


Xela wezria cube nen
salmo ca'



New Testament and Psalms in Zapotec, Tabaa (MX:zat:Zapotec,
Tabaa)

Xela wezria cube nen salmo ca' New Testament and Psalms in Zapotec, Tabaa (MX:zat:Zapotec, Tabaa)

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
80626b72-93df-58ae-9f5e-9d86733fab46

Contents

Salmos	1
San Mateo	136
San Marcos	196
San Lucas	234
San Juan	295
Los Hechos	340
Romanos	393
1 Corintios	417
2 Corintios	439
Gálatas	454
Efesios	463
Filipenses	471
Colosenses	476
1 Tesalonicenses	482
2 Tesalonicenses	487
1 Timoteo	490
2 Timoteo	497
Tito	502
Filemón	505
Hebreos	507
Santiago	524
1 San Pedro	530
2 San Pedro	537
1 Juan	541
2 Juan	547
2 Juan	548
Judas	549
Apocalipsis	551

SALMO CA'

1

1 Ba neza zrentę naca na chee bėnnea'
quebe dxezi'e da dxuluzėajni'i benne' wən da caleła ca' le',
ne quebe dxunę tuze benne' dul-la ca',
ne quebe dxunę tu zren benne' ca' dxelún le' chee Dios.

2 Zue' xel-la' dxebé lawe' da dxuzúe' dizra'
da nadxixruj bea Xránadxu,
ne ca naca da nadxixruj bea na,
te zra ne chizrela dxelaba lazre' na.

3 Benne' nigá naque' ca tu xaga zua na dxu'a xegu nisa,
da dxunna na da zixre chee na lu beu' cheéqueze na,
ne xrlegue na quebe dxase na.

Ca naca da dxun benne' nigá, dxępe ban na.

4 Quegá caní zaj naca benne' wən da caleła ca'.
Zaj naque' ca tu xizre laga' da dxua be' bđunu'.

5 Quebe xelexegá'ana chawe' benne' wən da caleła ca'
gate guchi'a Dios chee',
ne quebe xelú'u benne' dul-la ca' naga zaj nazraga
benne' xrlátaje ca'.

6 Dxezaca ba lazre' Dios ca da dxelún benne' xrlátaje ca'.
Da dxelún benne' wən da caleła ca'
che na le' naga xelebía xi'e.

2

1 ¿Bizr chee na' dxeledábaga benne' xęzr la xu ca' neda'?
¿Bizr chee na' dxululaba lázrequeze bėnneache
da guzúa na neda' chalá'ala?

2 Dxeledábagaqueze benne' wenná bea ca',
ne dxelún tuze dizra' benne' ca' dxelenná bea ca xelunę'
chee Xránadxu Dios, ne chee Bėnnea' gucá'a Le'.

3 Dxelennę': "Guselá cuínadxu lu xel-la' dxenná bea chee',
ne guzúadxu chalá'ala da zaj nadxixruj bé'ene' dxi'u."

4 Naga dxe' Xránadxu xabáa dxuzrizre'.
Quebe dxezi' lenę' chee da dxelegú'u lazre' xelunę'.

5 Lu xel-la' dxezrá'a chee' dxedil-le' le',
ne lu xel-la' snia chee' dxuchebe' le'.

6 Dxennę': "Lu xi'a lá'azxa chia', xi'a Sión
ba nuzúa' benne' gague' Wenná Bea waláz chia' neda'."

7 Dxenná Wenná Bea na': "Guzenda' le'e da
guzre Xránadxu neda'."

Guzre' neda': "Lue' nacu' Zri'ina'. Ná'aqueze naca' Xrau'.

8 Gunabe neda', na' gunna' Lue' xúgute' cue' xęzr la xu ca',
na' gaca chiu' dutę ca naca xęzr la xu.

9 Guzízxenu' bėnneache xęzr la xu ca' nen vara xia,
ne ca tu dxe'e xu guzuzru' le'."

10 Na'a, le'e, wenná bea, le xene da nigá dxuzėajni'ida' le'e.
Le guşęde da nigá dxusízreda' le'e,

benne' dxelenná bea lu xezr la xu.

11 Le gun zrin cheę Xránadxu Dios, dutę xel-la' dxezrebe cheęle.
Nen xel-la' dxezrize cheęle, le be lau Le'.

12 Le gapa ba lá'ana Zrí'ine' cheę quebe zře'e,
checa' cuía xile la neza cheęle, lawe' da la zra'ate Le'.
Da ba neza zrentę naca na cheę xúgute benne'
dxuluxrén lazre' Le'.

3

1 Xrana' Dios, ba naxánle'e benne' dxeledábague' neda'.

Benne' zantę dxeledíl-lalęne' neda'.

2 Benne' zantę dxelenné' chia': "Quebe guselá Dios le'."

3 Lue', Xrana' Dios, dxucú'uju' neda'.

Nacu' Benne' dxebélena', ne Benne' dxuzę chawe' neda'.

4 Gudxezre xa'a, bláwizra' Xrana' Dios,
na' Le' bechebe' chia' naga zue' lu xi'a lá'azxa cheę'.

5 Guta', ne gusia',
na' bebana' lawe' da nuxru Xrana' neda'.

6 Quebe zreba' gaxúa gaxúa bénneache,
benne' zaj naxéchaje' neda'.

7 Guzé, Xrana' Dios.

Bselá neda', Dios chia'.

Ben we' xraga benne' ca' dxeledíl-lalęne' neda',
ne guzuzruj lazxa benne' xriwe' ca'.

8 Xel-la' weselá za' lu na'u, Xrana' Dios.

Ben da chawe' cheę bénneache chiu'.

4

1 Bechebe chia' gate dxuláwizra' Lue', Dios.

Nacu' Benne' dxuchi'e ca da dxuna'.

Gate guzúa' lu da stebe, Lue' btipu' lazra'.

Bexache lazre' neda', ne bene ca da dxuchálajlena' Lue'.

2 Le'e, bénneache, ¿ájatęscha' gucá'ana dítjale neda'?

¿Ájatęscha' zri'ile da quebe zaca, ne chéajle da wen lazre'?

3 Le xexúnbea ba gucá'a Xránadxu
nu benne' dxape' Le' ba lá'ana.

Xrana' Dios xenne' gate dxuláwizra' Le'.

4 Le zrebe lau Dios, ne quebe gunle dul-la.

Le gulaba lazre' cheę naga dxásale, ne le sua zrize.

5 Le gute lau Le' béadu ca' lu da naca du lazre',
ne le guxrén lázre' Xránadxu Dios.

6 Benne' zantę dxelenné': "¿Nuzra gun gá'anatu' chawe'?"
Dutę xel-la' zri'i lazre' chiu' bxue netu', Xran.

7 Lue' bzu' xel-la' dxebe lu xichaj lázrdawa',
da naca na zrendxa ca da zaj napa benne' zaj nápalę'e zrua',
ne xrise uva wal-la.

8 Dutę xel-la' dxebeza zri lazre' gata', ne gasia',
lawe' da dxunu' Lue', Xran, zua' zri'a chawe'.

5

- 1 Bze naga dizra' chia', Xran.
 Bde lazre' ca dxebezre lazra'.
- 2 Bene ca guchálajlena' Lue', Wenná Bea chia', ne Dios chia', q lawe' da guláwizraja' Lue', Dios.
- 3 Xran, che zílala xennu' chi'a.
 Che zílala xídaqueza' lau Lue', ne wabeza lazra' Lue'.
- 4 Nacu' Dios quebe dzezaca ba lazru' da calela.
 Benne' wen da calela quebe súaqueze' naga zu' Lue'.
- 5 Quebe dxu'u lataj xelezrín benne' wen da calela lau'.
 Dxecuidenu' xúgute benne' dxelune' da zrinnaj.
- 6 Guzría xí'quezu' benne' ca' dxelezí xē'ē.
 Guzú' chalá'ala benne' wete benne', ne benne' guzrí xē'.
- 7 Neda' waca chu'a lizru' lawe' da nazrí'ile'enu' neda'.
 Güe lá'ana' Lue' lu xudau' lá'azxa chiu' dutē xel-la' dxezrebe.
- 8 Bsi neda' chee guna' da xrlátaje chiu', Xran,
 lawe' da zrále'ē benne' dxeledábague' neda'.
 Gulú'u neda' neza chawe' chiu'.
- 9 Benne' caní quebe dxelenné' da li.
 Lu xichaj lázrdawe' xu'u da calela.
 Xedxu lbe'ē zaj naca na ca tu ba chee benne' gate da naxalaj na.
 Zaj nupé'ē dizra' chawe' chee' da zaj naca na da wen lazre'.
- 10 Bde benne' ca' lu da ba xa', Xrana' Dios.
 Ben cheajlecházie' cáteze zaj naca xrtízaqueze'.
- Lawe' da naxánle'ē da calela da dxelune'
 ne lawe' da guledábague' Lue', bebéaje' chalá'ala.
- 11 Welebéle'ē benne' ca' dxuluxrén lazre' Lue'.
 Welebézre xá'aqueze' dutē xel-la' dxelebe'
 lawe' da dxucú'uju' le'.
- Lau Lue' welebéle'ē benne' ca' zaj nazrí'ine' Lue'.
- 12 Gúnquezu' da chawe' chee benne' xrlátaje, Xran.
 Gucu'uju' bēneea' lawe' da dzezaca ba lázrelenu' le'.

6

- 1 Lue', Xran, quebe til-lu' neda' lu xel-la' snia chiu',
 ne quebe gudéu' neda' ba xa' lu xel-la' dxezrá'a chiu'.
- 2 Bexache lazre' neda', Xran, lawe' da quebe chawe' zua'.
 Bexún neda', Xran, lawe' da dxedéa' xel-la' zi'.
- 3 Stébele'ē zua xichaj lázrdawa'.
 Xran, ¿bátala gácalenu' neda'?
- 4 Gudá, Xran, bselá bēne'du xu'a.
 Bselá neda' dutē xel-la' zrí'i lazre' chiu'.
- 5 Naga zaj zra' benne' gate ca', quebe nu dxeajsá lazre' Lue'.
 Lu lataj ba xa' ¿núzraqueze güe lá'ana Lue'?
- 6 Ba dxexedú lazra' lawe' da dxebezre lazra'.
 Tu zre' tu zre' dxebísane ga dxásia' nisa da dxebezra'.
 Dxusebisa' xrcugua' nisa da dxebezra'.
- 7 Ba dxane xiaj lawa' xel-la' dxebezre.
 Ba bebízraqueze nisa xuzru xiaj lawa' lawe' da zrále'ē
 benne' dxulusaca zi'ē neda'.
- 8 Le cuasa naga zua', xúgutele dxunle da zrinnaj

lawe' da ba ben Dios dxebézrele'a.

⁹ Xrana' Dios ba benne' da dxata' xueda' Le'.

Ba guzí' Xrana' Dios da dxuchálajlëna' Le'.

¹⁰ Dxelexedué'e, ne zaj zua lu da stébele'e xúgute
benne' dxeledábague' neda'.

Chaditë xelexebigue' naga zua', ne xelexedué'ene'.

7

¹ Xrana' Dios, dxuxrén lazra' Lue'.

Gúcale neda' ne bselá neda' lu na' benne' ca' dxulusaca zi'e
neda',

² cheë quebe xelexe'le' neda' ca dxun beẏre xixre',

na' xuluzúruje' neda' naga quebe nu chilá' nu guselá neda'.

³ Xrana' Dios, che bëna' neda' caní:

Che bi da zrinnaj bën ni'a na'a.

⁴ Che bi da calela bëna' cheë benne' zue' chawe' nen neda'.

(Bselá' bënnea' dxedábague' neda' lácala quebe bi nuna' cheë'.)

⁵ Che caní bëna',

bë lataj benne' dxedábague' neda' gau zi' ne xezrúnene' neda'.

Bë lataj bënnea' guchuchu guléaje' neda' lu xu,

ne xusunitië' xel-la' ba lá'ana chia'.

⁶ Xran, dutë xel-la' dxezrá'a chiu', guzé.

Bexechaj benne' ca' dxulusaca zi'e neda' lu xel-la' dxelezrá'a cheë'.

Gusel-la da gácale na neda' gate guchi'u da dxaca chia'

ca da gunná be'u.

⁷ Xúgute benne' zaj zre'e xezr la xu xelezrague' lau'.

Gunná be'e benne' ca' dutë xel-la' szren chiu'.

⁸ Lue', Xran, guchi'u cheë benne' xúgute xezre.

Bchi'a ca da nuna' lu da naca xrlátaje,

ne lu da naca du lazre' chia'.

⁹ Bën cheajsé naze da zrinnaj da dxelún benne' wën da calela ca',

san bzua chawe' benne' xrlátaje,

lawe' da nacu' xrlátaje, Dios, ne dxenná'u da xu'u

xichaj lázrdau bënneache.

¹⁰ Diósqueze dxucu'uje' neda'.

Dxuselé' benne' zaj naque' du lazre'.

¹¹ Xlátaje dxuchi'a Dios cheë da dxelún bënneache.

Tu dxezrá'azqueze Dios da dxelún benne' wën da zrinnaj ca'.

¹² Che quebe xelexíaje lazre' Dios gulé' xia cheë'.

Ba nuzúa cuásatë' xaga nalá xéche'ze cheë'.

¹³ Ba naxrúa cuásatë' xia cheë' ca' cheë wedil-la.

Ba nuzúa cuásatë' xaga nalá xéche'ze da dxelala.

¹⁴ Benne' wën da zrinnaj dxugú'u lazre' ca da calela gunë'.

Xu'u lázrdawe' da zrinnaj da gunë', na' dxebéájé' da wën lazre'.

¹⁵ Ba gudëne' tu xëdxu situj naga cheajlechaze bënneache,

na' lézqueze' xeajcházie' lu xëdxu na'.

¹⁶ Da zrinnaj da bënë' dxebugue na léqueze',

na' da bsaque' bënneache xezrizre na xíchajë'.

¹⁷ Güe lá'anaqueza' Xrana' Dios ca da xrlátaje da dxune',

ne gúl-laqueza' cheë La Xrana' Dios, Bënnea' naque' szrente.

8

1 Lue' Dios, Xránantu', zrentę naca Lau' du gabí'i xęzr la xu.

Zrendxa naca xel-la' szren chiu' ca xabáa.

2 Bidu ca', ne bidu dxe'ene ca' dxelúl-labe' ca naca na.

Zúaquezu' lataj chawe' naga quebe xelezrín benne' ca'
dxeledábaguę' lue'.

Dxuzúa zriu' benne' dxeledábaguę' lue',
ne benne' dxelecuídenę' Lue'.

3 Gate dxenná'a xabáa da nunu' Lue',
ne beu', ne belaj ca', da ca' nuzú' cha cheę na,

4 na' dxucheęba': "¿Ájazra naca bėnneache, dxulaba lazru' cheę le'?"

¿Ájazra naca bėnneache, dxe'u gunne xue le'?"

5 Bėnu' le' látezdxá szren ca' nacu' Lué'queze,
ne bzu' cheę' xel-la' szren, ne xel-la' ba lá'ana.

6 Bėnu' dxenná bė'eng' xúgute da ca' nunu'.

Xúgute na bdeu' lu ne'e,

7 zrila' ca', ne bęzre ca',

ne xúgute bę xixre' ca',

8 bę zaj zua xrila, ne bela ca',

ne xúgute da zaj zua na lu nísadau'.

9 Xránantu', Dios,

szrentę naca Lau' du gabí'i xęzr la xu.

9

1 Xran, dutę lázrdawa' güe lá'ana' Lue'.

Guzenda' bėnneache ca' zaj naca da zrentę da bėnu'.

2 Wabėquezda', ne gúl-laqueza' ca' naca chiu'.

Gul-la' cheę lau' Lue', nacu' Dios zrentę.

3 Buluzrunnuj benne' dxeledábaguę' neda'.

Xeajlechazię', ne belexenitię' lau Lue'

4 lawe' da nucá'ana chawu' da xrlátaje da dxuna'.

Dxe'u lataj blau chiu', ne lu da xrlátaje dxuchi'u.

5 Gudil-lu' benne' xęzr la xu ca',

ne bzria xi'u benne' węn da calęla ca'.

Bsulu' la benne' ca' chadíá chacanna.

6 Ba gulebía xi' benne' dxeledábaguę' neda'.

Chadíá chacanna zaj nazrinna' lataj cheę benne' ca',

ne xęzre cheę' ca', da ca' bchínnuju' Lue'.

Netú benne' cheajsá lazre' benne' ca'.

7 Xránadxu Dios súatequezę' chadíá chacanna.

Ba nucuezę' lataj blau cheę' naga guchi'e cheę bėnneache.

8 Lu da xrlátaje guchi'e cheę bėnneache dutę xęzr la xu,

ne cheę benne' xúgute xęzre ca' lu da naca li lazre'.

9 Xránadxu Dios gaquę' ca' tu lataj ga xelezrá chawe' benne' xache',
naga xelezrę'e chawe' gate zrin zra cheę da zi' da xa'.

10 Benne' ca' zaj núnbe'e Lue', Xran, xuluxrén lazre' Lue',

lawe' da quebe bsan lazru' benne' ca' belexilaję' Lue'.

11 Le gul-la cheę Xránadxu, Bėnnea' zuę' xęzre Sión.

Le guzén benne' xezre ca' ca zaj naca da ca' nune',
 12 lawe' da dxeajsá lazre' chee benne' ca',
 ne dxexebéaj lazre' chee benne' wete benne'.
 Quebe gul-la lazre' ca da dxululáwizra benne' ba xache' ca' Le'.
 13 Bexache lazre' neda', Xran.
 Gunná' da dxezaca' lu ni'a na' benne' ca' dxelecuídene' neda'.
 Dxecá'u neda' lu na' xel-la' gute,
 14 chee guzenda' bénneache da dxue lá'ana' Lue',
 naga dxu'untu' xezre Sión,
 ne chee beda' lawe' da bseláu' neda'.
 15 Xeajlechaze benne' xezr la xu ca' lu xedxu da gulene'.
 Xeajlechu'e lu xralaj da bulucueze'.
 16 Xránadxu Dios blé'ene' ca da zaj naque' ne chee
 da zi' da xa' da gudichaj be'e chee benne' ca' dxelune' da calela.
 Xeajchaze benne' wen da calela na' lu da nun ni'a ná'queze'.
 17 Benne' wen da calela ca' xeledéqueze' lu lataj ba xa'.
 Xúgute' benne' ca' dxelal-la lazre' Xránadxu Dios.
 18 Quegá chadía chacanna gal-la lazre' Dios benne' xache' ca',
 ne quegá tu chí'ize xenite da dxelebeza lazre' le'.

19 Guxasa, Xrana' Dios.
 Quebe gu'u lataj xelexegá'ana szrénqueze bénneache.
 Xelelá' lau' benne' xezr la xu ca' chee guchi'u chee'.
 20 Xran, beñ xelezrebe benne' ca' Lue'.
 Beñ xelexúnbea benne' xezr la xu ca' zaj naque' bénneacheze.

10

1 ¿Bizr chee na' zu' zitu', Xran?
 ¿Bizr chee na' dxucache cuinu' gate dxeledé xel-la' zi'
 bénneache chiu'?

2 Benne' wen da calela dxenáu zi' xuzre' benne' xache'
 lu xel-la' dxucá'ana szren cuine',
 na' xeajchaze benne' xache' na' lu da ba nucuéza bénnea'.
 3 Dxucá'ana szren cuine' ca naca da dxezá lazre'.
 Nupé'e dizra' da dxenné' chee benne' dxucude',
 na' dxucá'ana dítajé' Xránadxu Dios.
 4 Benne' wen da calela na' lu xel-la' dxucá'ana szren cuine'
 quebe dxape' Dios ba lá'ana,
 ne quebe dxéquene' che zua Dios.

5 Tu dxúnzqueze' da calela,
 ne quebe dxéquene' guchi'u Lue' ca da dxunge'.
 Dxuzúe' chala'ala xúgute' benne' dxeledábague' le'.
 6 Lu xichaj lázrdawe' dxenné': "Quebe bi seque' guzaga na neda'.
 Cabata' bi gaca chia' da calela."
 7 Tu dxennézqueze' dizra' schanni',
 ne da wen lazre', ne ca naca da calela da gune'.
 Dxeledxúaj dxu'e dizra' calela, ne dizra' xálaze.

8 Dxu'a xezre ca' dxucache cuine' chee quele' bénneache.
 Bagácheze dxutie' benne' dxeledeze' na'.

Bagácheze dxenné'ē chee bi gunē' chee benne' xache' ca'.

⁹ Bagácheze dxebeze' ca dxun beze xixre'.

Dxebeze' ga séquene' quel-le' benne' xache' ca'.

Dxel-le' benne' xache' lu xralaj chee', ne dxexu'e le'.

¹⁰ Dxiñe' xu bēnnea' gudēl-le'.

Dxusaca zie' benne' zan nen ne'e wal-la.

¹¹ Lu xichaj lázrdawe' dxenné': "Nal-la lazre' Dios benne' caní.

Nucache lawe', ne quebe lé'ene' da dxuna'."

¹² Guxasa, Xrana' Dios, ne bze na'u.

Quebe gal-la lazru'u benne' xache' ca'.

¹³ ¿Ájazra chen' benne' ca' dxelunē' da calela

dxuluzúē' Dios chalá'ala?

Lu xichaj lázrdawe' dxelenné': "Quebe xebéaj lazre' Dios."

¹⁴ Dios, Lue' blé'equeznu' da nigá,

lawe' da dxenná'u benne' wen da calela,

ne da ca' dxunē' quebe naca na xrlátaje,

na' xebéaj lázrequezu' bēnnea'.

Dxuluzúa cuina benne' xache' ca' lu na'u.

Lue' dxácalequezu' bi wezébedu ca'.

¹⁵ Dxugú' xel-la' wal-la chee benne' wen da calela.

Guleaj lálwela da calela da nune', da na' bene' lu da bagache'.

¹⁶ Chadía chacanna naca Xránadxu Wenná Bea cheedxu.

Lu xezr la xu chee' ba gulebía xi' benne' dxelecuídenē' Le'.

¹⁷ Bnézruju' ca da bululáwizra benne' dxexruj lázre'du ca' Lue', Xran.

Lue' dxupa'u lázxdau bēnne'du ca' chee xuluzé nague' xrtizru',

¹⁸ chee guchi'u chee bi wezébedu ca',

ne chee benne' dxeledéē' xel-la' zi',

chee québedxa bi da calela xelún benne' ca'

dxelunē' da calela chee bēnne'du caní.

11

¹ Dxuxrén lazra' Xrana' Dios.

Ájazra chen' dxi'u bēnne'du xu'a:

"Bzrunnuj, guxiáj lu xí'ala ca tu bxinne?"

² Le na' xque, dxulucuéza benne' ca' dxelunē' da calela

xaga nalá xéche'ze.

Ba zaj naxrúē' xaga nalá xéche'ze chee' lu du chee na,

chee xelútiē' bagácheze benne' xrlátaje ca'.

³ Chete ca' xelaxinnaj da dxulusé chuchu da xrlátaje,

¿ájazra xelún benne' xrlátaje ca'?

⁴ Xránadxu Dios zúaqueze' lataj lá'azxa chee'.

Xabáaqueze zua lataj blau naga dxe' Dios.

Dxelenná' xanne xiaj lawe'.

Dxelé'ene' ca da dxelún bēnneache.

⁵ Xránadxu Dios dxudéē' chawe' benne' xrlátaje ca' lu da stebe.

Dxelecuídenē' benne' ca' dxelunē' da calela,

ne benne' dxelunę' da zrinnaj.

⁶ Gudé' benne' ca' dxelunę' da caleła lu da zi' da xa',
da zaj naca na xi', ne da dxuzézrele' e da dxala na ca xedxe,
ne tu be' lálę'e, da ca' sel-le' lawe' benne' ca'.

⁷ Cani gunę' lawe' da naca xrlátaje Xránadxu Dios,
ne nazrí'ing' da naca na xrlátaje.

Benne' li lazre' ca' xelexé'eng' lawe'.

12

¹ Xrana' Dios, bselá bėnneache chiu' lawe' da québedxa
dxape' benne' xezica Lue' ba lá'ana.

Quebe nu chilá' benne' li lazre' ládujla bėnneache ca'.

² Xúgute bėnneache ca' dxelezí xę'e le sa' ljwezre'.

Lu da wen lazre' ba zaj nupę'e dizra' cheę xelezí xę'e le'.

³ Xránadxu Dios guzría xi'e xúgute benne'

quebe dxuluchálaje' du lazre',

ne benne' ca' dxuluchálaje' da dxucá'ana szren cuine'.

⁴ Benne' ca' gulenné': "Nę cheę dizra' cheentu'

zrué'entu' da chawe'.

Ca dxezá lázrentu' guchálajntu', ¿nuzra nna be'e netu', xca?"

⁵ Dxenná Xránadxu Dios: "Na'a xídaqueza' lawe' da

dxulusaca zi'e benne' xache' ca',

na' dxelebezre lazre' benne' baxache' ca'.

Guselá' benne' ca' dxelánenę' da guna'."

⁶ Xrtizra' Xránadxu Dios zaj naca na du lazre'.

Zaj naca na ca xiaj plata da ba gudé na lu xi',

da ba gudé na lu xi' gazre lasa.

⁷ Xran, guxúquezu' Lue' bėnneache chiu' ca'.

Chadía chacanna gucu'uju' le' lu na' benne' zaj zre'e

lu zra na'a zra.

⁸ Gáteteze na' dxaca da caleła

gate dxulucá'ana szren bėnneache da naca sban.

13

¹ ¿Ájatequeze gal-la lazru' neda', Xran?

¿Gal-la lázrtequezu' neda'?

¿Ájatequeze quebe le'enu' da dxaca chia'?

² ¿Ájatequeze gun na ba xen guchaga lawa' da dxezaca'?

¿Ájatequeze gaca wi'ine lazra' te zra, ne chizrela?

¿Ájatequeze nna be'e benne' dxedábague' Lue' neda'?

³ Gunná' da dxaca chia', Xran, ne bechebe chia'.

Btipa lazra' cheę quebe gatia',

⁴ ne cheę quebe nna benne' dxedábague' neda':

"Ba bętia' ni'a ne'e."

Benne' ca' dxeledábague' neda' xelebene'

che cheajcházia' lu da caleła.

⁵ Neda' dxuxrén lazra' Lue' xexache lazru' neda'.

Dutę lázrdawa' dxebeda' lawe' da dxuseláu' neda'.

6 Gúl-laqueza' cheę Xrana' Dios
lawe' da ba nune' chia' da xrlátaje.

14

1 Benne' lázxdau zide' dxezá' lazre', dxenné': "Quebe zua Dios."
Benne' caní zaj nazrinnaj xichaj lázrdawe'.

Dxelune' da sban ca'.
Quebe nu chilá' benne' dxune' da xrlátaje.

2 Xránadxu Dios zuę' xabáa dxenné'ę bėnneache
cheę lé'ene' che zua nu benne' dxėjni'ine',
bėnnea' dxape' ba lá'ana Dios.

3 Xúgute' zaj xu'ę neza xuca'.

Xúgute' zaj nazrinnaj xichaj lázrdawe'.

Quebe nu chilá' benne' dxune' da xrlátaje, netúęe'.

4 ¿Quebe dxelėjni'i benne' ca' dxelune' da sban?
Dxulusunítie' bėnneache chia' ca dxuzuzruj tu benne'
xeta da dxawe',

ne quebe dxeléquebe'ene' zua Xrane' Dios.

5 Dute' xel-la' dxelezrebe dxelezrize benne' ca'
lawe' da dxácale' Dios benne' xrlátaje ca'.

6 Belún le' cheę da gulenná benne' xache' ca',
sua benne' caní xelebeza lazre' Xránadxu Dios.

7 Xídatega Bėnnea' guselé' benne' Israel ca'.

Gate gun Xránadxu xelexezrín benne' cheę' ca',
benne' ca' zaj nada'u zítu'la,
na' welebé zri'ine zre sua Jacob,
ne welebéle'ęquezę' benne' Israel ca'.

15

1 Xran, ¿núzraqueze benne' sue' naga zu' Lue'?
¿Núzraqueze benne' sue' naga naca lá'azxa chiu'?

2 Waca bėnnea' naque' du lazre', ne dxune' da xrlátaje,
bėnnea' zua da líqueze lu xichaj lázrdawe',

3 bėnnea' quebe dxenné' cheę le sa' ljwezre',
ne quebe bi da calela dxune' cheę le sa' ljwezre',
ne quebe dxu'ę lataj nu benne' si' tizre' le sa' ljwezre'.

4 Waca bėnnea' quebe dxape' ba lá'ana
nu benne' dxune' da sban.

Dxape' ba lá'ana benne' ca' dxelape' ba lá'ana Xránadxu Dios,
bėnnea' quebe dxuché'ę dizra' da ba gunné' lácala bi da' gunítie'.

5 Waca bėnnea' dxusanę' dumí cheę' ne quebe dxenabe' xíchaję,
ne quebe dxezí' lu ne'ę dumí cheę nnię' cheę
nu benne' quebe bi zria nabague'.

Nu benne' dxune' caní cabata' cheajchazie' lu da calela.

16

1 Bxue neda', Dios, lawe' da dxuxrén lazra' Lue'.

2 Lu xichaj lázrdawa' gucha' Xrana' Dios:

"Lue' nacu' Xrana'.

Quebe bi xetú da xrlátaje de' chia' da quebe naca na chiu'."

³ Tuze benne' ca' zaj naqueḡ' cheḡ Dios lu xęzr la xu,
ne benne' ca' zaj naqueḡ' du lazre' dxezaca ba lázrelena'.

⁴ Waxánqueze da dxelezaca benne' ca' dxelapeḡ' ba lá'ana
tu dios quebe bi zaca.

Quebe guna' leḡ' tu zren gate dxuluzríḡ' zren lau dios na',
ne quebe guchíneda' la dios na'.

⁵ Xránadxu Dios dxugaweḡ' neda', ne naqueḡ' da ba neza chia'.

Lue', Dios, nuxru' ca da naca chia'.

⁶ Ca da nuzú' chia' zaj naca na da dxezi'a ba neza,
ne xrtantę zaj naca da nunnu' chia'.

⁷ Tu gucá'ana szrénzqueza' Xránadxu Dios,
Bénnea' dxusédeneḡ' neda'.

Chizrela gate ne dxasia' dxuzéajni'ineḡ' neda' lu xichaj lázrdawa'.

⁸ Xránadxu Dios nuxrén lazra' gusi'ę neda'.

Lawe' da zuḡ' cuita', quebe bi seque' guchebe na neda'.

⁹ Cheḡ leḡ' na' gubé lázrdawa', ne gubéleḡ'ęquezda',
na' zra gacha' lu xędxu ba cueza lazra'

¹⁰ lawe' da quebe gucá'anu' bėnne'du xu'a lu lataj ba xa',
ne quebe gu'u lataj guzru nu benne' nácaquezeḡ' chiu'.

¹¹ Gulé'enu' neda' da guna' cheḡ gata' chia' xel-la' nabán.

Naga zu' Lue' wabéleḡ'ęquezda',
na' cuitu' Lue' súatequeze da ba neza chia'.

17

¹ Bze naga chi'a, Xran.

Ben xanne' da dxuláwizra' Lue'.

Guzi' da dxenaba' Lue', naca' du lazra'.

² Benna lataj xelá'a lau' cheḡ guchi'u chia',
lawe' da dxelé'enu' xúgutę cáteze zaj naca na.

³ Lue' dxenná' xánniu' xichaj lázrdawa'
ne dxelé'enu' neda' chizrela.

Gunná' xánniu' da dxuna', na' quebe bi da caleḡa blé'enu'.

Ba nuna' quebe bi dizra' caleḡa nnia'.

⁴ Dxuzú'a' dizra' ca naca da dxennáu',
na' quebe dxuna' ca da dxelún benne' węn da zrinnaj ca'.

⁵ Bxue neda' lu neza chawe' chiu',
cheḡ quebe cheajházia' lu da caleḡa.

⁶ Dxuláwizra' Lue', Dios, lawe' da dxennu' chi'a.
Bze naga chi'a, na' bene da dxennía'.

⁷ Ble'e ca dxexache lázreleḡ'u bėnneache.
Bselá benne' ca' dxuluxrén lazreḡ' Lue' lu na' benne'
dxeledábaguḡ' leḡ'.

⁸ Bxue neda' ca dxun benne' dxuxúḡ' xiaj laweḡ'.
Gudezre neda' ca dxun bedxuj dxézreba' zri'ineba' zran xrílaba'

⁹ cheḡ quebe bi xelún chia' benne' ca' dxelunę da caleḡa,
benne' dxeledábaguḡ' neda', ne dxelaca lazreḡ' xelútię' neda'.

¹⁰ Quebe dxelexache lazreḡ' le sa' ljwezreḡ',

na' dute_̄ xel-la' dxulucá' ana szren cuine_̄ dxuluchálaje'.

¹¹ Gáteteze dxedá' dxeléchaje' neda'.

Dxelaca lazre' xeline' neda' xu.

¹² Zaj naque_̄' ca tu bezre xixre'dau' dxaca lázreba' bi gáguba'.

Zaj naque_̄' ca tu bezre xixre',

ba nucache cuínaba' chee_̄ quél-laba' béadu ca'.

¹³ Gudá, Xran, gudábaga' benne' ca' dxelune_̄' da calela,

na' bchiche' lu xu.

Bselá neda' lu na' benne' ca' dxelune_̄' da calela,

guchínenu' xia chiu'.

¹⁴ Bselá neda' lu na' benne' ca' nen ni'a ná'quezu', Xran.

Bselá neda' lu na' bénneache, benne' ca' zaj dxe'e_̄ gunne xue

chee_̄ xezr la xu nigaze,

benne' ca' dxeláguqueze_̄' da zácale'e_̄ chiu'.

Da nigáqueze dxulugawe' zri'ine' ca',

ne dxexegá' anaqueze da dxelágu zri'ine zre sue'.

¹⁵ Le'eda' neda' lau Lue' lawe' da naca' xrlátaje.

Xezaca ba lazra' gaca' ca nácaquezu' Lue' gate xebana'.

18

¹ Nazrí'ida' Lue', Xran.

Lue' dxuzé_̄ chuchu' neda'.

² Lue', Xran, nacu' ca tu xiaj naga ze chúchua',

ne ca tu xu'u zren naga xu'u chawa', na' nacu' weselá chia'.

Dios chia', Lue' dxuzé_̄ chuchu' neda', na' guxrén lazra' Lue'.

Dxucu'uju' neda', ne dxuseláu' neda', ne dxucache chawu' neda'.

³ Wannéqueza' Xránadxu Dios,

Bénnea' naca chee' güe lá'anadxu Le'.

Le' guselé' neda' lu na' benne' ca' dxeledábague' neda'.

⁴ Guzúa' lu da štebe chee_̄ xel-la' gute,

na' guca da calela ca tu xegu nisa da bchebe na neda'.

⁵ Guzúa' lu da štebe chu'a lataj ba xa'

lawe' da zua' lu da štebe chee_̄ xel-la' gute.

⁶ Lu da zi' da xa' bláwizra' Xrana' Dios, ne gunnéqueza' Dios chia'.

Le' benne' chi'a naga zue' lataj lá'azxa chee',

ne bze_̄ nague_̄' da bchálaja' lawe'.

⁷ Nadxa guzrú' lu xezr la xu nigá.

Gulezrize lane xi'a ca'.

Gulezrízele'e_̄ na lawe' da bzra'a Le'.

⁸ Bdxuaj zren chee_̄ xi' lu zrine',

ne bdxuaj xi' lu dxu'e_̄ da bzezze na da de lawe',

na' xi' na' gudel-la na bau ca'.

⁹ Bzéxruje' da zria zran xabáa, na' bétaje',

na' guzúa da chul-la zran ni'e.

¹⁰ Gudé' lu be' zrie' tu da nazí le na querubín.

Chadí gudé' lu be' bdunu'.

¹¹ Gúcu'e_̄ da chul-la, da bcache na Le',

da na' naca na beuj bza da xuzru na nisa.

¹² Lu da dxácatite legala chee' da xu'u lu beuj bza,

na' beledxúaj bau dxelala, ne xiaj bezxe'.

13 Zran xabáa gunné guziu' chee chi'i Xránadxu, na' ben chi'i Dios szrenté ládujla bau dxelala ca', ne xiaj bezxe' na'.

14 Bsané' xaga nalá xéche'ze chee' ca', na' bese dínnaje' benne' ca' dxeledábague' neda'. Bsané' xesa guziu' ca', ne bzria xi'e benne' ca'.

15 Nadxa belelá' da zaj de lu situj chee nísadau', ne ble'e lau lane xezr la xu da zua na zran nísadau', gate na' gudil-lu' benne' ca' dxeledábague' neda', Xran, ne lu xel-la' dxezrá'a chiu' bzagu' benne' ca'.

16 Bétaje' lu da sibe, ne beque'e neda'.

Bebéaje' neda' lu da naca ca tu nisa zila.

17 Bselé' neda' lu na' benne' wal-la dxeledábague' neda', ne lu na' benne' ca' dxelecuídené' neda', benne' zaj nácadxe' wál-la ca neda'.

18 Buluzague' neda' gate na' zua' lu da stébele'e, san Xrana' Dios gúcalene' neda'.

19 Bebéaje' neda' naga xu'a, ne bzue' neda' tu lataj zren.

Bselé' neda' lawe' da bezaca ba lazre' chia'.

20 Xránadxu Dios bexunne' chia' cáteze naca da xrlátaje da nuna'.

Cáteze naca da xrlátaje da nuna' bexunne' chia'

21 lawe' da dxuna' ca da dxusede Xrana' neda', ne quebe guleaj xíchaja' Dios chia'.

22 Dxuna' ca naca da dxenná bé'ene' neda', ne quebe bsana' da ca' nadxíxruj be'e.

23 Guca' li lazre' lau Le', ne bxue cuina' chee quebe guna' da caléla.

24 Chee le na' bexunna Xránadxu Dios chia' cáteze naca da xrlátaje da bēna', cáteze naca da xrlátaje da nuna' lau Le'.

25 Ddexache lazru' chee benne' dxexache lazre' le sa' ljwezre', ne nacu' li lazre' nen benne' naque' li lazre'.

26 Dxunu' da naca chawe' chee benne' naque' chawe', na' gacu' snia nen benne' wen da caléla.

27 Guseláu' benne' zaj zue' lu da zi' da xa', san guzérxuju' benne' dxulucá'ana szren cuine'.

28 Lué'queze guzalju' xi' chia'.

Xrana' Dios, guzani'u chia' naga zua' lu da chul-la.

29 Nen xel-la' waca chiu' guzría xi'a benne' zante dxeledíl-lalene' neda'.

Che Lue', Dios, síalēnu' neda' waca guchínnaja' ze'e da zaj naxechaj xezre ca'.

30 Li lazre' zaj naca da dxun Dios, na' du lazre' naca xrtizre'. Dxucu'uje' xúgutē benne' ca' dxelebeza lazre' Le'.

31 Tuze Xránadxu naque' Dios.

Tuze Dios cheedxu naque' Benne' dxucu'uje' dxi'u.

32 Dios naque' Bēnea' dxuné' neda' benne' wal-la, ne Benne' dxuné' li lazre' da dxuna' neda'.

33 Dxuné' ni'a ca zaj naca ni'a bzrina' xixre'

ne dxuzúa chúchue' neda' lu xi'a Sión chee'.

³⁴ Dxusédene' neda' chee gaca cha'a lu wedil-la,
ne chee gaca guchínda' xaga nalá xéche'ze
da naca na xia gache'.

³⁵ Lu xel-la' weselá chiu' bcu'uju' neda',
ne nen na'u xabela gúcalenu' neda'.

Xel-la' zri'i lazre' chiu' ba nucá'ana szren na neda'.

³⁶ Ben chawu' neza naga tea',
chee quebe cuila' lu neza na'.

³⁷ Blaga' benne' dxeledábage' neda', na' xeajzrena' le',
na' quebe bebi'a cadxa bétetea' benne' ca'.

³⁸ Bena' benne' ca' we', na' quebe guca xelexase'.
Xeajlecházie' zran ni'a.

³⁹ Btipu' lazra' chee cha'a lu wedil-la.

Bzéxruju' benne' dxeledábage' neda' zran ni'a.

⁴⁰ Benu' buluzrunnuj benne' dxeledábage' neda' lawa',
chee bzria xi'a benne' ca' dxelecuídené' neda'.

⁴¹ Gulenné' nu benne' gácalene' le' san quebe nu chilá'.
Gulenné' Xránadxu Dios, san quebe benne' chee'.

⁴² Bzúzruja' benne' ca' ca bxrte xu da dxua be'.

Bléaja' le' ca dxuléaja' guna' la neza ca'.

⁴³ Bseláu' neda' lu na' benne' ca' dxeledábage',
na' benu' neda' benne' xíchaje xezr la xu ca',
na' benne' ca' quebe núnbe'a dxelune' zrin chia'.

⁴⁴ Gate belenne' chia', na' buluzúe' xrtizra'.
Benne' zaj zra' xezr la xu ca' belune' ca' gunná be'eda'.

⁴⁵ Benne' zitu' ca' gulate ni'a ne'e,
na' beledxúaje' dxelezrízie' lu xezre zrentau' chee' ca'.

⁴⁶ Gaca ba lá'azxa Xránadxu Dios.
Gaca ba Bénnea' dxucu'uje' neda'.

Xegá'ana szrénqueze Dios, Bénnea' dxuselé' neda'.

⁴⁷ Naca Dios Bénnea' dxebéaj lazre' benne' dxeledábage' neda',
ne dxuzúe' benne' ca' zran ni'a.

⁴⁸ Naque' Bénnea' dxuselé' neda' lu na' benne' ca'
dxeledábage' neda'.

Dxune' dxenná be'eda' benne' ca' guledábage' neda'.

Bselé' neda' lu na' benne' xichaj zra'a ca'.

⁴⁹ Chee le' na' xechéba' chiu', Xran, lau benne' xezr la xu ca',
na' gúl-laqueza' chee Lau' Lue'.

⁵⁰ Dxun Dios dxenná bea bénnea' waláz chee',
ne dxexache lazre' bénnea' guqu'é, bénnea' naque' David,
ne zri'ine zre sue' chadía chacanna.

19

¹ Dxulé'e lau zran xabáa ca naca xel-la' szren chee Dios.
Dxuchálajqueze na ca zaj naca da nung'.

² Tu zra tu zra dxuzén na zra xula da nigá,
na' tu zre' tu zre' dxé na zre' xula da ná'queze.

³ Quebe dxuluchine na xrtizra' bénneache,
ne quebe nu dxen chí' na,

⁴ san dxezriluj da dxeleenná na du gabí'i xęzr la xu,
ne dxeleznín xrtizra' na dapa saca cheę xęzr la xu.
Dios benę' xabáa ca tu xu'u naga zua gubizra.

⁵ Che zílala dxalaj na ca tu benne' wechaga na'.
Dxebé na ca tu benne' dxezá chégü'e lu witja.

⁶ Dxedxuaj na chala'a naga dxalaj na,
na' dxezrin na chala'a naga dxebia na.
Dxuchá'a na xúgute da zaj de.

⁷ Du lazre' naca da nadxixruj bea Xránadxu,
ne dxuzé chacha na béne' du xú'udxu.
Li lazre' naca da dxexechebe Xránadxu,
ne dxunezruj na xel-la' sina cheę benne' ca'
quebe zaj nape' na.

⁸ Da líqueze zaj naca da nadxixruj bea Xránadxu,
na' dxelebéle'e benne' ca' dxelune' ca zaj naca na.
Du lazre' zaj naca da dxuzéajni'i Xránadxu dxi'u,
da dxuluzúa na dxi'u lu xel-la' naxaní'.

⁹ Cháwedau' naca zrédexu Xránadxu,
da gun na súadxu chadia chacanna.
Da líqueze zaj naca da dxuchi'a Xránadxu cheędxu,
ne zaj naca na chawe'.

¹⁰ Zaj naca na da dxezá lázredxadxu ca oro,
ne ca oro zrente da zácale'e na.
Zaj naca na zírredxa ca bzrina'dau', da nácale'e na zixre.

¹¹ Dxulusizre na neda', wen zrin chiu'.
Lawe' da dxuna' ca zaj naca na, da zrente dxezi'a.

¹² Netú benne' quebe gaca lé'ene' da calela da dxune'.
Bselá neda', Xran, lu da calela da quebe dxéquebe'eda' dxuna'.

¹³ Bucache chawe' neda', wen zrin chiu',
cheę quebe bi dul-la guna' du lazra'.
Quebe gu'u lataj nna be'e dul-la neda'.
Nadxa gaca' du lazra', ne quebe бага' zria cheę dul-la na'.

¹⁴ Gaca da dxuchálaja', ne da dxulaba lazra'
da dxezaca ba lazru' Lue', Xran
Nacu' Benne' dxuxúe' neda', ne Benne' dxexá'ue' neda'.

20

¹ Dxenaba' Xránadxu xenne' chi'u lu zra zu' lu da stębe,
ne gucu'uj La Dios cheę Jacob lue'.

² Dxenaba' Le' naga zue' lataj lá'azxa cheę' sel-le'
da gácale na lue',
ne cheę xi'a Sión xide' guxre' lue'.

³ Dxenaba' Le' cheajsá lazre' ca naca xúgute guna' bzu' cheę',
ne si' lu ne'e béadu ca' dxuzezru' lawe'.

⁴ Dxenaba' Le' gunne' lue' ca naca da dxezá lazru',
ne gune' xúgute da dxéquenu' xrlátaje.

⁵ Béle'entu' gate guselé' lue',
na' chísantu' tu da gulé'e lawe na La Dios cheędxu.
Dxenaba' Xránadxu gunne' lue' xúgute da dxenabu' lau Le'.

6 Na'a nezda' dxuselá Xránadxu bénnea' ba gucá'aqueze'.
 Naga zué' xabáa lá'azxa chee' xenne' chí'i bénnea'.
 Xel-la' waca zrente' chee' guselé' bénnea'.
 7 Bal-la benne' dxuluxrén lazre' carro ca' chee' wedil-la,
 na' xezícadxé' dxuluxrén lázre' bzrina' ca'.
 Dxi'u dxuxrén lázredxu La Xránadxu Dios.
 8 Benne' ca' gulate ni'a ne'e, ne xeajlechazie'.
 Dxi'u bexásadxu, na' zedxu.
 9 Bselá netu', Xran, nacu' Wenná Bea cheentu'.
 Ben chí'intu' gate dxuláwizrantu' Lue'.

21

1 Benne' dxenná bea dxebéle'ene' nen xel-la' waca chiu', Xran,
 na' ca naca xel-la' weselá chiu' dxebéle'ene'.
 2 Bnézruju' le' da guzá lazre',
 ne quebe bzagu' da gunabé' Lue'.
 3 Guzí' lu na'u le', ne benú' dxaca chawe' chee'.
 Nuzriu' xíchaje' tu da naca na oro.
 4 Gunabé' Lue' gunnu' le' xel-la' nabán,
 na' bnézruju' na le' chee' súaqueze' zane' iza.
 5 Zrente' naca xabáa chee' lawe' da bseláu' le'.
 Bennu' le' xel-la' ba lá'ana, ne xel-la' szren.
 6 Lawe' da nunu' gaca chawe' chee' chadía chacanna
 dxunu' dxebéle'ene' lau Lue'.
 7 Lawe' da dxuxrén lazre' wenná bea na' Xránadxu,
 xexache lazre' Dios szrente' le',
 na' quebe sue' lu da stebe.
 8 Xulétaju' xúgute' benne' dxeledábague' lue'.
 Xel-la' waca chiu' xulétaju' benne' ca' dxelecuídené' lue'.
 9 Lu zra na' zra'u le' gaca chee' benne' ca'
 ca guzú' le' lu xí' ga dxulúzrie' bla'dau'.
 Xránadxu guzúzruje' benne' ca' lu xel-la' dxezrá'a chee',
 na' xi' na' guzezxe na le'.

10 Xúgute' da belune' lu xezr la xu níga guzria xi'u,
 ne xegú' zri'ine zre sue' ládujla bénneache,
 11 lawe' da gulaca lazre' xelune' da caléla chiu' Lue'.
 Gulilaj lazre' ca da xelune', san quebe bi xelezéquene',
 12 lawe' da gulagu' benne' ca'.
 Nucuezu' xaga nalá xéche'ze chiu' chee' le'.
 13 Begá'ana szrénqueze Lue', Xran, lu xel-la' wal-la chiu'.
 Tu gúl-lazquezdxu, ne tu güe lá'anazquezdxu Lue'
 ca naca xel-la' waca chiu'.

22

1 Dios chia', Dios chia', ¿bizr chee' na' nusán lazru' neda'?
 ¿Bizr chee' na' quebe dxennu' da dxenaba' Lue'
 chee' guseláu' neda'?
 2 Dios chia', dxuláwizra' Lue' te zra, ne quebe dxexechebu' chia'.
 Dxuláwizra' Lue' chizrela, ne quebe dxezí'i lazra'.

³ Lá'azxa nacu' Lue'.

Nacu' Benne' dxebeze' naga dxelúe lá'ana benne' Israel Lue'.

⁴ Xra xrtáuntu' gulebeza lazre' Lue'.

Gulebeza lazre', na' bseláu' le'.

⁵ Bululáwizre' Lue', na' belelé'.

Buluxrén lazre' Lue', na' quebe belexedué'eng'.

⁶ Neda' naca' ca tu bela' gúna'dau', ne quegá bènneache.

Dxelecuide bènneache neda', ne dxuluzúe' neda' chalá'ala.

⁷ Xúgute' benne' dxelelé'e neda' dxelún le' chia'.

Lu da dxelún le' chia' dxelexrá dxu'e,

ne dxulutá xichaje', dxelenné':

⁸ “Bzua cuine' lu na' Xránadxu chee guselé' le'.

Guselé' le' che dxezaca ba lázrele' le'.”

⁹ Lue' nacu' Bénnea' bexru' neda' gate gúlaja'.

Benú' bxren lazra' Lue' gate na' ne dxázretea'.

¹⁰ Guxu'a lu na'u gate quebe ne gálajtea'.

Gate ne xu'a lu le'e xrna'a, báchequeze nacu' Dios chia'.

¹¹ Quebe xebigu' naga zua' lawe' da zua gágute

da gusaca zi na neda',

ne quebe nu chilá' benne' gácalene' neda'.

¹² Zaj naxechaj benne' dxeledábague' neda' ca bezre ca'.

Zaj naxechaj benne' neda' zaj naque' ca bezre wal-la ca'

chee Basán.

¹³ Gulaca lazre' xuluzría xi'e neda'

ca tu bezre xixre' dxedunba', ne dxebezre xa'aba'.

¹⁴ Bebizre lazra' ca nisa da nalalaj na lu xu,

na' ca naca zrita xu'a bulusán ljwezre na.

Lázdawa' guca na ca xina' da bxuna na lu le'a ca nisa.

¹⁵ Bexaca xel-la' wal-la chia' ca tu xé'ena xu la'a,

na' luzra' bedá' na chichja'.

Nuzú' neda' lu xu xrte chee xel-la' gute.

¹⁶ Zaj naxéchaje' neda' ca becu' ca'.

Zaj naxechaj benne' wen da zrinnaj ca' neda'.

Gulídue' ni'a na'a.

¹⁷ Waca gulaba' ca naca zrita xu'a,

na' benne' ca' dxelenné'e neda', ne dxelenná' xánnie' neda'.

¹⁸ Belexelé'e zra lana' late' weaj,

na' lawe' zra lana' gulebeje' da gaca bea na.

¹⁹ Quebe xebigu' naga zua', Xran.

Nacu' xel-la' wal-la chia'.

Gudázega gácalenu' neda', Xran.

²⁰ Bselá bènne'du xu'a lu na' benne' gu'e neda' xia.

Bènnea' guzría xi'e neda' gune' ca dxun becu'.

²¹ Bselá neda' lu dxu'a bezre xixre'.

Bselá neda' lu luzu bezre wal-la ca'.

²² Guzenda' bi bícha'dau' ca' lau' Lue'.

Güe lá'anaqueza' Lue' ladaj benne' zaj nazrague' lau'.

²³ Le'e, dxezrébele Xránadxu, le güe lá'ana Le'.

Le gucá'ana szrene', le'e, zri'ine zre sua Jacob.

Le zrebe Le', le'e, zri'ine zre sua Israel.

²⁴ Quebe bzua Dios chalá'ala, ne quebe gucúidene'

da zi' da xa' da guledé benne' xache' ca',
ne quebe bcache lawe' lau benne' ca'
san gate bululáwizre' Le', benne' chi'e.

²⁵ Güe lá'anaqueza' Lue' laduj benne' zan zaj nazrague' lau'.
Ca da guchebe lazra' gúnqueza' lau benne' ca' dxelezrebe' Lue'.

²⁶ Xelagu benne' dxexruj lazre', ne welélaquezne'.
Benne' ca' dxelebigue' lau Xránadxu xelúe lá'anaqueze' Le'.
Tu gácazqueze da ba neza chee benne' ca'.

²⁷ Cheajlesá lazre' benne' duté xezr la xu Xránadxu,
na' xelexebi'e lau Le'.
Xúgutę cue' benne' chee xúgutę cue' xezr la xu
xelúe lá'anaqueze' Le',

²⁸ lawe' da xu'u lu na' Xránadxu xel-la' dxenná bea,
na' nna bé'ene' xúgutę benne' xezr la xu ca'.

²⁹ Xeláguqueze xúgutę benne' zren ca' chee xezr la xu nigá,
ne xelúe lá'anaqueze' Dios.

Xuluzú zribe lau Le' xúgutę benne' ca' xelate,
benne' ca' quebe xelezéquene' xelegú'u chawe'
bénne'du zaj xu'e chee quebe xelatie'.

³⁰ Zri'ine zre sua benne' ca' xelunbe' zrin chee Xránadxu.
Xuluzenne' zri'ine' ca' ca naca chee Xránadxu
cadxa cheajsetę chee bénneache.

³¹ Xelezrine', ne xuluzenne' bénneache ca naca
da xrlátaje da dxun Dios.

Xuluzenne' benne' quebe ne xelálaje' ben Dios da caní.

23

¹ Xránadxu Dios dxuxúe' neda' ca tu benne' dxuxúe' zrila' chee'.
Quebe bi dxexázzrjeda'.

² Ca dxelezzrúa zríla'du ca' ba guláguba' xixre' xá'adau',
caní dxune' chia' chee xezí' lazra'.
Gune' chia' ca dxaca chee zríla' ca'
dxeché'e-ba' dxu'a xegu nisa da de zrize.

³ Dxuxuzúa chúchue' neda' lu xichaj lázrdawa'.
Dxusi'e neda' lu da xrlátaje chee gaca li da guchebe lazre'.

⁴ Láqueze tea' naga sua' lu da stebe chee xel-la' gute,
quebe bi da calęla guchebe na neda',
lawe' da zúalęnu' Lue' neda', Xran,
na' dxelácale zrise', ne blazru chiu' neda'.

⁵ Dxucuezu' da xi'aj gawa' lálala benne'
dxeledábage' neda' zaj naxechaj neda'.

Dxugú'u da za xichja' da dxapa na neda' ba lá'ana,
ne dxusezráteu' zriga' chia'.

⁶ Da xrlátaje, ne xel-la' dxexache lazre' chiu'
da lítegage xelezúale na neda' xúgutę zra naca bana',
na' lizru', Dios, gaca na lizra' chadía chacanna.

24

¹ Chee Dios naca xezr la xu nigá ne xúgutę da zaj de lawe na.
Naca chee' xezr la xu, ne xúgutę bénneache zaj zre'e ga na'.

² Bzue' na lawe' nísadau',
ne bzale' lane na sítujla zran nísadau'.

³ ¿Nu seque' cuen xi'a chee Xránadxu?
¿Nu seque' chu'u xudau' lá'azxa chee'?

⁴ Waca benne' ca' zaj naque' du lazre' ca naca da dxelune',
ne ca naca da dxulaba lazre'.

Benne' ca' quebe ne xelechisa ne'e lau bedáu' xiaj xaga ca',
ne quebe bi ne xechebe lazre' da naca wen lazre'.

⁵ Xránadxu guné' da chawe' chee benne' caní.

Dios guchi'e chee benne' caní, ne guselé' le'.

⁶ Caní zaj naca bénneache dxelebigue' lau le',
benne' ca' dxelexu'e naga zua Dios chee Jacob.

⁷ Le salaj dxa xu'u chee xudau'.

Le salaj dxa xu'u chawe' ca',
na' chu'u Wenná Bea szrenté.

⁸ ¿Nuzra na' Wenná Bea szrenté nigá?

Naque' Xránadxu, Benne' wal-la,
Bénnea' nape' duté xel-la' waca.

Naque' Xránadxu, Bénnea' dxedxúaje' chawe' lu wedil-la.

⁹ Le salaj dxa xu'u chee xudau'.

Le salaj dxa xu'u chawe' ca',
na' chu'u Wenná Bea szrenté.

¹⁰ ¿Nuzra na' Wenná Bea szrenté nigá?

Naque' Xránadxu, Benne' dxenná bé'ene' xúgute' da zaj zua.

Le' naque' Wenná Bea szrenté na'.

25

¹ Xran, dxennía' Lue' duté lázrdawa'.

² Dxuxrén lazra' Lue', Dios chia'.

Quebe gu'u lataj xedué'eda'.

Quebe gu'u lataj benne' dxeledábague' neda' xuluzétaje' neda'.

³ Da líqueze, benne' ca' dxelebeza lazre' Lue'
quebe xeque zréajene'.

Xeledué'e benne' ca' dxeledábague' xrtizru'.

⁴ Xran, ble'e neda' da dxaca lazru' guna'.

Ble'e neda' da dzezaca ba lazru' guna'.

⁵ Bsede neda' guna' ca naca da li chiu'
lawe' da nacu' Dios dxuseláu' neda'.

Tu dxebeza lázrezqueza' Lue'.

⁶ Bsa lazre', Xran, gacu' zri'i lazre',
ne xexache lazru' chia' cáteze da dxúntequezu'.

⁷ Quebe chajsá lazru' dul-la da bena' gate ne naca'
benne' cuide', ne ca gudábaga' xrtizru'.

Nen duté xel-la' dxexache lazre' chiu', bsa lazre' neda',
ne nen duté xel-la' zri'i lazre' chiu', Xran.

⁸ Xrlátaje, ne li lazre' naca Xránadxu Dios.

Chee le' na' gusédené' benne' dul-la ca' da dxal-la' xelune'.

⁹ Gulé'engé' benne' dxexruj lazre' ca' da xrlátaje da xelune',
ne gusédené' benne' zren lazre' ca' da xelune'.

10 Lu xel-la' dxexache lazre',
ne lu da li dxeché Xránadxu benne' ca' dxelunę'
ca naca xel-la' wezría cheę', ne ca da dxusede Le'.

11 Lawe' da dxunu' ca da ba gunnú', Xran,
gunite lau' ca naca dul-la nuna', da naca na zren.

12 ¿Nu benne' dxezrebe' Xránadxu Dios?
Le' gusedene' benne' nigá da dxal-la' gunę'.

13 Gaca cheę' tu da ba neza zrente,
na' zri'ine zre suę' gaca cheębe' xęzr la xu.

14 Xránadxu Dios naque' tuze nen benne' ca' dxelezrebe' Le',
na' gunę' xelúnbe'ę xel-la' wezría cheę'.

15 Tu dxennázqueza' Xránadxu Dios
lawe' da guselę' neda' lu na' benne' ca' dxelaca lazre' xelel-le' neda'.

16 Gunná' neda', ne bexache lazre' neda'
lawe' da zua' tuza', ne dxezaca zi'a.

17 Naxánle'ę da stebe da zaj zua lázrdawa'.
Bselá neda' lu da stebe zua'.

18 Gunná' ca dxezaca zi'a, ne ca dxunle'a zrin,
na' bnite lau xúgutę dul-la da nabaga'.

19 Gunná' benne' ca' dxeledábague' neda' ca naxánle'ęne',
ne ca dxelecuídele'ęne' neda'.

20 Bxue bėnne' du xu'a, ne bselá neda'.
Quebe gu'u lataj xedué'eda' lawe' da dxuxrén lazra' Lue'.

21 Zaj nuxru da xrlátaje, ne xel-la' li lazre' neda'
lawe' da dxebeza lazra' Lue'.

22 Dios, bselá benne' Israel ca'
lu xúgutę da dxelezaca zi'e.

26

1 Bchi'a chia', Xran, lawe' da nuna' da xrlátaje.
Bxren lazra' Lue', Xrana' Dios, ne quebe ben chupa lazra'.

2 Gunná' xanne' lázrdawa', Xran, ne bxue ca da nuna'.
Gunná' xanne' da xu'u lu xichaj lázrdawa'

3 lawe' da dxeque be'eda' dxexache lazru' neda',
ne dxuna' ca naca da li chiu'.

4 Quebe ne guna' tu zren benne' ca' dxelunę' da xrlátaje cúzreze,
ne quebe ne guna' tuze benne' ca' dxululę'e cuine' xrlátaje.

5 Dxequídeda' da dxelún benne' ca' dxelunę' da calela
naga dxelezrague',

ne quebe ne chu'a tu zren benne' ca' dxuluzúę' Dios chalá'ala.

6 Dxelé'enu' quebe bi zria nabaga',
na' waca biga' lu cugu chiu', Xran,

7 cheę cuezre xa'a, xapa' Lue': "Xcalenu'",

ne cheę guzenda' bėnneache ca naca da zren ca' da nunu'.

8 Xran, nazrí'ida' lizru' naga zu',
ne lataj lá'azxa naga zua da xabáa chiu'.

9 Quebe guzría xi'u neda' tu zren nen benne' dul-la ca',
ne quebe gutiu' neda' tu zren nen benne' ca' dxelútię' benneáche,

10 benne' ca' dxelunę' da caleła,
ne tu dxulunęzrujzqueze' dumí cheę xełelę' lu da zaj nune'.

11 Neda' tu gúnzqueza' da naca li lazre'.

Bselá neda', ne bexache lazre' neda'.

12 Tu núnzqueza' da xrlátaje, na' güe lá'anaqueza'

Xránadxu Dios

lau benne' ca' zaj nazrague' cheę'.

27

1 Xránadxu Dios naque' xel-la' naxaní' chia',
ne Benne' dxuselę' neda'.

¿Nu benne' gaca guchębe' neda'?

Xránadxu Dios naque' Benne' dxucu'uje' neda'.

¿Nu benne' gaca guzúę' neda' lu da stębelę'e'?

2 Gate gulęchaj benne' ca' dxelunę' da caleła chia',

nen benne' ca' dxulusaca zi'ę neda',

ne benne' ca' dxeledábague' neda' cheę xuluzría xi'ę neda',

na' gulechęę', ne xeajlecházie'.

3 Láqueze xelęchaj tu cue' benne' dxjaque' wedil-la neda',

benne' ca' dxeledábague' neda', quebe zrébequeza'.

Láqueze xuluzúę' neda' lu wedil-la, neda' guxrén lázrequeza' Dios.

4 Tu da gunábeda' Xránadxu Dios.

Da nigáze sa lazra', da naca na cheę sua' lizre Xránadxu

xúgute zra gaca bana',

cheę gulaba lazra' ca naca da xrtantę cheę Xránadxu,

ne cheę guchálajłęna' Le' lu xudau' lá'azxa cheę'.

5 Le' gucache chawę' neda' lu lataj lá'azxa cheę'

lu zra dxaca da caleła.

Gucache chawę' neda' lu lataj cheęqueze' naga zúaqueze'.

Guzúę' neda' tu naga sę cháweda'.

6 Nadxa gunę' guzętąja' benne' dxeledábague' neda',

ne zaj naxęchąę' neda',

na' nen dutę xel-la' dxebe' gutia' béadu ca' guzúa'-ba'

lu cugu cheę'.

Gúl-laqueza', ne tu güe lá'anazqueza' Xránadxu.

7 Xran, ben chi'a gate ne dxuláwizra' Lue'.

Bexache lazre' neda', ne bechębe chia'.

8 Lu xichaj lázrdawa' będa' chi'u, gunnú': "Bexilaj chia'."

Xexilaja' chiu', Xran.

9 Quebe gucache lau' chia' neda'.

Lu xel-la' dxezrá'a chiu' quebe xebigu' naga zua' neda',

węn zrin chiu'.

Nacu' Benne' dxácalęnę' neda'.

Quebe gusanu' neda', ne quebe cueaj xichju' neda',

Dios, weselá chia'.

10 Lácala xulusán xra xrna'a neda',

tu xecá'azqueze Xránadxu Dios neda'.

11 Będe neda' da dxaca lazru' guna', Xran,

ne błe'e neda' da li lazre' da dxal-la' guna',

lawe' da zaj naxán benne' dxeledábague' neda'.

12 Quebe gu'u lataj benne' dxeledábague' neda'

xelunĕ' chia' da dxelaca lazrĕ'
 lawe' da zaj naxechaj benne' wen lazre' neda'
 nen benne' dxelaca lazrĕ' xulusaca zi'e neda'.
 13 Xránadxu Dios guchebe lazre' le'eda' da xrlátaje cheĕ'
 naga gaca bana'.

La quebe guxéajle'a da nigá, na' gute ni'a na'a.

14 Le cueza xelá' Xránadxu.

Le gutipa lázrele, na' Le' guzĕ chúchue' le'e.

Awe', le cueza xelá' Xránadxu.

28

1 Xran, dxuláwizra' Lue'.

Nacu' Benne' dxucú'uju' neda'.

Bzĕ naga chi'a lawe' da che quebe xennu' neda'
 gaca' ca tu benne' dxu'e lataj ba xa'.

2 Ben chi'a dxuláwizra' Lue',
 ne dxechisa na'a lau' naga zu' lataj lá'azxa chiu'.

3 Quebe guzría xi'u neda' tu zren nen benne' wen da caleļa ca',
 ne cá'anqueze nen benne' ca' dxelunĕ' da zrinnaĵ,
 benne' ca' dxelennĕ' dizra' cháwedau' lau le sa' ljwezre',
 san xu'u lázrdawe' da caleļa gunĕ' cheĕ'.

4 Bde benne' ca' lu da ba xa' cáteze naca cheĕ da belunĕ',
 cáteze naca da caleļa da zaj nune'.

Bunezruĵ cheĕ benne' ca' cáteze da belunĕ', da na' dxal-la' xelezí'e.

5 Lawe' da quebe gulapĕ' ba lá'ana da ben Xránadxu,
 ne quegá da bene' lu ni'a ná'queze',
 guxrinnaje' benne' ca', ne gudĕĕ' le' lu da ba xa'.

6 ĵGaca ba Xránadxu Dios, Bénnea' benne' chi'a
 gate bláwizra' Le'!

7 Xránadxu naque' Bénnea' dxuzĕ chúchue' neda',
 ne dxucu'uje' neda'.

Bxren lazra' Le', na' gúcalĕne' neda',
 na' cheĕ le na' gubéle'eda', na' gul-laqueza',
 ne güe lá'anaqueza' Le'.

8 Xránadxu naque' Bénnea' dxuzĕ chúchue' benne' cheĕ' ca',
 ne naque' Benne' dxucu'uje', ne dxuselĕ' bénnea' guquĕ'e.

9 Bselá benne' chiu' ca', ne ben gaca chawe' cheĕ da naca cheĕ'.
 Bxue benne' ca', ne bexru le' chadía chacanna.

29

1 Le güe lá'ana Xránadxu, le'e, zr ale xabáa.

Le güe lá'ana xel-la' szren cheĕ', ne xel-la' waca cheĕ'.

2 ĵDa xabáa naca La Xránadxu!

ĵLe güe lá'ana na!

Le guzú zríbele lau Xránadxu lá'azxa gate xelĕ'e.

3 Chi'i Xránadxu dxen na lawe' nísadau'.

Dxen chi'i Dios xabáa ca guziu' da dxennĕ na.

Dxedá chi'e lawe' nísadau'.

4 Dxen chi'i Xránadxu ca naca xel-la' wal-la cheĕ na.

Dxen chi'i Xránadxu dute xel-la' szren cheĕ na.

5 Chi'i Xránadxu dxichaj na xaga cedro ca'.

Dxichaj na xaga cedro ca' zaj zę na xi'a Líbano.

⁶ Dxuxrite na xi'a Líbano ca' ca dxelexrite bézredu ca',
na' dxuxrite xi'a Hermón ca tu bézredau'.

⁷ Chi'i Xránadxu dxun na chaze xesa.

⁸ Chi'i Xránadxu dxuxrize na le'ę xixre' lawe' lataj.
Dxuxrize na le'ę xixre' cheę xęzr la xu Cades.

⁹ Chi'i Xránadxu dxuxrize na xaga wal-la ca'.

Dxuchibe na xrlęue xaga ca',

na' lu xudau' cheę' dxelenná xúgute bėnneache:

“¡Gaca ba Dios!”

¹⁰ Dxenná be'e Xránadxu nísadau' ca'.

Chadía chacanna dxenná be'ę ca Wenná Bea.

¹¹ Xránadxu Dios dxuzé chachę' benne' cheę' ca'.

Dxuzúę' le' lu da ba neza cheę xel-la' dxebeza zri lazre'.

30

¹ Gucá'ana szrena' Lue', Xran, lawe' da bechisu' neda',
ne quebe bnėzruju' lataj benne' ca' dxeledábague' neda'
xelún le' chia'.

² Xrana' Dios, bláwizra' Lue', na' bexunu' neda'.

³ Xran, bseláu' neda' lu lataj ba xa'.

Bexunu' neda' cheę quebe chu'a xędxu ba.

⁴ Le gul-la cheę Xránadxu, le'e nácale benne' cheęqueze'.

Le xę Le': “Xcalenu’”, ne dxajsá lázrele naque' lá'azxa,

⁵ lawe' da tu chí'idauze dxezré'ę

san chadía chacanna zua xel-la' zri'i lazre' cheę'.

Wabėzredxu tu zreze, san che zílala wabėle'ędxu.

⁶ Gate guzúa chawa' gunnía': Quebe nu seque' gutá neda',

⁷ lawe' da bzę chuchu' neda', Xran, ca tu xi'a zren,
ne blé'enu' neda' cháwedau'.

Gate bcache lau', na' guzúa' stębe.

⁸ Xran, guláwizra' Lue', ne gata' xueda' Lue'.

⁹ ¿Bizra da ba neza gaca na chiu' che gatia',
ne chu'a xędxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

¹⁰ Bzę naga neda', Xran, ne bexache lazre' neda'.

Xran, gúcale neda'.

¹¹ Bėnu' bexaca xel-la' dxebezre chia' xel-la' wexá'a.

Bcuasu' xel-la' dxewí'ine lazre' chia', ne bzu' chia' xel-la' dxebe'.

¹² Cheę le' na' tu gúl-lazqueza' chiu', lawe' da nacu'

da ba neza chia', ne quebe sua zríqueza'.

Xrana' Dios, tu güe lá'anazqueza' Lue' chadía chacanna.

31

¹ Dxuxrén lazra' Lue', Xrana' Dios.

Quebe gu'u lataj xedué'eda'.

Lu da xrlátaje chiu' bselá neda'.

² Bzę naga chí'a, ne bselá neda'.

Bzę chuchu neda', ne bucú'uj neda' cheę la'.

³ Nacu' Benne' dxuzé chuchu' neda', ne dxucú'uju' neda'.
lawe' da nacu' li lazre' gulé'enu' neda' neza,
ne gusi'u neda' neza na'.

⁴ Bebéaj neda' lu xralaj da ba zaj nucueze', chee xelēl-lē' neda'.
Lue' nacu' Benne' dxuxúe' neda'.

⁵ Lu na'u dxuzúa' bēnne'du xu'a, Xran.
Lue' bexá'awenu' neda', Dios li lazre'.

⁶ Dxecuǐdeda' benne' ca' dxelebeza lazre' dios ca'
quebe bi zaj zaca.

Neda' dxebeza lazra' Xrana' Dios.

⁷ Béle'eda', ne sua' lu da ba neza lawe' da dxexache lazru' neda'.
Caní dxunu' lawe' da dxelé'eqeznu' ca da dxezaca zǐ'a.

Nézenu' ca dxedéa' lu da ba xa'.

⁸ Quebe bdeu' neda' lu na' benne' ca' dxeledábage' neda'.
Bze chuchu' neda' tu lataj chawe'.

⁹ Bexache lazre' neda', Xrana' Dios, lawe' da zua' lu da ba xa'.
Ba bebizre nisa xuzru xiaj lawa' lawe' da dxewí'ine lazra'
duté bēnne'du xu'a, ne dutē bela' dxen chia'

¹⁰ lawe' da dxedé xel-la' nabán chia' lu da ba xa',
ne dxedéa' iza chia' ca' dxebezre lazra'.

Dxedú lazra' lawe' da nabaga' zria, na' dxelelá zrita xu'a.

¹¹ Xúgute' benne' ca' dxeledábage' neda' dxelecuǐdene' neda',
na' benne' walǐzr chia' dxuluzúe' neda' chelá'ala,
na' benne' zaj núnbe'e neda' dxelecuase' neda'.

Benne' ca' dxelelé'ene' neda' la neza dxuluzrúnnuje' naga zua'.

¹² Benne' caní ba gual-la lazre' neda' ca dxelal-la lazre'
tu benne' gate.

Naca' neda' ca tu xé'ena xu da nalá'a.

¹³ Dxenda' dizra' schanni' da dxelenná benne' zante' chia',
na' gáteteze zua da dxuchebe na neda'.

Dxacate' na' dxelune' tuze dizra' bi xelune' chia',
ne zaj nune' xelútiē' neda'.

¹⁴ Neda' dxuxrén lazra' Lue', Xran.

Dxennía' nacu' Lue' Dios chia'.

¹⁵ Lu na'u Lue' zaj xu'u zra chia' ca'.

Bselá neda' lu na' benne' ca' dxeledábage' neda',
ne lu na' benne' ca' zaj nau zǐ' xuzre' neda'.

¹⁶ Lu xel-la' szren chiu' bxue neda', wen zrin chiu'.

Lu xel-la' dxexache lazre' chiu' bselá neda'.

¹⁷ Quebe gu'u lataj xedué'eda', Xran, lawe' da dxuláwizra' Lue'.

Bēn xelxedué'e benne' ca' dxelebéaj xíchaje' Lue'.

Bēn xelézúa zriē' lu lataj ba xa'.

¹⁸ Bēn quebe gaca xelenné benne' ca' dxelezǐ xē'e,
benne' ca' dxelenné' da calēla chee benne' xrlátaje ca',
da dxelenné' lu xel-la' dxulucá'ana szren cuina,
ne lu xel-la' dxulucá'ana ditaj benne' caní.

¹⁹ Da zrente' naca xel-la' zri'i lazre' chiu' da napu'
chee bi gunu' chee benne' ca' dxelape' Lue' ba lá'ana,
da na' dxunu' lau xúgute' bēnneache
ne chee benne' ca' dxelebeza lazre' Lue'.

²⁰ Lu da bagácheze naga zu' Lue' dxucachu' benne' ca'

chee quebe bi xelún bénneache chee'.
 Dxuzú' benne' ca' tu lu xu'u nagache
 chee quebe bi gun chee' xel-la' wetil-la dizra' chee bénneache.

21 ¡Gaca ba Xránadxu Dios!

Lu xel-la' dxexache lazre' chee' bene' da zrente
 chee gúcalene' neda' tu lu xezre naga guca wedil-la.

22 Gate na' guzúa da dxuchebe neda' gunnía':

Zua' naga québedxa le'e Xrana' neda'.

Lue' bennu' chi'a da guta' xueda' Lue' gate na' bláwizra' Lue'.

23 ¡Le zri'i Xránadxu, xúgutele le'e nácale benne' chee Léqueze'!

Xránadxu dxuxúe' benne' ca' quebe dxulusane' Le',

na' dxuxunézrujle' chee benne' ca' dxulucá'ana szrene' Le'.

24 Le gutipa lázrele, xúgutele le'e dxebeza lázrele Xránadxu Dios,
 na' Le' guzé chúchue' le'e.

32

1 ¡Ba neza zrente naca na chee bénnea'
 Dios ba bnite lawe' dul-la da gubágue',
 ne ba gudúe' zria da guzúa chee'!

2 ¡Ba neza zrente naca na chee bénnea'
 Dios quebe dxusebague' le' zria,
 bénnea' quebe dxezi xé'e!

3 Gate quebe guxrúalepa' dul-la gubaga',
 bedú lazra' lawe' da gudxezra' bedú zra.

4 Te zra ne chizrela bdeu' neda' xel-la' zi', Xran.

Bedú lazra' ca dxebizre beaj nisa beu' la.

5 Nadxa guxrúalepa' dul-la gubaga',
 ne quebe bcacha' zria da guzúa chia'.

Bechugu lazra' guxrúalepa' na lau Lue', Xran,
 na' Lue' bnite lau' chee dul-la gubaga'.

6 Xúgute bénneache chiu' dxal-la' xuluchálajlene' Lue'
 gate de lataj xelexezrelne' Lue', na' gate zrin da zi' da xa'
 da xelezaque',

da gaca na ca tu xegu nisa zren da dxedxuaj na,
 na' quebe bi gune na benne' ca'.

7 Lue' nacu' ca tu lataj naga gaca gucache cuina',
 na' gucache chawu' neda' chee quebe bi da saca'.

Tu gul-lazqueza' zizraj ca bseláu' neda' lawe' da dxuxú' neda'.

8 Dxenná Xránadxu: "Gulé'eda' lue' neza naga dxal-la' tau'.

Gusédeda' lue', ne guzéajni'ida' lue' ca dxal-la' gunu'.

9 Quebe gacu' ca tu bzrina' u tu bea, be quebe bi dxeléajni'iba',
 bea ca' dxun na ba xen nna be'enu'-ba', na' cu'u xia dxú'aba',
 chee gunu' xelunba' ca dxaca lazru'."

10 Benne' wen da calela ca' dxun na ba xen
 xeledé' lu da zi' da xa'.

Benne' ca' dxuluxrén lazre' Xránadxu,
 tu dxuxúezqueze' le' nen duté xel-la' zri'i lazre' chee'.

11 Le'e, benne' xrlátaje, le be, ne le sua lu da ba neza,
 ne chee da ben Xránadxu, gúcalene' le'e.

Nen dutę xel-la' dxebé le gul-la, le'e, nácale li lazre' lau Le'.

33

1 Le be le'e, benne' xrlátaje, lau Xránadxu Dios.

Xrtante naca lau Dios da dxelúe lá'ana benne' xrlátaje ca' Le'.

2 Le gucá'ana szren Dios nen da zríadi'i na du da dxínnele.

Le gúl-laqueze chee' nen da dxúl-lalenle,
ne nen tu da nua na chi du.

3 Le gul-la chee' Le' tu da cube.

Le gul-la cháwedau', quínnele dutę xel-la' dxebé.

4 Li lazre' naca xrtizra' Xránadxu Dios,
na' nune' dutę lu xel-la' li lazre' chee'.

5 Le' nazrí'ine' da naca xrlátaje, ne da naca du lazre'.

Zaj núnbea bėnneache xel-la' dxexache lazre' chee' Xránadxu
du gabí'i xęzr la xu.

6 Ne chee' xrtizra' Xránadxu Dios, bene' xabáa,
na' xúgute' belaj da zaj nalá' zran xabáa bene'
nen be' dxedxuaj dxu'e.

7 Le' dxuxutube' nísadau', ne dxexune' na ca tu xi'a nisa.
Dxegá'a chawe' nisa lu da situj ca' naga nucueze' chee' na.

8 Le zrebe Xránadxu Dios, xúgutele' zrale xęzr la xu nigá.

Le zrebe lau Le', xúgutele' le'e zrale lu xęzr la xu

9 lawe' da gunneze', na' guca xęzr la xu.

Gunná be'ene' na, na' zúaqueze na.

10 Xránadxu Dios dxune' dxexaca dácheze dizra' zaj nun
bėnneache xęzr la xu ca',
ne dxune' dxelaca níteze da ca' zaj nune' xelune'.

11 Dizra' ba nun Xránadxu Dios tu súazqueze
na chadía chacanna.

Da dxegú'u be'ę lu lázrdawe' tu wadíazqueze na
lau xúgute' bėnneache.

12 Ba neza zrente naca na chee' benne' xęzr la xu ca'
Xránadxu naque' Dios chee' le',

benne' xęzr la xu ca' gucá'a Dios chee' xelaque' benne' chee'.

13 Naga zue' xabáa chee' dxenná' Xránadxu Dios,
na' dxelé'ene' xúgute' cuen bėnneache.

14 Naga zue' lataj lá'azxa chee' dxenné'e,
na' dxelé'ene' ca' zaj zra' bėnneache lu xęzr la xu.

15 Le' bene' xichaj lázxdau' xúgute' benne' ca',
na' dxenné'e' xúgute' da dxelune'.

16 Quebe la benne' wenná bea ne chee' benne'
dxjaque' wedil-la zante' chee',
ne quebe la benne' wal-la ne chee' xel-la' wal-la da nape'.

17 Quebe nu benne' le' ne chee' bzrina',
ne quebe nu la ne chee' xel-la' wal-la zren chee'.

18 Le na' xque, dxuxúe Xránadxu Dios benne' ca' dxelezrebe' Le'.
Dxuxúe' benne' ca' dxelebeza lazre' Le' xexache lazre' le'

19 chee' guselé' le' lu xel-la' gute,
ne chee' gugawe' le' gate dxaca gubina'.

20 Dxebeza lázredxu Xránadxu Dios.

Lē' naque' Bénnea' dxácalēne' dxi'u, ne dxucu'uje' dxi'u.

²¹ Chee lē na' du lázredxu béle'equezdxu lau Lē',
lawe' da tu dxuxrén lázrezquezdxu La lá'azxa chee'.

²² Bexache lazre' netu', Xránantu',
lawe' da dxebeza lázrentu' Lue'.

34

¹ Tu güe lá'anazqueza' Xránadxu Dios te zra chizrela.

Tu gúl-lazqueza' da güe lá'ana na Lē'.

² Xezaca ba lázrelena' Xránadxu Dios.

Xelén benne' dxexruj lazre' da caní, na' welebélē'ene'.

³ Le gucá'ana szren Xránadxu Dios tu zren nen neda',
na' tu zren gucá'ana szrendxu La lá'azxa chie'.

⁴ Bláwizra' Xránadxu Dios, na' Lē' benne' chia',
ne bselé' neda' lu xúgutē da buluchebe na neda'.

⁵ Benne' ca' gulebeza lazre' Lē' beledé'ene' da xabáa chee',
ne quebe belexedué'ene'.

⁶ Neda', benne' xache', bláwizra',
na' ben Xránadxu Dios chia',
ne bselé' neda' lu xúgutē da dxezaca zi'a.

⁷ Gubáz chee' Xránadxu zue' cuita benne' ca' dxelezrebe' Lē',
na' dxucu'uje' benne' ca'.

⁸ Le guxúe xque, na' lé'ele naca xrlátaje Xránadxu Dios.
Ba neza zrente naca na chee' bénnea' dxuxrén lazre' Lē'.

⁹ Le zrebe Xránadxu Dios, le'e, nácale benne' chee' Lē'queze',
lawe' da quee bi dxelexazrje benne' ca' dxelezrebe' Lē'.

¹⁰ Bezre xixre' du ca' dxelexázrjeba', ne dxeledunba'.

Benne' ca' dxelebeza lazre' Xránadxu Dios
quebe bi da chawe' xelexázrjene'.

¹¹ Le da, bidau', ne le xen chia'.

Gusédeda' le'e chee' zrēbele Xránadxu Dios.

¹² Nu benne' ládujla le'e dxaca lazre' xegá'ane'
lu xel-la' nabán,

bénnea' dxaca lazre' sue' zane' iza chee' lé'ene' da chawe'?

¹³ Bxue xanne' ca' dxuchálaju' chee' quebe nneu' da calela,
ne chee' quebe guchálaju' da wen lazre'.

¹⁴ Bsan da calela da dxunu', na' ben da xrlátaje.

Ben ba xuzre gapu' xel-la' dxebeza zri lazre',
ne ben ca naca chee' na.

¹⁵ Dxuxúe Xránadxu Dios benne' ca' zaj naque' xrlátaje,
ne dxuzé nague' da dxululáwizre' Lē'.

¹⁶ Dxezrá'a Xránadxu Dios benne' ca' dxelunē' da calela,
chee' quebe sua nu benne' chajsá lazre'
benne' wen da calela ca'.

¹⁷ Benne' xrlátaje ca' dxululáwizre' Xránadxu Dios,
na' Lē' dxenne' chee',
ne dxuselé' benne' ca' lu xúgutē da dxelezaca zi'e.

¹⁸ Gágutē zua Xránadxu Dios naga zaj zra' benne' ca'
dxelexewi'ine lazre',
ne dxuselé' benne' ca' dxelexewi'ine lazre'.

¹⁹ Da zantē da dxezaca zi' benne' xrlátaje.

Dxuselá Xránadxu Dios bënnea' lu xúgute da ca'.

²⁰ Le' dxuxúequeze' xúgute zrita xu'e,
na' netú zrita chee' quebe gachaj na.

²¹ Dul-la da dxun benne' wen da calela gute na le',
na' xelebía xi' benne' ca' dxelecuídenē' benne' xrlátaje.

²² Xránadxu Dios dxexá'awe' bënne'du xu'u
benne' wen zrin chee' ca',
na' xúgute benne' ca' dxuluxrén lazre' Le'
québequeze xelebía xi'e.

35

¹ Xran, bsizre benne' ca' dxeleenné' chia'.
Gudíl-lalē benne' ca' dxeledíl-lalēnē' neda'.

² Gudá gucu'uju' neda' lu wedil-la,
ne gúcale neda'.

³ Gudēl-la xia chee' wedil-la chee' guzagu' benne' ca'
dxululague' neda'.

Guzre neda' nacu' Benne' dxuselé' neda'.

⁴ Bēn xelexedué'e, ne xeleque zrēaje benne' ca'
dxelaca lazre' xelútiē' neda'.

Bēn xuluzrunnuj, ne xelexedué'e benne' ca' dxelaca lazre'
xelunē' chia' da calela.

⁵ Bēn xelaque' ca tu xizre bebe da dxua be',
ne gusel-la gubáz chee' xabáa chiu' chee' gulague' benne' ca'.

⁶ Bēn chul-la neza naga xeledé'e, na' gaca na naga xelebilē',
ne gusel-la gubáz chee' xabáa chiu' chee' gulague' benne' ca'.

⁷ Bulucache' tu xralaj chee' queła na neda',
ne quegá bi nuna' chee'.

Gulēnē' tu xēdxu naga cheajcházia' neda',
ne quegá bi dē da dxagu na zria chia'.

⁸ Gusel-la da guzriá xi na benne' ca', ne quebe xeleque be'ene'.
Bēn queła xralaj chee' na' léqueze',

ne cheajlecházie' naga xelebía xi'e.

⁹ Nadxa béle'equezda' ca naca da nun Xránadxu Dios.
Sua' lu da ba neza lawe' da bselé' neda'.

¹⁰ Xúgute zrita xu'a xelenná na: Xran, ¿núzraqueze naca
ca nacu' Lue'?

Dxuseláu' benne' xache' lu na' benne' wál-ladxu ca le',
ne benne' dxexazrje lu na' benne' dxebane' da du dē chee'.

¹¹ Belasa benne' dxelexechebe' da wen lazre'.
Gulawē' zria neda' chee' tu da quebe dxaca be'eda'.

¹² Belexebi'e neda' da calela chee' tu da xrlátaje da bēna',
chee' xuluzúē' neda' lu da ba xa'.

¹³ Neda', gate quebe chawe' gulezúē', bewi'ine lazra'.
Bēna' gubasa da bsaca zi na neda',

nē du lazra' bláwizra' Dios chee' xexunē' benne' ca'.

¹⁴ Bewi'ine lazra' chee' benne' ca' ca dxuna' chee'
le sa' ljwezra', u chee' bi bíchequeza'.

Guzúa' lu da baxache' ca dxun benne' chee' xrnē'e gate dxatie'.

¹⁵ Gulebé benne' ca' gate zua' lu da ba xa', ne belezrague'.
Belezraga benne' dxeledábague' neda',

benne' wen da calela, na' chadiṭe gulel-le' neda'.

Tu belúezqueze' neda', ne quebe gulezúa zrie'.

¹⁶ Bulusaca zi'e neda', ne belún le' chia',
ne gulagu lazxe' lu xel-la' dxelezzá'a chee' neda'.

¹⁷ Xran, zájate scha' gu'u latja da dxelune'?

Bselá neda' lu na' benne' caní dxuluzria xi'e neda',
benne' zaj naque' ca bezre xixre' ca'.

¹⁸ Xapa' Lue': Xcalenu', lávela benne' zan ca' zaj
nadupe' chiu' Lue'.

Tu güe lá'anazqueza' Lue' ládujla benne' zan ca'.

¹⁹ Quebe gu'u lataj xelebé benne' ca' dxeledábage' neda',
ne quebe bi nuna' chee'.

Quebe gu'u lataj xelún la benne' ca' chia',
benne' dxelecuídené' neda',

ne quebe bi de da dxagu na zria chia'.

²⁰ Benne' caní quebe dxelaca lazre' xelezúe' lu
xel-la' dxebeza zri lazre',

na' lu xel-la' dxelezi xe chee' dxelenné' chee' benne' ca'
dxelebeza zri lazre' lu xezr la xu nigá.

²¹ Belún le' chia'.

Gulenné': "¡E! ¡E! ¡Ba blé'entu' da nune'!"

²² ¡Xran, ba blé'equenzu' da dxelune'!

¡Quebe sua zriu'!

¡Xran, quebe gusanu' neda'!

²³ ¡Guxasa, guzúa guchi'u chia'!

¡Gudá, Xrana' Dios, chee' gácalenu' neda'!

²⁴ ¡Bchi'a chia' lu da xrlátaje chiu', Xrana' Dios!

¡Quebe gu'u benne' ca' lataj xuluzrizre' chia'!

²⁵ ¡Quebe gu'u lataj xelenné': "Ba guca da dxezá lázredxu!"

¡Quebe xelenné': "Ba bendxu chie'!"

²⁶ Ben xelxedué'e, ne xeleque zréaje xúguté benne' ca'
dxelebene' gate bi dxaca chia'.

Bsi'e xel-la' stu', ne ben xelaca xala benne' ca'
dxeledábage' neda'.

²⁷ Ben xelúl-la, ne xelebé benne' ca' zaj de'e neda',
chee' xelennáqueze': "Tu xegá'ana szrénzqueze Xránadxu,

Bénnea' dxezá lazre' sua lu xel-la' dxebeza zri lazre'
benne' wen zrin chee'!"

²⁸ Tu guchálajzqueza' chee' da xrlátaje chiu',

ne chee' da dxue lá'anaqueze na Lue' te zra chizrela.

36

¹ Da zrinnaj da dxun benne' dxuzúa chalá'ala Dios
dxuchálajle na le' lu xichaj lázrdawe'.

Quebe dxezá lázrequeze' gape' Dios ba lá'ana.

² Chee' le' na' dxulé'e cuine' ca' tu benne' zrente'.

Dxéquene' quebe dxelé'e Dios da zrinnaj da dxune',
ne quebe dxecuide Dios le'.

³ Da tu dxuchálajzqueze' naca na da zrinnaj, ne da wen lazre'.

Québedxa dxéajni'ine', ne québedxa dxune' da xrlátaje.

⁴ Dxulaba lazre' ca naca da caleļa gunē' gate de' naga dxate'.
Xu'e neza da quebe naca neza chawe'.

Quebe dxecuidenē' da caleļa.

⁵ Xrana' Dios, zrentē naca xel-la' dxexache lazre' chiu'
da dxezrintē na xabáa,
na' dxezrintē lu beuj xel-la' li lazre' chiu'.

⁶ Da xrlátaje chiu' naca na ca tu xi'a zren chiu',
na' ca dxuchi'u naca na ca tu nísadau' sítuje.
Xrana' Dios, tu dxuxúezquezu' bēnneache, ne be xixre' ca'.

⁷ Xrdante naca xel-la' dxexache lazre' chiu', Dios.
Chee le na' dxuluxrén lazre' bēnneache Lue' ca dxelún
bedxuj dxé'enedu ca' dxelexezraba' zran xrila bedxuj.

⁸ Welélajquezne' chee da dele'e lizru',
na' Lue' gunézruju' xelé'aje' da naca ca tu xegu da
naca na da dxezaca ba lazru' Lue'.

⁹ Naga zu' Lue' zua beaj naga dxalaj nisa da dxunna na
xel-la' nabán.

Lu xel-la' naxaní' chiu' walé'entu' da naca lení'.

¹⁰ Bexache lazre' benne' ca' zaj núnbe'e Lue',
ne bzua chee benne' li lazre' ca' da xrlátaje chiu'.

¹¹ Quebe gu'u lataj tábaga benne' dxucá'ana szren cuina neda',
ne quebe gutá benne' dxun da caleļa neda'.

¹² Xeaļlechaze benne' ca' dxelunē' da zrinnaj.
Lue' bēnu' xeaļlechaze benne' ca', na' quebe gaca xelexase'.

37

¹ Quebe su' stebe ne chee da dxelún benne' ca'
dxelunē' da caleļa,
ne quebe se lazru' da zaj nápalē'e benne' dxelunē' da zrinnaj,

² lawe' da xeledé chee benne' ca' ca dxaca chee xixre'du ca',
na' gaca chee benne' ca' ca dxaca chee xixre' da nadxugu,
dxebizre na.

³ Bxren lazre' Xránadxu Dios, ne ben da xrlátaje,
na' súaquezu' lu xezr la xu, ne sí'quezu' ba neza da li.

⁴ Bezaca ba lazre' nen Xránadxu,
na' Le' gúnnaqueze' chiu' da dxezá lazru'.

⁵ Bzua cuinu' lu na' Xránadxu,
ne bxren lazre' Le', na' Le' gunē' ca da dxenabu'.

⁶ Gulé'engē' da xrlátaje chiu' ca tu xel-la' naxaní',
ne da li lazre' chiu' ca lawe' zra.

⁷ Guzúa zrize lau Xránadxu, ne guleza lazre Le'.
Quebe su' stebe ne chee benne' dxezi'e ba neza,
bēnnea' dxúnqueze' da caleļa.

⁸ Bsan xel-la' xichaj zra'a, ne quebe cuídenu'.
Quebe sa lazru' bi xusacu' benne' ca' dxelunē' da caleļa,

⁹ lawe' da guzría xi' Dios benne' ca' dxelunē' da caleļa.
Benne' ca' dxelebeza lazre' Xránadxu, gaca chee' xezr la xu.

¹⁰ Chadite te chee benne' ca' dxelunē' da caleļa.
Le'enu' lizre lataj benne' ca', san quebedxa zaj zre'e na'.

¹¹ Benne' dxexruj lazre' ca' gaca chee' xezr la xu,
na' xelexezaca ba lazre' lu xel-la' dxebeza zri lazre' zrentē.

- 12 Benne' dxelún da calela dxelilaj lazre' bi xelune'
chee benne' xrlátaje,
ne lu xel-la' dxelezá'a chee' xelagu lazxa benne' ca'.
13 Xránadxu Dios guzrízrequeze' chee' benne' ca' dxelune'
da calela
lawe' da nézene' ba za zra cheajsé chee' benne' ca'.
14 Benne' dxelune' da zrinnaj dxelebéaje' xia chee',
ne dxuluzé' xaga nalá xéche'ze chee',
chee' xuluzría xi'e benne' xache' ca', ne benne' dxelexazrje',
chee' xelútie' benne' ca' dxelune' da li lazre'.
15 Xia nalá chee' benne' ca' chaze na lu lazrdáuqueze',
na' gáchajqueze xaga nalá xéche'ze chee'.
16 Cháwedxa naca da du da de chee' benne' xrlátaje
ca da gunní'a da zaj napa zánete' benne' dul-la ca',
17 lawe' da welátequeze ni'a na' benne' dxelúne' da zrinnaj.
Xránadxu ná'queze dxuxúe' benne' xrlátaje ca'.
18 Nunbea Xránadxu ca zaj naca zra xelezúa benne'
du lazre' ca',
na' da zaj napa benne' ca' xelezúa na chadía chacanna.
19 Quebe xelexedué'eng' gate quebe dxaca chawe' chee'
bénneache,
na' lu zra chee' gubina' gata' da xelawe'.
20 Xelebía xi' benne' dxelúne' da zrinnaj,
na' benne' ca' dxeledábaga' Xránadxu,
ca dxaca chee' xiaj xixre' ca'.
Xeledé chee', ne xelexenitie' ca zren chee' xi'.
21 Benne' ca' dxelún da calela tu da dxelenabe' tu chí'idauze,
ne quebe dxuluxunézruje' na,
na' benne' xrlátaje dxexache lazre' le', ne dxunézruje' chee'.
22 Benne' ca' dxelé'e Xránadxu le' chawe', gaca chee'
benne' ca' xezr la xu,
na' benne' ca' quebe dxelé'eng' chawe', xelebía xi' queze'.
23 Da dxelún benne' xrlátaje ca' zaj naca na da ble'e
Xránadxu le', na' dxelé'eng' cháwedau' ca da dxelune'.
24 Gate dxelejchaze benne' xrlátaje ca' quebe cheajlechaze'
tu chí'ize lawe' da nuxru Xránadxu na' benne' ca'.
25 Benne' cuide' guca', ne na'a ba gúxrúa',
ne cabata' ble'eda' tu benne' xrlátaje gusán Dios le',
na' quebe xeledá zri'ine zre sué' xelebéaje' guna'.
26 Benne' xrlátaje nigá tu dxexache lázrezqueze',
ne dxunézruje' bi dxexazrje nu benne',
na' zri'ine zre sué' zaj naque' da ba neza chee' bénneache.
27 Québedxa gunu' da calela, san ben da xrlátaje,
na' gaca bánquezu' chadía chacanna,
28 lawe' da nazrí'i Xránadxu da naca li lazre',
ne quebe dxusane' benne' zaj de'e Le'.
Chadía chacanna tu guxúezqueze' benne' ca',
san guzría xi'e xrtia ljwezre benne' ca' dxelune' da calela.
29 Benne' xrlátaje ca' gaca chee' xezr la xu nigá,
na' xelezrá'queze' chadía chacanna lu xezr la xu.

- 30 Benne' xrlátaje dxuchálajqueze' da naca sina,
na' ca dxuchi'e naca na xrlátaje.
- 31 Da nadxixruj bea Dios tu xú'uzqueze na xichaj lázrdawe'.
Chee le na' quebe cheajchaze bénnea'.
- 32 Benne' wen da zrinnaj dxenné'e benne' xrlátaje,
ne dxuné' ba xuzre gutié' le'.
- 33 Quebe gusán Xránadxu le' lu na' benne' wen da calela na',
ne quebe guzría xi'e le' gate dxuchi'e chee'.
- 34 Guleza lazre' Xránadxu, ne ben ca da ba gunné',
na' Le' chísaqueze' Lue' chee gaca chiu' xezr la xu nigá.
Gate xelebía xi' benne' dul-la ca', na' lé'enu' na.
- 35 Ble'eda' tu benne' wen da zrinnaj, nagá'ane' szrente,
na' guxánle'e da de chee' ca dxegula tu xaga zrente'.
- 36 Na' gudé chee', na' québedxa zue' na'a.
Bexílaja' le', san quebe nu bezrelda'.
- 37 Blaba lazre' ca naca chee benne' li lazre',
ne gunná' benne' xrlátaje
lawe' da naga cheajsé gaca tu da ba neza chee benne'
dxebeze' zri lazre'.
- 38 Benne' dxeluné' da calela xelebía xí'queze'.
Quebe nu cha' xrtia ljwezre benne' dxeluné' da zrinnaj.
- 39 Xránadxu Dios guseláquezé' benne' xrlátaje ca',
na' Le' gutipe' lazre' benne' ca' lu zra chee da stébe.
- 40 Xránadxu Dios gácalené' le', ne guselé' le'.
Guselé' le' lu na' benne' ca' dxeluné' da calela,
na' guné' gaca chawe' chee' lawe' da buluxrén lazre' Le'.

38

- 1 Xrana' Dios, quebe til-lu' neda' lu xel-la' dxezrá'a chiu'.
Quebe gudéu' neda' da ba xa' lu xel-la' snia chiu',
2 lawe' da belúe xaga nalá xéche'ze chiu' neda',
na' be na'u neda'.
- 3 Quebe bi chawe' zua belá' dxen chia' lawe' da dxezra'u neda',
ne quebe zaj zua zrita xu'a cháwedau' lawe' da nuna' dul-la.
- 4 Ca naca da zrinnaj da nuna' ba zria cháqueze na xíchaja'.
Zaj naca na chia' ca tu xua' zí'ile'.
- 5 We' da zaj zria bel-la' dxen chia' ba dxelelá na,
ne ba dxeluzru na,
da na' dxaca chia' lawe' da bena' da calela.
- 6 Nucache lawa', ne dxexedué' ele'eda',
ne dxebezre xacha' te zra chizrela,
- 7 lawe' da ca naca bel-la' dxen chia' dxelá na,
ne quebe bi chawe' zua belá' dxen chia'.
- 8 Nate ni'a na'a, ne dxéqueda' ba naxúzrujne zrita xu'a.
Dxebezre lazra' lawe' da zua stébe lázrdawa'.
- 9 Xran, ca naca da dxezá lazra' zaj zua na nen Lue',
na' da dxebezre lazra' dxelé'equeznu' Lue'.
- 10 Dxate' lázrdawa', ne ba bedú lazra',
ne québedxa dxelé'eda' cháwedau'.
- 11 Dxelexebiga ljwezra', ne le sa' ljwezra' ca' zítu'la
ne chee xízrawe' chia',

na' benne' walíZR chia' ba belexecuase' zítu'la.

¹² Benne' ca' dxelaca lazre' xelútíe' neda' dxuluzale' xralaj,

na' benne' ca' dxelúe lazre' bi gaca chia' dxelenné' chia'
wabía xi'a, ne tu zaj zúaze' bi xulusaque' neda'.

¹³ Neda' quebe dxenda' ca dxaca chee' tu benne' cuezru,

ne naca' ca tu benne' quebe dxaca nne',

benne' quebe dxexrá dxu'e.

¹⁴ Naca' ca tu benne' quebe dxenne',

bénnea' quebe dxexechebe',

¹⁵ lawe' da dxebeza lazra' Lue', Xrana' Dios.

Lue' xechebu' waláz chia', Xrana' Dios.

¹⁶ Gunnia': Quebe gu'u lataj xelebene' ne chee' da dxaca chia'.

Gate dxeajchazia', quebe gu'u le' lataj xulucá'ana szren cuine'
lawe' da zua' lu da baxache'.

¹⁷ Ba zua' cheajcházia',

ne tu dxelázqueze duté bel-la' dxen chia'.

¹⁸ Chee le' na' xrúalepequeza' da calela da bēna',

ne xewine lazra' ca naca dul-la da nabaga'.

¹⁹ Benne' ca' dxeledábague' neda' zaj zúaqueze' chawe',

ne zaj naque' benne' wal-la.

Zaj naxánle'e benne' ca' dxelecuídenē' neda',

ne quebe bi de' da dxagu na zria chia' lau le'.

²⁰ Benne' ca' dxelune' da calela chee' benne' ca'

dxelune' da xrlátaje

zaj naque' benne' dxeledábague' neda' lawe' da

tu dxúnzqueza' da xrlátaje.

²¹ Quebe gusanu' neda', Xrana' Dios.

Dios chia', quebe su' zitu' naga zua'.

²² Ben ba xuzre gácalenu' neda', Xran.

Nacu' Benne' dxuselé' neda'.

39

¹ Neda' gunnía': Guxúe xanne' cuina' chee' quebe guna' dul-la
lu da guchálaja'.

Tu guxúe xánnezqueza' ca da guchálaja' dxácate' na'

zua benne' wen da calela naga zua'.

² Guzúa' zrize ca tu benne' quebe dxaca nnie',

ne québequeze bchálaja' da xrlátaje,

na' bzáladxa xel-la' dxudía chia'.

³ Guca lázrdawa' ca tu da dxala,

na' lu da dxulaba lazra' guca na ca tu xi'.

Na' gunaba' lau Xránadxu, gunnía':

⁴ Xran, ble'e neda' da gaca chia',

ne ájate zra gaca bana'.

Bzéajni'i neda' chadite nazruzre gatia'.

⁵ Nunu' chia' sua' bábaze zra,

na' iza chia' québequeze bi naca na lau Lue'.

¡Da líqueze quebe bi zaj naca zra chee' xúgutē' bénneache!

⁶ ¡Da líqueze zaj naca bénneache ca tu zrúl-laze!

¡Da líqueze dácheze naca zaj dxe' bénneache gunne xue

chee xel-la' nabán chee!
 ¡Dxulucúdie' xel-la' gunní'a, ne quebe zaj nézeng'
 nu chee gaca na!

7 Na'a, Xran, ¿bízraqueze cueza lazra'?

Tuzu' Lue' dxal-la' cueza lazra'.

8 Bselá neda' lu xúgutę da zrinnaj da bena'.

Quebe gu'u lataj benne' xala ca' xelún le' chia'.

9 Guzúa' zrize, ne quebe bi bchálaja'

lawe' da Lué'queze benu' guca caní chia'.

10 Becá'a xízrawe' da bzu' lu bela' dxen chia'.

Bache gatia' lu da dxusacu' neda'.

11 Dxudéu' ba xa' tu benne' ba nun dul-la

chee dxuzéajni'inu' le',

ne ca dxun béadu dxuteba' ladxe' dxuzría xi'u

da nazrí'idxe bénnea'.

¡Da líqueze quebe bi zaj naca zra chee xúgutę bénneache!

12 Bene da dxenaba' lau Lue', Xran,

ne bze naga ca da dxuláwizra' Lue'.

Quebe su' zrize gate zua' dxebezra' lau'

lawe' da naca' lau Lue' ca tu benne' dxedaze', ne quebe de lize',

ne naca' ca tu benne' quebe de xęzr la xu chee'

ca gulaca xra xrtawa' ca'.

13 Bsan neda' chee gata' lataj xezí' le dipa'

nédxula ca xexá'a xenitia'.

40

1 Nen dutę xel-la' zren lazre' chia' guleza lazra' Xrana' Dios,
 na' bze nague' chia', ne benne' da gunábeda' Le'.

2 Bebéaje' neda' ca tu lu xędxu situj, ne lu da naca
 ca guna' guzra'.

Bzue' ní'a ca tu lu xiaj xre, ne begu'e neda' neza li.

3 Beņe' dxul-la' tu da cube da naca na da dxue lá'ana'
 Xránadxu.

Benne' zantę xeledé'eng' da nigá dxune', na' xelezrebe' Le',
 ne xuluxrén lazre' Xránadxu Dios.

4 Ba neza zrentę naca na chee bénnea' dxuxrén lazre'
 Xránadxu Dios,

ne quebe dxunę' ca dxelún benne' ca' dxulucá'ana szreņe'
 bedáu' xiaj xaga ca',

ne quegá ca dxelún benne' ca' dxelún lazre'.

5 Da zantę benu', Xrana' Dios, da dxebámentu',

ne ca zaj naca da dxezá lazru' gunu' cheęntu'

quebe gaca gulábantu' lau Lue'.

Chelá nu guzenda' ca zaj naca na,

ne che guchálaja' chee na, quebe baben tu na.

6 Quebe dxezaca ba lazru' béadu ca' gutia' lau',
 u da gunna' Lue',

ne quebe gunabu' béadu ca' guzézxea' lau', u dxen chee

béadu ca' da guzúa' lau' ne chee dula nabaga',

san gusalaju' naga' chee xenda' chi'u.

7 Nadxa gunní'a: Guná' xque, za'a neda'.

Lu xiche lá'azxa naxúaj na ca naca chia'.

⁸ Dhezaca ba lazra' guna' ca da dxaca lazru' Lue', Dios chia',
na' da nadxixruj be'u zua na lu xichaj lázrdawa'.

⁹ Ca naca da xrlátaje chiu' ba bzenda' bénneache
naga zaj nazraga chiu' bénneache zante.

Gunná' xque, quebe guzúa zria',
ca nézqueznu' Lue', Xrana' Dios.

¹⁰ Quebe bcácheza' ca da xrlátaje chiu' lu lázrdawa'.

Ba bchálajqueza' ca naca xel-la' li lazre' chiu',
ne ca dxuseláu' bénneache.

Quebe guzúa' zri ca naca xel-la' dxexache lazre' chiu',
ne ca naca da li chiu' ládujla benne' zante zaj nazrague' chiu'.

¹¹ Xran, quebe chenu' xexache lazru' neda'.

Xel-la' dxexache lazre' chiu', ne da li chiu'
tu dxelácalezqueze na neda'.

¹² Lawe' da ba guléchajle'e da calela ca' neda',

da calela ca' da ba nuna' zaj zria na neda',
na' quebe gaca nna'a naga zu'.

Zaj naxándxa na ca zaj naca xicha xíchaja', na' dxedú lazra'.

¹³ Dxenaba' lau', Xran, guseláu' neda'.

Xran, ben ba xuzre gácalenu' neda'.

¹⁴ Ben xelexedué'e, ne xeleque zrêaje
xúgute benne' ca' dxelaca lazre' xelútie' neda'.

Ben xeajxaca bzêbela, ne xelexedué'e
benne' ca' dxelezá lazre' xelune' chia' da calela.

¹⁵ Ben xeleque zrêaje' lawe' da belún zrêaje' neda'
benne' ca' gulé'e neda': "E, e."

¹⁶ Ben xelebé, ne xelezúe lu da ba neza xúgute benne' ca'
dxelebeze' Lue',

ne ben xelemnáqueze benne' ca' zaj nazrí'ine' Lue',
weselá chee'.

Xelenné': "Xegá'ana szrénqueze Xránadxu."

¹⁷ Láqueze sua' neda' lu da ba xa', ne lu da baxache',
guxúequeze Xrana' Dios ájala guné' chia'.

Nacu' Benne' dxácaleñe' neda', ne Benne' weselá chia'.
Dios chia', quebe chenu' gácalenu' neda'.

41

¹ Ba neza zrente naca na chee' bénnea' dxe'e gunne xue
chee' benne' xache'.

Lu zra gate zue' lu da stebe, guselá Xránadxu bénnea'.

² Xránadxu guxúequeze' le', ne gunézruje' le' xel-la' nabán.
Gaca na tu da ba neza zrente chee' bénnea' lu xezr la xu nigá,
na' quebe gudé Xránadxu le' lu na' benne' ca' dxeledábage' Le'.

³ Xránadxu Dios gúxruqueze' le' gate zúe' lu xel-la' dxudía.

Gun chawe' duté da naque' gate na' quebe chawe' zue'.

⁴ Gunnía': Xrana' Dios, bexache lazre' neda'.

Bexún benne'du xu'a lawe' da bēna' dul-la gate gudábaga' Lue'.

⁵ Benne' ca' dxeledábage' neda' dxelenné' chia' da calela.

Dxelenné': "¿Bátala gate benne' nigá, ne xenite le'?"

- 6 Che xedajlenné'ē neda', dxelún lazre'.
Dxelebáje' neda' dizra' chee bi da calela gaca xelenné' chia',
na' gate dxelexedxúaje', na' dxelexrúe' dizra' na'.
- 7 Gate dxelezraga benne' dxelecuídene' neda',
na' tu dxelennézqueze' chia'.
Tu dxuluchálajlezqueze' ljwezre' chia' neda' da naca
da calela, dxelenné':
- 8 “Ba guxú'ē tu xízrawe' da gute na le',
ne québedxa xexásaqueze' ga na' de'.”
- 9 Cá'anqueze bénnea' guleza zri lazre' nen neda',
bénnea' bxren lazra', na' gudágulequeze' neda',
benne' nigá dxedábagazegue' neda'.
- 10 Lue', Xrana' Dios, bexache lazre' neda',
ne ben xexasa' neda',
na' xunézruja' benne' ca' ca da dxal-la' xelezí'ē.
- 11 Caníqueze nezda' ba bena' da dxezaca ba lazru' Lue',
chee quebe bi xelebéle benne' ca' dxeledábague' neda'.
- 12 Ca naca chia' neda', ba béxruquezu' neda' lawe' da
naca' du lazre',
ne ba bzu' neda' lau Lue' chadía chacanna.
- 13 ¡Gaca ba Xránadxu, Dios chee benne' Israel ca'
gaxuane iza, ne chadía chacanna!
¡Ca'an naca na, ne ca'an gaca na!

42

- 1 Ca dxun bzrina' xixre' dxebezre xa'aba' lawe' da
dxebíleba' nisa,
ca' dxuláwizra bénne' du xu'a da naca chiu', Dios.
- 2 Dxebile bénne' du xu'a da naca chiu', Dios ban.
- ¿Bata gaca xida' chee guzúa cuina' lau Dios?
- 3 Nisa xuzru xiaj lawa' guca na ca xeta dxawa'
te zra chizrela,
dxácate na' gulé'ē neda' xúgute zra: “¿Ga na' Dios chiu'?”
- 4 Dxajsá lazra' chee da caní, ne dxebezre lazra'.
Dxajsá lazra' ca guxá'aleña' benne' zan ca',
ne nuzúa' lawe' le' lizre Dios.
Tu dxúl-lazquezdxu lu xel-la' dxebé,
ne dxue lá'anaquezdxu Dios lu laní.
- 5 ¿Bizr chee na' dxate ní'a na'u, bénne' du xu'a?
¿Bizr chee na' zu' stebe lu xichaj lázrdawa'?
- Guleza lazre' Dios lawe' da güe lá'anaqueza' Le' da xula.
Naque' Benne' dxuselé' neda', ne Dios chia'.
- 6 Dios chia', ba nate ní'a na' bénne' du xu'a
lu xichaj lázrdawa'.
- Chee le' na' dxajsá lazra' chiu' nigá zua' lu xezr la xu
xechalá'a xegu Jordán,
ne lu xezr la xu chee benne' Hermón naga zua xi'a Mizar.
- 7 Ca schaga da dxun nísadau', ne da dxun tu bdua nisa
zren chiu', Dios,

ca' dxeque bénne'du xu'a lawe' da dxusaca zi' na'u neda'.

⁸ Te zra xexache lazre' Xránadxu neda',
na' chizrela tu gúl-lazqueza' da güe lá'ana' Le',
ne tu guchálajlezqueza' Dios,

Bénnea' dxunne' xel-la' nabán chia'.

⁹ Xapa' Dios: Lué'queze dxucu'uju' neda'.

¿Bizr chee na' nal-la lazru' neda'?

¿Bizr chee na' dxewí'ine lazra' lawe' da dxusaca zi'
benne' dxedábague' neda'?

¹⁰ Ca tu benne' dxelé'e zrita xu'a, ca' dxelún benne' ca'
chia', dxelún le' chia'.

Tu zra tu zra dxelenné' chia': "¿Ga na' Dios chiu'?"

¹¹ ¿Bizr chee na' dxate ni'a na'u, bénne'du xu'a?

¿Bizr chee na' zu' stēbe lu xichaj lázrdawa'?

Guleza lazre' Dios lawe' da güe lá'anaqueza' Le' da xula.

Naque' Benne' dxuselé' neda', ne Dios chia'.

43

¹ Bchi'a chia', Dios, ne ble'e lau naca' xrlátaje.

Bselá neda' lu na' benne' ca' dxuluzú'e Lue' chalá'ala,
ne lu na' benne' ca' dxelezí xē'e, ne dxelune' da zrinnaj.

² Nacu' Lue' Dios chia', ne dxuzé chuchu' neda'.

¿Bizr chee na' nusán lazru' neda'?

¿Bizr chee na' dxewí'ine lazra' lawe' da dxusaca zi' neda'
benne' ca' dxeledábague' neda'?

³ Gusel-la chia' xel-la' naxaní' chiu', ne da li chiu'.

Da caní xulusí na neda' neza.

Xeleché na neda' lu xi'a lá'azxa chiu', ne naga zúaquezu' Lue'.

⁴ Chu'a naga zua lucugu chee Dios.

Chu'a lau Dios, Bénnea' dxunne' dxebeda', na' zua' lu da ba neza.

Güe lá'ana' Lue' nen da zríadi'i na du, Dios chia'.

⁵ ¿Bizr chee na' dxate ni'a na'u, bénne'du xu'a?

¿Bizr chee na' zu' stēbe lu xichaj lázrdawa'?

Guleza lazre' Dios lawe' da güe lá'anaqueza' Le' da xula.

Naque' Benne' dxuselé' neda', ne Dios chia'.

44

¹ Dios, bache bémentu' lawe' da buluzén Xra xrtáuntu' netu'
ca naca da beñu' lu zra chee', da naca na iza ba guledé na.

² Bzria xi'u bénneache xezr la xu xezícadxa ca' lau
xra xrtauntu' ca', na' bzu' le' xлатаj benne' ca'.

Bsaca zi'u benne' xezr la xu ca', san bzua chachu'
bénneache chiu' lu xezr la xu nigá.

³ Xra xrtáuntu' ca' quebe gulezi'e xezr la xu nigá

nen xia nalá cheéqueze',

Ne quebe buluselá cuíne' nen xel-la' wal-la da zaj nape'.

Lue' bseláuquezu' le' nen xel-la' waca chiu',

ne nen xel-la' wal-la chiu',

ne nen xel-la' naxaní' chiu', lawe' da bezaca ba lazru' nen le'.

⁴ Dios, nacu' wenná bea chia'.

Bselá zri'ine zre sua Jacob.

⁵ Nen xel-la' waca chiu' xebéajntu' benne' ca'
dxeledábague' netu'.

Lu Lau' Lue' guchuchuj guléajntu' benne' ca'
dxeledábague' netu'.

⁶ Quebe guxrén lazra' xaga nalá xéche'ze chia',
ne quebe guselá xia chia' neda'.

⁷ Lue' bcu'uju' netu' lau benne' ca' dxeledábague' netu',
ne beñu' belexedué'e benne' ca' belecuidene' netu'.

⁸ Ne chee Dios tu súazquezentu' lu da ba neza,
na' chadía chacanna güe lá'anantu' Lau' Lue'.

⁹ Nusán lazru' netu', ne nunu' dxexedué'entu',
ne quebe dxéajlenu' benne' cheentu' ca' dxjaque' wedil-la.

¹⁰ Beñu' buzrúnnujntu' lau benne' ca' dxeledábague' netu',
na' benne' ca' dxelecuidene' netu' gulegüe' ca naca
da nápantu'.

¹¹ Bdeu' netu' ca zrila' ca' lu na' benne' xelútie' netu',
ne ba bese dínnaju' netu' ládujla benne' xezr la xu ca'.

¹² Bdéu' netu', benne' chiu' ca' cá'aze, ne quebe bi guzi'u.

¹³ Dxunu' dxelún la benne' walízre cheentu'.

Benne' zaj naxéchaje' netu' dxelún le', ne dxuluzrizre' cheentu'.

¹⁴ Nuzú' netu' ca tu da dxelenná benne' xezr la xu ca'
naca na da baxáchele'e.

Xúgute' benne' dxelelé'ene' netu' dxulutá xíchaje',
ne dxelexebánene' ca da baxache' nácantu'.

¹⁵ Tu zra tu zra tu dxexedué'ezquezda',

ne tu zúazqueza' lu da stébele'e

¹⁶ lawe' da dxelenné' schanni' chia', ne dxuluzúe'
neda' chalá'ala,

ne dxulutí-lalé neda' benne' ca' dxeledábague' neda',
nen benne' ca' dxelexebeaj lazre' neda'.

¹⁷ Xúgute' da caní dxaca cheentu', ne quebe ne
gal-la lazrentu' Lue',

ne quebe ne guzúantu' chalá'ala xel-la' wezría chiu'.

¹⁸ Quebe ne gusán lázrentu' Lue',

ne quebe ne xecuásantu' lu da gunná be'enu' netu'.

¹⁹ ¿Bizr chee na' nuzú' netu' chalá'ala tu lataj chee be' snia ca',
ne nuzú' netu' naga xelaze gátentu'?

²⁰ La gul-la lázrentu' La Dios cheedxu,

ne bca'ana szrentu' tu dios da quebe bi zaca,

²¹ ¿quebe dxal-la' zra'a Dios netu' ne chee da nigá?

Le' nézquezne' da zaj zua lu xichaj lázxdau bénneache.

²² Lawe' da nácantu' chiu', tu zra tu zra ba
zaj zúatequeze' xelútie' netu'.

Zaj nune' netu' ca zrila' ca' ba zua xelútie'-ba'.

²³ ¡Bebán, Xran!

¿Bizr chee na' dxasiu'?

¡Bebán!

¡Quebe su' zitu' tu chi'ize!

²⁴ ¡Bizr chee na' nucache cuinu',
ne quebe dxeque be'enu' ca dxezaca zí'intu',
ne ca dxuluchine benne' ca' netu'?

²⁵ Ba nate ni'a na' bénne'du xú'untu', ne dxeajcházet_{ent}'u' lu xu,
na' ba déte_{nt}'u' sudxú'ala lu xezr la xu.

²⁶ ¡Guxasa, gúcale netu',
ne dute xel-la' dxexache lazre' chiu', bselá netu'!

45

¹ Xu'u lázrdawa' tu dizra' xrtante,
na' gúl-laqueza' tu da naca chee Wenná Bea.
Gúl-laqueza' tu da bzuj tu benne' dxuchálajle'g cháwedau'.

² Nacu' xrtánle'edxa ca xúgute bénneache.
Dxezile'entu' ba neza chee dizra' dxuchálaju',
lawe' da nucá'anaqueze Dios Lue' cháwedau' tu chí'izqueze.

³ Bda' xia chiu' dxu'a le'u, Lue', benne' wal-la,
lu dute xel-la' szren chiu', ne xel-la' dxenná bea chiu'.

⁴ Lu xel-la' szren chiu' chepe bánquezu'.
Bchine dizra' li, ne xel-la' dxexruj lazre', ne da xrlátaje,
na' guzėjani'i Cuinu' da zri'a ca'.

⁵ Zaj nalále'g xaga nalá xéche'ze chiu' ca',
da xelute na benne' xezr la xu ca' lau Lue',
ne cheajlechaze na lu lázrdau benne' ca' dxeledábage' Lue'.

⁶ Lataj blau naga dxe'u, Dios, naca na da chadía chacanna,
ne súatequeze na.

¡Xrlátaje naca ca dxenná be'u!

⁷ Nazri'inu' da naca xrlátaje, ne dxecuídenu' da calela.
Chee le na' ba nuzúa Dios chiu' Lue' xlátaju',
naga dxebéle'edxenu' ca le sa' ljwezru' ca'.

⁸ Dxelá zixre zra lanu' nen xala da naca na nizre xaga,
ne xiaj, da ca' dxelelá na zixre.

Lu xu'u lizru' da zácale'g na dxuluzúe' Lue' lu da ba neza.

⁹ Bi nu'ula chee wenná bea ca' zaj zúabe' ládujla nu'ula
chiu' ca' zaj naque' blaudxa.

Chalá'a xabęla chiu' dxe' nu'ula gácabe' zru'ulu' nácube' oro
da za na xezre Ofir.

¹⁰ Bene, nú'uladau', ne gunná' xque, ne bze naga da nnia':
Bzala lazru' lazriu' ne lizre xrau',

¹¹ na' benne' wenná bea sa lazre' xel-la' xrtan chiu'.
Bzexruj lazru' lau le' lawe' da naca le' xranu'.

¹² Xelelá' nu'ula xezre Tiro lau lue', zaj nu'e da xelunne' chiu',
na' xelenaba benne' gunní'a ca' gunu' tu culuén chee'.

¹³ Xrtanle'g naca bi nu'ula chee wenná bea lu xu'u naga zue'.
Zra lánabe' nazí' lechítaje na oro.

¹⁴ Xeleché'g-be' lau wenná bea, nácube' zra lánabe'
da núale'g lechítaje na.

Nu'ula węgu'du ca' chjácabe' cuzru lebe'.

Nu'ula caní, nu'ula ljwézrebe' xuluzúabe' lawe' lue'.

¹⁵ Lu dutę xel-la' dxebé, ne lu da ba neza xeleché'e-be', na' xelú'ube' lu xu'u lizru', wenna' bea.

¹⁶ Waláz cheę xra xrna'u xelexezúa zri'inu', bi ca' gunu' xelenná beabe' du gabí'i xęzr la xu.

¹⁷ Guna' cheajlesá lazre' xúgute bėnneache lau' lue'.

Cheę lę na' xelúe lá'ana bėnneache lue' chadía chacanna, ne gaxuane iza.

46

¹ Dios naque' Benne' dxuxúe' dxi'u, ne dxune' dxi'u benne' wal-la.

Zúatequeze' gácalęne' dxi'u gate dxededxu xel-la' zi'.

² Cheę lę na', quebe zrėbedxu lácala xru' xęzr la xu nigá na' cheajlechaze xi'a ca' lu nísadau',

³ ne lácala xeajxruza zren cheę nísadau' xuluninne na, ne dxelúnle'e na schaga,

na' welezrízequeze xi'a ca' ne cheę da dxezrú'.

⁴ De tu xęgu da dxunna na xel-la' dxebé lu xęzre cheę Dios, ne lu xu'u lá'azxa cheę Dios, Benne' nape' dutę xel-la' szren.

⁵ Dios zue' xęzre na', ne cabata' cuía xi na.

Dxaní'sise' xídę' gácalęne' bėnneache zaj zre'e xęzre na'.

⁶ Dxelezrėbele'e benne' xęzr la xu ca',

na' dxelezríze benne' cheę wenna' bea ca'.

Dxenné Dios ca dxenné guziu', na' dxexuna xęzr la xu.

⁷ Dios, Bėnnea' nape' dutę xel-la' waca, zúalęne' dxi'u.

Dios na' cheę Jacob dxucache chawe' dxi'u.

⁸ Le da lé'ele da ca' nun Xránadxu.

Le nna' ca naca da dxebánedxu da nune' lu xęzr la xu.

⁹ Dxebeque zrie' wedil-la da dxelaca du gabí'i xęzr la xu.

Dxuzúzruje' da dxuzala na xaga nalá xėche'ze ca',

ne dxíchuję' xaga tuče' ca' cheę wedil-la,

na' dxuzezxe' da ca' zaj nachę' benne' wedil-la ca'.

¹⁰ Dxenná Dios: "Le sua zríze, ne le xúnbea naca' Dios.

Naca' szrendxa ca zaj naca xúgute cue' xęzr la xu.

Naca' szrendxa ca dutę xęzr la xu."

¹¹ Dios, Bėnnea' nape' dutę xel-la' waca, zúalęne' dxi'u.

Dios na' cheę Jacob dxucache chawe' dxi'u.

47

¹ ¡Le capa na'le, le'e, xúgute bėnneache!

¡Le güe lá'ana Dios nen dutę xel-la' dxebé!

² Dxał-la' zrėbedxu Xránadxu, nape' dutę xel-la' szren.

Naque' Wenna' Bea zren dxenná bé'ęne' dutę xęzr la xu.

³ Bzue' benne' xęzr ca' zran ní'adxu.

Bzue' dxi'u cheę nna be'edxu zánete cue' xęzr la xu ca'.

⁴ Beque'e tu xęzr la xu da gaca na cheędxu,

Da naca tu xezr la xu xrtante chee zri'ine zre sua Jacob,
 benne' ca' nazri'ine'.
 5 Dxe'güén Dios naga dxe'e dxenná be'e.
 Dxelebezre luzu da dxulucuezre' gate dxe'güén Xránadxu ga na'.
 6 ¡Le gul-la da gaca ba Dios!
 ¡Le gul-la!
 ¡Le gul-la da gaca ba Wenná Bea cheedxu!
 ¡Le gul-la!
 7 ¡Dios naque' Wenná Bea dutę lu xezr la xu nigá!
 ¡Le gul-la chee' nen dutę xel-la' dxéajni'i chee!
 8 Dxe' Dios naga dxenná be'e, lu lataj na' naca na lá'azxa.
 Dxenná bé'ene' xúgutę cue' xezr la xu ca'.
 9 Dxelezraga benne' dxelenná bé'ene' xúgutę cue' xezr la xu
 tu zren nen bėnneache chee Dios chee Abraham.
 10 Benne' ca' dxelenná be'e du gabí'i xezr la xu
 buludé' xel-la' dxenná bea chee' lu na' Dios.
 Le' dxenná bé'ene' xúgutę benne' wenná bea ca'.

48

1 ¡Zrente naca Xránadxu!
 ¡Naca chee' güe lá'anale'edxu Le'
 ga naca lu xezre chee Dios cheedxu,
 da dxe' na lu xi'a lá'azxa chee'!
 2 Sión, da naca na xi'a chee Dios, naca na sibe, ne xrtante.
 Naca na xezre chee Wenná Bea zrente,
 da dxunna na xel-la' dxebé dutę xezr la xu nigá.
 3 Dios ba blé'ene' dxucache chawe' dxi'u,
 lu xu'u zaca ca' chee xezre chee' na'.
 4 Belezraga benne' wenná bea ca',
 na' belelé'e chee xeledíl-lalene' xezre nigá,
 5 na' gate belelé'ene' na, na' belexebánene'.
 Belezrébe', na' buluzrúnnuje'.
 6 Gulezré'e lu da štebe,
 ne gulezúe' xel-la' dxudía ca dxaca chee tu nu'ula
 ba zua sane' bidau'.
 7 Gulaque' ca da ca' dxeledá lawe' nísadau' dxexrite na
 gate dxácale'e be' bdunu' lu nísadau'.
 8 Bendxu ca da ben Dios, na' na'a ba ble'edxu na,
 ga naca lu xezre chee Xránadxu, nape' dutę xel-la' waca,
 da naca na xezre chee Xránadxu Dios.
 Le' guzúa chawe' xezre nigá chadía chacanna.
 9 Ga naca lu xudau' chiu' Lue', Dios
 dxajsá lázredxu ca naca xel-la' zri'i lazre' zren chiu'.
 10 Gáteteze na' dxelúe lá'ana bėnneache Lue',
 na' ca naca xel-la' szren chiu' dxezrín na
 du gabí'i xezr la xu.
 Ca naca da xrlátaje dxenná be'u.
 11 Xelebé'e bėnneache zaj zre'e Sión.
 Xelebé'e bėnneache zaj zre'e xezre ca' chee Judá
 ne chee da dxuchi'u chee'.
 12 Le'e, bėnneache chee Dios, le chechaj dxu'a xezre na',

ne le gulaba ca zaj naca xu'u sibe ca',
da dxuluzé chacha na xezre na'.

¹³ Le nna' xque ca naca ze'e zren naxechaj na xezre na'.
Le nna' xanne' ca zaj naca xu'u wal-la chee na,
chee guzenle bi cheele ca naca xezre na'.

¹⁴ Dios nigá nácaqueze' Dios cheedxu chadía chacanna.
Le' tu gulé'ezquezne' dxi'u neza.

49

¹ Le xen da nigá, le'e, benne' xúgute cue' xezr la xu.

Le guzé nágale, le'e, benne' duté xezr la xu,

² le'e, benne' blau, ne le'e, benne' xezícadxa,
le'e, benne' gunní'a, ne le'e, benne' xache'.

³ Guchálajqueza' xel-la' sina,
ne guzéajni'ida' le'e da xu'u lázrdawa'.

⁴ Guzé naga' tu dizra' sina.

Gúl-laqueza' chee tu da nagache,
ne quinnia' da zriadi'i na du chēn.

⁵ ¿Bizr chee na' dxun na ba xen zreba' lu zra chee da stebe,
gate naxechaj da calela neda' da dxelún benne'
dxeledábague' neda'?

⁶ Benne' ca' dxuluxrén lazre' da zaj de chee',
ne dxulucá'ana szren cuine' lawe' da zaj nápalé'e.

⁷ Quebe xelezéquene' xelexá'awe' le sa' ljwezre',
ne quebe gaca xulunézruje' Dios da guselá na le'

⁸⁻⁹ chee tu xelaca bánzqueze',
ne chee cabata' xeluzru bel-la' dxen chee'
lawe' da zrente naca da dxexa'u na xel-la' nabán chee bēneache,
ne cabata' seque' nu benne' quízruje' na.

¹⁰ Xelelé'ene' dxelátequeze benne' sina ca',
ne xelúzrué' cáteze dxaca chee benne' xala ca',
ne chee benne' lázrdau zide' ca',
na' dxulucá'ane' xel-la' gunní'a chee' lu na' benne' xula ca'.

¹¹ Dxeléquene' wazráqueze zri'ine zre sue' chadía chacanna,
na' xelexegá'ana lizre' chee xelaca na chee xúgute cuen
xrtia ljwezre',

na' dxelu'e la xezr la xu chee' ca' ca zaj nazí láqueze'.

¹² Quebe xelexegá'anatequeze bēneache lu da ba lá'ana.
Zaj naque' ca be xixre' ca', be dxeláteba'.

¹³ Ca da dxelune' naca na da xálaze,
na' dxelexezaca ba lazre' xrtia ljwezre' ca' nen da dxelennaze'.

¹⁴ Zaj naque' ca tu cue' zrila' zjácaba' lataj ba xa',
naga guxúe xel-la' gute leba'.

Benne' xrlátaje ca' xelenná bé'ene' benne' gunní'a ca'
gate za' chaní',

na' xelebía xi' da ca' guta' chee',

na' lataj ba xa' gaca na naga tu xelezúazqueze'.

¹⁵ Dios xexá'awe' xel-la' nabán chia' lu lataj ba xa'
lawe' da xeché'e neda' naga zúaqueze' Le'.

¹⁶ Quebe su' stebe gate nu benne' dxezrué'ene' xel-la' gunní'a,

ne gate dxunę' lizrę' da zácale'ędxa,
 17 lawe' da gate gatię' quebe bi xexu'ę,
 ne quebe chéaję xel-la' gunnía' cheę' lę'.
 18 Lácala dxácatę naca banę' dxę cuine' zue'
 lu da ba neza zrente,
 na' dxelúe lá'ana bėnneache lę' gate dxępe banę',
 19 san chu'ę naga zaj zra xra xrtawę' ca',
 ne cabátadxa lé'ene' xel-la' naxaní'.
 20 Bėnnea' dxelapa bėnneache lę' ba lá'ana san quebe
 bi dxéajni'ine'
 naque' ca bę xixre' ca', bę dxeláteba'.

50

1 Ba gunné Xránadxu Dios, ne ba nutubę' bėnneache
 cheę dute xęzr la xu,
 benne' zaj zrę'ę naga dxalaj gubizra,
 ne benne' zaj zrę'ę naga dxebía na.
 2 Lu xi'a Sión, da naca na xrtánle'ę ba bzani' Dios.
 3 Xelá' Dios cheędxu, ne quebe sua zrię'.
 Gálajqueze xi' lau Lę',
 ne gácale'ę be' bdunu' da chechaj na Lę'.
 4 Xutúbequeze' benne' zaj zrę'ę xabáa na'ala,
 ne benne' zaj zrę'ę xęzr la xu,
 cheę guchi'ę cheę bėnneache cheę'.
 5 Dxenné': "Le xutube benne' chia' ca',
 benne' ca' belunę' tu xel-la' wezría nen neda'
 da buluzúa chúchue' nen dxen cheę béadu ca'."
 6 Da zua xabáala gulé'e lau na naque' xrlátaje,
 lawe' da naca Dios Benne' guchi'ę cheę bėnneache.
 7 Dxenné': "Le xen, bėnneache chia', na' guchálaja'.
 Le guzé nágale, benne' Israel, na' nnia'
 da gagu na zria cheele.
 Neda', Dios, naca' Dios cheęle.
 8 Quebe til-la' le'e ca naca béadu ca' bėtele lawa',
 ne ca naca béadu ca' bzézele,
 da zaj zúaqueze na lawa' neda'.
 9 Quebe ca'a lu na'ale među ca',
 ne chivo biu ca', bę nápaquezle
 10 lawe' da zaj naca chia' xúgutę bę xixre' ca',
 ne zane gaxúa bę xixre' zaj zra'ba' lu xí'adu ca'.
 11 Xu'u lu na'a xúgutę bę zua xrila,
 ne naca chia' xúgutę bę zaj naca banba'.
 12 Chela neda' dxeduna', quebe xapa' le'e ca'
 lawe' da naca chia' xęzr la xu, ne xúgutę da de lawe na.
 13 ¿Dxun na ba xen gawa' bęla' bęzre ca'?'
 ¿Xí'aja' dxen cheę chivo biu ca'?'
 14 Le guzúa lau Dios da güe lá'anale Lę'
 ne le gunezruj ca da guchebe lázrele lau Dios szrente.
 15 Bláwizra neda' lu zra zu' lu da zi' da xa',
 na' guselá' lue', na' lue' gapu' neda' ba lá'ana."
 16 Dios guzre' benne' wen da calela:

“¿Bi dxéquenu' lue', dxuchálaju' ca nadxixruj bi'a,
ne dxenníu' ca naca chee xel-la' wezría chia'?

¹⁷ Lue' dxecuídenú' neda' che dxusízreda' lue',
ne dxuzú' chalá'ala dizra' chia'.

¹⁸ Gate dxelé'enu' gubán, na' dxunu' le' tu zren,
ne nacu' tu zren benne' ca' dxeledálgene' nu'ula
quebe zaj naca zru'ule'.

¹⁹ Dxuchálajquezu' da calela,
ne tu dxúnzquezu' da wen lazre'.

²⁰ Tu dxennézquezu' da calela chee bi bíchequezu',
Ne dxagu' zria chee bi chee xrná'aquezu'.

²¹ Da caní benu', na' neda' guzúa' zrize.

Gúquenu' naca' tu benne' ca nacu' lue'.
Na'a wadíl-laqueza' lue', ne gulé'eda' lue' ca ba benu'."

²² Le chéajni'i da nigá na'a, le'e dxal-la lázrele Dios.

Ga gaze guzuzruj Dios le'e, ne québedxa sua nu guselá le'e.

²³ Bénnea' guzúg' lawa' da güe lá'ang' neda' gape'
neda' ba lá'ana,

na' bénnea' dxuxuchá cuine' chee guné' da xrlátaje,
gulé'eda' le' ca guselá' le', naca' Dios chee'.

51

¹ Gúcale neda', Dios, lu duté xel-la' dxexache lazre' chiu'.
Duté xel-la' dxexache lazre' chiu' bsula zria da nabaga'.

² Gudibe neda' ca naca da calela da nuna',
ne bca'ana chawe' neda' chee dul-la da bena',

³ lawe' da dxexúnbe'a ca bena' gudábaga' Lue',
ne ca naca dul-la chia' tu dxáguze na zria neda'.

⁴ Lau' Lue' bena' dul-la.

Awe', lau' Lué'queze, ne ba bena' da calela lau' Lue'.

Caní dxaca na chia' chee gaca bea nacu' xrlátaje lu da dxenníu',
ne nacu' du lazre' ca da dxuchi'u chee bénneache.

⁵ Gunná' xque, báchequeze nabaga' dul-la gate gúlajtea',
ne lu dul-la zúaqueza' gate guzrán xrna'a neda'.

⁶ Lue' dxezá lazru' sua da li lu xichaj lázrdawa',
ne lu xichaj lázrdawa' ba bzéajni'inu' neda' da naca sina.

⁷ Bca'ana chawe' neda' nen da na' dxuchínenu',
na' xegá'ana' xrlátaje.

Gudibe neda', na' gaca' chíchedxa ca tu bezxe'.

⁸ Ben xenda' xel-la' dxebé, ne da ba neza,
na' xelexezí' le dipa zrita xu'a, da ba gudichaju'.

⁹ Quebe gusá lazru' ca naca dul-la da bena',
na' bsula xúgute da calela da nuna'.

¹⁰ Dios, bzua neda' tu lázrdawa' xrlátaje,
ne bzua tu be' li lazre' lu xichaj lázrdawa'.

¹¹ Quebe gucuasu' neda' lau' Lue',
ne quebe xeca'u lu xichaj lázrdawa' be' lá'azxa chiu'.

¹² Bexunna neda' xel-la' dxebé chee xel-la' weselá chiu',
ne bzua chuchu be' chawe' da xu'a.

¹³ Nadxa gusédeda' benne' ca' dxelune' da zrinnaj

ca dxaca lazru' xelune',
 na' benne' dul-la ca' xelexexaque' chiu' Lue'.
 14 Bselá neda' lu zria da nabaga', beŋtia' benne'.
 Lue' Dios, nacu' Dios dxuseláu' neda',
 na' gúl-laqueza' chee da xrlátaje nacu' Lue'.
 15 Xran, gusalaj dxu'a,
 na' guzenda' bénneache da dxue lá'ana' Lue'.
 16 Quebe dxaca lazru' béadu ca' gutia'-ba' lau',
 ne quebe dxaca lazru' béadu ca' guzézxea' lau'.
 17 Da guzúadxu lau Dios da dxaca lazre' naca na
 tu lázxdau dxexruj lazre'.
 Tu lázxdau dxexruj lazre', ne da dxexíaje lazre'
 quebe guzú' chalá'ala, Dios.
 18 Dute' xel-la' zri'i lazre' chiu', beŋ gaca chawe' chee
 xezre Sión.
 Bsegula ze'e da nazechaj na xezre Jerusalén.
 19 Nadxa xezaca ba lazru' nen béadu ca' gútentu' lau'
 dute' da naca xrlátaje cheentu',
 ne béadu ca', ne da du ca' guzézxentu' lau'.
 Nadxa xelútie' béadu ca' lu cugu chiu'.

52

1 ¿Bizr chee na' dxucá'ana szren cuinu' chee da calela
 da nunu', lue', benne' wal-la?
 Tu zúazqueze xel-la' dxexache lazre' chee Dios.
 2 Tu dxuchálajzquezu' chee da calela da gunu' chee le sa' ljwezru'.
 Da dxenníu' naca na ca tu xia da nalále'e, dxezí xe'u ljwezru'.
 3 Nazrí'idxenu' da calela quézcala da xrlátaje,
 ne dxedánnedxenu' da wen lazre' quézcala da li.
 4 Nazri'inu' xúgute' dizra' da dxulucá'ana ditaj na bénneache,
 lue', benne' dxezí xe'u.
 5 Chee le na' guzrí'a xi' Dios lue' tu chí'izqueze.
 Waxele' lue', ne xequé'e lue' naga zúaquezu',
 ne gucuase' lue' naga zaj zra' benne' ban ca'.
 6 Xelele'e benne' xrlátaje ca' da nigá, na' xelezrébequeze'.
 Xuluzrízrqueze' chiu' lue', xelenné':
 7 "Le na' xque, benne' nigá quebe bxren lazre' Dios
 chee gucu'uje' le'.
 Bxren lázrequeze' ca naca xel-la' gunnía' zrente' chee',
 ne guzúaqueze' lu da calela da dxune'."
 8 Neda' naca' ca tu xaga olivo xa'a lu xu'u lizre Dios.
 Tu dxuxrén lázrequeza' xel-la' dxexache lazre' chee
 Dios chadía chacanna.
 9 Güe lá'anaqueza' Lue' chadía chacanna lawe' da beŋu' da caní,
 ne cueza lazra' lau Lue' lawe' da naca na xrlátaje lau xúgute'
 benne' chiu' Lue'.

53

1 Benne' xala ca' dxelenná lu lázrdawe': Quebe zua Dios.
 Xúgute' zaj naque' sban, ne zaj nuné' da calela.

Quebe nu chilá' benne' dxunę' da xrlátaje.

² Dios zuę' xabáa dxenné'ę bėnneache
cheę lé'eng' che zua tu benne' sina,
bėnnea' dxape' Dios ba lá'ana.

³ Xúgute benne' zaj nabéaj xíchaje' Dios.

Xúgute' zaj naque' sban.

Quebe nu chilá' benne' dxunę' da xrlátaje, netú guę'.

⁴ Dxenná Dios: “¿Quebe dxelėjni'i benne' caní
dxelunę' da caleļa?

Dxelej'aj dxelawe' da dxelebanę' cheę bėnneache chia',
ne quebe dxelexílaje' neda'.”

⁵ Za zrin zra xelexruse' ca da quebe ne xezezaque',
lawe' da gusedinnaj Dios zrita ca' cheę benne'
guledábague' bėnneache cheę'.

Dios na' nuzúę' chalá'ala benne' ca',
na' bėnneache cheę' xuluzría xi'ę benne' ca'.

⁶ Dxenaba' Dios gunę' dxuaj Sión da gácale' na
benne' Israel ca'.

Gate ba nun Dios xelezrín bėnneache cheę' lu xęzr la xu
cheęqueze',

xelebé zri'ine zre sua Jacob,

ne xelezúa lu da ba neza benne' Israel ca'.

54

¹ Bselá neda', Dios, nen xel-la' waca chiu'.

Gúcale' neda', Dios, nen xel-la' wal-la chiu'.

² Bene da dxenaba' lau', Dios, ne bechebe chia'.

Bęę naga da guchálajęna' Lue'.

³ Za'aca benne' snia ca' xeledíl-lalęę' neda'.

Benne' xichaj zra'a ca' dxelaca lazre' xelútię' neda',

benne' ca' quebe dxelape' ba lá'ana Lue', Dios.

⁴ Dios naque' Benne' dxácalęę' neda'.

Xránadxu Dios zúalęę' benne' ca' dxuluxúę' neda'.

⁵ Ca naca da caleļa dxelún benne' dxeledábague' neda',
xuzrí'i Dios na cheę benne' ca'.

Guzría xi'ę benne' ca' lawe' da naque' li lazre'.

⁶ Du lazra' cu'a da gudéa' lau Lue', Xran.

Güe lá'anaqueza' Lau' lawe' da nácale'ę na xrlátaje.

⁷ Bseláu' neda' lu xúgute' da stębe guzúa'.

Ble'eda' gulebía xi' benne' ca' dxeledábague' neda'.

55

¹ Bęę naga, Xran, ca da dxuchálajęna' Lue',

ne quebe guzú' chalá'ala ca da dxenaba' lau'.

² Guzúa ban lazre', ne bechebe chia'.

Dxuláwizra' Lue' lu da dxuchálaja', ne zua' stębe,

³ lawe' da benne' dxeledábague' neda' dxelenné' chia',

ne lawe' da dxelún la benne' węn da caleļa neda'.

Bulusebague' neda' da zrinnaj,

ne dutę xel-la' dxelezrá'a zaj nau zi' xuzre' neda'.

4 Dxe' gunne xue lázrdawa' lu bēla' dxen chia',
ne dxuchebe xel-la' gute neda'.

5 Zua' lu xel-la' dxezrebe, ne dxezrízqueza',
na' zúalę neda' da dxuchebe na neda'.

6 Na' gunniá': ¿Nuzra gunna neda' xrila tu bsia
cheę cha'a lu be'la naga xezí' lazra'?

7 Da líqueze guzrúnnuja' zítu'la,
na' súaqueza' le'ę xixre' lawe' lataj.

8 Guna' ba xuzre la' lu be' bđunu', ne lu be' wal-la.

9 Bzria xi' benne' ca' dxelunę' da calęla, Xran.

Bzaga naze da dxelunę',
lawe' da ble'eda' da zrinnaj, ne da calęla da dxelunę'
lu xęzre.

10 Te zra chizrela dxeledé' lawe' ze'e da naxechaj na xęzre,
ne dxelunę' da zrinnaj, ne da calęla lu xęzre nigá.

11 Nazratę xęzre nigá da calęla da dxelunę',
ne tu dxelúnzqueze' da wen lazre', ne xel-la' dxezí xę
lu neza cheę na.

12 La guca tu benne' bēnnea' dxedábage' neda',
bēnnea' ben le' chia',

na' bchaga lawa' da na'.

La guca tu benne' dxecuídene' neda' bēnnea' gudábage' neda',
na' bcache cuina' lau le'.

13 Lue', bēnnea', gucu' ca tu le sa' ljwezra'.

Bsi'u neda', ne gucu' tuze neda'.

14 Tu zren bchálajdxu du lázredxu,
ne lu xel-la' zri'i lazre' gudadxu lu xu'u lizre Dios.

15 Dios, ben queła xel-la' gute benne' ca' dxelunę'
da calęla chadite.

Ben xelexú'e lu lataj ba xa' zaj naca bane',
lawe' da nazratę xu'u lizre' da calęla da dxelunę'.

16 Ca naca chia' neda', bláwizra' Dios,
na' Xrana' Dios bselé' neda'.

17 Che zílala, ne wagubizra, ne ca dxebía gubizra
guchálajęqueza' Dios, ne guláwizra' Le',
na' Le' xenne' chia'.

18 Xexá'awę' bēnne' du xu'a lu wedil-la da dxaca chia' neda',
ne gunę' cueza' zri lazra',

lácala zaj zra' zánete benne' dxeledábage' neda'.

19 Wene Dios, na' guzría xi'queze' benne' ca'.

Naque' Bēnnea' zúatequeze' dxenná be'e nédxutę.

Caní gunę' cheę benne' ca' lawe' da quebe dxuluché'e
ca dxelunę', ne quebe dxelezrebe' Dios.

20 Guchisa na' benne' wen da zrinnaj cheę gu'e benne' ca'
dxelebeza zri lazre' nen le'.

Gudíchaję' xrba cheę xel-la' wezría da beņę' nen benne' ca'.

21 Dizra' bchálaję' zaj naca na dizra' zren lazre',

san xu'u lázrdawe' xel-la' dxezrá'a.

Dxunę' xrtante dizra' dxuchálaję',

san zaj naca na ca xia da zaj nalále'e.

22 Bda xua chiu' cuzru Xránadxu, na' Le' gutipe' lazru'.

Québequeze gu'ę lataj cheajchaze benne' chawe' tu chi'ize.

²³ Lue', Dios, gunu' xelexú'u benne' ca' dxelunę'
da caleła lataj ba xa',
benne' dxelute benne', ne benne' dxelezí xe'e,
gate quebe ne xelezrine' gachaj catite dxal-la' xelaca banę',
san neda' guxrén lazra' Lue'.

56

¹ Bexache lazre' neda', Dios, cheę quebe xuluzría xi'
bénneache neda'.

Tu zra tu zra dxulusaca zi' bénneache neda', benne' ca'
dxeledíl-lalęne' neda'.

² Te zra chizrela benne' ca' dxeledábage' neda'
dxulucá'ana dítaje' neda',

lawe' da zaj zra' benne' zante, benne' dxeledíl-lalęne' neda'
lu xel-la' dxulucá'ana szren cuine'.

³ Lu zra dxezreba', dxuxrén lazra' Lue'.

⁴ ¡Dxuxrén lazra' Dios, na' güe lá'ana' xrtizre'!

¿Dxuxrén lazra' Dios, na' québedxa zreba'!

¿Bízraqueze gaca gun bénneache chia' neda'?

⁵ Xúgutę zra dxuluchuque' xrtizra'.

Ca naca da dxelegú'u be'ę zaj naca na cheę xelunę' chia'
da caleła.

⁶ Dxelezrague', ne dxulucache cuine'.

Dxeleenná' xánnie' ca da dxuna'.

Dxelilaj lazre' ca xelunę' xelútie' neda'.

⁷ Dios, bxue ca da dxelunę',

na' dutę xel-la' dxezrá'a chiu' bzria xi' benne' ca'.

⁸ Nézqueznu' Lue' ca dxuzrúnnuja' lau benne' ca'.

Bsa lazre' nisa da ba gudxezra'.

¿Quebe zaj naxúaj na lu xiche chiu'?

⁹ Gate dxuláwizra' Dios, lu zra ná'queze xuluxuzrunnuj
benne' ca' dxeledábage' neda'.

Nézquezda' zúalę Dios neda'.

¹⁰ ¡Dxuxrén lazra' Dios, na' güe lá'ana' xrtizre'!

¡Dxuxrén lazra' Xránadxu, na' güe lá'ana' xrtizre'!

¹¹ ¡Dxuxrén lazra' Dios, na' québedxa zreba'!

¿Bízraqueze gaca gun bénneache chia' neda'?

¹² Nabaga' ca da nachebe lazra' chiu', Dios.

Gúl-laqueza' da güe lá'ana' Lue'.

¹³ Ba bseláu' bénne'du xu'a lu xel-la' gute,

ne bebéaju' ni'a naga zaj zua cheajlechaze na,

cheę gaca chu'a lau Dios lu xel-la' naxaní' da dxunę'
cheę benne' ca' zaj naca banę'.

57

¹ Bexache lazre' neda', Dios.

Bexache lazre' neda', lawe' da dxuxrén lazra' Lue'
dute lázrdawa'.

Quezru' neda' ca dxun bedxuj dxézreba' zrí'ineba'

zran xrlába', cadxa te chee da štebe caní.

² Guláwizra' Dios, Benne' zrenté.

Guláwizra' Dios chee gácalene' neda'.

³ Naga zúate' xabáa chee' sel-le' nu guselá neda' lu na'

bénnea' dxáca lazre' guzría xi'e neda'.

Gusel-la Dios xel-la' dxexache lazre', ne da li chee'.

⁴ Zua' lu da štebe ca tu benne' zue' ládujla bežre xixre' ca'.

Xu'a ládujla bènneache zaj naque' ca bežre xixre' ca'

dxeláguba' bènneache.

Dizra' da dxeleonné' chia' zaj naca na ca tu xia natuche',

ne xaga nalá xéche'ze ca',

na' xrtizre' zaj naca na ca tu xia da nalále'e.

⁵ Xega'ana szrénquezu' lu xabáa, Dios.

Xel-la' szren chiu' sua na lawe' duté xezr la xu.

⁶ Ba zaj nabeche' xralaj chee xelél-le' neda'.

Ba dxedú lazra' lu da dxaca chia'.

Ba zaj naxene' tu xedxu chee cheajházia' lu'ule na.

Lu'ule da na' ba xeajlecházqueze le'.

⁷ Ba zúatequeze lázrdawa', Dios.

Ba zúatequeze lázrdawa' chee gúl-laqueza' da güe lá'ana' Lue'.

⁸ Bebán lazre', bènne'du xu'a, ne le xebán lázrele,

le'e dxínnele da dxúl-lalenle, ne da zríadi'i na du.

Che zílala chásaqueza'.

⁹ Güe lá'anaqueza' Lue' ládujla bènneache chiu', Xran.

Gúl-laqueza' chiu' lau benne' xúguté cue' xezr la xu,

¹⁰ lawe' da naca xel-la' dxexache lazre' chiu' zrendxa ca xabáa,

na' da li chiu' naca na zrendxa ca beuj bza ca'.

¹¹ Xega'ana szrénquezu' lu xabáa, Dios.

Xel-la' szren chiu' sua na lawe' duté xezr la xu.

58

¹ Le'e dxenná beale ¿da li dxuchálajle da naca xrlátaje?

¿Dxuchi'ale ca naca da li chee bènneache chia'?

² ¡Cabíze'!

¡Lu lázrdaule dxugú'u beale da zrinnaj!

¡Stébele'e dxuzúale bènneache lu xezr la xu chia'!

³ Zaj nazrinnaj lázxdau benne' ca' zaj nabéaj xíchaje' neda'

gate gulálajte'.

Belexase dínnaje' dxelún lazre' gate gulezante' xrne'e le'.

⁴ Dizra' da dxeleonné' zaj naca na da dxelute bènneache

ca da zria zran lazxa bela'.

Zaj naca na ca bela' snia, be nácaba' be cuezru.

⁵ Quebe dxenba' chi'i benne' dxunné' leba'

lácala dxennéle'e xrtandau'.

⁶ Dios, gudichaj lázxa benne' ca'.

Gudichaj, Xran, lazxa benne' ca' zaj naque' ca bežre xixre' ca'.

⁷ Beñ xelexenítie' ca nisa da dxelalaj na lu xu.

Gate dxulusane' xaga nalá xéche'ze chee',

beñ xeledé na chalá'ala.

⁸ Beñ xeledé chee' ca dxaca chee be zaga dxelexexúnaba'.

Beñ quebedxa xelélé'ene' gubizra ca tu bidau' dxálajbe'

ba nátebe'.

⁹ Nédxula gate quebe ne la xesu' lu xi' xecá'a Dios benne' ca' tu lu be' bduunu', benne' zaj naca bang', ne benne' ca' zaj zua xelatié'.

¹⁰ Wabé benne' xrlátaje gate lé'eng' xebéaj lazre' Dios benne' ca' dxeluné' da caléla.

Guchuchu guléajé' dxen cheé benne' zaj nabéaj xíchajé' Dios.

¹¹ Nadxa nñé bénnea': "Da líqueze de lazruj cheé benne' xrlátaje.

Da líqueze zua Dios, Bénnea' dxuchi'e cheé bénneache zaj zré'e lu xezr la xu."

59

¹ Bselá neda' lu na' benne' ca' dxeledábague' neda', Dios chia'.

Bselá neda' lu na' benne' ca' dxeluné' chia' da caléla.

² Bselá neda' lu na' benne' ca' dxeluné' da zrinnaj.

Bselá neda' lu na' benne' ca' dxelutié' benne',

³ lawe' da dxelilaj lazre' xelútié' neda'.

Zaj nazraga benne' wal-la ca' cheé xeledíl-lalene' neda',

quegá lawe' da bi zria nabaga', ne quegá ne cheé dul-la nuna' neda', Xran.

⁴ Lácala quebe bi bēna' cheé benne' ca',

zá'aca chégüé', ne dxulucueze' bi xeluné' chia'.

Bebán cheé xidu' naga zua', na' le'enu' da dxeluné'.

⁵ Lue', Xran, Dios cheé benne' zan dxjaque' wedil-la, ne Dios cheé benne' Israel ca',

bebán cheé gudéu' ba xa' benne' xúgute' cue' xezr la xu.

Quebe xexache lazru' xúgute' benne' ca' dxeledábague' Lue', ne dxeluné' da zrinnaj.

⁶ Xelelé'e gate cuía gubizra, ne xelebezre xé'e ca dxelún becu', na' xeléchajé' xezre.

⁷ Gunná' xque, da dxuluchálajé' naca na ca da dxelexexébe'.

Dizra' dxelenné' zaj naca na ca xia zaj nalá na,

lawe' da dxelenné': "¿Nuzra xene?"

⁸ Lue', Xran, guzrizru' cheé benne' ca'.

Gun lau' cheé benne' xúgute' cue' xezr la xu ca'.

⁹ Zaj naca wal-la benne' ca' dxeledábague' neda'.

Cueza lazra' Lue' lawe' da dxucu'uju' neda', Dios.

¹⁰ Dios, Bénnea' dxexache lazre' neda', cuía lawe' lawa' neda'.

Dios guné' le'eda' gaca cheé benne' ca' dxeledábague' neda' ca da dxezá lazra'.

¹¹ Quebe gutiu' benne' ca', cheé quebe xelal-la lazre'

bénneache chia' ca da gunu'.

Bese dinnaj benne' ca' nen xel-la' waca chiu'.

Lue', Xran, Benne' dxucu'uj netu', ben cheajlecházíe'.

¹² Ben xeledulé' lu xel-la' dxulucá'ana szren cuine', ne cheé dul-la dxeluné' lu da dxuluchálajé',

ne ne cheé dizra' schanni', ne da wēn lazre' da dxelenné'.

13 Bzria xi'e lu xel-la' dxezrá'a chiu'.
 Bzria xi'e chee québedxa xelezúe'.
 Dios, bēn xeleque be'ene' dxenná be'enu' zri'ine zre sua Jacob.
 Dxenná be'u du ca naca xēzr la xu.

14 Dxelelé'e gate dxebía gubizra, ne dxelebezre xē'e
 ca dxelún becu', ne dxeléchaje' xēzre.
 15 Dxeledé' ca benne' dxeledaze', dxelílaje' da xelawe',
 na' che quebe dxeléljane', na' du xēla dxelawe' zria tue' xetúe'.

16 Neda' gúl-laqueza' chee xel-la' waca chiu',
 na' che zílala güe lá'ana' xel-la' dxexache lazre' chiu',
 lawe' da gúcaleñu' Lué'queze neda',
 ne bcu'uju' neda' gate guzúa' lu da stébele'e.
 17 Lue' dxutipu' lazra', na' gúl-laqueza' chiu',
 lawe' da nacu' Lue', Dios, Bénnea' dxucu'uje' neda',
 ne Dios, dxexache lazru' neda'.

60

1 Dios, Lue' ba bzu' netu' chalá'ala, ne bēnu' xeajcházentu'.
 Bzrá'ale'ēnu' netu'.
 Na'a bedá gácaleñu' netu'.
 2 Bēnu' guzrú' xēzr la xu, ne bēnu' bxalaj na.
 Bexún na naga bxalaj na lawe' da dxebía xi na.
 3 Bēnu' blé'entu' netu', benne' chiu', da naca stébele'e.
 Bēnu' guca cheñtu' ca güé'entu' tu da bēn na xeajcházentu'.
 4 Bnézruju' tu da dxulé'e lau chee benne' dxelezrebe' Lue',
 Da xeluxre' chee gulé'e lau da naca li.
 5 Chee xelelá benne' ca' nazrí'iqueznu' Lue',
 bsel-la le' dute xel-la' waca chiu', ne bene chia'.
 6 Dios gunné' lu lataj lá'azxa chee': "Wabéquezda' neda'.
 Gunna' late weaj cheele xēzr la xu chee benne' Siquem,
 ne gudxixra' cheele xēzr la xu de cuita xēgu Sucot.
 7 Chia' naca xēzr la xu Galaad, ne chia' naca xēzr la xu
 chee zri'ine zre sua Manasés.
 Xēzr la xu chee zri'ine zre sua Efraín naca na ca
 tu da napa chí'i na xíchaja'.
 Xēzr la xu chee zri'ine zre sua Judá naca na naga dxenná be'a.
 8 Xēzr la xu chee benne' Moab naca na ca tu
 zriga' da xuzru nisa guná'a,
 na' xēzr la xu chee benne' Edom guchichan' nen zrela'.
 Si'a ba neza xēzr la xu chee benne' Filistea."
 9 ¿Nuzra che' neda' chee guzétaja' xēzre da naxechaj na
 ze'e sibe?
 ¿Nuzra che' neda' chee guzétaja' benne' Edom ca'?
 10 ¿Quegá Lue' na' che' u neda', Dios, nacu' Bénnea'
 bzue' netu' chalá'ala,
 ne quebe guxeájñe' benne' cheñtu' ca', benne' dxjaque'
 wedil-la?
 11 Gúcale netu' chee séquentu' tíl-lalēntu' benne' ca'
 dxeledíl-lalēne' netu',

lawe' da naca dácheze xelácale bénneache netu'.
 12 Tu zren nen Dios gundxu tu da zrente,
 na' Le' gulague' benne' ca' dxeledil-lalene' dxi'u.

61

1 Bene, Dios, da dxuláwizra' Lue'.
 Bze naga da dxuchálajlena' Lue'.
 2 Zitu' naga zua lazria' dxuláwizra' Lue', lawe' da dxedú lazra'.
 Guché' neda' naga zua Bénnea' naque' ca tu xi'a xiaj,
 Bénnea' nácadxe' szren ca neda',
 3 Nacu' Lue' Benne' nuxrue' neda',
 ne nacu' ca tu ze'e xiaj da dxucu'uj na neda' lau benne' ca'
 dxeledábage' neda'.
 4 Tu súazqueza' lu xu'u lá'azxa chiu'.
 Sua chawa'a cuitu' Lue' ca zaj zua chawe' bedxuj dxé'enedu ca'
 zran xrila bedxuj.
 5 Lawe' da bennu' Lue', Dios, ca da guchebe lazra' chiu',
 benu' napá' ca da dxelapa benne' ca' dxelezrebe' Lue'.
 6 Gunu' gaca bana' neda', wenna' bea, zánete' zra.
 Iza chia' xelaca na ca da zaj naca chee' chupa cuen bénneache.
 7 Tu súazqueza' lau', Dios.
 Bcuezza xel-la' dxexache lazre' chiu', ne da li
 chee' xulucá'ana chawe' na neda', wenna' bea.
 8 Caníqueze gúl-laqueza' chee' lau' tu chí'izqueze,
 ne gúnqueza' tu zra tu zra ca da guchebe lazra'.

62

1 Tuze nen Dios dxebeza zri lazre' bénne'du xu'a.
 Léqueze' dxuselé' neda'.
 2 Tuze Le' dxucu'uje' neda', ne dxuselé' neda'.
 Naque' Bénnea' dxuxre' neda', na' quebe negue lazra'.
 3 ¿Ajatezcha' gucuézale da gunle chee' tu benne',
 na' dxunle ba xen xúgutele guzría xile le',
 ca dxun tu benne' dxuchínnaje' tu ze'e da ba de' chalá'ala,
 u tu le'aj da ba guzru'?
 4 Dxunle tuze dizra' ájazra xebéajle neda' lu xel-la' szren chia'.
 Nazrí'ile da wen lazre'.
 Nen dxú'ale dxennele da xrlátaje, san xu'u lárdaule da calela.
 5 Lue', bénne'du xu'a, guleza lazre' tuze Dios,
 lawe' da naca Le' Bénnea' dxebeza lazra'.
 6 Tuze Le' dxucu'uje' neda', ne dxuselé' neda'.
 Naque' Bénnea' dxuxre' neda', na' quebe negue lazra'.
 7 Naca Dios Bénnea' dxuselé' neda', ne naque' da ba neza chia'.
 Naca Dios Bénnea' dxucu'uje' neda', ne Benne' dxuxre' neda'.
 8 Le cueza lazre' Le' tu chí'izqueze, le'e, bénneache.
 Le xe'e ca da dxezá lázrele.
 Naca Dios Bénnea' dxuxre' dxi'u.
 9 Da líqueze, da dácheze zaj naca bénneache,
 ne ca tu da wen lazre' benne' zren ca'.
 Quebe bi dxelé'e tu lu zrgú'unsá.

Zaj nácadxę' zraze ca tu be' da dxecá'a lázredxu.

¹⁰ Quebe guxrén lázrele da sile gate dxexúbele,
ne quebe gucá'ana szren cuínale cheę da ca' dxebanle.
Che dxeğula xel-la' gunní'a cheęle, quebe xezaca ba lázrele
cheę da na'.

¹¹ Tu lászaze gunná Dios:
na' chupa lasa benda' da nigá:
Cheę Dios naca xel-la' waca.

¹² Chiu' Lue', Xran, naca xel-la' dxexache lazre'
lawe' da dxunézruju' lazruj cheę tu tu bėnneache
cátęze da zaj nune'.

63

¹⁻² Dios, Lue' nacu' Dios chia'.

Dxebile bėnne'du xu'a da naca chiu',
na' bėla' dxen chia' dxezá lazre' na da naca chiu'.
Naca chia' ca zúaqueza' tu xęzr la xu bizre naga
quebe bi nisa de.

Dxani'siseze xida' lau Lue' cheę le'eda' xel-la' waca chiu',
ne xel-la' szren chiu',
cátęze ba ble'eda' da naca chiu' lu lataj lá'azxa chiu'.

³ Cháwedxa naca xel-la' dxexache lazre' chiu'
ca xel-la' nabánqueze.

Cheę le na' güe lá'anaqueza' Lue'.

⁴ Caníqueze nnia' chiu' da xrlátaje dxácatę naca bana'.

Cheę gucá'ana szrena' Lau' chísaqueza' na'a.

⁵ Xélaje bėnne'du xu'a da naca na ca bęse zrita,
ne bėla' da dxánnele'e,

na' dutę xel-la' dxebé güe lá'anaqueza' Lue'

⁶ gate dxajsá lazra' chiu', ne dea' ga dxata',
ne gate dxulaba lazra' ca naca chiu' gate dxennaza' chizrela.

⁷ Lawe' da dxácalenu' neda', bėle'ęda' cuitu'
ca dxelún bedxuj dxé'enedu ca' zran xrila bedzuj.

⁸ Naca bėnne'du xu'a Lue' tuze.

Nen na'u wal-la nuxru' neda'.

⁹ Benne' ca' gulezá lazre' xuluzría xi'ę neda'
cheajlecházię' lataj ba xa'.

¹⁰ Xelebía xi'ę lu xia nalá.

Xelaque' da xelagu becu' xixre' ca'.

¹¹ Neda', wenná bea, beda' lu da naca cheę Dios.

Xegá'ana ba lá'ana nüteteze benne' dxuluchínene' la',
lawe' da xelexxuj dxu'a benne' ca' dxelennę' da węn lazre'.

64

¹ Dios, bęe naga chi'a lawe' da zua' stebe dxuláwizra' Lue'.

Bxue xel-la' nabán chia' lawe' da dxezreba' bi xelún benne' ca'
dxeledábage' neda'.

² Bcache chawe' neda' cheę quebe xelún benne' węn
da calęla chia' ca da dxelezá lazre',
ne cheę quebe xelún benne' dxelún da zrinnaj chia'
ca da zaj nune' xelune' chia'.

- 3 Dizra' dxuluchálaję' zaj naca na ca xia zaj nalále'ę na,
ne dxeleńńę' schanni' ca dxun tu benne' dxusanę'
xaga nalá xęche'ze cheę'.
- 4 Caní dxeleńńę' bagácheze cheę xelunę' cheajlechaze
benne' zaj naque' li lazre'.
Chaditę dxelunę' na, ne quebe bi dxelezrebe'.
- 5 Dxelunę' ba xuzre xelunę' da zrinnaj da zaj nunę' xelunę',
na' dxuluzúę' xralaj ca' cheę xelele' bęńneache,
dxeleńńę': "¿Nuzra le'e da dxundxu?"
- 6 Dxelilaję' ca zaj naca da zrinnaj xelunę',
ne dxeleńńá' xáńńię' ca zaj naca na.
Ca da zaj xu'u xichaj lázrdawę' zaj naca na stębele'ę
ca zaj naca lázrdauqueze'.
- 7 Dios gunę' benne' ca' wę' nen tu xaga nalá xęche'ze cheę'.
Chaditę xelu'ę xizrawę' zren ca'.
- 8 Dizra' buluchalaj benne' ca' xelún na cheajlecházię',
na' xelezrebe xúgutę bęńneache gate xelele'ęne' benne' ca'.
- 9 Nadxa xelezrebe xúgutę bęńneache, ne xuluzenne'
ca da nun Dios,
na' xuluxúnbe'ę ca zaj naca da bęne' Le'.
- 10 Bęqueze benne' xrlátaje lau Xránadxu, ne guxrén lazre' Le',
na' xelezúa lu da ba neza xúgutę benne' zaj naque' li lazre'.

65

- 1 Naca chiu' Lue', Dios, güe lá'anantu' Lue' lu xęzre Sión,
na' guntu' da guchebe lázrentu' chiu'.
- 2 Lue' dxénqueznu' da dxuchálajęntu' Lue',
na' xelelá' lau Lue' xúgutę bęńneache.
- 3 Nabágale'a da zrinnaj da bęna',
san Lue' dxunite lau' ca da gudábagantu' Lue'.
- 4 Ba neza zrentę naca na cheę bęńnea' dxeca'u Lue',
ne dxenníu' le' gaque' chiu', cheę súaqueze' lataj lá'azxa chiu'.
Xélajquezentu' da xrlátaje da de lizru', da ca' da zaj de
xudau' lá'azxa chiu'.
- 5 Lu da xrlátaje chiu' gunu' da zaj naca zrentę gate gunu'
ca da dxenábantu' Lue', Dios, Benne' dxuselę' netu'.
Xúgutę bęńneache zaj zra' dutę xęzr la xu dxelebeza lazre' Lue',
ne cá'anqueze dxelebeza lazre' benne' dxeledęę'
zítu'la lawe' nísadau'.
- 6 Lué'queze dxuzúa chuchu' xi'a zren ca' nen xel-la' waca chiu'.
Nácaquezu' Benne' wal-la.
- 7 Dxebeche zriiu' nísadau' gate dxelucu na,
ne schaga da dxelún xęajxruza cheę na.
Dxebeche zriiu' benne' xęzr la xu gate dxeledábague' Lue'.
- 8 Cheę le' na' benne' zaj zre'ę dutę xęzr la xu
xelezrebe' ca naca da zrentę da dxunu'.
- Dxuzú' lu da ba neza bęńneache zaj zra' du gab'í xęzr la xu.
- 9 Dxenna'u xęzr la xu, ne dxesel-lu' nisa xiuj.
Dxunu' dxúnnałę'ę na lina cheę na.
Nuzúaquezu' lu xęzr la xu xęgu ca' da zaj dełę'ę na nisa.

Dxucuezu' zrua' za da xelagu bėnneache,
ca ba núnquezu' gaca na.

¹⁰ Dxesel-lu' nisa xiuj naga ba zaj nuneġ' na'.

Dxunu' dxexaca na xu xa'a.

Dxuculu na nen nisa xiuj na'.

Dxunu' dxelegula chawe' da du ca' ba zaj naxaza na.

¹¹ Dxunu' dxelexezi' bėnneache ba neza tu iza tu iza
neġ' cheġ da dxunėzruju',

na' ca zaj naca beuj bza chiu' dxelunna na xiuj

da dxun na dxelegula chawe' da zaj naza bėnneache.

¹² Dxelunna na xiuj naga dxeledá be xixre' du ca' da dxeláguba',
na' dxelebé bėnneache dxelelé' eng' ca bane zaj zua xí'adu ca'.

¹³ Lache' ca' zaj zra' zřila' ca',

na' dxu'a xėgudu ca' zaj naxaza zrua' xřila,

na' dxelebezre xa'a bėnneache chiu' dutė xel-la' dxelebé,
ne dxelúl-laqueġ' chiu'.

66

¹ Le gucá'ana szren Dios dutė xel-la' dxebé,
le'e zrale dutė xėzr la xu.

² Le gul-la ca naca xel-la' szren cheġ le'.

Le gucá'ana szreneġ' gate dxue lá'anale Le'.

³ Le xė Dios: "Dxebáneleġ'equezentu' ca zaj naca da nunu'."

Neġ' cheġ xel-la' szren cheġ xel-la' waca chiu' xuluzúa
xřtızru' benne' ca' dxeledábague' lue'.

⁴ Xúgute bėnneache zaj zra' dutė xėzr la xu xelúe
lá'anaqueze' Lue', ne xelúl-laqueze' chiu'.

Tu xelúl-lazqueġ' cheġ Láquezu'.

⁵ Le da, lé'ele ca zaj naca da nun Dios.

Da zřébedxu zaj naca da beġe' cheġ benne' ca'
beluneġ' da calela.

⁶ Beġe' bexaca nısadau' xu bizre.

Guledé bėnneache cheġ' ní'aze' naga nedxu de tu xėgu situj.

Dxu'a nısadau' na' gubéleġ'edxu lau Dios.

⁷ Dutė xel-la' waca cheġ' nna be'e chadıa chacanna.

Dxuxúequeze' ca da dxelún bėnneache dutė xėzr la xu.

Bxunu' dxeledábague' Le' quebe xelezrué'equezne' xel-la' szren.

⁸ Le'e, bėnneache, le gucá'ana szren Dios cheġdxu,

ne le guzén bėnneache ca da dxue lá'anale Le'.

⁹ Léqueze' bxue' dxi'u cheġ naca bandxu,

ne quebe be'e lataj cheajcházedxu.

¹⁰ Lué'queze bxu' netu' ca da beġtu', Dios.

Bdeu' netu' xel-la' zi' ca dxelún bėnneache dxuludé'
xia plata lu xi' cheġ xegá'ana chawe na.

¹¹ Beġu' xeajchú'untu' tu lu xralaj.

Bda'u cúzruntu' tu xua zí'ile'e.

¹² Beġu' guledé xıchajntu' benne' zaj zřie' bzřina' cheġ' ca'.

Gudentu' tu lu xi', ne tu lu nisa situj,

na' bebéaju' netu', ne bzu' netu' tu lataj naga zúantu'
lu da ba neza.

13 Chú'unqueza' lu xu'u lizru' cheę guzézxea' béadu ca',
ne gunna' chiu' ca da guchebe lazra' guna',

14 da na' guchebe lazra' ca da gunnia'
gate guzúa' lu da stébele'e.

15 Guzézxea' béadu ca', be dxelanne lau' Lue',
ne guna' cuen zren cheę zríla'du ca' lau',
ne gutia' bezre ca', ne chivo biu ca' lau'.

16 Le da, xénele, xúgutele dxezrébele Dios,
na' guzenda' le'e ca da bene' gúcalene' neda'.

17 Du lazra' bláwizra' Le',
ne bca'ana szrénqueza' Le'.

18 La guzé lazra' tu da calęla,
quebe ben Xránadxu chia'.

19 Da líqueze bene Dios chi'a.
Bze nague' ca da gunábeda' Le'.

20 ¡Gaca báqueze Dios!
¡Quebe bzuę' chalá'ala da bchálajęna' Le',
san bexache lazre' neda'!

67

1 Dios, bexache lazre' netu', ne ben da chawe' cheętu'.
Dute xel-la' zri'i lazre' chiu' guzúale netu',

2 cheę xelúnbea bėnneache du gab'i xęzr la xu
ca naca da dxaca lazru',
ne cheę xeleneze bėnneache dute xęzr la xu
ca dxuseláu' bėnneache.

3 Xúgute bėnneache dxelúe lá'ane' Lue', Dios.
Dxelúe lá'ana xúgute bėnneache Lue'.

4 Le be, ne le sua lu da ba neza, le'e, bėnneache dute xęzr la xu,
lawe' da guchi'a Dios cheęle ca naca da xrlátaje,
ne guxúqueze' xúgute bėnneache.

5 Xúgute bėnneache dxelúe lá'ane' Lue', Dios.
Dxelúe lá'ana xúgute bėnneache Lue'.

6 Xęzr la xu nigá ba zria na lina cheę na,
lawe' da ben Dios cheędxu da chawe' cheędxu.

7 Dios ba bene' chawe' cheędxu,
na' gáteteze dxal-la' xelapa bėnneache Le' ba lá'ana.

68

1 Guzé, Dios, ne beşe dinnaj benne' ca' dxeledábage' Lue',
ne ben xuluzrunnuj benne' ca' dxelecuídene' Lue'.

2 Ca dxun tu be', dxulaga na zren cheę xi',
ca' gulagu' benne' ca'.

Ca dxuna xina' lu xi', ca' xelexenite benne' ca' lau Dios,
benne' ca' dxelune' da zrinnaj.

3 Xelebé benne' xrlátaje ca', ne xelezúe' lu da ba neza lau Dios,
ne xelexrítequeze' lu xel-la' dxelebé cheę'.

4 ¡Le gul-la cheę Dios!

¡Le gul-la da du ca' chee Láqueze'!

¡Le gucá'ana szren Bénnea' dx'e' xabáa, nazí le' Jah!

¡Le be lau Le'!

⁵ Ca xra bi dx'é'enedu ca', ne ca benne' dxuxúe
nu'ula ca' zaj zue' tuze,

naca Dios lu lataj lá'azxa naga zúaqueze'.

⁶ Dxun Dios xelezúa xrtia ljwezre bénneache quebe nu
xrtia ljwezre' zaj zra'.

Dxebéaje' benne' zaj xu'e' lu na' benne' zitu' ca'
chee xelezúe' lu da ba neza.

Benne' ca' dxeledábaga Dios zaj zue' tu lu xezr la xu bizre.

⁷ Dios, gate bdxúaju' lau bénneache chiu',

ne gudáu' lu xezr la xu bizre na',

⁸ na' guzrú' xezr la xu na'.

Cá'anqueze gúcale'e xiuj lau Dios.

Xi'a Sinaí guzrize na lau Dios,

Dios chee benne' Israel ca'.

⁹ Gusel-lu' tu nisa xiuj zílale'e, Dios.

Gate belexedú lazre' bénneache chiu', Lue' btipu' lazre'.

¹⁰ Bénneache zaj naca chiu' zaj zúaqueze' lu xezr la xu chiu'.

Dute da chawe' chiu', Dios, dxuxú' benne' xache' ca'.

¹¹ Xránadxu Dios gusel-le' tu dizra' chawe',

na' gulezrá' benne' zante, benne' buluzenne' bénneache
ca naca dizra' chawe' na'.

¹² ¡Buluzrúnnuje'!

¡Buluzrúnnuj wenná bea ca' nen

ca naca benne' chee' dxjaque' wedil-la,

na' benne' ca' zaj nagá'ana lu xu'u lizre' belexequé'e

da bulucá'ana benne' ca' buluzrúnnuje'.

¹³ Lácala bcache cuínale naga dxuxúele zrila' ca',

gacu zra lánale da naca na ca xrila bgúgudu ca' da

zaj nazí lechítaje na plata,

na' dube' chee xrílabá' ca' zaj nazí lechítaje na oro.

¹⁴ Gate bese dinnaj Dios zrente wenná bea ca' lataj na',

na' bexrui bezxe' da bgacu na xi'a Salmón.

¹⁵ Tu xi'a zrente naca xi'a Basán.

Tu xi'a zri'ana naca xi'a Basán na'.

¹⁶ ¡Bizr chee na' dxenna'le, le'e, xi'a zri'ana ca',

xi'a na' naga dxaca lazre' Dios súaqueze'?

Da líqueze súaqueze Xránadxu lu xi'a na' chadía chacanna.

¹⁷ Da zaj naché' benne' ca' lu wedil-la da napa Dios

zánete cue' gaxúa zaj naca na.

Xránadxu Dios zezé'e xi'a Sinaí chee sue' lataj lá'azxa chee'.

¹⁸ Begüénu' xabáa, zeché'u benne' ca' bebéaju'

lu na' xel-la' gute,

na' guzi'u da chawe' ca' da belunna bénneache,

ne cá'anqueze guzúa da bennu' chee benne' ca'
 guledábague' Lue',
 chee súaquezu' ládujla bénneache, Dios, leu' Jah.
 19 ¡Gaca ba Xránadxu!
 ¡Tu zra tu zra dxusezrate' dxi'u da chawe' chee'!
 ¡Naque' Dios, dxuselé' dxi'u!

20 Dios, Bénnea' naque' Dios cheedxu guselé' dxi'u.
 Léqueze Xránadxu Dios guselé' dxi'u lu na' xel-la' gute.

21 Da líqueze Dios gune' we' xichaj benne' ca'
 dxeledábague' Le'.
 Gune' we' xichaj benne' quebe dxulusane' ca zaj naca
 dul-la da dxelune'.

22 Gunná Xránadxu: "Guna' xezrinle lázrele,
 xeza'ale lu xi'a Basán.

Guna' xeza'ale lu da situj chee nísadau', xezrinle lázrele,

23 lawe' da guna' guchuchu guléajle dxen chee benne' ca'
 dxeledábague' le'e,

na' xelelé'e becu' chee dxen chee benne' ca'."

24 Belelé'e bénneache ca guledá bénneache chiu' belúe
 lá'ane' Lue', Dios.

Dute xel-la' dxelebé gulu'e lataj lá'azxa chiu', Dios,
 Wenná Bea chia'.

25 Benne' ca' dxelul-la zeajzrie' láwe'la,

na' benne' zaj nu'e da dxulucuezre' zja'aque' bzébela.

Ládujla zjaca nu'ula cuíde'du ca' zaj núxrube'
 da du ca' dxulusézxebe'.

26 Le güe lá'ana Dios naga zaj nazraga bénneache chee'.

Le güe lá'ana Xránadxu, le'e nácale zri'ine zre sua Israel.

27 Zaj zra' zri'ine zre sua Benjamín na', guque' benne'
 cuídedxa, na' dxelenná be'e.

Zaj nazraga benne' xíchaje chee zri'ine zre sua Judá na',

ne benne' xíchaje chee zri'ine zre sua Zabulón,

ne benne' xíchaje chee zri'ine zre sua Neftalí.

28 Dios, ble'e lau xel-la' wal-la chiu'.

Bzua chacha, Dios, da na' benu' cheentu'.

29 Ne chee xel-la' szren chee xudau' chiu' da zua na
 xezre Jerusalén,

xelegú'u benne' wenná bea ca' da xelunne' lau'.

30 Gudil-la benne' dxjaque' wedil-la chee dute xezr la xu

zaj nazrague' chee xeledíl-lalene' Lue',

benne' ca' zaj naque' ca bezre zan ca' nen biadu cheeba' ca',
 cadxa xuluzúa xúgute' dizra' chiu',

na' xelunne' ca naca xia plata da zaj nape'.

Bese dinnaj benne' dute xezr la xu dxelexezaca ba lazre'
 xelezúe' lu wedil-la.

31 Xelelá' benne' xíchaje chee xezr la xu Egipto.

Benne' xezr la xu Etiopía xeluné' ba xen xulucá'ana szrene' Dios.

32 ¡Le gul-la chee Dios, le'e zrale du gabí'i xezr la xu!

¡Le gul-la chee Xránadxu!

33 ¡Le gul-la chee Bénnea' dxe'e xabáa na'ala,

da zua na nédxutē!

¡Le nna' xque, wanné', ne zízrajle'ē nne'!

³⁴ ¡Le nne nápalē'ē Dios xel-la' waca!

¡Lu xel-la' szren chee' dxuxúequeze' benne' Israel ca',

na' zran xabáa nalá' xel-la' waca chee'!

³⁵ Benne' zrébentu' nacu' Lue', Dios,

naga zu' lataj lá'azxa chiu'.

Dios chee' benne' Israel ca', Léqueze' dxutipe' lazre'

bénneache chee'.

¡Gaca ba Dios!

69

¹ Bselá neda', Dios.

Naca' ca tu benne' dxepē' lu nisa.

² Naca' ca tu benne' xu'ē lu guzra' situj, ne quebe dxaca se'ē.

Naca' ca tu benne' xu'ē lu nisa sítujle'ē,

na' nisa na' ba dxacu na xíchajē'.

³ Ba dxajxréqueda' lawe' da ba gunnéle'a, ne ba da lba'a.

Ba dxelátetē lawa' dxenná'a gácalē Dios neda'.

⁴ Ba naxándxa benne' dxelecuídenē' neda' ca naxán

xicha xíchaja', ne quebe bi de bi nuna'.

Zaj naca benne' wál-lalē'ē benne' dxeledábage' neda',

benne' ca' dxuluzría xi'ē neda', ne quebe bi de bizr chee' na'.

¿Dxal-la' quízruja' da quebe gulana'?

⁵ Dios, nézqueznu' Lue' naca da xálaze da nuna',

ne dxelé'equeznu' dul-la da bēna'.

⁶ Quebe gu'u lataj xelexedué'e ne chia' neda' benne' ca'

dxuluxrén lazre' Lue', Xrana' Dios szrente.

Quebe gu'u lataj xeleque zréaje ne chia' neda' benne' ca'

dxelebeza lazre' Lue', Dios chee' benne' Israel ca'.

⁷ Lawe' da nazrí'ida' Lue' bulucháchalēnē' neda',

na' lu xel-la' stu' zúaqueza'.

⁸ Ca tu benne' zitu' naca' lau bi bícha'dau' ca',

ne quebe zaj núnbea bi chee' xrna'a neda'.

⁹ Lawe' da dxé'le'a gunne xue chee' lizru' dxal-la na

lu lázrdawa'.

Gate dxelenné' benne' ca' schanni' chiu' Lue', Dios,

naca ca dxelenné' schanni' chia' neda'.

¹⁰ Gudxezra', ne bēna' gubasa, na' bde cuina' xel-la' zi',

na' chee' le' na' bulucháchalēnē' neda'.

¹¹ Cá'anqueze bgacu cuina' zra lana' tuzruj.

Buluzúe' neda' ca tu da dxulé'e na da baxache' zrente.

¹² Gulenné' chia' benne' ca' zaj xu'ē xu'u lawe',

na' benne' ca' dxelezuzre' belún le' chia' lu da belul-le'.

¹³ Neda' bláwizra' Lue', Xrana' Dios, lu zra

dxezaca ba lazru' Lue'.

Dios, lu xel-la' dxexache lazre' zren chiu', ne lawe' da

líqueze nacu' weselá cheentu', bene chia'.

¹⁴ Bebéaj neda' lu da stebe zua', naca' ca tu benne'

xu'ë lu guzra' situj, ne quebe gu'u lataj cházedxa'.

Bselá neda' lu na' benne' ca' dxelecuídenë' neda'.

Naca' ca tu benne' xu'ë lu nisa situj.

¹⁵ Quebe gu'u lataj gatia' ca tu benne' xegache' lu nisa situj,
ne quebe gaca' ca tu benne' chu'ë lu da situj,
ne quebe gaca' ca tu benne' cheajchazie' tu lu xedxu situj.

¹⁶ Bechebe chia', Xrana' Dios, lawe' da chawe' naca
xel-la' dxexache lazre' chiu'.

Gudá, gúcale neda', lawe' da zrente naca xel-la'
dxexache lazre' chiu'.

¹⁷ Gunná' xque ca da dxaca chia' neda', wen zrin chiu'.
lawe' da zua' lu da stébele'ë, ben ba xuzre xennu' chia'.

¹⁸ Gudá naga zua', ne bselá neda'.

Bselá neda' lawe' da zaj naxánle'ë benne' ca'
dxeledábage' neda'.

¹⁹ Lue' nézqueznu' ca dxulucháchalëne' neda', ne ca zua'
lu da stébele'ë, ne ca dxulucá'ana dítaje' neda'.

Dxelé'eqeznu' xúgutë benne' ca' dxelecuídenë' neda'.

²⁰ Lawe' da dxelún le' chia' dxedú lazra', ne zua' lu da stébe.
Guleza' nu benne' xexache lazre' neda', san quebe nu chilá'.
Guleza' nu benne' xelexúe zrene' neda', san quebe nu chilá'.

²¹ Bulugawe' neda' da sla',
na' gate gubíleda', buluxí'aje' neda' da zichaj.

²² Ca naca laní cheë benne' ca' ben gaca na ca tu
xralaj naga cheajlecházie',

ne ben xexaca da ba neza cheë' tu da gun na cheajlecházie'.

²³ Ben xelexchul-la xiaj lawe' cheë québedxa xeledé'engë',
ne ben tu xelexrízrezqueze benne' ca'.

²⁴ Dute' xel-la' dxezrá'a chiu' ble'e benne' ca',
ne dutë xel-la' xichaj zra'a chiu' be' benne' ca'.

²⁵ Ben quebe nu chilá' lu xu'u lizre benne' ca',
ne quebe nu sua lu xëzr la xu cheë',

²⁶ lawe' da guláu zi' xuzre' bënnea' benu' Lue' we',
ne dxuluzrizre' ca naca xel-la' zi' dxedé bënnea' be'u Lue'.

²⁷ Ble'e dul-la da zaj nabaga benne' ca',
ne quebe gu'u le' lataj xelaque' tuze benne' xrlátaje chiu'.

²⁸ Busula la benne' ca' lu xiche cheë benne' ca'
zaj nape' xel-la' nabán,

ne quebe guzúaju' le' naga zaj naxúaj la benne' xrlátaje ca'.

²⁹ Neda' zua' lu da ba xa', ne lu da stébele'ë.

Bselá neda', Dios, ne bechisa neda'.

³⁰ Gúl-laqueza' da güe lá'ana' La Dios chia'.

Gucá'ana szrena' Le' nen da dxue lá'ana' Le'.

³¹ Da nigá xezaca ba lázredxa Dios ca tu bezre, be gutia' lawe',
u ca tu me', béadu zaj zua lúzuba', ne xrúguba'.

³² Xeledé'eqeze benne' baxache' ca' da nigá, na' xelebenë'.

Le biga lau Dios, na' gaca bánquezle,

³³ lawe' da dxene Xránadxu benne' ca' dxelexárzjene',
ne quebe dxuzúe' chalá'ala benne' cheë' ca', benne'
zaj xu'ë lizre xia.

³⁴ Le güe lá'ana Le', le'e zrale xabáa, ne le'e, zrale lu xęzr la xu,
ne le'e zrale lawe' nísadau', ne cá'anqueze xúgute
da zaj naca ban xúgute lataj caní.

³⁵ Dios guselé' benne' zaj zře'e xęzre Sión,
ne xexunę' xęzre ca' zaj zra na lu xęzr la xu chee
benne' Judá ca',
na' tu xelexúazqueze' na', ne gata' chee' xęzr la xu na'.

³⁶ Zri'ine zre sua benne' wen zrin chiu' ca', gaca
chee' xęzr la xu na',
na' benne' ca' zaj nazri'ine' Lau' Lue' xelexúe' na'.

70

¹ Bselá neda', Dios.

Gúcaleche neda', Xran.

² Ben xelexedué'e, ne xelexúa lu da stębe benne' ca'
dxelaca lazre' xelútie' neda'.

Ben xelexebigüe', ne xelexala benne' ca' dxelebene'
lawe' da zua' lu da stębe.

³ Ben xelexegá'ana xala benne' ca' dxelún le' chia'.

⁴ Benne' ca' zá'aque' lau Lue' xelebene',
ne xelexúe' lu da ba neza.

Benne' ca' dxelé'e Lue': "Xcalenu" lawe' da bseláu' le',
tu dxelennázqueze': "įzrentę naca Dios!"

⁵ Zua' lu da stębe, ne nate ni'a na'a.

Gudázega gácalenu' neda', Dios.

Nacu' Weselá chia', ne Xrana'.

Quebe chenu', Xran.

71

¹ Za'a lau' Lue', Xran, chee guxrú' neda'.

Ben québedxa xedué'eda'.

² Gúcale neda', ne bselá neda' nen dutę da naca xrlátaje chiu'.

Bzę naga chí'a, ne bselá neda'.

³ Nacu' ca tu xiaj xre naga sua' chawe', na' waca xida'
naga zu' te zra chizrela.

Gunná be'enu' nu guselá neda', lawe' da nacu' Lue'
ca tu xiaj xre naga dxaca dipa lazra'.

⁴ Dios chia', bselá neda' lu na' benne' ca' zaj nabéaj xíchaje' Lue',
ne lu na' benne' ca' dxelunę' da calęla ne zaj naque' xichaj zra'a,

⁵ lawe' da dxebeza lazra' Lue', Xrana' Dios.

Nacu' Bénnea' dxuxúe' neda' gate nácatea' bídau'tę.

⁶ Lue' núxruquezu' neda' gate gúlajtea'.

Lue' bęnu' bdxuaja' lu le'e xrna'a.

įTu güe lá'anazqueza' Lue'!

⁷ Belexebane benne' zantę ca naca chia',
ne ca naca chiu', dxuxúe xánniu' neda'.

⁸ Ben tu gul-lazqueza' da güe lá'ana' Lue',
ne gucá'ana szrena' Lue' du zra.

⁹ Quebe guzú' neda' chalá'ala gate ba guxrúa'.

Gate ba bedú lazra', quebe gusanu' neda'.

10 Benne' dxeledábage' neda' dxelenné' chia',
na' benne' ca' dxelezá lazre' xelútié' neda' belune' tuze dizra',
11 dxelenné': "Ba bsan Dios le'.

Chéajdxu cheajtéladxu le' lawe' da québedxa nu zua
nu guselá le'."

12 ¡Dios, quebe su' zitu' naga zua'!

¡Dios chia', gudázega gácalenu' neda'!

13 ¡Ben xelexedué'eng'!

"Ben xelexenite benne' ca' dxeledábage' neda'."

"Ben xelezúa xel-la' stu', ne xelege zréaje benne' ca'
dxelezá lazre' xelune' chia' da calela."

14 Neda' tu cueza lázrezqueza' Lue',

ne tu güe lá'anazqueza' Lue'.

15 Guzenda' bénneache nacu' xrlátaje,

ne tu guzénzqueza' le' ca da beñu' bseláu' neda',

láqueze quebe nezda' bal-la lasa bseláu' neda'.

16 Tu guchálajzqueza' chee da zrente da beñu' Lue',

Xrana' Dios,

ne gusá'a lazre' bénneache chee da xrlátaje cheéquezu'.

17 Dios, Lue' bsédenu' neda' gate nácatea' bidau'te.

Dxulé'eda' bénneache ca naca da zrente da beñu'.

18 Dios, quebe gusán lazru' neda' gate bache guxrúa',

ne ba bgucha'.

Be' neda' lataj guzenda' zri'ine zre sua' ca naca

xel-la' waca chiu',

ne guzenda' bi za xelalaj ca naca xel-la' wal-la chiu',

19 ne ca naca da xrlátaje chiu', da naca na da zrente, Dios.

Lue' ba beñu' da zaj nácale'e na zrente.

Dios, ¿Núzraqueze ca Lue'?

20 Lue' beñu' gudéa' lu da stebe zante, ne lu da calela ca',

na' gunu' xexaca bana', na' da xula xechisu' neda' lu xedxu ba.

21 ¡Gucá'ana szrendxu' neda',

ne xue zrénquezu' neda'!

22 ¡Cá'anqueze güe lá'anaqueza' Lue', quínnia' da gul-lalena'!

¡Dios chia', gúl-laqueza' chee da li chiu', quínnia'

da du' zriád'i na du'!

¡Nacu' Benne' Lá'azxa chee benne' Israel ca'!

23 ¡Sua' lu da ba neza gate gúl-laqueza' chiu' Lue',

ne béqueze bénne'du xu'a, bénne'du' bexa'u!

24 ¡Tu guchálajzqueza' chee da xrlátaje chiu' te zra chizrela,

lawe' da beñu' belexedué'e, ne guleque zréaje

benne' ca' belune' ba xuzre xelune' chia' da calela!

72

1 ¡Dios, ben guchi'a wenná bea da dxaca cheentu'

ca dxuchi'aquezu' Lue',

ne ben xelaca xrlátaje zri'ine wenná bea na'!

2 Nadxa le' guchi'a chee bénneache chiu' ca naca

da naca xrlátaje,

ne ca naca da li guchi'e chee benne' chiu' ca' zaj zue'

lu da ba xa'.

- ³ Lu xi'a ca' xelebeza zri lazre' bënneache chiu',
 ne lu xí'adu ca' xelezúe' lu da naca chawe'.
⁴ Guchi'e chee benne' ca' zaj zu'e' lu da ba xa'
 lu xezre cheentu',
 ne guselé' bidu ca' chee benne' ca' dxelexázejene',
 ne guzría xi'e benne' ca' dxulusaca zi'e bënneache.
⁵ Xelezrebe' Lue' dxácatę ne zua gubizra,
 ne beu' lawe' tu cuen tu cuen bënneache.
⁶ Gaca wenná bea na' ca nisa xiuj da dxaca naga ba nadín,
 ne ca xrlę'ęla da dxaca dxęla lu xęzr la xu.
⁷ Lu zra chee wenná bea na' gaca da xrlátaje,
 ne xelebeza zri lazre' bënneache dxácatę ne zua beu'.
⁸ Nna be'e dutę xęzr la xu,
 ne dxu'a xęgu Eufates, ga zrintę dxu'a nísadau'.
⁹ Lau lę' xuluzú zribe benne' ca' zaj zre'e xęzr la xu,
 na' guzęxruje' lazre' benne' guledábague' Lę'.
¹⁰ Benne' wenná bea chee xęzr la xu Tarsis,
 ne wenná bea ca' chee tu tu cue' xęzr la xu zitu' ca'
 xelelé'e zaj nu'e da xulunézruje' chee',
 na' benne' wenná bea chee xęzr la xu Sabá,
 ne wenná bea chee Seba xulunézruje' chee' da gunnía'.
¹¹ Xúgutę benne' wenná bea ca' xuluzú zribe' lau lę',
 na' benne' xúgutę cue' xęzr la xu xelunę' zrin chee'.
¹² Lę' guselé' benne' ca' dxelexázejene',
 benne' dxululáwizre' lę',
 ne guselé' benne' ca' zaj zu'e' lu da ba xa',
 ne quebe sua nu benne' gácalęne' lę'.
¹³ Xexache lazre' benne' xache' ca', ne benne' ca'
 dxelexázejene',
 na' guselé' benne' xache' ca' chee xelaca banę'.
¹⁴ Xexá'awę' benne' xache' ca' lu na' benne' wen lazre' ca',
 ne benne' snia ca'.
 Gunę' ba xuzre guselé' benne' ca' lu na' benne' ca'
 dxelutię' benne'.
¹⁵ Gaca ban wenná bea nigá,
 na' xulunézruje' chee' oro chee xęzr la xu Sabá,
 na' tu xelenábazqueze bënneache Dios gácalęne' lę',
 ne te zra chizrelá xelenabe' Dios gunę' gaca chawe'
 chee wenná bea na'.
¹⁶ Tu zrígadauze zrua' xtila xelaze' lu xęzr la xu,
 ne lu xí'adu ca',
 da cuialę'e na ca da dxebíla lu xi'a Líbano,
 na' benne' zaj zre'e lu xęzre ca' xelane' ca' xixre' ze lu xęzr la xu.
¹⁷ Tu súazqueze la benne' wenná bea na'.
 Tu xuluchálajzqueze' chee la lę' dxácatę ne zua gubizra.
 Ne chee lę' gaca da ba neza chee bënneache xúgutę
 cue' xęzr la xu,
 na' xelenné' chee' naca chee' da ba neza zrente'.
¹⁸ Xrlátaje naca Xránadxu Dios, Dios chee benne' Israel ca',
 na' tuze Lę' dxunę' da dxexebánedxu.
¹⁹ Xrlátaje naca La Lę' da naca na da xabáa chadía chacanna,

na' dutę xęzr la xu nigá xelexé'ęę' da xabáa cheę'.

¡Ca'an naca na, ne ca'an gaca na!

²⁰ Nigá dxexuzre xrtizra' David, da dxuchálajęę' Dios.

David nigá naque' zri'ine Isaí.

73

¹ Da líqueze ba ben Dios da chawe' cheę benne' Israel ca', benne' ca' zaj naque' du lazre' lau Dios.

² Neda' ba guzúa cheajházia' lu dul-la.

Ba guzúa guna' tu da zrinnaĵ,

³ lawe' da guca' zre'e lazre' ne cheę benne' gunnı'a ca', gate ble'eda' ca dxelepe ban benne' ca' zaj nabéaj xıchaję' Dios.

⁴ Benne' canı quebe zaj zuę' stębe cheę xel-la' gute,

lawe' da zaj zúale'ę chawe'.

⁵ Quebe dxeledę' lu da ba xa' ca da dxeledé xúgute benne' ca', ne quebe dxelezaca zi'ę ca da dxaca cheę xezıcadxa bęnneache.

⁶ Cheę le' na' dxulucá'ana szren cuinę'.

Tu dxelexúbequezęę' dxelunę' da caleĵa.

⁷ Dxelánnię' lawe' da dxelagu cháwele'ę.

Dxelezıle'ę ca naca da dxelezá lazre'.

⁸ Dxelún le' cheę Dios, ne dxelennę' caleĵa ca da zrinnaĵ da xelunę'.

Dute xel-la' dxulucá'ana szren cuina dxuluchálaję' da zrenteĵ.

⁹ Dxelennę' cheę da ca' zaj zua xabáa, ne dxuluchálaję' ca benne' zaj nape' dute xęzr la xu.

¹⁰ Cheę le' na' xúgute bęnneache dxelunę' le' tu zren,

ne dxelezi'ę ca da dxelenná benne' gunnı'a ca'.

¹¹ Dxelenná benne' ca' dxelunę' da caleĵa:

“¿Ájazra gaca neze Dios?

¿Dxelé'ęequeze Bęnnea' zuę' na'ala?”

¹² Benne' canı zaj naque' benne' zaj nabéaj xıchaję' Dios, na' dxelepe banę' lu xęzr la xu, ne dxelaque' gunnı'a.

¹³ Da líqueze, dácheze naca guca' du lazre', ne quebe bi da caleĵa nuna'.

¹⁴ Gudéa' lu da ba xa' tu zra tu zra,

ne gudéa' xel-la' zi' xúgute zra.

¹⁵ La nnia' neda': Guchálaję' ca dxuluchalaj benne' ca', na' si xę'a bęnneachedu ca' chiu', Dios.

¹⁶ Gate blaba lazra' cheę chéajni'ida' da nigá, guca na stębele'ę chia' neda'.

¹⁷ Gate guxu'a lu lataĵ lá'azxa cheę Dios,

na' guque be'eda' da gaca cheę benne' ca' gate cheajśę'.

¹⁸ Da líqueze nunu' cheę benne' ca' cheajlecházie',

ne gunu' xelebıa xı'quezę'.

¹⁹ Chadıte gulebıa xı'quezę'.

Belexenite' lu xel-la' gulezrébele'ę.

²⁰ Zaj naque' ca tu da ble'edxu lu xęla da dxexenite na gate dxexebandxu.

Ca'an gaca, Xran, gate chasu', guzú' chalá'ala ca da

gulaca benne' ca'.

21 Gate guca' zre'e lazre' chee benne' ca',
guzúa lázrdawa' lu da štebe.

22 Lawe' da guca' xichaj zide', na' quebe guxéajni'ida'
guca' ca tu be xixre' lau Lue'.

23 Tu guzúazqueza' nen Lue', na' guca'u na'a xabela.

24 Bsi'u neda' chee guna' da dxulé'enu' neda',
na' te nigá xezí' lu na'u neda' lu xabáa chiu'.

25 Quebe nu xetú zua chia' xabáa san tuzu' Lue',
ne quebe nu xetú dxezá lazra' lu xezr la xu, san tuzu' Lue'.

26 Dxelexedú lazre' bela' dxen chia', ne lázrdawa'.

Dios naque' Benne' dxutipe' lazra',
ne naque' da ba neza chia' chadía chacanna.

27 Benne' ca' dxelexecuase' naga zu' xelexenítie'.

Guzría xi'u xúgute benne' ca' xelexebeaj xíchajé' Lue'.

28 Ca naca chia' neda', dxaca chawe' chia' lawe' da gubiga'
lau Dios.

Tu dxebeza lázrezqueza' Xránadxu Dios,
chee guchálajqueza' ca naca da zrente da nune'.

74

1 Dios, ¿tu chí'izqueze nuzú' netu' chalá'ala?

¿Dxezra'u netu', nácantu' ca zrila' chiu' ca'?

2 Bsá lazre' bènneache chiu', benne' ca' guzi'u nédxudaute.
Benne' ca' bexa'u chee gunu' xelaque' benne' cheéquezu',
benne' ca' zaj zře'ę lu xi'a Sión nigá, naga zúaquezu' Lue'.

3 Gudá xedajnná'u ca nabía xi' xezre nigá,

ne ca naca da calela da belún benne' ca'
dxeledábage' netu', lu lataj lá'azxa chiu'.

4 Dxelebezre xa'a benne' ca' dxeledábage' Lue'

laduj naga zaj nazraga bènneache chiu'.

Zaj nuzúę' nigá da dxululé'e na xu'untu' lu na' benne' ca'.

5 Buluzría xi'e xezre nigá,

ca dxun tu benne' dxine' ca naca xaga zaj ze tu xi'a.

6 Na'a nen xa waga chee' ca', ne nen xaga chee' ca',
ba buluzría xi'e ca naca lechítaje chee xudau' chiu'.

7 Ba buluzézxie' lataj lá'azxa chiu'.

Bulucá'ana dítaje' xu'u lizru'.

Buluchínnaje' na.

8 Lu lázrdawę' gulenné': "Guzría xí'tegadxu na tu chí'ize."

Ba buluzézxie' xúgute xu'u naga bezrágantu' chiu'

lu xezr la xu chiu'.

9 Québedxa dxelé'entu' da la'azxa ca' da dxululé'e na
da guchísantu' lu xezr la xu cheentu'.

Québedxa nu chilá' benne' guchálaje' waláz chiu',
ne quebe nu zua ládujla netu', benne' nézene' bátaqueze lantu'.

10 Dios, ¿Báta cueza na xulucháchalę benne' ca' netu',
benne' ca' dxulusaca zi'e netu'?

¿Chadía chacanna welenné benne' dxeledábage' lue'

schanni' cheę Lau'?

11 ¿Bizr cheę na' quebe dxebéaj lazru' benne' ca'?

¿Bizr cheę na' quebe dxuzría xi'u benne' ca' dxelune' da caleļa?

12 Lue', Dios, nacu' Wenná Bea chia' nédxudaute.

Lué'queze dxuseláu' bėnneache dutę xęzr la xu.

13 Xel-la' waca chiu' bėnu' nísadau' chupa la'a.

Gula'u xichaj bę schanni' ca' lu nísadau'.

14 Bzúzruju' xichaj bę schanni' lęba' leviatán,

Na' bėnu' gulagu bę xixre' lęba', bea ca' zaj zra'ba' lu xu bizre.

15 Bėnu' gulaj nisa beaj, ne nisa xęgu ca'.

Bsebızru' xęgu zri'a ca'.

16 Chiu' Lue' naca te zra, ne cá'anqueze chiu' naca dxęla.

Lue' bzu' beu', ne gubizra naga dxeledé na.

17 Lue' bzu' tu chí'ize ca naca da zaj dę xęzr la xu nigá.

Lue' bėnu' beu' la ca', ne beu' zaga ca'.

18 Bsa lazre' da nigá: Benne' ca' dxeledábaguę' lue'

ba zaj nun lę' chiu' Lue', Xran.

Benne' xala ca' ba gulenné' schanni' cheę Lau'.

19 Quebe gusanu' lu na' benne' zaj naquę' ca bę snia ca'

benne' ca' nazrí'iquezu',

ne quebe gal-la lazru' tu chí'ize bėnneache chiu' zaj

zue' lu da ba xa'.

20 Gunná' ca naca xel-la' wezría da bėnu',

lawe' da gátetęze naca chul-la lu xęzr la xu,

na' zaj zra' benne' ca' dxelune' da zrinnaj.

21 Quebe gu'u lataj xelegá'ana lu xel-la' stu' benne'

ca' zaj zue' lu da baxache'.

Benne' dxelezaca zi'ę, ne benne' dxelexázrjenę'

xelúe lá'ane' Lau'.

22 ¡Guzé, Dios!

¡Bęn ca ba gunnáu'!

¡Bsa lazre' ca dxelún benne' xala ca', dxelún lę' chiu'

te zra te zra!

23 Quebe gal-la lazru' ca da gulenná benne' ca'

dxeledábaguę' lue'.

Da schaga dxelún benne' ca' dxeledábaguę' Lue'

tu dxėnzqueze na.

75

1 "Xcalenu'", dxęntu' Lue', Dios: "Xcalenu'."

Dxųzentu' bėnneache zúalęnu' netu', ne ba nunu' da ca'

dxexebánequezentu'.

2 Dxenná Dios: "Ba nuzúa' zra guchi'a cheę bėnneache.

Guchi'a ca naca da xrlátaje.

3 Lácala xru' dutę xęzr la xu, ne xelezrize xúgute

da zaj naca ban na,

neda' gúxruqueza' ca naca lane xęzr la xu na'.

4 Dxapa' benne' xala ca': Quebe gáwele.

Dxapa' benne' ca' dxelune' da caleļa:

Quebe gucá'ana szren cuínale.

5 Quebe guxrén lázrele xel-la' wal-la cheęle.

Quebe gácale benne' lázxdau zide'."

⁶Quebe za xel-la' szren naga dxalaj gubizra,
ne naga dxebía na,
ne quebe za na le'e xixre' lawe' lataj.

⁷Dios naque' Bénnea' guchi'e chee bénneache.

Dxucá'ane' cá'aze tu benne', ne dxucá'ane' szren xetú benne'.

⁸Dios nuxre' tu zriga', da nazrate na xrise uva wal-la,
da zeaje na xel-la' dxezrá'a chee'.

Dxulálaje' na chee xele'aj benne' ca' dxelune' da calela.
Xelé'aje' na xebizrtę na.

⁹Neda' guzénquezda' bénneache,
ne gul-la' da güe lá'ana' Dios chee Jacob.

¹⁰Le' guchínnajqueze' xel-la' waca chee benne'
węn da calela ca'.

Gusezrendxe' xel-la' waca chee benne' xrlátaje ca'.

76

¹Zaj núnbea benne' Judá ca' Dios,
na' ládujla benne' Israel zrentę nácaqueze La Le'.

²Lu xęzre Salem zua lataj lá'azxa chee'.

Lu xęzre Sión zua naga zúaqueze'.

³Lataj na' gudíchaje' xaga nalá xéche'ze ca',
ne xia da dxucu'uj na benne' lu wedil-la,
ne ca naca da dxuluchíneng' lu wedil-la.

⁴Benne' xabáa nacu' Lue',
ne Benne' wál-ladxa ca xi'a zri'a ca'.

⁵Xeajlechaze benne' wal-la ca', ne guláse dínnaje'.
Netú benne' wal-la ca' quebe belexechisa ne'e chee
xelune' wedil-la.

⁶Dios chee benne' Israel ca', gate gudil-lu' benne' ca',
guláse dinnaj bzrina' ca', ne benne' gulebię'-ba'.

⁷Nacu' Lue' Benne' zrébedxu.

⁸Nu benne' gaca se' lau Lue' gate dxezra'u?
Dxelezrebe bénneache lu xęzr la xu, na' dxelebeze'

⁹zra seu' Lue', Dios, chee guchi'u chee bénneache,
ne chee guseláu' xúgute benne' dxexruj lazre' zaj
zre'e lu xęzr la xu.

¹⁰Da líqueze xel-la' dxelezrá'a chee bénneache
gaca na tu da gucá'ana szren na Lue'.

Guzúa zriu' xel-la' dxelezrá'a chee bénneache zaj nagá'ane'.

¹¹Le chebe lázrele da gunle chee Dios,
na' le gun da na' chee Xránadxu, Dios chee.

Xúgute benne' zaj zre'e du gabi'ila xelélé'e,
na' xulunézruje' da zaj nu'e chee Dios,

Bénnea' dxezrébedxu.

¹²Guzague' da xu'u lu xichaj lázxdau benne' blau ca'.

Le' dxuchebe' benne' wenná bea ca' zaj zre'e lu xęzr la xu.

77

- 1 Nen chi'a bláwizra' Dios.
Bláwizra' Dios, na' Lẹ' buzé nague' chi'a.
- 2 Guxu'a lau Xránadxu lu zra guzúa' lu da ba xa'.
Chizrela guchisa na'a lau Lẹ', ne quebe guzúa' zria'.
Quebe be'a lataj nu benne' xue zrene' neda'.
- 3 Bsa lazra' chee Dios, ne guzúa' stębe.
Gudawa' zria lawe', ne bedú lazra'.
- 4 Begúe' bchigala chia'.
Guzúa' stębele'e, ne quebe guca guchálaja'.
- 5 Blaba lazra' ca naca zra nédxute.
Ca naca iza zan ca' da ba guledé chee na.
- 6 Bsa lazra' ca naca da bil-la' chizrélala,
ne blaba lázrequeza' ca zaj naca na, na' gunaba be' xu'a:
- 7 ¿Guzúa Xránadxu dxi'u chalá'ala tu chi'ize
ne québedxa gácalene' dxi'u?
- 8 ¿Cabátadxa xexache lazre' dxi'u?
¿Cabátadxa gune' ca da guchebe lazre'?
- 9 ¿Gul-la lázrequeze Dios xexache lazre' dxi'u?
¿Dxezré'e dxi'u, na' québedxa xexache lazre' dxi'u?
- 10 Nadxa gunnía': Caní dxuna' lawe' da quebe chawe' zua'.
Chee le na' cheajsá lazra' chee xúgute da zrente
da ben Dios zrente lu iza ba guledé chee na.
- 11 Cheajsá lazra' chee da zrente ca' da ben Jah.
- Awe', cheajsá lazra' chee da benu' nédxudaute da ca'
dxexebánentu'.
- 12 Gulaba lazra' ca naca xúgute da ba benu',
ne guchálaja' ca zaj naca da nunu'.
- 13 Dios, lá'azxa naca da dxusédenu' netu' ca guntu'.
¿Zua xetú Dios naque' benne' zren ca naca Dios cheentu'?
- 14 Lue' nacu' Dios, dxunu' da ca' dxexebánentu'.
Blé'enu' xúgute bėnneache lu xęzr la xu ca zrente
naca xel-la' waca chiu'.
- 15 Nen xel-la' waca chiu' bexa'u bėnneache chiu',
zri'ine zre sua Jacob, ne zri'ine zre sua José.
- 16 Xegu nisa ca' belelé'en Lue', Dios.
Belelé'e xegu nisa ca' Lue', na' belezrébele'e na.
Cá'anqueze gulezúa stębe nísadau' situj ca'.
- 17 Nisa xiuj zila bdxuaj na lu beuj bza ca',
ne gulennéle'e guziu', ne gulépele'e xesa.
- 18 Lu be' bđunu' ben guziu' chiu' da gunnéle'e na.
Bulusaní' xesa guziu' ca naca xęzr la xu.
Guzúa stębe, ne guzrize xęzr la xu.
- 19 Lawe' nísadau' guza'u,
ne lawe' nisa zila ca' gudéquezu',
ne quebe naca bea naga bléaju'.
- 20 Guche'u bėnneache chiu' ca zrila' ca'
lu na' Moisés, ne lu na' Aarón.

78

- 1 Le xen, le'e, bénneache chia', ca da dxusédeda'.
Le xen xanne' ca da dxuchálaja'.
- 2 Guchíneda' dizra' ca da dxuluchalaj benne' sina ca',
na' guzéajni'ida' le'e da ca' gulezúa na bagácheze gate nate,
3 da ca' bendxu, ne bénbeadxu na,
da ca' belixru be'e xra xrtáudxu ca' dxi'u.
- 4 Quebe gucáchedxu na lau zrí'inedxu ca'.
Guzénquezdxu zrí'inedxu ca' ca naca xel-la' szren
cheę Xránadxu,
ne ca naca xel-la' waca cheę', ne ca zaj naca da zren ca'
da bene'.
- 5 Bzue' tu da nadxixruij bea na da xelún benne' Israel ca',
ne da bdxixruij be'ene' ca' da xelún zrí'ine zre sua Jacob.
Gunná bé'ene' xra xrtáudxu ca' xuluzenne' bi cheę' ca'
ca naca da gunná bé'ene',
- 6 cheę xelúnbea zrí'ine' bidu ca' za xelálajbe' ca naca na,
na' bi caní xuluzenbe' zrí'inebe' da na',
7 cheę xuluxrén lázrebe' Dios,
ne quebe xelal-la lázrebe' da ca' ben Dios,
ne cheę xuluzúabe' dizra' da ca' gunná be'e.
- 8 Quebe xelácabe' ca gulaca xra xrtáube' ca'.
Benne' ca' quebe buluzúe' dizra' cheę', ne guledábage' Le',
ne quebe buluzúa chúchug' ca buluxrén lazre' Dios,
ne quebe gulaque' li lazre' lu da naca cheę Dios lu
be' zaj nácaqueze'.
- 9 Benne' zrí'ine zre sua Efraín, benne' zaj nu'e
da dxuluchínene' lu wedil-la
buluzrúnnuje' naga dxaca wedil-la.
- 10 Quebe belune' ca naca xel-la' wezría da ben Dios,
ne quebe buluzúe' dizra' da gunná bé'ene'.
- 11 Gulal-la lazre' da ca' ben Dios,
ne xel-la' waca ca' blé'ene' Le'.
- 12 Lau xra xrtawe' ca' bene' xel-la' waca ca'
lu xezr la xu Egipto, ne lu xezr la xu Zoán.
- 13 Gusalje' neza lu nísadau' naga guledé benne' ca'.
Bene' nísadau' na' ca xi'a ca' chalá'a weaj.
- 14 Te zra blé'ene' benne' ca' neza nen tu beuj bza da xjácálene',
ne chizrela nen beuj bza da naca na ca tu xi'.
- 15 Gulé'e xiaj ca' naga naca xu bizre,
na' bxí'aje' benne' ca' nisa da gulaj na le'e xiaj ca'
ca tu xegu nisa.
- 16 Bene' gulaj tu xegu nisa le'e xiaj na',
na' bzriluj na ca tu xegu zren.
- 17 Lácala bene' caní belúndxaqueze' dul-la lau Dios
le'e xixre' lawe' lataj,
ne guledábage' Dios nape' dutę xel-la' szren.
- 18 Gulegú'u lazre' xulu'zúa zrie' Dios.
Gulenabę' xelawe' ca da dxelezá lazre' le'.
- 19 Gulenné' cheę Dios, gulenné':
¿Wazeque Dios na' gunne' da gágudxu le'e xixre' nigá?

- 20 Da líqueze gulé'e xiaj na', na' gulaj nisa na',
na' bzriluj na ca tu xegu zren.
¿Wazéquequezne' gunne' dxi'u xeta, ne gunne' belá'
da gágudxu?
- 21 Chee le' na' bzra'a Xránadxu gate benne' da na',
ne gusel-le' xi' da bzezxe na bal-la bènneache chee',
na' bsdxi'ule'e xel-la' dxezrá'a chee' nen benne' Israel ca',
22 lawe' da quebe gulé'ajle'e chee' Dios,
ne quebe buluxrén lazre' Le' guselé' le'.
- 23 Gunná bé'ene' beuj zran xabáa,
ne gusalaje' dxa xu'u chee' xabáa,
24 na' bene' bxinnaj xeta maná ca dxinnaj xiuj chee'
gulagu benne' chee' na.
Bnézruje' le' da naca ca zrua' chee' xabáa.
- 25 Gulawe' da dxelagu gubáz chee' xabáa ca'.
Gusél-lalé'e da gulawe', na' gulé'ajtequezene'.
- 26 Bene' guca be' da za' chalá'ala naga dxalaj gubizra,
ne xel-la' waca chee' bene' guca be' za' chalá'ala
naga dxedé gubizra beu' zaga,
27 na' gusel-le' chee' benne' ca' belá' ca ze' bxrte xu,
béadu zaj zua xrila naxanba' ca xuzre' da dxe' dxu'a
tu xegu zren.
- 28 Bene' gulé'xrujba' chale'aj chee' benne' ca'.
Gulé'xrujba' dutequeze naga zaj zua xu'u xide chee'.
- 29 Gulawe'-ba', ne gulé'ajquezene'.
- Dios bnézruje' chie' ca naca da gulaca lazre'.
- 30 Gate quebe ne xelélajene', ne ne dxelawe'-ba',
31 bzra'a Dios benne' ca',
na' betie' benne' zaj nácadxe' benne' wal-la,
ne benne' Israel ca' zaj nácadxe' benne' waca.
- 32 Láqueze bene' caní, na' belúndxaqueze' dul-la,
ne láqueze belelé'ene' xel-la' waca ca' da bene',
quebe buluxrén lazre' Le'.
- 33 Chee le' na' guchugue' zra chee' benne' ca' ca
tu be' dxecá'adxu,
ne ca zaj naca iza da gulezúe', bdee' le' lu da zi' da xa'.
- 34 Gate betie' bal-la benne' ca', na' xezícadxe'
belexaque' chee' Dios.
Belexebí'i lazre', ne du lazre' buluchálajlene' Le'.
- 35 Xeajlesá lazre' naca Dios Benne' dxuxúe' le',
ne Dios na' nape' dute xel-la' szren naque' Bénnea'
bxá'awene' le',
- 36 san quebe guca li lazre' da gulenné'
lawe' da belún lazre' lau Dios.
- 37 Quebe gulaque' li lazre' nen Le',
ne quebe belune' du lazre' ca naca xel-la' wezría chee'.
- 38 Dios hexache lazre' chee' benne' ca',
ne bnite lawe' dul-la belune', ne quebe bzria xi'e le'.
Zane' lásate' bzue' chalá'ala xel-la' dxezrá'a chee',
ne quebe bzre'e le' dute ca da dxéquene'.

- 39 Xeajsá lazre' Dios zaj naque' be'la' dxen.
 Zaj naque' ca tu be' da dxedé na, ne quebe xezrín na.
- 40 Zane' lasa guledábage' Le' le'e xixre' lawe' lataj na,
 ne zane' lasa buluzúe' Le' baxache'.
- 41 Zane' lasa buluzúe' Dios chalá'ala,
 ne buluché'e Dios lá'azxa chee' benne' Israel ca'.
- 42 Gulal-la lazre' ca naca xel-la' waca zren chee',
 ne ca bene' lu zra na' bxá'aweng' le' lu da zi' da xa',
- 43 gate bene' xel-la' waca ca' lu xezr la xu Egipto,
 ne blé'ene' da ca' da dxebánedxu lu xezr la xu Zoán.
- 44 Bexuné' xegu chee' ca' dxen,
 na' québedxa guca da xe'le'aj benne' Egipto ca'.
- 45 Gusel-le' be'a ládujla benne' ca', be buludeba' le' xel-la' zi'.
 Gusel-le' bluzru ca' buluzría xiba' xezr la xu chee'.
- 46 Gusel-le' biche zu ca' guláguba' lina chee',
 ne buluzría xiba' da zaj zua lu xezr la xu chee'.
- 47 Gusel-le' xiaj bezxe' zri'a da bzria xi na lba uva chee' ca',
 ne gusel-le' da zaga da bsebizre na xaga higo chee' ca'.
- 48 Gusel-le' xiaj bezxe' zri'a da bete na be xixre' chee' ca',
 ne gusel-le' xesa da bete na zrila' chee' ca'.
- 49 Bdeé' benne' Egipto ca' lu xel-la' zi' zren,
 lawe' da bzrá'ale'e benne' ca',
 na' guca da ca' ca zánete' gubáz ca' chee' xel-la' gute.
- 50 Quebe bzague' xel-la' dxezrá'a chee',
 ne quebe bnite lawe' chee' chee' quebe xelátie',
 san betie' le' nen tu xízrawe' wal-la.
- 51 Betie' bi biu nedxu chee' benne' ca',
 bi biu nedxu ca' chee' benne' Egipto ca'.
- 52 Nadxa beche'e benne' chee' ca' ca tu benne'
 dxeché'e zrila' ca',
 ne bsi'e le' le'e xixre' lawe' lataj.
- 53 Bsi'e le' zri'a chawe', ne quebe bi belezrebe',
 san gulate benne' guledábage' Le' lu nísadau'.
- 54 Beche'e le' lu xezr la xu lá'azxa chee',
 naga zua xi'a nigá da guca cheéqueze'.
- 55 Bebéaje' benne' zaj zre'e lu xezr la xu na' lau
 benne' chie' ca',
 na' gulé'e xezr la xu chee' cha chee' benne' Israel ca',
 ne bzre'e le' lizre benne' ca' bebéaje'.
- 56 Da xula buluzúe' Dios chalá'ala, ne buluché'e
 Dios, nape' duté xel-la' szren.
 Quebe buluzúe' dizra' da ca' gunná be'ene' le'.
- 57 Da xula guledábage' Dios ca belún xra xrtawe' ca'.
 Gulaque' ca tu bdxequé' xala chee' xaga nalá xéche'ze.
- 58 Buluché'e Le' ne chee' lataj ca' naga bulucá'ana
 szrene' bedáu' xiaj xaga ca',
 ne ne chee' bedáu' xiaj xaga chee' ca' bzrá'ale'e Dios.
- 59 Bzra'a Dios gate blé'ene' na,
 na' gucuídele'ene' benne' chee' ca', benne' Israel.
- 60 Guleaj xíchaje' xu'u xide lá'azxa chee' zua na xezre Silo,

xu'u xide na' guzuáqueze' ládujla benne' ca'.

⁶¹ Be'e lataj belecá'a benne' ca' dxeledábague' dxi'u
xi'ina lá'azxa chee',

da na' dxulé'e na xel-la' waca, ne xel-la' szren chee'.

⁶² Bzre'e benne' chee' ca',
na' bde'e' le' lu na' benne' ca' belútie' le'.

⁶³ Benne' wal-la ca' gulátie' lu wedil-la.

Quebe nu zra' benne' wegu', benne' xelezúalene'
nu'ula wegu' ca'.

⁶⁴ Cá'anqueze gulate bxruze ca' lu wedil-la,
na' nu'ula chee' bxruze ca' quebe gulebezre xache'
chee' bxruze ca'.

⁶⁵ Nadxa guca Xránadxu ca tu benne' dxexeban'e' lu bchigala.

Guque' ca tu benne' wal-la dxebezre xe'e gate ba né'aje'
xrise uva wal-la.

⁶⁶ Na' blague' benne' guledábague' Le',
ne bca'ane' le' cá'aze chadía chacanna.

⁶⁷ Bzue' chalá'ala zri'ine zre sua José,
ne quebe beque'e zri'ine zre sua Efraín,

⁶⁸ san beque'e zri'ine zre sua Judá,
ne xi'a Sión, da na' nazrí'ile'ene'.

⁶⁹ Lu xi'a na' bene' xudau' lá'azxa chee',
da guca na ca naca da zua na xabáa.

Bzua chúchue' na chadía chacanna,
ca nácaqueze xezr la xu nigá.

⁷⁰ Beque'e David, benne' wen zrin chee'.

Bebéaje' le' naga zaj zra' zrila' ca'.

⁷¹ Beche'e le' naga zue' dxuxúe' zrila' ca' zaj nache'eba' bedau',
chee' gague' wenná bea, benne' guxúe' bèneache chee',
zri'ine zre sua Jacob, benne' zaj naque' benne' Israel ca'.

⁷² Dute xel-la' du lazre' chee' bxue' benne' ca'.

Bxue' le' dute xel-la' waca zren chee'.

79

¹ Dios, ba gulú'u benne' xezr la xu zitu' ca' lu xezr la xu
chee' bèneache chiu'.

Bulucá'ana dítaj'e' xudau' lá'azxa chiu'.

Buluzría xi'e xezre Jerusalén.

² Bulucá'ane' belá' dxen chee' wen zrin chiu' ca' naga
gulagu be zua xrila le'.

Be xixre' ca' guláguba' belá' dxen chee' benne' ca'
zaj naque' chiu'.

³ Ca nisa bululálaje' dxen chee' benne' ca' xúgute' lu neza
chee' xezre Jerusalén,

ne quebe nu chilá' benne' gucache' benne' ca'.

⁴ Benne' xezr la xu walizre' cheentu' ca'
dxulucháchalene' netu'.

Benne' zaj zre'e xezre walizr ca' dxulucá'ana dítaj'e' netu',
ne dxelún le' cheentu'.

⁵ ¿Bata cuézaqueze gaca caní cheentu', Xran?

¿Tu chí'izqueze dxezra'u netu'?

¿Tu chí'izqueze gaca xel-la' dxezrá'a chiu' ca tu xi'?

⁶ Bzra'a benne' xęzr la xu ca' quebe zaj núnbe'e Lue',
na' benne' xęzr la xu ca' quebe dxululáwizre' Lue',

⁷ lawe' da ba buluzría xi'e zri'ine zre sua Jacob,
ne bulucá'ana dítaję' xu'u lizre benne' ca'.

⁸ Quebe gusebagu' netu' ca naca da zrinnaj da belún
xra xrtauntu' ca'.

Gudázega xexache lazru' netu', lawe' da dxezraga láule'entu'.

⁹ Gúcalę netu', Dios, nacu' Bénnea' dxuselę' netu',
cheę gaca ba Lau'.

Bselá netu', ne bnite lau dul-la nuntu' cheę xegá'ana szren Lau',

¹⁰ lawe' da xelenna bénneache: "¿Ga na Dios cheę benne' ca'?"
Bebéaj lazre' benne' ca' belútię' węn zrin chiu' ca'.

¹¹ Caní bęn cheę xeledé'e xúgute benne' chiu' ca' zaj xu'e
lu na' benne' ca' dxeledábaguę' netu'.

Dutę xel-la' waca zren chiu' bselá benne' ca' ba zaj nachugue'
cheę' xelatię'.

¹² Bunezruj cheę benne' xęzr la xu walizre' cheęntu'
ca' xegazre cue'

ca da calęla da belunę', bulucá'ana dítaję' Lue', Xran.

¹³ Netu', bénneache chiu', nácantu' ca zrila' chiu' ca',
güe lá'anaquezentu' Lue' chadía chacanna.

Tu cuen tu zri'ine zre suantu' gúl-laquezentu' da
güe lá'anantu' Lue'.

80

¹ Bene cheęntu', Lue' dxuxú' benne' Israel ca',
Lue' na', dxuxú' zri'ine zre sua José ca zrila'du ca',
ne dxe'u lataj blau chiu' da zua na lávela querubín ca'.

² Ble'e xel-la' szren chiu' lau zri'ine zre sua Efraín,
ne Benjamín, ne Manasés.

Ble'e xel-la' waca chiu', ne gudá guseláu' netu'.

³ Beché' netu', Dios.

Bexache lazre' netu', na' lantu'.

⁴ Xránantu' Dios, napu' dutę xel-la' waca,

¿bata chájsęqueze zra'u netu',

ne quebe xennu' ca da nábantu' Lue'?

⁵ Bzúalę'u netu' lu xel-la' dxewí'ine lazre',
ne bzílalę'u nisa dxebézrentu'.

⁶ Bę'u lataj xęzr la xu walizre ca' bulucá'ana dítaję' netu',
na' benne' ca' dxeledábaguę' netu' belún lę' cheęntu'.

⁷ Beché' netu', Dios, napu' dutę xel-la' waca.

Bexache lazre' netu', na' lantu'.

⁸ Bebéaju' tu zrigu' lba uva lu xęzr la xu Egipto da naca na
bénneache chiu'.

Blagu' benne' xęzr la xu gulezré'e nigá, na' guzu' nigá
zrigu' lba uva na'.

⁹ Gú'unu' lba uva na' cheę gula na.

Bdéle'e lue zrigu' lba uva na', na' gucu na xęzr la xu na'.

¹⁰ Gulú'u na zrul-la xúgute xi'a ca',

na' zruze na ca' gulegú'u na zrul-la xaga cedro zren ca'.

- 11 Gulechiluj zruze na, belezrinte na dxu'a nísadau',
ne belezrinte na dxu'a xegu Eufrates.
- 12 ¿Bizr chee na' gucá'u le'aj da naxechaj na le na?
Na'a xúgutę benne' dxeledé na' dxelebanę' da zixre chee na.
- 13 Dxuluchuchu dxululéaj cuche xixre' ca' lba uva na',
na' be xixre' ca' dxeláguba' na.
- 14 Bedá cheentu', Dios, napu' dute xel-la' waca.
Gunná' netu' ga na' zu' xabáa, ne gudá xedajnná'u lba uva chiu'.
- 15 Gudá, guseláu' lba uva nigá, da gúzaquezu'.
- Bechuj chee lba uva na', ba bzua chuchu' gaca na chiu'.
- 16 Benne' ca' dxeledábague' netu' ba gulechúgue' lba na',
ne ba guláduę' na xi'.
- Gunná' benne' ca' lu xel-la' dxezrá'a chiu',
ne bzria xi' benne' ca'.
- 17 Bzua chuchu, ne bxue benne' ca' ba guca'u,
benne' xezr la xu na' ba nuzúa chuchu'.
- 18 Cabátadxa cueaj xíchajntu' Lue' xecha lasa.
Bache chawe' netu', naca bantu', na' güe lá'anantu' Lau'.
- 19 Xránantu' Dios, napu' dute xel-la' waca, beché' netu'.
- Bexache lazre' netu', na' lantu'.

81

- 1 Lu dute xel-la' dxebé le gul-la chee Dios, Bénnea' dxutipe'
lázredxu.
Lu da ba neza chee le cuezre xa'a lau Dios chee
zri'ine zre sua Jacob.
- 2 Le gul-la, ne le capa xidedau'.
- Le quinne xrtan da con zriadi'i na du, ne da dxúl-lalenle.
- 3 Le gucuezre luzu da dxulucuezre' gate naca beu' dxe'ene,
da naca na zra nuzúadxu gundxu laní lá'azxa.
- 4 Naca na tu da dxun na ba xen xelún benne' Israel ca',
da bdxixruj bea Dios xelún zri'ine zre sua Jacob.
- 5 Bzue' na ca tu da gulé'e lau na zri'ine zre sua José
gate beledxúaje' lu xezr la xu Egipto,
naga benda' tu xrtizra' bénneache da quebe guxéajni'ida'.
- 6 Gunná Dios: "Begúa' xua' da buludé'e' benne' chia' ca'.
Bsezrá'a benne' chia' ca' da zi'i."
- 7 Lu da ba xa' da guzúale, bláwizrale neda', na' bselá' le'e.
Bechéba' chee le naga nagacha' lu beuj bza gate na'
gunnéle'e' guziu',
na' bxua' ájala gunle naga zaj de beaj nisa zaj nazí le Meriba.
- 8 Le xene, bénneache chia', na' gusízreda' le'e.
Le'e, benne' Israel, che dxaca lázrele sile da dxennía',
- 9 quebe gápale tu dios chee benne' xula,
ne quebe guzú zríbele lau tu dios chee benne' zitu'.
- 10 Neda', Xránale, naca' Dios chee le.
Bebéaja' le'e lu xezr la xu Egipto.
Le salaj dxú'ale, na' gunna' da gágule.
- 11 Bénneache chia' quebe belúe lazre' da gunnía'.
Benne' Israel ca' quebe gulaca lazre' xelezi' lu ne'e neda'.

12 Chee le na' bsana' benne' ca' lawe' da gulaque'
láxzdau zide'.

Belune' ca da guléquene' xrlátaje.

13 Che la gulebé' gunne xue bénneache chia' chee da gunnía',
ne che la belún benne' Israel ca da ble'eda' le'.

14 na' chadite bzria xi'a benne' guledábague' le',
ne gudíl-lalena' benne' guledíl-lalene' le'.

15 Che la belún benne' Israel caní,
na' benne' ca' dxelecuídené' Xránadxu buluzúe' xrtizre',
(san chadía chacanna zaj nabague' zria),

16 na' Dios guné' xelawe' zrua' xtila cháwedau',
ne guné' xelélajquezne' nen bzrina'dau'.

82

1 Zua Dios naga zaj nazraga benne' dxuluchi'e chee bénneache chee'.
Dios dxuchi'e chee benne' ca' dxuluchi'e chee bénneache.

2 Dxenná Dios: "¿Bátadxa guchí'ale chee bénneache chia' da quebe naca
xrlátaje,

ne gápale ba lá'ana benne' ca' zaj nabéaj xíchaje' Dios?"

3 Le gácale benne' xache' ca', ne bidau' wezebe ca'.

Le gun da xrlátaje chee benne' baxache' ca'
ne chee benne' ca' dxelexázejene'.

4 Le guselá benne' ca' dxeledéé' lu da ba xa',
ne benne' ca' quebe bi zaj napé'.

Le guselá benne' ca' lu na' benne' ca' zaj nabéaj xíchaje' Dios.

5 Quebe bi zaj nézene', ne quebe dxeléajni'ine',
na' dxeledéé' lu da chul-la.

Dxuluzrizre' ca naca da zaj de lu xezr la xu.

6 Neda' gunnía': Le'e nácaquezele ca dios ca',
ne nácale xúgutele ca zrí'inequeze Dios szrente,

7 Wátele ca dxelate xezícadxa bénneache,
na' cheajcházele ca cheajchaze núteteze benne' dxenná be'e.

8 ¡Guxasa, Dios!

¡Bchi'a chee bénneache zaj zra' lu xezr la xu,
lawe' da naca duté xezr la xu chiu' Lue'!

83

1 ¡Dios, quebe sua zriu'!

Quebe su' zrize, Dios, ne quebe gusezxuj dxu'u,

2 lawe' da dxelebezre xa'a benne' ca' dxeledábague' Lue',
ne dxulucá'ana szren cuina benne' ca' dxelecuídené' Lue'.

3 Bagácheze ba zaj nune' tuze dizra' bi xelune' chee bénneache chiu',
ne ba zaj nune' bi xelune' chee benne' ca' dxuxúequezu' Lue'.

4 Gulenné': "Le chu'u, guzría xidxu benne' ca'
chee québedxa xelaque' tu cue' xezr la xu,
ne québedxa nu sua benne' cheajsá lazre' la Israel."

5 Ba belune' tuze dizra'.

Zaj nune' tuze dizra' xeledábague' Lue'

6 benne' Edom ca', ne benne' Ismael ca',
ne benne' Moab ca', ne benne' zri'ine zre sua ca' Agar,

7 ne benne' Gebal ca', ne benne' Amón ca', ne benne' Amalec ca',
ne benne' Filistea ca', ne benne' zaj zre'e xezre Tiro.

8 Cá'anqueze benne' Asiria ca' zaj nune' le' tuze.

Xúgute benne' caní dxelune' zrin chee zri'ine zre sua Lot.

9 Ben chee benne' caní ca benu' chee benne' Madián ca',
ne ca benu' chee Sísara, ne ca benu' chee Jabín dxu'a xegu Cisón,

10 benne' ca' gulátie' lu xezr la xu Endor,
na' belexaque' ca xrche'e bezre da gun na bebe lu xezr la xu.

11 Ben gaca chee benne' blau ca' chee benne' caní
ca guca chee Oreb, ne chee Zeeb,

ne ben gaca chee benne' dxelenná bé'ene' benne' caní
ca guca chee Zeba, ne chee Zalmuna,

12 lawe' da gulenná benne' caní: "Gaca cheedxu xezr la xu
naga zaj zra' bèneache chee Dios."

13 Dios chia', ben xelaque' ca xizre bebe da dxua be' gate dxedube na.
Ben xelaque' ca xrlácue xia xéladu ca' da dxua be' bdunu'.

14 Ca dxun tu xi' da dxuzezxe na tu xi'a zren,

ne ca dxun xi' da dxuzezxe na tu din zren,

15 ca'an gudáu zi' xuzre benne' caní tu lu be' bdunu',
ne bchebe le' nen tu be' bdunu' chiu'.

16 Ben xelexedué' ele' ene',
ne ben xelape' Lue' ba lá'ana, Xran.

17 Ben xelexeque zréajene' ne xelezúa stébele'e tu chí'izqueze.
Ben xelexegá'ana dítaje', ne xelexenítie'.

18 Ben xelexúnbe'e nacu' Lue' Xránantu' Dios.

Tuzu' Lue' nacu' Dios zrente lawe' duté xezr la xu.

84

1 Nazrí'ile'eda' xudau' chiu' Lue', Dios, napu' duté xel-la' waca.

2 Dxaca lázrele'eda' sua' ga na',
ne dxezá lazra' sua' lu xudau' chiu', Xran.

Duté da naca', ne duté lázrdawa' dxul-la' chiu' Lue', Dios ban.

3 Ba belún chjegu ca' xrú'uneba',
na' buchuj ca' zaj de lataj naga dxuluzríaba' biadu cheeba' ca'
naga zua lu cugu chiu' Lue', Dios, napu' duté xel-la' waca.

Nacu' Lue' Wenná Bea chia', ne Dios chia'.

4 Ba neza zrente naca na chee benne' ca' zaj zre'e xudau' chiu'.
Chadía chacanna xelúe lá'anaqueze' Lue'.

5 Ba neza zrente naca na chee benne' ca',
Lue' dxuzúa chuchu' le',
benne' ca' dxelezá lazre' chjaque' xi'a lá'azxa chiu', xi'a Sión.

6 Gate dxeledé' lache' bizre nazí le na

Lache' Nisa Dxebézredxu,
dxexaca na lataj naga dxalaj nisa,
na' gusezrá nisa xiuj ca zaj naca beaj ca'.

7 Dxelácadxé' benne' wal-la dxácaté ne zaj xu'e neza
lawe' da xelexé'ene' Dios lu xi'a lá'azxa chee', xi'a Sión.

8 Bene, Xran, ca naca da dxenaba' Lue', Dios, napu' duté xel-la' waca.
Bene, Dios, nacu' Dios chee Jacob.

9 Ben da xrlátaje chee benne' wenná bea cheentu', Dios,
benne' wenná bea na' guca'u Lue'.

10 Cháwedxa naca sua' tu zraze lu xudau' chiu'
 quézcala sua' chi gaxúa iza naga xula.
 Dxaca lazredxa' sua' dxa xu'a xudau' cheę Dios chia'
 ca tu benne' nada'u,
 quézcala súaqueza' tu lizra' zaca naga quebe zua Dios.
 11 Xránadxu Dios naque' Benne' dxuxúę' dxi'u,
 ne Benne' Wenná Bea xabáa cheędxu.
 Dxunę' dxi'u da chawe' dutę xel-la' zri'i lazre' cheę',
 ne dxunę' dxelapa bėnneache dxi'u ba lá'ana.
 Quebe xezúene' zi' gunę' da chawe' cheę benne' ca' zaj naque' du lazre'.
 12 ¡Dios, napu' dutę xel-la' waca!
 ¡Ba neza zrentę naca na cheę benne' ca' dxuluxrén lazre' Lue'!

85

1 Benu' da xrlátaje cheę bėnneache chiu', Xrana' Dios.
 Benu' belexelá zri'ine zre sua Jacob,
 benne' ca' guluę lu na' benne' zitu' ca'.
 2 Bnite lau' da zrinnaj da belún bėnneache chiu'.
 Bdeu' chalá'ala ca zaj naca dul-la cheę benne' ca'.
 3 Bzua zriu' xel-la dxezrá'a chiu',
 ne bsanu' xel-la' xichaj zra'a chiu'.
 4 Bėn xezúantu' lu da ba neza cheę xel-la' weselá chiu', Dios,
 ne québedxa zra'u netu'.
 5 ¿Tu chí'izqueze zra'u netu'?
 ¿Wazrá'aquezu' tu cuen tu cuen zri'ine zre suantu'?
 6 ¿Québedxa gunu' xexaca bantu',
 cheę súantu' lu da ba neza lau Lue'?
 7 ¡Xran, bexache lazre' netu', ne bselá netu'!
 8 Guzé naga' da nņę Xrana' Dios.
 Nņę' da guzúa na bėnneache cheę'
 lu xel-la' dxebeza zri lazre',
 cheę québedxa xelún benne' lá'azxa cheę' da xálaze.
 9 Da líqueze Lę' zúatequeze' guselé' benne' ca' dxelezrebe' Lę',
 cheę sua da xabáa cheę' lu xęzr la xu cheędxu.
 10 Zaj nazraga xel-la dxexache lazre', ne da li cheę Dios.
 Zaj naca tuze da xrlátaje, ne xel-la' dxebeza zri lazre'.
 11 Da li cheę' gusezrá na xęzr la xu nigá,
 na' sel-lę' da xrlátaje cheę' da za xabáa.
 12 Xránadxu gúnnaqueze' dxi'u da cháwedau',
 na' gúnnałę'ę xęzr la xu cheędxu.
 13 Nu benne' naque' xrlátaje waca xezrine' lau Dios,
 na' gunę' gundxu ca da ba blé'ene' gundxu.

86

1 Bzę naga, Xran, ne bene chia',
 lawe' da zua' lu da ba xa', ne dxexázrjeda'.
 2 Bxue neda' lawe' da naca' chiu'.
 Bselá neda', Dios chia', naca' węn zrin chiu',
 ne dxuxrén lazra' Lue'.
 3 Bexache lazre' neda', Xrana' Dios,
 lawe' da dxuláwizra' Lue' te zra chizrela.

- 4 Ben béle'eda neda', wen zrin chiu',
lawe' da dxuzúa cuina' lau Lue', Xran,
5 na' Lue', Xran, nacu' xrlátaje, ne dxunite lau' cheętu'.
Zúatequezu' xexache lazru' benne' ca' dxululáwizre' Lue'.
6 Xrana' Dios, bene da dxuchálajęna' Lue',
ne bęę naga ca da dxenaba' lau'.
7 Lu zra sua' lu da stébele'ę wannéqueza' Lue',
lawe' da dxexechébequezu' Lue' chia'.
8 Xran, quebe nu chilá' Dios ca Lue',
ne quebe nu dxun ca da dxunu' Lue'.
9 Xelelá' bėnneache dutę xęzr la xu da bėnu' Lue',
na' xelúe lá'anaqueze' Lue', Xran,
ne xulucá'ana szreńę' Lau' Lue',
10 lawe' da nacu' Lue' szren, ne dxunu' da dxexebánentu'.
Tuzu' Lue' nacu' Dios.
11 Bseđe neda' da dxaca lazru' guna', Xrana' Dios,
na' guna' ca naca da li chiu'.
Gunná be'e lázrdawa' cheę zreba' La cuinu'.
12 Dutę lázrdawa' güe lá'anaqueza' Lue', Xrana' Dios,
ne gucá'ana szrėnqueza' Lau' chadía chacanna,
13 lawe' da zúatequezu' xexache lazru' neda',
ne bseláu' bėnne'du xu'a lu lataj ba xa'.
14 Dios, belasa benne' dxulucá'ana szren cuinę',
ne dxeledábague' neda',
na' benne' xichaj zra'a ca' belunę' tuze dizra' xelútię' neda',
ne quebe dxelezrebe benne' ca' Lue'.
15 Lue', Xrana', nacu' Dios dxexache lazru' netu',
ne nacu' zren lazre',
ne quebe dxezrá'azeu', san zúatequezu' xexache lazru' netu',
ne nacu' li lazre'.
16 Gunná' ca naca chia', ne bexache lazre' neda'.
Benna chia' neda', wen zrin chiu', xel-la' waca chiu',
nā' bxue neda', zri'ine nu'ula wen zrin chiu'.
17 Ble'e neda' tu da gaca bea na gaca chawe' chia',
ne bėn xelelé'e benne' ca' dxelecuídenę' neda' da na',
ne bėn xelxedué'ene',
lawe' da nacu' Lue', Xrana' Dios, Bėnnea' gúcalenę' neda',
ne bexúe zreńę' neda'.

87

- 1 Lane xęzre Sión zria na lu xi'a lá'azxa.
2 Nazrí'idxa Xránadxu Dios lataj naga dxuluchi'a benne' zaj zre'ę xęzre Sión,
ca nazrí'ine' xúgutę xu'u lizre zri'ine zre sua Jacob.
3 Da xrtante' ca' dxelenná bėnneache ca naca xęzre cheę Dios.
4 Cheajsá lazra' lu xęzr la xu Egipto, ne lu xęzr la xu Babilonia
ga na' zaj zra' bėnneache zaj núnbe'ę neda'.
Le nna' xque, lu xęzr la xu Filistea, ne lu xęzre Tiro, ne lu
xęzr la xu Etiópia gulalaj benne' caní zaj naque' chia'.
5 Ca naca cheę xęzre Sión nnia':
Benne' nigá, ne bėnnea' gulálaję' ga na', na' neda',
Dios zrente, guzúa chúčhua' xęzre na'.

6 Gate gulaba Xránadxu Dios benne' ca' zaj naque' chee',
nne': "Benne' nigá gúlaje' lu xezre na'."

7 Benne' ca' dxelul-le', ne benne' ca' dxeline' xide xelenné':
Ca naca da ba neza zúantu' lu xezre na'.

88

1 Xran, nacu' Dios dxuseláu' neda'.
Te zra, ne chizrela dxuláwizra' Lue'.

2 Bene da dxuchálajlena' Lue',
ne bze naga da dxuláwizra' Lue'.

3 Dxedú lazra' lu da calela ca' da dxaca na chia',
ne ba zua' gatia'.

4 Dxeleque bénneache neda' ca tu benne' gate,
lawe' da dxátele'e ni'a na'a.

5 Nagá'ana' cá'aze ládujla benne' gate.

Naca' ca benne' gulátie' lu wedil-la, ne zaj de' xedxu ba ca',
benne' ca' québedxa dxajsá lazru', Dios,
ne québedxa zaj xu'e lu na'u Lue'.

6 Dxaca chia' cáteze ba nuzú' neda' tu xedxu zren
naga naca chul-la, ne nácale'e situj.

7 Dxequeda' dxezrá'le'u neda'.

Da dxaca chia' naca na ca dxazia' zran xeajxruza zri'a
chee' nísadau'.

8 Benu' belexebiga bi ljwezra' ca' naga zua'.
Benu' neda' ca tu da dxusegute na benne' ca'.

Naca' ca tu benne' xu'e lizre xia ne quebe gaca xedxúaje'.

9 Dxelechul-la xiaj lawa' ne chee' da dxezi dzezaca'.

Xúgutę zra dxuláwizra' Lue', Xrana' Dios.

Dxechisa na'a lau Lue'.

10 ¿Dxúnquezu' xel-la' waca chee' xabáa dxácalenu'
benne' gate ca'?

¿Dxelexasa benne' gate ca' dxelúe lá'ane' Lue'?

11 ¿Dxuluchalaj benne' zaj nagache' lu xedxu ba chee'
xel-la zri'i lazre' chiu',

na' dxuluchalaj chee' da li lazre' chiu' benne' zaj xu'e
lataj chul-la chee' benne' gate ca'?

12 ¿Welexúnbea benne' zaj xu'e lataj chul-la na' ca
naca da zrente' da dxunu',

na' welexúnbea benne' zaj xu'e naga quebe nu dxajsá lazre' le'
ca nacu' xrlátaje?

13 Neda' dxuláwizra' Lue', Xrana' Dios.

Xúgutę zila dxezrín lau' da dxenaba' Lue'.

14 ¿Bizr chee' na' dxebéaj xíchaju' neda', Xran?

¿Bizr chee' na' quebe dxenná'u neda' chee' gácalenu' neda'?

15 Dxezi dzezaca', ne ba zua' gatia'.

Nácatea' bi cúde'tę dxedéa' xel-la' zi' da dxudeu' neda',
na' dxedú lazra'.

16 Dxequeda' dxezrá'le'u neda'.

Da dxuchebu' neda' ba bsedú na lazra'.

17 Zaj naxečaj da caní neda' du zra.

Dxulusaca zi na neda' gáteteze na'.

18 Benu' belexebiga bi ljwezra' ca' naga zua',
na' tuze da naca chul-la dxedále na neda'.

89

1 Tu gúl-lazqueza' cheę xel-la' zri'i lazre' chiu', Xran.
Guzenda' tu cuen tu cuen zri'ine zre súantu' nacu' li lazre'.

2 Nezda' tu súazqueze xel-la' zri'i lazre' chiu',
ne chadía chacanna zua xel-la li lazre' chiu',
cáteze zúaqueze xabáa.

3 Lue' gunnáu': "Bena' xel-la wezría nen bénnea' ba gucá'a.
Guchebe lazra' cheę David, wen zrin chia',

4 gunnia': Guna' tu cháazqueze zri'ine zre su'.
Guna' xelenná be'ę tu chí'izqueze lu waláz chiu'."

5 Benne' zaj zra' xabáa dxelúe lá'ang' Lue',
ne cheę da zrente' ca' da dxunu', Xran,
ne ne cheę xel-la' li lazre' chiu', naga zaj nazrague'.

6 Quebe nu zua xabáa, benne' naque' ca Lue', Xran.
Quebe nu zua benne' szrente', benne' naque' ca Lue'.

7 Benne' zaj zra' xabáa dxelape' Dios ba lá'ana,
na' xúgute' benne' ca' zaj nazraga cheę' dxelezrebe' Le'.

8 Xran, nacu' Dios cheę benne' zante', benne' zaj zra' xabáa.
Quebe nu zua, benne' naque' ca Lue', Xran.

Nacu' Benne' wál-late, ne tu nácazquezu' li lazre'.

9 Xu'u lu na'u xeajxruza zren cheę nísadau'.
Gate dxelasa xeajxruza ca' Lue' dxebeque zriu' na.

10 Bchúchuju' benne' Egipto ca', na' belexegá'ang'
ca tu da gate.

Bese dínnaju' benne' ca' dxeledábage' lue' nen na'u wál-late.

11 Chiu' Lue' naca xabáa, ne chiu' Lué'queze naca xęzr la xu.
Benu' xęzr la xu nigá, ne da ca' zaj nnita lawe na.

12 Benu' da de chalá'a naga za' be' zaga,
ne da de chalá'a naga dxedé gubizra beu' zaga ca'.
Xel-la dxelebé dxelul-la chiu' xi'a Tabor, ne xi'a Hermón.

13 Benne' wál-late nacu' Lue'.
Da zrente' naca xel-la waca chiu', ne nagá'ana szren na.

14 Lu da xrlátaje, ne lu da li lazre' dxenná be'u.
Lu xel-la zri'i lazre', ne lu da li lazre' zaj zua ca da dxunu'.

15 Ba neza zrente' naca na cheę benne' ca' dxelul-ę'
da dxue lá'ana na Lue',
ne zaj zuę' lu xel-la naxaní' chiu', Xran.

16 Ne chiu' Lue' dxelebé'ęne' du zra,
ne dxulucá'ana szrene' Lue' ca naca da xrlátaje chiu'.

17 Lué'queze nacu' xel-la wal-la cheę benne' ca',
ne xel-la xrtan cheę'.
Dxúnnadxu' netu' xel-la waca lawe' da ca' dxéquenu' xrlátaje.

18 Xránadxu Dios dxucu'uje' dxi'u,
na' Dios lá'azxa cheę benne' Israel ca' naque'
Wenná Bea cheędxu.

- 19 Nédxudaṭe bchálaju' lu da blé'enu' benne'
 wən zrin chiu' ca', benne' zaj naque' li lazre', gunnáu':
 Ba gucá'a tu benne' wal-la ládujla bēnneache chia',
 ne ba bzua' le' gaque' wenná bea, ne dxácalēna' le'.
- 20 Ba gucá'a David, wən zrin chia'.
 Bzúaqueza' le' gaque' wenná bea.
- 21 Neda' tu gácalezqueza' le'.
 Xel-la waca chia' gutípaqueza' lazre'.
- 22 Benne' ca' guledábage' Le' quebe xezezéquene'
 bi xelune' chee',
 na' benne' ca' dxelune' da calēla quebe xezezéquene'
 xuluchúchuje' le'.
- 23 Guchúchujqueza' benne' dxeledábage' Le', ne gucuasa'
 benne' ca' lau le'.
 Guna' we' benne' ca' dxelecuídenē' le'.
- 24 Tu zrí'izqueza' le', ne gaca' li lazre' nen le',
 na' ne chia' neda' gápadxē' xel-la' wal-la.
- 25 Guna' nna be'e dutē dxu'a nísadau' zren,
 ne dutē dxu'a xegu Eufrates.
- 26 Le' xe'e neda': "Lue' nacu' Xra'.
 Nacu' Dios chia', dxucu'uju' neda', ne dxuseláu' neda'."
- 27 Neda' guzúa' le' ca zrí'ina' blau,
 na' nna bé'ene' xúgutē benne' wenná bea zaj zre'e
 lu xezr la xu.
- 28 Tu chí'izqueze nuzúa' chee' xel-la' zrí'i lazre' chia',
 na' ca naca xel-la' wezría chia' gaca líqueze na nen le'.
- 29 Guna' tu cházqueze zrí'ine zre suē',
 na' xelenná be'e lu waláz chee' dxácatē ne zua xabáa.
- 30 Che xulusán zrí'ine zre sua David da nadxixruj be'a,
 ne che quebe xelune' ca da nuchi'a chee',
- 31 ne che xelecuae' lu da dxenná be'a,
 ne che quebe xelune' ca da dxapa' le',
- 32 na' gu'a le' zrise lawe' da dxeledábage' neda',
 ne quina' le' xide lawe' da dxelune' da calēla.
- 33 Quebe gusana' ca nazrí'ida' David,
 ne quebe gusana' gaca' li lazre' nen le',
- 34 ne quebe gal-la lazra' xel-la' wezría da nuna',
 ne quebe guchá'a ca da ba gunnía'.
- 35 Tu lásaze bzetaj cuina' guchebe lazra',
 na' cabata' gun lazra' chee' David,
- 36 gunnia': Tu cházqueze zrí'ine zre suē',
 na' xelenná be'e lu waláz chee' lawa' neda'
 dxácatē ne zua gubizra.
- 37 Xel-la' dxenná bea chee' tu sua chúchuzqueze na
 ca zua beu' zran xabáa.
 Tu sua chúchuzqueze na dxácatē ne zua xabáa.
- 38 Lue', Dios, guleaj xíchaju', ne bzu' chalá'ala bēnnea' guca'u,
 ne dxezrá'le'u le'.
- 39 Nuzú' chalá'ala xel-la' wezría bēnlēnu' David,
 wən zrin chiu',

ne nucá'ana dítaju' xel-la' dxenná bea chee'.

⁴⁰ Nuxrínajaju' ze'e da naxechaj na xezre zréntau' chee',
ne nuzríá xi'u ca naca lataj wal-la chee' chee wedil-la.

⁴¹ Xúgute bénneache, benne' dxeledaze ga na' dxelebane'
chee da zaj de chee',
na' benne' xezre walíZR chee' dxelún le' chee'.

⁴² Ba benu' bedxúaj chawe' benne' guledábage' Le',
na' dxelebéle'ene'.

⁴³ Ben dítaju' da ca' dxuchínene' lu wedil-la,
ne quebe gúcalenu' le' lu wedil-la na'.

⁴⁴ Ba gudú' ca naca da xrtante chee',
ne nucá'ana dítaju' xel-la' dxenná bea chee'.

⁴⁵ Benu' naque' ca tu benne' gula gate ne zue' iza cuide' chee',
ne bsi'u le' xel-la' stu'.

⁴⁶ Xrana' Dios, ¿bátaqueze quebe xennu' cheentu'?
¿Tu chí'izqueze dxezrá'aquezu' netu'?

⁴⁷ Bsa lazre' látega sua' lu xezr la xu.

Látega nunu' xel-la' nabán chee xúgute bénneache.

⁴⁸ Quebe zua nu benne' gaca bane' tu chí'izqueze.
Xúgute' xelatie'.

Quebe zua nu benne' le' lu na' xel-la' gute.

⁴⁹ Xran, ¿ba bsanu' David, ne québedxa nazrí'inu' le',
ca bzetaj cuinu' guchebe lazru' zrí'iquezenu' le'?

⁵⁰ Gunná' xque, Xran, ca dxelún le' chia' neda',
wen zrin chiu',

ne ca dxuchaga lawa' da dxelún lala benne' xúgute xezr la xu
chia' neda'.

⁵¹ Benne' ca' dxeledábage' lue' dxulucá'ana dítaje'
bénnea' guca'u Lue', Xran.

Dxulucá'ana dítaje' le' gáteteze zéaje'.

⁵² Ba neza zrentę gaca Xránadxu Dios chadía chacanna.
Ca' naca na, ne ca' gaca na.

90

¹ Xránantu' Dios, ba cua ba cua,
Lue' nacu' ca tu xu'u naga zra cháwentu'.

² Nédxudate ca za gunu' xi'a zri'a ca',
ne ca za sua xezr la xu, ne bénneache,
na' nédxudate, ne lu da za za' nácaquezu' Lue' Dios.

³ Dxu'u bénneache xelexaque' da gulaque',
dxelexaque' xu xrte.

⁴ Chiu' Lue' chí'gaxúa iza zaj naca na ca neaje, da ba gudé na,
ne ca tu chí'idau'ze chizrela.

⁵ Dxejú' bénneache ca dxun guba'u,
da dxua na xúgute xizre laga ca'.

Zaj naque' ca tu bchigala da dxexenite na gate dxexebandxu.

⁶ Zaj naque' ca tu xixre' da dxegula na che zílala.

Dxegula na, ne dxelá'tę na xiaj,
na' xelate' zua gubizra dxelechugue' na, na' dxebizre na.

⁷ Dxebía xi'ntu' lawe' da dxezra'u netu'.

Stébele'e zúantu' lawe' da dxezrá'le'u netu'.

⁸Dxenna'u ca da calela da nuntu'.

Dxulé'enu' lówela zria da nabágantu'.

⁹Dxuzáchiu' iza cheentu' lawe' da dxezra'u netu'.

Dxelexedú iza cheentu' ca tu be' da dxecá'antu'.

¹⁰Ca zaj naca zra naca bantu', zaj naca na ga xun chi iza, na' che nácantu' benne' wal-la, waca bantu' du tápalalaj iza, san ca zaj naca iza ca', dxedentu' xel-la' zi', ne dxéquentu' zede.

Chadí dxeledé iza ca', na' xenítentu'.

¹¹¿Nuzra núnbea xanne' ca naca xel-la' dxezrá'a chiu'?

¿Nuzra núnbea ca naca xel-la' xichaj zra'a chiu'?

¹²Ble'e netu' ca láteze zaj naca zra cheentu'

chee gácantu' benne' dxeléajni'ine'.

¹³Xran, bexaca netu' tuze.

¿Bátadxa chenu'?

Bexache lazre' netu', wen zrin chiu'.

¹⁴Tu tu zila bzua xichaj lárdauntu' xel-la' zri'i lazre' chiu',

na' dutę xel-la' dxebe' tu gul-lazquezentu' chiu'

xúgute zra naca bantu'.

¹⁵Benna netu' zane' iza chee bentu' ca zaj naca iza

bsaca zí'u netu',

ne ca zaj naca iza guzúantu' lu da štebe.

¹⁶Bę lataj netu', wen zrin chiu', le'entu' da zrentę da dxunu',

ne xeledé'e zri'ine zre suantu' da xabáa chiu'.

¹⁷Xránantu' Dios, ben gaca cheentu' da chawe' chiu'.

Ben chepe ban ca naca zrin dxuntu'.

Awe', Xran, ben chepe ban ca naca zrin dxuntu'.

91

¹Bénnea' dxuxrén lazre' Xránadxu Dios chee guxúe' le',

ne dxuzúe' Dios, Bénnea' nape' dutę xel-la' waca,

chee gácalęne' le',

²waca xe'e Dios: Nacu' Bénnea' dxebeza lazra',

ne Bénnea' dxucache chawe' neda'.

Nacu' Dios chia', na' dxuxrén lazra' Lue'.

³Dios gucache chawe' lue' lu xúgute da štebe da quebe zaj nalá',

ne lu xúgute xízrawę' da dxelute na bénneache.

⁴Gucache chawe' lue' ca dxun tu bedxuj dxézreba' biadu cheęba' zran

xrílaba', na' chu'u chawu' lu na' Le'.

Xel-la' li lazre' chee' gácalę na lue', ne gucache chawe na lue'.

⁵Quebe bi guchebe lue' chizrela, ne quebe bi da štebe te zra,

⁶ne quebe bi xízrawę' chee da chul-la,

ne quebe bi da calela ca' da dxelute na bénneache te zra.

⁷Welate chi gaxúa bénneache cuitu' lue',

ne gaxúa gaxúa bénneache gáguze naga zu',

san quebe bi sacu' lue'.

⁸Wanna'u, na' walé'enu'

ca ba xa' xeledé benne' ca' dxelune' da calela.

⁹Nuzú' Xránadxu Dios ca Benne' dxebeza lazru', ne Dios,

Bénnea' nape' dutę xel-la' waca, chee gucache chawe' lue'.

- 10 Chee lę na' quebe bi da caleła gaca na chiu',
ne quebe bi xızrawę' chu'u na lizru'.
- 11 Dios gusebague' gubáz chee xabáa chee' ca' chee xelácalęę' lue',
na' xuluxúę' lue' gáteteze chéaju'.
- 12 Xeluxre' lue' lu ne'ę chee quebe ga'a xiaj ni'u.
- 13 Guléajquezu' bezre xixre' ca', ne bęla' ca',
bezre xixre' schanní' ca', ne bę snia ca'.
- 14 Dxenná Dios: "Guselá' xúgute benne' ca' zaj
nazrí'ine' neda',
ne gucache chawa' benne' ca' dxelexechebę' naca' Xrane'.
- 15 Gate xelenné' neda', na' xecheba' chee'.
Gate zaj xu'ę lu da stebe, súalequeza' le'.
Guselá' le', ne guna' le' ba lá'ana.
- 16 Guna' xelaca banę' zánete iza, ne guselá' le'."

92

- 1 Chawe' naca dxue lá'anantu' Lue', Xrana' Dios,
ne gúl-lantu' da dxucá'ana szren na Lue', Dios szrente.
- 2 Chawe' naca dxuzéentu' bęnneache tu zra tu zra
ca dxexache lazru' netu',
na' dxela dxulé'entu' nacu' li lazre'.
- 3 Dxúl-lantu' da caní, dxínnetu' da dxúl-lalęntu'
da zę chi du chee na,
ne dxínnetu' da con zriadi'i na du da dxennęle'ę xrtandau'.
- 4 Xrana' Dios, ne chee da dxunu' Lue', dxunu' dxebéle'ęda'.
Ca zaj naca da nun na'u zua' lu da ba neza.
- 5 Da zrente zaj naca da nunu', Xrana' Dios.
Da zréne'ę zaj naca da dxugú'u lazru' gunu'.
- 6 Québequeze neze benne' lázxdau zide',
ne quebe dxéajni'i benne' xala ca naca da nigá.
- 7 Gate dxelegula benne' dxelebéaj xíchaje' Dios
ca dxegula xixre',
ne dxępe ban da dxelún benne' węn da zrinnaj,
naca na chee xelebía xi'ę tu chí'izqueze.
- 8 Lue', Xrana' Dios, tu nácazquezu' Dios szrente.
- 9 Dxunna bea na ca gaca chee benne' dxedábage' Lue',
Xrana' Dios.
Dxunna bea na xelebía xi' benne' ca' dxeledábage' Lue'.
Xelase dinnaj xúgute benne' ca' dxelunę' da zrinnaj.
- 10 Lue' dxunu' dxezrendxa xel-la' wal-la chia' ca naca
xel-la' wal-la chee bezre.
Dxugú'u da za xíchaja' da dxutipa na lazra'.
- 11 Dخال-la' le'ęda' xelezrá' zran ni'a benne'
dxeledábage' neda',
na' xenda' xelebezre xache' benne' ca' guledíl-lalęę' neda',
benne' ca' dxelunę' da caleła.
- 12 Welexán benne' xrlátaje ca' ca dxun xaga zina'.
Xelegule' ca dxun xaga cedro lu xi'a Líbano.
- 13 Zaj naque' ca tu xaga zę na lu xudau' chee Xránadxu Dios,
da dxegúlalę'ę na lu chale'aj chee xu'u lizre Dios cheedxu.
- 14 Zaj naque' ca xaga ca' dxelebía da zixre chee na gate

ba zaj nagula na, ne zaj naca na xaga xa'a wal-la.

¹⁵ Benne' caní xuluzenne' bénneache naca li lazre'
Xrana' Dios, Bénnea' dxuzé chúchue' neda',
ne quebe bí zúale Le' da quebe naca xrlátaje.

93

¹ Xránadxu Dios naque' Wenná Bea,
ne nacue' zra lané' da zácale'e.

Nácué' zra lané', ne da nagú'u le'e naca na xel-la' waca zren.
Nuzúa chúchue' xezr la xu nigá, na' quebe nu seque' gutá na.

² Lataj naga dxe'u dxenná be'u, Xran,
zua chuchu na nédxudaute,
na' Lue' zúaquezu' chadía chacanna.

³ Dxelebezre xa'a xegu ca', Xran.

Dxelebezre xa'a na, ne dxelenné na zizraj.

⁴ Xránadxu, Bénnea' zue' xabáa nápadxe' xel-la' waca
ca da zaj napa xegu ca' dxelebezre xa'a na,
ne ca da zaj napa xeajxruza chee nísadau'.

⁵ Chúchule'e zaj naca da nadxixru be'u, Xran.

Lá'azxa nácaqueze xudau' chiu' chadía chacánnaqueze.

94

¹ Xrana' Dios, dxebéaj lazru' bénneache.
Lue', Bénnea' dxebéaj lazre' bénneache, ble'e cuinu'.

² Dxuchi'u Lue' chee da dxelún xúgute bénneache.
Guxasa, bexizruj da dxal-la' xelezí' benne'
dxulucá'ana szren cuine'.

³ Xrana' Dios, ¿Bátadxaqueze xelún benne' wen da calela caní?
¿Bátadxaqueze xelebé benne' ca' dxelebéaj xíchaje' Dios?

⁴ ¿Bátadxaqueze xulucá'ana szren cuine', ne xelenné' dizra' zi'?
¿Bátadxaqueze xulucá'ana szren cuina benne' ca'
dxelebéaj xíchaje' Dios?

⁵ Benne' caní dxuluxrínna' bénneache chiu' Lue', Xran,
ne dxulusaca zi'e bénneache guca'u Lue'.

⁶ Dxelútie' nu'ula tuze ca', ne benne' zitu' ca',
ne dxeluné' xelátebe' bidau' wezebe ca'.

⁷ Dxelenné': "Quebe bi dxelé'e Dios, Xrana benne' ca'.
Dios chee benne' Israel ca' quebe dxue lazre' chee da na'."

⁸ Le chéajni'i, le'e, benne' lázxdau zide'.

Le'e, benne' xala, ¿bátadxaqueze quebe chéajni'ile?

⁹ Dios bene' nágadxu.

¿Québequeze dxénne' da dxennale?

Dios bene' xiaj laudxu.

¿Québequeze dxelé'eng' da dxunle?

¹⁰ Díósqueze dxuzé' lu da ba xa' benne' xezr la xu ca'.

¿Québequeze til-le' le'e?

Díósqueze dxuné' dxeléajni'i bénneache.

¿Québequeze gueque be'ene' da xu'u xichaj lázrdaule?

¹¹ Xránadxu Dios nézquezne' da xu'u xichaj lázxdau

xúgute bēneache.

Nézene' zaj naca na da dácheze.

¹² Ba neza zrente naca na chee bēnea' dxuzéajni'inu', Xran,

ne dxusédenu' le' ca naca da nadxixruj be'u,

¹³ chee cueza zri lazre' gate za zra dxaca da calela,

ca zrin zra xelexú'u xedxu ba benne' dxelune' da zrinnaj.

¹⁴ Québequeze cueaj xichaj Xránadxu Dios bēneache chee',

ne quebe gusán lazre' benne' ca' ba gucá'a Le'.

¹⁵ Naca xrlátaje ca xuluchí'e chee bēneache,

na' xelúnqueze da xrlátaje xúgute benne' zaj naque' li lazre'.

¹⁶ ¿Núzraqueze gácale neda' tíl-laleđxu benne'

wen da calela ca'?

¿Núzraqueze súale neda' tíl-laleđxu benne'

dxelune' da zrinnaj?

¹⁷ Chela ca gúcale Xránadxu neda', bachelja xu'a xedxu ba.

¹⁸ Gate gunnía': Xran, ba zua cheajcházia',

na' Lue', dute xel-la' zri'i lazre' chiu' gúcalenu' neda'.

¹⁹ Gate dxe'a gunne xue, ne zua' lu da štebe,

Lué'queze dxexúe zrenu' neda', na' dxebé'geda'.

²⁰ Québequeze nacu' tuze benne' ca' dxuluchi'e chee

bēneache da quebe naca xrlátaje,

benne' ca' dxulucá'ang' ca xrlátaje da quebe naca na xrlátaje.

²¹ Benne' caní dxelune' tuze dizra' da xelune' chee

benne' xrlátaje,

na' dxelechugue' chee gate bēnea' quebe bi zria nabague'.

²² Xránadxu Dios naque' ca tu xu'u naga zua chawa'.

Dios chia' naque' ca tu xiaj xre da dxuzé chacha na neda'.

²³ Le' xexízruje' benne' ca' dxelune' da calela cáteze naca

da zrinnaj da belune'.

Guzría xi'e benne' ca' lu da calela da dxelune'.

Xránadxu Dios guzría xi'e benne' ca' dxelune' da calela.

95

¹ Le da, güe lá'anadxu Xránadxu Dios dute xel-la' dxebé.

Dute xel-la' dxebé gúl-ladxu chee Bēnea' nuzúa chúchue'

dxi'u naga ladxu.

² Cheajdxu lau Le', ne xedxu Le': Xcalenu'.

Dute xel-la' dxebé gúl-ladxu da güe lá'anadxu Le'.

³ Naca Xránadxu tu Dios szrente,

ne naque' Wenná Bea szrente lawe' dios ca' chee bēneache.

⁴ Dxenná bé'ene' du gabí'i xezr la xu,

naga naca situj, ne naga naca sibe chee xi'a ca'.

⁵ Dxenná bé'ene' nísadau' da núnqueze Le',

ne cá'anqueze xezr la xu da bene'.

⁶ Le da, gucá'ana szrendxu Le', gátadxu sudxú'ala.

Guzú zríbedxu lau Xránadxu, Bēnea' nune' dxi'u.

⁷ Le' naque' Dios cheedxu.

Nácadxu benne' ca' dxuxúequeze', ne nácadxu ca zríla'du ca'

cheéqueze'.

⁸ Che dxenle chí'e na'a zra, quebe gun zide' lázrdaule

ca belún xra xrtáule ca' naga nazí le na Meriba,
ne ca belunę' lu zra na' le'ę xixre' lawe' lataj naga
nazi le na Masah,

⁹ naga buluchá'a xra xrtáule neda', ne belunę' neda' da stebe
lácala belelé'ene' xúgute da beña'.

¹⁰ Lawe' chua iza beditaj lazra' cheę benne' ca',
na' gunnía': Zaj naque' benne' dxelebéaj xíchaję' neda',
ne quebe dxelunę' ca da dxulé'eda' le'.

¹¹ Cheę le na', dutę xel-la' dxezrá'a chia' bzetaj cuina' gunnía':
Quebe xelexú'úqueze' naga xelexezi' lazre' nen neda'.

96

¹ Le gul-la cheę Xránadxu tu da cube.

Le gul-la cheę Xránadxu, le'e zrale du gabí'i xęzr la xu.

² Le gul-la cheę Xránadxu, ne le güe lá'ana La lá'azxa chie'.

Tu zra tu zra le guzén ca naca xel-la' weselá da dxunne'.

³ Le guzén benne' xęzr la xu ca' ca naca xel-la' szren cheę',
Ne benne' xúgute xęzre ca zaj naca xel-la' waca zren nune'.

⁴ Szrente naca Xránadxu, ne naca cheę' güe lá'analę'ędxu Le'.

Naca cheę' gápadxę' xel-la' ba lá'ana ca dios ca'

cheę bėnneache,

⁵ lawe' da zaj naca xúgute dios ca' bedáu' xiaj xaga ca'.

Xránadxu Dios bene' xabáa na'.

⁶ Zúalę Le' da xabáa, ne xel-la' szren.

Nazrate xudau' cheę' xel-la' waca, ne da xrtante.

⁷ Le güe lá'ana Xránadxu, le'e zrale du gabí'i xęzr la xu.

Le güe lá'ana xel-la' szren cheę', ne xel-la' waca cheę'.

⁸ Le gapa ba lá'ana Xránadxu ca da naca cheę' si'e.

Le gua da gunézrujle, ne le da chale'aj cheę xudau' cheę'.

⁹ Le gucá'ana szren Xránadxu lu xel-la' xrtante cheę

da naca lá'azxa cheę'.

Le zrebe lau Le', le'e zrale du gabí'i xęzr la xu.

¹⁰ Le xę bėnneache xęzr la xu: Naca Xránadxu Wenná Bea.

Nuzúa chúchue' xęzr la xu nigá, na' quebe nu seque' gutá na.

Guchi'ę cheę bėnneache ca naca da xrlátaje.

¹¹ Le be, le'e, xabáa, ne xęzr la xu.

Le cuezre xa'a, le'e, nísadau', ne bea ca' zrale na'.

¹² Le be, le'e, le'ę xixre', ne bea ca' zrale na'.

Xaga ca' zaj dxe' xi'a ca' welunna schaga lu xel-la' dxebe'

¹³ lau Xránadxu gate xidę'.

Xidę' guchi'ę cheę bėnneache zaj zre'ę xęzr la xu.

Nna bé'ene' bėnneache du gabí'i xęzr la xu.

Nna be'e Le' ca naca da xrlátaje, ne ca naca da li.

97

¹ Naca Xránadxu Benne' Wenná Bea.

Le be, le'e zrale xęzr la xu.

Le be, le'e zrale dxu'a nísadu ca'.

² Zaj naxechaj beuj, ne da chul-la Le'.

Ca naca da li, ne da xrlátaje dxenná be'ę.

³ Cuía lau xi' lau Le',

ne guzezxe na benne' guledábage' Le'.

4 Ca naca xesa ca' chee' bulusení na xezr la xu.

Dxelé'e xezr la xu na, ne dxezrize na.

5 Dxelexuna xi'a ca' ca da zixre chee' bézudau' lau Xránadxu,

lau Xrana bénneache zaj zre'e du gabí'i xezr la xu.

6 Dxulé'e xabáa ca naca da xrlátaje chee',

na' dxelelé'e bénneache duté xezr la xu ca naca

xel-la' szren chee'.

7 Dخال-la' xelexedué'e xúguté benne' ca' dxulucá'ana szreng'

bedáu' xiaj xaga ca',

benne' ca' dxulucá'ana szren cuine' ca zaj naca bedáu' xiaj xaga ca'.

Xúguté dios chee' bénneache ca' dxal-la' xuluzú zribe na

lau Xránadxu Dios.

8 Belén benne' zaj zre'e Sión, na' gulebene'.

Gulebé benne' zaj zre'e Judá, ne chee' da guchi'u Lue', Xran.

9 Szrenté nacu' Lue', Xran, lawe' duté xezr la xu.

Szrendxa nacu' Lue' ca xúguté dios chee' bénneache.

10 Le'e, núlale nazrí'ile Xránadxu, le cuide da caléla.

Le' dxuxúe' bénne'du zaj xu'e bénneache chee'.

Dxuselé' le' lu na' benne' dxelebéaj xíchaje' Dios.

11 Zualé da dxusení na benne' xrlátaje ca',

na' xel-la' dxebé zualé na benne' li lazre' ca'.

12 Le be, le'e, benne' xrlátaje, lau Xránadxu.

Le gusá lázrele ca da nun Dios lá'azxa, ne le güe lá'ana Le'.

98

1 Le gul-la chee' Xránadxu tu da cube lawe' da nune' da ca'
da dxebánedxu.

Ne chee' xel-la' wal-la chee', ne xel-la' waca lá'azxa chee'

ba bđinne'.

2 Ba nuzén Xránadxu ca dxunge' dxuselé' bénneache.

Ba bzenne' bénneache xezr la xu ca' ca naca da xrlátaje chee'.

3 Ba nune' ca da guchébe lazre' chee' benne' Israel ca'

ca naca xel-la' li lazre' chee', ne xel-la' nazrí'i zren chee'.

Bénneache du gabí'i xezr la xu ba belelé'ene' ca naca da ben

Dios cheedxu.

4 Le gul-la lu xel-la' dxebé lau Xránadxu, le'e zrale du gabí'i

xezr la xu.

Le güe lá'ana Le' nen da gúl-lale, ne lu xel-la' dxebé chee

le cuezre xa'a.

5 Le gul-la da güe lá'anale Xránadxu.

Le gul-la nen da con zriadi'i na du ca' da quínele.

6 Le gucuezre luzu da ca' dxulucuezre', ne da dxutíl-lale ca',

ne le cuezre xa'a lu xel-la' dxebé lau Xránadxu,

Wenná Bea cheedxu.

7 Le gun schaga nísadau', ne bea ca' zrale na'.

Le gul-la, le'e, xezr la xu, ne le'e zrale na'.

8 Le capa na'le, le'e xegu ca'.

Le gul-la lu xel-la' dxebé, le'e, xi'a ca', lau Xránadxu

9 lawe' da xide' xedajnná bé'ene' xezr la xu nigá.

Nna bé'ene' benne' zaj zre'e du gabí'i xezr la xu lu da xrlátaje,

ne b́enneache dutę xęzr la xu lu da naca li lazre'.

99

¹ Naca Xŕanadxu Dios Benne' Wenná Bea,
na' dxelezrize xúgute b́enneache lau Le'.

Dxe'e lataj blau chee' da zua na ĺawela querubín ca',
na' dxezrú' lu xęzr la xu.

² Szrentę naca Xŕanadxu lu xi'a Sión.
Naque' szren lawe' xúgute cue' xęzr la xu ca'.

³ Le güe lá'ana La Xŕanadxu da naca na szren,
ne da dxal-la' zŕebedxu.

¡Lá'azxa naca Le'!
⁴ Lue', Wenná Bea szrentę, nazrí'inu' da naca xrlátaje.
Nuzúa chachu' da naca li lazre'.

Ba nunu' da naca xrlátaje, ne da naca li lazre'
ládujla zri'ine zre sua Jacob.

⁵ Le gucá'ana szren Xŕanadxu Dios.
Le guzú zríbele lau Le' naga dxe'e.

¡Lá'azxa naca Le'!
⁶ Moisés, ne Aarón gulaque' bxruze chee' ca'.
Samuel guque' tu benne' bchálajlene' Le'.

Gulenné' Xŕanadxu Dios, na' Le' bechebe'.

⁷ Tu lu beuj bza bchálajlene' benne' ca'.
Buluzúe' dizra' da gunná bé'ene',
ne da ca' bdxixruj be'ene' le'.

⁸ Xŕanantu' Dios, bechebu' lau benne' ca'.
Blé'enu' le' nacu' Dios, dxunite lau' chee' b́enneache,
lácala dxudéu' le' xel-la' zi' ne chee' dul-la da zaj nabague'.

⁹ Le gucá'ana szren Xŕanadxu Dios.
Le guzú zríbele lau Le' lu xi'a lá'azxa chee',
lawe' da lá'azxa naca Xŕanadxu Dios.

100

¹ ¡Le gul-la lau Xŕanadxu Dios, le'e zrale du gabí'i xęzr la xu!

² ¡Le gucá'ana szren Le' dutę xel-la' dxebé!

¡Le da lau Le', dxúl-lale dutę xel-la' dxebé!

³ Cabata' gal-la ĺazrele naca Xŕanadxu Diósqueze.

Le' bene' dxi'u, na' nácadxu chee' Le'.

Nácadxu xęzre chee', ne zríla'du chee'.

⁴ Le chu'u lataj naga zua xudau' chee', xeje Le': Xcalenu',
ne chale'aj chee' na, güe lá'anale Le'.

Le xę Le': Xcalenu', ne le güe lá'ana Le'.

⁵ Chawe' naca Xŕanadxu, na' chadía chacanna zua
xel-la' zri'i lazre' chee'.
Xel-la' li lazre' chee' tu súazqueze na chadía chacanna.

101

¹ Tu gúl-lazqueza' ca naca xel-la' zri'i lazre',
ne xel-la' li lazre' chiu'.

Tu gúl-lazqueza' chiu' Lue', Xrana' Dios.

² Dxaca lazra' guna' da naca li lazre'.

¿Bátala xidu' gácalenu' neda'?

Guna' da naca du lazre', ne cá'anqueze guna' caní
lu xu'u lizra'.

³ Québequeze cu'u lazra' guna' tu da zrinnaĵ.

Dxecuídeda' da dxelún benne' ca' dxelebéaj xíchajé' Dios.

Québequeze gu'a lataĵ xelegue' naga zua' neda'.

⁴ Gucuaša' lu xichaj lázrdawa' da caleĵa,
ne quebe cu'u lazra' cheĵ da caleĵa.

⁵ Guzúa' chalá'ala benne' dxelenné' bagácheze
cheĵ benne' xula.

Quebe gu'a lataĵ súale neda' tu benne' dxucá'ana szren cuine',
u naque' benne' wenná be'e.

⁶ Le'eda' chawe' benne' ca' zaj naque' li lazre' lau Dios,
cheĵ xelezrē'ē lawa' neda'.

Tuze benne' ca' zaj naque' du lazre' xelunē' zrin chia'.

⁷ Quebe gu'a lataĵ benne' wecache lan chu'ē lizra'.

Quebe gu'a lataĵ tu benne' wen lazre' xegá'ane' naga zua'.

⁸ Tu zra tu zra guzría xi'a benne' ca' dxelunē' da caleĵa,
benne' ca' zaj zre'ē lu xezr la xu chia'.

Gucuaša' xúgute' benne' ca' dxelunē' da zrinnaĵ lu xezre cheĵ
Xránadxu Dios.

102

¹ Xrana' Dios, bene da dxenaba' lau',
ne bze naga da dxuláwizra' Lue'.

² Quebe gucache lau' lawa' neda', lawe' da lu da štebe zua'.

Bze naga neda', ne bechébeche chia' gate dxuláwizra' Lue'.

³ Naca xel-la' nabán chia' ca zren cheĵ xi' da dxexenítete.
Xu'u da la lu zrita chia' ca tu xi' da dxále'ē na.

⁴ Dxedú lazra', ne naca lázrdawa' ca tu xixre' da dxecuade,
na' québedxa dxenná na gudagu xeta.

⁵ Lawe' da dxebezre wé'le'a ba nazritale'a.

⁶ Naca' ca tu situgún dxedaba' tu lu xezr la xu bizre,
ne ca tu bzriu zríaba' lawe' tu xu'u ze la'a.

⁷ Dxíchaja' bchigala, ne naca' ca tu bxinne zríaba' túzeba'
xrgu'u sibe.

⁸ Tu zra tu zra tu dxuluchácalezqueze benne'
dxeledábague' neda'.

Benne' ca' dxelecuídenē' neda' dxuluchínenē' la' neda'
gate nu benne' dxelegú'ē de'.

⁹ Lu waláz cheĵ xeta dxawa' de,
na' nisa dxebezra' dxechixre na da dxé'aja'.

¹⁰ Caní dxaca chia' lawe' da dxezra'u neda',
ne dxecuídenu' neda'.

Guca'u neda', na' gudxú'unu' neda'.

¹¹ Naca xel-la' nabán chia' ca tu zrul-la da dxedeze,
na' naca' ca tu xixre' da ba nabizre.

¹² Lue', Xrana' Dios, tu chí'izqueze zu',

na' cheajlesá lazre' xúgute' cuen bēnneache Lau'.

¹³ Chasu', ne xexache lazru' benne' zaj zre'ē xezre Sión,
lawe' da ba bzrin zra xexache lazru' benne' ca'.

- 14 Netu', wən zrin chiu', nazrí'intu' xiaj ca' chee xezre na'.
Dxéquentu' zi' lawe' da ba nabía xi na.
- 15 Nadxa benne' xezr la xu ca' xelezrebe' lau Lue', Xran.
Xelezrebe xúgute benne' wenná bea chee xezr la xu nigá
da xabáa chiu',
- 16 gate ba bechisu' xezre Sión, Xran,
ne xeelé'equezne' ca naca da xabáa chee na,
- 17 gate na' guzé nagu' da dxelenaba benne' ca' guleaj xíchaju',
ne québedxa guzú' chalá'ala da dxelata' xuene' Lue'.
- 18 Xuaj da nigá chee xululaba benne' ca' za zá'aca,
na' benne' ca' za xelalaj xelúe lá'ané' Xránadxu Dios.
- 19 Naga zua Xránadxu xabáa gunné'e.
Naga zue' xabáa blé'eng' lu xezr la xu nigá.
- 20 Dxelé'eng' benne' dxelebezre xache', benne' zaj xu'e
lizre xia,
na' gusané' benne' ca' ba zaj nachugue' chee' xelatig'.
- 21 Xuluzenne' benne' zaj zre'e xezre Sión ca szren naca
La Xránadxu Dios,
chee xelúe lá'ané' Lē' lu xezre Jerusalén,
- 22 gate xelezraga bēnneache chee xúgute xezre, ne xúgute cue'
xezr la xu
chee xulucá'ana szrene' Xránadxu Dios.
- 23 Xránadxu Dios bene' gute ni'a na'a gate ne naca' cuide'.
Xeláteze ca betig' neda'.
- 24 Nadxa gunnía': Dios chia', quebe gutiu' neda',
gate quebe ne guéxrua'.
Lue' tu chí'izqueze zu'.
- 25 Nédxudaute Lue' bzu' xezr la xu nigá, na' nen na'u
benu' xabáa.
- 26 Xelebía xi' da ca', san tu zúazquezu' Lue'.
Welexru xúgute da ca' ca tu ladxe'.
Ca dxuchadxu zra lánadxu tuzruj, ca' gucha'u da ca',
na' xucúbeu' na.
- 27 Túzqueze ca nacu' Lue',
ne québequeze te chiu' Lue'.
- 28 Zrí'inentu' netu', wən zrin chiu', xelezrabe' chawe',
na' guzé chúchuquezu' zri'ine zre súantu' lau Lue'.

103

- 1 Be lá'ana Xránadxu Dios, lue', bēnne'du xu'a.
Be lá'ana Lē' lá'azxa, duté da naca'.
- 2 Be lá'ana Xránadxu, lue', bēnne'du xu'a,
ne quebe gal-la lazru' ca da chawe' da nune' chiu'.
- 3 Dxunite lawé' chee xúgute dul-la nabaga'a.
Dxexuné' neda' ca naca xúgute xízrawé' da xu'a.
- 4 Dxuxúé' neda' chee quebe gatia'.
Lu xel-la' zri'i lazre' chee', ne xel-la' dxexache lazre' chee'
dxuné' chawe' chia'.
- 5 Dxuzánlé'e da chawe' da dxaca chia' chee xegá'ana'
benne' cuide',
ne benne' wal-la ca dxaca chee tu bsia.

- 6 Xránadxu Dios dxuchi'e chee da dxaca chee benne'
dxeledéé' da ba xa',
ne dxucá'ana chawe' da dxaca chee'.
- 7 Blé'engé' Moisés da ca' gulú'u lazre' guné',
ne be'e lataj benne' Israel ca' belelé'engé' da ca' bene'.
- 8 Naca Xránadxu Benne' dxexache lazre', ne Benne' zri'i lazre'.
Quebe dxezrá'azie', san zrentę naca xel-la' zri'i lazre' chee'.
- 9 Quebe nniaqueze', ne quebe zrá'aqueze'.
- 10 Quebe dxudéé' dxi'u lu da ba xa' ca naca zria
da nabágadxu,
ne quebe ne guzria xi'e dxi'u ne chee dul-la da nabágadxu.
- 11 Ca sibe naca xabáa lawe' xezr la xu,
caníqueze naca xel-la' zri'i lazre' zren chee' nen benne' ca'
dxelape' Le' ba lá'ana.
- 12 Ca zitu' naca naga dxalaj gubizra, ne naga dxebía na,
caníqueze dxucuase' zitu' dul-la da nabágadxu.
- 13 Ca zri'i lazre' naca xra bidu ca' nen zri'inequeze',
caníqueze naca zri'i lazre' Xránadxu nen benne' ca'
dxelape' Le' ba lá'ana.
- 14 Le' nézené' ca nácadxu lu bęla' dxen cheedxu.
Dxajsá lazre' nácadxu xu xrte.
- 15 Ca naca xel-la' nabán cheedxu, nácadxu ca tu xixre'.
Dxegúladxu ca tu xiaj xixre',
- 16 na' dxedé be' dxua na le' na, na' dxexenite na,
na' québedxa nu dxelé'eqeaze le' na.
- 17 Ca naca chee benne' ca' dxelape' ba lá'ana Xránadxu,
zúale xel-la' zri'i lazre' chee' benne' ca' chadía chacanna,
na' xel-la' xrlátaje chee' zúalequeze na xúgute zri'ine zre sua
benne' ca',
- 18 benne' ca' dxelúnqueze' ca naca xel-la' wezria nune',
ne benne' ca' dxelune' ca zaj naca da nadxixruj be'e.
- 19 Nuzúa Xránadxu lataj chee' xabáa naga dxe'e dxenná be'e.
Nácaqueze' Wenná Bea lawe' xúgute da zaj zua.
- 20 Le güe lá'ana Xránadxu, le'e, gubáz chee xabáa ca',
Nácale benne' wal-la, ne benne' chúchule'e,
na' dxunle ca dxenná Le', ne dxuzé nágale ca dxę'e le'e.
- 21 Le güe lá'ana Xránadxu, le'e, dxenná beale xabáa.
Nácale wen zrin chee', ne dxunle ca dxaca lazre' Le'.
- 22 Le güe lá'ana Xránadxu, xúgutele le'e ba nun Dios le'e,
zrale xúgute lataj naga dxenná bea Le'.
jBe lá'ana Xránadxu, lue', bęnne'du xu'a!

104

- 1 Bę lá'ana Xránadxu Dios, lue', bęnne'du xu'a.

jXrana' Dios, szrentę nacu' Lue'!

Nacu' zra lanu' da xabáa, ne da xrtante.

2 Dxugacu cuinu' xel-la' naxaní' ca zra lanu'.

Dxechilju' xabáa ca tu xu'u ladxe' chiu'.

3 Nunu' lizru' lawe' nisa da zę ná'ala.

Dxuchínenu' beuj ca' ca tu da dxudé xua naga dxe'u Lue',

da dxedá na lu be'.

⁴ Dxuchínenu' be' ca' ca gubáz chiu' ca',
ne xesa ca' ca wen zrin chiu' ca'.

⁵ Bzua chuchu' xezr la xu nigá lu lane na,
na' quebe nu gaca gutá le na.

⁶ Bgacu' xezr la xu nigá nen nísadau' ca dxun tu benne'
dxacue' zra lane',
na' nisa na' bgacu na xi'a ca'.

⁷ Gate gudil-lu' nisa na', na' bzrunnuj na.
Bebiga na gate ben na chí'u zizraj.

⁸ Nisa na' bgacu na xi'a ca' xajxedxé na dxu'a xegu ca',
lataj ca' ba nunu' chee nisa na'.

⁹ Bzu' naga ze lau cheajsé na, naga québedxa gaca te na,
chee québedxa gacu na xezr la xu bizre na'.

¹⁰ Dxunu' beaj ca' dxelalaj na dxu'a xégudu ca',
ne xegu ca' dxeledé na ládujla xi'a ca'.

¹¹ Lu xegu ca' dxelé'aj be xixre' ca' nisa,
na' dxegúa na xel-la' dxelebile chee burro xixre' ca'.

¹² Lu xaga zaj nnita dxu'a xegu ca' zaj zra' béadu ca'
zaj zua xrila.

Dxelúl-laba' ládujla zruze na ca'.

¹³ Zran xabáa dxesel-lu' xiuj da dxaca na lu xi'a ca',
na' dxezrate xezr la xu na' ca naca da xrlátaje da dxunu'.

¹⁴ Dxusegulu' xixre' da dxelagu bezure ca',
ne xixre'du ca' da dxelagu bénneache,

ne da ca' dxuluchine bénneache dxeluné' xel-la' wagu,

¹⁵ ne uva ca' da dxeluné' xrise uva wal-la da dxuzúa na
bénneache ca' xel-la' dxelebé,

ne olivo ca' da dxeluné' da za da dxelegú'e xíchajé',
ne zrua' da dxeluné' xeta chee xelaca bané'.

¹⁶ Xaga cedro ca' da zaj zua na xi'a Líbano dxelezilé'e na nisa xiuj.
Zaj naca na xaga chee Xránadxu Dios, da ca' guza Le'.

¹⁷ Lu xaga ca' dxuluzría bxínnedu ca' xrú'uneba',
na' lu zruze na ca' zaj zua lizre bxuze' ca'.

¹⁸ Zaj zua chivo xi'a ca' lu xi'a zri'a ca',
na' lu bluaj ca' chee xi'a ca' zaj zua bzrizru' ca'.

¹⁹ Benu' beu' da dxulé'e na tu beu' tu beu' chee iza,
na' gubizra núnbea na gate dxal-la' cuía na.

²⁰ Benu' dxela, na' gate bache nachul-la,
na' dxeledxúaj be dxela ca'.

²¹ Dxelebezre xa'a bezure xixre' ca', zaj nauba' be xeláguba'.
Dxelíljaba' da nun Dios xeláguba'.

²² Gate dxalaj gubizra, na' dxelexezrinba' lu bluaj cheeba',
naga dxeláseba' te zra.

²³ Nadxa dxeledxúaj bénneache dxeluné' zrin,
na' dxelúnqueze' zrin ca dxebíja gubizra.

²⁴ Xran, da zanté zaj naca da benu'.
Dute xel-la' sina chiu' benu' da ca'.

Nazrate xezr la xu nigá da ca' benu'.

²⁵ Na' zua nísadau', da zri'a, ne da laga,

naga zaj xu'u zánete bea ca', béadu ca', ne be zri'a ca'.

²⁶ Lu nísadau' na' zaj zra' da dxeledá lawe' nísadau' ca'.

Zua be zri'a na' benu' Lue', nazí' laba' leviatán.

²⁷ Xúgute bea ca' dxuluxrén lázreba' Lue',
chee gunézruju' da xeláguba' ca zrin chee na.

²⁸ Dxunézruju' leba', na' dxelecá'aba' na.
Dxunézruju' da dxeláguba', na' dxeléljeba'.

²⁹ Gate quebe dxenná'u-ba', na' dxelegrébeba'.

Gate dxucuasú' be' dxelecá'aba', na' dxeláteba',
ne dxelexácaba' xu xrte.

³⁰ Gate dxesel-lu' be' chiu', na' xelexaca banba'.

Dxunézruju' xel-la' nabán cube chee da ca' zaj zua
xezr la xu nigá.

³¹ ¡Chadía chacanna gaca ba Xránadxu Dios!

Dxezaca ba lazre' Xránadxu chee da ca' ba núnqueze'.

³² Dxenné'e xezr la xu nigá, na' dxezrú' na.

Dxuté' xi'a ca', na' dxeledxúaj na zren.

³³ Gúl-laqueza' chee Xránadxu dxácaté na' naca bana'.

Xúgute zra zúaqueza' neda' gul-la' da güe lá'ana' Dios chia'.

³⁴ Chawe' naca chia' da ca' dxulaba lazra' ca naca chee',
na' dxebéle'eda' ne chee Xrana' Dios.

³⁵ Welebía xi' benne' dul-la ca' zaj zre'e lu xezr la xu nigá,
Na' québedxa cha benne' ca' dxelebéaj xíchaje' Dios.

¡Be lá'ana Xránadxu Dios, lue', bénne'du xu'a!

¡Le güe lá'ana Xránadxu!

105

¹ ¡Le güe lá'ana Xránadxu Dios!

¡Le gucá'ana szren La Le'!

¡Le guzén bénneache duté xezr la xu ca naca da nune'!

² ¡Le gul-la chee'!

¡Le gul-la da güe lá'anale Le'!

¡Le guchalaj chee da zrente' ca' da nune'!

³ ¡Le be lu da naca chee'!

Xúgute benne' ca' dxelapa ba lá'ana Xránadxu dxal-la'
xelebéle'ene'.

⁴ Le naba Xránadxu gácalene' le'e.

Tu zra tu zra le guxrén lazre' Xránadxu Dios.

⁵⁻⁶ Le'e, zri'ine zre sua Abraham, wen zrin chee Xránadxu.

Le'e, zri'ine zre sua Jacob, bénnea' guqué'e,

Le gusá lazre' xel-la' waca ca', ne da zrente' ca' da bene',
ne ca naca da bchi'e cheele.

⁷ Le' naque' Xránadxu, ne Dios cheedxu.

Le' dxenná bé'ene' bénneache zaj zre'e duté xezr la xu.

⁸ Lácala te chee chi gaxúa cuen bénneache,

québequeze gal-la lazre' da guchebe lazre'

lu xel-la' wezría chee',

⁹ xel-la' wezría na' bénlene' Abraham,
da na' bzetaj cuine' guchebe lazre' chee Isaac,

- 10 na' bzua chúchug' na ca tu da nadxixruj bea na,
da gun Jacob,
da gaca na tu xel-la' wezría da zeajlí canna nen
benne' Israel ca',
- 11 da bene' gate na' gunné': "Chiu' lue' gunna' xezr la xu chee
benne' Canaán ca',
da gaca na tu da xudele lu na' zri'ine zre súale."
- 12 Gate na' bábaze zaj naque'
gulezré'e lu xezr la xu nígá ca benne' zitu' ca',
- 13 ne guledé'e tu xezr la xu xetú xezr la xu, ne tu xezre
xetú xezre.
- 14 Quebe be' Dios lataj nu benne' bi gung'e chee
bénneache chee',
na' ne chee benne' ca' gudil-le' benne' wenná bea ca'.
- 15 Guzre' le': "Quebe bi gunle chee benne' ca' gucá'a,
ne quebe gunle da calela chee benne' ca' dxuluchalaje'
waláz chia'."
- 16 Bene' guta' tu gubina' lu xezr la xu na',
na' gudú'e ca naca xeta xelawe'.
- 17 Gusel-le' tu benne' cuía lawe' lau benne' chie' ca',
bénnea' naque' José, bi na' belutie'-be' chee gácabe'
wen zrin chee benne' zitu'.
- 18 Buluzré'e ní'abe' lu xedxu chee cuaga da bexru na ní'abe',
gate na' gulu'e-be' lizre xia lu xezr la xu Egipto,
- 19 ca bzrin zra guca li ca da gunná José dxal-la' gaca.
Caní guca, ble'e xrtizra' Xránadxu cúnna' da li.
- 20 Nadxa benne' wenná bea chee Egipto gusel-le'
nu gusán José na'.
- Bénnea' dxenná bé'ene' zánete cue' xezr la xu bsane'-be'.
- 21 Bzue'-be' gácabe' xrana benne' zaj zré'e lizre',
ne chee nna be'ebe' ca naca da xu'u lu ne'e,
- 22 chee til-labe' benne' szren ca' chee wenná bea cáteze
dxaca lázrebe',
ne chee guzéajni'ibe' benne' gula chee xezr la xu Egipto
chee xelaque' benne' sina.
- 23 Gudé na' gulu'e benne' Israel ca' lu xezr la xu Egipto,
na' guzúa Jacob lu xezr la xu chee zri'ine zre sua Cam.
- 24 Gulánle'e bénneache chee Xránadxu lu xezr la xu na',
na' bene' gulaque' wál-ladxa ca benne' guledábague' Le'.
- 25 Bcha Dios lázxdau benne' Egipto ca' chee xelecuidene'
bénneache chee',
chee xelugú'u lazre' xelune' da calela chee wen zrin chee' ca'.
- 26 Nadxa gusel-le' Moisés, wen zrin chee', lau bénneache
chee' ca', ne Aarón, bénnea' guqu'é.
- 27 Benne' caní be'e Dios lataj belune' xel-la' waca ca'
chee xabáa,
ne xel-la' waca zrente ca' lu xezr la xu chee zri'ine zre sua Cam.
- 28 Gusel-la' Dios tu da chul-la da bgacu na duté xezr la xu na',
san benne' Egipto ca' quebe buluzú'e dizra' da gunná be'ene' le'.
- 29 Nadxa bene' bexaca nisa xegu chee benne' ca' dxen,
ne betie' xúgute bela zaj zraba' xegu ca'.

- 30 Busezrate' xezr la xu chee' bluzru ca' ga bzrinte' gulezraba' xu'u lizre benne' wenná bea chee' benne' Egipto ca'.
- 31 Gunnaze Dios, na' belelá' zánete be'a chee' bezre, ne be'a lase ca' dutę lu xezr la xu chee' benne' ca'.
- 32 Waláz chee' nisa xiuj gusel-le' xiaj bezxe' lu xezr la xu chee' benne' ca',
ne xi' da bzezxe na ca naca xezr la xu chee'.
- 33 Bzria xi'e ca zaj naca lba uva chee', ne ca zaj naca xaga higo chee', na' bzúxuje' ca zaj naca xaga zaj zę lu xezr la xu chee'.
- 34 Gunnaze', na' belelá' biche zu ca', da quebe nu seque' gulaba lęba',
- 35 na' guláguba' dutę xixre' xa'a lu xezr la xu chee', ne guláguba' dutę lina da dxunna xezr la xu na'.
- 36 Nadxa bętie' xúgute' bi biu nedxu chee' benne' Egipto ca', bi zaj nácabe' bi blau chee'.
- 37 Bebéaje' bęnneache chee' na' zaj nu'e dumí plata, ne dumí oro,
na' quebe nu chilá' benne' ládujla lę', benne' quebe chawe' zue'.
- 38 Gulebé benne' Egipto ca' gate beledxúaj benne' ca' ga na', lawe' da belezrébele'e lę'.
- 39 Bzalaј Dios tu beuj da gulú'u na benne' ca' zrul-la, ne tu xi' da bsaní na chee' chizrela.
- 40 Gulenabe' Dios, na' gusel-le' chee' btau ca', ne bęne' gulélajene' xeta da bdxuaj na xabáa.
- 41 Gulę'e tu xiaj xre, na' gulaj nisa da gudę na lu xezr la xu bizre na' ca tu xegu nisa.
- 42 Caní ben Dios lawe' da bsa lazre' xrtizre' lá'azxa da guchebe lazre' gune' chee' Abraham, wen zrin chee'.
- 43 Bebéaje' bęnneache chee' lu xezr la xu Egipto, dxelebene'.
- Lu da ba neza gulezrá' benne' ca' guqué'e.
- 44 Bnézruje' benne' ca' xezr la xu chee' benne' xezica ca', na' da belún benne' xezr la xu ca' bexaca na chee' benne' chee' ca',
- 45 chee' xulupá'ane' ca naca xrba chee' ca', ne xelune' ca naca da gunná bé'ene' ca'.

¡Gaca ba lá'azxa Xránadxu Dios!

106

1 ¡Gaca ba lá'azxa Xránadxu Dios!

¡Le xę Xránadxu Dios: "Xcalenu!"

Caní dxal-la' gunle lawe' da naque' xrlátaje, ne lawe' da tu chí'izqueze dxexache lazre' dxi'u.

2 ¿Núzraqueze seque' gulé'ene' ca naca xel-la' waca zrente' ca' da nune' Xránadxu?

¿Núzraqueze seque' güe lá'ane' Le' ca dxal-la' gundxu?

3 Ba neza zrente' naca na chee' benne' ca' dxelune' da xrlátaje, benne' ca' tu dxelúnzqueze' da naca xrlátaje.

4 Bsa lazre' chia', Xrana' Dios, gate dxunu' da chawe' chee' bęnneache chiu'.

5 Gudá bselá neda' chee gaca le'eda' da chawe' gunu'
 chee benne' ca' ba guca'u Lue',
 ne chee beda' gate xezezá' bénneache chiu' lu da ba neza,
 ne chee bélena' bénneache chiu'.
 6 Ba bentu' dul-la cáqueze belún xra xrtáuntu' ca'.
 Bentu' da calela, ne bentu' da zrinnaj.
 7 Gate gulezá' xra xrtáuntu' lu xeze la xu Egipto,
 quebe bululaba lazre' ca naca xel-la' waca ca' chee xabáa
 da benu'.
 Quebe xeajlesá lazre' ca bexache lázrele'u le'.
 Guledábague' Lue' dxu'a nísadau' da nazí le na Xrna.

8 Le' bselé' benne' ca' chee gaca ba lá'ana La Le',
 ne chee gulé'e lau ca naca xel-la' waca chee'.
 9 Gudil-le' nísadau' Xrna na', na' bebizre na,
 na' gulede' bénneache chee' laduj nísadau' na' lu xu bizre.
 10 Bselé' benne' ca' lu na' benne' guledábague' Le',
 ne bebéaje' le' lu na' benne' ca' bulusaca zi'e le'.
 11 Nadxa nísadau' na' bgacu na benne' ca' guledábague' le'.
 Netú benne' ca' quebe nu begá'ana.
 12 Nadxa benne' chee' ca' guléajle'e dizra' chee',
 ne belul-le' da belúe lá'ane' Le'.
 13 Chadí gulal-la lazre' ca da bene'.
 Quebe gulebeze' ca la' dizra' chee Dios.
 14 Gulezá lazre' tu da calela le'e xixre' lawe' lataj na',
 na' buluché'e Dios le'e xixre' na'.
 15 Gudé na' bnezruj Dios ca da gulenabe',
 san gusel-le' ládujla le' tu da gute na bal-la benne' ca'.
 16 Gulaque' xa lazre' chee Moisés naga zaj zre'e,
 ne chee Aarón, Bénnea' gucá'a Xránadxu Dios.
 17 Nadxa bzra xeze la xu na', ne gudebe na Datán,
 ne bgacu na benne' ca' zaj de'e Abiram.
 18 Nadxa guxalaj xi' naga zaj nazraga benne' ca',
 na' bzezxe na benne' ca' dxelune' da calela.
 19 Belune' tu bedáu' bezre da naca na oro lu xi'a Horeb,
 na' buluzú zribe' lau bedáu' oro na'.
 20 Caní bulucá'ane' Dios, Benne' xabáa,
 chee xulucá'ana szrene' tu bedáu' bezre,
 da naca na ca tu bezre dxáguba' xixre'.
 21 Gulal-la lazre' Dios, Bénnea' bselé' le',
 Bénnea' bene' xel-la' waca zrente' ca' lu xeze la xu Egipto,
 22 ne bene' xel-la' waca ca' chee xabáa lu xeze la xu
 chee zri'ine zre sua Cam,
 ne da ca' buluchebe na dxi'u dxu'a Nísadau' Xrna.
 23 Nadxa guca lazre' Dios guzríá xi'e bénneache chee',
 san Moisés, bénnea' gucá'a Dios, bzua cuine' lau Dios
 chee guzúa zrie' xel-la' dxezrá'a chee Dios,
 na' bene' quebe guzríá xi' Dios benne' ca'.
 24 Buluzúe' chalá'ala xeze la xu xrtante' da gunezruj Dios le',
 ne quebe guléajle'e dizra' chee'.
 25 Tu gulennézqueze' chee Dios lu xu'u xide chee' ca',

ne quebe buluzé naguę' da gunná Xránadxu Dios.

²⁶ Cheę ęę na' bzetaj cuine' gunné' ca da gunę' cheę benne' ca'.
Gunné' gunę' xelate benne' ca' ęę xixre' lawe' lataj na',

²⁷ ne gusi'e bėnneache cheę' lu xel-la' stu' lau benne'
xęzr la xu ca',

ne guse dınnaje' ęę' ládujla benne' xęzr la xu ca'.

²⁸ Nadxa belunę' tuze benne' ca' dxulucá'ana szrene'
bedáu' xia nazı le na Baal-peor,

ne gulawe' bėadu ca' belútię' lau dios gate ca'.

²⁹ Buluchę'e Dios ne cheę da belunę',

na' guxalaj tu xızrawę' zren da bęte na benne' zan benne' ca'.

³⁰ Nadxa guxasa Finees, ne bętię' bėnnea' bęne' dul-la,
na' guleza xızrawę' zren na'.

³¹ Da na' bęn Finees guzı' Dios ca tu da dxucá'ana xrlátaje na
bėnnea',

da gul'e lawe na lau xúgutę cuen bėnneache ca'.

³² Cá'anqueze buluchę'e Dios dxu'a beaj nisa nazı le na
Meriba,

na' guca da caleļa cheę Moisés ne cheę benne' ca',

³³ lawe' da ne cheę da belunę' guca Moisés xichaj zra'a,

na' bexúbetę Moisés da gunné'.

³⁴ Gate gulu'e lu xęzr la xu nigá quebe buluzrıa xi'e
bėnneache zaj nite' ga na'.

Canı guca, quebe belunę' ca da guzre Dios ęę' xelunę'.

³⁵ Gulaque' tuze benne' xęzr la xu ca',

ne bulusédie' benne' Israel ca' xelunę' ca dxelún benne' ca',

³⁶ na' bulucá'ana szrene' bedáu' xia xaga ca' cheę benne' ca',
da na' bęn na bxrinnaj Dios bėnneache cheę'.

³⁷ Belútię' zrı'ine' bi biu, ne bi nu'ula cheę'

lau bedáu' cheę da xriwe' ca',

³⁸ ne bululálaje' dxen cheę bi dxé'enedu ca',

bi quebe zaj nunbe' dul-la,

da naca na dxen cheę zrı'ine' bi biu, ne bi nu'ula,

bi ca' belútię' lau bedáu' xia xaga ca' cheę bėnneache Canaán,

na' guca sban xęzr la xu na' ne cheę dxen cheę bidu ca'.

³⁹ Da ca' belunę' bęn na ęę' sban,

na' gulebéaj xıchaję' Dios lu da belunę'.

⁴⁰ Cheę ęę na' bzrá'ale'ę Dios bėnneache cheę',

na' gucuıdeng' benne' ca' zaj naca cheę'.

⁴¹ Nadxa bdeę' benne' ca' lu na' benne' xęzr la xu ca',

na' benne' ca' dxelecuide bėnneache cheę Dios
gulenná bė'ene' ęę'.

⁴² Benne' ca' guledábague' ęę' bulusaca zi'e bėnneache
cheę Dios,

ne buluxrınnaje' ęę' lu xel-la' dxenná bea cheę'.

⁴³ Zánete' lasa Dios bselę' bėnneache cheę' ca',

san guledábague' ca da bsızrene' ęę',

na' gulape' xel-la' stu' lawe' da belunę' da caleļa.

⁴⁴ Lácala canı belunę', gate gulezré'ę lu da stębe,
Dios gunné'ę ca da dxelezaque',

ne benne' ca da bululáwizre' Le',
 45 na' xeajsá lazre' xel-la' wezria da bēnleñe' benne' ca',
 na' bexiáje lazre' chee' xel-la' dxezrá'a chee'
 lawe' da nácale'e benne' dxexache lazre'.
 46 Cá'anqueze bēne' belexache lazre' benne' ca'
 benne' ca' guleché'e le' ca benne' zaj nada'u.
 47 ¡Bselá netu', Xránantu', nacu' Dios cheentu'!
 ¡Becá'a netu' ládujla benne' xezr la xu ca',
 chee' güe lá'anantu' Lau' lá'azxa,
 ne chee' béle'entu' lu da dxúl-lantu' chiu'!
 48 Cháwedau' naca Xránadxu, Bēneea' naque' Dios chee'
 benne' Israel ca' nédxudaute, ne chadía chacanna.
 Xúgute' bēneache dxal-la' xelenné': ¡Ca'an gaca na!
 ¡Gaca ba lá'azxa Xránadxu Dios!

107

1 ¡Le güe lá'ana Xránadxu, Benne' xrlátaje!
 ¡Chadía chacanna naque' Benne' zri'i lazre'!
 2 Da nigá dxal-la' xelenná benne' ca' ba naxá'awe Xránadxu le',
 benne' ca' bselé' lu na' benne' guledábage' Le'.
 3 Beche'e le' naga gulezrá' benne' xezr la xu zítu' ca',
 da zaj zua naga dxalaj gubizra, ne naga dxebia na,
 ne naga za' be' zaga, ne naga dxedé gubizra beu' zaga ca'.
 4 Bal-la benne' ca' guledé' le'e xixre' naga quebe bi neza zua,
 ne quebe belezrelne' xezre naga xelezúe'.
 5 Guledune', ne gulebíleñe',
 ne québedxa bi gulebeza lazre'.
 6 Nadxa lu da dxelezaque' gulenné' Xránadxu,
 na' bselé' benne' ca' lu da dxelezaque'.
 7 Na' buzre'e le' tu neza li,
 chee' chjaque' tu xezre naga xelezúe'.
 8 Dخال-la' xelúe lá'ane' Xránadxu lawe' da bexache lazre'
 Xránadxu le',
 ne lawe' da bēne' chee' da ca' da dxebánedxu.
 9 Dxuxí'aje' benne' ca' dxelebile lazre',
 ne dxugawe' benne' ca' dxeledún nen da chawe' chee'.
 10 Bal-la benne' caní gulezúe' lu da chul-la, ne lu da stebe
 chee' xel-la' gute.
 Gulaque' ca benne' zaj xu'e lizre xia,
 ne zaj nadxéaj du xia, ne dxeledé'e' ba xa',
 11 lawe' da guledábage' xrtizra' Xránadxu,
 ne buluzúe' chalá'ala da bzéajni'i Dios zrente le'.
 12 Belexedú lazre' lu zrin zítu' da dxelune'.
 Xeleajcházie' zran xua da zaj nu'e,
 ne quebe nu chilá' gácaleñe' le'.
 13 Nadxa lu da dxelezaque' gulenné' Xránadxu,
 na' bselé' benne' ca' lu da dxelezaque'.
 14 Nadxa bebéaje' benne' ca' lu da chul-la
 ne lu da stebe chee' xel-la' gute,

ne bzúzruje' du xia ca' da zaj nadxéaje'.

¹⁵ Dxal-la' xelúe lá'ane' Xránadxu lawe' da bexache lazre' le',
ne lawe' da bene' chee' da ca' da dxebánedxu.

¹⁶ Bchínnaje' dxa xu'u ca' zaj naca na xia gache,
ne bzúzruje' xia ca' da zaj naxechaj na benne' ca'.

¹⁷ Bal-la benne' ca' gulaque' benne' xala,
ne guledéé' xel-la' zi' ne chee' dul-la da zaj nabague',
ne ne chee' da zrinnaj ca' da belune'.

¹⁸ Belexegútene' da dxelé'aj dxelawe',
na' xáteze ca gulátie'.

¹⁹ Nadxa lu da dxelezaque' gulenné' Xránadxu,
na' bselé' benne' ca' lu da dxelezaque'.

²⁰ Gusel-le' dizra' chee' chee' benne' ca',
na' bexune' le', ne bselé' le' lu xel-la' gute.

²¹ Dxal-la' xelúe lá'ane' Xránadxu lawe' da bexache lazre' le',
ne lawe' da bene' chee' da ca' da dxebánedxu.

²² Dxal-la' xelé'e Le': Xcalenu'.

Dxal-la' xelú'e da xulunézruje' Le',
na' lu xel-la' dxelebé chee' dxal-la' xelúl-le',
ne xuluzenne' bénneache ca zaj naca da nune'.

²³ Bal-la benne' ca' guledéé' lu nísadau'
lu da zren ca' da dxedá lawe' nísadau'.
Belezi'e dumí zren lu zrin dxelune' lu nísadau'.

²⁴ Belelé'ene' ca naca da ca' dxun Xránadxu,
da ca' dxune' lu nísadau' da zaj naca na da dxebánedxu.

²⁵ Gunnéze', na' guzú lau dxaca be' bdunu',
na' gulasa xeajxruza zren lu nísadau'.

²⁶ Belegüén da dxedá lawe' nísadau' ca' ca lu xi'a zri'a
da naca na nísadau',

na' belexexetaj na lu da situj lawe' nísadau' na'.

²⁷ Gulechégüe', ne xeajleté' ni xeajleté' na' ca
benne' dxelezuzre,

na' guca dácheze ca da zaj nusédie'.

²⁸ Nadxa lu da dxelezaque' gulenné' Xránadxu,
na' bselé' benne' ca' lu da dxelezaque'.

²⁹ Bzua zrie' be' bdunu' na' da dxaca na,
ne gulezúa zri xeajxruza chee' nísadau' na'.

³⁰ Gulebéle'ene' lawe' da zaj zua zri xeajxruza ca',
na' guché'e Dios le' cháwedau' naga zjaque'.

³¹ Dxal-la' xelúe lá'ane' Xránadxu lawe' da bexache lazre' le',
ne lawe' da bene' chee' da ca' da dxebánedxu.

³² Dxal-la' xuluzenne' ca naca xel-la' szren chee' naga
zaj nazraga bénneache chee',

ne xelúe lá'ane' Le' naga zaj nazraga benne' gula ca', benne'
dxeleenná be'e.

³³ Ben Xránadxu gulebizre xegu nisa ca',
ne busú'aje' beaj nisa ca'.

³⁴ Xu xa'a bexune' na xu bizre,
ne chee' da caléla da belún benne' ca' zaj zre'e na'.

35 Naga naca xu bizre bexunē' na xu nisa,
 na' xu xiaj bexunē' na naga dxalaj nisa.
 36 Bzrē'ē ga na' benne' ca' benne' dxeledún,
 na' belunē' tu xēzre naga xelezúē'.
 37 Gulazē' xēzr la xu na', na' belexazē' lba uva ca',
 na' belexezi'le'ē lina cheē na.
 38 Benē' da chawe' cheē benne' ca', na' gulánle'ē
 bídu cheē' ca',
 ne quebe be'ē lataj xelesase ca zaj naca be xixre' cheē' ca'.
 39 Gate buludé benne' dxelenná bea benne' ca' lu xel-la' zi',
 ne bulusaca zi'ē le',
 ne gulenná bé'edxene' le', ne belunē' le' da calēla,
 ne buludé' le' lu da ba xa',
 40 bca'ana ditaj Díos benne' xíchajē ca',
 ne benē' guledé' le'ē xixre' lawe' lataj naga quebe bi neza de.
 41 Bselé' benne' xache' ca' lu da zi' da xa' da dxeledé',
 ne bzánle'ē zri'ine benne' ca' ca dxelán zrila' ca'.
 42 Gate dxelelé'ē benne' xrlátaje ca' da caní, na' dxelebé'ē'ēnē',
 na' benne' ca' dxelunē' da calēla quebe bi gaca xelenné'.
 43 Benne' ca' zaj naque' sina dxal-la' xulaba lazre'
 ca zaj naca da caní,
 ne dxal-la' xelexúnbe'ē ca naca xel-la' zri'i lazre'
 cheē Xránadxu.

108

1 Ba zúatequeze lázrdawa', Dios,
 cheē gúl-laqueza' da güe lá'ana' Lue'.
 Da nigá dxugú'u na neda' lu da ba neza.
 2 Bebán lazre', bénne'du xu'a, na' le xebán lázrele,
 le'ē dxínnele da dxúl-lalēnle, ne da con zríadi'i na du.
 Che zílala cheajsá'queza'.
 3 Güe lá'anaqueza' Lue' ládujla bénneache chiu', Xran.
 Gúl-laqueza' chiu' lau benne' dutē xēzr la xu,
 4 lawe' da naca xel-la' dxexache lazre' chiu' zrendxa ca xabáa,
 na' da li chiu' naca na zrendxa ca beuj bza ca'.
 5 Xegá'ana szrénquezu' xabáa, Dios.
 Xel-la' szren chiu' sua na lawe' dutē xēzr la xu.
 6 Cheē xeledá benne' ca' nazrí'iqueznu' Lue',
 bselá le' dutē xel-la' waca chiu', ne bene chia'.
 7 Lu lataj lá'azxa cheē' gunná Dios: "Wabéquezda' neda'.
 Gunna' late weaj cheēle xēzr la xu cheē benne' Siquem ca',
 ne gudixra' cheēle xēzr la xu de cuite xēgu Sucot.
 8 Chia' naca xēzr la xu Galaad,
 ne chia' naca xēzr la xu cheē zri'ine zre sua Manasés.
 Xēzr la xu cheē zri'ine zre sua Efraín naca na ca tu
 da napa chi'i na xíchaja'.
 Xēzr la xu cheē zri'ine zre sua Judá naca na naga dxenná be'a.
 9 Xēzr la xu cheē benne' Moab naca na ca tu zriga'
 da xuzru nisa guná'a,

na' lu xęzr la xu cheę benne' Edom chu'una' zrela' gula.
Si'a ba neza xęzr la xu cheę benne' Filistea."

10 ¿Nuzra che' neda' cheę chu'a xęzre da naxechaj ze'e sibe?
¿Nuzra che' neda' cheę guzétaja' benne' Edom ca'?

11 ¿Quegá Lue' na' che'u neda', Dios.

Nacu' Bénnea' bzua netu' chalá'ala,
ne quebe guxéajlenu' benne' cheęntu' ca', benne' dxjaque'
wedil-la, Díos?

12 Gúcale netu' cheę séquentu' tíl-lalęntu' benne' ca'
dxeledíl-lalęne' netu',

lawe' da naca dácheze xelácale bėnneache netu'.

13 Tu zren nen Dios gundxu tu da zrente,
na' Le' gulague' benne' ca' dxeledil-lalęne' dxi'u.

109

1 ¡Dios, dxue lá'ana' Lue'!

Quebe xegá'anu' zrize

2 lawe' da dxelenná benne' ca' dxelune' da calela,
ne benne' wen lazre' ca' chia' neda'.

Dxelenné' chia' da naca da wen lazre'.

3 Lu xel-la' dxelecuide cheę' zaj naxéchaję' neda',
ne dxelenné' chia'.

Dxeledíl-lalęne' neda', ne quebe bi nuna' cheę benne' ca'.

4 Lácala bzri'ida' benne' ca', na'a dxeledábague' neda',
san neda' dxenaba' gaca da chawe' cheę benne' ca'.

5 Lácala beña' neda' da chawe' cheę benne' ca', dxelune' chia'
da calela,

ne lácala bzri'ida' le', dxelecuídęne' neda'.

6 Bzua tu benne' wen da zrinnaj cheę guchi'e cheę
benne' wen da calela ca',

ne beń sua tu benne' nnie' cheę benne' ca',
benne' guzúę' ca' naca da calela belún benne' ca'.

7 Gate na' zri'a cheę', beń gaca bea na zaj nabague' zria.
Ble'e da xelenabe' lau' ca' tu dul-la da dxelune'.

8 Bzache zra xelaca ban benne' ca',
ne beń xelú'u xezica' benne' waláz cheę'.

9 Bca'ana zrí'ine' ca' bidau' wezębe,
ne xelaca zru'ule' nu'ula tuze ca'.

10 Beń xelaca zrí'ine' bi dxeledaze cheę xelenábabe' guna',
ne beń xelezrélebe' xeta xelágube' zitu' naga zaj zua lízrebe'
da zaj naxinnaj.

11 Beń xelú'u da ca' zaj nape' lu na' bėnne' ca'
bulusanę' le' dumí.

Beń xelexúa benne' zitu' ca' da ca' zaj nune'.

12 Beń quebe nu zrel-la benne' xexache lazre' le',
ne quebe nu benne' zrel-la xexache lazre' bidau' wezębe
cheę' ca'.

13 Beń xelebía xi' zri'ine zre sua benne' ca',
ne québedxa nu cha' zri'ine zre sue',
si' le' ca' zaj nazi'i la benne' ca'.

14 Bsa lazre' ca' da calela da belún xra xrtawe', Xran,
ne quebe xusulu' dul-la da gulún xrne'e ca'.

- 15 Tu chí'izqueze bsa lazre' ca da calëla da zaj nune'.
- Québedxa cheajsá lazru' benne' ca'
- 16 lawe' da quebe xeleajsá lazre' xelexache lazre' le sa' ljwezre' ca', san bulusaca zi'e benne' baxache' ca', benne' dxelexájrjeng', ne benne' dxexruij lazre' ca', na' belútië' bënne'du ca'.
- 17 Beledánene' da dxugú'u na de', na' da caníze guca na chee'.
- Quebe gulaca lazre' xelenabe' gaca chawe' cheë bënneache, na' da chawe' bebiga na naga zaj zue'.
- 18 De' da gulegú'e bënneache guca na ca tu da gulacu cuine', na' guxú'u na le'e ca nisa gulé'ajé', ne guxú'u na zrita chee' ca da za.
- 19 Tu chí'izqueze ben gaca na chee' ca xicha da dxelácuë', ne gaca na ca tu xpádxue' dxuluchela le'e.
- 20 Gaca da nigá da quizruj Xránadxu Dios benne' ca' dxelenné' calëla chia', ne da quízrujë' benne' ca' dxelune' da calëla, ne dxelenné' calëla cheë bënne'du xu'a.
- 21 Xrana' Dios, ben culuén chia' cheë xegá'ana' xrlátaje lau'.
- Bselá neda' lawe' da dxexache lázrele'u bënneache,
- 22 ne lawe' da dxezaca zi'a, ne dxexájrjeda', ne dxeque zi' lázrdawa'.
- 23 Dxedé chia' ca dxedé cheë tu zrul-la gate dxebía gubizra. Dxaca chia' ca dxaca cheë biche xuaj gate dxua be' leba'.
- 24 Dxelate zriba' lawe' da dxuna' gubasa, ne nazrítalë'a lawe' da quebe bi dxawa'.
- 25 Naca' ca tu da dxulucá'ana dítajé'.
- Dxelenné'e neda', ne dxelún le' chia', dxulutá xíchajé'.
- 26 Gúcalë neda', Xrana' Dios.
- Bselá neda' lawe' da dxexache lazru' bënneache.
- 27 Ben xeleque be'enë' Lué'queze dxácalënu' neda'.
- Lué'queze, Xrana' Dios, ba nunu' da nigá.
- 28 Dxelegu'e neda' de', san ben Lue' gaca chawe' chia'.
- Guxasa, ben xelexedu'e benne' ca' dxeledábage' neda', san ben beda' neda'.
- 29 Ben xelëzrá' lu xel-la' stu' benne' ca' dxelenné' da calëla chia'.
- Ben xeleque zréajeng' tu chí'izqueze.

30 Du lazra' gúl-laqueza' da güe lá'analë'a Xránadxu Dios. Ládujla benne' zan ca' güe lá'ana' Le'.

31 Le' zue' cuita xabela cheë benne' xache' ca' cheë guselé' bënne'du zaj xu'e lu na' benne' ca' dxuluchi'e chee'.

110

1 Xránadxu Dios guzre' Xrana': "Gudxé'e chalá'a xabela chia' cadxa zrin zra guna' ga benne' ca' dxeledábage' lue' xuluzúa zribe' lau'."

2 Naga zu' Sión, gun Xránadxu zriluj xel-la' dxenná bea chiu'. Dxenné': "Gunná be'e benne' ca' dxeledábage' lue'."

3 Lu zra gate tíl-lalenu' benne' ca' dxeledábague' lue',
du lázrequeze benne' chiu' ca' chjaque' wedil-la.
Ca dxun xrlé'ela chee' bálala, dxacu na xi'a lá'azxa,
caníqueze xelaca benne' cuide' chiu' ca',
xelelé'ē naga zu' xelácalene' lue'."

4 Guchébe lazre' Xránadxu, ne quebe gunítie' xrtizre',
gunné': "Chadía chacanna nacu' bxruze ca guca bxruze
Melquisedec."

5 Zua Xránadxu chalá'a xabela chiu'.
Gate zre'ē, na' guzría xi'ē benne' wenná bea ca'.

6 Guchi'ē chee' benne' dute' xezr la xu, na' gutie' zánete
benne' xezr la xu ca'.

Guzría xi'ē benne' dxelenná be'ē dute' xezr la xu.

7 Xi'aj benne' wenná bea nigá nisa xégudu zua na dxu'a neza,
na' xexape' xel-la' wal-la chee'.

111

1 Dute' lázrdawa' güe lá'ana' Xránadxu Dios tu zren nen
benne' xrlátaje ca', benne' zaj nazrague' lau Le'.

2 Da zrente' zaj naca da ca' nun Xránadxu Dios,
na' xúgute' benne' ca' dxelezaca ba lázrele'ē' da nune',
ne dxelaca lazre' xelelé'ē' na.

3 Da xabáa, ne da xrtante' zaj naca da dxune' Le',
ne tu chí'izqueze zua da xrlátaje chee'.

4 Dxune' dxeajsá lázredxu ca naca xel-la' waca zrente'
da dxune'.

Xránadxu Dios naque' zren lazre', ne dxexache lazre'
bénneache.

5 Dxugawe' benne' ca' dxelezrebe' Le'.

Tu chí'izqueze dxeajsá lazre' xel-la' wezría da nune'.

6 Blé'ē' bénneache chee' ca' ca naca xel-la' waca chee'
da ca' bene'.

Dxunézruje' benne' chee' ca' da zaj napa benne' xezica
xezr la xu ca'.

7 Li lazre', ne xrlátaje zaj naca da ca' dxune'.

Li lazre' zaj naca xúgute' da bdxixruj be'ē.

8 Tu chí'izqueze, ne chadía chacanna zaj zua da ca' bdxixruje'.
Lu da li, ne lu da li lazre' nune' ca zaj naca na.

9 Gusel-le' tu benne' weselá chee' guselé' bénneache chee'.

Tu chí'izqueze nadxixruj be'ē xel-la' wezría chee'.

Lá'azxa, ne tu da zrédexu naca La Le'.

10 Chee' su laudxu gácadxu sina, dxun na ba xen zrédexu
Xránadxu Dios.

Dxeléajni'i xanne' xúgute' benne' ca' dxelune' ca zaj naca
da nadxixruje'.

Tu chí'izqueze dxal-la' güe lá'anadxu Le'.

112

1 Ba neza zrente' naca na chee' bénnea' dxezrebe'
Xránadxu Dios,

ne ca zaj naca da bdxixruj be'ē dxezaca ba lázrele'ē'.

2 Zri'ine zre sua b́ennea' xelape' xel-la' dxenná bea
 lu xęzr la xu,
 na' gaca chawe' cheę benne' xrlátaje ca'.
 3 Da zan da dę, ne xel-la' gunnı́'a zaj zra na xu'u lizre',
 ne tu chí'izqueze zua da xrlátaje da dxun b́ennea'.
 4 Dxusanı́' tu xi' lu da chul-la naga zaj zra' benne' li lazre' ca',
 benne' ca' zaj naque' zren lazre', ne xrlátaje,
 ne dxelexache lazre' b́enneache.
 5 Tu benne' xrlátaje dxexache lazre' b́enneache,
 ne dxusanę' le' dumı́.
 Lu da xrlátaje dxenná bé'eng' da zaj xu'u lu ne'e.
 6 Cheę le' na' quebe bi gutá na le' lu lataj naga zue',
 na' tu chí'izqueze xeajlesá lazre' b́enneache ca'.
 7 Quebe zrebe' gate xenne' dxaca da caleļa cheę
 da xu'u lu ne'e.
 Ze chacha lázrdawe' lawe' da dxuxrén lazre' Xránadxu Dios.
 8 Zua chawe' lázrdawe', ne quebe bi dxezrebe',
 ca zrindxa zra lé'eng' gaca cheę benne' ca' guledábage' le'
 ca da dxezá lazre'.
 9 Dxisie' da dę cheę', ne dxunézruje' da gácale
 benne' xache' ca',
 ne tu chí'izqueze zua da xrlátaje da dxune'.
 Lu da xabáa xegá'ana szren xel-la' dxenná bea cheę'.
 10 Walé'e benne' węn da caleļa da nigá, na' gueque zréajeng'.
 Gágu xa'ate lazre', ne cue'e gunne xue.
 Xelenite da ca' dxelezá lazre' benne' ca' dxelune' da caleļa.

113

1 ¡Le'e, węn zrin cheę Xránadxu Dios, le güe lá'ana Le'!
 ¡Le güe lá'ana La Xránadxu Dios!
 2 ¡Gaca ba lá'azxa La Xránadxu Dios,
 na'a zra, ne chadía chacanna!
 3 ¡Naga dxalaj gubizra ca zrintę naga dxebía na
 gaca ba lá'azxa La Xránadxu Dios!
 4 ¡Szrentę nagá'ana Xránadxu Dios lawe' dute xęzr la xu,
 na' lówela xabáa dxe' da xabáa cheę'!
 5 ¿Núzraqeze naca ca naca Xránadxu Dios,
 B́ennea' dxe'e xabáa na'la?
 6 Dios dxun cuine' dxexruj lazre' cheę lé'eng'
 da dę zran xabáa, ne lu xęzr la xu.
 7 Dios dxechise' benne' xache' lu xu xrte,
 ne dxebéaje' benne' baxache' lu da dxezaca zi'e,
 8 na' dxune' dxelebé' benne' canı́ ládujla benne'
 dxelenná be'e,
 ládujla benne' ca' dxelenná bé'eng' b́enneache cheę'.
 9 Dxune' zua nu'ula zue' tuze ládujla zrí'inequeze' ca',
 na' dxebé nu'ula nigá lawe' da naque' xrna bi cheęqueze'.
 ¡Gaca ba lá'azxa Xránadxu Dios!

114

¹ Gate beledxúaj benne' Israel ca' lu xęzr la xu Egipto,
beledxúaj zri'ine zre sua Jacob lu xęzr la xu chee
benne' zitu' ca',

² na' gulaca zri'ine zre sua Judá ca tu xu'u lizre Dios,
gulaca benne' Israel ca' naga dxenná be'e.

³ Ble'e Nísadau' Xrna da nigá, na' bzrunnuj na,
na' gugá xegu Jordán.

⁴ Gulexrite xi'a zri'a ca' ca dxelexrite chivo ca',
na' gulexrite xi'adu ca' ca dxelexrite chíbudu ca'.

⁵ ¿Bizra guca chiu', nísadau', lawe' da ben na bzrunnuju'?
¿Bizra guca chiu', xegu Jordán, lawe' da ben na gugú'?

⁶ Le'e, xi'a zri'a ca', ¿Bizr chee na' guxrítele ca dxelexrite
chivo ca'?

Le'e, xi'adu ca', ¿Bizr chee na' guxrítele ca dxelexrite
chíbudu ca'?

⁷ Dxezrize xęzr la xu lau Xránadxu Dios, lau Dios chee Jacob.

⁸ Dios nigá bene' bexaca xiaj xre' tu beaj nisa,
na' bexaca xiaj tu ga dxalaj nisa.

115

¹ Quegá netu', Xran.

Quegá cuintu', san Lué'queze dxal-la' xucá'ana szrentu'
ne chee xel-la' zri'i lazre' chiu', ne xel-la' li lazre' chiu'.

² ¿Bizr chee na' dxun na ba xen xuluchebe bėnneache netu':
"Gazra zua Dios cheele?"

³ Dios cheedxu zue' xabáa.

Dxunę' ca da dxaca lızrequeze'.

⁴ Dios ca' chee benne' ca' zaj naca na bedáu' plata,
ne bedáu' oro, da nun ni'a na' bėnneache.

⁵ Zaj zua dxu'a na, san quebe dxelennę na.

Zaj zua xiaj lau na, san quebe dxelelé'e na.

⁶ Zaj zua naga na, san quebe dxelén na.

Zaj zua zrına na, san quebe dxelelé'e na.

⁷ Zaj zua na' na, san quebe bi dxelecá'a na.

Zaj zua ni'a na, san quebe dxeledá na.

Quebe dxedxuaj chi'i na lba na.

⁸ Ca zaj naca na, zaj naca benne' ca' zaj nunę' na,
ne benne' ca' dxuluxrén lazre' na.

⁹ Le' guxrén lazre' Xránadxu, le'e, benne' Israel ca'.

Le' dxácalęne' le'e, ne dxuxúę' le'e.

¹⁰ Le' guxrén lazre' Xránadxu, le'e, bxruze chee Dios,
nácale zri'ine zre sua Aarón.

Le' dxácalęne' le'e, ne dxuxúę' le'e.

¹¹ Le' guxrén lazre' Xránadxu, le'e dxucá'ana szrenle Le'.

Le' dxácalęne' le'e, ne dxuxúę' le'e.

¹² Xránadxu dxajsá lazre' dxi'u, na' gunę' dxi'u da chawe'.

Gunę' da chawe' chee benne' Israel ca'.

Gunę' da chawe' chee bxruze chee', zri'ine zre sua Aarón.

¹³ Gunę' da chawe' chee xúgutę benne' dxelape' Le' ba lá'ana,
benne' blau ca', ne benne' quebe zaj naque' blau.

14 Gun Xránadxu chan zri'inu' ca',
 ne chan zri'ine bi biu chiu' ca'.
 15 Gun Xránadxu da chawe' chiu'.
 Naque' Bénnea' ben xabáa, ne xezr la xu.
 16 Chee tuze Xránadxu naca xabáa,
 san bnézruje' benneache xezr la xu.
 17 Benne' zaj nate quebe gaca xelúe lá'ane' Xránadxu,
 ne quebe gaca benne' ca' zaj zue' lu xedxu ba.
 18 Dxi'u, benne' ban, güe lá'anadxu Xránadxu,
 na'a zra, ne chadía chacanna.

¡Le güe lá'ana Xránadxu!

116

1 ¡Nazrí'ida' Xránadxu Dios
 lawe' da benne' chi'a, ne da gunaba' lawe',
 2 ne lawe' da bze nague' chia!
 Chee le na' guláwizra' Le' dxácate naca bana'.
 3 Guzúa' lu da stēbe chee xel-la' gute,
 ne bzreba' ba zua' chu'a lataj ba xa'.
 Guzúa' lu da stēbe, ne guzaca zí'a.
 4 Nadxa bláwizra' Xránadxu Dios, gunnía':
 Xrana' Dios, bselá benne'du xu'a.
 5 Cháwe'le'e naca Xránadxu Dios, ne xrlátaje naque'.
 Awe', dxexache lazre' Dios cheedxu dxi'u.
 6 Dxuxúe Xránadxu benne' dxexruj lazre' ca'.
 Gate na' guzúa' lu da stēbe bselé' neda'.
 7 Ben dipa lazre', benne'du xu'a,
 lawe' da nun Xránadxu da chawe' chiu'.
 8 Lue', Xran, bseláu' benne'du xu'a lu na' xel-la' gute,
 chee québedxa cuezre we'a, ne chee quebe cheajcházia'.
 9 Ta' lau Xránadxu Dios
 naga zaj zra' benne' ca' zaj naca bané'.
 10 Guxéajle'a chee', na' chee le na' bchálaja', lácala guzaca zí'le'a.
 11 Lu xel-la' dxezrebe chia', gunnía':
 Zaj naca xúgutē benneache benne' wen lazre' ca'.
 12 ¿Bizra quízrujqueza' Xránadxu Dios
 chee xúgutē da chawe' da bene' chia'?
 13 Si'a lu ne'e xel-la' weselá,
 ne guláwizra' Xránadxu Dios.
 14 Na'a guna' da ca' guchebe lazra' lau Xránadxu.
 Guna' na lau xúgutē benneache chee'.
 15 Xránadxu Dios dxe'e gunne xue
 chee benneache chee' gate dxelátie'.
 16 Xrana' Dios, da li naca' wen zrin chiu'.
 Naca' wen zrin chiu', ne zri'ine nu'ula wen zrin chiu'.
 Lue' bzúzruju' da zaj nadxéaj na neda'.
 17 Da güe lá'ana' Lue' gaca na ca tu béadau' gutia' lau',

ne gucá'ana szrena' Lau', Xrana' Dios.

¹⁸ Lau Xránadxu Dios guna' da ca' guchebe lazra' chee',
da guna' lau xúgutę bénneache chee'.

¹⁹ Guna' na chale'aj xu'u lizre Xránadxu Dios,
da dxe' na lu'ule xezre Jerusalén.

¡Gaca ba lá'azxa Xránadxu Dios!

117

¹ ¡Le güe lá'ana Xránadxu Dios, le'e, benne' dutę xezr la xu!

¡Le güe lá'ana Le', le'e, xúgutę bénneache,

² lawe' da zrentę naca xel-la' zri'i lazre' chee' ca nazr'ine' dxi'u,
ne chadía chacanna naca xel-la' li lazre' chee'!

¡Le güe lá'ana Xránadxu!

118

¹ ¡Le güe lá'ana Xránadxu Dios lawe' da naque' xrlátaje,
ne lawe' da chadía chacanna dxexache lazre' dxi'u!

² Dخال-la' xelenná benne' Israel ca':

¡Chadía chacanna dxexache lazre' dxi'u!

³ Dخال-la' xelenná zri'ine zre sua Aarón:

¡Chadía chacanna dxexache lazre' dxi'u!

⁴ Dخال-la' xelenná benne' ca' dxelezrebe' Xránadxu Dios:

¡Chadía chacanna dxexache lazre' dxi'u!

⁵ Gate na' guzúa' lu da stębe bláwizra' Xránadxu Dios,
na' bechebe Xránadxu, ne bselé' neda' lu da na'
bexru na neda'.

⁶ Zualę Xránadxu neda', na' québequeze zreba'
bi xelún bénneache chia' neda'.

⁷ Zúialę Xránadxu neda' ládujla benne' ca' dxelácalę' neda'.

Cheę le na' le'eda' cheajlechaze benne' ca' dxelecuídę' neda'.

⁸ Cháwe'dxa naca guxrén lázredxu Xránadxu Dios
quęzcala guxrén lázredxu bénneache.

⁹ Cháwe'dxa naca guxrén lázredxu Xránadxu Dios
quęzcala guxrén lázredxu benne' dxeleenná be'e.

¹⁰ Gulechaj benne' xúgutę cue' xezr la xu neda',
na' lu La Xránadxu Dios guzría xi'a benne' ca'.

¹¹ Guléchaję' neda', ne buluchídę' neda',
na' lu La Xránadxu Dios guzría xi'a benne' ca'.

¹² Guléchaję' neda' ca dxelún bęscutuche',
na' guca xel-la' dxelezá'a chee' ca tu xi' da dxuzezxe na
xixre' xeche' bizre,

na' lu La Xránadxu Dios guzría xi'a benne' ca'.

¹³ Buluzriguę' neda' cheę cheajcházia'
na' gúcalę Xránadxu Dios neda'.

¹⁴ Naca Xránadxu Dios ca tu xu'u naga zua chawa',
na' tu gúl-lazqueza' chee' lawe' da Lęqueze' dxuselé' neda'.

¹⁵ Xel-la' dxelebé dxelul-la benne' xrlátaje ca'
lawe' da dxuselá Xránadxu le'.

Dute xel-la' waca chee' dxun Xránadxu Dios da zrente ca'.
 16 Szrente nagá'ana xel-la' waca zren chee Xránadxu Dios.
 Da zrente ca' dxun xel-la' waca zren chee Xránadxu.
 17 Québequeze gatia', san gaca bana',
 na' guzenda' bènneache ca zaj naca da nun Xránadxu.
 18 Bde Xránadxu neda' lu da ba xa',
 san quebe bdee' neda' lu na' xel-la' gute.

19 Gusalaj dxa xu'u chee chu'a naga guchi'u chia', Xran,
 na' chu'a na', ne güe lá'ana' Lue', Xrana' Dios.

20 Dxa xu'u nigá naca na chee Xránadxu Dios.
 Dxa xu'u nigá dxelú'u benne' xrlátaje ca'.

21 Güe lá'ana' Lue', Xran, lawe' da bennu' chia',
 ne bseláu' neda' lu da guca chia'.

22 Xiaj na' da buluzúa benne' wen xu'u ca' chalá'ala,
 le' na' naca na xiaj blau.

23 Da nigá ben Xránadxu,
 na' naca na tu da dxexebánedxu.
 24 Zra nigá naca na zra da ben Xránadxu.
 Béle'edxu, ne súadxu lu da ba neza lu zra nigá.

25 Xrana' Dios, dxata' xueda' Lue' guseláu' netu' na'a.
 Dxata' xueda' Lue', Xrana', gunu' chepe ban na'a da dxuntu'.

26 Ba neza zrente naca na chee bènnea' ze'e waláz chee
 Xránadxu Dios.
 Lu xu'u lizre Xránadxu Dios nigá dxenábantu'
 gaca chawe' chiu'.

27 Xránadxu naque' Dios, ne ba bènne' dxi'u tu da dxusaní na.
 Le guchéaj béadu ca' gütele lawe' lu luzu cugu chee'.

28 Nacu' Lue' Dios chia', na' güe lá'ana' Lue'.
 Dios chia', gucá'ana szrena' Lue'.

29 Le güe lá'ana Xránadxu Dios lawe' da naque' xrlátaje,
 ne lawe' da chadía chacanna dxexache lazre' dxi'u!

119

Da dxun da bdxixruj be'e Dios dxi'u

1 Ba neza zrente naca na chee benne' ca' tu dxelúnzqueze'
 da naca du lazre',
 benne' ca' tu dxelúnzqueze' ca dxenná da bdxixruj bea
 Xránadxu Dios.

2 Ba neza zrente naca na chee benne' ca' tu dxelúnzqueze'
 ca dxusede dizra' chee' dxi'u,
 na' dute xichaj lázrdawe' dxuluzúe' dizra' chee'.

3 Benne' caní québequeze dxelunge' da zrinnaj,
 benne' ca' tu dxelúnzqueze' ca dxenná Dios dxal-la' xelunge'.

4 Lue', Xran, bsízrenu' netu' chee gun xánnentu'

ca zaj naca da bdxixruj be'u Lue'.

⁵ Dxaca lázreġ'a tu gúnzqueza'
ca zaj naca xrba chiu'.

⁶ Nadxa québequeze xedué'eda',
na' cue'a gunne xue guna' xúgute da bdxixruj be'u.

⁷ Duteġ xel-la' li lazre' chia' güe lá'ana' Lue' gate ba nusédia'
da ca' nuchi'u cheġtu', da zaj naca na xrlátaje.

⁸ Tu gúnzqueza' ca da dxenná be'u.
Québequeze cueaj xíchaju' neda'.

Dxal-la' gundxu da gunnáqueze Dios

⁹ ¿Ájala gun benne' cuide' gunbe' da naca na xrlátaje?
Dxal-la' tu gúnzquezebe' ca dxenná xrtizru'.

¹⁰ Duteġ xichaj lázrdawa' dxuna' ba xuzre guna'
da dxennáu' Lue'.

Quebe gu'u lataj guzúa' chalá'ala ca da bdxixruj be'u.

¹¹ Lu xichaj lázrdawa' tu dxúnzqueza' ca da dxennáu' Lue'
cheġ quebe guna' dul-la tábaga' Lue'.

¹² Ba lá'azxa nacu' Lue', Xrana' Dios.

Bséde neda' da ca' dxenná be'u.

¹³ Nen dxú'aqueza' ba bzenda' bénneache
ca zaj naca da ca' nuchi'u cheġtu'.

¹⁴ Dxebéġ'edxeda' tu dxúnzqueza' ca dxusede dizra' chiu' netu',
quez ca dxelebé benne' ca' déġeġ xel-la' gunní'a cheġ'.

¹⁵ Gulaba lazra' ca zaj naca da bdxixruj be'u Lue',
ne nna' xánnia' ca dxennáu' dxal-la' guntu'.

¹⁶ Béġeġ'eda' guna' ca da dxenná be'u,
ne quebe gal-la lazra' ca zaj naca xrtizru'.

Dxebéġ'edxu dxundxu da dxennáqueze Dios

¹⁷ Ben gaca chawe' chia' neda', wen zrin chiu',
na' gaca bana', ne tu gúnzqueza' ca naca xrtizru'.

¹⁸ Gusalaj xiaj lawa' cheġ nna'a
da zrentġ ca' da zaj zua na lu da bdxixruj be'u.

¹⁹ Naca' ca tu benne' dxedaze' lu xezr la xu nigá.
Ben chéajni'ida' da dxenná da bdxixruj be'u.

²⁰ Dxedú lazra' lawe' da tu chí'izqueze
dxezá lazra' guna' da ca' nuchi'u cheġtu'.

²¹ Gudil-lu' benne' ca' dxulucá'ana szren cuine',
benne' wen da caġla ca',
benne' ca' dxuluzúġ' chalá'ala da bdxixruj be'u.

²² Quebe gu'u lataj nu benne' nneġ schanni' chia',
na' quegá gucá'ana dítaġe' neda'
lawe' da tu dxúnzqueza' ca dxusédenu' netu'.

²³ Cá'anneze benne' dxelenná bea ca' gulennġ' chia'.
Neda', wen zrin chiu', blaba lazra' ca zaj naca xrba chiu'.

²⁴ Dxezaca ba lázreġna' da dxusede dizra' chiu' netu'.
Dxuluzéajni' na neda'.

Duteġ lázrdaudxu gundxu da dxennáqueze Dios

²⁵ Zua bénne'du xu'a lu da stebe cheġ xel-la' gute.

Ben dipa xichaj lázrdawa' nen xrtizru'.

²⁶ Ble'eda' Lue' ca zaj naca da dxuna', na' bezi'u neda'.

Bsede neda' ca zaj naca xrba chiu'.

²⁷ Ben chéajni'ida' ca gaca guna' ca bdxixruj be'u

cheę gulaba lazra' ca zaj naca da zrente' ca' da benu'.

²⁸ Dxedú lazra' lawe' da dxewí'ine lázrele'a.

Bexru chacha neda' ne cheę xrtizru'.

²⁹ Quebe gu'u lataj guna' da naca na wen lazre'.

Lu xel-la' dxexache lazre' chiu' bsede neda' da bdxixruj be'u.

³⁰ Bechugu lazra' guna' da naca li lazre',

na' dxe'a gunne xue guna' da ca' nuchi'u cheętu'.

³¹ Tu dxúnzqueza' ca dxusede dizra' chiu' netu'.

Xran, quebe guzú' neda' lu xel-la' stu'.

³² Tu gúnzqueza' ca bdxixruj be'u,

gate guzėjajni'idxenu' neda'.

Dxaca lázredxu chėjajni'idxu xrtizra' Dios

³³ Xran, bsede neda' cheę guna' ca naca xrba chiu',
na' tu gúnzqueza' ca naca na ca zrindxa zra cheajsé chia'.

³⁴ Bzėjajni'i neda', na' tu gúnzqueza' da bdxixruj be'u,

na' duté lázrdawa' guna' ca naca na.

³⁵ Ble'e neda' cheę guna' da bdxixruj be'u,

lawe' da dxaca lázrequeza' guna' ca dxenná na.

³⁶ Ben sa lazra' guna' ca dxusede dizra' chiu' netu',
cheę quebe gaca' benne' wecude.

³⁷ Quebe gu'u lataj gucá'ana szrena' bedáu' xia xaga ca'.

Ben dipa xichaj lázrdawa' cheę guna' ca dxenná xrtizru'.

³⁸ Ben ca dxenná xrtizru' da guchebe lazru' chia' neda',
wen zrin chiu', cheę zreba' Lue'.

³⁹ Bde chalá'ala dizra' schanni' da dxelenné' chia',
da na' dxezreba', lawe' da xrlátaje zaj naca xrba chiu'.

⁴⁰ Dxezá lazra' guna' da bdxixruj be'u.

Ben dipa xichaj lázrdawa' nen da xrlátaje chiu'.

Dxuxrén lázredxu xrtizra' Dios

⁴¹ Gudá xexache lazru' neda', Xrana' Dios.

Gudá guseláu' neda', ca ba guchebe lazru' gunu'.

⁴² Becheba' lau bénnea' dxusi'e neda' xel-la' stu', gunnía':

Dxuxrén lazra' xrtizra' Xrana' Dios.

⁴³ Ben tu séquezda' guchálaja' dizra' li lazre' chiu',
lawe' da dxebeza lazra' da ca' dxuchi'u cheętu'.

⁴⁴ Tu gúnzqueza' ca dxenná da bdxixruj be'u.

Guna' na tu chí'izqueze, ne chadía chacanna.

⁴⁵ Láqueza' neda'

lawe' da dxe'a gunne xue guna' ca bdxixruj be'u.

⁴⁶ Guchálajqueza' ca dxusede dizra' chiu' netu'
lau benne' wenná bea ca', na' québequeze xedué'eda'.

⁴⁷ Wabéle'ęquezda' guna' ca bdxixruj be'u,
da ca' nazrí'ile'eda'.

⁴⁸ Dxechebe lazra' guna' ca bdxixruj be'u,
da nazrí'ida', na' gulaba lazra' ca naca xrba chiu'.

Tu zúazqueze xrtizra' Dios

49 Bsa lazre' da guchebe lazru' chia' neda',
 wen zrin chiu', da na' benu' dxebeza lazra'.
 50 Gate na' guzaca zi'a, guzúa tu da bexúe zren na neda'
 lawe' da ben dipa xrtizru' xichaj lázrdawa'.
 51 Benne' dxulucá'ana szren cuine' belún lalé' chia' neda',
 san québequeze gusana' da dxenná da bdxixruj be'u.
 52 Xeajsá lazra' da bchi'u cheentu' nédxudaute, Xran,
 na' bexaca zrena'.
 53 Nen duté xel-la' dxezrá'a guzúa' lu da stebe
 ne chee benne' ca' dxelune' da zrinna',
 benne' ca' dxuluzúe' chalá'ala da bdxixruj be'u.
 54 Xrba chiu' ca' gulaca na chia' ca tu da dxul-la'
 gate na' zua' tu xezr la xu zitu'.
 55 Chizrela xeajsá lazra' lau' Lue', Xrana' Dios,
 na' tu bénzqueza' ca dxenná da bdxixruj be'u.
 56 Lu da ba neza caní guzúa'
 lawe' da tu bénzqueza' ca zaj naca da bdxixruj be'u.

Dxebedxu dxulábadxu xrtizra' Dios

57 Da dxezá lazra' nácaquezu' Lue', Xrana' Dios.
 Ba gunnía' tu gúnzqueza' ca naca xrtizru'.
 58 Duté lázrdawa' dxenaba' Lue' xidu' gácalenu' neda'.
 Bexache lazre' neda' ca ba gunnáu' gunu'.
 59 Gunná' xannia' ca zaj naca da dxuna',
 na' xecha lasa dxuna' ca dxusede dizra' chiu' netu'.
 60 Bena' ba xuzre, ne quebe guzreda'
 chee' tu gúnzqueza' ca bdxixruj be'u.
 61 Xralaj chee benne' ca' dxelune' da caléla zaj nuchele' na
 neda',
 san quebe ne gal-la lazra' ca dxenná da bdxixruj be'u.
 62 Dxéla dxasa' chee güe lá'ana' Lue'
 lawe' da xrlátaje zaj naca da ca' dxuchi'u cheentu'.
 63 Naca' tuze nen xúgute benne' ca' dxelezrebe' Lue',
 benne' ca' tu dxelúnzqueze' da bdxixruj be'u.
 64 Xrana' Dios, dxezrin duté xezr la xu
 xel-la' dxexache lazre' chiu'.
 Bsede neda' chee guna' ca dxenná xrba chiu'.

Zácalé'e da wnnáqueze Dios

65 Ba benu' guca chawe' chia' neda', wen zrin chiu'.
 Xran, benu' na cáteze dxenná xrtizru'.
 66 Bsede neda' chee gueque be'eda' da naca xrlátaje,
 ne chee chéajni'ida' lawe' da dxéajlé'a da bdxixruj be'u.
 67 Nédxula ca bzéxruju' neda' gudéa' chalá'ala,
 na' na'a tu dxúnzqueza' ca dxenná xrtizru'.
 68 Nacu' xrlátaje, ne dxunu' gaca chawe' cheentu'.
 Bsede neda' guna' ca naca xrba chiu'.
 69 Benne' dxulucá'ana szren cuine' gulenné' chia'
 da wen lazre'
 san duté lázrdawa' tu gúnzqueza' ca bdxixruj be'u.
 70 Quebe xu'u xel-la' dxéajni'i lázrdau benne' ca'.

Neda' dxezaca ba lázreḷena' da dxenná da bdxixruj be'u.

71 Chawe' naca bzéxruju' neda'

cheḡ gusédia' guna' ca naca xrba chiu'.

72 Cháwedxa naca da bdxixruj be'u chia' neda'

queḡ ca gaxúa gaxúane dumí oro, ne plata.

Cháweḷ'e naca da wnnáqueze Dios

73 Nen ná'quezu' benu' neda' cáteze naca'.

Bzéajni'i neda' cheḡ gusédia' guna' ca bdxixruj be'u.

74 Benne' dxelezrebe' Lue' xeḷelé'ene' neda'.

Xelebene' lawe' da dxebeza lazra' gaca ca dxenná xrtizru'.

75 Xran, ba nézquezda' xrlátaje naca da dxuchi'u cheentu',

na' lu duté xel-la' li lazre' chiu' bsaca zi'u neda'.

76 Lu duté xel-la' dxexache lazre' chiu' bexúe zren neda'

cáteze dxenná da guchebe lazru' chia' neda', wən zrin chiu'.

77 Bexache lazre' neda' cheḡ gaca bana'

lawe' da dxezaca ba lázreḷena' da bdxixruj be'u.

78 Ben xelexedué'e benne' ca' dxulucá'ana szren cuina

lawe' da gulenné' schanni' chia', ne quebe bi bena' cheḡ'.

Neda' gulaba lazra' ca da bdxixruj be'u.

79 Ben xeḷelé' benne' ca' dxelezrebe' Lue',

cheḡ xelenne' chia',

na' xulusédie' da dxuséde dizra' chiu' netu'.

80 Ben gaca' du lazre' ca naca xrba chiu'

cheḡ québequeze xedué'eda'.

Gun Dios ca dxenná xrtizre'

81 Zua bénne'du xu'a lu da stebe

lawe' da dxebeza' xidu' guseláu' neda',

na' dxebeza lazra' gaca ca dxenná xrtizru'.

82 Dxezé bxrinne xiaj lawa' lawe' da dxezá lazra' xrtizru',

dxennia': ¿Bátaqueze xexúe zrenu' neda'?

83 Dxebizra' ca tu buzude xide zḡ na lu zren,

san quebe dxal-la lazra' guna' ca dxenná xrba chiu'.

84 ¿Bal-la zra gaca bana' neda', wən zrin chiu'?

¿Bátaqueze gudéu' lu da ba xa' benne' ca'

dxeláu zi' xuzre' neda'?

85 Benne' dxulucá'ana szren cuine' gulene' tu xḡdxu

naga cheajcházia'.

Québequeze dxelune' ca dxenná da bdxixruj be'u.

86 Da líqueze zaj naca xúgute da bdxixruj be'u.

Gúcale neda' lawe' da dxeláu zi' xuzre' neda',

ne quebe bi nuna' cheḡ'.

87 Xeláteze la belutiḡ' neda',

san quebe ne gusana' guna' ca bdxixruj be'u.

88 Lu xel-la' dxexache lazre' chiu' ben dipa xichaj lázrdawa',

cheḡ tu gúnzqueza' ca dxuséde dizra' chiu' netu'.

Dxéajle'dxu xrtizra' Dios

89 Xrana' Dios, tu chí'izqueze

zua xrtizru' xabáa na'la.

90 Xel-la' li lazre' chiu' sua na cheḡ xúgute bənneache.

Lue' bzua chúchuquezu' xęzr la xu, na' zúaqueze na.

⁹¹ Ne cheę da gunnáquezu' zaj nnita xúgute da de,
na' xúgute da ca' dxelún na zrin chiu'.

⁹² La quebe bezaca ba lázreęna' da bdxixruj be'u
bache benítia' lu da guzaca zi'a.

⁹³ Cabátaqueze gal-la lazra' da bdxixruj be'u
lawe' da ne cheę da ca' ba btipu' lazra'.

⁹⁴ Chiu' Lue' naca' neda'.

Bselá neda', lawe' da dxuna' ba xuzre guna' ca bdxixruj be'u.

⁹⁵ Benne' dxelebéaj xichaj Dios gulenné'e neda' cheę
xuluzría xi'e neda',

san neda' dxulaba lazra' ca dxusede dizra' chiu'.

⁹⁶ Dxelé'equezda' dxeajsé cheę xúgute da de lu xęzr la xu,
san da bdxixruj be'u Lue' québequeze cheajsé cheę na.

Dxaca lázredxu gúnbeadxu xrtizra' Dios

⁹⁷ Dios, nazrí'ile'eda' da bdxixruj be'u.

Du zra dxulaba lazra' ca naca na.

⁹⁸ Ne cheę da bdxixruj be'u nunu' nácadxa' sina ca benne' ca'
dxeledábage' neda'

lawe' da tu zúalezqueze da bdxixruj be'u neda'.

⁹⁹ Dxéajni'idxeda' ca benne' ca' dxulusédene' neda'

lawe' da dxulaba lazra' ca dxusede dizra' chiu' neda'.

¹⁰⁰ Ba guxéajni'idxeda' ca benne' gula ca'

lawe' da tu dxúnzqueza' ca dxenná da bdxixruj be'u.

¹⁰¹ Bena' ba xuzre quebe bi da calęla guna'

cheę tu gúnzqueza' ca dxenná xrtizru'.

¹⁰² Quebe bsana' dxuna' da ca' nuchi'u cheęntu'

lawe' da Lué'queze bsédenu' neda'.

¹⁰³ Xrtizru' naca na ca tu da zírrele'ę lu dxu'a.

Nácadxa na zixre ca bzrina'dau' lu dxu'a.

¹⁰⁴ Ne cheę da bdxixruj be'u naca' benne' sina.

Cheę le' na' dxecuieda' xúgute da wen lazre'.

Xrtizra' Dios dxuzéajni'i na dxi'u

¹⁰⁵ Ca tu xi' naca xrtizru' naga dxedá',

da dxusení na neza xu'a.

¹⁰⁶ Bzétaja' Dios, ne guchebe lazra'

tu gúnzqueza' ca nuchi'u cheęntu' da naca na xrlátaje.

¹⁰⁷ Dzezaca zí'le'a.

Xrana' Dios, btípa lazra' cáteze guchebe lazru' gunu'.

¹⁰⁸ Xrana' Dios, dxata' xueda' Lue' si'u da dxue lá'ana' Lue',
ne gusédenu' neda' guna' ca nuchi'u cheęntu'.

¹⁰⁹ Tu zúazqueza' lu da stębe cheę xel-la' gute,

san québequeze ne gal-la lazra' guna' ca bdxixruj be'u.

¹¹⁰ Benne' dxelebéaj xichaj Dios buluzalę' xralaj

da queęa na neda'

san neda' quebe bsana' dxuna' ca bdxixruj be'u.

¹¹¹ Ba gucá'a da dxusede xrtizru' neda' cheę gaca na

da gápaqueza' chadía chacanna

lawe' da zaj naca xrtizru' da dzezaca ba lázrele'a.

112 Zúatequeze lázrdawa' guna' ca zaj naca xrba chiu'
tu chí'izqueze, ca zrindxa zra cheajsé chia'.

Bexácadxu chawe' ne cheę xrtizra' Xránadxu

113 Dxecuúdeda' benne' ca' dxelune' láweze da xrlátaje,
san nazrí'ida' da dxenná da bdxixruj be'u.

114 Nacu' Lue' ca tu xu'u naga zua chawa', ne ca tu
da dxucu'uj na neda',

lawe' da dxebeza lazra' gaca na ca dxenná xrtizru'.

115 Le gucuasa naga zua', le'e, benne' wen da calela,
lawe' da tu gúnzqueza' ca bdxixruj bea Dios chia'.

116 Bze chacha neda' cáteze dxenná xrtizru', na' gaca bana',
ne quebe xedué'eda' cheę da na' dxebeza lazra'.

117 Bze chacha neda', na' la',
ne tu xezaca ba lázrezqueza' ca naca xrba chiu'.

118 Bchuchu bléaju' xúgute benne' ca' bulusang' ca naca
xrba chiu'

lawe' da wen lazre' naca xel-la' sina cheę benne' ca'.

119 Ca bebe bzria xi'u xúgute benne' ca' dxelebéaj xíchajé'
Lue' lu xezr la xu nigá.

Cheę le na' nazrí'ida' da dxusede dizra' chiu' netu'.

120 Dxezrize bela' dxen chia' lawe' da dxezreba' Lue',
ne dxezreba' da dxuchi'u cheentu' da naca na xrlátaje.

Dxal-la' gundxu ca dxenná xrtizra' Xránadxu

121 Ba bēna' ca da nuchi'u cheentu', ne ca naca da xrlátaje.

Quebe gudéu' neda' lu na' benne' ca' dxuluchínene' neda'.

122 Gučebe lazre' chia' gunu' gaca chawe' chia'.

Quebe gu'u lataj benne' ca' dxulucá'ana szren cuine'
xuluchínene' neda' xadía.

123 Guzé bxxrinne xiaj lawa' lawe' da dxebeza' xidu'
guseláu' neda',

ne guchi'u cheentu' ca dxenná xrtizru'.

124 Dute xel-la' dxexache lazre' chiu' ben gaca chawe'
chia' neda', wen zrin chiu',

ne bsede neda' guna' ca naca xrba chiu'.

125 Naca' wen zrin chiu'.

Bzéajni'i neda' cheę gúnbe'a da dxusede dizra' chiu' netu'.

126 Xrana' Dios, ba bzzrin zra bi gunu',

lawe' da ba buluzúe' chalá'ala da bdxixruj be'u.

127 Cheę le na' neda' nazrí'idxada' da bdxixruj be'u Lue'
quézcala oro, ne quézcala galega oro.

128 Cheę le na' dxéqueda' zaj nácadxa li lazre'
da bdxixruj be'u ca xúgute da de,

na' dxecuúdeda' xúgute da zaj naca na da wen lazre'.

Dxaca lázredxu gundxu ca dxenná xrtizra' Dios

129 Dxebánentu' ca dxusede dizra' chiu' netu'.

Cheę le na' du lazra' tu dxúnzqueza' ca dxenná na.

130 Gate nu dxuzájla' ca naca xrtizru', dxusaní na.

Dxun na dxeléajni'i benne' dxexruj lazre' ca'.

131 Guxá dxu'a, ne gucá'a lazra'

lawe' da dxezá lazra' gúnbe'a da bdxixruj be'u.
 132 Gunná' neda', ne bexache lazre' neda',
 ca tu dxúnzquezu' cheę benne' ca' zaj nazrí'ing' Lue'.
 133 Ben tu gúnzqueza' ca dxenná xrtizru',
 ne quebe gu'u lataj da zrinnaj nna be'e na neda'.
 134 Bselá neda' lu na' benne' xichaj zra'a ca',
 na' tu gúnzqueza' ca dxenná da bdxixruj be'u.
 135 Ben gaca chawe' chia' neda', wen zrin chiu',
 ne bseđe neda' guna' ca zaj naca xrba chiu' ca'.
 136 Nisa gudxezra' guca na ca tu xegu nisa
 lawe' da quebe dxelún bénneache ca bdxixruj be'u.

Da li naca da dxenná Xránadxu

137 Xrana' Dios, xrlátaje nacu' Lue',
 ne li lazre' naca ca dxuchi'u cheętu'.
 138 Da dxuseđe dizra' chiu' netu', da na' bzu' lu na'ntu',
 naca na da li, ne da li lazre'.
 139 Dxedú lazra' lawe' da dxé'le'a gunne xue
 lawe' da gulal-la lazre' benne' ca' dxeledábague' neda'
 ca zaj naca xrtizru'.
 140 Du lázrele'e naca xrtizru',
 na' nazrí'ida' neda' na, naca' wen zrin chiu'.
 141 Dxezruj lazre' naca', na' dxuluzúe' neda' chalá'ala,
 na' quebe ne gal-la lazra' da bdxixruj be'u.
 142 Tu chí'izqueze zua da dxuchi'u cheętu',
 na' da li naca da bdxixruj be'u.
 143 Da dxezaca zi'a, ne da stebe zua' zaj nuchuchuj na neda',
 san dxezaca ba lázrele'na' da bdxixruj be'u.
 144 Tu chí'izqueze naca li lazre' da dxuseđe dizra' chiu'.
 Bzéajni'i neda', na' gaca bana'.

Dxal-la' gulaba lázredxu da gunná Dios

145 Duę lázrdawa' dxuláwizra' Lue', Xrana' Dios.
 Ben gaca chawe' chia', na' tu gúnzqueza' ca dxenná xrba chiu'.
 146 Dxuláwizra' Lue'.
 Bselá neda', na' tu gúnzqueza' ca dxuseđe dizra' chiu' netu'.
 147 Bálala dxasa', na' dxuláwizra' Lue'.
 Dxebeza lazra' gaca ca dxenná xrtizru'.
 148 Dxenná'aza' bedú xela,
 cheę gulaba lazra' da bdxixruj be'u.
 149 Duę xel-la' dxexache lazre' chiu' bene chi'a.
 Xrana' Dios, da bchi'u cheętu' btipa lazra'.
 150 Benne' dxeláu zi' xuzre' neda' ba zaj zre'e xelune' chia'
 da caleła.
 Zaj nusane' da dxenná da bdxixruj be'u.
 151 Xrana' Dios, zu' Lue' gagu naga zua',
 ne da li zaj naca xúgutę da bdxixruj be'u.
 152 Gate nate ba núnbe'a da dxuseđe dizra' chiu' netu',
 da na' nuzú' cheętu' tu chí'izqueze.

Da gunná Dios dxuzéajni'i dxi'u

153 Gunná' xque ca dxezaca zi'a, ne bselá neda'

lawe' da quebe ne gal-la lazra' da dxenná da bdxixruj be'u.

154 Bechebe waláz chia', ne bexa'u neda'.

Btipa lazra' nen xrtizru'.

155 Stébele'ē naca xeledá benne' ca' dxelebéaj xíchaje'

Lue', Dios,

lawe' da quebe dxelebé'ē gunne xue xelunē' ca naca xrba chiu'.

156 Xrana' Dios, dxexache lázrele'u bénneache chiu'.

Btipa lazra' cáteze dxenná xrtizru' gunu'.

157 Zánetej zaj naca benne' ca' zaj nau zi' xuzre' neda',

ne benne' ca' dxeledábague' neda',

san quebe ne gusana' dxuna' ca dxusede dizra' chiu' netu'.

158 Ble'eda' benne' ca' dxelún lazre', na' dxegúteda' benne' ca'

lawe' da quebe dxelunē' ca dxenná xrtizru'.

159 Gunná'xque, Xran, ca nazrí'ida' da bdxixruj be'u.

Dutej xel-la' dxexache lazre' chiu', btipa lazra'.

160 Da líqueze zaj naca xúgutej xrtizru',

ne tu chí'izqueze zaj naca da dxuchi'u cheentu' lu

da xrlátaje chiu'.

Da gunná Dios dxutipa lázredxu

161 Benne' ca' dxeleenná be'ē dxeláu zi' xuzre' neda'

na' quebe bi nuna' chee'.

Dutej lázrdawa' dxezreba' ca zaj naca xrtizru'.

162 Dxebéle'ēda' lu da dxenná xrtizru'

ca dxebé bénnea' dxezré'l-lenge' tu xel-la' gunní'a zrente.

163 Dxecuúdeda', ne dxegúteda' da wēn lazre'.

Nazrí'ida' da dxenná da bdxixruj be'u.

164 Gazre lasa tu zra dxue lá'ana' Lue'

lawe' da xrlátaje naca ca dxuchi'u cheentu'.

165 Dxelebeza zri lázrele'ē benne' ca' zaj nazrí'inej'

da bdxixruj be'u,

na' quebe bi de da gun na cheajlecházije'.

166 Xrana' Dios, dxebeza' Lue' xidu' guseláu' neda',

ne tu dxúnzqueza' ca naca da bdxixruj be'u.

167 Dutej lázrdawa' tu dxúnzqueza' da dxusede dizra' chiu' netu',

ne nazrí'ile'ēda' ca naca na.

168 Tu dxúnzqueza' ca naca da bdxixruj be'u,

ne ca dxusede dizra' chiu' netu'

lawe' da dxelé'eqeznu' xúgutej da dxuna'.

Dxebéle'ēdxu xrtizra' Dios

169 Xrana' Dios, bene da dxuláwizra' Lue'.

Bzéajni'i neda' ca dxenná xrtizru' gunu'.

170 Bene da dxenaba' lau Lue'.

Bselá neda' ca dxenná xrtizru' gunu'.

171 Tu güe lá'anazqueza' Lue', Xran,

gate ba nusédenu' neda' guna' ca naca xrba chiu'.

172 Tu guchálajzqueza' ca naca xrtizru'

lawe' da xrlátaje naca ca dxenná be'enu' netu'.

173 Guzúatequeze gácalenu' neda'

lawe' da dxuna' ba xuzre guna' ca bdxixruj be'u.

¹⁷⁴ Dxezá lazra' guseláu' neda', Xrana' Dios.

Dhezaca ba lázreləna' da bdxixruj be'u.

¹⁷⁵ Ben gaca bana', na' güe lá'ana' Lue',

na' da dxuchi'u chia' xelácale na neda'.

¹⁷⁶ Gudéa' chalá'ala ca dxedá tu zrila' naníteba'.

Bexilaj neda', wen zrin chiu', lawe' da quebe ne gal-la lazra'
da bdxixruj be'u.

120

¹ Gate guzúa' lu da stebe bláwizra' Xránadxu Dios,
na' Le' gúcaləne' neda'.

² Bselá neda', Xrana' Dios, lu na' benne' wen lazre' ca',
ne lu na' benne' dxelezí xē'ē ca'.

³ ¿Bizra gunna Dios le'e, benne' dxelezí xē'ē?

¿Bizra da ba neza gaca na chee gate gudé' le'e
lu da zi' da xa'?

⁴ Gudé' le'e lu na' benne' ca' xuludé' le'e xaga nalá xéche'ze,
ne xuluzrí' le'e xi' galaj.

⁵ Edxugúa neda'.

Dxaca chia' ca zúaqueza' ládujla benne' Mesec,
ne ca zua' tu lu xu'u xide chee benne' Cedar.

⁶ Da zrentə ba guzúa' ládujla benne' caní
dxuluzú' chalá'ala xel-la' dxebeza zri lazre'.

⁷ Neda' dxezá lazra' gata' xel-la' dxebeza zri lazre'.

Gate dxuchálaja' cheen, dxeledíl-lalə benne' ca' neda'.

121

¹ Chisa xíchaja' nna'a da dxelún bénneache lu xi'a ca'.

¿Gazra za' da gácale na neda'?

² Da gácale na neda' za' lu na' Xránadxu Dios,

Bénnea' bene' xabáa, ne xezr la xu.

³ Quebe gu'e lataj cheajcháziu'.

Quebe gase Bénnea' dxuxúequeze' lue'.

⁴ Gunná' xque, quebe te bchigala chee Bénnea'.

Québequeze gase Bénnea' dxuxúequeze' benne' Israel ca.

⁵ Xránadxu Dios dxucú'uj'e' lue'.

Xránadxu Dios zu'e' cuitu' xabela dxegu'e' lue' zrul-la.

⁶ Quebe guzezxe gubizra lue' te zra,
ne quebe bi gune beu' lue' chizrela.

⁷ Xranu' Dios guxúequeze' lue' chee quebe bi da calela
gaca na chiu'.

Guxúequeze' b'enne'du xu'u.

⁸ Xránadxu Dios guxúequeze' lue' gate dxedxúaju',
ne gate dxexú'u, na'a zra, ne chadía chacanna.

122

¹ Gubélena' benne' ca' gulé'ē neda':

“Chéajdxu xu'u lizre Xránadxu Dios.”

² Na'a zúadxu nigá, zəntu' dxa xu'u ze'e

da naxečaj lue', xęzre Jerusalén.

³ Jerusalén naca na tu xęzre da belexunę',

na' naca na xrtante, ne dxé'le'ę na cháwedau'.

⁴ Lu xęzre na' zjaca xúgute cuen bénneache zaj de'ę

Xránadxu Dios.

Dxelunę' ca dxenná dizra' da guzre Dios benne' Israel ca',

cheę xelúe lá'anę' La Xránadxu Dios.

⁵ Lu xęzre na' zaj dxę' benne' ca' dxuluchi'ę cheę

benne' Israel ca',

naga zaj dxę' benne' xrtia David, benne' ca' dxelenná be'ę.

⁶ Le naba lau Dios gata' xel-la' dxebeza zri lazre'

lu xęzre Jerusalén,

cheę xelepe ban da dxelún benne' ca' zaj nazrí'ine' xęzre na'.

⁷ Dxenábantu' Dios sua xel-la' dxebeza zri lazre'

lu'ule ze'e da naxečaj na lue', Jerusalén,

ne cheę xelezrá' chawe' benne' zaj xu'ę xu'u zren chiu'.

⁸ Nazrí'ida' le sa' ljwezra', ne bi ljwezra' ca', na' dxennía':

Gata' xel-la' dxebeza zri lazre' chiu', xęzre Jerusalén.

⁹ Lawe' da nazrí'ida' xu'u lizre Xránadxu Dios

dxuna' ba xuzre gaca chawe' chiu'.

123

¹ Chisa xíchaja' nna'a naga zu', Xran,

naga zu' Lue', zu' xabáa na'la.

² Ca dxun tu bi węn zrin dxenná'abe' bi nna xránabe',

ne ca dxun nu'ula węn zrin dxenná'abe' bi nna

nu'ula xránabe',

caní dxenná'adxu bi nna Xránadxu Dios

ca zrindxa zra xexache lazre' cheędxu.

³ Bexache lazre' cheętu', Xránantu' Dios.

Bexache lazre' cheętu', lawe' da dxedú lázrentu'

lawe' da dxulucá'ana ditaj bénneache netu'.

⁴ Dxedú lázrentu' lawe' da dxelún lala benne' gunní'a ca'

cheętu',

ne dxulucá'ana ditaj netu', benne' ca' dxulucá'ana szren

cuing'.

124

¹ Chela ca gúcale Xránadxu Dios dxi'u.

Caní dxal-la' xelenná benne' Israel ca' na'a.

² Chela ca gúcale Xránadxu Dios dxi'u

gate guledíl-lalę benne' ca' dxi'u,

³ na' buluzría xi'te' dxi'u

lu dute xel-la' dxelezrá'a zrentę cheę',

⁴ ne guca cheędxu ca dxaca cheę benne'

dxugacu nísadau' le', da na' gute na le'.

⁵ Chela guca caní cheędxu, na' bétete da na' dxi'u.

⁶ Dخال-la' xędxu Xránadxu Dios; Xcalenu',

lawe' da quebe be'ę lataj benne' ca' xuluzría xi'ę dxi'u.

⁷ Beladxu ca dxelá tu bxinne lu xixruj cheę benne' wezén bxinne.

Bzria xi' Xránadxu xel-la' dxenná bea cheę benne' ca', na' beladxu.

⁸ Naca Xránadxu Dios Bénnea' dxácalęne' dxi'u,

Bénnea' bénqueze' xabáa, ne xezr la xu.

125

¹ Benne' ca' dxuluxrén lazre' Xránadxu Dios zaj naque' ca xi'a Sión, da quebe nu seque' gutá, san tu chí'izqueze zua chacha na.

² Ca zaj zua xi'a ca' da zaj naxechaj na Jerusalén, zua Xránadxu Dios, dxuxúequeze' bénneache chee' na'a zra, ne chadía chacanna.

³ Quegá tu chí'izqueze xelenná bea benne' ca' dxelune' da calela lu xezr la xu chee benne' xrlátaje ca', chee quebe xelaca benne' xrlátaje ca' tuze nen benne' wən da zrinnaj ca'.

⁴ Xrana' Dios, bən gaca chawe' chee benne' xrlátaje ca', ne chee benne' ca' zaj naque' li lazre'.

⁵ Benne' ca' dxelebéaj xichaj Dios chee xelune' da caləla, xucuasa Xránadxu Dios benne' ca' tu zren nen benne' ca' dxelune' da zrinnaj.

Dxenaba' gata' xel-la' dxebeza zri lazre' chee benne' Israel ca'.

126

¹ Gate Xránadxu Dios bselé' dxi'u lu na' benne' zitu' ca', ne begu'e dxi'u lu xezre Sión, gúquedxu dxennədxu xəla.

² Nadxa bzrízredxu, ne bə lá'anadxu Xránadxu Dios. Nadxa gulenná benne' xezr la xu ca':

"Da zrentə ca' bən Dios, Xrana benne' ca', chee'."

³ Da zrentə ca' bən Xránadxu Dios cheədxu dxi'u, na' zúadxu lu da ba neza zrentə.

⁴ Bselá Xránadxu dxi'u lu na' benne' zitu' ca', na' bezrindxu lu xezr la xu cheədxu ca dxezrín nisa guba'u lu xəgu bizre ca'.

⁵ Benne' ca' dxelebezre' tiə' dxelaze', nen xel-la' dxelebé xeləxezi'e lina.

⁶ Dxebezre tiə' zéaje' nu'e binne cháwe'du ca', na' dutə xel-la' dxebé dxezrine' zeajnu'e lina chee'.

127

¹ Chela ca zúalə Xránadxu Dios benne' ca' dxelune' tu xu'u dácheze naca xelune' zrin na'.

Chela ca dxuxúe Xránadxu Dios tu xezre, dácheze naca dxuluxúe benne' ca' lə na.

² Dácheze naca dxásazele che zílala, ne dxunle zrin cáteze dxalaj gubizra ca dxebíadxu na, ne dutə xel-la' dxudía dxezile da gágule, lawe' da dxunna Dios da xelagu benne' ca' nazrí'ine' dxácatə na' dxelásiə'.

³ Le nna' xque, zaj naca zrí'inedxu bi ca' benna Xránadxu dxi'u. Zaj naca bə' tu da gunní'a zrentə.

⁴ Zrí'inedxu dxelálajbe' cheədxu gate ne nácadxu cuide' zaj nácabe' ca xaga nalá xéche'ze ca' da nuxru benne' zeje' wedil-la.

⁵ Ba neza zrentə naca na chee bənnea' nuxruə' zánete xaga nalá xéche'ze caní.

Québequeze xedué'eng' gate zri'a chee'
tu zren nen benne' ca' dxeledíl-laləṅe' le'.

128

¹ Ba neza zrente naca na chee benne' ca' dxelezrebe' Xránadxu Dios,
benne' ca' tu dxelúnzqueze' ca nadxixruj be'e Dios.

² Gate dxagu' da dxezi'u chee zrin da nunu'
gaca chiu' tu da ba neza, ne gaca chawe' chiu'.

³ Gaca zru'ulu' ca tu lba uva da dxebía da zixre
cuita xu'u lizru',
na' zri'ínu' ca' xelácabe' ca xaga olivo ca' zaj zə
dxu'a ga dxagu'.

⁴ Caní gun Xránadxu gaca chawe' chee bēnea' dxezrebe' Le'.

⁵ Dxenaba' gun Xránadxu, zuə' xi'a Sión, gaca chawe' chiu',
chee le'enu' gaca chawe' chee xəzre Jerusalén xúgute zra naca banu',

⁶ ne chee le'enu' zri'ine zre su'.
Dxenaba' gata' xel-la' dxebeza zri lazre' chee benne' Israel ca'.

129

¹ Zúadxu lu da stébele'e gate nácatədxu cuide',
waca xelenná benne' Israel ca'.

² Zúadxu lu da stébele'e gate nácatədxu cuide'
san quebe buluzria xi'e dxi'u.

³ Belunə' we' cúzrudxu gate beline' dxi'u xide,
na' gulaca cúzrudxu ca xəzr la xu naga dxedé xia chee bezre.

⁴ Xlátaje naca Xránadxu Dios.
Bselé' dxi'u lu na' benne' ca' buluchínene' dxi'u xadíaze.

⁵ Bən cheajlechaze, ne xelebígaqueze
xúgute benne' ca' dxelecuídene' benne' Sión ca'.

⁶ Bən xelaque' ca xíxre'du ca' dxelebía na xrgu'u
da dxelebizre na gate ne zaj nadxé'ene na,

⁷ da na' quebe nu benne' dxexequé'e na,
ne quebe seque' nu benne' gunə' na tu cheaj weaj.

⁸ Quebe xelenná benne' dxeledé'e naga zaj zria na:
Dxenábantu' gun Xránantu' Dios gaca chawe' chee.
Lu La Xránantu' Dios dxenábantu' gaca chawe' chee.

130

¹ Ga ni zua' lu da stébele'e dxuláwizra' Lue', Xrana' Dios.

² jXran, bene chí'a!
jBzə naga da dxenaba' lau'!

³ Xrana' Dios, chela nna' xánniu' ca naca dul-la nabáantu'
ǰnúzraqueze xegá'ana xrlátaje lau Lue'?

⁴ Lué'quezu' dxunite lau' cheəntu'
chee gápantu' Lue' ba lá'ana.

⁵ Dute lázrdawa' dxebeza lazra' Xránadxu Dios,
ne dxuxrén lazra' xrtizre'.

⁶ Dxebeza lazredxa' Xránadxu Dios
cáqueze dxelún benne' ca' dxuluxúe' xəzre ca',
dxelebeze' chaní',
ne cáqueze dxelún benne' ca' dxelicha bchigala,

dxelebeze' chaní'.

7 Benne' Israel ca' dxal-la' xebeza lazre' Xránadxu Dios lawe' da dxexache lazre' Xránadxu bènneache chee', ne dxexá'awe' benne' ca' lu na' benne' guledábague' Le'.

8 Dios xexá'awe' benne' Israel ca' lu na' xúgute' dul-la da zaj nabague'.

131

1 Xrana' Dios, ba bsana' xel-la' dxucá'ana szren cuina', ne ba bcuasa' xel-la' dxeque xrlátaje cuina'.
Quebe dxulapa napa' lu da zaj naca szren,
da ca' quebe naca chia' gulapa' na'a.

2 Quebe bi gunnía', ne guzúa' zrize ca tu bi dxe'ene
za bexuzrte' gúzrebe'.

Naca bènne' du xu'a ca tu bi dxe'ene za bexuzrte' gúzrebe'.

3 Le cueza lazre' Xránadxu Dios, le'e, benne' Israel na'a zra, ne chadía chacanna.

132

1 Bsa lazre', Xrana' Dios, ca guca chee' David,
ne ca guzaca zí'e,

2 ne ca da guchébe lazre' guné' chiu',
da guchébe lazre' lau', Dios wal-la chee' Jacob.

3 Guné': "Québequeze chu'a xu'u lizra',
ne québequeze gáta'a ga dxasia'

4 ne québequeze guchúdia' xiaj lawa'
ne québequeze gasia'

5 ca zrindxa zra ba bēna' tu xu'u lizre Xrana' Dios naga súaqueze Dios wal-la chee' Jacob."

6 Bénédxu zua xí'ina lá'azxa naga xu'u xel-la' wezría
lu xēzr la xu Efrata,

na' bezréledxu na lu xēzr la xu chee' bēneea' le' Jaar.

7 Gunnantu': Chéajntu' naga zua Dios cheentú'.

Guzú zríbentu' zran ní'a Lē'.

8 Guxasa, Xránantu' Dios, nen xí'ina naga xu'u
xel-la' wezría chiu',

ne gudá lu xí'a naga súaquezu' Lue'.

9 Ben xelún bxruze chiu' ca' da naca xrlátaje,
ne xebeze xa'a xúgute' bènneache chiu', lu dute
xel-la' dxelebé chee'.

10 Lawe' da nazrí'inu' David, wēn zrin chiu',
quebe guzú' chalá'ala wenná bea na' ba guca'u Lue'.

11 Da líqueze bzetaj cuina Xránadxu Dios,
guchébe lazre' chee' David quebe gucuaše' ca da gunné'.

Gunné': "Guna' xelenná bea zri'ine zre su' naga
dxenná béaquezu' Lue'.

12 Che zri'inu' ca' tu xelúnzqueze' ca naca xel-la' wezría chia',
ne ca naca xrtizra' da gusédeda' le',
zri'inu' ca' tu xelenná béazqueze' naga dxenná be'u lue'."

- 13 Lawe' da gucá'a Xránadxu Dios xezre Sión,
 guca lazre' sua xu'u lízrequeze' ga na'.
 14 Gunné': "Tu gácazqueze lataj nigá naga súaqueza' neda'.
 Tu súazqueza' nigá lawe' da caní dxezaca ba lazra' guna'.
 15 Guna' gáta'le'e lina chee benne' ca',
 ne guna' xeledaj benne' xache' ca' xeta.
 16 Guna' xelún bxruze chia' ca' da naca chawe',
 na' xelebezre xa'a xúgute bènneache chia' lu dute
 xel-la' dxelebé chee'.
 17 Lataj na' guna' xexaca xel-la' dxenná bea chee David.
 Guna' xelezúa na' zri'ine zre sua wenná bea na'
 ba gucá'a neda'.
 18 Guna' xeleque zréaje benne' guledábague' Le',
 na' guna' chepe ban xel-la' dxenná bea chee David na'."

133

- 1 Le nna' xque, xrtante naca, ne cháwe'le'e naca
 gate zaj nazraga bènneache chee Dios, zaj naque' tuze.
 2 Naca na ca tu da za da dxuluzúa xíchaje',
 da dxedínnetę na dxu'a lawe',
 ca na' dxedínnetę na lu luzru Aarón,
 ne dxedínnetę na ga zria zre'.
 3 Dxedínnetę na ca xrlę'ela da dxexruj lu xi'a Hermón,
 ne dxexruj na lu xi'a Sión lawe' da gun Xránadxu Dios
 gaca chawe' chee bènneache zaj zre'e na',
 ne gunne' benne' ca' xel-la' nabán da zeajlí canna.

134

- 1 Le na' xque, le güe lá'ana Xránadxu Dios,
 le'e, nácale węn zrin chee Xránadxu,
 zrle xu'u lize Xránadxu chizrela.
 2 Le chisa na'le lau lataj lá'azxa,
 ne le güe lá'ana Xránadxu Dios.
 3 Dxenaba' lau Xránadxu zue' Sión gunę' gaca chawe' chiu',
 naque' Bènnea' bęne' xabáa, ne xezr la xu.

135

- 1 ¡Le güe lá'ana La Xránadxu Dios!
 ¡Le güe lá'ana Le', le'e, węn zrin chee Xránadxu,
 2 le'e zrle xu'u lize Xránadxu Dios,
 lu chale'aj chee xu'u naga zúaqueze Dios!
 3 ¡Le güe lá'ana Xránadxu lawe' da naque' xrlátaje!
 ¡Le gul-la da güe lá'anale La Le', lawe' da naque' zri'i lazre'!
 4 Xránadxu Dios ba guquę'e zri'ine zre sua Jacob.
 Guquę'e zri'ine zre sua Israel chee xelaque' bènneache chee'.
 5 Nézquezdxu szrentę naca Xránadxu Dios.
 Xránadxu naque' szrendxa ca xúgute dios chee benne' zitu' ca'.
 6 Xúgute da dxaca lazre' Xránadxu gunę',
 dxune' na zran xabáa, ne lu xezr la xu,
 ne lu nísadau', ne lu da situj chee nísadau' ca'.

- 7 Dxunę' zá'aca beuj dapa saca cheę xęzr la xu.
 Dxunę' dxelepe xesa guziu' gate dxaca xiuj.
 Dxunę' dxaca be' gáteteze.
- 8 Bene' gulate bi biu nedxu cheę benne' Egipto ca'.
 Gulate bi biu nedxu cheę bėnneache,
 ne bėadu ca' cheę bę xixre' cheę' ca'.
- 9 Bene' xel-la' waca ca' da za xabáa, ne da zrente ca'
 da bene' lu xęzr la xu cheę benne' Egipto ca',
 da ca' bęn Dios da guca cheę Faraón,
 ne cheę xúgute węn zrin cheę Faraón na'.
- 10 Bzria xi'e bėnneache zánete cue' xęzr la xu ca',
 ne betię' benne' wenná bea ca',
 benne' zaj nápalę'e xel-la' dxelenná bea.
- 11 Betię' Sehón, wenná bea cheę benne' amorreo ca',
 ne Og, wenná bea cheę benne' Basán ca',
 ne xúgute benne' wenná bea cheę benne' Canaán ca'.
- 12 Bequę'e xęzr la xu nigá lu na' benne' wenná bea ca',
 na' bnėzruje' na lu na' bėnneache cheę', benne' Israel ca'.
- 13 Xrana' Dios, chadía chacanna zua lau' Lue'.
 Tu cheajlesá lázrezqueze bėnneache Lue'.
- 14 Xránadxu Dios guchi'e cheę bėnneache cheę',
 ne xexache lazre' cheędxu dxi'u, węn zrin cheę'.
- 15 Bedau' xia xaga ca' cheę benne' xęzr la xu ca'
 zaj naca na oro, ne plata.
 Zaj naca na da belún bėnneache.
- 16 Zaj zua dxu'a na san quebe dxelennę na.
 Zaj zua lau na san quebe dxelelé'e na.
- 17 Zaj zua naga na san quebe dxelén na, ne quebe
 dxelecá'a na be'.
- 18 Benne' ca' dxelunę' na zaj nácaqueze' ca léqueze na,
 ne caní zaj naca xúgute benne' dxuluxrén lazre' na.
- 19 Le'e, benne' xrtía Israel, le güe lá'ana Xránadxu Dios.
 Le'e, benne' xrtia Aarón, le güe lá'ana Xránadxu Dios.
- 20 Le'e, benne' xrtia Leví, le güe lá'ana Xránadxu Dios.
 Le'e, núlale dxezrébele Xránadxu Dios, le güe lá'ana
 Xránadxu Dios.
- 21 Le'e, zrale xęzre Sión, le güe lá'ana Xránadxu Dios,
 Bėnnea' zúaqueze' xęzre Jerusalén.

¡Gaca ba lá'azxa Xránadxu Dios!

136

- 1 ¡Le güe lá'ana Xránadxu Dios, Benne' xrlátaje!
 ¡Chadía chacanna dxexache lazre' dxi'u!
- 2 ¡Le güe lá'ana Dios, naque' szréntędxa ca zaj naca dios
 cheę xęzr la xu ca'!
 ¡Chadía chacanna dxexache lazre' dxi'u!
- 3 ¡Le güe lá'ana Xránadxu, naque' szréntędxa ca zaj naca
 xrana xęzr la xu ca'!

¡Chadía chacanna dxexache lazre' dxi'u!
 4 ¡Le güe lá'ana Dios na', dxune' xel-la' waca zri'a ca'!
 ¡Chadía chacanna dxexache lazre' dxi'u!
 5 ¡Le güe lá'ana Dios na', bene' xabáa dute xel-la' sina chee'!
 ¡Chadía chacanna dxexache lazre' dxi'u!
 6 ¡Le güe lá'ana Dios na', bzue' xezr la xu lawe' nísadau'!
 ¡Chadía chacanna dxexache lazre' dxi'u!
 7 ¡Le güe lá'ana Dios na', bene' gubizra ne beu'!
 ¡Chadía chacanna dxexache lazre' dxi'u!
 8 ¡Bene' gubizra chee gusení na te zra!
 ¡Chadía chacanna dxexache lazre' dxi'u!
 9 ¡Bene' beu' ne belaj ca' chee xulusení na chizrela!
 ¡Chadía chacanna dxexache lazre' dxi'u!
 10 ¡Le güe lá'ana Dios na', betie' bi biu nedxu chee
 benne' Egipto ca'!
 ¡Chadía chacanna dxexache lazre' dxi'u!
 11 ¡Le güe lá'ana Dios na', bebéaje' benne' Israel ca'
 lu xezr la xu Egipto na'!
 ¡Chadía chacanna dxexache lazre' dxi'u!
 12 ¡Beche'e le' dute xel-la' waca zren chee'!
 ¡Chadía chacanna dxexache lazre' dxi'u!
 13 ¡Le güe lá'ana Dios na', bene' chupa la'a nísadau'
 da nazí le' na Xrna!
 ¡Chadía chacanna dxexache lazre' dxi'u!
 14 ¡Bdee' benne' Israel ca' laduj nísadau' na'!
 ¡Chadía chacanna dxexache lazre' dxi'u!
 15 ¡Bgacue' nísadau' na' Faraón, benne' wenná bea chee Egipto,
 ne benne' zeje' wedil-la chee' ca'!
 ¡Chadía chacanna dxexache lazre' dxi'u!
 16 ¡Le güe lá'ana Dios na', beche'e benne' chee' ca'
 le'e xixre' lawe' lataj!
 ¡Chadía chacanna dxexache lazre' dxi'u!
 17 ¡Le güe lá'ana Dios na', betie' wenná bea blau ca'!
 ¡Chadía chacanna dxexache lazre' dxi'u!
 18 ¡Betie' wenná bea wal-la ca'!
 ¡Chadía chacanna dxexache lazre' dxi'u!
 19 ¡Betie' Sehón, wenná bea chee benne' amorreo ca'!
 ¡Chadía chacanna dxexache lazre' dxi'u!
 20 ¡Betie' Og, wenná bea chee xezr la xu Basán!
 ¡Chadía chacanna dxexache lazre' dxi'u!
 21 ¡Bnézruje' xezr la xu chee benne' ca' chee gaca na
 chee benne' chee' ca'!
 ¡Chadía chacanna dxexache lazre' dxi'u!
 22 ¡Benne' na chee benne' Israel ca', benne' wen zrin chee' ca'!
 ¡Chadía chacanna dxexache lazre' dxi'u!
 23 ¡Naque' Dios na', quebe gul-la lazre' dxi'u
 gate buluzetja benne' ca' dxi'u!
 ¡Chadía chacanna dxexache lazre' dxi'u!
 24 ¡Le' bselé' dxi'u lu na' benne' ca' guledí-lalene' dxi'u!
 ¡Chadía chacanna dxexache lazre' dxi'u!
 25 ¡Naque' Dios na', dxugawe' xúgute da zaj naca ban!
 ¡Chadía chacanna dxexache lazre' dxi'u!

26 ¡Le güe lá'ana Dios chee xabáa!
¡Chadía chacanna dxexache lazre' dxi'u!

137

1 Dxu'a xegu chee xezr la xu Babilonia gudxé'edxu,
ne gudxézredxu gate xeajsá lázredxu chee xezr Sión.

2 Lu zruze xaga labada' dxu'a xegu na'
buquéladxu da cun zríadi'i na du cheedxu ca'.

3 Benne' ca' guleché'ē dxi'u ca benne' zaj nada'u
gulenábene' dxi'u gúl-ladxu.

Benne' ca' buluzría xi' xezre cheedxu gulé'ē dxi'u
súadxu lu xel-la' dxebé, gulenné':

Le gul-la cheentu' da ca' bíl-lale lu xezre Sión.

4 ¿Ajazra gúl-ladxu da güe lá'anadxu Xránadxu Dios
naga zúantu' lu xezr la xu chee benne' zitu' ca'?

5 Chela gal-la lazra' lue', xezre Jerusalén,
gun Dios gunite na'a xabēla xel-la' waca chee na.

6 Ben xedá' luzra' chíchajla' che quebe cheajsá lazra' chiu',
ne che quebe gucá'ana szrena' lue', Jerusalén,
nacu' da dxezaca ba lázreleda'.

7 Xrana' Dios, bsa lazre' da calēla da belún benne' Edom
lu zra na' guzría xi' xezre Jerusalén,
gate na' gulenné': "Le guchinnaj na. Le guchinnaj na,
ca zrintē lu lane chee na."

8 Le'e, benne' Babilonia, cuía xile.

Ba neza zrentē gaca na chee bēnnea' gunē' chee le
ca da benle le'e cheentu' netu'.

9 Ba neza zrentē gaca na chee bēnnea' que'ē bidu chee le ca',
ne quine'-be' lu xiaj xre na'.

138

1 Xrana' Dios, dutē lázrdawa' güe lá'ana' Lue'.

Tu dxúl-lazqueza' da dxue lá'ana' Lue' lau dios ca' chee
benne' zitu' ca'.

2 Dxuzú zriba' lau xudau' lá'azxa chiu',
ne dxue lá'ana' Lau' lawe' da nacu' li lazre',
ne dxexache lazru' bēnneache chiu',
ne lawe' da blé'enu' nacu' Benne' szrentē,
na' szrentē naca xrtizru'.

3 Gate bláwizra' Lue', na' gúcalēnu' neda'.
Nen dutē xel-la' waca chiu' btipu' lazra'.

4 Xúgutē benne' wenná bea du gabí'i xezr la xu
xelúe lá'anē' Lue', Xrana' Dios.

Caní xelunē' lawe' da ba belenne' ca naca xrtizru'.

5 Xelúl-le' chee da ba nune' Xránadxu Dios,
lawe' da zrentē naca xel-la' ba chee Xránadxu.

6 Szrentē naca Xránadxu Dios, ne dxácalēnē'
benne' baxache' ca',
na' quebe dxu'ē lataj benne' dxucá'ana szren cuine'
zrine' lau Le'.

⁷ Lácala zua' lu da ba xa', Lue' dxutipu' lazra'.
Dxedábagu' benne' ca' dxeledábaguē' neda',
ne dutē xel-la' waca chiu' dxuseláu' neda'.

⁸ Gun Xránadxu Dios da guchebe lazre' chia'.
Xrana' Dios, tu dxexache lázrezquezu' bēnneache chiu'.
Quebe gusanu' dxunu' zrin da guzú lau' dxunu'.

139

¹ Xrana' Dios, ba gunná' xánniu' neda'
ne núnbea xánniu' neda'.

² Nézqueznu' gate dxe'a, ne gate dxasa'.
Zítu'la nézqueznu' da zaj xu'u xichaj lázrdawa'.

³ Ba gunná' xánniu' ca dxuna', ne ca dxexezí' lazra'.
Nézqueznu' xúgutē da dxuna'.

⁴ Gate quebe ne guchálaja' ba nézqueznu' Lue', Xran,
xúgutē da nnia'.

⁵ Gátetezla cuita' neda' zúaquezu' Lue', Xran,
ne nuzé na'u neda'.

⁶ Ca szrentē naca da nézenu' Lue' naca na da dxebáneda'.
Nácalē'ē na sina da quebe gaca chéajni'ida'.

⁷ ¿Gala cha'a zitu' naga quebe zúaqueze Be' chiu'?
¿Gala guzrúnmuja' naga quebe zúaquezu' Lue'?

⁸ Che cuena' sibe zran xabáa, na' zúaquezu' Lue',
ne che xétaja' lu da situj cheē xēzr la xu, na' zu' Lue'.

⁹ La séqueda' tea' lu be', ne cha'a zitu' naga dxalaj gubizra,
u tea' xechalá'a nísadau' naga dxebía gubizra,

¹⁰ cá'anqueze na' súalēnu' neda',
ne guxru na'u xabēla neda'.

¹¹ Chela gaca guna' gacu da chul-la neda',
u guna' xexaca lení' da naxechaj neda', cheē
xaca na da chul-la,

¹² da chul-la na' quebe gaca gucache na neda' lau Lue',
na' chizrela xaca na ca te zra lau'.
Túzqueze ca zaj naca da chul-la, ne xel-la' naxaní' lau Lue'.

¹³ Lue' benu' da zaj xu'u lu bēla' dxen chia'.
Lue' bzalju' neda' lu lē'ē xrna'a.

¹⁴ Güe lá'anaqueza' Lue' lawe' da szrentē zaj naca da dxunu',
ne dxebáneda' ca zaj naca na.
Dutē lázrdawa' nézquezda' caní naca na.

¹⁵ Blé'equenznu' neda' gate gulá' gubinna zrita xu'a,
gate na' belezraga na lu lē'ē xrna'a,
gate na' bgula' lu da bagácheze na'.

¹⁶ Ble'enu' bēla' dxen chia' gate gulá' gubinna na.
Xúgutē da caní ba naxúaj na lu xiche chiu',

na' ca gudé na' gulá' gubinna na,
na' xúgutē na gulaca na cáteze zaj naxúaj na.

¹⁷ Dios, szrentē zaj naca da dxuwía lazru' gunu'.
Da zantē ca zaj naca na.

¹⁸ Chela gaca lazra' gulaba' ca zaj naca na,

zaj naca na ca xuzre' dxe' dxu'a tu xegu zren.

Gate dxexebana', ne zúalequeza' Lue'.

¹⁹ Dios, da líqueze gutiu' benne' ca' dxelune' da caleła.

Cheę le na', le gucuasa naga zua', le'e, weęe benne'.

²⁰ Chiu' Lue', Dios, dxelenné' dizra' schanni'.

Benne' ca' dxeledábague' lue' dxuluzétaje' Lau' lu da xálaze.

²¹ Xrana' Dios, dxecuídada' benne' ca' dxuluzúe' Lue'
chalá'ala,

ne dxezrá'li'a benne' ca' dxeledábague' Lue'.

²² Dute lázrdawa' dxecuídada' benne' ca'.

Dxéqueda' benne' ca' ca benne' ca' dxeledábague' nédaqueza'.

²³ Gunná' xanne' neda', Dios, ne gunná' da xu'u na lázrdawa'.

Bxue neda' cheę nézenu' da xu'u lu xichaj lázrdawa'.

²⁴ Gunná' che zúale tu da caleła neda',
na' bsi neda' lu neza chawe' chiu' da zeajlí canna.

140

¹ Xrana' Dios, bselá neda' lu na' benne' ca' dxelune' da caleła.

Bxue neda' cheę quebe bi xelún benne' xichaj zra'a ca'
chia' neda'.

² Benne' caní dxuluwía lazre' da caleła ca' da xelune'.

Tu zra tu zra dxulutíl-lalęne' bęnneache.

³ Da dxelenné' naca na ca lazxa bęla' da zaj nalále'e.

Xrtizra' benne' ca' zaj naca na ca nisa snia cheę bęla'.

⁴ Xrana' Dios, bxue neda' cheę quebe bi xelún benne' ca'
dxelune' da caleła chia' neda'.

Bselá neda' lu na' benne' xichaj zra'a ca',
benne' ca' dxelune' ba xuzre cheajcházia'.

⁵ Benne' ca' dxulucá'ana szren cuine' zaj nabeque'
tu da queł-la na neda'.

Ba zaj nuzalę' xralaj dxu'a neza.

Ba zaj nabeque' da ca' xelęl-la na neda'.

⁶ Gucha' Xrana' Dios: Lue' nacu' Dios chia'.

Xrana' Dios, bene chi'a dxuláwizra' Lue'.

⁷ Xrana' Dios, nacu' weselá chia'.

Lue' bcu'uju' xíchaja' lu zra guca wedil-la.

⁸ Xran, quebe gu'u lataj gaca ca da dxelezá lazre' benne' ca'
dxelune' da caleła.

Quebe gu'u lataj chepe ban da dxuluwía lazre' xelune',
cheę quebe xulucá'ana szren cuine'.

⁹ Zaj naxechaj benne' ca' dxelune' da caleła neda'.

Ben gaca cheę benne' ca' ca de' da dxelaca lazre' gaca
cheę benne' xula.

¹⁰ Ben xexruj xi' lawe' benne' ca'.

Bzra benne' ca' lu xi'.

Bzra benne' ca' lu da sítuje'e naga cabátadxá xelexedxúaje'.

¹¹ Quebe gu'u lataj xegá'ana lu xęzr la xu bęnnea' dxenné'
da caleła.

Ben gaca da caleła cheę benne' xichaj zra'a, da guzríá xi na le'.

¹² Nezda' xechebe Xránadxu Dios waláz cheę benne' baxache',
ne guzé chache' da zaj xu'u lu na' benne' xache' ca'.

¹³ Da líqueze benne' xrlátaje ca' xelúe lá'ane' Lau' Lue',

na' benne' li lazre' ca' xelezúe' naga zu' Lue'.

141

¹ Xrana' Dios, dxuláwizra' Lue'.

Gudázega gácalenu' neda'.

Bene chi'a gate nnia' Lue'.

² Ben la' da dxenaba' lau Lue' ca zren xala.

Ble'e na'a da dxechisa' lau' ca tu béadau' dxútia'-ba' lau'.

³ Xrana' Dios, bxue dxu'a nigá,

ne bxue xide dxu'a chee quebe nnia' tu da calela.

⁴ Quebe gu'u lataj gaca lazra' guna' tu da calela,

ne chee quebe guna' tu da calela tu zren nen benne' ca'

dxelune' da zrinnaj,

ne chee quebe gágulena' benne' ca' dxelune' da calela

lu laní chee'.

⁵ Che gudé benne' xrlátaje neda' lu da ba xa', gaca na chia'

tu da chawe',

na' che til-le' neda', gaca na chia' ca tu da dxelále'e zixre

da dxegu'e xíchaja'.

Tu nábazqueza' Dios guzague' da calela da dxelún benne' ca'

dxelune' da calela.

⁶ Gate xeledxú'une' benne' xíchaje ca' chee benne'

wen da calela ca' zran xi'a xiaj ca',

na' xeleque be'e bénneache naca li ca da gunnía'.

⁷ Xelase dinnaj zrita chee benne' ca' dxu'a xedxu ba chee' ca'.

Xelaca na ca bchecu xu, da dxelase dinnaj na naga

dxa'ana bezre.

⁸ Chee le na' dxenná'a naga zu' Lue', Xrana' Dios.

Dxuxrén lazra' Lue', quebe gusán lazru' neda'.

⁹ Bxue neda' chee quebe xelej-la xralaj ca' chee benne' ca'

dxelune' da calela neda',

ne chee quebe cheajcházia' lu da zaj nabeque' benne'

wen da calela ca'.

¹⁰ Ben cheajlechaze benne' ca' dxelune' da calela lu xralaj

da zaj nabéchequeze'

dxácaté na' tea' neda' ga na' zri'a chawe'.

142

¹ Zizraj dxuláwizra' Xránadxu Dios.

Du lazra' dxenaba' Xránadxu xexache lazre' neda'.

² Lau Le' dxawa' zría ca da dxaca chia'.

Lau Le' dxulé'eda' ca da stebe zua' neda'.

³ Gate zua lázrdawa' lu da stebe, Lue', Xran, nézenu'

da dxaca chia'.

La neza naga dxedá' gulebeque' xralaj da quel-la na neda'.

⁴ Dxenná'a cuita' xabela, san quebe nu chilá' gácalé neda'.

Quebe nu chilá', benne' guxúequeze' neda'.

Quebe nu chilá', benne' dxe' gunna xue' chia' neda'.

⁵ Dxuláwizra' Lue', Xrana' Dios, dxennia':

Dxebeza lazra' tuzu' Lue'.

Tuzu' Lue' dxezá lazra' lu xezr la xu nigá.

6 Bene da dxuláwizra' Lue', lawe' da dxezaca zí'le'a.
Bselá neda' lu na' benne' ca' dxeláu zi' xuzre' neda',
lawe' da zaj naque' wál-ladxa ca neda'.

7 Bebéaj neda' lu da dxaca chia', chee gaca güe lá'ana' Lue'.
Benne' xrlátaje ca' xeléchaje' neda' lawe' da gunu' gaca chawe' chia'.

143

1 Xrana' Dios, bene da dxuchálaja' lau Lue'.

Bze naga da dxenaba' lau'.

Gudá gácalenu' neda' lawe' da nacu' li lazre', ne xrlátaje.

2 Quebe guchi'u chia' neda', wen zrin chiu',
ca naca da nabaga',

lawe' da lau' Lue' quebe nu chilá' benne' naque' du lazre'.

3 Gúcalē neda' lawe' da dxeláu zi' xuzre' neda'.

Xeláteze bache xelútiē' neda'.

Ba belunē' naca' ca tu benne' dxedé' lu da chul-la
ca naca chee benne' gate ca'.

4 Zua lázrdawa' lu da stébele'e, ne dxewí'ine lázrele'a.

5 Dxeajsá lazra' ca guca nédxudaute.

Dxulaba lazra' ca naca xúgute da benu'.

Dxeajsá lazra' ca naca da zrente' ca' da benu'.

6 Dxechisa na'a lau Lue'.

Naca' ca tu xezr la xu bizre, dxebíleda' Lué'queze.

7 Gudázega gácalenu' neda', Xran, lawe' da dxedú lazra'.

Quebe chenu' gácalenu' neda', chee quebe gaca' ca tu benne'
ba xu'e xedxu ba.

8 Che zílala ben cheajsá lazra' dxexache lazru' bēnneache
chiu' ca'

lawe' da dxuxrén lázrequeza' Lue'.

Bzéajni'i neda' ca dxal-la' guna'

lawe' da dxezá lazra' guna' da dxaca lazru' Lue'.

9 Xrana' Dios, bselá neda' lu na' benne' ca' dxeledábague'
neda'

lawe' da dxuzúa cuina' lu na'u chee guxúequezu' neda'.

10 Bsedē neda' chee guna' da dxaca lazru' Lue',

lawe' da nacu' Lue' Dios chia'.

Gusel-la Be' xrlátaje chiu' chee che'e neda' la neza chawe' chiu'.

11 Chee gaca bea na nacu' xrlátaje, Xran, gutipu' lazra'.

Lawe' da nacu' xrlátaje, guseláu' neda' lu da dxaca chia'.

12 Lawe' da nacu' li lazre', guzría xi'u benne' ca'
dxeledábague' neda',

ne guzría xi'u xúgute benne' ca' dxelaca lazre'

xuluzría xi'e neda',

lawe' da naca' neda' wen zrin chiu'.

144

1 ¡Gaca ba lá'azxa Xránadxu Dios,

Bēneea' dxuzé chache' neda'!

Naque' Bēneea' dxuzázraje' na'a chee cha'a lu wedil-la,

ne dxuzázraje' zrube na'a chee séqueda' tíl-lalēna' benne' ca'
dxelunē' da calēla.

- 2 Naque' Benne' dxexache lazre' neda',
 ne naque' ca tu xu'u naga ze chawa'.
 Dxuzúa chache' neda', ne dxuselé' neda'.
 Dxucu'uje' neda', na' dxuxrén lazra' Le'.
 Dxune' dxuluzúa bénneache chia' dizra' chia'.
 3 Xrana' Dios, ¿ájazra naca nu benne', dxeajsá lazru' le'?
 ¿Ájazra naca nu benne' dxe'u gunne xue chee'?
 4 Naca benne' ca tu da níteze.
 Zaj naca zra chee' ca tu zrul-la da dxedeze.
 5 Xrana' Dios, gusalaj zran xabáa, ne betaj gácalenu' neda'.
 Bta xi'a ca', na' dxuaj zren chee xi'.
 6 Bzalaj xesa guziu', ne blaga benne' ca' dxelune' da calela.
 Bzalaj xaga nalá xéche'ze chiu', ne bzria xi' le'.
 7 Naga zu' na'la, bze na'u, ne bselá neda' lu da stébele'e zua'.
 Bselá neda' lu na' benne' zitu' ca',
 8 benne' ca' tu dxelennézqueze' da wen lazre',
 ne dxuluzétaje' Dios gate dxelezí xe'e.
 9 Dios, gúl-laqueza' chiu' da cube, quínnia' da dxúl-lalena'.
 Nen tu da dxínnia' da nua chi du chee na gúl-laqueza' chiu'.
 10 Nacu' Lue' Bénnea' dxune' dxeledxúaj chawe'
 benne' wenná bea ca'.
 Dxuseláu' David, wen zrin chiu', lu xia nalá chee
 benne' wen da calela ca'.
 11 Bexa'u neda', ne bselá neda' lu na' benne' zitu' ca',
 benne' ca' tu dxelennézqueze' da wen lazre',
 na' dxuluzétaje' Dios gate dxelezí xe'e.
 12 Ben xelegula bi biu cheentu' ca tu xaga da dxegula chawe',
 ne zaj nácabe' bi cuide'.
 Ben xelaca bi nu'ula cheentu' ca bdú'a xiaj xrtante ca'
 da zaj nnita tu lu xu'u zren.
 13 Ben chaté lízrentu' xúgute cuen lina cheentu'.
 Ben xelánle'e be xixre' cheentu', chee xelácaba'
 gaxúa gaxúane be xixre'du ca' lu xezr la xu cheentu'.
 14 Ben xelaca bezre cheentu' be wal-la chee xelunba' zrin.
 Ben quebe xelezanba' gate quebe ne zrin cha beu' cheeba' ca'.
 Ben quebe nu cha' cuezre xáche' la neza cheentu'.
 15 Ba neza zrenté naca na chee bénneache ca' dxaca caní chee'.
 Ba neza zrenté naca na chee bénneache ca'
 naca Xránadxu Dios chee'.

145

- 1 ¡Gucá'ana szrena' Lue', Dios chia', ne Wenná Bea chia'!
 ¡Tu güe lá'anazqueza' Lau' Lue' chadía chacanna!
 2 ¡Tu zra tu zra güe lá'ana' Lue'!
 ¡Tu güe lá'anazqueza' Lau' Lue' chadía chacanna!
 3 ¡Szrenté naca Xránadxu Dios, ne naca chee'
 tu güe lá'anazquezdxu Le'!
 ¡Québequeze séquedxu gúnbeadxu ca szrenté naque'!
 4 Xúgute cuen bénneache chiu' xelúe lá'ané' da beñu' Lue',
 ne xuluzenne' benne' xezr la xu ca' ca naca da zrenté da beñu'.

- 5 Gulaba lazra' ca naca da xrtante chee da xabáa chee
xel-la' szren chiu', ne ca naca da zrente da nunu'.
- 6 Xúgute bēnneache xuluchálaje' ca naca xel-la' waca chee
da zrente da nunu',
na' neda' guzenda' le' ca naca xel-la' szren chiu'.
- 7 Xuluzenne' le sa' ljwezre' ca naca xel-la' zri'i lazre' zren
chiu',
ne tu xelúl-lazqueze' chee da xrlátaje da nacu' Lue'.
- 8 Xránadxu Dios naque' zri'i lazre', ne dxexache lazre'
bēnneache chee'.
Dxezrene', ne quebe dxezrá'aze', na' dxexache lázrele'e dxi'u.
- 9 Dxun Xránadxu Dios da chawe' chee xúgute bēnneache,
ne dxexache lazre' xúgute da zaj naca ban da nune'.
- 10 Xúgute da ca' nunu' xelúe lá'ana na Lue', Xran,
na' bēnneache chiu' xulucá'ana szrene' Lue'.
- 11 Dxelenné' ca szrente naca xel-la' dxenná bea chiu'.
Dxuluchálaje' ca naca xel-la' waca zrente chiu',
- 12 chee xuluzenne' xúgute bēnneache ca naca da zrente ca'
da nunu',
ne ca naca da xabáa chee xel-la' szren chee xel-la' dxenná bea
chiu'.
- 13 Xel-la' dxenná bea chiu' tu súazqueze na,
ne nna be'enu' xúgute cuen bēnneache.
- 14 Nuxru Xránadxu Dios xúgute benne' ca' dxeajlecházie',
ne dxechise' xúgute benne' ca' zaj nada'u lu zrin wal-la.
- 15 Xúgute bēnneache dxelenné'e Lue' chee gácalenu' le',
na' Lue' gunézruju' da xelawe' ca zrin zra chee na.
- 16 Dxuzé na'u, ne dxunézruju' ca naca da chawe'
da dxelexárje xúgute da zaj naca ban.
- 17 Xlátaje naca Xránadxu Dios lu xúgute da dxune',
ne dxexache lazre' xúgute da zaj naca ban da nun Le'.
- 18 Xránadxu Dios zúatequeze' gácalene' xúgute benne' ca'
dxululáwizre' Le',
xúgute benne' ca' du lazre' dxululáwizre' Le'.
- 19 Guné' ca dxelezá lazre' benne' ca' dxelezrebe' Le'.
Cá'anqueze xenne' chee' gate xululáwizre' Le', ne guselé'
benne' ca'.
- 20 Xránadxu Dios dxuxúequeze' xúgute benne' ca'
zaj nazrí'ine' Le',
san guzria xi'e xúgute benne' ca' dxelebéaj xíchaje' Le'.
- 21 Du lazra' güe lá'ana' Xránadxu Dios.
Xúgute benne' dxal-la' tu xelúe lá'anazqueze' Le' lá'azxa
chadía chacanna.

146

- 1 ¡Gaca ba lá'azxa Xránadxu Dios!
¡Du lazra' güe lá'ana' Xránadxu Dios!

- 2 ¡Dxácate naca bana' güe lá'ana' Xránadxu Dios!
 ¡Tu gúl-lazqueza' da güe lá'ana' Xránadxu Dios dxácate
 naca bana'!
- 3 Quebe guxrén lázrele benne' dxeleenná bea,
 ne quegá bènneache lawe' da quebe xelezéquene'
 xuluselé' le'e.
- 4 Dxeledxúaj be' zaj xu'e, na' xelexexaque' xu xrte.
 Lu zra ná'queze xelenite da dxuluwía lazre' xeluné'.
- 5 Ba neza zrente naca na chee bènnea', dxácalé Dios chee
 Jacob le',
 bènnea' dxebeza lazre' Xránadxu Dios.
- 6 Dios na' bene' xabáa, ne xezr la xu, ne nísadau',
 ne xúguté da zaj zra' lataj ca'.
 Naque' Bènnea' tu dxúnzqueze' da li lazre'.
- 7 Dxuchi'e chee benne' baxache' ca',
 ne dxugawe' benne' ca' dxeleduné'.
 Xránadxu Dios dxuselé' benne' ca' zaj nada'u lu na'
 benne' ca'.
- 8 Xránadxu Dios dxexuné' xiaj lau benne' la chul-la ca'.
 Xránadxu Dios dxechise' benne' ca' dxejlecházie'.
 Xránadxu Dios nazrí'ine' benne' xrlátaje ca'.
- 9 Xránadxu Dios dxuxúe' benne' zitu' ca'.
 Nuxre' bidau' wezebe ca', ne nu'ula tuze ca',
 na' dxuchinnaje' da dxelún benne' ca' dxeluné' da calela.
- 10 Tu nna béazqueze Xránadxu Dios.
 Le'e, benne' xezre Sión, nna be'e Dios cheele
 ne xúguté cuen zrí'ine zre súale.

¡Gaca ba lá'azxa Xránadxu Dios!

147

- 1 ¡Le güe lá'ana Xránadxu Dios lawe' da naca chawe'
 gúl-ladxu da güe lá'anadxu Dios cheedxu,
 lawe' da xrtante naca güe lá'anadxu Le'!
- 2 Xránadxu Dios xexuné' xezre Jerusalén.
 Xequé'e benne' Israel ca' zaj zue' xezr la xu zitu' ca'.
- 3 Dxexuné' benne' ca' dxelexewí'ine lázrele'e,
 ne dxudé'e ladxe' naga zaj naca we' chee benne' ca'.
- 4 ¡Nézquezne' ca zaj naxán belaj ca'!
 ¡Tu tu belaj ca' dxu'e la na!
- 5 ¡Szrente naca Xránadxu Dios, ne nape' dute xel-la' waca!
 ¡Quebe bi de da quebe dxéajni'ine'!
- 6 Xránadxu Dios dxácalene' benne' dxexruj lazre' ca',
 na' dxuzéxruje' benne' ca' dxeluné' da calela.
- 7 ¡Le gul-la da güe lá'anale Xránadxu Dios!
 ¡Le gul-la, ne le quinne da cun zríadi'i na du lau Dios cheedxu!
- 8 ¡Le' dxudé'e beuj ca' zran xabáa!
 ¡Le' dxelel-le' nisa xiuj lu xezr la xu!
 ¡Le' dxuné' dxelezríá xíxre'du ca' lu xi'a ca'!
- 9 ¡Le' dxunézruje' da dxelagu be xixre' ca'!

¡Dxunézruje' da dxelagu béchajdu ca', be dxelebezre xa'aba'!

¹⁰ Da dxezaca ba lázreleṅe' quebe naca na xel-la' wal-la
cheḡ bzrina' ca',
ne quegá xel-la' wal-la cheḡ bénneache.

¹¹ Dxezaca ba lázreleṅe' benne' ca' dxelezrebe' Le',
ne benne' ca' dxelebeza lazre' Le' cheḡ xexache lazre' le'.

¹² ¡Le güe lá'ana Xránadxu Dios, le'e zrale xezre Jerusalén!
¡Le güe lá'ana Dios cheḡle, le'e zrale xezre Sión!

¹³ ¡Le' dxuzúa chúchue' dxa xu'u cheḡ xezre cheḡle!
¡Dxunḡ' dxaca chawe' cheḡ benne' ca' zaj zre'e xezre cheḡle!

¹⁴ ¡Dxebeque' xel-la' dxebeza zri lazre' lu xezr la xu cheḡle!
¡Gúnnale'e cheḡle zrua' chawe'!

¹⁵ ¡Dxusel-le' xrtizre' cheḡ benne' ca' zaj zre'e dutḡ xezr la xu,
na' chadí dxaca ca da dxenné'!

¹⁶ ¡Dxugacue' xezr la xu bezxe' da naca na ca zrila'!
¡Dxuzéxruje' xrlḡ'ela dxela ca de!

¹⁷ ¡Dxunḡ' dxelexruj xiaj bezxe' ca weaj xíajdu ca'!
¡Nu benne' gaca guchaga lawe' da zaga cheḡ na?

¹⁸ ¡Dxenná be'e, na' dxexuna na!
¡Dxunḡ' dxaca be', na' dxexaca bezxe' na' nisa guba'u!

¹⁹ ¡Bzéajni'ine' Jacob ca naca xrtizre', ne bdeḡ xrba cheḡ',
ne da ca' gunná be'e lu na' benne' Israel ca'!

²⁰ Quebe ne gunḡ' caní cheḡ xezr la xu xezícadxa ca',
na' benne' xezr la xu ca' quebe dxelexúnbe'e xrba cheḡ'.

¡Gaca ba lá'azxa Xránadxu Dios!

148

¹ ¡Le güe lá'ana Xránadxu Dios!

¡Le güe lá'ana Xránadxu, le'e, zrale xabáa!
¡Le güe lá'ana Le', le'e, zrale dxala!

² ¡Le güe lá'ana Le', le'e, gubáz cheḡ xabáa cheḡ' ca'!
¡Le güe lá'ana Le', le'e, benne' zante cheḡ'!

³ ¡Le güe lá'ana Le', le'e, gubizra, ne beu'!
¡Le güe lá'ana Le', le'e, belaj dxusenile!

⁴ ¡Le güe lá'ana Le', le'e, xabáa ca',
ne le'e, nisa zrale lówela xabáa!

⁵ ¡Le güe lá'ana La Xránadxu,
lawe' da gunná bé'eng', na' guzúale!

⁶ ¡Beṅe' súale tu chí'ize, ne chadía chacanna!
¡Bzueḡ' cheḡle tu da bdxixruj be'e da quebe te cheḡ na!

⁷ ¡Le güe lá'ana Xránadxu lu xezr la xu,
le'e, bea zri'a zrale lu nísadau', ne xúgute nisa situj,

⁸ ne le'e, xesa guziu', ne xiaj xiuj, ne bezxe', ne beuj ca',
ne le'e, be' bduu' ca', dxunle ca gunná be'e!

⁹ ¡Le güe lá'ana Le', le'e, xí'adu ca', ne xí'a zri'a ca',
ne le'e, xaga zixre ca', ne xaga cedro ca',

¹⁰ ne le'e, be' xixre' ca', ne bea ca' dxuluxúe bénneache,
ne le'e, be' snia ca', ne be' zaj zua xrila!

11 ¡Le güe lá'ana Le', le'e, benne' wenná bea ca', ne xúgute
bénneache,

ne le'e, benne' dxelenná be'e, ne benne' dxuluchi'e,

12 ne le'e, benne' wegú' ca', ne nú'uladu ca',

ne le'e, benne' gula ca', ne bidu ca'!

13 ¡Le güe lá'ana La Xránadxu!

¡Szréntedxa naca La Le' ca xúgute la bénneache!

¡Da xabáa chee' dxulé'e lau na lu xezr la xu, ne xabáa!

14 ¡Le' nune' xezr chee' xezre wal-la!

¡Le güe lá'ana Le', le'e, bénneache chee',

nácale zrí'ine zre sua Israel!

¡Nácale benne' nazrí'i Le'!

¡Le güe lá'ana Xránadxu!

149

1 ¡Le güe lá'ana Xránadxu Dios!

¡Le gul-la chee' Xránadxu tu da cube!

¡Le güe lá'ana Le' naga zaj nazraga bénneache chee'!

2 ¡Le be, le'e, benne' Israel, lau Bénnea' bene' le'e!

¡Le sua xel-la' dxebé, le'e, zrale Sion, lau Bénnea' naque'

Wenná Beache!

3 ¡Le güe lá'ana La Xránadxu, ne guxa'ale!

¡Le guchunchu xide ca', ne le quinne

da cun zríadi'i na du ca', dxue lá'anale Le'!

4 ¡Xránadxu Dios dxezaca ba lázrele' bénneache chee'!

¡Dxape' ba lá'ana benne' dxexruj lazre' ca', ne dxuselé' le'!

5 Dخال-la' xelebéqueze bénneache chee' lu da xabáa chee',

ne xelúl-le' duté xel-la' dxelebé du xela.

6 Dخال-la' xebezre xe'e, xelúe lá'ane' Dios,

zaj nu'e xia da zaj nalá dxupa la'ate,

7 chee' xelexebéaj lazre' benne' xezr la xu ca',

ne xuludé' xel-la' zi' benne' xezre ca',

8 ne xuluchéajé' benne' wenná bea chee' ca' du xia,

ne benne' dxelenná be'e nen du xia,

9 ne xuluzría xi'e benne' ca' ca ba nun Dios gaca chee'.

Da nigá gaca na da xabáa chee' bénneache chee' Dios.

¡Le güe lá'ana Xránadxu!

150

1 ¡Le güe lá'ana Xránadxu Dios!

¡Le güe lá'ana Xránadxu lu xudau' chee'!

¡Le güe lá'ana xel-la' waca chee' lu xabáa chee'!

2 ¡Le güe lá'ana Le' ca zaj naca da zren da nune'!

¡Le güe lá'ana Le' ca naca xel-la' szren chee'!

3 ¡Le güe lá'ana Le', gucuézrele luzu ca' da dxulucuezre'!

¡Le güe lá'ana Le', quinnele da cun zríadi'i na du,

ne da ca' dxínnele!

4 ¡Le güe lá'ana Le', guchúnehule xide, ne guxa'ale!

¡Le güe lá'ana Le', quinnele da cun zríadi'i na du,

ne gucuézrele bchiuj!

⁵ ¡Le güe lá'ana Le', gutíl-lale xíadu ca'!

¡Le güe lá'ana Le', gutíl-lale xia zren ca'!

⁶ ¡Le güe lá'ana Xránadxu, xúgutele naca banle!

¡Le güe lá'ana Xránadxu Dios!

DIZRA' CHAWE' CA NACA CHEE JESUCRISTO DA BZUAJ SAN MATEO

La benne' ca' gulaque' xra gula chee Cristo

(Lc. 3.23-38)

¹ Da caní zaj naca na la chee benne' zaj naque' xra wdé chee Jesucristo. Jesús nigá nababe' zri'ine zre sua David, ne zri'ine zre sua Abraham.

² Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne' biche' ca'.

³ Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom.

Esrom nigá guque' xra Aram.

⁴ Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

⁵ Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isaí.

⁶ Isaí nigá guque' xra David, benne' wenná bea.

Wenná bea David nigá, ne nu'ula na' nédxute guque' zru'ula Urías gulaque' xra xrna Salomón.

⁷ Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

⁸ Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

⁹ Uzías nigá guque' xra Jotam.

Jotam nigá guque' xra Acaz.

Acaz nigá guque' xra Ezequías.

¹⁰ Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

¹¹ Josías nigá guque' xra Jeconías ne benne' biche' ca' ca lu zra ca' gate benne' Babilonia guleché'e benne' Israel ca' lu xezr la xu Babilonia.

¹² Jeconías nigá guque' xra Salatiel.

Salatiel nigá guque' xra Zorobabel.

¹³ Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

¹⁴ Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

¹⁵ Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le' Jacob.

¹⁶ Jacob nigá guque' xra José, benne' chee María, xrna Jesús, Bénnea' naque' Cristo.

¹⁷ Caní naca, gulaca chidá' cue' bènneache gate guzú lau zua Abraham, ca bzrinte zra zua David, na' gulaca xechidá' cue' bènneache ca' gate guzú lau zua David, ca bzrinte zra gate na' benne' Babilonia ca' guleché'ē benne' Israel ca' lu xezr la xu chee', na' gulaca xechidá' cue' bènneache ca' gate guzú lau zra na', ca bzrinte zra gulaj Cristo.

*Ca guca gate gulaj Cristo
(Lc. 2.1-7)*

¹⁸ Caní guca gate na' gulaj Jesucristo. María, xrna Jesús ba nachébebe' gácabe' zru'ula José. Nédxula ca za xelenite', nu'ula nigá ba zue' zi'i ne chee xel-la' waca chee Be' Lá'azxa chee Dios. ¹⁹ José, benne' chee María nigá, naque' benne' xrlátaje. Quebe guca lazre' gulé'ene' ca ba naca chee María lau benne' xezre ca'. Guca lazre' gusane' le' bagácheze. ²⁰ Dxácatē dxudé lazre' da nigá, ble'e lau tu gubáz chee xabáa, gubáz chee Xránadxu, ga zua José na' lu bchigala, na' guzre' le':

—José, zri'ine zre sua David, quebe zrebu' si' lu na'u María chee gácabe' zru'ulu', lawe' da bidu biu na' sanbe' zabe' ne chee Be' Lá'azxa chee Dios. ²¹ Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guselabe' bènneache lu dul-la da zaj nabague'.

²² Xúgute' da caní gulaca ca' chee guca ca da gunná Xránadxu lu dxu'a benne' ca' buluchálaje' waláz chee'. ²³ Caní gunné': Tu nú'uladau' gúadaube' sanbe' tu bidu biu cheebe', na' xelu'e labe' Emanuel. Emanuel zéaje na: Dios zúalene' dxi'u.

²⁴ Ca bebán José, na' bene' cáteze gunná gubáz chee Xránadxu, na' guzú' lu ne'e María chee gácabe' zru'ule'. ²⁵ Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

2

Dxelezn benne' sina ca' lu xezre Jerusalén

¹ Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa belezrn benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula. ² Na' gulenabe':

—¿Ga zua bidu na' ba gúlajbe' chee gácabe' benne' nna bé'ene' benne' judío ca'? Gate zuantu' chalá'ana naga dxalaj gubizra blé'entu' belaj cheebe', na' bla'ntu' nigá chee gúe lá'ana gúe szrentu'-be'.

³ Ca guneze Herodes, benne' wenná bea, da nigá, na' guzúe' stēbe, ne cá'anqueze guca chee xúgute' benne' zaj zre'e Jerusalén. ⁴ Nadxa Herodes, wenná bea na', btupe' xúgute' benne' xíchaje chee bxruze ca', ne benne' dxuluxuzájle'e da nadxixruj bea Dios, na' gunábene' benne' ca':

—¿Gazra na' galaj Cristo?

⁵ Benne' caní gulé'e le':

—Lu xezre Belén da nababa xezr la xu Judea, lawe' da bzuaaj caní tu benne' bchálaje' waláz chee Dios, gate na' gunné':

⁶ Lue', Belén chee xezre ca' zaj nababa na Judá, nacu' lue' xezre da quebe naca na da bzébedxa

ládujla benne' ca' dxelelná be'ene' xęzr la xu Judá nigá,
lawe' da ládujla bėnneache chiu' dxuaj tu benne' nna be'e,
na' guxúequeze' bėnneache chia', benne' Israel.

⁷ Nadxa Herodes, wenná bea na', bláwizrę' bagácheze benne' sina gula ca',
na' gunábene' lę' bátala ble'e lau belaj na' belelé'ene'. ⁸ Nadxa gusel-lę' benne'
ca' chjaque' xęzre Belén, ne guzre' lę':

—Le chjaca na', ne le naba xanne' cheę bidu na', na' ca cheajxrácale-be', na'
le guzén neda' cheę cha'a neda' gúe lá'ana gúe szrena'-be'.

⁹ Ca bexuzre belén benne' sina gula ca da gunná Herodes, wenná bea,
nadxa besiá'que', na' belaj da belelé'ene' gate zaj zre'e chalá'a naga dxalaj
gubizra zeaj na lau lę', na' bzrintę na, ne guzúa na naga zua bidu na'. ¹⁰ Gate
benne' sina gula ca' belelé'ene' belaj na', nadxa gulebé'ę'ene'. ¹¹ Ca gulu'e lu
xu'u, belelé'ene' bidu na', ne xrnabe' María. Nadxa buluzú zribe' dxelúe lá'ana
dxelúe szrene' bidu na'. Nadxa gulesálaje' xua cheę' ca', ne bulunęzruje'-be'
oro, ne xalaj zixre, ne mirra da naca na zichaj. ¹² Ca gudé na', Dios guzre'
benne' ca' lu bchigala québedxa xelexedę' naga zua Herodes. Cheę lę' na
belexeque'e neza xula, belexezrine' lazrie'.

Ca guca beleché'e Jesús lu xęzr la xu Egipto

¹³ Ca gudé besi'aca benne' sina gula ca', nadxa tu gubáz cheę xabáa, gubáz
cheę Xránadxu ble'e lawe' José lu bchigala, na' guzre' lę':

—Guxasa. Becá'a bidu na', ne xrnabe', na' le chjaca lu xęzr la xu Egipto, na'
xegá'anu' ga na' ca zrindxa zra xapa' lue' xetú. Caní dxal-la' gunu' lawe' da
wexilaj Herodes bidu nigá cheę gutię'-be'.

¹⁴ Nadxa José guxase', na' chizrélala beche'e bidu na', ne xrnabe', na'
bexu'e-be' lu xęzr la xu Egipto. ¹⁵ Gulezre'e na' ca bzrindxa zra gute Herodes.
Caní guca ca naca da gunná Xránadxu lu dxu'a benne' bchálaje' waláz cheę,
gunné': "Xuláwizra' bi biu chia' cheę xedxúajbe' lu xęzr la xu Egipto."

Dxenná be'e Herodes benne' ca' xelútię' bidu biu ca'

¹⁶ Gate gúquebe'e Herodes gulezí xę benne' sina ca' lę', na' bzrá'ale'e, ne
gunná bé'ene' benne' ca' xelútię' xúgute bi biu dxé'enedau', ca zrintę bidu ca'
ba zaj zua chup iza, bidu ca' zaj zrabe' xęzre Belén, ne bidu ca' zaj zrabe'
lu xęzredu ca' zaj naxechaj na xęzre Belén na'. Caní bęn Herodes cáteze
buluzén benne' sina gula ca' lę' ca naca zra na' belelé'ene' belaj na'. ¹⁷ Ca'an
guca ca da bzuaj Jeremías, bėnnea' bchálaje' waláz cheę Dios ba guca zan' iza,
gunné':

¹⁸ Guca tu schaga lu xęzre Ramá.
Guca webezre, ne gulebezre xache'.

Raquel na' dxebézre'e cheę bi cheę' ca'.

Québequeze dxaca lazre' xexaca zrene'
lawe' da ba gulate bi cheę' ca'.

¹⁹ Ca gudé gute Herodes, na' tu gubáz cheę xabáa, gubáz cheę Xránadxu ble'e
lawe' José lu bchigala naga zuę' Egipto, na' guzre' lę':

²⁰ —Guxásache. Beche'e bidu chiu' nigá, ne xrnabe'. Bexíaj lu xęzr la xu
Israel, lawe' da ba gulate benne' ca' gulaca lazre' xelútię' bidu nigá.

²¹ Nadxa guxasa José, na' beche'e bidu na', ne xrnabe', na' belexezrine'
lu xęzr la xu Israel. ²² Ca guneze José dxenná bea Arquelao naga nababa
Judea waláz cheę xre', Herodes na', na' bzrebe José xexíaje' ga na'. Nadxa
bexíaje' naga nababa Galilea ca da ba guzre gubáz cheę xabáa lę' lu bchigala.

²³ Ca bezrine' na', na' bexíaje' cheajxezúe' lu xezre Nazaret. Caní guca ca da gulenná benne' ca' buluchálaje' waláz chee Dios, gulenné' Jesús nigá si le' benne' Nazaret.

3

Juan dxegu'e lban le'e xixre' lawe' lataj
(Mr. 1.1-8; Lc. 3.1-9, 15-17; Jn. 1.19-28)

¹ Ca lu zra ca' bla' Juan, bénnea' bchué' bénneache nisa, dxegu'e lban le'e xixre' lawe' lataj naga nababa Judea. ² Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

³ Juan nigá naque' bénnea' bchalaj Isaías chee'. Isaías bchálaje' waláz chee Dios gate bzuaje' caní:

Dxene chí'i benne' dxebezre xe'e le'e xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Le' naga té'e'.

⁴ Zra lana Juan nigá nune na xicha zra camello, ne bazxu dxu'a le'e chee' naca na xide, na' dxawe' biche xuaj, ne bzrína'dau' chee' bézudau'. ⁵ Belezrín benne' belenne' ca da dxuchalaj Juan, benne' zá'aque' xezre Jerusalén, ne benne' chee' xúgute' xezre ca' zaj nababa Judea, ne benne' zá'aque' xézredu ca' zaj nniita gáguze xegu Jordán. ⁶ Ca gulexrúalepe' dul-la chee', Juan nigá bchué' benne' ca' nisa lu xegu Jordán.

⁷ Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnna'je da ba xa' da za'? ⁸ Le gun da xrlátaje da xelunna bea na ba bebí'i lázrele. ⁹ Quebe guéquele lale, dxennale le'eze: “Nalatu' lawe' da nácantu' xrtia Abraham.” Neda' dxapa' le'e: Dios waca xexuné' xiaj caní zri'ine xrtia Abraham. ¹⁰ Le'e nácale ca xaga ca'. Xia waga bache nalá na chee' chugu na xaga ca', na' xúgute' xaga ca' quebe dxelebia na da zixre chawe' welechugue na, na' xelezxe na lu xi'. ¹¹ Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' gune' ca da zéaje' xel-la' dxedxúa nisa, guzúe' le'e Dios Be' Lá'azxa, ne xi' chee'. Benne' nigá nácadxe' blau ca neda', na' quebe zaca' cuéajza' zrele' xu'u ní'e. ¹² Cá'anqueze nácale ca zrua' xtila. Benne' nigá ba nu'e da dxun be', cuéaje' xrte zrua' xtila na', na' xebéaje' chala'ala xizre chee' na, na' xuzrá chawe' zrua' xtila na' lu da'a chee' na, san guzezxe' xizre na' lu xi' da quebe xexula na.

Da guca gate gudxúa Jesús nisa
(Mr. 1.9-11; Lc. 3.21-22)

¹³ Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee' guchúe' Le' nisa. ¹⁴ Nédxute' Juan quebe guca lazre', na' dxé'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

¹⁵ Jesús guzre' le':

—Be' lataj gaca caní na'a. Dxun na ba xen gundxu xúgute' da xrlátaje lau Dios.

Nadxa Juan bene' ca'. ¹⁶ Gate bexuzre gudxúa Jesús nisa, na' la bxálajte xabáa, na' ble'e Juan Be' Lá'azxa chee' Dios dxétaje' ca tu gugu chíchidau', zeajsúaba' lawe Jesús. ¹⁷ Nadxa ben tu chí'i lu be', gunné':

—Benne' nigá naque' Zrí'inequeza' nazrí'ite' lazra'. Dxezaca ba lázre'lena' Le'.

4

*Dxaca lazre' da xriwe' gun na baga Jesús zria
(Mr. 1.12-13; Lc. 4.1-13)*

¹ Nadxa Be' Lá'azxa chee Dios la guché'te' Jesús le'e xixre' lawe' lataj naga gúe lazre' da xriwe' gun zr'éaje na Le'. ² Quebe bi gudagu Jesús chua zra chua xêla, na' ca gudé na' guduné'. ³ Nadxa da xriwe' bzrin na naga zua Jesús chee gun zr'éaje na Le', na' dxé na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

⁴ Jesús bechebe':

—Lu xiche chee Dios dxenné': "Quebe gaca ban nu benne' gawé' xétaze, san nen xúgute dizra' chee Dios gaca bane'."

⁵ Nadxa da xriwe' guché na Jesús lu xezre lá'azxa Jerusalén, na' bzua na Le' xíchajte xudau', ⁶ na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee Dios:

Dios nna bé'ené' gubáz chee xabáa chee' ca'
chee xelácaléne' Lue'.

Welexechise' Lue' nen ne'e
chee quebe gunu' zi' ni'u lu xiaj ca'.

⁷ Na' gunná Jesús:

—Cá'anqueze dxenná lu xiche chee Dios, dxé'e bénneache: "Quebe guchínenu' Xranu' Dios cáteze dxaca lazru'."

⁸ Nadxa da xriwe' guché na Le' tu lu xi'a sibe, na' ble'e na Le' ca naca xúgute cue' xezr la xu zaj nnita lu xezr la xu, ne ca naca xel-la' guni'a chee na. ⁹ Na' gunná da xriwe', dxé na Le':

—Xúgute da caní gunna' chiu' che guzú zribu' gucá'ana szrenu' neda'.

¹⁰ Nadxa Jesús guzre' na:

—Bexíaj, da xriwe', lawe' da dxenná Dios lu xiche chee', dxé'e bénneache: "Bca'ana szren Xranu' Dios, ne be lá'ana tuze Le'."

¹¹ Nadxa da xriwe' becuasa na lau Jesús, na' belezrín gubáz chee xabáa chee Dios, ne bulunézruje' da dxechine Jesús.

*Dxuzú lau Jesús dxuchálaje' xrtizra' Dios naga nababa Galilea
(Mr. 1.14-15; Lc. 4.14-15)*

¹² Gate ben Jesús xu'u Juan lizre xia, na' bezé'e zexíaje' naga nababa Galilea.

¹³ Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí. ¹⁴ Caní guca ca da bzuj Isaiás, benne' bchálaje' waláz chee Dios, gunné':

¹⁵ Lu xezr la xu chee Zabulón, ne chee Neftalí, naga zrua neza da zeaj na dxu'a nísadau', chalá'a naga dxalaj gubizra xechalá'a xegu Jordán. Naga nababa Galilea,

naga zaj zra' benne' quebe zaj naque' judío.

¹⁶ Bénneache zaj zra' lu da chul-la belelé'ene' tu da dxusaníle'e na, na' benne' zaj zra' naga xu'u zrul-la chee xel-la' gute ba bsaní' tu xi' naga zaj zre'e.

¹⁷ Ca lu zra na' guzú lau Jesús dxegu'e lban, dxenné':

—Le xebi'i lázrele, lawe' da ba zua gáguze zra nna bea Dios lu xezr la xu nigá.

*Jesús dxuláwizre' tapa benne' wezén bela**(Mr. 1.16-20; Lc. 5.1-11)*

¹⁸ Gate na' zeaj Jesús dxu'a nísadau' ga nababa Galilea, na' blé'ene' chupa benne'. Tué' le' Simón, ne zua xetú le' Pedro, na' xetúe' le' Andrés, biche Simón na'. Benne' caní zaj naque' benne' wezén bela, na' dxuluzale' xixruj bela chee' lu nisa. ¹⁹ Nadxa Jesús dxé'e benne' caní:

—Le gun neda' tuze, na' guna' le'e benne' gutúpale chia' bèneache ca dxunle dxezenle bela.

²⁰ La bulucá' anate' xixruj chee' ca', na' zjácálene' Jesús.

²¹ Xelátéduze gusá'aque', na' ble'e Jesús xechupa benne'. Tué' le' Jacobo, ne xetúe' le' Juan, biche Jacobo nigá. Zaj naque' zri'ine Zebedeo, ne zaj xu'e tu lu da dxedá lawe' nísadau' nen xre', dxelexún chawe' xixruj chee'. Jesús bláwizre' le', ²² na' la bulucá' anate' da dxedá lawe' nísadau' na', ne xre', na' zjácálene' Jesús.

*Jesús dxusédené' bèneache naga nababa Galilea**(Lc. 6.17-19)*

²³ Zeaj Jesús xúgute xezre zaj nababa Galilea, na' tu tu xezre ca' dxuzéajni'ine' bèneache lu xu'u ca' naga dxulucá'ana szren benne' judío ca' Dios. Na' dxequ'e lban ca nna bea Dios, ne dxexune' xúgute benne' ca' ca zaj naca xízrawe' cha chee'. ²⁴ Ca'an guca, xúgute benne' chee xezr la xu Siria belenne' ca da dxun Jesús, na' belezrine' lau Jesús, zaj naché'e benne' we' ca', benne' zaj xu'e xízrawe', ne benne' zaj zué' lu xel-la' dxudía, ne benne' zaj xu'e be' xriwe', ne benne' zaj xu'e chuna', ne benne' zaj naxrú'unie' bine, na' bexún Jesús xúgute benne' caní. ²⁵ Zjácále benne' zan Le', benne' zaj nababé' xezre ca' zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababé' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gubizra.

5*Lban da bchalaj Jesús tu lu xi'a*

¹ Gate ble'e Jesús xúgute benne' zan ca' zá'aque' naga zué', nadxa guluéne' tu lu xi'a, ne gudxé'e na'. Nadxa benne' ca' dxuséde Jesús beledube' cuité'.

² Nadxa guzú lau Jesús dxusédené' benne' ca'.

*Nu benne' naca chee' tu da ba neza**(Lc. 6.20-23)*

³ Gunná Jesús:

—Da ba neza zrenté naca na chee benne' ca' dxelexúnbe'e ca naca xel-la' dxexazrje chee' lau Dios. Benne' caní zaj naca chee' xelexú'e naga dxenná bea Dios xabáa.

⁴ 'Da ba neza zrenté naca na chee benne' ca' dxelelé'ele' zaj zué' lu da baxache' lawe' da zaj nabague' dul-la. Dios dxexúe zrenté' benne' caní.

⁵ 'Da ba neza zrenté naca na chee benne' zaj naque' zren lazre'. Benne' caní xelezí'e chee' xezr la xu da nachebe lazre' Dios gunézruje' benne' caní.

⁶ 'Da ba neza zrenté naca na chee benne' du lazre' dxelaca lazre' xelune' da naca xrlátaje lau Dios. Dios gácaléne' benne' caní.

⁷ 'Da ba neza zrenté naca na chee benne' dxelexexache lazre' benne' xula. Dios wexache lazre' benne' caní.

⁸ 'Da ba neza zrenté naca na chee benne' ca' zaj xu'u xichaj lázrdawe' da xrlátaje. Benne' caní welelé'ene' Dios.

⁹ 'Da ba neza zrente naca na chee benne' dxelebeza zri lazre' nen bènneache. Dios guzúe' le' ca bi cheéqueze'.

¹⁰ 'Da ba neza zrente naca na chee benne' dxeledé' xel-la' zi' lu na' benne' ca' dxeluné' chee' da caléla cate' dxeluné' da xrlátaje. Benne' caní zaj naca chee' xelxú'e naga dxenná bea Dios xabáa.

¹¹ 'Da ba neza zrente naca na chee le'e che benne' dxelenné' schanni' chee le, ne dxeluné' chee le da caléla, ne dxelenné' chee le xúgute dizra' wen lazre' lawe' da nácale chia' neda'. ¹² Le be, ne le kezaca ba lázrele lawe' da wazile tu da zrente da gunna Dios le'e xabáa. Caní gaca na lawe' da cá' anqueze caní guláu zi' xuzre' benne' ca' buluchálaje' waláz chee Dios, benne' ca' gulezré'e nédxudxa ca le'e.

Nácale ca zede', ne ca tu xi' lu xezr la xu

(Mr. 9.50; Lc. 14.34-35)

¹³ Na' gunná Jesús:

—Le'e nácale ca zede' chee bènneache lu xezr la xu nigá. Che zede' nigá xenite xel-la' sna'a chee na, ¿ájazra gácalele bènneache ca? Québedxa gaca guchínedxu zede' caní. ¡Chú'unadxu na, na' xululéaj bènneache le na!

¹⁴ 'Le'e nácale ca tu xi' chee bènneache zaj zre'e xezr la xu. Tu xezre da zua na tu lu xi'a, quebe gáchequeze na. ¹⁵ Gate guzálajdxu tu xi', quebe gudúsedxu na. Guzúadxu na sibe naga gusení na chee xelelé'e xúgute benne' zaj zre'e lu xu'u. ¹⁶ Cá'anqueze le gun le'e. Le güe lataj gusení xi' da nácale lau bènneache ca' chee xelelé'eng' ca da xrlátaje da dxunle. Nadxa xelúe lá'ané' Xrale Dios zue' xabáa.

Da bchalaj Jesús ca naca chee da nadxiruj bea Dios

¹⁷ Gunná Jesús:

—Quebe dxal-la' guéquele le'e za'a neda' chee cua' ca naca da bdxiruj be'e Moisés, ne ca naca dizra' da buluchalaj benne' ca' buluchálaje' waláz chee Dios. Quebe za'a chee cua' na. Za'a chee gulé'eda' cáteze zéajé na. ¹⁸ Da li dxapa' le'e. Dxácaté zaj zua xabáa, ne xezr la xu nigá, quebe dúaqueze tu dizra', ne tu da da' lu da nadxiruj bea na nigá ca zrindxa zra gaca xúgute ca da dxal-la' gaca na. ¹⁹ Chee le na', che tu benne' guzúe' chalá'ala bítetézla da nigá da bdxiruj bea Dios, láqueze naca na tu da dauze, ne che guzéajni'ine' bènneache chee xelúnqueze' ca', benne' nigá xegá'ané' cá'aze naga dxenná bea Dios xabáa. Bènnea' guzúe' dizra' da nadxiruj bea nigá, ne gulé'eng' bènneache chee xelúnqueze' ca', benne' nigá wegá'anaqueze' ba lá'ana naga dxenná bea Dios xabáa. ²⁰ Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'e da nadxiruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

Da bchalaj Jesús ca naca chee xel-la' dxezrá'a

(Lc. 12.57-59)

²¹ Na' gunná Jesús:

—Le'e ba bénele ca gulenná xrtiale gula ca': "Quebe gütele benne'," na "Núteteze benne' gutie' benne' waxíaje' chee cuía xi'e." ²² Neda' dxapa' le'e, núteteze benne' dxezré'e le sa' ljwezre' waxíaje' chee cuía xi'e. Na' bènnea' dxenné' schanni' chee le sa' ljwezre' waxíaje' lau benne' chee xu'u lawe' blau, na' xuludé' le' chee cuía xi'e. Bènnea' dxenné' chee le sa' ljwezre' tu dizra' sban, benne' nigá nácaqueze chee' chéaje' lu lataj ba xa'.

²³ 'Che gu'u lu xudau' tu da gunézruju' lau Dios, ne na' cheajsá lazru' chee tu da nunu' chee le sa' ljwezru', ²⁴ bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee bi gunézruju' lau Dios.

²⁵ 'Che zua nu benne' dxebagu' chee', na' che'e' lue' lau benne' guchi'e' chiu', bexaca chawe' nen le' la neza na', chee quebe gudé'e' lue' lau bènnea' dxuchi'e' da dxaca. Che quebe gunu' caní, nadxa benne' dxuchi'e' da dxaca na' gudé'e' lue' lu na' benne' dxuséxuje' bènne' ca' lizre xia, na' xelegú'e' lue' lizre xia na'. ²⁶ Da li dxapa' lue'. Quebe xedxúaju' na' che quebe quízruju' xúgutę da dxebagu' chee benne' na'.

Da bchalaj Jesús ca naca chee benne' dxíchaję xrba chee xel-la' nuchaga na'

²⁷ Na' gunná Jesús:

—Le'e bache bénquezle ca gulenné' nédxutę: “Quebe gunu' dul-la da dxichaj na xrba chee xel-la' nuchaga na'.” ²⁸ Neda' dxapa' le'e, núteteze benne' ne'e tu nu'ula, ne sa lazre' le', báchequeze bene' dul-la nen nu'ula na' lu xichaj lázrdawe'.

²⁹ 'Che xiaj lau' da zua xabęla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee bęl-la' dxen chiu' quézcala chu'u lataj ba xa' dutę bęl-la' dxen chiu'. ³⁰ Che na'u da zua xabęla chiu' dxuzúa na lue' lu dul-la, guchugu na, ne gudxú'una na zítu'. Nácadxa chawe' nite late' da naca na chee bęl-la' dxen chiu', quézcala chu'u lataj ba xa' dutę bęl-la' dxen chiu'.

Jesús dxusédenę ca naca chee benne' dxexelę'e' nen zru'ulę'
(Mt. 19.9; Mr. 10.11-12; Lc. 16.18)

³¹ Na' gunná Jesús:

—Cá'anqueze gulenné' nédxutę: “Núteteze benne' dxexelę'e' nen zru'ulę', dxal-la' gunézruje' nu'ula na' tu xiche da dxulé'e' na belexelę'e'.” ³² Neda' dxapa' le'e, che tu benne' dxexelę'e' nen zru'ulę', na' nu'ula nigá quebe guzúalęne' benne' xula, benne' chee nu'ula nigá dxuzúe' le' lu dul-la chee da dxichaj na xrba chee xel-la' nuchaga na' che tu benne' biu xula guchaga ne'e nen nu'ula na' bsan benne' chee' le'. Cá'anqueze le' dxune' dul-la nen nu'ula na'.

Jesús dxusédenę ca naca chee benne' dxucá'ana lię xrtizre'

³³ Na' gunná Jesús:

—Cá'anqueze ba bénele ca gulenná benne' gula ca', gulenné': “Quebe gucá'anu' cá'aze ca da nachębe lazru' nen dizra' bca'ana liu' lau Xránadxu Dios.” ³⁴ Neda' dxapa' le'e: Quebe dxal-la' guzétjale xabáa chee guca'ana lile dizra' cheęle, lawe' da naca na naga dxe' Dios, ³⁵ ne quebe guzétjale xezr la xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xezre chee Benne' Blau naque' Wenná Bea. ³⁶ Quebe guzétjale xíchajle chee guca'ana lile dizra' cheęle lawe' da quebe séquele gunle da chiche, ne da gasaj netú xicha xíchajle. ³⁷ Le nnaze: “Awe',” u le nnaze: “Cabí,” lawe' da gate tu benne' dxudadxę' chee' chee da nigá, naca na chee da xriwe'.

Dxulé'e Jesús ca naca chee nu benne' dxexebéaj lazre'
(Lc. 6.29-30)

³⁸ Na' gunná Jesús:

—Le'e ba bénele ca da gulenné' nédxutę: “Che tu benne' cuéaje' xiaj lau', cá'anqueze gunu' cheę', ne che cuéaje' lazxu', cá'anqueze gunu' cheę'.” ³⁹ Neda' dxapa' le'e, quebe til-lálele nu benne', san che tu benne' gu'e chala'a xragu', be' lataj gu'e xechalá'a xragu'. ⁴⁰ Che tu benne' gaca xúzre'leņę' lue', ne dxaca lazre' cuę' zrau', be' lataj xúate' xicha chiu'. ⁴¹ Che dxulusebáguę' lue' gu'u xua cheę' tu cuéndau', bia na chupa cuenla. ⁴² Che nüteteze benne' bi dxenabe' chiu', bnézruje' na, ne quebe guzagu' ca gunézruju' cheę' nu benne' bi dxenabe' chite.

Jesús dxusédenę' ca dxal-la' zri'idxu benne' ca' dxeledábage' dxi'u
(Lc. 6.27-28, 32-36)

⁴³ Na' gunná Jesús:

—Cá'anqueze ba bénele ca da gulenné' nédxutę: “Bzri'i le sa' ljwezru', ne gucuide benne' dxedábage' lue'.” ⁴⁴ Neda' dxapa' le'e, le zri'i benne' ca' dxeledábage' le'e. Le naba gaca chawe' cheę benne' dxeleńné' cheęle. Le gun da chawe' cheę benne' dxelecuídenę' le'e. Le naba lau Dios gaca chawe' cheę benne' dxeleńné' schanni' cheęle ne dxelunę' cheęle da caleļa. ⁴⁵ Che gunle caní gácale bi cheęqueze Xrale zuę' xabáa, lawe' da dxun Le' dxusaní' gubizra naga zaj zra' benne' wen da caleļa ne naga zaj zra' benne' xrlátaje ca', ne dxusel-la' nisa xiuj lu xęzr la xu cheę benne' chawe' ca', ne lu xęzr la xu cheę benne' ca' dxelunę' da caleļa. ⁴⁶ Che nazrí'ile tuze benne' zaj nazrí'ine' le'e, źájazra na' dxezá lázrele quizruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'. ⁴⁷ Che le'e dxugápale diuzre tuze le sa' ljwézrele, źbizra da xrlátaje dxunle? Cá'anqueze dxelún benne' quebe zaj núnbe'e Dios. ⁴⁸ Le gaca benne' xrlátaje cáteze naca Xrale zuę' xabáa, naque' xrlátaje.

6

Dxulé'e Jesús ca naca da xrlátaje da dxelún bėnneache

¹ Caní gunná Jesús:

—Le guxúe xanne' cuínale cheę quebe gunle da naca cheę xel-la' benne' xudau' cheęle lau bėnneache cheę xeledé'ene' na. Che ca'an dxunle, na' Xrale Dios zuę' xabáa quėbequeze bi gunne' le'e. ² Cheę le' na', gate lue' dxacaleńu' benne' dxelexárzjeng', quebe guzennu' xúgutę bėnneache ca da dxunu', ca dxelún benne' ca' dxelunę' xrlátaje cůzreze la neza, ne lu xu'u naga dxulucá'ana szren benne' judío ca' Dios. Dxelunę' da caní cheę xeleńné' bėnneache xrlátaje cheę'. Da li dxapa' le'e, ba déqueze lazruj cheę'. ³ Gate lue' gunézruju' late' cheę benne' dxelexárzjeng', ben na luéze cheę quebe neze le sa' ljwezru'. ⁴ Ben da caní bagácheze, na' Xrau' Dios, Bėnnea' dxelé'ene' ca da dxunu' bagácheze, Le' gunne' lazruj chiu'.

Jesús dxusédenę' ca dxal-la' gundxu xel-la' dxuláwizra Dios
(Lc. 11.2-4)

⁵ Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxelunę' xrlátaje cůzreze. Dxeledánene' dxelunę' xel-la' dxuláwizra Dios zaj zeze' lu xu'u naga dxulucá'ana szren benne' judío ca' Dios, ne la neza, cheę xeledé'e bėnneache da dxelunę'. Da li dxapa' le'e, ba déqueze lazruj cheę'. ⁶ Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu',

na' bláwizra Dios guchálajlenu' Xrau' Dios zúalene' lue' naga zu' tuzu'. Nadxa Xrau' Dios, Bénnea' dxelé'ene' ca da dxunu' bagácheze, Le' xuzri'e chiu'.

⁷ 'Gate dxuláwizru' Dios dxuchálajlenu' Le', quebe tuz ca da nneu' zánete lasa ca dxelún benne' ca' quebe zaj núnbe'e Dios. Dxeléquene' wen Dios chee' lawe' da dxelenné'le'e. ⁸ Quebe gunle ca dxelún benne' ca', lawe' da Xrale Dios ba nézquezne' ca da dxechinnele le'e nédxula ca za ná bale na. ⁹ Chee le' na', le guláwizra Dios nnale caní:

Xrantu' Dios, zu' xabáa,
gaca lá'azxaqueze Lau'.

¹⁰ Gudá nna be'u lu xezr la xu nigá.

Gaca lu xezr la xu nigá ca dxaca lazru' Lue',
cáteze dxaca xabáa.

¹¹ Benna netu' da gáguntu' na'a.

¹² Bnité lau cheentu' ca naca da calela da bentu',
ca netu' ba bnité launtu' chee benne' belune' cheentu'
da calela.

¹³ Quebe gu'u lataj nu gun zréaje netu',

2 san bselá netu' lu na' da xriwe'.

Naca chiú' gápaquezu' xel-la' dxenná bea,
ne xel-la' wáca,

ne da xabáa chadia chacanna. ¡Ca'an gaca na!

¹⁴ 'Che le'e gunite laule chee benne' belune' chee da calela, na' Xrale Dios zue' xabáa gunite lawe' chee le'e. ¹⁵ Che le'e quebe gunite laule chee benne' ca', na' Xrale Dios quebe gunite láuqueze' chee le'e ca naca dul-la da nabá gale.

Jesús dxusédené' ca dxal-la' gundxu gubasa

¹⁶ Na' gunná Jesús:

—Gate le'e dxunle gubasa, quebe guzúale baxache' laule ca dxelún benne' dxelune' xrlátaje cúzreze. Benne' caní dxelune' ca' chee xeelé'e bénneache le' dxelune' gubasa. Da li dxapa' le'e, ba déqueze lazruj chee benne' ca'.

¹⁷ Lue', gate dxunu' gubasa, bza xíchaju' chawe', ne gudibe lau', ¹⁸ chee quebe xeléquebe'e bénneache dxunu' gubasa. Tuze Xrau' Dios na', Bénnea' zúalene' lue' naga zu' tuzu', Le' dxennátequeze', na' gunne' da naca na chiu'.

Jesús dxusédené' chee da gunní'a chee xabáa

(Lc. 12.33-34)

¹⁹ Na' gunná Jesús:

—Quebe gutúpale da gunní'a lu xezr la xu nigá, naga guteba' na, ne da ca' dxelebia xi na, na' xelú'u gubán ne xelebane' na. ²⁰ Le'e, le gun da xrlátaje, da gaca na ca guzrá cháwele da gunní'a xabáa, naga quebe guteba' na, ne da ca' quebe bi xelege na, na' québequeze xelú'u gubán chee xelege na. ²¹ Naga nuzrale da gunní'a chee, na' zúaqueze lázrdaule.

Jesús dxusédené' chee tu xi' da xú'udxu

(Lc. 11.34-36)

²² Na' gunná Jesús:

—Xiaj laule zaj naca na ca tu xi' chee bel-la' dxen chee. Che xiaj laule zaj naca na chawe', duté ca naca bel-la' dxen chee naxaní'. ²³ Che xiaj laule quebe zaj naca na chawe', duté ca naca bel-la' dxen chee nachul-la na. Cá'anqueze che xi' da xu'ule xexaca na tu da chul-la, chúl-lalé'edxa súaquezle.

Jesús dxusédenę' cheę Dios, ne cheę da gunnı́'a
(Lc. 16.13)

²⁴ Na' gunná Jesús:

—Netú benne' quebe séquene' guzúa cuine' lu na' chupa xrane', lawe' da wazré'e tu xrane' ne wazrí'ine' xetúe', u wéquene' ba lá'ana tu xrane' na' xetúe' guzúe' chalá'ala. Quebe séquele guzúa cuinle lu na' Dios, ne lu na' da gunnı́'a.

Jesús dxusédenę' ca dxun Dios, dxuxúe' xúgute bi cheę' ca'
(Lc. 12.22-31)

²⁵ Na' gunná Jesús:

—Cheę le na' dxapa' le'e, quebe cue'le gunne xue ga sa' da gágule da xı́'ajle cheę gaca banle, ne ga sa' zra lánale da gácule. Zácadxa xel-la' nabán cheęle ca da dxágule, ne zácadxa bel-la' dxen cheęle ca zra lánale. ²⁶ Le nna'xque bxinnedu ca' dxeledaba' lu be'. Quebe dxelázaba'. Quebe dxelélápaba'. Quebe ga dxuluxuzrá cháweba' na. Xrale Dios zuę' xabáa dxunézuje' da dxeláguba'. Zácadxale le'e ca bxinnedu ca'. ²⁷ ¿Nuzra benne' ládujla le'e gaca gusetunna cuine' xate' lawe' da dxe'e gunne xue?

²⁸ ¿Bizr cheę na' dxe'le le'e gunne xue cheę zra lánale? Le nna'xque ca dxelęgula xıaj ca' zaj ze le'e xıxre'. Quebe dxelún na zrin, ne quebe dxelache na du. ²⁹ Dxapa' le'e, Salomón benne' wenná bea na' quebe gucuę' ca da xrtan cheę xıaj canı́, na' le' gúta'le'e cheę' da gunnı́'a. ³⁰ Che Dios dxudxęne' xrtánle'e xıaj canı́ da ca' zaj zua na na'a le'e xıxre', na' wxre xelexze na lu xı', quegá gundxę' da chawe' cheęle le'e, benne' québetę ca dxeajlı' lazre'. ³¹ Cheę le na', quebe cué'tecale gunne xue, nnale: “¿Ga sa' da gágudxu? ¿Ga sa' da xı́'ajdxu? ¿Ga sa' da gácudxu?” ³² Cheę da canı́ zaj dxe' gunne xue benne' quebe zaj núnbe'e Dios, san le'e, zua tu Xrale xabáa ba nézquezne' ca naca xúgute da dxechınnele. ³³ Zria laudxa cuele gunne xue cheę nna bea Dios lu xıchaj lázrdaule, ne cheę gunle da xrlátaje da xezaca ba lazre' Dios, na' sile xúgute da ca' dxechınnele. ³⁴ Quebe cuele gunne xue na'a da naca na cheę wxre, lawe' da wxre ca'an gáta'queze da cuele gunne xue. Tu zra tu zra dęqueze da guchaga laudxu.

7

Jesús dxusédenę' cheę benne' dxuchi'e da dxun le sa' lıwızreę'
(Lc. 6.37-38, 41-42)

¹ Na' gunná Jesús:

—Quebe guchı́'ale da dxelún le sa' lıwızrele cheę quebe guchi'a Dios canı́ cheęle le'e. ² Le' guchi'e cheęle le'e cáteze dxunle le'e cheę le sa' lıwızrele, ne cáteze dxunle le'e cheę le sa' lıwızrele, ca'an gun Dios nen le'e. ³ ¿Bizr cheę na' dxená'u bębedau' da xu'u xıaj lau le sa' lıwızru', ne quebe dxená'u da zrentę da xu'u na xıaj láuquezu' lue'? ⁴ ¿Ajazra gunu' xu'u le sa' lıwızru': “Benna lataj xebéaja' bębedau' da xu'u xıaj lau”, che da zrendxa xu'u xıaj láuquezu' lue'? ⁵ Lue', benne' dxun xrlátaje cüzreze. Bębéaj nedxu da zrentę da xu'u xıaj láuquezu', na' gaca le'enu' cháwedau' xebéaju' bębedau' da xu'u xıaj lau le sa' lıwızru'.

⁶ ¿Quebe gunézuje' da naca lá'azxa cheę benne' dxelunę' ca dxelún becu' snia, checa xelexéchaję', ne xuluzúzruę' le'e. Quebe guzúale da zaca cheęle lau benne' dxelunę' ca dxelún cuche, dxuluchuchuj dxululéajba' da dxugágule-ba'.

Dxuchalaj Jesús ca dxal-la' nábaxdu, ne xexílajdxu, ne nneđxdu dxu'a dxa xu'u
(Lc. 11.9-13; 6.31)

⁷ Na' gunná Jesús:

—Le naba, na' Dios gunne' na cheeġe. Le xilaj na, na' xezrélele na. Le nne dxu'a dxa xu'u, na' sáluje' cheeġe. ⁸ Le gun caní lawe' da benne' bi dxenabe', dxezi'e na. Benne' bi dxexílaje', dxeajxraque' na, na' benne' dxenné' dxu'a dxa xu'u, zua nu benne' sáluje' chee'.

⁹ 'Netule le'e quebe gunézruje zrí'inele tu xiaj che lebe' dxenábabe' le'e tu xeta. ¹⁰ Quebe gunézruje zrí'inele tu beġa' snia che lebe' dxenábabe' le'e tu bela. ¹¹ Che le'e, benne' wen da caleġa, nézele gunézruje zrí'inele da naca na chawe', da cháwedxa gunna Xrale Dios zua xabáa, gunne' da chawe' chee benne' bi dxenábene' Le'.

¹² 'Le gun chee' le sa' l'jwézrele ca dxaca lázrele le'e xelún lebe' cheeġe. Da nigá naca da nadxixruj bea na Moisés, ne da dxenná na lu xiche naga naxúaj da glenná benne' ca' buluchálaje' waláz chee' Dios.

Jesús dxusédene' chee' dxa xu'u lechide'
(Lc. 13.24)

¹³ Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zante zjaque' na'. ¹⁴ Dxa xu'u lechide', ne neza lase zaj naca naga zjaca benne' xelezi'e xel-la' nabán da zeajlí canna, na' bábaze benne' dxelexezrelne' na.

Naca bea tu xaga ne' chee' da zixre dxebía na
(Lc. 6.43-44)

¹⁵ Na' gunná Jesús:

—Le guxúe cuínale chee' benne' wen lazre' ca', benne' dxelenné' zaj naque' benne' dxuluchálaje' waláz chee' Dios. Benne' caní zá'aque' naga zrale le'e, zaj nun cuine' ca tu benne' dxexruj lazre' ca naca tu zríla'dau', san lu xichaj lázrdawe' zaj naque' snia ca tu becu' xi'a. ¹⁶ Le'e xúnbeale le' ne chee' da dxelune'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga hígo quebe xuchíbedxu na lu xeche' ga'. ¹⁷ Ca'an naca, xúgute' xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'. ¹⁸ Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'. ¹⁹ Xúgute' xaga zrinnaj welechugue na, na' xelezxe na lu xi'. ²⁰ Ca'an naca, le'e xúnbeale benne' ca' ne chee' da ca' dxelune'.

Quegá xúgute' benne' xelu'e naga dxenná bea Dios xabáa
(Lc. 13.25-27)

²¹ Na' gunná Jesús:

—Quebe xelu'e naga dxenná bea Dios xabáa xugute' benne' ca' dxelé'e neda': "Xrana', Xrana'." Welú'u tuze benne' ca' dxelune' ca da dxaca lazre' Dios zue' xabáa. ²² Ca zrin zra na', benne' zante xelé'e neda': "Xránantu', Xránantu', netu' bchálajntu' ne chee' Lau' Lue', ne bchímentu' Lau' bebéajntu' be' xriwe' ca', ne nen Lau' Lue' b'énle'entu' xel-la' waca ca' chee' xabáa." ²³ Nadxa neda' xápaqueza' benne' ca': "Quebe núnbe'a le'e. Le cuasa cuita' neda', le'e, ba benle da caleġa."

Jesús dxusédene' chee' chupa lane xu'u
(Lc. 6.47-49; Mr. 1.22)

²⁴ Na' gunná Jesús:

—Bénnea' dxenne' chia', ne dxuné' ca da dxennía', naque' ca tu benne' naxéajni'iqueze', benne' bene' tu lizre' lu xiaj xre. ²⁵ Guca xiuj, na' bdxuaj guba'u, ne guxasa be' bdunu' chee xuluzría xi na xu'u na', san quebe guzré'e na lawe' da xu'u lane na lu xiaj xre. ²⁶ Bénnea' quebe dxuzé' nague' chia', ne quebe dxuné' ca da dxennía', naque' ca tu benne' xala, benne' bene' tu lizre' lu xu dxeze. ²⁷ Guca xiuj, na' bdxuaj guba'u ne guxasa be' bdunu' chee xuluzría xi na xu'u na', na' chadite guzré'e na, ne guzria xite na.

²⁸ Ca bexuzre bchalaj Jesús, na' belexebanne benne' ca' ca naca da bsédené', ²⁹ lawe' da dxusédené' benne' ca' ca tu benne' nape' xel-la' dxenná bea, ne quegá ca dxelún benne' ca' dxuluxuzájle' da nadxixruj bea Dios.

8

Dxexún Jesús tu benne' dxuzru lu xpele'

(Mr. 1.40-45; Lc. 5.12-16)

¹ Gate bexetaj Jesús lu xi'a na', benne' zante zjácálené' Le'. ² Na' bzrin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

³ Nadxa Jesús guxrúa ne'e bénnea'. Dxe'e le':

—Dxaca lazra'. Na'a dxexuna' lue'.

Ca gunné' caní, benne' we' na' bexácate' ca naca xízrawé' chee'. ⁴ Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxelé'e cuinu' lau bxruze, ne xeajnezruj guna' ca da dxenná bea lu da bdxixruj be'e Moisés, chee xeledé'e benne' ca' ba bexacu' na'a.

Dxexún Jesús bi wen zrin chee tu benne' dxenná be'e lu wedil-la

(Lc. 7.1-10)

⁵ Ca bexú'u Jesús lu xezre Capernaum, na' bzrin lawe' tu benne' Roma, benne' dxenná be'ene' benne' ca' dxjaque' wedil-la, na' guta' xuene' Le', ⁶ dxe'e Le':

—Xran, bi wen zrin chia' debe' lizra'. Naxrú'unebe' bine, ne dxezácale'ebe'.

⁷ Jesús dxe'e le':

—Wazá'a xexuna'-be'.

⁸ Benne' dxenná be'e na' gunné':

—Xran, quebe naca chia' chu'u lizra'. Cun gunneze, na' xexaca bi wen zrin chia'. ⁹ Caní waca gunu' lawe' da zua benne' dxenná bé'ene' neda', ne cá'aqueze neda' dxenná be'eda' benne' ca' dxjaque' wedil-la. Gate dxapa' tubá: “Guxíaj”, na' dxéajbe'. Na' gate dxapa' bi xula: “Gudá”, na' dxídabe'. Na' gate dxuchíneda' bi wen zrin chia' chee bi da gunbe', na' dxunbe' na.

¹⁰ Gate bene Jesús da nigá, bebánene', na' guzre' benne' ca' zjácálené' Le':

—Da li dxapa' le'e, ládujla benne' Israel quebe nu ne xezrelda', benne' dxéajle' chia' ca dxun benne' nigá. ¹¹ Neda' dxapa' le'e, zá'aca benne' zante chalá'a naga dxalaj gubizra, ne xechalá'ala naga dxebía gubizra, na' xeledé'e tu zren xelawe' nen Abraham, ne Isaac, ne Jacob naga dxenná bea Dios xabáa. ¹² Benne' ca' gucá'a zga'ale Dios chee xelu'e naga dxenná bea Le', guzale' benne' ca' lataj chul-la naga xebezeze', ne xeláguxa'ate' lazxe'.

¹³ Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácate' bi wen zrin chee'.

*Dxexún Jesús xrna zru'ule Pedro**(Mr. 1.29-31; Lc. 4.38-39)*

¹⁴ Guxíaj Jesús lizre Pedro, na' blé'eng' xrna zru'ule' de' lu da'a, xu'e da la.
¹⁵ Xeaíté' ne'e, na' bedxúaj da la da xu'e. Nadxa nu'ula na' guxase', ne guzú lawe' dxusení'e da xelagu benne' ca'.

*Dxexún Jesús benne' zantę benne' we'**(Mr. 1.32-34; Lc. 4.40-41)*

¹⁶ Ca guzría gubizra, na' belezrín benne' zantę lau Jesús, zaj naché'e benne' zaj xu'e be' xriwe' ca'. Nen dízra'ze da gunná Jesús, bebéaje' be' xriwe' ca', ne bexuné' xúgutę benne' we' ca'. ¹⁷ Da nigá guca na ca da gunná Isaías, benne' bhálaje' waláz cheę Dios, gunné': "Le' bequé'e xízrawe' ca' da nápadxu, ne gubague' ca da dxezácadxu."

*Dxelaca lazre' benne' chjácęne' Jesús**(Lc. 9.57-62)*

¹⁸ Gate na' ble'e Jesús benne' zantę zaj naxéchaje' Le', na' guzre' benne' ca' dxusédene' gulelague' xechalá'a nísadau' tu lu da dxedá lawe' nisa. ¹⁹ Na' bzrin lau Jesús tu benne' dxuxuzájle'e da bdxixrux be'e Dios, na' dxę'e Le':
 —Benne' Wesede, dxaca lazra' sálęna' Lue' gáteteze chéaju'.

²⁰ Na' Jesús guzre' le':

—Beza' zaj zua bluj cheęba', na' bxinne zaj zria xrú'uneba', san neda', Benne' Gulje' Bénneache, ne naga xrua xíchaja' quebe ga zua.

²¹ Bzrin xetú benne' naque' benne' ba bsédequeze Jesús, na' guzre' Le':

—Xran, benna neda' lataj xexá'a nedxu cheę cheajxecacha' xra'.

²² Nadxa Jesús guzre' le':

—Gudálen neda'. Be' lataj benne' gate ca' xulucache ljwezre'.

*Dxebeque zri Jesús be' bdunu', ne xeaixruza cheę nísadau'**(Mr. 4.35-41; Lc. 8.22-25)*

²³ Nadxa guxú'u Jesús lu da dxedá lawe' nísadau', na' benne' ca' dxusédene' belune' Le' tu zren. ²⁴ Na' guzú lau dxaca tu be' bdunu' lawe' nísadau', na' xeaixruza cheę nísadau' guxú'u na lu da dxedá lawe' nísadau' na', dxácate dxase Jesús. ²⁵ Nadxa benne' ca' dxusédene' bulusebane' Le', na' dxelé'e Le':
 —Xránantu'. Bselá netu'. Ba dxázentu' lu nisa.

²⁶ Jesús guzre' le':

—¿Bizr cheę na' dxezrébele'ele? Nácale benne' látęga dxelejli lázre' Dios.

Nadxa guxasa Jesús. Gudil-le' be' bdunu', ne nísadau', na' la belebé zrite' na.

²⁷ Benne' ca' belexebánęne', gulenné':

—¿Núzraqueze benne' nigá? Dxuluzúa be', ne nísadau' dizra' cheę'.

*Benne' Gadara zaj xu'e be' xriwe'**(Mr. 5.1-20; Lc. 8.26-39)*

²⁸ Gate bezrín Jesús xechalá'a nísadau' na' lu xęzr la xu cheę benne' Gadara, na' chupa benne' biu belexedxúaje' lu bluj cheę benne' gate, na' belezrine' lau Jesús. Dxúpatę benne' ca' zaj xu'e be' xriwe', ne zaj naque' benne' sniále'e, na' netú benne' quebe dxexázrene' xedé'e la neza na'. ²⁹ Na' gulezú lawe' dxelebézrexe'e. Dxelenné':

—¿Bizr cheę na' za'u naga zúantu', Jesús, Zri'ine Dios? ¿Za'u nigá cheę gusaca zi'u netu', ne quebe ne zrin zra?

³⁰ Tu chi na' zra tu cue' cuche dxeláguba'. ³¹ Be' xriwe' ca' gulata' xue na Jesús, gulenná na:

—Che Lue' xebéaju' netu' nigá, benna lataj cheajchú'untu' lu cuche ca'.

³² Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgute' cuche ca' belelázruba' tu dxu'a xi'a zren, na' xeajlecházeba' lu nísadau' naga gulázeba' nisa, na' guláteba'.

³³ Benne' ca' buluxúe'-ba' belezrebe', na' besá'aca chégüe', ne belexezrine' lu xezre. Buluchálaje' ca' guca xúgute' da caní, ne ca' guca chee benne' ca', belexedxúaj be' xriwe' zaj xu'e'. ³⁴ Nadxa xúgute' benne' zaj zre'e' lu xezre na' beledxúaje', ne belezrine' naga zua Jesús. Na' ca' belelé'eng' Le', gulata' xuene' Le' xezé'e' lu xezr la xu chee'.

9

Dxexún Jesús tu benne' zaj zua zri ni'a ne'e

(Mr. 2.1-12; Lc. 5.17-26)

¹ Nadxa Jesús guxú'e' tu lu da dxedá lawe' nísadau', na' gulague' xechalá'a nísadau', na' bezrine' lázrequeze'. ² Na' bedajlegu'e' tu benne' biu lau Le', zaj zua zri ni'a ne'e, zaj naxrúe' benne' na' tu lu ta'a blaga'. Gate ble'e Jesús ca' dxelájle'e' chee', na' gunné', dxé'e' benne' we':

—Ben dipa lazru', zrí'ina'dau'. Dul-la chiu' dxunite lawa'.

³ Nadxa bal-la benne' dxuluxuzájle'e' da nadxiruj bea Dios gulenné' lu xichaj lázrdawe': "Benne' nigá dxucá'ana dítajé' Dios nen xrtizre'." ⁴ Lawe' da neze Jesús ca' gulenné' lu xichaj lázrdawe', na' dxé'e' benne' ca', gunné':

—¿Bizr chee' na' dxennale caní lu xichaj lázrdaule? ⁵ ¿Bízrala da quebe nácadxa stebe guna? ¿Nnia': "Dul-la chiu' ba bnite lawa'", u che nnia': "Bexasa, guzá?" ⁶ Chee' le' na' gulé'eda' le'e' neda', Benne' Gulje' Bénneache, napa' xel-la' dxenná bea lu xezr la xu nigá gunite lawa' dul-la.

Nadxa dxé'e' benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

⁷ Bénnea' zaj zua zri ni'a ne'e bexase', na' xezíajte' lizre'. ⁸ Gate belelé'e' bénneache da nigá, na' belezrebe', ne belúe lá'ané' Dios lawe' ba bnézruje' xel-la' waca caní chee' bénneache.

Jesús dxuláwizre' Mateo

(Mr. 2.13-17; Lc. 5.27-32)

⁹ Ca bezá Jesús na', na' blé'eng' tu benne' biu le' Mateo, dxé'e' lataj naga dxuchízruje' waláz chee' xezre Roma, na' dxé'e' le', gunné':

6 —Ben neda' tuze.

Nadxa Mateo nigá guxase' zéajlene' Jesús.

¹⁰ Gate na' dxé' Jesús dxawe' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawe' cuita Jesús, ne benne' ca' dxusédené'. ¹¹ Benne' xudau' fariseo ca', gate belelé'eng' da nigá, dxelé'e' benne' ca' dxusede Jesús, gulenné':

—¿Bizr chee' na' Benne' dxusédené' le'e' dxágulene' benne' wechizruj ca', ne benne' wen da zrinnaj ca'?

¹² Jesús benne' da nigá, na' dxé'e' benne' ca', gunné':

—Quebe dxelechine benne' chawe' nu benne' dxexune' bénneache. Benne' we' dxelechínene' le'. ¹³ Le chjaca, le cheajsede ca da dxenná da naxúaj na lu xiche chee' Dios, dxenné': "Neda' dxaca lazra' xexache lázrele le sa' ljwézrele,

quegá gútele be xixre'du ca' lu cugu chia'." Bla' neda', quegá chee guláwizra' benne' xrlátaje. Dxuláwizra' benne' dul-la chee xelexebí'i lazre'.

Jesús dxusédene' ca naca chee gubasa

(Mr. 2.18-22; Lc. 5.33-39)

¹⁴ Nadxa belezrín lau Jesús benne' ca' dxeledálenē' Juan, bēnnea' dxuchúē' bēnneache nisa, na' gulenábene' Le':

—¿Bizr chee na' quebe dxelún gubasa benne' dxusédenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

¹⁵ Na' Jesús dxē'e benne' ca', gunné':

—¿Ájala chee na' xelezúa ba xácheze benne' zaj zuē' laní chee wechaga na' dxácatē zua benne' wechaga na' nen le'? Wazrín zra gate dua benne' wechaga na'. Nadxa xelúnqueze' gubasa.

¹⁶ 'Quegá nu dxudá tu ladxe' cube le'e tu zra lánadxu gula, lawe' da gate cheajxdé' da cube na', ne xrube xu na da gula na', na' dxézadxa da gula na'. ¹⁷ Cá'anqueze quebe nu benne' que'e xrise uva wal-la cube lu bzude xide gula lawe' da che ca'an guné', gate cue' chí'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Chee le' na' dxal-la' ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpatē na.

Bchalaj Jesús da caní ca naca chee benne' ca' dxelezí' lu ne'e xrtizre'.

Dxexún Jesús bi nu'ula chee Jairo, ne nu'ula', xeajtē'e zra lana Jesús

(Mr. 5.21-43; Lc. 8.40-56)

¹⁸ Dxácatē na' dxuchalaj Jesús da nigá, na' bzrin tu benne' xíchaje chee benne' judío ca', na' bzu zribē' lau Jesús, dxenné':

—Bi nu'ula chia' za gútebe'. Che Lue' xidu' ne guzē' na'u lebe', wexaca banbe'.

¹⁹ Na' guxasa Jesús, guxíajlenē' le' nen benne' ca' dxusédene'. ²⁰ Nadxa bzrin tu nu'ula we' cúzrula Jesús, ba naca chazrinnu iza dxé'ene' tu we' dxaque dxen, na' xeajtē'e zra lana Jesús. ²¹ Dxenné' lu xichaj lázrdawē': "Che cheajtaza' zra lanē', na' xexaca'."

²² Jesús guxéchaje', guné'e nu'ula', na' dxē'e le':

—Ben dipa lazru', zrína'dau'. Bache bexacu' lawe' da dxéajle'u chia'.

La bexácatē nu'ula na'.

²³ Gate na' bzrin Jesús lizre benne' xíchaje chee benne' judío ca', na' blé'ene' zaj zra' benne' wil-la xulucache' bi nu'ula na', ne benne' zaj zre'e dxelunē' zralaj. ²⁴ Gunná Jesús, dxē'e benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrizre' chee'. ²⁵ Gudé bebéaje' benne' ca', na' guxú'u Jesús, ne bēxrue' na' bi nu'ula na', na' guxásabe'. ²⁶ Du ca naca xezre ca' bzriluj dizra' chee da ben Jesús.

Dxexún Jesús chupa benne' la chul-la

²⁷ Ca bedxúaj Jesús na', na' chupa benne' xjaque' cuzru Le', dxelenné' zizraj:

—Bexache lazre' netu', Lue', Zri'ine David.

²⁸ Ca guxú'u Jesús lu xu'u naga zúaqueze', na' benne' la chul-la caní gulebigue' lau Le', na' Jesús guzre' benne' ca':

—¿Dxéajlele wazéqueda' xexuna' le'e?

Na' gulé'e Le':

—Awe', Xran.

²⁹ Nadxa Jesús gudane' xiaj lau benne' ca', dxenné':

—Gaca cheeꞤ ca dxéajlele.

³⁰ Belexaca xiaj lawe'. Nadxa Jesús gunné xuene' benne' ca', gunné':

—Le guxúe xanne' chee quebe nu neze da nigá.

³¹ Gate beledxúaje', na' buluchálaje' du ca naca xezre ca' ca da ben Jesús chee'.

Dxexún Jesús tu benne' quebe dxaca nnie'

³² Ca bezá' Jesús nen benne' ca', na' belezrín bal-la benne' zaj nachéꞤ tu benne' biu quebe dxaca nnie', benne' xu'e be' xriwe'. ³³ Cáteze bebéaj Jesús be' xriwe' nigá, na' benne' quebe dxaca nnie' bezú lawe' dxuchálaje'. Na' benne' ca' belexebáneleꞤ, dxelenné':

—Cabata' ne lé'edxu gaca caní ládujla benne' Israel ca'.

³⁴ Benne' xudau' fariseo ca' gulenné':

—Benne' nigá dxebéaje' be' xriwe', dxuchínene' xel-la' waca chee da xriwe', da na' dxenná be'e na be' xriwe' ca'.

Dxexache lazre' Jesús bénneache ca'

³⁵ Gudé Jesús tu tu xezre zren, ne tu tu xézredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. GuluꞤ lban chee dizra chawe' ca' nna bea Dios, ne bexunte' bénneache zaj nape' tu tu cue' xízrawe' ca' da dxelezaque'. ³⁶ Gate ble'e Jesús bénneache ca', na' bexache lazre' le' lawe' da zaj zreꞤ xácheze', ne dxelecuán lazre'. Zaj naque' ca' zrila' ca' quebe zua benne' guxúe'-ba'. ³⁷ Nadxa guzre' benne' ca' dxusédene':

—Da lí, da zrente de da lápadxu, na' bábaze benne' wen zrin zaj zreꞤ. ³⁸ Chee le na' le naba lau Xrana lina nigá, sel-le' benne' wen zrin xelesape' lina chee'.

10

Dxecá'a Jesús chazrinnu benne' xelaque' gubáz chee'

(Mr. 3.13-19; Lc. 6.12-16)

¹ Nadxa Jesús bláwizre' chazrinnu benne' ca' dxusédene', na' bnézuje' le' xel-la' dxenná bea chee xelexebéaje' be' xriwe' ca', ne chee xelexexune' bénneache zaj xu'e tu tu cue' xízrawe' ca' da dxelezaque'.

² Caní zaj le' chazrinnu benne' gubáz ca' chee Jesús:

Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zaj le' Jacobo, ne Juan, benne' zaj naque' zri'ine Zebedeo.

³ Xezícala benne' ca' zaj le' Felipe, ne Bartolomé, ne Tomás.

Xetue' le' Mateo, benne' wechízruj chee xezre.

Xetue' le' Jacobo, zri'ine Alfeo.

Xetue' le' Lebeo, benne' léqueze' Tadeo.

⁴ Xetue' le' Simón, benne' dx'eꞤ gunne xue chee xezr la xu Israel.

Xetue' le' Judas Iscariote, bénnea' gudéꞤ Jesús lu na' benne' dxeledábague' Le'.

Dxesel-la Jesús benne' gubáz chee' ca' cheajlezenne' bénneache xrtizreꞤ

(Mr. 6.7-13; Lc. 9.1-6)

⁵ Nadxa gusel-la Jesús benne' chazrinnu caní. Guzre' le':

—Quebe cheajle naga zaj zra' benne' quebe zaj naque' judío, ne quebe chu'ule xezre ca' zaj nababa Samaria. ⁶ Le chjaca naga zaj zra' benne' Israel zaj naque' ca' zrila' zaj naníteba'. ⁷ Le chjaca cu'ule lban, xele bénneache ba bzrin gáguze zra nna bea Dios lu xezr la xu nigá. ⁸ Le xexún benne' zaj xu'e we' guzru', ne benne' bila xízrawe' dxelé'ene'. Le gusebán benne' gate. Le xebéaj

be' xriwe' da zaj xu'u bènneache. Cá'aze guzile xel-la' dxenná bea nigá, na' cá'aze le guchine na, quebe bi sile.

⁹ Quebe gúale dumí oro, ne dumí plata, ne dumí lase. ¹⁰ Quebe gúale xixruj xeta da gágule la neza. Quebe gúale xetú cue' zra lánale, ne zréale, ne xaga da gúxrule. Benne' wen zrin wazrúequeze' da gawe'.

¹¹ Gate na' zrinle le'e tu xezre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra zeza'ale na'. ¹² Gate na' chu'ule lu xu'u na', le xe bènnea' naca lizre' na': "Xela dxebeza zri lazre' suale na le'e."

¹³ Che benne' ca' zaj naca chee' xelezi'e xel-la' ba lá'ana caní, le gucá'ana cá'aze na. Che quebe zaj naca chee' xelezi'e da nigá, na' quebe gata' chee'. ¹⁴ Che quebe lataj dxelune' le'e, ne quebe dxelenne' chee, le xedxúaj lu xu'u na' u lu xezre na', na' le xebibe bxrteđu na' zria ní'ale. ¹⁵ Da li dxapa' le'e, ca zrin zra guchí'a Dios, Dios gundxe' da ba xa' chee benne' xezre na' quez ca da guné' chee benne' Sodoma, ne benne' Gomorra, xezre ca' guzría xi'e.

Xelebé nawe' bi ca' chee Jesús

¹⁶ Na' gunná Jesús:

—Le na' xque nigá. Neda' dxesel-la' le'e, gácale ca zrila' zaj zraba' ládujla becu' xi'a ca'. Chee le na', le gaca sina ca zaj naca bela', san le gaca dxexruj lazre' ca zaj naca bgúgudu ca'. ¹⁷ Le guxúe cuínale. Zaj zra' benne' xuludé' le'e lu na' benne' xu'u lawe', ne xuluzálaje' le'e lu xu'u naga dxulucá'ana szrene' Dios. ¹⁸ Cá'anqueze welech'e le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío. ¹⁹ Gate na' xuludé' le'e lu na' benne' dxuchi'a da dxaca, quebe gunne xue cue'le ca da nnale u ájala guchálajle, lawe' da gate zrin zra guchálajle, Dios gunne' ca da guchálajle. ²⁰ Quegá le'eze guchálajle, lawe' da Be' Lá'azxa chee Dios guchálajle' lu dxú'ale.

²¹ Xuludé bènneache benne' bíchequeze' lu na' benne' xelúti'e le'. Cá'anqueze xra xrna xuludé' zrí'ine', na' zrí'ine' ca' xeledábagabe' xra xrnáquezebe' chee xelátie'. ²² Xúgute bènneache xelezré'e le'e lawe' da nácale chia' neda', san bènnea' guxru chach'e dizra' chee Dios ca zrin zra cheajsé chee', la bènnea'. ²³ Gate xelebé nawe' le'e tu xezre, le xuzrunnuj xetú xezre. Da li neda', Benne' Gulje' Bènneache, dxapa' le'e, xida' nédxula ca quebe ne tache tale xúgute xezre chee benne' Israel.

²⁴ Netú benne' quebe naque' szrendxa ca benne' dxusédené' le'. Cá'anqueze netú benne' wen zrin quebe naque' szrendxa ca xrane'. ²⁵ Tu benne' dxuséde dxal-la' gun zi' lazre' gaque' ca naca benne' dxusédené' le', na' benne' wen zrin dxal-la' gun zi' lazre' gaque' ca naca xrane'. Che benne' naque' xrane xu'u dxel'é le' Beelzebú, da xriwe', chezradxa xelenné' chee bi chee' ca'.

¿Núzraqueze dxal-la' zrébedxu?

(Lc. 12.2-9)

²⁶ Na' gunná Jesús:

—Chee le na', quebe zrébele bènneache. Xúgute da bagácheze gaca béaqueze na, na' xúgute da dxelaca ga nagache gul'é láuqueze na. ²⁷ Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelén xúgute benne'. ²⁸ Quebe zrébele benne' xelúti'e beł-la' dxen chee. Quebe xelezéquene' xelúti'e bènne'du xu'ule. Le zrebe Dios. Le' dxezéquene' guzría xi'e beł-la' dxen chee, ne bènne'du xu'ule lu lataj ba xa'.

²⁹ Dxelúti'e chupa bxínnedu ca' nen tu dumída'u. Netuba' quebe gáteba' chee quebe ne güe lataj Xrale. ³⁰ Cá'anqueze xicha xíchajle, xúgute na zaj nababa na. ³¹ Chee le na', quebe zrébele. Zácadxale le'e quezcala be zan bxínnedu ca'.

Dxal-la' xechébedxu nácadxu chee Jesucristo
(Lc. 12.8-9)

³² Na' gunná Jesús:

—Xúgute benne' ca' dxelexechebe' zaj naque' chia' neda' lau bénneache, cá'anqueze neda' wechébequeza' zaj naque' chia' neda' lau Xra' zue' xabáa.

³³ Benne' ca' quebe dxelexechebe' zaj naque' chia' lau bénneache, néda'queza' québequeze xechéba' zaj naque' chia' lau Xra' zue' xabáa.

Da naca Jesús naca na tu da dxun na chupa la'a bénneache
(Lc. 12.51-53; 14.26-27)

³⁴ Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' ládujla bénneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la. ³⁵ Bla'a neda' chee guna' tábaga' tu benne' xre', ne chee guna' tábaga' tu bi nu'ula xrnabe', ne chee guna' tábaga' tu zru'a lizre' tau zri'ine'.

³⁶ Ca'an gaca, tu tu benne' tíl-lale xrtía ljwezre' le'.

³⁷ Che tu benne' nazrí'idxene' xra xrne'e quezca neda', quebe naca chee' gaque' chia', na' che nazrí'idxene' bi chee' ca' quezca neda', quebe naca chee' gaque' chia'. ³⁸ Che tu benne' quebe gun cuine' ca tu benne' zéajte'e le'e xaga béguaj, ne gun'e neda' tuze, quebe naca chee' gaque' chia'. ³⁹ Benne' dxaca lazre' gapa chi'e xel-la' nabán chee' gunitie' na. Bénnea' zúatequeze gudé'e xel-la' nabán chee' ne chia' neda', gusel'e' xel-la' nabán chee'.

Da gunna Dios dxi'u
(Mr. 9.41)

⁴⁰ Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bénnea' dxape' neda' ba lá'ana, dxápaqueze' ba lá'ana Dios, Bénnea' gusel-le' neda'.

⁴¹ Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bénnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'. ⁴² Núteteze benne' gun'ézruje' tu zriga' nisa zaga da xi'aj tu bidu caní lawe' da naque' chia' neda', da líqueze wazí'e da gunezruj Dios le'.

11

Dxelezn benne' ca' gusel-la Juan lau Jesús
(Lc. 7.18-35)

¹ Gate beuzre Jesús bchálajleñe' bénneache, na' bchálajleñe' chazrinnu benne' ca' dxusédené'. Bezé'e na' chee cheajsédené', ne cheajchálaje' lban xúgute xezre ca' lu xezr la xu na'.

² Juan, bénnea' bchue' bénneache nisa, xu'e lizre xia, na' benne' ca naca da dxun Cristo. Nadxa gusel-le' chupa benne' ca' dxeledálene' le' lau Jesús.

³ Benne' chupe' caní buluchebe' Jesús:

—¿Nacu' Lue' Cristo, Bénnea' dxal-la' xide', u che dxal-la' cuézantu' xelá' xetu' benne'?

⁴ Na' bechebe Jesús:

—Le chjaca cheajézrele Juan da caní dxelé'ele, ne da dxenle. ⁵ Le xe'e ca dxaca, dxelexelé'e benne' gulaque' la chul-la. Dxelexedá benne' gulezúa zri ni'a n'e'e. Belexexaca benne' gulezaque' we' guzru', ne belexexaca ban benne' ca' gulatig'. Benne' xache' ca' dxelleneg' dizra' chawe' chee Dios. ⁶ Ba neza zrenteg' naca na chee bènnea' quebe xucuán lazre' sálene' neda'.

⁷ Ca besí'aca benne' chupa ca', na' guzú lau Jesús dxuchálajlene' benne' zaj zre'eg' na' ca naca chee Juan. Dxenné':

—¿Bizra xeajinna'le le'e le'eg' xixre' na'? ¿Xeajinna'le tu xia da dxuxrize be'?

⁸ Che cabí, ¿bizra xeajinna'le na'? ¿Xeajinna'le tu benne' nacue' zra laneg' da zaca? Nézquezle benne' ca' zaj nácué' ladxe' zaca, lizre benne' dxelenná be'eg' zaj zra' benne' caní. ⁹ ¿Bízaqueze xeajinna'le? ¿Xeajinna'le tu benne' dxuchálajeg' waláz chee Dios? Awe'. Ca'an guca. Bènnea' ble'ele na' nácadxeg' blau ca tu benne' dxuchálajeg' waláz chee Dios. ¹⁰ Lu xiche chee Dios naxúaj na ca naca chee Juan na'. Dxenná na: Neda' dxesel-la' benne' gubáz chia' nédxula ca Lue', chee gucuezeg' neza naga teu'. ¹¹ Da li dxapa' le'e, ládujla xúguteg' bènneache quebe nu chilá' benne' nácadxeg' blau ca naca Juan, bènnea' bchue' bènneache nisa. Naga dxenná bea Dios, bènnea' nácadxeg' benne' dxexruj lazre' nácadxeg' blau ca naca Juan na'.

¹² 'Ca lu zra bla' Juan, bènnea' bchue' bènneache nisa, bzrinteg' na'a zra, zaj zra' benne' dxeluneg' zi' lazre' xelu'eg' naga dxenná bea Dios xabáa, na' benne' dxeluneg' zi' lazre' dxelezrué'eneg' na. ¹³ Ca da bzuaj Moisés lu xiche chee da nadxixruj bea na, ne ca gulenná xúguteg' benne' buluchálajeg' waláz chee Dios, dxuchalaj na ca naca chee xel-la' dxenná bea chee Dios, bzrinteg' ca bla' Juan na'. ¹⁴ Che le'e dxaca lázrele chéajlele da nigá, Juan na' naque' Elías, bènnea' bchálajeg' waláz chee Dios gate nate, na' dxal-la' xelég' chee guchálajeg' waláz chee Dios. ¹⁵ Che zua nácale, le xen da nigá.

¹⁶ '¿Ájazra zaj naca benne' zaj zre'eg' na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxelleneg'be' zizraj, dxelé' ljawézrebe' ca': ¹⁷ "Bcuézrentu' bchiuj san quebe bxá'ale le'e. Bil-la xácentu' san quebe gudxézrele." ¹⁸ Caní zaj naque' lawe' da bla' Juan, quebe dxaweg', ne quebe dxí'ajeg' da zaca, na' le'e dxennale xu'eg' be' xriwe'. ¹⁹ Nadxa bla' neda', Benne' Guljeg' Bènneache, dxawa', ne dxí'aja', na' dxennale naca' neda' benne' wagu xrata, ne benne' dxi'aj, ne ljawezre benne' dul-la, ne benne' wechizruj chee Roma. Naca bea nu benne' nape' xel-la' sina chee Dios ne chee da dxun bènnea'.

Ca gaca chee bènneache quebe dxuluzúeg' xrtizra' Dios (Lc. 10.13-15)

²⁰ Nadxa guzú lau Jesús dxedil-le' bènneache chee xezre ca' naga benge' xel-la' waca ca' chee xabáa, lawe' da quebe belexebí'i lazre' benne' zaj zre'eg' na'. Na' gunné':

²¹ —Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrenteg' ba zeaj gulácue' zra laneg' tuzruj, ne gulegú'eg' de xichajeg' da zaj naca bea na belexebí'i lazre'. ²² Neda' dxapa' le'e, lu zra guchi'a Dios, gundxeg' da ba xa' chee quez ca da ba xa' gune' chee benne' Tiro, ne benne' Sidón. ²³ Le'e zrale xezre Capernaum, ¿dxéquele Dios wechiseg' le'e xabáa? Dios gudég' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'anatequeze xezre

na' lu zra na'a zra. ²⁴ Neda' dxapa' le'e, lu zra guchi'a Dios, gundxɛ' da ba xa' chee'le quez ca gunɛ' da ba xa' chee' benne' Sodomá ca'.

Dxenná Jesús: "Le da naga zua' xezí' lázrele"

(Lc. 10.21-22)

²⁵ Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dxelájni'ine', san blé'enu' na bidu caní. ²⁶ Ca'an naca, Xrae, lawe' da naca na ca dxaca lazru' Lue'.

²⁷ Xra' ba bdeɛ' lu na'a xúgute' da caní. Quegá nu benne' núnbe'e neda', Zri'ine Dios, san Xra' Dios núnbe'e neda'. Quegá nu benne' núnbe'e Xra', san neda', Zri'ine Dios, núnbe'a Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'. ²⁸ Le da naga zua', xúgutele le'e dxejxréquele lu zrin dxunle chee' xudau', ne ca naca xua da núale, na' neda' guna' xezí' lázrele. ²⁹ Le gunna lataj xrua' le'e ca nu benne' xruɛ' beɛzre xugu' chee'ba', ne le gusede chia' lawe' da naca dxexruj lazre', ne dx'e'ene lazre', na' wazrué'ele xezí' lázrele lu bénne'du xu'ule. ³⁰ Da na' naca na ca xugu' chee' beɛzre da xrua' le'e québetɛ ca naca na stɛbe chee' gúale na, na' xua da xrua' le'e naca na zraze.

12

Bi ca' dxusede Jesús dxelequɛ'e dau zrua' xtila gate naca zra dxulupá'ana judío

(Mr. 2.23-28; Lc. 6.1-5)

¹ Ca lu zra na' xu'u Jesús neza zéaje' ládujla naga de xel-la' zrua' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú lawe' dxelálaje' dau naga zria zrua' xtila, ne dxelawe' na. ² Gate beledé' benne' xudau' fariseo ca' da caní, na' gulé'e Jesús:

—Guná' xque ca dxelún benne' ca' dxusédenu', dxelunɛ' zrin da quebe naca chee' xelunɛ' lu zra dxupá'anadxu.

³ Jesús guzre' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guledunɛ'? ⁴ Guxú'e lu xu'u chee' Dios, ne gulawe' xeta xtila lá'azxa, da quebe zaj naca chee' xelawe', le', ne benne' ljwezre' ca', san tuze bxruze ca' zaj naca chee' xelawe' na. ⁵ ¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxelunɛ' zrin chee' xudau' lu zra dxupá'anadxu, ne quebe zaj nabague' zria? ⁶ Neda' dxapa' le'e, de tu da naca blaudxa ca xudau' nigá. ⁷ ¿Quebe ne chéajni'ile ca zéaje' da naxúaj na lu xiche chee' Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be xixre'du ca' lu cugu chia'. La ba guxéajni'ile da nigá, quebe ne guzria xile bénneache quebe zaj nabague' dul-la. ⁸ Chee' le na', neda', Benne' Gulje' Bénneache, napa' xel-la' dxenná bea dxuna' zrin chia' lu zra dxupá'anadxu.

Dxexún Jesús tu benne' zua zri ne'e

(Mr. 3.1-6; Lc. 6.6-11)

⁹ Nadxá Jesús bežé'e na', na' guxú'e tu lu xu'u naga dxelúe lá'anɛ' Dios. ¹⁰ Zua tu benne' zua zri ne'e ga na'. Benne' judío ca' gulaca lazre' xelezrelnɛ' ájala xelunɛ' chee' gaca xelaju zrie' chee' Jesús. Chee' le na' gulenábenɛ' Le':

—¿Dxunna Dios lataj xexundxu benne' we' lu zra dxupá'anadxu?

¹¹ Jesús guzre' benne' ca':

—Núteteze benne' zue' ládujla le'e, che zua tu zrila' chee', ne che bíxreba' tu xedxu situj lu zra dxupá'anadxu, ¿quebe chéaje' cheajxeléaje'-ba' xca'? ¹² Da zrendxa zaca tu benne' quez ca tu zrila'. Ca'an naca dxunna Dios lataj gundxu tu da xrlátaje lu zra dxupá'anadxu.

¹³ Nadxa Jesús guzre' benne' we' na':

—Bli na'u.

Ca blí ne'e, na' bexaca na ca ne'e xetú. ¹⁴ Nadxa beledxúaj benne' xudau' fariseo ca', ne gulezú lawe' dxelíaje' ájala xelune' xelútie' Jesús.

Da gunná tu benne' bchálaje' waláz chee Dios ca dxal-la' gaca chee Jesús

¹⁵ Gate gúquebe'e Jesús da nigá, na' bezé'e na', na' benne' zante zjácálenē' Le'. Bexún Jesús xúgute benne' we' zaj zre'e ládujla benne' ca'. ¹⁶ Jesús gunné xúene' benne' ca' quebe nu xululé'ene' nu naca Le'. ¹⁷ Caní guca ca da gunná Isaías, benne' bchálaje' waláz chee Dios, gunné':

¹⁸ Benne' nigá naque' wen zrin chia', benne' ba gucá'a.

Benne' nigá nazrí'ida', ne dhexaca ba lázrele'na' Le'.

Guzáaqueza' xichaj lázrdawe' Be' Lá'azxa chia'.

Guzenne' bénneache xúgute xezr la xu ca dxuchi'a da dxaca.

¹⁹ Quebe tíl-laléqueze' bénneache, ne quebe cuézrexe'e.

Netú benne' quebe xenne' chi'e la neza.

²⁰ Quebe quichje' tu xia da ba nachaj,

ne quebe xusul-le' xi' da ba dxaca wexul-la na, ca zrindxa zra xuzúe' xel-la' dxenná bea chawe' chee'.

²¹ Bénneache xúgute xezr la xu xuluxrén lázrequeze' Le'.

Dxelenné' napa Jesús xel-la' dxenná bea chee da xriwe'

(Mr. 3.19-30; Lc. 11.14-23; 12.10)

²² Nadxa guleché'e lau Jesús tu benne' la chul-la, benne' quebe dxaca nnie', lawe' da xu'e be' xriwe'. Jesús bexune' benne' nigá, na' belé'ene', ne bennie'.

²³ Xúgute benne' ca' belexebánene', gulenné':

—¿Naca benne' nigá Zri'ine David zra?

²⁴ Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchínene' xel-la' dxenná bea chee Beelzebú, xrane be' xriwe' ca'.

²⁵ Dxeque be'e Jesús ca da dxelenné', dxelé'e ljwezre', na' guzre' le':

—Lu xu'u lawe' chee gáteteze xezre, che xelaca chupa la'a benne' xu'u lawe' ca', ne bal-le' xeledíl-lalene' xezícadxe', na' wexul-la wenite xel-la' dxenná bea chee benne' ca'. Cá'anqueze che tu xezre benne', u tu cue' xrtía ljwezre xelaque' chupa la'a, ne xeledíl-lalene' le sa' ljwezre', wenítequeze xezre na', u xrtía ljwezre ca'. ²⁶ Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ájazra gácaqueze nna bea na? ²⁷ Le'e dxennale chia' dxebéaja' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e tuze chee xelebéaje' be' xriwe' ca'? Chee le' na' léqueze' dxululé'etene' nanéguele le'e. ²⁸ Che neda' dxebéaja' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

²⁹ ¿Ájazra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' bénnea'? Che gune' caní, na' wazéquene' que'e da de chee bénnea'.

³⁰ 'Nu benne' quebe dxácalenē' neda', dxedábague' neda', na' benne' quebe dxexežígalenē' neda', dxexúsíē' na.

³¹ 'Cheē lē na' dxapa' le'e, gunitē lau Dios cheē bēnneache xúgute dul-la zaj nabague', ne xúgute da calela da dxelenné', san che xelenné' schanni' cheē Be' Lá'azxa, cabata' gunitē lau Dios cheē'. ³² Núteteze benne', che bi nniē' schanni' chia' neda', Benne' Gulje' Bēnneache, Dios gunitē lawe' cheē', san che tu benne' nniē' schanni' cheē Be' Lá'azxa, québequeze gunitē lau Dios cheē' lu xēzr la xu nigá ne cá'anqueze lu xēzr la xu da za za'.

Da dxun tu benne' dxule'e na ca naque'
(Lc. 6.43-45)

³³ Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na nē cheē da zixre da dxebía na. ³⁴ Le'e, bē snia ca'. ¿Ájazra gunle le'e nnele da xrlátaje che le'e nácaquezele benne' wēn da calela xca'? Ca da dxedxuaj dxú'adxu naca na ca da zua na lu xichaj lázrdaudxu. ³⁵ Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wēn da calela dxenné' da calela lawe' da zua da calela lu xichaj lázrdawe'. ³⁶ Neda' dxapa' le'e, lu zra guchi'a Dios, xúgute bēnneache xuludéē' ca da gulenné', tu tu dízra' xala da gulenné'. ³⁷ Ca naca dízra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

Bēnneache wēn da calela ca' dxelenábene' Jesús gunē' tu xel-la' waca cheē xabáa

(Mr. 8.12; Lc. 11.29-32)

³⁸ Nadxa bal-la benne' xudau' fariseo, ne benne' dxuluxuzájle'e da nadx-ixruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

³⁹ Na' guzre Jesús benne' ca':

—Bēnneache wēn da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xeledé'equezne' tu xel-la' waca, san tuze ca da dxunna bea na ca da guca cheē Jonás, benne' bchálajē' waláz cheē Dios. ⁴⁰ Ca guca cheē Jonás, guxú'e lu le'e bela zren chunna zra chunna xēla, cá'anqueze gaca chia' neda', Benne' Gulje' Bēnneache, waxú'uqueza' lu xēdxu ba chunna zra chunna xēla. ⁴¹ Benne' gulezré'e xēzre Nínive welexásaqueze' lu zra guchi'a Dios gate guchi'e cheē bēnneache zaj zré'e na'a, na' benne' Nínive ca' xulul'éene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dízra' cheē Dios lau benne' ca', na' blaudxa ca Jonás na' naca Benne' zue' nigá. ⁴² Cá'anqueze nu'ula na' gunná be'e chala'a naga dxedá gubizra beu' zaga ca' wexásaqueze' lu zra guchi'a Dios gate guchi'e cheē bēnneache zaj zré'e na'a, na' nu'ula na' gulé'e'ne' zaj nabaga zria benne' caní lawe' da bezé'e naga naca zítu'tē cheē xēzr la xu nigá cheē xenne' dízra' sina da bchalaj Salomón, na' blaudxa ca Salomón na' naca Benne' zue' nigá.

Ca naca cheē be' xriwē' da bexú'u na tu benne'
(Lc. 11.24-26)

⁴³ Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: ⁴⁴“Webi'a xexá'a lizra' naga bedxúaja'.” Ca xezrín na, le'e na benne' na', naque' ca tu xu'u da naxíajlbe lu'ule na, ne nalúa na, ne nagá'ana chawe na. ⁴⁵Nadxa cheaj na cheajxezrí na xegazre be' xriwe' da zaj naca na xriwedxa ca le' na, na' xúgute' na dxelú'u na lu bénnea', na' naca chee benne' na' da caléladxa ca guca chee' nedxu. Cá'anqueze gaca chee' bénneache wen da calela caní.

Benne' zaj naque' ca xrna Jesús, ne ca benne' biche' ca'
(Mr. 3.31-35; Lc. 8.19-21)

⁴⁶Jesús ne zué' dxuchálajlęne' benne' caní gate belezrín xrne'e ne benne' biche' ca' ga na'. Gulezre'e chalé'ajla, ne dxelaca lazre' xuluchálajlęne' Jesús.

⁴⁷Nadxa tu benne' guzre' Jesús:

—Xrna'u, ne bi bichu' ca' zaj zre'e chalé'ajla. Dxelaca lazre' xuluchálajlęne' Lue'.

⁴⁸Jesús guzre' benne' nigá:

—¿Núnbeale nuzra na' xrna'a, ne bi bicha'dau' ca'?

⁴⁹Nadxa ble'e Jesús benne' ca' dxusédene', dxenné':

—Benne' caní zaj naque' xrna'a, ne bi bicha'dau' ca'. ⁵⁰Caní naca na lawe' da núteteze benne' dxuęe' ca da dxaca lazre' Xra' zué' xabáa, benne' nigá naque' benne' bicha', ne benne' zana', ne xrna'a.

13

Da bsede Jesús ca da ben benne' dxaza
(Mr. 4.1-9; Lc. 8.4-8)

¹Lu zra na' bdxuaj Jesús xu'u, na' xeajdxé'e dxu'a nísadau'. ²Na' lawe' da belezraga benne' zante naga zua Jesús, guxú'e tu lu da dxedá lawe' nísadau', ne gudxé'e na'. Xúgute' benne' ca' belexegá'ane' dxu'a nísadau' na'. ³Nadxa bsede Jesús benne' ca' da zante da bchálaje', dxenné':

—Tu benne' dxaza guzé'e zíaęe' guza. ⁴Dxácate dxaze', bal-la binnedu ca' xeajlechaze na dxu'a neza. Na' belelá' bxinnedu ca', guláguba' binnedu ca'.

⁵Bal-la binnedu ca' xeajlechaze na lu xiaj naga quebe dxé'teca xu. Binnedu caní chadí gulezría na lawe' da quebe dxé'teca xu. ⁶Gate bla' gubizra, na' gulecuade na. Lawe' da quebe dxé'teca xu, na' gulebizre na. ⁷Bal-la binnedu ca' xeajlechaze na naga bezríale'e lba xeche', na' lba xeche' ca' belegula na, ne blule na da du ca' naze'. ⁸Bal-la binnedu ca' xeajlechaze na lu xu bebe, na' belúnnałe'e na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na. ⁹Che zua nágale, le xene.

Dxenná Jesús bizr chee' na' dxuchálaje' da dxululé'e na
(Mr. 4.10-12; Lc. 8.9-10)

¹⁰Nadxa benne' ca' dxusede Jesús gulebigue' naga zué' Le', ne buluchebe' Le':

—¿Bizr chee' na' dxuchálajlęnu' benne' ca' da dxululé'e na?

¹¹Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'e lataj. ¹²Benne' nape' late', Dios gunézrujdxé' le', na' gápale'e, san benne' quebe bi nape', Dios wequé'e ca da du nape'. ¹³Chee le' na' dxuchálajlęna' benne' caní da dxululé'e na, lawe' da cate' dxelenné'e

quebe dxelélé'eng'. Cate' dxellenne' quebe dxeléajni'ing'. ¹⁴ Ca naca da dxaca chee benne' caní dxaca na ca gunná Isaías, bènnea' bchálaje' waláz chee Dios, gunné':

Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

¹⁵ Caní naca na lawe' da zaj naca lázrdau zide' benne' caní.

Quebe dxelaca lazre' xellenne'.

Dxulugácuę' xiaj lawę' chee quebe xelexé'eng'.

Quebe dxellenne', na' quebe dxeléajni'ing'.

Quebe dxexílaje' neda' chee xexuna' le'.

¹⁶ Ba neza zrentę naca na chee le'e lawe' da dxelé'ele nen xiaj laule, ne dxenle nen nágle. ¹⁷ Da li dxapa' le'e, benne' zante, benne' ca' buluchálaje' waláz chee Dios, ne benne' xrlátaje ca' gulaca lazre' xelexé'eng' da caní dxelé'ele le'e. Quebe belelé'eng' na. Gulaca lazre' xellenne' da caní dxénnele le'e. Quebe belenne' na.

Jesús dxuzéajni'ing' benne' ca' ca naca chee benne' dxaza

(Mr. 4.13-20; Lc. 8.11-15)

¹⁸ Na' gunná Jesús:

—Le xenne ca zéaje da naca chee benne' dxaza nigá. ¹⁹ Benne' dxellenne' ca naca chee Bènnea' dxenná be'e xabáa, ne quebe dxeléajni'ing' zaj naquę' ca binnedu ca' xeajlechaze na dxu'a neza. Za da xriwę' ne dxugúa na ca naca dizra' da ba gulezi'e lu xichaj lázrdawę'. ²⁰ Ca naca chee binnedu ca' xeajlechaze na lu xiaj, da caní dxululé'e na ca naca chee benne' ca' dxelezi'e dizra' na' du lazre'. ²¹ Ca na' guca chee binnedu ca', quebe guca xuludé lue na, ne quebe guzi' bea na, ca'an dxaca chee benne' caní, gate na' bi da dxelezaquę', u che nu zeajnáu zi' xuzre' le' lawe' da zaj nazi'e dizra' nigá, na' dxexexibigüę'. ²² Binnedu ca' xeajlechaze na ládujla xeche' dxululé'e na ca naca chee benne' dxellenne' dizra' nigá, san dxelebé'le'e gunne xue da naca chee xęzr la xu nigá, na' ca naca xel-la' gunní'a dxezi xę na benne' ca'. Xúgute da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawę'. ²³ Ca naca chee binnedu ca' da xeajlechaze na lu xu bebe, da caní dxululé'e na ca naca chee benne' ca' dxellenne' dizra' nigá, ne dxeléajni'ing' na, na' zaj naquę' ca binnedu ca' belúnna'le'e na. Bal-la benne' zaj naquę' ca binnedu ca' belunna na tu gaxúa tu tu na, na' xebal-le' zaj naquę' ca binnedu ca' belunna na ga xun tu tu na, na' xebal-le' zaj naquę' ca binnedu ca' belunna na chi dxua tu tu na.

Da bchalaj Jesús ca naca chee xixre' zrinnaj da dxenná'queze na ca dxenná' xel-la' zrua' xtila

²⁴ Nadxa bchalaj Jesús xetú da dxululé'e na, dxenné':

—Ca dxaca ga ni dxenná bea Dios naca na ca da guca gate tu benne' guzę' binne cháwe'dau' lu xęzr la xu chee'. ²⁵ Gate dxelase xúgute', na' bzin tu benne' dxezre'e le', ne xeajaze' binne xixre' zrinnaj lávela zrua' xtila, na' bezé'e. ²⁶ Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'. ²⁷ Nadxa benne' wen zrin ca' xeajleguezre' xrane na, dxelé'e le': "Xran, guzu' binne cháwe'dau' lu xęzr la xu chiu'. ¿Gazra guzá xixre' zrinnaj caní?" ²⁸ Gunná xránabe': "Tu benne' dxezre'e neda' bene' da nigá." Nadxa benne' wen zrin ca' buluchębe' le': "¿Dxaca lazru' chéajntu' cheajlépentu' xixre' zrinnaj ca'?" ²⁹ Le' guzre' wen zrin ca': "Quebe gaca na. Gate na' lázrule xixre' zrinnaj ca', walázrutele xel-la' zrua' xtila. ³⁰ Xelegúladxa

na cháwe'la tu zren ca xecá'adxadxu zrua' xtila. Nadxa nna be'eda' benne' wen zrin ca' xelegu'e nedxu xixre' zrinnaj ca', na' xuluchéaje' xelune' tu xrúnujdu weaj chee guzédxedxu na. Nadxa xelegape' zrua' xtila na', ne xezrá chawe' na lizra'."

Da bchalaj Jesús ca naca chee binne mostaza

(Mr. 4.30-32; Lc. 13.18-19)

³¹ Nadxa bchalaj Jesús xetú da dxulé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu benne' guze' binne mostaza lu xezr la xu chee'. ³² Da li binne mostaza nigá naca na da bízrujdxu lawe' xúgute binne ca'. Gate ba nagula na naca na tu xaga zrendxa lawe' xúgute xixre' cuan. Dxaca na ca tu xaga zren naga dxezeque' cheajlezría bxinnedu ca' xrú'uneba' lu zruze na.

Da bchalaj Jesús ca naca chee cua zichaj chee xeta xtila

(Lc. 13.20-21)

³³ Nadxa bchalaj Jesús xetú da dxulé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' duté na guxasa na bliche.

Ca bchine Jesús da dxulé'e na caní

(Mr. 4.33-34)

³⁴ Xúgute da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na. ³⁵ Caní guca ca da gunná benne' bchálaje' waláz chee Dios, gunné': Guchálaja' ca naca da dxulé'e na da guchálaja'. Gulé'eda' ca naca da nagache gate guzrete xezr la xu.

Jesús dxuzéajni'ine' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila

³⁶ Nadxa Jesús bze' benne' ca' dizra', na' guxú'e lu xu'u. Benne' ca' dxusede Jesús gulebigue' lau Le', na' gulé'e Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

³⁷ Nadxa Jesús guzre' benne' ca':

—Bénnea' dxaze' binne cháwe'dau' nigá naque' Benne' Gulje' Bénneache.

³⁸ Naga dxaze' binne nigá naca na lu xichaj lázrdau bénneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'. ³⁹ Bénnea' dxezré'e xrane xezr la xu na', ne xeajaze' xixre' zrinnaj naque' da xriwe' ná'queze. Zra xelegape' naca na zra bzebe chee xezr la xu nigá, na' benne' ca' xelegape' zrua' xtila na' zaj naque' gubáz chee xabáa chee Dios. ⁴⁰ Ca belexequé'e xixre' zrinnaj ca', ne buluzré'e na lu xi' chee xelexze na, ca'an gácaqueze lu zra bzebe na'. ⁴¹ Neda', Benne' Gulje' Bénneache, sel-la' gubáz chee xabáa chia' ca' chee xulucuase' naga nna be'a xúgute benne' ca' dxuluxrinnajte' benne' xula, ne benne' ca' dxelune' da calela. ⁴² Nadxa gubáz chee xabáa ca' xuluzré'e benne' ca' dxelune' da calela lu xi' gabila naga xebezeze', ne xeláguxa'até lazxe'. ⁴³ Nadxa benne' ca' dxelune' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

Da dxulé'e na ca naca chee tu xel-la' gunní'a da nagache

⁴⁴ Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélenē' xel-la' gunní'a nigá, na' bucache' na. Ne zúale'ē xel-la' dxebé zexíaje' xeajxétie' xúgute da nape', na' bezi'ē xezr la xu na'.

Da dxulé'e na ca naca tu bga da zácale'ē na

⁴⁵ Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexíaje' bga ca' da zaj zaca na. ⁴⁶ Gate dxezrélenē' tu da zácale'ē, na' zexíaje' zeajxétie' xúgute da nape', na' si'ē bga na'.

Da dxulé'e na ca naca tu xixruj bela

⁴⁷ Na' gunná Jesús:

—Ca naca chee benne' ca' xelexú'ē naga dxenná bea Dios, naca na ca tu xixruj bela, da dxuluzale' lu nísadau', na' dxelezenē' zane' cue' bela. ⁴⁸ Gate dxezrá xixruj na', na' benne' ca' dxelezenē' bela dxelexequé'ē na dxu'a nísadau', na' dxelebé'ē dxelexebé'ē bela ca'. Bela chawe' ca' dxuluxuzré'ē-ba' lu xcuite, na' bela xala ca' dxeledxú'üne'-ba'. ⁴⁹ Ca'an gaca lu zra bzebe na'. Xeledxúaj gubáz chee xabáa ca', xelexebéaje' benne' ca' dxelune' da caleja ládujla benne' xrlátaje ca'. ⁵⁰ Xuluzré'ē benne' ca' dxelune' da caleja lu xi' gabila, naga xebebre', ne xeláguxa'atē lazxe'.

Da zaca ca da zaj naca na da cube, ne da zaj naca na da gula

⁵¹ Nadxa bchebe Jesús benne' ca', dxenné':

—¿Dxéajni'ile le'e xúgute da caní?

Benne' ca' gulenné':

—Awe', Xran.

⁵² Nadxa guzre' benne' ca':

—Gate tu benne' dxusédenē' da nadxixruj bea Dios, ne nazédenē' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawe'.

Jesús dxexezrine' Nazaret

(Mr. 6.1-6; Lc. 4.16-30)

⁵³ Gate bexuzre bchalaj Jesús da dxulé'e na caní, na' bezé'ē na'. ⁵⁴ Bezrine' naga naca lazriē'. Na' guzú lawe' dxusédenē' benne' ca' zaj zre'ē lu xudau' chee xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxune' xel-la' waca caní? ⁵⁵ Benne' nigá naque' zri'ine gubizre xaga, na' naca xrne'ē María. Naque' bi biche Jacobo, ne José, ne Simón, ne Judas. ⁵⁶ Bi zane' zaj zue' nigá nen dxi'u. ¿Ájazra na' dxaca dxune' da caní?

⁵⁷ Chee le' na' buluzúē' Jesús chalá'ala. Jesús guzre' benne' ca':

—Xúgute benne' xula dxelape' ba lá'ana tu benne' dxuchálaje' waláz chee Dios. Benne' lazriē', ne xrtia ljwezre' quebe dxelune' ca'.

⁵⁸ Jesús quebe bēnteque' na' xel-la' waca ca' lawe' da quebe guléajle'ē chee'.

14

Ca gute Juan, bēneea' bchue' bēneache nisa

(Mr. 6.14-29; Lc. 9.7-9)

¹ Lu zra na' Herodes, benne' dxenná be'e xezre ca' zaj nababa na Galilea, benne' ca naca da dxun Jesús. ² Na' guzre' bi wen zrin chee' ca':

—Benne' nigá naque' Juan, bënnea' bchue' bënneache nisa. Ba bebang' ládujla benne' gate. Chee le na' nape' xel-la' waca zren nigá.

³ Caní gunné' lawe' da gudela Herodes nigá Juan na', ne bchéaje' le' du xia, ne gulu'e le' lizre xia. Bëne' caní ne chee Herodías, zru'ula Felipe, biche Herodes na'. ⁴ Caní bënë' lawe' da guzre Juan le':

—Quebe naca chiu' súaŋenu' nu'ula nigá.

⁵ Herodes guca lazre' gutië' le', san dxezrebe' da xelún bënneache ca' lawe' da dxeléquene' naca Juan benne' dxuchálaje' waláz chee Dios. ⁶ Gate bzrin zra dxezría iza Herodes, na' belune' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'. ⁷ Chee le' na' Herodes guchebe lazre' lau benne' ca' gunézruje' ca da naba bi nú'uladu na'. ⁸ Lawe' da ba guzre xrnabe' lebe', na' gunabe':

—Benna nigá xichaj Juan, bënnea' bchue' bënneache nisa. Gulú'u na tu lu xé'ena.

⁹ Nadxa guzúa stëbe Herodes, bënnea' dxenná be'e, san lawe' da ba guchebe lazre', na' benne' zaj zre'e dxágulene' le' belenne' ca', chee le' na' guzre' tu benne' wen zrin chee' gunézruje' na lebe'. ¹⁰ Gunná bé'ene' nu benne' guchugue' xichaj Juan naga xu'e lizre xia. ¹¹ Nadxa xejlexrí'e xíchaje' tu lu xé'ena, ne bulunézruje' na bi nú'uladu na', na' lebe' bnézruje' na xrnabe'.

¹² Nadxa belezrín benne' ca' bsëde Juan, na' belexú'e le', ne xejlecache' le'. Nadxa xjaque' xejleguezre' Jesús.

Dxugagu Jesús chi xun gaxúa benne' biu
(Mr. 6.30-44; Lc. 9.10-17; Jn. 6.1-14)

¹³ Gate ben Jesús da na', na' bezé'e na', bexu'e tu lu da dxedá lawe' nísadau', na' bzrinë' tu naga quebe nu zra' benne'. Gate belén bënneache, na' gusiá'que' ni'e, na' belezrinë' naga zua Jesús. ¹⁴ Gate bedxúaj Jesús lu da dxedá lawe' nísadau', na' blé'ene' benne' zantë, ne bexache lazre' le', na' bexunë' benne' ca' quebe chawe' zaj zue'. ¹⁵ Gate ba za xrinne, benne' ca' dxusëde Jesús gulebigue' lau Le', dxelennë':

—Lataj nigá quebe bi de, ne ba dxedé zra. Bze benne' caní dizra' chee chjaque' xézredu ca', ne xelezi'e da xelawe'.

¹⁶ Jesús guzre' le':

—Quebe dxun na ba xen chjaque'. Le gunezruj le'e da xelawe'.

¹⁷ Benne' ca' gulé'e Le':

—Gáxuze xeta xtila de cheedxu nigá, ne chúpaze bela.

¹⁸ Jesús guzre' benne' ca':

—Le gunna na nigá.

¹⁹ Nadxa gunná bé'ene' gulebé' benne' zan ca' lawe' zrië. Guqué'e xeta xtila, ne bela ca', na' gunné'e xabaala, ne guzre' Dios: "Xcalenu'." Nadxa bzúzruje' xeta xtila, ne bnézruje' na benne' ca' dxusédene', na' benne' ca' gulisië' na lávela benne' zan ca'. ²⁰ Xúgute' gulawe', ne gulélajene'. Ca gudé na' bulusuzré'e chazrinnu ga' da bízruju ca' zaj nagá'ana. ²¹ Benne' gulawe' na zaj naque' chi xun gaxúa benne' biu, ne quebe nu blaba nu'ula, ne bidu ca'.

Jesús dxedé' lawe' nisa
(Mr. 6.45-52; Jn. 6.16-21)

²² Nadxa gunná be'e Jesús benne' ca' dxusédene' xelu'e lu da dxedá lawe' nísadau' chee xelague' nísadau' nédxudxa ca Le' chee xelexezrinë' xéchala'a nísadau' na', dxácatë Le' dxuzé benne' zan ca' dizra'. ²³ Ca gudé bze' dizra'

benne' zan ca', na' guluéne' tu lu xi'a xeajchálajlene' Dios naga zue' tuze'. Gate guxrinne zua Jesús tuze' na'. ²⁴ Dxácatę na' ba zeaj da na' dxedá lawe' nísadau' gachaj láwe'tę nísadau' na'. Nadxa guxasa xeajxruga cheę nísadau' na', da dxutá na da dxedá lawe' nísadau' na', lawe' da dxácalę'e be', ne quebe dxue na lataj sa na. ²⁵ Gate gudé dxęla gubiga Jesús naga zaj zře'e, zéaje' lawe' nisa. ²⁶ Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexe'e, gulenné':

—Da dxedá dxęla na'.

²⁷ Jesús guzre' benne' ca':

—Le gun dipa lázrele. Neda' nigá. Quebe zrébele.

²⁸ Na' gunná Pedro, dxę'e Jesús:

—Xran, che Lue' na', gunná be'e xida' lawe' nisa naga zu' na'te.

²⁹ Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezé'e lawe' nisa cheę zrine' naga zua Jesús. ³⁰ Gate dxeque be'ene' ca dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xę'e, gunné':

—Xran, becá'a neda'.

³¹ Nadxa becá'a Jesús ne'e, ne guzre' le':

—Látega dxeajlí lazru' neda'. ¿Bizr cheę na' ben chupa lazru'?

³² Gate belexegüene' lu da dxedá lawe' nísadau', na' bebé' zri be' na'.

³³ Nadxa benne' ca' zaj zře'e lu da dxedá lawe' nísadau' na' buluzú zribe' lau Jesús, dxelé'e Le':

—Da li nacu' Zri'ine Dios.

*Jesús dxexune' benne' we' ca', benne' zaj zře'e lu xezre Genesaret
(Mr. 6.53-56)*

³⁴ Guledéę xecha la'a nísadau', na' belezrine' lu xezr la xu cheę benne' Genesaret ca'. ³⁵ Gate benne' ca' zaj zře'e xezre na' belexexúnbe'e Jesús, na' buludéę dizra' xezícala xézredu ca', na' guleché'e xúgute benne' we' naga zua Jesús. ³⁶ Gulata' xuene' Jesús gu'e lataj xulutá benne' ca' zra lanę' naze. Xúgute benne' buluté' zra lanę' belexexaque'.

15

*Da dxuxrinnaj na bėnneache
(Mr. 7.1-23)*

¹ Nadxa benne' fariseo ca', ne benne' dxuluxuzájle'e da bdxixruj be'e Moisés, benne' ca' beledxuaję' lu xezre Jerusalén, gulebigue' lau Jesús, na' buluchebe' Le', dxelenné':

² —¿Bizr cheę na' benne' ca' dxusédenu' quebe dxuluzúę' dizra' ca naca da gulún xra xrtaudxu? Quebe dxelíbequeze ne'e ca naca da zéajlentú' gate dxelawe'.

³ Jesús bchebe' benne' ca', gunné':

—¿Bizr cheę na' le'e quebe dxuzuale dizra' da dxenná be'e Dios? Dxunle ca naca da zéajlele. ⁴ Dios gunné': "Gudapa ba lá'ana xra xrna'u." Cá'anqueze gunné': "Benne' nne' schanni' cheę xra xrne'e, le gute bėnnea'." ⁵ Le'e dxennale waca xę tu benne' xra xrne'e: "Quebe séquedá' bi gunna' le'e lawe' da ba guchebe lazra' gunézruja' Dios xúgute da dę chia'." ⁶ Dxennale che tu benne' dxune' caní québedxa dxun na ba xen gácalęe' xra xrne'e. Caní

dxunle le'e, dxuzuale chala'ala da bdxixruj be'e Dios, chee gunle ca naca da zéajlele. ⁷ Le'e, láweze dxunle da xrlátaje. Da li naca da gunná Isaías, bènea' bchálaje' waláz chee Dios, ca naca chee le'e, gunné':

⁸ Benne' caní dxelape' neda' ba lá'ana nen dxú'aze'.

Quebe dxelape' neda' ba lá'ana dute lázrdawe'.

⁹ Dácheze naca dxelúe lá'ane' neda'.

Da gulenná be'ene' bèneache naca na da ca' dxulusédene'.

¹⁰ Nadxa Jesús gunné' benne' ca', dxenné':

—Le xene, ne le chéajni'i. ¹¹ Da dxu'u na dxu'a bèneache quegá le na guxrinnaj na bèneache. Da dxedxuaj na dxu'a bèneache naca na da dxuxrinnaj na bèneache.

¹² Nadxa benne' ca' dxusede Jesús gulebigue' lau Le'. Dxelé'e Le':

—¿Nézenu' gulaca tula benne' xudau' fariseo ca' gate belenne' da gunnú'?

¹³ Jesús guzre' benne' ca':

—Bíteteze xágadau' da quebe guza Xra' zué' xabáa, welépeda'. ¹⁴ Le gusán benne' ca'. La chul-la zaj naque', ne dxulusi'e neza le sa' ljwezre' la chul-la ca'. Che tu la chul-la che'e le sa' ljwezre' la chul-la, dxúpaté' xelexixe' tu lu xedxu.

¹⁵ Nadxa Pedro guzre' Jesús:

—Bzéajni'i netu' ca naca chee da dxulé'e nigá.

¹⁶ Gunná Jesús:

—¿Cá'anqueze le'e quebe dxéajni'ile? ¹⁷ ¿Quebe nézele xúgute da dxu'u na dxú'adxu zeaj na le'edxu, na' te na' xedxuaj na? ¹⁸ Da dxedxuaj na dxú'adxu naca na da za' lu xichaj lázrdaudxu. Da nigá naca na da dxuxrinnaj na bèneache. ¹⁹ Lu xichaj lázrdau bèneache dxeledxuaj da dxezá lazre' da caléla, ca naca xel-la' wete benne', ne ca naca xel-la' zuale zru'ula benne' xula, ne ca naca da sban da dxelún bèneache, ne ca naca xel-la' gubán, ne xel-la' wen lazre', ne xel-la' wetupa dizra' bizruj. ²⁰ Da caní dxuluxrinnaj na bèneache. Che tu benne' quebe dxexibe ne'e ca da zéajlele gate dxawe' xeta, da nigá quebe dxuxrinnaj na le'.

Tu nu'ula zitu' dxéajle'e chee Jesús

(Mr. 7.24-30)

²¹ Nadxa bedxuaj Jesús na', zexíaje' chala'a naga zaj nababa xezre Tiro, ne xezre Sidón. ²² Tu nu'ula Canaán zué' na' ze'e dxebezre xe'e cúzrela Jesús, dxenné':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne cáitega dxezácabe'.

²³ Quebe bi bechebe Jesús. Nadxa belezrín benne' ca' dxusedene', ne gulata' xuene' Le', gulé'e Le':

—Bsel-la nu'ula nigá lawe' da ze'e dxebezre xe'e cúzrudxu.

²⁴ Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca zríla'du ca' zaj naníteba'.

²⁵ Gubiga nu'ula na' naga zua Jesús, ne bzu zribe' lau Le', ne dxé'e Le':

—Xran, gúcale' neda'.

²⁶ Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

²⁷ Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bízrujdu ca' dxelexruj zran naga dxelagu xránaba'.

²⁸ Nadxa Jesús guzre' le':

—Nú'uladu, da zrentę naca xel-la' dxeajlí lazre' chiu'. Gaca ca dxaca lazru'. Lu zra ná'queze bexaca zrí'ing' nú'uladu na'.

Jesús dxexune' benne' zante benne' we'

²⁹ Jesús guzé'e na', gudéę' dxu'a nísadau' cheę Galilea. Guluéne' tu lu xi'a, ne gudxé'e na'. ³⁰ Benne' zan belezrine' naga zua Jesús, zaj naché'e benne' zrinnaj ca', ne benne' la chul-la ca', ne benne' quebe dxaca xelenné', ne benne' zan zaj nadxugu ni'a na', ne zánedxa benne' we'. Buluzré'e benne' ca' lau Jesús, na' Le' bexune' le'. ³¹ Ca'an guca belexebane benne' ca' gate belelé'ene' dxelenné' benne' ca' quebe guca xelenné' nédxula, ne belexexaca benne' ca' gulaque' benne' ni'a na' dxugu, ne dxeledá benne' ca' gulaque' benne' zrinnaj, ne dxelelé'e benne' ca' gulaque' benne' la chul-la. Gulezú lawe' dxelúe lá'anę' Dios cheę benne' Israel ca'.

Jesús dxugawe' tapa cue' tu gaxúa benne' biu

(Mr. 8.1-10)

³² Nadxa Jesús gunné' benne' ca' dxusédenę'. Dxe'e le':

—Dxexache lazra' cheę benne' caní lawe' da ba zeaj chunna zra zrálene' neda' nigá, ne quebe bi de da xelawe'. Quebe dxaca lazra' xesel-la' le' cheę cheajxaque' lizre' quebe ne xelawe' cheę quebe xelate ni'a ne'e la neza.

³³ Nadxa benne' ca' dxusede Jesús gulé'e Le':

—¿Ájazra guntu' zréltentu' da xelagu cátitę benne' zan caní? Lataj nigá quebe nu chilá' benne' zua lizre' nigá.

³⁴ Jesús bchebe' benne' ca', dxenné':

—¿Bal-la xeta xtila nápale?

Benne' ca' belexechebe':

—Gazre na, ne xetu' chupa béladau'.

³⁵ Nadxa Jesús gunná bé'ene' benne' zan ca' xelebé'e lu xu. ³⁶ Guqué'e da gazre xeta xtila, ne béladu ca', na' guzre' Dios: "Xcalenu'." Nadxa bzúzruje' na, ne bnézruje' na benne' ca' dxusédenę', na' benne' ca' gulisie' na cheę benne' zan ca'. ³⁷ Xúgute' gulawe', ne belélajtęne'. Gudé na' bulusuzratę' gazre ga' da bízrujdu ca' zaj nagá'ana. ³⁸ Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'. ³⁹ Gudé na' Jesús bze' benne' zan ca' dizra', na' bexu'e lu da dxedá lawe' nísadau' zexiaje' naga nababa xezre Magdala.

16

Dxelenabe' Jesús gunę' tu xel-la' waca cheę xabáa

(Mr. 8.11-13; Lc. 12.54-56)

¹ Benne' xudau' fariseo ca', ne benne' xudau' saduceo ca' xjaque' naga zua Jesús cheę xuluxunéguene' Le'. Cheę le' na' gulenabe' Jesús gunę' tu xel-la' waca zrentę da za xabáa. ² Jesús bechebe' benne' ca':

—Xelate' zua gubizra dxennale le'e: "Gun chawe' wxre lawe' da da' beuj xrna zran xabáa." ³ Che zílala dxennale: "Quebe chawe' gun na'a zra lawe' da dá'le'e beuj xrna zran xabáa." Le'e dxul'é cuínale da quebe nácale. Dxácaqueze dxennale ca naca da gun zran xabáa. Quebe dxaca xuzájla'ale ca sa'yeaj da dxaca na'a zra. ⁴ Benne' wen da calela caní, benne' zaj nabéaj

xíchajé' Dios, dxelenabé' guna' tu xel-la' waca zrenté. Quebe xelexé'eng' xetú xel-la' waca. Welexé'eng' tuze da gaca na ca da guca cheé Jonás.

Nadxa bulucá'ana Jesús benne' ca', zjá'aque'.

Da dxelún benne' xudau' ca' da naca na ca cua zichaj cheé xeta xtila (Mr. 8.14-21)

⁵ Gate benne' ca' dxusede Jesús guladé' xechalá'a nísadau', na' gulal-la lazre' xelu'e chizre'. ⁶ Jesús guzre' le':

—Le nna'xque. Le guxúe cuínale ca naca cheé cua zichaj cheé xeta xtila cheé benne' fariseo ca', ne cheé benne' saduceo ca'.

⁷ Benne' ca' dxusede Jesús gulezú lawé' dxelé' ljwezre':

—Caní dxenné' lawe' da quebe núadxu xeta xtila.

⁸ Jesús dxeque be'ene', na' guzre' le':

—¿Bizr cheé na' dxennale naca na lawe' da quebe núale xeta xtila? Láteze dxéajlele chia'. ⁹ ¿Quebe ne chéajni'ile, ne quebe dxeajsá lázrele cheé da gazxu' xeta xtila da bgawa' gazxu' cue' chi gaxúa benne' biu, ne bal-la ga' becá'ale?

¹⁰ ¿Quebe dxeajsá lázrele cheé da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale? ¹¹ ¿Ájazra na' quebe dxeque be'ele quegá bchálaja' cheé xeta xtila gate gunnía' le guxúe cuínale ca naca cheé cua zichaj cheé xeta xtila cheé benne' fariseo ca', ne cheé benne' saduceo ca'?

¹² Nadxa guleque bé'ene' quegá guzre Jesús le' xuluxúe cuiné' cheé da naca cua zichaj cheé xeta xtila, san ca naca da dxulusede benne' fariseo ca', ne benne' saduceo ca'.

Pedro dxenné' Jesús naque' Cristo (Mr. 8.27-30; Lc. 9.18-21)

¹³ Gate bzin Jesús naga nababa xezre Cesarea da ben Filipino, na' bchebe' benne' ca' dxusedene':

—¿Nuzra na' dxelenná bénneache naca' neda', Benne' Gulje' Bénneache?

¹⁴ Na' benne' ca' gulenné':

—Bal-la benne' dxelenné' nacu' Juan, bénnea' bchue' bénneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz cheé Dios.

¹⁵ Nadxa guzre Jesús benne' ca':

—¿Gazra le'e? ¿Nuzra na' dxennale naca'?

¹⁶ Gunná Simón Pedro:

—Lue' nacu' Cristo, Zri'ine Dios ban.

¹⁷ Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'eng' lue' da nigá, san Xra' zua xabáa, Le' blé'eng' lue'. ¹⁸ Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajlí lazre' neda', na' xel-la' dxenná bea cheé da xriwe' quebe seque na gucu'uj na benne' ca'. ¹⁹ Neda' gunna' lue' da naca na zren xia cheé xel-la' dxenná bea cheé xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

²⁰ Nadxa Jesús gunná bé'eng' benne' ca' dxusedene' cheé quebe nu xelé'e naca Le' Cristo.

Jesús dxuchálaje' ca gaca gate gatie' (Mr. 8.31—9.1; Lc. 9.22-27)

²¹ Lu zra ná'queze guzú lau Jesús dxuzéajni'ing' benne' ca' dxusédenē' dxal-la' xexiájē' xezre Jerusalén, na' benne' gula ca', ne benne' xíchajē' ca' chee bxruze ca', ne benne' dxuluxuzájle'ē da nadxixruj bea Dios wulusaca zi'ē Le'. Na' guzre' benne' ca' dxusédenē' welute benne' Jerusalén ca' Le'. Nadxa gate gaca chunna zra xebanē'.

²² Nadxa Pedro guléajē' Jesús chalá'ala, ne guzú lawē' dxedil-le' Le', dxenné': —Dios quebe gu'ē lataj, Xran. Cabata' gaca chiu' da caní.

²³ Jesús bexéchajē', na' guzre' Pedro:

—Gucuasa cuita' neda', lue', da xriwē', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bēnneache dxulaba lazru'.

²⁴ Nadxa Jesús guzre' benne' ca' dxusédenē':

—Che nu benne' dxaca lazre' gaque' neda' tuze, dxal-la' guzúē' chalá'ala da naca chee', ne guzúa cuine' chee' gatiē', na' nadxa gaca xídalēne' neda'.

²⁵ Bēnnea' dxaca lazre' gapa chí'e xel-la' nabán chee' gunitiē' na. Bēnnea' gunitiē' xel-la' nabán chee' lawe' da dxunē' zrin chia', benne' nigá zrué'eng' xel-la' nabán du lazre'. ²⁶ ¿Bízraqueze ba neza naca na chee' tu benne' che gata' chee' xúgute' xel-la' gunní'a da dē lu xezr la xu nigá, na' cuía xi'ē lau Dios? Quebe bi gaca quizruj tu benne' chee' la bēnne' du xu'e lau Dios. ²⁷ Neda', Benne' Gulje' Bēnneache wida' xecha lasa nen xel-la' szren chee' Xra', ne nen gubáz chee' xabáa ca'. Nadxa xuzría chee' tu tu benne' ca naca da zaj nun tu tuē'. ²⁸ Da li dxapa' le'e, bal-la benne' zaj zre'ē nigá quebe xelatiē' cadxa xelelé'eng' neda', Benne' Gulje' Bēnneache, xida' xedajnná be'a.

17

Dios dxuché'ē ca dxenná' lau Jesús

(Mr. 9.2-13; Lc. 9.28-36)

¹ Ca gudé guca xrupa zra, na' Jesús guché'ē Pedro, ne Jacobo, ne Juan, bi biche Jacobo, na' bi cá'aze xjácálenē' Le' tu lau xi'a sibe. ² Na' Dios bche'ē ca dxenná' lau Jesús lówela benne' ca'. Lawe' guca tite na ca gubizra, na' zra lanē' guca na da chiche ca xel-la' naxaní'. ³ Na' benne' caní belelé'eng' Moisés, ne Elías, benne' gulezrá' gate nate, dxuluchálajlenē' Jesús. ⁴ Nadxa Pedro guzre' Jesús:

—Xran, cháwe'le'ē zúadxu nigá. Che dxaca lazru', guntu' chunna xu'u lágadau', tu chiu', ne tu chee' Moisés, ne tu chee' Elías.

⁵ Dxácatē dxenné' Pedro, bla' tu beuj da dxaca tite na, da gucu na benne' ca', na' lu beuj na' belennē' chí'i Dios, dxenné':

—Benne' nigá naque' Zri'ina' nazrí'itē' lazra', ne chee' Le' dxezaca ba lazra'. Chee' Le' le xene.

⁶ Gate belennē' da nigá, na' gulatē' sudxú'ala lu xu. Dxelezrébele'ē. ⁷ Nadxa Jesús gubigūē' naga zaj zre'ē, na' bte' benne' ca', ne guzre' le':

—Le chasa. Quebe zrébele.

⁸ Gate na' belenné'ē, québedxa nu belelé'eng'. Tuze Jesús zuē'.

⁹ Nadxa gate dxelexetájē' lu xi'a na', Jesús gunná' bé'eng' benne' ca', dxenné':

—Quebe nu guchálajle ca da ble'ele ca zrindxa zra neda', Benne' Gulje' Bēnneache, xebana' ládujla benne' gate.

¹⁰ Nadxa benne' ca' dxuséde Jesús buluchēbē' Le':

—¿Bizr chee' na' dxeleenná benne' ca' dxuluxuzájle'ē da nadxixruj bea Dios dxun na ba xen xelá' Elías nédxudxa ca xelá' Cristo?

11 Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca.

12 Neda' dxapa' le'e, ba bla' Elías, na' benne' ca' quebe belexúnbe'e le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulje' Bénneache.

13 Nadxa benne' ca' dxusede Jesús guléque be'ene' dxuchalaj Jesús ca naca chee Juan, bènea' bchue' bèneache nisa.

Jesús dxexune' tu bi biu dxe'ebe' chuna'

(Mr. 9.14-29; Lc. 9.37-43)

14 Gate belezrine' naga zaj zra' benne' zante, na' tu benne' gubigue' naga zua Jesús, ne bzu zribe' lau Le', dxenné':

15 —Xran, bexache lazre' zri'ina', dxe'ebe' chuna', ne da zrente da dx-
ezácabe'. Zánete' lasa ba xeajcházebe' lu xi', ne lu nisa. 16 Ba bedajgu'a-be' lau
benne' caní dxusédenu', na' quebe guca xelexuné'-be'.

17 Jesús bechebe':

—Le'e, benne' wen chupa lazre', ne benne' lázrdau zide'. ¿Bátate zúalena' le'e? ¿Bátate naca' zren lazre' nen le'e? Le cheajxri' bi cuide' na' nigá.

18 Nadxa Jesús gudil-le' be' xriwe' na', na' bebéaje' na lu bel-la' dxen chee bi cuide' na', na' zra ná'queze bexácatebe'.

19 Gudé na' benne' ca' dxusede Jesús gulenné' Le' chalá'ala, na' buluchebe' Le':

—¿Bizr chee na' quebe guca netu' xebéajntu' be' xriwe' na'?

20 Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la nápaie xel-la' dxeajlí lazre', lálcala naca na láteze ca naca tu bínnedau' chee mostaza, waca xele xi'a nigá: “Gucuasa nigá chéaju' xetú lataj”, na' xi'a na' wacuasa na. Quebe bi de da quebe gaca gunle che nápaie xel-la' dxeajlí lazre'. 21 Ca naca be' xriwe' caní, dxun na ba xen guchálajlele Dios, ne gunle gubasa chee séquele xebéajle be' xriwe' caní.

Jesús dxuchálaje' xecha lasa ca gaca gate gatie'

(Mr. 9.30-32; Lc. 9.43-45)

22 Dxácate na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bèneache. 23 Xelútie' neda', na' gate gaca chunna zra, xebana'.

Gate belenne' dizra' nigá, na' bewi'ine lázrele'ene'.

Da dxuluchízruje' bèneache chee xudau'

24 Gate Jesús ne benne' ca' dxusédene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchebe' le':

—¿Quebe dxizruj benne' dxusédene' le'e chee xudau'?

25 Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchízruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' walázr chee', u benne' zitu' ca'?

26 Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláZR chee' quebe xelízruje'. ²⁷ Na'a, chee' quebe nu guchá'adxu, guxiáj lu nísadau' na', ne guchize da na' dxeláleu' bela lu nisa na', na' bebéaj bela nedxu queŀu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeajtizruj na lau benne' ca'.

18

Nu benne' nácadxa blau xabáa

(Mr. 9.33-37; Lc. 9.46-48)

¹ Tu lasa gulebiga benne' ca' dxusede Jesús naga zue', na' buluchébe' Le':

—¿Nuzra benne' nácadxe' blau naga dxenná bea Dios?

² Nadxa Jesús gunné' tu bidau', na' bze'-be' lau benne' ca' dxusédene'.

³ Dxenné':

—Da lí dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa. ⁴ Ca'an naca, benne' nácadxe' blau naga dxenná bea Dios xabáa, naca benne' gaque' dxexruj lazre', ne xexaque' ca bidu nigá.

⁵ Benne' gape' ba lá'ana tu bidau' caní lu La' neda', néda'queza' gape' ba lá'ana.

Ca naca da dxun na gundxu dul-la

(Mr. 9.42-48; Lc. 17.1-2)

⁶ Na' gunná Jesús:

—Núteteze benne' gungé' gun tu bidu caní dul-la, bi dxeajlí lázrebe' neda', cháwela guchéajladxu lbé'e tu xiaj zi'i da dxutu, na' cheajchú'unadxu le' situj lu nísadau'. ⁷ Edxugúa bénneache lawe' da déle'e da dxun na xelún bénneache dul-la. Tu gátazqueze da caní, na' edxugúa bénneache dxelune' xelún bénneache dul-la. ⁸ Chee' le' na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpaté na'u, ne dxúpaté ni'u. ⁹ Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi' gabila, zua dxúpaté xiaj lau'.

Da dxulé'e na ca naca chee' zrila' naníteba'

(Lc. 15.3-7)

¹⁰ Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz chee' xabáa chee' bidu caní lau Xra' xabáa. ¹¹ Neda', Benne' Gulje' Bénneache, bla'a bedajselá' benne' zaj nanitie'.

¹² '¿Ájazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'ane' be tápalalaj chennu na' le'e xixre', na' cheajdilje' zrila' na' naníteba'? ¹³ Gate ba bezrelne'-ba', wabéle'edxene' chee' be tu na' quézcala chee' be tápalalaj chennu ca' quebe guleníteba'. ¹⁴ Cá'anqueze Xrale le'e, zue' xabáa, quebe dxaca lazre' nite netú bidu caní.

Ca dxal-la' gunite laudxu chee' le sa' ljwézredxu

(Lc. 17.3)

¹⁵ Na' gunná Jesús:

—Che bi bichu' dxunbe' chiu' da caléla, bchálajle tuze lebe', chee' xúnbeabe' da caléla da benbe'. Che xenbe' da dxu'u-be', na' ba bexacu' tuze bi bichu'. ¹⁶ Che quebe xenbe' da dxu'u-be', guché' tu chupa benne' chee' gaca chupa u chunna benne' xelexechebe' ca naca da dxu'u-be'. ¹⁷ Che quebe xenbe' chee' benne' ca', guzre ca naca benne' dxelezraga lu xudau'. Che quebe xenbe'

chee benne' ca, le guzúa-be' ca tu benne' quebe dxéajle'e chee Dios, u ca tu benne' dxuchízruje' waláz chee benne' zitu' ca'.

¹⁸ 'Da li dxapa' le'e, da guchéajle lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

¹⁹ 'Cá'anqueze dxapa' le'e, che chúpale le'e gácale tuze ca da nábase Dios, na' Xra' zua xabáa gunne' na. ²⁰ Naga zaj zra' chúpabe', u chúnname' zaj nazrágabe' lu La' neda', na' zúaqueza' neda' laduj lebe'.

²¹ Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunite lawa' cheebe'? ¿Gazre lasa?

²² Bechebe Jesús:

—Dxapa' lue', quegá gazre lasa, san ga xun chi da gazre lasa.

Benne' wen zrin quebe guca lazre' gunite lawe' chee le sa' ljwezre'

²³ Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelal-la benne' wen zrin chee'.

²⁴ Gate guzú lawe' dxucá'ana chawe' na, na' guleché'e lau le' tu benne' dxebague' chee' zane' cue' chi gaxúa dumí. ²⁵ Lawe' da quebe de chee benne' wen zrin na' da quízruje' xrané', na' gunná be'e xrané' ta'u benne' wen zrin na', ne zru'ule', ne zrí'ine' ca', ne ca nácaqueze da nape', chee gazruj da na' dxebague'. ²⁶ Nadxa bzu zribe benne' wen zrin na' lau xrané', na' guta' xuene' le', dxenné': "Xran, ben zren lazre' neda', na' quízrujqueza' ca naca na." ²⁷ Na' xrané' bexache lazre' le', ne bnite lawe' da na' dxebague' chee', ne bsané' le'. ²⁸ Gate benne' wen zrin na' bedxúaje', na' bezrague' xetú benne' wen zrin ljwezre', benne' dxebague' chee' látedau'. Na' gudele' lba bénnea', ne guzú lawe' dxusézxuje' chi'i bénnea', dxé'e le': "Gudziruj neda' da dxal-lu' chia'." ²⁹ Nadxa benne' wen zrin ljwezre' na' bzu zribe' lau le', ne guta' xuene' le', dxenné': "Ben zren lazre' neda', na' quízrujqueza' ca naca na." ³⁰ Bénnea' quebe guca lazre', na' guxíaje' xeajlu'e wen zrin ljwezre' na' lizre xia dxácate quízruje' da na' dxebague'. ³¹ Gate benne' wen zrin ca' xezícala guleque bé'ene' da nigá, na' belewí'ine lázrele'ene', na' xjaque' xeajleguezre' xrané' xúgute da ba guca. ³² Nadxa xrané' na' gunná bé'ene' xeajlenné' benne' wen zrin na', na' guzre' le': "Bi wen zrin calela. Neda' bnite lawa' chiu' ca naca da na' dxebagu' chia' lawe' da guta' xúenu' neda'. ³³ Cá'anqueze lue' dxal-la' xexache lazru' le sa' ljwezru' na' ca bēna' neda' bexache lazra' lue'." ³⁴ Xrané' na' bzrá'ale'e bēnnea', na' bdee' le' xel-la' zi' dxácate na' quízruje' ca naca da na' dxal-le' chee'.

³⁵ Nadxa gunná Jesús:

—Cá'anqueze gun Xra' zua xabáa cheele le'e che quebe gunite laule dute lázrdaule chee le sa' ljwézrele.

19

Da bchalaj Jesús ca naca chee benne' dxulusán ljwezre'

(Mr. 10.1-12; Lc. 16.18)

¹ Ca gudé bchalaj Jesús da caní, na' bezé'e xezre ca' zaj nababa Galilea, na' bezrine' chalá'ala naga nababa Judea, da zua chalá'ala xegu Jordán naga dxalaj gubizra. ² Benne' zan zjácálene' Le', na' bexunge' benne' zante, benne' we'.

³ Nadxa bal-la benne' xudau' fariseo gulebigue' naga zua Jesús chee xelebéajé' Le' dizra' chee gaca xelagu zrié' Jesús, na' buluchebe' Le':

—¿Waca nu benne' gusané' zru'ulé' ne chee biteteze da gune'?

⁴ Bechebe Jesús:

—¿Quebe ne gulábale le'e lu xiche lá'azxa da na' dxenná na: “Bennea' bene' benne' ca' nédxudaute bene' le' benne' biu, ne nu'ula”? ⁵ Cá'anqueze gunné': “Chee le na' benne' biu gusané' xra xrne'e chee gaque' tuze nen zru'ulé', na' dxupe' xelaque' ca tuze benne'.” ⁶ Caní naca na, québedxa zaj naque' chupe', san tuze benne' zaj naque'. Chee le na' quebe dxal-la' xelá'a bènneache da na' ba nuchaga Dios.

⁷ Nadxa buluchebe' Jesús:

—¿Bizr chee na' gunná be'e Moisés nu benne' gunézruje' zru'ulé' tu xiche da dxulé'e na belexelé'e, na' gusané' le'?

⁸ Jesús guzre' benne' ca':

—Caní bene' lawe' da gulaca lazrdau zizraj xra xrtaule. Moisés benne' lataj gusanle zru'ulale, san nédxudaute quebe guca na ca'. ⁹ Neda' dxapa' le'e, che tu benne' gusané' zru'ulé', ne quebe dxedálene' benne' biu xula, na' che xezálene' nu'ula xula, benne' nigá gune' dul-la súalene' nu'ula quebe naque' zru'ulé', na' che nu benne' biu xequé'e tu nu'ula nusán benne' chee', cá'anqueze gun dul-la bènnea' súalene' nu'ula quebe naque' zru'ulé'.

¹⁰ Nadxa benne' ca' dxusede Jesús gulé'e Le':

—Che ca' dxaca chee benne' zúalene' nu'ula, quebe dxal-la' súalentu' nu'ula.

¹¹ Jesús guzre' benne' ca':

—Quegá xúgute benne' gaca xelezí'e dizra' nigá, san tuze benne' ca' ba nun Dios chee' xelezí'e na. ¹² Zaj zra' benne' quebe dxelezúalene' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bènneache naca caní. Na' zaj zra' benne' dxelexegá'ane' cá'aze, quebe nu dxelezúalene' chee gaca xelune' zrin chee Dios, Bènnea' dxenná be'e xabáa. Benne' gaca si'e dizra' nigá dxal-la' si'e na.

Jesús dxenabe' gaca chawe' chee bidu ca'

(Mr. 10.13-16; Lc. 18.15-17)

¹³ Nadxa belezrín benne' lau Jesús zaj naché'e bal-la bidau' chee guzé ne'e bidu ca', ne nabe' Dios gaca chawe' cheebe', san benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. ¹⁴ Jesús guzre' le':

—Le güe bidu ca' lataj xelela'be' naga zua'. Quebe guzrúnnale-be', lawe' da benne' zaj naque' ca bidu caní xelu'e naga dxenná bea Dios xabáa.

¹⁵ Nadxa bzé Jesús ne'e lawe' bidu ca', na' gudé na' bezé'e lataj na'.

Tu benne' cuide' nape' xel-la' gunní'a

(Mr. 10.17-31; Lc. 18.18-30)

¹⁶ Tu benne' cuide' guxíaje' naga zua Jesús, na' bchebe' Le':

—Benne' Weséde chawe'. ¿Bi da xrlátaje dxal-la' guna' chee gapa' xel-la' nabán zeajlí canna?

¹⁷ Jesús guzre' le':

—¿Bizr chee na' dxu'u neda', benne' weséde chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca bdxixruj be'e Dios.

¹⁸ Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súaleñu' zru'ula benne' xula. Quebe cuanu'. Quebe nneu' da wen lazre' chee benne'. ¹⁹ Gudapa ba lá'ana xra xrna'u. Bzri'i le sa' ljwezru' ca nazri'i cuinu'.

²⁰ Benne' cuide' na' gunné':

—Xúgute da caní dxuna' nácatea' bídau'te. ¿Bízradxa quebe ne guna'?

²¹ Na' guzre Jesús le':

—Che dxaca lazru' gacu' benne' li lazre', bexíaj, xeajete ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

²² Gate benne' cuide' na' benne' da nigá, bezé'e dxexíaje lazre' lawe' da nápalé'e xel-la' gunní'a.

²³ Nadxa gunná Jesús, dxé'e benne' ca' dxusédene':

—Da li dxapa' le'e, stébelé'e naca chu'u tu benne' gunní'a naga dxenná bea Dios xabáa. ²⁴ Da xula dxapa' le'e, chadidxa gaca te tu bea', be dxebíá bèneache lu negue' tu xeche' zriche, quézcala chu'u tu benne' gunní'a naga dxenná bea Dios.

²⁵ Gate belenne' benne' ca' dxuséde Jesús da nigá, na' belexebánele'ene', na' buluchebe ljwezre':

—¿Nuzra la xca'?

²⁶ Jesús guné'e benne' ca', ne guzre' le':

—Da nigá quebe gaca xelún bèneache, san Dios waca guné' ca naca.

²⁷ Nadxa gunná Pedro:

—Xran, netu' ba bcá'anantu' ca naca da nápantu', ne zéajlentu' Lue'. ¿Bizra gápantu' xca'?

²⁸ Bechebe Jesús:

—Da li dxapa' le'e, ca lu zra na' gate na' xúgute xelexaca na cube, gate neda', Benne' Gulje' Bèneache, cue'a lataj chawe' chia' naga nna be'a, le'e na' ba gudálele neda' cué'quezele lu chazrinnu lataj naga nna beale, chee guchí'ale chee chazrinnu cue' benne' Israel, benne' judío ca'. ²⁹ Xúgute benne' ca' ba bulucá'ane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee', chee xelune' zrin chia', xelezí'queze' tu gaxúala na, ne xelezí'queze' xel-la' nabán zeajlí canna. ³⁰ Benne' zante zaj naca blau na'a xelaque' benne' bzebe, na' benne' zante zaj naca benne' bzebe na'a xelaque' benne' blau.

20

Da dxulé'e na ca naca chee benne' wen zrin ca'

¹ Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete cue' xezr la xu guzé'e lizre' che zílala, zéaje' zeajtíaje' benne' wen zrin ca' chee cheajlechibe' uva chee'. ² Bca'ana cháwelené' benne' wen zrin ca' quízruje' tu dumí lazruj chee tu zra, na' gusel-le' benne' ca' zeajleguene' zrin lu xezr la xu chee'. ³ Ca gudé na' guzé'e lizre' ca dxedá na, na' blé'ene' benne' zaj zre'e lawe' xi'a zaj nalátajze'. ⁴ Na' guzre' benne' ca': "Cá'anqueze le'e, le chjaca wen zrin lu xezr la xu chia', na' gunna' le'e da naca chawe'." Na' benne' ca' xjaque'. ⁵ Xrane na' guzé'e da xula wa gubizra, ne cá'anqueze dxexedá' chunna, ne tuze ca bene'. ⁶ Xetú du dxedá' gazxu' guxíaje' lawe' xi'a, na' blé'ene' zaj zra' na' benne' zaj nalátajzqueze', ne guzre' le': "¿Bizr chee na' zrale le'e nigá bedú zra quebe bi zrin dxunle?"

⁷ Gulenné': "Quebe nu ne xe netu' guntu' zrin chee'."

'Na' guzre' benne' ca': "Cá'anqueze le'e, le cheajén zrin lu lina chia', na' gunna' le'e da naca chawe'." ⁸ Gate gul-la' chizrela, xrane na' guzre' benne' xu'u lu ne'e zrin na': "Gunné benne' wen zrin ca', ne gudízruje', su lau' quízruju' benne' ca' belelá' bzébedxa, na' bzébetę quízruju' benne' ca' belelá' nédxute." ⁹ Nadxa belezrín benne' ca' belú'e lu zrin na' gate dxexedadxa gazxu', na' tu tu benne' ca' belezí'e lazruj chee' du naxá' lazruj tu zra wen zrin. ¹⁰ Gudé na' gate belezrín benne' ca' gulu'e nédxute lu zrin na', guléquene' xezezí'e da zrendxa, san cá'anqueze gulezí' tu tu benne' ca' lazruj tu zra wen zrin weaj.

¹¹ 'Gate gulezí'e na, na' gulezú lawe' dxelawe' zria lau xrane zrin na', ¹² dxelenné': "Benne' caní belelá' bzébedxa, tu chí'idau'ze ga belune' zrin, na' gudízrujquezu' benne' caní ca' gudízruju' netu', na' netu' bedú zra bentu' zrin, ne ca' naca da la chee' zra nigá bchaga launtu'."

¹³ 'Bechebe xrane na', dxę'e tu benne' ca': "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelená' lue' quízruja' lue' lazruj tu zra wen zrin? ¹⁴ Guzí' lazruj chiu', ne bexíaj. Neda' dxaca lazra' gunéruja' chee' benne' ca' belú'e bzébedxa ca da gudízrujqueza' lue'. ¹⁵ ¿Quebe gaca guna' ca da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje?"

¹⁶ Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunnía' benne' zan, san bábaze benne' ca' xelaque' blau.

Xecha lasa dxuchalaj Jesús ca gaca gate gatię'

(Mr. 10.32-34; Lc. 18.31-34)

¹⁷ Gate xu'u Jesús neza, zexíaje' Jerusalén, guléaje' cheeze benne' chazrinnu ca' dxusédenę', ne guzre' le':

¹⁸ —Dxelé'ele le'e ba zexíajdxu Jerusalén naga neda', Benne' Gulje' Bénneache, xuludé benne' ca' neda' lau benne' xíchaje ca' chee' bxruze ca', ne lau benne' ca' dxuluxuzájle'e da bdxixruj be'e Dios, na' xelechuge' chia' gatia'. ¹⁹ Xuludé' neda' lu na' benne' zitu' ca' chee' xelún le' chia', na' xelu'e neda', ne xuludé'e neda' xaga béguaj, san zra guxunne zra xebana'.

Da gunaba xrna Jacobo ne Juan

(Mr. 10.35-45)

²⁰ Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribe' lau Jesús, dxenabe' culuén. ²¹ Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabela chiu', ne xetube' xéglala.

²² Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute'?

Na' gulenabe':

—Wácantu'.

²³ Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chala'a xabēla chia', ne chala'a xéglala chia' quebe naca na chia' gunna' na le'e. Xra' gunézruje' na chee bi ca' ca da ba nucueze'.

²⁴ Gate xechi benne' ca' dxusede Jesús belenne' ca', na' belezré'e dxupa bi chee nu'ula na'. ²⁵ Jesús gunné' benne' ca', ne guzre' le':

—Ba nézele le'e ca dxelún benne' xíchaje chee xezr la xu ca', dxelenná bé'ene' benne' ca', na' benne' nácadxé' blau láduja benne' ca' dxelenná be'e, dxuchínene' xel-la' dxenná bea chee'. ²⁶ Le'e quebe dxal-la' gunle ca'. Benne' dxaca lazre' gaque' blau láduja le'e dxal-la' guné' zrin chee xezícadxale le'e, ²⁷ na' bēneea' dxaca lazre' gaque' xíchaje chee, dxal-la' gaque' wen zrin chee xúgutele le'e. ²⁸ Dخال-la' guné' ca bēna' neda', Benne' Gulje' Bēneache, quebe bida' chee nu gun zrin chia' neda', san bla'a chee guna' zrin chee bēneache, ne chee guzúa' xel-la' nabán chia' ca da quízruja' chee guselá' benne' zante.

Jesús dxexune' chupa benne' la chul-la

(Mr. 10.46-52; Lc. 18.35-43)

²⁹ Gate dxelexedxúaje' xezre Jericó, na' benne' zante zjálalene' Jesús.

³⁰ Naga dxeledé'e' zaj dxe' chupa benne' la chul-la dxu'a neza, na' gate belenne' dxedé Jesús na' gulebezre xe'e, dxelenné':

—Xran, Zri'ine David, bexache lazre' netu'.

³¹ Benne' zan ca' guledil-le' dxúpaté' na' chee xezeúe' zrize, san le' gulebezre xe'e zízrajdxa, dxelenné':

—Xran, Zri'ine David, bexache lazre' netu'.

³² Nadxa Jesús guleze', na' gunné' benne' la chul-la ca', na' bchebe' le':

—¿Bi dxaca lázrele guna' chee?

³³ Belexechebe benne' ca':

—Xran, dxaca lázrentu' xelé'entu'.

³⁴ Jesús bexache lazre' benne' ca', ne bte' xiaj lawe'. Na' belexelé'ete' benne' la chul-la ca', na' xjálalene' Jesús.

21

Ca da guca gate bexú'u Jesús Jerusalén

(Mr. 11.1-11; Lc. 19.28-40; Jn. 12.12-19)

¹ Gate belezrín Jesús, ne benne' ca' dxusédené' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédené' chee tu da xelune'. ² Dxe'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúaleba' leba'. Le sezre-ba', ne le che'e dxúpatēba' nigá.

³ Che nu benne' bi xe'e le'e, le xe'e: “Xránadxu nachinne' leba', na' la xesél-la'tequeze'-ba'.”

⁴ Da nigá guca na chee guxá ca da gunná benne' bchálaje' waláz chee Dios, gunné':

⁵ Le xe' benne' zaj zra' xezre Sión:

“Le nna', Benne' nna bé'ene' le'e ze'e naga zúale.

Dute xel-la' dxexruj lazre' zrie' tu burro bzrise'.

Zrie' tu búrrodau', zri'ine tu be dxua xua.”

⁶ Nadxa dxupa benne' ca' dxusede Jesús besía'que', ne belune' ca da ba gunná be'e Jesús le'. ⁷ Xeajlexri'e burro bzrise', ne zri'ineba', na' belezrúe' zra lane' cúzruba', na' guzría Jesús leba'. ⁸ Benne' zan ca' gulechílaje' zra lane' la

neza na', na' xebal-le' buluchibe' zina' da buluzale' la neza. ⁹ Benne' zjaque' lávela, ne benne' zá'aque' bzēbe gulezú lawe' dxelebezre xē'e, dxelenné':

—¡Gaca ba lá'azxa Zri'ine wenná bea David! ¡Ba neza zrentē naca na chee bñnea' ze'e waláz chee Xránadxu Dios! ¡Gaca ba lá'azxa Dios!

¹⁰ Gate guxú'u Jesús xēzre Jerusalén, ca naca bēnneache zaj zre'e na' beledxé'ena zrague', na' buluchebe ljwezre':

—¿Nuzra benne' nigá?

¹¹ Bal-la benne' ca' gulenné':

—Benne' nigá naque' Jesús, benne' dxuchálaje' waláz chee Dios, ze'e xēzre Nazaret da nababa Galilea.

Jesús dxuchi'e lu xudau'

(Mr. 11.15-19; Lc. 19.45-48; Jn. 2.13-22)

¹² Ca gudé na' guxú'u Jesús dxale'aj xudau' chee Dios, na' bebéaje' xúgute benne' wēte, ne benne' dxelá'awe' na'. Bdxixre' blag ca' chee benne' ca' dxuluché'e dumí, ne bdxixre' da ca' zaj dxe' benne' ca' dxelútiē' bgúgudu ca'.

¹³ Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bēnneache lawa' neda'”, san le'e ba nunle na ca tu lizre gubán.

¹⁴ Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexune' benne' ca'. ¹⁵ Belezrá' benne' xíchaje' ca' chee bxruze ca', ne benne' ca' dxuluxuzájle'e da nadxixruj bea Dios, gate na' belenné' ca dxelebezre xa'a bidu ca' lu xudau', dxelennabe': “¡Gaca ba lá'azxa zri'ine wenná bea David!” ¹⁶ Gulé'e Jesús:

—¿Dxennu' ca dxelenná benne' caní?

Bechebe Jesús:

—Dxenda' na. ¿Quebe ne gulábale le'e lu xiche lá'azxa naga naxúaj na chee da dxaca nigá? Dxenná na caní:

Ba bēnu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

¹⁷ Nadxa bca'ana Jesús benne' ca'. Bezé'e xēzre na', na' bezrine' xēzre Betania, naga bejgá'ane' xēla na'.

Jesús dxugu'e de' xaga higo

(Mr. 11.12-14, 20-26)

¹⁸ Che zílala ca zexíaj Jesús xēzre na', na' guduné'. ¹⁹ Zítu'la blé'eng' tu xaga higo dxu'a neza, na' gate bzrine' naga zua na, quebe bi da zixre chee na blé'eng'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete' xaga higo na'. ²⁰ Ca belelé'e benne' ca' dxusede Jesús da nigá, na' belexebánene', ne buluchebe' Jesús:

—¿Ájazra na' chadite' gubizre xaga higo nigá?

²¹ Bechebe Jesús:

—Da li dxapa' le'e, che nápale xel-la' dxeajli lazre', ne quebe gun chupa lázrele, quegaze da nigá gaca gunle ca da bēna' neda' chee xaga higo nigá, san waca xēle xi'a nigá: Gucuasa nigá, xeajsúa lu nísadau', na' gaca na. ²² Che dxeajli lázrele, na' xēzi'le bíteteze da návale Dios.

Xel-la' dxenná bea da xu'u lu na' Jesús

(Mr. 11.27-33; Lc. 20.1-8)

²³ Nadxa guxú'u Jesús lu chila xudau, na' dxácatę na' dxusédenę benne' zaj zre'e na', gulebiga naga zua Jesús benne' xíchaję ca' cheę bxruze ca', ne benne' gula cheę judío ca', na' buluchębe' Lę':

—¿Bi xel-la' dxenná bea napu' dxunu' da caní? ¿Núzraqueze bęnna lue' xel-la' dxenná bea nigá?

²⁴ Bechebe Jesús:

—Cá'anqueze neda' guchęba' le'e tu. Che xechębele da nigá, na' neda' xapa' le'e bi xel-la' dxenná bea napa' dxuna' da caní. ²⁵ ¿Nu benne' gusel-lę' Juan dxuchúę' bęnneache nisa? ¿Dios, che bęnneacheze?

Gulezú lawę' dxuluchálajlę ljwezre', dxeleńnę':

—Che nnadxu Dios gusel-lę' lę', na' xę'e dxi'u: “¿Bizr cheę na' quebe guxęajlę cheę?” ²⁶ Che nnadxu bęnneache gusel-lę' lę', dxal-la' zrębedxu bi xelún benne' zan ca' cheędxu dxi'u, lawę' da dxeleque xúgutę bęnneache bchalaj Juan na' waláz cheę Dios.

²⁷ Cheę lę na' gulę'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

Da dxulę'e na ca naca cheę chupa bi biu cheę tu benne'

²⁸ Na' guzre Jesús benne' ca':

—¿Aja dxęquele le'e cheę da nigá? Tu benne' zaj zra' chupa zrí'ingę' bi biu, na' guzre' tube': “Zrí'ina', guxíaj xęajęn zrin lu lina cheę uva chia.” ²⁹ Zrí'ingę' na' bechębebe': “Quebe dxaca lazra.” Ca gudę na' bęxíaje lázrebe', na' guxíajbe' xęajęnquezbe' zrin. ³⁰ Cá'anqueze xrabe' na' guxíaję' xęajnę'e xetube', ne guzre'-be', na' bi nigá bechębebe': “Waca, xrae. Na'a cha'a.” Quebe guxíajbe'.

³¹ ¿Núlabe' bi chupa caní bęnbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxę'e benne' ca':

—Da li dxapa' le'e, benne' wechizruj ca', ne nu'ula dxeledále benne' biu zantę xelexú'e naga dxenná bea Dios nédxudxa ca le'e ³² lawę' da bla' Juan, bedajlę'engę' le'e da naca xrlátaje, na' le'e quebe guxęajlę cheę'. Benne' wechizruj ca', ne nu'ula ca' dxeledále benne' biu zantę gulęajlę cheę'. Le'e, gate ble'ele da nigá, quebe bęxíaje lázrele cheę chęajlę cheę'.

Da dxulę'e na ca naca cheę benne' węn zrin calęla ca'

(Mr. 12.1-12; Lc. 20.9-19)

³³ Nadxa gunná Jesús:

—Le xene ca naca da nadxixruj bea nigá. Tu benne' xrane tu xęzr la xu guzę' lba uva ca', ne bęņę' le'aj cheę na. Bęņę' tu xędxu naga xelesię' uva ca', ne guchisę' tu xu'u sibe cheę gaca nu guxúę ca naca na. Na' bca'anę' na lu na' benne' węn zrin ca', ne guzę'e zęaję' zitu'. ³⁴ Gate bzrin zra xuluchibę' uva ca', na' gusel-lę' tu chupa bi węn zrin cheę' zęajlęxęzri'be' da dxal-la' xęzi' xrane na'. ³⁵ Benne' węn zrin ca' gulequę'e bi węn zrin cheę' ca'. Belúelę'e tube', ne belutię' xetube', na' xetube' buluzrię'-be' xiaj. ³⁶ Nadxa xrane na' gusel-ladęę' bi węn zrin cheę' bi zandxa ca nedxu. Benne' węn zrin ca' tuz ca bulusaquę' bi ca'. ³⁷ Naga xęajché'tequeze na gusel-lę' zrí'inequezę' lawę' da dxęquenę': Welapę' ba lá'ana zrí'ina'. ³⁸ Gate belelę'engę' zrí'ingę', na' benne' węn zrin ca' gulę' ljwezre': “Bi nigá xęzi' lu na'be' ca naca da caní. Du gute-be'

chee xegá'ana cheedxu da caní." ³⁹ Chee le na' gulele'-be', ne belexebéaje'-be' lu xezr la xu na', na' belutié'-be'.

⁴⁰ Nadxa Jesús bchebe' benne' ca':

—Gate xida xrane xezr la xu na', ¿ájazra guné' chee benne' wen zrin ca'?

⁴¹ Gulé'e Le':

—Gutié' benne' ca' dxeluné' da calela ne quebe xexache lazre' le'. Nadxa gucá'analeñe' xezr la xu na' benne' wen zrin xula, benne' xuluxunézruje' da dxal-la' xezí' le' gate zrin zra chee na.

⁴² Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na:

Xiaj na' da buluzúa benne' wen xu'u ca' chalá'ala,

le na' naca na xiaj blau na'a.

Da nigá naca na da ben Xránadxu,

ne naca na tu da dxexebánedxu.

⁴³ Chee le na' dxapa' le'e, Dios wequé'e da naca chee le'e naga dxenná be'e, na' gunézruje' na benne' xeluné' da naca chee xel-la' dxenná bea chee Dios.

⁴⁴ Che tu benne' cheajchazie' lawe' xiaj nigá waxúzruje', na' che xexruj na lawe' tu benne', na' guzuzruj na le'.

⁴⁵ Gate benne' xíchaje ca' chee bxruze ca', ne benne' xudau' fariseo ca' belenne' da bchalaj Jesús, guleque bé'eng' chee léqueze' bchalaj Jesús da caní.

⁴⁶ Gate gulaca lazre' xelele' Le', belezrebe' benne' xezre ca' lawe' da dxeléajle benne' ca' naca Jesús benne' dxuchálaje' waláz chee Dios.

22

Da dxulé'e na ca naca chee laní wechaga na'

¹ Guzú lau Jesús dxuchálajlene' benne' ca' xecha lasa tu da dxulé'e na, dxé'e le':

² —Ca da gaca xabáa naga dxenná bea Dios naca na ca da guca gate tu benne' wenna bea bene' tu laní wechaga na' chee bi biu chee'. ³ Gusel-le' benne' wen zrin chee' ca' cheajletupe' benne' ca'an gunné' lizre', san benne' ca' quebe gulaca lazre' xédajgaque'. ⁴ Nadxa gusel-ladxé' benne' wen zrin chee' ca', benne' xula. Dxe'e le': "Le xe benne' ca' gunnía', ba nucueza' xel-la' wagu. Ba gunná be'eda' xelútie' bezre ca', ne be dxelanne, na' ca naca na bache de. Dxal-la' xelele'e nigá naga zra wechaga na'." ⁵ Benne' ca' gunné' quebe gulaca lazre' xédajgaque'. Tu benne' ca' guxíaje' lu xezr la xu chee', ne xetú benne' guxíaje' wete. ⁶ Xebal-la benne' ca' gulele' bi wen zrin ca' chee wenna bea na', na' bulucháhalene'-be', ne belútete'-be'. ⁷ Nadxa wenna bea na' bzrá'ale'e, na' gusel-le' benne' chee' ca', benne' zjaca wedil-la xeaileguétie' benne' wete benne' ca', ne xeailezexe'te' lazre' benne' ca'. ⁸ Nadxa guzre' bi wen zrin chee' ca': "Bal-la bi de ba de chee wechaga na', na' benne' ca' gunnía' quebe zaj naca chee' xelele'e. ⁹ Le chjaca neza zri'a ca', ne le nne xúguté benne' lé'ele, chee xelele'e laní chee wechaga na'." ¹⁰ Benne' wen zrin ca' xjaque' la neza ca', na' xeailetupe' xúguté béneache, benne' belelé'ene' zaj naque' benne' calela, ne benne' xrlátaje. Ca'an guca guzrate' xu'u na' béneache. ¹¹ Nadxa wenna bea na' guxú'e xeaíné' benne' ca' gunné', na' blé'ene' tu benne' dxe'e na', quebe nazi'e zra lané' chee laní chee wechaga na'. ¹² Guzre' le': "Lue', benne', ¿ájazra guca guxú'u nigá, ne quebe nazi'u zra lanu' chee laní wechaga na'?" Béneea' gudxé'e zrize. ¹³ Nadxa wenna bea na' guzre' bi zaj zúabe' ga na', "Le guchéaj ni'a ne'e, ne le guzale' chalé'ajla naga

naca chul-la, naga cuezre', ne xáguxa'atē lazxe'." ¹⁴ Benne' zante gunnía', na' bábaze' zaj naca chee' xelu'e nigá.

Ca naca chee' dumí da dxuluchízuje'
(Mr. 12.13-17; Lc. 20.20-26)

¹⁵ Nadxa benne' fariseo ca' besía'que', ne belunē' tuze dizra' xelebéaje' Jesús dizra' chee' xelezéquene' xelawe' zría chee'. ¹⁶ Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, chee' zeajleguezre' Jesús:

—Benne' wesēde, nézentu' dxenníu' da li, ne dxusédenu' da li da zaj naca chee' Dios, ne quebe dxezrebu' bi xelenná bēneache, ne quebe dxenná'u ca da zaj napa bēneache. ¹⁷ Gunná xque. ¿Aja dxéquenu' lue'? ¿Dxun na ba xen quízrujdxu da dxuluchizruj benne' ca' nase-la César, benne' zitu', che cabí?

¹⁸ Jesús ba nézene' ca da dxelaca lazre' xelunē' chee', na' guzre' benne' ca': —Le'e, láweze dxunle da xrlátaje. ¿Bizr chee' na' dxuzúale da guzría xi na neda'? ¹⁹ Le gulé'e neda' dumí na' da dxízrujle chee' wechizruj.

Nadxa bulunézuje' Le' tu dumí chee' xezre Roma. ²⁰ Gate blé'eng' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

²¹ Belexechebe':

—Chee' César na'.

Na' guzre Jesús benne' ca':

—Le gunezruj chee' César da naca chee' César, ne le gunezruj chee' Dios da naca chee'.

²² Gate belenne' da nigá, na' belexebánene', ne besía'que' naga zua Jesús.

Da buluchebe' Jesús chee' benne' xelxebane' ládujla benne' gate
(Mr. 12.18-27; Lc. 20.27-40)

²³ Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe xelxebán benne' gate. Gulé'e Jesús:

²⁴ —Benne' wesēde, Moisés gunné' che tu benne' nuchaga ne'e gatie', ne quebe nu bidu chee' chilá', na' bi biche' dxal-la' guchaga na'abe' nen nu'ula gute benne' biu chee' na' chee' sua tu bi chee' benne' ba gutie'. ²⁵ Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zri'ine bi nedxu na' gúlajbe'. ²⁶ Cá'anqueze gúcaqueze na chee' bi gudxupe', na' gudé na' chee' bi guxunne', na' cá'anqueze guca chee' xúgute' bi gazre ca'. ²⁷ Ca gudé na', na' gute nu'ula na'. ²⁸ Gate xelxebán benne' gate, ¿nula bi gazre caní gácabe' benne' chee' nu'ula na' lawe' da tu tu bi gazre ca' bchaga na'abe' nen nu'ula na'?

²⁹ Jesús bechebe':

—Le'e dxeque zréajele lawe' da quebe núnbeale da naxúaj na lu xiche lá'azxa, ne ca naca xel-la' waca chee' Dios. ³⁰ Gate zrin zra xelxebán benne' gate, québedxa xuluchaga na' bēneache, ne québedxa xelútiē' bi nu'ula chee' xuluchaga na'abe'. Xelaque' ca zaj naca gubáz chee' xabáa chee' Dios. ³¹ Ca naca na che dxal-la' xelxebán benne' gate, ¿quebe ne gulábale le'e ca gunná Dios? Gunné': ³² “Neda' naca' Dios chee' Abraham, ne Dios chee' Isaac, ne Dios chee' Jacob.” Dios quebe naque' Dios chee' benne' gate, san naque' Dios chee' benne' ban, benne' ca' ba gulatie' lu xezr la xu nigá.

³³ Gate belenne' da nigá, na' belexebane benne' ca' ca naca da dxusēde Jesús.

*Da gunná be'e Dios da naca blau**(Mr. 12.28-34)*

³⁴ Gate benne' fariseo ca' guleque bé'eng' ba bzua zri Jesús benne' saduceo ca', na' belezrague'. ³⁵ Tu benne' ca', benne' naque' benne' dxuxuzájle'e da nadxixruj bea na, guca lazre' guxúe' ájala nne' Jesús. Bchebe' Le':

³⁶ —Benne' wesede, ¿bizrla da gunná be'e Dios naca blau?

³⁷ Bechébe Jesús:

—Dxal-la' zri'inu' Xranu' Dios duté xichaj lázrda'u, ne duté bénne'du xu'u, ne duté xel-la' dxéajni'i chiu'. ³⁸ Da nigá naca da nadxixruj bea da blaudxa, ne da dxundxa na ba xen. ³⁹ Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazrí'i cuinu'. ⁴⁰ Che tu benne' dxune' ca zaj naca chupa da nadxixruj bea caní, dxune' ca naca xúguté da nadxixruj bea da bzuj Moisés, ne ca naca xúguté da bulusede benne' ca' buluchálaje waláz chee Dios.

*¿Nuzra zri'ine naca Cristo?**(Mr. 12.35-37; Lc. 20.41-44)*

⁴¹ Dxácaté ne zaj nazraga benne' fariseo ca' na', ⁴² Jesús bchebe' le':

—¿Ájala dxéquele le'e chee Cristo? ¿Nuzra zri'ine naque'?

Benne' ca' gulé'e Le':

—Zri'ine David na'.

⁴³ Nadxa guzre Jesús benne' ca':

—¿Ájazra na' David gate bchálaje' chee Cristo dxé'e Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

⁴⁴ Xrana' Dios guzre' Xrana':

“Gudxé'e chalá'a xabela chia'

cadxa guzúa' zran ni'u benne' ca' quebe chawe' dxelélé'eng' Lue'.”

⁴⁵ ¿Ájazra naca na naca Cristo zri'ine David, che David ná'queze dxé'e Le': “Xrana'”?

⁴⁶ Quebe nu benne' guca xechébequeze' chee', na' ze lau zra na' netú québedxa nu bexazre bi guchébedxa Le'.

23*Jesús dxedil-le' benne' xudau' ca'**(Mr. 12.38-40; Lc. 11.37-54; 20.45-47)*

¹ Nadxa Jesús guzre' benne' ca' zaj zre'e na', ne benne' ca' dxusédene', ² dxenné':

—Benne' ca' dxuluxuzájle'e da nadxixruj bea Moisés, ne benne' xudau' fariseo ca' zaj nape' xel-la' dxenná bea xuluxuzájle'e da nadxixruj bea Moisés.

³ Chee le na' le guzúa dizra' chee benne' caní, ne le gun xúguté da xelenné'. Quebe gunle ca da dxelún benne' ca', lawe' da dxelenné' da ca' dxal-la'

gunle, na' quebe dxelúnqueze' na. ⁴ Dxelunge' xua zí'ilé'e da quebe dxelezeque xelexúe bénneache, ne dxelenná bé'eng' bénneache chee xelu'e na. Benne' ca' ne quebe dxuluzúe' na netú zrube ne'e chee da dxuluzúe benne' xubla.

⁵ Xúguté da dxelún benne' ca' naca na chee xelexé'e bénneache. Dxeledánnene' dxelu'e luzxgue', ne ne'e ladxe' laga naga naxúaj dizra' chee Dios, ne dxelácu'e zra lané' da zeajzé luzre na tunna. ⁶ Dxelaca lazre' xelexé'e naga ze láweze naga dxelawé', ne naga naca blau lu xu'u ca' naga dxeledubé'. ⁷ Dxelaca lazre' xelapa bénneache le' ba lá'ana la neza ca', ne xelé'e le': “Benne' wesede.”

⁸ Na'a le'e, quebe güele lataj nu xe le'e, “Benne' wesede”, lawe' da xúgutéle

nácale bi bíchele tule xetule, ne tuze Benne' dxusédene' le'e, neda', Cristo. ⁹Quebe nu xe le'e: Xrae, lu xezr la xu nigá, lawe' da zua tuze Xrale, Dios na' zue' xabáa. ¹⁰Quebe güele lataj nu xe le'e: Xran, lawe' da zua tuze Xránale, neda', Cristo. ¹¹Bénnea' dxune' zrin chee' xezícadxale le'e nácadxe' blau ládujla le'e. ¹²Bénnea' dxucá'ana szren cuine' wexéxrujla bénnea', na' bénnea' dxaque' dxexruj lazre' wexá'ane' szren.

¹³'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxsuséxujle neza chee' xabáa chee' quebe nu chu'u na. Lé'eequeze quebe dxú'ule, ne quebe dxuele lataj benne' dxelaca lazre' xelu'e.

¹⁴'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxe'gúale lizre nu'ula ca' ba gulate benne' biu chee', na' chee' xulé'ele xrlátaje cuínale, dxuwízrale Dios xcha lu xudau'. chee' le' na' da zrente da guzría xi na le'e.

¹⁵'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Le'e dxedale du ca naca xezr la xu nigá ne ca naca nísadau' chee' si' tu benne' ca naca da zéajlele chee' Dios, na' gate bache dxunle na, na' dxugápadxale bénnea' dul-la ca da nabágale le'e chee' cuía xi'e lu lataj ba xa'.

¹⁶'Edxugua le'e. La chul-la nácale, ne dxaca lázrele cu'ule benne' neza. Dxennale che tu benne' dxuzétaje' xudau', quebe dxun na le' ba xen, na' che dxuzétaje' oro chee' xudau', da na' dxun na le' ba xen. ¹⁷Nácale benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na? ¹⁸Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétaje' guna' da zria na lawe' cugu lá'azxa, da na' dxun na le' ba xen. ¹⁹Nácale benne' xala ne la chul-la. ¿Nula da naca na blaudxa, guna' na', u cugu lá'azxa na' da dxucá'ana na lá'azxa guna' na'? ²⁰Che nu benne' dxuzétaje' cugu lá'azxa, quegaze cugu lá'azxa dxuzétaje', san cá'anqueze dxuzétaje' ca naca da zria lawe na. ²¹Bénnea' dxuzétaje' xudau', quegaze xudau' na' dxuzétaje'. Cá'anqueze dxuzétaje' Dios zue' lataj na'. ²²Cá'anqueze benne' dxuzétaje' xabáa, dxuzétaje' lataj naga zria Dios, ne Diósqueze, Bénnea' zrie' lataj na' dxuzétaje'.

²³'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle chee' xudau' tu cue' chee' da chi cue' chee' xixruj weaj, ne chee' binnedu ca' chee' anís, ne chee' cumín. Quebe dxunle da zaj naca na blaudxa da zaj zua na lu da nadxixruj bea na, ca naca chee' gácale xrlátaje, ne chee' xexache lázrele le sa' ljwézrele, ne chee' chéajlele chee' Dios. Da caní zaj naca na da dxun na ba xen gunle, ne quebe gusanle da ca' ba dxunle. ²⁴La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', be' zrua lawe' da dxí'ajle, na' quebe dxeque be'ele dxí'ajle da naca ca tu camello, be' dxelaga benneache.

²⁵'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lázrdaule nácale ca gubán, ne benne' dxucude. ²⁶Benne' fariseo la chul-la. Nedxu le quíbe lu'ule zriga', ne xé'ena, na' cá'anqueze xegá'ana chawe' cúzrela.

²⁷'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtante cúzrela, na' lu'ule na nazrate na zrita chee' benne' gate', ne xúgute da

sgute. ²⁸ Ca'an nácale le'e. Cúzrela nala'le ca benne' xlátaje, na' lu lárdaule nazrate na da wen lazre', ne da calęla da dxunle.

²⁹ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxcú'anałe cháwedau' ba ca' naga zaj nagache benne' ca' buluchálaje' waláz cheę Dios, ne dxuele lechítaje lu'a cheę benne' xrlátaje ca'. ³⁰ Dxennale: "Chela netu' ba zúantu' gate na' gulezrá' xra xrtauntu' ca', quebe gúcalęntu' benne' ca' belutię' benne' ca' buluchálaje' waláz cheę Dios." ³¹ Gate dxennale ca', le'e dxexúnbeaquezle nácale zri'ine zre sua benne' ca' belutię' benne' ca' buluchálaje' waláz cheę Dios. ³² Dxusexúzrele dxunle ca da gulezú lau belún xra xrtáule ca'.

³³ 'Be snia nácale, ne xrtia be snia. ¿Ájazra gunle cheę gáchele lu da zi' da xa' cheę lataj ba xa'? ³⁴ Cheę le na' neda' sel-la' cheęle benne' ca' xuluchálaje' waláz cheę Dios, ne benne' sina ca', ne benne' ca' xulusédenę' le'e. Lé'eqeze gútele, ne gudá'le xaga bęguaj bal-la benne' ca', na' xebal-le' gunle le' zi' lu xudau' ca', na' gau zi' xúzrele le' tu xęzre xetú xęzre. ³⁵ Ca'an gaca, le'e bágale zria cheę xel-la' gute cheę xúgute benne' xrlátaje ca' belute xra xrtáule ca', gate guzú lau na nu bete Abel, benne' xrlátaje, ne naga bzrintę bętele Zacariás ládujla naga zua lataj lá'axza cheę xudau' ne lataj naga dxuluzezxe' be xixre'du ca', be dxelegú'ę lu cugu cheę Dios. ³⁶ Da li dxapa' le'e, bęnneache zaj zre'ę na'a xelebague' zria cheę xúgute da caní.

*Jesús dxebezre' cheę xęzre Jerusalén
(Lc. 13.34-35)*

³⁷ Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálaje' waláz cheę Dios, ne dxuzriále xiaj benne' gubáz ca' dxesel-la Dios naga zúale. Zane' lásate guca lazra' gutupa' zri'inele chia' ca dxun bedxuj, dxutúpaba' be dxé'enedau' zran xrlába', san quebe guca lázrele. ³⁸ Le nna'xque na'a, lízrele xelexegá'ana na dácheze, ³⁹ lawe' da dxapa' le'e, québedxa lé'ele neda' cadxa zrin zra nnale: La'axza naca bęnnea' ze'ę waláz cheę Xránadxu.

24

*Jesús dxennę' wabía xi' xudau'
(Mr. 13.1-2; Lc. 21.5-6)*

¹ Nadxa bedxúaj Jesús xudau', na' dxácatę dxexedxúaje' na', gulebiga benne' ca' dxusédenę' lau Jesús, ne gulezú lawe' dxuluchálajlene' Le' ca naca cheę xudau' na'. ² Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzria cuzru ljwezre na. Ca naca na cuía xi na.

*Ca naca da xelunna bea na ba za zra bzebe
(Mr. 13.3-23; Lc. 21.7-24; 17.22-24)*

³ Nadxa xjaque' lu xi'a naga zaj ze xaga olivo, na' gate dxe' Jesús na', benne' ca' dxusédenę' belezrine' lau Le', ne bagácheze buluchebe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsę cheę xęzr la xu nigá?

⁴ Nadxa Jesús guzre' benne' ca':

—Le guxúe cuínale cheę quebe nu si xę le'e. ⁵ Benne' zan xelexé'ę. Xelún lazre' xelennę' zaj naque' Cristo, na' xelexí xę'ę benne' zan. ⁶ Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca

da caní. Da caní quebe zaj naca na chee zra bzebe. ⁷ Tu cue' xezr la xu tíl-lale na xetú cue' xezr la xu, ne tu xezre tíl-lale na xetú xezre. Wata' gubina', ne welata' xízrawe' ca', ne wazrú' gáteteze na'. ⁸ Xúgute da caní zaj naca na naga dxezetú la ca da xelezaca bènneache.

⁹ 'Nadxa xuludé' le'e naga si sácale, na' bál-lale welútequeze'. Ca naca bènneache xelexúdené' le'e lawe' da dxunle da naca chia'. ¹⁰ Lu zra na' benne' zan québedxa xeléajle' chia', na' xelexúdené' le sa' ljwezre', ne xuludé' le sa' ljwezre' lu na' benne' guledábage' le'. ¹¹ Welelá' benne' zan benne' wen lazre'. Xelenné' dxuluchálaje' waláz chee Dios, na' xelezí xé'e benne' zante. ¹² Lawe' da gáta'le'e da caleja, benne' zan québedxa xelexrí'ing' le sa' ljwezre'. ¹³ Bénnea' zua chache' ca zrinte zra bzebe, la bènnea'. ¹⁴ Ca naca dizra' chawe' nigá ca nna bea Dios, zralaj na du gabí'i xezr la xu chee xelén ca naca benne' chee xúgute cue' xezr la xu, na' te na' cheajsé chee xezr la xu nigá.

¹⁵ 'Benne' gulabe' da nigá dxal-la' chéajni'ing'. Daniel, benne' bchálaje' waláz chee Dios, bzujaje' ca naca chee tu da dxezrá'a Dios, da dxuxrinnaj na. Gate lé'ele da nigá zua na lataj lá'azxa chee xudau', ¹⁶ nadxa benne' zaj zre'e xezre ca' zaj nababa Judea dxal-la' xuluzrúnnuje', ne chjaque' lu xi'a zren. ¹⁷ Che tu benne' ze' chju'u chee', quebe dxal-la' xexétaje' bí cheajxeléaje' lu xu'u. Dخال-la' guzrúnnujté'. ¹⁸ Benne' zue' le'e xixre' quebe dxal-la' xezrine' lizre' cheajxerzi'e xicha chee' da gácue'. ¹⁹ Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'. ²⁰ Le naba Dios quebe gun na ba xen guzrúnnujle beu' zaga, ne quegá lu zra dxupá'anale, ²¹ lawe' da che ca' gaca na, na' da zréntedxa da xelezí saca bènneache ca da quebe ne xelexaque' ca guzú laute zua xezr la xu nigá, ne québedxa bi xelexaque' caní ca te chee da nigá. ²² Che Dios quebe guzáchie' zra ca', na' netú quebe nu la. Guzáchie' na chee gácalene' benne' ca' bache nabéaje' chee'.

²³ Chee le na', quebe chéajle che nu xé le'e: "Le nna'xque, nigá zua Cristo", u che nu xé le'e: "Le nna' xque, na'la zue'." ²⁴ Caní dxapa' le'e lawe' da xelélé' benne' zan, benne' guzrí xé'e, na' xelenné' zaj naque' Cristo, u zaj naque' benne' dxuluchálaje' waláz chee Dios, na' da zrente xululé'eng', ne xelune' xel-la' waca zren ca' chee xelezí xé'e benne' ca' ba nabéaj Dios. Caní xelune' che xelexéque'. ²⁵ Ba bchálajlena' le'e caniqueze na'a quebe ne gaca na. ²⁶ Chee le na', che nu xé le'e: "Le nna'xque, na' zue' le'e xixre'", quebe chéajle na', u che nu xé le'e: "Le nna'xque, lu xu'u nigá zue'", quebe chéajle. ²⁷ Ca dxun tu xesa guziu', dxépe na naga dxalaj gubizra, na' dxelé'edxu na naga dxebía gubizra, ca'an gaca gate xida' neda', Benne' Gulje' Bénneache. ²⁸ Gáteteze de tu da nate, na' dxexezzraga laba ca'.

Ca da gaca gate ba zua xelá' Benne' Gulje' Bénneache

(Mr. 13.24-37; Lc. 21.25-33; 17.26-30, 34-36)

²⁹ Na' gunná Jesús:

—Gate bache guca zra na' gate xelezaca zi' bènneache, nadxa gubizra chulla na naga zua na, na' beu' quebe gusení na, na' belaj xelexruij na, na' xelexrízequeze ca naca da zaj naca na szren da dxeledá' lu be'. ³⁰ Nadxa lé'ele zran xabáa da gulé'e na ba zua xelá'a neda', Benne' Gulje' Bénneache, na' ca naca bènneache zaj zre'e xezr la xu xelexézequeze'. Nadxa xelélé'eng' neda', Benne' Gulje' Bénneache, zezá'a lu beuj zran xabáa, zue' neda' duté xel-la' dxenná bea, ne da xabáa. ³¹ Nadxa sél-laqueza' gubáz chee xabáa chia' ca', na' xulucuzre' zizraj lúzuba' chee xuluxutupe' benne' ca' ba nabéaja' chia' dapa saca chee xezr la xu nigá, ne du ca naca xezr la xu nigá.

³² 'Le gusede ca naca da dxulé'e xaga higo. Gate dxelexedxé'ene zruze na, ne dxezría na laga' dxe'ene, ba nézele ba za xaca beu' la. ³³ Cá'anqueze gate lé'ele dxelaca xúgute da caní, dxal-la' nézele gágute ba zua cheajsé chee xezr la xu, ne ba zua gaca na. ³⁴ Da li dxapa' le'e, xúgute da caní xelaca na nédxula gate quebe ne xelate bénneache zaj zre'e lu zra na'. ³⁵ Xabáa ne xezr la xu weledé chee na. Dizra' chia' quebe te chee na.

³⁶ 'Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zri'ine Dios. Tuze Xradxu Dios nézene' gate zrin zra na'.

³⁷ 'Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bénneache. ³⁸ Ca lu zra ca' gate quebe ne gun Dios nisa xiuj da guzria xi na bénneache, gulezrá' bénneache ca' dxelé'aj dxelawe', ne dxuluchaga ne'e, ne dxulunézruje' zrí'ine' ca' chee xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazí le na arca. ³⁹ Quebe guleque bé'ene' ca da dxal-la' gaca na, cadxa bzrin zra guca xiuj na', ne bête na ca naca benne' ca'. Cá'anqueze gaca gate xelá'a neda', Benne' Gulje' Bénneache. ⁴⁰ Ca lu zra ca' xelezrá' chupa benne' biu le'e xixre'. Tue' xeché'e, na' xetúe' xegá'ane'. ⁴¹ Xelezrá' chupa nu'ula dxelútue'. Tue' xeché'e, na' xetúe' xegá'ane'.

⁴² 'Le sua le'e ban lazre' lawe' da quebe nézele bi zra xelá'a neda', Xránale. ⁴³ Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee cuane'. ⁴⁴ Chee le' na', le sua le'e ban lazre' lawe' da xelá'a neda', Benne' Gulje' Bénneache, gate québela dxéquele ca'.

Benne' wen zrin li lazre', ne benne' wen zrin quebe naque' li lazre'

(Lc. 12.41-48)

⁴⁵ Na' gunná Jesús:

—¿Nuzra na' benne' wen zrin li lazre' ne dxéajni'ine', bénnea' xrané' dxucá'analene' le' benne' zaj zre'e lizre' chee gunézruje' da xelawe' gate zrin zra chee na? ⁴⁶ Ba neza naca na chee benne' wen zrin na', gate xezrín xrané', lé'ene' le' dxune' ca naca da nabague'. ⁴⁷ Da li dxapa' le'e, xrané' gucá'analene' le' ca naca da nape'. ⁴⁸ Che benne' wen zrin na' gaque' benne' wen da calela, ne guéquene' quebe xelá' ze xrané', ⁴⁹ ne che su lawe' gusaca zi'e xezícala benne' wen zrin ca', ne xi'aj gágulene' benne' dxelezuzre', ⁵⁰ nadxa xrané' xezrine' zra gate québela dxebeze'. Gaca na zra quebe nézene', ⁵¹ na' gusaca zi'le'e le'. Chugue' chee' gaque' tuze benne' ca' dxelune' láweze da xrlátaje. Cuezre', ne xáguxa'ate' lazxe'.

25

Da dxulé'e na ca naca chee chi nu'ula cuide'

¹ Gunná Jesús:

—Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Gulequ'é xi' chee' ca', chee chjaque' laní chee wechaga na', dxelebeze' bátala xelá' benne' wechaga na'. ² Gazxu' nu'ula caní gulaque' gat lazre', na' xegaxxu' nu'ula caní zaj naque' ban lazre'. ³ Nu'ula ca' quebe zaj naque' ban lazre' belú'e xi' chee' ca', san quebe belú'e da za zxezxe na da xelegué'e lu xi' chee' ca'. ⁴ Nu'ula ban lazre' ca' belú'e xi' chee' ca', ne da za zxezxe na da xelegué'e na. ⁵ Lawe' da guzré benne' wechaga na', na' gulaca wase ca zaj naque', na' xúgute' gulasie'. ⁶ Dxela ben

tu chi'i benne' dxebezre xē'ē, dxenné': "Ba za' wechaga na'. Le dxuaj si' lu na'le le'." ⁷ Xúgute nu'ula cuide' caní gulase', na' gulezú lawe' bulugale' xi' chee' ca'. ⁸ Nadxa gazxu' nu'ula ca' quebe zaj naque' ban lazre' gulé'ē gazxu' nu'ula ban lazre' ca': "Le gunna late' da za zxezxe na cheentu', lawe' da ba dxalexula xi' cheentu'." ⁹ Nu'ula ban lazre' ca' belexechebe': "Quebe gaca, lawe' da che gúnnantu' late' cheele, quebe gaca na da dxechínentu' netu', ne da dxechínnele le'e. Le chjácala naga dxutiē' na, ne le cheajxrí cheele." ¹⁰ Dxácate zjaca nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'ē nen le' lu laní chee' wechaga na', na' bsezxuj dxa xu'u na'. ¹¹ Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'." ¹² Le' bechebe': "Cabata'. Da líqueze quebe núnbe'a le'e."

¹³ Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

Da dxulé'e na ca naca chee benne' gulezi'ē dumí

¹⁴ Na' gunná Jesús:

—Ca gaca chee' benne' xelu'ē naga dxenná bea Dios xabáa, naca na ca da guca gate tu benne' zue' chee' se'ē chéaje' zitu', na' gunné' bi wen zrin chee' ca', ne bcá'anale' bi wen zrin ca' dumí chee'.

¹⁵ "Tu bi ca' bnéruzje' gazxu' cue' dumí, na' xetube' bnéruzje' chupa cue' dumí, na' xetube' bnéruzje' tu cue' dumí. Bnéruzje' chee' tu tube' ca da xelezéquebe' xuluchínebe' na. Nadxa guzé'ē zéaje' zitu'. ¹⁶ Bi wen zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. ¹⁷ Cá'anqueze bi wen zrin na' guzi'be' chupa cue' dumí, bezi'be' xechupa cue' dumí. ¹⁸ Bi wen zrin na' guzi'be' tu cue' dumí na' guxíajbe', ne bcáchebe' dumí chee' xránabe' tu lu xedxu da benbe' lu xu.

¹⁹ Zane' iza ba guca gate bezrín xrane bi wen zrin ca', na' guzú lawe' dxezi'ē da bdee' lu na' bi wen zrin ca'. ²⁰ Nedxu bzrin bi wen zrin na' guzi'be' gazxu' cue' dumí, na' bnéruzje' xránabe' xegazxu' cue' dumí, na' gúzrebe' le': "Xran, bennu' neda' gazxu' cue' dumí. Nigá dē xegazxu' cue' da bezi'a nen dumí chiu'." ²¹ Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubéle'ē." ²² Gudé na' bzrin bi wen zrin na' guzi'be' chupa cue' dumí, na' gunabe': "Xran, bennu' neda' chupa cue' dumí. Nigá dē xechupa cue' da bezi'a nen dumí chiu'."

²³ Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubéle'ē." ²⁴ Gate bzrin bi wen zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné' xue, ne dxezi'u da quebe guzu', ne dxexeca'u da quebe besiu'. ²⁵ Chee' le' na' bzreba', na' guxá'a xeajcáchia' dumí chiu' lu xu. Nigá dē da naca chiu'." ²⁶ Na' xránabe' guzre' lebe': "Nacu' bi wen zrin calēla, ne zrawede. Ba nézqueznu' dxezi'a da quebe guza', ne dxexecá'a da quebe besia'. ²⁷ Chee' le' na' la xju'u dumí chia' na' lu na' benne' dxelízruje' chee' dumí da dxuluchínene', na' gate za' neda', na' xezi'a da naca chia' nen da belezi'ē." ²⁸ Nadxa guzre' benne' ca' zaj zre'ē na': "Le xecá'a dumí na' da núxrube', ne le gunezruj na' bēnea' nape' chi cue' dumí. ²⁹ Benne' nape' wazidxe' da zréndxa, na' benne' quebe nape', ca late' da du na' nape' wecá'a na. ³⁰ Ca naca bi wen zrin

nigá, bi wedegún, le xebéaj-be' chalé'ajla naga naca chul-la, naga cuézebe', ne xáguxa'atę lázxabé'."

Ca gun Dios gate guchi'e cheę bénneache zaj zře'e xęzr la xu

³¹ Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz cheę xabáa chia', na' cué'queza' lataj naga nna be'a, da naca na da xabáa. ³² Na' bénneache cheę xúgute cue' xęzr la xu xelexezrague' lawa' neda', na' xebéaja' cha cheę' ca dxun benne' dxuxúe' zrila'. xebéaje' chibudu ca' ládujla zrila' ca'. ³³ Guzrá'a benne' ca' zaj naca zrila' chia' chalá'a xabęla chia', na' benne' ca' zaj naca ca chibudu ca' guzrá'a le' chalá'a xęglala chia'. ³⁴ Nadxa xapa' benne' ca' zaj zra' chalá'a xabęla chia': "Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' cheęle gate na' bęne' xęzr la xu nigá. ³⁵ Caní dxaca lawe' da guduna', na' bgágule neda'. Gubíleda', na' bęnnale da gu'a. Gudá' ca tu benne' xu'e neza, na' gulu'ule neda' lízrele. ³⁶ Bxázzreda' zra lana' gácua', na' bgácule neda'. Quebe chawe' guzúa', na' bedajnábale neda'. Guxu'a lizre xia, na' bedajnábale neda'." ³⁷ Nadxa benne' xrlátaje caní xelenné': "Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebilenu', na' bęnnantu' da gu'u? ³⁸ ¿Bata blé'entu' Lue' ca tu benne' xu'e neza, na' gulú'untu' Lue' lízrentu'? ¿Bata blé'entu' Lue' dxexázzrenu' zra lanu', na' bgácuntu' Lue'? ³⁹ ¿Bata bęnentu' quebe chawe' zu', u xu'u lizre xia, na' bedajnábantu' Lue'?" ⁴⁰ Neda' xechęba': Da li dxapa' le'e, ca da bęnle cheę bęnnedu caní, benne' zaj naca dxexruj lazre', cheę néda'queza' bęnle ca'.

⁴¹ Nadxa neda', Benne' Wenná Bea, xapa' benne' ca' zaj zra' chalá'a xęglala chia': Le cuasa cuita' neda', le'e, nácale wen da calela lau Xra'. Le hjaca lu xi' cheę lataj ba xa' da nabeza na cheę da xriwe', ne cheę gubáz cheę na ca'. ⁴² Caní dxaca lawe' da guduna', na' le'e quebe bęnnale da gawa'. Gubíleda', na' quebe bęnnale da xí'aja'. ⁴³ Gudá' ca tu benne' xu'e neza, na' quebe gulu'ule neda' lízrele. Bxázzreda' zra lana' gacua', na' quebe bgácule neda'. Quebe chawe' guzúa' ne guxu'a lizre xia, na' quebe bedajnábale neda'. ⁴⁴ Nadxa benne' ca' xelęqueze' neda': "Xran, ¿bata blé'entu' Lue' dxedunu', u dxebilenu', u xu'u neza, u dxexázzrenu' zra lanu', u quebe chawe' zu', u xu'u lizre xia, na' quebe gúcalentu' Lue'?" ⁴⁵ Neda', benne' wenná bea, xechęba': Da li dxapa' le'e, lawe' da quebe bi bęnle cheę bęnnedu caní, benne' zaj naca dxexruj lazre', quebe bi bęnle cheę néda'queza'. ⁴⁶ Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajli canna.

26

Dxelilaje' ájala xelęle' Jesús

(Mr. 14.1-2; Lc. 22.1-2; Jn. 11.45-53)

¹ Gate bexuzre bchalaj Jesús caní, na' guzře' benne' ca' dxusédene':

² —Ca ba nézquezle, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaje' bénneache cheę' lu xęzr la xu Egipto, na' neda', Benne' Gulje' Bénneache, xuludęe' neda' lu na' benne' xuludęe' neda' xaga bęguaj.

³ Ca lu zra na' benne' xíchaje ca' cheę bxruze ca', ne benne' dxuluxuzájle'e da bdxixruj Moisés, ne benne' gula sina ca' cheę judío ca', belezrague' chalé'aj

chee xu'u zaca chee Caifás, bxruze blau. ⁴ Na' belíaję' ájala xełęłę' Jesús lu da wen lazre' chee xelútię' Le'. ⁵ Gulenné':

—Quebe gundxu na lu zra laní nigá, chee quebe xeledábaga benne' ca' dxi'u.

Tu nu'ula dxegu'e Jesús da dxelá zixre

(Mr. 14.3-9; Jn. 12.1-8)

⁶ Zua Jesús xezre Betania lizre Simón, bėnnea' güé'ene' we' guzru'. ⁷ Bzrin tu nu'ula naga zua Jesús, nu'ę tu zruágadau' da naca na xiaj alabastro, ne nazrate na da dxelá zixre da zácale'ę na. Gate na' dxe' Jesús ga dxelawe', na' nu'ula nigá gulu'ę na xichaj Jesús. ⁸ Gate belelé'e benne' ca' dxuseđe Jesús da nigá, na' belezre'ę, ne gulezú lawe' dxelenné':

—¿Bizr chee na' guzría xi' da nigá? ⁹ Da nigá waca la gudá'u na sí'adxu da zrente, chee gácaleđxu benne' xache' ca'.

¹⁰ Jesús benne' da nigá, na' guzre' benne' ca':

—¿Bizr chee na' dxunle nu'ula nigá zeđe? Da nigá bene' naca na tu da xrlátaje. ¹¹ Benne' xache' ca' tu zrázqueze' ládujla le'e, na' neda' quegá tu súaleza' le'e. ¹² Ca naca da ben nu'ula nigá, gulu'ę da zixre na' bel-la' dxen chia', naca na da xucá'ana chawe na neda' chee zra gachia' lu xęđxu ba. ¹³ Da li dxapa' le'e, gáteteze xuluchálaje' dizra' chawe' chia' nigá du gabí'i xęzr la xu, na' zralajqueze ca da ben nu'ula nigá, chee cheajlesá lazre' bėnneache le'.

Judas dxexębe lazre' gudęę' Jesús

(Mr. 14.10-11; Lc. 22.3-6)

¹⁴ Nadxa tu benne' chazrinnu ca' dxuseđe Jesús, bėnnea' le' Judas Iscariote, guxiáję' xęajchálajlene' benne' xichaję ca' chee bxruze ca'. ¹⁵ Guzre' le':

—¿Ajate gúnnale neda' che ca' gudęa' Jesús lu na'le?

Nadxa benne' ca' gulízruje' le' chi dxua dumí plata. ¹⁶ Ca lu zra na' guzú lau Judas dxexilaje' ájala gune' gudęę' Jesús lu na' benne' ca'.

Da dxágudxu chee xucúbedxu ca guca gate gute Xránadxu

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Zra nedxu chee laní na' gate na' dxelawe' xeta xtila da quebe nachixre cua zichaj chee na, benne' ca' dxuseđe Jesús belezrine' lau Le', na' buluchebe' Le':

—¿Gazra dxaca lazru' gucuęzentu' da gágudxu chee laní pascua chee benne' judío?

¹⁸ Jesús guzre' le':

—Le chjaca lu xezre na', naga zua lizre tu benne', na' le xę'ę: “Bennea' dxuseđene' dxi'u dxenné': Zra chia' gatia' ba zua gágute, na' lizru' lue' gawa' chee Laní Pascua tu zren nen benne' ca' dxuseđeda'.”

¹⁹ Benne' ca' dxuseđe Jesús belune' ca da gunná bé'ene' le', na' bulucueze' da xelawe' chee Laní Pascua.

²⁰ Gate gula chizrela, na' gudxé' Jesús ga gawe' tu zren nen benne' ca' dxuseđene'. ²¹ Dxácate' na' dxelawe', guzre Jesús benne' ca':

—Da li dxapa' le'e, tule le'e naca bėnnea' gudęę' neda' lu na' benne' ca' dxelune' da calęla.

²² Nadxa benne' ca' belexewí'inele'ę, na' gulezú lawe' tu tue' dxuluchebe' Jesús:

—Xran, ¿quebe naca neda'?

²³ Na' bechebe Jesús:

—Bénnea' dxudé ne'e lu xé'ena tu zren nen neda', benne' na' gudé'e' neda'.
 24 Neda', Benne' Gulje' Bénneache, waxá'a naga dxal-la' gatia' ca naxúaj na lu xiche chee Dios, san edxugúa bénnea' gudé'e' neda'. Cháwedxa naca la quebe gulaj bénnea'.

25 Nadxa gunná Judas, bénnea' gudé'e' Jesús, dxenné':

—Benne' dxusede, ¿quebe naca neda'?

Na' bechebe Jesús, gunné':

—Awe', lue' na'.

26 Dxácatē dxelawē', Jesús guqué'e' xeta xtila, na' guzre' Dios: "Xcalenu'." Gudé na' búzruje' na, na' bnézruje' na benne' ca' dxusédene', dxenné':

—Le gagu. Da nigá naca na bel-la' dxen chia'.

27 Gudé na' guqué'e' tu zriga', na' guzre' Dios: "Xcalenu'", na' bnézruje' na benne' ca', dxenné':

—Le xi'aj xúgutēle da xuzru lu zriga' nigá. 28 Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne chee benne' zantē chee gunite lau Dios dul-la zaj nabaga benne' ca'. 29 Dxapa' le'e, québedxa xí'aja' ca naca xrise uva nigá ca zrindxa zra xí'aja' da cube tu zren nen le'e naga dxenná bea Xra'.

Jesús dxenné' nna Pedro quebe núnbe'e' Le'
 (Mr. 14.26-31; Lc. 22.31-34; Jn. 13.36-38)

30 Ca gudé belul-le' chee Dios, na' gusiá'que' zjaque' lu Xi'a Xaga Olivo Ca'.

31 Nadxa Jesús guzre' benne' ca':

—Xúgutēle le'e gusán lázrele neda' na'a zre', lawe' da naxúaj na lu xiche chee Dios, dxenné': "Gutia' benne' dxuxúe' zrila', na' zrila' ca' xelase dínnajba'."

32 Gate te xebana' neda', cha'a neda' ga nababa Galilea nédxudxa ca le'e.

33 Nadxa bechebe Pedro:

—Lácala xúgutē benne' caní xulusán lazre' Lue', quebe guna' neda' ca'.

34 Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

35 Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'. Cá'anqueze gulenná xúgutē benne' ca' dxusede Jesús.

Jesús dxuchálajlēnē' Dios naga zaj zxe' xaga olivo ca' nazí le na Getsemaní
 (Mr. 14.32-42; Lc. 22.39-46)

36 Nadxa bzin Jesús nen benne' ca' dxusédene' tu lataj nazí le na Getsemaní, na' guzre' le':

—Le cue'e nigá dxácatē cha'a neda', guchálajlēna' Dios.

37 Jesús guché'e' Pedro, ne dxúpatē zri'ine Zebedeo, na' guzú lawē' bewí'inelē'ēnē' ne guzúalē'e' stebe. 38 Nadxa guzre' benne' ca':

—Dxewí'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

39 Nadxa Jesús guzre' zéajē' xelate' caníladxa, na' gutē' sudxú'ala lu xu, ne bchálajlēnē' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

40 Nadxa bezrín Jesús naga zaj zra' benne' ca' dxusédene', na' blé'ēnē' benne' ca' dxelásiē', na' guzre' Pedro:

—¿Quebe gúcale le'e quíchale bchigala nen neda' tu chí'idau'ze? ⁴¹ Le nnaze, ne le guchálajle Dios chee quebe gun zréaje da xriwe' le'e. Da li bénne'du xu'ule dxaca lázre'le'e na, san lu belá' dxen cheele dxate ni'a na'le.

⁴² Da gudxupe' lasa guxíaj Jesús bchálajlene' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

⁴³ Ca gudé na' bezrine', ne belé'eng' benne' ca' dxusédene', dxelásié' lawe' da ba dxelezrude' lawe' dxelaca wásele'e. ⁴⁴ Bca'ane' benne' ca', guzé'e zéaje' bchálajlene' Dios da guxunne' lasa, na' gunnáqueze' ca da ba gunné' ca'an bache. ⁴⁵ Nadxa bezrine' naga zaj zra' benne' ca' dxusédene', na' guzre' le':

—Le gase na' lu, ne le xezí' lazre'. Ba bzrin zra gate neda', Benne' Gulje' Bénneache, tea' la na benne' dul-la ca'. ⁴⁶ Le chasa, ne le chu'u. Ba za bénnea' dxudé' neda'.

Dxelech'é Jesús ca tu benne' wen da zrinnaj
(Mr. 14.43-50; Lc. 22.47-53; Jn. 18.2-11)

⁴⁷ Ne dxuchálajte Jesús na' gate bzin Judas. Naque' tu benne' chazrinnu ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchaje ca' chee bxruze ca', ne benne' gula sina ca' chee judío ca'. ⁴⁸ Judas, bénnea' dxudé' Jesús, ba blé'eng' benne' ca' ca tu da gune' da gulé'e na nu na' naca Jesús. Gunné':

—Bénnea' gunupa' neda', Le' na'. Le che'e ca tu benne' wen da zrinnaj.

⁴⁹ Nadxa bzin Judas lau Jesús, dxenné':

—Diuzre, Benne' dxusede.

Na' bnupe' Jesús.

⁵⁰ Bechebe Jesús:

—Ljwezra', ¿bi chee za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrinnaj.

⁵¹ Tu benne' ca' dxusede Jesús guléaje' xia chee', ne guchugue' chalá'a naga bi wen zrin chee bxruze blau. ⁵² Nadxa Jesús guzre' le':

—Begú'u xia chiu' lu zre na, lawe' da xúgute benne' dxelute benne' nen xia nalá, cá'anqueze gate le'. ⁵³ ¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinnu cue' gubáz chee xabáa, zaj naque' zánete tu tu cue'? ⁵⁴ Na'a che ca'an guna', ¿ájazra gaca gaca na ca da naxúaj na lu xiche chee Dios, da dxenná na caní dxal-la' gaca na?

⁵⁵ Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee quélale neda', dxunle neda' ca tu benne' gubán. Xúgute zra gudxe'a neda' lu xudau' dxusédeda' le'e, ne quebe gudélale neda'. ⁵⁶ Xúgute da caní dxaca na chee gaca na ca da gulenná benne' ca' buluchálaje' waláz chee Dios, da na' naxúaj na lu xiche chee Dios.

Nadxa xúgute benne' ca' dxusede Jesús bulucá'ane' Le' tuze', buluxu-zrúnnuje'.

Dxezrín Jesús lau benne' ca' chee xu'u lawe' blau chee judío ca'
(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Benne' ca' gulele' Jesús guleché'e Le' lau Caifás, bxruze blau, ga na' zaj nazraga benne' ca' dxuluxuzájle' da bdixruj be'e Moisés, nen benne' gula sina ca'. ⁵⁸ Pedro zéaje nawe' Jesús zítu'la, na' bzrine' chale'aj chee lizre

bxruze blau, na' guxú'e, ne gudxé'e tu zren nen bi xa'aga chee lé'engé' ájala xexuzre da dxaca na'.

⁵⁹ Benne' xíchajé ca' chee bxruze ca', ne benne' gula sina ca', ne xúgute benne' ca' chee xu'u lawe' blau chee judío ca' belíajé' ájala xuluzría xi'e Jesús, lácala naca na da wen lazre', chee xelexéqueñé' xuludé'e' Le' gatié'. ⁶⁰ Quebe bi belezrelné', lácala belezrín benne' zan benne' gulenné' da wen lazre' chee Jesús. Naga xeajseté na belezrín chupa benne' wen lazre'. ⁶¹ Dxelenné':

—Benne' nigá gunné': “Wazéqueda' neda' guchínajaj' xudau' chee Dios, na' xexuna' na lawe' chunna zraze.”

⁶² Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné' chiu' lue'?

⁶³ Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

⁶⁴ Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Guljé' Bénneache, cue'a chalá'a xabéla chee Dios nen xel-la' szren chee', na' xelá'a lu beuj bza chee xabáa.

⁶⁵ Nadxa bxruze blau gucheze' zra lané' chee blé'engé' quebe nabague' zria, na' gunné':

—Benne' nigá dxenné' schanni' chee Dios. ¿Nachínnedxadxu benne' xechébe'? Ba bénquezle le'e ca dizra' schanni' dxenné'. ⁶⁶ ¿Bi dxennale le'e?

Benne' ca' gulenné':

—Nabague' zria, ne dxal-la' gatié'.

⁶⁷ Nadxa buluzré'e zrené' lau Jesús, ne belú'e Le', na' xebal-le' belegape' dxu'a lawe'. ⁶⁸ Na' gulé'e Le':

—¿Nácaquezu' Lue' Cristo? Gunné xa'a nu be Lue'.

Dxenná Pedro quebe núnbe'e Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Dxácaté na' dxe' Pedro chalé'ajla, na' tu nu'ula wen zrin bzriné' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

⁷⁰ Pedro ben chúchue' xrtizre' lówela xúgute benne' ca', gunné':

—Quebe nezda' nu chee na' dxenníu'.

⁷¹ Nadxa Pedro zexíajé' chee xedxúajé' chale'aj na', na' ble'e xetú nu'ula ca' le', ne guzre' benne' ca' zaj zré'e na':

—Cá'anqueze benne' nigá dxedálené' Jesús, benne' Nazaret na'.

⁷² Xecha lasa ben chúchue' Pedro xrtizre', na' bzétajé' Dios, gunné':

—Quebe núnbe'a benne' na'.

⁷³ Xetú chí'idau' guca belezrín benne' zaj zré'e na' lau Pedro, na' gulé'e le':

—Da li, tuze nácaquezu' nen bénnea' lawe' da xel-la' dxenné' chiu' dxunna bea na lue'.

⁷⁴ Nadxa guzú lau Pedro dxuzría xi' cuínazqueze', ne dxuzétajé' Dios, dxenné':

—Quebe núnbeaqueza' benne' na'.

Dxácaté na' gudxezre xjeaj. ⁷⁵ Nadxa xeajsa lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'e.

27

*Dxeleché'e Jesús lau Pilato**(Mr. 15.1; Lc. 23.1-2; Jn. 18.28-32)*

¹ Gate guxani', xúgute benne' xíchaję ca' cheę bxruze ca', ne benne' gula sina ca' cheę benne' judío ca' beluņę tuze dizra' ájala xelunę' cheę xelutię' Jesús.

² Nadxa beleché'e Le' nadxéaję', ne xeajlegu'e Le' lau Poncio Pilato, benne' dxenna be'e waláz cheę xęzr la xu Roma.

Ca guca gate gute Judas

³ Nadxa Judas, bėnnea' bdeę' Jesús, gate guque bé'ene' ba buluzría xi'e Jesús, bexíajele'ene', na' bunézruje' da chi dxua dumí plata lau benne' xíchaję ca' cheę bxruze ca', ne benne' gula sina ca'. ⁴ Dxe'e le':

—Neda' bėna' dul-la lawe' da bdea' tu benne' naque' du lazre' cheę gatię'.

Belexechebe benne' xíchaję ca':

—¿Bizra naca cheętu' da nigá? Chiu' lue' naca da na'.

⁵ Nadxa Judas buzale' dumí na' lu xudau', ne bezé'e, na' xeajxelú'u du lbe'e.

⁶ Benne' xíchaję ca' cheę bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí cheę xudau', lawe' da naca na lazruj cheę benne' dxute benne'.

⁷ Nadxa belunę' tuze dizra' xelá'awe' tu xęzr la xu nen dumí na' da nazí le na xęzr la xu cheę węn xesu' zruaga, cheę gaca na tu lataj naga xelegache benne' zitu'. ⁸ Cheę le' na' nazí le xęzr la xu na' Xęzr La Xu Cheę Dxen ca lu zra na'a zra. ⁹ Caní guca na cheę gaca ca da gunná Jeremías, benne' bchálaję' waláz cheę Dios, gunné': “Gulequé'e chi dxua dumí plata da naca na da zaca Le' da buluzúa benne' Israel. ¹⁰ Nen dumí na' belá'awe' xęzr la xu cheę benne' węn xesu' zruaga, cáteze gunná be'e Xrana' neda'.”

*Dxezrín Jesús lau Pilato**(Mr. 15.2-5; Lc. 23.3-5; Jn. 18.33-38)*

¹¹ Guleché'e Jesús lau bėnnea' dxenna be'e waláz cheę xęzr la xu Roma, na' le' bchebe' Jesús:

—¿Nacu' Lue' Wenná Bea cheę judío ca'?

Jesús gunné':

—Ca' naca na, ca dxenna' lue'.

¹² Gate benne' xíchaję ca' cheę bxruze ca', ne benne' gula sina ca' gulawe' zria cheę Jesús, na' Le' quebe bi bechebe'. ¹³ Nadxa gunná Pilato, dxę'e Jesús:

—¿Quebe dxennu' ca da dxelenná benne' caní chiu'?

¹⁴ Jesús quebe bi bechebe'. Ca'an guca bebanne bėnnea', ne quebe bezrela lazre' ájala nne'.

*Dxelechugue' cheę Jesús gatię'**(Mr. 15.6-20; Lc. 23.13-25; Jn. 18.38—19.16)*

¹⁵ Gate dxu'u laní na', bėnnea' dxenna be'e na' xu'u lawę' dxusane' tu benne' węn da zrinnaj, nüteteze benne' dxelaca lazre' benne' ca'. ¹⁶ Ca lu zra na' xu'u tu benne' lizre xia, benne' wėnle'e da zrinnaj, nazí le' Barrabás. ¹⁷ Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bėnnea' le' Cristo?

¹⁸ Caní gunné' lawe' da ba nézene' buludé'e Jesús lawę' le' lawe' da dxelaque' xa lazre' cheę Jesús.

¹⁹ Dxácate' na' dxę' Pilato naga dxuchi'e cheę bėnneache, na' zru'ule' gusel-le' tu benne' xeajęzre' Pilato: “Quebe guchixre chiu' da naca cheę benne'”

xrlátaje na', lawe' da guneda' x̄ela ba dx̄e, da bzúale'ē na neda' st̄ebe ne chee Le'."

²⁰ Benne' x̄ichajē ca' chee bxruze ca', ne benne' gula sina ca' belegú'u x̄elē benne' ca' chee xelenabē' la Barrabás, ne gate Jesús. ²¹ Bénnea' dxenná be'ē bchálajl̄enē' benne' ca' xecha lasa. Buchebe' lē':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

²² Pilato bchebe' benne' ca':

—¿Bizra guna' chee Jesús, benne' lē' Cristo?

Xúgutē' belexechēbe':

—Bde'ē xaga béguaj.

²³ Nadxa gunná Pilato, dx̄e'ē benne' ca':

—¿Bizra da calela nune'?

Benne' ca' gulezú lawē' dx̄elebezre x̄e'ē, gulenné':

—Bde'ē xaga béguaj. Bde'ē xaga béguaj.

²⁴ Gate Pilato guque bé'ene' quebe bi séquene', na' benne' zan ca' dx̄eledábague' lē', na' gunná bé'ene' bla' nisa, na' gudibe ne'ē l̄awela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na chee le'e.

²⁵ Xúgutē' benne' ca' belexechēbe':

—Netu', ne zr̄í'inentu' nabáantu' ca naca chee xel-la' gute chee'.

²⁶ Nadxa Pilato bsang' Barrabás, ne gunná bé'ene' beleché'ē Jesús chee xel'u'ē Le', na' bde'ē Le' chee tē'ē xaga béguaj.

²⁷ Nadxa benne' dxjaque' wedil-la chee bénnea' dxenná be'ē guleché'ē Jesús, ne gulegú'ē Le' lu xu'u' lawe'. Belexezraga ca naca benne' dxjaque' wedil-la naga zē Jesús. ²⁸ Belequé'ē zra lane', ne bulugácuē' Le' tu ladxe' bzawe. ²⁹ Buluzúē' x̄ichajē' tu da naca na zruze xaga xechē', ne buluguxrē' Le' tu xaga ne'ē xabēla. Nadxa buluzú zribe' lau Jesús, ne belún lē' chee', dxelenné':

—Gaca xabáa chiu', Wenná Bea chee judío ca'.

³⁰ Cá'anqueze buluzré'ē Le' zrene', na' gulequé'ē xaga da nuxru Jesús, ne guline' na x̄ichajē'. ³¹ Ca gudé belún lē' chee Jesús, na' belexegūē' ladxe' bzawe, na' buluxugácuē' Le' zra lánaqueze'. Nadxa beleché'ē Le' chee tē'ē xaga béguaj.

Dxuludé'ē Jesús xaga béguaj

(Mr. 15.21-32; Lc. 23.26-43; Jn. 19.17-27)

³² Ca gusiá'que' na', belexezrague' tu benne' x̄ezre Cirene, lē' Simón, na' gulenná bé'ene' lē' bi'ē xaga béguaj chee Jesús.

³³ Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate. ³⁴ Na' bulunézrujē' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'ē na.

³⁵ Ca bexuzre benne' dxjaca wedil-la buludé'ē Le' xaga béguaj, na' gulebéajē' da gaca bea na chee xelxelé'ē ca naca zra lana Jesús. Ca'an guca xubáca da gunná benne' bchálajē' waláz chee Dios, gunné': "Belexelé'ē zra lana' lezē'. Gulebéajē' da gaca bea na." ³⁶ Nadxa gulebé'ē dxuluzuzrē' Jesús.

³⁷ Buluzríē' xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

³⁸ Cá'anqueze buludé'e chupa benne' gubán tu zren nen Jesús le'e xaga béguaj ca', tue' chalá'a xabela, ne xetúe' chalá'a xéglala ga da' xaga béguaj chee Jesús. ³⁹ Benne' dxeledé'e' na' dxelún le' chee Jesús. Dxulutá xíchaje', ⁴⁰ ne dxelenné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

⁴¹ Cá'anqueze belún la chee' benne' xíchaje' ca' chee bxruze ca', ne benne' dxuluxuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

⁴² —Bselé' benne' xula, san quebe dxezéquene' guselá cuine'. Che naque' Wenna Bea Chee Xezre Israel, dxal-la' xexétaje' le'e xaga béguaj, na' chéajlédxu chee'. ⁴³ Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

⁴⁴ Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

Ca guca gate gute Jesús

(Mr. 15.33-41; Lc. 23.44-49; Jn. 19.28-30)

⁴⁵ Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna. ⁴⁶ La ná'queze Jesús gudxezre xé'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda?)

⁴⁷ Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

⁴⁸ Dxácaté na' guzá' chegu tu benne' ca', xeajxri'e tu da dxezrupe nisa, na' ca bsebisé' na nen nupe zichaj, na' bzue' na lawe' tu xaga, ne bzrigue' na dxu'a Jesús chee xrupe' na. ⁴⁹ Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

⁵⁰ Xecha lasa gudxezre xa'a Jesús, na' gutié'. ⁵¹ Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulúzruqueze na. ⁵² Gulexalaj ba, na' belexebán benne' gate ca', benne' guléajle'e da naca chee Dios. ⁵³ Ca gudé bebán Jesús, na' benne' caní belexedxúaje' lu xedxu ba, ne belexexú'e lu xezre lá'azxa Jerusalén, naga benne' zan belelé'ene' benne' ca'.

⁵⁴ Nadxa benne' dxenná be'e lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne xezícadxa da ca'an galuca, na' belezrebele'e, dxelenné':

—Da lítegaze benne' nigá guque' Zri'ine Dios.

⁵⁵ Nu'ula zan zaj zre'e na' dxelenné'e zítu'la, nu'ula ca' xjácálene' Jesús gate bezé'e ga nababa Galilea, ne gulácalequeze' Le'. ⁵⁶ Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

Dxulucache' Jesús lu xedxu ba

(Mr. 15.42-47; Lc. 23.50-56; Jn. 19.38-42)

⁵⁷ Ca guzú lau dxaca waxrinne, na' bla' tu benne' gunní'a le' José, benne' xezre Arimatea, benne' dxéajlequeze' chee Jesús. ⁵⁸ Benne' nigá guxíaje' xeajchálajlene' Pilato, na' benabe' bel-la' dxen chee Jesús. Pilato gunná bé'ene' xulunéruje' le' bel-la' dxen na'. ⁵⁹ Nadxa José beque'e' bel-la' dxen na', na' bchelé' na tu ladxe' da naxadxe. ⁶⁰ Nadxa gulu'e Le' lu ba da naca na cheéqueze José na', da bene' tu lu xiaj. Gulexru'e tu xiaj blaga zren dxu'a

ba chee Jesús, na' bezé'e ga na'. ⁶¹ Gulezrá' María Magdalena, ne xetú María, zaj dxe'e le nna' dxu'a ba na'.

Dxulubia dxuluxue' ba chee Jesús

⁶² Zeaj zra xula, da naca na zra ca gudé zra bulucueze', na' benne' xíchaje ca' chee bxruze ca', ne benne' xudau' fariseo ca' belezrine' lau Pilato. ⁶³ Dxelé'e le':

—Xran, dxeajsá lázrentu' ca naca da gunná benne' wen lazre' na' gate na' zue'. Gunné' gate gaca chunna zra, na' xebane' ládujla benne' gate. ⁶⁴ Chee le' na', bdixruj be'ene' benne' ca' xulubia xuluxue' ba chee' na' cadxa gaca chunna zra, chee quebe xeledá' benne' ca' bsédené' xedajlexebéaje' bel-la' dxen na' chizrela, na' te na' xuluzenne' bènneache ba bebane' ládujla benne' gate. Che ca'an gaca, na' dizra' wen lazre' bzebe nigá gun na da zrinnaj zrendxa ca da nedxu.

⁶⁵ Pilato guzre' benne' ca':

—Na' zaj zra' benne' dxjaque' wedil-la xuluzuzre' na. Le chjaca le'e, ne le guxúe xanne' ba na' ca se lau séquele.

⁶⁶ Nadxa xjaque', xeajlexúe' ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

28

Ca guca gate bebán Jesús

(Mr. 16.1-8; Lc. 24.1-12; Jn. 20.1-10)

¹ Ca gudé chee zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xeajlenné'e ba chee Jesús. ² Chadite guzrú'le'e na lawe' da betaj tu gubáz chee xabáa chee Xránadxu, na' bzrine' dxu'a ba na', ne bequé'e xíajta'a zren na' da zrua na dxu'a ba na', na' gudxé'e lawe na. ³ Gubáz na' dxácate legale', ne naca chiche zra lané' ca bezxe'. ⁴ Gate belelé'e benne' dxjaque' wedil-la gubáz chee xabáa na', na' belezrine' xel-la' dxelezrebe, ne belexegá'ane' ca benne' gate ca'. ⁵ Nadxa gunná gubáz chee xabáa na', dxe'e nu'ula ca':

—Quebe zrébele. Nezda' dxexilajle Jesús, bènnea' gudé'e xaga béguaj.

⁶ Quebe zue' nigá lawe' da ba bebane', cáteze na' gunné'. Le da nna'le lu ba naga gulegú'e Le'. ⁷ Le cheajxáquezega, le cheajezre benne' ca' bsédené' ba bebane' ládujla benne' gate, na' chéaje' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

⁸ Nadxa nu'ula ca' besía'que' dxu'a ba na', zeajxaca chégüe'. Dxelezrebe', ne dxelebene'. Zjaque' zeajleguzre' benne' ca' bséde Jesús. ⁹ Dxácate na' Jesús bhague' nu'ula ca', ne bgape' le' diuzre. Belezrine' lau Jesús, dxelúe lá'ane' Le', ne bulunide' ni'a Jesús. ¹⁰ Le' guzre' nu'ula ca':

—Quebe zrébele. Le chjaca, le cheajézre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

Ca da gulenná benne' dxjaque' wedil-la

¹¹ Dxácate zjaca nu'ula ca', na' benne' ca' dxjaca wedil-la gulu'e xezre, ne buluchálajlene' benne' xíchaje ca' chee bxruze ca' ca da guca. ¹² Benne' xíchaje ca' buluchálajlene' benne' gula sina ca' chee xelune' tuze dizra'. Nadxa bulunézruje' benne' dxjaque' wedil-la dumí zrente'. ¹³ Dxelenné':

—Le nna le'e belelá' benne' ca' bséde Jesús na' chizrela, dxácate dxásele le'e, na' belexexú'e bel-la' dxen chee'. ¹⁴ Che benne' dxenná be'e na' xenne' da

nigá, netu' guchálajlentu' le', ne gucá'ana cháwentu' chee quebe bi gaca chee le'e.

¹⁵ Nadxa benne' dxjaque' wedil-la gulezí' lu ne'e dumí na', na' besia'que' belune' ca bache zaj nézene'. Da nigá naca na ca dxelenná judío ca' zéajte lu zra na'a zra.

Jesús dxesel-le' benne' gubáz chee' ca'
(Mr. 16.14-18; Lc. 24.36-49; Jn. 20.19-23)

¹⁶ Nadxa xjaca benne' chinéaj ca' bsede Jesús, na' belezrine' lu xi'a naga ba guzre Jesús le'. ¹⁷ Gate belelé'ene' Jesús, na' bulucá'ana szrene' Le'. Bal-le' gulaca chupa lazre'. ¹⁸ Nadxa Jesús gubigue' naga zaj zra' benne' ca', na' guzre' le':

—Neda' ba nazí' lu na'a ca naca xel-la' dxenná bea xabáa, ne lu xezr la xu nigá. ¹⁹ Chee le na' le chjaca, le cheajchálajle benne' zaj zre'e du ca naca xezr la xu nigá, ne le cheajsédené' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa. ²⁰ Le guséde-ne' xelaque' wezúa dizra' ca naca da ba gunná be'eda' le'e, na' neda' tu súdezqueza' le'e xúgute zra cadxa cheajsé chee xezr la xu nigá. ¡Ca'an gaca na!

DIZRA' CHAWE' CA NACA CHEE JESUCRISTO DA BZUAJ SAN MARCÓS

*Da bchalaj Juan, benne' bchuë' bénneache nisa
(Mt. 3.1-12; Lc. 3.1-9, 15-17; Jn. 1.19-28)*

¹ Caní guzú lau dizra' chawe' ca naca chee Jesucristo, Zri'ine Dios.

² Bzrin lazre' da bzuaj Isaías, benne' bchálaje' waláz chee Dios, ca da gunná Dios:

¡Le nna'xque nigá!

Neda' dxesel-la' benne' gubáz chia', benne' cuía lawe' lau Lue'.

Bénnea' gupé'e neza naga teu' chee ilúnbe'e bénneache Lue'.

³ Welénqueze chi'i benne' dxebezre xe'e le'e xixre' lawe' lataj.

Dxenné': "Le gupá'a neza naga te Xránadxu lu xichaj lázrdaule.

Le xebéaj li neza lase chee' ca'."

⁴ Caní guca lawe' da bla' Juan le'e xixre' lawe' lataj, na' bchálaje' dizra' chee Dios, ne gunné' dxal-la' xeledxúa bénneache nisa, na' bchuë' le' nisa, benne' ca' belexebí'i lazre' chee gunite lau Dios dul-la da zaj nabague'.

⁵ Ca'an guca, guledxúaj bénneache zan lu xezre Jerusalén, ne xúgute xezre ca' zaj nababa Judea, na' xjaque' naga zua Juan, na' Juan nigá bchuë' benne' ca' nisa lu xegu Jordán, benne' ca' gulexrúalepe' dul-la da zaj nabague'.

⁶ Caní guca zra lana Juan. Gucue' zra lanë' ladxe' xicha zra camello, bia dxelebía bénneache, ne tu xpádxue' xide bchela le'e. Dxawe' biche xuaj, ne dxé'aje' bzrína'dau' chee bézudau'. ⁷ Ca dxuchálaje' dizra' chee Dios, dxenné':

—Gate te chia' neda', na' xida xetú benne', bénnea' nápadxe' xel-la dxenná bea ca neda'. Quebe naca chia' xáchua' chee lechja' zrele'. ⁸ Da lítega, neda' bchua' le'e nisa. Le' gunë' da zéaje' xel-la dxedxúa nisa nigá, guzú' Be' Lá'azxa lu xichaj lázrdaule.

*Ca da guca gate gudxúa Jesús nisa
(Mt. 3.13-17; Lc. 3.21-22)*

⁹ Ca da guca lu zra ca', guzá' Jesús lu xezre Nazaret chee ga nababa Galilea, na' bzrinë' lau Juan. Juan nigá bchuë' Jesús nisa lu xegu Jordán. ¹⁰ Gate bdxuaj Jesús lu nisa, la blé'etëne' naxalaj xabáa, ne blé'ene' betaj Be' Lá'azxa. Dxulé'e lawe' ca tu bgúgudu chiche, na' bzrinë' ca li xichaj Jesús. ¹¹ Ben tu chi'i da za xabáa, da dxenná na:

—Lue' nacu' Zri'ina'. Nazrí'ida' Lue', ne dxezaca ba lázreleđa' Lue'.

*Dxaca lazre' Satanás da xriwe' gun ga бага Jesús dul-la
(Mt. 4.1-11; Lc. 4.1-13)*

¹² Nadxa Be' Lá'azxa guché'e Jesús le'e xixre' lawe' lataj. ¹³ Guzúa Jesús le'e xixre' lawe' lataj chua zra chua xëla. Na' bzrin Satanás da xriwe', ne guca lazre' na gun na бага Jesús dul-la. Guzúa Jesús naga zaj zra' be xixre' be snia, na' gubáz chee xabáa chee Dios gulácalëne' Jesús.

*Jesús dxezú lawe' dxusédene' bénneache
(Mt. 4.12-17; Lc. 4.14-15)*

¹⁴ Ca gudé guxú'u Juan lizre xia, na' bzrin Jesús lu xezre ca' zaj nababa Galilea, ne dxuchálajlęne' bėnneache dizra' chawe' ca dxenná bea Dios.

¹⁵ Gunná Jesús:

—Ba bzrin zra. Ba zua báguze gate nna bea Dios xezr la xu nigá. Cheę le na', le xebi'i lazre', ne le cheajlí lazre' dizra' chawe' nigá.

Dxenné Jesús tapa benne' wezén bela cheę xelaque Le' tuze

(Mt. 4.18-22; Lc. 5.1-11)

¹⁶ Gate gudá Jesús dxu'a nísadau' cheę Galilea, na' blé'engé' Simón, ne Andrés, biche Simón na'. Benne' caní dxuluzalę' xixruij bela cheę' lu nísadau' lawe' da zaj naque' wezén bela. ¹⁷ Na' gunná Jesús:

—Le gun neda' tuze, na' guzúa' le'e gácale węn zrin chia'. Cheajxrile bėnneache ca dxunle dxezenle bela.

¹⁸ La bulucá'anate' xixruij cheę' ca', na' zjácalgęne' Jesús.

¹⁹ Nadxa gudé Jesús xelate' ca na'la, na' blé'engé' Jacobo, ne Juan, benne' ca' zaj naque' zri'ine Zebedeo. Zaj zre'ę lu da dxedá lawe' nísadau', dxelexexunę' xixruij bela cheę' ca'. ²⁰ Ca gunné Jesús Jacobo, ne Juan, na' la bulucá'anate' xre' Zebedeo ne węn zrin chie' ca' zaj zre'ę lu da dxedá lawe' nísadau', na' zjácalgęne' Jesús.

Tu benne' xu'ę be' xriwe'

(Lc. 4.31-37)

²¹ Gate gul-la na gulu'ę lu xezre Capernaum, na' gate bzrin zra dxulupá'ana benne' judío ca', guxú'u Jesús lu xu'u naga dxelúe lá'ana judío ca' Dios, ne bsédene' benne' ca' zaj zre'ę na'. ²² Belexebánene' ca naca da dxusęde Jesús le' lawe' da dxuchálaję' nen dutę xel-la dxenná bea, ne quegá ca dxuluchalaj benne' ca' dxuluxuzájle'ę da nadxixruij bea Dios. ²³ Nadxa bla' tu benne' xu'ę be' xriwe' lu xu'u na', na' gudxezre xa'a na lu dxu'a bėnnea'. ²⁴ Gunná na:

—¿Bizra nápantu' chiu', Jesús, benne' Nazaret? ¿Za'u guzría xi'u netu'? Ba nézquezda' nu nacu'. Benne' Lá'azxa cheę Dios nacu'.

²⁵ Jesús gudil-le' na, gunné':

—Zrize guzúa. Bedxúaj lu bęl-la' dxen cheę benne' nigá.

²⁶ Nadxa be' xriwe' na' bxrízle'ę na bėnnea', ne gudxezre xá'alę'ę na, na' bedxúaj na. ²⁷ Belexebánele'ę xúgutę benne' zaj zre'ę na', dxelé ljwezre':

—¿Bizra dizra' cube da nigá? Dutę xel-la dxenná bea cheę' dxenná be'engé' be' xriwe' ca', na' dxuluzúa na dizra' cheę'.

²⁸ La bzrılıjte dizra' cheę xel-la waca cheę Jesús du ca naca xezre ca' zaj nababa Galilea.

Jesús dxexunę' xrna' zru'ula Pedro

(Mt. 8.14-15; Lc. 4.38-39)

²⁹ Ca belexedxúaję' lu xu'u na' cheę judío ca', na' belezrine' lizre Simón, ne Andrés. Jacobo ne Juan dxelunę' Jesús tu zren. ³⁰ Lu xu'u na' de xrna' zru'ula Simón, xu'ę da la. La buluchálajlęte' Jesús ca dxaca cheę nu'ula nigá. ³¹ Le' la bęxrute' ne'ę, bechise' le'. La bedxúajte da la da xu'ę, na' bseni'ę da gulawe'.

Jesús dxexunę' bėnneache zan

(Mt. 8.16-17; Lc. 4.40-41)

³² Ca gula guzré zra na', ca guzría gubizra, na' guleché'ę xúgutę benne' we' lau Jesús, ne benne' ca' zaj xu'ę be' xriwe'. ³³ Ca naca benne' xezre gulebiguę' dxa xu'u naga zua Jesús. ³⁴ Jesús bexunę' zánete' benne' we' ca zaj naca

xízrawe' da xu'u tu tue', ne bebéaje' zane' be' xriwe' zaj xu'u bèneache ca'. Quebe be'e lataj be' xriwe' ca' xelenné na lawe' da zaj núnbea na Le'.

*Dxuchalaj Jesús lau bèneache zaj zre'e Galilea
(Lc. 4.42-44)*

³⁵ Ca bebán Jesús bál-lala, ne nachúl-late, bedxúaje' guze'e zéaje' tu lataj naga nadache' bèneache, na' bchálajlene' Dios. ³⁶ Simón Pedro, ne benne' ca' zaj zralene' le' belexeláje' Jesús. ³⁷ Ca xeajlexraque' Jesús, na' gul'e Le':

—Xúgute bèneache dxellexiláje' Lue'.

³⁸ Na' gunná Jesús:

—Chéajdxu xexre walizre ca' chee guchálajlena' benne' ca' xrtizra Dios. Chee le' na' beljá'.

³⁹ Lu xu'u ca' naga dxelúe lá'ana judío ca' Dios, da ca' zaj zua tu tu xexre ca' chee ga nababa Galilea, bchalaj Jesús dizra' chee Dios, ne bebéaje' xízrawe' xriwe' ca' da zaj xu'u benne' we' ca'.

*Jesús dxexune' tu benne' dx'e'ene' xízrawe' guzru'
(Mt. 8.1-4; Lc. 5.12-16)*

⁴⁰ Nadxa bzin lau Jesús tu benne' dx'e'ene' xízrawe' guzru', na' bzu zribe', ne guta' xuené Le', dxenné':

—Che Lue' dxaca lazru', waca xexunu' neda'.

⁴¹ Jesús bexache lazre' le', na' bli ne'e, gudane' le'. Dxenné':

—Dxaca lazra'. Na'a dxexacu'.

⁴² Ca gunné' caní, la becuásate xízrawe' na', na' begá'ane' chawe'. ⁴³ Nadxa Jesús bsízrene' le', na' besel-le' le'. ⁴⁴ Caní gunné':

—Quebe nu xu'u ca da guca chiu'. Guxíaj lau bxruze xeajlé'e cuinu', ne bnezruj ca naca da gunná be'e Moisés xelún benne' ca' xelexequé'. Caní gunu' chee xelélé'ene' ba bexacu' na'a.

⁴⁵ Nadxa benne' nigá, ca bezé'e, gúzú lawe' dxuchálajlene' tu tu benne' ca guca chee' bexaque'. Ca'an guca, québedxa guca chu'u Jesús zaca bal-la lau lu xexre. Begá'ane' le'e xixre' lawe' lataj. Bèneache chee xúgute xexre ca' belezrine' lau Jesús naga zue'.

2

*Jesús dxexune' tu benne' quebe gaca se'e
(Mt. 9.1-8; Lc. 5.17-26)*

¹ Ca gudé chupa chunna zra, na' guxú'u Jesús xecha lasa lu xexre Capernaum. Belénne bèneache zua Jesús tu lu xu'u. ² La belezragate benne' zante naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios. ³ Na' belezrín tapa benne' lu xu'u naga zua Jesús, zaj nu'e tu benne' quebe gaca se'e. ⁴ Lawe' da quebe gulezéquene' xelezrine' lau Jesús, lawe' da zaj zra' bèneache zante ga na', na' gulesáluje' chju'u chee xu'u naga zua Jesús. Na' bululétaje' da'a da zrua benne' na' quebe gaca se'e. ⁵ Lawe' da dxeque be'e Jesús ca dxeleajlí lazre' benne' ca' Le', na' gunné', dx'e'e bènea' quebe gaca se'e:

—Zri'ina'dau', ba nanite lau dul-la da nabagu'.

⁶ Zaj dx'e bal-la benne' ga na', benne' dxuluxuzáje'e da nadxixruj bea Dios, na' gulenné lanze': ⁷ —¿Bizr chee na' dxuchalaj caní benne' nigá? Dxucá'ana dítaje' Xránadxu Dios. ¿Núzraqueze gaca gunite lau dul-la da zaj nabaga bèneache? Tuze Dios na'. ⁸ Dxeque be'e Jesús lu lázrdawe' ca dxelenné lane' chee', na' gunné':

—¿Bizr chee na' dxéquele caní? ⁹ ¿Bizra dizra' quebe naca na stébela xapa' benne' nigá quebe gaca se'e? ¿Naca na stebe xapa' le', ba nanite lau dul-la nabagu'? Cabí. ¿U che stebe xapa' le', bexasa, becá'a da denu', ne bexíaj? ¹⁰ Na'a, chee nézele le'e neda', Benne' Gulje' Bénneache, napa' xel-la dxenná bea lu xezr la xu gunité lawa' dul-la da zaj nabaga bénneache.

Na' gunná Jesús, dxé'e bénnea'.

¹¹ —Lue' dxapa', bexasa, becá'a da'a chiu', ne bexíaj lizru'.

¹² Ca'an guca, la bexásatē', na' bequé'e da'a chee', ne bedxúajē' lau xúgute bénneache. Ca'an guca, xúgute benne' ca' belexebánē', na' belúe lá'angē' Xránadxu Dios. Dxelenné':

—Cabata' ne lé'edxu gaca na ca guca da nigá.

Dxenné Jesús benne' le' Leví

(Mt. 9.9-13; Lc. 5.27-32)

¹³ Ca gudé na' bedxúaj Jesús zéajē' dxu'a nísadau', na' xúgute bénneache lu xezre ca' belezrine' lau Le'. Nadxa bsédene' benne' ca' xrtizra Dios. ¹⁴ Ca gudé Jesús na', ble'ene' Leví, zri'ine Alfeo, dxé'e lataj chee wechizruj. Na' gunná Jesús, dxé'e le':

—Ben neda' tuze.

La guxásatē Leví, guxíajlē' Jesús.

¹⁵ Ca' guca, gate gudxé' Jesús dxawē' lizre Leví, na' zánete benne' wechizruj, ne benne' dul-la ca' gulebé'e dxelágulē' tu zren nen Jesús, ne benne' ca' dxusédene'. Caní naca lawe' da zjácāle benne' zantē Jesús. ¹⁶ Nadxa benne' ca' dxuluxuzájle'e da nadxixruj bea Dios, ne benne' fariseo ca', gate belelé'ene' ca da dxun Jesús, dxágulē' benne' wechizruj ca', ne benne' dul-la ca', na' gulenné', dxelē'e benne' ca' dxusēde Jesús:

—¿Bizra da nigá? Dxagu dxé'ajlē' benne' wechizruj ca', ne benne' dul-la ca'.

¹⁷ Ca ben Jesús da nigá, gunné':

—Benne' chawe' ca' quebe dxelechínē' benne' dxexún bénneache. Benne' we' ca' dxelechínē' bénnea'. Quegá bla'a dxennéa' benne' xrlátaje ca'. Benne' dul-la ca' dxennéa'.

Ca dxal-la' xelún bénneache gate dxelunē' gubasa

(Mt. 9.14-17; Lc. 5.33-39)

¹⁸ Ca guca lu zra na', belún gubasa benne' ca' dxusēde Juan, ne benne' ca' dxulusēde benne' fariseo ca'. Na' belezrín benne' ca', bedajleguezre' Jesús:

—¿Bizr chee na' dxelún gubasa benne' ca' dxusēde Juan, ne benne' ca' dxulusēde benne' fariseo ca', na' benne' ca' dxusédenu' Lue' quebe dxelunē' gubasa? ¿Bizr chee na'?

¹⁹ Na' Jesús guzre' benne' ca':

—¿Waca xelún gubasa benne' zaj zre'e laní chee wechaga na' dxácate na' zua benne' wechaga na' nen le'? Dxácate na' zua wechaga na' nen le' quebe gaca xelunē' gubasa. ²⁰ Wazrín tu zra gate dua benne' wechaga na'. Lu zra na' xelunē' gubasa.

²¹ 'Quegá nu benne' xudé'e tu ladxe' cube le'e zradxu gula. Che ca'an gunē', ladxe' cube da xudé'e wazrube xu na da gula, na' wachézadxa na. ²² Cá'anqueze, quegá nu benne' que'e xrise uva wal-la cube lu bzude xide gula. Che ca'an gunē', na' xrise uva wal-la cube na' wacheza na bzude xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

Benne' ca' dxusede Jesús dxelíchaje' dau chee zrua' xtila zra dxulupá'ana judío ca'

(Mt. 12.1-8; Lc. 6.1-5)

²³ Gate gudé Jesús naga ze zrua' xtila zra dxulupá'ana benne' judío ca', ná'ate na' benne' ca' dxusede Jesús, ca zaj xu'e neza, gulezú lawe' dxelíchaje' dau naga zria zrua' xtila. ²⁴ Nadxa benne' fariseo ca' gulé'e Jesús:

—Gunná'xque. ¿Bizr chee na' dxelune' zrin da quebe dxal-la' xelune' zra dxupá'anadxu?

²⁵ Jesús guzre' benne' ca':

—¿Cabata' ne gulábale ca da ben David gate gudune', ne bxá:zrene' da gagu le', ne da gugawe' benne' ca' zaj zrálene' le'? ²⁶ Guxú'e lu xu'u chee Dios gate naca Abiatar bxruze blau, na' David gudawe' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca chee' xelawe' na. Na' bnézrujte David da gulagu benne' ca' zrálene' le' chee xeta xtila na'.

²⁷ Cá'anqueze gunná Jesús, dxé'e benne' ca':

—Dios gudíxruje' zra dxupá'anadxu chee gaca ba neza chee bénneache, quegá bene' bénneache chee xelune' zrin chee zra dxupá'anadxu. ²⁸ Chee le' na, neda', Benne' Gulje' Bénneache, naca' xrane zra dxupá'anadxu.

3

Ca guca chee tu benne' nazrinnaj ne'e

(Mt. 12.9-14; Lc. 6.6-11)

¹ Gate guxú'u Jesús da xula lu xu'u naga dxelúe lá'ana judío ca' Dios, ze tu benne' biu nazrinnaj ne'e ga na'. ² Judío ca' buluzuzre' Jesús che xexune' benne' we' nigá lu zra dxulupá'ane', chee xeze'équene' xelagu zria Jesús.

³ Nadxa gunná Jesús, dxé'e benne' biu na' nazrinnaj ne'e:

—Guxasa. Guzé laduj benne' caní.

⁴ Nadxa gunaba Jesús lau judío ca', dxé'e le':

—¿Naca chee zra dxupá'anadxu gundxu da xrlátaje, u che gundxu da calela? ¿Waca gupá'adxu xel-la nabán chee nu benne', u che guzría xidxu xel-la nabán chee'?

Na' gulezúa zrize judío ca'. ⁵ Nadxa Jesús gunná zi'e benne' ca'. Bewí'inene' ca naca xel-la lázrdau zide' chee'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na. ⁶ Ca'an guca, belexedxúaj benne' fariseo ca', na' belune' xel-la wezría nen benne' ca' zaj de'e Herodes ájala xelútié Jesús.

Bénneache zan dxelezrague' dxu'a nísadau'

⁷ Nadxa gucuasa Jesús laduj benne' ca', na' guxiáje' dxu'a nísadau' nen benne' ca' dxusedene'. Zjácale benne' zan ca' Jesús, benne' chee xezre ca' zaj nababa Galilea. ⁸ Gate belén bénneache ca naca da zren ca' da dxun Jesús, belezrin benne' zan lau Le', benne' chee xezre ca' zaj nababa Judea, ne benne' xezre Jerusalén, ne benne' chee xezre ca' zaj nababa Idumea, ne benne' gusá'aque' xechalá'a xegu Jordán, ne benne' gusá'aque' xezre ca' zaj naxechaj na xezre Tiro, ne xezre Sidón. ⁹ Chee le' na' gunná be'e Jesús benne' ca' dxusedene' xulucueze' tu da dxedá lawe' nísadau' checa xuluchide' bénneache zan Le'. ¹⁰ Caní guca lawe' da bexún Jesús benne' zante, na' benne' we' ca' gulebigue' lau le' chee cheajleté' Le'. ¹¹ Gate be' xriwe' ca' zaj xu'u bénneache belelé'e na Jesús, na' buluzú zribe na lau Le', ne gulebezre xa'a na. Dxeleenná na:

—Lue' nacu' Zri'ine Dios.

¹² Jesús gupil-le' be' xriwe' ca' chee quebe xululé'e na da naca Le'.

Jesús dxenné' chazrinnu gubáz chee'

(Mt. 10.1-4; Lc. 6.12-16)

¹³ Ca gudé na' guluén Jesús tu lu xi'a, na' gunné' benne' ca' guca lazre'. Na' gulebigue' lau Le'. ¹⁴ Bchague' chazrinnu benne' xelune' Le' tuze, benne' sel-le' cheajlechálaje' xrtizra Dios. ¹⁵ Bzue' lu na' benne' caní xel-la dxenná bea chee xellexune' benne' we' ca', ne chee xelxebéaje' be' xriwe' ca' lu bel-la' dxen chee bènneache ca'. ¹⁶ Benne' chazrinnu caní zaj le':

Simón, bènnea' bzua Jesús xetú le' Pedro,

¹⁷ ne Jacobo ne Juan, biche Jacobo, benne' ca' zaj naque' zri'ine Zebedeo. (Benne' chupa caní bzua Jesús le' Boanerges, da zéaje na benne' wal-la ca guziu'.)

¹⁸ Bchague' Andrés ne Felipe, ne Bartolomé, ne Mateo, ne Tomás, ne Jacobo zri'ine Alfeo, ne Tadeo, ne Simón, benne' dxue lázrele'e chee lazrie',

¹⁹ ne Judas Iscariote, bènnea' xudé' Jesús lu na' benne' ca' dxeledábage' Le'.

Nu benne' dxenné' schanni' chee Be' Lá'azxa

(Mt. 12.22-32; Lc. 11.14-23; 12.10)

Ca gudé na' bzin Jesús tu lu xu'u nen benne' ca' dxusédene'. ²⁰ Xecha lasa gulebiga bènneache zan naga zua Jesús, na' québedxa dxaca lataj xelawe'. ²¹ Gate belene benne' xrtia Jesús ca da dxun Le', na' belezrine' chee xelxeché'e le'. Dxelenné':

—Quebe zua xrlátaje xichaj lázrdawe'.

²² Cá'anqueze benne' ca' dxuluxuzájle'e da nadxixruj bea Dios, benne' gusa'aque' Jerusalén, dxelenné':

—Benne' nigá zrague' Beelzebú, xrane be' xriwe' ca', na' ne chee xrane be' xriwe' ca' dxebéaje' be' xriwe' ca'.

²³ Nadxa gunné' Jesús benne' ca', na' bchálajlene' le' tu da dxulé'e na. Dxenné':

—¿Wazeque Satanás da xriwe' xebéaj cuine na? ²⁴ Che benne' dxelenná bea xelaxaque' chupa la'a, quebe díaqueze xel-la dxenná bea chee'. ²⁵ Cá'anqueze che benne' zaj zre'e tu lu xu'u xelaque' chupa la'a, quebe xeledíaqueze benne' zaj zre'e lu xu'u na'. ²⁶ Cá'anqueze, che Satanás tábaga cuínaqueze na, ne xexaca na chupa la'a, quebe díaqueze na. Wadéqueze chee na.

²⁷ 'Quebe nu seque chu'u lizre benne' wal-la chee cuane' da de chee' che quebe guchéaje' le' nédxula. Nadxa seque' cuane' da de lizre benne' wal-la na'.

²⁸ 'Da li dxenná', dxapa' le'e: Xúgute dul-la da dxelún bènneache, ne dizra' schanni' da dxelenné', ájateze zaj naca na, gunite láuqueze Dios chee'. ²⁹ Na'a, ca naca núteteze benne' nne' schanni' chee Be' Lá'azxa, cabata' gunite lau Dios chee bènnea'. Webía xí'queze'.

³⁰ Caní gunná Jesús lawe' da dxelenné':

—Zraga Jesús da xriwe'.

Nu naca ca xrna Jesús, ne bi biche' ca'

(Mt. 12.46-50; Lc. 8.19-21)

³¹ Ca gudé na' bzin xrna Jesús nen bi biche' ca'. Gulebeze' chalé'ajla, na' gulesel-le' tu benne' nne' Jesús. ³² Benne' ca' zaj zre'e cuita Jesús gulé'e le':

—Xrna'u ne bi bichu' ca' zaj ze' chalé'ajla, dxelenné' Lue'.

³³ Gunná Jesús, dxē'e benne' ca':

—¿Nézele nuzra na' xrna'a, ne bi bicha' ca'?

³⁴ Nadxa gunná' Jesús benne' ca' zaj zre'e cuita Le', na' gunné':

—Benne' caní zaj zráleṅe' neda' nigá zaj naque' ca' xrnáqueza', ne bi bicha' ca'. ³⁵ Caní naca na lawe' da xúgute benne' dxelune' ca' da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

4

Da dxulé'e na ca naca cheḡ benne' dxaza dxa'ana

(Mt. 13.1-23; Lc. 8.4-15)

¹ Xetú lasa guzú lau Jesús dxusédenē' benne' ca' dxu'a nísadau', na' belezraga béneache zante naga zue'. Naxánle'e benne', na' ben na ba xen guxú'u Jesús tu lu da dxedá lawe' nísadau' da dxe da' na', na' gudxé'e lu'ule da dxedá lawe' nísadau', na' béneache zan ca' gulezré'e dxu'a nísadau'. ² Nadxa bchalaj Jesús da dxululé'e na, na' bsédenē' benne' ca' da zante. Ca dxusédenē' benne' ca', na' bchálaje' caní:

³ —Le xene da nigá. Tu benne' dxaza dxa'ana zéaje' guza. ⁴ Ca zéaje' dxaze', na' xeajlechaze bal-la bínnedu ca' dxu'a neza. Na' belezrín bxinne, ne guláguba' bínnedu caní. ⁵ Xezícadxa bínnedu ca' xeajlechaze na lu xiaj naga quebe déteca xu. Bínnedu caní belezrí'a na lawe' da quebe déteca xu. ⁶ Ca bdxuaj gubizra, na' bzezxe na le na, na' lawe' da quebe zaj nun lue na lu da situj, gulebizre na. ⁷ Xezícadxa bínnedu ca' xeajlechaze na naga dxelezrí'a xixre' xeché'. Xixre' xeché' caní gulegúladxá na ca le na, na' bululule na le na, na' quebe gulebí'a na da gágudxu. ⁸ Xezícadxa bínnedu ca' xeajlechaze na lu xu bebe. Belezrí'a na cháwedau', na' belegula na, ne gulezrí'alé'e na da gágudxu. Bal-la na gulebí'a na chi dxua tu tu na. Xebal-la na gulebí'a na ga xun tu tu na. Xebal-la na gulebí'a na tu gaxúa tu tu na.

⁹ Gunnadxá Jesús, dxē'e benne' ca':

—Che nu benne' zua nague', dxal-la' xenne' da nigá.

¹⁰ Ca gudé na', ca' gucuasa Jesús cuita benne' zan ca', na' gulenaba benne' ca' zráleṅe' benne' ca' dxusede Jesús bi zéaje ca' naca da dxulé'e nigá. ¹¹ Na' gunná' Jesús, dxē'e benne' ca':

—Dios dxunne' le'e lataj nézele ca' naca cheḡ da nagache cheḡ da dxenná bea Le'. Na'a, ca' naca cheḡ benne' ca' zaj zre'e cúzrela, dxuchálajleṅa' le' dízra'ze da dxulé'e na. ¹² Caní dxuna' lawe' da dxelenné'e, na' quebe dxelaca lazre' xelélé'ene'. Dxelenne', na' quebe dxelaca lazre' xeléajni'ine', cheḡ quebe xelxebí'i lazre', na' chu'u xel-la wenite lau cheḡ dul-la da za nabague'.

¹³ Na' gunnadxá Jesús:

—¿Quebe dxéajni'ile ca' naca da dxulé'e nigá? ¿Ájalaqueze chéajni'ile xezícadxa dízra' ca' da dxululé'e na? ¹⁴ Benne' dxaza dxá'ane' naque' benne' dxuchálaje' xrtizra Dios. ¹⁵ Bal-la béneache zaj naque' ca' bínnedu ca' xeajlechaze na dxu'a neza. Dxelenne' xrtizra Dios, na' ca' dxedé na', dxezrín Satanás, na' dxucuasa na dízra' nigá da zua na xichaj lázrdau benne' ca'. ¹⁶ Benne' xula ca' zaj naque' ca' bínnedu ca' xeajlechaze na lu xiaj. Ca dxelenne' xrtizra Dios, na' dxelebéle'ene' dxelezi'e na. ¹⁷ Tu chí'idauze dxelone' caní. Gate dxeledé' xel-la zi', ne zua da dxedábaga le' ne cheḡ xrtizra Dios, na' dxelexcuase' lawe' da quebe guxaze xrtizra Dios lú'uleṅe' xichaj lázrdawe' ca' guca cheḡ bínnedu ca' quebe belún lue na lu xu situj. ¹⁸ Benne' xula ca' zaj naque' ca' bínnedu ca' xeajlechaze na ládujla xixre' xeché' ca'. Dxelenne' xrtizra Dios. ¹⁹ Lawe' da

dxelebe'dxe' gunne xue da naca chee xezr la xu nigá dxezí xē xel-la gunní'a le', na' dxelezá lazre' da zante da dxelelé'ene'. Xúgute da caní dxelú'u na xichaj lázrdau benne' caní, na' xuluxunite na dizra' da guxú'u xichaj lázrdawe', na' quebe gaca gun na ca da dxal-la' gun dizra' nigá. ²⁰ Zaj zra' benne' dxelenne' xrtizra Dios, ne dxelezí' lu ne'e na. Bal-le' zaj naque' ca binnedu ca' gulebía na chi dxua tu tu na. Benne' xula zaj naque' ca binnedu ca' gulebía na ga xun tu tu na. Benne' xula zaj naque' ca binnedu ca' gulebía na tu gaxúa tu tu na.

Xúgute da nagache gulé'e lawe na

(Lc. 8.16-18)

²¹ Cá'anqueze gunná Jesús, dxē'e benne' ca':

—¿Gúadxu xí', ne guzúadxu na zran xi'ina u che zran ga dxásedxu? Quebe gundxu ca', san guzúadxu na sibe chee gusení na. ²² Xúgute da nagache gulé'e lawe na, na' xúgute da xu'u xichaj lázrdaudxu wénqueze na. ²³ Che nu benne' zua nague', dxal-la' xenne' da nigá.

²⁴ Cá'anqueze gunná Jesús:

—¡Le xene xanne' ca da dxénele! Ca da dxudxíxrele, nen le na' gudxíxrequeze Dios chee, na' gúnnadxē' le'e dxénele. ²⁵ Caní gaca na, benne' nape' da naca chee xrtizre'e, gunézrujdxē' chee', na' benne' quebe bi nape', ca da dauze da nape' xecá'ate' na.

Da dxulé'e na ca naca chee binne da dxegula na

²⁶ Na' gunnáqueze Jesús:

—Da dxenná bea Dios naca na ca da dxaca gate tu benne' dxaze' binnedu ca' lu xu. ²⁷ Dxásiē' chizrela, dxasē' te zra, na' binnedu caní dxelezría na, ne dxegula na, ne quegá nézene' ájala. ²⁸ Dxaca na caní lawe' da nácaqueze ca da dxun xezr la xu. Nedxu dxebía na xrlegue na, nadxa za dau, na' bzébetē dxebía na binnedu ca' lu dau. ²⁹ Gate ba gulegula xíxredu caní, na' dxechugue' na lawe' da ba bzrin zra xequē'e na.

Da dxulé'e na ca naca chee binne mostaza

(Mt. 13.31-32; Lc. 13.18-19)

³⁰ Cá'anqueze gunná Jesús:

—¿Ájala gutil-la lébedxu da dxenná bea Dios, u che bila dizra' da dxulé'e na cá'adxu da gutil-la lébedxu le na? ³¹ Naca na ca tu binne mostaza da dxázadxu lu xu. Binnedu nigá nácadxa cuide' ca da zaj nnita lu xezr la xu. ³² Gate ba guzadxu na dxegula na, na' dxaca na da zrendxa ca xixre' ca' da zaj naca na ba dagu, na' dxebía zruze na zren, na' dxácatē dxelebía bxínnedu ca' zran zrula chee na.

Ca bgune Jesús da dxulé'e na caní

(Mt. 13.34-35)

³³ Caní bsēde Jesús benne' ca' xrtizra Dios, na' bchálajē' zánete' da dxululé'e na caní, cadite guléajni'ine'. ³⁴ Quebe bchálajē' da xula. Tuze dizra' da dxulé'e na bchálajēne' benne' ca'. Bzájla'adxē' ca naca na benne' ca' dxusédene'.

Jesús dxebeche zriē' be' bdunu'

(Mt. 8.23-27; Lc. 8.22-25)

³⁵ Lu zra ná'queze, ca gul-la chizrela, na' gunná Jesús, dxē'e benne' ca' dxusédene':

—Chéajdxu xecha la'a nísadau'.

³⁶ Besá'aque' naga zaj zra' benne' zan ca', na' guleché'e Jesús lu da dxedá lawe' nísadau' naga ba dxé'queze', na' gulennita xezícadxa da ca' dxeledá lawe' nísadau' ca' naga zaj zra' benne', na' xjácalēne' Le'. ³⁷ Nadxa guzú lau dxaca tu be' bdunu' lu nísadau' na', na' dxu'ute nisa lu da dxedá lawe' nísadau'. Caní guca guzú lau dxezrá nisa lu da dxedá lawe' nísadau'. ³⁸ Jesús de' dxasiē' lu xcúgūē' naga nácadxa sibe lu da dxedá lawe' nísadau'. Na' bulusebane' Jesús, dxelē'e Le':

—Benne' wesēde, ¿quebe dxe'u gunne xue wátedxu nate ca na'a?

³⁹ Nadxa guxasa Jesús, na' bchálajlēne' be' bdunu', ne nísadau'. Dxenné':

—¡Gudxé zri'! ¡Zrize guzúa!

Gudxé zri' be' bdunu', na' nísadau' guzúa zri na. ⁴⁰ Nadxa gunná Jesús, dxē'e benne' ca' dxusēdene':

—¿Bizr cheē na' dxezrébele'ele le'e? ¿Quebe dxeajlí lázrele Dios?

⁴¹ Belezrébele'edxe', ne dxelē' ljwezre':

—¿Núzraqueze benne' nigá? Dxuluzúa dizra' be' bdunu', ne nísadau' cheē'.

5

Tu benne' xezre Gadara, benne' xu'e be' xriwe' (Mt. 8.28-34; Lc. 8.26-39)

¹ Bezrín Jesús, tu zren nen benne' ca' dxusēdene' xecha la'a nísadau' lu xezr la xu cheē benne' Gadara ca'. ² Ca bedxúaj Jesús lu da dxedá lawe' nísadau', na' bzrin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'. ³ Benne' biu nigá zúaqueze' lu bluaj na'. Quebe nu dxezúe guchéaj lēbe' chalásaze, lácala nu guchéaj lēbe' nen du xia. ⁴ Zane' lasa buluchéajē' lēbe' nen du xia na'abe', ne ní'abe'. Bzúzrujbe' du xia ca', na' quegá nu guzeque nna bé'enge' lēbe'. ⁵ Dxedáquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'. ⁶ Gate ble'ebe' zítu'la ba za Jesús, na' guzá chégube', xeajzú zribebe' lau Le'. ⁷ Gunné zizraj be' xriwe' xu'ube', dxē na Jesús:

—¿Bizra dxaca chiú' nen neda', Jesús, Zri'ine Dios szrente? Lu La Xránadxu Dios, dxata' xueda' Lue', quebe gudéu' neda' xel-la zi'.

⁸ Caní gunná na lawe' da gunná Jesús, dxē'e na:

—Lue', da xriwe', bedxúaj lu bel-la' dxen cheē benne' nigá.

⁹ Nadxa gunaba Jesús, dxē'e na:

—¿Bi leu'?

Na' bechebe na:

—Da Zan lea', lawe' da naxantu'.

¹⁰ Guta' xue na Jesús cheē quebe xesel-le' na, ne quebe gucuae' na zitu' lu xezr la xu na'. ¹¹ Zaj zra' gagu lu xi'a na' tu cue' cuche zaj zraba' dxeláguba'.

¹² Gulata' xue be' xriwe' ca' Jesús, gulenná na:

—Besel-la netu' lu cuche ca'. Benna lataj chú'untu' lēba'.

¹³ Nadxa Jesús be'e na lataj. Na' be' xriwe' ca' beledxúaj na lu bēnnea', na' gulú'u na cuche ca'. Zaj nácaba' ca galaj gaxúa cuche ca', na' buludxixre cuínaba' tu chejéa. Xeajlechástēba' lu nísadau', ne gulátetēba' lu nisa na'.

¹⁴ Benne' ca' dxuluxúe' cuche ca' buluxuzrúnmuje', na' xeajlezenne' benne' zaj zre' lu xezre, ne benne' zaj zre'ē le'e xixre'. Na' belezrín benne' ca' naga zua Jesús, benne' ca' belenne' ca da ba guca. ¹⁵ Gate belezrín benne' ca' naga zua Jesús, na' belelé'enge' bēnnea' guxú'ube' be' xriwe' ca', dxe'ebe' ga zua Jesús, nácube' tu ladze', ne ba bezúa xrlátaje lu xichaj lázrdaube', na' gulezrebe'.

16 Benne' ca' belelé'e ca naca da guca chee benne' guxú'ube' be' xriwe' ca', ne ca guca chee cuche ca' buluchálajé' chee da ba guca. 17 Nadxa benne' xezre ca' gulata' xuene' Jesús xedxúajé' lu xezr la xu chee'.

18 Ca bexú'u Jesús lu da dxedá lawe' nísadau', na' bènnea' guxú'ube' be' xriwe' ca' guta' xuebe' Jesús gu'e lataj chéajlêbe' Lê'. 19 Quebe be' Jesús lêbe' lataj, san dxé'e lêbe', gunné':

—Bexíaj lizru', ne xeajchálajlê xrtiu' ca' ca naca da zren ca' da ben Xranu' nen lue', ne ca bexache lazre' lue'.

20 Nadxa bezá'abe' zexíajbe', ne guzú laube' dxuchálajbe' lu xezre ca' zaj nababa Decápolis ca naca da zren da ben Jesús nen lêbe'. Belexebánele'e xúgutê benne' zaj zre'e xezre ca'.

*Bi nu'ula chee Jairo, ne nu'ula na' xeajté' zra lana Jesús
(Mt. 9.18-26; Lc. 8.40-56)*

21 Begüén Jesús lu da dxedá lawe' nísadau', na' bezrine' xecha la'a nísadau'. Belezrín benne' zan naga ze', na' Lê' begá'angé' dxu'a nísadau'. 22 Ca'an guca bzrin tu benne' xíchajé chee xu'u naga dxelúe lá'ana judío ca' Dios, benne' lê' Jairo. Gate blé'ene' Jesús, na' bzu zribe' zran ni'e. 23 Guta' xuene' Jesús, dxé'e Lê':

—¡Bi nu'ula chia' ba dxátebe'! ¡Gudá, bze' na'u lêbe' chee xexácabe', ne xaca banbe'!

24 Nadxa guxíajlê Jesús bènnea', na' bènneache zan xjácálêne' Lê', ne dx-uluchíteg' Lê'. 25 Ládújla bènneache ca' za tu nu'ula quebe chawe' zue', ba zeaj chazrinnu iza nape' we' dxen. 26 Da zren da bulusaca benne' dxelexún bènneache ca' nu'ula nigá, na' bache ben dítajé' xúgutê da nape'. Quegá bi gúcalê na lê', san bzálaxa we' chee'. 27 Gate ben nú'ula' dxuluchalaj bènneache ca naca chee Jesús, na' bzrine' cúzrula Jesús ládujla bènneache, na' xeajté' zra lana Jesús. 28 Caní bene' lawe' da gunné' lu xíchaj lázrdawé': Cun cheajtaza' zra lana Jesús, na' xexácatea'. 29 La gulézate' xel-la we' chie', ne la guque bé'etene' ba hexaca bêl-la' dxen chee' chee xízrawé' na'. 30 Gúquebe'e Jesús ben zrin xel-la waca chee'. Chee lê na' bexéchajé', dxenné'e bènneache ca', na' gunábene' lê':

—¿Nuzra bedajtá zra lana'?

31 Nadxa benne' ca' dxusede Jesús gulé'e Lê':

—Dxelé'eqeznu' bènneache zan dxuluchíe' Lue'. ¿Bizr chee na' dxenabu': "Nuzra bedajtá neda'?"

32 Jesús guzúe' dxenné'e cuité' chee lé'ene' nua' bedajtá Lê'.

33 Nadxa guxíaj nu'ula nigá, dxezrízié' dxezrebe' lawe' da nézene' ca da ba guca chee', na' bzu zribe' lau Jesús, na' gunné' ca naca da li. 34 Nadxa gunná Jesús, dxé'e nu'ula':

—Bi nú'uladau', ba bexacu' lawe' da guxeajlí lazru' neda'. Bexíaj, cútudxa zrebu'. Ba bexácatequezu' chee xízrawé' da guzxacu'.

35 Ne dxuchálajlê Jesús gate belezrín benne' gusá'aca lizre benne' xíchajé chee xu'u naga dxelúe lá'ana judío ca' Dios, na' gulé'e xra nú'uladau' na':

—Bi nú'uladau' chiu' ba gútebe'. ¿Bizr chee na' dxunu' zédedxa benne' dxusede nigá?

36 Gate Jesús benne' ca da gulenná benne' caní, dxé'e benne' xíchajé chee xu'u na', gunné':

—Quebe zrebu'. Guxeajlí lazre' neda'.

³⁷ Quebe be'e lataj chjácãlë Bénneache zan ca' Le'. Tuze be'e lataj gusá'acale Pedro, ne Jacobo, ne Juan, biche Jacobo nigá, nen Le'. ³⁸ Ca belezrine' lizre benne' xichajë na', na' ble'e Jesús Bénneache dxelún schaga. Dxelebezre benne', ne dxelebezre xa'atë'. ³⁹ Nadxa guxú'u Jesús lu xu'u, na' dxë'e benne' ca', gunné':

—¿Bizr cheë na' dxunle schaga? ¿Bizr cheë na' dxebézrele? Quegá nate bidau' nu'ula. Dxásezebe'.

⁴⁰ Belún lala benne' ca' cheë'. Nadxa Jesús bebéajë' xúgute benne' ca', na' guché'e xrabe', ne xrna bidau' nigá, ne benne' ca' zjácãlënë' Le', na' guxú'e naga dë nú'uladu na'. ⁴¹ Bëxruë' na'be', ne guzrë' lëbe':

—Bi nú'uladau', lue' dxapa': ¡Guxasa!

⁴² La bexásatë nú'uladu na', na' guzátëbe' lawe' da ba zéajbe' chazrinnu iza. Na' benne' ca' zaj zré'e lu xu'u na' belezrébele'e. ⁴³ Jesús gunná bé'ene' benne' ca' cheë quebe nu xelé'e ca da benë'. Nadxa guzrë' benne' ca' xulugawë' nú'uladu na'.

6

Dxezrín Jesús lazrië' da nacan xezre Nazaret (Mt. 13.53-58; Lc. 4.16-30)

¹ Jesús bezé'e naga zue', ne bezrine' lazrië', na' benne' ca' dxusédene' xjácãlënë' Le'. ² Ca gula zra dxulupá'ana judío ca', na' bezú lau Jesús dxusédene' benne' ca' zaj zré'e lu xu'u naga dxelúe lá'ana judío ca' Dios. Bénneache zan belenne' cheë', ne belexebánene', dxeleennë':

—¿Gazra bsëde benne' nigá ca nácãtë? ¿Bizra xel-la sina da nunezruj Le', ne xel-la waca zren caní da dxunë'? ³ ¿Quegá benne' nigá gubizre xaga, zri'ine María, na' benne' biche' ca' zaj naquë' Jacobo, ne José, ne Judas, ne Simón, na' nu'ula zane' ca' cá'anqueze zaj zrálënë' dxi'u?

Cheë lë na' quebe guléajlë'e cheë Jesús. ⁴ Na' gunná Jesús, dxë'e benne' ca':

—Xúgute benne' dxelapë' ba lá'ana tu benne' dxuchálajë' waláz cheë Dios, san benne' waláZR cheë' ca', ne benne' xrtië' ca', ne benne' zaj zré'e xu'u lizre' quebe dxelapë' lë' ba lá'ana.

⁵ Cheë lë na' quebe gen Jesús lazrië' na' netú xel-la waca zren. Tuze bexunë' bál-laze benne' wë' gate na' guxrúa në'e xichaj benne' ca'. ⁶ Bebane Jesús lawe' da quebe guléajlë'e cheë'.

Jesús dxusel-lë' benne' ca' dxusédene' cheajlechálajë' xrtizra Dios (Mt. 10.5-15; Lc. 9.1-6)

Ca gudé na' bedé Jesús xecha lasa xézredu ca' zaj nnita gáguzë, na' bsédene' benne' zaj zré'e ga na'. ⁷ Gunné' benne' chazrinnu dxusédene', ne guzú lawë' dxesel-lë' lë' chupa weajë', ne bnëzrujë' lë' xel-la waca xulucuaasë' be' xriwë' ca' lu bel-la' dxen cheë Bénneache ca'. ⁸ Gunná bé'ene' lë' quebe bi xelu'e cheë la neza, con tuze xaga da xuluchichë'. Quebe xelu'e xixruj xeta, ne xeta, ne dumí. ⁹ Waca xululájë' zrelë', ne xelácue' tu cueze zra lanë'. ¹⁰ Gunnadxa Jesús, dxë'e benne' ca':

—Gate na' chu'ule le'e tu lu xu'u cheë benne', waca xegá'anatële lizre Bénnea' ca' zrindxa zra xezá'ale lu xezre na'. ¹¹ Che zrinle tu lu xezre naga quebe xuluxé lawë' le'e, ne quebe xelénene' cheële, waca xezá'ale, na' cuibetële bxrte xu da dxedá' ní'ale. Da nigá gaca na tu da dxulé'e na zaj nabaga benne' xezre na' zria, benne' dxeledábaga' le'e. Da li dxennéa', lu zra guchi'a Dios cheë Bénneache, waxache' gácãdxa da ba xa' da xeledé benne'

xęzre Sodoma, ne benne' xęzre Gomorra quęzcala da xeledé benne' xęzre ca' naga quebe buluzé nague' cheęle.

¹² Nadxa gusá'aca benne' ca' dxusede Jesús, na' buluchálajleņ' bęnneache cheę xelexebí'i lazre'. ¹³ Cá'anqueze belexebáję' zánete be' xriwe' ca' lu bel-la' dxen cheę bęnneache ca', na' gulegüę'e da za zane' benne' we', na' bęlexaxaque'.

Ca gute Juan, benne' bchue' bęnneache nisa
(Mt. 14.1-12; Lc. 9.7-9)

¹⁴ Na' ben wenná bea Herodes ca naca da zren ca' da dxun Jesús lawe' da guzé dizra' cheę'. Bal-la benne' dxelenné':

—Juan, benne' bchue' bęnneache nisa, bache bebane' ládujla benne' gate, na' cheę le' na' nape' xel-la waca zren nigá.

¹⁵ Benne' xula dxelenné':

—Elías, bęnnea' bchálaję' waláz cheę Dios benne' nigá.

Benne' xula dxelenné':

—Nácalję' bęnnea' dxal-la' xelá' guchálaję' waláz cheę Dios, che nácalję' benne' gulasa, benne' bchálaję' waláz cheę Dios.

¹⁶ Ca ben Herodes da caní, na' gunné':

—Benne' nigá naque' Juan, bęnnea' gunná be'eda' neda' gulechugue' xíchaję'. Benne' nigá ba bebane' ládujla benne' gate.

¹⁷ Caní gunná Herodes lawe' da gunná be'e le' buluzúę' Juan na' lizre xia, ne buluchéaję' le' du xia, da na' bęne' lawe' da dxezrá'a Herodías le'. Herodías nigá guque' zru'ula Felipe, benne' biche Herodes. Herodes nigá bequę'e nu'ula' cheę guque' zru'ule'. ¹⁸ Gunná Juan, dxę'e Herodes:

—Quebe dxal-la' súałenu' zru'ula bi bichu'.

¹⁹ Cheę le' na' Herodías guzré'e Juan, ne guca lazre' gútete' le'. Quebe guca cheę ²⁰ lawe' da neze Herodes naca Juan nigá tu benne' xrlátaje, ne benne' naque' tuze nen Dios, na' bezrebe' le'. Cheę le' na' quebe be'e lataj Herodías na' gútete' Juan nigá, na' lácala quebe guxéajni'ine' ca naca xúgutę da bchalaj Juan, Herodes nigá bze nague' cheę' du lazre'. ²¹ Herodías na' bzréleņ' ájala gunę' ca da dxaca lazre' gate na' guxú'u laní ca gula la Herodes. Gulé'aj gulagu benne' xíchaję ca', ne benne' dxelenná be'e lu wedil-la, ne benne' zaj naque' blau lu xęzre ca' zaj nababa Galilea. ²² Nadxa guxú'u bi nu'ula cheę Herodías na' lu xu'u naga dxelé'aj dxelawe', ne bxá'abe' lau benne' ca'. Bezaca ba lazre' Herodes ca bxá'abe', ne tuze ca belún benne' ca' zaj zra' dxelawe' tu zren nen le'. Gunná wenná bea Herodes, dxę'e nu'ula cuide' nigá:

—Gunaba neda' ca da dxedánenu', na' gunna' na' chiu'.

²³ Guchebe lazre' Herodes, ne bzétaję' Dios gunézruję' bíteteze da nábabe', lácala nábabe' gáchaję naga dxenná be'e le'.

²⁴ Nadxa nu'ula cuide' nigá bdxúajbe', xeajchálajlebe' xrnabe', gunabe':

—¿Bizra naba'?

Gunná xrnabe':

—Gunaba xichaj Juan, bęnnea' bchue' bęnneache nisa.

²⁵ La guxu'ute' nu'ula cuide' nigá naga zua wenná bea, na' gunabe', dxę'ebe' le':

—Dxaca lazra' gunnu' neda' na'a tu lu xé'ena xichaj Juan, bęnnea' bchue' bęnneache nisa.

²⁶ Nadxa wenná bea nigá bewí'inele'e, ne lawe' da ba bzétaję' Dios, na' belénete benne' ca' da gunné', quebe guca lazre' guzrunę' ca da gunaba bi

nu'ula nigá. ²⁷ Chee le na' gusel-la wenná bea tu benne' dxeje' wedil-la, ne gunná bé'eng' le' cheajxri'e xichaj Juan na'. ²⁸ Guxíaj benne' nigá lu xu'u lizre xia, na' bdxixre' xichaj Juan na', ne bexu'e na tu lu xé'ena. Bnézrujte' na bi nu'ula na', na' lebe' bnézrujbe' na xrnabe'.

²⁹ Gate gulénneze benne' ca' da nigá, benne' ca' bsede Juan, na' xeajlexexri'e bel-la' dxen chee', na' xeajlecácheté' na.

Jesús dxugawe' chi xun gaxúa benne' biu
(Mt. 14.13-21; Lc. 9.10-17; Jn. 6.1-14)

³⁰ Ca gudé na' belexezrín benne' gubáz ca' chee Jesús naga zua Le', ne buluzenne' Le' xúgute ca da belune', ne ca da bulusédene' benne' ca' naga xjaque'. ³¹ Nadxa gunná Jesús, dxe'e benne' ca':

—Le chu'u. Chéajdxu kezí' lázredxu chadite' naga xu'u lataj.

Gunné' caní lawe' da dxesá'aca benne' dxesá'aca, ne dxelexezrín benne' dxelexezrín, na' quebe dxelu'e lataj xelawe'. ³² Nadxa Jesús ne benne' gubáz chee' ca' belexexú'e leze' tu lu da dxedá lawe' nísadau', na' belezrine' tu lataj naga quebe nu chilá' benne'. ³³ Benne' zan ca' belelé'eng' ca zjaque', ne belexexúnbe'e Jesús, na' gusá'aca chégü'e xjá'aque' na'. Benne' xúgute xezre ca' belezrine' lataj na' nédxudxa ca Jesús. ³⁴ Gate bedxúaj Jesús lu da dxedá lawe' nísadau', na' blé'eng' benne' zante, ne hexache lazre' le' lawe' da zaj zre'e ca zrila' ca' quebe zua benne' dxuxú'e leba'. Na' guzú lawe' dxusédene' benne' ca' da zante. ³⁵ Ca gula guzré', belezrín benne' ca' dxuséde Jesús lau Le', na' gulé'e Le':

—Ba dxaca waxrinne, na' quegá nu lizre benne' zua lataj nigá. ³⁶ Besel-la benne' caní chee' cheajxaque' xezre ca' zaj nnita gálaze chee' xelezí'e xeta xelawe' lawe' da quebe bi de nigá da xelawe'.

³⁷ Na' gunná Jesús, dxe'e le':

—Le gunezruj le'e da xelawe'.

Na' gulenné', dxelé'e Jesús:

—¿Waca chéajntu' cheajgá'untu' xeta xtila, quízrujntu' lazruj chee' chupa gaxúa zra chee' gugágudxu benne' zan caní?

³⁸ Na' gunná Jesús, dxe'e le':

—¿Bal-la xeta xtila nápa'e? Le cheajnná'.

Ca gulénézene', na' gulenné', dxelé'e Jesús:

—Gaxxu' xeta xtila, ne chupa béléadau'.

³⁹ Nadxa gunná be'e Jesús gulebé'e xúgute bénneache ca' tu cue' weaj lu xrgúe xa'a. ⁴⁰ Na' gulebé'e tu cue' weaj, du tu gaxúe', du chi xune'. ⁴¹ Nadxa Jesús béxru'e' gaxxu' xeta xtila ca', ne da chupa béléadau'. Na' guchisa lawe' xabaala, gunabe' lau Dios gun la'azxe' na, na' bzúzruje' xeta xtila ca', ne bnézruje' na benne' ca' dxusédene' chee' gulisie' na chee' benne' ca'. Cá'anzeze gudísie' da chupa béléadau' chee' xúgute benne' ca'. ⁴² Na' gulagu xúgute' ne gulélajte'. ⁴³ Nadxa buluxutube' ca da begá'ana chee' xeta xtila, ne chee' béléadu ca', na' guca chazrinnu xcuite xca'a. ⁴⁴ Benne' ca' gulawe' xeta xtila ca' zaj naque' chi xun gaxúa benne' bua.

Dxezá Jesús lawe' nísadau'
(Mt. 14.22-27; Jn. 6.16-21)

⁴⁵ La gunná bé'ete' Jesús benne' ca' dxusédene' gulu'e lu da dxedá lawe' nísadau' chee' gulelague' nísadau' na' nédxudxa ca Le', chee' xelexezrine' lu xezre Betsaida dxácaté' Le' dxuzé' dizra' bénne' ca'. ⁴⁶ Ca gudé bze'

dizra' benne' ca', na' guz'e' zéaje' lu xi'a zeajchálajlene' Dios. ⁴⁷ Gate gula guxrínnequeze, ba zeaj da dxedá lawe' nísadau' na' gachaj lawe' nísadau', na' begá'ana Jesús tuze' lu xu dxu'a nísadau'. ⁴⁸ Gate blé'ene' ca dxelezraga lawe' dxulusé'e da dxedá lawe' nísadau' lawe' da za be' na', dxuzrí'i na da dxedá lawe' nísadau' na', na' gula balá' gubiga Jesús naga zaj zre'e, dxezé'e lawe' nísadau' na', ne guca lazre' té'e' lau da dxedá lawe' nísadau' na'. ⁴⁹ Gate belelé'ene' Le' ze'e lawe' nísadau' na', guléquene' da dxedá dxela, na' gulebezre xe'e. ⁵⁰ Belelé'e xúgute' ca dxezé'e lawe' nísadau', na' belezrébele'e. Na' gunná Jesús, dxé'e benne' ca' dxusédene':

—Ga zr'ébele. Neda' nigá. Le gun chuchu lázrele.

⁵¹ Nadxa guluén Jesús lu da dxedá lawe' nísadau' naga zaj zre'e, na' guleza be' na'. Na' guleque zréajene', ne belexebánele'ene', ⁵² lawe' da quebe ne xeléajni'ing' ca naca xel-la waca zren da bene' chee' xeta xtila ca', lawe' da ne dxun zide' xichaj lázrdawe'.

*Dxexún Jesús benne' we' ca' lu xezre Genesaret
(Mt. 14.34-36)*

⁵³ Gate na' gulelague' nísadau', belezrine' lu xezr la xu chee benne' xezre Genesaret, na' buluchéaje' xaga da dxedá lawe' nísadau' dxu'a nísadau' na'. ⁵⁴ Ca beledxúaje' lu da dxedá lawe' nísadau', la belexexúnbeate bénneache ca' Jesús. ⁵⁵ La gusá'aca chégute' zjaque' lu xezre ca' xeailexri'e benne' we' ca' tu lu ta'a, na' zeajlegü'e' le' naga zaj nézene' xedé Jesús. ⁵⁶ Gáteteze xézredu ca', ne xezre ca', ne le'e' xixre' naga dxedé Jesús, na' buluzúe' benne' we' ca' du la neza, ne gulata' xuene' Jesús gunézruje' lataj cheajletaze' zra lane', na' xúgute' benne' ca' xeaileté' zra lane' belexexácate'.

7

*Da dxucá'ana sban bénneache
(Mt. 15.1-20)*

¹ Benne' fariseo ca' nen bal-la benne' dxuluxuzájle'e da bdxixruj be'e Moisés, benne' gusá'aque' Jerusalén, belezríne' lau Jesús. ² Benne' caní belelé'ene' ca dxelún bal-la benne' dxuséde Jesús, dxelawe' xeta ne quebe zaj naxibe ne'e ca' dxelenná bea benne' xudau' ca'. Chee le' na' gulenná benne' Jerusalén ca':

—Zaj naca sban na' benne' ca' dxuséde Jesús.
Nadxa gulezíz tizre' le'.

³ Caní gulenná benne' ca' lawe' da zjácale benne' xudau' fariseo ca', ne xúgute' benne' judío ca' ca naca da belún xra xtau benne' ca', quebe dxelawe' xeta che quebe zaj naxibe ne'e zane' lasa. ⁴ Gate zjaque' lawe' xi'a wa'u, ca dxelexezrine' quebe dxelawe' xeta che quebe xelibe ne'e ca' zaj nadxixruj bea benne' xudau' ca'. Cá'anqueze de'xda da zante' da zjácálene', ca xexadxe zriga' da dxelé'aje', ne zruaga, ne zriga xé'ena, ne da naga dxelásie'. ⁵ Nadxa benne' fariseo ca', ne benne' ca' dxuluxuzájle'e da bdxixruj be'e Moisés gulenábene' Jesús:

—¿Bizr chee na' quebe zjácále benne' ca' dxusédenu' ca naca da gulún benne' gula? Dxelawe' xeta, zaj naca sban ne'e.

⁶ Na' bechebe Jesús:

—Láweze dxunle da xrlátaje. Lu lázrdaule xu'ule da calela. Cháweda' bchálajqueze Isaías ca nácale le'e gate na' bzuaaje' caní: Bénneache caní dxelúe lá'ane' neda' nen dxú'aze'.

Xichaj lázrdawe' ca' zaj nacuasa na neda'.

⁷ Níteze naca xel-la ba lá'ana da dxelu'e neda', lawe' da dxulusédenē' da zaj nadxixruj bea bēnneacheze.

⁸ Caní naca xca', le'e dxuzúale chalá'ala ca da nadxixruj bea Dios, na' zéajlele ca naca da gulún bēnneache ca dxíbele zruaga, ne zriga' cheeje, ne zánete da caní da dxunle.

⁹ Na' gunnadxe', dxē'e benne' ca':

—Chala'ala dxuzúale ca da nadxixruj bea Dios chee zéajlele ca naca da tu dxúnquezle. ¹⁰ Caní gunná Moisés na': "Gudapa ba lá'ana xra xrna'u." Cá'anqueze gunné': "Che tu benne' nne' schanni' chee xre', che xrne'e, con gátequeze bēnnea'." ¹¹ Le'e dxennale, "Che tu benne' xe'e xra xrne'e: Corbán," da zéaje na, quebe gaca gácalēna' le'e lawe' da bache bnéruzja' chee Dios ca naca da dē chia'. ¹² Che ca'an dxenné', nadxa le'e québedxa dxu'ule le' lataj gácalēne' xra xrne'e. ¹³ Gate dxunle caní dxuzúale chalá'ala xrtizra Dios, chee gunle ca da zéajlele. Na' zéajquezle dxunle zánete da zaj naca na caní.

¹⁴ Xecha lasa gunné' Jesús bēnneache ca', na' gunné', dxē'e le':

—Le guzé nágale xúgutele, ne le chéajni'i. ¹⁵ Netú da dxē'aj dxagu benne' quebe seque gucá'ana na le' sban. Da dxedxuaj na lu xichaj lázrdau bēnneache, le na' dxucá'ana na le' sban. ¹⁶ Le'e zua nágale, le xene.

¹⁷ Gate gucuasa Jesús naga zaj zra' benne' ca', na' guxú'e lu xu'u. Nadxa benne' ca' dxusédenē' gulēnábene' Le' ca naca chee da dxulē'e nigá. ¹⁸ Nadxa gunná Jesús, dxē'e le':

—¿Cá'anqueze le'e quebe dxéajni'ile? ¿Quebe dxéajni'ile xúgute da dxē'aj dxagu bēnneache quebe seque gucá'ana na le' sban ¹⁹ lawe' da quebe dxu'u na lu xichaj lázrdawe'. Dxu'u na lu le'e, na' dxedxuaj na?

Cate' gunná Jesús caní blé'ene' zaj naca chawe' xúgute da dxē'aj dxágudxu.

²⁰ Na' gunnadxe':

—Ca naca da dxedxuaj na lu xichaj lázrdau bēnneache, le na' dxucá'ana na le' sban ²¹ lawe' da lu xichaj lázrdau bēnnea' dxeledxúaj ca da calēla da dxuwía lazre', ne dul-la da dxucá'ana ditaj xel-la wechaga na', ne dul-la chee da sban, ne wete benne', ²² ne xel-la gubán, ne da dxezá lazre' gapa da naca chee benne' xula, ne da calēla ca', ne xel-la wezrí xe', ne da dxezá lazre' da sban, ne xel-la zrē'e lazre', ne xel-la wechalaj dizra' bizruj, ne xel-la dxun szren cuina, ne xel-la dxuchalaj bigaze. ²³ Xúgute da calēla caní dxeledxúaj na lu xichaj lázrdau bēnneache, ne dxuluxrinnaj na le'.

*Tu nu'ula quebe naca judío dxeajlí lazre' Jesús
(Mt. 15.21-28)*

²⁴ Na' bezá'a Jesús naga zue', guxíaje' lu xezre ca' zaj nababa xezre Tiro, ne xezre Sidón. Guxú'u Jesús tu lu xu'u, ne quegá guca lazre' nu xene. Quebe guca gache'. ²⁵ La gunézetē tu nu'ula zua Jesús na'. Nu'ula nigá zua tu zrí'ine' nu'ula, xu'ube' be' xriwe'. Bla' nu'ula' naga zua Jesús, ne bzu zribe' lawe'. ²⁶ Nu'ula nigá quebe naque' nu'ula judío. Naque' nu'ula chee tu xezre nababa xezr la xu Sirofenicia. Bzrine' lau Jesús, na' gunabe' Le' xebéaje' be' xriwe' da xu'u zrí'ine' nu'ula. ²⁷ Gunná Jesús, dxē'e nu'ula':

—Be' lataj xelagu nedxu zrí'ine benne' lu xu'u, lawe' da quebe naca chawe' cúadxu xeta xtila chee bidu ca', ne gunézrujdxu na chee bécudu ca'.

²⁸ Na' gunná nu'ula':

—Awe', Xran, san bécudu ca' zaj zra' zran ga dxelágube' dxeláguquezba' xeta bizruj da dxuluzexruj bidu ca'.

²⁹ Nadxa gunná Jesús:

—Ne chee dizra' da ba gunnéu', bexíaj na'a. Bache bedxúaj be' xriwe' lu beł-la' dxen chee zri'inu' nu'ula.

³⁰ Gate bezrín nu'ula' lizre', na' blé'ene' zri'ine' nu'ula dębe' lu da naga dxásebe', na' be' xriwe' ba bedxúaj na lu beł-la' dxen cheębe'.

Dxexún Jesús tu benne' nacuézruę', ne quebe dxaca nnie'

³¹ Nadxa bedxúaj Jesús, bezé'ę naga nababa xezre Tiro, na' gudétię' naga nababa xezre Sidón, ne xezre ca' zaj nababa Decápolis, na' bezrine' dxu'a nísadau' chee xęzr la xu Galilea. ³² Nadxa bedajleguá' benne' ca' tu benne' nacuézruę', ne quebe dxaca nnie', na' gulenábe' Jesús xrúa ne'ę benne' nigá.

³³ Guché Jesús benne' nigá chalá'ala naga zaj zra' benne' ca', na' bdię' zrube ne'ę lu naga bėnnea', na' bzre'ę zrene', ne bte' lawe' luzre bėnnea'. ³⁴ Nadxa la gunná'te' xabáa, ne gucá'a lazre', gunné':

—Efata.

Dizxa' nigá zéaę na: Bxalaj.

³⁵ Ca gunné' caní, na' bxalaj naga benne' cuezru nigá, ne bexaca luzre'. Nadxa guca bchálaje'. ³⁶ Na' gunná Jesús, dxę'e benne' ca' quebe nu xelé'ę ca da beņe'. Lácala gunná be'ene' le' caní, buluchílujdxę' dizra' ca da beņe'.

³⁷ Benne' ca' zaj zra' na' belexebánele'ęne', dxelenné':

—Xúgute dxune' cháwedau'. Dxexune' benne' cuezru ca', na' dxeléntene', ne dxexune' benne' ca' quebe dxaca nnie', na' dxelenné'tię'.

8

Dxugagu Jesús chua gaxúa benne' biu

(Mt. 15.32-39)

¹ Ca lu zra ca' zaj nazraga benne' zan, na' quebe bi dę da xelawę'. Ca'an guca gunné Jesús benne' ca' dxusėdene', na' guzre' le':

² —Neda' dxexache lazra' benne' caní lawe' da bache guca chunna zra zaj zre'ę nigá nen neda', ne quebe bi dę da xelawę'. ³ Che ca' xesel-la' le' lizre' quebe xelawę', na' xelate ni'a ne'ę la neza lawe' da zá'aca bal-le' zitu'.

⁴ Na' belexechebe benne' ca' dxusęde Jesús, dxelé'ę Le':

—¿Ájazra gundxu gunėzrujdxu da xelawę' nigá, ga quebe nu chilá' benne'?

⁵ Jesús bchebe' le':

—¿Bal-la xeta xtila nápałe le'e'?

Benne' ca' gulenné':

—Gazre na.

⁶ Nadxa gunná be'e Jesús xelebé' xúgute bėnneache ca' lu xu. Nadxa guquę'e xeta xtila, ne guzre' Dios:

—Xcalenu'.

Nadxa bzúzruje' na, ne bnėzruje' na benne' ca' dxusėdene', na' benne' caní gulisię' na lówela xúgute bėnneache ca'. ⁷ Zaj nápaqueze' tu chupa bėladau'. Na' Jesús gunabę' Dios gunę' na chawe'. Nadxa gunná be'ene' gulise benne' ca' le' na. ⁸ Gulagu xúgute bėnneache ca', ne belezúalę'ę chawe'. Ca gudé na' bulusuzre'ę gazre xcuite xca'a nen xeta bizruj da belegá'ana. ⁹ Benne' ca' gulawę' zaj naque' ca chua gaxúa benne' biu. Nadxa Jesús bze' benne' ca' dizra'. ¹⁰ Nadxa guxú'ę lu da dxedá lawe' nísadau' nen benne' ca' dxusėdene'. Xjaque' lu xęzr la xu chee benne' xezre Dalmanuta.

Dxelenabe' Jesús gunę' tu xel-la waca

(Mt. 16.1-4; Lc. 12.54-56)

¹¹ Nadxa belezrín benne' xudau' fariseo ca' ga na', ne gulezú lawe' dxulutil-le' dizra' nen Jesús. Gulenabé' Jesús guné' tu xel-la waca da za xabáa, chee xelenézene' bi xel-la waca nape'. ¹² Nadxa Jesús gucá'a dxgua lazre', gunné':

—¿Bizr chee na' dxelenaba benne' caní guna' tu xel-la' waca da za xabáa? Da li dxapa' le'e, québequeze bi xel-la waca guna' lau le'e.

¹³ Nadxa Jesús bca'ane' benne' ca', na' bexu'e lu da dxedá lawe' nísadau', dxexíaje' xechelá'a chee nísadau'.

Da naca ca cua zichaj chee xeta xtila

(Mt. 16.5-12)

¹⁴ Gulal-la lazre' benne' ca' dxusede Jesús xelu'e da xelawe', na' zaj nu'e tuze xeta xtila lu da dxedá lawe' nísadau'. ¹⁵ Nadxa Jesús gunná bé'ene', dxé'e benne' ca':

—¡Le nna'xque nigá! Le guxúe cuínale da naca cua zichaj chee xeta xtila chee benne' xudau' fariseo ca', ne ca naca cua zichaj chee xeta xtila chee Herodes.

¹⁶ Nadxa benne' ca' dxusede Jesús gulé ljwezre':

—Le' dxenné' caní lawe' da quebe de xeta xtila gágudxu.

¹⁷ Dxeque be'e Jesús da dxelenné', na' guzre' le':

—¿Bizr chee na' dxennale quebe de xeta xtila gágudxu? ¿Quebe ne chéajni'ile ne quebe dxeque be'ele? ¿Nácale'e zide lázrdaule? ¹⁸ ¿Quebe dxelé'ele nen xiaj laule, ne quebe dxenle nen nágale? ¿Quebe dxexásá lázrele? ¹⁹ Gate na' bgawa' chí xun gaxúa benne' biu nen gaxxu' xeta xtila, ¿bal-la xcuite xca'a xeta bizruj da becá'ale?

Benne' ca' gulenné':

—Chazrinnu na.

²⁰ Na' gunná Jesús:

—Na' gate na' bgawa' chua gaxúa benne' biu nen gazre xeta xtila, ¿bal-la xcuite xca'a da zaj zraté becá'ale?

Le' gulenné':

—Gazre na.

²¹ Nadxa Jesús guzre' benne' ca':

—¿Ne la gázqueze quebe dxéajni'ile?

Jesús dxexune' tu benne' la chul-la

²² Ca gudé na' Jesús, ne benne' ca' dxusedene' belexezrine' lu xezre Betsaida, na' benne' Betsaida guleché'e tu benne' la chul-la lau Jesús, na' gulata' xuene' Le' guté' le'. ²³ Jesús gudelé' na' benne' la chul-la, ne bebéaje' le' dxu'a xezre. Na' btupe' zrene' lu xiaj lawe', ne guxrúa ne'e le'. Na' bchebe' le' chete dxelé'ene'. ²⁴ Benne' la chul-la gunné'e, na' gunné':

—Dxelé'eda' benne' ca', zaj naque' ca weaj xaga, na' dxesí'aque'.

²⁵ Nadxa Jesús guxrúa ne'e xiaj lawe' da xula, na' benne' na' gunná dxgüe'. Na' bexaque', ne xúguté bache dxelé'ene' cháwedau'. ²⁶ Nadxa Jesús besel-le' le' lizre', dxé'e le':

—Quebe chu'u lu xezre nigá, ne quebe nu xu'u caní.

Pedro dxenné' naca Jesús benne' nasel-la Dios

(Mt. 16.13-20; Lc. 9.18-21)

²⁷ Ca gudé na' Jesús, ne benne' ca' dxusedene' xjaque' lu xézredu ca' zaj nababa xezre Cesarea naga dxenná bea Filipo. Dxácaté zaj xu'e neza bchebe Jesús benne' ca':

—¿Nuzra na' dxelenná benne' naca' neda'?

²⁸ Belexechebe':

—Bal-la benne' dxelenné' nacu' Juan, bénnea' bchue' bénneache nisa. Benne' xula dxelenné' nacu' Elías, bénnea' bchálaje' waláz chee Dios. Benne' xula dxelenné' nacu' tu benne' xula bchálaje' waláz chee Dios.

²⁹ Nadxa Jesús bchebe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nase-la Dios.

³⁰ Nadxa gunná be'e Jesús benne' ca'. Gunné':

—Quebe nu xele ca'.

Dxuchalaj Jesús ca dxal-la' gatie'

(Mt. 16.21-28; Lc. 9.22-27)

³¹ Nadxa guzú lau Jesús dxulé'ene' benne' ca' ca dxal-la' sáca'le'e Le', Benne' Gulje' Bénneache, ne ca xelún benne' gula chee judío ca', ne benne' xíchaje' ca' chee bxruze ca', ne benne' dxuluxuzájle'e da nadxixruj bea Dios, xuluzúe' Le' chálá'ala. Nadxa guzre' le' welútie' Le', san xebane' zra guxunne zra. ³² Da nigá guzre' le' caníqueze. Nadxa Pedro guché'e Jesús chálá'ala, ne guzú lawe' dxedil-le' Le'. ³³ Jesús bexéchaje', ne gunné'e benne' ca' dxusédené', na' gudil-le' Pedro, dxé'e le':

—Gucuasa cuita' nigá, lue', da xriwe'. Quebe dxéquenu' da nigá ca dxun Dios. Ca dxun bénneache dxunu'.

³⁴ Nadxa Jesús gunné' benne' ca' dxusédené', ne xúgute bénneache ca', na' guzre' le':

—Che núlale dxaca lázrele gunle neda' tuze, dxal-la' guzúale chálá'ala xúgute da dxezá lázrele le'e, ne gácale ca tu benne' zéaje' chee te'e xaga béguaj, na' gunle neda' tu zren. ³⁵ Che tu benne' dxaca lazre' guselé' xel-la nabán chee', benne' nigá gunitie' xel-la nabán chee'. Bénnea' gunitie' xel-la nabán chee' ne chia' neda', ne ne chee dizra' chawe' chia', benne' nigá guselé' xel-la nabán chee'. ³⁶ Che tu benne' gape' xúgute da gaca chee xezr la xu nigá, na' gunitie' bénne'du xu'e, ¿bízraqueze da ba neza gaca na chee bénnea'? ³⁷ Quebe bi gaca gunezruj tu benne' chee guselé' bénne'du xu'e. ³⁸ Che tu benne' gapa stu'e chia' neda', ne chee dizra' chawe' chia' lau bénne' caní, benne' dxulucá'ana Dios, ne dxelún dul-la, la gaze neda', Benne' Gulje' Bénneache, gapa stú'queza' chee bénnea' gate xida' nen xel-la szren chee Xra', ne nen gubáz chee xabáa lá'azxa ca'.

9

¹ Cá'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatie' nédxula ca xeelé'ene' xida xel-la dxenná bea chee Dios nen xel-la waca chee'.

Ca guca gate bcha ca gunná' Jesús

(Mt. 17.1-13; Lc. 9.28-36)

² Ca gudé xrupa zra, guché Jesús Pedro, ne Jacobo, ne Juan, na' guxíajlene' benne' canize tu lu xi'a sibe. Na' bcha ca gunná' Jesús lau benne' ca'. ³ Zra lana Jesús bexaca na chiche ca bezxe' da dxágute na laudxu. Quegá nu chilá' benne' lu xezr la xu gaca quibe' zra lané' chee xegá'ana na chiche ca guca zra lana Jesús. ⁴ Na' benne' ca' dxuséde Jesús belelé'ene' Elías, ne Moisés, benne' gulate nédxudaute, dxuluchálajlene' Jesús. ⁵ Pedro guzre' Jesús:

—Benne' weséde, cháwele'e naca zradxu nigá. Guntu' chunna xu'u lágadau', tu chiu', ne tu chee Moisés, ne tu chee Elías.

6 Canígunná Pedro lawe' da dxelezrebe benne' ca' dxusede Jesús, na' Pedro quebe nézene' ca da dxenné'. 7 Nadxa betaj tu beuj naga zaj zre'e, da bcache na le', na' lu beuj na' belenne' tu chi'i benne', gunné':

—Benne' nigá naque' Zri'ina' nazrí'itę lazra'. Le xen da dxenné'.

8 Gate gulenné'e, québedxa nu nalá' nen le', san tuze Jesús.

9 Dxacate dxelexétaje' lu xi'a na', gunná be'e Jesús benne' ca' quebe nu xuluchálajlene' ca naca da belelé'ene' gate te na' xebán Benne' Gulje' Bénneache ládujla benne' gate. 10 Cheę le' na' gulezúe' zrize ca naca da ba guca. Buluchebe ljwezre':

—¿Bizra zéaje da na', xebane' ládujla benne' gate?

11 Nadxa buluchebe' Jesús:

—¿Bizr cheę na' dxelenná benne' ca' dxuluxuzájle'e da nadxixruj bea Dios dxal-la' xelá' Elías nédxula ca Cristo?

12 Bechebe Jesús, na' guzre' le':

—Da li xelá' Elías nedxu, ne gucá'ana chawe' xúgute. ¿Bizra dxenná da naxúaj na lu xiche cheę Dios ca gaca chia' neda', Benne' Gulje' Bénneache? Dxenná na da zan da saca', na' xuluzúa bénneache neda' chalá'ala. 13 Neda' dxapa' le'e, ba bla' Elías, na' belune' cheę' ca naca xúgute da gulaca lazre' ca da dxenná na lu xiche cheę Dios ca da dxal-la' gaca cheę'.

Dxéxun Jesús tu benne' cuide' xu'ube' be' xriwe' (Mt. 17.14-21; Lc. 9.37-43)

14 Ca gudé na' belexezrine' naga zaj zra' xezicadxa benne' ca' dxusede Jesús, na' belelé'ene' benne' zan zaj naxéchaje' le', ne zaj zráqueze na' benne' dxuluxuzájle'e da nadxixruj bea Dios, na' dxulutíl-lalęne' le' dizra'. 15 Gate belelé'ene' Jesús, na' xúgute' belexebánene', na' gusi'aca chégüe' naga zua Jesús, ne bulugape' Le' diuzre. 16 Ca'an guca, Jesús bchebe' benne' ca':

—¿Bizra na' dxedíl-lalele benne' ca'?

17 Nadxa tu benne' ze' ga na' bechebe':

—Benne' wesęde, nache'a zri'ina' nigá cheę xexunu'-be' lawe' da xu'ube' be' xriwe' da ba nun na lebe' bi quebe dxaca nnebe'. 18 Gáteteze na' dxu'ube' da xriwe', na' dxel-la na lebe', ne dxin na lebe' lu xu. Dxezría bzrina' xú'abe', ne dxagu lázxabé'. Cheę le' na' ba dxéxrujle'ębe'. Ba gunaba' benne' ca' dxusédenu' xelxebéaje' be' xriwe' na', san quebe gulezéquene'.

19 Bechebe Jesús:

—Le'e, benne' quebe dxéajlele chia'. ¿Ájate dxal-la' súalęna' le'e? ¿Ájate dxal-la' gaca' benne' zren lazre' nen le'e? Le cheajxri' bi cuide' na' nigá.

20 Na' xejlexri'e-be'. Gate be' xriwe' na' ble'e na Jesús, na' ben na gudel-la chuna' bi cuide' na', ne gudinna lebe' xu, na' dxebixre dxetúl-labe' lu xu, ne guzría bzrina' dxú'abe'. 21 Nadxa bchebe Jesús xrabe':

—¿Bátate dxezácabe caní?

Gunná xrabe':

—Gate nácatebe' bidau'. 22 Zane' lasa be' xriwe' na' dxugú'u na lebe' lu xi', ne lu nisa cheę gute na lebe'. Che wazéquenu' bi gunu' cheębe', bexache lazre' netu', ne gúcale netu'.

23 Na' guzre Jesús le':

—Che wazéquenu' lue' chéajle'u chia', xúgute wazeque cheę benne' dxéajle'e chia'.

24 Nadxa xra bi cuide' nigá gunné' zizraj:

—Dxéajle'a chiu'. Gúcale neda' cheę chéajle'dxa'.

²⁵ Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nnié', ne cuezru, neda' dxenná be'eda' lue' xedxúaju'. ¡Bsan bí cuide' nigá! ¡Québedxa xexú'u lu bel-la' dxen chebe'!

²⁶ Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

²⁷ Nadxa gucá'a Jesús na'be', bechise'-be'. Na' benne' cuide' na' bezébe'.

²⁸ Nadxa guxú'u Jesús tu lu xu'u, na' benne' ca' dxusédene' buluchebe' Le' naga zue' tuze':

—¿Bizr chee' na' quebe guzéquentu' netu' xebéajntu' be' xriwe' na'?

²⁹ Nadxa Jesús guzre' benne' ca':

—Ca naca be' xriwe' caní séquele xebéajle na che návale lau Dios, ne gunle gubasa.

Jesús dxuchálaje' da xula ca gaca gate gatie'

(Mt. 17.22-23; Lc. 9.43-45)

³⁰ Gate besi'aque' naga zaj zre'e, na' belexedéé' naga nababa Galilea. Jesús quebe guca lazre' nu neze ga zue', ³¹ lawe' da dxuzéajni'ine' benne' ca' dxusédene', na' guzre' le':

—Zua tu benne' gudéé' neda', Benne' Gulje' Bénneache, lu na' benne' ca' dxeledábague' neda', na' xelútie' neda', san gate gaca chunna zra natia', na' xebana'.

³² Benne' ca' quebe guléajni'ine' ca da dxe'e le', ne belezrebe' xuluchebe' Le'.

Nu benne' naque' blau

(Mt. 18.1-5; Lc. 9.46-48)

³³ Nadxa belezrine' lu xezre Capernaum, na' gate zaj zre'e lu xu'u na', bchebe Jesús benne' ca' dxusédene':

—¿Bizra dizra' dxutíl-lalele ljwézrele za'le la neza?

³⁴ Gulezré'e zrize lawe' da bulutil-le' dizra' la neza na' che nule' nácadxe' benne' blau. ³⁵ Nadxa Jesús gudxé'e, na' gunné' benne' chazrinnu, benne' ca' dxusédene', na' guzre' le':

—Che núlale dxaca lázrele gácale benne' blau, dxal-la' gácale ca benne' bzebe, ne gunle zrin chee' xúgute bénneache.

³⁶ Nadxa guqu'é tu bidau', na' bzue' lebe' gachaj lawe' benne' ca'. Na' bnide'-be', ne guzre' benne' ca':

³⁷ —Benne' na' gape' ba lá'ana tu bidau' ca bidu nigá lawe' da nazrí'ine' neda', bénnea' gape' ba lá'ana neda', na' bénnea' gape' ba lá'ana neda', quegá tuza' neda' gape' ba lá'ana, cá'anqueze gape' ba lá'ana Xra' nasel-le' neda'.

Benne' quebe dxedábague' dxi'u, dxácalene' dxi'u

(Lc. 9.49-50; Mt. 10.42)

³⁸ Nadxa Juan guzre' Jesús:

—Benne' Wesede, blé'entu' tu benne' dxebéaje' be' xriwe' da xu'u bénneache, dxuchínene' Lau' Lue', san bénnea' quebe dxune' dxi'u tu zren. Chee le' na' gúzrentu' le' québedxa guné' ca'.

³⁹ Jesús guzre' benne' ca' dxusédene':

—Quebe bi xele le'. Che nu benne' guné' tu xel-la waca, guchínene' La' neda', benne' nigá quebe gaca nne' schanni' chia'. ⁴⁰ Caní naca na lawe' da

benne' quebe dxedábague' dxi'u, dxácalene' dxi'u. ⁴¹ Núteteze benne' gunne' le'e tu zriga' nisa ne chee La' neda' lawe' da nácale chia' neda', Cristo, da liqueze dxenní'a, wazí'queze' da dxal-la' si'e.

Ca naca da dxun na dxi'u benne' dul-la

(Mt. 18.6-9; Lc. 17.1-2)

⁴² Gunnadxa Jesús:

—Núteteze benne' gulé'ene' tu bidau' chee gunbe' dul-la, bidu na' dxéajlebe' chia', cháwedxa guchéajdxu tu xiaj zi'i lba bénnea', ne cheajchú'unadxu le' lu da situj chee nísadau'. ⁴³ Che na'u dxun na gunu' dul-la, wendxa guchugu na'u na'. Cháwedxa xexú'u xabáa naga gaca banu' nen tuze na'u quézcala xexíaju' lataj ba xa' nen dxúpaté' na'u, naga quebe xexula xi' da xezacu'. ⁴⁴ Lataj ba xa' na' quebe xelate bzuga', be dxeláguba' benne' ca' dxelune' da caléla, na' xi' na' cabata' xexúl-laqueze na'. ⁴⁵ Na' che ni'u dxun na gunu' dul-la, guchugu ni'u na'. Cháwedxa xexú'u xabáa naga gaca banu' nen tu ni'u, quézcala xexíaju' lataj ba xa' nen dxúpaté' ni'u, naga quebe xexula xi'. ⁴⁶ Lataj ba xa' na' quebe xelate bzuga', be dxeláguba' benne' ca' dxelune' da caléla, na' xi' na' cabata' xexúl-laqueze na'. ⁴⁷ Che xiaj lau' dxun na gunu' dul-la, guleaj xiaj lau' na'. Cháwedxa xexú'u naga dxenná bea Dios nen tuze xiaj lau', quézcala xexíaju' lataj ba xa' nen dxúpaté' xiaj lau'. ⁴⁸ Lataj ba xa' na' quebe xelate bzuga', be dxeláguba' benne' ca' dxelune' da caléla, na' xi' na' cabata' xexúl-laqueze na'.

⁴⁹ 'Ca dxundxu gate dxugú'udxu zede' b'ela' da guzáladxu lu xi' chee xegá'ana chawe' na, ca'an gaca chee xúguté' benne'. Cá'anqueze dxugú'udxu zede' da dxuzéxedxu lau Dios. ⁵⁰ Zede' na' naca na da chawe', san che xenite xel-la sna'a chee na, ¿ájala gundxu chee guchínedxu zede' na'? Le gaca le'e ca zede' chawe' na', ne le sua lu xel-la zri lázre' tule nen xetule.

10

Ca naca chee benne' dxexelé'e nen zru'ule'

(Mt. 19.1-12; Lc. 16.18)

¹ Nadxa bedxúaj Jesús xezre Capernaum, na' guxíaje' naga nababa Judea xechalá'a xegu Jordán naga dxalaj gubizra. Na' belezraga bénneache zan naga zua Jesús, na' xecha lasa na' bsédené' le' cáqueze dxune'. ² Nadxa bal-la benne' xudau' fariseo ca' belezrine' lau Jesús, na' buluchebe' Le' chee da gun nne' Le' tu da quebe dxal-la' nne'. Buluchebe' Le':

—¿Waca tu benne' xelé'e nen zru'ule'?

³ Nadxa bechebe Jesús:

—¿Bizra gunná be'e Moisés le'e?

⁴ Na' belexechebe benne' ca':

—Benna Moisés lataj gunézrujdxu zru'uladxu tu xiche da dxenná na dx-elá'adxu, na' gusandxu le'.

⁵ Nadxa Jesús guzre' le':

—Caní gunná be'e Moisés lawe' da zaj naca zizraj lázrdaule le'e. ⁶ Gate nédxudau' gate ben Dios xúguté' da dxelé'edxu, na' bene' bénneache benne' biu, ne nu'ula, na' gunné': ⁷ "Chee le' na' benne' biu na' gusané' xruze xrne'e chee gaque' tuze nen zru'ule', ⁸ na' dxupe' xelaque' ca tuze benne'." Ca' naca na, québedxa zaj naca chupe', san tuze benne' zaj naque'. ⁹ Chee le' na' netú benne' quebe dxal-la' xelé'e da nuchaga Dios.

¹⁰ Gate zaj zra' lu xu'u benne' ca' dxusede Jesús buluchebe' Le' xetú lasa ca naca chee da nigá. ¹¹ Na' Jesús guzre' benne' ca':

—Che tu benne' xelë'e nen zru'ule', ne xezúalene' nu'ula xula, dxíchuje' xrba chee wechaga na' lawe' da dxusebague' zru'ule' nedxu na' dul-la. ¹² Cá'anqueze che tu nu'ula gusanë' benne' chee', ne xezúalene' benne' xula, la gázqueze dxíchuje' xrba chee wechaga na' da dxusebague' benne' chee' dul-la.

Jesús dxenabe' Dios gun chawe'e bidu ca'

(Mt. 19.13-15; Lc. 18.15-17)

¹³ Nadxa bénneache ca' guleché'e bidu chee' ca' lau Jesús chee' xrua ne'e lebe', na' benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. ¹⁴ Gate ble'e Jesús da dxelunë', na' bzre'e, ne guzre' le':

—Le güe bidu ca' lataj xeledá'abe' naga zua'. Quebe guzágale-be' lawe' da benne' zaj naque' ca' bidu caní xelu'e naga dxenná bea Dios. ¹⁵ Da li dxapa' le'e, che tu benne' quebe gape' ba lá'ana da dxenná bea Dios ca' dxelün bidu caní, cabata' chu'u bénnea' naga dxenná bea Le'.

¹⁶ Nadxa gucá'a Jesús bidu ca', ne bnide'-be'. Guxrúa ne'e lebe', na' gunabe' Dios gun chawe'e-be'.

Benne' cuide' nape' da gunní'a dxuchálajlene' Jesús

(Mt. 19.16-30; Lc. 18.18-30)

¹⁷ Gate bexú'u Jesús neza, na' guzá chegu tu benne' biu, na' bzu zribe' lau Jesús, ne bchebe' Le':

—Benne' xrlátaje, bi dxal-la' guna' chee' gapa' xel-la nabán zeajlí canna?

¹⁸ Jesús guzre' le':

—¿Bizr chee' na' dxu'u neda' xrlátaje? Québedxa nu' chilá' naca xrlátaje. Tuze Dios naque' xrlátaje. ¹⁹ Núnbeaquezu' ca' da bdxixruj bea Dios gate na' gunné': Quebe quichju' xrba chee wechaga na'.

Quebe gutiu' benne'.

Quebe cuanu' chee benne'.

Quebe nneu' chee nu' benne' da quebe naca na.

Quebe gagu lanu'.

Gudapa ba lá'ana xra xrna'u.

²⁰ Nadxa bénnea' bechebe':

—Benne' wesede, xúgute' da caní dxuna' nácatea' bidau'.

²¹ Na' Jesús gunné'e le' xrtandau', ne guzre' le':

—Tu da dxexázzjenu'. Guxíaj xeajete xúgute' da napu', na' bnezruj benne' xache' ca' dumí chee' na. Nadxa gapu' da gunní'a xabáa. Na' gudá, gacu' ca tu benne' zéaje' chee te'e xaga béguaj, ne ben neda' tuze.

²² Gate bene' da nigá, na' benne' cuide' na' bewi'ine lázrele'e, na' bexíaje' dxewi'ine' lawe' da nácale'e benne' gunní'a.

²³ Nadxa Jesús gunné'e ni naze, na' guzre' benne' ca' dxusedene':

—Stébetë naca chu'u benne' gunní'a naga dxenná bea Dios.

²⁴ Belexebánele'e benne' ca' dxusede Jesús ca' naca dizra' gunná Jesús, na' Le' guzre' le' xetú lasa:

—Zrí'ina'dau', stébetë naca xelú'u naga dxenná bea Dios benne' dxuluxrén lazre' xel-la gunní'a. ²⁵ Chadidxa te tu bea zren lu negue xeche' quézcala chu'u tu benne' gunní'a naga dxenná bea Dios.

²⁶ Gate belén benne' ca' dizra' nigá, na' belexebánele'ene', na' buluchebe ljwezre':

—¿Núzraqueze la xca'?

²⁷ Jesús gunné'e benne' ca', ne guzre' le':

—Quebe seque' nu bénne' gungé' da nigá, san Dios wazéqueñe'. Quebe bi de ga quebe gaca gun Dios.

²⁸ Nadxa Pedro guzre' Jesús:

—Xránantu', netu' ba bcá'anantu' xúgute da nápantu', ne zéajlentu' Lue'.

²⁹ Na' bechebe Jesús:

—Da li dxapa' le'e, núteteze benne' gusané' lizre', u benne' biche', u nu'ula zane', u xre', u xrne'e, u zru'ule', u zri'ine', u xezr la xu chee' ne chia' neda', u ne chee dizra' chawe' chia', ³⁰ benne' nigá si'e na'a lu xezr la xu nigá tu gaxúa cue' ca' da si'e, xu'u ca', ne benne' biche' ca', ne nu'ula zane' ca', ne xrne'e ca', ne xezr la xu chee' ca', na' weláu zi' xúzrequeze bénneache le'. Lu xezr la xu da za za' wazí'queze' xel-la nabán zeajlí canna. ³¹ Zánete benne' zaj naca na'a benne' blau xelaque' ca benne' bzebe, na' zánete benne' zaj naca na'a ca benne' bzebe xelaque' benne' blau.

Dxuchalaj Jesús xetú lasa ca gaca gate gate'

(Mt. 20.17-19; Lc. 18.31-34)

³² Gate zaj xu'e neza dxelegüene' zjaque' Jerusalén, na' Jesús zria lawé' lau benne' ca' dxusédené'. Dxelezrebe benne' ca', ne lu xel-la dxelezrebe zjácálené' Le'. Na' da xula gucá'a Jesús benne' chazrinnu ca' dxusédené', na' guzú lawé' dxé'e le' ca naca da dxal-la' gaca chee'. ³³ Na' guzre' le':

—¡Le na' xque nigá! Dxegüendxu zéajdxu Jerusalén naga tu benne' gudée' neda', Benne' Guljé' Bénneache, lu na' benne' xíchajé ca' chee' bxruze ca', ne lu na' benne' dxuluxuzájle'e da nadxixruj bea Dios, na' xelechugue' chia' chee' gatia', na' wuludee' neda' lu na' benne' zitu' ca'. ³⁴ Nadxa xelún le' chia' neda', ne xelu'e neda', ne xuluzré'e neda' zrene', na' xelutie' neda'. Gate gaca chunna zra xebana' ládujla benne' gate.

Jacobo ne Juan dxelenabe' Jesús bi gungé' chee'

(Mt. 20.20-28)

³⁵ Nadxa Jacobo ne Juan, zri'ine Zebedeo, belezrine' lau Jesús, na' gulé'e Le':

—Benne' Wesede, dxaca lázrentu' gunu' cheentu' da nábantu' Lue'.

³⁶ Nadxa bchebe Jesús le':

—¿Bi dxaca lázrele guna'?

³⁷ Na' belexechebe' Le':

—Benna netu' lataj cué'entu', tuntu' chalá'a xabéla chiu', ne xetuntu' chalá'a xéglala chiu' naga nna be'u xabáa chiu'.

³⁸ Na' guzre Jesús le':

—Le'e quebe nézele da dxenábale. ¿Waca xí'ajle le'e da na' xi'aj neda', da zéaje na ca naca da sácadxu? ¿Waca chuale nisa ca chua' neda' nisa lu xel-la gute?

³⁹ Le' belexechebe':

—Wácantu'.

Na' Jesús guzre' le':

—Da li wé'ajle ca naca da na' xi'aj neda', ne chuale nisa ca chua' neda' nisa.

⁴⁰ Chee' cué'ele chalá'a xabéla chia' u chalá'a xéglala chia', quegá neda' gunna' na. Gaca chee' benne' ca' ba nucueza Dios chee'.

⁴¹ Gate xechí benne' ca' dxusede Jesús belenne' na, na' belezré'e nen Jacobo ne Juan. ⁴² Jesús gunné' benne' ca', na' guzre' le':

—Ba nézquezle ca dxelún benne' dxelenná be'e benne' xezr la xu ca'. Dxelún cuine' xrane benne' xezr la xu ca'. Benne' blau ládujla le' dxezi'e ba neza xel-la dxenná bea chee'. ⁴³ Quebe gaca caní ládujla le'e. Che nu benne' dxaca lazre' gaque' benne' blau ládujla le'e, benne' nigá dxal-la' gungé' zrin chee'

ljwezre', ⁴⁴ na' che nu benne' ládujla le'e dxaca lazre' gaque' benne' xíchaje, benne' nigá dxal-la' gaque' ca tu benne' nada'u chee guné' zrin chee xúgute ljwezre'. ⁴⁵ Caní gaca na lawe' da cá'anqueze neda', Benne' Gulje' Bénneache, bla'a, quegá chee xelún bénneache zrin chia' neda'. Bla'a chee guna' zrin chee bénneache, ne chee guzúa' xel-la nabán chia' chee guselá' benne' zan.

Dxexún Jesús tu benne' la chul-la le' Bartimeo

(Mt. 20.29-34; Lc. 18.35-43)

⁴⁶ Nadxa belezrine' xezre Jericó. Gate na' bedxúaj Jesús xezre nigá nen benne' ca' dxusédene', ne nen benne' zante, na' zua tu benne' la chul-la le' Bartimeo, zri'ine Timeo, dxe'e dxu'a neza dxenabe' guna'. ⁴⁷ Na' ca bénne' dxedé Jesús, benne' Nazaret, ga na', na' benne' la chul-la nigá guzú lawe' dxenné' zizraj:

—jJesús, Zri'ine David, bexache lazre' neda'!

⁴⁸ Benne' zan ca' guledil-le' le' chee sue' zrize, na' le' zízrajdxa gunné':

—jZri'ine David, bexache lazre' neda'!

⁴⁹ Nadxa gugá Jesús, na' gunné':

—Le nne' le'.

Na' gulenné' benne' la chul-la na', gulé'e le':

—Bdipa lazru'. Guxasa lawe' da dxenné' lue'.

⁵⁰ Nadxa bzale' lazxe' naxrúa cuzre' chalá'ala, na' guxritie' chee zrine' lau Jesús. ⁵¹ Nadxa Jesús gunábene' le':

—¿Bizra dxaca lazru' guna' chiu'?

Na' gunná benne' la chul-la:

—Benne' Wesede, dxaca lazra' xexunu' xiaj lawa'.

⁵² Na' Jesús guzre' le':

—Waca xexíaju'. Bache bexacu' lawe' da guxéajle'u chia'.

La ble'ete' benne' la chul-la na', na' guxíajlene' Jesús la neza.

11

Dxu'u Jesús xezre Jerusalén

(Mt. 21.1-11; Lc. 19.28-40; Jn. 12.12-19)

¹ Gate belezrine' gáguze naga dxe' xezre Jerusalén, ne zaj xu'e la neza naga zaj dxe' xezre Betfagé, ne xezre Betania zran xi'a chee xaga olivo ca', na' Jesús gusel-le' chupa benne' ca' dxusédene', ² na' guzre' le':

—Le chjaca lu xézredau' da dxe' tu chi na', na' gate zrinle na', cheajxrácale tu burro da'ba' xaga, bea na' netú benne' quebe ne cuié' lëba'. Le sezre-ba', ne le che'-ba' nigá. ³ Che nu benne' nabe' le'e bizr chee na' dxesézrele-ba', xégale le': "Xránadxu dxechine'-ba'", na' la xesél-la'te' lëba'.

⁴ Nadxa xjaque', ne xeajlexraque' burro na' da'ba' xaga dxu'a dxa xu'u cuita neza, na' gulesézre'-ba'.

⁵ Nadxa bal-la benne' zaj zre'e na' gulé'e le':

—¿Bizra' dxunle? ¿Bizr chee na' dxesézrele búrrua'?

⁶ Nadxa le' gulé'e benne' ca' ca ba gunnáqueze Jesús, na' belúe' le' lataj. ⁷ La belexché'ete' búrrua' lau Jesús, na' buluzríe' zra lané' cúzruba', na' guzríia Jesús lëba'. ⁸ Benne' zante gulechíluje' xicha chee', ne xladxe' la neza, na' benne' xula gulechugue' zina' da gulíxrué' la neza.

⁹ Na' benne' ca' zaj zrié' lawe', ne benne' ca' zjaque' bzébe, gulezú lawe' dxelenné' zizraj:

—¡Gaca ba! ¡Lá'azxa naca benne' ze'e, nase-la Xránadxu Dios Le'! ¹⁰ ¡Lá'azxa naca xel-la dxenná bea da za', xel-la dxenná bea chee xradxu David! ¡Gaca ba Dios!

¹¹ Ca'an guca gate na' guxú'u Jesús xezre Jerusalén, na' guxú'e lu xudau'. Ca gudé gunné'e xúgute da zaj nnita du cuite', na' bezé'e zexíaj'e xezre Betania nen benne' chazrinnu ca' dxuséden'e, lawe' da ba zeaj dxezré'.

Jesús dxugu'e de' xaga higo

(Mt. 21.18-19)

¹² Gute xu zra xula gate na' gusá'aque' xezre Betania, gudún Jesús. ¹³ Na' blé'ene' zítu'la dxe' tu xaga higo zria na laga', na' xeajnné'e che zria da zixre lu xaga na', san quebe bi zria na. Lágaze zria na lawe' da quebe ne zrin zra cuía na da zixre. ¹⁴ Nadxa Jesús guzre' xaga higo na':

—Cabátadxa nu gagu da zixre chiu'.

Benne' ca' dxuséde Jesús belénqueze' na.

Jesús dxexún lbe'e lu xudau'

(Mt. 21.12-17; Lc. 19.45-48; Jn. 2.13-22)

¹⁵ Ca gudé na' belexezrine' xezre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zre'e wete, ne benne' zaj zre'e wewa' na'. Na' bdxixre' blaga chee benne' weche'e dumí chee benne' zítu', ne bdxixre' naga dxelebé' benne' wete bgúgudu ca'. ¹⁶ Quebe be'e lataj nu benne' xudé'e xua ca' lu xudau'. ¹⁷ Nadxa bséden'e bèneache ca', dxenné':

—Lu xiché lá'azxa dxenná Dios: “Lizra' gaca na tu xu'u naga xuluchálajle Dios benne' zá'aque' xúgute xezre.” Le'e ba nunle lizra' ca tu lizre benne' gubán ca'.

¹⁸ Na' benne' xíchaj'e ca' chee bxruze ca', ne benne' dxuluxuzájle'e ca da nadxixruj bea Dios belenne', na' gulezú lawe' dxelexíujle' ájala gaca xelútete' Jesús lawe' da dxelezrebe' Le'. Ca'an guca lawe' da dxelexebane xúgute bèneache ca naca da dxuséde Jesús le'. ¹⁹ Ca gula chizrela, Jesús bezé'e lu xezre.

Dxebizre xaga higo

(Mt. 21.20-22)

²⁰ Ca gula zra xula che zílala, na' Jesús, ne benne' ca' dxuséden'e belexedé'e na', na' belelé'ene' xaga higo na', ba nabizre na duté lue na. ²¹ Nadxa xeajsa lazre Pedro, na' guzre' Jesús:

—Benne' weséde, gunná'xque xaga higo nigá da gulú'u na de'. Bache gubizre na.

²² Jesús gunné':

—Le cheajlí lazre Dios. ²³ Da li dxapa' le'e, che nútetezele nnale, xe le xi'a nigá: “Cuasa lue' nigá, xeajchú'u lu nísadau'”, ne che quebe dxun chupa lázrele, na' chéajlele waca da ba gunnale, na' gácaqueze na. ²⁴ Chee le na' dxapa' le'e, xúgute da ná bale Dios gate dxuchálajlele Le', che chéajlele ba guzile na, ca'an gácaqueze. ²⁵ Gate na' dxuchálajlele Dios, che dxezrá'ale nu benne', le gunité lau chee bènea' chee cá'anqueze Xrale zue' xabáa gunité lawe' dul-la da nabágale. ²⁶ Che quebe gunité laule chee bènea', Xrale zue' xabáa quebe gunité lawe' dul-la da nabágale.

Ca naca xel-la dxenná bea da napa Jesús

(Mt. 21.23-27; Lc. 20.1-8)

²⁷ Nadxa belexezrine' xezre Jerusalén, na' ca dxedá Jesús le'aj xudau', na' gulebiga lau Le' benne' xíchaj'e ca' chee bxruze ca', ne benne' dxuluxuzájle'e

da nadxiruj bea Dios, ne benne' gula ca'. ²⁸ Na' benne' caní gulenábenge' Jesús:

—¿Bizra xel-la dxenná bea napu' dxunu' da caní? ¿Nuzra benna lue' xel-la dxenná bea nigá?

²⁹ Na' bechebe Jesús:

—Cá'anqueze neda' de tu da nábeda' le'e. Che xechébele chia', nadxa xapa' le'e ca naca xel-la dxenná bea da napa' dxuna' da caní. ³⁰ ¿Nuzra gusel-la Juan bchué' bèneache nisa? ¿Dios che bèneache? Le xechébe na'a.

³¹ Nadxa gulezú lau benne' ca' dxuluchálaje' leze', dxelé ljwezre':

—Che xedxu Le', Dios gusel-le' le', na' nnáqueze': "¿Bizr chee na' quebe guxéajle chee'?" ³² Che nnadxu bèneache gulesel-le' le', dxal-la' zrédexu da xelún benne' xezre ca'.

Caní gulenné' lawe' da xúgute' benne' xezre nigá dxeléajle'e guca Juan benne' bchálaje' waláz chee' Dios. ³³ Ca'an guca, gulenná benne' ca', dxelé'e Jesús:

—Quebe nézentu'.

Nadxa gunná Jesús, dxé'e le':

—Cá'anqueze neda' quebe nnia' ca naca xel-la dxenná bea da napa' dxuna' da caní.

12

Da dxulé'e na ca naca chee' benne' wen zrin quebe zaj naque' xrlátaje (Mt. 21.33-46; Lc. 20.9-19)

¹ Nadxa guzú lau Jesús dxuchálajlene' benne' ca' tu da dxulé'e na. Dxe'e le':

—Zua tu benne' bde'e lba uva ca' lu xezr la xu chee', na' bene' le'aj chee' na. Bene' tu xiaj lutju naga guchuchuje' uva ca', ne bene' tu bdupa' naga cue' benne' guxúe' da caní.

Nadxa bde'e' xezr la xu chee' na' lu na' benne' wen zrin ca' chee' xelung' la'a lina chee' na, na' guzé'e zéaje' xezre zitu'. ² Ca gula zra chee' lina, na' gusel-le' tu bi wen zrin chee' cheajxezri'ibe' lu na' benne' wen zrin ca' ca naca lina da dxal-la' xezí' benne' xranbe'. ³ Na' benne' wen zrin ca' gulel-le'-be', ne buluzalje'-be', na' belexesel-le'-be' dáchezebe'. ⁴ Nadxa xránabe' gusel-le' bi wen zrin xula, na' bi nigá belú'e-be' xiaj, ne gulelé'e xíchajbe', ne bulucháchalene'-be'. ⁵ Na' xránabe' na' gusel-le' xetube', na' bi nigá belútete' benne' ca' lebe'. Ca gudé na' xránabe' gusel-le' bi zandxa bi xula, na' cá'anqueze belú'e bál-labe', ne belútete' xebál-labe'.

⁶ Xránabe' zua tu zrí'ing' bi biu, bi nazrí'ilé'ene', na' naga bzébeté gusel-le' zrí'ing' nigá, dxenné' lu xichaj lázrdawe': Dخال-la' xelape' ba lá'ana zri'ina'. ⁷ Benne' wen zrin ca' gulenné', dxelé ljwezre': "Bi nigá gueque cheebe' xezr la xu nigá. Gútetédxu-be' na'a, na' dxi'u xegá'analédxu da nigá." ⁸ Ca'an guca, gulel-le'-be', ne belútete'-be', na' gulebéaje' bel-la' dxen cheebe' lu xezr la xu na'.

⁹ Nadxa Jesús gunábenge' benne' xudau' ca':

—¿Ájazra gun xrane xezr la xu nigá? Walé'e, na' gútete' benne' wen zrin ca', na' gudé'e' xezr la xu chee' lu na' benne' xula ca'. ¹⁰ Ba blábale da naxúaj na lu xiche chee' Dios. Dxenná na: Xiaj na' da quebe buluchine benne' wen xu'u, xiaj na' naca na'a xiaj blau chee' xu'u.

¹¹ Da nigá ben Xránadxu, na' dxexebánedxu chee' na.

¹² Nadxa gulaca lazre' xelexe' le' Jesús lawe' da zaj nézene' bchálaje' da dxulé' ne nígá chee' gulé' ene' ca zaj naca le'. Quebe bi gulune' lawe' da gulezrebe' bi xelún benne' xezre ca'. Chee le na' bulusane' Jesús, besi' aque'.

Da bchalaj Jesús chee da dxuchizruj xu'u lawe'

(Mt. 22.15-22; Lc. 20.20-26)

¹³ Ca gudé na' gulesel-le' lau Jesús bal-la benne' xudau' fariseo, ne benne' zaj de'e Herodes chee gulebéaje' Le' dizra' chee xelexéque' xelawe' Le' zria. ¹⁴ Benne' caní belelé'e lau Jesús, na' gulé'e Le':

—Benne' wesede, ba nézentu' ca dxennáu' da li, ne quebe dxezi'u ca da dxelennaze bénneache, lawe' da quebe dxennáu' Lue' ca zaj naca cúzreze bénneache. Da li naca ca dxusédenu' bénneache da naca chee Dios. ¿Dxunna da nadxixruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dxal-la' quízrujdxu, che quebe quízrujdxu?

¹⁵ Jesús dxéquebe' ene' quegá du lazre' dxelenábene' Le' da nígá, na' guzre' le':

—¿Bizr chee na' dxebéajle neda' dizra'? Le dajguá nígá tu dumí da dxízrujle chee le'eda' na.

¹⁶ Na' bedajlegüé'e na, na' ca ble'e Jesús le na, na' gunábene' le':

—¿Nu lau da' dumí nígá, ne nu la naxúaj na nígá?

Na' gulé'e Le':

—Chee benne' dxenná bea Roma.

¹⁷ Nadxa Jesús guzre' benne' ca':

—Le gunezruj chee benne' dxenná bea Roma da naca chee', na' le gunezruj chee Dios da naca chee Dios.

Na' belexebáne' ca naca da bchalaj Jesús.

Da bchalaj Jesús ca xelexebán benne' gate

(Mt. 22.23-33; Lc. 20.27-40)

¹⁸ Nadxa belezrín lau Jesús bal-la benne' xudau' saduceo. Benne' caní dxelenné' quebe xelexebán benne' gate. Ca'an guca, gulénábene' Jesús caní:

¹⁹ —Benne' wesede, Moisés bzuajé' cheedxu da nadxixruj bea nígá: “Che tu benne' biu gate', ne xegá'ana zru'ulé', na' quebe nu zua bi chee bénnea', na' benne' biche' dxal-la' xequé'e nu'ula na' gute benne' chee' chee sua zri'ine bénnea' gutié'.” ²⁰ Gulezrá' gazre benne' biche'. Benne' nedxu bchaga na'abe', na' gútebe' quebe nu zrí'inebe' zua. ²¹ Na' benne' gudxupe' bequé'e nu'ula na', na' cá'anqueze gutié' quebe nu zrí'ine' zúaqueze. Cá'anqueze guca chee benne' guxunne'. ²² Ca'an guca, benne' gazre caní gulezúale' nu'ula na', na' netue' quebe nu zrí'ine' guzúa. Naga xeajseté na gúte'e nu'ula'. ²³ Na'a xca', gate na' xelexebán benne' gate, ¿nu la benne' biu caní gaque' benne' chee nu'ula na', lawe' da gulezúale' benne' gazre ca' le'?

²⁴ Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios. ²⁵ Gate na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa. ²⁶ Na'a, ca naca chee benne' gate che xelexebáne', ¿quebe ne gulábale ca da naxúaj na lu xiche chee Moisés ca gunná Dios gate na' bchálajene' Moisés tu lu xágadau' da dxala xi'? Gunná Dios caní: “Neda' naca' Dios chee Abraham, ne chee Isaac, ne chee Jacob.”

²⁷ Dios naque' Dios, quegá chee benne' gate ca'. Naque' Dios chee benne' ban ca'. Ca'an naca, álega nanítele le'e.

Da nadxiruj bea Dios da naca blau

(Mt. 22.34-40)

²⁸ Na' zéqueze tu benne' dxuxuzájle'ē da nadxiruj bea Dios, na' benne' da dxuchalaj Jesús, ne nézene' bzri'ē dizra' chawe', na' gunábene' Le':

—¿Bizra da nadxiruj be'e Dios naca na da blaudxa?

²⁹ Na' Jesús guzre' le':

—Da bdxiruj be'ē da naca na da blaudxa ca xúgute dxenná na caní: Le xene benne' Israel. Xránadxu Dios tuze naque'. ³⁰ Bzri'i Xranu' Dios du lazru', ne nen dutē bēnne'du xu'u, ne nen dutē xichaj lázrda'u, ne nen dutē xel-la wal-la da napu'. Da nigá naca da nadxiruj bea da blaudxa, ³¹ na' da nadxiruj bea gudxupe' nácaqueze na ca le' na, da dxenná na caní: Bzri'i benne' xula ca nazrí'i cuinu'. Quebe zua xetú da nadxiruj bea da naca blaudxa ca da chupa caní.

³² Nadxa gunná bēnne' dxuxuzájle'ē da nadxiruj bea Dios, dxē'ē Jesús:

—Ca'an xanne naca ca bechebu', Benne' dxusēde. Da li naca ca dxennáu'. Zua tuze Dios, ne quebe nu zua xetú ca Le', ³³ na' che zri'idxu Dios du lázredxu, ne nen dutē xichaj lázrdaudxu, ne nen dutē bēnne'du xú'udxu, ne nen dutē xel-la wal-la da nápadxu, ne che zri'idxu benne' xula ca nazrí'i cuínadxu, da caní zaj zácadxa na ca xúgute bē xixre' ca' dxútedxu-ba' lau Dios, ne ca xúgute da dxuzéxxedxu lu cugu cheē Dios.

³⁴ Nadxa Jesús, ca benne' bchálaje' chawe', na' guzre' le':

—Xeláteze ne de na cheē nna bea Dios xichaj lázrda'u.

Na' québedxa nu bexazre nábene' Le' dizra' ca'.

¿Nu zrí'ine' naca Cristo?

(Mt. 22.41-46; Lc. 20.41-44)

³⁵ Jesús dxusédene' benne' ca' lu xudau', na' gunné':

—¿Bizr cheē na' dxelenná benne' dxuluxuzájle'ē da nadxiruj bea Dios naca Cristo zrí'ine David? ³⁶ David ná'queze ca bzéajni'i Be' Lá'azxa le', gunné': Xránadxu Dios guzre' Xrana':

“Gudxé'e chalá'a xabela chia',

ca zrin zra ba nuzúa' benne' dxeledábague' lue',

cheē na be'enu' le'.”

³⁷ Che David ná'queze dxenné': “Xrana”, ¿ájala cheē na' naque' zrí'ine'?

Benne' zan ca' du lazre' buluzé nague' cheē'.

Jesús dxulé'ene' zaj nachixre benne' ca' dxuluxuzájle'ē da nadxiruj bea Dios

(Mt. 23.1-36; Lc. 11.37-54; 20.45-47)

³⁸ Ca dxusēde Jesús benne' ca', na' gunné':

—Le gapa chi'i cuínale cheē benne' ca'an dxuluxuzájle'ē da nadxiruj bea Dios. Benne' caní dxeledánene' dxelácue' zra lanē' tunna, ne dxeledánene' xulugapa bēnneache le' diuzre nen dizra' ba lá'ana lau bēnneache ca'. ³⁹ Benne' caní dxeledánene' dxelebé'ē lataj blau lu xu'u naga dxelezraga benne' dxelúe lá'anē' Dios, ne dxeledánene' dxelebé'ē lataj blau naga dxelawe' xrche'. ⁴⁰ Benne' caní dxelegüē' lizre xrlataj nu'ula ca' ba gulate benne' cheē, na' cheē xululé'e cuine' ca benne' xrlátaje, dxelune' xel-la dxuluwizraj Dios tunna. Le' zaj nabágadxē' zria.

Dumí da gulú'nu'ula xache' ba gute benne' chie'

(Lc. 21.1-4)

⁴¹ Tu lasa gate na' dxē' Jesús lu xudau' cuita naga dxelegú'ē dumí, na' dxenné'ē ca dxelún benne' ca' dxelegú'ē dumí, ne ca dxelún benne' gunní'a

ca', dxelegú'ē dumí zren. ⁴² Ca'an guca, bzrin tu nu'ula xache' ba gute benne' chie', na' gulu'ē chupa dumí lásedau' da quebe zaj zácate can. ⁴³ Nadxa gunné Jesús benne' ca'an dxusédene', na' guzre' le':

—Da li dxapa' le'e, nu'ula xache' nigá bnéruzjdxé' ca xúgutē benne' ca'an gulegú'ē dumí. ⁴⁴ Xúgutē benne' ca' gulegú'ē da québedxa dxelechínne'. Nu'ula xache' nigá gulu'ē ca naca da nape', da nunte gawe'.

13

Dxuchalaj Jesús ca gaca gate xrinna'j xudau'
(Mt. 24.1-2; Lc. 21.5-6)

¹ Gate bedxúaj Jesús lu xudau', na' tu benne' dxusédene' guzre' Le':

—Benne' Wesēde, gunná'xque ca zren naca xudau', ne xiaj xrtantē caní.

² Bechebe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru ljwezre nigá. Ca naca xudau' nigá wabia xí'queze na.

Da xelunna bea na gate cheajsé chee xezr la xu nigá
(Mt. 24.3-28; Lc. 21.7-24; 17.22-24)

³ Nadxa xjaque' lu xi'a chee xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulé'ē Jesús leze':

⁴ —Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúgutē da caní?

⁵ Na' bechebe Jesús:

—Le gapa chí'i cuínale chee quebe nu si xē le'e, ⁶ lawe' da xeledá' benne' zantē xelún lu'a neda', welenné' zaj naque' Cristo, na' welezí xē'ē benne' zantē.

⁷ Le'e, gate xénele gaca wedil-la, ne ba dxaca wedil-la, quebe zrébele. Cá'queze dxal-la' gaca na, san quegá ne zrin zra cheajsé chee na, ⁸ lawe' da xeledíl-lale benne' tu xezr la xu benne' xetú xezr la xu, na' tu xezre benne' tíl-lalē na xetú xezre. Wazrú' zánete xezre, ne wata' gubina', ne wadx'é na zraga bénneache. Da caní zaj naca na naga su lauze ca naca da xelezaca zí' bénneache.

⁹ Le guxúe cuínale lawe' da xuludé' le'e lu na' benne' xu'u lawe', na' xuluzalje' le'e lu xu'u naga dxulucá'ana szrene' Dios. Xuludé' le'e lau benne' xu'u lawe' ca', ne lau benne' dxelenná be'ē lawe' da nácale chia' neda'. Gate ca'an gaca, na' guchálajle chia' neda' lau benne' ca'. ¹⁰ Nédxudxa ca zrin zra cheajsé chee na, dizrá' chawe' chia' gaca lban chee na lau bénneache zaj zre'ē xúgutē xezr la xu. ¹¹ Gate xeleché'ē le'e chee xuludé' le'e lu na' benne' xu'u lawe' ca', quebe cue'le gunne xue bi nnale, ne quebe quilaj lázrele ájala guchálajle. Nnele ca da gunna Dios le'e zra na' lawe' da quegá le'ēze nnele, san Be' Lá'azxa, Le' nne'. ¹² Ca xelún bénneache lu zra na', xuludé' bi biche' ca' lu na' benne' xelútiē lebe'. Cá'aqueze xelún xruze xrna' ca', xuludé' zrí'inequeze'. Na' zrí'ine' ca' weledábagabe' xruze xrnabe', ne xelunbe' xelátiē'. ¹³ Xúgutē bénneache xelezré'ē le'e lawe' da nácale chia' neda'. Bénnea' zē tpe' ca zrinnda zra cheajsé chee na, la bénnea'.

¹⁴ Xánia, bénnea' bchálaje' waláz chee Dios bzuaaje' ca naca chee da sban da guzría xi na. Gate lé'ele le'e zria da nigá lataj lá'azxa naga quebe dxal-la' cuía na, nadxa benne' zaj zre'ē xezre ca' zaj nababa xezr la xu Judea dxal-la' xuluzrúnmuje', ne chjaque' lu xi'a zren. (Benne' dxulabe' da nigá dxal-la'

cheajní'ine' da naca chee na.) ¹⁵ Nu benne' zria chju'u lizre' lu zra na' quebe dxal-la' xexétaje' chee bi xebéaje' lu xu'u. ¹⁶ Benne' ze le'e xixre' quebe dxal-la' xezrine' lizre' chee xequé'e zra lane'. Dxal-la' xuluzrúnnujte benne' caní. ¹⁷ Baxache' xelaca nu'ula zaj zu'e zi'i, ne nu'ula ca' zaj nuxre' bidu dxé'ene lu zra na'. ¹⁸ Le naba lau Dios chee quebe gaca beu' zaga gate na' dxal-la' guzrúnnujle, ¹⁹ lawe' da xelzaca zidxa bénneache lu zra ca'an ca da quebe ne xelzácate', gulala ben Xránadxu Dios xezr la xu nigá, ne québedxa xelzácadxe' ca'. ²⁰ Che Xránadxu Dios quebe guzáchie' zra ca', québedxa nu láqueze', san ba bzachie' zra ca'an lawe' da nazrí'ine' bi chee' ca', bi ca' ba gucá'a Le'.

²¹ 'Lu zra na', che nu benne' dxé'e le'e: "Le na' xque, nigá zua Cristo", u che nne': "Le na' xque, na' ze'", quebe chéajle chee'. ²² Welelá' benne' xelezi xe'e, benne' xelune' lu'a Cristo, ne xelune' lu'a xel-la waca chee xabáa chee xelezi xe'e bi ca' ba gucá'a Dios che xelezéquene'. ²³ Le sua le'e ban lazre'. Neda' ba gucha' le'e xúgte nédxute ca gaca na.

Ca gaca gate xida Benne' Gulje' Bénneache
(Mt. 24.29-35, 42-44; Lc. 21.25-36)

²⁴ Nadxa gunná Jesús:

—Lu zra ca', gate te zra chee xel-la zi' caní, na' chul-la gubizra, ne québedxa gusení' beu'. ²⁵ Belaj ca' xelxruj na zran xabáa, na' ca da zaj nalá' zaj ze tipa zran xabáa welezrízete na. ²⁶ Ca nadxa xelelé'ene' neda', Benne' Gulje' Bénneache, za'a lu beuj bza, napa' xel-la waca zren, ne da xabáa chia'. ²⁷ Na' la sél-latea' gubáz chee xabáa chia' ca' chee xuluchague' benne' ca' gunniá', benne' zaj zre'e dapa saca chee xezr la xu nigá, benne' zitu' zá'aca nila, zá'aca na'la.

²⁸ 'Le gusede ca naca da dxulé'e na ca naca chee xaga higo. Gate na' dxelxedxe'ene zruze na, ne zá'aca xrlague na, na' ba nézele za beu' la. ²⁹ Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gátate na. ³⁰ Da li dxapa' le'e, xúgte da caní gaca na nédxudxa ca xelate bénneache zaj zre'e lu zra na'. ³¹ Xabáa ne xezr la xu nigá wadé chee na. Xrtizra' nigá quebe te na ca'anze, san waca li na.

³² 'Ca naca chee zra na', ne chee beu' na' quegá nu neze bata gaca na. Quebe zaj neze gubáz chee xabáa, ne Zrí'inequeze Dios quebe nézene'. Tuze Xradxu Dios nézene'.

³³ 'Chee le na', le sua le'e ban lazre'. Le guxúe, ne le guchálajle Dios lawe' da quebe nézele báta la zrin zra na'. ³⁴ Gaca na ca guca chee tu benne' biu, benne' guzé'e zéaje' zitu'. Gate na' za dxúaje' xu'u, na' dxudé' da nape' lu na' bi wen zrin chee' ca', ne dxunézruje' tu tube' zrin da xelunbe', ne dxusebague' benne' ze' dxa xu'u guxúe xánnie'. ³⁵ Chee le na', le sua le'e ban lazre' lawe' da quebe nézele le'e báta la xelá' xrane xu'u, che dxe xrinneze, che dxela, che ca cuezre xjeaj, che che zílala, ³⁶ ga gaze xelé'e chadí dute, na' cheajxraque' le'e dxásele. ³⁷ Ca da dxenníá', dxapa' le'e, dxapa' xúgte benne': ¡Le sua ban lazre'!

14

Dxelexegá'ane' dizra' chee xelele-le' Jesús
(Mt. 26.1-5; Lc. 22.1-2; Jn. 11.45-53)

¹ Xechupa zra za zrin chee xelune' laní chee xulusá lazre' ca naca da ben Dios gate na' bebéaje' benne' Israel ca' lu xezr la xu Egipto, laní na' dxelawe' xeta xtila da quebe nachixre cua zichaj chee na. Na' benne' xíchaje ca' chee

bxruze ca', ne benne' dxuluxuzájle'e da nadxixruj bea Dios belilaj lazre' ájala xelune' chee xelë-lë' Jesús bagácheze chee xelútië' Le'. ² Na' gulenné':

—Quegá gundxu na lu laní, chee quebe dxe'ena zraga bénneache.

*Tu nu'ula dxegüé'e da za xichaj Jesús
(Mt. 26.6-13; Jn. 12.1-8)*

³ Zua Jesús lu xezre Betania, lu lizre tu benne' le' Simón, benne' guzríë' wë' guzru'. Dxácatë zaj dxe'e dxelawe' na', na' bzrin tu nu'ula nu'e tu da dau' da naca na xiaj xrtan da nazí le na alabastro, ne nazratë na da za da dxelá zixre chee xiaj nardo, da zácale'e na. Na' gulé'e da dau' na', ne blálaje' da za na' xichaj Jesús. ⁴ Bal-la benne' ca', benne' zaj zré'e na', belezré'e, na' gulenné', dxelë ljwezre':

—¿Bizr chee na' ben ditaj nu'ula nigá da za na'? ⁵ Waca ta'u da na' chee sídxadxu ca lázrujdxu chee tu iza, chee gácalëdxu benne' xache' ca'. Na' guledil-le' nu'ula'.

⁶ Na' Jesús guzré' le':

—Quebe xele nu'ula nigá ca'. ¿Bizr chee na' dxunle le' zede? Ca naca da ben nu'ula nigá chia' neda' naca na da cháwele'e. ⁷ Benne' xache' ca' tu zrázqueze' ládujla le'e. Waca gunle benne' ca' chawe' gate dxaca lázrele, san neda' quegá tu súaleza' le'e. ⁸ Nu'ula nigá bene' ca da guzéqueñe', gulu'e da za bel-la' dxen chia' nédxula chee zra gate gachia' lu xëdxu ba. ⁹ Da li dxapa' le'e, gáteteze na' gaca lban chee dizra' chawe' chia' lu xúgute xezre zaj nnita xezr la xu nigá, cá'aqueze zrálajqueze ca naca da ben nu'ula nigá, chee xulusá lazre' chee'.

*Judas dxexegá'ane' dizra' gudéë' Jesús lu na' benne' ca' dxeledábaque' Le'
(Mt. 26.14-16; Lc. 22.3-6)*

¹⁰ Nadxa Judas Iscariote, tu benne' chazrinnu ca' dxusede Jesús, guxíaje' xeajchálajlënë' benne' xíchaje' ca' chee bxruze ca' chee xelexegá'ane' dizra' ájala gunë' gudéë' Jesús lu na' benne' ca'. ¹¹ Ca belén benne' ca' ca gunná Judas, gulebéle'ene', na' gulechebe lazre' xulunézruje' le' dumí. Nadxa Judas guzú lawë' dxexílaje' ájala gudéë' Jesús lu na' benne' ca'.

*Da dxágudxu chee gusá lázredxu ca gute Jesús
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

¹² Zra nedxu chee laní gate dxelawe' xeta xtila da quebe nachixre cua zichaj chee na, ne dxelutie' zríla'dau' chee Laní Pascua, gate na' dxulusá lazre' ca guca gate bebéaj Dios benne' Israel ca' lu xezr la xu Egipto, na' benne' ca' dxusede Jesús buluchebe' Le':

—¿Gazra dxaca lazru' chéajntu' cheajcuézentu' da gágudxu Laní Pascua?

¹³ Nadxa Jesús gusel-le' chupa benne' ca' dxusedene'. Dxe'e le':

—Le hjaca lu xezre Jerusalén, na' cheajxrácale tu benne' biu ze nu'e tu dxe'e nisa. Le hjácaleñe', ¹⁴ na' naga xexu'e, xele benne' xrane xu'u na': "Benne' Wesëde cheëdxu dxenné': ¿Gazra zua xu'u naga guna' Laní Pascua, chee gawa' tu zren nen benne' ca' dxusededa'?" ¹⁵ Nadxa gulé'ene' le'e tu xu'u zren da naca na gudxupe' cuía sibe da bache nabeza na. Na' gucuézale da gágudxu.

¹⁶ Nadxa benne' ca' dxusedene' belexedxúaje' gusá'aque', na' belezrine' xezre Jerusalén. Na' guca xúgute ca da ba guzre Jesús le', na' bulucueze' da xelawe' lu Laní Pascua.

¹⁷ Ca gula chizrela, na' bzrin Jesús nen benne' chazrinnu ca' dxusedene'.

¹⁸ Na' ca zaj dxe'e dxelawe', na' gunná Jesús, dxe'e le':

—Da li dxapa' le'e, tu benne' ládujla le'e, benne' dxawé' tu zren nen neda', gudéé' neda' lu na' benne' ca' dxeledábage' neda'.

¹⁹ Nadxa benne' ca' gulezúa xácheze', ne gulezú lawé' dxuluchebe' Jesús tu tue':

—¿Neda' xca'?

Na' xetúé' cá' anqueze guzre' Le':

—¿Neda' xca'?

²⁰ Nadxa bechebe Jesús, dxe'e le':

—Tu benne' ládujla le'e chazrínulle, benne' dxawé' tu zren nen neda' lu xé'ena nigá. ²¹ Da li gatia' neda', Benne' Gulje' Bénneache, ca da naxúaj na chia' lu xiche cheé Dios. Baxache' naca cheé benne' na' gudéé' neda' lu na' benne' ca' dxeledábage' neda'. Cháwedxa gaca cheé bénnea' la ca gúlaje'.

²² Dxácaté zaj zre'e dxelawé', na' gucá'a Jesús xeta xtila, ne guzre' Dios: "Xcalenu'." Ca gudé bzúzruje' na, na' bnézruje' na cheé benne' ca', ne guzre' le':

—Le gagu na. Da nigá dxulé'e na ca gaca cheé bel-la' dxen chia'.

²³ Nadxa guqué'e tu da dxé'ajdxu, ne ca gudé guzre' Dios: "Xcalenu'", na' bnézruje' na benne' ca', na' xúgute' gulé'aje' late' weaj da na'. ²⁴ Nadxa Jesús guzre' le':

—Da nigá zéaje na dxen chia' da dxucá'ana chawe na xel-la wezría cube. Dxen chia' nigá lalaj na ne cheé benne' zan. ²⁵ Da li dxapa' le'e, québedxa xí'aja' xrise uva caní ca zrindxa zra gate na' xí'aja' da cube naga dxenná bea Dios xabáa.

*Dxulé'e Jesús nna Pedro quebe núnbe'e Jesús
(Mt. 26.30-35; Lc. 22.31-34; Jn. 13.36-38)*

²⁶ Ca gudé belul-le' da gaca ba Dios, na' belegüene' lu Xi'a Xaga Olivo Ca'.

²⁷ Nadxa gunná Jesús, dxe'e le':

—Xúgutele le'e gusán lázrele neda' na'a xela lawe' da naxúaj na lu xiche cheé Dios, dxenné': "Gutia' benne' dxuxúé' zrila' ca', na' zrila' ca' welase dínnajba'."

²⁸ Gate te xebana' lu xedxu ba, wexá'a neda' nédxula ca le'e naga nababa Galilea.

²⁹ Nadxa Pedro guzre' Jesús:

—Láqueze xúgute' benne' caní xulusán lazre' Lue', neda' québequeze guna' ca'.

³⁰ Jesús guzre' le':

—Da li dxapa' lue', lu xela nigaze, nédxula ca za cuezre xjeaj chupa lasa, nnau' chunna lasa quebe núnbe'u neda'.

³¹ Na' dxennáqueze Pedro na', gunné':

—Láqueze gatia' tu zren nen Lue', québequeze nnia' quebe núnbe'a Lue'.

Cá' anqueze gulenná xúgute'.

*Jesús dxuchálajne' Dios tu lataj nazí le na Getsemaní
(Mt. 26.36-46; Lc. 22.39-46)*

³² Nadxa belezrine' tu lataj naga nazí le na Getsemaní, na' gunná Jesús, dxe'e benne' ca' dxusédene':

—Le cueza nigá dxácaté cha'a cheajchálajlena' Dios.

³³ Nadxa Jesús guché'e Pedro, ne Jacobo, ne Juan, na' guzú lau dxezúa xáche'le'e. ³⁴ Na' dxe'e benne' ca', dxenné':

—Ba dxunte na watia' lawe' da zua xáche'le'a. Le xegá'ana le'e nigá, ne le sua ban lazre'.

³⁵ Nadxa Jesús guzé'e zéaje' xelate' ca na'la, na' guzúe' sudxú'ala, gunabe' Dios che gaca, quebe té'e xel-la zi' ca da dxal-la' saque' lu zra na'. ³⁶ Ca dxuchálajle' Dios na', gunné':

—Xrae, xúgute' wazéquenu' Lue'. Bselá neda' chee' quebe saca zi'a lu da caní. Quebe gaca ca dxaca lázreza' neda', san ca dxaca lazru' Lue' gaca na.

³⁷ Nadxa bezrine' naga zaj zra' benne' ca'an dxusédene', ne xeajxraque' le' dxelásie'. Na' Jesús guzre' Pedro:

—Simón, ¿dxásequezu' nigá? ¿Quebe guzéquenu' gusebán lazru' tu chí'idau'ze? ³⁸ Le sua ban lazre', ne le guchálajle' Dios chee' quebe gun zréaje da xriwe' le'e. Da li, lu xichaj lázrdaule dxaca lázrele gunle da xrlátaje, san lu be'la' dxen chee'le dxate ni'a na'le.

³⁹ Nadxa Jesús guxíaje' da xula zeajchálajle' Dios, na' tuze ca dxenné'. ⁴⁰ Nadxa ca bezrine', xecha lasa xeajxraque' benne' ca'an dxusédene', dxelásie' lawe' da xu'u bchigala xiaj lawe'. Benne' caní quebe belexezrela lazre' bi xelé'e Le'. ⁴¹ Na' ca bezrin Jesús da guxunne' lasa, na' guzre' benne' ca':

—¡Le gase na'a, ne le xezí' lázre'! ¡Bache na! ¡Ba bzin zra tea' neda', Benne' Gulje' Bénneache, lu na' benne' dul-la ca'! ⁴² ¡Le chasa! ¡Le chu'u na'a! ¡Ba za benne' gude'e' neda' lu na' benne' ca' dxeledábage' neda'!

Dxelel-le' Jesús

(Mt. 26.47-56; Lc. 22.47-53; Jn. 18.2-11)

⁴³ Dxácaté dxuchalaj Jesús caní, na' bzin Judas, tu benne' nabábalene' benne' chazrinnu ca' dxuséde Jesús, na' zjácale' benne' zan le', zaj nu'e' xia nalá, ne xaga ca'. Zaj naque' benne' gulesel-la benne' xíchaje ca' chee' bxruze ca', ne benne' ca' dxuluxuzájle'e da nadxixruj bea Dios, ne benne' gula sina ca'. ⁴⁴ Judas, benne' dxudé'e' Jesús lu na' benne' ca' dxeledábage' Le', ba blé'ene' benne' ca' tu da gune' da gaca bea na nule' naca Jesús, gunné':

—Bénnea' gunupa', benne' na' quél-lale. Le xeché'e, ne le guxúe xanne' chee' quebe xelé'.

⁴⁵ Na' ca bzrine' na', gubigue' lau Jesús, ne dxé'e Le':

—Benne' Weséde.

Na' bnupe' Le'. ⁴⁶ Nadxa benne' ca' gulel-le' Jesús, ne belexeché'e Le' ba nadxéaje'.

⁴⁷ Tu benne' dxune' Jesús tu zren guléaje' xia nalá chee', na' guchugue' naga tu bi wen zrin chee' bxruze blau. ⁴⁸ Nadxa Jesús guzre' benne' ca':

—¿Dxua'je le'e zale nen xia nalá, ne xaga ca' chee' quél-lale neda', dxugúnele neda' ca tu benne' gubán? ⁴⁹ Xúgute' zra guzúa' neda' ládujla le'e dxusédeda' le'e lu xudau', na' cabata' gudél-lale neda'. Da nigá dxaca na chee' gaca li ca da naxúaj na lu xiche chee' Dios.

⁵⁰ Nadxa xúgute' benne' ca' dxuséde Jesús bulusán lazre' Le'. Buluzrúnnuje'.

Dxuzrunnuj tu bi cuide'

⁵¹ Tu bi cuide', bi zéajlebe' Jesús, ne nácube' tu ladxe' laga, gulel-la benne' ca' lebe'. ⁵² Na' bsanbe' ladxe' laga da nácube', na' bzurúnnujbe' gala xídezebe'.

Dxezrin Jesús lau benne' ca' chee' xu'u lawe' blau chee' judío ca'

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Nadxa belexché'e Jesús lau bxruze blau, na' belezraga xúgute' benne' xíchaje ca' chee' bxruze ca' ga na', ne benne' gula sina ca', ne benne' ca' dxuluxuzájle'e da nadxixruj bea Dios. ⁵⁴ Pedro nawe' Jesús zítu'la, na' bzrine'

chale'aj chee lizre bxruze blau, naga begá'anē' tu zren nen zruza ni'a na' benne' xu'u lawe' ca', dxuluxuché'ē dxu'a xi'.

⁵⁵ Na' bxruze blau, ne xúgute benne' chee xu'u lawe' blau chee judío ca' gulil-lajē' tu da gagu na zria Jesús chee xezezéqueñe' xuluzría xi'e Le' chee gatiē', na' quebe bi belezrelene'. ⁵⁶ Benne' zante belún lazre' chee Jesús. Quebe bedxúaj dizra' chee' tuze ca dxelenné' tuē' ne xetúē'. ⁵⁷ Bal-le' belase', na' gulagu zria Jesús da wēn lazre', dxelenné':

⁵⁸ —Netu' ba bēnnetu' chee', gunné': "Neda' guchínnaja' xudau' nigá da belún bēneache, na' ca gaca chunna zra xechisa' xetú xudau' da quebe xelún bēneache."

⁵⁹ Cá'anqueze quebe butil-le ca da dxelenné'.

⁶⁰ Nadxa bxruze blau guxase' ládujla xúgute benne' ca', na' bchebe' Jesús:

—¿Québequeze bi dizra' dxuxuzri'u Lue'? ¿Bizra da nigá dxelenné' chiu' Lue'?

⁶¹ Jesús guzúē' zrize, ne gútuqueze bi dizra' buzri'e. Na' bxruze blau bchebe' Le' xecha lasa, dxenné':

—¿Nacu' Lue' Cristo, Zri'ine Dios Lá'azxa?

⁶² Na' gunná Jesús, dxē'e le':

—Awe', ca' naca'. Walé'ele neda', Benne' Gulje' Bēneache, dxē'a chalá'a xabēla chee Dios, nape' dutē xel-la waca. Walé'ele neda' zezá'a lu beuj bza.

⁶³ Nadxa bxruze blau guchezē' zra lanē', na' gunné':

—¿Núzradxa nachínedxu benne' xelagu zria Le'? ⁶⁴ Le'e bache bēnquezle ca dxenné' schanni' chee Dios. ¿Bi dxennale le'e xca'?

Xúgute benne' ca' gulenné':

—Nabía xi'e dxal-la gatiē'.

⁶⁵ Nadxa bal-la benne' ca' gulezú lawe' dxuluzré'e Le' zrene', na' bulucache' lau Jesús, ne buluzálajē' Le'. Dxelenné':

—Gunné xa'a nuzra dxue Lue'.

Na' benne' zruza ni'a na' benne' xu'u lawe' belú'e lau Jesús.

Dxenná Pedro quebe núnbe'e Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Pedro guzúē' lu chale'aj zrila, na' bzrin tu nu'ula wēn zrin chee bxruze blau, ⁶⁷ na' ca blē'ebe' Pedro dxē'e dxu'a xi' dxuxuché'ē, na' gunná'abe' le', ne gúzrebe' le':

—Lue' dxedálequezu' Jesús, benne' Nazaret na'.

⁶⁸ Na' bechebe Pedro, dxenné':

—Quebe núnbe'a bēne'a, ne quebe nezda' nu chee na' dxuchálaju'.

Na' bedxúaj Pedro chale'aj naga dxelu'e. Nadxa gudxezre xjeaj. ⁶⁹ Nadxa nu'ula wēn zrin chee bxruze blau na' gunná'abe' Pedro xecha lasa, na' gunabe', dxē'ēbe' benne' ca' zaj zre'e na':

—Benne' nigá naque' tuze benne' ca'an.

⁷⁰ Pedro xecha lasa bzue' Jesús chalá'ala. Xetú chí'idau' benne' ca' zaj zre'e na' gulé'e Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee xezre ca' zaj nababa Galilea. Ca dxuchálaju' naca bea na da na'.

⁷¹ Nadxa Pedro guzú lawe' dxuzría xi' cuine', ne bēn chúchuē' xrtizre', gunné':

—Quebe núnbe'a bēne'a dxennale le'e ca'.

⁷² Ca'an guca, gudxezre xjeaj da gudxupe' lasa. Nadxa Pedro xeajsá lazre' ca da guzre Jesús le', gunné': "Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda.'" Na' ca xeajsá lazre' da nigá, gudxézrele'e.

15

Dxezrín Jesús lau Pilato

(Mt. 27.1-2, 11-14; Lc. 23.1-5; Jn. 18.28-38)

¹ Ca guxaní' che zila, na' benne' xíchaję ca' cheę bxruze ca' belexedupe' nen benne' gula sina ca', ne benne' ca' dxuluxuzájle'e da nadxixruj bea Dios, ne xúgute benne' cheę xu'u lawe' blau cheę judío ca'. Guleché'e Jesús nadxéaję', na' buludę' Le' lu na' Pilato. ² Pilato gunábene' Jesús:

—¿Nacu' Lue' wenná bea cheę judío ca'?

Na' bechebe Jesús:

—Ca' naca na, ca ba gunnáu' lue'.

³ Na' benne' xíchaję ca' cheę bxruze ca' gulawe' zria Jesús da zante. ⁴ Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da zánete da dxelawe' zria Lue'.

⁵ Jesús quebe bi dizra' ca buzri'e. Ca' guca, bebánele'e Pilato.

Dxelichaj be'e gate Jesús

(Mt. 27.15-31; Lc. 23.13-25; Jn. 18.38—19.16)

⁶ Pilato zua tu da dxúnqueze' tu iza tu iza gate dxaca Laní Pascua. Dxusane' tu benne' xu'e lizre xia, núteteze benne' xelenaba bënneache ca' le'. ⁷ Lu xu'u lizre xia na' xu'u tu benne' le' Barrabás, benne' nune' tu zren benne' ca' belutię' benne' ca', gate na' gudíl-lalęne' benne' Roma ca'. ⁸ Na' belezrín lau Pilato benne' xęzre ca', ne gulezú lawe' dxelenabe' lau Pilato gunę' ca dxúnqueze'. ⁹ Na' bechebe Pilato:

—¿Dxaca lázrele le'e gusana' bënnea' naque' wenná bea cheę judío ca'?

¹⁰ Caní gunná Pilato lawe' da dxeque be'ene' buludę' benne' xíchaję ca' cheę bxruze ca' Jesús lu ne'e lawe' da dxelaque' zre'e lazre' Le'. ¹¹ Na' benne' xíchaję ca' cheę bxruze ca' beleché'e benne' xęzre ca', ne gulegú'u xel-le' le' cheę xelexenabe' lau Pilato gusane' Barrabás. ¹² Nadxa Pilato gunábene' benne' ca':

—¿Bi dxaca lázrele le'e guna' cheę bënnea' naque' wenná bea cheę judío ca'?

¹³ Nadxa belexechebe', gulennę' zizraj:

—Bde'e xaga béguaj.

¹⁴ Na' Pilato bchebe' benne' ca':

—¿Bizra da calęla nun benne'?

Xecha lasa gulennę' zizraj:

—Bde'e xaga béguaj.

¹⁵ Nadxa Pilato bsane' Barrabás lawe' da dxaca lazre' xegá'ane' chawe' nen benne' xęzre ca'. Na' ca gudé na' bsebage' benne' ca' xeline' Jesús tu xide, na' bde'e Le' lu na' benne' ca' cheę xuludę'e Le' xaga béguaj.

¹⁶ Nadxa benne' dxjaque' wedil-la guleché'e Jesús lu chale'aj xu'u lawe', na' bulutupe' xúgute ljwezre' benne' dxjaque' wedil-la lataj na'. ¹⁷ Na' bulugácue' Jesús tu ladxe' bzawe, ne buluzrí'e xíchaję' tu da zaj nune' nen zruze xaga xeche'. ¹⁸ Nadxa gulezú lawe' dxelennę' zizraj:

—¿Gaca ba wenná bea cheę judío ca'!

¹⁹ Na' belú'e xichaj Jesús nen tu xia xtila, ne buluzré'e Le' zrene'. Na' buluzú zribe' lawe', dxelape' Le' ba lá'ana. ²⁰ Ca gudé bulucá'ana dítajé' Le' caní, na' belexegu'e ladxe' bzawe, na' buluxugá'ue' Le' zra lá'anaqueze'. Nadxa belexebá'je' Le' chee chjaque' naga xuludé'e Le' xaga béguaj.

Dxuludé'e Jesús xaga béguaj

(Mt. 27.32-44; Lc. 23.26-43; Jn. 19.17-27)

²¹ Tu benne' chee xezre Cirene le' Simón, xra Alejandro, ne Rufo, zezé'e le'e xixre', na' ca bedé'e na', na' bulusebague' le' gu'e xaga béguaj chee Jesús.

²² Guleché'e Jesús tu lataj nazí le na Gólgota, da zéaje na "Lataj Chee Zrita Xichaj Benne' Gate." ²³ Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na. ²⁴ Nadxa buludé'e Le' xaga béguaj, na' benne' dxjaque' wedil-la gulebé'aje' da gulé'e na nule' xelexale' zra lana Jesús, na' bila xelexúa tu tue'.

²⁵ Guca che zílala gate na' buludé'e Jesús xaga béguaj. ²⁶ Buludé'e da naxúaj xichaj xaga béguaj chee Jesús da dxulé'e na da nabague', da naxúaj na caní: "Wenná Bea Chee Judío Ca'." ²⁷ Cuita Jesús buludé'e le'e xaga béguaj ca' chupa benne' gubán, tue' chalá'a xabéla chee', ne xetúe' chalá'a xéglala chee'. ²⁸ Ca'an guca, guca li ca da naxúaj na lu xiche chee Dios naga dxenné' caní: "Buluzué' Le' tu zren nen benne' wen da zrinnaj ca'."

²⁹ Na' benne' dxeledé'e na' gulenné' schanni' chee Jesús, ne buluté' xíchaje', dxelenné':

—Awe'. Guchínnaju' Lue' xudau' cheentu', na' gate gaca chunna zra, na' xechisu' na. ³⁰ Bselá cuinu' na'a, ne bexetaj le'e xaga béguaj na'.

³¹ Cá'anqueze belún benne' xíchaje' ca' chee bxruze ca', ne benne' dxulux-uzájle'e da nadxixruj bea Dios. Belún le' chee Jesús, dxelé' ljwezre':

—Benne' xula bselá benne, san Le' québequeze dxezé'quene' guselá cuine'.

³² Lue', Cristo, wenná bea chee benne' Israel, bexetaj le'e xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'e le'e xaga béguaj ca' tu zren nen Jesús, gulenné' schanni' chee'.

Dxate Jesús

(Mt. 27.45-56; Lc. 23.44-49; Jn. 19.28-30)

³³ Ca bzrin wagubizra, na' guchul-la duté lu xezr la xu nigá tu chi'i wal-la gula. ³⁴ Ca gudé na', na' gunná Jesús zizraj:

—Eloi, Eloi, ¿lama sabactani?

Da nigá zéaje na: "Dios chia', Dios chia', ¿bizr chee na' nusanu' neda?"

³⁵ Bal-la benne' ca' zaj zré'e na' belenne' na, na' gulenné':

—Le xene. Dxenné' Elías, bènnea' bchálaje' waláz chee Dios.

³⁶ Nadxa tu benne' guzá chégü'e, na' xejlá'awaje' lu xrise uva zichaj tu da dxezrupe na nisa, na' bzue' na lawe' tu xia xtila da bcuene' dxu'a Jesús chee xi'aje', na' gunná benne' nigá:

—Cuézadxu. Guxúexquedxu che wida Elías chee xulétaje' Le'.

³⁷ Nadxa Jesús gudxezre xe'e, na' gútete'. ³⁸ Ca ná'queze gudxeza ladxe' da ze lu xudau', guca na chúpala. Guca'a na dxa'la, bedxúajé na zri'la. ³⁹ Na' benne' dxenná be'e lu wedil-la, benne' ze' lau Jesús, gate na' blé'eng' ca gudxezre xe'e, ne ca guca gútete', na' gunné':

—Da líqueze benne' nigá guque' Zri'ine Dios.

⁴⁰ Cá'anqueze zaj zē na' bal-la nu'ula dxelenné'ē zítu'la. Ládujla nu'ula caní zaj zē María Magdalena, ne Salomé, ne María, xrna Jacobo cuide' ne José. ⁴¹ Nu'ula caní gusá'acalēne' Jesús, ne gulácalēne' Le' gate na' gudé' naga nababa Galilea. Cá'anqueze zaj zē na' zánedxa nu'ula xula, nu'ula ca' belezrine' Jerusalén tu zren nen Jesús.

Dxulucache' Jesús lu xedxu ba
(Mt. 27.57-61; Lc. 23.50-56; Jn. 19.38-42)

⁴²⁻⁴³ Ca za chizrela bzrin José, benne' Arimatea ga na'. Benne' nigá naque' benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'ē. Lawe' da naca zra dxulucueze', zra nedxu chee zra dxulupá'ane', du lazre' guxú'ē lau Pilato, na' gunabe' si'ē lataj xexu'ē Jesús. ⁴⁴ Bebánele'ē Pilato ca bēnne' ba gute Jesús, na' gunné' benne' dxenná be'ē lu wedil-la na' chee gunabe' che ba guca ca'. ⁴⁵ Gate bēnnea' dxenná be'ē lu wedil-la gunné' ca'an guca, nadxa Pilato bnézruje' José lataj bexu'ē Jesús. ⁴⁶ Nadxa José guzi'ē tu ladxe' xtila laga, na' bulétaje' Jesús, ne bulazre' Le' ladxe' xtila na'. Na' gúxrue' Jesús tu lu ba da ba gudēne' le'ē xiaj xre, na' bsézxuje' ba na' nen tu xiaj zren. ⁴⁷ María Magdalena, ne María, xrna José belelé'eqezne' naga bulucache' Jesús.

16

Dxexebán Jesús ládujla benne' gate
(Mt. 28.1-10; Lc. 24.1-12; Jn. 20.1-10)

¹ Ca gudé zra dxulupá'ane', na' María Magdalena, ne Salomé, ne María, xrna Jacobo, gulezi'ē da dxelá zixre chee cheajlelu'ē Jesús. ² Na' bál-la'la zra nedxu chee da gazre zra belezrine' dxu'a ba gate na' za dxalaj gubizra. ³ Na' gulenné', dxelé' ljwezre':

—¿Nuzra cua xiaj da naxexxuj ba?

⁴ Ca gulenné'ē, na' belelé'ene' xiaj zren na' da bulusézxuje' ba, ba nadúa na. ⁵ Ca gulu'ē lu ba, na' belelé'ene' tu benne' dxe'ē chalá'a xabēla, nácuē' zra lane' tunna da chiche, na' belezrebe'. ⁶ Na' gunná benne' nigá, dxe'ē nu'ula ca':

—Quebe zrēbele. Le'e dxexilajle Jesús, benne' Nazaret, bēnnea' gudé'ē le'ē xaga bégua. Bache bebán bēnnea'. Québedxa xu'ē nigá. Le nna' lataj naga gulexrú'ē Le'. ⁷ Le chjaca na'a, le cheajezre benne' ca' bsédene', ne Pedro cuía lau Jesús chéaje' naga nababa Galilea ca le'e. Na' xelé'eqezle Le' ca ba gunnáqueze'.

⁸ Nadxa nu'ula ca' buluzrúnmuje', besí'aque' dxu'a ba lawe' da belezrébele'ē. Quebe nu guléqueze' ca da guca na lawe' da dxelezrébele'ē.

Jesús dxulé'ē lau María Magdalena
(Jn. 20.11-18)

⁹ Ca gudé bebán Jesús ládujla benne' gate ca guxaní' zra nedxu chee da gazre zra, na' ble'e lawe' zate ca' María Magdalena, nu'ula na' bebéaj Jesús gazre be' xriwe' guxú'ē. ¹⁰ Nu'ula nigá guxíaje' xeajezre' benne' ca' gulaque' Jesús tuze, zaj zre'ē baxácheze, ne dxelebezre'. ¹¹ Gate na' gulenne' nabán Jesús, na' ba ble'e nu'ula nigá Le', quebe guléajle'ē.

Dxulé'ē lau Jesús chupa benne' bsédene'
(Lc. 24.13-35)

¹² Ca gudé na' ble'e lau Jesús nazrala chupa benne' ca' bsédene' zaj xu'e neza le'e xixre'. ¹³ Benne' caní belexebi'e, na' xeajleguezre' benne' xezícala. Cá'anqueze benne' caní quebe guléajle'e.

Jesús dxusebague' benne' gubáz chee' ca' da dxal-la' xelune'
(Mt. 28.16-20; Lc. 24.36-49; Jn. 20.19-23)

¹⁴ Ca gudédxa, na' ble'e lau Jesús chinéaj benne' ca' bsédene' ca' zaj dx'e dxelawe', na' gudil-le' le' lawe' da quebe guléajle'e ba bebang', ne lawe' da zaj naque' lázrdau zide' lawe' da quebe guléajle'e chee' benne' ca' belexelé'ene' Le' ca gudé bebang'. ¹⁵ Na' gunné', dx'e benne' ca':

—Le chjaca du ca naca xezr la xu. Le cu'u lban chee' dizra' chawe' chia' chee' xelénqueze xúgute' bénneache. ¹⁶ Benne' chéajle'e, ne chue' nisa, la bénnea', na' benne' quebe chéajle'e, wabía xi' bénnea'. ¹⁷ Da dxelunna bea caní xululé'e benne' ca' xeléajle'e chia', xuluchínene' La neda' chee' xelexebéajle' be' xriwe'. Xuluchálaje' dizra' nazrala. ¹⁸ Welúxrue' bela' ca', ne che xelé'aje' da gute benne', quebe bi xeléquene'. Cá'anqueze wuluxrúa ne'e benne' quebe chawe' zaj zue', na' xelexexaque'.

Dxexepe Jesús xabáa
(Lc. 24.50-53)

¹⁹ Ca gudé bchálaj Xránadxu Jesús nen benne' ca', na' Dios bechise' Le' xabáa, na' gudxé'e chalá'a xabela chee' Dios. ²⁰ Nadxa benne' ca' guledxúaje', xeajlelu'e lban chee' dizra' chawe' nigá du ca naca xezr la xu nigá. Léqueze Xránadxu gúcalene' le', na' bdxixruj be'e dizra' chee' ne chee' xel-la waca ca' da za xabáa da belune'. ¡Ca'an gaca na!

DIZRA' CHAWE' CA NACA CHEE JESUCRISTO SDA BZUAJ SAN LUCAS

Dizra' dxuchalaj San Lucas, dx'e'e Teófilo

¹ Benne' zan ba belun'e' ca da gulezéquene' buluzúaje' cáteze naca da guca ládujla dxi'u, ² cáteze na' gulé benne' ca', benne' belelé'ene' nédxudaut'e ca naca da guca na, na' buluchálaje' dizra' chawe' na'. ³ Cá'anqueze neda' ba bchi'a xánnia' xúgut'e da ca' gulaca na nédxudaut'e, na' dxéqueda' chawe' guzúaja' da nigá chiu' cáteze guca, bi nazrí'ite' lazra', lue', Teófilo. ⁴ Dxuna' caní chee' nézenu' naca na da li ca da ba bululé'ene' lue'.

Gubáz chee xabáa dxuzenne' ca galaj Juan, benne' guchúe' bèneache nisa

⁵ Gate na' naca Herodes wenná bea chee' xezre ca' zaj nababa Judea, na' zua tu bxruze le' Zacarías, benne' nababe' cue' bxruze ca' gunná be'e Abías ca ni'te. Zru'ula Zacarías na' le' Elisabet, na' nácaqueze Zacarías na' zre sua benne' ca' gulebábale' bxruze Aarón. ⁶ Zacarías ne zru'ule' Elisabet gulaque' xrlátaje lau Dios, ne dxelun'e' ca zaj naca da bdxixruj bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria le' lau Dios. ⁷ Quebe nu zrí'ine' chilá', lawe' da naca Elisabet na' nu'ula wizre, na' dxúpat'e' zaj bezúale'e' gula.

⁸ Tu zra, gate belexala bxruze ca' naga nababa Zacarías xelun'e' zrin lu xel-la bxruze chee' lau Dios, ⁹ cáteze naca da dxelún bxruze ca', na' bexala Zacarías chu'e' lu lataj lá'azxa chee' Xránadxu lu xudau' chee' guzezxe' xala. ¹⁰ Dxácate' na' dxezxe xala na', ca naca benne' ca' zaj zra' ch'alé'ajla dxuluchálajlene' Dios. ¹¹ Nadxa ble'e' lau tu gubáz chee' xabáa chee' Xránadxu, ze' ch'alá'a xabéla chee' cugu naga zría xala dxezxe na. ¹² Ca ble'e' Zacarías gubáz chee' xabáa na', guzúe' stebe, ne bzrébele'e'.

¹³ Gubáz chee' xabáa na' guzre' le':

—Zacarías, quebe zrebu', lawe' da ba ben Dios dizra' da dxuchálajlenu' Le', na' nu'ula chiu', Elisabet, walaj tu zrí'ine', bi na' guzú' labe' Juan. ¹⁴ Wabéle'enu', ne gaca chiu' tu da ba neza zrent'e, na' benne' zan xebebe' lawe' da ba gulaj bidu na'. ¹⁵ Ca'an gaca lawe' da gaca zrí'inu' szrent'e lau Dios. Quebe xí'ajbe' xrise uva wal-la, u da dxusuzre na bèneache, na' gate gálajtebe' tu súalezqueze Be' Lá'azxa nen lebe'. ¹⁶ Ne chee' lebe' benne' zan xelexaque' bi chee' Xránadxu Dios. ¹⁷ Juan nigá quia laube' lau Xránadxu, na' Be' na', ne xel-la waca da gulezúale' na Elías, bènea' bchálaje' waláz chee' Dios gate nate, xelezúale' na lebe', chee' guzúabe' tuze benne' ca' zaj naque' xra xrna nen zrí'ine', ne chee' gulé'ebe' benne' dxeledábage' Dios chee' xelun'e' ca dxenná xrtizra' Dios. Ca'an gaca, gucá'ana cháwebe' bèneache chee' xelezí' lu ne'e' Xránadxu.

¹⁸ Zacarías na' bchebe' gubáz chee' xabáa:

—¿Ájazra gaca nezda' gaca caní? Neda' ba nagúlale'a, ne cá'anqueze naca nu'ula chia'.

¹⁹ Na' bechebe' gubáz chee' xabáa na':

—Neda' naca' Gabriel, ne naca' wen zrin chee' Dios. Le' gusel-le' neda' chee' guchálajlenu' lue', ne guzenda' lue' dizra' chawe' nigá. ²⁰ Na'a, lawe' da quebe

guxéajle'u da gucha' lue', xegá'anu' quebe gaca nníu' cadxa galaj zri'inu'. Caní gaca na ca zrinte zra chee na.

²¹ Dxácatē na' zaj zra' benne' ca' chalé'ajla, dxelebeze' Zacarías, ne dxexebánenē' lawe' da dxezréle'ene', quebe dxedxúaje' lu lataj lá'azxa. ²² Gate bedxúaj Zacarías, québedxa dxaca nniē'. Nadxa guleque bé'ene' ba ble'e Zacarías tu da ble'e Dios le' lu lataj lá'azxa na'. Na' le' bta ná'ase', lawe' da quebe dxaca nniē'.

²³ Ca xeajsé chee zra ca' dxal-la' gun Zacarías zrin chee xudau', na' bezé'e zexiáje' lizre'. ²⁴ Ca gudé na' zru'ule' Elisabet ba zue' zi'i, na' quebe bdxúaje' lataj bchina' chie' ca gazxu' beu', na' dxenné' lu lázrdawe': ²⁵ "Xrana' Dios ba bene' chia' da nigá chee québedxa xuluzúa bēnneache neda' chalá'ala."

Gubáz chee xabáa dxuzenne' ca galaj Jesús

²⁶ Ca gudé xrupa beu' gate na' bchálajle gubáz chee xabáa na' Zacarías, na' Dios gusel-le' le' tu xezre nababa Galilea nazí le na Nazaret, ²⁷ chee cheajchálajlene' tu nu'ula cuíde'dau' lebe' María. Lebe' ba zua guchaga na'be' benne' biu na' le' José, benne' naque' zri'ine zre sua wenná bea David.

²⁸ Gubáz chee xabáa na' guxú'e naga zua María na', na' guzre'-be':
—Padiuzre. Dios dxunē' lue' tu culuén. Xránadxu zúalene' lue'. Dios ba bene' tu da cháwedxa chiu' quézcala chee xúgute nu'ula ca'.

²⁹ Gate María na' ble'ebe' gubáz chee xabáa na', bebánebe' ca naca dizra' na', na' gunabe' lu lázrdaube': ¿Bizr chee na' dxugape' neda' diuzre caní?

³⁰ Nadxa gunná gubáz chee xabáa na':

—María, quebe zrebu' lawe' da ba bzrué'enu' tu culuén da dxun Dios chiu' lue'. ³¹ Na'a, zua da gunna Dios chiu', na' galaj tu bidu biu chiu', na' guzú' labe' Jesús. ³² Lebe' gácabe' szren, na' xelennáqueze' naque' Zri'ine Dios szrente, na' Xránadxu Dios gunē' Le' wenná bea ca guca xra xrtawe' David, ³³ chee nna bé'etecaze' xezr la xu Israel, na' xel-la dxenná bea chee' quebe cheajséqueze chee na.

³⁴ Nadxa María bchébebe' gubáz chee xabáa:

—¿Ájazra gaca da nigá, lawe' da quebe nu benne' biu zúalēna'?

³⁵ Gubáz chee xabáa na' gunné':

—Be' Lá'azxa chee Dios suē' xichaj lázrda'u, na' xel-la waca chee Dios szrente sua na nen lue'. Chee le na' bidu na' gálajbe' gácaquezebe' chee Dios, na' sí'queze labe' Zri'ine Dios. ³⁶ Cá'anqueze bila ljwezru' Elisabet wálajqueze bidu chee' lácala ba naque' benne' gula. Ca'an naca, nu'ula na' gulenné' naque' wizre, ba zeaj xrupa beu' bnezruj Dios chee'. ³⁷ Quebe bi de da quebe gaca gun Dios.

³⁸ Nadxa gunná María:

—Neda' nácaqueza' wen zrin chee Xránadxu. Gun Dios chia' ca da ba gunná'.

Na' gubáz chee xabáa na' bezé'e naga zua María na'.

María zeajxúbe' Elisabet

³⁹ Ca lu zra na' María guzá'abe' zéajbe' tu xézredau' da zua na laduj xi'a ca' chee ga nababa Judea. ⁴⁰ Na' guxú'ube' lizre Zacarías, ne bgápabe' diuzre Elisabet. ⁴¹ Gate ben Elisabet dizra' da gunné' María, na' bidu na' xú'ube' le'e Elisabet guxrítebe', na' guzúalē Be' Lá'azxa le'.

⁴² Nadxa gunné' tu chí'e zizraj:

—Dios ba bene' tu da cháwedxa chiu' quézcala chee xúgute nu'ula ca', lawe' da ba zua da benna Dios chiu'. ⁴³ ¿Núzraqueze naca' neda', za xrna Xrana' ga

zua' neda'? ⁴⁴ Cáteze benda' dizra' da gunnéu', na' guxrite bidu chia' lu le'a lu xel-la dxebe cheebe'. ⁴⁵ Ba neza naca na chiu' guxéajle'u lawe' da gaca li ca da gunná Xránadxu.

⁴⁶ Nadxa gunná María:

Bénne'du xu'a dxue lá'ana na Xrana'.

⁴⁷ Lázdawa' dxebe na ca dxun Dios, weselá chia'.

⁴⁸ Lawe' da gudxé' Dios gunne xue chia', nácaqueza' wən zrin chee'.

Na'a su lau na, xúgute benne' xelenné' nazi'a tu culuen zren chee' Dios.

⁴⁹ Dios Szrente ba bene' tu da zrente chia' neda'.

Chee le na' lá'azxa naca La Le'.

⁵⁰ Le' xexache lázrqueze' xúgute benne' ca' dxelezrebe' Le'.

⁵¹ Da zrente ba ben Le'.

Bzue' zrila benne' ca' dxulucá'ana szren cuine'.

⁵² Bebéaje' benne' blau ca' lu lataj chee',

ne bechise' benne' dxexruj lazre' ca'.

⁵³ Bnézrujle'e da gulagu benne' dxeledún,

na' benne' gunní'a ca' bca'ane' le' cá'aze.

⁵⁴ Gúcalene' benne' Israel, benne' wən zrin chee' ca' lawe' da bezrí lázrqueze' le'.

⁵⁵ ca da guchebe lazre' chee' xra xrtáudxu ca',

chee Abraham, ne chee benne' xrtie' ca' chadía chacanna.

⁵⁶ María begá'analebe' Elisabet ca chunna beu', na' ca gudé na' bezrinbe' lízrebe'.

Ca gulaj Juan, benne' bchue' bénneache nisa

⁵⁷ Ca gudé na' guxá' beu' chee' Elisabet na' chee galaj bidu chee', na' guzane' tu bi biu chee'. ⁵⁸ Benne' walírz chee' ca', ne xrtia ljwezre' belezrine' dxelebene' nen le', gate belenne' Dios bezrí lázrele'e le'. ⁵⁹ Gate guca xrunu' zra, belezrine' chee' xelechúgue' lu xpélabe' da gulé'e na naca be' bi chee' Dios, na' gulaca lazre' xuluzúe' labe' Zacarías ca le' xrabe'.

⁶⁰ Na' gunná xrnabe':

—Quebe gaca. Dxal-la' si' labe' Juan.

⁶¹ Na' gulé'e le':

—¿Bizr chee na'? Quebe nu chilá' xrtia ljwézrele le' ca'.

⁶² Na' buluchebe' xra bidu na', bulutá ne'e chee xelenézene' ájazra guzúe' labe'. ⁶³ Na' xrabe' na' gunabe' tu blágadau', na' bzuaje' le'e na: Juan si' labe'. Na' xúgute benne' ca' belexebáne'. ⁶⁴ Ca' guca Zacarías benné', na' guzú lawe' dxue lá'ané' Dios. ⁶⁵ Ca belelé'ene' da nigá, xúgute benne' walírz chee' belexebáne', na' ca naca xezre zaj nnita laduj xi'a ca ga nababa Judea, buluchálaje' ca da guca. ⁶⁶ Xúgute benne' belenne' na, gulezú lawe' dxelenné' lu lázrdawe', ne buluchebe ljwezre' tue' xetúe':

—¿Ájazraqueze gun bi nigá?

Naca bea na Xránadxu zúalene'-be'.

Ca da bil-la Zacarías

⁶⁷ Na' Be' Lá'azxa guzúalene' Zacarías, xra bidu nigá, na' bchálaje' waláz chee' Dios, gunné':

⁶⁸ ¡Gaca ba Xránadxu, Dios chee xezre Israel!

Ba ble'e naga zúadxu, bénneache chee', na' bselé' dxi'u.

⁶⁹ Ba gusel-le' tu benne' wál-lale'e, weselá cheedxu.

Bénnea' gulaj ládujla xrtia David, benne' wən zrin chee'.

- 70 Ca'an guchêbe lazre' Dios lu dxu'a benne' ca' buluchálaje' waláz chee' nédxudaute.
- 71 Guchêbe lazre' guselé' dxi'u lu na' benne' dxelezzré'ê dxi'u, ne lu na' benne' dxelecuídene' dxi'u.
- 72 Xezrí lazre' xra xrtáudxu ca', ne quebe gal-la lazre' xel-la wezría lá'azxa chee'.
- 73 Da nigá naca na da guchêbe lazre' Dios da bzua chache' nen xra xrtáudxu Abraham, da naca tu da gunne' cheedxu dxi'u.
- 74 Guchêbe lazre' guselé' dxi'u lu na' benne' dxelezzré'ê dxi'u chee' gaca gaudxu zrin chee', ne quebe zrébedxu,
- 75 ne gácadxu xrlátaje lau Le', ne gácadxu bi cheéqueze' xúgute' zra naca bandxu.
- 76 Lue', zrí'ina'dau', sí'queze lau' bi guchálajqueze waláz chee' Dios szrente, lawe' da quia lau' lau Xránadxu, salju' neza chee' Xránadxu,
- 77 Guzénenu' bènneache chee', Le' gunité lawe' dul-la chee', ne guselé' benne' ca'.
- 78 Ca'an gaca lawe' da dxexezrí lazre' Dios dxi'u. Dxuné' na'a dxalaj tu xi' chee' xabáa da dxusení' cheedxu,
- 79 na' gusení na naga zaj zra' benne' zaj zré'ê lu na' xel-la gute, chee' cu'u na dxi'u lu neza xrtante' lau Dios.
- 80 Bidu na' bgúlabe', ne bgula bènne' du xu'ube' chawe' lu da naca chee' Dios. Guzúaquezbe' le'ê xixre' lawe' lataj cadxa bzrin zra ble'e laube' xezre Israel.

2

Ca guca gate gulaj Jesús (Mt. 1.18-25)

¹ Ca lu zra na' gate dxenná bea Augusto, benne' xezre Roma, benne' dxenná be'ê xúgute' cue' xezr la xu, le' gunná bé'ene' xelú'u lu xiche xúgute' benne' zaj zré'ê xezr la xu. ² Da nigá naca da nédxudau' gulú'u bènneache lu xiche. Guca caní gate naca Cirenio benne' zaj xu'u lu ne'ê xezre ca' zaj nababa Siria. ³ Xúgute' bènneache dxun na ba xen chjaque' lu xezre naga zaj nababe' chee' xelu'ê lu xiche. ⁴ Chee' le' na' José guzé'ê lu xezre Nazaret, da nababa Galilea, chee' bzriné' lu xezre Belén, da nababa Judea, naga gulaj wenná bea David. Bzrin José na' lawe' da naque' xrtia David na'. ⁵ José guxíaje' Belén chee' chu'ê lu xiche tu zren nen María. María nigá ba nachébebe' guchaga ná'alêbe' José, na' ba bnezruj Dios chee'be'. ⁶ Dxácaté na' zaj zré'ê lu xezre Belén, na' bzrin zra san María bidu chee'. ⁷ Lu xezre na' gulaj bidu nedxu chee', na' bchele'-'be' ládxe' du ca', na' gúxrue'-'be' xu'u naga dxelún chi'ê da dxelagu bea ca', lawe' da quebe ga bzrela tu lataj lu xu'u naga che'ê.

Dxuluchálajle' gubáz chee' xabáa benne' ca' dxuluxúe' zrila' ca'

⁸ Gagu cuita xezre Belén zaj zra' benne' ca' dxuluxúe' zrila' ca', dxelexegá'ane' le'ê xixre' chizrela, dxuluxúe' zrila' chee' ca'. ⁹ Naga zaj zré'ê ble'e lau tu gubáz chee' xabáa chee' Xránadxu. Na' xel-la naxaní' chee' Xránadxu Dios bsaní na naga zaj zré'ê. Ca'an guca, belezrébele'ê. ¹⁰ Na' gubáz chee' xabáa na' guzre' le':

—Quebe zrébele, lawe' da dxuzenla' le'e tu dizra' chawe'. Ne chee' dizra' nigá xelebéle'ê xúgute' bènneache. ¹¹ Na'a, lu xezre chee' David, ba gulaj tu bidau' gácabe' weselá chee'le. Bi nigá naque' Cristo, Xránadxu. ¹² Da nigá

gaca na tu da gunna bea na chee. Cheajxrácale bidu dxe'ene nigá, dxélabé' ládxé'du ca', ne debe' tu xu'u naga dxelún chí'e da xelagu bea ca'.

¹³ Chadí lau, cuita gubáz chee xabáa na' bululé'e lau zandxa gubáz chee xabáa, dxelúe lá'angé' Dios, dxelenné':

¹⁴ ¡Gaca ba Dios na'ala,

na' lu xezr la xu nigá sua xel-la dxebeza zri lazre' chee bénneache, benne' dxeluné' ca da dxaca lazre' Dios!

¹⁵ Gate besí'aca gubáz chee xabáa ca', zeajxaque' xabáa, nadxa benne' ca' dxuluxúe' zrila' gulezú lawe' dxelé' ljwezre' tue' xetúe':

—Chéajxquedxu lu xezre Belén cheajnnadxu da ba guca, ca da ba gunná Xránadxu Dios, guzre' dxi'u.

¹⁶ Ca'an guca, besí'aca zézzuje', na' xeajlexraque' María ne José, ne bidu dxe'ene na', debe' xu'u naga dxelún chí'e da xelagu bea ca'. ¹⁷ Gate belelé'engé' bidu na', na' buluchálajlengé' benne' ca' ca da gunná gubáz chee xabáa ca da naca chee bidu na'. ¹⁸ Na' xúguté' benne' ca' belenne' da nigá belexebánele'engé' ca da gulenná benne' caní. ¹⁹ María bcache' da nigá lu xichaj lázrdawe', na' blaba lazre' ca naca da nigá. ²⁰ Ca'an guca besí'aca benne' ca' dxuluxúe' zrila', dxulucá'ana szrené' Dios, ne dxelúe lá'angé' Le' ca naca xúguté da belenne', ne da belelé'engé', lawe' da guca xúguté ca da guzre gubáz chee xabáa na' le'.

Ca guca gate belú'e bidu Jesús lu xudau'

²¹ Ca guca xrunu' zra, na' gulechugue' tu lu xpela bidu na' ca da nadxixruj bea na chee Dios, na' belú'e La bidu na' Jesús, cáteze naca da gunná gubáz chee xabáa na', guzre' María nédxudxa ca za gu'e bidu na'.

²² Ca bzrin zra chee xeluné' ca bdxixruj bea Moisés chee xelexexaque' chawe' lau Dios, na' belú'e bidu na' lu xezre Jerusalén chee xuluzúe'-be' lu na' Xránadxu Dios. ²³ Beluné' caní lawe' da ba naxúaj lu da nadxixruj bea Xránadxu Dios da dxenná na caní: Xúguté bi biu, bi nedxu gálajbe' dxal-la' guzúale-be' chee Xránadxu Dios. ²⁴ Na' xjaque' xeajlegu'e dxen chee be xixre'du ca' lau Dios ca da dxenná da nadxixruj bea na chee Xránadxu Dios, da dxenná na: Chupa bgugu, che chupa bxínnedau'.

²⁵ Ca lu zra na' zua tu benne' biu gula lu xezre Jerusalén, le' Simeón. Naque' tu benne' chawe', na' dxue lá'anaqueze' Dios, ne dxebezé' benne' sel-la Dios chee guselé' bénneache Israel. Zúale Be' Lá'azxa chee Dios Simeón na'. ²⁶ Be' Lá'azxa ba guzre' Simeón na' quebe gatié' cadxa lé'engé' Cristo, benne' na' sel-la Xránadxu Dios. ²⁷ Simeón nigá guxíaje' lu xudau' lawe' da bsi' Be' Lá'azxa chee Dios le'. Na' gate xra xrna bidu Jesús zaj nu'e-be' lu xudau' chee xeluné' cheebe' ca da bdxixruj be'e Moisés, ²⁸ na' Simeón na' guqu'é' bidu na'. Bnide'-be', ne be lá'angé' Dios, gunné':

²⁹ Xrana', na'a waca gunnu' lataj gatia' lu xel-la dxebeza zri lazre' lawe' da ba benu' ca da guchebe lazru' chia', naca' wen zrin chiu'.

³⁰ Nen xiaj láuqueza' ba ble'eda' Benne' Weselá,

³¹ Bénnea' ba bzu' chee gácalengé' xúguté' bénneache.

³² Le' naque' tu xi' da gusení na chee benne' quebe zaj nababe' Israel.

Ne chee Le' gaca tu da ba neza chee bénneache chiu', benne' Israel.

³³ José ne xrna Jesús belexebánele'engé' ca da gunná Simeón chee bidu Jesús.

³⁴ Nadxa Simeón gunabe' lau Dios gungé' chee' da chawe', na' guzre' María, xrna Jesús:

—¡Gunná'xque nigá! Bidu nigá, Dios nuzúe' lebe' chee gunbe' chee benne' Israel ca', cheajlecházie' benne' zante lu na' da xriwe', na' benne' zante xelexaxase' lau Dios. Lebe' gácabe' tu da dxunna bea chee Dios, na' benne' zante xuluzúe' lebe' chalá'ala. ³⁵ Ne chee lebe' gulé'e lau ca da dxeajlesá lazre' tu tue'. Na' chiu' lue' da nigá gaca na ca tu xia nalá, da cheajsúa lu lázrda'u.

³⁶ Cá'anqueze zua na' tu nu'ula dxenne' waláz chee Dios, le' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuíde'te, na' guzúalene' benne' chee' gazre iza. ³⁷ Na' begá'ane' tuze', ne ba xu'e tapa lalaj tapa iza. Quebe becuase' xudau', na' dxune' zrin chee Xránadxu Dios te zra chizrela. Dxune' gubasa, ne dxuchálajlene' Dios. ³⁸ Ana na' bzrinqueze' na', na' ca gudé guzre' Dios: "Xcalenu'", na' guzú lawe' dxuchálaje' chee bidu Jesús nen xúgute' benne' ca' dxelebeze' benne' na' sel-la Dios chee guselé' benne' Jerusalén ca'.

Ca guca gate belexezrine' xezre Nazaret

³⁹ Ca belune' xúgute' ca da dxenná da nadxixruj bea Xránadxu, nadxa besía'que' xjaque' naga nababa Galilea, na' belexezrine' xezre Nazaret da naca lazrie'. ⁴⁰ Na' bidu Jesús bgúlabe', ne gúcadxabe' chuchu, ne gúcadxabe' bi naxéajni'i, na' Dios bca'ane' lebe' chawe'.

Ca guca gate bzrin bidu Jesús lu xudau'

⁴¹ Xra xrna' Jesús, tu tu iza dxjá'aque' xezre Jerusalén gate dxu'u laní chee xulusá lazre' benne' judío ca da ben Dios, bebéaje' xra xrtawe' ca' lu xezr la xu Egipto. ⁴² Ca guque Jesús chazrinnu iza, na' xjá'aque' xúgute' Jerusalén, ca dxelúnqueze' ca dxaca laní. ⁴³ Ca gudé laní, na' besía'que', na' bidu Jesús begá'anabe' Jerusalén, ne quebe guleque be'e xrnabe', ne José. ⁴⁴ Dxeléquene' Jesús zezabe' ládujla benne' zan ca', na' besía'que' tu zra nez. Gate belexilje'-be' ládujla benne' xrtie' ca', ne benne' ca' zaj núnbe'e, ⁴⁵ quebe belexezrélné'-be'. Ca'an guca belexebi'e zeajxá'aque' Jerusalén chee cheajlexedílje'-be' na'.

⁴⁶ Ca gudé guca chunna zra, nadxa belexezrélné'-be' lu xudau', dxe'ebe' ládujla benne' ca' dxuluxuzájle'e da nadxixruj bea Dios, na' dxenbe' ca' dxelenné', ne dxuchébebe' benne' ca'. ⁴⁷ Xúgute' benne' ca' dxelenne' dxelxebánene' chee'be' ca naca xel-la sina chee'be', ne ca naca da dxuchálajlebe' le'. ⁴⁸ Gate belelé'e xra xrnabe' lebe', na' belexebánene'. Na' gunná xrnabe', dxe'e-be':

—Zri'ina', ¿bizr chee na' benu' caní nen netu'? Cadite stebe ba guzúantu' chiu' dxexilajntu' lue', xrau' ne neda'.

⁴⁹ Nadxa Jesús dxe'e'be' le':

—¿Bizr chee na' dxexilajle neda'? ¿Quebe nézele le'e dxal-la' guna' neda' da naca chee Xra'?

⁵⁰ Xra xrnabe' quebe guléajni'ine' ca da gúzrebe' le'.

⁵¹ Nadxa bezálebe' le' zeajxá'aque' Nazaret, na' gúcaquezebe' bi wezúa dizra' chee xra xrnabe'. Na' xrnabe' bcache chawe' xúgute' da nigá lu lázrdawe'.

⁵² Jesús zéajbe' dxegúlabe' lu bel-la' dxen chee'be', ne lu xichaj lázrdaube', na' dxedxúajquezebe' chawe' lau Dios, ne lau bénneache.

3

Juan, benne' dxuchúe' bénneache nisa, dxuchálaje' xrtizra' Dios le'e xixre' (Mt. 3.1-12; Mr. 1.1-8; Jn. 1.19-28)

¹ Iza chinu' ca dxenná bea Tiberio, benne' dxenná be'e ca naca xezr la xu, na' Poncio Pilato dxenná be'e naga nababa Judea, na' Herodes dxenná be'e naga nababa Galilea, na' Felipe, benne' biche Herodes, dxenná be'e naga nababa Iturea, ne Traconite, na' Lisantias dxenná be'e naga nababa Abilinia. ² Na' Anás, ne Caifás zaj naque' bxruze blau. Ca lu zra na' Dios bchálajlene' Juan, zri'ine Zacarías, naga zua Juan le'e xixre' lawe' lataj. ³ Juan na' gudé' ca naca xézredu ca' zaj nnitan' chala' a weaj xegu Jordán, na' dxé'e benne' ca' dxal-la' xelexebí'i lazre', ne xeledxúe' nisa chee' gunité' lau Dios chee' xtul-le'. ⁴ Caní guca ca na' gunná Isafas, benne' bchálaje' waláz chee' Dios, gunné': Nen tu chi'i bénnea' dxenné' zizraj le'e xixre' lawe' lataj. Dxenné':

Le gucuesa neza naga te Xránadxu.

Le xulí chawe' neza lase chee'.

⁵ Ca naca zritudu ca' le xuzrá na.

Ca naca xi'a ca', ne xí'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

⁶ Ca naca bénneache xeelé'ene' Benne' Weselá sel-la Dios.

⁷ Gate benne' ca' belezrine' lau Juan chee' xeledxúe' nisa, na' le' dxé'e benne' ca':

—Xrtia bela snia. ¿Ble'e nu benne' le'e chee' cuásale ca naca xel-la dxezrá'a chee' Dios da ba za? ⁸ Le gun da gulé'e na ba bebí'i lázrele, ne quebe nnale lu lázrdaule: Nácantu' xrtia ljwezre Abraham. Neda' dxapa' le'e, Dios wazéquene' xexune' xiaj caní xrtia Abraham. ⁹ Xa waga ba de cuásate na chee' chugue' xaga ca', na' xúgute' xaga da quebe dxelebía na da zixre chawe' welechugue na, na' xuluzré'e na lu xi'.

¹⁰ Nadxa benne' ca' buluchebe' le':

—¿Bi dxal-la' guntu'?

¹¹ Juan bechebe':

—Benne' de chupa zre' dxal-la' gunézruje' tu na benne' quebe de chee', na' benne' de da dxawe' dxal-la' gunézruje' da gagu bénnea' quebe bi de chee'.

¹² Cá'anqueze belelá' benne' wechizruj ca' chee' xeledxúe' nisa, na' buluchebe' Juan:

—Benne' wesede, ¿bi da dxal-la' guntu' netu'?

¹³ Juan guzre' le':

—Quebe guchízrujle da zrendxa ca da nadxixruj bea na.

¹⁴ Cá'anqueze bal-la benne' dxjaque' wedil-la buluchebe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wen lazre' chee' cuale dumí chee', na' le be nen cadite názrujle.

¹⁵ Benne' zaj zre'e na' zaj zue' stebe, na' dxuluchebe' lu lázrdawe' che Juan na' naque' Cristo, benne' nasele-la Dios. ¹⁶ Juan na' gunné':

—Neda', da li dxuchúa' le'e nisa nen nisa. Wida tu benne' gungé' da dxulé'e xel-la dxedxúa nisa nigá, guzúe' le'e Be' Lá'azxa, ne xi' chee'. Benne' nigá nápadxe' xel-la dxenná bea ca neda', na' quebe naca chia' cuéaja' xel-la chee' da xu'u ni'e. ¹⁷ Ba nuxre' da dxun be' chee', na' guchi'e naga dxine' zrua' xtila. Na' xutupe' zrua' xtila, guzrá' chawe' na lizre'. Guzezxe' xizre chee' na lu xi' da cabata' xul-la na.

¹⁸ Ca naca dizra' nigá, ne xezícadxa dizra' zan bchálajlene' benne' ca' ca naca dizra' chawe' chee' Dios. ¹⁹ Juan gudil-le' Herodes, benne' dxenná be'e, lawe'

da zúaləŋe' Herodías, zru'ula Felipe, benne' biche Herodes na', ne lawe' da ba bene' da zante da calela. Nadxa Herodes ²⁰ bəndxaqueze' da calela, gulu'e Juan lizre xia.

Da guca gate gudxúa Jesús nisa

(Mt. 3.13-17; Mr. 1.9-11)

²¹ Gate ne dxuchúa Juan na' bənneache nisa, cá'ancheze Jesús gudxúe' nisa, na' gate dxuchálajləŋe' Dios, na' b'xalaj xabáa, ²² na' betaj Be' Lá'azxa lawe' Jesús. Ble'e lawe' ca tu bgugu chiche, na' ben tu chi'e xabáa, dxenné':

—Lue' nacu' zri'ina' nazrí'ite' lazra'. Dxezaca ba lázreleŋa' Lue'.

Ca naca xra xrtau Jesucristo

(Mt. 1.1-17)

²³ Jesús napə' ca chi dxua iza gate guzú lawe' dxunə' zrin chee'. Dxeleque benne' naque' zri'ine José. Naca Jesús zre sua Elí, xra María.

²⁴ Elí na' guque' zri'ine Matat,

Matat na' guque' zri'ine Leví,

Leví na' guque' zri'ine Melqui,

Melqui na' guque' zri'ine Jana,

Jana na' guque' zri'ine xetú José.

²⁵ José nigá guque' zri'ine Matatías,

Matatías na' guque' zri'ine Amós,

Amós na' guque' zri'ine Nahum,

Nahum na' guque' zri'ine Ešli,

Ešli na' guque' zri'ine Nagai.

²⁶ Nagai na' guque' zri'ine Maat,

Maat na' guque' zri'ine xetú Matatías,

Matatías nigá guque' zri'ine Semei,

Semei na' guque' zri'ine xetú José,

José nigá guque' zri'ine Judá.

²⁷ Judá na' guque' zri'ine Joana,

Joana na' guque' zri'ine Resa,

Resa na' guque' zri'ine Zorobabel,

Zorobabel na' guque' zri'ine Salatíel,

Salatíel na' guque' zri'ine Neri.

²⁸ Neri na' guque' zri'ine xetú Melqui,

Melqui nigá guque' zri'ine Adi,

Adi na' guque' zri'ine Cosam,

Cosam na' guque' zri'ine Elmodam,

Elmodam na' guque' zri'ine Er,

²⁹ Er na' guque' zri'ine Josué,

Josué na' guque' zri'ine Eliezer,

Eliezer na' guque' zri'ine Jorim,

Jorim na' guque' zri'ine xetú Matat,

³⁰ Matat nigá guque' zri'ine xetú Leví,

Leví nigá guque' zri'ine Simeón,

Simeón na' guque' zri'ine xetú Judá,

Judá nigá guque' zri'ine xetú José,

José nigá guque' zri'ine Jonán,

Jonán na' guque' zri'ine Eliaquim,

³¹ Eliaquim na' guque' zri'ine Melea,

Melea na' guque' zri'ine Mainán,

Mainán na' guquē' zri'ine Matata,
Matata na' guquē' zri'ine Natán.

³² Natán na' guquē' zri'ine David,
David na' guquē' zri'ine Isai,
Isai na' guquē' zri'ine Obed,
Obed na' guquē' zri'ine Booz,
Booz na' guquē' zri'ine Salmón,
Salmón na' guquē' zri'ine Naasón.

³³ Naasón na' guquē' zri'ine Aminadab,
Aminadab na' guquē' zri'ine Aram,
Aram na' guquē' zri'ine Esrom,
Esrom na' guquē' zri'ine Fares,
Fares na' guquē' zri'ine xetú Judá,

³⁴ Judá nigá guquē' zri'ine Jacob,
Jacob na' guquē' zri'ine Isaac,
Isaac na' guquē' zri'ine Abraham,
Abraham na' guquē' zri'ine Taré,
Taré na' guquē' zri'ine Nacor.

³⁵ Nacor na' guquē' zri'ine Serug,
Serug na' guquē' zri'ine Ragau,
Ragau na' guquē' zri'ine Peleg,
Peleg na' guquē' zri'ine Heber,
Heber na' guquē' zri'ine Sala,

³⁶ Sala na' guquē' zri'ine Cainán,
Cainán na' guquē' zri'ine Arfaxad,
Arfaxad na' guquē' zri'ine Sem,
Sem na' guquē' zri'ine Noé,
Noé na' guquē' zri'ine Lamec,

³⁷ Lamec na' guquē' zri'ine Matusalén,
Matusalén na' guquē' zri'ine Enoc,
Enoc na' guquē' zri'ine Jared,
Jared na' guquē' zri'ine Mahalaleel,
Mahalaleel na' guquē' zri'ine xetú Cainán.

³⁸ Cainán na' guquē' zri'ine Enós,
Enós na' guquē' zri'ine Set,
Set na' guquē' zri'ine Adán,
Adán na' guquē' ca zri'inequeze Dios.

4

*Satanás da xriwe' dxilaj lazre' na ájala gusebaga na Jesús dul-la
(Mt. 4.1-11; Mr. 1.12-13)*

¹ Jesús, zúale Be' Lá'azxa Le', bezé'e xegu Jordán, na' guché Be' Lá'azxa Le' le'e xixre' lawe' lataj. ² Na' guzúé' chua zra, na' Satanás da xriwe' gudilaj lazre' na ájala si xē na Le'. Quebe bi gudagu Jesús da chua zra ca', na' ca gude' na' gadune'. ³ Nadxa gunná da xriwe', guzre na Le':

—Che da li nacu' Lue' Zri'ine Dios, beñ xelexaca xiaj caní xeta xtila.

⁴ Na' bechebe Jesús:

—Naxúajqueze na lu xiche chee Dios, dxenné': Quegá nen xeta xtilaze gaca ban bēnneache, san cá'anqueze nen xrtizra' Dios gaca ban bēnneache.

⁵ Nadxa da xriwe' guché na Jesús tu xi'a sibe, na' chadite ble'e na Le' xúgute cue' xezr la xu da zaj nnita lu xezr la xu nigá, ⁶ na' guzre na Le':

—Neda' gunna' Lue' ca naca xel-la dxenná bea nigá, ne xel-la szren chee xúgute xezr la xu caní, lawe' da zaj xu'u da caní lu na'a neda', na' gunézruja' na nu dxaca lazra' gunézruja' na. ⁷ Gunna' na chiu' che lue' guzú zribu' lawa', ne gucá'ana szrenu' neda'.

⁸ Jesús bechebe':

—Gucuasa lue', Satanás, lawe' da dxenná xiche chee Dios, dxé'e bénneache: "Bca'ana szren Xranu' Dios, ne ben zrin chee tuze Le'."

⁹ Nadxa da xriwe' na' guché na Jesús lu xezre Jerusalén, na' bcuén na Le' xichaj ze'e xudau', na' guzre na Le':

—Che da li na' nacu' Zri'ine Dios, guxrite' nigá cheajxezu' lu xu, ¹⁰ lawe' da lu xiche chee Dios dxenné':

Dios gusebague' gubáz chee xabáa chee' ca' xuluxue' Lue'.

¹¹ Xelechisaqueze' Lue' nen ne'e, chee quebe gaca we' ni'u lawe' xiaj ca'.

¹² Jesús bechebe':

—Cá'anqueze naxúaj na lu xiche chee Dios, dxé'e bénneache: "Quebe guchínenu' ca dxaca lazru' Xranu' Dios."

¹³ Gate da xriwe' québedxa bezrela lazre' na ájala gun zréaje na Jesús, na' becuasa na tu chí'i.

Jesús dxune' zrin chee' naga nababa Galilea

(Mt. 4.12-17; Mr. 1.14-15)

¹⁴ Na' Jesús bezrine' Galilea, ba nápalé'e xel-la waca chee Be' Lá'azxa, na' ca naca xézredu ca' zaj nababa na' buluchálaj bénneache ca naca xel-la waca chee'. ¹⁵ Jesús bsédené' benne' ca' tu lu xudau' ca', na' xúgute' belúe lá'ane' Le'.

Jesús dxexezrine' Nazaret

(Mt. 13.53-58; Mr. 6.1-6)

¹⁶ Nadxa Jesús bezrine' Nazaret, xezre naga bgule'. Lu zra dxulupá'ana benne' judío ca' guxú'e lu xu'u ga na' dxelezraga benne' judío ca', ca xu'u lawe' dxune', chee gulabe' da naxúaj na lu xiche chee Dios. ¹⁷ Buludé'e' Lu ne'e xiche naga naxúaj dizra' bzuaj Isaías, benne' bchálaje' waláz chee Dios, na' gate gusaláje' na, na' blabe' naga naxúaj da dxenná:

¹⁸ Be' Lá'azxa chee Xránadxu zúalene' neda', lawe' da guqué'e neda' chee guchálajlena' benne' baxache' ca' dizra' chawe' chee'.

Gusel-le' neda' chee xexuna' benne' ca' quebe chawe' zaj zue', ne chee guzenda' benne' ba zaj nadxéaje' lu da zrinnaj, waca xeledé', ne chee xexuna' lau benne' la chul-la ca', ne chee guselá' benne' dxelezaca zi'e,

¹⁹ ne chee guzenda' bénneache ba bzin zra Xránadxu Dios gucá'ane' le' chawe'.

²⁰ Nadxa Jesús butube' xiche na', na' bde'e' na lu na' benne' dxuxúe' xu'u na', na' bebé'e. Xúgute' benne' zaj zre'e lu xu'u na' dxelenné'e Le', ²¹ na' Jesús guzú lawe' dxé'e benne' ca':

—Na'a zra guca ca da naxúaj na laule le'e.

²² Xúgute' gulenné' chawe' chee Jesús, ne belexebánene' ca naca dizra' chawe' da dxuchalaje'. Na' buluchebe ljwezre':

—¿Quegá benne' nigá zri'ine José?

²³ Jesús guzre' le':

—Da líqueze le'e wele neda' dizra' nigá: Lue', benne' dxexúnu' benne' we' ca', bexún cuinu', ne xe'le neda': Ca da bémentu' benu' lu xezre Capernaum, cá'anqueze ben na lázriu' nigá na'a.

²⁴ Nadxa gunná Jesús:

—Da li dxapa' le'e, tu benne' dxuchálaje' waláz chee' Dios, quebe nu dxue le' ba lá'ana lazrie'. ²⁵ Dxapa' le'e, gulezrá' nu'ula zan ba gulate benne' chee' lu xezr la xu Israel ca lu zra guzúa Elías, benne' bchálaje' waláz chee' Dios, gate na' quebe guca xiuj chun iza xugachaj, ne gúcalé'e gubina' ca naca xezr la xu na'. ²⁶ Dios quebe gusel-le' Elías lau netú nu'ula, nate benne' chee', zue' xezr la xu Israel. Gusel-le' le' lau tu nu'ula, nate benne' chee', zue' lu xezre Sarepta, da zua na gagu naga dxe' xezre Sidón. ²⁷ Cá'anqueze gulezrá' benne' zan benne' dxeledxé'eng' we' guzru' lu xezr la xu Israel ca lu zra guzúa Eliseo, benne' bchálaje' waláz chee' Dios, na' netúe' quebe bexaque'. Tuze Naamán, benne' xezr la xu Siria bexaque'.

²⁸ Gate belén benne' ca' zaj zre'e xu'u na' da nigá, na' belezrá'alé'e. ²⁹ Na' gulase', ne belexebéaje' Jesús xezre na', na' beleché'e Le' dxu'a chjéaj naga zria xezre na', chee' xuludxixe' Le' na'. ³⁰ Na' Jesús bedé'e ládujla benne' ca', na' bezé'e zexiaje'.

Jesús dxexune' tu benne' xu'e be' xriwe'
(Mr. 1.21-28)

³¹ Nadxa Jesús bexiaje' Capernaum, tu xezre nababa Galilea, na' guzú lawe' dxusédene' benne' ca' lu zra lá'azxa chee' judío ca'. ³² Belexebánene' ca naca da dxusédene', lawe' da dxuchálaje' ca tu benne' nape' xel-la dxenná bea.

³³ Lu xu'u na' zua tu benne' xu'e be' xriwe', na' dxebezre xe'e, ³⁴ dxenné': —Bsan netu'. ¿Bizr chee' na' dxunu' netu' zede, Jesús, benne' Nazaret? ¿Za'u guzría xi'u netu'? Neda' núnbe'a Lue', ne nezda' nacu' benne' lá'azxa chee' Dios.

³⁵ Jesús gudil-le' be' xriwe' na', dxenné':

—Zrize guzúa. Bsan benne' biu nigá.

Nadxa be' xriwe' na' gudín na bénnea' xu lau xúgute' benne' ca', na' bedxúaj na lu xichaj lázrdau bénnea', ne quebe bi ben na chee'. ³⁶ Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'ene' be' xriwe' ca' nen dute' xel-la dxenná bea chee', ne nen xel-la waca, na' be' xriwe' ca' dxeledxúaj na.

³⁷ Na' buluchálaje' ca naca chee' Jesús xúgute' lu xezre ca' zaj nababa na'.

Jesús dxexune' xrna zru'ula Pedro
(Mt. 8.14-15; Mr. 1.29-31)

³⁸ Nadxa bedxúaj Jesús lu xu'u na', na' guxú'e lizre Simón. Xrna zru'ula Simón na' quebe chawe' zue', xú'ule'e da la, na' gulata' xuene' Jesús xexune' le'. ³⁹ Jesús gubigue'e cuite', na' gudil-le' da la na', na' bedxúaj na. Ca ná'queze bexasáte', na' guzú lawe' dxusení'e da xelawe'.

Jesús dxexune' benne' zan quebe chawe' zaj zue'
(Mt. 8.16-17; Mr. 1.32-34)

⁴⁰ Ca dxe'bia gubizra, benne' ca' zaj nnita' benne' quebe chawe' zaj zue' lizre' belú'e le' lau Jesús, na' Le' bze' ne'e tu tu benne' ca', ne bexune' le'.

⁴¹ Cá'anqueze zánete' be' xriwe' belexedxúaj na lu xichaj lázrdau benne' ca'. Dxelenná na:

—Lue' nacu' Zri'ine Dios.

Jesús gudil-le' be' xriwe' ca'. Quebe be'e na lataj xelessé na, lawe' da zaj neze na naca Le' Cristo.

Jesús dxuchálaje' naga nababa Galilea

(Mr. 1.35-39)

⁴² Ca dxani'sise', bdxuaj Jesús xezre na', guxiáje' naga xeaajsúe' tuze'. Na' benne' ca' belexexiláje' Le', na' belezrine' xuluzague' Le' chee' quebe xeze'e.
⁴³ Jesús gunné':

—Dxun na ba xen guzenda' bèneache xezícadxa xezrdu ca' ca dxenná bea Dios, lawe' da chee' guna' caní gusel-le' neda'.

⁴⁴ Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dxelezraga judío ca' lu xezre ca'.

5

Dxelezene' bela zan

(Mt. 4.18-22; Mr. 1.16-20)

¹ Gate zua Jesús dxu'a nísadau' chee' Genesaret, na' belezrín benne' zan, ne buluchídeté' Le', lawe' da dxelaca lazre' xelenne' xrtizra' Dios. ² Jesús blé'engé' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba belexedxúaj benne' wezén bela ca' lu'ule da dxedá lawe' nísadau', na' zaj zre'e dxelexibe' xixruj chee' ca'. ³ Nadxa guxú'u Jesús tu lu da dxedá lawe' nísadau', da naca na chee' Simón, na' guzre' Simón guzrigue' na xelate' lu nísadau' na'. Jesús gudxé' lu da dxedá lawe' nísadau' na', na' guzú lawe' dxusédene' benne' ca'. ⁴ Ca bexzure bchálaje', na' guzre' Simón:

—Bsa da dxedá lawe' nísadau' chiu' naga nácadxa situj nísadau', na' le guzal-la xixruj chee'le na' chee' senle bela.

⁵ Simón bechebe':

—Benne' Weséde, bedú xela bentu' zrin, ne quebe bi bela ne sentu'. Lu dizra' chiu', na'a guzal-la' xixruj nigá.

⁶ Ca belune' ca gunná Jesús, na' bela zante gulezene', na' gúcate' wadxeza xixruj na'. ⁷ Nadxa bulutá ne'e gulenné' benne' ljwezre' zaj zre'e xetú lu da dxedá lawe' nísadau' chee' xelácalene' le'. Benne' ca' belezrine', na' bulusezrate' dxúpaté da dxedá lawe' nísadau' ca', na' gulácaté na zí'i, ne dxácaté welaze na lu nísadau'. ⁸ Gate ble'e Simón Pedro da nigá, na' bzu zribe' lau Jesús, gunné':

—Gucuasa cuíta' neda', Xran, lawe' da naca' neda' benne' dul-la.

⁹ Caní gunná Simón lawe' da dxezrébele'e ne chee' da guca na, ne cá'anqueze dxelezrebe benne' ljwezre' ca', gate belelé'engé' bela zan ca'. ¹⁰ Cá'anqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná'atela su lau' senu' bèneache lu da naca chee' Dios.

¹¹ Nadxa, ca belexebéaje' da dxedá lawe' nísadau' na' dxú'ela nísadau', na' bulucá'ane' ca naca da ca', na' zjálalene' Jesús.

Jesús dxexune' tu benne' dxé'engé' we' guzru'

(Mt. 8.1-4; Mr. 1.40-45)

¹² Gate Jesús zué' tu xezre, na' bzrin tu benne' dxé'engé' we' guzru', na' ca blé'engé' Jesús, bzu zribe', ne gudíxrujte' lawe' lu xu, na' bca'ana szrene' Le', gunné':

—Xran, che dxaca lazru', waca xexunu' neda'.

¹³ Nadxa Jesús bte'-be' nen ne'e, gunné':

—Dxaca lazra'. Bache bexacu'.

Ca gunné' ca', we' guzru' na' bedxúajte na. ¹⁴ Jesús bsebage' bénnea' quebe nu xe'e da nigá. Nadxa gunné':

—Guxíaj na'a, xeajlé'e cuinu' lau bxruze, ne gulú'u dumí chee xexádxeu' lau Dios ca da gunná be'e Moisés chee xeleneze benne' ba bexacu' ca naca xízrawe' chiu'.

¹⁵ Ca naca xel-la waca chee Jesús bzríljdx na, na' benne' zante belezrague' lau Jesús chee xelenné' da dxuchálaje', ne chee xexuné' le' ca naca xízrawe' chee'. ¹⁶ Nadxa Jesús bezé'e na', na' bzrine' naga quebe nu chilá' benne', na' bchálajlene' Dios.

Jesús dxexuné' tu benne' naxrú' une ni'a ne'e

(Mt. 9.1-8; Mr. 2.1-12)

¹⁷ Tu zra zua Jesús dxusédene', na' bal-la benne' xudau' fariseo ca', ne benne' dxuluxuzájle'e da nadxixruj be'e Moisés, zaj dxe'e na', benne' zá'aque' ca naca xézredu ca' zaj nababa Galilea, ne xezre ca' zaj nababa Judea, ne chee xezre Jerusalén, na' zúalé xel-la waca chee Xránadxu Dios Jesús, na' bexuné' benne' ca' quebe chawe' zaj zue'. ¹⁸ Nadxa belezrín tapa benne' zaj nu'e tu benne' zua zri ni'a ne'e, dee' tu lu blaga', na' gulaca lazre' xelegú'e le' lu xu'u chee xelíxrué' le' lau Jesús. ¹⁹ Quebe guca xelezrine' lau Jesús lawe' da zrále'e benne' zan ga na'. Nadxa gulegüéne' chju'ula, ne gulesaluje' chju'u, na' bululétaje' benne' na' de' lu blaga' ládujla benne' zan ca' lau Jesús. ²⁰ Gate ble'e Jesús ca dxeléajle benne' ca' chee', na' guzre' benne' quebe chawe' zue':

—Bénne'dau', ba bnite lawa' dul-la chiu'.

²¹ Nadxa benne' ca' dxuluxuzájle'e da nadxixruj bea na, ne benne' xudau' fariseo ca' gulezú lawe' dxelenné' lu xichaj lázrdawe': ¿Nuzra benne' nigá, dxenné' schanni' chee Dios? Quebe nu benne' séquene' gunite lawe' dul-la chee bènneache. Tuze Dios gaque'.

²² Jesús dxéquebe'ene' da dxelenné' lu xichaj lázrdawe', na' guzre' benne' ca':

—¿Bizr chee na' dxéquele le'e caní? ²³ ¿Bízrala na quebe naca na stébe guna', che xapa' benne' nigá: Ba bnite lawa' dul-la chiu', u che xapa' le': Guxasa bexíaj? ²⁴ Gulé'eda' le'e neda', Benne' Gulje' Bénneache, napa' xel-la dxenná bea lu xezr la xu nigá chee gunite lawa' dul-la chee bènneache.

Nadxa guzre' benne' na' naxrú' une ni'a ne'e:

—Lue' dxapa', bexasa, bexúa blaga' chiu', ne bexíaj.

²⁵ Ca gunné' ca', bexásate benne' na' lau xúgute benne' ca', na' bequé'e blaga' chee', ne bezé'e zexíaje' lizre' zeajxé lá'ane' Dios. ²⁶ Xúgute benne' ca' belexebánene', na' belúe lá'ane' Dios, ne nen xel-la dxelezrebe gulenné':

—Na'a ble'edxu da dxebánequezdxu.

Jesús dxenné' Leví

(Mt. 9.9-13; Mr. 2.13-17)

²⁷ Ca gudé na' bezá'a Jesús, na' blé'eng' tu benne' dxuchizruje' waláz chee xezre Roma, le' Leví. Dxe'e naga dxuchízruje', na' guzre' le':

—Ben neda' tuze.

²⁸ Na' guxasa Leví, bca'ane' ca naca chee' ca', na' guxíajlene' Jesús.

²⁹ Ca gudé na', Leví gulu'e tu xrche' zrenté lizre' chee bca'ana szrene' Jesús, na' zrále'équeze na' xezicadx wechizruj ca', ne xezicadx benne' zaj dxe'e dxágulene' benne' ca'. ³⁰ Na' benne' xudau' fariseo ca', ne benne' ca' dxuluxuzájle'e da nadxixruj bea na gulezú lawe' dxelezí tizre' benne' ca' dxusede Jesús, dxelé'e le':

—¿Bizr chee na' dxe'aj dxágulele benne' wechizruj caní, ne benne' dul-la ca'?

³¹ Jesús bechebe':

—Quebe zaj nachine benne' zaj zua chawe' nu benne' dxexúne' le'. Benne' quebe chawe' zaj zue' dxelechínene' le'. ³² Neda' quegá za'a dxennéa' benne' xrlátaje. Za'a dxennéa' benne' dul-la, chee xelexebi'i lazre'.

Dxuluchebe' Jesús ca naca chee gubasa

(Mt. 9.14-17; Mr. 2.18-22)

³³ Nadxa buluchebe' Jesús:

—¿Bizr chee na' dxelúnle'e gubasa, ne dxuluchálajle Dios benne' ca' zjácálenē' Juan, ne benne' ca' zjácálenē' benne' xudau' fariseo ca', san benne' ca' dxusédenu' tu dxelé'aj dxeláguzqueze'?

³⁴ Jesús bechebe':

—¿Wazéquele xe'e benne' zaj zra' laní chee wechaga na' xelune' gubasa dxácatē na' zua benne' wechaga na' nen benne' ca'? ³⁵ Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

³⁶ Nadxa bchálajlene' le' ca naca da dxulé'e nigá:

—Quegá nu benne' cheze' tu zre' cube chee xudé'e na tu zre' gula. Che ca' gunē, na' guzría xi'e ca naca zre' cube na', na' ládxe'du cube na' quebe gulé'e na cháwedau' nen ladxe' gula na'. ³⁷ Cá'anqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'. ³⁸ Chee le na' dxal-la' cá'adxu xrise uva cube lu bzude xide cube, na' dxúpatē na' xegá'ana chawe' na'. ³⁹ Che tu benne' xí'aje' xrise uva wal-la gula, québedxa nna na chee' xí'aje' xrise uva cube, lawe' da dxenné': "Nétajdxa da gula na'."

6

Benne' ca' dxuséde Jesús dxelálaje' dau zrua' xtila lu zra lá'azxa chee judío ca'
(Mt. 12.1-8; Mr. 2.23-28)

¹ Tu lu zra lá'azxa chee judío ca', gudé Jesús naga naxaza zrua' xtila, na' benne' ca' dxusédene' zjaque' dxelálaje' dau zrua' xtila, na' dxeleZRube na nen ne'e, ne dxelawe' zrua' xtila na'. ² Nadxa benne' xudau' fariseo ca' buluchebe' le':

—¿Bizr chee na' dxunle le'e tu zrin da quebe naca na gunle zra lá'azxa chee dxu?

³ Jesús bechebe':

—¿Quebe ne gulábale le'e ca ben David ne benne' ljwezre' ca' gate gule-dunē'? ⁴ Guxú'u David na' tu lu xudau' chee Dios, ne guqué'e xeta xtila da gulú'u bxruze lau Dios, na' gudawe' na, ne bnéZRujte' chee benne' ca' zjácálenē' le', ne quebe naca chee' xelawe' xeta xtila na'. Tuze bxruze ca' naca chee' xelawe' na.

⁵ Cá'anqueze guzre Jesús benne' ca':

—Neda', Benne' Gulje' Bénneache, nápaqueza' xel-la dxenná bea ca naca chee zra lá'azxa.

Jesús dxexune' benne' nazrinnaj ne'e

(Mt. 12.9-14; Mr. 3.1-6)

⁶ Xetú lu zra lá'azxa chee judío ca', guxú'u Jesús tu lu xu'u, na' guzú lawe' dxusédene' benne' zaj nazrague' na'. Zua na' tu benne' nazrinnaj ne'e xabēla.

⁷ Benne' ca' dxuluxuzájle'e da nadxixruj bea na, ne benne' xudau' fariseo ca'

dxuluzuzre' Jesús chee xelexelé'ene' che xexún Jesús bënnea' lu zra lá'azxa chee', chee xelexéquene' xelawe' zria Jesús. ⁸ Jesús ba nézene' ca da dxelegú'u lazre', na' guzre' bënnea' nazrinnaj ne'e:

—Guxasa, ne guzé laduj nigá.

Benne' na' guxase', na' guzé' na'. ⁹ Nadxa gunná Jesús, guzre' benne' ca':

—Na'a gucheba' le'e tu: ¿Bízrala na' waca gundxu zra lá'azxa chee', da xrlátaje che da calela? ¿Gucache cháwedxu xel-la nabán chee' tu benne', che guzría xidxu na'?

¹⁰ Nadxa Jesús guné'e benne' ca' zaj naxechaj Le', na' guzre' benne' we' na':

—Bli na'u nigá.

Benne' na' bene' ca', na' bexácaté ne'e na'. ¹¹ Na' benne' ca' zaj zre'e na' belezrá'ale'e, na' gulezú lawe' dxuluchebe ljwezre' bi xelexéquene' xelune' chee Jesús chee xuluzría xi'e Le'.

Jesús dxequ'é benne' chazrinnu ca' xelaque' gubáz chee'

(Mt. 10.1-4; Mr. 3.13-19)

¹² Ca lu zra na' Jesús guxiáje' tu lu xi'a xeajchájlajlene' Dios, na' guzúe' bedú xela dxuchálajlene' Dios. ¹³ Ca guxaní' gunné' benne' ca' dxusédene', ne guqu'é' chazrinnu benne' ca', na' bzre'e benne' ca' xelaque' gubáz chee'.

¹⁴ Benne' caní zaj naque':

Simón, (bënnea' bzué' le' Pedro),

Andrés, (benne' biche Simón na'),

Jacobo, Juan, Felipe, Bartolomé,

¹⁵ Mateo, Tomás,

Jacobo, (zri'ine Alfeo),

Simón, (bënnea' dxedábague' benne' Roma ca')

¹⁶ Judas, (benne' biche Jacobo), ne

Judas Iscariote, (bënnea' gudé' Jesús lu na' benne' ca' dxeledábague' Le'.)

Jesús dxusédene' benne' zante

(Mt. 4.23-25)

¹⁷ Jesús bдинne' lu xi'a na' nen benne' ca' dxusédene', na' bzrine' tu lache' nen benne' ca'. Benne' zan zaj zre'e na' zaj nababe' xezre ca' zaj nababa Judea, ne Jerusalén, nen benne' zaj nababe' Tiro, ne Sidón. Benne' caní belelé'e chee xelenne' da dxuchalaj Jesús, ne chee xexún Jesús le' ca naca xízrawe' dxeledxé'ene'. ¹⁸ Cá'anqueze benne' ca' zaj xu'e be' xriwe' belexaque'.

¹⁹ Xúguté benne' ca' gulaca lazre' xuluté' Jesús lawe' da dxexún Le' xúguté' nen xel-la waca chee'.

Benne' ca' naca da ba neza zren chee', ne benne' ca' zaj naque' baxache'

(Mt. 5.1-12)

²⁰ Nadxa Jesús gunné'e benne' ca' dxusédene', na' guzre' le':

—Ba neza zrenté naca na chee' le'e, dxéquebe'ele nácale benne' xache', lawe' da waxú'ule le'e naga dxenná bea Dios.

²¹ 'Ba neza zrenté naca na chee' le'e, dxedunle da dxunna Dios, lawe' da wélajquezle.

'Ba neza zrenté naca na chee' le'e, dxebézrele ne chee' dula, lawe' da guzrízreqezle.

²² 'Ba neza zrenté naca na chee' le'e, gate xelecuide bënneache le'e, ne gate xelexebájé' le'e chalé'ajla, ne gate xelenné' schanni' chee', ne gate xulucá'ana ditje' lale ca tu da sban lawe' da nácale bi chia' neda', Benne' Gulje' Bënneache. ²³ Le béle'e, ne le sua lu da ba neza lu zra na' lawe' da zrué'ele tu

da zren lu xabáa chee Dios. Cá'anqueze benne' xra xrtau benne' caní bulusaca zi'e benne' ca' buluchálajé' waláz chee Dios.

²⁴ 'Baxache' nácale le'e, benne' gunní'a, lawe' da ba nápane xel-la dxebé da naca chee xezr la xu nigá.

²⁵ 'Baxache' nácale le'e, nélajle na'a, lawe' da wadunle le'e.

'Baxache' nácale le'e dxuzrízrele na'a, lawe' da cuezre xáchele.

²⁶ 'Baxache' nácale le'e gate xúgute bénneache dxelenné' da chawe' chee, lawe' da ca' belún xra xrtáule, gulenné' da chawe' chee benne' wən lazre' ca', benne' gulenné': "Netu' dxuchálajntu' waláz chee Dios."

Dxal-la' zrí'idxu benne' ca' dxelecuídené' dxi'u

(Mt. 5.38-48; 7.12)

²⁷ Na' gunná Jesús:

—Dxapa' le'e dxénele chia', le zri'i benne' ca' dxelecuídené' le'e, ne le gun chawe' chee benne' ca' dxelezné'e le'e. ²⁸ Le nne chawe' chee benne' ca' dxelenné' calela chee, ne le naba lau Dios gaca chawe' chee benne' ca' dxelenné' schanni' chee. ²⁹ Che nu benne' cape' xrágale, le guzete xecha la'a, ne che nu benne' que'e xicha chee, le güe lataj ca'ate' zrale. ³⁰ Le gunezruj núteteze benne' bi nabe' le'e, ne che nu benne' que'e da naca chee, quebe xenábale na. ³¹ Le gun chee bénneache cáteze na' dxaca lázrele xeluné' chee.

³² 'Che le'e nazrí'ile tuze benne' ca' zaj nazrí'ing' le'e, ¿bízraqueze da chawe' dxunle? Cá'anqueze dxelún benne' ca' dxeluné' da calela. ³³ Che dxunle chawe' chee tuze benne' ca' dxeluné' le'e chawe', ¿bízraqueze da chawe' dxunle? Cá'anqueze dxelún benne' wən da zrinnaj ca'. ³⁴ Che bi dxusanle chee tuze benne' ba nézele wexunne' na, ¿bízraqueze da chawe' dxunle? Cá'anqueze benne' wən da calela ca' dxulusané' da naca chee' chee benne' ca' dxeluné' da calela, lawe' da zaj nézene' wulunézrujte benne' ca' le na. ³⁵ Dxal-la' zri'ile le'e benne' ca' dxelezné'e le'e, ne gunle da chawe' chee, ne gusanle chee benne' ca' da xelenabe' le'e, lácala quebe xelexexunne' na. Che gunle ca', da zrendxa da si' lu na'le, ne gácale bi ca' chee Dios szrente, lawe' da naca Le' zri'i lazre' nen benne' ca' quebe dxellexezaca ba lazre', ne benne' wən da calela ca'. ³⁶ Le xezri lazre' bénneache ca dxun Dios, dxezri lazre' le'e.

Quebe guzúale chalá'ala le sa' ljwézrele

(Mt. 7.1-5)

³⁷ Na' gunná Jesús:

—Quebe guzúale chalá'ala le sa' ljwézrele, na' Dios quebe guzúe' le'e chalá'ala. Quebe bi nnele chee le sa' ljwézrele, na' Dios quebe guchi'e chee le'e. Le gunité lau chee le sa' ljwézrele, na' Dios gunité lawé' chee le'e. ³⁸ Le gunezruj chee bénneache, na' Dios gunne' chee le'e. Dios cu'e lu xcuite chee tu xi'ina da nálate, ne da naxi'tequeze, ne guníbete' na, ne sua dí'atequeze na. Dios gudxíxrequeze' chee ca da dxudxírele chee bénneache.

³⁹ Nadxa Jesús bchálaje' da dxulé'e nigá, gunné':

—¿Waca tu benne' la chul-la cu'e neza xetú la chul-la? Che ca' gune', dxúpaté' xelexixre' tu lu xedxu. ⁴⁰ Netú benne' dxusede gácadxe' szren ca naca bénnea' dxusedene' le', na' gate xuzre gusedie', gaque' ca naca bénnea' bsédene' le'.

⁴¹ '¿Bizr chee na' dxenná'u bébedu na' xu'u na xiaj lau le sa' ljwezru', ne quebe dxéquebe'enu' ca naca da zren da xu'u na xiaj lau' lue'? ⁴² Che quebe dxéquebe'enu' ca naca da zren na' da xu'u na xiaj lau' lue', ¿ájazra dxunu'

dxexázrenu' dxu'u le sa' ljwezru': "Benna lataj xebéaja' bébedu na' xu'u na xiaj lau?" Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedau' xebéaju' bébedu na' xu'u na xiaj lau le sa' ljwezru'.

Naca bea tu benne' ne chee da dxuné'

(Mt. 7.17-20; 12.34-35)

Nadxa gunná Jesús: ⁴³—Tu xaga xrlátaje quebe cuía na da zixre caleļa, na' xaga da quebe naca chawe' quebe gaca cuía na da zixre chawe'. ⁴⁴ Tu tu xaga naca bea na ne chee da zixre da dxebeja na. Quebe gaca guchíbedxu da zixre chee xaga higo tu lu xaga xeche', ne quebe guchíbedxu da zixre chee lba uva lu xeche' bisigá. ⁴⁵ Benne' xrlátaje, da xrlátaje dxenné bènnea' lawe' da naxaza da xrlátaje lu xichaj lázrdawe', na' benne' wen da caleļa, da caleļa dxenné bènnea' lawe' da xu'u da caleļa lu xichaj lázrdawe'. Dxu'e na' dxenné na ca naca da xu'u lu xichaj lázrdawe'.

Dxuchalaj Jesús chee chupa lane xu'u

(Mt. 7.24-27)

Gunná Jesús: ⁴⁶—¿Bizr chee na' dxele neda': "Xran, Xran", ne quebe dxunle ca da dxapa' le'e? ⁴⁷ Xapa' le'e aja naca bènnea' ze'e nen neda', ne dxenne' xrtizra'a, ne dxuné' ca da dxapa' le'. ⁴⁸ Naque' ca tu benne' bene' tu xu'u. Da zren gudene', na' bzrie' lane na lawe' xiaj xre. Gate bdxuaj xegu, na' xeajchú'ule'e na le'e xu'u na', quebe bi guzeque' gunne na xu'u na' lawe' da zria lane na lawe' xiaj xre. ⁴⁹ Na' bènnea' dxenne' xrtizra'a, ne quebe dxuné' ca da dxapa' le', naque' ca tu benne' bene' xu'u chee' lawe' xu dxeze, ne quebe guzalé' lane na, na' gate bdxuaj xegu na', ne xeajchú'ule'e na le'e xu'u na', na' guché na le na, na' tu chí'izqueze bzria xi na le na.

7

Jesús dxexuné' bi wen zrin chee tu benne' Roma

(Mt. 8.5-13)

¹ Gate bexuzre bchálajle Jesús benne' ca', na' bezé'e zexíaje' Capernaum. ² Zua tu benne' Roma na', benne' dxenná be'e lu wedil-la, na' zua tu bi wen zrin chee' nazrí'ile'ene'-be', na' bi na' quebe chawe' zúabe', ne dxaca wátebe'. ³ Gate ben benne' Roma na' ca da dxun Jesús, na' gusél-le' bal-la benne' gula sina chee judío ca', chee xeajleguezre' Jesús xide' xexuné' bi wen zrin chee'. ⁴ Benne' gula ca' belezrine' lau Jesús, na' gulezú lawe' dxelata' xuene' Le', dxelenné':

—Benne' Roma nigá naca chee' gácalenu' le', ⁵ lawe' da dxape' ba lá'ana xezre cheedxu, na' léqueze' bene' tu xu'u cheedxu ga dxezrágadxu.

⁶ Nadxa Jesús guxíajlene' benne' gula ca'. Gate belezrine' gagu naga zua lizre benne' Roma na', le' gusél-le' bal-la benne' ljwezre' xeajleguezre' Jesús: —Xran, quebe senu' gunne xue, lawe' da quebe naca chia' chu'u lizra'.

⁷ Chee le na' ne quebe bexazrda' néda'queza' xedajdilja' Lue'. Cun gunnaze, na' xexaca bi wen zrin chia'. ⁸ Néda'queza' zua benne' dxenná bé'ene' neda', na' neda' dxenná be'eda' benne' dxjaca wedil-la. Che xapa' tu bènnea': Guxíaj, na' waxíajbe', ne che xapa' xetube': Gudá, na' wídate', ne che nna be'eda' bi wen zrin chia' da gunbe', na' gunbe' na.

⁹ Gate ben Jesús da nigá, na' bebánene', na' gunné'e benne' ca' zjácale Le', gunné':

—Da li, quebe ne cheajxraca' tu benne' xezre Israel dxeajlí lazre' neda' ca dxun benne' nigá.

¹⁰ Gate belexezrín benne' ljwezre benne' Roma na' lizre', na' belelé'eng' ba bexaca bi wɛn zrin na'.

Jesús dxusebane' bi biu chee tu nu'ula ba gute benne' chie'

¹¹ Ca gudé na' Jesús guzré'e zéaje' tu xezre da nazí le na Naín, na' xjácale Le' benne' ca' dxusédeng', ne benne' zante. ¹² Gate bzrine' gáguze naga zua xezre na', blé'eng' benne' zaj nu'e tu bi gate zeajlecache'-be', na' naca be' bi tulicha' chee xrnabe', nu'ula na' ba gute benne' chie'. Benne' zan, benne' lazrie' zjácaleng' le'. ¹³ Gate Xránadxu blé'eng' nu'ula na', na' bexache lazre' le', ne guzre' le':

—Québedxa cuezru'.

¹⁴ Nadxa gubiga Jesús dxu'a xi'ina xu'ube', na' bte' na. Na' benne' ca' zeajlexexu'e-be' gulague'. Na' Jesús guzre' bi gate na':

—Bidau', dxapa' lue', guxasa.

¹⁵ Na' bi na' ba nate bexásabe' gudxe'be', na' bezú laube' dxuchálajbe'. Na' Jesús bunézuje'-be' lu na' xrnabe'. ¹⁶ Gate belelé'e benne' ca' da nigá, na' belezrebe', ne gulezú lawe' dxelúe lá'ang' Dios, dxelenné':

—Tu benne' zrenté, benne' dxenné' waláz chee Dios, ba ble'e ládujla dxi'u.

Cá'anqueze dxelenné':

—Dios ba ble'e dxácaleng' xezr chee'.

¹⁷ Ca naca naga nababa Judea, ne xezre walíxr chee na belén bénneache ca naca xel-la waca chee Jesús.

Juan, bénnea' bchue' bénneache nisa dxesel-le' gubáz chee' lau Jesús (Mt. 11.2-19)

¹⁸ Naga xu'u Juan lizre xia, benéne' ca naca chee da nigá lawe' da benne' ca' zjácaleng' Juan buluzenne' le' da dxaca na. Juan gunné' chupa benne' ca', ¹⁹ na' gusel-le' le' lau Jesús chee cheajlechebe' Le' che da li naque' Cristo, bénnea' dxal-la' xide', u che dxal-la' xelebeze' benne' xula. ²⁰ Nadxa benne' ca' gusel-la Juan belezrine' lau Jesús, na' gulé'e Le':

—Juan, bénnea' bchue' bénneache nisa nasel-le' netu' zedajchébentu' Lue' che Lue' na' nacu' Cristo, bénnea' dxal-la' xide', u che dxal-la' cuézantu' benne' xula.

²¹ Ca lu zra na' Jesús bexuné' benne' zante benne' we', ne benne' dxé'eng' xízrawe' da dxedá du zren, ne benne' ca' zaj xu'e be' xriwe', na' bexuné' benne' la chul-la ca'. ²² Nadxa Jesús guzre' benne' ca' nasel-la Juan:

—Le cheajxaca, ne le xe Juan ca naca da ba ble'ele, ne da bénele. Benne' la chul-la ca' dxelxelé'eng', na' benne' zrinna' ca' dxelxedé', na' benne' dxelédxé'eng' we' guzru' ba belexaque', na' benne' xache' ca' dxelenne' dizra' chawe' chee Dios. ²³ Ba neza zren naca na chee benne' quebe gusán lazre' neda'.

²⁴ Gate besí'aca benne' ca' gusel-la Juan, na' Jesús guzú lawe' dxuchálajleng' benne' zaj zré'e na' ca naca chee Juan na', dxenné':

—¿Bizra guxiajle le'e xeajna'le le'e xixre' lawe' lataj? ¿Tu xia xtíla da dxutá be'? ²⁵ Che cabí, ¿bizra xeajna'le? ¿Tu benne' nacu zra lané' da zácálé'e? Ba nézquezle le'e benne' ca' dxelacu zra lané' da zácálé'e, ne dxelé'aj dxelawe' da zácálé'e zaj zré'e lizre benne' blau ca'. ²⁶ Che cabí, ¿bizra xeajna'le? ¿Tu benne' dxuchálajé' waláz chee Dios? Awe', ble'ele tu benne' nácadxé' szren ca

tu benne' dxuchálajé' waláz chee Dios. ²⁷ Juan nigá naque' bénnea' naxúaj na chee' lu xiche chee Dios, dxenné': Dxesel-la' gubáz chia' lau Lue', chee' gucá'ana chawe' neza naga teu'.

²⁸ Dxapa' le'e, ládujla xúgute benne' quebe nu chilá' benne' dxuchálaje' waláz chee Dios nácadxe' szren ca Juan nigá. Na'a benne' nácadxe' dxexruj lazre' naga dxenná bea Dios nácadxe' blau ca Juan nigá.

²⁹ Na' gunná Jesús:

—Gate na' benne' dxexruj lazre' ca', ne benne' wechizruj ca' belenne' da dxuchalaj Juan, guleque bé'engé' Dios naque' xrlátaje, na' beledxúe' nisa lu na' Juan. ³⁰ Benne' xudau' fariseo ca', ne benne' ca' dxuluxuzájle'e da nadxixruj bea na buluzúe' chalá'ala ca naca da dxaca lazre' Dios guné' chee', na' quebe beledxúe' nisa lu na' Juan.

³¹ Na' gunná Xránadxu:

—¿Ájazra gutil-la lébeda' benne' zaj zre'e na'a zra? ¿ájazra zaj naque'? ³² Zaj naque' ca bidu ca' dxelebe'be' dxelítajbe' lawe' xi'a, ne dxelebezre xa'abe', dxelebe' bidu ljwézrebe': “Bcuézrentu' bchiuj da bénele, san quebe bxá'ale. Billa xácentu', san quebe gudxézrele.” ³³ Caní zaj naca benne' ca' lawe' da bla' Juan, bénnea' bchue' bénneache nisa, ne quebe gudawe' xeta, ne quebe gu'e xrise uva wal-la, na' gulenné' xu'e be' xriwe'. ³⁴ Nadxa bla'a neda', Benne' Gulje' Bénneache, dxe'aj dxawa', na' dxeleenné' naca' wagu xrata, ne benne' dxé'ajle'e, ne dxeleenné' naca' ljwezre benne' dul-la ca', ne benne' wechizruj ca'. ³⁵ Xel-la sina chee Dios naca bea na ne chee da dxelún benne' ca' zaj nape' xel-la sina chee Dios.

Da bchalaj Jesús lizre Simón, benne' xudau' fariseo

³⁶ Tu benne' xudau' fariseo gunné' Jesús cheajtawe' xeta lizre', na' Jesús guxiáje' lizre bénnea', na' gudxé'e dxawe'. ³⁷ Nadxa tu nu'ula dul-la chee xezre na', gate benne' bzrin Jesús dxawe' xeta lizre benne' fariseo na', na' bzrin nu'ula na' ga na', nu'e tu da' naca na xiaj zaca, da nazráté na da dxelá zixre. ³⁸ Gate bzrin nu'ula na' naga zua Jesús, na' gudxé'e zran ni'e dxebezre', ne guzú lawe' dxibe' ni'a Jesús nen nisa dxebezre', ne bsebize' ni'e nen xicha xíchajé', ne bnupe' ni'a Jesús, na' gulu'e na da dxelá zixre na'. ³⁹ Na' benne' xudau' fariseo, bénnea' gunné' Jesús lizre', gate blé'engé' da nigá, gunné' lu lázrdawe': “Chela benne' nigá da li naque' benne' dxuchálaje' waláz chee Dios, guéquebe'equeze' aja naca chee nu'ula nigá dxuté' ni'e, lawe' da naque' nu'ula dul-la.” ⁴⁰ Nadxa Jesús guzre' benne' fariseo na':

—Simón, de tu da guchálajlena' lue'.

Na' bechebe benne' fariseo na':

—Gunná, Benne' Wesede.

⁴¹ Jesús gunné':

—Chupa benne' dxelal-le' dumí chee tu benne' tu dxusántezqueze' benne' dumí. Tu'e dxal-le' chee' lazruj chee chupiza, na' xetúe' dxebague' lazruj chee chupa beu'. ⁴² Lawe' da quebe dxelezéquene' xellexízruje' chee' bénnea', na' le' bnite lawe' chee dxúpaté benne' ca' ca naca da dxelebage' chee'. Na'a gunná, ¿nula benne' caní zrí'idxene' bénnea'?

⁴³ Simón bechebe':

—Dxéqueda' bénnea' bnite lawe' chee' da zrendxa.

Na' Jesús guzre' le':

—Da li dxennáu'.

⁴⁴ Nadxa Jesús gunné'e nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu gunná be'enu' quibe ni'a, san nu'ula nigá gudibe' ni'a nen nisa dxebezre', ne bsebizre' na nen xicha xíchaje'. ⁴⁵ Quebe bnupu' neda', san nu'ula nigá, gate guxú'utea', quebe dxusane' dxunúpequeze' ni'a. ⁴⁶ Quebe gulú'u da za xíchaja', san nu'ula nigá gulu'e ni'a da dxelále'e zixre. ⁴⁷ Chee le' na' dxapa' lue', lawe' da nazrí'ile'ene' neda', da nigá naca bea na ba bnite lawa' chee' ca naca dul-la zan chee', san bénnea' naca bábaze dul-la chee' da bnite lawa', láteze zrí'ing' neda'.

⁴⁸ Nadxa Jesús guzre' nu'ula':

—Dul-la chiu' ba bnite lawa'.

⁴⁹ Na' benne' ca' zaj zře'e nen Le', ne zaj dxe'e na' gulezú lawe' dxeleñe' lu lázrdawe': “¿Nuzra benne' nigá, dxunite láuqueze' dul-la?”

⁵⁰ Jesús guzre' nu'ula na':

—Ba naláu' lawe' da guxéajle'u chia'. Bexíaj duté xel-la dxebeza zri lazre'.

8

Nu'ula ca' belún zrin chee Jesús

¹ Ca gude' da nigá, gudá Jesús zane' xezre, ne xezredu ca', dxusédené', ne dxuchálaje' ca dxenná bea Dios. Benne' chazrinnu gubáz ca' zjácalene' Le'. ² Cá'anqueze zjácale' Le' bal-la nu'ula ca', benne' ca' bexunge' le' ca naca xízrawe' chee', ne bebéaje' be' xriwe' ca' da zaj xu'e. Ládujla nu'ula ca' ziaj María Magdalena, nu'ula na' belexedxúaj gazre be' xriwe' lu xichaj lázrdawe'. ³ Ládujla le' zíajqueze Juana, zru'ula Chuza, benne' na' xu'u lu ne'e da napa Herodes. Cá'anqueze ládujla le' ziaj Susana, na' zjaca nu'ula zandxa na', nu'ula ca' dxelácalene' Jesús nen da zaj nape'.

Da dxulé'e na ca naca chee benne' dxaze' zrua' xtila

(Mt. 13.1-9; Mr. 4.1-9)

⁴ Benne' zan beledxúaje' lu xezre ca' chee xelelé'ene' Jesús, na' gate belezraga benne' zan naga zue', na' bchálaje' tu da dxulé'e na, dxé'e le':

⁵ —Tu benne' dxaze' guzé'e zjaze' zrua' xtila. Ca zéaje' dxaze' na, bal-la bínne'du ca' xeajlechaze na dxu'a neza, na' benne' ca' bululéaje' na, na' belezrín bxínnedau' guláguba' na. ⁶ Xebal-la bínne'du ca' xeajlechaze na lu xiaj ca', na' gate bínne'du caní belezría na, chadite' gulebizre na, lawe' da quebe gudxé' gupa'. ⁷ Xebal-la bínne'du ca' xeajlechaze na naga zaj dxe' lue xeché', na' bululule xeché' ca' le' na. ⁸ Xebal-la bínne'du ca' xeajlechaze na lu xu bebe, na' gate belegula na, na' gulezríale'e na. Bal-la na gulezría na tu gaxúa weaj.

Gate bexuzre bchalaj Jesús da nigá, na' gunné' zizraj:

—¡Che le'e zua nágale, le xene!

Jesús dxenné' bizr chee na' dxuchálaje' da dxululé'e na

(Mt. 13.10-17; Mr. 4.10-12)

⁹ Nadxa benne' ca' dxuse'de Jesús gulenábene' Le' bizra zéaje' da dxulé'e nigá.

¹⁰ Jesús guzre' le':

—Dios dxuzéajni'ine' le'e ca naca da nagache chee xel-la dxenná bea chee', san benne' xula, dxuchálajlena' le' da dxulé'e na caní, chee gate dxelelé'ene' xelaque' ca benne' quebe dxelelé'ene', ne gate dxelenne' quebe dxeléajni'ine'.

Jesús dxuxuzájle'e da dxulé'e na ca naca chee bénnea' dxaze'

(Mt. 13.18-23; Mr. 4.13-20)

11 Na' gunná Jesús:

—Da nigá naca ca zéaje da dxulé'e na': Binnedu ca' zéaje na xrtizra' Dios. 12 Binnedu ca' xeajlechaze na dxu'a neza zéaje na benne' ca' dxelenne' xrtizra' Dios, san za' da xriwe', na' dxegúa na dizra' na' lu xichaj lázrdau benne' ca', chee quebe xeléajle'e, ne quebe xelélé'. 13 Binnedu ca' xeajlechaze na lu xiaj ca' zéaje na benne' ca' dxelenne' dizra' na', ne dxelezi'e na duté xel-la dxelebé, san quebe dxaze na lu xichaj lázrdawe'. Dxeléajle'e tu chí'idau'ze, na' gate dxeledé'e lu da zi' da xa', na' dxulusán lazre' na. 14 Binnedu ca' xeajlechaze na naga zaj dxe' lue xeche' zéaje na benne' ca' dxelenne' dizra' na', na' dxeajxaque', na' lawe' da dxelezené' gunne xue da zante, ne dxelezé lazre' xel-la gunní'a, ne da xele'aj xelawe' da zácále'e, na' xúguté da caní dxulusunite na dizra' na', na' quebe dxun na zrin lu xichaj lázrdawe'. 15 Na' binnedu ca' xeajlechaze na lu xu bebe zéaje na benne' ca' zua chawe', ne du lazre' lázrdawe', na' gate dxelenne' dizra' na', dxuluzúa chache' na, na' dxun zrin dizra' na' lu xichaj lázrdawe'.

Da dxulé'e na ca naca chee tu da dxegú'u lení
(Mr. 4.21-25)

16 Gunná Jesús:

—Netú benne' che gugale' da dxegú'u lení', quebe gudúsi'e na tu xi'ina, u zranle ga dxasi'e, san guzú'e na sibe, chee cu'u lení' na chee benne' zaj zre'e lu xu'u na'. 17 Quebe bi de da nagache' da quebe gulé'e lau na, ne quebe bi xu'u lu xichaj lázrdau bènneache da quebe gaca bea na, ne lá'tequeze na.

18 'Chee le na', le xene xanne'. Tu benne' nazi'e xrtizra' Dios, wazidxe', san benne' quebe dxezi'e na, wegá'a ca da du dxéquene' nape'.

Dxeleznín lau Jesús xrne'e, ne benne' biche' ca'
(Mt. 12.46-50; Mr. 3.31-35)

19 Nadxa xrna Jesús, ne benne' biche' ca' belezrine' naga zue', san quebe gulezéquene' xelezrine' lau Le', lawe' da zrále'e benne' zan ga na'. 20 Tu benne' na' bzenne' Jesús, gunné':

—Xrna'u, ne bi bichu' ca' zaj zre'e chale'aj nigá, dxelaca lazre' xuluchálajlene' Lue'.

21 Jesús guzre' le':

—Benne' ca' dxelenne' xrtizra' Dios, ne dxelune' ca dxenná na, benne' caní zaj naque' ca xrna'a, ne benne' bícha'dau' ca'.

Jesús dxuzúa zrie' be' bdunu', ne xeajxrza chee nísadau'
(Mt. 8.23-27; Mr. 4.35-41)

22 Tu zra guxú'u Jesús tu lu da dxedá lawe' nísadau' nen benne' ca' dxusédené', na' guzre' le':

—Cheajdxu xecha la'a nísadau'.

Na' gusiá'que', 23 ne dxácaté zjaque' lu nísadau' na', guse Jesús. Na' guzú lau dxácalé'e be' bdunu' lu nísadau', na' guzú lau dxu'u nisa lu da dxedá lawe' nísadau' na', ne ba dxácaté waxaze na lu nísadau'. 24 Nadxa bulusebane' Jesús, dxelé'e Le':

—¡Benne' Wesede! ¡Benne' Wesede! ¡Ba dxázédxu lu nisa nigá!

Nadxa guxasa Jesús, na' gudil-le' be' bdunu' na', ne nisa na', na' ca naca da ca' belezúa zri na. 25 Nadxa Jesús guzre' benne' ca' dxusédené':

—¿Quebe ne chéajlele chee Dios?

Benne' ca' belezrebe', ne belexebánene', na' buluchébe ljwezre':

—¿Núzraqueze benne' nigá, dxenná bé'eng' be', ne nisa, na' dxuluzúa na dizra' chee'?

Tu benne' Gadara xu'e be' xriwe'
(Mt. 8.28-34; Mr. 5.1-20)

²⁶ Nadxa belezrine' xecha la'a nisa lu xezr la xu chee xezre Gadara, chalá'a ca'ala chee Galilea. ²⁷ Gate bedxúaj Jesús lu da dxedá lawe' nísadau' na', na' bzin tu benne' xezre na' lau Le'. Zánete iza ba guca xu'u be' xriwe' ca' benne' nigá. Quebe gúcué' zra lané', ne quebe guzúé' netú lu xu'u, san xeajchu'e tu lu ba ca'. ²⁸ Gate blé'eng' Jesús, na' xeajzú zribe' lau Le', na' gudxezre x'e, dxenné':

—¿Bizr chee na' za'u naga zua', Jesús, Zri'ine Dios szrente? Dxata' xueda' Lue' quebe gusaca zi'u neda'.

²⁹ Gunná na caní lawe' da ba gunná be'e Jesús be' xriwe' ca' xelexedxúaj na lu xichaj lázrdau benne' nigá. Zane' lasa be' xriwe' ca' ba gulela na benne' nigá. Benne' xezre na' gulele' benne' nigá, ne buluchéajé' le' ni'a ne'e nen du xia, san le' bzúxujé' du xia na', na' be' xriwe' ca' guleché na le' le'e xixre' lawe' lataj. ³⁰ Jesús bchebe' be' xriwe' ca':

—¿Bi lele?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zante benne' na'. ³¹ Be' xriwe' ca' gulenaba na Jesús quebe sel-le' na lataj chul-la. ³² Lu xi'a naga zua Jesús, na' zrálé'e cuche zan dxeláguba', na' be' xriwe' ca' gulata' xue na Jesús gu'e lataj da ca' cheajxezra na lu cuche ca', na' bnezruj Jesús na lataj. ³³ Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúguté cuche ca' buluzrúnmuja', ne gulebíxreba' dxu'a chjéa, na' xeajlecházeba' lu nísadau', naga gulépeba', guláteba'.

³⁴ Benne' ca' dxuluxúé' cuche ca', gate belelé'eng' ca da guca, na' buluzrúnmuje' lu xel-la dxelezrebe, na' gulé'e benne' zaj zre'e le'e xixre', ne benne' zaj zre'e lawe' xezre ca da guca. ³⁵ Nadxa benne' ca' beledxúaje' xeajlenné'e ca da guca. Gate belezrine' naga zua Jesús, na' belelé'eng' bénnea' belexedxúaj be' xriwe' ca' lu xichaj lázrdawé', dxe'e zran ni'a Jesús, ba nácué' ladxe', ne ba bezúa chawe' xichaj lázrdawé', na' benne' ca' belezrebe'. ³⁶ Na' benne' belelé'e ca da guca buluchálajléné' benne' xula ca' ca guca gate bexaca bénnea' guxú'e be' xriwe' ca'. ³⁷ Gate belenne' caní, ca naca benne' zaj zre'e lu xezr la xu chee xezre Gadara gulezú lawe' dxelata' xúene' Jesús xezé'e lazrie', lawe' da dxelezrébele'e. Ca'an guca, guxú'u Jesús lu da dxedá lawe' nísadau', chee xezé'e xéaje'. ³⁸ Bénnea' belexedxúaj be' xriwe' ca' lu xichaj lázrdawé' gunabe' lau Jesús gunézruje' lataj chéajléné' Le', san Jesús busebague' le' xegá'ane' lázrie', na' guzre' le':

³⁹ —Bexiaj lizru', na' bchalaj chee xúguté ca da ba ben Dios chiu'.

Na' benne' na' bezé'e zexíaje', na' bchálajléné' benne' xezre ca' ca da ben Jesús chee le'.

Jesús dxexune' bí nu'ula chee Jairo, ne tu nu'ula xeajté' zra lane'
(Mt. 9.18-26; Mr. 5.21-43)

⁴⁰ Gate bezrín Jesús xecha la'a dxu'a nísadau', benne' ca' zaj zre'e na' gulezú lu ne'e Le' nen duté xel-la dxelebé, lawe' da xúguté dxelebezé' Le'. ⁴¹ Nadxa bzin tu benne' le' Jairo, benne' blau chee xu'u naga dxelezraga judío ca', na' bzu zribe' lau Jesús, ne guta' xúene' Le' chéaje' lizre', ⁴² lawe' da zua tuze bi

nu'ula cheg'. Xu'ube' chazrinnu iza, na' ba dxaca wátebe'. Gate guzá' Jesús zéajé', benne' zanté zjácáleñe' Le', ne buluchídeté ljwezre'.

⁴³Ládujla benne' ca' zeaj tu nu'ula quebe chawe' zue', na' chazrinnu iza ba zeaj dxé'ene' wé' dxen da dxaca cheg nu'ula ca'. Ba gudízruje' benne' dxelexún bènneache ca' xúgute' ca da gudape', na' quebe bi gulezéqueñe' xelune' cheg xexaca nu'ula na'. ⁴⁴Nu'ula na' gubigue' cúzrula Jesús, na' xeajté' zran ni'a zre', na' la ná'queze bexágate' dxen da dxaca nu'ula na'.

⁴⁵Nadxa Jesús bchebe':

—¿Nuzra bta neda'?

Xúgute' gulenné': "Quebe nu ne gutá Lue'", na' Pedro, ne benne' ljwezre' ca' gulenné':

—Benne' Wesede, benne' caní dxuluchídee' Lue', ne dxuluzrigue' Lue', na' dxuchébequezu', dxennáu': "¿Nuzra bta neda'?"

⁴⁶Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

⁴⁷Gate gúquebe'e nu'ula na' ba neze Jesús da guca, nadxa gudéé' dxezrízeté', na' bzu zribé' lau Jesús, ne guxrúalepe' lau xúgute' benne' ca' bizr chee' na' bte' Jesús, ne ca guca bexácate'. ⁴⁸Nadxa gunná Jesús, guzre' nu'ula na':

—Zrí'ina'dau', ba bexacu' lawe' da guxéajle' u chia'. Bexíaj na'a, dute' xel-la dxebeza zri lazre'.

⁴⁹Ne dxuchálajte Jesús, bzrin tu benne' naga ze Jesús, benne' guzé'le lizre Jairo, benne' blau chee' xu'u ga na' dxelezraga judío ca', na' guzre' Jairo:

—Ba gute bi nu'ula chiu'. Québedxa guzúa xuzru' Benne' Wesede nigá.

⁵⁰Gate ben Jesús ca gunné', na' guzre' Jairo:

—Quebe zrebu'. Con guxeajle. Bi nu'ula chiu' na' xexácabe'.

⁵¹Gate bzrin Jesús xu'u na', netú quebe be' lataj chú'ule' Le', san tuze Pedro, ne Jacobo, ne Juan, ne xra xrna bi nu'ula na'. ⁵²Xúgute' benne' zaj zre'e na' dxelebezre', ne dxelebezre xache' chee' bi nu'ula na'. Jesús gunné':

—Quebe cuézrele. Bi nú'uladu nigá quebe nátebe'. Dxásezebe' na'.

⁵³Na' benne' ca' buluzrizre' cheg', lawe' da zaj nézquezne' ba gútebe'.

⁵⁴Nadxa Jesús guqué'e na' bi na', na' gunné' zizraj:

—¡Bi nu'ula, bexasa!

⁵⁵Na' bebanbe', ne bexásatebe'. Na' Jesús busebague' le' xulunézruje' da gágube'. ⁵⁶Xra xrnabe' belexebánele'ene'. Jesús busebague' le' quebe nu xel'ée ca da guca.

9

Jesús dxesel-le' benne' chazrinnu ca' xelune' xrchine' (Mt. 10.5-15; Mr. 6.7-13)

¹Jesús bchague' benne' chazrinnu ca' dxusédene', na' bnézruje' le' xel-la waca, ne xel-la dxenná bea chee' xelxebéaje' xúgute' cue' be' xriwé' ca' da zaj xu'u bènneache, ne chee' xellexexune' benne' ca' zaj xu'e xízrawé'. ²Na' gusel-le' le' chee' xuluzenne' bènneache ca dxenná bea Dios, ne chee' xellexexune' benne' zaj xu'e xízrawé' ca'. ³Na' guzre' le':

—Quebe bi gúale chee' la neza. Quebe gúale xaga da guchíchele, na' xixruj chee'le, ne da gágule, ne dumí. Le gua' tu cue'ze zra lánale. ⁴Gáteteze xu'u naga chú'ule, le xegá'ana na' cadxa zrin zra xeza'ale lu xezre na'. ⁵Naga quebe

xelezí'e dizra' guchálajle le', le xedxúaj xezre na', ne le cuibe bxrte xu da da ní'ale, da gul'é e na zaj nabague' zria lau Dios.

⁶ Nadxa beledxúaje', na' ca naca xézredu ca' xeajlechalaje' dizra' chawe' chee Dios, ne belexxune' benne' zaj xu'e xízrawe' ca'.

Ca guca gate gute Juan, benne' bchue' bèneache nisa

(Mt. 14.1-12; Mr. 6.14-29)

⁷ Herodes, benne' dxenná be'ene' xezr la xu na', benne' ca naca xúgute da dxun Jesús, na' guzúe' stebe lawe' da dxelenná bal-la benne' ba bebán Juan ládujla benne' gate. ⁸ Xebal-le' dxelenné' Elías, bènea' bchálaje' waláz chee Dios ba bele'e, na' xebal-le' dxelenné' ba bebán tu benne' ca' buluchálaje' waláz chee Dios ca ni'te. ⁹ Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zante dxenda' dxune'?

Nadxa Herodes beñe' ba xuzre lé'ene' Jesús.

Jesús dxugawe' chi xun gaxúa benne'

(Mt. 14.13-21; Mr. 6.30-44; Jn. 6.1-14)

¹⁰ Gate belexezrín benne' gubáz ca' chee Jesús lau Le', na' gul'é e Le' ca da ba belune'. Na' Jesús beche'e benne' ca', na' besía'que' zeajxaque' tu lataj da nagá'ana zitu' naga zaj dxe' xezre ca', naga zua lu xezr la xu chee xezre Betsaida. ¹¹ Gate benne' xezre na' belenne' zua Jesús na', na' gusiá'que' zjaque' naga zua Le'. Na' Jesús guzú' lu ne'e benne' ca', ne bchálajlene' le' ca dxenná bea Dios, ne hexune' benne' zaj xu'e xízrawe' ca'.

¹² Gate guzú lau zeaj dxezré', na' gulebiga benne' chazrinnu gubáz ca' chee Jesús lau Le', na' gul'é e Le':

—Bze benne' caní dizra' chee chjaque' naga xelasié', ne xelíaje' da xelawe' xézredu ca' zaj nnita gagu, lawe' da ga zúadxu nigá quebe bi de.

¹³ Jesús guzre' le':

—Le gunezruj le'e da xelawe'.

Nadxa benne' ca' bele'e Jesús:

—Quebe dedxa cheentu' ca gáxzuga xeta xtíladau', ne chúpaga bela, u ¿wacheaxríquezentu' da xelagu catite benne' zan caní?

¹⁴ Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédene':

—Le xe benne' ca' xebe'é e chi xun weaje' tu cue' tu cue'.

¹⁵ Ca'an belune', na' gulebe'e xúgute'. ¹⁶ Nadxa Jesús guqué'e da gazxu' xeta xtila ca', ne chupa bela ca'. Na' guchisa lawe' xabaala, ne guzre' Dios "Xcalenu'", na' ca bexuzre bzúzruje' na, na' bnézruje' na benne' ca' dxusédene' chee xelisié' na chee benne' zan ca'. ¹⁷ Xúgute' gulawe', ne belélaje'. Ca gudé na' bulusuzré'e chazrinnu ga' da bízrujdu ca' belexegá'ana na.

Pedro dxenné' Jesús naque' Cristo

(Mt. 16.13-19; Mr. 8.27-29)

¹⁸ Tu zra gate zua Jesús dxuchálajlene' Dios naga quebe zaj zra benne' zan ca', na' zrale benne' ca' dxusédene' Le', na' Le' bchebe' benne' ca':

—¿Nuzra dxelenná benne' naca' neda'?

¹⁹ Le' belexechebe':

—Bal-le' dxelenné' nacu' Juan, bènea' bchue' bèneache nisa, na' xebal-le' dxelenné' nacu' Elías, bènea' bchálaje' waláz chee Dios, na' xebal-le' dxelenné' nacu' tu benne' ca' buluchálaje' waláz chee Dios ca ni'ite, na' bebane'.

²⁰ Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo chee Dios.

Jesús dxuzenne' benne' ca' ca gaca gate gatie'

(Mt. 16.20-28; Mr. 8.30—9.1)

²¹ Jesús bsebague' benne' ca' quebe nu xel'é'e ca'. ²² Na' guzre' le':

—Neda', Benne' Gulje' Bénneache, dxal-la' télé'a xel-la zi', na' benne' gula sina ca', ne benne' xíchajé ca' chee bxruze, ne benne' ca' dxuluxuzájle'e da nadxixruj bea na xuluzúe' neda' ch'alá'ala. Xelúti'e neda', san gate gaca chunna zra, na' xebana'.

²³ Ca gudé na' guzre' ca naca benne' zaj zre'e na':

—Che nu benne' dxaca lazre' gaque' neda' tuze, dxal-la' guzúe' ch'alá'ala xúgute' da naca chee', na' guné' neda' tuze xúgute' zra, lácala gate benne' na'.

²⁴ Benne' dxaca lazre' gapa chí'e xel-la nabán chee', guniti'e na, san benne' guniti'e xel-la nabán chee' lawe' da naque' chia', wazrué'eng' na. ²⁵ ¿Bizra da ba neza gaca na chee tu benne' che gape' ca naca da de lu xezr la xu nigá, san cuía xi' léqueze'? ²⁶ Che nu benne' xedué'eng' chia' neda', ne chee dzira' chia', cá'aqueze neda', Benne' Gulje' Bénneache, wedué'eda' chee bénnea' gate za'a neda' chee nna be'a nen xel-la szren chee Xra', ne chee gubáz lá'azxa chee xabáa ca'. ²⁷ Da li dxapa' le'e, bál-lale zrale nigá quebe gátele nédxudxa ca lé'ele zra nna bea Dios.

Gate bcha lu'a lesaca Jesús

(Mt. 17.1-8; Mr. 9.2-8)

²⁸ Ca guzre xi' gudé gunná Jesús da nigá, na' guluéne' tu lu xi'a chee guchálajlene' Dios, na' xjácále Pedro, ne Jacobo, ne Juan Le'. ²⁹ Dxácaté dxuchálajlene' Dios, na' bcha lu'a lesaca Jesús, na' zra lané' bexaca na da chiche, ne guca tite na. ³⁰ Nadxa bululé'e lau chupa benne' dxuluchálajlene' Jesús. Zaj naque' Moisés ne Elías. ³¹ Naga ze'le Jesús benne' ca' gúcatite' legala, na' dxuluchálajlene' Jesús ca gaca gate gatie' Le' xezre Jerusalén. ³² Gulácalé'e welase Pedro ne benne' ljwezre' ca', san bulusebán lazre', na' belelé'eng' ca naca xel-la szren chee Jesús, ne chupa benne' ca' zaj zé'lene' Jesús. ³³ Gate benne' ca' belexesiá'que' naga ze' Jesús, na' Pedro gunné':

—Benne' Wesede, néquega zúadxu nigá. Benna netu' lataj guntu' chunna xu'u lága'dau', tu chiu', ne tu chee Moisés, ne tu chee Elías.

Pedro quebe dxéquebe'eng' ca da dxenné'. ³⁴ Dxácaté dxenná Pedro caní, na' bla' tu beuj da gucu na naga zaj zre'e, na' belezrebe Pedro, ne benne' ljwezre' ca' gate gulezré'e lu beuj na'. ³⁵ Na' belenne' chí'i nu dxuchalaj lu beuj na', gunná:

—Bi nigá naque' Zri'ina', nazrí'ite' lazra'. Le xen da dxuchálajbe'.

³⁶ Ca gudé belenne' chí'i na', na' belelé'eng' Jesús ba ze' tuze'. Na' benne' caní gulezúe' zrize, na' quebe nu gulé'e ca da belelé'eng'.

Jesús dxexune' tu bi biu xu'ube' be' xriwe'

(Mt. 17.14-21; Mr. 9.14-29)

³⁷ Gute xu, gate belexexétaje' lu xi'a na', na' benne' zan zjaque' zeajlexrígalé' Jesús. ³⁸ Nadxa tu benne' ca' gunné' zizraj, guzre' Jesús:

—Benne' Wesede, dxata' xueda' Lue' dajxú' bi biu chia' lawe' da tu lícha'te bi chia' naca, ³⁹ na' tu be' xriwe' dxaze na lebe', ne dxucuezre xa'a na lebe', ne dxudxixe dxutula na lebe', na' dxebía bzrina' dxú'abe'. Dxusaca zi na

lebe', ne quebe dxaca lazre' na gusán na lebe'. ⁴⁰ Ba guta' xueda' benne' ca' dxusédenu' chee' xelexebéajé' na, san quebe gulezéquene'.

⁴¹ Jesús bechebe':

—Le'e, benne' wen chupa lazre', ne wen da calela. ¿Ájaté dxal-la' súalena' le'e? ¿Ájaté dxal-la' guchaga lawa' nen le'e? Xeajxri' zri'inu' na' nigá.

⁴² Gate bi cuide' na' ba zéajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudil-le' be' xriwe' na', ne bexuné' bi cuide' na', na' bdeé'-be' lu na' xrabe'. ⁴³ Xúguté benne' ca' belexebánene' ca naca xel-la szren chee' Dios.

Jesús dxuzenne' benne' ca' xecha lasa ca gaca gate gatié'

(Mt. 17.22-23; Mr. 9.30-32)

Dxácate' na' xúguté benne' ca' dxelexebánene' ca da dxun Jesús, Le' guzre' benne' ca' dxusédene':

⁴⁴ —Le xen xanne' da nigá, ne quebe gal-la lázrele na. Neda', Benne' Gulje' Bénneache, wuludé' neda' lu na' bénneache.

⁴⁵ Benne' ca' dxusédene' quebe guléajni'ine' ca da dxenná Jesús lawe' da quebe ne gunézruj Dios lataj xeléajni'ine', na' belezrebe' xelenabe' Jesús guzéajni'ine' le' ca da na' gunné'.

¿Nuzra naca blau?

(Mt. 18.1-5; Mr. 9.33-37)

⁴⁶ Nadxa benne' ca' dxuséde Jesús gulezú lawe' dxuluchebe ljwezre' núzraqueze naca blau ládujla le'. ⁴⁷ Jesús gúquebe'ene' ca da dxelenné'. Nadxa guqué'e tu bi biúdau', ne bze'-be' cuité', ⁴⁸ na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze' ba lá'ana Dios, Bénnea' nasel-le' neda'. Cá'anqueze bénnea' nácaxé' benne' dxexruj lazre' ládujla le'e, benne' nigá naque' benne' blau.

Benne' quebe dxedábage' dxi'u zue' gácalene' dxi'u

(Mr. 9.38-40)

⁴⁹ Nadxa Juan guzre' Jesús:

—Benne' Weséde, blé'entu' tu benne' dxuchínene' Lau', dxebéaje' be' xriwe' ca' lu xichaj lázrdau benne' ca', na' gúzrentu' le' quebe guné' ca' lawe' da quebe naque' dxi'u tuze.

⁵⁰ Jesús guzre' le':

—Quebe guzágale ca da dxuné' lawe' da benne' quebe dxedábage' dxi'u zue' gácalene' dxi'u.

Jesús dxedil-le' Jacobo ne Juan

⁵¹ Gate ba za zrin zra dxal-la' xexíaj Jesús xabáa, ben zi' lazre' chéaje' Jerusalén. ⁵² Na' gusél-le' gubáz chee' ca' xelebia lawe', na' benne' ca' xjaque' tu xézredau' nababa Samaria chee' cheajlecuéze' naga sua Jesús. ⁵³ Benne' Samaria ca' quebe gulaca lazre' xegá'ana Jesús na', lawe' da guleque bé'ene' zéaje' Jerusalén. ⁵⁴ Gate Jacobo ne Juan, benne' ca' dxuséde Jesús, belelé'ene' da nigá, na' gulé'e Jesús:

—Xran, ¿dxaca lazru' nna béantu' xetaj xi' da za xabáa chee' guzríia xi na benne' caní, ca ben Elías, bénnea' bchálaje' waláz chee' Dios?

⁵⁵ Nadxa Jesús guné'e le', ne gudil-le' le', dxenné':

—Le'e quebe nézele nu be' zúale le'e. ⁵⁶ Caní naca lawe' da bla' neda', Benne' Gulje' Bénneache, quegá chee guzría xi'a xel-la nabán chee bénneache, san chee gucache chawa' le' na.

Nadxa xjaque' xetú xézredau'.

Benne' dxelaca lazre' chjácalene' Jesús

(Mt. 8.19-22)

⁵⁷ Ca zjaque' lu neza na', tu benne' biu guzre' Jesús:

—Xran, dxaca lazra' sále'na' Lue' gáteteze chéaju'.

⁵⁸ Jesús bechebe':

—Beza ca' zaj zua bluaj cheeba', na' bxínnedu ca' zaj zria xrú'oneba', san neda', Benne' Gulje' Bénneache, quebe bi de ga xrua xíchaja'.

⁵⁹ Na' Jesús guzre' xetú benne':

—Ben neda' tuze.

Benne' nigá gunné':

—Xran, benna neda' lataj cheajcáchea' xra'.

⁶⁰ Na' Jesús bechebe':

—Be' lataj benne' ca' zaj naque' ca benne' gate xulucache' ljwezre', na' lue', guxíaj, xeajchalaj ca dxenná bea Dios.

⁶¹ Nadxa tu benne' xula guzre' Jesús:

—Xran, dxaca lazra' guna' Lue' tuze, san steca, benna neda' lataj xexá'a cheajzéa' dizra' benne' zaj zra' lizra'.

⁶² Jesús guzre' benne' na':

—Benne' dxugá'ane' bezre, na' nne'e' cúzrule', quebe gaca chee bénnea' gune' zrin chee da dxenná bea Dios.

10

Jesús dxesel-le' benne' gaxún chi ca'

¹ Ca gudé na', Xránadxu guqu'é' xegaxún chi benne' ca', na' gusél-le' chupa weaje' xelebía lawe' lau Le' xúgute xezre, ne xézredu ca' naga dxal-la' chéaje' Le'. ² Guzre' benne' ca':

—Da li dxennéa', lina da zren naca na, na' benne' wen zrin bábase zaj naque'. Chee le' na' le naba lau Xrane zrin na' sel-le' benne' wen zrin ca' xelexequ'é' lina na'. ³ ¡Le chjaca! Le nna'xque, neda' dxesel-la' le'e, gácale ca zríla'du ca' ládujla becu' xi'a ca'. ⁴ Quebe gúale xixruj, ne dumí, ne zréale, ne quebe gagale lá neza nu guchálajlele. ⁵ Gate chu'ule tu lu xu'u, na' gugápale díuzre, nnale: “Xel-la dxebeza zri lazre' gaca chee benne' zaj zre'e' lu xu'u nigá.” ⁶ Che zaj zra' na' benne' dxelebeza zri lazre', na' da gunábale gaca chee benne' ca', san che quebe nu chilá' naca caní, le naba quebe gaca da ba gunábale. ⁷ Le xegá'ana lu xu'u ná'queze, na' le xi'aj le gagu ca da xelunne' lawe' da benne' wen zrin quebe te le tunge'. Quebe cheajjúale tu xu'u xetú xu'u. ⁸ Gate zrinle tu xezre naga xelezi' lu ne'e' le'e, le gagu ca da xelunne'. ⁹ Le xexún benne' zaj xu'e' xízrawe' zaj zre'e' na', na' le xe'e: “Xel-la dxenná bea chee Dios ba zua nen le'e.” ¹⁰ Che zrinle tu xezre naga quebe xelezi' lu ne'e' le'e, le xedxúaj la neza chee xezre na', na' nnale: ¹¹ “Ca naca bxrtedu' da' n'antu' dxexebíent'u na chee gaca tu da gulé'e na le'e nabágate zria lau Dios. Dxa-la' nézele ba bla' ládujla le'e xel-la dxenná bea chee Dios.” ¹² Dxapa' le'e, ca lu zra guchi'a Dios, da xelezaca benne' zaj zre'e' lu xezre nigá gácaxa na xel-la zi' ca da xelezaca benne' xezre Sodoma, xezre na' bzria xi' Dios.

Da gaca chee xezre naga quebe beluṅ' ca dxenná xrtizra' Dios
(Mt. 11.20-24)

¹³ Na' gunná Jesús:

—¡Edxugúa le'e, benne' xezre Corazín! ¡Edxugúa le'e, benne' xezre Betsaida! Chela lu xezre Tiro, ne lu xezre Sidón belelé'ene' ca naca xel-la waca chee xabáa da ba gulaca ládujla le'e, gate na'te ba belexebí'i lazre', belácuṅ' zra lanṅ' tuzrui, ne buluzriṅ' de xíchaje'. ¹⁴ Lu zra guchi'a Dios da dxaca, na' sácadxale le'e xel-la zi' ca da xelezaca benne' Tiro, ne Sidón. ¹⁵ Na' le'e, benne' xezre Capernaum, ¿dxéquele waxásale zrinteṅe xabáa? ¡Lataj chúl-lala xétajle!

¹⁶ Nadxa guzre' benne' ca' dxusédene':

—Benne' xenne' cheṅe le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bénnea' gusel-le' neda', guzúe' chalá'ala.

Dxelexezrín benne' gaxún chi ca'

¹⁷ Benne' gaxún chi ca' belexezrine' lu xel-la dxelebé, dxelenné':

—Xran, be' xriwe' ca' dxuluzúaqueze na dizra' cheentu' gate dxuchíntentu' Lau'.

¹⁸ Jesús guzre' benne' ca':

—Ca' naca, na' neda' ble'eda' da xriwe' beṅruij na zran xabáa ca tu xesa da dxejúsua na lu xu. ¹⁹ Neda' ba benna' le'e xel-la dxenná bea chee guléajle be snia ca', ne béxrujni, ne chee guchúchujle dutṅe xel-la dxenná bea chee da xriwe', na' quebe bi seque gunṅe na le'e. ²⁰ Quebe bele lawe' da dxelún be' xriwe' ca' dxennale le'e, san le be lawe' da ba naxúaj lale xabáa na'la.

Jesús dxebene'

(Mt. 11.25-27; 13.16-17)

²¹ Lu zra ná'queze gubéle'e Jesús, zúale Be' Lá'azxa Le', na' gunné':

—Dxue lá'ana' Lue', Xrae, Xrane xabáa ne xezr la xu, lawe' da ba blé'enu' benne'du caní da bcácheu' cheṅ benne' sina ca', ne benne' dxeléajni'ineṅ'. ¡Ca' naca, Xrae, lawe' da ca'an guca lazru' Lue'!

²² 'Xra' ba benne' neda' xúgutṅe. Quegá nu neze nu na' naca Zrí'ineṅ', san tuze Xrá'queza', ne quegá nu neze nu na' naca Xra', san tuze Zrí'inequezeṅ', ne nu benne' ca' dxaca lazre' Zrí'ineṅ' guzéajni'ineṅ' le' Nu na' naca Xre'.

²³ Nadxa guné'e benne' ca' dxusédene', na' guzre' benne' cá'anze:

—Ba neza naca na cheṅ benne' ca' dxelélé'eneṅ' ca da dxelé'ele le'e, ²⁴ lawe' da dxapa' le'e, záneteṅ benne' ca', benne' buluchálaje' waláz cheṅ Dios, ne benne' wenná bea ca' gulaca lazre' xelélé'eneṅ' ca da dxelé'ele le'e, san quebe belelé'eneṅ' na. Gulaca lazreṅ' xelenneṅ' ca da dxenle le'e, san quebe belenneṅ' na.

Da dxulé'e na ca ben benne' Samaria, benne' naque' chawe'

²⁵ Nadxa tu benne' dxuxuzájlṅe' da nadxixruij bea Dios bdxúaje', ne guxíaje' xejchálajleneṅ' Jesús chee gaca guzúa zriṅ' Le', na' bchebe' Le':

—Benne' Wesede, ¿bizra dxal-la' guna' cheṅ gata' chia' xel-la nabán da zeajli canna?

²⁶ Jesús bechebe':

—¿Bizra da naxúaj na lu da nadxixruij bea Dios? ¿Aja dxéquenu' da dxulabu'?

²⁷ Bénnea' dxuxuzájlṅe' da nadxixruij bea Dios bechebe':

—Bzri'i Xranu' Dios dutṅe lázrda'u, ne nen dutṅe benne'du xu'u, ne nen dutṅe xel-la dxun zi' lazre' chiu', ne nen dutṅe xel-la dxulaba lazre' chiu', na' bzri'i le sa' ljwezru' ca nazri'i cuinu'.

²⁸ Nadxa gunná Jesús, guzre' le':

—Cháwe'le'e bechebu'. Che dxunu' caní, na' gapu' xel-la nabán na'.

²⁹ Bénnea' dxuxuzájle'e da nadxixruj bea Dios guca lazre' gucá'ana chawe' cuine', na' guzre' Jesús:

—¿Nuzra na' le sa' lwezra'?

³⁰ Bechebe Jesús:

—Tu benne' guzé'e Jerusalén, bétaje' zíaje' Jericó. Lu neza na' xu'e, na' guləla gubán le', ne gulebane' ca naca da nape', ne zra lane'. Na' buluzálaje' le', ne besía'que' zaj nucá'ane' le' ca benne' gate. ³¹ Nadxa gudé tu bxruze neza na', na' gate blé'ene' le', gudé'e chala'ala. ³² Cá'anqueze gudé na' tu benne' xrtia Leví, benne' dxune' zrin chee xudau', na' gate blé'ene' bénnea', gudé'e chala'ala. ³³ Nadxa tu benne' Samaria gudé'e neza na', na' gate blé'ene' le' bexache lazre' le'. ³⁴ Gubigüe' cuita benne' na', ne btupe' tu da za lu we' chee', ne xrise uva wal-la, na' bchele' na ladxe'. Nadxa bcuene' le' cuzru bea chee', na' beche'e le' tu lu xu'u naga xegá'ane', ne bxue' le' na'. ³⁵ Zra xula, ca bezá' benne' Samaria na', na' guləjaje' chupa dumí da bnéruje' xrane xu'u na', ne guzre' le': "Bxue benne' nigá, na' che ba gucá'adxá xelate' dumí chiu', neda' xexunna' na gate xelá'a."

³⁶ Nadxa Jesús guzre' benne' dxuxuzájle'e da nadxixruj bea Dios:

—¿Nula benne' chunna caní guque' le sa' ljwezre bénnea' guləla gubán ca'?

³⁷ Na' gunná bénnea' dxuxuzájle'e da nadxixruj bea Dios:

—Bénnea' bexache lazre' le'.

Nadxa Jesús guzre' le':

—Bexiaj lue', na' gúnquezu' ca'.

Jesús dxezrine' lizre Marta ne María

³⁸ Jesús bexu'e neza, na' bezrine' tu xéredau', na' lu xezre na' zua tu nu'ula le' Marta, na' gulu'e Jesús lizre'. ³⁹ Marta na', zua tu bi bile' le' María, na' María na' gudxé'e zran ni'a Jesús chee xenne' da dxuchálaje'. ⁴⁰ Marta déle'e da dxune', na' bzrine' lau Jesús, ne guzre' Le':

—Xran, ¿quebe dxeache lazru' neda' lawe' da dxucá'ana bi bila' neda' chee guna' tuza' zrin cheentu'? Guzre-be' gácalebe' neda'.

⁴¹ Jesús bechebe':

—Marta, Marta, dxezéle'enu' gunne xue, ne zu' stebe ca naca chee da ca dxunu', ⁴² san de tuze da dxun na ba xen nu gun. María ba bezrele' da cháwedxa, na' netú benne' quebe seque' cue' na.

11

Ca dxal-la' gundxu guchálajle dxu Dios

(Mt. 6.9-15; 7.7-11)

¹ Tu zra Jesús bchálajlene' Dios tu lataj, na' gate bexuzre bchálajlene' Dios, na' tu benne' ca' dxusédené' guzre' Le':

—Xran, bséde netu' guchálajlentú' Dios, ca ben Juan, bsédené' benne' ca' zaj de'e le'.

² Jesús gunné':

—Gate guchálajlele Dios, na' nnale:

Xrantu' Dios, zu' xabáa,

gaca lá'azxa Lau' Lue'.

Gudá nna be'u.

Gaca ca dxaca lazru' lu xezre la xu, ca da dxaca xabáa.

3 Benna cheent'u da gágunt'u na'a zra.

4 Bnrite lau dul-la cheent'u ca dxunite launt'u chee benne' ca' dxelung' cheent'u da calela.

Quebe gu'u lataj da xriwe' cu'u na netu' neza chee na, na' bselá netu' lu na' da calela.

5 Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxela, ne xe'e le': “Bi ljwezra', guleaj neda' chunna xeta xtila

6 lawe' da zua tu bi ljwezra' za belá'tebe' lizra', na' quebe bi de chia' gugawa'-be.” 7 ¿Wechebe benne' ljwezre' na', benne' xu'u lu xu'u: “Quebe gunu' neda' zede. Naxeexuj dxa xu'u chia', na' bi chia' zaj debe' nigá. Quebe gaca chasa' bi gunna' chiu'?” 8 Neda' dxapa' le'e, lácala quebe chasé' bi gunézruje' le' lawe' da naque' ljwezre', san chasé' chee québedxa guné' le' zede, na' gunézruje' le' ca naca da nachínne'.

9 Caní dxapa' le'e: Le naba, na' Dios gunne' cheele. Le xexilaj, na' xezrélele.

Le nne dxu'a dxa xu'u, na' xalaj cheele.

Le nne dxu'a dxa xu'u, na' xalaj cheele.

10 Ca' naca na, lawe' da benne' dxenabe', na' si'e, ne benne' dxexílaje', na' xezréle', ne benne' dxenné' dxu'a dxa xu'u, na' xalaj chee'.

11 ‘Che tu benne' ládujla le'e naque' xra xrna', ¿waca gunézruje' zrí'ing' tu xiaj che nábabe' tu xeta xtila? ¿Waca gunézruje'-be' tu bela' che nábabe' tu bela?

12 ¿Waca gunézruje'-be' tu béxrujni che nábabe' tu zrita? 13 Che le'e nácale benne' wen da calela, na' nézele gunézruje' da chawe' chee zrí'inele, ¿quebe nácadxa Xrale zua xabáa li lazre' chee gunne' chee nu benne' nabe' Be' Lá'azxa?

Dxelenné' napa Jesús xel-la dxenná bea chee da xriwe'

(Mt. 12.22-30; Mr. 3.19-27)

14 Tu zra Jesús bebéaje' be' xriwe' lu xichaj lázrdau tu benne', da nucá'ana na le' quebe dxaca nnie', na' gate bedxúaj be' xriwe' na', na' benné' bénnea'. Na' benne' ca' belexebánene' chee da nigá. 15 Na' bal-le' gulenné':

—Benne' nigá dxebéaje' be' xriwe' ca', dxuchínene' xel-la dxenná bea chee Beelzebú, xrane be' xriwe' ca'.

16 Xebal-la benne' gulaca lazre' gulé'e Jesús xel-la waca chee', na' gulenabe' Le' guné' tu xel-la waca da za xabáa. 17 Le' nézene' ca da dxelaca lazre', na' guzre' benne' ca':

—Che benne' zaj zre' tu tu xezre xelaque' chupa la'a, ne xeledil-le', wabía xi' xezre na', na' che benne' tu lu xu'u xelaque' chupa la'a, cá'anqueze welebia xi' benne' ca'.

18 Cá'anqueze, che da xriwe' ca' xelaca na chupa la'a, ¿ájazra xegá'ana xel-la dxenná bea chee na? Da nigá dxapa' le'e lawe' da dxennéle dxebéaja' be' xriwe' ca', dxuchíneda' xel-la dxenná bea chee Beelzebú da xriwe'.

19 Che caní naca na, ¿nuzra dxunezruj xel-la dxenná bea benne' ca' dxusédele le'e chee xelexebéaje' be' xriwe' ca'? Chee le' na', benne' caníqueze dxululé'ene' dxeque zrəajele.

20 Na'a che neda' dxebéaja' be' xriwe' ca', dxuchíneda' xel-la dxenná bea chee Dios, da li xel-la dxenná bea chee Dios ba bla' na ládujla le'e.

21 ‘Che tu benne' wal-la nape' da guchínene' lu wedil-la, ne dxuxéqueze' lizre', na' da zra lizre' napa chí'e na. 22 Che za' xetú benne' nácadxe' wal-la ca le', ne dxucul-le' le', nadxa que'e ca naca da dxuchínene' lu wedil-la, da na' dxuxrén lazre', na' quisie' da gudapa bénnea'.

²³ 'Benne' quebe zuë' gácalenë' neda', dxedábage' neda', na' benne' quebe dxexeque'ë nen neda' dxúsela bénnea'.

Be' xriwe' da dxexezrín na lizre na
(Mt. 12.43-45)

²⁴ Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: “Wexá'a lizra' naga bezá'a.” ²⁵ Gate xezrín na, na' le'e na bénnea' naque' ca tu xu'u da nalúa lu'ule na, ne nabá'atë na. ²⁶ Nadxa zexiaj na, zeajxezri na gegazre be' xriwe' da zaj nácadxa na xriwe' ca lë na, na' ca naca da ca' xelú'u na xelezúa na lu xichaj lázrdau bénnea', na' naga cheajsëte cheë benne' na' nácadxa da calela cheë' ca da guca cheë' nédxula.

Da ba neza cheë bénneache da naca na li lazre'

²⁷ Dxácatë Jesús dxenné' da caní, tu nu'ula ládujla benne' ca' gunné' zizraj:

—Ba neza zrente naca na cheë nu'ula na' guzane' Lue', ne bsegule' Lue'.

²⁸ Na' gunná Jesús:

—Ba neza zrendxa naca na cheë benne' ca' dxelenne' ca da dxenná Dios, ne dxunë' ca dxenná dizra' na'.

Dxelenabe' Jesús gune' tu xel-la waca da za xabáa
(Mt. 12.38-42; Mr. 8.12)

²⁹ Benne' ca' ne zaj zre'ë cuita Jesús, na' Lë' guzú lawë' dxuchálajlënë' lë', gunné':

—Benne' zaj zre'ë lu zra caní zaj naque' benne' wën da calela, na' dxelenabe' neda' guna' tu xel-la waca da za xabáa, na' québedxa bi xelexé'ëng' ca da ble'e Jonás, bénnea' bchálajë' waláz cheë Dios. ³⁰ Ca guca cheë Jonás, guque' tu da ble'e na benne' gulezre'ë lu xezre Nínive, cá' anqueze neda', Benne' Guljë' Bénneache, gaca' tu da gulé'e na benne' zaj zre'ë lu zra na'a zra. ³¹ Lu zra guchi'a Dios, gate Dios guchi'ë cheë benne' zaj zre'ë lu zra na'a zra, na' chasa nu'ula na' gunná bé'ëng' xezr la xu da zua chalá'a naga dxedé gubizra beu' zaga ca', na' gulé'ëng' zaj nabaga zria benne' caní, lawë' da nu'ula na' guzë'ë zítu'të cheë xenne' ca naca xel-la sina cheë Salomón, na' nigá zua tu Benne' nácadxë' blau ca Salomón na'. ³² Lu zra guchi'a Dios, gate Dios guchi'ë cheë benne' zaj zre'ë lu zra na'a zra, na' xelase' benne' ca' gulezre'ë xezre Nínive, na' xululé'ëng' zaj nabaga zria benne' caní, lawë' da benne' ca' gulezre'ë xezre Nínive belexebí'i lazre' gate Jonás bchálajlënë' benne' ca' xrtizra' Dios, na' nigá zua tu Benne' nácadxë' blau ca Jonás na'.

Da dxusení' lu xichaj lázrdaxu
(Mt. 5.15; 6.22-23)

³³ Gunná Jesús:

—Netú benne' che dxugale' xi' cheë', quebe guzúë' na tu naga nagache, ne quebe gudusië' na tu xi'ina, san guzúë' na sibe cheë xelexé'e benne' ca' xelu'ë lu xu'u na'. ³⁴ Xiaj laudxu zaj naca na ca tu xi' da dxusení' na lu xichaj lázrdaxu. Che xiaj lau' zaj naca na chawe', ca naca xichaj lázrdau xu'u na lení', na' che xiaj lau' quebe zaj naca na chawe', na' xu'u da chul-la lu xichaj lázrdau. ³⁵ Bxue xanne' ca naca xi' da napu' cheë quebe xexaca na da chul-la. ³⁶ Che ca naca xichaj lázrdau xu'u na lení', na' quebe bi xu'u da chul-la, na' le'enu' chawe' xúgutë ca dxaca gate tu xi' dxusení' na lizru'.

Jesús dxedil-le' benne' xudau' ca'

(Mt. 23.1-36; Mr. 12.38-40; Lc. 20.45-47)

³⁷ Gate bexuzre bchalaj Jesús, na' tu benne' xudau' fariseo gunné' Le' cheajtawé' xeta lizre'. Na' guxú'u Jesús, gudxé'ē dxawe'. ³⁸ Na' benne' fariseo na' bebáne' gate blé'ene' Jesús quebe gudibe ne'ē ca da zjácale benne' judío gate dxelawé' xeta. ³⁹ Xránadxu guzre' le':

—Le'e, benne' fariseo, dxíbele cúzrela zriga', ne xé'ena, san lu'ule na, nazrátēle ca naca da ba gulanle, ne da calela da dxunle. ⁴⁰ Le'e, benne' lázrdau zide', ¿quebe nézele Béneea' bñe' da zua cúzrela bñenze' da zua lu'ula? ⁴¹ Le gunezruj benne' xache' ca' cheē da nápaie, na' ca nácale xegá'anaie chawe'.

⁴² 'jEdxugúa le'e, benne' fariseo ca'! Le'e dxunézrujle Dios tu cue' cheē da chi cue' cheē xixru weaj, ne cheē binne cheē ruda, ne cheē xúgute xixre' cuan, san dxuzáale chala'ala ca naca xel-la wen xrlátaje, ne xel-la zri'i lazre' cheē Dios. Da caní dxal-la' gunle, ne quebe gusanle ca da ba dxunle.

⁴³ 'jEdxugúa le'e, benne' fariseo ca'! Dxaca lázrele gápale lataj blau naga cue'le lu xu'u naga dxezrágale, ne dxaca lázrele xelapa benne' le'e ba lá'ana lawe' xi'a ca'.

⁴⁴ 'jEdxugúa le'e, benne' dxuluxuzájla'a da nadxixruj bea na, ne le'e, benne' fariseo ca', benne' dxeluné' láweze da xrlátaje! Nácale ca xēdxu ba ca' da quebe zaj nalá', na' benne' ca' dxeledé' lówela na, ne quebe zaj nézene' da dxululájaje'.

⁴⁵ Nadxa gunná tu benne' dxuxuzájle'ē da nadxixruj bea na, guzre' Jesús:

—Benne' Wesēde, gate dxennáu' da nigá, dxennéteu' ca' cheētu'.

⁴⁶ Na' Jesús gunné':

—jEdxugúa le'e, benne' dxuluxuzájle'ē da nadxixruj bea na! Dxugúale bñeache xua da quebe xezeuéné', na' le'e netú zrube názele quebe dxaca lázrele gutale na.

⁴⁷ 'jEdxugúa le'e! Dxunle lu'a cheē ba ca' cheē benne' ca' buluchálaje' waláz cheē Dios, benne' ca' belute xra xrtáule. ⁴⁸ Ca da dxunle dxulé'e na nácale tuze nen da belún xra xrtáule ca'. Benne' ca' belutié' le', na' le'e dxunle lu'a chee ba chee' ca'.

⁴⁹ 'Cheē le' na' gunná Dios lu xel-la sina cheē', gunné': "Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-le' xelútie', na' xebal-le' xeláu zi' xúzrequeze' le'." ⁵⁰ Dios gusebague' benne' zaj zre'ē lu zra na'a zra ca naca xel-la gute cheē xúgute benne' ca' gulenné' waláz chee', benne' gultatie' lu na' benne' ca' zaj zre'ē gate bente' xēzr la xu, ⁵¹ gate na' tu benne' betie' Abel, zri'ine Adán, ca bzrintē zra belutié' Zacarías gachaj lówela naga zua lucugu, ne naga zua lataj lá'azxa. Ca'an dxapa' le'e, Dios gusebague' benne' zaj zre'ē lu zra na'a zra xel-la gute cheē benne' ca'.

⁵² 'jEdxugúa le'e, benne' dxuluxuzájla'a da nadxixruj bea na! Xu'u lu na'le ca naca zren xia cheē dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dxelaca lazre' xelu'ē na'.

⁵³ Gate Jesús guzre' benne' ca' da caní, na' benne' ca' dxuluxuzájle'ē da nadxixruj bea na, ne benne' fariseo ca' belezrá'ale'ē Le', na' gulezú lawe' dxeluné' Le' zēde, na' da zantē da buluchebe' Le', ⁵⁴ na' buluzuzre' che bi nna Jesús cheē xezeéquene' xelagu zrié' Le'.

12

Jesús dxenné' ca naca chee da naca xrlátaje láweze

¹ Ca lu zra na' belezraga zane gaxúa benne' ca', na' dxululéajte ljwezre'. Na' guzú lau Jesús dxé'e benne' ca' dxusédené':

—Le guxúe xanne' cuínale ca naca cua zichaj chee xeta xtila chee benne' xudau' fariseo ca', da naca na da dxulé'e na láweze da xrlátaje chee benne' ca'. ² Quebe bi de da dxundxu bagácheze da quebe gulé'e lawe', ne quebe bi de da nagache da quebe nu neze. ³ Chee le na', xúgute da gunle lu da chul-la, xululé'e lawe' te zra, na' da gunle bagácheze lu xu'u naga naxéxujte dxa xu'u, wénqueze na lau xúgute bénneache.

*Nu dxal-la' zrédexu
(Mt. 10.28-31)*

⁴ Na' gunná Jesús:

—Dxapa' le'e, bi ljwézra'du ca', quebe dxal-la' zrébele benne' dxelute belá' dxen chee bénneache, san gate te na', québedxa xelexéqueñ' bi xeluné'. ⁵ Na'a dxapa' le'e nu dxal-la' zrébele. Le zrebe Bénnea' gate te xeque'e xel-la nabán chee bénneache, nape' xel-la dxenná bea gudé'e bénneache ca' lataj ba xa'. Awe', Le' le zrebe.

⁶ ¿Quebe ta'u gazxu' bxínnedau' lawe' chupa dumí lásedau'? Dios quebe dxal-la lazre' netú bxínnedu ca'. ⁷ Cá'anqueze xícha xíchajle le'e xúgute na zaj nababa na lau Dios. Chee le na' quebe zrébele. Zácadxale le'e ca be zanté bxínnedu ca'.

*Benne' dxexechebe' zaj naque' chee Jesús
(Mt. 10.32-33; 12.32; 10.19-20)*

⁸ Na' gunná Jesús:

—Dxapa' le'e, xúgute benne' xelexechebe' zaj naque' chia' neda' lau bénneache, cá'anqueze neda', Benne' Gulje' Bénneache, xechébequeza' chee benne' ca' lau gubáz chee xabáa ca' chee Dios, ⁹ san benne' ca' quebe xelexechebe' chia' lau bénneache, néda'queza' quebe xechéba' chee' lau gubáz chee xabáa ca' chee Dios.

¹⁰ 'Che nu benne' bi nnié' chia' neda', Benne' Gulje' Bénneache, gunite lau Dios chee', na' benne' nnié' chee Be' Lá'azxa, quebe gunite lau Dios chee bénnea'.

¹¹ 'Gate xelech'é le'e lau benne' xíchajé chee xudau', u lau benne' dxuchi'e da dxaca, u lau benne' xu'u lawe', quebe cue'le gunne xue bi xechébele u bi nnae, ¹² lawe' da gate zrin zra dxal-la' nnele, Be' Lá'azxa gulé'ene' le'e da dxal-la' nnele.

Da stébe chee xel-la gunní'a

¹³ Tu benne' ládujla benne' ca' guzre' Jesús:

—Benne' Weséde, guzre bi bicha' gúnnabe' chia' da xexal-la' chee da guca chee xrantu'.

¹⁴ Jesús guzre'-be':

—Benne', ¿zua nu bzua neda' ca benne' dxuchi'e da dxaca u ca benne' le'e xezr la xu?

¹⁵ Nadxa guzre' benne' ca':

—¡Le na' xque! ¡Le guxúe xanne' cuínale chee quebe gucúdele! Xel-la nabán chee nu benne' quebe zua na lu da nápalé'e.

¹⁶ Nadxa bchalaj Jesús da dxulé'e nigá, gunné':

—Guzúa tu benne' gunní'a, na' xezr la xu chee' bnézrujle' na. ¹⁷ Na' benne' gunní'a na' guzú lawe' dxenné': ¿Bizra guna? Québedxa de naga guzrá'a lina chia' nigá. ¹⁸ Nadxa dxenné': “¡Ba nezda' ca da guna! Guchínnaja' naga dxezrá' lina chia', chee guna' da zrí'adxa, na' guzrá'a na' ca naca lina chia'

nigá, ne ca naca da ba napa'. ¹⁹ Nadxa nníqueza' néda'queza': Ba déle'e chiu' da zante chee zane' iza. Bezí' lazre'. Güe'e gudagu, ne gubé." ²⁰ Na' Dios guzre' bénnea': "Lue', benne' zide', lu zre' na'a zre' gatiu', na' da nuzrá' chawu', quebe nézenu' nu chee gaca na." ²¹ Ca'an dxaca chee benne' dxutupe' xel-la gunní'a da gaca cheéqueze'. Naque' ca tu benne' xache' lau Dios.

Dios dxuxúe' bi chee' ca'

(Mt. 6.25-34)

²² Ca gudé na', Jesús guzre' benne' ca' dxusédene':

—Dxapa' le'e, quebe cue'le gunne xue ca naca da gágule chee gaca banle, ne ca naca zra lánale da gágule. ²³ Xel-la nabán chee zácadxa na ca da gágule, na' bel-la' dxen chee zácadxa na ca zra lánale. ²⁴ Le nna'xque ca dxaca chee bxínnedu ca'. Quebe dxelázaba', ne quebe dxelélápaba', ne quebe zaj zua naga dxuluxuzraba', na' Diósqueze' dxuxi'aj dxugawe'-ba'. Zácadxale le'e ca bxínnedu ca'. ²⁵ ¿Núlafe le'e séquele gusetunna cuínale xetú ben lawe' da dxebé'le'ele gunne xue? ²⁶ Che quebe gaca gunle tu da naca da dauze, ¿biz chee na' dxebe'le gunne xue chee da ca' xezícala?

²⁷ 'Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du ladxe', na' dxapa' le'e, wenná bea Salomón quebe gucue' da xrtandxa ca tu xiajdu caní. ²⁸ Che Dios dxugacue' caní xixre'du ca', da zaj zua na'a le'e xixre', na' wxre xelezxe na, ¿quegá gundxe' chee le'e, benne' dxeléajle'e láteze chia'? ²⁹ Chee le' na', quebe cue'le gunne xue ca naca da gágule, u ca naca da xí'ajle, ne quebe súale stebe. ³⁰ Ca' naca na, lawe' da ca naca benne' ca' zaj zre'e xezr la xu dxelexíajle' ca naca da caní, san le'e, zua Xrale xabáa ba nézene' nachínnele ca naca da caní. ³¹ Le cue' gunne xue nna bea Dios lu xichaj lázrdaule, na' sile ca naca da caní.

Da gunní'a da dxegú'u cháwedxu xabáa

(Mt. 6.19-21)

³² Na' gunná Jesús:

—Quebe zrêbele, zríla'du chia', bábaze nácale le'e. Xrale Dios dzezaca ba lazre' gunne' chee lataj naga dxenná be'e. ³³ Le gute da nápafe, na' le gunezruj benne' xache' ca'. Ca'an gaca, guzrale na naga quebe te chee na, na' gápale da gunní'a xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na. ³⁴ Naga nuzúale xel-la gunní'a chee, na' súaqueze lázrdaule.

Dxal-la' gupá'a cuínadxu

³⁵ Na' gunná Jesús:

—Le gupá'a cuínale, ne le gugala xi' chee. ³⁶ Le gaca ca benne' wen zrin ca' dxelebeze' xrane' xezrine' lu laní chee wechaga na', na' nne' dxu'a dxa xu'u na'. ³⁷ Ba neza zrenté naca na chee benne' wen zrin ca', benne' ca' xedajxraca xrane' le' dxelenaze' gate xezrine'. Da li dxapa' le'e, xrane' na' cueche' benne' ca' xelawe', na' guzúa cuine' chee que'e da xelagu benne' wen zrin ca'. ³⁸ Lácala xezrine' dxela u dxaní'sise', che xedajxraque' le' dxelennaze', ba neza naca na chee benne' wen zrin ca'. ³⁹ Dxal-la' nézele da nigá, che xrane xu'u gunézené' bi zra zrin gubán, na' quebe gasie' chee quebe gu'e lataj quíduje' lizre' chee cuane' da nape'. ⁴⁰ Cá'anqueze le'e, le sua ban lazre', lawe' da gate québela nézele, xelá'a neda', Benne' Gulje' Bénneache.

Benne' wen zrin li lazre', ne benne' wen zrin quebe naque' li lazre'

(Mt. 24.45-51)

41 Nadxa Pedro bchebe' Jesús:

—Xran, ¿bchálaju' da dxulé'e nigá chee' nétu'ze, che chee' xúgute' benne'?

42 Xránadxu gunné':

—¿Nuzra naca wen zrin li lazre', bénnea' dxucá'ana xrane' lu ne'e benne' zaj zra' lizre' chee' gunézruje' da xelagu benne' ca' gate zrin zra chee' na? 43 Ba neza naca na chee' benne' wen zrin na', gate xezrín xrane', xedajxraque' le' dxune' ca da nabague'. 44 Da li dxapa' le'e, xrane' gucá'ane' lu ne'e xúgute' da nape'. 45 Che benne' wen zrin na' dxéqueñe' wazré xrane' xelé'e, ne su lawe' gusaca zi'e benne' wen zrin xezica ca', ne nu'ula wen zrin ca', ne su lawe' xi'aj gawe', ne súzrene', 46 nadxa xrane' xelé'e lu zra quebe dxebeze' le', ne lu zra quebe nézene', na' gusaca zi'le'e le', ne chugue' chee' saque' ca xelezaca benne' ca' quebe zaj naque' chee' Dios.

47 'Benne' wen zrin na' nézene' ca da dxaca lazre' xrane' san quebe nucueze', ne quebe dxuzúe' dizra', benne' nigá gudé' le' ba xa'. 48 Benne' wen zrin na' quebe nézene' da na', ne dxune' da dxusebaga na le' zria, benne' nigá té'e láteze xel-la zi'. Che tu benne' dxezi'le'e da dxunezruj Dios le', Dios wanábale'e le, na' bénnea' Dios nuxrén lazre' le' da zrente, Dios wanné xúle'ene' le'.

Dxelaca benne' chupa la'a ne chee' Jesús

(Mt. 10.34-36)

49 Na' gunná Jesús:

—Neda' bla'a guzrena' xi' lu xezr la xu nigá, na' la guzreda' ba dxala xi' na'.

50 Dxal-la' chu'a lu xel-la gute ca dxu'u tu benne' lu nisa gate dxedxúe' nisa, na' tég'a xel-la zi' cadxa gácatequeze na. 51 ¿Dxéquele le'e za' neda' cu'a xel-la dxebeza zri lazre' lu xezr la xu nigá? Dxapa' le'e: Cabí. Za'a chee' guna' benne' chupa la'a. 52 Na'a su lau, gazxu' benne' zaj zre'e tu xu'u xelaque' chupa la'a. Chunne' xeledábague' chupe', na' chupe' xeledábague' chunne'. 53 Xra tu bi biu tábague' bi biu chee', na' bi biu na' tábagabe' xrabe'. Xrna tu bi nu'ula tábague' bi nu'ula chee', na' bi nu'ula na' tábagabe' xrnabe'. Tau zri'ine tu nu'ula tábague' zru'a lizre', na' zru'a lizre' na' tábague' tau zri'ine'.

Da dxululé'e na ca da gaca lu zra na'a zra

(Mt. 16.1-4; Mr. 8.11-13)

54 Na' Jesús guzre' benne' ca':

—Gate le'e dxelé'ele da' beuj naga dxebía gubizra, na' dxennale, waca xiuj, ne ca' dxaca. 55 Gate dxaca be' za na chala'a naga dxedé gubizra beu' zaga ca', na' dxennale waca da la, ne dxaca ca'. 56 Le'e, benne' dxunle láweze da xrlátaje. Le'e nézele nnale ca da gaca zran xabáa, ne lu xezr la xu nigá, san quebe dxezéquele xuzájla'ale da dxululé'e na ca gaca chee' lu zra na'a zra.

Dxal-la' xezúadxu lu xel-la dxebeza zri lazre' nen benne' dxedábague' dxi'u

(Mt. 5.25-26)

57 Na' gunná Jesús:

—¿Bizr chee' na' quebe dxeque be'ele da naca xrlátaje? 58 Che nu benne' dxaca lazre' guzúe' lue' lau benne' dxuchi'e, na' gate chéajlenu' le' chee' zrinle lau bénnea', ben ba xen xezú' lu xel-la dxebeza zri lazre' nen bénnea' dxácate xu'ule neza, chee' quebe che'e lue' lau bénnea', na' bénnea' gudé' lue' lu na' benne' guséxuje' lue' lizre xia. 59 Dxapa' lue' quebe xedxúaju' na' cadxa quízruju' ca da dxebagu'.

13

Dxal-la' xelexebí'i lazre' bènneache

¹ Ca lu zra na' belezrín bal-la benne' lau Jesús, na' buluzenne' Le' ca ben Pilato, betië' bal-la benne' Galilea, na' bhague' dxen cheë benne' ca' nen dxen cheë be xixre', bea ca' ba belutië' cheë xuluzríë' dxen cheë na lau Dios.

² Na' Jesús guzre' le':

—¿Dxéquele le'e caní gulezaca benne' ca' lawe' da zaj nácadxe' benne' dul-la ca benne' ca' xezícala zaj zre'e xezre ca' zaj nababa Galilea? ³ Dxapa' le'e: Cabí, na' che quebe xebí'i lázrele le'e, xúgutele le'e cuía xile. ⁴ ¿Dxéquele le'e benne' chinu chunna ca' gulatië' gate guzríá cha xu'u sibe le' da nazí le na Siloé zaj nabágadxe' dul-la ca xezícala benne' ca' zaj zre'e xezre Jerusalén? ⁵ Dxapa' le'e: Cabí, na' che le'e quebe xebí'i lázrele, cá'anqueze le'e wabía xile.

Xaga higo da quebe dxebía na da zixre

⁶ Nadxa Jesús bhálajlëne' benne' ca' da dxul'é nígá, dxenné':

—Tu benne' zua tu xaga higo cheë' zua na lu xezr la xu cheë', na' xejné'e na che zría na, na' quebe bi bezrélenë'. ⁷ Nadxa guzre' benne' dxun zrin lu xezr la xu cheë': "Gunná'xque, chun ízate ba bida' dxenná'a che zria xaga nígá, ne quebe bi bezréleda'. ¡Guchugu na! ¿Bizr cheë na' nulán na xezr la xu nígá?"

⁸ Bënnea' dxun zrin cheë xezr la xu na' bechebe': "Xran, bca'ana na xetú iza na'a. Guzúludxa' zran na, ne cua'a na bebe. ⁹ Nen da na', gúnnalja na, san che cabí, na' chugu' na."

Jesús dxexune' tu nu'ula nalegu cuzre'

¹⁰ Gate naca zra dxulupá'ana judío ca', na' zua Jesús tu lu xu'u naga dxelezraga judío ca' dxusédene' benne' ca', ¹¹ na' zua na' tu nu'ula xu'e wë' ba gaça chinu chunna iza. Tu be' xriwë' nun na le' cuzru legu, na' quebe dxácaqueze' xelíe'. ¹² Gate ble'e Jesús le', na' gunné' le', ne guzre' le':

—Nu'ula, ba bexacu' cheë xízrawë' chiu'.

¹³ Nadxa guxrúa ne'e nu'ula na', na' la ná'queze nu'ula na' belite', na' guzú lawë' dxue lá'ane' Dios. ¹⁴ Na' benne' xíchajë cheë xu'u na' bzre'e lawe' da bexún Jesús nu'ula na' lu zra dxulupá'ane', na' guzre' benne' zaj zre'e na':

—Xrupa zra dxal-la' gundxu zrin. Lu zra ca' waca xídale xexácale, quegá lu zra dxupá'anadxu.

¹⁵ Nadxa Xránadxu bechebe':

—Le'e, benne' dxelún láweze da xrlátaje, ¿quebe dxesézrele le'e bezre cheële u burro cheële lu zra dxupá'anadxu chjua'le-ba' xelé'ajba' nisa? ¹⁶ Nú'ula nígá naque' xrtia Abraham, na' da xriwë' nuchéaj na le' lu xízrawë' nígá ba zeaj chinu chunna iza, na' ¿quebe dxal-la' xebéaja' xízrawë' da nuchéaj na le' lu zra dxupá'anadxu?

¹⁷ Gate gunná Jesús da nígá, xúgute benne' dxeledábague' Le' belexe-dué'ene', na' xúgute benne' xezícadxa gulebene' gate belelé'ene' ca naca da zrente da dxun Jesús.

Da dxul'é na ca naca cheë bínnedau' cheë mostaza

(Mt. 13.31-32; Mr. 4.30-32)

¹⁸ Nadxa gunná Jesús:

—¿Aja naca xel-la' dxenná bea cheë Dios, ne bi gutil-le lébeda' na? ¹⁹ Naca na ca tu bínnedau' cheë mostaza, tu benne' dxaze' na lu xezr la xu cheë', na' dxegula na, ne dxácatë na ca tu xaga zren, na' bxínnedu ca' dxuluzríaba' xrú'uneba' lu zruze na ca'.

Da dxulé'e na ca naca chee cua zichaj chee xeta xtla

(Mt. 13.33)

²⁰ Cá'anqueze gunná Jesús:

—¿Bizra gutil-le lébeda' xel-la dxenná bea chee Dios? ²¹ Naca na ca cua zichaj chee xeta xtla tu nu'ula dxuchague' na chunna xaga de xezaj, na dxuchazra na ca naca cua na'.

Dxa xu'u lechide'

(Mt. 7.13-14, 21-23)

²² Dxácatē xu'u Jesús neza zexíaje' xezre Jerusalén, dxusédenē' bēneache lu xezre ca', ne xézredu ca' naga dxedéē'. ²³ Na' bchebe tu benne' Lē':

—Xran, ¿bábaze benne' xelélé?

Bechebe Jesús:

²⁴ —Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'ē na', na' quebe xelezéqueñe'. ²⁵ Ca te na' chasa xrane xu'u, ne guséxujē' dxa xu'u, na' le'e zrале chalé'ajla nnele dxu'a dxa xu'u na', nnale: “Xran, gusalaj chú'untu'.” Na' lē' xechēbe': “Quebe nezda' ga benne' le'e.” ²⁶ Nadxa tu láuquezle le'e nnale: “Güe'e gudágulentu' lue', na' lue' bsédenu' lu neza cheentu' ca'.” ²⁷ Lē' xechēbe': “Dxapa' le'e, quebe nezda' ga benne' le'e. Le cuasa cuita' neda', xúgutele le'e dxunle da calela.” ²⁸ Na' cuézrele, ne xagu xá'atē lázrale gate lé'ele Abraham, ne Isaac, ne Jacob, ne xúgute' benne' ca' gulenné' waláz chee Dios, zaj zuē' naga dxenná bea Dios, na' le'e zrале chalé'ajla. ²⁹ Welelá' benne' zaj zre'ē dapa saca chee xezr la xu nigá, na' xelebé'ē xelawe' naga dxenná bea Dios. ³⁰ Nadxa bal-la benne' zaj naque' bzébedxa na'a xelaque' benne' blau, na' benne' zaj naque' blau na'a xelaque' bzébedxa.

Dxebezre Jesús chee xezre Jerusalén

(Mt. 23.37-39)

³¹ Lu zra ná'queze, belezrín lau Jesús bal-la benne' fariseo ca', na' gulé'ē Lē':

—Bezá' nigá, lawe' da dxaca lazre' Herodes gutiē' Lue'.

³² Jesús bechebe':

—Le hjaca cheajguézrele benne' wilaj lazre' calela na': “Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'.” ³³ Dxun na ba xen chéajlēna' neza chia' na'a, ne wxre, ne wizraj, lawe' da quebe gaca gate tu benne' dxenné' waláz chee Dios che quebe xelute benne' Jerusalén lē'.

³⁴ “Jerusalén, Jerusalén, le'e na' dxútele benne' dxelenné' waláz chee Dios, ne dxuzriale xiaj benne' gubáz ca' dxesel-la Dios. Zane' lasa guca lazra' gutupa' bi cheele ca' ca dxun bedxuj, dxutúpaba' bédxujdu ca' zran xrílaba', san quebe guca lázrele. ³⁵ ¡Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca zrindxa zra nnale: ¡Lá'azxa naca Bēnea' ze'ē lu La Xránadxu!”

14

Jesús dxexunē' tu benne' dē xi' ca naca beł-la' dxen chee'

¹ Tu zra dxulupá'ana benne' judío ca' guxíaj Jesús zeajtawē' lizre tu benne' blau chee benne' fariseo ca', na' benne' fariseo ca' dxuluzuzre' Jesús bi gunē'.

² Zúaqueze lau Jesús tu benne' dē xi' ca naca beł-la' dxen chee'. ³ Nadxa Jesús bchebe' benne' ca' dxuluxuzájle'ē da nadxixruj bea na, ne benne' fariseo ca', gunné':

—¿Waca nu benne' xexunge' benne' we' lu zra dxupá'anadxu, che cabí?

⁴ Benne' ca' gulezúe' zrize. Nadxa Jesús guqué'e benne' we' na', ne bexunge' le', na' guzre' le' xexíaje'. ⁵ Nadxa guzre' benne' fariseo ca':

—¿Núlale le'e, che beẏre cheele u bia cheele bíxreba' tu lu xedxu, quebe xebéajle-ba' zra ná'queze lácala naca zra dxupá'anadxu?

⁶ Quebe bi guca xelexechebe'.

Benne' zaj zre'e laní chee wechaga na'

⁷ Gate ble'e Jesús ca' dxelún benne' ca', dxelebé'e lataj blaudxa ga dxelawe', na' bchálaje' da dxulé'e na, dxenné':

⁸ —Gate tu benne' dxenné' lue' laní chee wechaga na', quebe cue'u lataj blau, lawe' da che wazá tu benne' nácadxe' blau ca lue', ⁹ na' bénnea' gunné' dxúpatéle xide' xe'e lue': "Bnezruj lataj nigá benne' nigá." Nadxa gun na ba xen xexíaju' lataj bzébedxa lu xel-la stu'. ¹⁰ Na'a, gate nu benne' nne' lue', gudxé'e lataj bzébedxa, chee gate za bénnea' gunné' lue', wanné': "Bi ljwezra', gudé nigala naga nácadxa blau." Ca'an gaca, xegá'anu' szren lau benne' ca' zaj zre'e dxelágulene' lue'. ¹¹ Benne' dxucá'ana szren cuine', wexéxrujla bénnea', na' benne' dxucá'ana baxache' cuine' wegá'ana szrénqueze'.

¹² Nadxa Jesús guzre' benne' na' gunné' Le':

—Gate gunézruju' tu zrue u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walizr chiu' ca' zaj nape' da gunní'a, lawe' da benne' caní welennéqueze' lue', na' zrué'equenzu' da xelexexunne' chiu'. ¹³ Gate dxunu' tu laní, gunné' benne' xache' ca', ne benne' zaj nadxugu ní'a ne'e, ne benne' zrinnaj ca', ne benne' la chul-la ca'. ¹⁴ Caní gaca tu da ba neza chiu', lawe' da benne' caní quebe gaca xelexexunne' ca' chiu', na' wazrué'enu' lazrju' gate xelexebán benne' xrlátaje ca'.

Da dxulé'e na ca naca chee tu xrche' zren

¹⁵ Gate ben tu benne' dxágule' Le' da na', na' guzre' Jesús:

—Ba neza zrenté naca na chee benne' gawe' xeta naga dxenná bea Dios.

¹⁶ Jesús guzre' le':

—Tu benne' gulu'e tu xrche' zren, na' gunné' benne' zan. ¹⁷ Ca bzrin zra xelawe' xrche' na', gusél-le' wen zrin chee' chee cheajzre' benne' ca' gunné': "Le da, lawe' da ba nusení'a da gágudxu." ¹⁸ Xúgute' gulezú lawe' dxelenabe' gu'e le' lataj quebe xelide'. Benne' nedxu gunné': "Za bezítea' tu cue' xezr la xu chia', na' dxal-la' cheajnná'a na. Dxata' xueda' lue' si zrenu' chia'." ¹⁹ Xetúe' gunné': "Za bezítea' gazxu' cue' beẏr chia', na' guxúa' aja xelunba'. Dxata' xueda' lue' si zrenu' chia'." ²⁰ Na' xetúe' gunné': "Za bchágate na'a, na' quebe gaca xida'." ²¹ Gate bezrín benne' wen zrin na', guzre' xrané' ca naca da nigá. Nadxa bzra'a xrané' na', na' guzre' wen zrin na': "Guxíaj na'a la neza ca', ne neza chee xezre nigá, na' xeaxrí' xúgute' benne' xache' ca', ne benne' zaj nadxugu ní'a ne'e, ne benne' zrinnaj ca', ne benne' la chul-la ca'." ²² Ca gudé na' gunná benne' wen zrin na': "Xran, ba beña' ca gunnáu', na' ne dedxa lataj." ²³ Nadxa gunná xrané' na': "Guxíaj na'a la neza ca', ne neza lásedu ca', na' xején ba xen xelexé'e, chee cha' lizra' nigá. ²⁴ Dxapa' le'e, netú benne' ca' gunnéa' nédxula quebe xelawe' xrche' chia'."

Xel-la zi' da te benne' chéajlene' Jesús

²⁵ Benne' zan zjácálene' Jesús, na' Le' bexéchaje', na' guzre' benne' ca':

26 —Che nu benne' ze'e naga zua', ne quebe guzúe' chalá'ala xre', ne xrne'e, ne zru'ule', ne zri'ine' ca', ne bi biche' ca', ne bi zane' ca', ne xel-la nabán chee', quebe gaca gaque' neda' tuze. 27 Benne' quebe sá'lene' neda' lácala dxal-la' te'e xaga béguaj, quebe gaca gaque' neda' tuze. 28 Che tu benne' ládujla le'e dxaca lazre' gune' tu xu'u sibe, ¿quebe cue'e nedxu gune' xrbaba chee' che wazúene' xuzrte' na? 29 Che quebe gune' caní, ne che cueche' lane na, na' ca te na' quebe suene' xuzre' na, na' xúgute benne' xelexé'ene' na xelexú lawe' xelún le' chee' bérnea', 30 na' xelenné': "Benne' nigá guzú lawe' dxune' tu xu'u. Quebe guque' gune' ca naca." 31 Che tu benne' wenná bea dxal-la' cheajtíl-lalene' xetú benne' wenná bea, ¿quebe cue'e gune' xrbaba chee' che wazúene' nen tu gaxúa gaxúa benne' dxjaque' wedil-la cheajtíl-lalene' bérnea' za' nen chupa gaxúa gaxúa benne' dxjaque' wedil-la? 32 Che quebe séquene', gate benne' wenná bea na' xetú ne ze'e zitu', na' sel-le' gubáz chee' ca' xelenabe' gata' xel-la dxebeza zri lazre'. 33 Ca' naca na, núteteze benne' ládujla le'e, che quebe gusané' ca naca da nape', quebe gaca gaque' neda' tuze.

Zede' da québedxa naca na sna'a
(Mt. 5.13; Mr. 9.50)

34 Na' gunná Jesús:

—Zede' naca na da chawe', san che québedxa naca na sna'a, ¿ájazra guchínedxu na? 35 Quebe gaca guchínedxu na, quegá chee' gucá'ana cháwedxu xezr la xu, ne quegá chee' guchíxredxu bebe, san dxal-la' chú'unadxu na. Benne' ca' zaj zua nague', dxal-la' xelenne'.

15

Ca guca chee' tu zrila' guníteba'
(Mt. 18.10-14)

1 Benne' zante' benne' wechizruij waláz chee' Roma, ne benne' dul-la ca' gulebigue' naga zua Jesús chee' xelenne' da dxuchálaje'. 2 Chee' le' na' benne' fariseo ca', ne benne' dxuluxuzájle'e da nadxixruij bea na gulezí tizre' Jesús, gulenné':

—Benne' nigá dxune' tu zren benne' dul-la ca', ne dxágulene' le'.

3 Nadxa bchalaj Jesús da dxulé'e na, gunné':

4 —Nu benne' ládujla le'e, che nape' tu gaxúa zrila', na' nite tuba', ¿quebe gucá'ane' xetápalalaj chennu zrila' ca', bea ca' zaj zrabá' le'e xixre', na' se'e cheajdílaje' bea na' guníteba' cadxa xezrelne'-ba'? 5 Na' gate xezrelne'-ba', bene', na' xeque'e-ba' xexrúe'-ba' xe'a xene'. 6 Na' ca xezrine' lizre', gutupe' ljwezre' ca', ne benne' walizre chee' ca'. Na' xe'e le': "Le be nen neda', lawe' da bezrelda' zrila' chia' guníteba'."

7 Na' gunná Jesús, dxé'e benne' ca':

—Cá'anqueze zúale'edxa xel-la dxebe' xabáa gate tu benne' dul-la dxexebí'i lazre', quézcala chee' tápalalaj chennu benne' xrlátaje ca' dxeléquene' quebe dxun na ba xen xelexebí'i lazre'.

Ca guca chee' tu dumí da gunite

8 Nadxa Jesús bchalaje' xetú da dxulé'e na, dxé'e benne' ca':

—Tu nu'ula nape' chí dumí zaca, na' che nite tu na, nadxa guzúe' xi' chee' chee' gusaní na lu xu'u chee'. Nadxa su lawe' gulúe' lu xu'u chee', xexílaje' bínnalu ca xezrelne' dumí chee' da gunite na. 9 Na' ca xezrelne' dumí na',

gutupe' nu'ula ljwezre' ca', ne nu'ula walírz chee' ca', na' xe'e le': "Le be nen neda', lawe' da bache bezrelda' dumí chia' da gunite na."

¹⁰ Na' gunná Jesús, dxé'e benne' ca':

—Cá'anqueze dxelebé gubáz chee' xabáa ca' chee' Dios gate tu benne' dul-la dxexebí'i lazre'.

Ca guca chee' zri'ine tu benne' gunítebe'

¹¹ Nadxa Jesús bchálaje' xetú da dxulé'e na, dxé'e le':

—Tu benne' zaj zra' chupa bi chee'. ¹² Na' bi cuide' chee' gúzrebe' xrabe': "Xrae, bēna chia' da dxal-la' si'a chee' da naca chiu'." Nadxa xrabe' bēne' gachaj da bnézruje' cha chee'be' tube', ne xetube'. ¹³ Ca gudé tu chupa zra, bi cuide' chee' bēne'a' btúpabe' xúgutē da naca chee'be', na' guzabe' zítu', na' bzrinbe' xetú xēzr la xu. Na' bēn dítajbe' dumí chee'be' lu da calēla da bēnbe'.

¹⁴ Na' ca gudache xúgutē dumí chee'be', bzrin tu gubina' lu xēzr la xu na', na' lēbe' gudunbe'. ¹⁵ Nadxa guzabe' xejtílajbe' zrin gunbe' chee' tu benne' lu xēzr la xu na'. Benne' na' gusél-le'-be' le'e xixre' chee' chee' cheajxúbe' cuche chee' ca'. ¹⁶ Guca lázrebe' gágube' da calēla da dxelagu cuche ca'. Netú benne' quebe bi bnézruje' da gágube'. ¹⁷ Nadxa xejásá lázrebe', dxennabe': "Benne' zante, benne' wēn zrin zaj zre'e lizre xra', na' déle'e da dxelawe'. Neda' dxátequeza' xel-la dxedún. ¹⁸ Webí'iza' xexá'a naga zua xra', na' xapa' le': Xrae, bēna' dul-la lau Dios, ne lau lue'. ¹⁹ Québedxa naca chia' gaca' zri'inu'. Bzua neda' ca tu benne' wēn zrin chiu'." ²⁰ Nadxa begú'ube' neza, bezrinbe' lizre xrabe'.

Tu chi na', ble'e xrabe' lēbe' ba zezabe', na' bexache lazre'-be'. Na' guzá chégü'e' xejchague'-be', na' bnide'-be', ne bnúpete'-be'. ²¹ Nadxa gunabe': "Xrae, bēna' dul-la lau Dios, ne lau lue'. Québedxa naca chia' gaca' zri'inu'." ²² Na' gunná xrabe', dxé'e benne' wēn zrin chee' ca': "Le cueaj zra lana' da zaca, ne le gugacu-be'. Le cu'u tu da naca oro zrube nabe', ne le cu'u xel-la ní'abe'. ²³ Le cheajzrí' tu bēzre be' dxanne, na' gútebe-ba'. Gágudxu, ne gundxu laní, ²⁴ lawe' da bi chia' nigá guca chee'be' ca tu benne' ba gute, na' bebanbe'. Gunítebe', na' ba bezrágadxu-be'." Na' gulezú lawe' dxelwē' laní.

²⁵ Dxácatē na', zrí'ine' bi waca zúabe' le'e xixre' dxunbe' zrin. Na' chizrela' ca bezrinbe' gagu cuíta xu'u lizre xrabe', na' benbe' dxaca wíl-la, ne dxaca wexá'a. ²⁶ Nadxa gunnébe' tu bi wēn zrin na', dxé'ēbe' lēbe': "¿Bi dxaca nigá?" ²⁷ Bi wēn zrin nigá cúnnabe': "Ba belá' bi bichu', na' xrau' gunná bé'ene' nu gute tu bēzre be' dxanne, lawe' da belabe' zúabe' zri'a chawe'." ²⁸ Bzra'a bi waca na', na' quebe guca lázrebe' xexú'ube'. Nadxa bdxuaj xrabe', ne guta' xuene' lēbe' xexú'ube'. ²⁹ Na' cúnnabe', dxé'ēbe' xrabe': "Nézqueznu' zane' iza ba bēna' zrin chiu', ne cabata' bcha'a lue', na' ne tu lasa quebe ne gunnu' chia' tu chíbudau' chee' guna' tu laní nen ljwezra' ca'. ³⁰ Na'a belá' bi chiu' nigá, bi ba bēn dítajbe' dumí chiu', gúzulébe' nu'ula dxeledá zraga ca', na' bēte lizu' bēzre be' dxanne ne chee' lēbe'." ³¹ Nadxa gunná xrabe', dxé'ē-be': "Zri'ina', lue' tu zúalēzquezu' nen neda', na' xúgutē da dē chia' naca na chiu'. ³² Na'a dxun na ba xen gundxu laní, ne bedxu, lawe' da bi bichu' gúcabe' ca tu benne' ba gute, ne naca banbe'. Gunítebe', na' ba bezrágadxu-be'."

16

Benne' wēn zrin blau quebe naque' xrlátaje

¹ Nadxa Jesús guzre' benne' ca' dxusédene':

—Guzúa tu benne' gunní'a, na' zua tu benne' wən zrin blau chee'. Na' bal-la benne' xeajleguezre' le' benne' wən zrin blau na' dxun dítaje' da de chee xrane'. ² Nadxa xrane' gunné' le', ne guzre' le': “¿Bizra da nigá dxelenné' chiu'?” Blué'e neda' ca naca chee zrin dxunu', lawe' da québedxa gaca gacu' wən zrin blau chia'.” ³ Nadxa benne' wən zrin blau na' guzú lawe' dxenné' lu xichaj lázrdawe': “¿ájazra guna' na'a, lawe' da xebéaj xrana' neda' lu zrin chia'?” Quebe sueda' guna' zrin le'e xixre', ne wedué'eda' naba' guna'. ⁴ Na'a ba nezda' tu da guna' chee xelezúa benne' xezezi' lu ne'e neda' gate québedxa de zrin chia'. ⁵ Nadxa gunné' tu tu benne' dxelal-le' chee xrane' na'. Na' bchebe' benne' nedxu: “¿ájate dxal-lu' chee xrana'?” ⁶ Benne' na' bechebe': “Dxal-la' chee' tu gaxúa zruaga da za.” Nadxa benne' wən zrin blau na' guzre' le': “Nigá de xiche chiu'. Gudxé'e bexún xetú na, na' bzuaj na dxebagu' chi xun zruaga ca'.” ⁷ Gudé na' bchebe' xetú benne' ca': “¿Gazra lue', ájate dxebagu'?” Na' benne' nigá guzre' le': “Dxebaga' tu gaxúa bzude' zrua' xtila.” Nadxa benne' wən zrin blau guzre' le': “Nigá de xiche chiu'. Ben xetú na, na' bzuaj na dxebagu' tápalajze.” ⁸ Xrane' gúquebe'ene' nácale'e sina benne' wən zrin blau na' ca beñe' da ca'.

Nadxa gunná Jesús:

—Ca' naca na, benne' zaj zre'e na'a zra zaj nácadxe' sina lu da dxelune' nen le sa' ljwezre' ca', ca zaj naca benne' zaj naque' chee Dios.

⁹ Neda' dxapa' le'e, le guchine xel-la gunní'a chee xezr la xu nigá chee cha benne' ljwézrele, chee gate te chee xel-la gunní'a na', na' sua nu si' lu na' le'e naga gaca banle chadía chacanna.

¹⁰ 'Benne' dxuchíne' láteze lu duté xel-la li lazre' chee', cá'anqueze guchíne' tu da zrendxa duté xel-la li lazre' chee', na' benne' quebe naque' li lazre' ca dxuchíne' láteze, cá'anqueze quebe gaque' li lazre' ca guchíne' tu da zrendxa. ¹¹ Ca' naca na, che quebe nácale li lazre' ca dxuchínele xel-la gunní'a chee xezr la xu nigá, ¿nuzra guxrén lazre' le'e chee guchínele xel-la gunní'a li? ¹² Che quebe nácale li lazre' ca dxuchínele da naca chee benne' xula, ¿nuzra gunna le'e da gaca cheéquezle?

¹³ 'Quebe gaca tu benne' wən zrin guné' zrin chee chupa xrane', lawe' da cuidéne' tue', na' xetúe' zrí'ine', u gaque' li lazre' nen tue', na' xetúe' guzúe' chalá'ala. Quebe gaca nu gun zrin chee Dios, ne chee da gunní'a da nape'.

¹⁴ Benne' fariseo ca', benne' dxulucúde' dumí, ne dxuluzé nague' da dxenná Jesús, belún le' chee'. ¹⁵ Nadxa gunná Jesús:

—Le'e dxulé'e cuínale xrlátaje lau bènneache ca', san Dios núnbe'e lázrdaule. Da dxelque bènneache naca na xrlátaje, naca na da dxuzúa Dios chalá'ala.

Da nadxixruj bea na, ne xel-la dxenná bea chee Dios

¹⁶ Na' gunná Jesús:

—Ca bzrin zra zua Juan gulenná bea da nadxixruj bea na, ne da bululé'e benne' ca' buluchálaje' waláz chee Dios. Na'a, ca na'te dxendxu dizra' chawe' ca gaca chú'udxu naga dxenná bea Dios, na' xúguté benne' dxelune' ba xuzre xelu'e na'.

¹⁷ Waca te chee xabáa, ne chee xezr la xu nigá, san quebe te chee tu da naxúaj na lu da nadxixruj bea na.

Benne' biu dxulusáne' nu'ula chee'
(Mt. 19.1-12; Mr. 10.1-12)

¹⁸ Na' gunná Jesús:

—Che tu benne' biu gusanē' zru'ule', ne súalēne' nu'ula xula, benne' biu nigá dxune' dul-la dxáchajne' xrba chee' xel-la wechaga na', na' benne' biu zúalēne' tu nu'ula ba bsan benne' chee' le', benne' nigá cá'anqueze dxune' dul-la dxáchajne' xrba chee' xel-la wechaga na'.

Tu benne' gunn'á, ne tu benne' xache'

¹⁹ Na' gunná Jesús:

—Guzúa tu benne' gunn'á, gúcuē' zra lanē' da zaca, ne da zri'a xrtan, na' xúgute zra bene' laní zren. ²⁰ Cá'anqueze guzúa tu benne' xache' le' Lázaro, nazrate we' lu bel-la' dxen chee', na' dxeajché'e lu xu dxu'a lizre benne' gunn'á na'. ²¹ Benne' xache' nigá guzá lazre' gawe' ca da dxelexruij zranla ga dxelagu benne' gunn'á na', na' bécudu ca' dxelelé'eba' lu we' ca' chee' Lázaro. ²² Bzrin zra gute benne' xache' na', na' belexché' gubáz chee' xabáa ca' le' zeajxezúalēne' Abraham lu lataj chawe' chee' Dios. Cá'anqueze gute benne' gunn'á na', na' bulucache' le'. ²³ Gate benne' gunn'á na' dxezaca zi'e lataj chul-la chee' benne' gate, na' guchisa lawē', na' blé'ene' Abraham zue' zitu', ne Lázaro zúalēne' le'. ²⁴ Nadxa gudxezre xe'e, gunné': "iXrae, Abraham, bexache lazre' neda', ne gusel-la Lázaro, cheajsebiē' tu zrube ne'e, na' xide' xucule' luzra' nigá! Dxezaca zi'a lu xi' nigá." ²⁵ Na' Abraham gunné': "Bi chia', bsa lazre' gúcalē'e chawe' chiu' lu xezr la xu, san Lázaro gúcalē'e da zi' da xa' chee'. Na'a le' dxezi'e da ba neza nigá, na' lue' dxezaca zi'u na'. ²⁶ Xetú da zua, zua tu chejáa zrentē laduj netu' ne le'e. Ca' naca na, che nu benne' zua nigá dxaca lazre' chéaje' naga zu', quebe gaca, ne quebe gaca benne' zua naga zu' xide' naga zúantu' netu'." ²⁷ Nadxa gunná benne' gunn'á na': "Dxata' xueda' lue', xrae Abraham, sel-lu' Lázaro lizre xra', ²⁸ naga zaj zra' gazxu' bi bícha'dau', chee' cheajchálajlēne'-be', chee' quebe xeledá' lebe' nigá xelezaca zi'be' ca dxaca chia'." ²⁹ Abraham gunné': "Zaj napē' da buluzúaj Moisés, ne benne' ca' buluchálaje' waláz chee' Dios. Dخال-la' xelená' xánnie' da na' naxúaj na." ³⁰ Benne' gunn'á na' bechebe': "Awe', xrae Abraham, san che nu benne' ládujla benne' gate chéaje' cheajchálajlēne' le', welexebí'i lazre'." ³¹ Abraham gunné': "Che quebe xelēne' ca da gulenná Moisés, ne benne' ca' buluchálaje' waláz chee' Dios, quebequeze xeléajle'e che tu benne' xebanē' ládujla benne' gate."

17

Ca naca da dxun na ga nabágdaxu dul-la

(Mt. 18.6-7, 21-22; Mr. 9.42)

¹ Jesús guzre' benne' ca' dxusédene':

—Welezúaqueze da xelún na xelebaga bēnneache dul-la, na' edxugúa bēnnea' gunē' da gun na xebaga benne' xula dul-la. ² Gácadxa chawe' chee' bēnnea' che nu guchéaj xiaj xiche lbe', na' chu'e lu nísadau' naga gátete' quézcala gunē' da gun na xebaga bidu caní dul-la. ³ Le guxúe xanne' cuínale.

'Che le sa' ljwezru' gunē' chiu' da calela, bzéajni'ine', na' che xebí'i lazre', bnite lau chee'. ⁴ Lácala gunē' chiu' da calela gazre lasa tu zra, na' gazre lasa xide' xe'e lue': "Dxexebí'i lazra'", dxal-la' gunite lau' chee'.

Xel-la waca chee' xel-la dxeajlí lazre'

⁵ Benne' gubáz ca' chee' Xránadxu gulē'e Le':

—Ben ga cheajlí lázredxantu' Dios.

⁶ Nadxa gunná Xránadxu:

—Che le'e zrué'ele xel-la dxeajlí lazre', lácala naca na láteze ca tu bínedu chee mostaza, waca xeḗe xaga zrentę nigá: “Gucuasa nigá, ne xeajsúa lu nísadau,” na' xaga na' guzúa na dizra' cheeḗe.

Da dxal-la' gun benne' wen zrin

⁷ Che tu benne' ládujla le'e zua tu benne' wen zrin chee', na' xelé'e le'e xixre' gate te gudé' bezre u guxúe' béadu ca', ¿we'e benne' wen zrin na': “Gudé nigala, gudxé'e gagu?” ⁸ Cabí, san nne': “Bcueza da gawa', ne gusí' chawe' le'u chee' gaca ca'u chia' da xi'aj gawa'. Te na' waca xi'aj gagu' lue'.” ⁹ ¿We'e benne' wen zrin na': “Xcalenu”, lawe' da beḗe' da gunná be'e xranę le'? Cabí. ¹⁰ Cá'anqueze le'e, gate xuzre gunle xúgute' da gunná be'e Dios le'e, dxal-la' nnale: “Nácantu' benne' wen zrin quebe bi zaj zaca, lawe' da quebe bi ne guntu' da zréndxala ca naca da nabáantu'.”

Jesús dxexune' chi benne' zaj de'e we' guzru'

¹¹ Ca zexíaj Jesús zéaję Jerusalén, gudé' lu xęzr la xu chee xęzre ca' zaj nababa Samaria, ne xęzre ca' zaj nababa Galilea. ¹² Gate bzrinę' tu xęzredau', bedajlechaga Le' chi benne' zaj de'e we' guzru', na' belezé' zítu'la, ¹³ ne gulebezre xę'e, dxelenné':

—Jesús, Benne' Wesęde, bexache lazre' netu'.

¹⁴ Gate ble'e Jesús le', na' gunné':

—Le chjaca le cheajlué'e cuínale lau bxruze ca'.

Dxácate' zjaque' na', na' belexexaque' chee xízrawe' chee'. ¹⁵ Nadxa tu benne' ca', gate guque' bé'ene' ba bexaque', na' bebi'e, dxue lá'ane' Dios du lazre'. ¹⁶ Bzu zribę' lau Jesús, ne gudíxrujte' lawe' lu xu, dxę'e Le': “Xcalenu'.” Benne' nigá naque' tu benne' Samaria. ¹⁷ Nadxa gunná Jesús:

—¿Quegá chie' na' belexexaque' lu xízrawe' na'? ¿Gazra na' xegué'? ¹⁸ ¿Tuze benne' zítu' nigá belá' güe lá'ane' Dios?

¹⁹ Nadxa Jesús guzre' benne' na' bexaque':

—Bexasa, bexíaj. Ba bexacu' lawe' da guxéajle'u chia'.

Ca la' xel-la dxenná bea chee Dios

(Mt. 24.23-28, 36-41)

²⁰ Benne' fariseo ca' buluchębe' Jesús bátala la' xel-la dxenná bea chee Dios, na' bechebe Le':

—Ca lá' xel-la dxenná bea chee Dios quebe naca na da lé'ele. ²¹ Quegá nu nna: “Nigá zua na”, u “Na' zua na”, lawe' da ba zua lu'ule le'e xel-la dxenná bea chee Dios.

²² Nadxa guzre' benne' ca' dxusédenę':

—Wazrín zra gate le'e gaca lázrele lé'ele tu zra zua' neda', Benne' Gulje' Bénneache, na' quebe lé'ele na. ²³ Che xelenná bénneache, xelé'e le'e: “Nigá zue”, u: “Na' zue”, quebe chéajle, ne quebe gaulę benne' ca'. ²⁴ Ca dxeajsúa xesa chalá'a zran xabáa, na' nalá'tęqueze na xechalá'a zran xabáa, ca'an gaca gate xelá' neda', Benne' Gulje' Bénneache, lu zra xelá'a neda'. ²⁵ Nédxula dxal-la' téle'a xel-la zí', na' benne' zaj zre'e lu zra na'a zra xuluzúe' neda' chalá'ala.

²⁶ Ca guca lu zra gate zua Noé, cá'anqueze gaca lu zra gate xelá'a neda', Benne' Gulje' Bénneache. ²⁷ Lu zra na' zua Noé gulé'aj gulawe', ne buluchaga ne'e, ne bulunęzruje' bi nu'ula chee' ca' lu xel-la wechaga na', cadxa bzrin zra guxú'u Noé lu da zren na' da dxedá lawe' nísadau', na' gücale'e xiuj, na' gulate xúgute' benne' ca'. ²⁸ Cá'anqueze guca lu zra zua Lot, gulé'aj gulawe', ne gulá'awe', ne belútie', na' gulaze', ne belunę' lizre', ²⁹ na' gate Lot bedxúaję' lu xęzre

Sodoma, na' ca dxaca gate dxaca xiuj, ca'an guca bexruij xi', ne da gache da dxuzéxzele'e zran xabáa, ne bzria xi na ca naca benne' ca'. ³⁰ Ca'an gaca lu zra xelá'a neda', Benne' Gulje' Bénneache.

³¹ 'Lu zra na', che nu benne' ze' chju'u chee', na' da de chee' zra na lu xu'u chee' na', quebe dxal-la' chu'e cuéajé' na, na' che nu benne' zué' le'e xixre', quebe dxal-la' xezrine' lizre'. ³² Le cheajsá lazre' ca guca chee' zru'ula Lot. ³³ Benne' dxaca lazre' gapa chi'e xel-la nabán chee' gunitie' na, na' bénnea' wdeé' na, wazrué'e bénnea' xel-la nabán.

³⁴ 'Dxapa' le'e, lu zre na', chupa benne' xelate' tu zren ga dxelase'. Tue' xeché'e, na' xetúe' xegá'ane'. ³⁵ Chupa nu'ula xelezré'e dxelútue'. Tue' xeché'e, na' xetúe' xegá'ane'. ³⁶ Chupa benne' xelezré'e le'e xixre'. Tue' xeché'e, na' xetúe' xegá'ane'.

³⁷ Gate belén benne' ca' da nigá, na' buluchebe' Jesús:

—¿Gazra gaca ca', Xran?

Le' bechebe':

—Naga de tu da nate, na' xeledúpaqueze laba ca'.

18

Da dxulé'e na ca naca chee' tu nu'ula ba gute benne' chee', ne benne' dxuchi'a da dxaca

¹ Jesús bchálaje' da dxulé'e na ca naca chee' gusedene' benne' ca' dxal-la' xuluwírajtecaze' Dios, ne quebe xelexebigue'. ² Na' guzre' benne' ca':

—Tu xezre guzúa tu benne' dxuchi'e da dxaca, na' quebe gudape' ba lá'ana Dios, ne cá'anqueze bénneache. ³ Lu xezre ná'queze guzúa tu nu'ula ba gute benne' chee'. Guxíaje' xeajnabe' lau benne' dxuchi'e da dxaca chee' guchi'e da dxaca chee' nen tu benne' dxune' chee' da calela. ⁴ Zane' lásate' benne' dxuchi'e da dxaca quebe guca lazre' guchi'e chee' nu'ula na', san ca gudé na' gunné' lu xichaj lázrdawe': Lácala quebe dxapa' ba lá'ana Dios, ne cá'anqueze bénneache, ⁵ san lawe' da nu'ula nigá dxune' neda' zede, guchi'a chaza' da dxaca chee' chee' quebedxa xide' gúnle'e neda' zede.

⁶ Na' gunná Xránadxu:

—Caní na' gunná benne' wen da calela na', benne' dxuchi'e da dxaca.

⁷ ¿Quebe guchi'a Dios da dxaca chee' benne' ca' ba guqué'e, benne' ca' dxelenné' Le' te zra, ne chizrela? ¿Wazrene' xechebe' chee' benne' ca'? ⁸ Dxapa' le'e, Le' guchi'e da dxaca chee', ne quebe chenge'. Gate xelá'a neda', Benne' Gulje' Bénneache, ¿wazréldexa' tu benne' lu xezr la xu nigá, benne' dxéajle' chia'?

Da dxulé'e na ca naca chee' tu benne' fariseo, ne tu benne' wechizruj

⁹ Jesús bchálaje' xetú da dxulé'e na, chee' xelene benne' ca' dxeléquene' zaj naque' xrlátaje, san dxuluzúe' chalá'ala le sa' ljwezre'. ¹⁰ Gunné':

—Chupa benne' xjaque' xudau' chee' xuluchálajlene' Dios. Tue' naque' benne' xudau' fariseo, na' xetúe' naque' wechizruj waláz chee' xezre zítu'.

¹¹ Benne' xudau' na' guzé' dxuchálajlene' Dios, gunné': “Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da calela, ne benne' dxelún dul-la dxeláchajne' xrba chee' wechaga na', ne quegá ca benne' wechizruj nigá. ¹² Neda' dxuna' gubasa chupa lasa da gazre zra, ne dxunna' chiu' tu cue' chee' da chi cue' da dxezi'a.” ¹³ Benne' wechizruj na' guzúe' dxu'a dxa xú'uze, ne quebe bexazrjne' chisa lawe' xabáa. Béle'e la chu'e, dxenné': “Dios, bexache lazre' neda', naca' benne' dul-la.” ¹⁴ Dxapa'

le'e, benne' wechizruj na' bezé'e xexíajé' lizre', ne bexaque' xrlátaje lau Dios, san quegá caní guca chee benne' xudau' na'. Ca' guca lawe' da benne' dxucá'ana szren cuine' wexéxrujla bénnea', san benne' dxucá'ana baxache' cuine' wegá'ana szrénqueze bénnea'.

Jesús dxenabe' gaca chawe' chee bidu ca'

(Mt. 19.13-15; Mr. 10.13-16)

¹⁵ Belezrín benne' ca' zaj naché'e bidu ca' lau Jesús chee guzé ne'e lebe'. Gate belelé'e benne' ca' dxusede Jesús da nigá, na' gulezú lawe' dxeledil-le' benne' ca'. ¹⁶ Jesús gunné' benne' ca' dxusedene', na' dxe'e le':

—Le güe lataj xelélé' bidu ca' naga zua', ne quebe guzágale-be', lawe' da benne' zaj naque' ca' bidu caní welexu'e naga dxenná bea Dios. ¹⁷ Da li dxapa' le'e, benne' quebe si' lu ne'e nna bea Dios le' ca' dxelún bidu caní, quebequeze chu'e naga dxenná bea Dios.

Tu benne' cuide' naque' benne' gunní'a

(Mt. 19.16-30; Mr. 10.17-31)

¹⁸ Tu benne' xíchaje bchebe' Jesús:

—Benne' Weseđe xrlátaje, ¿bi da dxal-la' guna' chee zrué'eda' xel-la nabán zeajlí canna?

¹⁹ Jesús guzre' le':

—¿Bizr chee na' dxennáu' naca' xrlátaje? Netú benne' quebe naque' xrlátaje. Tuze Dios naque' xrlátaje. ²⁰ Lue' núnbe'u ca' zaj naca xrba chee Dios: Quebe gunu' dul-la da dxachaj na xrba chee wechaga na'. Quebe gutiu' benne'. Quebe cuanu'.

Quebe nneu' chee le sa' ljwezru' da quebe naca na.

Gudapa ba lá'ana xra xrna'u.

²¹ Benne' na' guzre' Jesús:

—Xúgutę da caní dxuna' ne nácatea' bídau'tę.

²² Gate ben Jesús da nigá, na' guzre'-be':

—Ne dxexájrjenu' xetú da dxal-la' gunu'. Bęte ca naca da de' chiu', na' bnezruj na chee benne' xache' ca'. Nadxa gapu' xel-la gunní'a lu xabáa chee Dios. Na' gudá sálęnu' neda'.

²³ Gate benne' cuide' na' benne' da nigá, bewí'inele'ęne' lawe' da nápalę'e da gunní'a. ²⁴ Gate ble'e Jesús ca bewí'ine benne' na', gunné':

—Stébetę naca chee benne' gunní'a ca' xellexú'e naga dxenná bea Dios.

²⁵ Chadídxala te tu bea zren lu negue' tu xeche' zriche quegala chu'u tu benne' gunní'a naga dxenná bea Dios.

²⁶ Na' benne' ca' dxelenne' gulenné':

—Che ca' naca na, ¿núzraqueze la?

²⁷ Jesús guzre' benne' ca':

—Da quebe gaca xelún bénneache, waca Dios gúnqueze' na.

²⁸ Na' gunná Pedro, guzre' Jesús:

—Xran, ba bsantu' ca da gudápantu' chee zálęntu' Lue'.

²⁹ Nadxa Jesús bechebe':

—Da li dxapa' le'e, núteteze benne' gusané' lizre', u xra xrne'e, u bi biche', bi zane' ca', u zru'ulę', u zrí'ine' ca', chee gunę' zrin chee xel-la dxenná bea chee Dios, ³⁰ benne' nigá wazi'e da zrendxa lu xęzr la xu nigá, na' lu xęzr la xu da za za' wazi'e xel-la nabán da zeajlí canna.

*Jesús dxuchálaję' xecha lasa ca gaca gate gatię'**(Mt. 20.17-19; Mr. 10.32-34)*

³¹ Na' Jesús gunné' chala' ala benne' chazrinnu ca' dxusédene', na' guzre' le':
 —Na'a zexiajdxu Jerusalén, naga gaca li ca naca da buluzúaj benne' ca' buluchálaję' waláz cheę Dios ca gaca chia' neda', Benne' Gulję' Bénneache.
³² Benne' zaj zre'ę Jerusalén xuludéę' neda' lu na' benne' zitu' ca', na' xelún le' chia', ne xelennéqueze' schanni' chia', ne wuluzráqueze' neda' zrene'ę.
³³ Welúequeze' neda', na' te na' xelútię' neda', na' zra guxunne' zra xebana' ládujla benne' gate.

³⁴ Benne' ca' quebe gulėjajni'ine' da nigá, ne quebe zaj nézene' bi cheę na' dxuchálajęne' le', lawe' da zaj naca da quebe guca xelėjajni'iquezne'.

*Tu benne' la chul-la, benne' zue' xezre Jericó**(Mt. 20.29-34; Mr. 10.46-52)*

³⁵ Gate Jesús bzrinę' gagu naga zua xezre Jericó, na' dxe' tu benne' la chul-la dxu'a neza dxenabe' guna'. ³⁶ Gate benne' dxeledé benne' zante, na' benne' la chul-la na' bchebę' benne' ca' bizra na' dxaca na. ³⁷ Na' gulé'ę le':

—Jesús, benne' Nazaret dxedéę' nigá.

³⁸ Nadxa gudxezre xa'a la chul-la na', gunné':

—jJesús, Zri'ine David, bexache lazre' neda'!

³⁹ Benne' ca' zaj zria lawe' lau Jesús guledil-le' benne' la chul-la na' cheę suę' zrize, san gudxezre xá'adxá le', dxenné':

—jZri'ine David, bexache lazre' neda'!

⁴⁰ Nadxa gugá Jesús, na' gunná bé'ene' xeaјlexri'ę le'. Gate ble'ę lau Jesús, na' Jesús bchebę' le':

⁴¹ —¿Bi dxaca lazru' guna' chiu'?

Bechebe la chul-la na':

—Xran, dxaca lazra' xelé'eda'.

⁴² Jesús guzre' le':

—Gaca ca dxennáu'. Ba bexacu' lawe' da guxéajle'u chia'.

⁴³ Zra ná'queze belé'e benne' la chul-la na', na' guxíajlene' Jesús, dxue lá'ane' Dios. Xúgute' benne' ca' belelé'ene' da nigá cá'anqueze belúe lá'ane' Dios.

19*Jesús dxuchálajęne' Zaqueo*

¹ Nadxa Jesús guxú'ę xezre Jericó, ne dxedéę' xezre na'. ² Lu xezre na' zua tu benne' gunni'a le' Zaqueo. Naque' xíchaję cheę benne' wechizruj ca'. ³ Benne' nigá dxaca lazre' gúnbe'e Jesús, san quebe guca lé'ene' Le' lawe' da zaj zra' benne' zante na', na' Zaqueo na' quebe naque' benne' tunna. ⁴ Nadxa guxíaj chęgüę' guzria lawe', ne cheę gaca lé'ene' guluéne' tu lu xaga zren da zua gagu naga dxal-la' te Jesús. ⁵ Gate gudé Jesús na', gunné'ę lu xaga na', ne guzre' le':
 —Zaqueo, bexétajche, lawe' da na'a dxun na ba xen xegá'ana' lizru'.

⁶ Nadxa Zaqueo na' bexétaję' chadí, na' nen dutę xel-la dxebe' guzi' lu neę Jesús. ⁷ Gate belelé'e benne' ca' da nigá, xúgute' gulezú lawe' dxelezí tizre' Jesús, dxelenné':

—Jesús bzrinę' begá'ane' lizre tu benne' dul-la.

⁸ Nadxa Zaqueo na' guzé', na' guzre' Xránadxu:

—Gunná'xque, Xran, gunézruja' benne' xache' ca' gáchajte ca da de' chia', na' che nu benne' bsaca zia' le', xunézruja' tapa cue'la cheę'.

⁹ Na' Jesús guzre' le':

—Na'a bla' xel-la weselá lu xu'u nigá, lawe' da nácaqueze benne' nigá xrtia Abraham. ¹⁰ Ca' naca na lawe' da bla' neda', Benne' Gulje' Bénneache, chee xexíajaja', ne guselá' benne' ca' zaj nanítie'.

Da dxulé'e na ca naca chee chi dumí zaca

¹¹ Dxácaté na' dxuluzé naga benne' ca' dxenná Jesús da caní, na' bchálaje' tu da dxulé'e na lawe' da ba zue' gáguze xezre Jerusalén, na' benne' ca' dxeléquene' zra ná'queze nna bea Dios lu xezr la xu nigá. ¹² Nadxa guzre' benne' ca':

—Guzúa tu benne' gunní'a xrlátaje, na' dxal-la' chéaje' zitu' chee xuluzúe' le' gaque' wenná bea, na' te na' xezrine' lazrie'. ¹³ Gate za se'e, gunné' chi benne' wen zrin chee', na' bnézruje' tu tu benne' ca' tuwéaj dumí zácale'e, ne guzre' benne' ca': "Le guchine dumí nigá cadxa xelá'a." ¹⁴ Benne' zaj zre'e lázrie' dxelecuídené' le', na' gulesel-le' bal-la benne' gubáz chee' naga zéaje' chee cheajleguezre' benne' zaj zre'e na': "Quebe dxaca lázrentu' gaca benne' nigá wenná bea cheentu'." ¹⁵ Buluzúe' le' gaque' wenná bea, na' bezrine' lázrie'. Gate bezrine' gunné' benne' wen zrin ca' bnézruje' dumí, chee nézene' ájate bezí' tu tu benne' ca'. ¹⁶ Benne' nedxu bzrine' lawe', na' gunné': "Xran, dumí chiu' ba bezí' na chi cue'la." ¹⁷ Wenná bea na' bechebe': "Chawe' benú'. Nacu' wen zrin xrlátaje. Lawe' da gucu' li lazre' lu late' da benna' lue', na'a guna' lue' benne' nna be'ene' chi xezre ca'." ¹⁸ Na' bzrin xetúe' lawe', na' gunné': "Xran, dumí chiu' ba bezí' na gazxu' cue'la." ¹⁹ Cá'anqueze guzre' benne' nigá: "Lue' gacu' benne' nna be'ene' gazxu' xezre ca'." ²⁰ Nadxa xetúe' bzrine', na' gunné': "Xran, nigá de' dumí chiu'. Bcache chawa'a na tu lu bazxu, ²¹ lawe' da bzreba' lue'. Nacu' tu benne' dxuzúa xuzre. Dxexeca'u da quebe guxru', ne dxexelapu' naga quebe guzu'." ²² Nadxa wenná bea na' guzre' le': "Wen zrin calela. Ca dizra' da gunnéu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxru'a, ne dxelapa' naga quebe guza', ²³ ¿bizr chee' na' quebe xju'u dumí chia' lu na' benne' xuluchínene' na, chee xezí' lu na'a neda' dumí chia' nen da gun xíchaje na, gate xezrina' neda' lizra'?" ²⁴ Nadxa guzre' benne' ca' zaj zre'e na': "Le xecá'a dumí na' lu ne'e, na' le gunezruj na benne' nape' chi dumí ca'." ²⁵ Benne' ca' gulé'e le': "Xran, ba nape' chi dumí." ²⁶ Na' bechebe' wenná bea na': "Dxapa' le'e, benne' nape' wazidxe' da zrendxa, na benne' quebe nape', wecá'a ca da du nape'. ²⁷ Na'a, ca naca chee' benne' ca' quebe gulaca lazre' gaca' neda' wenná bea chee', le cheajxri'e nigá, ne le gutie' lawa' neda'."

Jesús dxexu'e Jerusalén

(Mt. 21.1-11; Mr. 11.1-11; Jn. 12.12-19)

²⁸ Ca gudé gunné' da nigá, na' bexú'u Jesús neza zexíaje' Jerusalén. ²⁹ Gate ba zua xezrine' xezre Betfagé, ne xezre Betania, ne zue' gáguze naga zua Xí'a Xaga Olivo, na' gusel-le' chupa benne' ca' dxusédene'. ³⁰ Guzre' le':

—Le chjaca xézredu na' zua gáguze, na' ca zrinle na' lé'ele tu burru da'ba' xaga, be' netú quebe nu ne cuía leba'. Le sezre-ba', na' le che'-ba' nigá. ³¹ Che nu naba le'e bizr chee' na' dxesézrele-ba', le xe'e Xránadxu nachínene'-ba'.

³² Na' gusiá'ca benne' ca', na' belelé'ene' xúgute' naca na ca ba guzre Jesús le'.

³³ Na' gate dxelesezre' búrrua', na' xránaba' buluchebe' le':

—¿Bizr chee' na' dxesézrele búrrua'?

³⁴ Benne' chupa ca' belexechebe':

—Lawe' da nachine Xránadxu leba'.

³⁵ Na' beleché'e-ba' lau Jesús, na' belexrúe' xicha chee' cúzruba', na' bu-luzrié' Jesús cúzruba'. ³⁶ Ca zeaj Jesús, xu'e neza zrie' búrrudu na', na' dxelechiluj benne' ca' xicha chee' la neza naga té'e'. ³⁷ Gate bzrine' gagu naga naca létajla chee' Xi'a Xaga Olivo, xúgute' benne' ca' zaj de'e Le' gulezú lawe' dxelebezre xe'e lu xel-la dxelebé, ne dxelúe lá'ang' Dios ca naca xúgute' xel-la waca chee' xabáa da belelé'ene'. ³⁸ Gulenné':

—La'azxa naca wenná bea, benne' za' waláz chee' Xránadxu Dios. Gaca xel-la dxebeza zri lazre' da za xabáa, ne gaca ba Dios.

³⁹ Nadxa bal-la benne' fariseo ca' zaj zra' ládujla benne' ca' gulé'e Jesús:

—Benne' Wesede, gudil-la benne' caní zaj de'e Lue'.

⁴⁰ Jesús bechebe':

—Dxapa' le'e, che benne' caní xelezúa zrig', xiaj caní xebebezre xa'a na.

⁴¹ Gate bzrine' gagu xezre Jerusalén, ne ca blé'ene' na, na' gudxezre Jesús ca naca chee' na. ⁴² Na' gunné':

—La chéajni'ile lu zra cheele nigá da gaca gunna cheele xel-la dxebeza zri lazre'. Na'a da na' nagache na, na' quebe gaca lé'ele na. ⁴³ Welezrín zra gaca cheele da zrinnaj, gate benne' dxelecuídene' le'e xeléchaje' ze'e dxu'a xezre cheele, ne xuluzague' le'e gátetze na', ⁴⁴ na' xuluchínnaje' xezre cheele. Na' xelútie' ca naca benne' zaj zre'e nigá, na' quebe xuluxucá'ang' tu xiaj cuzru ljwezre na. Caní gaca cheele lawe' da quebe gúquebe'ele zra bla' Dios chee' gácalene' le'e.

Jesús dxucá'ana chawe' chale'aj xudau'
(Mt. 21.12-17; Mr. 11.15-19; Jn. 2.13-22)

⁴⁵ Nadxa guxú'u Jesús chale'aj xudau', na' guzú lawe' dxebéaje' na' benne' ca' dxelutie', ne dxelá'awe' na'. ⁴⁶ Na' guzre' benne' ca':

—Lu xiche chee' Dios dxenné': "Lizra' naca na xu'u naga guchálajlele neda'," na' le'e nunle na ca tu lizre gubán ca'.

⁴⁷ Tu zra tu zra Jesús dxusédené' benne' ca' zaj zra' chale'aj xudau'. Benne' xíchaje' ca' chee' bxruze, ne benne' dxuluxuzájle'e da nadxixruj bea na, ne benne' xu'u lawe' chee' xezre na' dxelílaje' ájala xelune' xelútie' Le'. ⁴⁸ Quebe belezrélene' ájala xelune', lawe' da dxuluzé naga xanne' xúgute' benne' ca' Jesús, chee' xelenne' ca da dxenné'.

20

Ca naca xel-la dxenná bea napa Jesús
(Mt. 21.23-27; Mr. 11.27-33)

¹ Tu zra gate zua Jesús chale'aj xudau' dxusédené' benne' ca', ne dxuchálajlene' le' ca naca dizra' chawe' chee' Dios, na' belezrín na' benne' xíchaje' ca' chee' bxruze ca', ne benne' ca' dxuluxuzájle'e da nadxixruj bea na, ne benne' gula sina ca', ² na' gulé'e Le':

—Gunná bi xel-la dxenná bea napu' dxunu' da caní. ¿Nuzra benna lue' xel-la dxenná bea nigá?

³ Na' gunná Jesús:

—Cá'anqueze neda' gucheba' le'e tu. Le xechebe chia'. ⁴ ¿Nuzra gusel-la Juan guchúe' bènneache nisa? ¿Dios che bènneache?

⁵ Na' gulezú lawe' dxelé ljwezre':

—¿Bizra nnadxu? Che nnadxu gusel-la Dios le', na' guchebe' dxi'u: "¿Bizra chee' na' quebe guxéajlele chee'?" ⁶ Che xedxu Le', bènneache gulesel-le' le',

benne' zaj zře'ë nigá wuluzríe' dxi'u xiaj, lawe' da zaj neze xánnie' bchalaj Juan waláz chee Dios.

⁷ Nadxa belexechebe' quebe zaj nézene' nu gusel-la Juan bchue' bënneache nisa. ⁸ Na' Jesús guzre' benne' ca':

—Cá'aqueze neda' quebe xapa' le'e bi xel-la dxenná bea napa' dxuna' da caní.

Da dxulé'e na ca naca chee benne' wen zrin calela ca'
(Mt. 21.33-44; Mr. 12.1-11)

⁹ Na' guzú lau Jesús dxuchálajlene' benne' ca' zaj zře'ë na', dxuchálaje' da dxulé'e na, dxenné':

—Guzúa tu benne' bde'ë lba uva lu xezr la xu chee', na' ca gudé na' bca'ane' na lu na' benne' wen zrin ca', na' guzé'ë na' zane' iza. ¹⁰ Gate bzin zra xuluchibe' uva ca', na' gusel-le' tu bi wen zrin chee' zeajxenábabe' tu cue' chee' lina na' da dxal-la' xezi'e, san benne' wen zrin ca' buluzálaje'-be', na' belexesel-le'-be' cá'aze. ¹¹ Nadxa xrane lina na' gusel-le' xetú bi wen zrin chee', na' cá'aqueze bi nigá bulucháchalene'-be', ne buluzálaje'-be', na' belexesel-le'-be' cá'aze. ¹² Xrane na' gusel-le' xetú bi wen zrin chee', na' benne' wen zrin ca', cá'aqueze belune'-be' zi', na' belexebéaje'-be' lu lina na'.

¹³ 'Naga xeajche'te na, xrane na' gunné': "¿ájazra guna? Sel-la' zri'ina' nazrí'ite lazra'. Gate xeelé'enge'-be' nalja xelape'-be' ba lá'ana." ¹⁴ Na' gate benne' wen zrin ca' belelé'enge'-be', na' gulé ljwezre': "Bi nigá xezí' lu na'be' da de chee' xránadxu. Gútedxu-be', chee' gácadxu xrane na dxi'aqueze." ¹⁵ Nadxa belexebéaje'-be' lu xezr la xu na', na' belutie'-be'.

Nadxa Jesús bchebe' benne' ca':

—¿Bizra gun xrane na' chee' benne' wen zrin ca'? ¹⁶ Xelé'ë, na' gutie' benne' wen zrin ca', na' gudé'ë xezr la xu na' lu na' benne' xula ca'.

Gate belén benne' ca' ca' gunná Jesús, na' gulenné':

—Dios quebe gu'e lataj gaca ca'.

¹⁷ Na' Jesús gunné'ë benne' ca', na' gunné':

—¿Bizra zéaje' da naxúaj na lu xiche chee' Dios? Dxenné' caní:

Xiaj na' da buluzúa benne' wen xu'u ca' chalá'ala,
le na' naca na xiaj blau.

¹⁸ Núteteze benne' cheajchazie' lawe' xiaj na', na' chúzrujqueze bënnea', na' che xiaj na' xexruj na lawe' nu benne', gútute' na le'.

Ca naca chee' da dxuchizruj xezre zi'tu'
(Mt. 21.45-46; 22.15-22; Mr. 12.13-17)

¹⁹ Benne' xíchaje' ca' chee' bxruze ca', ne benne' ca' dxuluxuzájle'ë da nadxizruj bea na gulaca lazre' xelee' Jesús zra ná'queze, lawe' da guleque bé'enge' bchalaj Jesús da dxulé'e na ca zaj naca le', san belezrebe' da xelún bënneache ca'. ²⁰ Nadxa gulesel-le' benne' ca' xuluzuzre' Jesús, benne' xululé'e cuine' ca benne' xrlátaje' ca'. Benne' caní dxelaca lazre' xelee' Jesús dizra' chee' xelee'equene' xuludé' Le' lu na' bënnea' dxenná be'e. ²¹ Chee' xelune' da nigá, buluchebe' Le':

—Benne' Wesede, nézentu' dxennáu', ne dxusédenu' da naca li lazre', ne quebe dxuchi'u chee' bënneache cáteze dxululé'e cuine', san lu da li dxusédenu' da naca chee' Dios. ²² Guzre netu', ¿naca na chawe' guzrujdxu da dxuchizruj César, bënnea' dxenná bé'enge' duté xezr la xu, che cabí?

²³ Dxeque be'e Jesús ca naca da dxelaca lazre' xelune' chee', na' guzre' benne' ca':

—¿Bizr chee na' dxaca lázrele gun xálele neda'? ²⁴ Le gulé'e neda' tu dumí. ¿Nuzra lu'a na' da na nigá, ne nu la naxúaj nigá?

Benne' ca' belexechebe':

—Chee benne' dxenná bea na'.

²⁵ Nadxa gunná Jesús:

—Le gunezruj bénnea' da naca chee', na' le gunezruj Dios da naca chee Dios.

²⁶ Quebe gulezéquene' xelún xálene' Jesús ca naca da bechebe' lau benne' ca'. Belexebáne' ca naca da bechebe', na' gulezúa zrie'.

Ca gaca gate xelexebán benne' gate

(Mt. 22.23-33; Mr. 12.18-27)

²⁷ Ca gudé na' bal-la benne' xudau' saduceo ca' belezrine' lau Jesús. Benne' saduceo ca' dxeléquene' quebe xelexebán benne' gate, na' gulé'e Jesús:

²⁸ —Benne' Wesede, Moisés bzúajé' cheentú' che tu benne' gate', ne gucá'ane' zru'ule', ne che quebe nu chilá' zrí'ine', na' bi biche bénnea' dxal-la' guchaga na'abe' nen nu'ula na' gute benne' chee' chee galaj tu bidau' gácabe' ca zrí'ine' bénnea' ba gútee'. ²⁹ Gulezrá' gazre benne' gulaque' zrí'ine tuze xre'. Bi nedxu bchaga na'abe' nen tu nu'ula, na' gútebe', quebe nu chilá' bi cheebe'. ³⁰ Bi gudxupe' bchaga na'abe' nen nu'ula na', ne cá'anqueze gútebe' quebe nu chilá' bi cheebe'. ³¹ Nadxa bi guxunne' bchaga na'abe' nen nu'ula na', na' cá'anqueze belún bi ca' xezica, na' bi gazre ca' gulátebe' quebe nu chilá' bi cheebe'. ³² Naga xeajche'te na, na' gute nu'ula na'. ³³ Gate xelexebán benne' gate, ¿nula bi ca' gaca zrú'ulabe' nu'ula na', lawe' da ca naca bi gazre ca' buluchaga na'abe' nen nu'ula na'?

³⁴ Nadxa bechebe Jesús:

—Lu xezr la xu nigá dxuluchaga na' benne' biu ca' nen nu'ula ca'. ³⁵ Na' benne' ca' naca chee' xelexexú'e xezr la xu da za za', ne chee xelexebane' ládujla benne' gate, québedxa xuluchaga ne'e, ne québedxa xulunézruje' zrí'ine' lu xel-la wechaga na'. ³⁶ Ca'an gaca lawe' da quebe nu gátedxa na'. Xelaque' ca zaj naca gubáz chee xabáa ca', ne xelaque' bi chee Dios lawe' da belexebane'. ³⁷ Moisésqueze, gate bzuaie' ca guca chee bisigá da guzúa na' xi', dxulé'engé' dxi'u dxal-la' xelexebán benne' gate. Naga naxúaj da nigá dxenná na ca naca chee Dios, naque' Dios chee Abraham, ne Dios chee Isaac, ne Dios chee Jacob. ³⁸ Díos quebe naque' Díos chee benne' gate ca'. Naque' Díos chee benne' ban ca', lawe' da lau Le' zaj naca ban xúgute' bènneache.

³⁹ Nadxa bal-la benne' ca', benne' dxuluxuzájle'e da nadxixruj bea na gulé'e Jesús:

—Cháwedau' dxennáu', Benne' Wesede.

⁴⁰ Québedxa belexájrje' bi xuluchebe' Jesús.

¿Nu benne' naca Cristo zrí'ine'?

(Mt. 22.41-46; Mr. 12.35-37)

⁴¹ Jesús guzre' le':

—¿Bizr chee na' dxennale le'e naca Cristo zrí'ine David? ⁴² Davidqueze gunné' lu xiche naga zaj naxúaj salmo ca':

Xránadxu Dios guzre' Xrana':

“Gudxé'e cuita' xabe'la chia',

⁴³ Cadxa guzúa' benne' dxelecuídene' lue' ca' zran ni'u.”

⁴⁴ ¿ájazra chee na' naca Cristo zrí'ine David, na' Davidqueze dxé'e Le': “Xran”?

Jesús dxenné' chee benne' ca' dxuluxuzájle'e da nadxixruj bea na

(Mt. 23.1-36; Mr. 12.38-40; Lc. 11.37-54)

⁴⁵ Ca naca benne' ca' zaj zra' na' dxuluzé nague' chee Jesús gate guzre' benne' ca' dxusédene':

⁴⁶ —Le guxúe xanne' cuínale chee benne' ca' dxuluxuzájle'e da nadxixruj bea na, lawe' da dxeledánene' dxeledé' zaj nague' zre' tunna, ne dxelaca lazre' xelapa bénneache le' ba lá'ana lawe' xi'a ca', ne dxelebé'e lu lataj blau ca' lu xu'u naga dxezrágale, ne lataj blau ca' naga dxelawe' zruae. ⁴⁷ Benne' caní dxelequé'e ca naca lizre nu'ula ca' ba gulate benne' chee', na' chee' xulucá'ana cuine' xrlátaje lau bénneache ca' dxululawízraje' Dios da tunna lu xu'u ca' naga dxezrágale. Benne' caní xelezaca zídxaqueze'.

21

Dumí da bnezruj tu nu'ula xache' ba gute benne' chee'
(Mr. 12.41-44)

¹ Gate zua Jesús chale'aj xudau', blé'ene' benne' gunnía' ca' dxelegú'e dumí lu xí'ina chee' xudau'. ² Na' blé'ene' tu nu'ula naque' benne' xache', ne ba gute benne' chee', gulu'e chupa dumí'au'. ³ Na' gunná Jesús:

—Da li dxapa' le'e, nu'ula xache' nigá gulú'udxe' da zrendxa ca benne' gunnía' caní, ⁴lawe' da dxelegú'u benne' ca' chee' da dxutínneze na, san nu'ula nigá, lu xel-la baxache' chee' bné'zruje' ca naca da nape' da nunte' gawe'.

Jesús dxuchálaje' ca gaca gate cuía xi' xudau'
(Mt. 24.1-2; Mr. 13.1-2)

⁵ Bal-la benne' dxuluchálaje' ca naca chee' xudau' na', ne chee' xiaj xrtante' da zaj zrále'e na ze'e xudau' na', ne chee' da xrtan da bulunezruj benne' chee' xudau' na'. Nadxa gunná Jesús, dxé'e le':

⁶ —Wazrín zra gate xelebía xi' xúgute' da caní dxelé'ele, ne quebe xegá'ana netú xiaj cuzru ljwezre na.

Da xululé'e na gate cheajsé chee' xezr la xu nigá
(Mt. 24.3-28; Mr. 13.3-23)

⁷ Nadxa benne' ca' buluchebe' Jesús:

—Benne' Wesede, ¿bata gaca da na'? ¿Bi gulé'e na gate ba za xelaca da caní?

⁸ Jesús gunné':

—Le guxúe xanne' cuínale, ne quebe güele lataj nu si xe le'e, lawe' da xeledá' benne' zante' benne' xulusí' cuine' La' neda', xelenné' zaj naque' Cristo, ne xelenné' ba bzrin zra. Quebe chéajlele benne' ca'. ⁹ Gate xénele dxaca wedilla, ne xeledábague' bénneache xu'u lawe', quebe zrébele, lawe' da dxal-la' gaca da caní nedxu, san quebe ne zrin zra cheajsé chee' xezr la xu nigá.

¹⁰ Nadxa guzre' benne' ca':

—Bénneache tu xezr la xu xeledíl-lale' bénneache xetú xezr la xu, na' benne' tu xezre xeledíl-lale' benne' xetú xezre. ¹¹ Wazrú'le'eqeze, ne gácale'e gubina', ne gáta'le'e xízrawe' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

¹² Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché'e le'e lu xu'u ca' ga dxelezrague' chee' xelechugue' ca xeluné' chee'le, na' xelegú'e le'e lizre xia, ne xeleché'e le'e lau benne' wenná bea ca', ne lau benne' xu'u lawe' ca' lawe' da nácale neda' tuze. ¹³ Gate gaca da caní gata' lataj guchálajlele benne' ca' ca naca chia' neda'. ¹⁴ Le guzúa chacha lázra'uale, quebe gucuézale nédxula da dxal-la' nnele, ¹⁵ lawe' da gunna' neda' le'e dizra', ne xel-la sina da quebe xezezeque benne' dxeledábague' le'e bi xelenné' chee' na. ¹⁶ Wuludéqueze bénneache le'e lu na' benne' dxeledábague'

le'e. Caní xelúnqueze xra xrnale, ne bi bíchele, ne xrtia ljwézrele, ne bi ljwézrele ca'. Welútequeze' bál-lale le'e, ¹⁷ na' xúgute bénneache welecuídenē' le'e lawe' da nácale neda' tuze, ¹⁸ san quebe nite tu xicha xíchajle lau Dios. ¹⁹ Che sua cháchale, na' gápale xel-la nabán.

²⁰ 'Gate lé'ele zaj naxechaj benne' dxjaque' wedil-la xezre Jerusalén, na' nézele ba za cuía xí' xezre nigá. ²¹ Lu zra na', benne' zaj zre'e xezre ca' zaj nababa Judea dxal-la' xuluzrúmmujē' chjaque' lu xi'a ca', na' benne' zaj zre'e xezre Jerusalén dxal-la' xeledxúajē' na', na' benne' zaj zre'e le'e xixre' quebe dxal-la' xelexezrine' xezre na'. ²² Lu zra ca' Dios gudēe' benne' ca' lu da zi' da xa', na' gaca li ca naca da naxúaj na lu xiche chee Dios ca dxal-la' gaca chee benne' ca'. ²³ Edxugúa nu'ula zaj zuē' zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le'e da xelezaca bénneache ca', na' gaca tu da ba xa' zrente chee benne' ca'. ²⁴ Bal-le' xelatie' lu wedil-la na', na' xebal-le' xelechē'e le' zaj nadxéajē' tu tu xezr la xu ca', na' benne' zitu' ca' xululéajē' xezre Jerusalén cadxa cheajsē chee zra xelenná bea benne' zitu' ca'.

Ca gaca gate xelá' Benne' Gulje' Bénneache
(Mt. 24.29-35, 42-44; Mr. 13.24-37)

²⁵ Na' gunná Jesús:

—Lu zra na' xelata' da xululé'e na lau gubizra, ne lau beu', ne lau belaj ca', na' lu xezr la xu xelexúia stebe benne' ca', ne xelezrebe' ca naca schaga' da gun nísadau', ne xeajxruza chee na. ²⁶ Benne' ca' xelate ni'a ne'e ne chee xel-la dxelezrebe gate xulusá lazre' ca da dxal-la' gaca lu xezr la xu, ne ca naca da zaj zra' zran xabáa, da zaj napa xel-la waca xelexrízequeze na. ²⁷ Lu zra na' xelexlé'equenzē' neda', Benne' Gulje' Bénneache, xelá'a tu lu beuj, nen dute xel-la waca zren, ne da xabáa chia'. ²⁸ Gate su lau gaca da caní, le gun dipa lázrele, ne le chisa xíchajle, lawe' da ba za zrin zra lale lu da dxaca chee.

²⁹ Nadxa bchalaj Jesús tu da dxulé'e na, gunné':

—Le nna'xque xaga higo, u bíteteze xaga. ³⁰ Gate lé'ele ba dxezría na laga' dxe'ene, nézquezle le'e ba za xaca beu' la. ³¹ Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

³² 'Da li dxapa' le'e, xúgute da caní xelaca na néxdudxa gate quebe ne xelate bénneache zaj zra' lu zra na'a zra. ³³ Xabáa, ne xezr la xu weledé chee na, san dízra' chia' quebe te chee na.

³⁴ Le guxúe xanne' cuínale, quebe güele lataj xelú'u lu xichaj lázrdaule da calela ca' ca naca xel-la dxagu xrata, ne xel-la dxezuzre, ne xel-la dxezá lazre' da naca chee xezr la xu nigá, chee quebe gácale ca tu benne' nachúl-lene' lu xichaj lázrdawē' gate zrin zra na', ³⁵ ne chee quebe gaca na ca tu da quēla na le'e, lawe' da caní gaca chee xúgute benne' zaj zre'e lu xezr la xu nigá. ³⁶ Le sua le'e ban lazre', ne le naba lau Dios chee gaca lale lu da dxal-la' gaca lu xezr la xu nigá, ne chee gaca gulé'e cuínale du lázrele lawa' neda', Benne' Gulje' Bénneache.

³⁷ Jesús bsédenē' benne' ca' lu xudau' te zra, na' chizrela dxexíajē' lu Xi'a Xaga Olivo. ³⁸ Xúgute benne' ca' belezrine' lu xudau' na' xugu' zila chee xelenne' chee Jesús.

22

Dxelunē' tuze dízra' xelexē' Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ba zua gagu laní gate dxelawé' xeta xtila da quebe nachixre cua zichaj chee xeta xtila, da naca na Laní Pascua gate dxulusá lazre' ca da ben Dios gate bebéaje' bènneache chee' lu xezr la xu Egipto. ² Lu zra ca' benne' xíchaje ca' chee bxruze ca', ne benne' ca' dxuluxuzájle'e da nadxixruj bea na belílaje' ájala xelune' xelútié' Jesús bagácheze, lawe' da dxelezrebe' da xelún benne' zan ca'.

³ Nadxa guxú'u Satanás da xriwe' lu lázrdau Judas, bènnea' cá'anqueze le' Iscariote. Naque' tu benne' chazrinnu gubáz ca' chee Jesús. ⁴ Judas nigá guxiaje' xejchálajlene' benne' xíchaje ca' chee bxruze ca', ne benne' blau ca' chee xudau', na' bchálajlene' benne' ca' ájala gune' gudée' Jesús lu na' benne' ca'. ⁵ Benne' caní gulebene', na' gulechebe lazre' xulunézruje' le' dumí. ⁶ Judas na' guzú' lu ne'e dumí na' guzú lawe' dxílaje' ájala gune' gudée' Jesús lu na' benne' ca' gate quebe nu chilá' benne'.

Da dxágudxu chee cheajsá lazrdxu ca gute Xránadxu

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Bzrin zra laní gate dxelawé' xeta xtila da quebe nachixre cua zichaj chee xeta xtila, gate dxal-la' xelútié' zríla'dau' ca' chee Laní Pascua. ⁸ Na' Jesús gusel-le' Pedro ne Juan, na' guzre'-be':

—Le chjaca, ne le gucuéza da gágudxu chee Laní Pascua.

⁹ Benne' caní buluchébe' Le':

—¿Ga dxaca lazru' gucuézentu' na?

¹⁰ Na' bechébe Jesusen':

—Gate chu'ule lu xezre, na' xezrágale tu benne' biu zenu'e tu dxe'e nisa. Le hjácalene' xu'u naga xezrine', ¹¹ na' le xé xrane xu'u na': "Benne' Wesede dxe'e lue': ¿Ga zua xu'u naga gágulena' benne' ca' dxusédea' zríla'dau' chee Laní Pascua?" ¹² Nadxa gulé'ene' le'e tu xu'u zren da zua chupa cuia sibe, da bache nucá'ana chawe'. Le gucuéza da gágudxu na'.

¹³ Benne' ca' xjaque', na' belezrélene' xúgute' ca da ba guzre Jesús le', na' bulucueze' da xelawé' chee Laní Pascua.

¹⁴ Gate bzrin zra, Jesús ne benne' ca' dxusédené' gulezré'e ga xelawé' na.

¹⁵ Nadxa gunná Jesús, dxé'e benne' ca':

—Guzá lázrele'a gágulena' le'e chee Laní Pascua nigá nédxudxa ca quebe ne gatia'. ¹⁶ Dxapa' le'e québedxa gawa' da nigá cadxa gaca li na naga dxenná bea Dios.

¹⁷ Nadxa guqué'e tu zruágadau', na' guzre' Dios: "Xcalenu", na' gunné':

—Le xi'aj late' weaj tu tule le'e. ¹⁸ Dxapa' le'e québedxa xí'aja' chee nisa uva caní cadxa xida xel-la dxenná bea chee Dios.

¹⁹ Nadxa guqué'e xeta xtila, ne guzre' Dios: "Xcalenu", na' bzúzruje' na, ne bnézruje' na benne' ca', dxenné':

—Da nigá naca na bel-la' dxen chia', da guzúa' waláz cheele. Le gun da nigá chee cheajsá lázrele chia' neda'.

²⁰ Cá'anqueze bene' nen zruágadau' na' ca gudé gulawé' xrche', na' gunné':

—Zruágadau' nigá zéaje na xel-la wezría cube, da guzúa' chúchua' nen dxen chia', da gulálaja' waláz cheele.

²¹ 'Na'a, zrua na' benne' biu na' tu zren nen na'a ga zua da dxágadxu, bènnea' gudé'e neda' lu na' benne' dxeledábague' neda'. ²² Neda', Benne' Gulje' Bénneache, waxá'a lu neza da ble'e Dios neda' naga gatia', san edxugúa bènnea' gudé'e neda' chee gatia'.

²³ Nadxa benne' ca' dxusede Jesús gulezú lawe' dxuluchebe ljwezre' nu na' gudé Jesús.

Dxuluchebe ljwezre' nule' gácadxe' blau

²⁴ Cá'aqueze buluchebe ljwezre' nule' gácadxe' benne' blau. ²⁵ Na' Jesús guzre' le':

—Benne' wenná bea chee xezr la xu ca' dxelenná bé'ene' bèneache ca xrane bèneache ca', na' benne' xíchaje chee benne' ca' dxelenné' zaj naque' benne' dxelune' da chawe' chee benneáche ca'. ²⁶ Le'e quebe dxal-la' gunle ca'. Benne' nácadxe' blau ládujla le'e dxal-la' gaque' ca benne' nácadxe' cuide', na' benne' dxenná be'e dxal-la' gaque' ca benne' nada'u chee ljwezre' ca'. ²⁷ ¿Nu nácadxa blau, benne' dxe'e dxawe', che benne' dxudé'e xel-la wagu? ¿Quebe naca bènea' dxe'e dxawe'? Neda' zúaleña' le'e ca tu benne' dxuné' zrin chee.

²⁸ 'Le'e guzálequeze neda' gate neda' guzí guzaca'. ²⁹ Chee le na' dxunna' le'e lataj nna beale, ca ben Xra', benne' na neda', ³⁰ chee xi'aj gágule ga naca chia' naga nna be'a neda', na' cue'le lataj blau ca' chee guchí'ale chee chazrinna cue' xrtia Israel.

Jesús dxenné' Pedro nne' quebe núnbe'e Le'
(Mt. 26.31-35; Mr. 14.27-31; Jn. 13.36-38)

³¹ Na' gunnáqueze Xránadxu:

—Simón, Simón, Satanás, da xriwe' ba gunaba na le'e chee seque gudé na le'e lu dul-la ca dxun tu benne' dxudxixre dxutul-le' xizre za. ³² Neda' guta' xueda' Xra' gácalene' lue' chee quebe guníteu' xel-la dxeajlí lazre chiu'. Na' lue', gate bache bexacu' dipa lazre', gúcale le sa' ljwezru' ca' chee xelezé chache'.

³³ Na' gunná Simón, guzre' Jesús:

—Xran, ba zúaqueza' sá'leña' Lue' lizre xia, ne chee gátequeza' nen Lue'.

³⁴ Jesús guzre' le':

—Pedro, dxapa' lue', ná'atela ne dédxela cuezre xjeaj, lue' wannáu' chunna lasa quebe núnbe'u neda'.

Ba zua gagu zra si saca Jesús

³⁵ Nadxa Jesús bchebe' benne' ca':

—Gate gusel-la' le'e quebe bíale xixruj, ne naga cu'ule dumí, ne zrélale, ¿bxázrjele bi da guchínnele?

Benne' ca' belexechebe':

—Gutu bi de.

³⁶ Nadxa guzre' benne' ca':

—Na'a, benne' nape' xixruj dxal-la' gu'e na, ne naga dxugu'e dumí. Bènea' quebe nape' xia da dxuluchínene' lu wedil-la, dxal-la' xexutie' xicha chee', na' si'e xia chee'. ³⁷ Dxapa' le'e dxal-la' gaca chia' néda'queza' ca da naxúaj na lu xiche chee Dios, dxenné': "Gubabe' ca tu benne' wen da zrinna." Xúgute da naxúaj na chia' dxal-la' gaca li na.

³⁸ Nadxa benne' ca' gulenné':

—Xran, nigá de chupa xia.

Le' bechebe':

—Da naze.

Jesús dxuchálajlene' Dios naga nazí le na Getsemaní
(Mt. 26.36-46; Mr. 14.32-42)

39 Nadxa bedxúaj Jesús xu'u na', na' ca dxúnqueze', guxiáje' lu Xi'a Xaga Olivo, na' benne' ca' dxusédenē' xjácalēne' Le'. 40 Gate belezrine' na', Jesús guzre' le':

—Le naba lau Dios chee quebe seque da xriwe' cu'u na le'e lu dul-la.

41 Nadxa Jesús guzre' ca tu legu'una xiaj naga zaj zra' benne' ca', na' bzu zribe' bchálajlēne' Dios. 42 Gunne':

—Xrae, che dxaca lazru', bcuasa neda' ca naca da dxal-la' saca', da naca na ca tu da sla' da dxal-la' xí'aja', quegá gaca na ca dxaca lazra' neda', san ca dxaca lazru' Lue'.

43 Nadxa ble'e lau naga zua Jesús tu gubáz chee xabáa, na' btipe' lazre' Jesús.

44 Gate ne dxezácale'e, du lazre' bchálajlēne' Dios, na' xesa chee' guca na ca dxen dxeleznún na lu xu.

45 Ca bexuzre bchálajlēne' Dios, na' bexase', na' bezrine' naga zaj zra' benne' ca' dxusédenē', na' blé'ene' dxelase benne' ca', lu xel-la dxelexewi'ine lazre' chee'. 46 Nadxa guzre' benne' ca':

—¿Dxáselale le'e na'a? Le chasa, ne le naba lau Dios chee quebe seque da xriwe' cu'u na le'e lu dul-la.

Dxelele' Jesús

(Mt. 26.47-56; Mr. 14.43-50; Jn. 18.2-11)

47 Ne dxuchálajte Jesús gate belelá' benne' zan ca'. Bénnea' le' Judas, tu benne' chazrinnu ca', ze'e zria lawe' lau benne' ca', na' gubiguē' cuita Jesús chee gunupe' Le'. 48 Nadxa Jesús guzre' le':

—Judas, ¿dxunupu' neda', Benne' Gulje' Bénneache, chee gudéu' neda' lu na' benne' dxeledábague' neda'?

49 Benne' ca' zralēne' Jesús, ca belelé'ene' ca da dxaca, na' buluchēbe' Jesús:

—Xran, ¿guchínentu' xia?

50 Tu benne' ca' dxedále Jesús bēne' zi' tu bi wēn zrin chee bxruze blau, guchuguē' nágabe' zua xabela. 51 Jesús gunné':

—Québedxa gunle ca'. Cá'anze.

Nadxa Jesús bte' naga bi wēn zrin na', na' bexune' na.

52 Na' guzre' benne' xíchaje ca' chee bxruze, ne benne' blau ca' chee xudau', ne benne' gula sina ca', benne' zá'aque' xelechē'e Jesús, gunné':

—¿Blale le'e nen xia, ne xaga chee quélale neda' ca dxélale tu gubán? 53 Gate guzúa' neda' lu xudau' nen le'e tu zra tu zra, quebe bi bēnle le'e chia', san zra nigá naca na zra chele, gate dxenná bea da zua na lataj chul-la.

Pedro dxenné' quebe núnbe'e Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Nadxa gulēle' Jesús, na' guleché'e Le' lizre bxruze blau, na' Pedro zíaje' nawe' Le' zítu'la. 55 Na' gulebé'e guléchaje' xi' na', na' Pedro gudxé'e ládujla benne' ca'. 56 Nadxa tu nu'ula wēn zrin, gate blé'ene' Pedro dxe'e dxu'a xi' na', guzúe' dxenné'e le', na' gunné':

—Cá'anqueze benne' nigá guque' tuze len Jesús.

57 Pedro gunné':

—Nu'ula, quebe núnbe'a bénnea'.

58 Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

59 Xelate gudé na', xetú benne' bēn chúchue' xrtizre', gunné':

—Da li, benne' nigá guque' tuze len Jesús, lawe' da naque' benne' Galilea.

⁶⁰ Nadxa gunná Pedro:

—Benne', quebe nezda' nu chee na' dxuchálaju'.

Dxacaté na' ne dxuchálaję Pedro ca', na' gudxezre xjeaj. ⁶¹ Nadxa Xránadxu bzechaj xíchaję, gunné'ę Pedro, na' Pedro xeajsá lazre' ca da guzre Xránadxu le', gunné': "Ná'atęla ne dędxela cuezre xjeaj, lue' wannáu' chunna lasa quebe núnbe'u neda'." ⁶² Nadxa bedxúaj Pedro, na' gudxezre xáche'le'ę.

Dxelún le' chee Jesús

(Mt. 26.67-68; Mr. 14.65)

⁶³ Na' benne' ca' zaj nuxre' Jesús belún le' chee', na' buluzalje' Le'.

⁶⁴ Bulucache' lawe', na' belegape' xrague', dxelę'e Le':

—Gunnę xa'a nu be Lue'.

⁶⁵ Da zan da gulennę', dxelennę' schanni' chee Jesús.

Jesús dxezrine' lau benne' ca' chee xu'u lawe' blau chee judío ca'

(Mt. 26.59-66; Mr. 14.55-64; Jn. 18.19-24)

⁶⁶ Gate naca te zra, na' belezraga benne' gula sina ca' chee judío ca', ne benne' xíchaję ca' chee bxruze ca', ne benne' ca' dxuluxuzájle'ę da nadxixruj bea na, na' guleché'ę Jesús lau benne' ca' chee xu'u lawe' blau chee judío ca'. Na' buluchębe' Le':

⁶⁷ —Gunná, ¿nacu' lue' Cristo?

Na' bechębe Jesús:

—Che xapa' le'e: Awe', quebe chėjlele, ⁶⁸ na' che bi guchęba' le'e, quebe xechębele chia', ne quebe gusanle neda'. ⁶⁹ Ná'atęla neda', Benne' Gulje' Bénneache, cue'a chalá'a xabęla chee Dios nape' dute' xel-la waca.

⁷⁰ Nadxa xúgute' buluchębe' Le':

—¿Nacu' Lue' Zri'ine Dios?

Jesús bechębe':

—Naca', ca dxennáquezle le'e.

⁷¹ Nadxa gulenná benne' ca':

—¿Núzradxa chínnedxu bi nne' chee benne' nigá? Dxi'unqueze ba bęnedxu ca da gunnáqueze'.

23

Jesús dxezrine' lau Pilato

(Mt. 27.1-2, 11-14; Mr. 15.1-5; Jn. 18.28-38)

¹ Nadxa gulasa xúgute' benne' dxuluchi'ę, na' guleché'ę Jesús lau Pilato, benne' dxenná be'ę waláz chee Roma. ² Na' gulezú lawe' dxelagu zrie' Jesús, dxelennę':

—Ble'entu' benne' nigá dxegú'u xel-le' bęnnęache chee xeledábague' xu'u lawe'. Dxennę' quebe dxal-la' quízrujntu' da dxuchizruj César, benne' Roma, na' cá'anqueze dxennę' naque' Cristo, Benne' Wenná Bea.

³ Nadxa Pilato bchębe' Jesús:

—¿Nacu' Lue' Wenná Bea chee judío ca'?

Na' bechębe Jesús:

—Ca' naca na, ca ba gunnáu' lue'.

⁴ Nadxa gunná Pilato, guzre' benne' xíchaję ca' chee bxruze ca', ne bęnnęache ca':

—Quebe bi da zrinnaj dxezrelda' nun benne' nigá.

⁵ Benne' ca' belún chúčhue' dizra' chee', gulennę':

—Dxegu'u xel-le' xúgute benne' zaj zře'e xezre ca' zaj nababa Judea chee xeledábage' xu'u lawe'. Guzú lawe' dxune' na naga nababa Galilea, na' na'a dxune' na nigá.

Jesús dxezrine' lau Herodes

⁶ Gate ben Pilato da nigá, na' bchebe' che naca Jesús benne' Galilea. ⁷ Gate gulé'e le' naca Jesús benne' Galilea, na' Pilato gusél-le' Le' lau Herodes, benne' dxenná be'e xezre ca' zaj nababa Galilea, na' lu zra na' zue' Jerusalén. ⁸ Gate ble'e Herodes Jesús, gubéle'ene', lawe' da bátate dxaca lazre' lé'ene' Le', lawe' da ba benne' dxuluchalaj bénneache chee Jesús, na' guca lazre' lé'ene' gun Jesús tu xel-la waca da za xabáa. ⁹ Da zante da bchebe' Jesús, na' Le' quebe bi bechebe'. ¹⁰ Zráqueze benne' xíchaje ca' chee bxruze ca' na', nen benne' ca' dxuluxúzjle'e da nadxiruj bea na, na' belún chúchue' dizra' chee' da dxelagu zria Jesús. ¹¹ Nadxa Herodes, ne benne' chee' ca' dxjaque' wedil-la buluzúe' Le' chalá'ala, na' chee xelún le' chee', bulugácue' Le' ladxe' bzawe ca naca zra tu benne' wenná bea. Nadxa Herodes besel-le' Le' lau Pilato. ¹² Lu zra na' Pilato, ne Herodes belexaque' tuze, lawe' da belezra' ljwezre' nédxute.

Dxelechugue' chee Jesús gatie'

(Mt. 27.15-26; Mr. 15.6-15; Jn. 18.39—19.16)

¹³ Nadxa Pilato bchague' benne' xíchaje ca' chee bxruze ca', ne benne' xu'u lawe' ca', ¹⁴ na' guzre' benne' ca':

—Le'e guchele benne' nigá za'le naga zua', dxennale dxegú'u xel-le' bénneache chee xeledábage' xu'u lawe'. Neda' ba bcheba' Le' laule le'e, na' quebe bi da zrinnaj dxezréleda' nunge' ca naca da dxennale chee'. ¹⁵ Cá'anqueze Herodes quebe bi da zrinnaj bzrélene' da nun Jesús, na' budée' Le' launtu'. Quebe bi ne gune' chee chuga' chee' gatie'. ¹⁶ Gudéa' Le' xel-la zi', na' gusánqueza' Le'.

¹⁷ Dxácate dxaca laní na', Pilato dxal-la' gune' tu da dxelezaca ba lazre' bénneache, gusané' tu benne' xu'e lizre xia. ¹⁸ Xúgute benne' ca' gulezú lawe' dxelebezre xé'e, dxelenné':

—¡Gate benne' nigá! ¡Bsan Barrabás na'!

¹⁹ Barrabás nigá gulegú'e le' lizre xia lawe' da gudábage' xu'u lawe', na' betie' tu benne'. ²⁰ Pilato guca lazre' gusané' Jesús, na' bchá'ajlene' benne' ca' xetú. ²¹ Na' benne' ca' gulebezre xé'e zizrajdxá, dxelenné':

—¡Bde'e xaga béguaj! ¡Bde'e xaga béguaj!

²² Da guxunne' lasa gunná Pilato:

—¿Bizra da zrinnaj nunge'? Quebe bi dxezréleda' da gudé na Le' gatie'. Gudéa' Le' xel-la zi', na' te na' gusana' Le'.

²³ Na' benne' ca' belún chúchue' dizra' chee' chee te'e xaga béguaj, ne gulebezre xá'atie', nen benne' xíchaje ca' chee bxruze ca', cadxa guca ca da gulaca lazre'. ²⁴ Nadxa Pilato guchugue' chee Jesús gaca chee' ca da dxelaca lazre' benne' ca'. ²⁵ Na' bsané' bénnea' belenabe', xu'e lizre xia lawe' da gudábage' xu'u lawe', ne betie' tu benne', na' bdeé' Jesús chee gaca chee' ca dxelaca lazre' benne' ca'.

Dxuludé'e Jesús xaga béguaj

(Mt. 27.32-44; Mr. 15.21-32; Jn. 19.17-27)

²⁶ Gate zjaque' zaj naché'e Jesús chee xuludé'e Le' xaga béguaj, na' gulele' tu benne' Cirene, le' Simón, zezé'e le'e xixre', na' bulugu'e le' xaga béguaj chee Jesús, na' zéajé' cuzru Jesús na'.

²⁷ Na' xjácale Le' benne' zante, ne nu'ula zan dxelebezre', na' dxelebezre xache' ne chee da dxaca chee Jesús. ²⁸ Nadxa Jesús gunné'e nu'ula ca', na' guzre' le':

—Le'e, nu'ula Jerusalén, quebe cuézrele chia' neda'. Le cuezre cheéquezle, ne chee zrí'inele, ²⁹ lawe' da zrin zra gate xelenné': "Ba neza zren naca na chee nu'ula wizre, ne nu'ula ca' cabata' gulezúe' zi'i, ne nu'ula ca' cabata' bulugazre' bidau'." ³⁰ Lu zra na' xelezú lau bénneache xelé'e xi'a ca': "Le gugacu netu' xu." Na' xelé'e xi'adu ca': "Le gugache netu'." ³¹ Che dxelung' da caní chia' neda', naca' ca tu xaga ban, ¿gázaradxa xelune' chee le'e, nácale ca xaga bizre ca'?

³² Cá'anqueze guleché'e chupa benne' wēn da zrinnaj chee xelúti'e le' tu zren nen Jesús. ³³ Gate belezrine' lataj na' nazí le na, Calavera, da zéajé na, Xi'a Zrita Xíchajdxu, na' buludé'e Jesús xaga béguaj, ne cá'anqueze belune' chee benne' wēn da zrinnaj ca', tue' cuite' xabēla, ne xetúe' cuite' xéglala. ³⁴ Ca dxuludé'e Le' xaga béguaj, na' gunná Jesús:

—Xrae, bnite lau chee benne' caní lawe' da quebe zaj nézene' bi na' dxelune'.

Na' benne' dxjaque' wedil-la gulebeje' da dxunna bea' chee xelezí'e late' weaj zra lana Jesús. ³⁵ Benne' ca' zaj zre'e na' dxelenné'e, ne benne' xu'u lawe' ca' belún le' chee', dxelenné':

—Bselé' benne' xula ca'. Na'a dxal-la' guselá cuine' che da li naque' Cristo, Bénnea' Gucá'a Dios.

³⁶ Cá'anqueze benne' dxjaque' wedil-la belún le' chee', na' gulebigue' cuita Jesús, ne buluxí'aje' Le' nupe zichaj. ³⁷ Gulé'e Le':

—Che lue' nacu' Wenná Bea chee judío ca', bselá cuinu'.

³⁸ Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea chee judío ca'.

³⁹ Tu benne' wēn da zrinnaj, bénnea' de'e xaga béguaj ben le' chee Jesús, dxenné':

—Che Lue' nacu' Cristo, bselá cuinu', ne bselatē netu'.

⁴⁰ Na' xetú benne' wēn da zrinnaj na' gudil-le' lǝwzre'. Guzre' le':

—¿Quebe dxezrebu' Dios? Lue' dxezácaquezu' ca da gulechugue' chee' Le'.

⁴¹ Dxi'u dxezácadxu ca da dxál-la'queze sácadxu, lawe' da dxaca cheedxu da dxal-la' sidxu ca naca da zrinnaj da nundxu, san benne' nigá quebe bi da zrinnaj nune'.

⁴² Nadxa gunné':

—Jesús, xeajsá lazre' neda' gate su lau' nna be'u.

⁴³ Na' bechebe Jesús:

—Da li dxapa' lue', ná'atēla súalequezu' neda' lu lataj chawe' chee Dios.

Ca guca gate gute Jesús

(Mt. 27.45-56; Mr. 15.33-41; Jn. 19.28-30)

⁴⁴ Guca ca wagubizra. Nadxa ca naca lu xēzr la xu guchul-la na cadxa bzrintē na dxedá' chunna. ⁴⁵ Gubizra guchul-la na, na' ladxe' zē lu xudau' bdxuaj na chúpala. ⁴⁶ Nadxa gudxezre xa'a Jesús, dxenné':

—Xrae, lu ná'u dxegu'a be' xu'a.

Ca gunné' ca', na' gutie'.

⁴⁷ Gate benne' dxenná bé'eng' benne' dxjaque' wedil-la blé'eng' ca da guca, na' bę lá'ane' Dios, gunné':

—Da li, benne' nigá quebe bi da zrinnaj bene'.

⁴⁸ Xúgute' benne' ca' zaj zře'ę na', gate belelé'eng' ca da guca, na' besiá'que' na', dxelu'ę lachu'ę. ⁴⁹ Xúgute' benne' ca' zaj núnbe'ę Jesús, ne nu'ula ca' xjácłene' Jesús gate bezé'ę Galilea, belexegá'ane' zítu'la dxelenné'ę da caní.

Dxulucache' Jesús

(Mt. 27.57-61; Mr. 15.42-47; Jn. 19.38-42)

⁵⁰ Zua tu benne' chawe' ne xrlátaje le' José, benne' xęzre Arimatea cheę xęzre ca' zaj nababa Judea. Nababe' xu'u lawe' blau cheę judío ca'. ⁵¹ José nigá dxebeze' zra nna bea Dios, na' quebe bene' tuze ca da belún benne' xu'u lawe' blau ca'. ⁵² Benne' nigá guxíaje' xejchálajlene' Pilato, na' gunabe' latja gucache' Jesús. ⁵³ Ca bexuzre buluxulétaje' Le' xaga béguaj, na' buluxuchele' Le' tu ladxe', na' gulu'ę Le' tu lu xędxu ba, da ba gudene' tu le'ę xi'a xiaj, naga quebe nu ne gáchequeze. ⁵⁴ Naca na zra dxulucueze' cheę zra dxulupá'ane', da ba zua su lau na.

⁵⁵ Nu'ula ca' xjácłene' Jesús gate bezé'ę xęzre ca' zaj nababa Galilea, xjaque' na', ne belelé'eng' ba na', ne belené'ę ájala zaj nagu'ę Le' xędxu ba. ⁵⁶ Gate belexezrine' xu'u naga zaj zře'ę, na' bulucueze' da du ca' dxelelále'ę zixre, ne da zaj naca na ca za dxelelále'ę na zixre. Belexezi' lazre' zra dxulupá'ane' cáteze naca da gunná bea Dios.

24

Ca guca gate bebán Jesús

(Mt. 28.1-10; Mr. 16.1-8; Jn. 20.1-10)

¹ Zra nedxu cheę da gazre zra, nu'ula ca' belezrine' dxu'a ba na' dxanı'sise', zaj nu'ę ca naca da ca' dxelelá zixre da bulucueze', na' xebal-la nu'ula xjácłene' le'. ² Gate belezrine' na', belelé'eng' xiaj da guduse dxu'a ba na', québedxa naduse na naga guduse na. ³ Belú'ę lu ba na', san quebe belexezrelne' Xránadxu Jesús na'. ⁴ Na' belezrébele'ę, ne quebe zaj nézene' ájala xelune', na' belelé'eng' chupa benne' zaj ze' cuite', zaj nacue' zra lane' dxácatite na. ⁵ Nu'ula ca' belezúe' sudxú'ala lu xu, ne belezrébele'ę. Na' benne' ca' gulé'ę le':

—¿Bizr cheę na' dxexílajle le'e tu benne' naca banę láwela benne' gate?

⁶ Quebe zue' nigá, lawe' da ba bebane'. Le gusá lázre' da bchálajlene' le'e gate ne zue' Galilea. ⁷ Gunné': "Benne' Gulje' Bénneache dxal-la' xuludée' Le' lu na' benne' dul-la ca', na' xuludé'ę Le' xaga béguaj, na' zra guxunne' zra xebane'."

⁸ Nadxa nu'ula ca' xejlesá lazre' ca naca da gunná Jesús. ⁹ Ca gudé besiá'que' dxu'a ba na', na' belexezrine' lu xęzre na', na' buluchálajlene' benne' chinéaj gubáz ca' cheę Jesús, ne xúgute' benne' ca' xezica, ca naca da guca na'. ¹⁰ Nu'ula ca' xjaque' xejlezenne' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'. ¹¹ Benne' gubáz ca' gulé'ęne' da dáłaze dxelenná nu'ula caní, na' quebe guléajle'ę cheę'.

¹² Nadxa bdxuaj Pedro, zeaj chégüe' dxu'a ba na', na' gate guné'ę lu ba na', blé'eng' ladxe' da bedxela Jesús xu'u na chalá'ala, na' bezé'ę zexíaje' xu'u naga guzé'ę, dxexebáne'ę ca naca da guca.

Da guca lu neza da zeaj xezre Emaús

(Mr. 16.12-13)

¹³ Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén. ¹⁴ Zjaque' dxuluchálaje' ca naca da guca lu zra ca'. ¹⁵ Dxácatę na' dxuluchálaje' caní, na' Jesús ná'queze gubiguę' cuíta benne' ca', na' guzú lawe' zéajlęne' le'. ¹⁶ Quebe belexúnbe'ę Jesús, lawe' da guzúa tu da guxúa na xiaj lau benne' ca'. ¹⁷ Nadxa bchebe Jesús benne' ca':
—¿Bizra da na' dxuchálaje' ljwézrele dxácatę xu'ule neza? ¿Bizr cheę na' zale dxewi'ine lázrele?

¹⁸ Tu benne' ca' le' Cleofas bechebe':

—Xúgutę benne' zaj nézene' ca da guca xezre Jerusalén lu zra caní. ¿Nacu' lue' benne' zitu' zu' Jerusalén, na' tuze lue' quebe nézenu' ca da guca na'?

¹⁹ Nadxa Le' guzre' benne' ca':

—¿Bizra guca na'?

Gulę'e Le':

—Da guca cheę Jesús, benne' Nazaret. Guquę' tu benne' bchálaje' waláz cheę Dios, na' xel-la waca zren ca' bene', ne bchálaje' dizra' lau Dios, ne lau xúgutę bėnneache. ²⁰ Na' benne' xíchaje ca' cheę bxruze ca', ne benne' xu'u lawe' cheęntu' ca' buludęe' Le' cheę gulechugue' cheę gatię, na' buludęe' Le' xaga bęguaj. ²¹ Netu' guleza lázrentu' Le' naque' Benne' dxal-la' guselę' xezr la xu Israel. Na'a, ba zeaj chunna zra guca da ca'. ²² Bal-la nu'ula ca' ládujla netu' buluzúaqueze' netu' lu da stębe, lawe' da xjaque' dxani'sise' dxu'a ba cheę na', ²³ na' gate quebe belexezrelne' Le', na' belexelę'e naga zúiantu', ne gulennę' belelę'eng' chupa gubáz cheę xabáa ca' bululę'e lawe' nu'ula ca', na' gulę'e le' nabán Jesús. ²⁴ Nadxa bal-la benne' ljwézrentu' ca' xjaque' dxu'a ba na', na' belelę'eng' cąteze na' gulenná nu'ula ca', san quebe belelę'eng' Jesús.

²⁵ Nadxa gunná Jesús:

—Le'e quebe dxéajni'ile, na' ne naca zide' lázrdaule cheę quebe chéajlele xúgutę da gulenná benne' ca' buluchálaje' waláz cheę Dios. ²⁶ ¿Quebe dxal-la' saca Cristo da caní nédxudxa ca xegá'ane' szren?

²⁷ Nadxa guzú lawe' dxuzéajni'ine' benne' ca' ca naca xúgutę da naxúaj lu xiche cheę Dios naga dxuchalaj na cheę Le'. Guzú lawe' lu xiche ca' cheę Moisés, na' ne zéajdxaqueze na lu xiche ca' cheę benne' ca' buluchálaje' waláz cheę Dios.

²⁸ Gate belezrine' lu xezre naga zjaque', Jesús bene' ca benne' zeajteze' xu'e neza. ²⁹ Na' benne' ca' buluxucá'ane' Le' xadía, dxelennę':

—Begá'anale' netu', lawe' da ba zeaj dxezre', ne ba dxę' xrinnequeze na'a.

Nadxa Jesús guxú'ulęne' benne' ca'. ³⁰ Gate na' dxé'lene' le' dxelawe', guquę'e xeta xtila, ne bzúzruje' na, na' guzre' Dios "Xcalenu'", ne bnézruje' na benne' ca'. ³¹ La' ná'queze becuasa ca naca da guxúa na xiaj lau benne' ca', na' belexúnbe'ę Jesús, san la' ná'queze benite Le' lau benne' ca'. ³² Na' gulę' ljwezre':

—¿Quebe guzúa xel-la dxebę lu lázrdaudxu gate ze'ę dxuchálajlęne' dxi'u tu neza, ne bzéajni'ine' dxi'u ca naca da naxúaj lu xiche cheę Dios?

³³ Nadxa, ne quębedxa gulezrenę', belexegu'e neza, zeajxaque' Jerusalén, naga belelę'eng' zaj nazraga benne' chinéaj gubáz ca', ne benne' ljwezre' ca'.

³⁴ Benne' ca' zaj nazrague' na' gulę'e benne' chupa ca':

—Da li bebán Xránadxu, na' Simón ba blę'eng' Le'.

³⁵ Nadxa benne' chupa ca' buluzenne' le' ca naca da guca la neza, ne ca belexúnbe'ę Jesús gate bzúzruje' xeta xtila na'.

Jesús dxul'é lawe' benne' ca' xjácaleñe' Le'
(Mt. 28.16-20; Mr. 16.14-18; Jn. 20.19-23)

³⁶ Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale na le'e.

³⁷ Na' benne' ca' belexruse', ne belexrebele'e. Guléqueñe' dxelelé'ene' bxinne dxela. ³⁸ Na' Jesús guzre' benne' ca':

—¿Bizr chee na' dxezrébele? ¿Bizr chee na' dxaca chupa lázrele? ³⁹ Le na' na'a caní, ne le na' ni'a. Neda'queza' na'. Le gutá neda', ne le guxúe xque neda'. Tu bxinne dxela quebe napa na bēla' zrita, ca dxel'éle le'e napa' neda'.

⁴⁰ Ca dxē'e benne' ca' da nigá, na' blé'ene' le' ne'e, ne ni'e. ⁴¹ Benne' ca' québequeze dxeléajle'e chee' lawe' da dxelebéle'ene', ne dxelexebánele'ene', na' guzre Jesús le':

—¿De late' da gawa' nigá?

⁴² Nadxa bulunézruje' Le' late' bēla' guzrúa xi', ne late' da zixre che bēzudau', ⁴³ na' gucá'a Jesús da ca', ne gudawe' na lau benne' ca'. ⁴⁴ Nadxa guzre' benne' ca':

—Da ba guca chia' naca na ca da gucha' le'e gate ne zúalequeza' le'e, gunnéa' dxal-la' gaca li ca naca xúgute' da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee benne' ca' buluchálajē waláz chee Dios.

⁴⁵ Nadxa bzéajni'ine' benne' ca' ca da naxúaj lu xiche chee Dios, ⁴⁶ na' guzre' benne' ca':

—Caní naxúaj na dxal-la' gate Cristo, na' zra guxunne' zra dxal-la' xebane' ládujla benne' gate ca', ⁴⁷ na' lu La Le' dxal-la' xuluchalaj bēnneache lau xúgute' xezr la xu ca'. Su lau gunle na lu xezre Jerusalén, xe'le bēnneache dxal-la' xelexebí'i lazre' chee gunite lau Dios dul-la zaj nabaga benne' ca'. ⁴⁸ Le'e nácale benne' xelexechebe' da caní. ⁴⁹ ¡Le nna'xque! Neda' sel-la' chee ca da guchebe lazre' Xra'. Le xegá'ana nigá lu xezre Jerusalén, cadxa si'le xel-la waca da za xabáa.

Jesús dxexegüēñe' xabáa
(Mr. 16.19-20)

⁵⁰ Nadxa Jesús beche'e benne' ca', belexedxúaje' Jerusalén, xeajxaque' xezre Betania, na' guchisa na' Jesús, ne gunabe' gaca chawe' chee benne' ca'.

⁵¹ Ne dxúntee' ca', na' bezé'e naga zaj zra' benne' ca', begüēñe' zexíaje' xabáa. ⁵² Ca hexuzre belúe lá'ane' Le', besiá'que' zeajxaque' Jerusalén lu dute' xel-la dxelebé, ⁵³ na' gulezráqueze' chale'aj xudau' dxelúe lá'ane' Dios. Ca' naca na.

DIZRA' CHAWÉ' CA NACA CHEÉ JESUCRISTO DA BZUAJ SAN JUAN

Bénnea' le' Xrtizra' Dios dxaque' bénneache

¹ Gate guzú lau zua xúgute da de, ba zúaqueze Bénnea' le' Xrtizra' Dios, da zéaje na Benne' naque' dutē da nácaqueze Dios, na' Bénnea' le' Xrtizra' Dios zúalēne' Dios, ne nácaqueze' Dios. ² Nédxudautē Benne' nigá zúalēne' Dios. ³ Lu na' Benne' nigá ben Dios xúgute da de. Quebe bi de da quebe nun Le'. ⁴ Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bénneache chee xelaca banē'. ⁵ Xel-la' naxaní' nigá dxusení na lu da chul-la chee dul-la da zaj nabaga bénneache, na' da chul-la nigá quebe dxezeque na xusula na xel-la' naxaní' nigá.

⁶ Guzúa tu benne' le' Juan, gusel-la Dios bennea'. ⁷ Benne' nigá ble'e chee bchálaje' ca naca chee Bénnea' naque' xel-la' naxaní' nigá, chee xeléajle' xúgute bénneache chee Bénnea' ne chee da dxenné'. ⁸ Juan nigá quebe naque' xel-la' naxaní' na'. Ble'e chee bchálaje' ca naca chee Bénnea' naque' xel-la' naxaní' nigá. ⁹ Xel-la' naxaní' li, da dxusení na lu xichaj lázrdau xúgute bénneache ba za' la' na lu xezr la xu nigá.

¹⁰ Bénnea' naque' Xrtizra' Dios zuē' lu xezr la xu nigá, na' lácala ben Dios xezr la xu lu na' Bénnea', bénneache zaj zre'e lu xezr la xu quebe belexexúnbe'e Le'. ¹¹ Ble'e naga zua da naca chee', na' benne' lazriē' ca' quebe gulezi' lu ne'e Le'. ¹² Benne' ca' gulezi' lu ne'e Le', ne guléajle'e chee', be'e benne' caní lataj xelaque' bi ca' chee Dios. ¹³ Benne' caní québedxa zaj naque' ca zri'ine bénneacheze, bi ca' dxelálajbe' ne chee bénneache, u ne chee da dxezá lazre' tu benne'. Benne' caní zaj naque' bi ca' chee Dios ná'queze.

¹⁴ Bénnea' naque' Xrtizra' Dios gúlaje' ca tu bénneache, na' guzúe' ládujla dxi'u, zaj zúalē xel-la' zri'i lazre', ne da li Le'. Blé'entu' ca naca xel-la' szren chee', tu xel-la' szren da nunezruj Xradxu Dios chee Zrí'ine' tu licha'. ¹⁵ Juan bchálaje' ca naca chee Bénnea', gunné':

—Benne' nigá naque' Bénnea' bchálaja' neda' chee' gate gunnéa' Bénnea' ze'e te chia' neda' naque' szrendxa ca neda' lawe' da zúaqueze' nédxute' ca neda'.

¹⁶ Xúgutedxu ba guzidxu xel-la' zri'i lazre' chee' da dxúnnaqueze Le'. ¹⁷ Blá' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo. ¹⁸ Netú benne' quebe ne lé'eng' Dios. Zrí'ine' tu licha', bi nazrí'ite lazre', benne' nigá guque' tuz ca nácaqueze Xre'.

Juan, benne' bchue' bénneache nisa, dxexechebe' chee Jesús

(Mt. 3.11-12; Mr. 1.7-8; Lc. 3.15-17)

¹⁹ Benne' xíchaje' ca' chee judío ca', benne' zaj zre'e Jerusalén, gulesel-le' bxruze ca', ne xrtia Leví, benne' ca' dxelunē' zrin chee xudau', na' belezrine' lau Juan chee xuluchebe xánnie' le' nu naque'. ²⁰ Bechebe Juan du lazre', gunné':

—Quebe naca' neda' Cristo. (Dizra' nigá zéaje na Benne' guchebe lazre' Dios sel-le').

²¹ Nadxa buluchebe' le':

—¿Nuzra nacu'? ¿Nacu' Elías, bénnea' bchálaje' waláz chee Dios?

Bechebe Juan:

—Cabí.

Na' buluchébequeze' le':

—¿Nacu' bënnea' dxal-la' le'ë, ne guchalaje' waláz cheë Dios, ca da gunná Moisés dxal-la' gaca na?

Le' bechebe':

—Cabí.

²² Nadxa buluchébedxaqueze' le':

—¿Nuzra nacu'? Dxun na ba xen gata' bi xechébentu' cheë benne' gulesel-le' netu'. ¿Bi dxennáquezu' nu nacu'?

²³ Juan bechebe':

—Neda' naca' bënnea' naxúaj na ca naca cheë' lu xiche cheë Dios, da dxenná: Wen chi'i tu benne' dxebezre xë'ë le'ë xixre' lawe' lataj, dxenné': "Le salaj tu neza li naga te Xránadxu." Naquen cáteze gunná Isaías, bënnea' bchalaje' waláz cheë Dios.

²⁴ Benne' xudau' fariseo ca' gulesel-le' benne' caní cheë cheajlechálajlene' Juan. ²⁵ Le' buluchebe' le':

—Che lue' quebe nacu' Cristo, ne Elías, ne bënnea' dxal-la' xedajchalaje' waláz cheë Dios, ¿bi xel-la' dxenná bea napu' dxuchú' bënneache nisa?

²⁶ Juan guzre' benne' ca':

—Neda' dxuchúa' bënneache nisa lu nísaze. Zua tu benne' ládujla le'e quebe nézele ca szren naque'. ²⁷ Benne' nigá zë'ë ca te chia' neda', na' zúaqueze' nédxudxa ca neda'. Quebe zaca' neda' cuéaja' zrelë' da xu'u ni'e.

²⁸ Xúgutë da caní guca na lu xezr la xu cheë xezre Betábara, da zua na chala'a xegu Jordán naga dxalaj gubizra, naga zua Juan dxuchúë' bënneache nisa.

Jesús naque' Zríla'dau' cheë Dios, be dxelutie' lau Dios ne cheë xtul-le'

²⁹ Zra xula ble'e Juan dxezrín Jesús naga zue', na' gunné':

—¡Le nna'xque! Benne' nigá naque' Zríla'dau' cheë Dios, cue' dul-la zaj nabaga bënneache. ³⁰ Neda' bchálaja' ca naca cheë' gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudaute ca neda'.

³¹ Néda'queza' quebe gunezda' nu naque'. Bla'a dxuchúa' bënneache nisa cheë xelenezé xezre Israel nu Benne' naca Le'.

³² Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bgugu chíchedau', ne begá'analëne' Benne' nigá. ³³ Neda' quebe ne nezda' nu naque'. Dios na' nasel-le' neda' cheë guchúa' bënneache nisa, Le' guzre' neda': "Gate le'enu' Be' Lá'azxa xétaje' xegá'analëne' tu benne', Benne' nigá gunë' da zéaje xel-la' dxedxúa nisa, guzúë' Be' Lá'azxa lu xichaj lázrdaule." ³⁴ Na'a ba ble'eda' guca da nigá, ne dxexechëba' nácaqueze Benne' nigá Zrí'ine Dios.

Benne' nedxu ca' dxusede Jesús

³⁵ Zra xula zúaqueze na' Juan nen chupa benne' ca' dxusedene'. ³⁶ Gate blé'engë' dxedé na' Jesús, na' gunná Juan:

—¡Le nna'xque! ¡Benne' nigá naque' Zríla'dau' cheë Dios, bia gáteba' ne cheë dul-la nabágadxu!

³⁷ Dxúpatë benne' ca' dxusede Juan belennë' ca da gunné', na' xjácälëne' Jesús. ³⁸ Nadxa bexechaj Jesús, gunné'ë cúzrule', ne blé'engë' benne' ca' zá'aque' cúzrule', na' guzre' le':

—¿Bi dxexílajle?

Benne' caní gulé'ë Jesús:

—Benne' Wesëde, ¿gazra zu'?

³⁹ Jesús bechebe':

—Le da nna'le.

Nadxa xjácálenē' Jesús, ne belelé'enē' naga zuē', na' belexegá'analēnē' Le' zra na' lawe' da bache zeaj du dxedá' tapa.

⁴⁰ Tu benne' chupa ca', benne' belenne' ca da gunná Juan, ne xjácálenē' Jesús, naque' Andrés, benne' biche Simón Pedro. ⁴¹ Andrés nigá la guxíajte' xeajdílaje' bi biche' Simón, na' guzre' le':

—Ba bezrérentu' Mesías. (Dizra' nigá zéaje na Cristo, Bénnea' guchebe lazre' Dios sel-le'.)

⁴² Nadxa Andrés guché'e Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zri'ine Jonás. Si' lau' Cefas. (Dizra' hebreo nigá zéaje na: Pedro, da zeaje na: Xiaj.)

Jesús dxenné' Felipe ne Natanael

⁴³ Zra xula guca lazre' Jesús chéaje' naga nababa Galilea, na' bezrague' Felipe, ne guzre' le':

—Ben neda' tuze.

⁴⁴ Felipe nigá naque' benne' xezre Betsaida, da naca na lazre Andrés, ne Pedro. ⁴⁵ Felipe guxíaje' xeajdílaje' Natanael, na' guzre' le':

—Ba bezrérentu' Bénnea' bzujaj Moisés chee' lu xiche naga zaj naxúaj da nadxixruj bea na, ne cá'unqueze chee Benne' nigá buluzúaj benne' ca' buluchálaje' waláz chee Dios. Benne' nigá naque' Jesús, zri'ine José, tu benne' xezre Nazaret.

⁴⁶ Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

⁴⁷ Gate ble'e Jesús za Natanael naga zuē', gunné':

—Nigá za' tu benne' naca xánnie' benne' Israel, benne' dxennéqueze' da dxéquene'.

⁴⁸ Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za nne Felipe lue', gate ze'u zran xaga higo.

⁴⁹ Nadxa Natanael guzre' Jesús:

—Benne' Wesede, Lue' nacu' Zri'ine Dios. Lue' nacu' Wenná Bea cheentu', benne' Israel.

⁵⁰ Bechebe Jesús:

—¿Dxéajle'u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá. ⁵¹ Da li dxapa' le'e, walé'equeze le'e naxalaj xabáa, na' gubáz chee xabáa ca' chee Dios dxelétaje', ne dxelexegüene' naga zua neda', Benne' Gulje' Bénneache.

2

Dxaca laní chee wechaga na' lu xezre Caná

¹ Zra guxunne zra, na' guca laní chee wechaga na' lu xezre Caná da nababa Galilea. Xrna Jesús zuē' na', ² na' zua nu gunné Jesús, ne benne' ca' dxusédene' lu laní na'. ³ Bebizre xrise uva wal-la, na' xrna Jesús guzre' Le':

—Québedxa bi de xrise uva wal-la xelé'aje'.

⁴ Jesús bechebe':

—Nú'uladau', ¿bizr chee na' dxu'u neda' caní? Quebe ne zrin zra gulé'e lau da naca'.

⁵ Xrne'e guzre' benne' wen zrin ca':

—Le gun ca naca da xe'e le'e.

⁶ Zaj nnita xrupa xesu' xiaj na', da dxuluchine judío ca' gate dxelibe ni'a ne'e ca naca da zjácálene'. Tu tu xesu' xiaj ca' dxeluzru na chupa u chunna dxe'e nisa. ⁷ Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'. ⁸ Nadxa Jesús guzre' benne' ca':

—Le ca'a na, na'a, ne le gua na lau benne' ze' dxu'a ga dxelawe'.

Ca'an belune'. ⁹ Bénnea' zue' dxu'a ga dxelawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zue' dxu'a ga dxelawe' gunné' benne' wechaga na', ¹⁰ na' guzre' le':

—Xúgute' benne' dxelebéaje' nedxu xrise uva wal-la nácadxa chawe', na' gate ba gulé'ajle'e benne' ca' zaj zre'e laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na'na.

¹¹ Da nigá da ben Jesús lu xezre Caná da nababa Galilea naca na tu xel-la' waca zrente da bene' nedxu, da ble'e na xel-la' szren chee', na' benne' ca' dxusédené' guléajle'e chee'.

¹² Gudé na' Jesús bezé'e zexíaje' xezre Capernaum, zéajle' xrne'e Le' nen benne' biche' ca', ne benne' ca' dxusédené'. Na' gulezúe' na' zane' zra.

Jesús dxucá'ana chawe' chale'aj xudau'

(Mt. 21.12-13; Mr. 11.15-18; Lc. 19.45-46)

¹³ Na' Jesús guxíaje' xezre Jerusalén lawe' da ba za Laní Pascua gate benne' judío ca' dxulusá lazre' ca' ben Dios, bebéaje' xra xrtawe' ca' lu xezr la xu Egipto. ¹⁴ Lu xezre Jerusalén blé'ene' lu chale'aj xudau' na' zaj zra' benne' dxelexutie' bezre ca', ne zrila' ca', ne bgúgudu ca', béadu ca' dxelutie' lau Dios. Cá'anqueze blé'ene' na' benne' dxuluxuché'e dumí chee' xezr zitu' ca'. ¹⁵ Gate ble'e Jesús da caní, na' bgu'e du ca' da güe'e benne' ca', na' bebéaje' ca' naca benne' ca' tu zrente nen bezre chee' ca', ne zrila' chee' ca'. Na' gudxú'ungé' lu xula dumí chee' benne' ca' dxuluxuché'e dumí, ne bdxixre' blaga' ca' chee' benne' ca'. ¹⁶ Na' guzre' benne' ca' dxelexutie' bgúgudu ca':

—¡Le xebéaj da caní! Quebe gunle lizre Xra' ca' na lawe' xi'a.

¹⁷ Nadxa benne' ca' dxuséde Jesús xeajlesá lazre' da naxúaj na lu xiche chee' Dios, da dxenná na: Dxácaté zi' lázrdawa' lawe' da dxé'le'a gunne xue chee' lizru'.

¹⁸ Nadxa judío blau ca' buluchebe' Jesús:

—¿Bi xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

¹⁹ Bechebe Jesús:

—Le guzría xi' xudau' nigá, na' neda', te chunna zra xechisa' na.

²⁰ Nadxa judío ca' gulé'e Le':

—Xrupe xun iza ba zeaj dxelune' xudau' nigá, na' Lue', ¿xechisu' na chunna zraze?

²¹ Bchalaj Jesús chee' xudau' na' da naca na bel-la' dxen chee'. ²² Chee' le' na', gate bebán Jesús ládujla benne' gate, na' benne' ca' bsédené' xeajlesá lazre' ca'

da gunné', na' guléajle'e chee da naxúaj na lu xiche chee Dios ca naca chee Jesús, ne chee da guzre Jesús le'.

Jesús núnbe'e xúgute bénneache

²³ Gate zua Jesús xezre Jerusalén lu Laní Pascua chee judío ca', na' benne' zan guléajle'e chee' gate belelé'enge' ca naca xel-la' waca zren ca' da dxuné'.

²⁴ Jesús quebe bde cuine' lu na' benne' ca' lawe' da nézquezne' quegá xúgute benne' ca' dxeléajle'e chee'. ²⁵ Quebe guchínene' nu benne' xe'e Le' ca zaj naca bénneache lawe' da nézquezne' ca da zaj xu'u xichaj lázxdau bénneache.

3

Jesús dxuchálajle' Nicodemo

¹ Zua tu benne' xudau' fariseo le' Nicodemo. Naque' benne' blau lávela benne' judío ca'. ² Benne' nigá guxíaje' xeajnné'e Jesús chizrela, na' guzre' Le':

—Benne' Weséde, nézentu' Dios nasel-le' Lue' chee gusédenu' netu' lawe' da quebe nu benne' gaca guné' ca zaj naca xel-la' waca zrenté da dxunu' Lue' che quebe zúale Dios le'.

³ Nadxa Jesús guzre' le':

—Da li dxapa' lue', nu benne' quebe gálaje' xecha lasa quebe gaca gaque' tuze benne' ca' dxenná be'e Dios.

⁴ Nicodemo bchebe' Jesús:

—¿Ájazra gaca xexalaj tu benne' ba naque' gula? ¿Waca xexu'e le'e xrne'e chee gálaje' xetú?

⁵ Jesús bechebe':

—Da li dxapa' lue', nu benne' quebe gálaje' ne chee nisa chee xrtizra' Dios, ne ne chee Be' Lá'azxa, quebe gaca chu'e naga dxenná bea Dios. ⁶ Benne' nálaje' lu ni'a lu na' bénneache, naque' bénneacheze. Nu benne' nálaje' ne chee Be' Lá'azxa, naca ban bénnea' ne chee Be' Lá'azxa. ⁷ Quebe xebánenu' lawe' da dxapa' lue', dxun na ba xen gálaju' xecha lasa. ⁸ Gáteteze dxaca be'. Dxennu' ca schaga da dxun na, na' quebe nézenu' gala za na, ne gala zeaj na. Cá'anqueze naca chee benne' zaj nálaje' ne chee Be' Lá'azxa. Gaca le'enu' da ba nun Be' na' lu xichaj lázxdau bénnea', na' quebe dxelé'enu' ájala dxun Be' na'.

⁹ Nadxa Nicodemo bchebe' Jesús:

—¿Ájazra gaca da caní?

¹⁰ Bechebe' Jesús:

—Lue' nacu' tu benne' weséde blau ládujla benne' Israel ca', na' ¿quebe nézenu' da caní? ¹¹ Da li dxapa' lue', netu' dxuchálajntu' ca naca da nézentu', ne dxexchébentu' ca da blé'entu', na' le'e quebe dxéajlele da dxentu' le'e. ¹² Che quebe dxéajlele chia' gate dxuchálajlena' le'e ca naca chee da dxaca lu xezr la xu nigá, ¿ájazra gaca chéajlele chia' che guchálajlena' le'e chee da dxaca xabáa?

¹³ 'Quebe ne cuen tu benne' xabáa chee lé'enge' ca dxaca na'. Tuze Bénnea' bétaje' xabáa, Bénnea' naca' neda', Benne' Gulje' Bénneache, naca' Bénnea' zúaqueze' xabáa. ¹⁴ Ca ben Moisés, bde'e tu belá' xia le'e xaga naga zua le'e xixre' lawe' lataj, cá'anqueze neda', Benne' Gulje' Bénneache, wuludá'queze' neda' tu le'e xaga, ¹⁵ chee quebe xelebía xi' nu benne' xeléajle'e chia'. Zrué'e bénnea' xel-la' nabán da zeajli canna.

Dios dxezrí'i lazre' bénneache

¹⁶ Dios dxezrí'i lázrele'ene' bénneache, na' chee le na' bdee' Zrí'ine' tu licha' chee quebe xelebía xi' nu benne' dxelájl'e' chee'. Zrué'e bénnea' xel-la' nabán da zeajli canna. ¹⁷ Dios gusél-le' Zrí'ine' lu xezr la xu nigá, quegá chee guzrí'a xi'e bénneache, san chee gusel'e' bénneache.

¹⁸ Bénnea' dxéajle'e' chee Zrí'ine' Dios quebe naca chee' cuía xi'e, san nu benne' quebe dxéajle'e' chee' ba naca chee' cuía xi'e lawe' da quebe dxéajle'e' chee' Zrí'ine' Dios, bi tu licha' chee'. ¹⁹ Benne' ca' quebe dxelájl'e' chee' ba zaj naca chee' cuía xi'e lawe' da gate bla' xel-la' naxaní' lu xezr la xu nigá, beledámedxene' da chul-la ca xel-la' naxaní', lawe' da dxelune' da calela. ²⁰ Xúgute benne' dxelune' da calela dxelecuídené' xel-la' naxaní', ne quebe dxelebigue' lu xel-la' naxaní', chee' quebe gaca bea da calela da dxelune'. ²¹ Benne' ca' dxelune' ca naca da li dxelebigue' lu xel-la' naxaní' chee' gaca bea naca na chee' Dios da dxelune'.

Da gunná Juan, bénnea' bchue' bénneache nisa

²² Gudé na' guxíaj Jesús naga nababa Judea nen benne' ca' dxusédené', na' guzúe' na' zane' zra nen benne' ca', dxuluchúe' bénneache nisa. ²³ Cá'anqueze zua Juan lu xezr la xu chee' xezre Enón da zua gáguze naga dxe' xezre Salím, dxuchúe' bénneache nisa lataj na' lawe' da déle'e' na' nisa zila, na' belezrín benne' zan naga zua Juan, na' beledxúe' nisa. ²⁴ Da nigá guca na nédxudxa gate quebe ne xelegú'e' Juan lizre xia.

²⁵ Nadxa bal-la benne' zaj de'e' Juan gulezú lawe' dxulutil-le' judío ca' dizra' ca naca chee' da dxucá'ana chawe na bénneache lau Dios. ²⁶ Nadxa xeaajleguezre' Juan:

—Benne' wesede, bénnea' blé'e' naga zu' chalá'a xegu Jordán naga dxalaj gubizra, bénnea' bchálajlenu' netu' chee', na'a dxuchúe' bénneache nisa, na' xúgute bénneache zjácálené' Le'.

²⁷ Nadxa Juan guzre' benne' ca':

—Quegá nu benne' gaca bi gape' che quebe gunezruj Dios na chee'. ²⁸ Le'e' bénnezle gunnía' neda' quebe nácaqueza' neda' Cristo, Bénnea' guchebe lazre' Dios sel-le'. Naca' tu benne' nasel-la Dios chee' quia lawa' lau Le'. ²⁹ Lu laní chee' wechaga na', bénnea' si'e' nu'ula wechaga na' naque' benne' wechaga na', na' benne' ljwezre benne' wechaga na', bénnea' zu'e' na', ne dxenne' chee', dxebéle'ene' gate dxenne' da dxuchalaj benne' wechaga na'. Cá'anqueze neda' dxebéle'eda' lawe' da caní naca' ljwezre Cristo. ³⁰ Le' dxal-la' gácadxe' szren, na' neda' dxal-la' gácadxa' cá'aze.

Ca naca chee' Bénnea' za' xabáa

³¹ Na' gunná Juan:

—Bénnea' za' xabáa nácadxe' blau ca xúgute bénneache. Benne' naque' chee' xezr la xu nigá naque' bénneacheze, ne dxuchálaje' ca naca chee' da dxaca lu xezr la xu nigáze. Bénnea' ze'e' xabáa nácadxe' szren ca xúgute bénneache. ³² Le' dxuchálaje' ca naca chee' da ba blé'ene', ne da ba benne' xabaala, na' quebe dxéajle' nu benne' chee' da dxenné'. ³³ Che nu benne' dxéajle'e' chee', benne' nigá dxulé'ene' naca li ca da dxenná Dios. ³⁴ Bénnea' nasel-la Dios dxuchálaje' xrtizra' Dios lawe' da dxunna Dios Le' Be' Lá'azxa chee' duté' ca naque'. ³⁵ Xradxu Dios nazrí'ine' Zrí'inequeze', ne ba bdee' lu ne'e' xúgute da de'. ³⁶ Nu benne' dxéajle'e' chee' Zrí'ine' Dios nape' xel-la' nabán da zeajli canna, na' benne' quebe dxuzúe' dizra' chee' Zrí'ine' Dios quebe gape' xel-la' nabán caní. Wadé' lu da ba xa' da gun Dios.

4

Dxuchálajle Jesús tu nu'ula cheę tu xęzre nababa na Samaria

¹ Benne' fariseo ca' belenne' zjácalę benne' zandxa Jesús ca benne' zjácalęne' Juan, na' dxuchúa Jesús benne' zandxa nisa ca benne' dxuchúa Juan nisa. ² Quebe dxuchúaqueze Jesús bénneache nisa. Benne' ca' dxusédenę' dxuluchúę' bénneache nisa. ³ Gate guque be'e Jesús da nigá, na' bezé'e naga nababa Judea, xexíaję' naga nababa Galilea.

⁴ Ca xu'u Jesús neza, ben na ba xen téę' naga nababa Samaria. ⁵ Ca'an guca, bzrinę' tu xęzre naga nababa Samaria nazi le na Sicar, da dxe' gáguze naga zua xęzr la xu na' bnezruj Jacob cheę zrí'ing', bi lębe' José. ⁶ Lu xęzr la xu na' gudęn Jacob, zre sua Abraham, tu beaj situj. Ba dxeajxreque Jesús xu'e neza, na' gudxé'e dxu'a beaj na'. Naca na zran wagubizra. ⁷⁻⁸ Benne' ca' dxusęde Jesús xjaque' lu xęzre Sicar, xeajlegá'awe' da xelawe'. Dxácatę' na' bzrin tu nu'ula Samaria dxu'a beaj na' zeajxri'e nisa, na' Jesús guzre' le':

—Benna nisa xí'aja'.

⁹ Nadxa nu'ula na' bechebe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'. ¹⁰ Nadxa bechebe Jesús:

—Chela nézenu' da dxunna Dios, ne nua' dxenabe' lue' nisa xí'aję', lue' nábenu' neda', na' neda' gunna' lue' nisa da gunna na lue' xel-la' nabán.

¹¹ Na' nu'ula na' guzre' Le':

—Benne', quebe bi nuxru' cuéaju' nisa, na' beaj nigá nácalę'e na situj. ¿Ájazra na' gunu' gunnu' neda' nisa cheę xel-la' nabán? ¹² Xra xrtáuntu', Jacob, benne' netu' beaj nigá, naga gü'e'queze le' nisa, ne naga gulé'ajqueze zrí'ing', ne be xixre' cheę'. ¿Nácadxu' szrendxa ca le'?

¹³ Jesús bechebe':

—Xúgute benne' dxelé'aję' nisa cheę beaj nigá welexebilequezne' nisa. ¹⁴ Nu benne' xí'aję' nisa da gunézruja' neda', québedxa bílenę' na, lawe' da nisa na' dxunézruja' neda' galaj na lu xichaj lázrdawe' ca tu beaj nisa da gunna na le' xel-la' nabán da zeajlí canna.

¹⁵ Nadxa nu'ula na' guzre' Le':

—Benne', benne' neda' nisa na', cheę québedxa gun na ba xen xida' nigá xedajxrí'a nisa.

¹⁶ Na' Jesús guzre' nu'ula na':

—Guxíaj xeajnné benne' chiu', na' xídale nigá.

¹⁷ Na' bechebe nu'ula na':

—Quebe nu chilá' benne' chia'.

Nadxa Jesús guzre' le':

—Da li dxennáu' quebe nu chilá' benne' chiu', ¹⁸ lawe' da ba guzúalęnu' gazxu' benne', na' bénnea' zúalęnu' na'a quebe naque' benne' chiu'. Ca naca da nigá gunnáu' da li.

¹⁹ Gate nu'ula' benne' da nigá, na' gunné':

—Xran, dxéqueda' nacu' lue' benne' dxuchalaję' waláz cheę Dios. ²⁰ Xra xrtáuntu' ca' bulucá'ana szrenę' Dios lu xi'a nigá, na' le'e, benne' judío, dxennale dxun na ba xen gucá'ana szrendxu Dios xęzre Jerusalén.

²¹ Na' bechebe Jesús:

—Guxéajle chia', nu'ula. Ba za zra gate le'e gucá'ana szrenle Xradxu Dios, ne quebe gun na ba xen xídale lu xi'a nigá, ne quebe gun na ba xen chéajle Jerusalén. ²² Le'e, benne' Samaria, quebe núnbeale nua' dxucá'ana szrenle. Netu' núnbeantu' Nua' dxucá'ana szrentu', lawe' da za' benne' weselá ládujla benne' judío ca'. ²³ Wazrín zra, ne ba dxezrín zra na', gate benne' ca' da li dxulucá'ana szrene' Xradxu Dios, xeluné' na ne chee Be' Lá'azxa, ne ne chee da li, lawe' da dxaca lazre' Xradxu Dios xulucá'ana szren bénneache Le' caní. ²⁴ Dios naque' Be', na' benne' dxulucá'ana szrene' Le', dxun na ba xen xulucá'ana szrene' Le' ne chee Be' Lá'azxa, ne ne chee da li.

²⁵ Na' nu'ula na' guzre' Le':

—Neda' nezda' walá' benne' Mesías (da zéaje na Cristo), na' gate la' Le', na' guzėjni'ine' dxi'u ca naca xúgute.

²⁶ Jesús guzre' le':

—Neda' naca' Bénnea', dxuchálajlena' lue'.

²⁷ Ca gunné' ca', na' belexezrín benne' ca' dxuseđene', na' belexebánene' lawe' da dxuchálajle Jesús tu nu'ula Netúe' quebe bexázrjene' guchebe' Le' bi da dxaca lazre', u bizra cheen dxuchálajlene' nu'ula na'. ²⁸ Nadxa nu'ula na' bca'ané' dxe'e chee' dxu'a beaj na', na' bezé'e zexíaje' xezre na' naga xeajezre' benne' ca':

²⁹ —Le da lé'ele tu benne' guzre' neda' xúgute da ba bēna'. ¿Quegá benne' nigá Cristo, Bénnea' sel-la Dios?

³⁰ Nadxa beledxúaj benne' ca' xezre na', zjaque' naga zua Jesús. ³¹ Dxácate na', benne' ca' dxuseđe Jesús gulata' xuene' Le', gulenné':

—Benne' Wesede, gudagu late'.

³² Jesús guzre' benne' ca':

—De da dxawa', da quebe núnbeale le'e.

³³ Nadxa benne' ca' dxuseđe Jesús gulezú lawe' dxulučebe ljwezre', dxelenné':

—¿Núteca bedajgú'e da gudawe'?

³⁴ Jesús guzre' le':

—Xela wagu chia' naca na chee guna' da dxaca lazre' Xra', Bénnea' nasele' le' neda', ne chee gusexuzra' guna' zrin chee'. ³⁵ Le'e dxennale: “Xetapa beu' xelápadxu.” Neda' dxapa' le'e, le nna' bénneache zaj naque' ca tu lina, da bache naca na xelápadxu. ³⁶ Benne' dxelape' dxezi'e lazruj chee', na' da dxelape' naca na chee xelapa bénneache xel-la' nabán da zeajli canna, chee sua xel-la' dxebe' benne' dxaza tu zren nen benne' ca' dxelape'. ³⁷ Da li naca ca da dxelenná bénneache: Tu benne' dxaze', na' xetúe' dxelape'. ³⁸ Neda' gusel-la' le'e xelápale naga quebe gúzale. Ca' naca na, benne' xula beluné' zrin gulaze', na' le'e dxezile ba neza zrin da belún benne' ca'.

³⁹ Benne' zan, benne' xezre na' naga nababa Samaria, guléajle'e chee Jesús ne chee xrtizra' nu'ula na', gunné': “Guzre' neda' xúgute da ba bēna'.” ⁴⁰ Gate belelá' benne' Samaria ca' naga zua Jesús, na' gulata' xuene' Le' xegá'ané' nen le', na' begá'ané' na' chupa zra. ⁴¹ Benne' zandxa guléajle'e chee Jesús gate belenne' ca da dxenná Le'. ⁴² Nadxa gulé'e nu'ula na':

—Na'a dxéajlentu' chee' quegá tuze ne chee da guzru' lue' netu', na' cá'anqueze lawe' da bénquezentu' netu' chee', na' nézentu' da li naque' Cristo, Bénnea' guselé' ca naca bénneache.

Jesús dxexune' zri'ine tu benne' wen zrin blau chee xu'u lawe'

⁴³ Gudé chupa zra bezá' Jesús xezre ca' zaj nababa Samaria, na' guzé'e zéajé' naga nababa Galilea. ⁴⁴ Guxíajé' na' lawe' da gunnáqueze Jesús, gunné': "Tu benne' dxuchalajé' waláz chee Dios, quebe dxelapa benne' lazrié' le' ba lá'ana." ⁴⁵ Gate bezrine' naga nababa Galilea, benne' zaj zre'e na' belez'í' lu ne'e Le' du lazre', lawe' da xjácaqueze le' Laní Pascua da guca na Jerusalén, na' belelé'ene' xúgute da ben Jesús lu laní na'.

⁴⁶ Nadxa bezrin Jesús xezre Caná naga nababa Galilea naga bene' bexaca nisa xrise uva wal-la. Zua lu xezre Capernaum tu benne' wen zrin blau chee xu'u lawe', zua tu zri'ine' bi biu quebe chawe' zúabe'. ⁴⁷ Gate ben benne' wen zrin blau nigá ba bezá' Jesús naga nababa Judea, ne ba bezrine' naga nababa Galilea, na' guxíajé' xejanné' e Jesús, na' gutá' xuene' Le' chéajé' lizre' xexunge' bi biu chee', bi na' ba zua gátebe'. ⁴⁸ Nadxa Jesús guzre' le':

—Le'e quebe chéajlele chia' che quebe lé'ele xel-la' waca chee xabáa da dxulé'eda'.

⁴⁹ Benne' wen zrin blau na' gunné':

—Xran, gudázega na'a quebe ne gate zri'ina'.

⁵⁰ Nadxa guzre Jesús le':

—Bexíaj lizru'. Naca ban bi chiu'.

Benne' wen zrin blau na' guxéajlé'e chee da guzre Jesús lé', na' bezé'e zexíajé'. ⁵¹ Gate ba zua xezrine' lizre', na' benne' wen zrin chee' xejalex-ezrígalé' le', na' gulé'e le':

—Naca ban zri'inu'.

⁵² Nadxa bchebe' benne' ca' bátala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

⁵³ Nadxa benne' wen zrin blau na' bexúnene' guca na la' ná'queze gate guzre Jesús le': "Naca ban zri'inu'." Ca'an guca, le', ne xúgute benne' zaj zra' lizre' guléajlé'e chee Jesús.

⁵⁴ Da nigá naca na xel-la' waca zren da gudxupe' da ben Jesús gate bezrine' naga nababa Galilea.

5

Jesús dxexune' tu benne' biu naga nazi le na Betesda

¹ Ca gudé na' guxú'u tu laní chee judío ca', na' bezrin Jesús xezre Jerusalén.

² Lu xezre na', gáguze naga zua dxa xu'u chee xezre da nazi le na Dxa Xu'u Chee Zrila' Ca', dxe' tu cue'la nisa nazi le na Betesda lu dizra' hebreo, na' dxu'a nisa na' zaj nnita gazxu' lachila. ³ Lachila ca' zaj de' benne' zan zaj xu'e we', benne' la chul-la ca', ne benne' zaj zua zri ni'a ne'e, ne benne' zrinnaj ca'. Dxelebeze' ca bixre nisa na'. ⁴ Ca'an naca lawe' da dxetaj tu gubáz chee xabáa bata gala, ne dxunibe' nisa na', na' benne' nedxu dxeajchu'e lu nisa na' ca dxedé dxunibe' na, dxexaque' chee bíteteze xel-la' we' xu'e. ⁵ Zua tu benne' na' ba guca chinu chunne dxua iza xu'e we'. ⁶ Gate ble'e Jesús benne' nigá, ne dxeque bé'ene' ba guca zane' iza xu'e we' na', na' bchebe' le':

—¿Dxaca lazru' xexacu'?

⁷ Benne' we' na' bechebe':

—Benne', quebe nu chilá' benne' cu'e neda' lu nisa na' ca dxedé dxebixre na. Tu tu lasa gate dxaca lazra' chu'a, benne' xula dxu'e nedxudxa.

⁸ Jesús guzre' le':

—¡Guxasa! Becá'a da'a chiu', ne bexíaj.

⁹ La' ná'queze bexaca benne' wə' na', na' bequé'ə da'a chee', ne guzú lawe' dxedé'. Zra na' naca zra dxulupá'ana judío ca', ¹⁰ na' benne' judío ca' gulé'ə bēnnea' bexaque':

—Na'a naca na zra dxupá'anadxu. Quebe naca na gu'u da'a chiu'.

¹¹ Na' benne' na' bechebe':

—Bēnnea' bexunə' neda' guzre' neda': "Becá'a da'a chiu', ne bexíaj'."

¹² Nadxa buluchebe' le':

—¿Nuzra na' guzre' lue': Becá'a da'a chiu', ne bexíaj'?

¹³ Benne' na' quebe nézene' nu bēnnea' bexunə' le' lawe' da ba zexíaj Jesús lálwela benne' zan ca' zaj zre'ə na'. ¹⁴ Ca gudé na' Jesús bezrague' bēnnea', dxedé' chale'aj xudau', na' guzre' le':

—¡Gunná'xque! Ba bexacu' na'a. Québedxa gunu' dul-la, chee' quebe bi sacu' xetú da wál-ladxa.

¹⁵ Nadxa benne' na' bezé'ə zexíaje', na' bzenne' judío ca' bexún Jesús le'.

¹⁶ Chee' le' na' benne' judío ca' guláu zi' xuzre' Jesús, ne gulaca lazre' xelútie' Le' lawe' da dxunə' da caní lu zra dxulupá'anə'. ¹⁷ Jesús guzre' benne' ca':

—Dios, Xra', tu dxúnzqueze' zrin, na' neda' dxuna' zrin.

¹⁸ Chee' le' na' benne' judío ca' gulaca lázredxe' xelútie' Jesús lawe' da quegá tuze dxuzú' chalá'ala da nadxixruj bea na chee' zra dxulupá'anə', na' cá'anqueze dxun cuine' ca Dios gate gunné' Dios nácaqueze' Xre'.

Xel-la' dxenná bea da napa Zri'ine Dios

¹⁹ Nadxa Jesús guzre' benne' judío ca':

—Da li dxapa' le'e, neda', Zri'ine Dios, quebe gaca bi guna' cheézqueza'. Tuze dxuna' da dxelé'eda' dxun Xra'. Xúgute' da dxun Xra', cá'anqueze dxuna' neda', Zri'ine'. ²⁰ Dios, Xra', nazrí'ine' neda', Zri'ine', ne dxulé'enə' neda' xúgute' da dxúnqueze' Le', na' gulé'enə' neda' da zaj nácadxa szren ca da ca' dxuna', na' xebánequezle le'e ca xelaca na. ²¹ Ca dxun Xradxu Dios, dxusebanə' benne' gate, ne dxuxunézruje' xel-la' nabán chee', cá'anqueze neda', Zri'ine', dxuxunézruja' xel-la' nabán chee' benne' ca' dxaca lazra' xunézruja' na. ²² Xradxu Dios quebe dxuchi'ə nu benne', san ba benne' neda', Zri'ine', xel-la' dxenná bea guchi'a da dxelún tu tu bēnneache, ²³ chee' xelapa xúgute' benne' neda', Zri'ine', ba lá'ana, cáteze na' dxelape' ba lá'ana Dios, Xra'. Nu benne' quebe dxape' ba lá'ana neda', Zri'ine', cá'anqueze quebe dxape' ba lá'ana Xradxu Dios nasel-le' neda'.

²⁴ Da li dxapa' le'e, benne' dxenne' da dxenné'a' neda', ne dxéajle'ə chee' Dios nasel-le' neda', benne' nigá nape' xel-la' nabán da zeajlí canna, na' quebe cuía xi'ə lawe' da ba bedxúaje' lu na' xel-la' gute, ne ba zuə' lu xel-la' nabán. ²⁵ Da li dxapa' le'e, wazrín zra, ne ba dxezrín zra na' gate benne' gate ca' xelenne' chí'a neda', Zri'ine Dios, na' benne' xuluzúa xrtizra' welaca bánqueze'. ²⁶ Xráqueza' nape' xel-la' dxenná bea xunézruje' xel-la' nabán da naca na li lazre' chee' bēnneache, ne cá'anqueze ba benne' neda', Zri'ine', xel-la' dxenná bea xunézruja' bēnneache xel-la' nabán caní, ²⁷ ne ba benne' neda' xel-la' dxenná bea guchi'a chee' bēnneache lawe' da naca' Benne' Gulje' Bēnneache. ²⁸ Quebe xebánele chee' da nigá lawe' da zrin zra gate xúgute' benne' gate xelenne' chí'a ²⁹ xelaxedxúaje' lu xədxu ba. Benne' ca' belunə' da xrlátaje xelxebanə' chee' xelape' xel-la' nabán da zeajlí canna. Benne' ca' belunə' da caləla xelxebanə' chee' xelébía xi'ə.

Da dxelunna bea na napa Jesús xel-la' dxenná bea

³⁰ Na' gunná Jesús:

—Neda' quebe bi gaca guna' cheézqueza'. Neda' dxuchi'a chee bènneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca lazre' Xra', nasel-
le' neda'. ³¹ Che neda' dxexechebe' da nácaze cheéqueza', da dxenné'a' quebe naca na da dxunna bea na. ³² Zua tu benne' xula dxexechebe' da nácaqueze chia', na' da dxenné' naca na da dxunna bea na. ³³ Le'e gusél-lale benne' xejlechebe' Juan, na' ca da bechebe' naca na da li. ³⁴ Da dxunna bea na da dxuxrén lazra' neda' quebe naca na chee bènneacheze. Dxapa' le'e da nigá chee lale le'e. ³⁵ Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'idau'. ³⁶ Zua tu da dxunna bea na chia' neda', da nácadxa szren ca da bchalaj Juan. Da ca' dxuna' neda', da bsebagá Xra' neda' dxuna'. Da caní dxelunna bea na da li Dios, Xra', gusél-le' neda'. ³⁷ Cá'anqueze Xra' nasel-le' neda' dxexechebe' chia'. Lácala ba bchalaj Le', le'e quebe ne xénele chi'e, ne quebe ne lé'ele Le', ³⁸ ne quebe nuzúale dizra' chee' xichaj lázrdaule lawe' da quebe dxéajlele chia' neda', nasel-la Xra' neda'. ³⁹ Le'e dxusédele du lázrele da naxúaj na lu xiche chee Dios lawe' da dxéquele xezrélele xel-la' nabán da zeajlí canna lu xiche na', na' da naxúaj na lu xiche chee Dios dxuchalaj na ca naca chia' neda'. ⁴⁰ Le'e quebe dxaca lázrele xídale naga zua' neda' chee gápale xel-la' nabán na'.

⁴¹ 'Neda' quebe dxezi'a xel-la' ba lá'ana ca da dxelunna bènneache, da quebe naca na li lazre'. ⁴² Neda' núnbe'a le'e, ne nezda' quebe nazrí'ile Dios. ⁴³ Bla'a neda' waláz chee Dios, Xra', na' le'e quebe dxezi' lu na'le neda'. Che za' tu benne' lu da naca cheézqueze', benne' na' wazi' lu na'le. ⁴⁴ ¿Ájazra gaca chéajlele le'e chia' che dxunle zrin chee xelapa ljwézrele le'e ba lá'ana, ne quebe dxue lázrele sile xel-la' ba lá'ana da dxunna Dios tu licha'? ⁴⁵ Quebe guéquele néda'queza' gusebaga' le'e zria lau Dios, Xra'. Da gusebaga le'e zria naca na da ba gunná Moisésqueze, da na' dxuxrén lázrele guselá na le'e. ⁴⁶ Che da li guxéajlele le'e chee da gunná Moisés, cá'anqueze chéajlele chia' neda' lawe' da bzuaaj Moisés ca naca chia' neda'. ⁴⁷ Na'a, che quebe dxéajlele chee da bzuaaj le', ¿ájazra gaca chéajlele chee da dxapa' le'e?

6

Jesús dxugawe' chi xun gaxúa benne' biu

(Mt. 14.13-21; Mr. 6.30-44; Lc. 9.10-17)

¹ Ca gudé na' guxíaj Jesús xecha la'a dxu'a nísadau' chee Galilea, da nazíqueze le na nísadau' chee Tiberias. ² Benne' zantę zjácalęne' Jesús lawe' da ba belelé'eng' xel-la' waca zren ca' da dxun Le', dxexung' benne' we' ca'. ³ Nadxa Jesús guluéne' tu lu xi'a, na' gudxé'e na' nen benne' ca' dxusédenę'. ⁴ Ba zua gagu Laní Pascua chee judío ca'. ⁵ Gate ble'e Jesús benne' zan ca' zá'aque' zeaj nawe' Le', na' guzre' Felipe:

—¿Gazra cheajxridxu da xelagu benne' zan caní?

⁶ Gunná caní Jesús chee la' bi nna Felipe, lawe' da ba neze Jesús ca da gunę'. ⁷ Nadxa bechebe Felipe:

—Che sídxu xeta xtila lazruj da sídxu chee chupa gaxúa zra, quebe gueque na xezezi' benne' caní late' weaj.

⁸ Nadxa Andrés, xetú benne' ca' dxuséde Jesús, ne naque' bi biche Simón Pedro, guzre' Jesús:

9—Ze tu bi cuide' nigá nápabe' gazxu' xeta xtila zrua' cebada, ne chupa bela. ¿Ájazra gun da nigá gueque na chee xúgute benne' caní?

¹⁰ Nadxa gunná Jesús:

—Le xe xúgute' xelebé'e.

Naca lu daca lataj na', na' gulebé' ca du chi xun gaxúa benne' biu. ¹¹ Nadxa gucá'a Jesús xeta xtila ca', na' ca gudé guzre' Dios "Xcalenu'", bnézruje' na benne' ca' dxusédene', na' benne' caní gulísie' na láwele benne' zan ca' zaj dxe'e na'. Cá'anqueze ben Jesús chee' bela ca', na' bnézruje' ca da gulaca lazre' benne' ca'. ¹² Gate gulélaje benne' ca', na' Jesús guzre' benne' ca' dxusédene':

—Le xutupa da bízrujdu ca' da dxelexegá'ana na, chee' quebe bi gaca dítaje.

¹³ Belexequé'e na, na' buluzré'e chazrinnu xcuite da bízruj ca' zaj nagá'ana na chee' da gazxu' xeta xtila zrua' cebada ca'. ¹⁴ Nadxa benne' zan ca', gate belelé'ene' xel-la' waca zren nigá da ben Jesús, gulenné':

—Da li benne' nigá naque' bènea' guchálaje' waláz chee' Dios, bènea' dxal-la' le'e.

¹⁵ Guque bé'ene' Jesús dxelaca lazre' xeleché'e Le' xadía chee' xuluzúe' Le' ca benne' wenná bea, na' bezé'e na, ne begüéne' lu xi'a sibe na' chee' sue' leze'.

Jesús dxedé' lawe' nísadau'

(Mt. 14.22-27; Mr. 6.45-52)

¹⁶ Gate ba za xrinne, benne' ca' dxusede Jesús belétaje' dxu'a nísadau', ¹⁷ na' gulu'e lu da dxedá lawe' nísadau', ne gulezú lawe' zjaque' xeledé'e xechalá'a nísadau' chee' xelezrine' xezre Capernaum. Ca guxrinne, quebe ne xezrín Jesús na'. ¹⁸ Nadxa guzú lau dxaca tu be' bduunu' lawe' nísadau' na', na' xeajxruza chee' nísadau' na' guxásale'e na. ¹⁹ Gate ba guledé'e lu nísadau' na' catite sadxu tu chi'i zren, na' belelé'ene' Jesús ba dxezrine' naga ziaj da dxedá lawe' nísadau', dxezé'e lawe' nísadau', na' belezrebe'. ²⁰ Nadxa Jesús guzre' benne' ca':

—Neda' na'. Quebe zrébele.

²¹ Nadxa lu dute' xel-la' dxelebe' gulezú' lu ne'e Le' lu da dxedá lawe' nísadau' na', na' chadite' belezrine' lu xezr la xu naga zjaque'.

Benne' zan ca' dxelexilaje' Jesús

²² Zra xula benne' zan ca', benne' belexegá'ana xecha la'a nísadau', guleque bé'ene' ba zeajxaca benne' ca' dxusede Jesús lu da dxedá lawe' nísadau' tu licha' da dxe' chalá'a na', na' Jesús quebe guxíajlene' benne' ca'. ²³ Dxácate' na xezícala da dxeledá lawe' nísadau', da ca' beledxúaj na xezre Tiberias, belezrín na tu lataj da zua gáguze naga gulawe' xeta xtila na' ca' gudé guzre' Xránadxu Dios: "Xcalenu'." ²⁴ Chee' le na' gate benne' zan ca' guleque bé'ene' québedxa zua Jesús na', ne cá'anqueze benne' ca' dxusédene', na' gulu'e lu da dxeledá lawe' nísadau', ne xjaque' xezre Capernaum zeajlexedílaje' Jesús.

Jesús naque' xeta xtila da dxunna na xel-la' nabán li lazre'

²⁵ Gate benne' zan ca' belezrine' xecha la'a dxu'a nísadau', na' belexezrague' Jesús, ne buluchébe' Le':

—Benne' Weséde, ¿bata bla'u nigá?

²⁶ Jesús guzre' benne' ca':

—Da li dxapa' le'e, dxexilaje' le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e. ²⁷ Quebe cue'le gunne xue sile da gágule da te chee' na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na

xel-la' wagu da gunna' neda', Benne' Gulje' Bénneache, le'e, lawe' da bzua Xra' Dios nen neda' da dxunna bea na naca' Zrí'ine'.

²⁸ Nadxa buluchebe' Le':

—¿Bi dxal-la' guntu' chee gaca ca da dxaca lazre' Dios guntu'?

²⁹ Jesús bechebe':

—Da dxaca lazre' Dios gunle naca na chéajle chia' neda', naca' Bénnea' gusel-la Dios.

³⁰ Nadxa buluchebe' Le':

—¿Bizra xel-la' waca gunu' chee le'entu' na, na' chéajlentu' chiu'? ¿Bizra dxunu'? ³¹ Xra xrtauntu' ca' gulawe' xeta maná le'e xixre' lawe' lataj, ca naxúaj na lu xiche chee Dios, dxenná na: Dios bgawe' benne' ca' xeta xtila da za xabáa.

³² Bechebe Jesús:

—Da li dxapa' le'e, quegá Moisés na' bnézruje' benne' ca' xeta xtila da za xabáa. Dios, Xra', dxunne' le'e xeta xtila da za xabáa da naca na li lazre'. ³³ Xeta xtila na' da dxunna Dios le'e naca na Bénnea' bétaje' xabáa, ne dxunézruje' chee bénneache xel-la' nabán li lazre'.

³⁴ Nadxa benne' ca' gulé'e Le':

—Xran, tu bennazqueze cheentu' xeta xtila caní.

³⁵ Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xide' naga zua' neda' cabátadxa tune', na' benne' chéajle'e chia' cabátadxa bílene'.

³⁶ Naca na ca ba gucha' le'e. Le'e na' quebe dxéajle chia', lácala ba ble'ele neda'. ³⁷ Xúgute benne' ca' dxunna Xra' neda', xelélé'e lawa', na' benne' ca' xelélé'e naga zua', quebe guzúa' benne' ca' chalá'ala. ³⁸ Neda' guzá'a xabáa, quegá chee guna' ca dxaca lázrequeza' neda'. Bla'a chee guna' ca da dxaca lazre' Xra', gusel-le' neda'. ³⁹ Da dxaca lazre' Xra', nasel-le' neda', naca na chee quebe gunitia' netú benne' ca' ba benne' chia'. Nacan chee gusebana' benne' ca' lu zra bzebe. ⁴⁰ Da dxaca lazre' Xra', nasel-le' neda', naca na chee xelapa bénneache xel-la' nabán da zeajlí canna, xúgute benne' ca' xelenné'e neda', Zrí'ine Dios, ne xeléajle'e chia' neda', na' chee gusebana' neda' benne' ca' lu zra bzebe na'.

⁴¹ Gate belenne' da nigá, na' judío ca' gulezú lawe' dxelezí tizre' Jesús lawe' da gunné': "Neda' naca' xeta xtila da betaj xabáa." ⁴² Nadxa gulenné':

—¿Quegá benne' nigá zrí'ine José? Dxi'u núnbeadxu xra xrne'e. ¿Bizr chee na' dxenné' bétaje' xabáa?

⁴³ Nadxa Jesús guzre' benne' ca':

—Québedxa si tízrale. ⁴⁴ Quebe nu benne' gaca xide' naga zua' neda', che quebe xedajgúa Xra' nasel-le' neda' bénnea', na' neda' gusebana' bénnea' lu zra bzebe na'. ⁴⁵ Lu xiche ca' naga naxúaj da gulenná benne' ca' buluchalaje' waláz chee Dios, dxenná na: Dios gusédene' xúgute bénneache. Ca' gaca na, xúgute benne' ca' dxuluzé nague' ca da dxusede Xra', dxelelé'e naga zua'.

⁴⁶ Quebe ne le'e nu benne' Xra'. Benne' tu licha', bénnea' blé'engé' Le', naca bénnea' guzé'e naga zua Dios. ⁴⁷ Da li dxapa' le'e, nu benne' dxéajle'e chia' neda' nape' xel-la' nabán da zeajlí canna. ⁴⁸ Neda' naca' xeta xtila da dxunna na xel-la' nabán li lazre'. ⁴⁹ Xra xrtáule ca' gulawe' xeta maná le'e xixre' lawe' lataj, na' gudé na' xúgute benne' ca' gulatie'. ⁵⁰ Xeta xtila nigá naca na da za xabáa, na' che nu benne' gawe' na, quebe gatie' tu chi'ize. ⁵¹ Néda'queza' naca' xeta xtila da dxunna na xel-la' nabán da za xabáa. Benne' gawe' xeta xtila

nigá waca bánqueze' chadíá chacanna. Xeta xtila na' da dxunna' neda' naca na belá' dxen cheézqueza', da gunna' chee xelaca bánqueze bénneache.

⁵² Nadxa benne' judío ca' gulezú lawe' dxuluchebe ljwezre', dxelenné':

—¿Ájazra gun benne' nigá, gunne' dxi'u belá' dxen cheézqueze' chee gágudxu na'?

⁵³ Jesús guzre' benne' ca':

—Da li dxapa' le'e, che le'e quebe gágule belá' dxen chia' neda', Benne' Gulje' Bénneache, ne che quebe xí'ajle dxen chia', quebe gápale xel-la' nabán li lazre'.

⁵⁴ Benne' dxawe' belá' dxen chia', ne dxí'aje' dxen chia' nape' xel-la' nabán da zeajlí canna, na' neda' gusebana' bénnea' lu zra bzebe na'. ⁵⁵ Bela' dxen chia' naca na xel-la' wagu li lazre' chee bénnea'du xu'ule, na' dxen chia' naca na da xele'aj bénneache da naca na li lazre'. ⁵⁶ Benne' dxawe' belá' dxen chia', ne dxí'aje' dxen chia', naque' neda' tuze, na' néda'queza' naca' bénnea' tuze. ⁵⁷ Xra' nasele' neda' xu'u lu ne'e xel-la' nabán li lazre', na' neda' naca bana' ne chee Le'. Cá'anqueze bénnea' dxawe' da naca chia' neda' gaca bánqueze' ne chia' neda'. ⁵⁸ Da nigá naca na xeta xtila da za xabáa. Xeta xtila nigá quebe naca na ca xeta maná da gulagu xra xrtáule ca', na' gudé na' gulate xúgute'. Benne' dxawe' xeta xtila nigá waca bánqueze' chadíá chacanna.

⁵⁹ Bsede Jesús ca naca da caní naga zaj zra' benne' zan ca' lu xu'u naga dxelezraga bénneache chee xezre Capernaum.

Ca naca dizra' na' da dxunna na xel-la' nabán da zeajlí canna

⁶⁰ Gate belén benne' zan ca' da nigá dxusede Jesús, na' benne' ca' zjácale Jesús gulenné':

—Dizra' caní dxenná Jesús zaj nácale'e na stebe sidxu. ¿Nuzra gaca gun caní'?

⁶¹ Guque bé'ene' Jesús dxelenné' chee xrtizre', na' bchebe' benne' ca':

—¿Dxuzúa dizra' nigá le'e stebe? ⁶² ¿Ájazra gunle checa' lé'ele neda', Benne' Gulje' Bénneache, xegüéna' xabáa naga zua' nédxute'? ⁶³ Be' naca na da dxunna xel-la' nabán li lazre'. Da naca na belá' dxen quebe bi zaca na. Dizra' ca' da ba gucha' le'e zaj naca na chee Be', ne zaj naca na da dxelunna na xel-la' nabán li lazre'. ⁶⁴ Bál-lale le'e quebe dxéajlele chia'.

Caní gunná Jesús lawe' da nézeng' nédxudaute' nu benne' ca' quebe dxeléajle'e chee', ne nua' gudé Le' lu na' benne' guledábage' Le'. ⁶⁵ Nadxa gunná Jesús:

—Chee le' na' gucha' le'e, quebe nu benne' gaca xide' naga zua' neda' che quebe xedajgúa Xra' bénnea'.

⁶⁶ Lu zra ná'queze benne' zan ca', benne' xjácalene' Jesús, québedxa xjácalene' Le'. ⁶⁷ Nadxa Jesús bchebe' benne' chazrinnu ca' dxusédene', gunné':

—¿Cá'anqueze le'e dxaca lázrele xexíajle'?

⁶⁸ Bechebe Simón Pedro:

—Xran, ¿nuzra chéajlentu'? Dizra' chiu' naca na da dxunna na xel-la' nabán da zeajlí canna. ⁶⁹ Netu' dxéajlentu' chiu', ne nézentu' nacu' Cristo, Zri'ine Dios ban.

⁷⁰ Jesús bechebe':

—Neda' gucá'a le'e, benne' chazrinnu, na' tu benne' ládujla le'e xu'e da xriwe'.

⁷¹ Da nigá gunná Jesús, bchálaję' ca naca cheę Judas Iscariote, zri'ine tu benne' le' Simón, lawe' da gudę Judas nigá Jesús lu na' benne' guledábague' Le'. Naque' tu benne' chazrinnu ca' dxusęde Jesús.

7

Benne' biche Jesús quebe dxelęaję'e cheę'

¹ Gudę na' gudę Jesús naga nababa Galilea. Quebe guca lazre' teę' naga nababa Judea lawe' da dxelaca lazre' judío blau zaj zre'e na' xelútie' Le'. ² Ba za laní gate judío ca' dxelezúę' lu xu'u laga' ca'. ³ Cheę le' na' bi biche Jesús gulę'e Le':

—Quebe xegá'anu' nigáze. Bexíaj Judea, cheę cá'anqueze benne' ca' dxelęaję' chiu' zaj zre'e na' gaca xeledę'eng' ca' da dxunu'. ⁴ Che nu benne' dxaca lazre' xelúnbe'e bęnneache le', quebe dxunę' da ca' bagácheze. Lawe' da dxunu' Lue' da caní, ben na lau xúgute bęnneache.

⁵ Caní gulennę' lawe' da quebe dxelęaję' benne' biche' ca' cheę Jesús.

⁶ Nadxa Jesús guzre' benne' ca':

—Quebe ne zrin zra cha'a na'. Cheęle le'e bíteteze zra waca chęaję. ⁷ Benne' ca' zaj naca cheę xezr la xu nigá quebe gaca xelecuidenę' le'e. Dxelecuidenę' neda' lawe' da dxulę'eda' neda' naca da caleła da dxelún benne' ca'. ⁸ Le chjaca le'e laní na'. Quebe sa'a neda' na'a lawe' da quebe ne zrin zra cha'a.

⁹ Ca gudę guzre Jesús benne' ca' da nigá, na' begá'ane' naga nababa Galilea na'.

Jesús dxezrinę' laní gate judío ca' dxelezúę' xu'u laga' ca'

¹⁰ Ca gudę besiá'aca benne' biche Jesús, na' cá'anqueze Le' guxíaję' laní na'. Bagácheze guxíaję' cheę quebe nu le'e Le'. ¹¹ Benne' xíchaję cheę judío ca' belexíaję' Jesús lu laní na'. Dxelennę':

—¿Gazra zua bęnnea'?

¹² Ládujla benne' zan ca', benne' zan buluchálaję' ca naca cheę Jesús. Bal-le' gulennę': "Naque' benne' xrlátaję." Xebal-le' gulennę': "Quebe naque' xrlátaję lawe' da dxezi xę'e bęnneache."

¹³ Quebe nu benne' bchálaję' caníqueze ca naca cheę' lawe' da dxelezrebe' da xelún benne' xíchaję ca' cheę judío ca'.

¹⁴ Ba zeaj gachaj laní na' gate guxú'u Jesús lu chale'aj xudau', na' guzú lawe' dxusędenę' benne' zaj zre'e na'. ¹⁵ Belexebane benne' judío ca', dxelennę':

—¿Ajazra na' benne' nigá da zantę nézenę', ne quebe bsędię' cheę xudau'?

¹⁶ Bechebe Jesús:

—Da dxusędeda' neda' le'e quebe naca na cheęzqueza'. Naca na cheę Xra' nasele' neda'. ¹⁷ Che nu benne' dxaca lazre' gunę' ca' da dxaca lazre' Dios, na' wanęzenę' che da dxusędeda' naca na cheę Dios, u che dxennę'a' ca' da naca cheęzqueza'. ¹⁸ Benne' dxuchálaję' da naca cheęzqueze' dxunę' na cheę xelapa bęnneache le' ba lá'ana. Bęnnea' dxue lazre' xelapa bęnneache ba lá'ana bęnnea' gusel-le' le', benne' nigá dxennę' da li, ne quebe bi dxennę' da naca na da węn lazre'.

¹⁹ Moisésqueze bęnne' le'e da nadxixruj bea na, na' netule le'e quebe dxuzále dizra' cheę da nadxixruj bea na na'. ¿Bizr cheę na' dxaca lázrele gútele neda'?

²⁰ Belexechebe benne' zan ca':

—Xu'u lue' be' xriwe'. ¿Núzraqueze dxaca lazre' gutie' lue'?

²¹ Jesús guzre' benne' ca':

—Tu xel-la' waca bena' lu zra dxupá'anale, na' xúgutēle le'e dxebánele. ²² Moisés benne' da zéajlele, dxechúgule late' weaj belá' chee bel-la' dxen chee zrí'inele bi biudu ca' chee xelexegá'anabe' xrlátaje lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'antē. Chee le na' le'e dxechúgule late' belá' chee bel-la' dxen chee tu bi biúdau' chee xegá'anabe' xrlátaje lau Dios lácala naca zra dxupá'anale. ²³ Che caní dxunle lu zra dxupá'anale chee quebe gusanle ca naca da bdxixruj be'e Moisés, ¿bizr chee na' dxezrá'ale neda' lawe' da bexuna' dutē bel-la' dxen chee tu benne' gate naca zra dxupá'anale? ²⁴ Quebe guchí'ale le'e chee tu da dxun benne' ca naca da dxelé'ezele. Gate bi da guchí'ale, le gun na lu da naca xrlátaje.

Jesús dxuchálaje' chee naga ze'e

²⁵ Nadxa bal-la benne' ca' zaj zre'e Jerusalén gulezú lawe' dxuluchebe ljwezre':

—¿Quegá benne' nigá bénnea' dxelexílaje' chee xelútiē' le'? ²⁶ Nigá zue' dxuchálaje' lávela bénneache, na' quebe nu bi dxē Le'. ¿Zaj neze benne' xíchaje ca' da li naca benne' nigá Cristo, Bénnea' nasel-la Dios? ²⁷ Netu' nézentu' ga za' benne' nigá. Gate xida Cristo, quegá nu neze ga ze'e.

²⁸ Jesús zue' dxusédenē' benne' ca' chale'aj xudau', na' gate benne' da nigá, na' gunné' zizraj:

—Dxennale núnbeale neda', ne dxennale nézele ga za'a. Bla'a nigá, quegá chezqueza'. Bénnea' nasel-le' neda' naque' li lazre', na' Bénnea' quebe núnbeale le'e. ²⁹ Neda' núnbe'a Le' lawe' da za'a naga zua Le', na' Le' gusél-le' neda'.

³⁰ Nadxa gulaca lazre' xelēl-le' Jesús. Quebe nu gudela Le' lawe' da quebe ne zrin zra chee xelútiē' Le'. ³¹ Benne' zan guléajle'e chee Jesús, na' gulenné':

—Gate xida Cristo, ¿gúnljadxe' xel-la' waca zrentē ca da dxun benne' nigá?

Benne' fariseo ca' dxelesel-le' xra'aga wen zrin chee' chee xelēl-le' Jesús

³² Benne' fariseo ca' belenne' ca da dxelenná bénneache ca naca chee Jesús, na' le', ne benne' xíchaje ca' chee bxruze ca' gulesel-le' xra'aga wen zrin chee xudau' chee xelēl-le' Jesús. ³³ Nadxa gunná Jesús:

—Wazúalēna' le'e xetú chí'idau', na' xezrínqueza' naga zua Bénnea' gusél-le' neda'. ³⁴ Le'e wexílajle neda', na' quebe xezrélele neda', lawe' da quebe gaca sa'le naga sua' neda'.

³⁵ Nadxa benne' judío ca' gulezú lawe' dxuluchebe ljwezre':

—¿Gazra cheaj benne' nigá, naga quebe gaca xezreldxu Le'? ¿Waxíajē' naga zaj zra' benne' judío ca' zaj nase dínnejē' ládujla benne' xezr la xu ca' chee gusédenē' benne' quebe zaj naque' judío? ³⁶ ¿Bizra zéajē da nigá guzre' dxi'u: Wexílajle neda', na' quebe xezrélele neda' lawe' da quebe gaca sa'le naga sua' neda'?

Jesús dxuchálaje' chee xegu nisa da dxunna xel-la' nabán li lazre'

³⁷ Zra bzebe chee laní na' naca na zra blaudxa. Lu zra na' guzē Jesús, na' gunné' zizraj:

—Che nu benne' dxebilēng', dxal-la' xide' naga zua' neda', na' xí'aje'. ³⁸ Naca na ca naxúaj na lu xiche chee Dios, dxenné': “Benne' dxéajle'e chia, lu lázrdawe' galaj xegu nisa da gunna na xel-la' nabán.”

³⁹ Da nigá gunná Jesús ca naca chee Be' Lá'azxa, Bénnea' xezezi' benne' ca' xeléajle'e chee Jesús, lawe' da quebe ne la' Be' Lá'azxa lawe' da quebe ne xegá'ana szren Jesús naga zua Xre'.

Bénneache dxelaque' chupa la'a

⁴⁰ Bal-la bénneache, gate belenne' da nigá, gulenné':

—Da li benne' nigá naque' Bénnea' guchalaje' waláz chee Dios, Bénnea' dxal-la' xide'.

⁴¹ Xebal-le' gulenné':

—Benne' nigá naque' Cristo, Benne' guchebe lazre' Dios sel-le'.

Xebal-le' gulenné':

—¿Waca Cristo benne' Galilea? ⁴² Lu da naxúaj na lu xiche chee Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

⁴³ Ca'an guca, gulaca benne' ca' chupa la'a ne chee Jesús. ⁴⁴ Bal-le' gulaca lazre' xelel-le' Jesús, na' quebe nu hexazre guné' na.

Benne' xíchaje ca' chee judío ca' quebe dxeléajle'e chee Jesús

⁴⁵ Xra'aga wen zrin ca' chee xudau' belexezrine' naga zaj zra' fariseo ca', ne benne' xíchaje ca' chee bxruze ca', na' benne' caní buluchebe' xra'aga wen zrin ca':

—¿Bizr chee na' quebe guchele bénnea'?

⁴⁶ Belexechebe xra'aga wen zrin ca':

—Quebe ne guchalaj nu bénneache ca dxuchalaj benne' nigá.

⁴⁷ Nadxa fariseo ca' gulé'e xra'aga wen zrin ca':

—¿Cá'aqueze le'e bele lataj guzi xe'e le'e? ⁴⁸ Quebe nu ne chéajle chee bénnea', benne' xíchaje caní, ne cá'aqueze benne' fariseo ca'. ⁴⁹ Benne' ca' dxeléajle'e chee bénnea' quebe zaj núnbe'e da nadxixruj bea na, ne zaj nabía xi'e.

⁵⁰ Nicodemo, bénnea' guxíaje' xeajnné'e Jesús chizrela naque' tu benne' fariseo ca', na' guzre' benne' ca':

⁵¹ —Cateze dxenná da nadxixruj bea cheedxu quebe gaca guzríá xidxu tu benne' che quebe ne xenedxu xechébe' chee nézedxu che bi da nabague'e.

⁵² Nadxa belexechebe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalaje' waláz chee Dios quebe ne gálaje' naga nababa Galilea, naga zaj zra' bénneache quebe zaj naca xánnie' judío.

⁵³ Nadxa tu tu benne' ca' xeajxaque' lize'.

8

¹ Na' Jesús guzé'e zéaje' lu Xi'a Xaga Olivo.

Jesús dxuchálajle' tu nu'ula dxune' dul-la dxíchaje' xrba chee xel-la' nuchaga na'

² Zra xula, gate guxaní', na' bezrín Jesús chale'aj xudau' na'. Xúgute benne' ca' gulebigue' naga zua Jesús, na' Le' gudxé'e, ne guzú lawe' dxusédené' benne' ca'. ³ Nadxa benne' ca' dxuluxuzájle'e da nadxixruj bea Dios, ne benne' fariseo ca' guleché'e tu nu'ula naga zua Jesús, belelé'engé' le' dxune' dul-la dxíchaje' xrba chee xel-la' nuchaga na'. Buluzé' nu'ula na' laduj benne' zaj zre'e na', ⁴ na' gulé'e Jesús:

—Benne' Wesede, nu'ula nigá blé'entu' le' dxune' dul-la dxíchaje' xrba chee xel-la' nuchaga na'. ⁵ Da bdxixruj be'e Moisés dxenná be'e netu' gúntentu' nu'ula caní, güntu' le' xiaj. ¿Bizra dxennáu' Lue'?

⁶ Caní gulenná benne' ca' chee xuludxixre' Jesús chee xezezéquene' xelagu zria Le'. Nadxa gudxé' luche Jesús, ne guzú lawe' dxuzúaje' lu xu nen zrube ne'e. ⁷ Benne' ca' buluchébequeze' Jesús, na' Le' bezé' dxe'e benne' ca':

—Nútezezlale le'e quebe nabágate dul-la, waca su laule güele nu'ula nigá xiaj.

⁸ Na' bebé' luche Jesús, ne bzúajqueze' lu xu. ⁹ Benne' ca', gate belenne' da nigá, quebe bzua xichaj lázrdawe' le' zrize, na' belexedxúaje' tu weaje'. Belexedxúaj za'a benne' gúlaxa, na' ca' belexedxúaj xúgute' benne' ca' dxelagu zrie' nu'ula, na' begá'ana Jesús tuze' nen nu'ula na', ze' laduj benne' ca' dxuluzé nague' chee'. ¹⁰ Nadxa bezé' Jesús, ne gate québedxa nu' benne' ca' ble'e Jesús, benne' dxulagu zrie' nu'ula na', nadxa guzre' le':

—Nu'ula, ¿gazra na' benne' ca' gulagu zrie' lue'? ¿Quebe nu chilá' benne' guzría xi'e lue'?

¹¹ Nu'ula na' gunné':

—Quebe nu chilá', Xran.

Nadxa Jesús guzre' nu'ula na':

—Cá'anqueze neda', quebe guzría xi'a lue'. Bexíaj, ne québedxa gunu' dul-la.

Jesús dxusení'e lu xichaj lázxdau bénneache

¹² Bchálajle Jesús benne' ca' xecha lasa, gunné':

—Neda' naca' xel-la' naxaní' chee lu xichaj lázxdau bénneache. Benne' dxedálene' neda' gape' xel-la' naxaní' nigá da gunezruj na le' xel-la' nabán li lazre', na' cabata' tadxe' lu da chul-la chee dul-la da zaj nabague'.

¹³ Nadxa benne' fariseo ca' gulé'e Le':

—Lue' dxexechebu' cheézquezu', na' da dxexechebu' quebe bi zaca na.

¹⁴ Bechebe Jesús:

—Da dxexecheba' zaca na lácala néda'queza' dxexecheba' cheézqueza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a. ¹⁵ Le'e dxuchi'ale cáteze dxenná xichaj lázrdau. Bla'a neda', quegá chee guchi'a ca da dxun nu' benne'. ¹⁶ Che dxuchi'a, dxuchi'a cáteze naca na, lawe' da quebe dxuchi'a néda'za'. Xra' nasele' neda' dxuchi'e tu zren nen neda' ca naca da dxelún bénneache. ¹⁷ Lu da nadxixruj bea chee le'e naxúaj gate zaj zra' chupa benne' dxelexechebe' tuz ca dxelenné', naca da li xrtizra' benne' ca'. ¹⁸ Néda'queza' dxexecheba' da naca cheézqueza', na' Xra' nasele' neda', cá'anqueze dxexechebe' chia'.

¹⁹ Nadxa benne' ca' buluchebe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

²⁰ Da caní bchalaj Jesús dxácate' na' dxusédene' bénneache chale'aj xudau' naga zaj nnita xi'ina dumí chee xudau'. Quebe nu gudela Le' lawe' da quebe ne zrín zra chee'.

Dxenná Jesús: "Naga cha'a neda' quebe gaca sa'le le'e"

²¹ Nadxa Jesús guzre' benne' ca':

—Wexá'a neda', na' le'e xexílajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

²² Nadxa benne' judío ca' gulé ljwezre':

—¿Gute cuine', ne chee le na' dxenné' quebe gaca chéajdxu naga cheaj Le'?

²³ Nadxa Jesús guzre' benne' ca':

—Le'e nácale chee zran xabáa nigá. Neda' naca' chee xabáa na'la. Le'e nácale chee xezr la xu nigá. Neda' quebe naca' chee xezr la xu nigá. ²⁴ Chee le na' gucha' le'e wátele lu dul-la nabágale, lawe' da che quebe dxéajle zúaqueza' neda', wátele lu dul-la nabágale.

²⁵ Nadxa benne' ca' buluchebe' Jesús:

—¿Nuzra nacu' Lue'?

Bechebe Jesús:

—Nácaqueza' ca ba gucha' le'e nédxudaute. ²⁶ Déle'e da dxal-la' nnia' cheele, ne da dxal-la' guchi'a ca naca da dxunle. Bénnea' gusél-le' neda' dxenné' da li, na' da dxapa' bénneache naca na da ba benda' gunné Le', lácala quebe dzezaca ba lázrele na.

²⁷ Benne' ca' quebe guléajni'ine' dxuchálajle Jesús le' ca naca chee Dios, Xre'.

²⁸ Nadxa Jesús guzre' benne' ca':

—Gate le'e chísale sibe neda', Benne' Gulje' Bénneache, nadxa xúnbeale zúaqueza' neda', ne quebe bi dxuna' da naca cheézqueza'. Tuze dxennéa' ca da ba ble'e Xra' neda'. ²⁹ Bénnea' gusél-le' neda' zúalequeze' neda'. Xra' quebe nucá'ane' neda' tuza' lawe' da tu dxúnzqueza' ca da dzezaca ba lazre' Le'.

³⁰ Ca gunná Jesús da caní, guléajle benne' zan chee'.

Benne' zaj naque' chee Dios, ne benne' ca' nuxru dul-la le'

³¹ Nadxa Jesús guzre' benne' judío ca', benne' dxeléajle'e chee':

—Che le'e se típale lu da dxapa' le'e, da li nácale neda' tuze. ³² Gúnbeale da li, na' da li na' guselá na le'e.

³³ Belexechebe benne' zan ca':

—Netu' nácantu' xrtia Abraham, ne quebe ne chú'untu' lu na' nu benne' ca' benne' zaj nada'u. ¿Bizr chee na' dxennáu' Lue' lantu'?

³⁴ Jesús guzre' benne' ca':

—Da li dxapa' le'e, xúgute benne' dxelúnqueze' dul-la, dúl-laqueze na' nuxru na benne' ca'. ³⁵ Nu benne' xu'e lu na' tu benne' ca' benne' nada'u quebe tu súazqueze' xu'u na'. Zrí'inequeze bénnea' wazúatequezebe'. ³⁶ Chee le na', che neda', Zrí'ine Xra', guselá' le'e, da li láqueze le'e. ³⁷ Nezda' nácale le'e xrtia Abraham. Na'a dxaca lázrele gútele neda' lawe' da quebe dxezi' lu na'le da dxapa' le'e. ³⁸ Neda' dxuchálaja' ca naca da ble'e Xra' neda', na' le'e dxunle ca da guzre xráqueze le'e.

³⁹ Belexechebe benne' ca':

—Xra xrtauntu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham. ⁴⁰ Lácala gucha' le'e da li da ble'e Xra' neda', le'e dxaca lázrele gútele neda'. Abraham cabata' bñe' da caní. ⁴¹ Le'e dxúnquezele ca da dxun xráquezele.

Nadxa benne' ca' gulé'e Jesús:

—Netu' quebe nácantu' bi lan. Zua tuze Xrantu', Dios.

⁴² Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheézqueza'. Dios nasel-
le' neda'. ⁴³ ¿Bizr chee na' quebe dxezéquele chéajni'ile da dxennéa'? Naca na lawe' da quebe dxaca lázrele xénele dizra' chia'. ⁴⁴ Xráquezle le'e naca da xriwe'. Le'e nácale chee da na', ne dxaca lázrele gunle ca da dxaca lazre' le na. Da xriwe' na' naca na wete benne' nédxudaute. Cabata' dxenné na da li lawe' da quebe bi zua da li nen le na. Gate dxun lazre' na, dxenné na cáteze naca na, lawe' da tu dxun lázrezqueze na, ne naca na da guzú lau na ben lazre' na. ⁴⁵ Lácala dxapa' le'e da li, le'e quebe dxéajlele chia'. ⁴⁶ ¿Núlale le'e séquele gulé'ele nabaga neda' tu dul-la? Che dxennéa' da li, ¿bizr chee na' quebe dxéajlele chia'? ⁴⁷ Benne' naque' chee Dios dxenne' dizra' chee Dios. Le'e quebe nácale chee Dios. Chee le na' quebe dxaca lázrele xénele chee Dios.

Cristo ba zúaqueze' nédxudxa ca Abraham

⁴⁸ Nadxa benne' judío ca' gulé'e Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

⁴⁹ Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chalá'ala. ⁵⁰ Quebe dxe'a gunne xue chee gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'e ca da dxunle. ⁵¹ Da li dxapa' le'e: Benne' dxuné' ca naca dizra' chia', cabata' gátequeze bénnea'.

⁵² Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgute benne' ca' buluchálaje' waláz chee Dios, na' lue' dxennáu' benne' guné' ca naca dizra' chiu' cabata' gátequeze'. ⁵³ ¿Nácadxu' szrendxa ca xra xrtáudxu Abraham? Gútequeze Le', ne cá'anqueze gulate benne' ca' buluchálaje' waláz chee Dios. ¿Bízraqueze dxugune cuinu'?

⁵⁴ Bechebe Jesús:

—Che neda' dxucá'ana cuina' ba lá'ana, quebe bi zaca na. Benne' dxape' neda' ba lá'ana naque' Xra', Bénnea' dxennale le'e naque' Xrale. ⁵⁵ Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'. ⁵⁶ Xra xrtáule Abraham, bénnea' gutié' nédxudaute, gubéle'ene' lawe' da dxal-la' lé'ene' zra zua neda'. Blé'ene' na, na' gubéle'ene'.

⁵⁷ Nadxa benne' judío ca' gulé'e Jesús:

—Québequeze ne su' chi xun iza, na' ¿dxennáu' blé'enu' Abraham?

⁵⁸ Jesús bechebe':

—Da li dxapa' le'e, nédxudaute gate quebe ne sua Abraham, báchequeze zua neda'.

⁵⁹ Nadxa gulequé'e xiaj chee xelu'e Jesús, na' Le' bcache cuine'. Bdee' ládujla benne' ca', na' bedxúaje' chale'aj xudau', ne bezé'e.

9

Jesús dxexune' tu benne' gúlaje' la chul-la

¹ Gate gudé Jesús tu lataj, na' blé'ene' tu benne' gúlaje' la chul-la. ² Benne' ca' dxusede Jesús buluchébe' Le':

—Benne' Wesede, ¿bizr chee na' gulaj benne' nigá la chul-la? ¿Naca na lawe' da belún xra xrne'e dul-la, che lawe' da ben léqueze' dul-la?

³ Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrne'e dul-la. Naca na chee gulé'e lau xel-la' szren chee Dios ne chee benne' nigá. ⁴ Dxácatē naca te zra dxal-la' guna' zrin chee Bénnea' nasele' neda' lawe' da ba za da chul-la gate netú benne' quebe seque' gunē' zrin. ⁵ Dxácatē ne zua' neda' xezr la xu nigá, naca' xel-la' naxaní' chee bēneache.

⁶ Ca gudé gunná Jesús da nigá, na' bzre'e zrene' lu xu, ne bene' guna' nen zrene' na', na' btupe' na xiaj lau benne' la chul-la na'. ⁷ Nadxa guzre' le':

—Guxíaj xeajtibe lau' lu beaj nisa nazí le na Siloé. (Dizra' nigá zéajē na: Da Nasele' la Na.)

Benne' la chul-la na' guxíaje' xeajtibe lawe', na' gate bezrine' ba dxelé'ene'.

⁸ Nadxa benne' walíazr chee' ca', ne benne' ca' belelé'ene' le' nédxula, naque' la chul-la, gulenné':

—¿Quegá benne' nigá bēneae' dxebe'e dxenabe' guna'?

⁹ Bal-le' gulenné':

—Le' na'.

Xebal-le' gulenné':

—Quegá le' na', na' ca'an ca dxenné'e.

Benne' ná'queze gunné':

—Neda' na'.

¹⁰ Nadxa buluchebe' le':

—¿Ájazra na' ba dxelé'enu'?

¹¹ Bechebe bēneae':

—Bēneae' le' Jesús bene' guna', ne btupe' na xiaj lawa', na' gunné': “Guxíaj beaj nisa nazí le na Siloé, xeajtibe lau'.” Guxá'a na', na' gate gudiba' lawa', guca ble'eda'.

¹² Nadxa buluchebe' le':

—¿Ga na' zua bēneae'?

Le' guzre' benne' ca':

—Quebe nezda'.

Benne' fariseo ca' dxuluchebe' bēneae' guque' la chul-la

¹³ Nadxa benne' ca' guleché'e bēneae' guque' la chul-la lau benne' fariseo ca'. ¹⁴ Naca na zra dxulupá'ana judío ca' gate ben Jesús guna', ne btupe' na xiaj lau benne' la chul-la na'. ¹⁵ Chee le' na' benne' fariseo ca' buluchebe' bēneae' guque' la chul-la ájazra guca dxelé'ene'. Le' guzre' benne' ca':

—Bzriē' guna' xiaj lawa', na' bexiba' na, ne dxelé'eda'.

¹⁶ Nadxa bal-la benne' judío ca' gulenné':

—Bēneae' bene' da nigá quebe naque' chee Dios lawe' da quebe dxape' ba lá'ana zra dxupá'anadxu.

Na' xebal-le' gulenné':

—¿Ájazra na' dxune' xel-la' waca zrente caní che naque' benne' dul-la?

Ca'an guca, gulaca chupa la'a benne' fariseo ca'. ¹⁷ Xecha lasa buluchebe' bēneae' guque' la chul-la:

—¿Bi dxennáu' lue' chee bēneae' bexune' lue'?

Le' gunné':

—Neda' dxennéa' naque' benne' dxuchalaje' waláz chee Dios.

¹⁸ Benne' judío ca' quebe guléajle'e guque' la chul-la, ne na'a dxelé'ene', na' gulenné' xra xrna bēneae' bexaque'. ¹⁹ Na' buluchebe' xra xrna bēneae':

—¿Nácaqueze benne' nigá zrí'inele, dxennale le'e gúlaję' la chul-la? ¿Ájazra na' dxaca dxelé'ene'?

²⁰ Belexechebe xra xrne'e:

—Nézentu' benne' nigá naque' zrí'inentu', ne gúlaję' la chul-la. ²¹ Quebe nézentu' aja guca dxelé'ene' na'a, ne quebe nézentu' nu bexún xiaj lawę'. Le guchebe le'. Ba nápaqueze' iza, ne waca xechébequeze'.

²² Caní gulenná xra xrne'e lu xel-la' dxelezrebe lawe' da ba zaj nun benne' xíchaję cheę judío ca' tuze dizra' xelexebáję' xu'u na' núteteze benne' xechébe' Jesús naque' Cristo. ²³ Cheę le' na' gulenná xra xrne'e: “Le guchebe le'. Ba nápaqueze' iza.”

²⁴ Nadxa benne' judío ca' belenné' bënnea' guque' la chul-la, na' gulé'e le':

—¡Gunné da li lau Dios! Nézentu' naca benne' nigá benne' dul-la.

²⁵ Le' bechebe':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dxelé'eda'.

²⁶ Na' buluchébequeze' le':

—¿Bizra beņe' chiu'? ¿Ájazra beņe' cheę bexune' xiaj lau'?

²⁷ Na' bechebe bënnea':

—Ba gucha' le'e, ne quebe dxénele chia'. ¿Bizr cheę na' dxaca lázrele nnia' xetú? ¿Cá'aqueze le'e dxaca lázrele gácale Le' tuze?

²⁸ Nadxa benne' judío ca' gulenné' schanni' cheę bënnea' guque' la chul-la, dxelenné':

—Lue' da'u bënnea', na' netu' da'ntu' Moisés. ²⁹ Netu' nézentu' Dios bchálajęne' Moisés. Quebe nézentu' ga benne' benne' nigá.

³⁰ Nadxa bënnea' bechebe':

—Da nigá naca na da dxebáneda'. Le'e quebe nézele ga bënnea', na' bexune' xiaj lawa'. ³¹ Nézquezdxu Dios quebe dxenne' cheę benne' dul-la. Tuze dxenne' cheę benne' ca' dxulucá'ana szreņe' Le', ne dxelune' ca da dxaca lazre' Le'. ³² Quebe ne xendxu che nu benne' xexune' tu benne' gúlaję' la chul-la. ³³ Chela benne' nigá quebe naque' cheę Dios, quebe gaca bi gunę'.

³⁴ Nadxa gulé'e le':

—Ca gúlajquezu' dxulé'e na nabagu' dul-la. Na'a, ¿dxaca lazru' guzėjajni'inu' netu'?

Nadxa belexebáję' le' lu xu'u na'.

Benne' zaj naque' la chul-la lu xichaj lázrdawe'

³⁵ Jesús benne' belexebáję' bënnea' guque' la chul-la, na' gate bezrague' le', guzre' le':

—¿Dxéajle'u lue' cheę Zri'ine Dios?

³⁶ Benne' na' guzre' Jesús:

—Xran, guzre neda' Nu na', cheę chéajle'a cheę'.

³⁷ Bechebe Jesús:

—Ba blé'equeznu' Le'. Neda', dxuchálajęna' lue' naca' Bënnea'.

³⁸ Nadxa benne' na' bzu zribe' lau Jesús, na' gunné':

—Dxéajle'a chiu', Xran.

³⁹ Nadxa gunná Jesús:

—Neda' bla'a lu xęzr la xu nigá cheę guchi'a ca da dxelún bënneache, cheę xelexé'e la chul-la ca', ne cheę xelexaca ca la chul-la benne' ca' dxelenné' dxelélé'ene'.

⁴⁰ Nadxa bal-la benne' fariseo ca', benne' zaj zre'e nen Jesús, gate belenne' da nigá gunná Jesús, buluchebe' Le':

—¿Cá'anqueze netu' nácantu' la chul-la?

⁴¹ Jesús bechebe':

—Chela nácale le'e la chul-la quebe nabágale ca naca dul-la da benle. Dxennale dxelé'ele, na' chee le na' nabágale dul-la.

10

Dxuchalaj Jesús da dxulé'e na ca naca chee le'aj chee zrila' ca'

¹ Na' gunná Jesús:

—Da li dxapa' le'e, bénnea' quebe dxu'e dxu'a dxa xu'u chee le'aj chee zrila' ca', na' dxu'e naga xula, naque' gubán, ne tu dxebánzqueze'. ² Bénnea' dxu'e dxu'a dxa xu'u na' naque' benne' dxuxúequeze' zrila' ca'. ³ Bénnea' zue' dxu'a dxa xu'u dxesálaje' chee chu'u bénnea' dxuxúequeze'-ba', na' zrila' ca' dxelexúnbeaba' chi'e. Benne' nigá dxu'e la tu tu zrila' ca', ne dxebéaje'-ba' lu le'aj cheeba'. ⁴ Ca dxedé dxebéaje' xúguteba', na' dxebia lawe' lauba', na' zrila' ca' zjácaleba' Le', lawe' da dxelexúnbeaba' chi'e. ⁵ Quebe zjácaleba' tu benne' quebe zaj núnbeaba'. Dxuluzrúnnujba' lau benne' na' lawe' da quebe dxelexúnbeaba' chi'i benne' quebe zaj núnbeaba'.

⁶ Bchálajle Jesús benne' ca' da dxulé'e nigá, na' benne' ca' quebe guléajni'ine' bi zéaje da guzre Jesús le'.

Jesús naque' benne' chawe' dxuxúe' zrila' ca'

⁷ Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bénneache zaj naque' ca zrila' chia' ca'. ⁸ Xúgute benne' dxuluxúe' zrila', benne' belelé'e nédxudxa ca neda', gulaque' gubán, ne tu gulebánzqueze'. Zrila' ca' quebe beléneba' chee benne' ca'. ⁹ Neda' naca' dxa xu'u. Bénnea' chu'e ne chia' neda', láqueze bénnea'. Gaque' ca tu zrila' dxu'uba', ne dxuajba' le'aj cheeba', na' dxezréleba' zríedu dxáguba'.

¹⁰ Benne' gubán ze'e tuze chee cuane'-ba', ne chee gútete'-ba, ne chee guzría xi'te'-ba'. Neda' bla'a chee gápale xel-la' nabán, ne chee gapa xánnele na.

¹¹ Neda' naca' benne' chawe' dxuxúa' zrila' ca'. Benne' chawe' dxuxúe' zrila' ca' dxuzúe' xel-la' nabán chee' chee guselé' zrila' ca'. ¹² Benne' dxuxúe'-ba' lawe' da dxezi'e lazruj, gate dxelé'ene' za becu' xi'a, na' dxusané' zrila' ca', ne dxuzrúnnuje', lawe' da quebe nácaqueze' benne' dxuxúe' leba', na' zrila' ca' quebe zaj nácaba' be' cheézqueze'. ¹³ Benne' nigá dxuzrúnnuje' lawe' da dxunze' zrin chee si'e lázruje', na' quebe dxe'e gunne xue cheeba'.

¹⁴⁻¹⁵ 'Neda' naca' benne' chawe' dxuxúa' zrila' ca'. Cáteze núnbea Xra' neda', na' neda' núnbe'a Xra', cá'anqueze neda' núnbe'a zrila' chia' ca', na' leba' zaj núnbeaba' neda'. Neda' dxuzúa' xel-la' nabán chia' chee guselá' zrila' ca'. ¹⁶ Cá'anqueze zaj zra' zrila' chia' quebe zaj zraba' lu le'aj nigá. Dخال-la' cheajxexri'a-ba'. Zrila' ca' xelunba' ca dxenná xrtizra', ne xelácaba' tu cueze, na' tuze benne' guxúe' leba'.

¹⁷ 'Xra' nazrí'ine' neda' lawe' da dxuzúa' xel-la' nabán chia', na' xecá'a na.

¹⁸ Quebe nu seque' cua xel-la' nabán chia'. Neda' xuzúa' na cáteze dxaca lázrequeza' neda'. Napa' xel-la' dxenná bea guzúa' na, ne chee xecá'a na. Da nigá naca na da gunná be'e Xra' neda' guna'.

19 Gate benne' judío ca' belenne' dizra' caní, na' gulaque' chupa la'a xetú.
20 Benne' zan benne' ca' gulenné':

—¿Bizr chee na' dxuzé nágale chee benne' nigá? Xu'e be' xriwe', ne nadá xichaj lázrdawe'.

21 Xebal-le' gulenné':

—Tu benne' xu'e be' xriwe' quebe séquene' guchálaje' caní. ¿Waca tu be' xriwe' xexún na xiaj lau tu benne' la chul-la?

Dxuluzúa benne' judío ca' Jesús chalá'ala

22 Naca na beu' zaga, na' lu xezre Jerusalén zaj zue' laní gate dxulusá lazre' ca guca gate gulegú'e xudau' na' lu na' Dios. 23 Jesús dxedé' chale'aj xudau' na' naga naca lachila chee Salomón. 24 Nadxa benne' judío ca' guléchaje' Le', ne gulé'e Le':

—¿Bátalaqueze québedxa gunu' lue' chupa lázrentu'? Che lue' nacu' Cristo, Bénnea' sel-la Dios, gunnátegala.

25 Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dxuchíneda' xel-la' dxenná bea chee Xra', dxululé'e na nu naca' neda'. 26 Le'e quebe dxéajlele chia' lawe' da quebe nácale zrila' chia', ca ba gucha' le'e nédxula. 27 Zrila' chia' dxelaxúnbeaba' chi'a, na' neda' núnbe'a-ba', na' leba' dxelauba' neda'. 28 Benne' zaj naque' zrila' chia', dxunézruja' chee benne' ca' xel-la' nabán da zeajlí canna, ne cabáta'quezdxa xelebía xi'e, na' quebe nu seque' xecá'a le' lu na'a neda'. 29 Xra' benne' neda' benne' caní, na' Le' nácadxe' szren ca xúgute' bènneache, na' quebe nu seque' xecá'a benne' ca' lu na' Xra'. 30 Neda', ne Xra' tuze nácantu'.

31 Nadxa benne' judío ca' guleque'e xiaj xetú chee xelúti'e Jesús. 32 Nadxa Jesús guzre' benne' ca':

—Ba bènqueza' da zan da chawe' laule le'e, dxuchíneda' xel-la' waca chee Xra'. ¿Nula chee da chawe' caní güele neda' xiaj?

33 Belexechebe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunné' schanni' chee Dios. Lue' nacu' bènneache, na' dxun cuinu' Dios.

34 Nadxa Jesús guzre' benne' ca':

—Lu da nadxixruj bea chee le'e naxúaj xrtizra' Dios, dxenná na: Le'e nácale dios ca'. 35 Quebe gaca tábagadxu ca da naxúaj na lu xiche chee Dios, na' Díosqueze' gunné' chee benne' ca' gulezú'e xrtizre' zaj naque' dios ca'. 36 Che Dios bzue' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios? 37 Che quebe dxuna' ca naca da dxun Xra', quebe chéajlele chia'. 38 Che dxuna' na, lácala quebe dxéajlele chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

39 Xetú lasa gulaca lazre' xelél-le' Jesús, na' Le' gulé' lu na' benne' ca'.

40 Nadxa bezrín Jesús dxu'a xegu Jordán chalá'a naga dxalaj gubizra, na' begá'ane' na', naga guzúa Juan nédxute dxuchúe' bènneache nisa. 41 Benne' zan xjaque' xeajlenné'e Jesús, na' gulenné':

—Juan, da li quebe bi xel-la' waca zren bene', na' xúgute' da gunné' ca naca chee benne' nigá naca na da li.

42 Benne' zan guléajle'e chee Jesús lataj na'.

11

Ca guca gate gute Lázaro

¹ Zua tu benne' dxé'engé' le' Lázaro, benne' xezre Betania, da naca na lazre María, ne bi bilé' le' Marta. ² María nigá, bi zan Lázaro, benne' dxé'engé' na', naque' nu'ula na' gulu'e ni'a Jesús da na' dxelále'e zixre, ne bsebizre' na nen xicha xíchaje'. ³ Dxúpaté' nu'ula caní gulesel-le' benne' xeajezre' Jesús:

—Xran, bènea' nazrí'inu' quebe chawe' zue'.

⁴ Ca ben Jesús da nigá, na' gunné':

—Da dxé'engé' quebe naca na da gúteṭe na le'. Naca na chee gulé'e lau na xel-la' szren chee Dios, ne cá'anqueze chee gulé'e lau na xel-la' szren chia' neda', Zri'ine Dios, ne chee xel-la' we' na'.

⁵ Lácala nazrí'i Jesús Marta, ne bi bilé', ne Lázaro, ⁶ gate benne' quebe chawe' zua Lázaro na', begá'angé' naga zue' xechupa zra. ⁷ Ca gudé na' guzre' benne' ca' dxusédené':

—Le chu'u naga nababa Judea xetú.

⁸ Nadxa benne' ca' gulé'e Le':

—Benne' Weséde, ná'asca benne' judío ca' zaj zre'e na' gulaca lazre' xelútie' Lue' nen xiaj. ¿Dxaca lazru' chéaju' na' xetú?

⁹ Jesús guzre' benne' ca':

—¿Quebe nun Dios duté te zra gate dxelún bèneache zrin? Che nu benne' dxedé' te zra, quebe cheajchazie' lu da stebe lawe' da dxelé'engé' xel-la' naxaní' da nuzúa Dios lu xezr la xu nigá. ¹⁰ Che nu benne' dxedé' chizrela, dxechégüe' lawe' da quebe zúale' xel-la' naxaní' le'.

¹¹ Ca gudé na' guzre Jesús benne' ca':

—Benne' Ijwézredxu Lázaro ba dxásie'. Cha'a neda' cheajsebana' le'.

¹² Nadxa benne' ca' gulé'e Jesús:

—Xran, che dxásie', wexaque'.

¹³ Da nigá da gunná Jesús zéaje na ba gute Lázaro. Benne' ca' dxusédené' gulé'quene' gunná Jesús dxáseze'. ¹⁴ Nadxa Jesús bzéajini'ine' benne' ca', gunné':

—Ba gútequeze Lázaro. ¹⁵ Dxebeda' lawe' da quebe zua' na'. Caní gácadxa chawe' chee le'e, chee chéajle' chia'. Le chu'u cheajnnadxu Lázaro.

¹⁶ Nadxa Tomás, bènea' léqueze' bilide', guzre' xezícala benne' ca':

—Le chú'uqueze dxi'u chee gátedxu tu zren nen Jesús.

Jesús naque' benne' dxusebané' benne' gate ca', ne benne' dxunne' dxi'u xel-la' nabán li lazre'

¹⁷ Gate belezrine' xezre Betania, na' bene Jesús gudapa zra bulucaché' Lázaro. ¹⁸ Betania dxe' na gáguze naga dxe' Jerusalén, ca cadite sadxu tu chí'idau'ze zrindxu na', ¹⁹ na' benne' zan benne' judío ca' xjaque' xeajlenné'e Marta ne María, na' xulunéruje' le' xel-la' zren lazre' lawe' da gute bi zane'.

²⁰ Gate ben Marta ba za' Jesús, na' guzé'e zeajxrígalé' Le', na' María begá'angé' xu'u. ²¹ Marta guzre' Jesús:

—Xran, chela zu' nigá, quebe gute bi zana'. ²² Neda' nezda' Dios gunné' Lue' bíteteze da nabu'.

²³ Jesús gunné':

—Webán bi zanu'.

²⁴ Nadxa Marta guzre' Le':

—Nezda' webané' lu zra xelexebán benne' gate ca', zra bzebe na'.

²⁵ Nadxa gunná Jesús:

—Neda' naca' benne' dxusebáne' benne' gate ca', ne benne' dxunne' xel-la' nabán li lazre'. Nu benne' dxéajle' chia', lácala gatie', webane', ²⁶ na' xúgute benne' zaj naca bané', ne dxeléajle' chia', québequeze xelatíe' tu chí'ize. ¿Dxéajle'u da nigá?

²⁷ Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bénnea' guchebe lazre' Dios sel-le'.

Jesús dxebezre' lawe' da zaj zua baxache' nu'ula ca'

²⁸ Ca gudé gunná Marta da nigá, na' guxíaje' xeajzenne' bi bile' María, na' guzre' le' zrize:

—Ba bla' Benne' dxusede, ne dxenné' lue'.

²⁹ Ca ben María da nigá, na' guxase' guz'é, xeajnné' Jesús. ³⁰ Jesús quebe ne chu'e xezre na', na' zue' naga bezraga Marta Le'. ³¹ Benne' judío ca' zaj zra' xu'u na' dxulunéruje' María xel-la' zren lazre', gate belelé'ene' guxasa María, ne chadí bdxúaje', na' xjácale benne' caní le', dxeléquene' zéaje' dxu'a ba zeajchezre' na'.

³² Gate bzrin María naga zua Jesús, na' bzu zribe' zran ni'a Jesús, gunné':

—Xran, chela zu' nigá, quebe gute bi zana'.

³³ Gate ble'e Jesús dxebezre María, ne cá'anqueze dxelebezre judío ca', benne' zjácalene' María, na' bexíajele'ene', ne guzúe' stebe lu lázrdawe'. ³⁴ Na' bchebe' benne' ca':

—¿Ga bcáchele bénnea'?

Na' gulé'e Le':

—Xran, gudá le'enu'.

³⁵ Na' gudxezre Jesús. ³⁶ Nadxa gulenná benne' judío ca':

—Le nna'xque cátité nazrí'ine' le'.

³⁷ Bal-la benne' ca' gulenné':

—Benne' nigá bexune' benne' la chul-la. La zue' nigá, ¿quebe guzéquene' ájala gune' chee quebe gute Lázaro?

Jesús dxusebane' Lázaro

³⁸ Jesús guzúe' stebe xetú, na' bzrine' dxu'a ba. Ba na' naca na tu blauj, na' da' tu xiaj ta'a dxu'e na. ³⁹ Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bénnea' tula, lawe' da ba guca tapa zra na'a gutie'.

⁴⁰ Na' Jesús gunné':

—¿Quebe gucha' lue' che chéajle'u chia', walé'enu' xel-la' szren chee Dios?

⁴¹ Nadxa belexequé'e xiaj ta'a na'. Jesús guné'e xabáa, gunné':

—Xrae, dxapa' Lue': "Xcalenu'" lawe' da ba bennu' chia'. ⁴² Neda' nezda' tu dxénzquezenu' chia'. Dxennéa' da nigá chee gaca tu da ba neza chee benne' caní, chee xeléajle' chiu' nase-lu' neda'.

⁴³ Ca gudé gunné' da nigá, na' gunné' zizraj:

—¡Lázaro, bedxúaj nigá!

⁴⁴ Bedxúaj benne' gate na', nadxéaj ni'a ne'e nen ládxe'dau' da buluchele' ni'a ne'e, na' lawe' dxela na ladxe'. Jesús guzre' benne' ca':

—Le xesezre', ne le gusané' xexíaje'.

Benne' dxeledábague' Jesús dxelune' tuze dizra' xelél-le' Le'
(Mt. 26.1-5; Mr. 14.1-2; Lc. 22.1-2)

⁴⁵ Nadxa guléajle benne' zan chee Jesús, benne' judío ca' xjácale María, ne belelé'ene' ca da ben Jesús. ⁴⁶ Bal-la benne' ca' xjaque' xeajlechálajlene' benne' fariseo ca', na' buluzenne' le' ca da ben Jesús. ⁴⁷ Nadxa fariseo ca', ne benne' xíchaje ca' chee bxruze ca' belezrague' nen benne' xu'u lawe' blau chee judío ca', na' gulenne':

—¿Ajazra gundxu? Benne' nigá dxúnle'e xel-la' waca da za xabáa. ⁴⁸ Che ca' güedxu Le' lataj, xúgute bénneache xealejlé'e chee' chee xuluzúe' Le' ca wenna bea, na' xeledá' benne' Roma ca', benne' zjaque' wedil-la, na' xuluzría xi'e xudau' cheedxu, ne xezr la xu cheedxu.

⁴⁹ Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele, ⁵⁰ ne quebe dxeque be'ele gácadxa chawe' cheedxu gate' tuze benne' ne chee xezre nigá, ne quegala ca naca xezr la xu nigá cuía xi na.

⁵¹ (Quegá gunná Caifás da nigá cheézqueze'. Lawe' da naque' bxruze blau iza na', bchájaje' waláz chee Dios, gunné' gate' Jesús ne chee xezr la xu judío.

⁵² Quegá gatie' tuze ne chee xezr la xu naze. Cá'aqueze chee xutupe' lu na' Dios xúgute benne' zaj naque' chee Dios, benne' zaj nase dínnaje', benne' ca' zaj nababe' xúgute cue' xezr la xu.) ⁵³ Ca'an guca, ca lu zra na'te benne' judío wenna bea ca' belune' tuze dizra' xelútie' Jesús.

⁵⁴ Chee le' na' Jesús québedxa gudé' naga zaj zra' benne' wenna bea ca' chee judío ca', na' guzé'e naga nababa Judea, na' guxíaje' xezre Efraín naga zua gáguze tu le'e xixre' lawe' lataj. Begá'ane' xezre na' nen benne' ca' dxusédené'.

⁵⁵ Ba zua gáguze zrin Laní Pascua chee judío ca', na' benne' zan chee xezre ca' xjaque' Jerusalén chee xulucá'ana chawe' cuine' nédxudxa ca zrin Laní Pascua. ⁵⁶ Guledé' dxelexilaje' Jesús, na' gate zaj zre'e chale'aj xudau' na', buluchebe ljwezre':

—¿Ajazra dxéquele? ¿Widé' laní, che quebe xide'?

⁵⁷ Benne' fariseo ca', ne benne' xíchaje ca' chee bxruze ca' ba gulebéaje' dizra' che nu benne' ca' nézene' ga zua Jesús, na' xelé'e benne' ca' chee gaca xeled-le' Le'.

12

María dxugu'e da dxelá zixre ni'a Jesús

(Mt. 26.6-13; Mr. 14.3-9)

¹ Xrupa zra nédxudxa gate za chu'u Laní Pascua chee judío ca', guxíaj Jesús xezre Betania naga zua Lázaro, bénnea' bsebán Jesús ládujla benne' gate'. ² Lu xezre na' belune' tu xrche', chee gulape' ba lá'ana Jesús. Marta bde' xella' wagu, na' Lázaro dxé'lene' benne' ca' dxelágulene' Jesús. ³ Nadxa María guqué'e tu xia da za da dxelá'e zixre, da naca na chee dusén lase, da zácale'e na, na' gulu'e da za na' ni'a Jesús, ne bsebizre' na nen xicha xíchaje'. Ca naca benne' zaj zra' xu'u na' gulelé'ene' ca dxelá da zixre na'. ⁴ Nadxa Judas Iscariote, zri'ine Simón, tu benne' ca' dxuséde Jesús, ne naque' bénnea' gudé' Jesús lu na' benne' guledábage' Le', gunné':

⁵ —¿Bizr chee na' quebe gudá'u da zixre na', na' sidxu na dumí lazruj chee chunna gaxúa zra chee gácalédxu benne' xache' ca'?

⁶ Quebe gunná Judas da nigá lawe' da dxe'e gunne xue chee benne' xache' ca'. Naque' gubán, ne nu'e bzude dumí chee benne' ca' dxuséde Jesús, ne dxebane' late' weaj dumí na' da dxuluzré'e lu bzude na'. ⁷ Nadxa Jesús guzre' Judas na':

—Bē lataj nu'ula nigá lawe' da bēne' da nigá chee dxucá'ana chawe' neda' chee gate xulucache' neda' lu xedxu ba. ⁸ Benne' xache' ca' tu zrázqueze' ládujla le'e. Neda' quebe tu súazqueza' nen le'e.

Dxelunę' tuze dizra' xelútię' Lázaro

⁹ Zane' benne' judío ca' belenne' zua Jesús xezre Betania, na' xjaque' na', quegá tuze zeajlenné'e Jesús. Cá'anqueze zeajlenné'e Lázaro, bēneea' bsebān Jesús ládujla benne' gate ca'. ¹⁰ Nadxa benne' xíchaje' ca' chee bxruze ca' belunę' tuze dizra' cá'anqueze xelútię' Lázaro, ¹¹ lawe' da ne chee Lázaro benne' zan benne' judío ca' dxelebéaj xíchaje' bxruze ca' chee xeaeajlé'e chee Jesús.

Dxexú'u Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xezre na'. ¹³ Nadxa gulechugue' zina', na' xjaque' xeajlexrígalę' Jesús, ne dxelennę' zizraj:

—¡Gaca ba lá'azxa Dios! ¡Ba neza zrentę naca na chee Benne' ze'e waláz chee Xránadxu Dios! ¡Ba neza zrentę naca na chee Wenná Bea chee xezre Israel!

¹⁴ Jesús xeajxraque' tu burro, na' guzrię'-ba', ca naxúaj na lu xiche chee Dios, dxenná na:

¹⁵ Quebe zrēbele le'e, benne' zre'e xezre Sión.

Le nna'xque, ba za' Wenná Bea chee.

Zrie' tu burro.

¹⁶ Nédxutę benne' ca' dxusede Jesús quebe guléajni'ing' da na' dxaca na. Ca gudé na', gate begá'ana szren Jesús lau Dios, na' xeajlesá lazre' xúgutę da caní zaj naxúaj na lu xiche chee Dios ca naca chee Jesús, na' ca'an guca chee'.

¹⁷ Benne' ca' zaj zre'e nen Jesús gate gunné' Lázaro lu xedxu ba, ne bsebān' le' ládujla benne' gate, buluzenne' bēneache Jerusalén ca da guca na'. ¹⁸ Chee le' na' benne' caní xeajlexrígalę' Jesús lawe' da belenne' ca naca xel-la' waca zrentę da bēne'. ¹⁹ Nadxa benne' fariseo ca' gulę' lįwezre':

—Ba dxelé'ele quebe séquedxu bi gundxu. Ca naca bēneache dxelunę' Le' tuze.

Dxelexilaj benne' griego ca' Jesús

²⁰ Zaj zra' bal-la benne' griego ca' ládujla benne' ca' belezrine' Jerusalén chee xulucá'ana szrenę' Dios lu laní na'. ²¹ Benne' caní belezrine' lau Felipe, benne' Betsaida chee ga nababa Galilea, ne naque' Jesús tuze, na' gulata' xuene' le', dxelennę':

—Benne', dxaca lázrentu' le'entu' Jesús.

²² Felipe guxíaje' xeajezre' Andrés caní, na' xjaca dxupe' xeajleguezre' Jesús ca'. ²³ Nadxa Jesús guzre' benne' dxupa ca':

—Ba bzrin zra xegá'ana szrena' neda', Benne' Gulje' Bēneache. ²⁴ Da li dxapa' le'e, tu binne zrua' xtila wegá'ana na tuze na che quebe xexruij na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'. ²⁵ Benne' dxe'e gunne xue gapa chi'e xel-la' nabán chee' gunitię' na. Bēneea' dxuzúę' chalá'ala xel-la' nabán chee' lu xezr la xu nigá, gapa chi'e na, ne zrué'eng' xel-la' nabán da zeajlí canna. ²⁶ Che nu benne' dxaca lazre' gunę' zrin chia', dxal-la' gaque' neda' tuze, na' gáteteze sua' neda', na' súaqueze benne' dxunę' zrin chia'. Che nu benne' dxunę' zrin chia', Xra' gape' le' ba lá'ana.

Jesús dxuchálaje' ca gaca gate gatie'

²⁷ Gunná Jesús:

—Na'a stébele'e zua'. ¿Bizra nnia'? ¿Nnia': Xrae, bselá neda' lu da dxal-la' gaca chia' na'a? Belájqweza' chee gaca chia' da caní. ²⁸ Xrae, bca'ana szren lau'.

Nadxa ben tu chí'i benne' dxenné' xabáa:

—Ba bca'ana szrena' na, ne gucá'ana szrena' na xetú.

²⁹ Benne' ca' zrē'e na' dxellené' gulenné' guziu' gunné. Xebal-le' gulenné':

—Tu gubáz chee xabáa bchálajlene' Le'.

³⁰ Nadxa Jesús guzre' benne' ca':

—Quegá gunné chí'e na' ne chia' neda'. Gunné na ne chee le'e. ³¹ Na'a ba bzin zra guchi'a Dios chee bénneache zrē'e xezr la xu nigá, na' na'a cueaj Dios chalá'ala da xriwe', da na' dxenná bea na lu xezr la xu nigá, chee québedxa nna bea na. ³² Gate xelechise' neda' lu xezr la xu nigá le'e xaga béguaj, na' neda' nnia' xúgute' bénneache chee xelaque' neda' tuze.

³³ Gate gunné' caní, ble'e Jesús ca gatié'. ³⁴ Nadxa benne' zan ca' gulé'e Jesús:

—Netu' benentu' ca da naxúaj na lu xiche chee da nadxixruj bea na da dxenná na waca bánqueze Cristo chadía chacanna. ¿Bizr chee na' dxennáu' Benne' Gulje' Bénneache xelechise' Le'? ¿Nuzra na' Benne' Gulje' Bénneache?

³⁵ Nadxa Jesús guzre' benne' ca':

—Xetú chí'idauze xel-la' naxaní' sua na ládujla le'e. Le ta na'a dxácate ne zua xel-la' naxaní' nen le'e, chee quebe xrinnele, lawe' da benne' dxedé' lu da chul-la quebe nézene' ga zéajé'. ³⁶ Le cheajlé chee xel-la' naxaní' da naca' neda' dxácate zua xel-la' naxaní' nen le'e, chee gácale tuze xel-la' naxaní' na'. Ca gudé gunná Jesús da nigá, na' bezé'e bcache cuine' lau benne' ca'.

Benne' judío ca' quebe dxeajlé'e chee Jesús

³⁷ Lácala ble'e Jesús zane' xel-la' waca zrente lau benne' judío ca', quegá xúgute' guleajlé'e chee', ³⁸ lawe' da ben na ba xen guca ca da gunná Isaías, benne' bchálajé' waláz chee Dios, gunné':

Xran, ¿muzra guxeajlé chee dizra' cheedxu?

¿Nuzra na' ble'e Xránadxu xel-la' waca chee'?

³⁹ Ca'an guca, quebe guca xeajlé'e chee' lawe' da caní gunnáqueze Isaías na':

⁴⁰ Dios bene' benne' ca' la chul-la, ne bene' zide' lázrdawe',

chee quebe xeelé'ene' nen xiaj lawe',

ne quebe xelájni'ine' lu xichaj lázrdawe',

ne quebe xeelé'e lawa' neda' chee xexuna' le'.

⁴¹ Isaías na' gunné' da nigá lawe' da blé'ene' xel-la' szren chee Jesús, ne bchálajé' ca naca chee'.

⁴² Zane' benne' judío ca' guléajlé'e chee Jesús, ne cá'anqueze bal-la benne' xíchajé ca'. Quebe belexchebē' lávela bénneache lawe' da belezrebe' da xelún benne' fariseo ca', chee quebe xelexebájé' le' xu'u naga dxelezrague'. ⁴³ Caní belune' lawe' da beledánedxene' xel-la' ba lá'ana da dxelúe bénneache le' ca xel-la' ba lá'ana da dxue Dios le'.

Dizra' chee Jesús guchi'a na chee da dxelún bénneache

⁴⁴ Jesús gunné' zizraj:

—Benne' dxéajlé'e chia', quegá cheeza' dxéajlé'e, cá'anqueze dxéajlé'e chee Xra' nasele' neda'. ⁴⁵ Bénnea' dxelé'ene' neda', dxelé'equenze' Xra' nasele' neda'. ⁴⁶ Neda', xel-la' naxaní', bla'a lu xezr la xu nigá chee québedxa xelexegá'ana benne' dxeléajlé'e chia' lu da chul-la. ⁴⁷ Che nu benne' dxenne' dizra' chia', ne quebe dxune' ca naca na, quegá neda' guzríá xi'a le', lawe' da

quebe bla'a neda' chee guzría xi'a bèneache. Bla'a chee guselá' benne' ca'.
⁴⁸ Benne' dxuzúe' neda' chala'ala, ne quebe dxune' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bènea' lu zra bzebe na'.
⁴⁹ Caní gaca na lawe' da quebe dxuchálaja' cheézqueza', lawe' da Xra' nasele' neda' ba gunná bé'ene' neda' bi dxal-la' nnia', ne bi dxal-la' gusededa'.
⁵⁰ Neda' nezda' gunná be'e Xra' neda' caní chee xezeque bèneache xelape' xel-la' nabán da zeajlí canna. Ca'an naca, da dxennéa' neda', dxennéa' na ca gunná be'e Xra' neda'.

13

Jesús dxibe' ni'a benne' ca' dxusédene'

¹ Naca na zra nedxu gate za chu'u Laní Pascua chee judío ca'. Jesús ba nézene' ba bzrin zra xezé'e lu xezr la xu nigá chee xexiaje' naga zua Xre'. Nazrí'iquezne' benne' zaj naca chee', benne' zaj zre'e xezr la xu, na' na'a ba zua gulé'ene' benne' ca' tu da zrendxa da gulé'e na nazrí'ine' le'.

²⁻⁴ Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' gune' chee gudé'e Jesús lu na' benne' guledábage' Le'. Nézqueze Jesús ze'e naga zua Dios, ne dxal-la' xezrine' naga zua Dios, na' Xre' ba bnézruje' Le' duté xel-la' dxenná bea. Chee le' na', gate dxelawe' xrche', guxasa Jesús, na' gudúe' ladxe' naxrúa cuzre', ne bnase' tu ladxe' dxu'a le'e.
⁵ Nadxa gudé'e nisa tu zriga xia zren, ne guzú lawe' dxibe' ni'a benne' ca' dxusédene', na' bsebizre' ni'e nen ladxe' na' da nunase' dxu'a le'e.

⁶ Ca bzrine' chee quibe' ni'a Simón Pedro, le' guzre' Jesús:

—Xran, ¿Lue' quibequezu' ni'a?

⁷ Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

⁸ Pedro guzre' Le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

⁹ Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

¹⁰ Jesús guzre' le':

—Benne' ba bexuzrte' guzje', tuze ni'e dxal-la' chadx lawe' da ba naxádxequeze'. Le'e ba naxádxele, san quegá xúgutele.

¹¹ Gunná Jesús: “Quegá xúgutele”, lawe' da nézene' nu na' gudé'e Le' lu na' benne' dxeledábage' Le'.

¹² Ca gudé gudibe Jesús ni'a benne' ca', na' bexrúe' ladxe' chee' cuzre', ne bebe'e ga dxelawe', na' guzre' benne' ca':

—¿Dxéajni'ile le'e da ba bēna'?
¹³ Le'e dxéle neda': Benne' Weséde, ne: Xran, na' caní dxal-la' nnale lawe' da caní naca'.
¹⁴ Che neda', Benne' Weséde chee'e, ne Xránale, ba gudiba' ní'ale, cá'anqueze le'e dxal-la' quíbele ni'a ljwézrele tule xetule.
¹⁵ Neda' ba ble'eda' le'e tu da dxulé'e na, chee gunle le'e ca da bēna' neda'.
¹⁶ Da li dxapa' le'e, tu benne' wen zrin quebe nácaxge' szren ca xrané', na' tu benne' gubáz quebe nácaxge' szren ca benne' nasele' le'.
¹⁷ Che dxéajni'ile da caní, ne dxunle ca zaj naca na, gaca chee'e tu da ba neza.

¹⁸ Quebe dxuchálaja' chee xúgutele le'e. Neda' núnbe'a benne' ca' gucá'a, san dxal-la' gaca ca naxúaj na lu xiche chee Dios, dxenná na: Benne' dxágule neda'

ba gudábaguē neda' cheē gudéē neda'. ¹⁹ Dxapa' le'e da nigá na'a, nédxula gate quebe ne gaca na, cheē gate gaca na, na' chéajle le'e zúaqueza' neda'. ²⁰ Da li dxapa' le'e: Benne' dxezí' lu neē Bénnea' dxusel-le' neda', neda' na' dxezí' lu ne'e, na' benne' dxezí' lu ne'e neda', dxezí' lu ne'e Xra' nasel-le' neda'.

Dxenná Jesús gudé Judas Le' lu na' benne' dxeledábaguē Le'

(Mt. 26.20-25; Mr. 14.17-21; Lc. 22.21-23)

²¹ Ca gudé gunná Jesús da nigá, na' guzúē' stebe lu xichaj lázrdawē', na' bzéajni'ine' benne' ca', gunné':

—Da li dxapa' le'e, tu benne' ládujla le'e gudéē' neda' lu na' benne' ca' dxeledábaguē' neda'.

²² Nadxa benne' ca' dxusede Jesús gulezú lawē' dxelenná' ljwezre', ne quebe zaj nézene' nu cheē na' dxuchalaj Jesús. ²³ Tu benne' ca' dxusede Jesús, bénnea' nazrí'ile'e Jesús le', zuē' cuita Jesús naga dxelawē' xrche', ²⁴ na' Simón Pedro bene' tu da dxunna bea lau bénnea' cheē guchebe' Jesús nu cheē na' dxenné' caní. ²⁵ Nadxa bénnea' de'e cuita Jesús bchebe' Le':

—Xran, ¿nuzra na'?

²⁶ Bechebe Jesús:

—Gusebisa' late' xeta xtila, na' bénnea' gunézruja' na, benne' ná'queze'.

Nadxa Jesús bsebise' late' xeta xtila, na' bnézruje' na cheē Judas Iscariote, zri'ine Simón. ²⁷ Ca gucá'a Judas xeta xtila na', na' da xriwe' guxú'ute na lu xichaj lázrdawē'. Nadxa Jesús guzre' le':

—Da dxal-la' gunu', béntega na.

²⁸ Benne' ca' zaj zre'e dxelawē' na' quebe guléajni'ine' bizr cheē na' guzre' Judas na' caní. ²⁹ Lawe' da nua Judas bzude' dumí, bal-le' guléqueñe' Jesús guzre' le' bi si'e cheē laní na', u bi gunézruje' benne' xache' ca'. ³⁰ Ca gudé gudagu Judas xeta xtila na', na' bdxúaje'. Ba guxrinne.

Da nadxiruj bea cube

³¹ Ca gudé bdxuaj Judas, gunná Jesús:

—Na'a gulé'e lau xel-la' szren chia' neda', Benne' Gulje' Bénneache, na' xegá'ana szren Dios ne chia' neda'. ³² Che neda', Benne' Gulje' Bénneache, dxulé'eda' ca naca xel-la' szren Dios, na' Dios gulé'eng' ca naca xel-la' szren chia' neda', ne la gúntęqueze' na. ³³ Le'e, bidu chia' ca', québedxa sua' scha' nen le'e. Le'e wexilajle neda', san ca gucha' benne' judío ca', dxapa' le'e na'a, quebe gaca sa'le le'e naga cha'a neda'. ³⁴ Tu da cube dxixruj be'eda' le'e. Le zri'i le sa' ljwézrele tule xetule ca neda' nazrí'ida' le'e. Caní dxal-la' zri'i ljwézrele tule xetule. ³⁵ Che nazrí'i ljwézrele tule xetule, na' xúgute bénneache xeque bé'eng' nácale neda' tuze.

Jesús dxenné' nna Pedro quebe númbe'e Le'

(Mt. 26.31-35; Mr. 14.27-31; Lc. 22.31-34)

³⁶ Simón Pedro bchebe' Jesús:

—Xran, ¿gazra chéaju'?

Bechebe Jesús:

—Naga cha'a neda', quebe gaca sá'lenu' neda' na'a. Te na'a wadéquezu' naga tea' neda'.

³⁷ Nadxa gunná Pedro:

—Xran, ¿bizr cheē na' quebe gaca sá'lēna' Lue' na'a? Zúaqueza' guzúa' xel-la' nabán chia' cheē guna' Lue' tuze.

³⁸ Jesús bechebe':

—¿Zúaquezu' guzú' xel-la' nabán chiu' chee gacu' neda' tuze? Da li dxapa' lue', nédxudxa ca cuezre xjeaj, lue' wannáquezu' chunna lasa quebe núnbe'u neda'.

14

Jesús naque' neza da dxezrín na naga zua Xradxu Dios

¹ Gunná Jesús:

—Quebe cuele le'e gunne xue. Le guxrén lazre' Dios, ne le guxrén lazre' neda'. ² Lizre Xra' déle'e lataj naga súale. Chela quebe naca na caní, neda' ba gucha' le'e. Wexá'a cheajxecueza' lataj chee. ³ Ca te xexá'a cheajxecueza' lataj chee, na' wexelájqueza' xetú chee xedajxezri'a le'e súale neda', chee súale le'e naga súaqueza' neda'. ⁴ Le'e nézele naga cha'a, ne núnbeale neza na'.

⁵ Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu' neza na'?

⁶ Jesús bechebe':

—Neda' naca' neza na', ne naca' da li, ne naca' xel-la' nabán. Tuze ne chia' neda' waca zrinle naga zua Xra'. ⁷ Chela núnbeale neda', cá'anqueze núnbeale Xra'. Ná'atela núnbeale Le' lawe' da ba dxelé'ele Le'.

⁸ Nadxa Felipe guzre' Jesús:

—Xran, ble'e netu' Xrau', xetú da ná'teze.

⁹ Bechebe Jesús:

—Felipe, scha' ba guzúalena' le'e, na' ¿quebe ne gúnbe'u neda'? Benne' dxelé'eng' neda', dxelé'equezeneg' Xra'. Chee le' na', ¿bizr chee na' dxenabu' neda' gulé'eda' le'e Xra'? ¹⁰ ¿Quebe dxéajle'u zúalena' Xra', na' Xra' zúaleng' neda'? Da dxapa' le'e, quegá dxennéa' na cheézqueza'. Xra', Bénnea' zúaleng' neda', Léqueze' na' dxuneg' zrin chee' lu na'a neda'. ¹¹ Le chéajlele zúalena' Xra', na' Xra' zúaleng' neda', u che cabí dxéajlele ca da dxennéa', le chéajle chia' ne chee da ca' dxuna'. ¹² Da li dxapa' le'e, benne' dxéajle'e chia', gúnqueze' ca da dxuna' neda', na' gune' da zaj nácadxa zren ca da caní dxuna' lawe' da xexá'a neda' naga zua Xra'. ¹³ Xúgutę da ná bale le'e lu La' neda', neda' guna' na, chee gulé'eda' neda' xel-la' szren chee Xra'. ¹⁴ Néda'queza' guna' biteteze da ná bale lu La' neda'.

Jesús dxechebe lazre' sel-le' Be' Lá'azxa

¹⁵ Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e. ¹⁶ Neda' gata' xueda' Xra' sel-le' chee xetú Benne' gácalequeze' le'e, ne súaletecaze' le'e. ¹⁷ Benne' nigá naque' Be' Lá'azxa gulé'eng' le'e ca naca da li. Benne' zaj naca chee xezr la xu nigá quebe xezelequene' xezezi' lu ne'e Le' lawe' da quebe gaca xezele'eng' Le', ne quebe zaj núnbe'e Le'. Le'e núnbeale Le' lawe' da zúaleng' le'e, ne súaqueze' lu xichaj lázrdaule. ¹⁸ Quebe gucá'ana' le'e ca bi wezebe ca'. Welá'queza' súalena' le'e. ¹⁹ Xetú chí'idau' bénneache ca' québedxa xezele'eng' neda', san le'e welé'ele neda'. Le'e tu gaca bánzquezele lawe' da tu naca bánzqueza' neda'. ²⁰ Lu zra na' guéquebe'ele neda' zúalena' Xra', na' le'e zúalele neda', na' neda' zúalena' le'e. ²¹ Benne' nézeneg' ca naca da nadxixruj bea na nuna' neda', ne dxuneg' na, dxule'eng' nazrí'iqueze' neda'. Xra' zrí'ing' benne' nazrí'ing' neda', na' cá'anqueze neda' zri'ida' bénnea', ne gulé'e lawa' le'.

²² Judas, quegá bénnea' le' Iscariote, guzre' Jesús:

—Xran, ¿bizr chee na' gulé'e lau' netu', ne quegá gulé'e lau' lau bénneache zaj zre'e xezr la xu nigá?

²³ Jesús bechebe':

—Benne' nazrí'ing' neda' dxuné' ca naca da dxennéa', na' Xra' zrí'ing' bénnea', na' neda' ne Xra' xedajsúalentu' le'. ²⁴ Benne' quebe nazrí'ing' neda' quebe dxuné' ca da dxennéa'. Ca naca dizra' da dxénele quebe zaj naca na cheézqueza'. Zaj naca na chee Xra' nasele' neda'.

²⁵ 'Dxapa' le'e xúguté da caní dxácaté ne zúaléna' le'e, ²⁶ na' Be' Lá'azxa, Bénnea' sel-la Xra' lu La' neda' chee gácaléne' le'e, Le' gulé'ene' le'e xúguté, ne gusá'queze' lázrele ca naca xúguté da ba gucha' le'e.

²⁷ 'Xel-la' dxebeza zri lazre' dxuca'ana' chee. Dxunna' le'e xel-la' dxebeza zri lazre' chia'. Quebe cuele gunne xue, ne quebe zrébele. ²⁸ Ba bénele gunnéa' wexá'a, ne welá'a súaléna' le'e xetú. Chela da li nazrí'ile neda', suale xel-la' dxebé, lawe' da xexá'a naga zua Xra', na' nácadxa Le' szren ca neda'. ²⁹ Da nigá dxapa' le'e na'a nédxula gate quebe ne gaca na, chee gate gaca na, na' chéajlele chee da dxennéa'.

³⁰ 'Québedxa guchálajleteca' le'e da zren lawe' da ba za' da xriwe', da na' dxenná bea na lu xezr la xu nigá. Da na' quebe seque na bi gunne na neda'. ³¹ Caní dxal-la' gaca chee xeleneze bénneache neda' nazrí'ida' Xra', ne dxunna' ca da gunná bé'ene' neda'. ¡Le chasa! ¡Le xebú'u nigá!

15

Jesús dxuchálaje' chee lba uva ne chee zruze na ca'

¹ Gunná Jesús:

—Neda' naca' ca tu lba uva da naca na li lazre', na' Xra' naque' ca tu benne' dxá'ane' na. ² Le' dxechugue' zruze na ca' da quebe dxelebía na da zixre, ne dxun chí'e zruze na ca' da dxelebía na da zixre chee xelebiádx na. ³ Le'e nácale ca zruze na ca' da ba nun chí'e, ne chee dizra' da ba gucha' le'e. ⁴ Le súaqueze gácale neda' tuze ca neda' tu zúalezqueza' le'e. Tu zruze xaga quebe gaca cuía na da zixre cheézqueze na che quebe súalequeze na xaga na'. Cá'anqueze le'e quebe bi gaca gunle che quebe tu gácazquele neda' tuze.

⁵ 'Neda' naca' bzrigu lba uva, na' le'e nácale zruze na ca'. Bénnea' naque' neda' tuze, na' neda' naca' le' tuze, naque' ca tu zruze na da dxebiále' na da zixre, lawe' da quebe bi seque' gunle che quebe gácale neda' tuze. ⁶ Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutupe' zruze na bizre ca', ne xuluzré'e na lu xi'.

⁷ 'Che le'e súatequezele neda' tuze, ne quebe gusanle dizra' chia', waca nácale ca da dxaca lázrele, na' sile na. ⁸ Xra' dxegá'ana szrené' gate nácale ca zruze na ca' da dxelebiale' na da zixre, ne caní gaca bea na nácale neda' tuze. ⁹ Neda' nazrí'ida' le'e ca nazrí'i Xra' neda'. Chee le na' le súaquezele lu xel-la' zri'i lazre' chia'. ¹⁰ Che gunle ca da dxixruj be'eda' le'e, na' súatequezele lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' chee'.

¹¹ 'Neda' dxuchálajléna' le'e caní chee súale lu xel-la' dxebé chia', ne chee gaca da lazre' xel-la' dxebé chee. ¹² Cani naca da dxixruj be'eda' le'e: Le zri'i le sa' ljwézrele tule xetule ca neda' nazrí'ida' le'e. ¹³ Xel-la' zri'i lazre' da naca szrendxa naca bea na che tu benne' guzúe' xel-la' nabán chee' chee gácaléne' bi ljwezre' ca'. ¹⁴ Le'e nácale bi ljwezra' che dxunle ca da dxixruj be'eda' le'e.

¹⁵ Québedxa xapa' le'e nácale bi wen zrin chia' lawe' da quebe neze bi wen zrin bi da gun xránabe'. Dxapa' le'e nácale bi ljwezra' lawe' da ba bzenda' le'e xúgute' da guzre Xra' neda'. ¹⁶ Le'e quebe gunnéle neda'. Neda' gunnéa' le'e, ne ba nuzúa' le'e chee gácale ca zruze lba na' da dxelebálę'e na da zixre, na' tu súazqueze da zixre na'. Che gunle caní, na' Xra' gunne' le'e xúgute' da nácale lu Lá' neda'. ¹⁷ Da nigá naca na da dxixruij be'eda' le'e: Le zri'i le sa' ljwézrele tule xetule.

Bénneache chee xęzr la xu nigá dxelecuídenę' Jesús, ne cá'anqueze benne' chee' ca'

¹⁸ Nadxa gunná Jesús:

—Che bénneache dxelecuídenę' le'e, dxal-la' cheajsá lázrele belecuídequeze' neda' nédxute'. ¹⁹ Chela nácale le'e chee xęzr la xu nigá, na' xelezrí'i bénneache le'e ca zaj nazrí'ine' le sa' ljwezre' ca'. Neda' ba gucá'a le'e ládujla bénneache chee xęzr la xu nigá, na' chee lę na' dxelecuíde bénneache le'e lawe' da québedxa nácale xęzr la xu nigá tuze. ²⁰ Le gusá lázrele da gucha' le'e, gunnéa': Netú benne' wen zrin quebe nácadxe' szren ca xrane'. Che guláu zi' xuzre' neda', cá'anqueze xelau zi' xuzre' le'e, na' che belune' ca dxenná dizra' chia', cá'anqueze xelune' ca dxenná dizra' chee le'e. ²¹ Xúgute' da caní xelune' chee le'e da nácale chia', ne lawe' da quebe zaj núnbe'ę Xra' nasele' neda'.

²² 'Chela quebe bla'a neda', ne bchálajlena' benne' ca', quebe bi dul-la zaj nabague'. Na'a zaj nabágaqueze' dul-la ²³ lawe' da nu benne' dxecuídenę' neda', cá'anqueze dxecuídenę' Xra'. ²⁴ Chela quebe bęna' neda' xel-la' waca zren ca' lálwela benne' ca' ca da netú benne' quebe ne gune', na' quebe bi dul-la xelebáguę'. Lálcala ba belelé'eng' da ca', dxelecuídenę' neda', ne dxelecuídenę' Xra'. ²⁵ Da nigá dxaca na chee gaca li ca naxúaj na lu da nadxixruij bea na da zjálcale benne' ca'. Dxenná na: Belecuídenę' neda' ne quebe bi da calela bęna' chee benne' ca'.

²⁶ 'Gate xida Bénnea' gácalęne' le'e, Bénnea' naque' Be' Lá'azxa, ne dxulé'eng' da li, Bénnea' sel-la' neda' waláz chee Xra', Léqueze' xechębe' ca naca chia' neda'. ²⁷ Cá'anqueze le'e wechębequezle ca naca chia' neda' lawe' da zúálele neda' nédxudautę.

16

¹ Gunná Jesús:

—Dxapa' le'e da caní chee quebe gusán lázrele da naca chia'. ² Welexebeáję' le'e lu xu'u naga dxelezraguę', na' zrin zra gate núteteze benne' gutię' le'e guéquene' gune' zrin chee Dios. ³ Caní xelune' lawe' da quebe ne xelúnbe'ę Xra', ne neda'. ⁴ Dxapa' le'e da nigá chee gate zrin zra na', na' cheajsá lázrele ba gucha' le'e da nigá.

Da dxun Be' Lá'azxa

Nadxa gunná Jesús:

—Quebe gucha' le'e da nigá nédxute' lawe' da zúálequeza' le'e. ⁵ Na'a wexá'a cheajxezúalęna' Xra' nasele' neda', na' netule le'e quebe dxuchębele neda' ga cha'a. ⁶ Dxewí'ine lázrele lawe' da gucha' le'e da caní. ⁷ Na'a dxapa' le'e da li: Cháwe'dxa gaca chee le'e che xexá'a neda' lawe' da che quebe xexá'a, quebe xida Be' Lá'azxa xedajszúalęne' le'e, Bénnea' gácalęne' le'e. Che xexá'a neda', sel-la' Lę' chee le'e. ⁸ Gate xida Lę', na' gulé'eng' bénneache zaj naque' benne' dul-la, ne quebe dxelune' da xrlátaje, na' Dios guzrí'a xi'e benne' caní. ⁹ Zaj naque' benne' dul-la lawe' da quebe dxelájle'ę chia' neda'. ¹⁰ Xeleque bé'eng' quebe

dxelunge' da xrlátaje lawe' da xexá'a neda' naga zua Xra', na' le'e québedxa lé'ele neda'. ¹¹ Xeleque bé'eng' Dios guzrí'a xi'e le' lawe' da ba guchugue' chee da xriwe', da na' dxenná' bea na lu xezr la xu nigá.

¹² Ne dél'e' da dxal-la' xapa' le'e, san le'e quebe gaca chéajni'ile na na'a.

¹³ Gate xida Be' Lá'azxa, Bénnea' dxulé'eng' da li, Le' gulé'eng' le'e ca naca xúgute da li lawe' da quebe guchálaje' cheézqueze'. Wanné' xúgute da xéne'ne', na' guzéajni'ine' le'e ca da dxal-la' gaca na. ¹⁴ Le' gucá'ana szrene' neda' lawe' da wazi'e' chee da naca chia' neda', na' guzéajni'ine' na le'e. ¹⁵ Xúgute da napa Xra', cheéqueza' naca na, na' chee le' na' gunné'a', wazi' Be' Lá'azxa da naca chia', na' guzéajni'ine' na le'e.

Xel-la' dxelewí'ine lazre' chee benne' ca' xexaca na xel-la' dxelebe

¹⁶ Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xel'é'ele neda' lawe' da xexá'a neda' naga zua Xra'.

¹⁷ Nadxa bal-la benne' ca' dxusede Jesús buluchebe ljwezre':

—¿Bizra zéaje da nigá? Dxe'e dxi'u, xetú chí'idau' québedxa lé'edxu Le', na' xetú chí'i, na' xel'é'edxu Le' lawe' da xexíaje' naga zua Xre'. ¹⁸ ¿Bi zéaje da na', xetú chí'idau'? Quebe dxéajni'idxu bi chee dxuchálaje'.

¹⁹ Guque be'e Jesús dxelaca lazre' xuluchebe' Le', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xel'é'ele neda'. ¿Da nigá na' dxuchebe ljwézrele? ²⁰ Da li dxapa' le'e, wabézrele le'e, ne xewi'ine lázrele, san bénneache chee xezr la xu nigá xelebene'. Lácala le'e xewi'ine lázrele, xel-la' dxewi'ine lazre' chee xexaca na xel-la' dxebe. ²¹ Gate tu nu'ula zua sane' bidau' zue' stebe lawe' da ba bzrin zra sua xel-la' dxudía chee'. Gate te galaj bidu na', na' québedxa dxeajsá lazre' da guzaque' lawe' da dxebele'eng' chee bidu na' ba gúlajbe'. ²² Cá'anqueze le'e zúale stebe na'a, san neda' welá'queza' xedajxenná'a le'e, na' lu xichaj lázrdaule súatequeze xel-la' dxebe, da naca na tu xel-la' dxebe da quebe nu seque' cua.

²³ Lu zra na' québedxa bi guchébele neda'. Da li dxapa' le'e, Xra' gunné' le'e xúgute da ná bale lu La' neda'. ²⁴ Nédxula quebe bi gunábale lu La' neda'. Na'a le naba, na' si'le, chee súale'ele xel-la' dxebe.

Jesús guchuchuj guléaje' da dxaca lu xezr la xu nigá

²⁵ Gunná Jesús:

—Ba gucha' le'e da caní nen dizra' ca' da dxulul'é' na. Wazrín zra gate québedxa guchálajlëna' le'e da naca da dxulé'e na. Guchálajlëna' le'e caníqueze da naca chee Xra'. ²⁶ Lu zra na' ná bale Xra' lu La' neda', na' quebe dxenné'a' neda' gata' xueda' Xra' waláz chee, ²⁷ lawe' da Xrá'queze nazrí'ine' le'e. Nazrí'ine' le'e lawe' da nazrí'ile le'e neda', ne dxéajle chia' za'a naga zua Dios. ²⁸ Guz'á' lau Xra' chee bla'a lu xezr la xu nigá chee xexá'a naga zua Xra'.

²⁹ Nadxa benne' ca' dxusede Jesús gulé'e Le':

—Na'a dxuchálajlënu' netu' caníqueze. Quebe dxuchínenu' dizra' ca' da dxulul'é' na. ³⁰ Na'a dxeque bé'entu' nézenu' xúgute da ca', na' quebe dxal-la' nu guchebe Lue'. Chee le' na' dxéajlentu' chiu' za'u naga zua Dios.

³¹ Jesús guzre' benne' ca':

—¿Dxeajle chia' na'a? ³² Za' zra, ne ba naca zra ná'queze gate le'e gase dínajle ca'ale xrneza cha chee, na' gucá'anale neda' tuza'. Quebe zúaqueza' tuza' lawe' da zúale Xra' neda'. ³³ Dxapa' le'e da nigá chee gápale xel-la' dxebeza zri lazre' lawe' da nácale neda' tuze. Lu xezr la xu nigá dxun na ba

xen si sácale. Le gun chuchu lázrdaule, lawe' da ba bchuchuj bléaja' da dxaca lu xęzr la xu nigá.

17

Jesús dxenabe' Dios xucá'ana chawe'ę benne' ca' dxeláajle'ę chee'

¹ Ca gudé gunné' da nigá, na' Jesús gunné'ę xabáa, dxenné':

—Xrae, ba bzin zra. Bca'ana szren neda', Zri'inu', chee' cá'anqueze neda', Zri'inu', gucá'ana szrena' Lue'. ² Lue' ba bęnnu' neda', Zri'inu', xel-la' dxenná bea chee' nna be'eda' xúgute' bęnneache, chee' gunęzruja' xel-la' nabán da zeajlí canna chee' xúgute' benne' ca' bęnnu' neda'. ³ Xel-la' nabán da zeajlí canna naca na chee' xelúnbe'ę Lue', nacu' Dios tu licha', ne li lazre', na' chee' xelúnbe'ę neda', Jesucristo, Bęnnea' gusel-lu' Lue'.

⁴ Neda' ba bca'ana szrena' Lue' lu xęzr la xu nigá, ne ba bexuzre bęna' da bdxixruj be'enu' neda'. ⁵ Na'a, Xrae, bęnna neda' xel-la' szren lau Lue', da naca na xel-la' szren na' da guca na chia' naga zu' Lue' nédxudautę gate za gata' xęzr la xu nigá.

⁶ Benne' ca' guca'u Lue' ládujla bęnneache, benne' ca' bęnnu' neda', neda' ba bzéajni'ida' le' Nu nacu' Lue'. Gulaque' chiu', na' Lue' bęnnu' neda' benne' ca', na' ba belunę' ca' dxenná xrtizru'. ⁷ Na'a zaj nézenę' xúgute' da bęnnu' neda' za na naga zu' Lue'. ⁸ Ba bnęzruja' chee' benne' caní dizra' chiu' da bęnnu' neda', na' benne' caní ba gulezi' lu ne'ę na. Ba guleque' be'ene' da li neda' za'a naga zu' Lue', ne ba guléajle'ę chiu', gusel-lu' neda'.

⁹ Neda' dxata' xueda' Lue' gaca chawe' chee' benne' caní. Quebe dxata' xueda' Lue' ne chee' benne' ca' zaj naque' chee' xęzr la xu nigá. Dxenaba' Lue' ne chee' benne' ca' bęnnu' neda', lawe' da zaj naque' chiu'. ¹⁰ Xúgute' da naca chia' naca na chiu', na' da naca chiu' naca na chia' neda', na' xel-la' szren chia' dxul'e' lawe' na ne chee' benne' caní.

¹¹ Neda' québedxa sua' lu xęzr la xu nigá, san benne' caní xelexegá'anę' lu xęzr la xu nigá, na' neda' wezá'a nigá, ne xedajxezúalequeza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bęnnu' neda', chee' xelácaqueze' tuze ca nácadxu dxi'u tuze, Lue' ne neda'. ¹² Gate ne zua' neda' lu xęzr la xu nigá, bxua' benne' caní nen xel-la' dxenná bea chiu', benne' caní bęnnu' neda', ne bcache chawa' le'. Netú benne' caní quebe gunite, san tuze bęnnea' ba nanítequeze', na' caní guca na chee' guca li ca naxúaj na lu xiche chiu'.

¹³ Na'a ba zezá'a naga zu' Lue'. Dxácatę ne zua' lu xęzr la xu nigá dxennéa' da caní chee' xelápalę'ę benne' caní xel-la' dxebe' ca da nápaqueza' neda'.

¹⁴ Neda' bnęzruja' benne' caní dizra' chiu'. Bęnneache chee' xęzr la xu nigá dxelecuídenę' benne' caní lawe' da québedxa zaj naque' tuze nen benne' ca' chee' xęzr la xu nigá, ca na' neda' quebe naca' tuze nen da naca chee' xęzr la xu nigá. ¹⁵ Quebe dxenaba' Lue' xeca'u benne' caní lu xęzr la xu nigá. Dxenaba' guzrá chawu' benne' caní chee' quebe seque' da xriwe' bi gun na chee' le'.

¹⁶ Ca neda' quebe naca' chee' xęzr la xu nigá, cá'anqueze benne' caní quebe zaj naque' chee' xęzr la xu nigá. ¹⁷ Bzua benne' caní chee' xelaque' cheéquezu' Lue' ne chee' da li. Dizra' chiu' naca na da li. ¹⁸ Ca gusel-lu' Lue' neda' ládujla bęnneache zaj naque' chee' xęzr la xu nigá, cá'anqueze neda' dxusel-le' benne' caní ládujla bęnneache zaj naque' chee' xęzr la xu nigá. ¹⁹ Ne chee' benne' caní nuzúa cuina' cheéquezu' Lue', chee' cá'anqueze benne' caní xelaque' cheéquezu' Lue' ne chee' da li.

²⁰ 'Dxata' xueda' Lue', quegaze chee benne' caní, san cá' anqueze chee benne' ca' xeléajle' e chia' gate xelenne' da xuluchalaj benne' caní. ²¹ Dxenaba' Lue' chee xelaca xúgute benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xeléajle' bèneache zaj naca chee xezr la xu nigá Lue' gusel-lu' neda'. ²² Neda' ba bnézruja' chee benne' caní xel-la' szren na' da bennu' neda' chee xelaque' tuze ca nácaquezdxu tuze dxi'u. ²³ Neda' súalena' benne' caní, na' Lue' súalenu' neda', chee xelácaqueze benne' caní tuze, na' caní xeleque be'e bèneache Lue' gusel-lu' neda', ne nazrí'inu' benne' caní cáteze nazrí'inu' neda'.

²⁴ 'Xrae, Lue' bennu' neda' benne' caní, na' dxaca lazra' xelezúalene' neda' naga sua' neda', chee xelélé'ene' xel-la' szren da ba bennu' neda', lawe' da nazrí'inu' neda' nédxudauté gate quebe ne gunu' xezr la xu nigá. ²⁵ Xrae chawe', benne' zaj naque' chee xezr la xu nigá quebe zaj núnbe'e Lue', san neda' núnbe'a Lue', na' benne' caní ba zaj nézene' Lue' gusel-lu' neda'. ²⁶ Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i lazre' dxéquenu' Lue' neda' lu xichaj lázrdau benne' caní, ne chee súale néda'queza' le'.

18

Dxelel-le' Jesús

(Mt. 26.47-56; Mr. 14.43-50; Lc. 22.47-53)

¹ Ca gudé gunná Jesús da caní, na' bdxúaje' nen benne' ca' dxusédene' chee chjaque' xecha la'a xegu Cedrón. Lataj na' zéle'e xaga olivo naga guxú'u Jesús nen benne' ca'. ² Cá'anqueze Judas, bènea' dxudée' Jesús lu na' benne' ca' dxeledábague' Le', núnbe'e lataj na' lawe' da zane' lasa guxíaj Jesús na' nen benne' ca' dxusédene'. ³ Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra' aga wen zrin chee xudau', benne' ca' gulesel-la benne' xichaje' ca' chee bxruze ca', ne benne' fariseo ca'. Zaj nu'e xaga, ne xia ca', ne xi' ca', ne xi' xedxe. ⁴ Jesús ba nézene' ca da gaca chee', na' chee le' na' bdxúaje' lau benne' ca', na' bchebe' le':

—¿Nuzra dxexilajle?

⁵ Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bènea' dxudée' Jesús lu na' benne' ca' zúaqueze' ládujla benne' ca'.

⁶ Gate gunná Jesús: Neda' na', na' benne' ca' belexebigue' lau Jesús, ne xeajlechazte' lu xu. ⁷ Nadxa Jesús bchebe' benne' ca' da xula:

—¿Nuzra dxexilajle?

Gulenná benne' ca':

—Jesús, benne' Nazaret.

⁸ Nadxa guzre Jesús benne' ca':

—Ba gucha' le'e neda' na'. Che dxexilajle neda', le güe benne' caní lataj cheajxaque'.

⁹ Ca guca da nigá guca li ca gunná Jesús, gunné': "Benne' ca' benna Xra' neda', netue' quebe bnitia'." ¹⁰ Nadxa Simón Pedro, ne nu'e xia, guléaje' na, na' guchugue' naga da zua xabela chee Malco, wen zrin chee bxruze blau.

¹¹ Jesús guzre' Pedro:

—Begú'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na'?

Jesús dxezrine' lau bxruze blau

(Mt. 26.57-58; Mr. 14.53-54; Lc. 22.54)

¹² Nadxa benne' dxjaca wedil-la, ne benne' dxenná be'ene' le', ne benne' xra'aga wen zrin chee judío ca' gulel-le' Jesús, ne buluchéaje' Le'. ¹³ Nadxa guleché'e Jesús lizre Anás. Anás nigá naque' xrtau zri'ine Caifás, bénnea' naque' bxruze blau iza na'. ¹⁴ Caifás nigá naque' bénnea' guzre' judío blau ca' gácadxa chawe' gate tuze benne' waláz chee xezr la xu chee'.

Pedro dxenné' quebe núnbe'e Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro, ne xetú benne' ca' dxusede Jesús zjaque' zeajnawe' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'ulene' Jesús chale'aj lizre bxruze blau na'. ¹⁶ Pedro begá'ane' dxu'a dxa xu'u da zua chale'aj na'. Chee le' na' bdxuaj bénnea' núnbea bxruze blau le', na' bchálajlene' nu'ula zua dxu'a dxa xu'u na', na' gulu'e Pedro chale'aj na'.

¹⁷ Nadxa nu'ula na' zua dxu'a dxa xu'u bchebe' Pedro:

—¿Quebe nacu' lue' tuze nen benne' Nazaret na'?

Pedro bechebe':

—Quebe naca'.

¹⁸ Lawe' da dxun na zaga, benne' wen zrin ca', ne benne' xra'aga wen zrin chee bxruze ca' ba zaj nabeque' xi', ne zaj ze' dxu'a xi' na' dxelexezré'ene'. Pedro ze' nen benne' ca', dxexezré'ene' dxu'a xi' na'.

Bxruze blau dxuchebe' Jesús

(Mt. 26.59-66; Mr. 14.55-64; Lc. 22.66-71)

¹⁹ Bxruze blau guzú lawe' dxuchebe' Jesús nuca benne' ca' zaj naque' benne' dxusédené', ne bi da dxusédené' le'. ²⁰ Jesús guzre' le':

—Neda' ba bchálajqueza' lówela xúgute bénneache. Bsédequeza' lu xu'u ca', ne lu xu'u naga dxelezraga xúgute benne' judío ca'. Quebe bi bchálaja' bagácheze. ²¹ ¿Bizr chee na' dxuchebu' neda'? Bchebe benne' ca' ba belenne' chia', na' le' xelenné' bi da bchálajlena' le'. Benne' ca' zaj nézene' da ba gunnéa'.

²² Gate gunná Jesús da nigá, na' tu benne' xra'aga wen zrin chee xudau', benne' ze' na', gudape' xraga Jesús, na' gunné':

—¿Caní dxexechebu' lau bxruze blau nigá?

²³ Jesús bechebe':

—Che gunnéa' tu da calela, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

²⁴ Nadxa Anás gusél-le' Jesús, zaj nadxéaj ne'e, lau Caifás, bxruze blau.

Pedro dxenné' xecha lasa quebe núnbe'e Jesús

(Mt. 26.71-75; Mr. 14.69-72; Lc. 22.58-62)

²⁵ Dxácaté na' ze' Pedro dxu'a xi' na' dxexezré'ene', na' gulé'e le':

—¿Quebe nacu' lue' tu benne' ca' zaj naque' tuze nen bénnea'?

Na' Pedro gunné':

—Quebe naca'.

²⁶ Nadxa tu benne' wen zrin chee bxruze blau, benne' naque' xrtia bénnea' guchugu Pedro nague', bchebe' le':

—¿Quegá ble'eda' lue' nen bénnea' naga zaj ze' xaga olivo ca'?

²⁷ Pedro gunné' xecha lasa:

—Quebe núnbe'a bénnea'.
La' ná'queze gudxezre xjeaj.

Jesús dxezrine' lau Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Nadxa belexebéajé' Jesús lizre Caifás, na' guleché'e Le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxaní'sise', na' benne' judío ca' quebe gulu'e xu'u na' chee quebe xelexegá'ang' sban, lawe' da che xelu'e na', quebe gaca xelawé' xrche' chee Laní Pascua. ²⁹ Chee le' na' bdxuaj Pilato bchálajleñe' benne' ca', na' guzre' le':

—¿Bizra da zria dxágule benne' nigá?

³⁰ Belexechebe benne' ca':

—Chela ca naque' tu benne' wen da zrinnaj, quebe gudentu' le' lau'.

³¹ Nadxa Pilato guzre' benne' ca':

—Le xeché'e, ne le guchi'a chee' cáteze naca da nadxixruj bea chee.

Belexechebe benne' judío ca':

—Netu', benne' judío, quebe naca cheentu' nu gútentu'.

³² Ca'an guca, guca li ca naca da ba gunná Jesús ca gatié'. ³³ Pilato bexu'e xu'u na', na' gunné' Jesús, ne bchebe' Le':

—¿Nacu' Lue' Wenná Bea chee judío ca'?

³⁴ Jesús gunné':

—¿Dxenabu' da nigá lue'zqueze, u lawe' da nu guzre lue' ca naca chia'?

³⁵ Pilato bechebe':

—¿Naca' neda' judío? Benne' xezr la xu chiu', ne benne' xíchajé ca' chee bxruze ca' buludé' lue' lawa' neda'. ¿Bizra beñu'?

³⁶ Nadxa bechebe Jesús:

—Naga dxenná be'a quebe naca na chee xezr la xu nigá. Chela naca na chee xezr la xu nigá, na' benne' ca' zaj naque' neda' tuze welásaqueze' chee quebe tea' neda' lu na' benne' judío caní. Naga dxenná be'a quebe naca na nigá.

³⁷ Nadxa guzre Pilato Jesús:

—¿Nacu' Lue' wenná bea?

Bechebe Jesús:

—Naca' wenná bea, cáteze dxennáu' lue'. Neda' gúlaja', ne bla'a lu xezr la xu nigá chee nniá' da li. Xúguté benne' ca' dxeluné' ca dxenná dizra' chee da li dxelenné' da dxennéa' neda'.

³⁸ Pilato gunné':

—¿Bizra na' da lí?

Dxelechugue' chee Jesús gatié'
(Mt. 27.15-31; Mr. 15.6-20; Lc. 23.13-25)

Ca gudé bchebe Pilato Jesús caní, na' bdxúajé' xetú. Bchálajleñe' benne' judío ca', na' guzre' le':

—Neda' quebe bi da calela dxezrelda' nun benne' nigá. ³⁹ Le'e zua tu da zéajle. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenná bea chee judío ca'?

⁴⁰ Nadxa xúguté' gulenné' zizraj:

—¡Quegá benne' nigá! ¡Bsan Barrabás!

Barrabás na' naque' gubán.

19

1 Nadxa Pilato guqué'e Jesús, na' bdxixruj bé'ene' xelu'e Le' xide'. 2 Benne' dxjaque' wedil-la buluzri'e xichaj Jesús tu da' belune' zruze xaga xeche', ne bulugácu'e Le' tu ladxe' bzawe. 3 Nadxa gulé'chaj'e Le', dxelenné':

—¡Gaca ba lue', wenná bea chee judío ca'!

Nadxa belú'e dxu'a lau Jesús.

4 Nadxa bdxuaj Pilato da xula, ne guzre' benne' ca':

—¡Le nna'xque! Dxebé'aja' benne' nigá chee nézele quebe dxezrelda' bi da zrinnaj nabague'.

5 Bdxuaj Jesús zria xíchaj'e da naca zruze xaga xeche', ne nacue' ladxe' bzawe na'. Nadxa Pilato guzre' benne' ca':

—Nigá zua bénnea'.

6 Gate benne' xíchaj'e ca' chee bxruze ca', ne xra'aga wen zrin chee' ca' belelé'ene' Jesús, na' gulezú lawe' dxelenné' zizraj:

—¡Bde'e xaga béguaj! ¡Bde'e xaga béguaj!

Pilato guzre' benne' ca':

—Le che'e, ne le gudé'e xaga béguaj lé'equeze, lawe' da quebe dxezrelda' bi da zrinnaj nabague'.

7 Na' benne' judío ca' belexechebe':

—Netu' nápantu' tu da nadxixruj bea na, ne ca dxenná na dxal-la' gati'e lawe' da dxun cuine' Zri'ine Dios.

8 Gate ben Pilato da nigá, na' bezrébedxe'. 9 Bexu'e xu'u na', na' bchebe' Jesús:

—¿Gazra benne' Lue'?

Quebe bi bechebe Jesús.

10 Nadxa guzre Pilato Le':

—¿Quebe dxexechebu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

11 Bechebe Jesús:

—Quebe bi xel-la' dxenná bea napu' bi gunu' chia' chela ca benna Dios lue' xel-la' dxenná bea nigá. Chee le na', bénnea' bde'e neda' lu na'u dul-la zrendxa nabague' ca lue'.

12 Lu zra na'te gudilaj lazre' Pilato ájala guné' gusané' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bénnea' dxenná bea Roma. Nu benne' dxun cuine' wenná bea dxedábague' César.

13 Nadxa Pilato, gate benne' da nigá, bdxixruj bé'ene' xelexebé'aje' Jesús, na' gudxé'e lataj blau chee', da zua lataj na' nazí le na Gabata nen dizra' hebreo, da zé'aje na chale'aj xiaj ta'a. 14 Naca na zra za zrin Laní Pascua, ca du wagubizra. Nadxa Pilato guzre' benne' judío ca':

—Nigá zua wenná bea chee.

15 Na' benne' ca' gulenné' zizraj:

—¡Gatié'! ¡Gatié'! ¡Bde'e xaga béguaj!

Pilato guzre' benne' ca':

—¿Gudá'a wenná bea chee xaga béguaj?

Belexechebe benne' xíchaj'e ca' chee bxruze ca':

—Netu' zua tuze wenná bea cheentu'. ¡César! 16 Nadxa Pilato bde'e Jesús lu na' benne' ca' chee te'e xaga béguaj, na' guleché'e Jesús.

*Jesús dxedé'e xaga béguaj**(Mt. 27.32-44; Mr. 15.21-32; Lc. 23.26-43)*

¹⁷ Na' bdxuaj Jesús nu'e xaga béguaj chee chéaje' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota. ¹⁸ Buludé'e Jesús xaga béguaj lataj na', na' tu zren nen Jesús buludé'e xechupa benne' xaga béguaj ca' chalá'a weaj naga da' Jesús. ¹⁹ Pilato bdxixruj bé'ene' buluzúe' le'e xaga béguaj xichaj Jesús da dxenná na: Jesús, Benne' Nazaret, Wenná Bea Chee Judío Ca'. ²⁰ Zane' benne' judío ca' bululabe' da na' lawe' da zua lataj na' naga buludé'e Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín. ²¹ Chee le na' benne' xíchaje' ca' chee bxruze chee judío ca' gulé'e Pilato:

—Quebe guzúaju na: Wenná Bea Chee Judío Ca'. Bzuj na: Le' Gunné' Nague' Wenná Bea Chee Judío Ca'.

²² Bechebe Pilato:

—Da bzujaja', ba naxúajqueze na.

²³ Ca gudé buludá' benne' dxjaque' wedil-la Jesús xaga béguaj, na' belexequé'e zra lané', ne belebeque' na tapa cue', tu cue' weaj chee tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na. ²⁴ Chee le na' benne' dxjaque' wedil-la gulé' lwezre':

—Quebe chézadxu na. Cwéajdxu da gunna bea na chee la' nu xala le na.

Ca'an guca, guca li da naxúaj na lu xiche chee Dios, da dxenná na: Belexelé'e zra lana', ne guléaje' da gunna bea na chee le na. Caní belún benne' dxjaque' wedil-la.

²⁵ Gáguze naga zua xaga béguaj chee Jesús ze xrna Jesús nen bi bila xrne'e, ne María, zru'ula Cleofas, ne María Magdalena. ²⁶ Gate ble'e Jesús xrne'e, ne cuita xrne'e na' ze Juan, benne' bsede Jesús, bënnea' nazri'idxe', na' guzre' xrne'e:

—Nú'uladau', na' ze zri'inu'.

²⁷ Nadxa guzre Jesús bënnea':

—Na' ze xrna'u.

Zra na'te benne' nigá beche'e nu'ula na' lizre'.

*Dxate Jesús**(Mt. 27.45-56; Mr. 15.33-41; Lc. 23.44-49)*

²⁸ Ca gudé gunná Jesús da nigá, lawe' da nézene' xúguté na ba guca li, ne chee guca li ca naxúaj na lu xiche chee Dios, gunné':

—Dxebíleda'.

²⁹ Zua na' tu dxe'e nupe zichaj, na' bulusubise' tu da dxezrupe na nupe zichaj na', ne buluzúe' na lawe' tu xia tunna, na' buluzúe' na dxu'a Jesús.

³⁰ Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchaje', gutie'.

Tu benne' dxeje' wedil-la dxechizie' xia lachú'u Jesús

³¹ Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'e xaga béguaj ca' lu zra dxulupá'angé' lawe' da naca zra na' tu zra blau. Chee le na' gulenabe' lau Pilato dxixruj bé'ene' xelíchaje' ni'a benne' ca' zaj de'e xaga béguaj ca', ne xelexequé'e le' le'e xaga béguaj ca'.

³² Nadxa tu benne' ca' dxjaque' wedil-la gudíchaje' ni'a benne' nedxu na', ne cá'anqueze chee benne' xetú de'e cuita Jesús. ³³ Gate bzrine' naga da' Jesús, blé'ene' ba gutie', na' chee le na' quebe gudíchaje' ni'e.

³⁴ Tu benne' ca' dxjaque' wedil-la guchízie' xia chee' lachú'u Jesús, na' bdxuaj dxen, ne nisa na'. ³⁵ Benne' dxuchalaj da nigá naque' benne' blé'ene' na, ne dxuchálaje' da li, ne nézene' dxenné' da li, chee' cá'anqueze le'e chéajlele chee' Jesús. ³⁶ Da caní guca na chee' guca li ca da naxúaj na lu xiche chee' Dios, da dxenná na: Quebe gulíchaje' netú zrita chee'. ³⁷ Xetú da naxúaj na lu xiche chee' Dios dxenná na: Welelé'ene' bënnea' belune' we'.

Dxulucache' Jesús

(Mt. 27.57-61; Mr. 15.42-47; Lc. 23.50-56)

³⁸ Ca gudé na' José, benne' xezre Arimatea, xeajnabe' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús. ³⁹ Cá'anqueze Nicodemo, bënnea' xeajchálajlene' Jesús chizrela, bzrine' na', nu'e tu gaxúa xiaj nedxe, ne tu da dxelále'e zixre. ⁴⁰ Nadxa José, ne Nicodemo belexequé'e Jesús, na' buluchele' Le' ladxe' nen nedxe na' ca naca da zjácale benne' judío ca' da dxelune' chee' benne' gate', gate na' dxulucache' le'. ⁴¹ Lataj na' naga buludé'e Jesús xaga béguaj zua tu lataj naga zaj ze xaga ca', na' lávela lataj na' zua tu ba cube le'e xiaj na', naga quebe nu ne chú'unqueze benne' gate'. ⁴² Lu ba na' belegu'e Jesús lawe' da zua ba na' gáguze, ne lawe' da ba dxebía gubizra, ne ba zua su lau zra dxulupá'ana judío ca'.

20

Jesús dxexebangé' ládujla benne' gate

(Mt. 28.1-10; Mr. 16.1-8; Lc. 24.1-12)

¹ Zra nedxu, guxíaj María Magdalena dxu'a ba na' dxani'sise', gate ne nachúl-late, na' blé'ene' québedxa naduse xiaj dxu'a ba na'. ² Nadxa bexíaj chégü'e naga zua Simón Pedro nen xetú benne' bsede Jesús, bënnea' bzri'idxe' Jesús, na' guzre' benne' ca':

—Ba belequé'e Xránadxu lu ba na', ne quebe nézentu' ga xeajlelú'e Le'.

³ Nadxa Pedro, ne bënnea' xetú beledxúaje' zjaque' dxu'a ba na'. ⁴ Dxúpaté' zjaca chégü'e tu zren, san bënnea' xetú guzá chégudxe' ca Pedro, ne bzrine' nédxudxa dxu'a ba na'. ⁵ Na' xeajse' su dxú'ala xeajnné'e lu ba na', na' blé'ene' ladxe' da buluchele' Jesús xu'u na na', san quebe guxú'e lu ba na'. ⁶ Ca gudé na', bzrin Simón Pedro, na' guxú'e lu ba na'. Cá'anqueze le' blé'ene' ladxe' na' xu'u na na', ⁷ ne blé'ene' ladxe' da buluchele' xichaj Jesús, quebe xu'u na tu zren nen ladxe' da bedxela na le'. Nadube na, dxe' na chálá'ala. ⁸ Nadxa cá'anqueze guxú'u bënnea' xetú, bënnea' bzrin nedxu dxu'a ba na', na' blé'ene' ladxe' ca', ne guxéajle'e. ⁹ Quebe ne xeléajni'ing' da naxúaj na lu xiche chee' Dios da dxenná na xebán Jesús ládujla benne' gate'. ¹⁰ Nadxa benne' ca' bsede Jesús belexezrine' xu'u naga zaj zre'e.

Jesús dxulé'e lawe' María Magdalena

(Mr. 16.9-11)

¹¹ María begá'ane' dxu'a ba na', dxebezre'. Ca dxebezre' na', na' gulégü'e dxenné'e lu ba na', ¹² na' blé'ene' chupa gubáz chee' xabáa zaj nácu'e zra lane' chiche, zaj dxe'e naga guxú'u Jesús. Tu'e dxe'e naga guzrúa xichaj Jesús, na' xetú'e dxe'e zeaj zranle ga guzrúa ni'a Le'. ¹³ Na' buluchebe gubáz chee' xabáa ca' María na':

—Nu'ula, ¿bizr chee' na' dxebezru'?

Le' guzre' gubáz chee' xabáa ca':

—Lawe' da belú'e Xrana', ne quebe nezda' ga xeajlelú'e Le'.

14 Caní dxenné', na' bzéchaj xíchajé', ne blé'engé' Jesús zé' ca'ala, san quebe nézengé' che Jesús na'. 15 Nadxa Jesús bchébe' María na':

—Nú'uladau', ¿bizr cheé na' dxebezru'? ¿Nu dxexíajú'?

María gúquené' naque' benne' dxá'angé' xaga ca' zaj zé na', na' guzre' Le':

—Benne', che lue' bi'u Le', gunná ga xeajlú'u Le', cheé cheajxezri'a Le'.

16 Nadxa Jesús guzre' nu'ula na':

—María.

María na' bexéchajé', ne guzre' Le' nen dizra' hebreo:

—¡Raboni!

Dizra' nigá zéajé na: Benne' Dxuséde.

17 Jesús guzre' María na':

—Bsan neda' lawe' da quebe ne xegüéna' naga zua Xra'. Bexíaj, xeajxéze re bi bícha'dau' ca', benne' ca' bsédeda', xegüéna' naga zua Xra', ne nácaqueze' Xrale. Naque' Dios chia', ne Dios cheéle.

18 Nadxa bexíaj María Magdalena, xeajzenne' benne' ca' bséde Jesús ba blé'engé' Jesús, na' Le' guzre' le' da caní.

Jesús dxulé'e lawé' benne' ca' bsédengé'

(Mt. 28.16-20; Mr. 16.14-18; Lc. 24.36-49)

19 Lu zra ná'queze, da naca na zra nedxu cheé da gazre zra, na' chizrela zaj nazraga benne' ca' bséde Jesús, ne zaj nusézxujé' dxa xu'u ca' lawe' da dxelezrebe' judío blau ca'. Na' guxú'u Jesús, guzé' laduj benne' ca', na' bgape' benne' ca' diuzre, dxenné':

—Le gapa xel-la' dxebeza zri lazre'.

20 Ca gudé gunná Jesús da nigá, na' blé'engé' benne' ca' ne'e, ne le'e naga gudé xia na'. Benne' ca' bséde Jesús gulebé'le'engé' gate belelé'engé' Xránadxu.

21 Nadxa Jesús guzre' benne' ca' xecha lasa:

—Le gapa xel-la' dxebeza zri lazre'. Cáteze gusel-la Xra' neda', cá'anqueze dxusel-la' neda' le'e.

22 Nadxa blube' lau benne' ca' ne guzre' le':

—Le si' Be' Lá'azxa cheé Dios. 23 Benne' ca' dxunite laule le'e cheé dul-la zaj nabague' ba bnite lau Dios cheé', na' benne' ca' quebe dxunite laule le'e cheé dul-la zaj nabague', quebe bunite lau Dios cheé'.

Tomás dxelé'engé' Xránadxu ba bebangé'

24 Tomás, tu benne' chazrinnu ca' bséde Jesús, bénnea' le' Bi Lide', quebe zue' nen benne' ca' xezicadxa gate ble'e lau Jesús. 25 Ca gudé na' gulé'e Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé bdiduj ca', ne gudéa' zrube na'a lu xedxu cheé bdiduj ca', ne gudéa' na'a le'e naga gudé xia na', québequeze chéajle'a.

26 Ca guca xrunu' zra, benne' ca' bséde Jesús zaj nazrágaqueze' lu xu'u na' xetú lasa, na' zua Tomás nen benne' ca'. Nadxa, lácala zaj naxezxuj dxa xu'u ca', ble'e lau Jesús lau benne' ca', ne guzé' laduj le', na' bgape' le' diuzre, gunné':

—Le gapa xel-la' dxebeza zri lazre'.

27 Nadxa Jesús guzre' Tomás:

—Bde zrube na'u nigá, ne gunná' na'a nigá. Benna na'u, bde na le'a nigá. Québedxa gun chupa lazru', san guxéajle.

28 Nadxa bechébe Tomás:

—Xrana', ne Dios chia'.

²⁹ Jesús guzre' le':

—Tomás, na'a dxéajle'u lawe' da ba blé'enu' neda'. Ba neza zrente naca na chee benne' ca' dxeléajle'e chia' lácala quebe ne xelexé'ene' neda'.

Da dxaca lazre' Juan gun xiche nigá

³⁰ Jesús bene' da zandxa xel-la' waca zrente lau benne' ca' bsédene' da quebe zaj naxúaj na lu xiche nigá. ³¹ Da caní zaj naxúaj na chee chéajlele le'e chee Jesús, naque' Cristo nase-la Dios, ne Zri'ine Dios, ne chee gápale xel-la' nabán lawe' da dxéajlele chee'.

21

Jesús dxulé'e lawe' gazre benne' ca' bsédene'

¹ Ca gudé na' Jesús ble'e lawe' lau benne' ca' bsédene' dxu'a nísadau' chee Tiberias. Caní guca na. ² Zaj nazraga Simón Pedro, ne Tomás, bénnea' léqueze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bséde Jesús. ³ Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'anqueze netu' wazá'lentu' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu bela gulezénqueze'. ⁴ Ca guzú lau dxani'sise', ble'e lau Jesús dxu'a nísadau' na'. Benne' ca' bsédene' quebe zaj nézene' che Jesús na'. ⁵ Nadxa Jesús guzre' benne' ca':

—Bénne'dau', ¿quebe nu bela ne senle?

Belexechebe benne' ca':

—Quebe bi ne sentu'-ba'.

⁶ Nadxa guzre Jesús benne' ca':

—Le guzala xixruj na' chalá'a xabeła chee da dxedá lawe' nísadau' na', na' senle bela.

Ca' belune', na' ca dxelexequé'e xixruj na' quebe dxelexegu'é'ene' na lawe' da nazrate na bela zan. ⁷ Nadxa bénnea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázie' ladxe dxexrúa cuzre' lawe' da nagüe' na, na' bexétaje' lu nisa. ⁸ Xezícadxa benne' ca' belexezrine' dxu'a nísadau' na', zaj zre'e lu da dxedá lawe' nísadau', dxelexezrube xue' xixruj na' nazrate na bela ca' lawe' da dxe' da dxedá lawe' nísadau' na' lu nísadau' ca tu le gu'una xiaj. ⁹ Gate belexétaje' lu xu bizre, na' belelé'ene' ba dxe' xi', ne ba zrua tu bela lawe' xi' na', na' de na' xeta xtila. ¹⁰ Nadxa Jesús guzre' benne' ca':

—Le cheajxri' tu chupa bela ca', be za guzéntele.

¹¹ Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'te, nazrate na bela zri'a, tu gaxúa chi'inu xunba', na' lácala naca tu cá'anté'ba' quebe gudxeza xixruj na'. ¹² Nadxa guzre Jesús benne' ca':

—Le da gágule xrsila.

Netú benne' ca' quebe dxelexázrene' xuluchébe' Le' nu Le', lawe' da zaj nézene' naque' Xránadxu. ¹³ Nadxa Jesús guqu'é'e xeta xtila na', na' bnézuje' na benne' ca', ne cá'anqueze bene' chee bela ca'.

14 Da nigá naca na da guxunne' lasa ble'e lau Jesús lau benne' ca' bsédeng' ca gudé bebane' ládujla benne' gate.

Jesús dxucháajleṅ' Simón Pedro

15 Ca gudé gulawe' xrsila, na' Jesús bcheḅe' Simón Pedro:

—Simón, zri'ine Jonás, ¿nazrí'idxenu' neda' ca benne' caní?

Becheḅe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zrila'du chia' ca'.

16 Nadxa Jesús bcheḅe' le' da xula:

—Simón, zri'ine Jonás, ¿nazrí'inu' neda'?

Pedro becheḅe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zrila' chia' ca'.

17 Da guxunne' lasa Jesús bcheḅe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bcheḅe Jesús le' da guxunne' lasa che dxelé'ene' Le' chawe', na' guzre' Jesús:

—Xran, Lue' nézquezenu' xúgute. Lue' nézenu' dxelé'eda' Lue' chawe'.

Na' Jesús guzre' le':

—Bxue zrila' chia' ca'. 18 Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácuḅ' lue', ne che'e lue' naga quebe gaca lazru' chéaju'.

19 Gate gunná Jesús da nigá, dxuzéajni'ine' benne' ca' ca dxal-la' gate' Pedro cheḅe' gucá'ana szrene' Dios. Ca gudé na' Jesús guzre' le':

—Ben neda' tuze.

Da gaca cheḅe' bēnnea' nazrí'idxa Jesús

20 Gate bexechaj Pedro, blé'ene' bēnnea' nazrí'idxa Jesús zéaje nawe' le', naque' bēnnea' dxe'e cuita Jesús gate na' gulawe' xrche' na', ne bcheḅe' Jesús: "Xran, ¿nuzra na' gudé Lue' lu na' benne' ca' dxeledábague' lue'?" 21 Gate Pedro blé'ene' bēnnea', na' bcheḅe' Jesús:

—Xran, ¿gazra benne' nigá? ¿Aja gaca cheḅe'?

22 Jesús becheḅe':

—Che neda' dxaca lazra' xegá'ane' nigá ca zrindxa zra xelá'a neda', ¿naca na' chiu' lue' nézenu'? Lue', ben neda' tuze.

23 Belén benne' ca' zaj de'e Jesús quebe gate benne' na'. Jesús quebe guzre' le' quebe gatiḅ'. Guzre' le': "Che neda' dxaca lazra' xegá'ane' ca zrindxa zra xelá'a neda', ¿naca na' chiu' lue' nézenu'?"

24 Benne' nigá naque' benne' dxexecheḅe' cheḅe' da nigá, ne ba nuzúaje' na. Nézentu' dxenné' da li.

25 Cá'anqueze ne zaj dedxa da zante da ben Jesús, na' chela xuaj tu tu na, dxéqueda' quebe gueque lu xezr la xu nigá cha' xiche ca' dxal-la' guzúajdxu. Ca' naca na.

DA CA' BELÚN BENNE' GUBÁZ CHEE CRISTO

Dios nachebe lazre' sel-le' Be' Lá'azxa

¹ Lue', Teófilo, bzuaja' chiu' lu xiche nedxu ca naca xúgutę da guzú lau Jesús dxune', ne dxusédenę nédxudaute, ² cadxa begüene' xabáa. Gate za xezé'e xexiaje' xabáa guquę'e gubáz chee' ca', na' zúalę Be' Lá'azxa Le' guzre' benne' ca' ca da dxal-la' xelune'. ³ Ca gudé gutię', Jesús ná'queze ble'e lawe' benne' ca', ne lawe' chua zra ble'e lawe' benne' ca', na' blé'ene' da zan da dxelunna bea na naca banę', ne bchálajlene' benne' ca' ca dxal-la' nna bea Dios.

⁴ Gate ne zúalę Jesús benne' gubáz ca', gunné xuene' le' quebe xesi'aque' xęzre Jerusalén. Na' guzre' benne' ca':

—Le cueza ca da guchebe lazre' Xra' gunne' cheęle, ca gunníqueza' neda'.

⁵ Da li Juan bchue' bęnneache nisa, san lu zra caní gaca cheęle ca da zéaje xel-la' dxedxúa nisa, xida Be' Lá'azxa xedajsúę' lu xichaj lázrdaule.

Jesús dxegüene' xabáa

⁶ Gate na' zaj nazrague' nen Jesús, na' buluchebe' Le':

—Xran, ęgüe Dios lataj nna béaqueze xęzre Israel lu zra caní?

⁷ Na' bechebe Jesús:

—Quebe naca cheęle nézele bátala, u bi zra gun Dios da ca' tuze Le' nape' xel-la' waca guņe'. ⁸ Gate xida Be' Lá'azxa súalene' le'e, sile xel-la' waca, na' chéajle cheajchálajle da naca chia' lu xęzre Jerusalén, ne ca naca naga nababa Judea, ne naga nababa Samaria, ne ca nácaqueze xęzr la xu nigá.

⁹ Ca gudé gunné' da nigá, ne dxácate dxelenná' benne' ca' Le', begüen Jesús xabáa, na' ca bexu'ę tu lu beuj benite Jesús lau benne' ca'. ¹⁰ Ne zaj zra' benne' ca' dxelenné'ę dxácate dxegüen Jesús, belelá' chupa benne' zaj nácuę' ladxe' chiche lau benne' ca', ¹¹ na' gulę'e benne' gubáz ca':

—Le'e, benne' Galilea, ębizr chee na' zele dxenna'le xabáa? Jesús nigáqueze begüene' zexiaje' xabáa, bezé'ę ládujla le'e, welę'e xetú cáqueze ble'e'le Le' zexiaje'.

Dxelequę'e Matías cheę xedę'e waláz cheę Judas

¹² Nadxa besí'aca benne' gubáz ca' lu Xí'a Xaga Olivo, ne belexezrine' Jerusalén, da quebe naca na zitu', san dxe' cáтитеze da dxunna da nadxixruij bea na lataj xesi'aque' lu zra dxulupá'ane'. ¹³ Gate belexezrine' lu xęzre na', belexegüene' xu'u sibe naga zaj zue'. Benne' caní zaj naque' Pedro, ne Jacobo, ne Juan, ne Andrés, ne Felipe, ne Tomás, ne Bartolomé, ne Mateo, ne Jacobo zri'ine Alfeo, ne Simón, bęnnea' dxedábague' benne' Roma ca', ne Judas, zri'ine Jacobo. ¹⁴ Xúgutę benne' caní tu dxelezrágazqueze' nen benne' biche Jesús, ne María xrna Jesús, ne xebal-la nu'ula ca', cheę xuluchálajlene' Dios.

¹⁵ Lu zra ca' Pedro guzę' laduj bi bíchedxu ca', zaj naque' ca tu gaxúa galaj bęnneache, na' guzre' le':

¹⁶ —Le'e, bi bícha'dau', bęn na ba xen guca li ca da gunná Be' Lá'azxa lu xiche cheę Dios, da na' gunná David waláz cheę Dios ca naca da dxal-la' gaca cheę Judas, bęnnea' guché'e benne' ca' gulel-le' Jesús. ¹⁷ Judas nigá guzúalene' dxi'u tu zren, ne guque' dxi'u tuze lu zrin nigá. ¹⁸ Bxa'u tu cue' xęzr la xu ca naca lazruj cheę Judas, da guzú' lu ne'ę cheę da calęla da bęne'. Na' benne' nigá xeajcházie' suxíchajla, ne gutín le'e, na' bdxuaj ca naca zrájlue'. ¹⁹ Xúgutę

benne' zaj zře'e Jerusalén belenne' da nigá, na' buluzúe' la xezr la xu na' Acéldama, da zéaje na: Xezr La Xu Chee Dxen. ²⁰ Guca li ca da dxal-la' gaca chee' lawe' da naxúaj lu xiche lá'azxa naga zaj naxúaj salmo ca', da dxenná na:

Xegá'ana cá'aze lizre',

ne quebe nu chilá' sua na'.

Cá'anqueze dxenná na:

Xetú benne' tée' waláz chee'.

²¹ Zaj zra' nigá benne' ca' gusá'acaleñe' dxi'u ca naca dxácatę guzúale Jesús dxi'u. ²² Guzú lau na gate bchua Juan Jesús nisa, cadxa bzhin zra begüéñe' xabáa. Dxun na ba xen tu benne' caní gaque' dxi'u tuze chee' xechebe' ca guca gate bebán Jesús lu xel-la' gute.

²³ Nadxa gulebéaje' chupa benne' ca', José ne Matías. José na' léqueze' Barsabás ne léqueze' Justo. ²⁴ Buluchálajleñe' Dios, gulenné':

—Xran, Lue' nézqueznu' ca naca da xu'u lu xichaj lázxdau xúgutę bėnneache. Ble'e netu' nula benne' chupa caní ba nabéaju' Lue', ²⁵ chee' gaque' gubáz chiu', ne xedéę' waláz chee' Judas, bėnnea' bnitie' da naca chee' lawe' da bėne' dul-la, na' bexíaje' lataj naga naca chee'.

²⁶ Nadxa gulebéaje' da gaca bea na, na' bexala Matías, na' gúcatę' tuze benne' chinéaj gubáz ca'.

2

Ca guca gate bla' Be' Lá'azxa

¹ Ca bzhin zra Pentecostés, xúgutę benne' ca' dxelájele'e chee' Jesús zaj nazrague' tuze lataj. ² Ca' guca, belenne' tu schaga da za' lu be' zran xabáa, ca dxun tu be' bđunu', na' belén na xúgutę benne' zaj zře'e lu xu'u naga zaj dxe'e. ³ Nadxa belélé'ene' lu be' xi' ca', da dxelala, na' xeajlezúa na xíchaj tu tu benne' ca'. ⁴ Nadxa guzúaletequeze Be' Lá'azxa xúgutę benne' ca', na' tu tuę' gulezú lawę' dxuluchálaje' dizra' nazrala cáteze dxuchine Be' Lá'azxa le'.

⁵ Ca lu zra ca' zaj zra' xezre Jerusalén benne' judío ca' dxulucá'ana szrėnequeze' Dios. Benne' caní za'aque' xúgutę xezr la xu zaj dxe' lu xezr la xu nigá. ⁶ Ca belenne' bėnneache ca naca schaga na' da dxaca na, na' belexezrague', ne quebe zaj nézene' bi na', lawe' da dxelén tu tu benne' ca' dizra' cha chee' da dxuluchalaj benne' ca' dxelájele'e chee' Jesús. ⁷ Na' belexebánele'ene', ne belexruse', ne gulé ljwezre' tuę' xetúe':

—Zaj naca benne' Galilea xúgutę benne' caní dxuluchálaje'. ⁸ ¿Ájazra na' dxendxu dxuluchálaje' dizra' cha cheędxu dxi'u? ⁹ Zradxu dxi'u nigá, nácadxu benne' xezr la xu Partia, ne benne' xezr la xu Media, ne benne' xezr la xu Elam, ne benne' xezr la xu Mesopotamia, ne benne' chee' xezre ca' zaj nababa Judea, ne benne' chee' naga nababa Capadocia, ne benne' chee' naga nababa Ponto, ne benne' chee' naga nababa Asia, ¹⁰ ne benne' chee' naga nababa Frigia, ne benne' chee' naga nababa Panfilia, ne benne' xezr la xu Egipto, ne benne' chee' xezr la xu Africa da zua dédedxa chee' xezre Cirene. Cá'anqueze zaj zra' benne' xezr la xu Roma nigá. Bal-la benne' Roma ca' zaj naque' benne' judío, benne' gulálaje' ca', ne benne' zaj nazi'e ca naca da nadxixruj bea chee' benne' judío ca'. ¹¹ Cá'anqueze nácadxu benne' xezr la xu Creta, ne benne' xezr la xu Arabia. Xúgutędxu dxendxu lu dizra' cha cheędxu dxuluchalaj benne' caní ca naca da zren ca' da dxun Dios.

¹² Xúgute' belexebánene', ne quebe zaj nézene' bi da dxaca na', na' gulenaba ljwezre' tue' xetúe':

—¿Bizra Zéaje da nigá?

¹³ Benne' xula ca' belún le', gulenné':

—Dxelezuzre benne' caní.

Da bchalaj Pedro lau benne' ca'

¹⁴ Nadxa guxasa Pedro nen benne' chinéaj gubáz chee Cristo, na' zizraj bchálajlene' bèneache zaj zra' na'. Dxe'e le':

—Le'e, benne' Judea, ne xúgutele le'e nazrágale xezre Jerusalén. Dخال-la' nézele le'e da nigá. Le xen xanne' ca naca da xapa' le'e. ¹⁵ Netu' quebe dxezúzrentu' ca dxéquele le'e. Za gudete xrsila na'a. Netú benne' quebe dxezúzrene' ca ná'queze. ¹⁶ Da nigá naca da gunnáqueze Joel, bènea' bchálaje' waláz chee Dios gate na' gunné':

¹⁷ Caní dxenná Dios: “Lu zra bzébe wasél-laqueza'

Be' Lá'azxa chia' chee súaleñe' xúgute bèneache.

Zrí'inele bi biu ne bi nu'ula welennéquezebe' waláz chia' neda'.

Bi cuide' ca' welelé'equezebe' ca da gulé'eda'-be'.

Na' benne' gula ca' welennéquezene' xela.

¹⁸ Ca lu zra na' guzuáqueza' Be' Lá'azxa chia' nen bi wen zrin chia' ca', benne' biu ne nu'ula ca', na' guchálajquezebe' waláz chia' neda'.

¹⁹ Lu be' zran xabáa gulé'equezda' xel-la' waca chia', na' lu xezr la xu dxe'ela gulé'eda' da xelunna bea na, dxen, ne xi', ne zren da naca ca beuj gasaj.”

²⁰ Gubizra xechul-la na,

na' beu' xexaca na xrna ca dxen

nedxu ca za zrin zra xelá' Xránadxu.

Zra na' gaca na tu zra chee da xebánedxu

ne zra na' walé'equezdXu xel-la' szren chee Dios.

²¹ Nadxa xeledá xúgute benne' ca'

xelenné' Xránadxu lu xel-la' dxeleajlí lazre' chee'.

²² 'Chee le' na', le'e, benne' Israel, le xen ca da xapa' le'e. Jesús, benne' Nazaret, guque' tu benne' bedxúaje' xrlátaje lau xúgutele le'e ne chee da ben Dios laule le'e. Lu na' Jesús Dios blé'engé' da zan da dxebánedxu, ne xel-la' waca ca', ne da dxelunna bea na ca ba nézqueze le'e. ²³ Gate Dios be'e lataj tu benne' bde'e Le' lu na'le le'e cáteze bache núnqueze' nedxu, nadxa le'e gudél-lale Le', na' bétele Le' gate na' bdele Le' lu na' benne' ca' dxeluné' da calela, benne' ca' buludé'e Le' xaga béguaj naga gutie'. ²⁴ Nadxa Dios bsebané' Le', bebéaje' Le' lu xel-la' gute. Quebe guxú'u ájala xegá'ane' chalásaze lu xel-la' gute na'. ²⁵ Ca naca da nigá bchalaj wenna' bea David ca naca chee Jesús na', gate gunné': Belé'equezda' Xrana' lawa' nigá.

Le' zué' cuita' xabela, chee quebe bi guchebe na neda'.

²⁶ Chee le' na' gubéle'eda', ne bil-la' lu xel-la' dxebé chia'.

Chee le' na' guxrén lázrequeza' Le' gate gatia',

²⁷ lawe' da quebe xucá'anaquezu' neda' lu lataj chee benne' gate.

Quebe güéquezu' lataj guzru bel-la' dxen chia' neda',

naca' benne' wen zrin chiu', ne benne' nazrí'inu'.

²⁸ Blé'equezenu' neda' ca dxal-la' guna' chee zrué'eda' xel-la' nabán,

na' gúnnale'u neda' xel-la' dxebé lawe' da zúaleñu' neda'.

²⁹ 'Le'e, bi bícha'dau'. Naca bea na gute xra xrtáudxu David, na' bulucache' le' lu xedxu ba chee' da zúaqueze na na'a nagá zúadxu. ³⁰ David na' guque' tu benne' bchálaje' waláz chee' Dios, ne gunézene' ca da nachebe lázrequeze Dios guné'. Gunné' lie' tu benne' zri'ine zre sua David na' gaque' Cristo, Bénnea' nna béaqueze', xeque'e lawe' chee' David. ³¹ Ca' guca, David nigá belé'equezne' nedxu ca naca da dxal-la' gaca chee' Cristo, na' bchálaje' ca guca gate bebán Cristo, gunné': "Benne' nigá quebe xegá'anaqueze' lataj chee' benne' gate, ne quebe gúzruqueze bel-la' dxen chee'." ³² Caní guca, Dios bsebané' Jesús nigá, na' netu' dxexechéentu' da li ca guca da nigá. ³³ Ca' guca, Dios bzue' Jesús lu xabáa chee' nen xel-la' waca chee', na' be'e Le' lataj gusel-le' Be' Lá'azxa chee' nigá ca nachebe lázrequeze' nedxu guné', na' xúgute da caní dxelé'ele le'e, ne dxenle zaj naca na da dxun Be' Lá'azxa na'. ³⁴ David na' quebe begüene' xabáa, san léqueze' guné':

Xránadxu Dios guzre' Xrana':

"Gudxe'e cuita' xabéla nigá

³⁵ ca zrindxa zra guzúa' benne' dxedábague' lue' chee' nna be'enu le'."

³⁶ Xúgutele le'e, benne' Israel, dxal-la' nézquezle da nigá: Jesús nigá, bénnea' bda'le le'e xaga béguaj, Dios ba nune' Le' Xránale ne Cristo cheele, Benne' guselé' le'e.

³⁷ Gate benne' ca' belenne' da nigá, na' belexewí'ine lazre', na' buluchebe' Pedro, ne benne' gubáz ca' chee' Jesús, dxelé'e le':

—Benne' bíchentu', ¿ájazra dxal-la' guntu' xca'?

³⁸ Nadxa gunná Pedro:

—Le xebí'i lazre' lau Dios, ne le chua nisa tu tule chee' gácale Jesucristo tuze, chee' gunité lau Le' cheele le'e ca naca dul-la da nabágale. Ca' gaca, nadxa Dios sél-laqueze' Be' Lá'azxa chee' chee' súalene' le'e. ³⁹ Da nigá nachebe lazre' Dios naca na cheele le'e, ne chee' zri'inele, ne chee' xúgute benne' zaj zre'e zitu', xúgute benne' ca' dxaca lazre' Dios nne'.

⁴⁰ Ca naca dizra' nigá, ne xezícaladxa dizra' da bchalaj Pedro, bzéajni'ine' benne' ca', na' gunné':

—Le la ládujla benne' wen da calela caní.

⁴¹ Ca'an guca, benne' ca' guléajle'e chee' da bchalaj Pedro belexedxúe' nisa, na' lu zra na' belaca tuze ca chi dxua gaxúa benne' nen benne' ca' ba dxeléajle'e chee' Jesús. ⁴² Na' xúgute benne' ca' gulezúa típaqueze' ca da dxulusede benne' gubáz chee' Jesús le', na' gulezúe' tuze nen le sa' ljwezre' chee' bululáwizre' Dios, ne buluzrague' chee' xelawe' da dxusá lázredxu ca guca gate gute Cristo.

Ca belún benne' nedxu ca', benne' guleajlí lazre' Cristo

⁴³ Xúgute benne' ca' gulezrebe' gate belelé'ene' xel-la' waca zante, ne da dxelunna bea na da dxelún benne' gubáz chee' Jesús. ⁴⁴ Xúgute benne' ca' dxeléajle'e chee' Jesús gulaque' tuze, ne bulunézruje' da de chee' tue' xetúe'. ⁴⁵ Belutié' xúgute da zaj nape', ne bulunézruje' dumí na' chee' benne' ca' ca da dxelexázejne'. ⁴⁶ Xugu' zra belexezrague' lu xudau', ne cá'aqueze lu lizre cha chee', chee' xelawe' da dxusá lázredxu ca guca gate gute Cristo. Gulawe' tu zrente lu xel-la' dxelebe', ne duté xel-la' dxelexruj lazre' chee'. ⁴⁷ Belúe lá'ane' Dios, na' xúgute bénneache guléquene' benne' ca' ba lá'ana. Tu zra tu zra Xránadxu bzane' benne' ca' chee' Cristo ca dxelezi' lu ne'e tu tue' Cristo.

3

Dxexaca tu benne' zrinnaj

¹ Tu zra xjaque' Pedro ne Juan lu xudau' dxexedá' chunna, da naca na gate dxululáwizraj bénneache Dios lu xudau'. ² Tu zra tu zra zua tu benne' na' naque' zrinnaj ca nálajte'. Dxeleché' benne' ljwezre' le' xudau' na', ne dxelebeche' le' dxu'a dxa xu'u na' nazí le na: Da Xrtante, chee nabe' guna' chee benne' dxelu'e na'. ³ Gate benne' zrinnaj nigá blé'eng' Pedro ne Juan, dxelu'e xudau', na' gunabe' guna' lau benne' caní. ⁴ Nadxa Pedro ne Juan gulenné'e le', na' Pedro guzre' benne' na':

—Gunná' netu'.

⁵ Benne' na' gunná' xánnie' le' lawe' da dxéquene' bi xulunezruje' le'. ⁶ Pedro guzre' le':

—Quebe bi de chia' dumí plata ne dumí oro. Da napa' gunna' lue'. Lu La Jesucristo, benne' Nazaret, guxasa gudá.

⁷ Nadxa Pedro guque'e na' benne' zrinnaj na' da zua xabela, ne bechise' le', na' ca bene' caní, belexezúa chacha ni'e, ne béchajdu chee' ca'. ⁸ Nadxa benne' zrinnaj na' guxrítie' tu, na' guzé, ne guzú lawe' dxedé'. Guxú'e nen benne' ca' xudau', dxedé', dxexrítie', ne dxue lá'ane' Dios. ⁹ Xúgute benne' zaj zre'e na' belelé'eng' le' dxedé', ne dxue lá'ane' Dios. ¹⁰ Belexebáne'e, ne belezrebe' ca' da belelé'eng' guca na, lawe' da zaj núnbe'e benne' zrinnaj na', ne zaj nézene' naque' bénnea' dxebe'e dxenabe' guna' ga dxelexú'u bénneache xudau', da na' nazí le na Da Xrtante.

Da bchalaj Pedro la chila da nazí le na La Chila Chee Salomón

¹¹ Benne' zrinnaj na', benne' ba bexaque', quebe bsane' na' Pedro ne Juan, na' xúgute benne' dxelexebáne'e, ne xjaque' naga nazí le na La Chila Chee Salomón, naga zaj zra' Pedro ne Juan. ¹² Gate ble'e Pedro da nigá, na' guzre' benne' ca':

—Le'e, benne' Israel, ¿bizr chee na' dxebénele le'e? ¿Bizr chee na' dxenná'le netu' caní, ne dxéquele netu' bexuntu' benne' nigá, na' dxexedé' ne chee xel-la' waca cheentu', u ne chee xel-la' benne' xudau' cheentu'? ¹³ ¡Cabí! Dios chee xra xrtáudxu Abraham, ne Isaac, ne Jacob bca'ana szrene' Zri'ing', Jesús, Bénnea' bdele le'e lu na' benne' xu'u lawe'. Gate guca lazre' Pilato gusané' Le', le'e quebe guca lázrele. ¹⁴ Bzúale chalá'ala Benne' na' naque' lá'azxa ne xrlátaje, na' gunábale la tu benne' wen da zrinnaj. ¹⁵ Ca'an guca, bétele le'e Bénnea' dxunne' bénneache xel-la' nabán, san Dios bsebané' Le' ládujla benne' gate, na' netu' dxexeché'entu' chee da nigá. ¹⁶ Guca lu La Jesús nigáqueze, u nnadxu guca na lawe' da guxéajle chee La Jesús, chee bezi' le dipa benne' nigá dxelé'ele, ne núnbeale le'. Lawe' da guxéajle'e chee Jesús, ba bexácatequeze' ca dxelé'ele le'e xúgutele.

¹⁷ Le'e, Bi bicha', nezda' gate le'e, ne benne' xíchaje ca' chee bétele Jesús, quebe guque be'ele ca da dxunle. ¹⁸ Dios bene' guca caní chee guca li ca da ba gunné' nédxute gate buluchalaj waláz chee' benne' ca', na' gulenné' dxal-la' si' saca Cristo chee Dios. ¹⁹ Chee le na', le xebí'i lázrele, ne le xexaca Dios tuze, chee xusule' dul-la nabágale. Nadxa Xránadxu Dios gunné' le'e lataj xexaca chawe' xíchaj lázrdaule. ²⁰ Sel-le' chee Jesús, Bénnea' guchebe lazre' sel-le' chee nédxudate. ²¹ Lu zra caní Jesucristo dxal-la' xegá'ane' xabáa cadxa gucá'ana chawe' Dios xúgute da dxaca, ca na' gunné' lu dxu'a benne' ca' buluchálaje' waláz chee' nédxudate. ²² Ca' naca na, lawe' da gunná Moisés, guzre' xra xrtáudxu ca': “Sel-la Xránadxu Dios chee tu benne' guchálaje'

waláz chee'. Gaque' tu benne' ládujla bi bíchele ca', na' sel-le' le' chee ca gusel-le' neda'. Le xen xanne' xúgute da xe'e le'e, ²³lawe' da welebía xi' xúgute benne' quebe xelapa Le' ba lá'ana, na' cuase' benne' ca' ládujla xezre Israel."

²⁴ Xúgute benne' ca', benne' buluchálaje' waláz chee Dios, guzú lau na gate zua Samuel, ne zeaj na, buluchálaje' chee zra caní. ²⁵ Le'e dxezile ca da gulenná benne' ca' buluchálaje' waláz chee Dios, ne nácale tuze lu xel-la' wezría da ben Dios nen xra xrtáule ca', ca guzre' Abraham: "Lu na' benne' zri'ine zre su' gaca chawe' chee xúgute bénneache zaj zre'e lu xezr la xu." ²⁶ Gate Dios bsebane' Zrí'ine', gusel-le' Le' nedxu laule le'e chee gaca chawe' chee, chee gusanle tu tule le'e da caleja da dxunle.

4

Pedro ne Juan dxelezrine' lau benne' xu'u lawe' ca'

¹ Pedro ne Juan ne dxuluchálajlene' benne' ca' gate belezrín na' bxruze ca', ne benne' xu'u lu ne'e bi xra'aga chee xudau', ne benne' saduceo ca'. ² Dxelezr'e' lawe' da dxulusede Pedro, ne Juan benne' ca', dxeleonné' welexebán benne' gate lawe' da bebán Jesús. ³ Nadxa gulel-le' Pedro ne Juan, na' guleché'e le' lizre xia ca zrindxa zra xula lawe' da ba dxezré' zra na'. ⁴ Guléajle' benne' zan ládujla benne' ca' belénne' da bchalaj Pedro, na' cátime benne' ca' dxeléajle'e chee Jesús zaj naque' ca gazxu' cue' chi gaxúa benne' biu.

⁵ Zra xula na' benne' xíchaje ca' chee judío ca', ne benne' gula sina ca', ne benne' ca' dxuluxuzáje'e da nadxixruj bea na, belezrague' lu xezre Jerusalén ⁶ nen Anás, bxruze blau, ne Caifás, ne Juan, ne Alejandro, ne xúgute benne' xrtia bxruze blau ca'. ⁷ Nadxa gulenná be'e xeajlexrí'e Pedro ne Juan, na' buluzé' le' laduj naga zaj zre'e, na' buluchébe' le':

—¿Bi xel-la' dxenná bea, u nu lu La dxunle da caní?

⁸ Nadxa Pedro, zúalequeze Be' Lá'azxa le', guzre' benne' ca':

—Le'e, benne' xíchaje ca' chee bxruze, ne benne' gula sina ca', ⁹ le'e dxuchébele netu' chee tu da chawe' da guca chee tu benne' we', chee nézele ájala guca bexaca bénnea'. ¹⁰ Dxuzentu' xúgutele le'e chee xeleneze xúgute benne' Israel, benne' nigá ze' lau xúgutele le'e, ba bexaque' lu La Jesucristo, Benne' Nazaret, Bénnea' bda'le le'e le'e xaga béguaj, na' Dios bsebane' Le' ládujla benne' gate. ¹¹ Jesús nigá naque' xiaj na', le'e, benne' wen xu'u bzúale chalá'ala, san na'a Léqueze' naque' xiaj blau chee xu'u. ¹² Quebe nu chilá' bénneache seque' guselé' dxi'u lawe' da quebe ne gunna Dios xetú La bénneache lu xezr la xu nigá, benne' séquene' guselé' dxi'u.

¹³ Gate benne' xu'u lawe' belelé'ene' Pedro ne Juan dxuluchálaje' du lazre', ne dxeleque bé'ene' quebe zaj nazédie' lu na' bxruze ca', san zaj naque' benne' zre'e cá'aze, na' belexebáne benne' xíchaje ca', san guleque bé'ene' zaj naque' benne' guledálene' Jesús. ¹⁴ Cá'anqueze bénnea' bexaque' ze' na' nen Pedro ne Juan, na' chee le' na' quebe gulezéquene' bi xelenné' chee'. ¹⁵ Nadxa gulenná be'e belexedxaj benne' gubáz ca' ládujla le'. Cate' belexegá'ana leze' buluchébe ljwezre', ¹⁶ dxeleonné':

—¿Ájazra gundxu chee benne' caní? Xúgute benne' zaj zre'e Jerusalén zaj nézene' belune' xel-la' waca zren nigá, na' quebe gaca tábagadxu na. ¹⁷ Na'a, chee québedxa zriluj da nigá lówela bénneache, guxrúsadxu benne' caní chee québedxa nu xuluchálajlene' lu La Jesús.

18 Nadxa gulenná be'e belexezrín Pedro ne Juan, na' gulenná bé'ene' le' québedxa nu xuluchálajlene', ne quebe nu xulusédene' lu La Jesús. 19 Pedro ne Juan belexechebe':

—Le nna' le'e che naca xrlátaje lau Dios guzúazrantu' xrtízrale le'e, quézcala xrtizra' Dios. 20 Netu' quebe gaca gusantu' gucháljantu' ca naca da blé'entu', ne da béntentu'.

21 Nadxa benne' xu'u lawe' ca' buluxruse' Pedro ne Juan, san bulusane' le'. Quebe belezrelne' ájala xelune' xuluzaca zi'e le' lawe' da dxelúe lá'ana xúgute' bènneache Dios ca naca da ba guca. 22 Bénnea' bexaque' ne chee xel-la' waca zren nigá ba gudé'e chua iza.

Benne' ca' dxeláje'e chee Jesús dxelenabe' lau Dios gunézruje' le' xel-la' dxuluxrén lazre'

23 Gate bulusane' Pedro ne Juan, benne' caní xjaque' naga zaj zra' benne' ljwezre', na' buluzenne' le' ca naca xúgute' da gulenná benne' xíchaje' ca' chee bxruze ca', ne benne' gula sina ca'. 24 Gate belenne' da caní, xúgute' buluchálajlene' Dios, gulenné':

—Xránantu', Lue' nacu' Dios. Benu' xabáa, ne xezr la xu, ne nísadau', ne xúgute' da zaj nnita lataj ca'. 25 Lue', lu na' Be' Lá'azxa, ne lu dxu'a David, benne' wen zrin chiu', gunnáu':

¿Bizr chee' na' dxelasa bènneache xezr la xu ca', na' bènneache dxelegú'u lazre' da quebe bi zaj zaca?

26 Benne' wenná bea ca' chee xezr la xu gulune' tuz, na' benne' blau ca' chee xezr ca' belezrague' chee xeledábage'e Xránadxu Dios, ne Cristo chee'.

27 Da li, Herodes. ne Poncio Pilato belezrague' lu xezre nigá nen benne' zitu' ca', ne nen benne' Israel ca', na' guledábage' Zri'inu' Lá'azxa, Jesús, Bénnea' bzúaquezu' Lue'. 28 Ca'an guca, benne' ca' belune' xúgute' ca da ba núnquezu' Lue' dxal-la' gaca na. 29 Na'a, Xran, gunná' ca dxuluxruse' netu', ne benna netu', wen zrin chiu' ca', xel-la' dxuxrén lazre' chee guchálajntu' xrtizru', ne quebe zrémentu', 30 ne benna netu' xel-la' waca chiu' chee gaca xexuntu' benne' we' ca', ne chee guntu' xel-la' waca chee xabáa lu La Zri'inu' Lá'azxa Jesús. ¡Ca'an gaca!

31 Gate bexuzre buluchálajlene' Dios, lu lataj naga zaj nazrague' guzrú', na' xúgute' guzúale Be' Lá'azxa le', na' buluchálaje' xrtizra' Dios duté xel-la' dxuluxrén lazre' chee'.

Xúgute' dxelune' tuze ca naca da zaj nape'

32 Benne' zan ca', benne' dxeláje'e chee Jesús gulaque' tuze lu xichaj lázrdawe'. Netúe' quebe gunné' cheeze' naca da nape'. Xúgute' da zaj nape' zaj nune' tuze. 33 Benne' gubáz ca' chee Jesús, nen duté xel-la' dxelenná bea buluchálajqueze' ca guca gate bebán Xránadxu Jesús, na' Dios bene' guca chawe' chee xúgute' benne' ca'. 34 Quebe nu guzúa ládujla benne' ca' bi bxárzjene' lawe' da caní belún xúgute' benne' zaj nape' xezr la xu ca' u xu'u ca'. Beluti'e na, na' belú'e dumí na', 35 ne xeajlenézruje' na lu na' benne' gubáz ca', chee xelexele'e na tu tu benne' ca' ca da dxelechínene'. 36 Zua ládujla benne' ca' tu benne' xrtia Leví le' José, benne' gúlaje' Chipre da naca tu xezr la xudau' naxechaj nísadau' le na. Benne' nigá, buluzúa gubáz ca' le' Bernabé, da zéaje na benne' dxexúe zrene'. 37 Benne' nigá beti'e tu xezr la xu da nape', na' bi'e dumí na', ne bnézruje' na lu na' benne' gubáz ca'.

5

Dul-la da belún Ananías ne Safira

¹ Xetú benne' le' Ananías nen zru'ule' Safira, bētie' tu xezr la xu chee'.
² Benne' nigá bequé'e late' dumí na', na' da begá'anaze bi'e lau benne' gubáz ca', ne gunné' ca naca na'. Zru'ule' ca naca na nézene'. ³ Nadxa guzre Pedro le':

—Ananías, ¿bizr chee na' be'u lataj Satanás guxú'u na lu xichaj lázrda'u chee si xe'u Be' Lá'azxa, na' beca'u late' chiu' ca naca da guzi'u chee xezr la xu na'?

⁴ ¿Quebe guca xezr la xu na' chiu'? Na' gate bētiu' na, ¿quebe guca dumí na' chiu'? ¿Ajazra guca benu' da nigá? Dios guzú xe'u, quegá bēneache.

⁵ Ca ben Ananías da nigá, na' guzré'e gútete'. Xúgute' benne' belén da nigá belezrébele'e. ⁶ Nadxa gulebiga bal-la bi cuide' ca', ne buluchélabē le' tu ladxē, na' belúabe' le' cheajlecáchebe' le' lu ba.

⁷ Ca guca chunna hora gudé na', guxú'u zru'ula Ananías na', ne quebe nézene' bi ba guca. ⁸ Pedro bchebe' le':

—Gunná, ¿bētele le'e xezr la xu na' ca dxennale guzile na?

Gunná Safira na':

—Awe', ca naca na'.

⁹ Nadxa Pedro guzre' le':

—¿Bizr chee na' benle le'e tuze dizra' gúquele si xele Be' Lá'azxa? Chale'aj na' ba zesí'aca bi ca' xeajlecáchebe' benne' chiu', na' na'a xelúatequezebe' lue'.

¹⁰ La' ná'queze nu'ula na' guzré'e gútete' zran ni'a Pedro. Gate belú'u benne' cuide' ca', na' belelé'ebe' le' ba gutie', na' belexebéajbe' le' xeajlecáchebe' le' cuita ba chee benne' chee'. ¹¹ Xúgute' benne' ca' zaj nazrague' na', ne xúgute' bēneache, benne' belén da caní belezrébele'e.

Benne' gubáz ca' dxelúnle'e xel-la' waca chee xabáa

¹² Benne' gubáz ca' belúnle'e xel-la' waca chee xabáa, ne da dxelunna bea na lau benne' ca', na' xúgute' belezrague' La Chila Chee Salomón, da naca na chee xudau'. ¹³ Netú benne' ca', benne' quebe dxeléajle'e chee Jesús, quebe belexázrene' gunē' benne' ca' tuze, san xúgute' bēneache belape' benne' caní ba lá'ana. ¹⁴ Benne' zandxa gulezú lawe' dxeléajle'e chee Xránadxu, benne' biu ne nu'ula ca'. ¹⁵ Ca' guca na, belebéajē' benne' we' ca', zaj de' lu da dxeláta'ne', ne da'a chee, na' gulíxrue' le' la neza ca' chee gate te Pedro na', na' te zrula chee' lawe' benne' ca'. ¹⁶ Ca'anqueze benne' xezre walizre ca' belelé'e lu xezre Jerusalén, zaj nu'e benne' we' chee' ca', ne benne' ca' zaj xu'e be' xriwe' ca', na' xúgute' belexaxque'.

Benne' gubáz ca' dxelu'e lizre xia

¹⁷ Nadxa bxruze blau, ne benne' saduceo ca' zaj zúalene' le', gulaque' xa lazre', ¹⁸ na' gulēl-le' benne' gubáz ca', ne buluzré'e le' lizre xia. ¹⁹ Na' tu gubáz chee xabáa chee Xránadxu gusalaje' dxa xu'u chee lizre xia na' chizrela, na' bebéajē' benne' ca', ne dxē'e le':

²⁰ —Le chjaca, ne le cheajsé lu xudau', ne le guzén benne' ca' ca naca chee xel-la' nabán cube nigá.

²¹ Ca belenne' da nigá, zra xula belú'e chila xudau' che zílala, na' gulezú lawe' dxulusédene' benne' zaj zre'e na'.

Dxácatē na', bxruze blau na', ne benne' zrálene' le', buluchague' benne' ca' chee xu'u lawe' blau, ne benne' gula sina ca' chee xezre Israel, na' gulenná be'e xellexebéajē' gubáz ca' zaj xu'e lizre xia. ²² Gate belezrín bi xra'aga

chee xudau' na, quebe nu belelé'eng' lu xu'u lizre xia, na' belexezrine', ne buluzenne' benne' ca', ²³ dxelenné':

—Gate bzrintu' lizre xia na', naxezxuj tipa na, na' benne' dxjaque' wedil-la zaj zré'ē dxu'a dxa xu'u na', ne dxuluxúē' na, san gate gusálajntu' na, quebe nu bezrélentú' lu xu'u na'.

²⁴ Gate bxruze blau, ne benne' xíchajē ca' chee bxruze ca', ne xíchajē chee bi xra'aga ca', belenne' da nigá, na' buluchebe ljwezre' ga cheajsé da nigá. ²⁵ La' ná'queze bzrin tu benne' guzre' le':

—Benne' ca' bzra'le le'e lizre xia zaj zré'ē lu chila xudau', dxulusédene' bēnneache.

²⁶ Nadxa benne' xíchajē chee bi xra'aga chee xudau' guxíajlēne' bi xra'aga ca', na' xeajlexrí'ē gubáz ca'. Quebe bi belúnene' le' lawe' da belezrebe' bi xelún benne' ca' dxelenne' chee gubáz ca', lawe' da dxeléquene' xelu'ē le' xiaj.

²⁷ Gate xeajlexrí'ē gubáz ca', na' buluzré'ē le' lau benne' xu'u lawe' blau, na' gunná bxruze blau na', dxē'ē benne' gubáz ca':

²⁸ —Netu' bzrúnantu' le'e quebe guchálajlēdxale bēnneache lu la bēnnea'. ¿Biza na' bēne? Ba bzenle ca naca benne' zaj zré'ē xezre Jerusalén ca naca da dxusédele, ne dxaca lázrele gusebágate netu' xel-la' gute chee benne' na'.

²⁹ Nadxa belexechebe Pedro, ne xezicadxa benne' gubáz ca':

—Dxala' guzúantu' xrtizra' Dios, quegá xrtizra' bēnneache. ³⁰ Dios chee xra xrtáudxu ca' bsebane' Jesús, Bēnnea' bētele le'e bda'ale Le' xaga béguaj. ³¹ Dios bca'ana szrene' Le' chalá'a xabēla chee', ne bēne' Le' Benne' Blau, ne Weselá, chee gata' lataj chee benne' Israel xelxebí'i lazre' chee gunite lau Dios dul-la chee'. ³² Chee le' na' netu' dxexechēbentu', ne cá'anqueze dxun Be' Lá'azxa. Dios dxunézruje' Be' Lá'azxa benne' dxuluzúē' dizra' chee'.

³³ Gate belenne' da nigá, na' belezré'ē, ne gulaca lazre' xelútíē' gubáz ca'.

³⁴ Ládujla benne' xu'u lawe' ca' zua tu benne' fariseo le' Gamaliel. Naque' benne' dxuxuzájle'ē da nadxixruj bea na, na' dxelápalē'ē bēnneache le' ba lá'ana. Benne' nigá guzé', na' gunná bé'eng' xelxebéaje' gubáz ca' chalé'ajla tu chí'idau'. ³⁵ Nadxa guzre' benne' xu'u lawe' ca':

—Le'e, benne' Israel, le' guxúe xanne' ca' gunle chee benne' caní. ³⁶ Le' gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácāle ca' tapa gaxúa benne' biu le'. Na' belutiē' le', na' xúgute' benne' ca' gulaca le' tuze belexase dinnaje' ca', na' gudé chee da na'. ³⁷ Gudé na', lu zra gate belú'u bēnneache xiche, na' bla' Judas, benne' Galilea, na' benne' zan xjácālēne' le'. Cá'anqueze belutiē' bēnnea', na' xúgute' benne' guledē'ē le' belexase dinnaje'. ³⁸ Chee le' na', le' gusán benne' caní, ne quebe guchixre chee'le nen benne' ca'. Che da nigá naca na da dxun beneácheze, wadé chee na. ³⁹ Che naca na da dxun Dios, quebe séquele le'e guzria xile na. Le' guxúe xanne' chee quebe til-lalele Dios.

⁴⁰ Xúgute' belexaque' tuze. Nadxa gulenná be'ē belú'u gubáz ca' da xula, na' ca' belú'u benne' ca', na' buluzrunē' le' québedxa nu xuluchálajē benne' ca' lu La Jesús. Gudé na' bulusanē' le'. ⁴¹ Na' benne' gubáz ca' belexedxúaje' naga zaj zra' benne' xu'u lawe' ca', dxelebé'ēne' lawe' da be' Dios lataj guledē' xel-la' zi' lawe' da zaj naque' Jesús tuze. ⁴² Quebe bulusanē' dxuluchálajē', ne dxulusédene' bēnneache ca' naca chee Jesucristo xúgute' zra, lu chila xudau', ne lu xu'u ca'.

6

Dxuluzúe' gazre benne' xelune' zrin chee benne' zaj de'e Cristo

¹ Lu zra ca', gate zaj dxan benne' ca' zaj de'e Jesús, na' benne' ca' dxelenné' dizra' griego gulawé' zria benne' ca' dxelenné' dizra' hebreo. Dxelenné' quebe nu dxunezruj xanne' da xeláw nu'ula ba gulate benne' chee' zaj zre'e ládujla le' gate dxelési'e' xel-la' wagu tu zra tu zra. ² Nadxa benne' gubáz ca' buluchague' ca naca benne' ca' dxeléajle'e' chee Jesús, na' gulé'e' le':

—Quebe naca xrlátaje gusantu' guchálajntu' xrtizra' Dios chee gudentu' xel-la' wagu. ³ Chee le' na', biche ljwézrentu', le quilaj gazre benne' lávela le'e, benne' zaj naque' du lazre', ne dxeléajni'ine', ne zúale Be' Lá'azxa le', na' le gusebague' zrin nigá. ⁴ Netu' tu guchálajlezquezentu' Dios, ne gusédentu' bènneache xrtizra' Dios.

⁵ Xúgute' gulaza lazre', na' gulequ'e' Esteban, tu benne' dxéajle'e' dute lázrdawe' chee Jesús, ne zúale Be' Lá'azxa le'. Cá'anqueze gulequ'e' Felipe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquia, benne' nédxute' hexaque' tuze benne' judío ca'. ⁶ Na' guleché'e' benne' canílau benne' gubáz ca', na' le' bululáwizre' Dios, ne buluzé ne'e lawe' benne' gazre caní.

⁷ Xrtizra' Dios zeaj dxezriluj na, na' benne' ca' dxeléajle' chee Jesús guxánle'e' lu xezre Jerusalén, na' bxruze zan chee judío ca' guléajle'e' chee'.

Dxelél-le' Esteban

⁸ Esteban, tu benne' nápale'e' xel-la' waca, ne naque' chawe' lau Dios, bèn'e' xel-la' waca ca' chee xabáa, ne da dxelunna bea na chee da ca' lau bènneache ca'. ⁹ Nadxa bal-la benne' chee xu'u naga dxelezraga bènneache ca', nazí le na Xu'u Chee Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' chee ga nababa Cilicia, ne Asia, gulezú lawe' dxulutíl-lalene' Esteban dizra'. ¹⁰ Quebe gulezéquene' bi xelenné' chee xrtizra' Esteban lawe' da bchálaje' nen dute xel-la' sina chee Be' Lá'azxa. ¹¹ Nadxa gulízruje' bal-la benne' ca' chee xelenné' belenne' gunné Esteban dizra' schanni' chee Moisés, ne chee Dios. ¹² Caní belune', ne gulu'e' xel-le' bènneache ca', ne benne' gula sina ca', ne benne' dxuluxuzájle'e' da nadxixruj bea na, na' gulebía di'e Esteban. Gulel-le' le', ne guleché'e' le' lau benne' xu'u lawe' blau. ¹³ Cá'anqueze gulíaj'e' benne' wen lazre' xelenné' chee Esteban, na' gulenné':

—Benne' nigá quebe dxusané' dxenné' schanni' chee xudau' lá'azxa nigá, ne chee da bdxixruj bea Dios. ¹⁴ Ba bentu' gunné' ca gun Jesús, benne' Nazaret, dxenné' guzría xi'e' xudau' nigá, ne guché'e' ca naca da zéajledxu da bca'ana Moisés.

¹⁵ Nadxa benne' xu'u lawe' ca', ne xúgute' benne' zaj zre'e' na', gate gulenné'e' Esteban, belelé'ene' lawe', naca na ca lau tu gubáz chee xabáa.

7

Dxexechebe Esteban lau benne' xu'u lawe' ca'

¹ Nadxa bxruze blau bchebe' Esteban:

—¿Zaj naca da li da caní?

² Na' Esteban bechebe':

—Le'e, benne' gula, ne le'e biche ljwezra', le xene. Xradxu zu'e' xabáa ble'e lawe' lau xra xrtáudxu Abraham gate ne zu'e' lu xezr la xu Mesopotamia, nédxudxa gate quebe ne xezé'e' cheajxezúe' xezre Harán. ³ Dios guzre' le':

“Bsan lázriu' ne xúgute xrtia ljwezru', na' guxíaj lu xezr la xu da gulé'eda' lue'.” ⁴ Nadxa Abraham guzé'e lu xezr la xu Caldea, xeajsúe' xezre Harán. Ca gudé gute xra Abraham, Dios guché'e Abraham lu xezr la xu nigá, naga zrale le'e na'a. ⁵ Dios quebe bi bné'zruje' chee Abraham naga sue' lu xezr la xu nigá, ne naga gune' lizre', san guchebe lazre' guné'zruje' le' xezr la xu nigá, na' gate te gate le', na' gaca na chee zrí'ine', lácala lu zra na' quebe ne galaj nu zrí'ine Abraham. ⁶ Cá'anqueze Dios guzre' le' xelexúa zrí'ine zre sue' ca benne' zitu' tu lu xezr la xu chee benne' xula, ne xelaque' benne' zaj nada'u, na' xuluzálaje' le' tapa gaxúa iza. ⁷ Cá'anqueze guzre Dios le': “Neda' chuga' ca gaca chee xezr la xu na' guchine na zrí'ine zre su', na' te na' xelexedxúaje' ga na', ne xelúe lá'ane' neda' lu xezr la xu nigá.” ⁸ Dios bene' tu xel-la' wezría nen Abraham, na' gunná bé'ene' le' chugu látedu weaj belá' chee benne' biu ca' lu bel-la' dxen chee', tu da guzúa chuchu na xel-la' wezría na'. Chee le' na' gate gulaj Isaac, zrí'ine Abraham, guchugue' látedau' belá' chee bel-la' dxen chee Isaac gate gúquebe' xrunu' zra, na' cá'anqueze ben Isaac chee zrí'ine', Jacob, ne cá'anqueze ben Jacob chee zrí'ine' ca', benne' ca' gulaque' xra chazrinnu cue' benne' Israel.

⁹ Zrí'ine Jacob na', benne' ca' zaj naque' xra xrtáudxu, gulaque' xa lazre' chee bi biche' José, na' belutié-be' chee chu'ube' lu na' benne' guchínene'-be' lu xezr la xu Egipto. Dios guzúalene' José, ¹⁰ na' bselé'-be' lu xúgute da zi' da xa'. Bné'zruje'-be' xel-la' dxéajni'i, na' ben Dios bezaca ba lázrele Faraón José na'. Faraón nigá guque' wenná bea lu xezr la xu Egipto, na' bzue' José gácabe' benne' xu'u lu ne'e xezr la xu Egipto na', ne benne' walizre Faraón na'.

¹¹ Nadxa guca gubina' du ca naca xezr la xu Egipto, ne ca naca xezr la xu Canaan, na' xra xrtáudxu ca' quebe bi belezrelene' da xelawe'. ¹² Gate ben Jacob de zrua' xtla lu xezr la xu Egipto, na' gusel-le' na' zrí'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto. ¹³ Da gudxupe' lasa xjaque' na', José ble'e lawe' benne' biche' ca', na' ca'an guca guneze wenná bea chee Egipto ga benne' José na'. ¹⁴ Nadxa José gunná bé'ene' xeajlexrí'e xre', ne ca naca xrtia ljwezre', zaj naque' ga xun chínue'. ¹⁵ Ca'an guca, Jacob xeajsúe' Egipto naga gutie', ne naga gulátequeze xra xrtáudxu ca'. ¹⁶ Ca gudé na' belú'e bel-la' dxen gate chee benne' ca' lu xezre Siquem, naga bulucache' le' lu ba da zua na lu xezr la xu na' da guzú' Abraham nen dumí da gudízruje' bi ca' zrí'ine Hamor lu xezre Siquem na'.

¹⁷ Gate ba zua gagu zra gaca li da guchebe lazre' Dios da na' ben chúchue' lau Abraham, na' benne' Israel zaj zre'e xezr la xu Egipto gulánle'e. ¹⁸ Nadxa guzú lau dxenná bea tu wenná bea lu xezr la xu Egipto, benne' quebe núnbe'e José. ¹⁹ Wenná bea nigá guzú xe'e benne' ljwézredxu, ne bzálaje' xra xrtáudxu ca', na' gunná bé'ene' le' cheajleca'ane'-be' bidu dxe'ene chee' ca' chee xelátebe'. ²⁰ Lu zra ca' gulaj Moisés, ne gúcabe' tu bidau' bezaca ba lazre' Dios cheebe', na' xra xrnabe' bulusegule'-be' lizre' chunna beu'. ²¹ Gate bzin zra xzal-la' cheajlega'ane'-be', na' bi nu'ula chee wenná bea na' bequé'e-be', ne bsegule'-be' ca zrí'inequeze'. ²² Chee le' na', Moisés guzédebe' ca naca xel-la' sina chee Egipto, na' gúcabe' tu benne' napé' xel-la' dxenná bea ca naca da gunné', ne da bene'.

²³ Gate bzrie' chua iza, Moisés guca lazre' cheajnné'e benne' ljwezre', benne' Israel ca'. ²⁴ Blé'ene' tu benne' Egipto dxu'e tu benne' Israel. Chee gúcalene' benne' na', ne chee bebéaj lazre' bénnea', betie' benne' Egipto na'. ²⁵ Moisés gúquene' benne' lazrie', benne' Israel ca', xelexe bé'ene' Dios

guselé' benne' ca' nē cheē lē'. Benne' ca' quebe guleque bé'engē' na. ²⁶ Zra xula Moisés blé'engē' chupa benne' Israel dxeledil-lē', na' lawe' da guca lazrē' xelezrá zriē' benne' ca', na' guzrē' lē': "Le'e nácale biche ljwézrele. ¿Bizr cheē na' dxue ljwézrele?" ²⁷ Nadxa benne' na' dxu'e benne' ljwezrē' bzrigue' Moisés, na' guzrē' lē': "¿Nu bzua lue' ca benne' xíchajē cheętu' cheē guchi'u ca da dxuntu?" ²⁸ ¿Dxaca lazru' gutiu' neda' ca bēnu' neaje, bētiu' benne' Egipto na?" ²⁹ Ca ben Moisés da nigá, na' bzrúnajē' zexíajē' lu xezr la xu cheē benne' Madián ca'. Na' guzúē' ca tu benne' zitu', na' bhaga ná'leņē' nu'ula, na' gulaj chupa zrí'ine'.

³⁰ "Ca gudē chua iza, gate zue' lē'e xixre' lawe' lataj da zua na gagu lu xi'a Sinaí, na' ble'e lau tu gubáz cheē xabáa lē' tu lu xi' da dxe' lu xeche' bisigá. ³¹ Moisés bzrebe' ca naca da blé'engē', san gate gubigūē' cheē le'e xánnēņ', benne' chi'i Xránadxu, dxennē': ³² "Neda' naca' Dios cheē xra xrtá'u ca', Dios cheē Abraham, ne Dios cheē Isaac, ne Dios cheē Jacob." Nadxa Moisés guzú lau dxezríziē' lu xel-la' dxezrebe, na' quebe bexázrjēņ' nņē'e. ³³ Xránadxu guzrē' lē': "Guleaj zrelu' xu'u ni'u lawe' da naca lá'azxa lataj naga dxelájaju. ³⁴ Neda' ba ble'eda' ca naca da dxelezaca zi' bēneache chia' zaj zrē'e lu xezr la xu Egipto. Dxenda' ca dxelebezre xache', ne ba bla'a cheē guselá' benne' ca'. Gudá lue', sel-la' lue' lu xezr la xu Egipto."

³⁵ 'Lácala benne' ca' buluzúē' Moisés chalá'ala, gulé'e lē': "¿Nu bzua lue' ca benne' xíchajē cheętu' cheē guchi'u ca da dxuntu?" Dios gusel-lē' lē' ca benne' xíchajē, ne benne' guselá lē', nē cheē gubáz cheē xabáa na' ble'e lawē' lē' lu xeche' bisigá. ³⁶ Moisés na' bebéajē' xra xrtáudxu ca' lu xezr la xu Egipto, ne bēņē' xel-la' waca ca', ne da gulunna bea na da bēņē' lu xezr la xu na', ne lu nísadau' Xrna, ne lē'e xixre' lawe' lataj da chua iza na'. ³⁷ Moisés nigáqueze guzrē' benne' Israel ca': "Dios sel-lē' tu benne' guchálajē' waláz cheē', benne' gálajē' ládujla xrtia ljwézrele le'e, ca gusel-lē' neda'. Cheē Lē' le xen." ³⁸ Cá'anqueze Moisés nigá, bēne' guzúale benne' ca' lē'e xixre' lawe' lataj, tu zren nen gubáz cheē xabáa na' bhálajlē' lē' lu xi'a Sinaí, guzúaleņē' xra xrtáudxu ca', ne guzi'e dizra' cheē xel-la' nabán cheē bdeē' na cheętu'.

³⁹ 'Xra xrtáudxu ca' quebe gulaca lazrē' xuluzúa dizra' cheē Moisés, san buluzúē' lē' chalá'ala, ne gulaca lazrē' xelexezrine' Egipto. ⁴⁰ Gate cabí zue' Moisés ga na' gulé'e Aarón: "Dxaca lázrentu' gunu' dios ca' cheē xelebía lawē' launtu', lawe' da quebe nézentu' bi guca cheē Moisés, bēne' bebéajē' netu' lu xezr la xu Egipto." ⁴¹ Nadxa beluņē' tu bedáu' guca na ca tu bēzredau', ne belutiē' bē xixre'du ca' lau bedáu' na', ne gulebenē' cheē da zaj nune'. ⁴² Nadxa Dios becuasē' nen benne' ca', na' bē'e lē' lataj belúe lá'ane' belaj zaj zria zran xabáa. Ca'an naxúaj na lu xiche cheē benne' ca' buluchálajē' waláz cheē Dios. Dxeleņné':

Le'e, benne' Israel ca', ¿guzríale-ba' chia' neda' bē xixre'du ca' bētele dutē chua iza gate na' guzúale lē'e xixre' lawe' lataj?

⁴³ ¡Cabí! Bíale xudau' xide zra bē xixre' cheē dios cheēle, Moloc, ne xudau' cheē belaj nazí le na Renfán, dios cheēle,

bedáu' ca' bēņquezle le'e cheē bē lá'anale na.

Cheē lē' na' cuéajaja' le'e lu xezr la xu cheēle,

ne sel-la' le'e dédedxa ca naga dxe' Babilonia.

⁴⁴ 'Lē'e xixre' lawe' lataj na' xra xrtáudxu ca' beluņē' tu xudau' xide naga buluzrá chawē' blaga' xiaj naga naxúaj da nadxixruj bea na. Beluņē' na ca naca da ble'e Dios Moisés, gate guzrē' lē' gūņē' na ca naca da na' ba blé'engē'.

⁴⁵ Zri'ine xra xrtáudxu ca' belexaca lu ne'e xudau' xide na', na' belú'e na gate belezrine' lu xezr la xu nigá nen Josué, chee belequé'e xezr la xu nigá lu na' benne' xezr la xu ca' zaj zre'e nigá, benne' ca' Dios bebéaje' le' chee bnézruje' xezr la xu nigá chee xra xrtáudxu ca'. Ca'an guca ca bzrinte' zra ca' zua David.

⁴⁶ Wenná bea David na', Dios bezaca ba lazre' chee', na' guca lazre' David guné' tu xudau' naga sua Dios chee Jacob. ⁴⁷ Salomón, zri'ine David, bene' lizre Dios na'. ⁴⁸ Dios szrente' quebe zu'e' lu xudau' ca' da zaj nun bénneache. Caní gunná tu benne' bchálaje' waláz chee Dios, gunné':

⁴⁹ Xabáa naca lataj naga dxe'a, na' xezr la xu naca na naga nuléaj ni'a.

¿Ájazra naca xu'u gunle le'e chia'? dxenná Xránadxu.

¿Ájazra naca lataj naga dxal-la' xezí' lazra'?

⁵⁰ ¿Quegá neda' bénqueza' da ca'?

⁵¹ Nadxa gunná Esteban:

—Le'e nácaquezle lázxdau zide', ne zria nágale, ne lázrdaule ca zaj naca chee benne' quebe zaj núnbe'e Dios, quebe dxezile xrtizre'. Dxedábagaquezle Be' Lá'azxa. Nácale ca gulaca xra xrtáule ca'. ⁵² Xra xrtáule ca' buluzría xi'e xúgute' benne' ca' buluchálaje' waláz chee Dios. Belutie' benne' ca' buluchálaje' nédxudauté ca dxal-la' gaca chee benne' xrlátaje nigá, na' gate blé'e, lé'equezle bdele Le' lu na' benne' ca' guledábague' Le', ne bétele Le'. ⁵³ Le'e guzile da nadxixruj bea na da benna gubáz chee xabáa dxi'u, san quebe dxuzúale dizra' chee na.

Dxelutie' Esteban

⁵⁴ Gate belén benne' ca' da caní, na' gulagu lazxe' lu xel-la' dxelezrá'a Esteban. ⁵⁵ Nadxa Esteban, zúale Be' Lá'azxa le', gunné'e xabáa, ne blé'ene' xel-la' szren chee Dios, na' Jesús ze' chalá'a xabəla chee Dios. ⁵⁶ Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bénneache ze' chalá'a xabəla chee Dios.

⁵⁷ Benne' ca' bulusézxuje' nague', na' gulebezre xe'e, ne xeajlechía che'e Esteban na'. ⁵⁸ Na' belebéaje' le' lu xezre na', naga belú'e le' xiaj. Na' benne' ca' gulenné' chee Esteban bulucá'ane' zra lané' lu na' tu benne' cuide' le' Saulo.

⁵⁹ Dxácaté dxuluzrié' le' xiaj, Esteban na' bláwizre' Dios, gunné':

—Xrana' Jesús, bezí' lu na'u be' nácaqueza'.

⁶⁰ Gudé na' bzu zribe', na' gunné' zizraj:

—Xran, quebe gusebagu' benne' caní dul-la nigá.

Ca bexuzre gunné' ca', na' gutie'.

8

Saulo dxenáu zi' xuzre' benne' ca' dxeléajle'e chee Jesús

¹ Saulo guque' tuze nen benne' ca' belutie' Esteban.

Lu zra ná'queze gulezú lawé' dxelau zi' xuzre' benne' ca' dxeléajle'e chee Jesús, benne' ca' zaj zre'e xezre Jerusalén. Xúgute' belexase dínnaje' ca naca zezre ca' zaj nababa Judea, ne zezre ca' zaj nababa Samaria. Benne' gubáz ca' belexegá'ane' xezre Jerusalén na'. ² Bal-la benne' ca' zaj naque' chee Dios bulucache' Esteban na', ne gulebézrele'e chee'. ³ Dxácaté na' Saulo dxenáu zi' xuzre' benne' ca' dxeléajle'e chee Jesús, na' guxú'e tu tu xu'u chee cheajxrube xue' benne' ca', ne cheajlu'e le' lizre xia.

Dxuluchálaje' dizra' chawe' chee Jesús naga nababa Samaria

⁴ Benne' ca' chee Cristo, benne' buluzrúnnuje' Jerusalén, buluchálaje' dizra' chawe' chee Jesús gáteteze na' zjaque'. ⁵ Felipe, tue' benne' ca', guxiáje' tu xezre naga nababa Samaria, na' guzú lawe' dxuchálajlene' benne' ca' ca naca chee Cristo. ⁶ Benne' ca' zaj nazrague' belén xánnene' ca da dxuchalaj Felipe, ne belelé'equezne' ca naca xel-la' waca ca' da dxunge'. ⁷ Benne' zan, benne' zaj xu'e be' xriwe' belexequa', na' be' xriwe' ca' belexedxúaj na lu xichaj lázrdau benne' ca', dxelebezre xa'a na, na' benne' zan benne' zaj zua zri ni'a ne'e, ne benne' zrinnaj ca' belexequa'. ⁸ Ca'an guca, gulebéle'e xúgute benne' ca' lu xezre na'.

⁹ Zua na' tu benne' le' Simón, nédxute guque' benne' wazrá', ne guzú xe'e benne' Samaria ca', dxenné' naque' tu benne' szren. ¹⁰ Xúgute' belén xánnene' chee', benne' cazraze ca', ne benne' blau ca', gulenné':
—Benne' nigá nape' xel-la' szren chee Dios.

¹¹ Gulape' le' ba lá'ana lawe' da lu xel-la' wazrá' chee' na' guzú xe'e benne' ca' zane' iza. ¹² Gate guléajle'e chee dizra' chawe' da dxuchalaj Felipe ca dxenná bea Dios, ne ca naca chee La Jesucristo, xúgute', benne' biu, ne nu'ula ca', beledxúe' nisa. ¹³ Cá'aqueze Simón na' guxéajle'e chee Jesús, ne gudxúe' nisa, na' guzú lawe' zéajlene' Felipe, na' dxexebánene' ca naca xel-la' waca da za xabáa da dxun Felipe.

¹⁴ Gate benne' gubáz ca' chee Jesús, benne' zaj zre'e Jerusalén, belenne' gulezí' lu na' benne' Samaria ca' xrtizra' Dios, na' gulesel-le' Pedro ne Juan na'. ¹⁵ Gate belezrine' na', na' belenabe' law Dios chee benne' Samaria ca' dxeléajle'e chee Jesús chee xelezí'e Be' Lá'azxa. ¹⁶ Quebe ne xida Be' Lá'azxa súalene' netú benne' ca'. Tuze beledxúaze' nisa lu La Xránadxu Jesús. ¹⁷ Nadxa Pedro ne Juan buluzé ne'e lawe' benne' ca', na' gulezí'e Be' Lá'azxa.

¹⁸ Gate ble'e Simón bla' Be' Lá'azxa gate gubáz ca' buluzé ne'e benne' ca', na' guca lazre' gunézruje' gubáz ca' dumí, ¹⁹ gunné':

—Le gunna neda' xel-la' waca nigá chee gate guzéa' na'a lawe' núteteze benne', na' si'e Be' Lá'azxa.

²⁰ Nadxa guzre Pedro le':

—Wabía xi' dumí chiu' na' nen lue' lawe' da dxéquenu' wazéquenu' ga'u nen dumí ca da dxúnnaze Dios. ²¹ Quebe naca chiu', ne quebe napu' lataj lu da nigá lawe' da quebe naca xrlátaje xichaj lázrda'u lau Dios. ²² Bsan ca naca da calela chiu' nigá, ne guta' xue Dios chee gunite lawe' chiu' ca da gúquenu' lu xichaj lázrda'u. ²³ Dxeque be'eda' nazrate xichaj lázrda'u da calela, na' da calela na' nuchéaj na lue'.

²⁴ Na' bechebe Simón:

—Le gata' xue Xránadxu chia' neda', chee quebe gaca chia' ca da gunnáu'.

²⁵ Ca gudé belexechebe' chee Jesús, ne buluchálaje' dizra' chee Dios, na' benne' gubáz ca' buluzenne' bénneache dizra' chawe' chee Jesús lu xezredu ca' zaj nababa Samaria, na' ca gudé na' belexezrine' Jerusalén.

Felipe dxuchálajlene' tu benne' chee xezr la xu Etiopía

²⁶ Gudé na' guzre tu gubáz chee xabáa chee Xránadxu Felipe:

—Guxasa, guxiáj chalá'a naga dxedé gubizra beu' zaga ca', naga zrua neza chee Jerusalén da zeaj xezre Gaza, da dxedé na le'e xixre' lawe' lataj.

²⁷ Felipe guxase', na' guz'é'e zéaje', na' la neza na' bezrague' tu benne' Etiopía. Benne' nigá naque' wizre, ne naque' benne' szren xu'u lu ne'e xel-la' gunní'a chee Candace, nu'ula na' dxenná bé'ene' xezr la xu Etiopía. Ba guxiáj

benne' nigá Jerusalén chee bē lá'anē' Dios. ²⁸ Na'a zexíajē' Etiopía na', dxe'e lu carreta chee' da dxelecá'a bzrina', ne dxulabē' xiche naga zaj naxúaj xrtizra' Isaías, benne' bchálajē' waláz chee Dios. ²⁹ Nadxa gunná Be' Lá'azxa, guzre' Felipe:

—Gubiga gagu cuita carreta na'.

³⁰ Gate gubiga Felipe na' benne' dxulaba bēnnea' xiche chee Isaías, na' bchebē' le':

—¿Dxéajni'inu' ca naca da dxulabu'?

³¹ Benne' biu na' guzre' le':

—¿Ájazra gaca chéajni'ida' che quebe nu chilá' guzéajni'i neda'?

Na' guzre' Felipe cuene' cué'lene' le'.

³² Naga dxulabē' lu xiche chee Dios dxenná na caní:

Belechē'e Le' naga gatiē' ca tu zrila'dau', na' ca zrila' na' dxátaba' zrize lau benne' ca' dxuluchibē' zraba', ca' bēnqueze Le', quebe bi gunné'.

³³ Bulucá'ana ditjē' Le', ne quebe belú'e lataj nu guchi'a chee', ne quebe nu gaca guchálajē' ca naca chee zri'ine zre suē', lawe' da belutiē' Le'.

³⁴ Na' benne' Etiopía na' bchebē' Felipe:

—Gunná, ¿nuzra chee dxenná benne' nigá, cheéqueze' na', che chee xetú benne' xula'?

³⁵ Nadxa guzú lau Felipe bzéajni'ine' le' ca naca naga dxulabē', ne bchálajlene' le' dizra' chawe' ca naca chee Jesús. ³⁶ Gate guledéē' tu naga de nisa, na' gunná benne' Etiopía na':

—Nigá de nisa. ¿Quebe gaca chua' nisa, zra'?

³⁷ Felipe guzre' le':

—Che dxéajle'u dutē lárda'u, waca.

Benne' na' bechebē':

—Dxéajle'a naca Jesucristo Zri'ine Dios.

³⁸ Nadxa gunná bé'ene' guleza carreta na', na' dxúpatē' gulu'e lu nisa, na' Felipe bchue' le' nisa. ³⁹ Gate belexedxúajē' lu nisa na', na' Be' chee Xránadxu beche'e Felipe naga xula. Benne' Etiopía na' québedxa blé'ene' le', na' bexu'e neza chee' dutē xel-la' dxebé. ⁴⁰ Felipe na' guque bé'ene' ba zue' xezre Azoto, na' gudéē' tu tu xezre dxuchálajē' dizra' chawe' ca naca chee Jesús cadxa bezrine' Cesarea.

9

Saulo dxexaque' benne' chee Jesús (Hch. 22.6-16; 26.12-18)

¹ Dxácatē' na' Saulo quebe dxusanē' dxunē' ba xuzre gutiē' benne' ca' dxeléajle'e chee Xránadxu. Chee gunē' caní guxíajē' xeajchálajlene' bxruze blau. ² Gunabē' xiche da dxulé'e na nape' xel-la' dxenná bea da gu'e chéajē' xudau' ca' zaj nnita xezre Damasco, chee séquene' cheajxedíajē' benne' ca' dxeléajle'e chee dizra' chawe' chee Jesús, ne che'e le', benne' biu, ne nu'ula ca', chee guzré'e le' lizre xia lu xezre Jerusalén. ³ Na' gate ne xu'e neza zéajē', ne ca ba zua zrinē' xezre Damasco, na' bsaní' tu xi' naga zéajē' da za' xabáa.

⁴ Saulo xeajcházie' lu xu, na' benne' chi'i tu benne' dxe'e le':

—Saulo, Saulo, ¿bizr chee na' nau zi' xuzru' neda'?

⁵ Nadxa Saulo bchebē':

—¿Nuzra Lue', Xran'?

Na' bénnea' bechebe':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca dxun bezre gate dxulíbeba' lawe' xágala da dxáduē'-ba'.

⁶Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' le':

—Guxasa, guxú'u lu xezre, na' xeléqueze' lue' da dxal-la' gunu'.

⁷Benne' ca' zjácale Saulo belezrébele'e lawe' da belenne' chi'i benne' na', san quebe nu belelé'ene'. ⁸Nadxa Saulo bexase' lu xu na', na' gate guxá' lawe', quebe guca lé'ene'. Ca' guca, belequé'e ne'e, ne guleché'e le' lu xezre Damasco. ⁹Guzúe' na' chunna zra quebe dxelé'ene', ne quebe bi güe'e gudawe'.

¹⁰Lu xezre Damasco na' zua tu benne' dxéajle'e chee Jesús le' Ananías, na' Xránadxu ble'e lawe' le' tu lu da ble'e le', na' guzre' le':

—Ananías.

Na' le' bechebe':

—Nigá zua', Xran.

¹¹Nadxa gunná Xránadxu, dxe'e le':

—Guxasa, guxíaj neza da nazí le na: Neza Li, na' lizre Judas guchebu' chee tu benne' Tarso, le' Saulo. Benne' nigá dxuláwizre' Dios. ¹²Tu lu da blé'ene', ba blé'ene' tu benne' le' Ananías chu'e guzé ne'e le' chee xelé'ene'.

¹³Gate benne' da nigá, na' gunná Ananías:

—Xran, benne' zan ba buluzenne' neda' chee benne' nigá, ne chee xúgute da calela da dxun'e chee benne' ca' dxeléajle'e chiu' Lue' lu xezre Jerusalén.

¹⁴Na'a blé'e nigá nape' xel-la' dxenná bea chee benne' xíchaje' ca' chee bxruze ca', chee che'e lizre xia xúgute benne' dxelenné' Dios lu Lau' Lue'.

¹⁵Na' Xránadxu guzre' le':

—Guxíaj. Neda' ba gucá'a benne' na' chee cheajzenne' benne' xezr la xu ca', ne benne' wenná bea ca', ne benne' Israel ca', ca naca chia' neda'. ¹⁶Neda' gulé'eda' le' ca naca da zanté da saque'e ne chia' neda'.

¹⁷Nadxa Ananías guzé'e zéaj'e xu'u naga zua Saulo. Gate guxú'e na', guxrúa ne'e lawe' le', na' guzre' le':

—Saulo, bicha'. Xránadxu Jesús, Bénnea' ble'e lawe' lue' la neza naga za'u, nasele' neda' chee xelé'enu', ne chee súale Be' Lá'azxa lue'.

¹⁸Ca' guca beléxrujte lu xiaj lawe' da zaj naca ca xrlacu bela, na' belé'ene'. Na' bexasa Saulo, ne gudxúate' nisa. ¹⁹Gudé na' gudawe', ne bedipe'. Begá'ane' tu chupa zra nen benne' Damasco ca' dxeléajle'e chee Jesús.

Saulo dxuchálaje' chee Jesús lu xezre Damasco

²⁰Nadxa guzú lau Saulo dxuchálaje' chee Jesús lu xu'u ga dxelezraga judío ca' zaj nnite' Damasco, dxenné' Jesús naque' Zri'ine Dios. ²¹Xúgute benne' belé'ene' chee' belexebánene', dxelenné':

—¿Quegá benne' nigá bénnea' gudáu zí' xuzre' benne' ca' zaj zre'e Jerusalén, benne' ca' dxelenné' Dios lu La Jesús? ¿Quegá lé'queze' na' blé'e nigá chee che'e benne' ca' xezre Jerusalén chee gudé'e le' lu na' benne' xíchaje' ca' chee bxruze ca'?

²²Saulo bcháajdxé' du lazre' chee Jesús, ne dxulé'ene' Jesús naque' Cristo chee Dios, na' bzua zri'e' benne' judío ca' zaj zre'e Damasco.

Saulo dxelé' lu na' benne' judío ca'

²³ Ca gudé zane' zra, benne' judío ca' belune' tuze dizra' xelútię' Saulo. ²⁴ Gunezne' le' da nigá. Te zra ne chizrela gulebeza benne' judío ca' dxu'a dxa xu'u ca' naga dxelexedxúaj bėnneache xęzre na', cheę xelútię' le'. ²⁵ Nadxa benne' ca' dxelėajle'ę cheę Jesús gulegú'ę Saulo tu lu xcuite lba zren, na' buluxulėtaję' le' chizrela le'ę ze'e da naxechaj na xęzre. Ca' guca, gulá Saulo.

Saulo dxezrine' Jerusalén

²⁶ Gate bezrín Saulo Jerusalén, guca lazre' gune' tuze benne' ca' dxelėajle'ę cheę Jesús, san benne' ca' dxelezrebe' le' lawe' da quebe dxelėajle'ę ba dxėajle'ę Saulo cheę Jesús. ²⁷ Bernabé guché'ę Saulo, ne bze' le' lau benne' gubáz ca' cheę Jesús. Na' bchálajle Bernabé gubáz ca' ba ble'e Saulo Xránadxu la neza, ne ca bėn Xránadxu bchálajle'ę Saulo, ne ca bchalaj Saulo du lazre' lu xęzre Damasco nen xel-la' dxenná bea cheę La Jesús. ²⁸ Nadxa Saulo begá'anę' Jerusalén, dxedálęne' benne' ca'. ²⁹ Bchalaj Saulo du lazre' lu La Xránadxu, dxuchálajle'ę benne' ca' dxelenné' dizra' griego, san benne' caní gulaca lazre' xelútię' le'. ³⁰ Gate guleque be'e biche lįwėzredxu da caní, na' guleché'ę Saulo lu xęzre Cesarea, na' lu xęzre na' gulesel-le' le' xęzre Tarso.

³¹ Nadxa benne' ca' dxelezrague' lu La Jesús tu tu xęzre zaj nababa Judea, ne Galilea, ne Samaria, gulebeza zri lazre', ne beledipa lazre'. Xel-la' dxelezrebe gulaque' Xránadxu tuze, na' lawe' da gúcale Be' Lá'azxa le', gulane'.

Pedro dxexunę' Eneas

³² Gate dxedá Pedro dxeajnné'ę biche lįwėzredxu ca', na' guxıajqueze' xea-jnné'ę benne' ca' dxelėajle'ę cheę Jesús lu xęzre Lida. ³³ Na' bezrague' tu benne' le' Eneas, bache guca xrunu' iza de' lu da'a lawe' da naque' benne' zrinnaj. ³⁴ Na' gunná Pedro, dxę' le'ę:

—Eneas, Jesucristo ba bexune' lue'. Bexasa, ne butube da'a chiu'.

Na' bexasatę Eneas na'. ³⁵ Belelé'e xúgutę benne' le', benne' zaj zre'ę xęzre Lida, ne xęzre Sarón, na' belexaque' cheę Xránadxu.

Dorcax dxexebanę' ládujla benne' gate

³⁶ Lu zra na' zua tu nu'ula le' Tabita lu xęzre Jope. Dxėajle'ę cheę Jesús. Lu dizra' griego le' Dorcas. Nu'ula nigá dxúnqueze' da xrlátaje, ne dxácalęne' benne' xache' ca'. ³⁷ Lu zra ca' guxú'u Dorcas xel-la' wę', na' gutię'. Na' bulugazję' le', ne belexrue' le' tu lu xu'u naga zua gudxupe' cuía dxala. ³⁸ Xęzre Jope na' zua na gagu naga zua xęzre Lida naga zua Pedro, na' lawe' da zaj neze benne' Jope ca' zue' na', na' gulesel-le' chupa benne' biu cheajlegęzre' le':

—Gudázega xęzre Jope.

³⁹ Nadxa Pedro guxıajle'ę benne' ca'. Gate bzrine' na', na' beleché'ę le' naga zrua Dorcas na', na' xúgutę nu'ula ca' ba zaj nate benne' chię' zaj naxėchaję' Pedro dxelebezre', ne dxululé'enę' le' zra nu'ula, ne zra benne' biu, da ca' bėn Dorcas na' gate ne zue' nen benne' ca'. ⁴⁰ Nadxa guleaj Pedro xúgutę benne' ca', na' bzu zribe' bchálajle'ę Dios. Na' gunné'ę nu'ula gate na', gunné':

—Tabita, bexasa.

Nadxa nu'ula na' bexá' lawe', na' gate blé'enę' Pedro, bexasę' gudxé'ę. ⁴¹ Na' Pedro bequę'ę ne'ę, bechise' le'. Nadxa gunné' biche lįwėzredxu ca', ne nu'ula ca' ba gute benne' biu cheę, na' blé'enę' benne' ca' le' naca banę'. ⁴² Ca guca da nigá belén ca naca benne' zaj zre'ę xęzre Jope, na' benne' zan gulėajle'ę

chee Xránadxu. ⁴³ Pedro begá'ang' zane' zra lu xezre na' lizre Simón, tu benne' dxucá'ana chawe' xide zra be xixre'.

10

Pedro ne Cornelio

¹ Zua lu xezre Cesarea tu benne' le' Cornelio, benne' dxenná be'e lu wedil-la tu cue' benne' nazí le na Benne' Ítalia Zjaque' Wedil-la. ² Benne' nigá, ne benne' zaj zre'e lizre' dxulucá'ana szrene' Dios, ne dxelezrebe' Le'. Cá'aqueze dxunézrujle'e dumí dxácalene' benne' judío ca', ne tu dxuchálajlezqueze' Dios. ³ Tu zra gate dxexedá chunna ble'e Cornelio tu da ble'e Dios le', na' blé'eng' cátequeze guxú'u tu gubáz chee xabáa naga zu'e, na' guzre' le':

—Cornelio.

⁴ Cornelio guzúe' dxenné'e gubáz chee xabáa na' duté xel-la' dxezrebe, na' bchebe' le':

—¿Bizra na', Xran?

Nadxa gunná gubáz chee xabáa, guzre' le':

—Dios ba benne' da dxuláwizru' Le', ne nézene' ca da dxunu' dxácalenu' benne' xache' ca'. ⁵ Gusel-la benne' chjaque' xezre Jope, cheajlenné' Simón, bénnea' léqueze' Pedro. ⁶ Zu'e lizre xetú benne' le' Simón, benne' dxucá'ana chawe' xide zra be xixre', na' zua lizre' dxu'a nísadau'. Pedro na' xe'e lue' ca da dxál-la' gunu'.

⁷ Gate bezá' gubáz chee xabáa na' bchálajlene' le', na' gunné Cornelio chupa bi wen zrin chee', ne tu benne' dxeje' wedil-la, ne dxape' Dios ba lá'ana, ne zúaqueze' lizre Cornelio na'. ⁸ Na' bchálajlene' benne' ca' ca naca da ba guca, na' ca gudé na' gusel-le' le' chjaque' xezre Jope.

⁹ Zra xula, dxácaté zaj xu'e benne' ca' neza, ne ba dxezrine' gagu naga dxe' Jope, na' guluén Pedro chju'u sibe du wagubizra chee guchálajlene' Dios. ¹⁰ Ba dxedúnle'e, ne guca lazre' gawe', na' dxácaté ne dxulucueze' da gawe', blé'eng' tu da ble'e Dios le'. ¹¹ Blé'eng' naxalaj xabáa, ne dxetaj lu xezr la xu da naca na ca tu ladxe' zren nadxéaj na dápaté la'a chee na. ¹² Lawe' ladxe' na' zaj zria xúguté cue' be xixre', be zria tapa ní'a na'ba', ne be snia ca', ne be zua xrila ca'.

¹³ Nadxa benne' tu chí'i benne' dxé'e le':

—Guxasa, Pedro. Bete tu bea ca' chee gagu'-ba'.

¹⁴ Pedro bechebe':

—Cabí, Xran. Neda' cabata' ne gawa' da quebe nun Dios gagu bénneache, ne quegá da naca na sban.

¹⁵ Benne' na' bchálajé' da xula, dxé'e le':

—Da ba nucá'ana chawe' Dios, quebe nnau' lue' naca na sban.

¹⁶ Da nigá guca na chunna lasa, na' ladxe' na' begüén na xabáala. ¹⁷ Dxácaté dxe' Pedro dxulaba lazre' bi zéaje ca naca da blé'eng', na' belezrín benne' ca' nase-la Cornelio dxu'a dxa xu'u, dxuluchebe' ga zua lizre Simón. ¹⁸ Gate belezrine' lizre Simón na', na' gulenné' zizraj, dxelenabe' che zua xu'u na' tu benne' le' Simón, bénnea' léqueze' Pedro. ¹⁹ Gate Pedro ne dxulaba lazre' ca naca da blé'eng', na' Be' Lá'azxa guzre' le':

—Gunná'xque, chunna benne' dxelexíajé' lue'. ²⁰ Guxasa, bexetaj. Guxíajle benne' ca', ne quebe gun chupa lazru' lawe' da nase-la' neda' benne' ca'.

²¹ Nadxa Pedro bexétaje' naga zaj zra' benne' ca' nase-la Cornelio, na' guzre' le':

—Neda' na' dxexíajle le'e. ¿Bizra chee za'le'?

²² Benne' ca' belexechebe':

—Za'ntu' waláz cheę Cornelio, benne' dxenná be'ę lu wedil-la. Naque' benne' xrlátaje, ne dxezrebe' Dios, na' xúgute benne' judío ca' dxelape' le' ba lá'ana, ne zaj nazrí'ine' le'. Tu gubáz cheę xabáa cheę Dios guzre' le' dxal-la' sel-le' benne' xedajlenné' lue' xidu' lizre' cheę xenne' ca da dxal-la' xu'u le'.

²³ Nadxa Pedro bzre'ę benne' ca' xu'u na', na' belexegá'ane' nen le' xela na'. Zra xula guxiáje Pedro benne' ca', na' xjácale bal-la biche ljwézredxu le', benne' zaj zre'ę Jope.

²⁴ Zra gudxupe' zra belezrine' xęzre Cesarea naga zua Cornelio dxebeze' le', ne zrale bal-la benne' xrtie' le', ne xezícadxa benne' ljwezre', benne' ca' gunné'. ²⁵ Gate bzrin Pedro chale'aj, bdxuaj Cornelio guzı' lu ne'ę le'. Bzu zribe' lau Pedro cheę gucá'ana szrene' le'. ²⁶ Pedro bechise' le', dxenné':

—Guzé. La gázqueze neda' naca' bėnneache ca lue'.

²⁷ Dxácate dxuchálaje Pedro Cornelio, gulu'ę lu xu'ula, na' blé'ene' benne' zan zaj nazrague' na'. ²⁸ Nadxa gunná Pedro, dxe'ę le':

—Nézquezle le'e quebe dxunna da nadxixruj bea cheę judío ca' neda' lataj gaca' tuze nen benne' quebe zaj naque' judío u chu'a lizre'. Na'a Dios ba blé'ene' neda' quebe dxal-la' nnia' cheę netú benne', quebe nnia' naque' sban, u naque' benne' quebe gapa' ba lá'ana. ²⁹ Cheę le' na', gate gulenné' neda', la guzá'tea', ne quebe ben chupa lazra'. Dxaca lazra' nezda' bi cheę na' gunnele neda'.

³⁰ Nadxa bechebe Cornelio:

—Ba zeaj tapa zra ca zúadxu na'a, zua' lizra' nigá dxuna' gubasa, ne dxuchálajena' Dios, gate ble'e lau tu benne' neda', nacuę' zra lanę' da dxácatite na. ³¹ Benne' na' guzre' neda': “Cornelio, Dios ba benne' da dxuchálajenu' Le', na' nézene' ca da dxunu' dxácalenu' benne' xache' ca”. ³² Gusel-la benne' chjaque' xezre Jope, cheajlexri'ę Simón, bėnnea' léqueze' Pedro. Zue' lizre xetú benne' le' Simón, benne' dxucá'ana chawe' xide zra be xixre' ca', na' zua lizre' dxu'a nisadau'. Gate xide' nigá, na' guchálajlene' lue'.” ³³ Ca'an guca, gusél-latea' benne' ca' bedajlexedilaje' lue', na' bėnu' da chawe' bla'u nigá. Na'a xúgantentu' zrantu' nigá lau Dios, ne dxaca lázrentu' xėnentu' xúgute ca da gunná be'e Xránadxu lue' guchálajlenu' netu'.

Da bchalaj Pedro lizre Cornelio

³⁴ Nadxa guzú lau Pedro dxuchálaje', dxenné':

—Na'a dxéajni'ida' Dios quebe dxebéaje' bál-laze bėnneache, ³⁵ Na' xúgute xęzr la xu Dios dxezí' lu ne'ę benne' ca' dxelezrebe Le', ne dxelune' da xrlátaje. ³⁶ Dios bchálajlene' zri'ine zre sua Israel ca', ne bchálaje' dizra' chawe' cheę xel-la' dxebeza zri lazre', da dxezidxu ne cheę Jesucristo, Bėnnea' naque' Xrana xúgute bėnneache. ³⁷ Le'e ba nézquezle ca naca da guca du ca naca lu xęzr la xu cheę benne' judío ca', da guzú lau na naga nababa Galilea ca gudé bchalaj Juan xrtizra' Dios, ne bchue' bėnneache nisa. ³⁸ Nézele ca ben Dios, bnézruje' Jesús, benne' Nazaret, xel-la' waca cheę Be' Lá'azxa, ne ca gudá Le' dxunę' da chawe', ne dxexunę' xúgute benne' dxelezaca zi'ę lu na' da xriwe'. Da nigá bėne' lawe' da guzúale Dios Le'. ³⁹ Netu' dxexechėbentu' cheę da canı, xúgute da ben Jesús naga nababa Galilea, ne da bėne' lu xęzre Jerusalén. Gudé na' belutie' Le', gate buludé'ę Le' xaga bėguaj, ⁴⁰ na' Dios bsebanę' Le' gate guca chunna zra, na' be'ę lataj ble'e lau Jesús netu'. ⁴¹ Quebe ble'e lawe' xúgute bėnneache, san launtu' nétu'ze, nácantu' benne' ca' guleaj Dios nédxudaute cheę xechėbentu' cheę da canı. Netu' güe'e gudáguntu' nen Le' gate gudé bebane' ládujla benne' gate. ⁴² Gusel-le' netu' guchálajlentu'

bénneache, ne xechébentu' ca da nun Dios, nuzúe' Jesús nigá chee' guchi'e chee benne' ban ca', ne chee benne' gate ca'. ⁴³ La gázqueze nédxudauté gulenná xúguté benne' ca' buluchálaje' waláz chee' Dios, buluchálaje' ca dxal-la' gaca chee' Jesús, gulenné' xúguté benne' xeléajle'e chee' Jesús, na' ne chee' Le' Dios gunite lawe' xtul-la benne' ca'.

Benne' quebe zaj naque' judío dxelezi'e Be' Lá'azxa

⁴⁴ Ne dxuchalaj Pedro gate bzrin Be' Lá'azxa bedajśualəne' xúguté benne' ca' dxelenne' da dxuchalaj Pedro. ⁴⁵ Benne' judío ca' dxeləajle'e chee' Jesús, benne' ca' zá'acaləne' Pedro, belexebəne' gate guleque bé'ene' ba zúale Be' Lá'azxa benne' ca' quebe zaj naque' judío. ⁴⁶ Dxeleque bé'ene' na lawe' da belenne' dxuluchalaj benne' ca' dizra' chee' benne' xula, ne dxelúe lá'ang' Dios. ⁴⁷ Nadxa gunná Pedro:

—¿Waca nnadxu quebe dxal-la' xeledxúa benne' caní nisa, benne' ca' bache gulezi'e Be' Lá'azxa ca bəntu' netu'?

⁴⁸ Nadxa gunná bea Pedro xeledxúa benne' ca' nisa lu La Jesucristo. Gudé na', benne' ca' gulata' xuene' Pedro xegá'ang' nen le' tu chupa zra.

11

Pedro dxuzenne' benne' gubáz ca' zaj zre'e Jerusalén ca naca da bene'

¹ Benne' gubáz ca', ne biche ljwézredxu ca' zaj zre'e Jerusalén belenne' ba gulezi' lu na' benne' quebe zaj naque' judío dizra' chee' Dios. ² Gate bezrin Pedro xezre Jerusalén, gulezi' tizra' benne' ca' le', benne' ca' dxelenne' dxal-la' chugu late' bəla' chee' benne' ca' zaj naque' chee' Dios. ³ Benne' caní buluchəbe' Pedro:

—¿Bizr chee' na' guxiaju' xeajśualənu' benne' ca' quebe zaj naque' judío, ne gudəgulənu' le'?

⁴ Nadxa Pedro bzenne' benne' ca' xúguté da guca cha chee' na, gunné':

⁵ —Neda' zua' lu xezre Jope, na' gate dxuchəajləna' Dios, ble'eda' tu da ble'e Dios neda'. Ble'eda' tu ladxe' zren nadxəaj dápate' la'a chee' na, da dxetaj na xabáa, ne bedajśe' na lawa'. ⁶ Gate gunná' xánnia' chee' ble'eda' bi na' zaj zria na lawe', ble'eda' bə xixre', bə zria tapa ni'a na'ba', ne bə snia ca', ne bea ca' zaj zua xrílabá'. ⁷ Na' bənda' tu chi'i benne' guzre' neda': "Guxasa Pedro, bəte tu bea ca', na' gagu'-ba'." ⁸ Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu' bənnəache, ne quegá da naca sban. ⁹ Nadxa bənnea' dxenné' xabáa gunné' neda' da xula, na' guzre' neda': "Da ba nucá'ana chawe' Dios, quebe nnau' lue' naca na sban." ¹⁰ Da nigá guca na chunna lasa, na' ca gudé na' xúguté da ca' belexegúen na xabáa. ¹¹ Lu zra ná'queze beledá' chunna benne' lu xu'u naga zua', benne' ca' gusel-la tu benne' zua Cesarea chee' zedajlexedilaj neda'. ¹² Be' Lá'azxa gunná bé'ene' neda' chəajləna' benne' ca', ne quebe gun chupa lazra'. La gázqueze gusiá'calə xrupa benne' biche ljwézredxu caní neda'. Xúgutəntu' guxú'untu' lizre tu benne'. ¹³ Le' bchəajləne' netu' ca blé'ene' lizre' tu gubáz chee' xabáa, zə ni'e, ne guzre' le': "Gusel-la benne' chjaca xezre Jope chee' cheajlenné' Simón, benne' léqueze' Pedro. ¹⁴ Benne' nigá xe'e lue' aja gunu' chee' lau' lue', ne xelələ xúguté benne' zaj zre'e lizru'." ¹⁵ Gate guzú lawa' dxuchəajləna' benne' ca', na' bzrin Be' Lá'azxa guzúaləne' benne' ca', ca blə'e guzúaləne' dxi'u nédxudauté. ¹⁶ Nadxa xeajśá lazra' ca gunná Xránadxu, gunné': "Da li Juan bchue' bənnəache nisa, na' gaca chee'le da zéaje' xel-la' dxedxúa nisa, súale Be'

Lá'azxa le'e." ¹⁷ Che Dios bnézruje' chee benne' ca' ca benne' dxi'u, guxéajle'dxu chee Xránadxu Jesucristo, ¿nuzra naca' neda' chee tábaga' Dios?

¹⁸ Nadxa gate biche ljwézredxu ca' zaj zre'e Jerusalén belenne' da caní, na' gulezúa zrie', ne gulezú lawe' dxelúe lá'ane' Dios, dxelenné':

—Ca' naca, la gázqueze dxunna Dios lataj benne' quebe zaj naque' judío xelexebi'i lazre' chee xezezi'e xel-la' nabán zeajlí canna.

Benne' dxeléajle'e chee Jesús zaj zre'e xezre Antioquía

¹⁹ Gate belutié' Esteban, na' belau zi' xuzre' xezícala benne' dxeléajle'e chee Jesús, na' bal-le' buluzrúnajé', xjaque' xezre Fenicia, ne lu xu Chipre, ne xezre Antioquía. Gate belezrine' lataj ca', na' buluchálajé' dizra' chee Jesús lau benne' judío cá'aze, ne quegá lau benne' quebe zaj naque' judío. ²⁰ Nadxa bal-la benne' dxeléajle'e chee Jesús, benne' Chipre, ne benne' Cirene, belelé'e xezre Antioquía, na' buluchálajlene' benne' ca' quebe zaj naque' judío, ne buluzenne' le' dizra' chawe' ca naca chee Xránadxu Jesús. ²¹ Xel-la' waca chee Xránadxu guzúale na benne' ca', na' ca'an guca, benne' zan belexexaque' chee Xránadxu.

²² Gate belén benne' ca' da nigá, benne' dxeléajle'e chee Jesús zaj zre'e Jerusalén, na' gulesel-le' Bernabé xezre Antioquía. ²³ Gate bzin Bernabé na', blé'ene' ca da chawe' da dxun Dios chee benne' ca', na' gubelé'ene'. Na' bsízrene' xúguté benne' ca' chee xezezúa chúchue' lu da naca chee Xránadxu. ²⁴ Bernabé naque' benne' xrlátaje, na' zúale Be' Lá'azxa le', ne duté lázrdawe' dxéajle'e chee Jesús. Ca'an guca, ne chee le' guléajle benne' zan chee Xránadxu.

²⁵ Gudé na' guxíaj Bernabé xezre Tarso, zeajxedíajé' Saulo, na' gate bezrelne' le', beché'e le' Antioquía. ²⁶ Gulezúe' na' tu iza naxá' nen benne' ca' dxeléajle'e chee Jesús, na' bulusédené' benne' zan. Lu xezre Antioquía na' guca na da nedxu gulé'e benne' ca' dxeléajle'e chee Xránadxu, Benne' Cristiano.

²⁷ Ca lu zra ca', bal-la benne' dxelenné' waláz chee Dios besía'que' Jerusalén, xjaque' Antioquía. ²⁸ Tu benne' ca' le' Agabo guzé' lówela biche ljwézredxu ca', na' ca da bnezruj Be' Lá'azxa le', gunné' waca tu gubina' zren du ca naca xezr la xu, na' gubina' nigá guca na gate naca Claudio benne' dxenná bé'ene' ca naca xezr la xu Roma. ²⁹ Nadxa benne' ca' dxeléajle'e chee Jesús, benne' zaj zre'e Antioquía belún zi' lazre' xelesel-le' da gácale na biche ljwézredxu zaj zre'e xezre ca' zaj nababa Judea, ca da xezezeque' tu tue' xulunézruje'. ³⁰ Ca'an belune', na' belesel-le' tu guna' lau benne' gula ca' chee Cristo zaj zre'e Judea, na' Bernabé ne Saulo belú'e na na'.

12

Dxelutié' Jacobo ne dxelegú'e Pedro lizre xia

¹ Lu zra ca' guzú lau wenna bea Herodes nau zi' xuzre' bal-la benne' ca' dxeléajle'e chee Jesús. ² Gunná bé'ene' belutié' Jacobo, biche Juan nen xia nalá. ³ Gate ble'e Herodes dxelexezaca ba lazre' benne' judío ca' ca naca da bene', na' gudél-le' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj chee xeta xtila. ⁴ Ca gudé gudél-le' Pedro, na' gulu'e le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúe' Pedro lau benne' xezre ca' te laní. ⁵ Ca'an guca xu'u Pedro lizre xia

naga dxuluxúe xánnië' lë', na' benne' biche lĵwézredxu ca' buluchálajlequeze' Dios du lazre'.

Dios dxuselë' Pedro lizre xia

⁶ Dxëla xanne' ca za chani' zra xula gate dxal-la' guzúa Herodes lë' lau benne' xezre ca', Pedro dë' dxásie' laduj chupa benne' dxjaque' wedil-la, nadxéajë' chupa du xia, na' xebal-la benne' dxjaca wedil-la zaj zrë'e dxu'a dxa xu'u dxuluxúe' lizre xia na'. ⁷ Nadxa ble'e lau tu gubáz cheë xabáa cheë Xránadxu, na' ca naca lizre xia na' guxani'. Na' gubáz cheë xabáa na' bte' lë'e Pedro, ne bsebane' lë', na' guzrë' lë':

—Guxásache.

Ca'an guca, du xia ca' belexexezre na na' Pedro. ⁸ Na' gunná gubáz cheë xabáa na', guzrë' lë':

—Besí lë'u, ne buléaj zrelu'.

Gate bexuzre bën Pedro da na', na' guzre gubáz cheë xabáa na' lë':

—Guxrúa xicha chiu' cuxru', ne gudále neda'.

⁹ Pedro bedxúajë' cuzru gubáz cheë xabáa na', ne quebe nézenë' che naca da li che cabí ca da dxun gubáz cheë xabáa na'. Dxéqueñë' dxelë'eng' tu da dxulé'e Dios lë'. ¹⁰ Belexedéë' naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a dxa xu'u xia da dxedxuaj zeaj la nézala, dxa xu'u na' lëze na bçalaj na. Belexedxúajë', na' ca gudé besía'que' belezrine' xetú neza xula cheë xezr na', na' bca'ana gubáz cheë xabáa na' lëze'. ¹¹ Nadxa guque be'e Pedro ba bedxúajë', na' guzá' lazrë', gunné': Na'a dxelé'eda' naca na da li. Xrana' gusel-lë' gubáz cheë xabáa cheë' cheë bselé' neda' lu na' Herodes, ne lu xúgutë da gulaca lazre' judío ca' xelunë' chia'.

¹² Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalëñë' Pedro. ¹³ Gate gunné Pedro dxu'a dxa xu'u na', bzrin na' tu bi nu'ula lëbe' Rode zeajnabe' nu na'. ¹⁴ Gate bexúnbeabe' chi'i Pedro, quebe gusalajbe' dxa xu'u. Xel-la' dxebé cheëbe' zexíaj chégube' naga zaj nazraga benne' ca' cheë zeajézrebe' benne' ca' zë Pedro dxu'a dxa xu'u. ¹⁵ Nadxa benne' ca' gulé'ë bi nu'ula na':

—Nadá xichaj lázrda'u.

Bi nu'ula na' bën chúchube' xrtízrabe'. Benne' ca' gulenné':

—Quebe lë' na'. Be' guxu'ë na'.

¹⁶ Dxácatë na' zë Pedro tu dxennézqueze' dxu'a dxa xu'u. Na' gate gulesálajë', ne belelé'eng' Pedro, na' belexebánenë'. ¹⁷ Pedro guchisa ne'ë cheë xelezúa benne' ca' zrize, na' bchálajlëñë' benne' ca' ca bën Xránadxu bebéajë' lë' lizre xia. Na' guzrë' benne' ca':

—Le guzén Jacobo, ne biche lĵwézredxu ca' ca naca da nigá.

Nadxa bezé'ë zexíajë' naga xula.

¹⁸ Gate guxani', gulezúalë'ë stëbe benne' dxjaque' wedil-la ca' lawe' da quebe zaj nézenë' aja guca cheë Pedro. ¹⁹ Herodes gunná bé'eng' xelexilaj benne' dxjaca wedil-la Pedro, na' lawe' da quebe belexezrelne' lë', na' gunáb xánnië' benne' dxjaque' wedil-la bi guca, na' gudé na' gunná bé'eng' xelate benne' ca' dxjaque' wedil-la. Ca gudé na' guzá' Herodes xezre ca' zaj nababa Judea, guxíajë' xeajsúë' xezre Cesarea.

Dxate Herodes

²⁰ Herodes dxezré'e benne' ca' zaj zré'e xezre Tiro, ne xezre Sidón. Benne' chee xezre ca' beluné' tuze dizra' chee cheajlé'e cuine' lau Herodes na'. Beluné' Blasto benne' ljwezre'. Naque' tu benne' blau chee wenná bea Herodes, na' gulesel-le' le' lau Herodes na' chee nabe' le' sua zri ca naca da dxaca chee Herodes nen benne' ca'. Caní beluné' lawe' da nédxuté dxelagu benne' xezre Tiro, ne Sidón da guzá' xezre Cesarea naga zua Herodes. ²¹ Nadxa Herodes bzue' tu zra xelezrín benne' ca' lawe'. Lu zra na' Herodes gucue' zra lane' da zácale'e, na' gudxé'e lataj blau chee', ne bchálajlene' benne' zan ca'. ²² Nadxa benne' zan ca' gulezú lawe' dxelenné' zizraj:

—¡Benne' nigá dxuchálaje' quebe naque' beniácheze! ¡Dios na'!

²³ Zra na'te tu gubáz chee xabáa chee Xránadxu gulu'e Herodes tu xízrawe' lawe' da guzi'e xel-la' ba lá'ana da dxal-la' si' Dios, na' guzré'e bzuga', ne gútete'.

²⁴ Bzriluj dizra' chawe' chee Xránadxu, na' benne' ca' buluchálaje' ca naca na gáteteze na'.

²⁵ Gate belezúe Bernabé, ne Saulo zrin dxeluné' lu xezre Jerusalén, be-siá'que' xezre na', zaj naché'e Juan, bi na' léquezebe' Marcos.

13

Bernabé ne Saulo dxelezú lawe' dxeledé' dxuluchálaje' dizra' chee Dios

¹ Ládujla benne' ca' zaj nazraga chee Cristo lu xezre Antioquia zaj zra' benne' ca' dxelenné' waláz chee Dios, ne benne' ca' dxulusédené' bénneache xrtizra' Dios. Ládujla benne' caní zaj zua Bernabé, ne Simón, bénnea' léqueze' benne' gasaj, ne Lúcio, benne' xezre Cirene, ne Manaén, benne' gúlalébe' Herodes, benne' xu'u lu ne'e xezr la xu Galilea na', ne Saulo. ² Tu zra gate benne' caní zaj zré'e dxelúe lá'ane' Dios, ne dxeluné' gubasa, Be' Lá'axza gunné':

—Le cueaj Bernabé, ne Saulo chee xeluné' zrin na' da gunnéa' le' xeluné'.

³ Chee le' na', ca gudé buluchálajlene' Dios, ne beluné' gubasa, na' buluzé ne'e lawe' benne' ca', ne buluzé' le' dizra'.

Dxupa benne' gubáz ca' dxuluchálaje' dizra' chee Dios lu xezr la xu Chipre

⁴ Gudé na', ca gusel-la Be' Lá'axza le', na' Bernabé, ne Saulo xjaque' xezre Seleucia naga gulu'e tu lu da dxedá lawe' nísadau' chee chjaque' lu xezr la xu da naxechaj nísadau' da nazí le' na Chipre. ⁵ Gate belezrine' na', na' belexedxúaje' lu da dxedá lawe' nísadau' naga zua xezre Salamina, na' gulezú lawe' dxuluchálaje' dizra' chee Dios lu xudau' ca' chee benne' judío ca'. Juan zéajléquezebe' gubáz ca' chee gácalebe' le'. ⁶ Na' guledé' xúgute' xezredu ca' da zaj nnita lu xezr la xu na', na' belezrine' xezre Pafos. Na' belexezrague' tu benne' judío le' Barjesús, naque' benne' wazrá'. Naque' tu benne' wen lazre' dxenné' dxuchálaje' waláz chee Dios. ⁷ Benne' wazrá' nigá zue' nen Sergio Paulo, benne' xu'u lu ne'e xezr la xu na', ne naque' benne' sina. Benne' xu'u lu ne'e xezr la xu na' gusel-le' benne' xeajnné' Bernabé, ne Saulo lawe' da dxaca lazre' xenne' dizra' chee Dios. ⁸ Na' benne' wazrá' na', léqueze' Elimas gudábage' gubáz ca' lawe' da guca lazre' quebe chéajle chee Jesús benne' xu'u lu ne'e xezr la xu na'. ⁹ Nadxa Saulo, bénnea' léqueze' Pablo, zúale' Be' Lá'axza le', gunná' dxugüé' le', ¹⁰ na' guzré' le':

—Guzrí xé, benne' wen da calela. Zri'ine da xriwe', ne benne' dxusezxiu xrneza xúgute' bénneache. ¿Bizr chee na' quebe dxusanu' dxusézxuju' neza

chee benne' ca' dxelaca lazre' chjácáleñe' Xránantu'? ¹¹ Na'a, Xránantu' gudé' lue' ba xa'. Xegá'anu' la chul-la, na' tu chí'iqueze quebe le'enu' xel-la' naxani' chee gubizra.

Benne' na' guzúe' lu da chul-la, na' guzú lawe' dxílaje' nu xecá'a ne'e lawe' da québedxa dxel'e'ene'. ¹² Gate ble'e benne' xu'u lu ne'e xezr la xu na' da nigá, na' guxéajle'e chee Jesús lawe' da bebánene' ca naca da dxusede Pablo ca naca chee Xránadxu.

Pablo ne Bernabé dxelezrine' xezre Antioquia da nababa xezr la xu Pisidia

¹³ Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' belezrine' xezre Perge da nababa na xezr la xu Panfilia. Lu xezre na' Juan bsanbe' gubáz ca', na' bexíajbe' xezre Jerusalén. ¹⁴ Gudé na' gubáz ca' besía'que' Perge, na' belezrine' xezre Antioquia da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee judío ca', na' gulebé'e. ¹⁵ Nadxa, ca gudé bululabe' lu xiche naga naxúaj da bdxixruj bea Moisés, ne da gulenná benne' ca' buluchálaje' waláz chee Dios, na' benne' xíchaje ca' chee xudau' na' gulesel-le' benne' xeajezre' Pablo, ne Bernabé:

—Le'e, biche ljwézrentu', che nápaie dizra' da guzéajni'ile netu', waca nnele na na'a.

¹⁶ Nadxa Pablo guxase', na' guchisa ne'e chee xelezúa zri benne' ca', na' gunné':

—Le xene le'e, benne' Israel, ne le'e dxezrébele Dios. ¹⁷ Dios chee xezre Israel guqu'e' xra xrtáudxu ca', na' bene' benne' ca' tu cue' benne' zanté gate ne zaj zre'e ca benne' zitu' ca' lu xezr la xu Egipto, na' ca gudé na' bebéaje' le' lu xezr la xu na' duté xel-la' waca chee'. ¹⁸ Dios bchaga lawe' benne' ca' chua iza le'e xixre' lawe' lataj, ¹⁹ na' bzria xi'e gazre cue' bénneache gulezúa lu xezr la xu Canaán, chee bnézruje' xra xrtáudxu ca' xezr la xu chee benne' ca'. ²⁰ Gudé na', lawe' tapa gaxúa xu gachaj iza gunná be'e Dios benne' ca' lu na' benne' ca' buluchi'e chee', cadxa bzrin zra zua Samuel, benne' bchálaje' waláz chee Dios. ²¹ Nadxa benne' ca' gulenabe' Dios sua tu benne' gaque' wenná bea chee', na' Dios bzue' wenná bea tu benne' le' Saúl, zri'ine Cis, tu benne' chee tu cue' benne' judío zaj naque' zri'ine zre sua Benjamín. Saúl nigá guque' wenná bea lawe' chua iza. ²² Gudé na' Dios begü'e Saúl lataj chee', na' bzue' David gaque' wenná bea chee', na' chee benne' nigá gunné': “Nezda' David, zri'ine Isai, naque' tu benne' dxune' da dxezaca ba lazra', ne gune' xúgute da dxaca lazra'.” ²³ Tu benne' zri'ine zre sua David nigá naca Jesús, bénnea' bzua Dios chee guselé' benne' Israel ca', ca ba guchebe lazre' chee David. ²⁴ Nédxudxa gate za xida Jesús, Juan bchálajene' ca naca benne' Israel ca', guzre' benne' ca' dxal-la' xelexebí'i lazre', ne xelexedxú'e nisa. ²⁵ Na' gate ba za cheajsé chee Juan, na' gunné': “Neda' quebe naca' bénnea' dxéquele naca', san ca te chia' neda' za xetú benne' quebe naca chia' neda' cuéaja' zrele' da xu'u ni'e.”

²⁶ Le'e, biche ljwezra', zri'ine zre sua Abraham, ne le'e dxezrébele Dios. Dios nasel-le' chee dizra' nigá chee lala. ²⁷ Benne' ca' gulezrá' Jerusalén, ne benne' blau chee' ca', quebe belexúnbe'e nu na' Jesús, ne quebe guléajni'ing' dizra da buluchalaj benne' ca' buluchálaje' waláz chee Dios da dxelenne' xúgute zra dxulupá'ane'. Ca' guca, benne' ca' belún líqueze' ca naca da naxúaj na chee Jesús gate gulechugue' chee' gatié'. ²⁸ Lácala quebe belezrelné' tu da nabaga Jesús chee xelútié' Le', gulenabe' lau Pilato nna bé'ene' gatie'. ²⁹ Nadxa, gate gudé belune' xúgute da naxúaj na lu xiche chee Dios ca naca

da dxal-la' gaca chee Jesús, na' buluxulétaje' Le' xaga béguaj, ne bulucache' Le'. ³⁰ Nadxa Dios bsebane' Le' ládujla benne' gate. ³¹ Lu zane' zra Jesús ble'e lawe' benne' ca' guledálenē' Le' gate bezé'e Galilea dxeaje' Jerusalén, na' na'a, benne' caní dxelexechebe' ca' naca chee' lau bénneache.

³² Cá'anqueze netu' dxuzénentu' le'e dízra' chawe' ca' naca da guchebe lazre' Dios lau xra xrtáudxu ca'. ³³ Ben lie' ca' naca da guchebe lazre' cheedxu dxi'u, nácadxu zri'ine zre sua benne' ca', gate bsebane' Jesús, ca' naxúaj gudxupe' salmo, dxenné': "Lue' nacu' zri'ina'. Neda' bzua' Lue' na'a." ³⁴ Dios blé'eng' gusebane' Le' ládujla benne' gate, chee quebe guzru bel-la' dxen chee' gate gunné' lu xiche chee': "Gunna' le'e da chawe' da guchebe lazra' lau David." ³⁵ Cá'anqueze dxenné' xetú' lu salmo: "Quebe gu'u lataj guzru bel-la' dxen chee' wen zrin chiu', bi nazri'ite lazru'." ³⁶ Da li David bene' zrin chee' benne' ca' zaj zre'e gate zua le', ca' gunná be'e Dios le', san ca' gudé' na' gutié', na' bulucache' le' naga belegache xra xrtawe' ca', na' guzru bel-la' dxen chee'. ³⁷ Quebe guzru bel-la' dxen chee' Bénnea' bsebán Dios Le'. ³⁸ Biche ljwezra', dxuzenda' le'e, dxal-la' nézele Dios gunite lawe' chee' dul-la' cheele ne chee' Jesús. ³⁹ Ne chee' Le', xúgute' benne' dxelejil' lazre' Le', Dios dxunite lawe' chee' benne' ca' ca' naca xúgute' da quebe guca gunite lawe' chee' lálala belunē' ca' naca da bdxixraj be'e Moisés. ⁴⁰ Le' guxúe xanne' cuínale chee' quebe gaca chee' ca' naca da buluzúaj benne' ca' buluchálaje' waláz chee' Dios, gate gulenné':

⁴¹ Le' nna', le'e, benne' wen la, ne le' xebane, ne le' xenite, lawe' da guna' neda', Dios cheele, lu zra cheele,

tu da naca da zrente, da quebe chéajlele lálala nu guzén le'e.

⁴² Gate Pablo ne benne' ljwezre' ca' belexedxúaje' lu xudau' chee' judío ca', na' benne' ca' quebe zaj nálaje' judío gulenabe' le' guchálajlene' le' chee' da caní gate zrin xetú' zra dxulupá'ane'. ⁴³ Gate belexedxúaje' lu xudau' na', benne' zan benne' judío ca', ne benne' ca' belexaque' judío, ne dxelunē' da naca chee' Dios, xjálalene' Pablo ne Bernabé. Gubáz caní buluzéajni'ine' benne' ca' dxal-la' xelezúa chache' lu xel-la' zri'i lazre' chee' Dios.

⁴⁴ Guledé xrunu' zra gate naca zra dxulupá'ane', belezraga ca' nácaqueze benne' zaj zre'e xezre na' chee' xelenne' dízra' chee' Dios. ⁴⁵ Gate benne' judío ca' belelé'ene' benne' zantē zaj nazrague' na', na' belaque' xa lazre' ne gulezú lawe' dxelenné' chee' da dxenná Pablo, ne gulenné' schanni' chee'. ⁴⁶ Nadxa Pablo ne Bernabé gulenné' du lazre', gulé'e benne' judío ca':

—Ben na' ba xen bzénentu' le'e nedxu dízra' chee' Dios, le'e nácale judío, san lawe' da quebe dxaca lázrele xénele, ne da dxunle dxulé'e na' quebe naca cheele gápale xel-la' nabán zeajlí canna, chee' le' na' chéajntu' na'a chálajlentu' benne' quebe zaj naque' judío. ⁴⁷ Caní guntu' lawe' da caní gunná bea Xránadxu gate gunné':

Bzua' Lue' ca' tu xi' da gusení na' benne' xezr la xu ca',

ne chee' gacu' weselá chee' bénneache zaj zre'e ca' naca xezr la xu.

⁴⁸ Gate belenne' da nigá, benne' quebe zaj naque' judío gulebé'ene', na' gulezú lawe' dxelenné' xrlátaje naca dízra' chee' Xránadxu, na' guléajle xúgute' benne' ca' ba nabéaj Dios chee' xelape' xel-la' nabán zeajlí canna. ⁴⁹ Ca' guca, bzriluj dízra' chee' Dios du ca' naca lu xezre ca' zaj nababa na'. ⁵⁰ Benne' júdiu ca' buluchálajlene' bal-la' nu'ula blau ca' zjálalene' da dxulusédenē' chee' Dios, ne benne' biu' blau ca' chee' xezre, na' gulegú'u xel-le' benne' ca' chee' xeláu zi' xuzre' Pablo, ne Bernabé, ne chee' xuluxulague' le' naga nababa na'.

⁵¹ Nadxa gubáz ca' belexebibe' bxrte xu da zeajzria na' zrele' da dxulé'e na'

zaj nabaga benne' ca' zria, na' xjaque' lu xezre Iconio. ⁵² Gulebéle'e benne' zaj zre'e Antioquia na', benne' dxelájl'e chee Jesús, zúale Be' Lá'azxa le'.

14

Da belún Pablo ne Bernabé lu xezre Iconio

¹ Gate belezrin Pablo ne Bernabé xezre Iconio, na' belú'e tu zrente lu xudau' chee judío ca', na' ca buluchálaje' dizra' chee Dios, benne' zante guléajle'e chee Jesús, benne' judío ca', ne benne' quebe zaj naque' judío. ² Nadxa benne' judío ca', benne' quebe dxelájl'e chee Jesús belegú'u xel-le' benne' quebe zaj naque' judío chee xelecuídene' biche ljwézredxu ca'. ³ Lácala belune' caní, benne' gubáz ca' gulezúaqueze' na' zane' zra, ne du lazre' buluchálaje' dizra' chee Dios, dxuluxrén lazre' Xránadxu, na' Xránadxu bzua chúchue' ca da dxelenná benne' gubáz ca' ca naca xel-la' zri'i lazre' chee Dios, na' Le' bnézruje' gubáz ca' xel-la' dxenná bea xelune' xel-la' waca ca' chee xabáa ne da dxelunna bea na naca da li da dxelenné'. ⁴ Benne' ca' zaj zre'e xezre na' gulaque' chupa la'a. Bal-le' beledé'e judío ca', na' xebal-le' beledé'e gubáz ca' chee Jesús. ⁵ Nadxa benne' judío ca', ne benne' quebe zaj naque' judío belune' tuze dizra' nen benne' xu'u lawe' ca' chee gulenné' schanni' chee benne' gubáz ca', na' gulaca lazre' xuluzríe' le' xiaj. ⁶ Pablo ne Bernabé, gate belenné' ca', buluzrúnnaje' zjaque' naga zaj dxe' xezre Listra, ne xezre Derbe, da zaj nababa Licaonia, na' guledé'e ca naca xézredu ca' chee xezre ca' zaj nababa na', ⁷ na' buluchálaje' na' ca naca dizra' chawe' chee Jesús.

Dxuluzríe' Pablo xiaj lu xezre Listra

⁸ Lu xezre Listra zua tu benne' nazrinnaj ni'e. Dxe'e na' lawe' da gúlaje' nazrinnaj ni'e, ne quebe dxácaqueze se'e. ⁹ Benne' nigá dxenne' da dxuchalaj Pablo, na' Pablo gunné'e benne' zrinnaj na', na' guque bé'ene' nape' xel-la' dxeajlí lazre' chee xexaque'. ¹⁰ Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'. ¹¹ Gate belelé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca bénneache ba belelé'e naga zúadxu.

¹² Dxelenné' naca Bernabé dios Júpiter, ne naca Pablo dios Mercurio lawe' da dxuchálajqueze Pablo. ¹³ Na' bxruze chee dios Júpiter, zua xudau' chee na ca dxú'udxu xezre na', guché'e beze ca' ne xiaj zaj nuzé'e na du, na' bxruze na', ne benne' zan ca' gulaca lazre' xuluxucá'ana szrene' benne' gubáz ca', ne xelútie' beze ca' lau benne' gubáz ca' ca dxelúnqueze benne' xezre Listra na' chee dios chee'. ¹⁴ Gate guleque be'e Bernabé ne Pablo, benne' gubáz ca', na' gulecheze' zra lané' da dxulé'e na dxelezrebe' bi gun Dios, na' gulu'e lávela benne' ca', dxelenné' zizraj:

¹⁵ —Le'e, benne', ¿bizr chee na' dxunle da nigá? Netu' nácantu' bénneache ca lé'equeze, ne za'ntu' nigá chee xentu' le'e dxal-la' gusanle québedxa gunle da caní da quebe bi zaca na, ne chéajlele chee Dios ban, Bénnea' bene' xabáa ne xezr la xu, ne nísadau', ne xúguté da de lu'ule na. ¹⁶ Lu iza da ba guledé Dios be'e lataj xúguté bénneache guledé' lu xrneza cha chee, na' belune' ca da gulaca lazre', ¹⁷ lácala blé'eqezne' benne' ca' nu naca Le' ne chee da chawe' da dxune' chee benne' ca'. Le' dxusel-la' xiuj cheedxu ne ca naca lina xrtante, ne dxunne' da dxechínedxu da gágudxu, ne chee bedxu.

¹⁸ Lácala gulenná gubáz ca' da nigá, gúcale'ē na sṭebe buluzague' benne' ca' chee quebe xelutiē' beẓr ca' lau lē' chee xuluxucá'ana szrene' lē'.

¹⁹ Gudé na' belezrín bal-la benne' judío, benne' Antioquía, ne benne' Iconio, na' belegú'u xel-lē' bēnneache ca', na' buluzríe' Pablo xiaj. Guléquene' ba belutiē' Pablo, na' gulezrube xue' lē' belebéajē' lē' xezre na'. ²⁰ Gate benne' ca' dxeléajlē' chee Jesús belezrague' zaj naxéchéjē' naga de' Pablo, na' bexasa lē', ne bexu'e xezre na', na' zra xula bezá'lene' Bernabé, zjaque' xezre Derbe.

²¹ Ca gudé bchálaje' dizra' chawe' chee Jesús lu xezre Derbe, naga benne' zante gulezí' lu ne'e dizra' chee Dios, na' gubáz ca' belexedéē' xezre Listra, ne xezre Iconio, ne xezre Antioquía. ²² Lu xezre caní belún chache' lázrdau benne' ca' dxeléajlē' chee Jesús, ne bulusízrene' lē' chjácalēne' da naca chee Dios, dxelē' lē':

—Benne' xelu'e naga dxenná bea Dios, xel-la' zi' zrentē xeledéē'.

²³ La gázqueze buluzúe' benne' gula ca' chee xuluxúe' tu tu cue' benne' ca' dxeléajlē' chee Jesús, na' ca gudé na' buluzré'e benne' ca' lu na' Xránadxu, Bēnnea' ba guléajlē' chee'.

Pablo ne Bernabé dxelexezrine' lu xezre Antioquía da nababa Siria

²⁴ Ca gudé na' belexedéē' naga nababa Pisidia, na' belezrine' naga nababa Panfilia. ²⁵ Buluchálaje' dizra' chee Dios lu xezre Perge, na' ca gudé na' xjaque' xezre Atalia. ²⁶ Na' belexú'e da dxedá lawe' nísadau', na' belexezrine' xezre Antioquía, naga zaj zra' benne' belegu'e gubáz ca' lu na' Dios chee xelunē' zrin na', da ba belezuene' na'a. ²⁷ Gate belezrine' Antioquía na', na' bulutupe' benne' ca' dxeléajlē' chee Jesús, ne buluzenne' benne' ca' xúgute da ba ben Dios, bchínene' gubáz ca', ne ca ben Xránadxu, be'e benne' quebe zaj naque' judío lataj xeléajlē' chee Jesús. ²⁸ Na' Pablo, ne Bernabé belexegá'ane' na' zane' beu' nen benne' ca' dxeléajlē' chee Jesús.

15

Gubáz ca' chee Jesús dxelexezrague' Jerusalén

¹ Ca lu zra ca', bal-la benne' gusiá'que' xezre ca' zaj nababa Judea, ne belezrine' xezre Antioquía na', na' gulezú lawe' dxelē' biche ljwézredxu ca' dxal-la' chugu late' weaj belá' chee bel-la' dxen chee benne' biu ca' chee xelélé', ca gunná bea Moisés. ² Pablo ne Bernabé bulutíl-lalē' lē' dizra', na' naga xeajche'te na, biche ljwézredxu ca' buluzúe' Pablo, ne Bernabé, ne xezícala benne' ca' chee chjaque' Jerusalén chee cheajlechéálaje' chee da nigá nen benne' gubáz ca', ne benne' gula ca' chee cue' benne' dxeléajlē' chee Jesús zaj zre'e Jerusalén.

³ Benne' dxeléajlē' chee Jesús, benne' zaj zre'e Antioquía, belexegu'e benne' caní neza, na' belexedéē' xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xezredu ca' ca belún benne' quebe zaj naque' judío, ba belexexaque' chee Dios, na' xúgute biche ljwézredxu belebéle'ene' gate belenne' da nigá.

⁴ Gate Pablo ne Bernabé belexezrine' Jerusalén, na' benne' ca' dxeléajlē' chee Jesús ne benne' gubáz ca', ne benne' gula ca' gulezí' lu ne'e lē', na' Pablo ne Bernabé buluzenne' lē' ca naca da ben Dios lu na' lē'. ⁵ Bal-la benne' fariseo ca', benne' ba guléajlē' chee Jesús, gulezé' gulenné':

—Dxun na ba xen chugu late' weaj bela' chee bel-la' dxen chee benne' biu ca', benne' ba guléajle'e chee Jesús, benne' quebe zaj naque' judío, ne nna be'edxu le' xuluzúe' dizra' da bdxixruj be'e Moisés.

⁶ Nadxa belezraga benne' gubáz ca' ne benne' gula ca', benne' dxeléajle'e chee Cristo, chee xulucá'ana chawe' da na' dxaca. ⁷ Ca gudé buluchálajle ljwezre' chee da nigá, na' Pedro guxase', ne guzre' benne' ca':

—Biche ljwezra', nézquezle le'e Dios guqué'e neda' nédxute ládujla le'e chee guzenda' benne' quebe zaj naque' judío dizra' chawe' ca naca chee Jesús, chee xeléajle benne' ca' chee Le'. ⁸ Dios nézene' ca naca da xu'u lu xichaj lázxdau bénneache, na' blé'ene' dxezí' lu ne'e benne' ca', lawe' da bnéruzje' benne' ca' Be' Lá'azxa ca bene' cheedxu dxi'u. ⁹ Dios quebe dxuché'e ca zrí'ine' tudxu xetudxu lawe' da bca'ana cháwequeze' lázxdau benne' ca' guleajli lazre' Jesús. ¹⁰ Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxeléajle'e chee Jesús, da quebe gaca gúadxu dxi'u, ne quebe guca xelúa xra xrtáudxu na? ¹¹ Na'a, dxéajledxu dxi'u bache naladxu ne chee xel-la' zri'i lazre' chee Xránadxu Jesús, ne cá'anqueze zaj nalá benne' ca'.

¹² Nadxa xúgute' gulezúa zrie', ne buluzé nague' dxácaté dxuchalaj Pablo ne Bernabé ca naca da ben Dios, bene' da zan da dxelunna bea na naca li xrtizre' nen xel-la' waca ca' da za xabáa, da ca' bene' lu na' Pablo ne Bernabé lávela benne' ca' quebe zaj naque' judío. ¹³ Gate bexuzre buluchálaje', na' gunná Jacobo:

—Biche ljwezra', le xene chia'. ¹⁴ Simón Pedro bzenne' dxi'u ca ben Dios, be'e lataj benne' ca' quebe zaj naca judío xelexexaque' chee' da nedxu lasa, bequé'e ládujla benne' ca' bénneache xelexexaque' chee'. ¹⁵ Da na' guca naca na tuze nen da buluzúaj benne' ca' buluchálaje' waláz chee Dios, da na' naxúaj na lu xiche chee Dios, dxenné':

¹⁶ Te nigá xelá'a

na' xechisa' ca naca lizre David da nazre'e.
Gucá'ana chawa' da nagá'ana chee na,
na' xechísaqueza' na,

¹⁷ chee xelexilaj xúgute' benne' xezica ca' Xrane' Dios,
ne cá'anqueze xelún xúgute' benne' zaj zra' xezr la xu ca',
benne' ca' xelenne' chee La' neda'.

¹⁸ Ca' dxenná Xránadxu, blé'ene' da nigá nédxudauté.

¹⁹ Chee le' na' dxapa' le'e quebe dxal-la' gunle zede benne' quebe zaj naque' judío, benne' ca' dxellexexaque' chee Dios. ²⁰ Dخال-la' guzúajntu' chee benne' ca' dxal-la' xulusane' da naca chee bedáu' xaga ca' u bedáu' xiaj, ne quebe dxal-la' xelune' dul-la chee da dxucá'ana sban bénneache, ne quebe dxal-la' xelawe' bela' chee be xixre', be quebe bdxuaj dxen, ne quebe dxal-la' xelawe' dxen cheeba'. ²¹ Caní dxal-la' xelune' lawe' da ca ni'i zaj zra' benne' tu tu xezre, benne' dxuluzenne' bénneache ca naca da bdxixruj bea Moisés, da na' dxululabe' lu xudau' ca' chee benne' judío ca' tu tu zra ca' dxulupá'ane'.

²² Nadxa benne' gubáz ca', ne benne' gula ca', ne xúgute' benne' dxeléajle'e chee Jesús belune' tuze dizra' xelequé'e bal-la benne' ca' ládujla le' ne xelesel-le' le' xezre Antioquía nen Pablo, ne Bernabé. Belequé'e Judas, béneae' léqueze' Barsabás, ne Silas. Chupa benne' caní zaj naque' benne' blau ládujla biche ljwézredu ca'. ²³ Bulugüé'e benne' ca' tu xiche da dxenná na: "Netu', benne' gubáz zrantu' nigá, ne benne' gula zrantu' nigá, ne biche ljwézrele zrantu' nigá, dxugápantu' le'e diuzre, biche ljwézrentu' quebe nácale judío,

zrale xezre Antioquia, ne le'e zrale xezre ca' zaj nababa Siria, ne xezre ca' zaj nababa Cilicia. ²⁴ Ba benentu' bal-la benne' ba besia'que' nigá, ne quebe nasél-lantu' netu' le', na' beluné' le'e zede nen dizra' da buluchálaje', ne belún zréajené' le'e, dxelenné' dxal-la' chugu late' weaj bela' chee' bel-la' dxen chee', benne' biu ca', ne chéajlele ca' naca da bdxixruij be'e Moisés. ²⁵ Chee' le' na' dxéquentu' naca xrlátaje cá'antu' bal-la benne' ládujla netu' chee' xeledé'e xedajlenné'e le'e nen biche ljuwézredxu Bernabé ne Pablo, benne' ca' nazrí'i lázrele'entu'. ²⁶ Benne' caní beluné' zrin chee' Xránadxu Jesucristo, xjaque' lu da stebe naga gulaca lazre' bènneache xelútié' le'. ²⁷ Ca' naca na, dxesél-lantu' naga zúale Judas ne Silas, na' benne' caní xuluchálajlene' le'e ca' naca chee' da nigá. ²⁸ Guque Be' Lá'azxa xrlátaje, ne cá'anqueze netu' gúquentu' xrlátaje quebe bi xua' guzúantu' lawe' le'e, san da canize dxun na ba xen gunle. ²⁹ Dخال-la' gulanle da naca chee' bedáu' xaga, ne bedáu' xiaj ca', ne quebe dxal-la' gunle dul-la' chee' da dxucá'ana sban bènneache, ne quebe dxal-la' gágule bela' chee' be xixre', be quebe bdxuaj dxen, ne quebe dxal-la' gágule dxen cheeba'. Che gunle ca' naca da nadxixruij bea caní, gunle xrlátaje. Dxenábantu' lau Dios gaca chawe' chee'.

³⁰ Nadxa benne' ca' gulesel-le' xjaque' xezre Antioquia. Na' buluchague' benne' ca' zaj naque' chee' Dios, ne bulunézruje' le' xiche na'. ³¹ Gate biche ljuwézredxu ca' bululabe' na, na' gulebé'ene' lawe' da dxue zren na le'. ³² Judas ne Silas zaj naque' benne' dxelenné' waláz chee' Dios. Chee' le' na' buluchálajlene' biche ljuwézredxu ca', belúe zrene' le', ne bulutipe' lazre' le'. ³³ Gate gudé guca tu chí'i zaj zre'e na', na' benne' bíchedxu ca' buluzé' benne' ca' dizra', ne gulenabe' Dios sua xel-la' dxebeza zri lazre' nen benne' ca', chee' xesi'aque' xelexezrine' naga zaj zra' benne' ca' gulesel-le' le'. ³⁴ Silas gúquene' xrlátaje xegá'ane' na'. ³⁵ Cá'anqueze Pablo, ne Bernabé belexegá'ane' lu xezre Antioquia, na' tu zren nen benne' zandxa gulezúe' dxulusédene' bènneache, ne dxuluchálaje' ca' naca dizra' chee' Xránadxu.

Dxezú lau Pablo zéaje' zitu' da gudxupe' lasa guchálaje' chee' Jesús

³⁶ Ca' gudé na', Pablo guzre' Bernabé:

—Xu'u xecha lasa cheajnnadxu biche ljuwézredxu ca' zaj zre'e xúguté xezre ca' naga xeajchálajdxu dizra' chee' Xránadxu, chee' cheajnnadxu aja dxaca zaj zre'e.

³⁷ Bernabé guca lazre' che'e Juan nen le', bi na' léquezebe' Marcos, ³⁸ san Pablo quebe guzáa lazre' che'e-be' lawe' da bsanbe' benne' ca' gate zaj zre'e xezre ca' zaj nababa Panfilia, ne québedxa guxíajlebe' le' lu zrin chee' Xránadxu. ³⁹ Na' Pablo, ne Bernabé bulutil-la' ljuwezre' dizra'. Ca'an guca, belexela'a cha chee'. Bernabé guché'e Marcos, na' gulu'e tu lu da dxdá lawe' nísadau', na' xjaque' Chipre. ⁴⁰ Na' Pablo guqué'e Silas, na' ca' gudé biche ljuwézredxu ca' belegü'e Pablo ne Silas lu na' Xránadxu chee' guné' da chawe' chee' benne' ca', ⁴¹ na' gusiá'que', ne guledé'e xezre ca' zaj nababa Siria, ne xezre ca' zaj nababa Cilicia, na' bulutipe' lazre' bi bíchedxu ca'.

16

Timoteo dxéajlebe' Pablo ne Bernabé

¹ Pablo ne Silas belezrine' xezre Derbe, ne xezre Listra naga belexezrague' tu benne' cuide' dxéajlebe' chee' Jesús, lebe' Timoteo, zri'ine tu nu'ula judío dxéajle'e chee' Jesús, san xrabe' naque' benne' griego. ² Bi bíchedxu zaj zre'e

xezre Listra, ne xezre Iconio dxeleñné' xrlátaje dxgua dxunbe'. ³ Pablo guca lazre' chéajle Timoteo le', na' guchugue' late' bela' chee bel-la' dxen cheebe' ca dxenná bea da bdxixruj be'e Moisés, chee quebe xelezrá'a benne' judío ca' zaj zre'e naga nababa na lawe' da zaj neze xúgute benne' ca' naca xra Timoteo benne' griego. ⁴ Lu xúgute xezre naga dxeledé' buluzenne' benne' bíchedxu ca' naca da zaj nadxixruj bea na belún benne' gubáz ca', ne benne' gula ca' zaj zre'e Jerusalén. ⁵ Ca'an guca bi bíchedxu ca' gulezúa chúchue' ca dxeleajli lazre' Jesús, na' benne' ca' dxeléajle'e chee', tu zra tu zra zeajte dxelane'.

Dxele'e Pablo tu da ble'e Dios le', dxelé'ene' tu benne' Macedonia

⁶ Be' Lá'azxa quebe be'e benne' gubáz ca' lataj xuluchálaje' dizra' chee Dios naga nababa Asia. Chee le' na' guledé' naga nababa Frigia, ne xezre ca' zaj nababa Galacia. ⁷ Belezrine' naga nazraga xezre ca' zaj nababa Misia. Gulaca lazre' chjaque' naga nababa Bitinia, san Be' Lá'azxa chee Jesús quebe be'e le' lataj. ⁸ Nadxa guledé' naga nababa Misia, na' belezrine' xezre Troas. ⁹ Lu xezre na' Pablo blé'ene' tu da ba ble'e Dios le' chizrela, blé'ene' tu benne' biu chee ga nababa Macedonia, ze' dxata' xuene' Pablo, dxenné': "Gudá Macedonia nigá, gácalenu' netu'." ¹⁰ Gate ble'e Pablo da nigá, na' benne' ca', ne neda', Lucas, la gudíajtentu' ájala guntu' chee chéajntu' ga nababa Macedonia lawe' da gúquequezentu' Dios dxenné' netu' chee cheajchálajlentu' benne' ca' dizra' chawe' ca' naca chee Jesús.

Pablo ne Silas dxelezrine' ciudad Filipos

¹¹ Lu xezre Troas na' guxú'untu' tu lu da dxedá lawe' nísadau', na' guxéajntu' tu xezr la xu da naxechaj nísadau', nazí le na Samotracia, na' zra xula bzrintu' xezre Neápolis. ¹² Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzú'antu' tu chupa zra. ¹³ Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéajle' dxeajlechálajlene' Dios. Gudxe'ntu' na' ne bchálajlentu' nu'ula ca' zaj nazrague' na' ca naca dizra' chawe' ca naca chee Jesús. ¹⁴ Tu nu'ula ca' le' Lidia, naque' nu'ula chee xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da naca chee Dios, na' benne' cheentu', na' Xránadxu bzani'e lázrdawe' chee guzú' lu ne'e da dxuchalaj Pablo. ¹⁵ Na' bdxue nisa nu'ula nigá nen benne' zaj zre'e lizre'. Gudé na' guta' xuene' netu', gunné':

—Che le'e dxéquele da li dxeajli lazra' Xránadxu, le da súale lizra'.

Na' bene' ba xuzre begá'anantu' na'.

¹⁶ Tu zra gate zéajntu' naga zeajchálajlentu' Dios, bezrágantu' tu bi nu'ula cuide' xu'ube' be' xriwe', ne dxenné' xa'abe' ne chee be' xriwe' na'. Bi nu'ula nigá xú'ube' lu na' benne' ca' dxuluchíne' lebe' xadía, na' xránabe' ca' dxelezíle'e dumí da dxezibe', dxenné' xa'abe'. ¹⁷ Bi nu'ula nigá guzú' laube' za'be' cuzru Pablo ne netu', dxennabe' zizraj:

—Benne' caní dxelune' zrin chee Dios szrente', ne dxuluzenne' le'e ájala gunle lale.

¹⁸ Zane' zra benbe' caní cadxa guque Pablo ze'de, na' bexéchaje', ne guzre' be' xriwe' da xu'ube':

—Lu La Jesucristo dxenná be'eda' lue' xedxúaju' lu bel-la' dxen chee bi nu'ula nigá.

Na' be' xriwe' na' bedxúajte na.

19 Gate benne' ca' dxuluchínene'-be' xadía guleque bé'ene' québedxa bi xelexezí'e ne cheébe', na' gulel-le' Pablo ne Silas, na' guleché'e benne' caní lau benne' xu'u lawe' naga zua chale'aj xu'u lawe' blau. 20 Na' buluzú'e benne' caní lau benne' xu'u lawe' ca', na' gulenné':

—Benne' caní zaj naque' judío ne dxelún zréajene' benne' zaj zré'e xezre cheedxu, 21 ne dxulusédene' ca naca da zjácálene', da quebe gaca sidxu, ne quebe gaca gundxu na lawe' da nábabadxu Roma.

22 Nadxa benne' zaj zré'e xezre na' guledábague' Pablo ne Silas, na' benne' xu'u lawe' na' gulenná be'e xelexé'chaje' zra lana Pablo ne Silas, ne xelu'e le' zrise. 23 Ca gudé belúele'e le', na' buluzré'e le' lizre xia, ne gulenná bé'ene' benne' xu'u lu ne'e lizre xia na' guxúe xánnie' benne' ca'. 24 Gate benne' ca' gulenná be'e, na' bzre'e le' zane' lézxdxa ne bzre'e ni'a benne' ca' lu xedxu chee' cuaga da dxuxru na ni'e.

25 Gate gula dxela Pablo ne Silas dxuluchálajlene' Dios, ne dxelul-le' da dxelúe lá'ane' Dios, na' xezícadxa benne' zaj zré'e lizre xia dxuluzé nague' chee'. 26 La' na'te' guzrú'le'e da bxrize na ca naca lizre xia, na' belexalaj xúgute dxa xu'u ca', ne belexexezre du xia da zaj nadxéaj ni'a xúgute benne' ca' zaj zré'e lizre xia. 27 Na' benne' xu'u lu ne'e lizre xia na' bebane', ne gate blé'ene' zaj naxalaj dxa xu'u ca' chee' lizre xia, gúlaje' xia chee' xute cuine' lawe' da dxéqene' ba buluxuzrúnnaj benne' ca' zaj zré'e lizre xia. 28 Pablo gudxezre xé'e, guzre' le':

—Quebe bi gune cuinu'. Xúgute'ntu' zúantu' nigá.

29 Nadxa benne' na' xu'u lu ne'e lizre xia gunabe' tu xi', na' guxú'u chégüe', dxezrízequeze' xel-la' dxezrebe, na' bzu zribe' lau Pablo ne Silas. 30 Nadxa guléaje' benne' ca' ne bchebe' le':

—Le'e, benne', ¿bizra dxal-la' guna' chee' la'?

31 Benne' ca' belexechebe':

—Guxéajle' chee' Xránadxu Jesucristo, na' lau', ne cá'aqueze benne' zaj zré'e lizru'.

32 Na' buluchálajlene' le', ne xúgute' benne' zaj zré'e lizre' ca naca dizra' chee' Xránadxu. 33 Lu xela ná'queze benne' na' xu'u lu ne'e lizre xia gudibe' we' chee' Pablo ne Silas, na' ca gudé na', le' ne xúgute' benne' zaj zré'e lizre' guledxúe' nisa. 34 Ca gudé na' beche'e Pablo ne Silas lizre', na' bné'zruje' da gulawe', na' le' ne benne' zaj zré'e lizre' gulebé'le'ene' lawe' da ba guléajle'e chee' Dios.

35 Che zílala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gusané' Pablo ne Silas. 36 Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

37 Pablo guzre' bi xra'aga ca':

—Netu' nabá'antu' Roma, na' belú'e netu' lávela benne' xezre ca', ne quebe ne xuluchí'e cheentu', na' buluzré'e netu' lizre xia. Na'a ¿dxeléquene' xulusane' netu' bagácheze? Quebe gaca. Xelída lé'queze' xelexebéaje' netu'.

38 Bi xra'aga ca' xejlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababe' Roma. 39 Na' xjaque' lizre xia na', ne gulenabe' Pablo ne Silas xelí zrene' chee'. Nadxa belexebéaje' le', ne gulata' xuene' le' xelexedxúaje' xezre na'. 40 Gate Pablo ne Silas belexedxúaje' lizre xia na', na' xjaque' lizre Lidia, na' ca gudé buluchálajlene' biche ljwézredxu ca', ne bulutipe' lazre', na' besía'que'.

17

Benne' zaj zre'e xezre Tesalónica dxeledábague' Pablo

¹ Nadxa Pablo ne Silas guledé' xezre Anfípolis, ne xezre Apolonia, na' belezrine' xezre Tesalónica, naga zua tu xudau' chee' judío ca'. ² Pablo guxiájé' xudau' na', na' ca dxúnqueze' bchálajléné' benne' ca' tu tu zra dxulupá'angé' du chunna da gazre zra. ³ Ca da naxúaj na lu xiche chee' Dios, bzéajni'ine' lé' ben na ba xen Cristo guzí guzaque', ne gutié', na' ca gudé' na' ben na ba xen bebane' ládujla benne' gate. Na' guzre' benne' ca':

—Jesús nigáqueze, bènnea' dxuzenda' le'e chee', naque' Cristo, Bénnea' guchebe lazre' Dios sel-lé'.

⁴ Nadxa bal-la benne' judío ca' guléajlé'e chee' Jesús, ne gulaque' tuze Pablo ne Silas. La gázqueze guléajlé' benne' zan benne' griego, ne nu'ula zan zaj naque' nu'ula blau. ⁵ Benne' judío ca', benne' quebe dxeléajlé'e chee' Jesús gulaque' xa lazre' chee' Pablo, na' buluchague' bal-la benne' ca' dxeluné' da calela dxeledaze', ne bulutupa ljwezre', na' buluzúé' stebe ca naca benne' xezre. Gulu'e xadía lizre Jasón, dxelexílajé' Pablo ne Silas, chee' xelebéajé' lé', ne xuludé' lé' lu na' benne' xezre ca'. ⁶ Gate quebe belexezrelné' Pablo ne Silas lu xu'u na', nadxa beleché'e xadía Jasón ne xebal-la biche ljwézredxu ca' lau benne' xu'u lawe' ca' chee' xezre, na' dxelebezre xe'e, dxelenné':

—Benne' ca', benne' ba belún zréajené' ca naca benne' zaj zre'e xezr la xu, cá'anqueze ba belelé'e nigá. ⁷ Jasón nigá ba gulu'e benne' ca' lizre'. Ca naca benne' ca' dxeledábague' da bdxixruij bea César lawe' da dxelenné' zua xetú wenna' bea, tu benne' lé' Jesús.

⁸ Gate belenne' da caní, na' benne' xezre ca', ne benne' xu'u lawe' ca' gulezúé' stebe. ⁹ Jasón, ne biche ljwézredxu ca' bulucá'angé' dumí chee' gulezúé' lataj, na' benne' xu'u lawe' ca' bulusané' lé'.

Pablo ne Silas dxelezrine' xezre Berea

¹⁰ Nadxa biche ljwézredxu gulé'e Pablo ne Silas chee' xesi'aque' chizrela, chee' chjaque' xezre Berea. Gate belezrine' na', na' belú'e lu xudau' chee' judío ca'. ¹¹ Benne' judío caní zaj nácadxe' zren lazre' ca benne' Tesalónica ca' lawe' da du lazre' gulezúé' dizra' chee' Dios, na' tu zra tu zra dxululabe' lu xiche chee' Dios chee' xuluxúé' che naca da li da dxelé'e lé'. ¹² Ca'an guca, benne' zan benne' judío ca' guléajlé'e chee' Jesús, ne cá'anqueze benne' griego. Benne' zan guléajlé'e, nu'ula blau ca', ne benne' biu ca'. ¹³ Gate benne' judío ca' zaj zre'e xezre Tesalónica guleque bé'engé' dxuchalaj Pablo dizra' chee' Dios lu xezre Berea, na' belezrine' na', ne gulegú'u xel-le' bènneache chee' xeledábague' Pablo ne Silas. ¹⁴ Biche ljwézredxu ca' la gulesél-la'té' Pablo chéajé' dxu'a nísadau', na' Silas ne Timoteo belexegá'angé' lu xezre Berea. ¹⁵ Benne' ca' zjácálené' Pablo beleché'e lé' lu xezre Atenas. Nadxa benne' ca' belexezrine' lazrie', ne gulé'e Silas, ne Timoteo chjácazegue' naga zua Pablo.

Da dxun Pablo lu xezre Atenas

¹⁶ Dxácaté' na' Pablo dxebeze' Silas ne Timoteo naga zue' lu xezre Atenas, na' guzúalé'e stebe gate blé'engé' ca naca xezre na', ni' naze nítalé'e bedáu' xiaj. ¹⁷ Chee' lé' na' bchálajé' lu xudau' chee' judío ca' nen benne' judío ca', ne xezícala benne' ca' zjácálené' da naca chee' Dios, na' tu zra tu zra bchálajléné' benne' ca' zaj zre'e lawe' xi'a. ¹⁸ Bal-la benne' zjácálené' ca naca da dxuluséde benne' ca' zaj lé' benne' epicureo, ne benne' estoico gulezú lawé' dxuluchálajléné' Pablo. Bal-le' gulenné':

—¿Bizra xęga benne' wechalaj nigá dxi'u?

Na' xebal-le' gulenné':

—Dxequentu' naque' benne' dxuse dizra' cheę dios zitu' ca'.

Ca'an gulenné' lawe' da dxuchalaj Pablo dizra' chawe' ca naca cheę Jesús, ne ca naca cheę xel-la' dxexebán. ¹⁹ Nadxa guleché'e Pablo lu lataj nazí le na Areópago, naga dxelzrágazeze' bi xuluzén ljwezre'. Na' buluchebe' Pablo:

—¿Waca guzénenu' netu' ca naca da cube nigá da dxusédenu' bėnneache? ²⁰ Lue' dxuchálaju' dizra' da quebe ne xénentu', na' dxaca lázrentu' nézentu' bi zéaje ca naca da caní.

²¹ Caní gulenné' lawe' da dxuluzé nágaze, ne dxuluchálajze ca naca tu dizra' cube xúgute benne' Atenas, ne benne' zitu' ca' zaj zře'e xęzre na'.

²² Nadxa Pablo guzé' laduj benne' ca' zaj zře'e Areópago na', na' guzre' le':

—Le'e, benne' Atenas, ca naca xúgute da dxelé'eda', dxulé'e na dxápale'ele ba lá'ana dios cheęle ca', ²³ lawe' da gate gudá' neda' gunná'a ca zaj naca xudau' ca' naga dxue lá'anale dios cheęle ca', na' ble'eda' tu xudáudau' naga naxúaj dizra' caní: Cheę Dios Quebe Nu Núnbea. Na'a, Dios na' dxue lá'anale le'e, ne quebe núnbeale Le', cheę Dios na' dxuchálajlena' le'e.

²⁴ 'Naque' Dios na' bene' xęzr la xu nigá, ne xúgute da de lawe na. Naque' Xrane xabáa, ne Xrane xęzr la xu nigá. Quebe zue' xudau' da nun ni'a na' bėnneache. ²⁵ Quebe nachínene' bi da gaca xelún bėnneache cheę Le' lawe' da dxunna Dios ná'queze xúgutedxu xel-la' nabán, ne be' da dxeca'adxu, ne xúgute da de.

²⁶ 'Tuze benne' bene' naque' xra xúgute cue' xęzr la xu ca' cheę che'e du gabí'i xęzr la xu, na' blé'ene' zra, ne lataj naga dxal-la' xelezre'e, ²⁷ cheę xelexexílaje' Dios cheę ájala xelexezrelne' Le' lácala quebe xelúnbea xánnie' Le', san da li Dios quebe zue' zitu' naga zua tu tudxu dxi'u. ²⁸ Ne cheę Dios nigá naca bandxu, ne dxedadxu, ne zradxu. Naca ca gulenná bal-la benne' wila cheęle, gulenné': "Nácadxu xrtia Dios." ²⁹ Che nácadxu xrtia Dios, quebe dxal-la' guéquedxu naca Dios ca tu bedáu' oro, u tu bedáu' plata, u tu bedáu' xiaj, da zaj nun bėnneache cáteze dxululaba lázrequeze'. ³⁰ Dios bzue' chalá'ala da belún bėnneache ca ni'te lu xel-la' quebe zaj neze cheę', san na'a dxenná bé'ene' xúgute benne' gáteteze zaj zře'e xelexebí'i lazre'. ³¹ Dios ba nuzúe' tu zra gate guchi'e cheę xúgute bėnneache lu da xrlátaje cheę' lu na' tu benne' ba gucá'a Le', na' cheę da nigá bzue' tu da dxunna bea na gate bsebané' bėnnea' ládujla benne' gate.

³² Gate benne' ca' belenne' dizra' nigá ca naca cheę tu benne' bebane' ládujla benne' gate, na' bal-le' belún le' cheę', ne xebal-le' gulenné':

—Waca guchálajlenu' netu' ca naca da nigá xetú zra.

³³ Nadxa Pablo bezé'e naga zaj zra' benne' ca'. ³⁴ Bal-la benne' ca' guléajle'e cheę Jesús, na' gulaque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

18

Pablo dxezrine' xęzre Corinto

¹ Gudé na' bezá' Pablo xęzre Atenas, bexíaje' xęzre Corinto. ² Lu xęzre na' xeajxraque' tu benne' judío le' Aquilo, naque' benne' nababe' tu xęzre nababa Ponto. Láteze ba guca belexezrín Aquilo, ne zru'ule' Priscila ga na'. Benne' caní besía'que' xęzr la xu Italia lawe' da gunná bea César Claudio

xelexedxúaj xúgutę benne' judío ca' xęzre Roma. Pablo guxíaję xeajnné'e Aquilo ne Priscila, ³ na' lawe' da tuze ca naca zrin da dxelún Pablo ne Aquilo, dxelunę' xu'u xide zra bę xixre' da dxelútię' cheę benne' dxjaca wedil-la, na' begá'ana Pablo nen benne' caní cheę xelunę' tu zren zrin. ⁴ Tu zra tu zra gate naca zra dxulupá'ana judío ca', Pablo zéaję' lu xudáudau' cheę judío ca' naga bchálaję' ne blé'ene' benne' ca', benne' judío, ne benne' quebe zaj naque' judío, Jesús naque' Cristo, Bénnea' guchebe lazre' Dios sel-le'.

⁵ Gate belezrín Silas, ne Timoteo ga na', gudé belexesi'aque' xęzre ca' zaj nababa Macedonia, na' Pablo tu dxuchálajzqueze' dizra' cheę Dios, ne dxulé'ene' benne' judío ca' da li Jesús naque' Cristo, bénnea' nasel-la Dios, bénnea' dxelebeza judío ca'. ⁶ Benne' judío ca' gulezú lawę' dxeledábague' Pablo, ne dxelennę' schanni' cheę'. Nadxa Pablo guzribe' gabán cheę' da dxulé'e na dxebéaj xíchaję' benne' ca', dxennę':

—Le'e nabágale cheę xel-la' gute cheę bénne'du xu'ule. Québedxa nabaga' neda' cheę na lawe' da ba bzenda' le'e dizra' chawe' cheę Cristo. Ná'atęla guchálajęna' benne' quebe zaj naque' judío.

⁷ Bezé'e lu xudáudau' na', na' bezrine' lizre tu benne' le' Justo, benne' dxucá'ana szrenę' Dios ne zua lizre' cuita xudáudau' cheę judío ca'. ⁸ Na' Crispo, benne' xíchaję cheę xudáudau' cheę judío ca', ne ca naca benne' zaj zre'e lizre' guléajle'e cheę Xránadxu. Cá'anqueze benne' zan benne' Corinto, gate belenne' dizra' cheę Dios, guléajle'e ne guledxúę' nisa. ⁹ Nadxa Xránadxu ble'e lawe' Pablo tu zre' tu lu da ble'e Dios le', ne guzre' le':

—Quebe zrebu'. Bchálajęze, ne quebe sua zriu'. ¹⁰ Neda' zúalęna' lue', na' quebe nu seque' bi gune lue' lawe' da zaj zrále'e benne' zaj naque' chia' lu xęzre nigá.

¹¹ Ca'an guca, begá'ana Pablo tu iza xugachaj lu xęzre Corinto, dxusédenę' benne' ca' dizra' cheę Dios.

¹² Lu zra ca' gate naca Galión benne' xu'u lu ne'e xęzr la xu na' naga nababa Acaya, waláz cheę Roma, na' benne' judío ca' guledábague' Pablo. Beleché'e le' xu'u lawe', ¹³ ne gulé'e benne' xu'u lu ne'e xęzr la xu na':

—Benne' nigá dxedé' dxegú'u xel-le' bénneache cheę xelúe lá'ane' Dios, ne xelunę' tu da dxedábaga da nadxixruj bea cheęntu'.

¹⁴ Pablo ba zue' guchálaję' gate Galión guzre' benne' judío ca':

—Chela naca na cheę tu da dxuzúa chalá'ala da bdxixruj bea César u cheę tu da zrinnaj zren, na' gun na ba xen xenda' ca da dxennale le'e, benne' judío.

¹⁵ Lawe' da naca na cheę dízra'ze, ne cheę la tu benne', ne cheę da nadxixruj bea na cheézele, le gucá'ana chawe' na lé'equeze, lawe' da quebe dxaca lazra' neda' guchí'e da dxaca cheę da ca'.

¹⁶ Nadxa bebéaję' benne' ca' lu xu'u lawe' na'. ¹⁷ Nadxa xúgutę benne' griego gulel-le' Sóstenes, benne' xíchaję cheę xudáudau' cheę judío ca', ne belú'e le' lau benne' xu'u lu ne'e xęzr la xu na', le' Galión. Galión na' quebe be' lazre'e cheę da na'.

Pablo dxezrine' xęzre Antioquia, na' dxezú lawę' zéaję' da guxunne' lasa zéaję' wen zrin cheę Cristo

¹⁸ Pablo begá'ane' xęzre na' xezane' zra. Gudé na' bze' biche ljwézredxu ca' dizra', na' guxú'e tu lu da dxedá lawe' nísadau' zéaję' naga nababa Siria tu zren nen Priscila ne Aquilo. Lu xęzre Cencrea nédxudxa gate za chu'e lu da dxedá lawe' nísadau', Pablo bzuatę' xídeze xíchaję', da dxunna bea na zua tu da nachebe lazre' gune' lau Dios. ¹⁹ Gate belezrine' lu xęzre Efeso, Pablo bsane'

Priscila ne Aquilo, na' guxiáje' lu xudáudau' chee judío ca', ne bchálajlɛnɛ' judío ca' zaj nazrague' na'. ²⁰ Benne' ca' gulata' xuene' le' xegá'anadxɛ' xetú' chí'i, na' le' quebe guca lazre'. ²¹ Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén chee súaqueza' lu laní da ba za'. Welá'aqueza' xedajnná'a le'e che gunna Dios lataj.

Na' guxú'ɛ lu da dxedá lawe' nísadau', ne bezé'ɛ Efeso na'. ²² Gate bezrine' xezre Cesarea, Pablo guxiáje' Jerusalén xeajape' diuzre benne' ca' dxelájajlɛ' chee Jesús, na' gudé na' guxiáje' xezre Antioquía. ²³ Ca gudé guzú'ɛ na' tu chí'i, na' bezé'ɛ na', gudé' tu tu xézredu ca' zaj nababa Galacia, ne xezre ca' zaj nababa Frigia, dxutipe' lazre' benne' ca' dxelájajlɛ' chee Jesús.

Apolos dxuchálajɛ' dizra' chee Dios lu xezre Efeso

²⁴ Ca lu zra ca' tu benne' judío le' Apolos bzrine' lu xezre Efeso, naque' benne' xezre Alejandría, lu xu Egipto. Naque' tu benne' nupá'alɛ'ɛ xrtizre', ne núnbealɛ'ɛ da naxúaj na lu xiche chee Dios. ²⁵ Naxéajni'ile'ɛnɛ' ca naca chee Xránadxu, ne dutɛ lázrdawɛ' dxuchálajɛ', dxusédene' cáteze naca chee Jesús, lácala dxusédene' xel-la' dxuchúa nisa ca ben Juan. ²⁶ Apolos guzú' lawe' dxusédene' benne' ca' zaj zre'ɛ xudáudau' chee judío ca' du lazre'. Gate belén Priscila, ne Aquilo chee', na' guleché'ɛ le' chalá'ala, ne buluzéajni'idxene' le' cáteze naca dizra' chee Dios. ²⁷ Ca gudé na', gate guca lazre' Apolos chéajɛ' naga nababa Acaya, bi bíchedxu ca' bulutipe' lazre', ne buluzuajɛ' tu xiche chee benne' ca' dxelájajlɛ' chee Jesús zaj zre'ɛ xezre ca' zaj nababa Acaya na' chee xelezí' lu ne'ɛ Apolos na'. Gate bzrin le' naga nababa Acaya, gúcalelɛ'ɛnɛ' benne' ca', na' Dios be'ɛ le' lataj gulájajlɛ' chee Jesús. ²⁸ Apolos blé'ɛnɛ' lau xúgutɛ benne' ca' ca dxeleque zrɛaje benne' judío ca', ne blé'ɛnɛ' nɛ chee da naxúaj na lu xiche chee Dios Jesús naque' Cristo, Bénnea' nase-la Dios, Bénnea' dxelebeza judío ca'.

19

Pablo dxezrine' xezre Efeso

¹ Dxácatɛ zua Apolos lu xezre Corinto, na' gudé Pablo xézredu ca' zaj dxe' laduj xi'a ca', na' bzrine' lu xezre Efeso naga xeajxraque' bal-la benne' dxelájajlɛ' chee Jesús. ² Na' bchebe' benne' ca':

—¿Guzi'le le'e Be' Lá'azxa gate guxéajlele'?

Belexechebe':

—Ne quebe xénentu' che zua Be' Lá'azxa.

³ Nadxa Pablo bchebe' benne' ca':

—¿Bi xel-la' dxedxúa nisa guzi'le le'e?

Benne' ca' belexechebe':

—Xela dxuchúa nisa ca ben Juan.

⁴ Na' gunná Pablo, guzre' benne' ca':

—Awe', Juan bchuɛ' nisa benne' ca' belexebí'i lazre', san guzre' benne' ca' dxal-la' xelájajlɛ' chee Bénnea' xidɛ' ca te chee le', da zéajɛ na, chee Jesús, Bénnea' naque' Cristo, nase-la Dios.

⁵ Gate belenne' da nigá, na' beledxú'ɛ nisa lu La Xránadxu Jesús. ⁶ Gate bze' na' Pablo benne' ca', na' guzúalɛ' Be' Lá'azxa le', na' gulenné' dizra' chee benne' zitu' da quebe bulusédɛ', ne buluchálajɛ' waláz chee Dios. ⁷ Benne' caní zaj naca chazrinnue'.

⁸ Lawe' chunna beu' dxeaj Pablo lu xu'u ca' naga buluzraga judío ca' naga bchálajlɛnɛ' benne' ca' dizra' chee Dios, ne blé'ɛnɛ' benne' ca' naca da li da

dxuchálaję' ca naca xel-la' dxenná bea cheę Dios. ⁹ Bal-lę' belún zide' lázrdawę', ne quebe gulaca lazre' xelėjaję'e cheę Jesús, na' gulenné' schanni' cheę dizra' chawe' ca naca cheę Jesús lówela benne' ca'. Nadxa Pablo bezé'e naga zaj zra' benne' ca', ne guché'e benne' ca' dxelėjaję'e cheę Jesús lu xu'u ga dxuseđe tu benne' le' Tiranno, na' lu xu'u na' bchálajęne' benne' ca' tu zra tu zra. ¹⁰ Ca' bęe' lawe' chupa iza, na' ca'an guca xúgute' benne' zaj zre'e xęzre ca' zaj nababa Asia belenne' dizra' cheę Xránadxu Jesús, benne' judío ca', ne benne' quebe zaj naque' judío. ¹¹ Dios bęe' xel-la' waca zri'a ca' lu na' Pablo lu zra ca'. ¹² Ca'an guca, gulequę'e ladxe' ca' da dxuchėjaj xichaj Pablo, ne ladxe' ca' da bde'e lachu'e, na' belú'e na naga zaj de' benne' we' ca', na' benne' caní belexexaquę' ca naca xízrawę' da zaj napę', na' be' xriwe' ca' belexedxúaj na lu bel-la' dxen cheę benne' ca'.

¹³ Bal-la benne' judío ca', benne' dxeledé' dxelexebéaję' be' xriwe' ca' lu xichaj lázxdau benne' ca', gulaca lazre' xuluchínene' La Xránadxu Jesús cheę xelexebéaję' na, na' gulé'e be' xriwe' ca':

—Dxenná bé'entu' le'e xedxúajle lu xichaj lázxdau benne' nigá lu La Jesucristo, Bénnea' dxuchalaj Pablo cheę'.

¹⁴ Caní belún gızre benne' zaj naque' zri'ine tu benne' judío le' Esceva, naque' tu benne' xichaję cheę bxruze ca'. ¹⁵ Gate belunę' caní, be' xriwe' na' bechebe na cheę':

—Núnbe'a Jesús, ne nezda' nua' Pablo, san le'e, ¿nuzra le'e?

¹⁶ Gate gunná na da nigá, na' benne' biu na' xu'e be' xriwe' na', guxritię' guzría che'e benne' ca', na' dute' xel-la' wal-la cheę' buculę' xúgute' benne' ca', na' bé'le'e benne' ca' cadxa buluzrúnnuje' lu xu'u na' gala' xídeze, ne dxelaquę' dxen. ¹⁷ Xúgute' benne' zaj zre'e xęzre Efeso, benne' judío ca', ne benne' quebe zaj naque' judío, belenne' ca' guca da nigá, na' cheę le' na' belezrébelę'e, ne bulucá'ana szreņę' La Xránadxu Jesús.

¹⁸ Cá'unqueze benne' zan lówela benne' ca' dxelėjaję'e cheę Jesús belelé'e dxelxráulępe' da calęla da belunę', ¹⁹ na' benne' zan, benne' belúnę' xel-la' wazrá', zaj nu'e xiche cheę wazrá', na' buluzezxe' na lau xúgute' benne' ca'. Gate bululabe' ca gulezaca xiche ca', na' gulenézene' gulezaca na ca gazxu gaxúa cue' tu gaxúa dumí plata. ²⁰ Ca'an guca, guxíaj bzriluj dizra' cheę Xránadxu, ne ble'e na xel-la' waca cheę na.

²¹ Gudé na' Pablo guca lazre' téę' xęzredu ca' zaj nababa Macedonia, ne Acaya, na' te na' chėjaję' xęzre Jerusalén. Gunné' ca te chėjaję' Jerusalén, na' dxal-la' cheaję' xęzre Roma. ²² Nadxa gusel-lę' chupa benne' dxelácalę le', Timoteo ne Erasto, naga nababa Macedonia, dxácate' begá'ana le' xetú' chí'i naga nababa Asia.

Benne' xęzre Efeso dxeledábague' Pablo

²³ Ca lu zra na' benne' zan guledábague' dizra' chawe' ca naca cheę Jesús, ²⁴ da na' guca na ne cheę tu benne' le' Demetrio, benne' gubizre plata. Benne' nigá dxunę' níchudu ca' da zaj naca plata ca xudau' cheę dios nu'ula le' Diana, na' benne' ca' dxelúnłęne' le' zrin nigá dxelezí'le'e dumí. ²⁵ Demetrio na' bhague' benne' caní tu zren nen xezica benne' dxelunę' zrin caní, na' guzre' benne' ca':

—Le'e, benne', nézquezle lu zrin nigá dxaca cheędxu da cháwele'e, ²⁶ na' ca dxelé'eqezle le'e ne dxenle, Pablo nigá dxedé' dxenné' dios ca' da zaj nun bėnneache quebe zaj naca na dios, na' caní ba bsėdene' benne' zan, quegá Efeso nigáze, san du ca nababa Asia. ²⁷ Da nigá nácalę'e na stebe cheędxu,

lawe' da ca naca zrin cheɛdxu nigá nazruzre cuía xi na, ne la gaze xudau' cheɛ dios nu'ula Diana nazruzre nite xel-la' nuzé cheɛ na, na' caní xegá'ana ditaj ca naca xel-la' szren cheɛ dios nu'ula, bènnea' dxelúe lá'ana ca naca benne' zaj zré'e ga nababa Asia, ne du ca naca bènneache zaj zré'e xezr la xu.

²⁸ Gate belenne' da nigá, na' belezrá'alé'e benne' ca', ne gulebezre xé'e, dxelenné':

—jGa'ana szren Diana, dios cheɛdxu, benne' Efeso!

²⁹ Na' ca naca benne' zaj zré'e xezre na' guleque zréajene'. Gulele' Gayo, ne Aristarco, benne' Macedonia dxeledálene' Pablo, na' gulezrube xue' benne' caní chale'aj xu'u lawe'. ³⁰ Pablo guca lazre' chu'e na' cheɛ guchálajlene' benne' ca', san bi bíchedxu ca' quebe gulegú'e le' lataj. ³¹ Cá'anqueze bal-la benne' xu'u lawe' cheɛ xezre ca' zaj nababa Asia gulesel-le' benne' xeajezre' Pablo quebe dxal-la' chu'e na'. ³² Dxácate' na', naga zaj nazraga benne' ca', bal-le' gulebezre xé'e, tu da dxelenné', na' xebal-le' dxelebezre xé'e, dxelenné' da xula, lawe' da beledxé'ena zraga benne' zan, na' benne' zanté quebe zaj nézene' bizr cheɛ na' zaj nazrague' na'. ³³ Nadxa benne' judío ca' buluzúe' Alejandro lau benne' ca' cheɛ guzéajni'ine' le' ca naca da nigá, na' le' guchisa ne'e cheɛ xelezúa zri benne' ca' lawe' da guca lazre' guchálajlene' benne' zan ca' da gácale na judío ca'. ³⁴ Gate benne' zan ca' guleque bé'ene' naque' benne' judío, na' gulebezre xa'a xúgute' ca chupa hora, dxelenné':

—jGa'ana szren Diana, dios cheɛdxu, benne' Efeso!

³⁵ Nadxa benne' dxuzúajé' ne cheɛ xezre na', gate ba bzua zrié' benne' zan ca', gunné':

—Le'e, benne' Efeso. Ca naca bènneache zaj zra' xezr la xu nigá zaj nézene' benne' zaj zré'e xezre Efeso nigá zaj nabague' xuluxúe' xudau' cheɛ dios nu'ula Diana, ne bedáu' cheɛ da bexruij na zran xabáa. ³⁶ Quebe nu seque' tábaga' da nigá. Cheɛ le' na' le sua zrize, ne quebe bi gunle da quebe ne guxúe xánnele. ³⁷ Benne' caní nache'le nigá quebe bi da calela ne xelune', ne quebe bi schanni' ne xelenné' cheɛ dios nu'ula cheɛle. ³⁸ Che Demetrio, ne benne' ca' dxelune' zrin nen le' dxélaca lazre' xelagu zria cheɛ tu benne', zaj zra' benne' dxuluchi'e da dxaca, ne zaj zua xu'u lawe' ca' naga gaca xelawé' zría cheɛ benne' ca'. ³⁹ Na' che le'e bi xetú da nábale, dxal-la' nábale na naga zaj nazraga benne' xu'u lawe' ca dxenná bea da bdxixruij bea César. ⁴⁰ Na'a zúadxu stebe ga gaze nu gagu zria cheɛdxu ca naca da bendxu, xelenné' dxedábaga dxu xu'u lawe' lawe' da quebe seque' bi xechébedxu che nu gagu zria dxi'u ne cheɛ da guca na'a.

⁴¹ Ca gudé gunné' da nigá, na' bze' benne' zan ca' dizra'.

20

Pablo dxedé' ga nababa Macedonia ne Grecia

¹ Gate gudé guca da stebe na' lu xezre Efeso, na' Pablo btupe' benne' ca' dxeléajle'e cheɛ Jesús cheɛ guzéajni'ine' le'. Nadxa bze' benne' ca' dizra', ne bnide' le', na' guzé'e zéajé' xezre ca' zaj nababa Macedonia. ² Xeajné'e bíchedxu ca' zaj zré'e xúgute' xézredu ca', ne btípalé'e lazre' benne' ca' ne cheɛ dizra' da bchálajlene' le'. Ca gudé na' bezrine' naga nababa Grecia. ³ Begá'ane' na' chunna beu', na' gudé na' gate ba zuate' chu'e tu lu da dxedá lawe' nisadau' chéajé' xezre ca' zaj nababa Siria, guque' bé'ene' ba zaj nun judío ca' ca da xelune' cheɛ'. Cheɛ le' na' gulú'u bi'e xezé'e ni'e té'e' naga nababa Macedonia.

⁴ Belún le' tuze Sópater, benne' xezre Berea, ne Aristarco, ne Segundo, benne'

xezre Tesalónica na', ne Gayo, benne' xezre Derbe, ne Timoteo, ne Tíquico, ne Trófimo, benne' ca' chee xezre ca' zaj nababa Asia. ⁵ Bi bíchedxu caní gulebía lawe' launtu', neda', Lucas, ne xezícadxa ljwezre Pablo, na' gulebeze' netu' lu xezre Troas. ⁶ Netu', gate gudé laní gate dxelagu benne' judío xeta xtila da quebe nachixre cua zichaj chee na, guxú'untu' tu lu da dxedá lawe' nísadau', na' beza'ntu' xezre Filipos. Zra gazxu' zra na' xeajzrentu' bi bíchedxu ca' lu xezre Troas, naga guzúantu' gazre zra.

Da ben Pablo lu xezre Troas

⁷ Zra nedxu chee da gazre zra bezrágantu' chee gáguntu' da dxusá lázredxu ca guca gate gute Xránadxu, na' Pablo bsédene' bi bíchedxu ca'. Ben na ba xen xeza'ntu' zra xula, na' chee le na' bchálajqueze Pablo cadxa bzrinte dxela. ⁸ Nazrágantu' tu xu'u da zua chunna cuía sibe, na' zaj zéle'e xi' da dxulusení na. ⁹ Tu bi cuide' zríabe' ga dxu'u lení, na' gate Pablo bsetúnnadxe' xrtizre', na' guca wásele'e bi cuide' na, na' naga xeajcheté na, na' dxásetebe' gubíxrebe' chunna cuía sibe, na' xeajlechise'-be' ba nátebe'. ¹⁰ Nadxa betaj Pablo, na' gulégüe' bequé'e-be', ne bnide'-be'. Nadxa guzre' bi bíchedxu ca':

—Quebe zrébele. Nabanbe'.

¹¹ Nadxa Pablo begüéne' bezrine' chunna cuía sibe na'. Na' bzúzruje' xeta xtila gudawe', na' bezú lawe' dxuchálaje' cadxa guxaníte. Zra na' bezé'e na'. ¹² Nadxa bíchedxu ca' belexeché'e bi na' gubíxrebe' ba bexaca banbe', na' xúgute' gulezúe' lu xel-la' dxeleznén lazre'.

Pablo dxexeze'e xezre Troas xezrine' xezre Mileto

¹³ Netu' guzríla launtu' lau Pablo, na' guxu'untu' lu da dxedá lawe' nísadau', na' bzrintu' xezre Asón naga xezrágantu' Pablo ca ba nun le' lawe' da guca lazre' zéaje' ní'aze'. ¹⁴ Gate bezrágantu' le' lu xezre Asón, na' guxú'e lu da dxedá lawe' nísadau' naga xu'untu', na' guxíajntu' xezre Mitilene. ¹⁵ Beza'ntu' na', na' zra xula bedentu' le nna' xezre Quío, na' xetú zra, zra xula bezrintu' lu xezre Samos. Na' guzúantu' xezre Trogilio naga bezí' lázrentu', na' zra xula bzrintu' xezre Mileto. ¹⁶ Ca' bentu' chee quebe guzré'te cantu' naga nababa Asia. Chee le na' Pablo quebe guca lazre' chéaje' Efeso lawe' da guca lazre' xezrinze' lu xezre Jerusalén chee sué' na' lu zra Pentecostés che ba guca.

Pablo dxuchálajlene' benne' gula dxeléajle'e chee Jesús, benne' zaj zre'e Efeso

¹⁷ Ca zrantu' lu xezre Mileto, Pablo gusel-le' tu benne' cheajnné' benne' gula ca' dxeléajle'e chee Jesús zaj zre'e xezre Efeso. ¹⁸ Gate belelá' benne' ca', Pablo guzre' le':

—Le'e nézquezle ca bēna' neda' xúgute' zra ca gudé bla'a ga nababa Asia.

¹⁹ Xúgute' zra guzúa' lálwela le'e dxuna' zrin chee Xránadxu duté xel-la' dxexruj lazre', ne zane' lasa gudxezra', na' gudéa' lu zane' da guzxacá' ca naca da gulaca lazre' benne' judío ca' xeluné' chia'. ²⁰ Bchálajlena' le'e xúgute' da naca na xrlátaje, ne bsédeda' le'e lálwela benne' zan, ne lízrquezle. ²¹ Benne' zaj naque' judío, ne benne' quebe zaj naca judío, gúchequeza' benne' ca' dxal-la' xelexebí'i lazre' lau Dios, ne xeléajle'e chee Xránadxu Jesucristo. ²² Na'a zexá'a Jerusalén, ca dxenná be'e Be' Lá'azxa neda', ne quebe nezda' bi gaca chia' na'. ²³ Tuze da nezda', lu xúgute' xezre ca' naga dxedéa', Be' Lá'azxa dxé'e neda' dxal-la' chu'a lizre xia, ne tea' zane' xel-la' zi'. ²⁴ Quebe dxebe'a gunne xue chee da nigá, ne quebe bi zaca xel-la' nabán chia', san tuze che gaca chéajlena' ca naca da dxuna', ne chee gusexúzrqueza' guna' ca naca da nusebaga Xránadxu Jesús neda', guchálaja' dizra' chawe' ca nazrí'i Dios dxi'u.

²⁵ 'Nézquezda' netule le'e, ba bchálajlëna' le'e ca dxenná bea Dios, québedxa lé'ele neda'. ²⁶ Chee lë na', dxaca lazra' xapa' le'e na'a, quebe nabaga' zria ne chee tule le'e, ²⁷ lawe' da ba bzenda' le'e ca naca da dxaca lazre' Dios gunë', ne quebe bi bcá'ana' da quebe bzéajni'ida' le'e. ²⁸ Chee lë na', le guxúe cuínale, ne le guxúe ca naca benne' ca' nácale tuze, benne' ca' Be' Lá'azxa ba nuzúe' le'e ládujla lë' chee chu'u lu na'le guxuele benne' ca' zaj nazrague' chee Xránadxu, benne' ca' naxá'aweng' nen dxen cheéqueze'. ²⁹ Nezda' gate xezá'a neda' xeledá' bal-la benne' xelaca lazre' guzría xi'e benne' zaj nazraga chee Xránadxu ca dxelún becu' xi'a, be snia ca' dxuluzría xiba' zrila' ca'. ³⁰ Ládujla le'e weledá' bal-la benne' xulusédene' da wen lazre', ne quegá da li, chee chjácále benne' ca' dxeléajlë' chee Jesús lë'. ³¹ Chee lë na', le guxúe cuínale. Le gusá' lázrele ca' beña' chun iza, te zra ne chizrele quebe bsana' bzéajni'ida' le'e tu tule le'e, ne gudxézretea'.

³² 'Na'a, biche ljwezra', dxuzúa' le'e lu na' Dios, ne lu dizra' chee xel-la' zri'i lazre' chee', da napa na xel-la' waca chee gun na le'e benne' chuchu lazre', ne chee guzúa na le'e lówela xúgutë benne' ca' ba guleaj Dios cheéqueze'. ³³ Quebe guca lazra' neda' si'a chia' dumí ne zra lana nu benne'. ³⁴ Nézquezle le'e ca beña', beña' zrin nen ni'a ná'queza' chee guta' da guchíneda' neda', ne da gulechinne benne' ca' gualaque' neda' tuze. ³⁵ Blé'equezda' le'e, ca'an dxal-la' gunle zrin chee séquele gácalele benne' dxelexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na chee benne' dxunexruz, quézcala chee benne' si' lu ne'e."

³⁶ Ca gudé gunná Pablo da nigá, na' bzu zribe', ne bchálajlëne' Dios nen xúgutë benne' ca'. ³⁷ Xúgutë' gulebezre', na' bulunide', ne bulunupë' Pablo. ³⁸ Belexewí'inele'ëne' lawe' da guzre' lë' québedxa xeledé'ene' lë'. Na' xjácálenë' lë' naga bexu'e lu da dxedá lawe' nísadau'.

21

Pablo dxezrine' xezre Jerusalén

¹ Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexíajtecentu' naga dxe' xezre Cos, na' zra xula gudentu' naga dxe' xezre Rodas, na' gudé na' bzrintu' xezre Pátara. ² Lu xezre Pátara xeajxrácantu' tu da dxedá lawe' nísadau' da zeaj na naga nababa Fenicia. Na' guxu'untu' lu da dxedá lawe' nísadau' nigá, na' beza'ntu' na'. ³ Gate gudentu' naga dxe' xezr la xu Chipre, blé'entu' na' chalá'a xéglala, na' bexíajtecentu', bzrintu' lu xezre ca' zaj nababa Siria. Lu xezre Tiro ben na ba xen xuluxulétajë' xua' da nua da dxedá lawe' nísadau' na', na' chee lë na' bzrintu' na'. ⁴ Na' bezrágantu' benne' ca' dxeléajlë' chee Jesús, benne' zaj zre'e xezre Tiro na', na' begá'anantu' nen benne' ca' gazre zra. Benne' caní, lawe' da bzéajni'i Be' Lá'azxa lë' da gaca, gulé'e Pablo quebe dxal-la' chéajë' Jerusalén. ⁵ Gate gudé guca gazre zra ca', na' zua xezá'ntu' na'. Xúgutë benne' ca' dxeléajlë' chee Xránadxu, ne zru'ule' ca', ne bidu chee' ca' gusá'acalëne' netu' bedxúajtëntu' xezre na', na' dxu'a nísadau' na' bzu zribentu' bchálajlëntu' Dios. ⁶ Nadxa bzë ljwézrentu' dizra', ne bnídatë ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belexezrine' lizre'.

⁷ Beza'ntu' Tiro, gudentu' lu nísadau', ne bzrintëntu' xezre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra. ⁸ Zra xula Pablo, ne netu' zrálëntu' lë' bezá'ntu' na', na' bzrintu' xezre Cesarea. Na' bzrintu' lizre Felipe, benne' dxedá dxuchálajë' dizra' chee Dios.

Naque' tu benne' gazre, benne' ca' buluzúa gubáz ca' xelunge' zrin chee Jesús. Begá'anantu' nen benne' nigá. ⁹ Felipe na' zaj zra' tapa zrí'ine' nu'ula quebe ne xuluchaga na'abe', ne dxuluchálajbe' waláz chee Dios. ¹⁰ Guzúantu' na' zane' zra gate bla' tu benne' le' Agabo chee xezre ca' zaj nababa Judea. Naque' benne' dxuchálajé' waláz chee Dios. ¹¹ Agabo na' bide' bedajnné' netu'. Guqué'è bazxu dxu'a le'è chee Pablo, na' bchéajé' na ni'a na' cuine', dxenné':

—Be' Lá'azxa dxenné' judío ca' lu xezre Jerusalén xuluchéaj caní benne' xrane bazxu dxu'a le'è nigá, na' xuludé' le' lu na' benne' zitu' ca'.

¹² Gate bentu' netu', ne benne' Cesarea da nigá, na' guta' xuentu' Pablo quebe chéajé' Jerusalén. ¹³ Pablo bechébe':

—¿Bizr chee na' dxebézrele, ne dxuzúale neda' xel-la' dxewí'ine lazre'? Ba zúaqueza', quegá tuze xuluchéajé' neda', san la gázqueze zua' chee gatia' lu xezre Jerusalén ne chee Xránadxu Jesús.

¹⁴ Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

¹⁵ Gudé na' bsení'antu' cheentu', na' guxíajntu' Jerusalén. ¹⁶ Na' gusiá'acale bal-la benne' netu', benne' Cesarea dxeléajlé'è chee Jesús, na' ládujla benne' ca' zua tu benne' Chipre le' Mnasón, zane' iza ba zeaj dxéajlé'è chee Jesús, na' lizre benne' nigá dxal-la' zrintu' súantu'.

Pablo zeajnné'è Jacobo

¹⁷ Gate bzrintu' Jerusalén, bi bíchedxu ca' belezí' lu ne'è netu' duté xel-la' dxelebé. ¹⁸ Zra xula Pablo guxíajlene' netu' xeajnná'ntu' Jacobo, na' zaj zrá'queze na' xúgute benne' gula ca' dxeléajlé'è chee Jesús. ¹⁹ Pablo bgape' le' diuzre, na' bzenne' benne' ca' tu tu da ben Dios lu na' le' ládujla benne' quebe zaj naque' judío. ²⁰ Gate belenne' ca', na' belúe lá'ane' Dios. Nadxa gulé'è Pablo:

—Chawe' naca na, bi bícha'dau'. Dxelé'equezenu' zane gaxúa benne' judío dxeléajlé'è chee Jesús, na' xúgute' dxelenné' dxun na ba xen chéajledxu da bdxixruj bea Moisés. ²¹ Zaj zra' benne' ba gulé'è benne' judío caní lue' dxusédenu' xúgute benne' judío zaj zre'è zitu' québedxa xelunge' ca da gunná be'e Moisés, ne quebe xelechugue' late' béla'dau' chee bel-la' dxen chee bidu biu chee' ca', ne quebe chjácálene' ca naca da zéajledxu dxi'u dxundxu.

²² ¿Ájala dxal-la' gundxu? Benne' judío caní welezrague' gate xelenne' ba bla'u. ²³ Cháwedxa gunu' da caní: Zaj zra' tapa benne' lávela dxi'u dxal-la' xelunge' tu da zaj nachebe lazre' lau Dios. ²⁴ Guché benne' caní chjá'acalene' lue', ne bca'ana chawe' cuinu' lau Dios nen benne' caní, na' gudizruj ca naca da dxal-la' xelízruje' benne' guchibe' xicha xichaj benne' caní. Ca'an gaca, xúgute benne' xeleque bé'ene' quebe naca da li ca da gulenné' chiu', san la gázqueze lue' dxunu' xúgute ca da dxenná da nadxixruj bea na. ²⁵ Ca naca chee benne' ca' quebe zaj naque' judío, ba bzúajntu' chee' quebe dxun na ba xen xelunge' da caní, san tuze dxal-la' xulusane' da naca chee bedáu' xiaj xaga ca', ne quebe xelawé' dxen chee be xixre' ca', ne quebe xelawé' béla' chee be xixre', be quebe bdxuaj dxen, ne quebe xelunge' dul-la chee da dxucá'ana sban bèneache.

Dxelé'è Pablo lu xudau'

²⁶ Nadxa Pablo guché'è tapa benne' ca', na' zra xula bca'ana chawe' cuine' lau Dios nen benne' ca', na' belexú'è lu xudau' chee buluzenne' bxruze ca'

gate xexuzre zra ca' chee da dxulucá'ana chawe' cuine' lau Dios, gate na' tu tue' dxal-la' xelegú'e guna'.

²⁷ Gate ba zua xuzre da gazre zra, na' bal-la judío ca', benne' zá'aca xezre ca' zaj nababa Asia, belelé'eng' Pablo lu xudau' na', na' buluchague' ca naca benne' ca' zaj zre'e na', na' gulebía che'e Pablo. ²⁸ Dxelenné' zizraj:

—Benne' Israel, le gácale netu'. Benne' nigá dxedé' gáteteze dxusédené' xúgute' bènneache xuluzú'e' chalá'ala xezr la xu cheedxu, ne da bdxixruj be'e Moisés, ne xudau' nigá, ne ba guzre'e lu xudau' nigá bal-la benne' griego. Dxucá'ana dítaje' lataj lá'azxa nigá.

²⁹ Caní gulenné' lawe' da ba belelé'eng' Pablo lu xezre na' nen Trófimo, tu benne' xezre Efeso, na' dxeléquene' gulú'u Pablo le' lu xudau'.

³⁰ Ca naca benne' zaj zre'e xezre na' beledxé'ena zrague', ne zá'aca chégü'e'. Nadxa gulel-le' Pablo, ne gulezrube xue' le' chale'aj xudau' na', na' bulusézxuje' dxa xu'u chee na. ³¹ Ba zuate xelútie' Pablo gate benne' Roma dxenná be'e lu wedil-la benne' ba dxeledxé'ena zraga ca naca benne' zaj zre'e xezre Jerusalén. ³² Nadxa benne' nigá bhague' benne' dxjaque' wedil-la nen benne' dxenná bé'eng' le', na' xjaca chégü'e' naga zaj nazraga benne' zan ca'. Gate benne' ca' belelé'eng' benne' na' dxenná be'e lu wedil-la, na' bulusane' quebedxa buluzálaje' Pablo. ³³ Nadxa gubiga' benne' na' dxenná be'e lu wedil-la, na' gudel-le' Pablo, ne gunná bé'eng' xuluchéaj'e' le' chupa du xia. Gudé na' bchebe' benne' ca' nua' benne' nigá, ne bi ba bene'. ³⁴ Benne' ca' gulebezre xe'e da zan da gulenné'. Ca'an guca benne' dxenná be'e lu wedil-la quebe bi guxéajni'ing' lawe' da dxelúnle'e' schaga'. Nadxa gunná bé'eng' xelech'e' Pablo xu'u naga zaj zra' benne' dxjaque' wedil-la, benne' zan ca'. ³⁵ Gate belezrine' dxa xu'u naga zaj zra' benne' dxjaque' wedil-la, na' benne' dxjaque' wedil-la belexú'e' Pablo lu na'ze' lawe' da dxelúle'e' benne' zan ca' Pablo, ³⁶ na' xúgute' zá'aque' cuzre na' dxelenné' zizraj:

—Gate bènnea'.

Pablo dxexechebe' lau benne' zan ca'

³⁷ Gate dxelegú'e' Pablo lu xu'u naga zaj zra' benne' dxjaque' wedil-la, le' guzre' benne' na' dxenná bé'eng' le':

—¿Waca bi nniá'?

Na' bchebe bènnea' le':

—¿Waca nneu' dizra' griego? ³⁸ ¿Quebe nacu' lue' benne' Egipto na' ba zeaj tu chupa iza btupe' benne' ca' guledábague' xu'u lawe', na' guché'e' tapa gaxúa benne' dxelutie' benne', xeajzre'e' le' le'e' xixre' lawe' lataj?

³⁹ Nadxa Pablo guzre' benne' na':

—Neda' naca' benne' judío, ne nababa' tu xezre blau chee ga nababa Cilicia. Ben culuén gunu' neda' lataj guchálajlene' benne' zan caní.

⁴⁰ Benne' na' be'e le' lataj, na' Pablo guzé' lachila chee xu'u na', na' guchisa ne'e' chee xelezúa zri benne' zan ca'. Gate gudxé' zri, na' bchálajlene' le' dizra' hebreo, dxenné':

22

¹—Le'e, benne' gula, ne le'e, bi bicha', le xen ca da xapa' le'e da dxexecheba' cheele.

² Gate belenne' dxuchálajle Pablo le' dizra' hebreo, na' gulezúadxé' zrize, na' Pablo guzre' le':

³—Neda' naca' judío. Gúlaja' xezre Tarso naga nababa Cilicia, na' bgula' Jerusalén nigá, na' Gamaliel bsédené' neda' cáteze naca da nadxixruj bea na

chee xra xrtáudxu ca'. Tu dxue lázrezqueza' dxuna' da naca chee Dios cáteze dxunle le'e na'a. ⁴ Nédxute gudáu zi' xuzra' benne' ca' dxeléajle'e chee Jesús, ne bêtequeza' bal-le', ne guche'a benne' biu, ne nu'ula chee, na' bzra'a le' lizre xia. ⁵ Bxruze blau, ne xúgute benne' gula sina waca xelexechébequeze' belunne' neda' xiche chee bi'a na lau bi bíchedxu judío ca' zaj zre'e xezre Damasco. Guxá'a na' xeajxedilja' naga zaj zra' benne' ca' dxeléajle'e chee Jesús chee che'a benne' ca' Jerusalén nigá, chee xeledé'e ba xa'.

⁶ 'Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa. ⁷ Na' xeajchazia' lu xu, ne benda' chi'i tu benne' guzre' neda': "Saulo, Saulo, ¿bizr chee na' nau zi' xuzru' neda'?" ⁸ Nadxa bcheba' le': ¿Núzraqueze lue', Xran? Na' guzre' neda': "Neda' naca' Jesús, benne' Nazaret, bénnea' nau zi' xuzru' lue'." ⁹ Benne' ca' zralene' neda' belelé'eng' xi' na', ne belezrebe', san quebe belenne' chi'i bénnea' gunné' neda'. ¹⁰ Nadxa gunnéa': ¿Bi dxal-la' guna', Xran? Na' Xránadxu gunné': "Guxasa, ne guxíajteze Damasco, ga na' zua benne' xel'é'e lue' ca da dxal-la' gunu'." ¹¹ Benne' ca' zjácálene' neda' belequ'é'e na'a zeajntu' Damasco lawe' da bca'ana xi' na' neda' la chul-la.

¹² 'Zua na' tu benne' le' Ananías, benne' dxune' du lazre' ca naca da bdxixruj be'e Moisés, na' xúgute benne' judío zaj zre'e Damasco dxelenné' cháwele'e ca dxune'. ¹³ Ananías na' ble'e naga zua' neda', na' guzre' neda': "Bicha' Saulo, na'a xele'enu'." Lu zra ná'queze bel'é'etēda', ne ble'eda' benne' na'. ¹⁴ Nadxa guzre' neda': "Dios chee xra xrtáudxu guqu'é'e lue' nédxute chee gúnbe'u ca naca da dxaca lazre' Le', ne chee le'enu' Benne' xrlátaje chee Dios, ne xennu' chi'i Bénnea'. ¹⁵ Lue' guchálaju' da naca chee Le' lau ca naca bénneache zaj zre'e lu xezre la xu, ne guzennu' benne' ca' ca naca da blé'enu', ne da bennu'. ¹⁶ Na'a, ¿bizr chee na' dxezrenu'? Guxasa, gudxúa nisa, ne bxren lazre' chee Xránu' Dios chee cue'e dul-la chiu'."

¹⁷ 'Gate bezrina' Jerusalén, guxá'a lu xudau' xeajchálajlena' Dios, na' ble'eda' tu da ble'e Dios neda'. ¹⁸ Ble'eda' Xránadxu, na' guzre' neda': "Bdx-uajche Jerusalén nigá lawe' da quebe xezezi'e ca naca da guchálaju' chia'." ¹⁹ Nadxa gucha' Le': Xran, zaj nézquezne' guxá'a neda' xúgute xu'u naga dxelezraga judío ca', ne xeajxri'a benne' ca' dxeléajle'e chiu', na' bzra'a le' lizre xia, ne bzálajqueza' benne' ca', ²⁰ na' gate belúti'e Esteban, benne' wen zrin chiu', na' zéqueza' neda' naca' tuze nen benne' ca' belúti'e le'. ²¹ Xránadxu guzre' neda': "Guxíaj, lawe' da sel-la' lue' zitu' naga zaj zra' benne' quebe zaj naque' judío."

Da ben benne' dxenná be'e lu wedil-la

²² Dizra' caní belenne', san lu dizra' nigá gulezú lawe' dxelebezre xe'e, dxelenné':

— ¡Gate benne' nigá! ¡Québedxa dxal-la' gaca bane'!

²³ Na' gulebezre xá'aqueze', ne buluzale' sibe zra lang', ne belequ'é'e bxrte xu da buluzale' sibe. ²⁴ Chee le' na' benne' na' dxenná be'e lu wedil-la gunná bé'eng' xelegú'e Pablo lu xu'ula, ne xelu'e le' chee nne' da li, bizr chee na' gulebezre xa'a benne' zan ca' chee le'. ²⁵ Gate bexuzre buluchéaj'e na' Pablo, chee xelu'e le', Pablo guzre' tu benne' dxeaje' wedil-la zu'e na':

— ¿Naca chee le'e güele tu benne' nababe' Roma, ne quebe ne guchí'ale aja naca chee'?

²⁶ Gate ben benne' dxeaje' wedil-la da nigá, na' guxíaje' xeajezre' benne' dxenná be'e lu wedil-la:

—Guxúe xánniu' bi na' gunu', lawe' da nababa Roma benne' nigá.

²⁷ Nadxa benne' nigá gubigue' naga ze Pablo, na' bchebe' le':

—¿Da li na' nababu' Roma?

Pablo bechebe':

—Awe'.

²⁸ Na' benne' dxenná be'e lu wedil-la gunné':

—Neda' da zrenté gudízruja' chee gubaba' Roma.

Na' Pablo gunné':

—Neda' nabábaqueza' Roma gate gúlajtea'.

²⁹ Gate belenne' da nigá, na' benne' ca' ba zaj ze' xelu'e Pablo belexecuase' cuita le', na' la gaze benne' na' dxenná be'e lu wedil-la, gate guque bé'ene' nababa Pablo Roma, bzrebe' lawe' da nuchéaje' le' du xia.

Pablo dxezriné' lau benne' xu'u lawe' blau ca' chee judío ca'

³⁰ Zra xula, benne' na' dxenná be'e lu wedil-la guca lazre' nézene' bi chee na' dxelagu zria judío ca' Pablo, na' beque'e du xia na' nadxéaj na' na' Pablo, na' gunná bé'ene' xelezraga benne' xíchaje ca' chee bxruze, ne xúgute benne' xu'u lawe' blau. Nadxa guléaje' Pablo, na' bze' le' lau benne' ca'.

23

¹ Pablo gunné'e benne' xu'u lawe' blau ca', na' guzre' le':

—Le'e, bi bicha', ca naca xúgute da ba be'na' neda', zua zri xichaj lázrdawa' lau Dios.

² Nadxa Ananías, bxruze blau, gunná bé'ene' benne' zaj ze' na' xelegape' dxu'a Pablo. ³ Na' Pablo bechebe':

—Dios güe'e lue', benne' dxun láweze da xrlátaje. Dxe'u na' chee guchi'u chia' neda' ca dxenná bea da nadxixruj bea Dios. ¿Bizr chee na' dxunu' da dxedábaga da bdxixruje', dxenná be'enu' xelu'e neda'?

⁴ Benne' ca' zaj zre'e na' gulé'e Pablo:

—¿Caní schanni' dxennáu' chee bxruze blau chee Dios?

⁵ Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche chee Dios: Quebe nneu' schanni' chee benne' dxenná be'e lázriu'.

⁶ Nadxa guque bé'ene' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj naue' fariseo ca', na' dxuchí'ale ca naca chia' lawe' da dxebeza lazra' xelexebán benne' gate.

⁷ Gate gunná Pablo da nigá, na' benne' fariseo ca', ne benne' saduceo ca' gulezú lawe' dxulutil-la ljwezre' dizra', na' gulaca chupa la'a ca naca benne' ca'. ⁸ Ca'an guca lawe' da dxelenná saduceo ca' quebe xelexebán benne' gate, ne quebe nu chilá' gubáz chee xabáa ca', ne quebe nu chilá' bé'ne' du xu'u bénneache, san benne' fariseo ca' dxeléajle'e dxata' xúgute da ca'. ⁹ Xúgute' gulebezre xe'e, na' gulezé bal-la benne' dxuluxuzájle'e da nadxixruj bea na, benne' zaj naque' fariseo, na' gulenné':

—Benne' nigá quebe bi da caléla ne guné'. Che nu bédnedu xu'u bénneache, u tu gubáz chee xabáa ba gunné' le', quebe dxal-la' nnedxu chee Dios.

¹⁰ Na' bulutíl-lale'e ljwezre' dizra', na' benne' na' dxenná be'e lu wedil-la bzrebe' xelexe' le' Pablo xuluzúzruje' le'. Chee le' na' gunná bé'ene' benne' dxjaca wedil-la xelexebéaje' le' lálwela benne' ca', ne xelexeché'e le' lu xu'u na' naga zaj zra' benne' dxjaque' wedil-la.

11 Xela xula, Xránadxu ble'e lawe' Pablo, na' guzre' le':

—Ben dipa lazru', Pablo, lawe' da ca bchálajquezu' chia' Jerusalén nigá, ca'an dxál-la'queze guchálaju' chia' lu xezre Roma.

Zaj nun benne' judío ca xelunē' xelútiē' Pablo

12 Zra xula bal-la benne' judío ca' belunē' tuze dizra' xelútiē' Pablo. Gu-lenné':

—Dios cu'e dxi'u de' che bi xi'aj gágudxu, ne quebe ne gútedxu Pablo.

13 Nadé chua benne' biu ca' zaj nachēbe lazre' xelunē' da nigá. 14 Benne' caní xjaque' lau benne' xíchaje ca' chee bxruze ca', ne benne' gula sina ca', na' galenné':

—Netu' ba guchēbe lázrentu' lau Dios cu'e netu' de' che bi gáguntu', ne quebe ne gútentu' Pablo. 15 Na'a, le'e, ne xezícaxa benne' xu'u lawe' blau ca' dxal-la' ná bale benne' dxenná be'e lu wedil-la xedajlegü'e Pablo wxre zila laule le'e, xe le bēnnea' dxaca lázrele guchēbe xánnele Pablo, na' netu' sē cuásantu' gútentu' le' québela ne xidē' nigá.

16 Zri'ine bi zan Pablo benbe' ca naca da nigá, na' guxiájbe' naga zua Pablo cheajézrebe' le'. 17 Nadxa Pablo gunné' tu benne' xu'u lu ne'e benne' ca' dxjaque' wedil-la, na' guzre' le':

—Guché' bi cuide' nigá lau benne' xíchaje chiu' lawe' da de da dxal-la' xēbe' le'.

18 Na' benne' na' xu'u lu ne'e benne' ca' dxjaque' wedil-la guché'e-be' lau xrane', na' guzre' le':

—Pablo, bēnnea' nadxéaje' gunné' neda', na' gunabe' xedajgu'a bi cuide' nigá naga zu' lawe' da de da dxal-la' xēbe' lue'.

19 Benne' xíchaje na' guqu'é na' bi cuide' na', na' guché'e-be' chalá'ala, ne bchēbe'-be':

—¿Bi dxaca lazru' xu'u neda'?

20 Na' gunná bi cuide' na', gúzrebe' le':

—Benne' judío ca' ba zaj nunē' tuze dizra' xelenabe' lue' chē'u Pablo wxre zila lau benne' xu'u lawe' blau ca', xelenné' dxelaca lazre' xuluchēbe xánne' le'. 21 Quebe chéajle'u chee benne' ca' lawe' da nadé chua benne' ca' xelebezē' le' bagácheze, ne ba gulechēbe lazre' lau Dios Le' cu'e benne' ca' de' che bi xele'aj xelawe', ne quebe ne xelútiē' Pablo. Na'a ba zaj zuē' dxelebezē' xrtizru'.

22 Nadxa benne' xíchaje na' bze' bi cuide' na' dizra', na' guzre'-be' quebe nu xēbe' ba xejézrebe' le' caní.

Dxelesel-le' Pablo lau Félix, benne' xu'u lu ne'e xezr la xu na'

23 Benne' xíchaje na' gunné' chupa benne' chee', benne' xu'u lu ne'e benne' ca' dxjaque' wedil-la, na' gunná bé'eng' le' xulucueze' chupa gaxúa benne' dxjaque' wedil-la, benne' sa'aca ni'e, ne ga xun chi benne' dxjaque' wedil-la, benne' xelebia' chrina', ne chupa gaxúa benne' dxjaque' wedil-la, benne' xelu'e xia tunna, chee' chjaque' lu xezre Cesarea dxedá' ga chizrela. 24 La gázqueze gunná bé'eng' xulucueze' bzrina' cuía Pablo, ne gunná bé'eng' xeleché'e le' cháwedau' lau Félix, benne' xu'u lu ne'e xezr la xu na' waláz chee' Roma. 25 Gusel-le' tu xiche da belúa benne' dxjaque' wedil-la. Caní naxúaj na:

26 Neda' Claudio, dxugapa' lue' diuzre Félix, benne' xu'u lu na'u xezr la xu nigá. 27 Benne' judío ca' gulel-le' benne' nigá ná'tega na'a chee xelútiē' le'. Gate gunezda' neda' nababe' Roma, na' guxiájlena' benne' chia' ca', benne'

dxjaque' wedil-la, xeajselá' le'. ²⁸ Guca lazra' nezda' bi dxelagu zria le', na' guche'a le' lau benne' xu'u lawe' ca' chee judío ca'. ²⁹ Na' gunezda' dxelagu zria le' da naca chee da nadxixruj bea chee judío ca', san quebe naca na chee xelúti'e' le', ne chee chu'e lizre xia. ³⁰ Gate benda' ca ba zaj nun judío ca' chee xelúti'e' le', na' dxusel-la' le' naga zu', ne ba gucha' benne' ca' dxelagu zria le' waca xelawe' le' zria lau lue'. Gaca xrlátaje chiu'.

³¹ Nadxa benne' dxjaque' wedil-la belune' ca gunná be'e benne' xíchaje chee', na' beleché'e Pablo chizrela, na' belezrine' xezre Antípatris. ³² Zra xula benne' dxjaca wedil-la, benne' ca' dxeledá' ní'aze, belexezrine' Jerusalén, na' benne' dxjaque' wedil-la zaj zrie' bzrina' beleché'e Pablo naga dxal-la' zrine'. ³³ Gate belezrine' xezre Cesarea, na' bulunézruje' benne' xu'u lu ne'e xezr la xu na' xiche na', ne buludé' Pablo lu ne'e. ³⁴ Ca bexuzre blabe' xiche na', na' benne' xu'u lu ne'e xezr la xu na' bchébe' ga benne' Pablo. Gate benne' naque' benne' chee xezre nababa Cilicia, ³⁵ na' guzre' le'.

—Guchi'a chee da dxaca chiu' gate xeledá' benne' ca' dxelagu zria lue'.

Nadxa gunná bé'ene' cha benne' dxjaca wedil-la xuluxúe' Pablo naga zua xu'u lawe' chee Herodes.

24

Pablo dxuzri'e dizra' da dxácale na le' lau Félix

¹ Ca gudé gazxu' zra, Ananías, bxruze blau, bzrine' xezre Cesarea nen bal-benne' gula sina ca', ne tu benne' dxenné' waláz chee benne' ca', le' Tértulo. Benne' caní belezrine' lau benne' xu'u lu ne'e xezr la xu na' chee xelagu zria Pablo. ² Gate xeajlexrí'e Pablo, na' guzú lau Tértulo dxawe' xria Pablo, dxé'e Félix:

—Xcalenu' lue', benne' xu'u lu na'u xezr la xu nigá, lawe' da zúantu' xel-la' dxebeza zri lazre', na' da chawe' dxgua dxaca na cheentu', na' ca dxenná be'enu' netu' lu xel-la' sina chiu' dxexedxúaj na chawe'. ³ Xúgute da nigá dxezí'queze lu na'ntu' gáteteze na', ne dxentu' lue' xcalén cuinu', Félix. ⁴ Chee québedxa guntu' lue' zédete, dxata' xueda' lue' gun zren lazru' xennu' cheentu' tu chí'idau'. ⁵ Dxenná'antu' benne' nigá dxúnle'e da calela, ne gáteteze na' lu xezr la xu nigá dxune' benne' judío chupa la'a, ne naque' benne' xíchaje chee benne' ca' zaj da' tu benne' Nazaret. ⁶ Benne' nigá guca lazre' guzúe' chalá'ala xudau' cheentu', na' netu' gudél-lantu' le', ne guca lázrentu' guchí'antu' da naca chee' ca nadxixruj bea na cheentu'. ⁷ Na' Lisias, benne' dxenná be'e lu wedil-la, bequé'e le' lu na'ntu' xadía. ⁸ Na' gunné' che zaj zra benne' xelagu zrie' Le', dxal-la' xeledé'e lau lue'. Lue' gaca guchebu' benne' nigá, na' nézenu' naca da li zria dxáguntu' le'.

⁹ Benne' judío ca' zaj zre'e na' gulenné' naca da li xúgute da ca'. ¹⁰ Nadxa benne' xu'u lu ne'e xezr la xu na' guchisa ne'e chee guchalaj Pablo, na' gunná Pablo:

—Dxebéle'eda' dxunu' neda' lataj xecheba' lau lue', lawe' da nezda' naca xrlátaje ca dxuchi'u da dxaca chee xezr la xu cheentu' ba zeaj zane' iza. ¹¹ Lué'queze waca chéajni'inu' ba zeaj chazrinnu zraze bla'a Jerusalén chee güe lá'ana' Dios. ¹² Quebe belelé'eng' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' chee xezre na'. ¹³ Benne' caní quebe xezezé'quene' xululé'eng' naca da li ca zaj naca da dxelawe' neda' zria. ¹⁴ Tu da dxexechéba', dxucá'ana szrena' Dios chee xra xrtáudxu ca', dxuna' ca da dxelenná benne' caní naca na da

wen lazre', lawe' da dxéajle'a xúgute da naxúaj na lu xiche chee da nadxixruj bea na, ne chee benne' ca' buluchálaje' waláz chee Dios. ¹⁵ Neda' dxebeza lázrqueza' ca da gun Dios, ca dxelebeza lazre' benne' caní, dxebeza lázrentu' Dios gusebané' benne' gate ca', benne' xrlátaje, ne benne' ca' dxeluné' da calela. ¹⁶ Chee le na' dxue lazra' sua zri xichaj lázrdawa' lau Dios, ne lau bèneache ca'.

¹⁷ 'Ca gudé gudá' xezre xula ca' zane' iza, na' bezrina' lazria' chee gunézruja' da gácale na benne' xache' ca', ne cu'a guna' lau Dios. ¹⁸ Da nigá dxuna' neda' gate bal-la benne' judío chee xezre ca' zaj nababa Asia belexezrague' neda' lu xudau' ca gudé bca'ana chawe' cuina' cáteze naca da zéajlentu', san quebe nu benne' bchaga', ne quebe nu benne' guché'ena' zraga. ¹⁹ Benne' caní dxal-la' xelelé'e nigá chee xelawe' neda' zria che bi zua dxelaca chee' nen neda', ²⁰ san che quebe bi de, na' benne' caní zaj zre'e nigá dxal-la' xelenné' che bi belezrelené' da dxebaga' gate zua' lau benne' xu'u lawe' blau ca' chee judío ca'. ²¹ Tuze da bena' gate zua' lau benne' ca', gunnéa' zizraj: Na'a dxuchi'ale chia' lawe' da dxejli lazra' xelexebán benne' gate.

²² Gate Félix benne' da nigá, na' bca'ane' na cá'aze lawe' da neze xanne' le' ca naca chee benne' ca' dxeléajle'e chee Jesús, na' guzre' benne' ca':

—Gate xida Lisias, benne' dxenná be'e lu wedil-la, na' chéajni'idxeda' chee da nigá dxaca chee.

²³ Nadxa Félix gunná bé'ene' benne' dxenná be'e lu wedil-la, ne benne' ca' dxenná be'ene' xelexegu'e Pablo lu xu'u lawe' na', na' xelu'e le' lataj bi guné', ne xelu'e lataj benne' ljwezre Pablo cheajlenné'e le', ne bi xeluné' chee'.

²⁴ Gudé tu chupa zra Félix belé'e xetú nen zru'ule' Drusila, nu'ula judío, na' gunná bé'ene' bzin Pablo chee guchálajlene' le' ca naca xel-la' dxejli lazre' chee' chee Jesucristo. ²⁵ Gate Pablo bchálajlene' le' ca dxal-la' gundxu da xrlátaje, ne nna be'e cuínadxu, na' zrin zra guchi'a Dios cheedxu gate cheajsé chee xezr la xu, na' bzrebe Félix, ne guzre' Pablo:

—Bexíaj na'a. Gate nalátaja', na' nnéqueza' lue'.

²⁶ La gaze dxaca lazre' Félix gunezruj Pablo le' dumí chee gusané' le'. Chee le na' gunnéle'e Pablo chee guchálajlene' le'. ²⁷ Ca' guca, gudé chupa iza, na' Félix bedxúaje' xrlátaje' ga xu'u lu ne'e xezr la xu na', na' bedé tu benne' le' Porcio Festo waláz chee Félix. Félix bca'ane' Pablo lizre xia lawe' da guca lazre' xegá'ane' chawe' lau judío ca'.

25

Pablo dxexechebe' lau Festo

¹ Nadxa Festo bzrine' xezre Cesarea chee si' lu ne'e gaque' benne' xu'u lu ne'e xezr la xu na', na' gate guca chunna zra, guxíaje' Jerusalén. ² Lu xezre na' belezrin benne' xíchaje ca' chee bxruze ca', ne benne' judío blau ca' lau le', ne gulawe' zria Pablo. ³ Gulata' xuené' benne' xu'u lu ne'e xezr la xu na' sel-le' benne' cheajlexezri'e Pablo chee xezrine' Jerusalén. Benne' judío ca' ba zaj nune' xelúti'e Pablo la neza gate zezé'e na'. ⁴ Bechebe Festo ba xu'u Pablo lizre xia lu xezre Cesarea, na' léqueze' ba nune' chéaje' na' xetú chupa zra. ⁵ Na' guzre' benne' ca':

—Benne' ca' zaj zre'e lówela le'e, benne' zaj nape' xel-la' dxenná bea, dxal-la' chjácálené' neda' Cesarea, na' che benne' na' zua bi da calela da bene', waca gágule le' zria.

⁶ Festo begá'angé' Jerusalén ca du xrunu' ga chi zraze, na' bezrine' Cesarea. Zra xula gudxé'ē lataj blau chee', ne gunná bé'engé' xea'jlexrí'ē Pablo. ⁷ Gate bzrin Pablo lau benne' xu'u lu ne'ē xezr la xu na', na' gulebiga judío ca' zá'aca Jerusalén, ne gulágule'ē zria Pablo, san quebe guca xululé'engé' naca na da li. ⁸ Nadxa Pablo bechebe' waláz chee', gunné':

—Neda' quebe bi da calela ne guna', quegá chee' da nadxixruj bea chee' judío ca', ne quegá chee' xudau' chee', ne quegá chee' César.

⁹ Festo guca lazre' xegá'angé' xrlátaje lau benne' judío ca', na' bchebe' Pablo: —¿Dxaca lazru' chéaju' Jerusalén chee' guchi'a neda' ca naca chiu' na'?

¹⁰ Pablo bechebe':

—Zua' lau xu'u lawe' da nuzúa César naga dxal-la' zri'a ca naca chia'. Lue' nézqueznu' quebe bi da zrinnaj ne guna' chee' benne' judío ca'. ¹¹ Che ba bēna' tu da zrinnaj da dxun na gútele neda', waca gútele neda'. Che quebe bi de naca na da li ca naca zria da dxelawe' neda', quebe nu napa xel-la' dxenná bea gudé'ē neda' lu na' benne' ca'. Dxenaba' zri'a chia' lau César.

¹² Ca gudé' bchálajlene' benne' dxuluzéajni'i le', na' Festo guzre' Pablo:

—Ba gunabu' zri'a chiu' lau César. Chéaju' lau César.

Pablo dxezrine' lau Agripa, benne' wenná bea

¹³ Ca gudé zane' zra Agripa, benne' wenná bea, ne bi zane' belezrine' Cesarea chee' xulugape' Festo diuzre. ¹⁴ Gulezú'ē na' tu chupa zra, na' Festo bzenne' Agripa, benne' wenná bea na' ca naca chee' Pablo. Guzre' le':

—Zua tu benne' nigá, benne' bca'ana Félix lizre xia. ¹⁵ Gate guzúa' xezre Jerusalén, na' benne' xichajé' ca' chee' bxruze ca', ne benne' gula sina ca' chee' judío ca' gulenné' chee' benne' nigá, ne gulenabe' neda' chuga' chee' gatie'.

¹⁶ Neda' becheba' benne' ca', gunnía' benne' xu'u lawe' chee' Roma quebe nu benne' dxelechugue' chee' gatie' che quebe zrine' lau benne' ca' dxelawe' le' zria chee' xechébe' waláz chee'.

¹⁷ Chee' le' na', gate belelá' benne' ca' nigá, quebe guzreda', na' zra xula gudxe'a lataj blau chia', ne gunná be'eda' bla' benne' na'. ¹⁸ Benne' ca' gulawe' le' zria quebe bi gulenné' chee' ca da gúqueda' neda'. ¹⁹ Laze láweze da gulenné' chee' naca na ca naca da dxelájle'ē chee' Dios, ne chee' tu benne' le' Jesús, benne' gute, san dxenná Pablo naca bane'.

²⁰ Quebe bezréleda' ájala guna' chee' da na', na' bcheba' Pablo che dxaca lazre' chéaje' Jerusalén chee' zri'a ca naca chee' na'. ²¹ Nadxa le' gunabe' zri'a chee' lau César Augusto, na' gunná be'eda' xegá'angé' lizre xia cadxa séqueda' sel-la' le' lau César.

²² Nadxa gunná Agripa, dxé'ē Festo:

—La gaze neda' dxaca lazra' xenda' chee' benne' nigá.

Na' bechebe' Festo:

—Wxre xennu' chee'.

²³ Zra xula, gate belezrín Agripa, ne Berenice ga na', belú'ē lu dutē xel-la' szren nen benne' dxenná be'ē lu wedil-la, ne benne' blau ca' chee' xezre. Na' Festo gunná bé'engé' xea'jlexrí'ē Pablo, ²⁴ na' gunné':

—Agripa, benne' wenná bea, ne le'e, nazrágale nigá nen netu'. Nigá zua benne' na'. Benne' zan, benne' judío zaj zre'ē Jerusalén, ne benne' zaj zre'ē Cesarea nigá, gulenné' chee' benne' nigá, na' tu gulézqueze' neda' dxal-la' gatie'. ²⁵ Neda' dxéqueda' quebe bi bēne' da gudé na le' gatie', san léqueze' gunabe' zri'a chee' lau César. Chee' le' na' ba nuna' chee' sel-la' le' lau César.

²⁶ Quebe bi de da guzúaja' chee' Xrana' César ca naca chee' benne' nigá. Chee' le' na' dxuzúa' benne' nigá laule le'e, ne da naca bláuqueze, dxuzúa' le' lau lue',

wenná bea Agripa, chee guchebu' le' chee gata' late' da guzúaja' ca naca chee'.
 27 Dxéqueda' quebe naca chawe' sel-la' tu benne' nadxéaje' du xia, ne quebe
 nnia' bi da zria nape'.

26

Pablo dxexechebe' lau Agripa, benne' wenna' bea

1 Nadxa gunná wenna' bea Agripa, guzre' Pablo:
 —Waca xechebu'.

Na' Pablo guchisa ne'e, ne guzú lawe' dxuchálaje', dxenné':

2 —Dxebéle'eda' dxunu' neda' lataj dxuchálaja' lau lue', wenna' bea Agripa,
 chee xecheba' ca' da gulenná benne' judío chia' neda',³ ne da naca blaudxa,
 lawe' da nézqueznu' lue' ca naca da zéajlentu' netu', benne' judío ca', ne ca naca
 dizra' dxutil-la ljwézrentu'. Chee le' na' dxenaba' lue' xennu' chia' duté xel-la'
 zren lazre' chiu'.

4 'Xúgute' benne' judío ca' zaj nézengé' ca bēna' lazria', ne lu xezre Jerusalén
 gate nácatea' bidau'te. 5 Zaj nézqueze benne' ca', ne waca xelexechebe' che
 dxelaca lazre', ca nácatea' benne' cuide'te, naca' fariseo. Benne' fariseo ca'
 zjácaldxe' ca naca chee da dxeléajle' judío ca' chee Dios. 6 Na'a lawe' da
 dxebeza lazra' gusebán Dios benne' gate ca', ca guchebe lazre' chee xra
 xrtáuntu' ca', benne' ca' buluzúé' neda' lau xu'u lawe'. 7 Dxelebeza lazre'
 chazrinnu' cue' zri'ine zre sua Israel xeelé'ene' gaca ca naca da nigá guchebe
 lazre' Dios, na' chee le' na' dxulucá'ana szrené' Dios, ne dxelune' zrin chee' te
 zra ne chizrela. Na'a, wenna' bea Agripa, benne' judío ca' dxelawe' neda' zria
 lawe' da dxebeza lazra' ca naca da caníqueze da nachebe lazre' Dios. 8 ¿Quebe
 dxéajle'u gusebán Dios benne' gate ca'?

9 'Néda'queza' nédxute' gúqueda' da zan da dxal-la' guna' chee' benne' ca'
 dxeléajle' chee Jesús, benne' Nazaret. 10 Caní bēna' lu xezre Jerusalén. Lu
 xel-la' dxenná bea chee benne' xíchaje ca' chee bxruze ca', benne' zan bzra'a
 lizre xia, benne' dxeléajle' chee Jesús, na' gate belútié' benne' ca' neda'
 bēnqueza' tuze benne' ca' belútié' le'. 11 Zane' lásate' bdea' benne' ca' ba xa'
 chee xulusane' xel-la' dxeleajlí lazre' chee'. Caní bēna' xúgute' lu xu'u ca' naga
 dxelebzraga judío ca', na' lu xel-la' dxezrá'a chia' benne' ca', gudáu zi' xuzra'
 benne' ca' zaj zre'e lu xezre zitu' ca'.

12 'Chee guna' da nigá zexá'a xezre Damasco, zaj nasel-la benne' xíchaje ca'
 chee bxruze ca' neda' nen xel-la' dxenná bea chee'. 13 Ca zexá'a xu'a neza na',
 du wagubizra ble'eda' tu xi' da za' xabáa da nácadxa ca xel-la' dxenná' chee
 gubizra, na' gusení na naga zexá'a neda' nen benne' zjácale' neda'. 14 Nadxa
 xúgute'ntu' xeajcházentu' lu xu, na' bēnda' chi'i tu benne' gunné' dizra' hebreo,
 guzre' neda': "Saulo, Saulo, ¿bizr chee' na' nau zi' xuzru' neda'? Lue'ze dxun
 zi' cuinu' ca' dxun beze' gate dxulíbeba' lawe' xágala da dxádué'-ba'." 15 Nadxa
 gunnéa': ¿Nuzra Lue', Xran? na' Xránadxu guzre' neda': "Neda' naca' Jesús,
 bēnnea' nau zi' xuzru'." 16 Bexasa, guzé, lawe' da ble'e lawa' lue' chee gunu'
 zrin chia', ne chee xechebu' ca naca da ba blé'enu', ne ca naca da za le'enu'
 gate te na'a. 17 Guselá' lue' lu na' benne' judío ca', ne lu na' benne' zitu' ca'
 naga dxusel-la' lue' na'a. 18 Dxusel-la' lue' lau benne' ca' chee sálaju' xiaj lau
 benne' ca' chee xulusane' da naca chee da chul-la, na' xelune' da naca chee
 xel-la' naxaní, ne chee xelexedxúaje' lu na' da xriwe', ne xelexú'e lu na' Dios,
 ne chee xeléajle' chia' neda', na' xunite lau Dios ca naca dul-la chee', ne gaca
 chee' tu da xelape' lówela benne' ca' ba gucá'a Dios."

19 'Ca' guca, wenná bea Agripa. Bzua' dizra' ca naca da ble'e Dios neda' da naca chee xabáa. 20 Nedxu bchálaja' dizra' chee Dios lau benne' zaj zre'e xezre Damasco, na' gudé na' lau benne' zaj zre'e Jerusalén, ne ca naca naga nababa Judea, ne lau benne' ca' quebe zaj naque' judío. Gucha' benne' ca' dxal-la' xelexebi'i lazre', ne xelexeaque' chee Dios, na' xeluné da xelunna bea na ca da ba zaj naque'. 21 Chee le na' benne' judío ca' gulél-le' neda' lu xudau', ne gulaca lazre' xelútie' neda'. 22 Dios dxácalené' neda', na' zé chúchuqueza' lu zra na'a zra, dxuchálajlena' xúgute benne' ca naca chee Dios, benne' cá'aze ca', ne benne' blau ca'. Dxapa' benne' ca' tuze ca naca da gulenná benne' ca' buluchálaje' waláz chee Dios, ne da gunná Moisés dxal-la' gaca. 23 Gulenné' Cristo dxal-la' si' saque', na' ca te gatie' dxal-la' xebané' ládujla benne' gate nédxudxa ca xúgute benne' ca', na' gulenné' xelén benne' judío ca', ne benne' quebe zaj naque' judío ca naca chee xel-la' naxani' chee Dios, da dxulé'e na le' ca gaca xeelé'.

Pablo dxaca lazre' guzėjni'ine' Agripa gaque' benne' chee Cristo

24 Gate gunná Pablo da caní, na' gunná zizraj Festo:

—Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

25 Pablo bechebe':

—Quebe nadá xichaj lázrdawa', dxapa' cuinu' Festo. Da dxennéa' naca na da gaca chéajledxu, ne da li. 26 Nigá zua wenná bea Agripa. Nézele'ene' ca naca chee da caní, na' chee le na' dxuchálaja' dute xel-la' dxuxrén lazre' chia' lawe'. Néquezda' le' nézene' ca naca da nigá lawe' da dxuchálaja' ca naca chee da quebe guca na bagácheze. 27 ¿Dxéajle'u lue', wenná bea Agripa, ca naca da gulenná benne' ca' buluchálaje' waláz chee Dios? Nezda' dxéajle'u.

28 Nadxa gunná Agripa:

—Xeláteze guzėjni'inu' neda' gaca' chee Cristo.

29 Nadxa gunná Pablo:

—Che xeláteze u che da zrendxa dxenaba' gun Dios, quegá lue'ze, san cá'anqueze xúgute benne' dxellené' chia' na'a, xelaque' ca neda'queza', san quebe xeledxéaje' du xia.

30 Ca gudé gunná Pablo da nigá, na' gulexasa wenná bea, ne benne' xu'u lu ne'e xezr la xu na' tu zren nen Berenice, ne xúgute benne' ca' zaj dxe'e na'.

31 Belexedxúaje' cheeze' chee xuluchálajle' ljwezre' ca naca chee da nigá. Na' gulenné', dxelé' ljwezre':

—Benne' nigá quebe bi da calela ne gune' da gudé na le' gatie', ne quebe dxal-la' chu'e lizre xia.

32 Na' gunná Agripa, guzre' Festo:

—Waca gusandxu benne' nigá chela quebe gunabe' zri'a chee' lau César.

27

Dxelesel-le' Pablo lu xezre Roma

1 Gate ba zaj nune' xelesel-le' netu' lu xezr la xu Italia, na' Pablo, ne xezícala benne' ca' zaj zre'e lizre xia, buludé' le' lu na' tu benne' dxenná bé'ene' lu wedil-la le' Julio, benne' yu'u lu ne'e tu cue' benne' dxjaque' wedil-la nazí le na Benne' Chee Augusto Dxjaque' Wedil-la. 2 Na' guxú'untu' tu lu da dxedá lawe' nísadau' chee xezre Adramitio, da ba zua te na xézredu ca' chee ga nababa Asia. Zúalequeze Aristarco netu', tu benne' xezre Tesalónica chee ga nababa Macedonia. 3 Zra xula bzrintu' xezre Sidón, naga Julio bénle'e da

chawe' chee Pablo, na' be'e le' lataj xejnné'e bi bíchedxu ca' chee bi belunge' chee'. ⁴ Gate beza'ntu' xezre Sidón, na' gudentu' naga dxe' xezr la xu Chipre da naxechaj nísadau'. Blé'entu' na chala'a xéglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'. ⁵ Gudentu' lu nísadau' le nna' xezre ca' zaj nababa Cilicia, ne Panfilia, na' bzrintu' xezre Mira da nababa Licia.

⁶ Lu xezre na' benne' dxenná be'e lu wedil-la bezrague' tu da dxedá lawe' nísadau' chee xezre Alejandría da zeaj na xezr la xu Italia, na' bzre'e netu' lawle chee zeajntu' Italia na'. ⁷ Zane' zra zéajntu' chawe' lazre', na' stébele'e bzrintu' le nna' xezre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxéčajntu' naga dxe' xezr la xu Creta da naxechaj nísadau'. ⁸ Stébele'e gudentu' chala'ala naga dxe' Creta na', na' bzrintu' tu xézdredau' nazí le na Buenos Puertos, da zua gagu naga zua xezre Lasea.

⁹ Záne'te zra bnítentu' xu'untu' da dxedá lawe' nísadau' na', na' ba naca stébe zéajntu' lu nísadau' na' lawe' da ba dxexú'udxu beu' zaga. Chee le na' bzéajni'i Pablo benne' ca'. ¹⁰ Dxenné':

—Le'e, benne', dxelé'eda' wácale'e stébe naga zéajdxu na'a, na' wabía xi' da dxedá lawe' nísadau' nigá ne xua da nua na, na' zrúzet'e cuía xidxu dxi'u.

¹¹ Benne' dxenná be'e lu wedil-la guxéajle'dxe' chee xrane da dxedá lawe' nísadau' na', ne chee benne' xu'u na lu ne'e, ca chee Pablo. ¹² Na' lawe' da quebe naca lataj na' chawe' súadxu na' beu' zaga ca', na' xúgute' guléquené' nácadxa chawe' xezá' da dxedá lawe' nísadau' na' chee xexéaj na Fenice, tu xezre chee Creta na', da dxe' chala'a chee xezr la xu Creta naga dxe'bia gubizra, na' xegá'anadxu na' beu' zaga ca'.

Dxaca be' bđunu' lu nísadau'

¹³ Nadxa guzú lau dxaca lase be' da za' chala'a naga dxedé gubizra beu' zaga, na' guléquené' waca chéajtezentu' lu nísadau', na' gudentu' gáguze lu xezr la xu Creta na'. ¹⁴ Nadxa chíteze guca guzú lau dxácale'e be' bđunu' da za' chala'a ga za' be' zaga. ¹⁵ Be' na' guzú lau dxuzriga na chala'ala da dxedá lawe' nísadau' na', na' lawe' da québedxa guca chéajdxantu' naga za' be' na' ben na ba xen bentu' lataj bzriga na da dxedá lawe' nísadau' na'. ¹⁶ Na' gudentu' cúzrela tu xezr la xudau' naxechaj nísadau' da nazí le na Claudia, naga québedxa dxácaté na be' na' wal-la, na' stébele'e gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'. ¹⁷ Ca gudé bulucuené' da dau' na', na' buludéé' du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebe' chaze da dxedá lawe' nísadau' na' lu xuzre' naga nazí le Sirte, na' bululétaje' ladxe' ca' da dxelecá'a be' lu da dxedá lawe' nísadau' na', na' belúe lataj be' na' bzriga na len. ¹⁸ Zra xula, lawe' da ne dxácale'e be' bđunu', gulezú lawe' dxeledxú'une' xua ca' lu nísadau', da nua da dxedá lawe' nísadau' na'. ¹⁹ Zra guxunne' zra nen ná'quezentu' gudxú'unantu' lu nísadau' da dxuluchínene' chee da dxedá lawe' nísadau' na'. ²⁰ Zane' zra quebe blé'entu' gubizra ne belaj ca', ne ca naca be' bđunu' zren na' ne dxuzriga na da dxedá lawe' nísadau' na', na' québedxa guleza lázrentu' láquezentu'.

²¹ Zane' zra gudentu' quebe náguntu', na' guzé Pablo lávela benne' ca', ne gunné':

—Le'e, benne', cháwedxa la guca cheedxu la benle da gucha' le'e, na' quebe bedxúajdxu lu xezr la xu Creta, ne quebe bi guque da dxedá lawe' nísadau'

nigá, na' xua' da nua na quebe guzríá xi'. ²² Na'a, quebe guchebe lázrele. Netudxu dxi'u quebe cuía xidxu, lácala cuía xi' da dxedá lawe' nísadau' nigá. ²³ Ba dxele ble'e lau tu gubáz chee xabáa chee Dios neda'. Naca' chee Dios nigá ne dxuna' zrin chee'. ²⁴ Gubáz na' guzre' neda': "Quebe zrebu', Pablo, lawe' da dxun na ba xen zrinu' lau César, na' ne chiu' lue' Dios guselé' lu xel-la' gute xúgute benne' zaj zra' nen lue' lu da dxedá lawe' nísadau' nigá." ²⁵ Chee le na', benne', le gun dipa lázrele, lawe' da dxuxrén lazra' Dios, ne nezda' waca ca gunná gubáz chee xabáa na' bchálajlene' neda'. ²⁶ Na'a dxun na ba xen cheajchaze da dxedá lawe' nísadau' nigá tu lu xezr la xu da naxechaj nísadau'.

²⁷ Ca gudé chinu' zra gate naca chizrela, ne zrantu' lu nísadau' nazi le na Adria, na' be' na' dxaca dxuzriga na da dxedá lawe' nísadau' quela ca'ala, na' dxela guleque be'e benne' ca' dxulusá da dxedá lawe' nísadau' na' ba dxezrín na dxu'a xu bizre. ²⁸ Na' buludxixre' cáтите situj dxe' nisa na', na' dxe' na galaj esa. Na' xetú chí'idau' gudé buludxixre' da xula, na' dxe' na chinu' ésaze. ²⁹ Belezrebe' cheajtá da dxedá lawe' nísadau' na' xiaj, na' buluzale' tapa xia da nácale'ē zī'i zran nisa zeaj zranla da dxedá lawe' nísadau' na', na' gulebeze' chani' dudxuze dxelezrebe'. ³⁰ Nadxa benne' ca' dxulusá da dxedá lawe' nísadau' na' guléquene' xelexedxúaje' lu da dxedá lawe' nísadau' na', na' gulezú lawe' dxululétaje' da dau' na' zria lawe' da zren na' dxedá lawe' nísadau', dxelune' ca benne' xuluzáladxa xia da guxru na da dxedá lawe' nísadau' zren na' da zeaj laula na. ³¹ Pablo bzenne' benne' dxenná be'e lu wedil-la, ne benne' dxjaque' wedil-la, dxenne'':

—Che quebe xelegá'ana benne' caní lu da dxedá lawe' nísadau', quebe lale le'e.

³² Nadxa benne' dxjaque' wedil-la gulechugue' du zri'a da nadxéaj da dau' na', na' belú'ē na lataj bexruij na lu nísadau'.

³³ Ca guxaní'sise' bzéajni'i Pablo xúgute benne' ca' dxal-la' xelawe' xeta, gunné':

—Ba zeaj chinu' zra quebe dxásele ne quebe dxágule. ³⁴ Dxata' xueda' le'e gágule. Da nigá dxun na ba xen chee lale. Netudxu dxi'u quebe cuía xi' netú xicha xíchajdxu.

³⁵ Ca gunné' caní, Pablo guqué'ē tu xeta xtila, na' guzre' Dios: "Xcalenu'", lau xúgute benne' ca'. Nadxa bzúzruje' na, na' guzú lawe' dxawe'. ³⁶ Nadxa xúgute' belún dipa lazre', na' gulezú lau dxelawe'. ³⁷ Cáтите netu' zrantu' lu da dxedá lawe' nísadau' na' nácantu' chupa gaxúa ga xun chinu' tuntu'. ³⁸ Ca gudé gulawe' cáтите guléljene', na' buluzale' zrua' xtila lu nísadau' chee bezrá' da dxedá lawe' nísadau' na'.

Dxebía xi' da zren da dxedá lawe' nísadau'

³⁹ Gate guxaní, benne' ca' dxulusá da dxedá lawe' nísadau' na' quebe belexúnbe'ē xezr la xu na' da zua na le nna' naga zaj zre'ē. Belelé'ene' naga dxexú'u nísadau' gachaj lówela xezr la xu na', na' dxu'e na' naca lache'. Na' gulaca lazre' xuluxudé' da dxedá lawe' nísadau' laduj na'. ⁴⁰ Gulechugue' du zri'a ca' zaj nacá'a xia ca', ne bulucá'ane' xia ca' lu nísadau'. Gulesezre' du zri'a da nadxéaj ne'e xaga da dxuzechaj na da dxedá lawe' nísadau'. Nadxa gulechise' ladxe' da dxecá'a be' da zeaj lówela da dxedá lawe' nísadau', na' da dxedá lawe' nísadau' na' guzú lau dxebiga na naga naca lache'. ⁴¹ Bzrin na naga dxezraga nisa na' dxupa la'a, na' da dxedá lawe' nísadau' na' guxaze na lu xuzre' da dxe' zran nisa na'. Zeaj lówela da dxedá lawe' nísadau', na' begá'ana na chalásaze lu xuzre' na', ne québedxa gulezéquene' xuluté' na. Da

zeaj zranla guzú lau dxuzruj na lawe' da dxeajéle'e xeajxruza chee nísadau' na' zran da dxedá lawe' nísadau' na'. ⁴² Benne' dxjaque' wedil-la gulaca lazre' xelútie' benne' zaj nadxéaje' chee quebe xuluxuzrúnnuje' xezezrúe' lawe' nisa na'. ⁴³ Benne' dxenná be'e lu wedil-la guca lazre' guselé' Pablo, na' quebe be'e lataj benne' dxjaque' wedil-la xelútie' benne' ca'. Na' gunná bé'ene' benne' ca' dxelaque' dxezezrúe' nisa cheajlexerítie' lu nisa na' chee xelexezrine' lu xu bizre. ⁴⁴ Benne' ca' xezícala, bal-le' gulequé'e blaga', ne xebal-le' gulequé'e blaga' bizruj chee da dxedá lawe' nísadau' na', na' caní guca, xúgute' belexezrine' lu xu bizre.

28

Da ben Pablo lu xezr la xu na' nazí le na Malta

¹ Ca gulá xúgúte'ntu', na' gunézentu' xezr la xu na' da naxechaj nísadau' nazí le na Malta. ² Benne' zaj zre'e na' belúnle'e netu' cháwedau'. Gulebéche'le'e xi' lawe' da dxúnle'e zaga, ne dxaca xiuj, na' gulenné' netu' cheajsentu' dxu'a xi' chee xezré'entu'. ³ Nadxa Pablo guqué'e tu xrunu zruze xaga, na' ca dxuzré'e na lu xi', bedxúaj tu bela' da na' dxuzrúnnujba' lu da la na', na' gudagu xa'aba' na' Pablo. ⁴ Gate belelé'e benne' ca' zaj zre'e lu xezr la xu na', nal-la' bela' na' na' Pablo, na' gulé ljwezre':

—Benne' nigá naque' wete benne' lawe' da lácala gulé' lu nísadau', quebe dxue lataj dios na' nazí'i le' Xrlátaje gaca ban le'.

⁵ Pablo guzribe' bela' na' lu xi', ne quebe bi gúquene'. ⁶ Xúgute' gulebeze' chee gata' xi' na' Pablo u che'e gatie'. Ca gudé gulebeze' tu chi'i wal-la, ne belelé'ene' quebe bi gúquene', na' buluché'e ca da dxeléquene', ne gulezú lawe' dxelenné' naca Pablo tu dios.

⁷ Gágute' naga zrantu' de' xezr la xu chee benne' blau chee xezr la xu na', le' Publio. Benne' nigá guzi' lu ne'e netu', ne bxúle'e netu' cháwedau' lawe' chunna zra. ⁸ Xra Publio deze', quebe chawe' zue', na' xu'e da la, ne dxaque' xízrawe' dxen. Pablo guxíaje' xeajnné'e le', na' ca gudé bchálajlene' Dios, bze ne'e lawe' le', na' bexaque'. ⁹ Gate belenne' da nigá, na' benne' ca' xezícadxa, benne' we' ca' zaj zre'e xezr la xu na', belezrine' lau Pablo, na' belexaque'. ¹⁰ Gulápale'e netu' ba lá'ana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgute' da nachínnentu'.

Pablo dxezrine' xezre Roma

¹¹ Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na' na' dxácaté' naca beu' zaga ca'. Naca na' tu da dxedá lawe' nísadau' chee xezre Alejandría, na' luzrgue da dxedá lawe' nísadau' na' zaj da bedá'u' chee dios bi lide' ca' zaj le' Cástor ne Pólux. ¹² Bzrintu' dxu'a xezre Siracusa naga begá'anantu' chunna zra. ¹³ Gate beza'ntu' na', na' gudentu' dxu'a xezr la xu na', ne bzrintu' xezre Regio. Zra xula dxaca be' da za' chalá'a naga dxedé gubizra beu' zaga ca', na' zra gudxupe' zra bzrintu' xezre Puteoli. ¹⁴ Lu xezre na' bezrágantu' bal-la bi bíchedxu, benne' gulenné' netu' lizre' xegá'analentu' le' xrunu' zra, na' ca gudé na' guza'ntu' ní'antu' zéajntu' Roma. ¹⁵ Bi bíchedxu zaj zra' Roma ba belenne' cheentu', na' beledxúaje' xezre na', bedajlechague' netu' tu xézredau' nazí le' na Xi'a Chee Apio, na' xebal-le' belexezrage' netu' tu lataj nazí le' na Chunna Xú'udau'. Gate ble'e Pablo bi bíchedxu ca', na' guzre' Dios: "Xcalenu'", ne ben dipa lazre'. ¹⁶ Gate bzrintu' Roma, benne' dxenná be'e lu wedil-la bdee' benne' zaj nadxéaje' lu na' benne' xíchaje' chee bi xra'aga ca', san be'e lataj Pablo

sue' cheeꝛe' nen tu benne' dxéaje' wedil-la, benne' guxúe' le' chee quebe xuzrúnuje'.

Pablo dxuchálaje' chee Jesús lu xezre Roma

¹⁷ Ca gudé chunna zra Pablo gusel-le' benne' xeajnné' benne' judío blau ca' zaj zre'e Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácale xra xrtáudxu ca', san benne' judío ca' zaj zre'e Jerusalén buludé'e neda' lu na' benne' Roma ca'. ¹⁸ Gate benne' Roma zaj zre'e na' buluchebe' neda', gulaca lazre' xulusane' neda' lawe' da quebe belezrelné' bi da bená' da gun na xelechugue' chia' gatia'. ¹⁹ Judío ca' guledábague', na' ben na ba xen gunaba' neda' zri'a chia' lau César. Quebe nacan chee gawa' zria benne' lázredxu. ²⁰ Chee le' na' gunnéa' le'e chee le'eda' le'e, ne guchálajlena' le'e lawe' da naca ne chee da dxebeza lázredxu dxi'u, benne' Israel, zua' nigá nadxéaja' xia.

²¹ Nadxa gulé'e le':

—Netu' quebe bi xiche ne si' lu na'ntu' da za na Judea ca naca chiu' lue', na' netú bi bíchedxu, benne' judío, benne' ba bele'e nigá bezé'e Judea, quebe bi da calēla dxenné' benu'. ²² Dxaca lázrentu' xénentu' ca da dxéquenu' lue' lawe' da nézentu' gáteteze na' dxelenné' chee benne' ca' dxeléajle'e dizra' cube nigá.

²³ Buluzúe' tu zra gate xelexezrague', na' lu zra na' benne' zan belezrague' naga zua Pablo. Bchálajlene' benne' ca' ca naca xel-la' dxenná bea chee Dios che zilatēla guxrínneleṭe. Bēne' ba xuzre guzéajni'ine' benne' ca' ca naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios. ²⁴ Bal-le' gulezī'e xrtizra' Pablo, san xebal-le' quebe guléajle'e. ²⁵ Quebe belune' tuze dizra', na' gulezú lawe' dxelexedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isaías, bēnnea' bchalaje' waláz chee Dios, gunné':

²⁶ Guxíaj, xeajezre benne' ca':

Da li wenle le'e san quebe chéajni'ile.

Da li walé'ele, ne quebe gueque be'ele.

²⁷ Zaj naca zide' lázxdau benne' caní,

ne quebe dxelenne' chawe'.

Zaj naxezxuj xiaj lawe'

chee quebe xelélé'ene' nen xiaj lawe',

ne quebe xelēnēne' nen nague',

ne quebe xeléajni'ine' nen lázrdawe',

ne quebe xelxelé'e lawa' neda' chee xexuna' neda' le'.

²⁸ 'Dxal-la' nézele le'e, na'a ne da za za' xel-la' weselá chee Dios guchálajlentu' benne' quebe zaj naque' judío, na' benne' ca' xelezī'e na.

²⁹ Gate gunná Pablo da nigá, na' besia'aca judío ca', dxuluchébele'e ljwezre'.

³⁰ Pablo guzúe' chupa iza lu xu'u da dxízruje', ne dxezī' lu ne'e xúgute' benne' dxedajlenné'e le'. ³¹ Du lazre' bchálaje' ca naca xel-la' dxenná bea chee Dios, ne bsédené' ca naca chee Xránadxu Jesucristo, na' netú quebe nu blalé' le'.

DA BZUAJ SAN PABLO CHEE BI CHEE CRISTO ZAJ ZRABE' XEZRE ROMA

Pablo dxugape' diuzre bi chee Cristo zaj zrabe' Roma

¹ Neda', Pablo, naca' wen zrin chee Jesucristo. Dios bláwizre' neda' chee gaca' gubáz chee', ne guqué'e neda' chee' guzenda' bénneache dizra' chawe' chee'.

² Dios guchebe lazre' sel-le' dizra' chawe' nigá gate nate lu dizra' lá'azxa chee' lu na' benne' ca' buluchálaje' waláz chee'. ³ Dizra' chawe' nigá dxulé'e na ca naca chee' Xránadxu Jesucristo, Zri'ine Dios. Lu be'la' dxen chee' naque' zri'ine zre sua wenná bea David. ⁴ Lu be' nácaqueze' da naca na lá'azxa, naque' Zri'ine Dios. Dios blé'ene' naca caní gate bsebané' Le' ládujla benne' gate ne chee' xel-la waca chee'. ⁵ Ne chee' Zri'ine' Dios nunne' netu' lataj nácantu' gubáz chee' chee' xelezrá' benne' ládujla xúgute' cue' xezr la xu, benne' xeleajlí lazre' Cristo, ne xuluzú' dizra' chee' chee' gaca ba La Le'. ⁶ Ládujla benne' caní zrale le'e chee' gácale bi chee' Jesucristo.

⁷ Dxuzúaja' chee' xúgutele le'e dxéajlele chee' Cristo, zrale xezre Roma. Dios nazrí'ine' le'e, ne bláwizre' le'e chee' gácale bi cheéqueze'. Dxenaba' Xradxu Dios, ne Xránadxu Jesucristo guné' chawe' chee'e, ne gunne' le'e xel-la dxebeza zri lazre'.

Pablo dxaca lazre' chéajé' xezre Roma

⁸ Da naca blaudxa, ne chee' Jesucristo dxapa' Dios chia' xcalene' ca naca chee' xúgutele lawe' da dxezralaj ca dxeajlí lázrele Cristo du gabí'i xezr la xu. ⁹ Duté lázrdawa' dxuna' zrin chee' Dios, dxuzenda' bénneache dizra' chawe' chee' Zri'ine'. Le' nézquezne' dxeajsá lázrqueza' le'e gate dxuchálajlena' Le'. ¹⁰ Dxata' xúeda' Dios, che naca da dxaca lazre' Le', chee' ájala gunne' neda' lataj xedajnná'a le'e ¹¹ lawe' da dxaca lazra' le'eda' le'e ne gunna' le'e lataj si'le da naca chee' Be' Lá'azxa, chee' se cháchadxale. ¹² Caní gutipa lázredxu tudxu xetudxu lu xel-la dxeajlí lazre' cheedxu.

¹³ Bi bícha'dau', dxaca lazra' nézele zane' lasa guca lazra' xida' xedajnná'a le'e, san dxácaté ca' dxecuasa na. Dxaca lázrele'a xida' chee' guna' zrin gusédeda' da naca chee' Cristo ládujla le'e, cáteze ba be'na' ládujla xezícadxa bénneache zaj zre'e lu xezr la xu nigá. ¹⁴ Nabaga' guna' zrin caní ládujla xúgute' bénneache, che zaj naque' benne' blau u ca zaj naque', u che zaj naque' benne' zaj naxéajni'i u ca zaj naque'. ¹⁵ Chee' le' na', neda' ba zúaqueza' guzenda' le'e zrale xezre Roma dizra' chawe' chee' Cristo.

Xel-la waca chee' dizra' chawe' chee' Cristo

¹⁶ Quebe dxedué'eda' chee' dizra' chawe' chee' Cristo lawe' da napa na xel-la waca chee' Dios chee' guselá na xúgute' benne' dxeleajlí lazre' le' na, nédxula benne' judío ca', san cá'aqueze benne' quebe zaj naque' judío. ¹⁷ Dizra' chawe' nigá dxulé'e na dxi'u nagá'anadxu chawe' lau Dios che dxeajlí lázredxu le' na, chee' cheajlí lázredxu Le' ca naxúaj na lu dizra' lá'azxa, da dxenná na: Benne' nagá'ane' chawe' lau Dios gata' chee' xel-la nabán li lazre' che dxeajlí lazre' Le'.

Dul-la da zaj nabaga bénneache

18 Ba ble'e Dios lu xabáa chee' ca guné', gudéé' xel-la zi' xúgute benne' dxuluzúé' chalá'ala Dios, ne benne' wen da calela, benne' dxuluzague' da li ne chee da calela da dxeluné'. 19 Zaj nézquezne' ca gaca xelúnbea bènneache da naca chee Dios lawe' da Léqueze Dios na' bache blé'ene' na zaca ba lau. 20 Da quebe gaca lé'edxu chee Dios gaca gúnbeadxu na ne chee da ca' da ben Dios. Gate bente' xezr la xu dxunna bea na nácaqueze Dios, ne nápaqueze' xel-la waca. Chee le na' quebe bi de xuludé'ene'. 21 Lácala zaj númbe'e ca naca Dios, quebe ne xelape' Le' ba lá'ana ca Dios, ne quebe ne xelé'e Le'; Xcalenu', san dxuludé lazre' da níteze, na' gulechul-la xichaj lázrdawe' lawe' da zaj naque' benne' zide'. 22 Lácala dxeléquene' zaj naxéajni'ine', da li zaj naque' benne' xala, 23 lawe' da buluzúé' chalá'ala Dios xabáa, Bènnea' quebe dxedé chee', ne dxelúe lá'ane' bedáu' xiaj xaga zaj naca na lu'a bènneache dxelate, ne lu'a bea ca' zaj zua xrila, ne lu'a be snia, ne lu'a be xixre' be zria tapa ní'a na'ba'.

24 Chee le na' Dios ba guleaj xíchaje' benne' ca' chee xeluné' xúgute da sban da dxelezá lazre', na' bulucá'ana dítaj cuine' tue' xetue', 25 lawe' da buluzúé' chalá'ala xel-la li chee Dios, na' gulez' lu ne'e da wen lazre', ne belúe lá'ane', ne belecá'ana szrene' da ca' nun Dios, ne quegá Diosqueze, Bènnea' dxal-la' güe lá'anaquezdxu. ¡Ca'an gaca na!

26 Chee le na' Dios ba guleaj xíchaje' benne' ca' chee xeluné' da dxelezá lazre' da ca' xedué'edxu. Cá'anqueze nu'ula buluzúé' chalá'ala xel-la zúale benne' chee', ne dxeluné' da quebe zaj naca chee' xeluné'. 27 Cá'anqueze belún benne' biu, buluzúé' chalá'ala xel-la zúale zru'ule', ne dxeluné' da sban da dxelezá lazre' tue' xetue', ne dxeluné' da ca' xedué'edxu tue' xetue', na' dxeledéé' xel-la zi' lu bel-la' dxen chee' ne chee da sban da dxeluné'.

28 Lawe' da québedxa gulaca lazre' xelexúnbe'e Dios, Le' guleaj xíchaje' benne' ca' chee xuludé lazre' da calela, ne chee xeluné' da quebe dxal-la' xeluné'.

29 Dxeluné' xúgute da calela.

Dxulucá'ana díte' bènneache.

Dxeluné' da quebe naca xrlátaje.

Zaj naque' benne' wecude'.

Dxeluné' da zrinna'.

Zaj naque' benne' xa lazre'.

Dxelutié' benne'.

Dxelílaje' da ba xa'.

Dxelezí xe'e.

Dxeledanne' da xálaze.

Dxuluchálaje' dizra' bizruj.

30 Dxeleonné' schanni' chee ljwezre'.

Dxelecuídené' Dios.

Zaj naque' benne' wenné wal-la.

Dxulucá'ana szren cuine'.

Zaj naque' benne' wezé cua.

Dxelalaj lazre' bícala da sban.

Quebe dxuluzúé' dizra' chee xra xrne'e.

31 Zaj naque' benne' lázrdau zide'.

Dxulunitié' xrtizre'.

Quebe zaj naque' zri'i lazre'.

Quebe dxulunite lawe' chee ljwezre'.

Quebe dxelexache lazre' chee ljwezre'.

32 Zaj nézene' Dios guzrí'a xi'e bènneache,

na' benne' dxelunę' da caní dxal-la' xelátie'.
Benne' caní tu dxelúnzqueze' na,
ne dxelexezaca ba lazre' nen benne' dxelunę' da caníqueze.

2

Dios dxuchi'ę cheę bénneache cáteze da zaj nune'

¹ Cheę le na' québedxa bi de da gudé'enu', lue' dxuchi'u da dxun benne' xula, núteteze nacu'. Gate dxuchi'u da dxun benne' xula, na' dxule'enu' nabagu' zria, lawe' da dxuchi'u da dxun benne' xula, ne cá'anqueze dxunu' lue'. ² Nézquezdxu dxuchi'a Dios cáteze da naca na gate dxennę' zaj nabaga zria benne' ca' dxelún da caní. ³ ¿Dxéquenu' lue' wadé gun ca'aze chiu' gate Dios nne' zaj nabaga zria bénneache, lue' na' dxennáu' zaj nabaga zria benne' dxelún da caní, ne cá'anqueze dxunu' lue'? ⁴ ¿Dxuzú' chalá'ala xel-la zri'i lazre', ne xel-la zren lazre' zren cheę Dios, ne quebe nézenu' lu xel-la zri'i lazre' cheę dxunne' lue' lataj xebi'i lazru'? ⁵ Nacu' lázrdau zide', ne quebe dxexebi'i lazru'. Cheę le na' dxuzanu' da si sacu' lu zra na' gate Dios nne' zaj nabaga zria benne' ca' dxelunę' da caleła. Naca xrlátaje gunę' da caní. ⁶ Lu zra na' gunne' ca da dxal-la' si' tu tudxu cáteze naca da bendxu. ⁷ Xel-la nabán zeajlí canna gunna Le' xúgute benne' dxelaca lazre' xelezi'ę lu na' Dios da xabáa, ne xel-la ba lá'ana, ne da zaj naca na da chadía chacanna ne cheę da chawe' da tu dxelúnzqueze'. ⁸ Lu xel-la dxezrá'a cheę nne' zaj nabaga zria xúgute benne' zre'e lazre' ca', benne' quebe dxuluzúę' dizra' da li, san dxuluzúę' dizra' da wen lazre'. ⁹ Gusaca zi'ę, ne gudéę' lu da ba xa' xúgute benne' dxelunę' da caleła. Ga su lau gunę' caní cheę benne' judío ca', ne cá'anqueze gunę' cheę benne' quebe zaj naque' judío. ¹⁰ Da xabáa, ne da ba lá'ana, ne xel-la dxebeza zri lazre' gunne' xúgute benne' dxelunę' da chawe'. Ga su lau gunę' caní cheę benne' judío ca', ne cá'anqueze gunę' cheę benne' quebe zaj naque' judío.

¹¹ Dios tuze ca dxuchi'ę da dxelún xúgute bénneache, ¹² na' benne' dxelunę' dul-la, ne quebe zaj núnbe'ę da bdxixruj be'e Moisés welebía xi'ę lácala quebe belúnbe'ę da nadxixruj bea na, na' benne' dxelunę' dul-la lácala zaj núnbe'ę da bdxixruj be'e Moisés welebía xi'ę ne cheę da nadxixruj bea na na'. ¹³ Quebe zaj nagá'ana chawe' lau Dios benne' dxelénzenę' da nadxixruj bea na, san zaj nagá'ana chawe' lau Dios benne' dxuluzúę' dizra' da nadxixruj bea na. ¹⁴ Benne' zitu' ca', benne' quebe zaj núnbe'ę da bdxixruj be'e Moisés, gate dxelunę' ca dxenná da nadxixruj bea na na', lácala quebe zaj núnbe'ę da nadxixruj bea na, naca cheę' cáteze zua da nadxixruj bea na lu xichaj lázrdawe'. ¹⁵ Caní naquen lawe' da ca dxelunę' dxulé'ę na zua xichaj lázrdawe' ca naca da nadxixruj bea na, na' naca na ca naca da bdxixruj be'e Moisés. Xichaj lázrdawe' dxunna bea na cheę da nigá, na' da dxelegú'u lazre' guzría xi na le', u xecá'a na le' ¹⁶ lu zra na' gate Dios guchi'ę xúgute da nagache' cheę xúgute bénneache lu na' Jesucristo cáteze dxenná dizra' chawe' na' da dxuzenda' bénneache.

Ca naca cheę benne' judío ca' ne da bdxixruj be'e Moisés

¹⁷ Dxennáu' nacu' judío, ne dxennę'enu' da bdxixruj be'e Moisés, ne dxucá'ana szren cuinu' lawe' da núnbe'u Dios chiu'. ¹⁸ Nézenu' da dxaca lazre' Dios, na' da gunná bé'ene' dxulé'ę na lue' gunu' da nácadxa chawe'. ¹⁹ Dxuxrén lazru' cuinu' waca gulé'enu' ca da xelún benne' zaj naque' ca lo chul-la, ne gusen'i'u benne' zaj zra' lu da chul-la. ²⁰ Dxéquenu' waca guzėjajni'inu' benne' quebe zaj naxėjajni'ę, ne gusédenu' benne' quebe ne cheajni'ę lawe' da naca

da nadxixruj bea na da napu' tu da dxulé'e na dxi'u chee gúnbeadxu da li.
²¹ Lue' dxusédenu' benne' xula. ¿Bizr chee na' quebe dxusede cuinu'? Lue' dxuzennu' benne' quebe dxal-la' cuandxu. ¿Bizr chee na' dxebanu' lue'?
²² Lue' dxennáu' quebe dxal-la' súałedxu zru'ula benne' xula. ¿Bizr chee na' dxunu' lue' ca'? Lue' dxecuídenu' bedáu' xiaj xaga. ¿Bizr chee na' dxebanu' lue' da gunní'a da de lu xudau' ca' chee bedáu' xiaj xaga ca'? ²³ Dxucá'ana szren cuinu' lawe' da núnbe'u da nadxixruj bea na, san dxucá'ana ditju' Dios lawe' da quebe dxunu' lue' ca da dxenná bea da nadxixruj bea na. ²⁴ Naxúaj lu dizra' lá'azxa da dxenná na: Benne' quebe zaj naque' judío dxeleonné' schanni' chee Dios ne chee da calęla da dxunle le'e.

²⁵ Da li da nadxugu lu bęla' chiu' da dxulé'e na nacu' bi chee Dios, naca na tu da chawe' che dxunu' ca da dxenná bea da bdxixruj be'e Moisés, san che quebe dxunu' ca dxenná na, nacu' ca tu benne' quebe nadxugu lu bęla' chee' da na' dxulé'e na. ²⁶ Che benne' quebe nadxugu lu bęla' chee' dxunę' ca nadxixruj bea na, naque' ca tu benne' nadxúguqueze lu bęla' chee' da na', lácala quebe naca caní chee'. ²⁷ Benne' quebe nadxugu lu bęla' chee' da na' dxulé'e na, san dxunę' da nadxixruj bea na, da na' dxunę' dxulé'e na nabagu' zria lue', lawe' da quebe dxunu' da dxenná bea da nadxixruj bea na, lácala zua lu na'u da nadxixruj bea na, ne nadxugu lu bęla' chiu' da na'. ²⁸ Quebe naca xanne' judío bęnnea' naque' caní cůzreze, ne quebe naca xanne' da nadxugu na lu bęla' chee benne' da naca na cůzreze, lu bęla'ze. ²⁹ Benne' naca xánnie' judío naque' bęnnea' naque' judío lu xichaj lázrdawe', ne da naca xanne' da nadxugu lu bęla' chee benne' naca na da zua na lázrdawe'. Quebe nácaqueze na nen dızra'ze san naca na chee be' chee'. Benne' caní dxelezi'e xel-la ba lá'ana, quegá chee bęnneache, san chee Dios.

3

¹ ¿Bizra da ba neza naca na chee benne' lawe' da nadxugu lu bęla' chee' da na' dxulé'e na? ² Nácalę'e na, ne zánete' ca naca na. Da nédxute, Dios bdeę' dızra' chee' lu na' benne' judío ca'. ³ ¿Bizra xca'? Che bal-la benne' judío ca' quebe zaj naque' li lazre', ¿nnadxu chee da na' quebe naca Dios li lazre'? ⁴ ¡Cabata! Dios dxúnqueze' ca naca da li lácala xúgute bęnneache zaj naque' wen lazre', lawe' da naxúaj lu dizra' lá'azxa da dxenná Dios. Dxenné': Nacu' xrlátaje ca da dxennáu', na' wegá'anaquezu' xrlátaje gate xuluchi'e ca da dxunu'.

⁵ Che da calęla da dxundxu dxulé'e na naca Dios xrlátaje, ¿Bızraqueze nnadxu? (Dxuchálaja' ca da dxuluchalaj bęnneache.) ¿Naca Dios benne' quebe naca xrlátaje lawe' da dxudęe' dxi'u xel-la zi'? ⁶ ¡Cabata! Chela naca Dios Benne' quebe dxun da xrlátaje, ¿ájazra gunę' guchi'e ca da dxelún bęnneache?

⁷ Che da wen lazre' da dxuna' gun na chee xegá'ana zrendxa da li da dxun Dios, ¿bizr chee na' dxuchi'e chia' neda', dxennę' naca' benne' dul-la? ⁸ Che naca na caní, ¿bizr chee na' quebe gundxu da calęla chee gulé'e laudxa da xrlátaje? Da nigá naca na da dxeleonné' bal-la benne' dxundxu, benne' ca' dxelún da calęla, ne dxeleonné' schanni' cheedxu. Xrlátaje naca Dios nne' zaj nabaga zria benne' caní.

Xúguteđxu nabágadxu dul-la

⁹ ¿Bizra xca'? Dxi'u, benne' judío, ¿nácadxadxu xrlátaje ca xezícadxa benne' ca'? ¡Cabata! Bache blé'entu' zaj nabaga dul-la benne' judío, ne cá'aqueze xezícadxa benne' ca'. ¹⁰ Naxúaj lu xiche lá'azxa da dxenná na:

Quebe nu chilá' benne' xrlátaje, netú gue'.

¹¹ Quebe nu chilá' benne' dxéajni'ing'.

Quebe nu chilá' benne' dxexilaje' Dios.

¹² Xúgute' dxeledé' calela. Xúgute' zaj nanítie'.

Quebe nu chilá' benne' dxune' da xrlátaje, netú gue'.

¹³ Da dxelennéqueze' naca na ca tu da sgute, ca tu ba da naxálajze.

Nen luzre' ca' dxelezí xe'e.

Xrtizre' zaj naca na ca nisa snia chee' bela' da dxe na zran lázxabá'.

¹⁴ Tu dxelennézqueze' dizra' schanni', ne dizra' zi'.

¹⁵ Chadite dxelútie' bénneache.

¹⁶ Gáteteze dxeledé' dxuluzría xi'e, ne dxulusaca zi'e.

¹⁷ Quebe zaj nézene' ájala xelebeza zri lazre'.

¹⁸ Quebe dxelezrebe' Dios.

¹⁹ NezdXu xúgute' ca da dxenná da nadxixruj bea gula na' da bzuj Moisés, dxé na benne' ca' zaj xu'e lu na' da nadxixruj bea na na', chee' xelezúa zri xúgute', ne chee' xelexúnbea xúgute' bénneache zaj nabague' zria lau Dios.

²⁰ Netú benne' quebe xegá'ang' xrlátaje lau Dios lawe' da nune' da dxenná bea da nadxixruj bea na, lawe' da dxulé'eze da nadxixruj bea na dxi'u nácadXu benne' dul-la.

Xelelá bénneache che xeléajle'e chee Cristo

²¹ Na'a, dxunna bea na ca gaca xegá'anadXu xrlátaje lau Dios, da quebe naca na ne chee' da nadxixruj bea na, lácala lu da nadxixruj bea na, ne lu da buluzáj benne' ca' gulenné' waláz chee' Dios dxuluchalaj na ca naca chee' da nigá. ²² Nagá'anadXu xrlátaje lau Dios caní che dxeajlí lázredXu Jesucristo, ne cá'anqueze gaca chee' xúgute' bénneache xeleajlí lazre' Le'. Tuz ca naca chee' bénneache ²³ lawe' da zaj nun xúgute' bénneache dul-la, ne quebe zaj naca chee' xelexú'e lu xabáa chee' Dios. ²⁴ Lu da chawe' chee' Dios, cá'aze nune' chee' xegá'anadXu xrlátaje lau Le' lawe' da bexa'u Jesucristo dxi'u lu dul-la da nabágadXu. ²⁵ Dios bzue' Jesucristo gutie' ne chee' xtúl-ladXu chee' xegá'anadXu xrlátaje lau Le' che dxeajlí lázredXu da ben Le'. Da nigá guca na chee' ble'e Dios naque' xrlátaje lácala lu xel-la zren lazre' chee' bdege' cá'aze ca naca dul-la da bendXu nédxute. ²⁶ Gúcaqueze da nigá chee' gulé'e lawe' naca Dios xrlátaje na'a, ne gácaqueze' xrlátaje gate gucá'ang' xrlátaje benne' ca' dxeajlí lazre' Jesús.

²⁷ Na'a, ¿waca gucá'ana szren cuínadXu? ¡Cabata! ¿Bizr chee' na'? Naca na lawe' da nagá'anadXu xrlátaje, quegá lawe' da bendXu ca nadxixruj bea na, san lawe' da guxeajlí lázredXu Cristo. ²⁸ Ca'an naca, dxunna bea na nagá'ana xrlátaje tu benne' lau Dios lawe' da dxeajlí lazre' Cristo, ne quegá lawe' da nune' ca da nadxixruj bea na.

²⁹ ¿Naca Dios cheeze benne' judío ca'? ¿Quegá nácaqueze' Dios chee' benne' ca' ³⁰ lawe' da zua tuze Dios, na' Le' gucá'ang' xrlátaje benne' ca' zaj nadxugu lu bela' chee' da na' dxunna bea na che dxeajlí lazre' Cristo, ne cá'anqueze gucá'ang' xrlátaje benne' ca' quebe zaj nadxugu lu bela' chee' da na', che dxeajlí lazre' Cristo. ³¹ Na'a che dxucá'ana Dios xrlátaje benne' dxeajlí lázreze', ¿naca da nadxixruj bea na tu da québedxa zaca? ¡Cabata! Che dxéajledXu chee' Cristo dxúnquezdXu ca dxenná da nadxixruj bea na.

4

Da dxulé'e da guca chee Abraham

¹ ¿Bízraqueze nnadxu chee da ba neza da guca na chee xra xrtáudxu Abraham? ² Che Abraham bega'anē' xrlátaje lau Dios ne chee tu da bene', waca gucá'ana szren cuine' san quegá lau Dios. ³ ¿Bízraqueze naxúaj na lu dizra' lá'azxa? Dxenná na: Abraham guxeajlí lazre' Dios, na' Dios guzi' lu ne'e le' ca tu benne' xrlátaje. ⁴ Che nu benne' dxunge' zrin, lazruj da si'e quebe naca na tu da dxunézrujedxu, san naca na tu da nabágaquezdxu chee'. ⁵ Che nu benne' quebe bi nune', san dxeajlí lázreze' Dios, Bénnea' dxucá'ane' xrlátaje benne' dul-la, nacan lawe' da dxezí' lu na' Dios xel-la dxeajlí lazre' chee' chee' xuca'ane' le' xrlátaje. ⁶ Cá'anqueze bchalaj David ca naca chee benne' naca da ba neza chee' lawe' da dxucá'ana Dios le' xrlátaje lácala quebe bi nune' chee' xegá'ane' xrlátaje. ⁷ Gunná David:

Ba neza zrente naca na chee benne' ca' ba bunité lau Dios chee' da zrinna' da zaj nune', ne gude' cá'aze dul-la da belún benne' ca'.

⁸ Ba neza zrente naca na chee benne' ca' quebe dxusebaga Xránadxu le' dul-la da belune'.

⁹ ¿Naca ba neza nigá chee'z benne' ca' zaj nadxugu lu bela' chee' da na' dxulé'e na, u che nácaqueze na chee benne' ca' quebe zaj nadxugu lu bela' chee' da na'? Bache blé'entu' bca'ana Dios Abraham xrlátaje lawe' da guxeajlí lazre' Le'. ¹⁰ ¿Bátazra bca'ane' le' xrlátaje? ¿Guca na ca gudé gudxugu lu bela' chee Abraham da na' dxulé'e na, u che nédxula? Quebe guca na ca gudé na', san nédxula guca na. ¹¹ Gudxugu da na' lu bela' chee Abraham ca tu da dxunna bea na chee gulé'e na nagá'ane' xrlátaje lau Dios lawe' da guxeajlí lazre' Dios gate na' quebe ne chugu da na' lu bela' chee'. Ca'an guca, naca Abraham xra xúgute benne' dxeleajlí lazre' Dios, ne quebe zaj nadxugu da na' lu bela' chee'. Cá'anqueze dxucá'ana Dios le' xrlátaje lawe' da dxeleajlí lazre' Le'. ¹² Da li naca Abraham xra benne' ca' zaj nadxugu da na' lu bela' chee', na' cá'anqueze dxeleajlí lazre' Dios ca ben xradxu Abraham gate na' quebe ne chugu lu bela' chee' da na'.

Dxezidxu da guchebe lazre' Dios che dxeajlí lázredxu Cristo

¹³ Dios guchebe lazre' chee Abraham, ne chee zri'ine zre sue' gaca chee benne' ca' xezr la xu nigá. Quebe guchebe lazre' na chee' lawe' da nune' ca dxenná bea da nadxixruj bea na, san lawe' da bega'anē' xrlátaje lau Dios gate guxeajlí lazre' Le'. ¹⁴ Che xezr la xu nigá gaca na tuze chee benne' ca' dxelune' ca da dxenná bea da nadxixruj bea na, dácheze nagá'ana xel-la dxeajlí lazre', ne québedxa zaca da guchebe lazre' Dios. ¹⁵ Lu da nadxixruj bea na xelebía xi' bēnneache, san naga quebe ne zrin da nadxixruj bea na, quebe bi zaj nabaga bēnneache chee da nadxixruj bea na na'.

¹⁶ Ca' naca na, dxezí' lu nnadxu da guchebe lazre' Dios ne chee xel-la dxeajlí lazre' cheedxu Le', chee gaca na tu da sídxu cá'aze, ne chee gaca na tu da suatequeze chee xúgute zri'ine zre sua Abraham. Ca' naca na, quegá naca na chee'z benne' ca' dxelune' ca da nadxixruj bea na, san cá'anqueze naca na chee benne' ca' dxeleajlí lazre' Dios ca ben Abraham. Ca' naca na, le' naque' xra xúgutedxu ¹⁷ lau Dios, Bénnea' guxeajlí lazre' Abraham Le'. Naca na ca da naxúaj na lu dizra' lá'azxa, dxenná na: Nuna' lue' xra bēnneache zánete cue' xezr la xu.

Dios na' dxu'e xel-la nabán chee benne' ca' zaj nate, ne dxuchálaje' chee da quebe ne sua ca dxuchálaje' chee da ba zua.

¹⁸ Abraham guxeajli lazre' Dios, ne guleza lazre' si'e da guchebe lazre' Dios, lácala ba gudé chee si'e da dxebeza lazre'. Ca'an guca, guque' xra bénneache zánete cue' xezr la xu cáteze ba guzre Dios le', gunné': "Canite chan zri'ine zre su'." ¹⁹ Abraham ba zue' ca tu gaxúa iza, san quebe gute ni'a ne'e lu xel-la dxeajli lazre' chee' gate xeajsá lazre' zaj naque' ca benne' ba zaj nate, le' ne zru'ule' Sara, ne naca Sara nu'ula wizre. ²⁰ Quebe ben chupa lazre', san bxren lazre' da guchebe lazre' Dios chee', na' gudápadxe' xel-la dxeajli lazre', ne bxren lázredxe'. Bca'ana szrene' Dios, ²¹ ne bentequeze' neza napa Dios xel-la waca gune' xúgute' ca da guchebe lazre'. ²² Chee' le' na' Dios guzi' lu ne'e xel-la dxeajli lazre' chee' chee' bca'ane' le' xrlátaje.

²³ Gate dxenná na: "Dios guzi' lu ne'e xel-la dxeajli lazre' chee'", quebe guxuaj na chee' tuze Abraham ²⁴ san cá'anqueze cheedxu dxi'u lawe' da si' lu na' Dios xel-la dxeajli lazre' cheedxu che dxeajli lázredxu Bénnea' bsebané' Xránadxu Jesucristo ládujla benne' gate, ²⁵ na' naca Jesús Bénnea' bde Dios Le' chee' gutie' ne chee' dul-la da nabágadxu dxi'u, ne bsebané' Le' chee' xegá'anadxu xrlátaje lau Dios.

5

Da naca cheedxu lawe' da nagá'anadxu xrlátaje lau Dios

¹ Che nagá'anadxu xrlátaje lau Dios lawe' da dxeajli lázredxu Cristo zúadxu xrlátaje nen Dios ne chee' Xránadxu Jesucristo. ² Cá'anqueze lawe' da dxeajli lázredxu Cristo, ne chee' Le' dxezidxu da xrlátaje chee' Dios da tu dxeajlézquezdXu, ne dxebéle'edxu lawe' da dxebeza lázredxu sidxu da xabáa chee' Dios. ³ Quegaze da nigá, san cá'anqueze dxebéle'edxu gate dxededxu xel-la zi', lawe' da nézedxu xel-la zi' da dxededxu dxun na dxi'u zren lazre', ⁴ na' xel-la zren lazre' dxucá'ana na dxi'u xrlátaje lau Dios, na' gate nagá'anadxu xrlátaje dxebeza lázredxu. ⁵ Quebe naca tu da dácheze da na' dxebeza lázredxu lawe' da ba nuzúa Dios lu lázrdaudxu xel-la zri'i lazre' chee' ne chee' Be' Lá'azxa, Bénnea' ba nunna Dios dxi'u.

⁶ Gate na' quebe guzéquedxu guselá cuínadxu, lu zra blé'equenze Dios, gute Cristo waláz chee' benne' wen da zrinna' ca'. ⁷ Stébelé'e naca che ne nu benne' gatie' waláz chee' tu benne' xrlátaje, lácala wexázrelja tu benne' gatie' waláz chee' tu benne' naque' duté li lazre'. ⁸ Dios dxulé'ene' dxi'u ca nazri'ile'ene' dxi'u lawe' da gute Cristo waláz cheedxu gate ne nácadxu benne' dul-la. ⁹ Na'a nagá'anadxu xrlátaje lau Dios lawe' da gute Cristo waláz cheedxu, ne ba nácaqueze cheedxu ladxu ne chee' Le' lu da zi' da xa', da za za' lu zra ni'. ¹⁰ Gate na' ne dxecuídedxu Dios, Le' bexune' dxi'u tuze nen Le' lawe' da gute Cristo waláz cheedxu, na' na'a lawe' da nácadxu tuze nen Dios ba nácaqueze cheedxu ladxu ne chee' xel-la nabán chee' Cristo da zúale na dxi'u. ¹¹ Quegá tuze da nigá, san cá'anqueze dxebéle'edxu lu da naca chee' Dios ne chee' Xránadxu Jesucristo, ne ne chee' Le' nácadxu tuze nen Dios.

Da nun Adán, na' da nun Cristo

¹² Ca guca, guxú'u dul-la lu xezr la xu nigá ne chee' da ben tuze benne', na' bla' xel-la gute ne chee' dul-la, ca'an guca gulú'u bénneache lu na' xel-la gute lawe' da zaj nun xúgute' dul-la. ¹³ Nédxula ca bla' da nadxixruj bea na, ba zaj nun bénneache dul-la lu xezr la xu nigá, lácala quebe dxusebaga Dios

bénneache dul-la gate quebe ne zrin da nadxixruj bea na. ¹⁴ Ca guzú lau lu zra zua Adán ca bzin zra zua Moisés, gulú'u bénneache lu na' xel-la gute, benne' ca' zaj nune' dul-la, lálcala quebe belune' dul-la ca da ben Adán, bénnea' gudichje' da gunná be'e Dios, na' Adán na' naque' tu da dxulé'eze na ca naca Bénne' dxal-la' xide', Le' Cristo.

¹⁵ Da zrinnaj da ben Adán quebe gaca díl-lalébe na ca da dxunna Dios dxi'u. Ne chee da zrinnaj da ben tuze benne', gulate benne' zante, san xel-la weselá da nunna Dios dxi'u cá'aze ne chee xetuze benne', Jesucristo, naca na da zréndxaqueze, ne naca na da ba neza chee benne' zante. ¹⁶ Da zrinnaj na' da ben tuze benne' quebe gaca díl-lalébe na ca da dxunna Dios dxi'u lawe' da ne chee tuze da zrinnaj, zaj nabaga zria bénneache, san da dxunna Dios dxi'u naca na chee xelexegá'ana xrlátaje benne' zante benne' zaj nune' da zrinnaj. ¹⁷ Ne chee da zrinnaj da ben tuze benne' gulú'u bénneache lu na' xel-la gute, na' benne' ca' zaj nazí' lu ne'e da dxunna Dios cá'aze, ne zaj nagá'ang' xrlátaje lau Le' ba zaj nalé' lu na' dul-la, ne dxelezéque' xelenná be'e cuine' lu xel-la nabán chee' ne chee da nun xetuze benne', Jesucristo.

¹⁸ Ca guca zaj nabaga zria xúgute' bénneache ne chee da zrinnaj da ben tuze benne', Adán, cá'anqueze ne chee da xrlátaje da ben xetuze benne', Jesucristo, belexexaca bénneache xrlátaje chee' xelaca bané'. ¹⁹ Ca guca belexexaca bénneache zante benne' dul-la lawe' da quebe bzua dizra' tuze benne', cá'anqueze lawe' da bzua dizra' xetuze benne', xelexegá'ana benne' zante xrlátaje lau Dios.

²⁰ Bzua Dios da nadxixruj bea na chee gunná béadxa na da naca dul-la, na' gate dul-la guxánle'e na, ca' guzrendxa xel-la zri'i lazre' chee Dios. ²¹ Ca naca zua lu na' dul-la gute na bénneache, cá'anqueze zua lu na' xel-la zri'i lazre' chee Dios gucá'ana na dxi'u xrlátaje lau Dios chee gaca bandxu chadía chacanna ne chee Xránadxu Jesucristo.

6

Nácadxu ca benne' gate ca' chee québedxa gundxu dul-la, na' naca bandxu nen Cristo

¹ ¿Bízraqueze nnadxu? ¿Gúndxadxu dul-la chee gulé'e láwedxa xel-la zri'i lazre' chee Dios? ² ¡Cabata! Ba nácadxu ca benne' gate chee québedxa gundxu dul-la. ¿Ájazra gúndxadxu dul-la? ³ ¿Quebe nézele le'e, xúgutēdxu dxi'u ba nadxúadxu nisa chee gácadxu tuze nen Jesucristo, naca na ca ba nátedxu tu zren nen Le' lu da nadxúadxu nisa? ⁴ Ca' naca na, ne chee da nadxúadxu nisa naca ca bgáchedxu tu zren nen Le', ne nátedxu chee xebandxu, ne súadxu tu lu xel-la nabán cube cáteze guca chee Cristo, bebané' ládujla benne' gate ne chee xel-la waca xabáa chee Xre'.

⁵ Che gúcadxu tuze nen Cristo lu xel-la gute, cá'anqueze gácadxu tuze nen Le' lu xel-la dxexebán chee'. ⁶ NezdXu da gúcadxu gate nate ba gudá na le'e xaga béguaj tu zren nen Le' chee cuía xi' benne' dul-la da gúcadxu chee québedxa gundxu zrin chee dul-la ca benne' zaj nada'u cheen. ⁷ Tu benne' ba nate, ba bedxúaje' lu na' dul-la. ⁸ Che ba gútedxu tu zren nen Cristo, dxuxrén lázredxu gaca bánquezdXu tu zren nen Le' ⁹ lawe' da nezdXu quebe gate Cristo da xula lawe' da ba bebané' ládujla benne' gate, na' québedxa xu'e lu na' xel-la gute. ¹⁰ Gate gute Cristo, tu lásaze gutie' ne chee dul-la waláz chee xúgute' bénneache, san na'a naca bane', na' lu na' Dios naca bane'. ¹¹ Cá'anqueze le'e, le gueque

nácale benne' gate chee québedxa gunle dul-la, san naca banle lu na' Dios tu zren nen Xránadxu Jesucristo.

¹² Chee le na' québedxa güele lataj nna be'e dul-la bela' dxen chee da dxal-la' gate, chee québedxa gun na gunle da dxezá lazre' bela' dxen chee. ¹³ Quebe guzúa cuínale lu na' dul-la chee guchine na le'e lu da calela, san le guzúa cuínale lu na' Dios, gácale ca benne' belexebán ládujla benne' gate, chee guchíne le'e lu da xrlátaje. ¹⁴ Québedxa gaca dul-la nna be'e na le'e lawe' da québedxa xu'ule lu na' da nadxiruj bea na, san xu'ule lu na' xel-la zri'i lazre' chee Dios.

Tu da dxulé'e na ca naca chee benne' zaj nada'u

¹⁵ ¿Bizra xca'? ¿Gundxu dul-la lawe' da québedxa xú'udxu lu na' da nadxiruj bea na, san xú'udxu lu na' xel-la zri'i lazre' chee Dios? ¡Cabata! ¹⁶ Ba nézquezle che guzúa cuínale lu na' tu xránale ca benne' zaj nada'u chee guzúale dizra' chee', nadxa nácale benne' zaj nada'u chee xránale, ne dxun na ba xen guzúale dizra' chee'. Cá'anqueze naca chee le'e che guzúale dizra' chee dul-la, da gunna na le'e xel-la gute, u che guzúale dizra' chee Dios, chee gácale xrlátaje. ¹⁷ Xcalén Dios, lácala gúcale ca benne' zaj nada'u lu na' dul-la, na'a du lázrele dxuzúale dizra' chee dizra' li na', lu da na' bzua cuínale. ¹⁸ Gate bedxúajle le'e lu na' dul-la, bexácale wen zrin chee da xrlátaje. ¹⁹ (Dxuchálajlena' le'e ca dxuluchalaj bénneache lawe' da lu bela' dxen chee quebe gaca chéajni'ile ca naca da nigá.) Cáteze benle gate na' bzua cuínale lu na' da sban, ne lu na' da zrinna chee gunle da zrinna, cá'anqueze le gun na'a, le guzúa cuínale lu na' da xrlátaje chee gácaquezle bi chee Dios.

²⁰ Gate ne nácale ca benne' zaj nada'u lu na' dul-la, quebe ben na ba xen gunle da xrlátaje. ²¹ Na'a ¿bizra da ba neza guca chee da ca' dxexedué'ele chee na'a? Da ca' benle nédxuté guché na le'e lu xel-la gute. ²² Na'a nadxúajle lu na' dul-la, ne ba nácale wen zrin chee Dios chee gácaquezle bi chee Dios da naché na le'e lu xel-la nabán da zeajlí canna. ²³ Benne' dxuné' dul-la dzezi'e lazruj chee' da naca na xel-la gute, san da dxúnnaze Dios dxi'u naca na xel-la nabán da zeajlí canna tu zren nen Xránadxu Jesucristo.

7

Tu da dxulé'e na ca naca chee xel-la wechaga na'

¹ Bi bícha'dau', le'e núnbeale da nadxiruj bea na, zaj xu'u lu na' da nadxiruj bea na bénneache tuze dxácaté ne zaj naca bané'. ² Ca naca da nigá, tu nu'ula nuchaga na' xu'e lu na' benne' chee' ne chee da nadxiruj bea na dxácaté zug' nabané', san che gate benne' chee', na' xedxúaj zru'ule' lu na' da nadxiruj bea na na'. ³ Ca' naca na, che nu'ula na' súalene' benne' xula dxácaté ne nabán benne' chee', guné' dul-la gáchajne' xrba chee xel-la nuchaga na', san che benne' chee' na' gatié', xedxúaj zru'ule' lu na' da nadxiruj bea na na', na' waca xuchaga ná'lene' benne' xula, ne quebe guné' dul-la da gáchajne' xrba chee xel-la nuchaga na'.

⁴ Cá'anqueze naca chee le'e, bi bícha'dau', le'e zrágale bel-la' dxen chee Cristo, ba nácale ca benne' gate, ne québedxa xu'ule lu na' da bdxiruj be'e Moisés, chee gácale ca zru'ula benne' xula. Na'a nácale ca zru'ula Cristo, Bénnea' bebane' ládujla benne' gate, chee gácadxu bi guchine Dios. ⁵ Dxácaté na' bendxu da naca chee bela' dxen chee dxu, da nadxiruj bea na ble'e na dxi'u naca dul-la da bendxu ca da dxezá lazre' bela' dxen chee dxu, na' da

na' guché na dxi'u lu xel-la gute. ⁶ Na'a ba nácadxu ca benne' zaj nate, na' ba bedxúajdxu lu na' da nadxixruj bea na da gunná be'e na dxi'u, chee gaca gundxu zrín chee Dios lu xel-la nabán cube da dxunna Be' Lá'azxa dxi'u, ne quegá gundxu zrín na' lu da nadxixruj bea gula da naxúaj na.

Dul-la da zúale neda'

⁷ ¿Bizra nnadxu xca'? ¿Dxun da nadxixruj bea na nácadxu benne' dul-la? ¡Cabata! Quebe gunezda' da naca na dul-la chela ca ble'e da nadxixruj bea na neda'. Quebe gunezda' naca dul-la sa lazra' da naca chee nu benne' chela ca gunná da nadxixruj bea na: Quebe sa lazru' da naca chee nu benne'. ⁸ Ble'e da nadxixruj bea na neda' da naca dul-la, na' guque be'eda' zúale'e zánete da calela lu xichaj lázrdawa' da guzá lazra', lawe' da gate quebe ne gúnbe'a da nadxixruj bea na, guca dul-la chia' tu da nagache lawa' neda'. ⁹ Guzúa tu zra gate quebe ne la' da nadxixruj bea, na' gúqueda' naca bana' neda', san gate benda' da na' gunná be'e na neda', bénbe'a da naca dul-la, na' guque be'eda' nabaga' zria, ne dxal-la' gatia'. ¹⁰ Ca'an guca, da nadxixruj bea na' naca na chee gunna na neda' xel-la nabán, san guca na chia' ca tu da bete neda' ¹¹ lawe' da ble'e da nadxixruj bea na' neda' da naca na dul-la, da na' guzú xé na neda', na' ne chee da nadxixruj bea na' guque be'eda' nabaga' zria, ne dxal-la' gatia'.

¹² Ca' naca na, da li naca lá'azxa da nadxixruj bea na. Da nadxixruj bea na' naca na lá'azxa, ne xrlátaje, ne chawe'. ¹³ ¿Ájazra naca da nigá? ¿Bete da nadxixruj bea xrlátaje na' neda'? ¡Cabata! Dul-la na' bete na neda', na' caní guque be'eda' naca na dul-la. Da nigá guque be'eda' ne chee da nadxixruj bea xrlátaje na', na' caní ble'e da nadxixruj bea na' da sbánle'e naca dul-la.

¹⁴ Nezdru da nadxixruj bea na naca na da benna Be' Lá'azxa chee Dios dxi'u, san lu bela' dxen chia' naca' ca tu benne' nada'u, na' da naca' dxun na guna' dul-la. ¹⁵ Neda' quebe dxéajni'ida' da dxaca chia' lawe' da quebe dxuna' da dxaca lazra' guna', san da dxecuídeda' naca na da dxuna'. ¹⁶ Che dxuna' da calela da quebe dxaca lazra' guna', da na' dxenná da nadxixruj bea na naca na dul-la, na' nezda' xrlátaje naca da nadxixruj bea na. ¹⁷ Ca' naca na, quegá neda' dxuna' da na', san dul-la da zúale neda', le na' dxun na ca'. ¹⁸ Nezda' quebe bi zúale bela' dxen chia' da naca xrlátaje, lawe' da dxezá lazra' guna' da xrlátaje, san quebe dxezéqueda' guna' na. ¹⁹ Quebe dxuna' da xrlátaje da dxaca lazra' guna', san dxuna' da calela da quebe dxaca lazra' guna'. ²⁰ Chee le na', che dxuna' da quebe dxaca lazra' guna', quebe naca neda' dxuna' na, san dul-la da zúale neda' dxun na ca'.

²¹ Caní naca da dxaca chia': Gate dxaca lazra' guna' da xrlátaje, dxulé'e lawe zúale da calela neda'. ²² Lu xichaj lázrdawa' dxedáneda' da nadxixruj bea Dios, ²³ san dxeque be'eda' lu bela' dxen chia' zua tu da dxedábaga na ca da dxaca lazra', da naca da nadxixruj bea dul-la da zúale bela' dxen chia', na' dxenná be'e na neda'.

²⁴ ¡Edxugúa neda'! ¿Nu guselá neda' lu bela' dxen chia' da naché na neda' lu xel-la gute? ²⁵ Xcalén Dios, Le' gune' na ne chee Xránadxu Jesucristo. Ca' naca, lu xichaj lázrdawa' dxuzúa cuina' lu na' Dios, san lu bela' dxen chia' naca' ca tu benne' nada'u lu na' da nadxixruj bea dul-la.

8

Xel-la nabán da dxunna Be' Lá'azxa chee Dios dxi'u

¹ Na'a, quebe zaj nabía xi' benne' ca' zaj naque' tuze nen Jesucristo, benne' ca' québedxa dxeluné' da calëla cáteze dxenná bea bëla' dxen cheé', san dxeluné' da xrlátaje cáteze dxenná bea Be' Lá'azxa. ² Da nadxixruj bea na da dxunna Be' Lá'azxa, Bénnea' dxunne' dxi'u xel-la nabán lawe' da nácadxu tuze nen Jesucristo, ba bselá na neda' lu na' da bdxixruj be'e Moisés da dxulé'e na neda' naca' benne' dul-la, ne nabaga' zria, ne dxal-la' gatia'. ³ Ba ben Dios da quebe guca gun da bdxixruj be'e Moisés, ba gudúé' dul-la da zaj nabaga bénneache. Da nadxixruj bea na quebe guca gun na gundxu da xrlátaje lawe' da nate ni'a na' bëla' dxen cheedxu. Cheé le na' Dios gusel-le' Zrí'inequeze', na' guque' bénneache ca naca bëla' dxen cheedxu da xu'u na lu na' dul-la, chee gutié' ne cheé dul-la cheedxu, lawe' da nabágadxu zria gátedxu ne cheé dul-la da zúalë bëla' dxen cheedxu. ⁴ Caní bene' cheé gaca gundxu da nadxixruj bea na, dxi'u québedxa dxundxu ca dxenná bea bëla' dxen cheedxu, san dxundxu ca dxenná bea Be' Lá'azxa.

⁵ Benne' dxeluné' ca dxenná bea bëla' dxen cheé' zaj dxé'e gunne xue da naca cheé bëla' dxen cheé', san benne' dxeluné' ca dxenná bea Be' Lá'azxa zaj dxé'e gunne xue da naca cheé Be' Lá'azxa. ⁶ Benne' zaj dxé'e gunne xue da naca cheé bëla' dxen cheé' welátequeze', san benne' ca' zaj dxé'e gunne xue da naca cheé Be' Lá'azxa xelaca bané', ne xelebeza zri lazre'. ⁷ Benne' zaj dxé'e gunne xue cheé bëla' dxen cheé' dxelecuídené' Dios, lawe' da quebe dxelaca lazre', ne quebe gaca xuluzúa cuiné' lu na' da nadxixruj bea Le'. ⁸ Cheé le na' benne' dxeluné' ca da dxezá lazre' bëla' dxen cheé' quebe gaca xeluné' da dxezaca ba lazre' Dios.

⁹ Le'e quebe dxunle ca dxenná bea bëla' dxen cheéle, san dxunle ca dxenná bea Be' Lá'azxa, lawe' da ba zúalë Be' Lá'azxa cheé Dios le'e. Benne' quebe zúalë Be' Lá'azxa le', Be' da nasel-la Cristo, quebe naque' bi cheé Cristo. ¹⁰ Lácala zua Cristo lu xichaj lázrdaule, lu bëla' dxen cheéle dxal-la' gátele, san lu xichaj lázrdaule ba xu'ule tu xel-la nabán cube lawe' da bca'ana Dios le'e xrlátaje. ¹¹ Che zúalë Be' Lá'azxa le'e, Be' cheé Dios, Bénnea' bsebané' Jesucristo ládujla benne' gate, Léqueze Dios na', Bénnea' bsebané' Le', gunné' xel-la nabán cube cheé bëla' dxen cheéle da gátequeze na. Da nigá guné' ne cheé Be' Lá'azxa cheé Dios, Bénnea' zue' xichaj lázrdaule.

¹² Ca' naca na, bi bícha'dau', nabágadxu tu da gundxu, san quegá cheé gundxu ca dxenná bea bëla' dxen cheedxu. ¹³ Che gundxu ca dxenná bea bëla' dxen cheedxu, gátequezdxu, san che ne cheé Be' Lá'azxa guzúadxu chalá'ala da dxun bëla' dxen cheedxu, na' gaca bandxu.

¹⁴ Xúgutë benne' ca' dxelún ca dxulé'e Be' Lá'azxa le', benne' caní zaj naque' bi cheé Dios. ¹⁵ Be' Lá'azxa da guzí' lu na'le quebe dxugu'e le'e lu xel-la dxezrebe ca benne' zaj nada'u, san dxuné' nácale bi cheé Dios. Ne cheé Be' Lá'azxa nigá dxennédxu: "Xrae", gate dxuláwizredxu Dios. ¹⁶ Léqueze Be' Lá'azxa nigá dxexechébelené' be' nácadxu, dxenné' nácadxu bi cheé Dios. ¹⁷ Che nácadxu bi cheé' ca', gácaqueze cheedxu da naca cheé Dios. Gaca cheedxu da dxal-la' gaca cheé Cristo che gudedxu xel-la zi' tu zren nen Le', cheé xegá'ana szrendxu tu zren nen Le'.

¹⁸ Dxéqueda' ca xel-la zi' da dxededxu na'a quebe gutíl-lelebe na ca da xabáa da sidxu lu zra da za za'. ¹⁹ Da dxelezá lazre', ne da dxelebeza xúgutë da nun Dios naca na cheé gulé'e Dios bi zaj naca bë' bi cheé' ca'. ²⁰ Ca naca da nun Dios belexaca na dácheze, quegá ca gulaca lazre' le na, san lawe' da núnqueze Dios gaca na ca'. Bene' zua da dxelebeza lazre na ²¹ lawe' da

xelédxúaj ca da nun Dios lu na' da dxuzríá xi' lẹ na, cheę gaca ba neza cheę na tu zren nen bi ca' zaj naca bi ca' cheę Dios lu xel-la weselá cheębe' da naca xabáa. ²² Nézquezdxu, ca zrin na'a zra, xúgute da nun Dios dxelebezre wẹ' na, ne dxeledé na xel-la zi' ca tu nu'ula zuę' xel-la dxudía cheę sanę' bidau'. ²³ Quegá tuze da na' nun Dios dxedé na xel-la zi', san cá'anqueze dxi'u dxededxu xel-la zi', dxi'u na' ba zúale Be' Lá'azxa dxi'u, da naca cheędxu tu da dxunna bea na da dxal-la' sidxu. Cá'anqueze dxi'u dxebezre lázredxu dxácatę na' dxebézadxu zra gulé'e Dios nácadxu bi cheę' ca', gate na' gunne' cheędxu tu bęla' dxen cube. ²⁴ Lu da dxebeza lázredxu guládxu, san che gaca lé'edxu da dxebeza lázredxu, québedxa naca na tu da dxebeza lázredxu. Tu da ba dxelé'edxu, québedxa dxun na ba xen cueza lázredxu na. ²⁵ Che da dxebeza lázredxu naca na tu da quebe gaca lé'edxu, dxun na ba xen cuézadxu na lu dute xel-la zren lazre' cheędxu.

²⁶ Cá'anqueze Be' Lá'azxa dxácalęne' dxi'u lu xel-la nate ni'a na' cheędxu. Quebe nezdXu guchálajlędxu Dios ca dxal-la' gundxu, san Léqueze Be' Lá'azxa dxue lazre' lau Dios waláz cheędxu, ne dxebezre lazre' ca da quebe dxezeque' nu nne. ²⁷ Dios, Bénnea' dxenné'e da zua xichaj lázrdaudxu nézene' da dxaca lazre' nne Be' Lá'azxa lawe' da dxue lazre' Be' Lá'azxa lau Dios cáteze naca da dxaca lazre' Dios waláz cheę bi zaj naca be' cheę'.

Nácadxadxu wal-la ca tu benne' dxezrué'eng'

²⁸ NezdXu dxuchine Dios xúgute da dxaca cheędxu cheę gucá'ana na dxi'u chawe', dxi'u na' nazrí'idxu Lẹ', na' Lẹ' bláwizre' dxi'u ca naca da nune' gunę'. ²⁹ Benne' ca' bęnbea Dios nédxudate, bęn Lẹ' nédxudate xelaque' ca naca Zrí'inequeze', cheę gaca Zrí'ine' na' Benne' blau lédujla zánete bi biche'. ³⁰ Benne' ca' bęn Dios nédxudate ca xelaque', cá'anqueze bláwizre' lẹ', na' benne' ca' bláwizre', cá'anqueze bca'ane' lẹ' xrlátaje, na' benne' ca' bca'ane' xrlátaje, cá'anqueze bca'ana szrénqueze' lẹ'.

³¹ ¿Bizra nnadXu cheę da caní? Che caní dxácalę Dios dxi'u, ¿nuzra benne' seque' tábague' dxi'u? ³² Dios quebe bezúene' zi' gunne' dxi'u Zrí'inequeze', san bdeę' Lẹ' cheę gútię' waláz cheędxu. ¿Quebe gunne' cheędxu xúgute da ca' tu zren nen Zrí'ine'? ³³ ¿Nuzra seque' bi nne cheę benne' ca' ba gucá'a Dios lẹ'? Léqueze Dios na' bca'ane' benne' ca' xrlátaje. ³⁴ ¿Nuzra benne' seque' nne' zaj nabaga zria benne' ca'? Léqueze Cristo gutię' waláz cheędxu, ne da naca na blaudxa, naque' Bénnea' bebán ládujla benne' gate, na' zue' chalá'a xabęla cheę Dios, ga dxue lazre' lau Lẹ' waláz cheędxu. ³⁵ ¿Nuzra seque' xecá'a dxi'u lu na' Cristo, Bénnea' nazrí'ine' dxi'u? ¿Wazeque' xel-la zi', u xel-la xache', u da nau zi' xuzre na dxi'u, u xel-la dxedún, u da dxugúa zra lánadXu, u da stębe, u xel-la gute? ³⁶ Naca na ca da naxúaj na lu dizra' lá'azxa, dxenná na: Lawe' da nácantu' bi chiu' zúaquezentu' gátentu' xúgute zra. Dxelunę' netu' ca zríla'dau' ba zaj zúaba' cheę xelútię'-ba'.

³⁷ Lu xúgute da caní nácadxadXu szren ca benne' dxelezrué'eng', ne cheę Bénnea' bzrí'ine' dxi'u. ³⁸ Cheę lẹ na' dxuxrén lazra' quebe bi dę da seque' gucuasa na dxi'u lu na' Dios, Bénnea' nazrí'ine' dxi'u.

Ne xel-la gute, ne xel-la nabán,
ne gubáz cheę xabáa ca', ne be' xriwe' dxelenná bea,
ne xel-la waca cheę be' xriwe' ca',
ne da dxaca na'a, ne da za za,
³⁹ ne da zua xabáa, ne da zua lu xęzr la xu,
ne xetú da nun Dios,
quebe seque' xecá'a na dxi'u lu xel-la zri'i lazre' cheę Dios,

da blé'eng' dxi'u gate bdeę' Xránadxu Jesucristo waláz cheędxu.

9

Dios guquę'ę benne' Israel ca'

¹ Dxennía' da li ca bi cheę Cristo, ne quebe dxun lazra', na' xichaj lázrdawa' nę cheę Be' Lá'azxa dxę na neda' naca na da li. ² Dxexiáje lázreļ'ęda', ne tu zúazqueze xel-la dxudía lu lázrdawa', ³ na' dxezá lázrtea' cuía xi'a neda', ne xecuasa' nen Cristo, la naca da nigá da gácale na bi bícha'dau' ca', benne' walázr chia', benne' judío. ⁴ Benne' caní zaj naque' zri'ine zre sua Israel, na' Dios guzi' lu nę'ę benne' caní ca bi cheę' ca'. Dios guzųę' ládujla benne' ca' lu da xabáa cheę', ne beņę' lu tu xel-la wezría nen benne' ca', ne bnęzruje' le' da nadxixruj bea na da bzujaj Moisés, ne xel-la wil-la cheę xelacu', ne da nachebe lazre'. ⁵ Zaj naque' zri'ine zre zua xra xrtáudxu ca', na' ládujla benne' walázr cheę' ca', lu beļa' dxen cheę' bla' Cristo, Bénnea' naque' Dios lawe' xúgutę da de, ne gaca báqueze' chadía chacanna. ¡Ca' gaca na!

⁶ Quebe nnadxu quebe dxun Dios da dxenná xrtizre', san da naca na, quegá xúgutę zri'ine zre sua Israel zaj nababa benne' Israel ca' cheę Dios. ⁷ Quegá xúgutę zri'ine zre sua Abraham zaj naca xánņię' zrí'inequeze', san naca na ca guzre Dios le', bzunę': "Lu zri'ine zre sua Isaac xelaca zri'ine zre su'." ⁸ Da nigá dxulé'e na dxi'u quebe nu naca bi cheę Dios cáteze nálajbe', san zaj naca bi cheę' benne' ca' zaj nálaję' ca naca da guchebe lazre' Dios. ⁹ Ca naca da guchebe lazre' Dios da gunnę' cheę Abraham naca na da nigá: Lu zra da ba gunńía' xida', na' Sara chiu' sanę' tu zrí'inu'.

¹⁰ Quegá tuze da nigá, san cá'aqueze gate Rebeca guzrá' chupa zrí'inę' naca tuze xrabe', Isáac, xra xrtáudxu, ¹¹⁻¹³ ne gate bi ca' quebe ne xelálajbe', ne quebe ne xelunbe' da xrlátaje u da caleļa, Dios guzre' Rebeca: "Bi waca chiu' gácabe' wen zrin cheę bi cuide'." Da nigá naca na tuze nen da naxúaj lu dizra' lá'azxa, da dxenná na: Bzri'ida' Jacob, ne quegá Esau'. Ca' guca na, begá'ana chawe' da xu'u lu na' Dios cheę gudxęę' ca naca da núnqueze', benne' ca' dxaca lazre' guláwizre', ne quebe dxuchę'ę ca da zaj nunę'.

¹⁴ ¿Bízraqueze nnadxu? ¿Naca Dios Benne' quebe dxun da xrlátaje? ¡Cabata'! ¹⁵ Guzre' Moisés: "Wezrí lazra' benne' dxaca lazra', ne wexache lazra' benne' dxaca lazra'." ¹⁶ Ca' naca na, quebe naca lawe' da dxaca lázredxu, ne quegá lawe' da dxun zi' lázredxu, san naca na lawe' da dxexache lazre' Dios dxi'u. ¹⁷ Lu dizra' lá'azxa Dios dxę'ę wenná bea cheę xęzr la xu Egipto: "Bená' lue' wenná bea cheę gulé'eda' nę chiu' lue' xel-la waca chia', ne cheę xelúnbea bēnneache La neda' du gabí'i xęzr la xu." ¹⁸ Ca' naca na, Dios dxexache lazre' benne' dxaca lazre', ne cá'aqueze dxu'ę lataj gaque' zizraj lazre' benne' dxaca lazre' gu'ę lataj gaque' zizraj lazre'.

¹⁹ Na'a xi'u neda': Che caní naca na, ¿bizr cheę na' dxugapa Dios bēnneache dul-la? ¿Núzraqueze seque' tábaga ca da dxaca lazre' Le'?' ²⁰ Lue', benne', ¿nuzra nacu' lue' cheę gutil-lu' Dios dizra'? ¿Waca tu xesu' xę na benne' beņę' le' na: ¿Bizr chęę na' bēnu' neda' caní? ²¹ Benne' wen xesu' zruaga na' wazęqueng' gunę' cheę guna' na' ca dxaca lazre'. Wazęqueng' gunę' cheę guna' ná'queze tu xesu' da zácadxa, ne tu xesu' da xálaze. ²² ¿Bízra nnáquezdXu che Dios guca lazre' gulé'eng' dxi'u ca dxuzría xi'e bēnneache, ne ca naca xel-la waca cheę', na' lu xel-la zren lazre' cheę' bhaga lawe' cheę benne' ca' lálala dxal-la' xeledęę' le' xel-la zi', na' xelebía xi'tęqueze'?

²³ Bene' na chee blé'ene' ca naca xel-la szren chee' da xabáa chee' lu da naca cheedxu dxi'u, nácadxu benne' dxexache lazre' Le', ne bequé'e dxi'u nédxute chee' gaca cheedxu xabáa na' da nucueza Le'. ²⁴ Dios bláwizre' dxi'u ládujla benne' judío, ne ládujla benne' quebe zaj naque' judío. ²⁵ Naca na ca naxúaj na lu dizra' lá'azxa ca gunná Oseas, gunné':

Benne' ca' quebe zaj naque' bi chia', xapa' le' bi chia', na' benne' quebe bzri'ida', xapa' le' bi nazri'ite lazra'.

²⁶ Lu lataj naga gucha'-be': Quebe nácale bi chia', ná'queze xapa' le' bi chee' Dios ban.

²⁷ Ca naca chee' benne' Israel ca', Isaías dxenné': "Lácala zaj naxán zri'ine zre sua Israel ca' naxán xuzre' dxe' dxu'a tu xegu zren, bábaze benne' ca' xelexegá'ane' chee' xelelé'", ²⁸ lawe' da gun Xránadxu ca dxenná xrtizre', guzría xi'e zezr la xu nigá lu da naca xrlátaje, ne chadite. ²⁹ Naca na ca gunná léqueze Isaías na' gate nate, gunné':

Chela Xránadxu, Xrana zánete' gubáz chee' xabáa, quebe bca'ane' zri'ine zre súadxu ca',

na' xenitedxu ca guca chee' xezre Sodoma, ne chee' xezre Gomorra.

Benne' judío ca', ne dizra' chawe'

³⁰ ¿Bízraqueze nnadxu? Benne' quebe zaj naque' judío, ne quebe belexexílaj lazre' xelexegá'ane' xrlátaje lau Dios, zaj naque' benne' belexegá'ane' xrlátaje lau Dios, da zéaje na, belexegá'ane' xrlátaje lawe' da guleajlí lazre' Cristo.

³¹ Benne' Israel ca', benne' belune' ca dxenná da nadxixruj bea na da dxal-la' xucá'ana na le' xrlátaje lau Dios, quebe gulezéquene' xelexegá'ane' xrlátaje lawe' Le'. ³² ¿Bizr chee' na'? Naca na lawe' da quebe belune' ba xuzre xelexegá'ane' xrlátaje ne chee' xel-la dxeajlí lazre' chee', san gulaca lazre' xelexegá'ane' xrlátaje ne chee' da belúnqueze' le'. Chee' le' na' xeajlecházie' lawe' xiaj da dxelechegu bénneache, da na' naca Cristo ³³ ca da dxenná Dios lu dizra' lá'azxa chee', dxenné':

Neda' dxuzú'a lu xezre Sión tu benne' naque' xiaj da dxelechegu bénneache. Nu benne' cheajlí lazre' Le' quebe xedu'é'equzne'.

10

¹ Le'e, bi bícha'dau', da dxezá' lazra', ne da dxenaba' Dios guné' chee' benne' Israel ca' naca na chee' xelelé'. ² Ca naca chee' benne' ca', da li dxelebile lazre' da naca chee' Dios, san quebe naca na chee' xel-la sina li. ³ Quebe zaj nézene' ca xrlátaje dxucá'ana Dios bénneache, san dxelaca lazre' xulucá'ana xrlátaje cuine', ne quebe dxelezí' lu ne'e ca xrlátaje dxucá'ana Dios bénneache. ⁴ Cristo dxune' da dxaca lazre' Dios gun da nadxixruj bea na, lawe' da dxucá'ana Cristo xrlátaje xúgute' bénneache dxelejli lazre' Le'.

⁵ Ca naca chee' da dxucá'ana xrlátaje bénneache lau Dios da naca na ne chee' da nadxixruj bea na, bzujaj Moisés caní: Benne' dxune' ca naca da dxenná da nadxixruj bea na gaca bané' ne chee' le' na. ⁶ Ca naca chee' da dxucá'ana xrlátaje bénneache lau Dios da naca na ne chee' xel-la dxeajlí lazre' dxenná na caní: Quebe nnau' lu lazrda'u: "¿Núzraqueze benne' cuéne' xabáa?" (da naca na chee' gulétaje' Cristo), ⁷ ne quebe nnau': "¿Núzraqueze benne' xétaje' lataj chul-la chee' benne' gate ca'?" (da naca na chee' xebéaje' Cristo ládujla benne' gate.) ⁸ ¿Bizra da na' dxenná na: Dizra' na' zua na gágute' naga zu', lu dxu'u ne lu lazrda'u? Dizra' nigá naca na dizra' chawe' da dxuzénentu' bénneache chee' xeléajle'e chee' Cristo. ⁹ Che nen dxu'u dxennáu' naca Cristo Xranu', ne che lu

lazrda'u dxeajlí lazru' Dios bsebanē' Lē' ládujla benne' gate, nadxa lau'. ¹⁰ Lu lázrdaudxu dxeajlí lázredxu cheē xegá'anadxu xrlátaje lau Dios, ne nen dxú'adxu dxexechébedxu nácadxu cheē Cristo cheē ladxu.

¹¹ Lu dizra' lá'azxa dxenná na: Nu benne' dxeajlí lazrē' Lē' quebe xe-dué'eng'. ¹² Dios quebe dxebéé' benne' judío ca', u benne' quebe zaj naque' judío lawe' da Léqueze Xránadxu na' naque' Xrana xúgute bēnneache, na' dxunézrujle'ē xúgute benne' ca' dxululáwizrē' Lē'. ¹³ Naca na ca da dxenná na: Xúgute benne' dxululáwizrē' La Xránadxu xeledé'. ¹⁴ Na'a ¿ájazra xululáwizrē' Lē' che quebe ne xeléajle'ē cheē? ¿Ájazra xeléajle'ē cheē' che quebe ne xelenne' nu dxuchalaj cheē? ¿Ájazra xelenne' che quebe nu chilá' benne' guzenne' le'? ¹⁵ ¿Ájazra xuluzenne' bēnneache che quebe nu nase-la le'? Naca na ca dxenná dizra' lá'azxa, dxenná na: Xrtante naca lau Dios da dxelún benne' dxeledé' dxuluzenne' bēnneache dizra' cheē xel-la dxebeza zri lazre', ne dizra' chawe'.

¹⁶ Quegá xúgute bēnneache dxelezí' lu ne'ē dizra' chawe' nigá. Naca na ca gunná Isaías, gunné': "Xran, ¿zua nu benne' ba guxéajle'ē ca da dxuchálajntu'?"

¹⁷ Ca' naca na, dxéajle'dxu cheē' gate dxénedxu, na' da dxal-la' xénedxu naca na da gunná Cristo.

¹⁸ Na'a dxenaba': ¿Quebe ne xelenne'? Da li ba belenne'. Lu dizra' lá'azxa dxenná na:

Da dxuluzén benne' caní bache belén bēnneache du ca naca
xēzr la xu nigá.

Dizra' cheē benne' caní bache belén bēnneache du gabí'i xēzr la xu.

¹⁹ Xecha lasa dxenaba': ¿Quebe ne xeleque be'e benne' Israel ca da gunná Dios? Za'a Moisés bzuaje' ca gunná Dios, gunné':

Neda' guna' gácale benne' se lazre' cheē tu xēzre benne'
quebe ne xelaque' tu xēzre.

Guna' zrá'ale tu xēzre benne' quebe ne xeléajni'ing'.

²⁰ Gudé na' bzuaj Isaías ca gunná Dios, gunné':

Benne' quebe belexílaje' neda' belexezrélenē' neda'.

Ble'e lawa' benne' ca' quebe bululáwizrē' neda'.

²¹ Ca naca cheē benne' Israel, gunná Dios: "Tu dxuláwizrazqueza' benne' quebe dxuluzúē' dizra', ne dxeledábague' xrtizra'."

11

Nu benne' Israel ca' zaj nalé'

¹ Na'a dxenaba': ¿Ba bzua Dios chalá'ala xēzre cheē', benne' Israel ca', tu chí'izqueze? ¡Cabata! Neda'queza' naca' benne' Israel. Neda' nabábalēna' zri'ine zre sua Abraham, ne nabábalēna' zri'ine zre sua Benjamín. ² Gate nate Dios guzú' lu ne'ē benne' Israel ca', na' na'a quebe nuzúē' benne' ca' chalá'ala. ¿Quebe nézele le'e da dxenná dizra' lá'azxa ca naca cheē Elías, bēnne' bchálaje' waláz cheē Dios, gate na' gudawē' zria benne' Israel ca' lau Dios? Gunné': ³ "Xran, ba belútiē' benne' buluchálaje' waláz chiu', ne buluzrí'a xi'ē lataj lá'azxa chiu' ca', na' tuza' neda' nagá'ana', na' cá'anqueze neda' dxelaca lazre' xelútiē'." ⁴ Dios bechebē', guzre' Elías: "Ba gucá'a chia' ga xun chi gaxúa benne' quebe ne xuluzúa zribe' lau bedáu' xiaj xaga le' na Baal." ⁵ Cá'anqueze na'a ba begá'ana tu cue' benne' ca', benne' ba gucá'a Dios cheē' lu xel-la zri'i lazre' cheē'. ⁶ Na'a, che naca na ne cheē xel-la zri'i lazre' cheē Dios, quebe

naca na ne chee da gaca gun nu benne', lawe' da la guca na ca', na' xel-la zri'i lazre' chee Dios quebe naca na xel-la zri'i lazre'.

⁷ ¿Bizra xca'? Benne' Israel ca' quebe belezrué'ene' da dxelexíajé', san benne' ca' gucá'a Dios le' belezrué'ene' na, san xezícadxa benne' ca' gulaque' benne' zide'. ⁸Naca ca dxenná dizra' lá'azxa, dxenná na: Dios be'e lataj gulaca benne' ca' lázrdau zide'. Be'e le' lataj gulaque' ca benne' la chul-la, ne ca benne' cwezru' ca', na' caní zaj naque' na'a. ⁹Cá'anqueze gunná Davíd, gunné': Ca naca laní chee benne' ca' ben xelaca na ca tu xralaj, u ca tu da quela na le'

chee cheajlecházie', na' gudé Dios le' lu da ba xa'.

¹⁰Xiaj lawe' xelechul-la na chee québedxa xeelé'ene', na' xeelé'güe' chadía chacanna zran xua da naca na dul-la chee'.

Ca zaj nalá benne' quebe zaj naque' judío

¹¹Na'a dxenaba': ¿Tu chí'ize belenite benne' judío ca' gate xeajlecházie'? ¡Cabata! Gate benne' judío ca' guledábague' xrtizra Dios, guta' lataj xeelé'á benne' quebe zaj naque' judío, chee xelezúa benne' judío ca' lu xel-la dxezá lazre'. ¹²Na'a, che da zrinnaj da belún benne' judío ca' ben na guca tu da ba neza chee xúgute' bènneache, ne che gate belenitie' guca na tu da ba neza chee benne' quebe zaj naque' judío, gaca na tu da ba neza zrendxa gate xelexú'u xúgute' benne' judío ca' lu na' Dios.

¹³De tu da dxal-la' xapa' le'e, núlale quebe nácale benne' judío. Lawe' da gusel-la Dios neda' chee guzenda' benne' quebe zaj naque' judío xrtizre', dxé'le'a gunne xue chee zrin nabaga' guna'. ¹⁴Dxaca lazra' guna' xelezúa lu xel-la dxezá lazre' bal-la benne' waláxr chia' chee xeelé'. ¹⁵Che gate bzua Dios chala' ala benne' judío ca', belexaca tuze nen Dios benne' quebe zaj naque' judío, ¿ájazra gaca gate xelexaca benne' judío ca' tuze nen Dios? Gaca na ca xelexaca bane' ládujla benne' gate. ¹⁶Che guzúadxu lau Dios xeta nedxu chee cua, na' nácaqueze chee' duté cua na'. Na' che naca chee Dios lue xaga, zaj nácaqueze chee' ca naca zruze xaga na'.

¹⁷Benne' judío ca' zaj naque' ca zrúzequeze tu xaga olivo, san bal-la zruze guledxugu na, na' lue' beda'u waláz chee zruze ca', ne nacu' ca tu zruze xaga olivo xixre'. Ca'an guca, gucu' tuze nen lue xaga olivo chawe' na', ne dxezí'u ba neza xel-la nabán chee xaga olivo na'. ¹⁸Quebe gucá'ana szren cuinu' lawe' zrúzequeze xaga olivo na'. Che dxucá'ana szren cuinu', naca be'e quebe dxugagu' lue' lue xaga na', san luéqueze na' dxugagu na lue'.

¹⁹Wannáu': Awe', guledxugu zruze ca' chee cheajxedá'a neda' le'e xaga olivo na'. ²⁰Ca'an naca, san guledxugu na lawe' da quebe guléajle'e chee Dios, na' lue' bedá'azu' le'e xaga na' lawe' da dxéajle'u. Ca'an naca, quebe gucá'ana szren cuinu', san bxue xanne' cuinu'. ²¹Che Dios quebe bnite lawe' chee benne' ca' zaj naque' ca zrúzequeze xaga na', na' bebéaje' le', cá'anqueze quebe gunite lawe' chiu' lue', na' xebéaje' lue'. ²²Le nna'xque ca xrlátaje naca Dios, na' cá'anqueze ca snia naque'. Guque' snia nen benne' ca' xeajlecházie', na' naque' chawe' nen lue'. Dxun na ba xen tu gúnzquezu' ca dxal-la' gunu' chee tu sí'zquezu' da chawe' chee', lawe' da che quebe gunu' caní, cá'anqueze wegüe' lue'. ²³Che benne' judío ca' xelexexéaj lazre', na' xelexaque' tuze nen xaga olivo na', lawe' da napa Dios xel-la waca xuné' le' tuze. ²⁴Lue' quebe nacu' judío, san guchugue' lue' le'e tu xaga olivo xixre', na' bexuné' lue' tuze nen xaga olivo chawe' na', da quebe nu dxun. Benne' judío ca', benne' zaj

naque' ca zrúzequeze xaga olivo chawe' na', gácadxa chawe' xexune' le' tuze nen xaga olivo cheéqueze' na'.

Ca xelexú'u benne' judío lu na' Dios

²⁵ Le'e, bi bícha'dau', dxaca lazra' chéajni'ile chee da nagache nigá, chee quebe guéquele nácale benne' sina. Benne' Israel ca' zaj naque' benne' lázrdau zide' tu chí'idauze, ca zrin zra xelexú'u lu na' Dios xúgute' benne' quebe zaj naque' judío. ²⁶ Gate gaca na, nadxa xeledá xúgute' benne' Israel ca' lawe' da naxúaj lu dizra' lá'azxa da dxenná na:

Benne' weselá ze'e Sión,

na' cue' da calela da zaj nabaga zri'ine zre sua Jacob.

²⁷ Da nigá gaca xel-la wezría guna' nen benne' ca', gate neda' cua' dul-la chee'.

²⁸ Ca naca chee dizra' chawe' chee Cristo, zaj naca benne' judío ca' ca benne' dxelecuídenē' Dios chee gaca da ba neza chee le'e, san Dios ne nazrí'ine' benne' ca' lawe' da guqué'e xra xrtawe' ca'. ²⁹ Ca da dxunna Dios, quebe xequé'e na, ne quebe dxuzúe' chalá'ala nu ba bláwizre'. ³⁰ Le'e nédxute' gudábaga xrtizra Dios, san na'a, lawe' da guledábaga benne' judío ca' xrtizre', Dios dxexache lazre' le'e. ³¹ Cá'anqueze na'a, benne' judío ca' dxeledábague' xrtizra Dios, san naca na chee xexache lazre' Dios le' ca dxexache lazre' le'e. ³² Dios be' lataj xúgute' guledábague' xrtizre' chee gaca xexache lazre' xúgute'.

³³ Szrente naca xel-la gunní'a chee xel-la sina, ne xel-la dxéajni'i chee Dios. Quebe séquedxu chéajni'idxu ca da dxuchi'e, ne quebe gaca gúnbea xánnedxu da dxune'. ³⁴ ¿Núzraqueze gaca chéajni'i ca da xu'u xichaj lázrdau Xránadxu? ¿Núzraqueze gaca guzéajni'i Le'? ³⁵ ¿Núzraqueze benne' bi bnézruje' chee Xránadxu, chee gun na ba xen bi xuzri'e chee bēnea'? ³⁶ Xúgute' da dxelédxu zá'aca na lu na' Dios, na' Le' bēne' da ca', ne zaj naca na chee Léqueze'. ¡Gaca ba Dios chadía chacanna! ¡Ca'an gaca na!

12

Da dxal-la' gun benne' naque' bi chee Dios

¹ Ca'an naca, bi bícha'dau', lu xel-la dxexache lazre' chee Dios, dxata' xúeda' le'e guzúa cuínale lu na' Dios ca tu guna' ban, da naca na lá'azxa, ne da xezaca ba lazre' Dios. Da nigá naca na tu da gucá'ana szrene Dios da dxal-la' gunle.

² Québedxa gunle ca dxelún bēneache chee xezr la xu nigá, san le guchá cuínale chee caní zra dutē ca naca lu xichaj lázrdau. Ca'an gaca, gúnbeale da dxaca lazre' Dios gunle, da na' naca xrlátaje, ne da dxezaca ba lazre' Dios, ne da naca na li lazre'.

³ Ne chee da nusebaga Dios neda' lu da chawe' chee dxapa' xúgutele le'e quebe nu benne' dxal-la' gucá'ana cuine' szrendxa ca dxal-la' gune', san dxal-la' guxúe' ca da naque' lu xel-la dxexaj lazre', cáteze naca xel-la dxeajli lazre' da nunezruj Dios le'. ⁴ Ca naca chee bel-la' dxen cheedxu, zánete da napa na, na' xúgute' da ca' quebe dxelún na tuze zrin, ⁵ cá'anqueze dxi'u, láqueze naxandxu, nácadxu ca tuze bel-la' dxen chee Cristo, ne nácadxu tuze tudxu xetudxu ca zaj naca da ca' napa tu bel-la' dxen chee nu benne'.

⁶ Dios nunne' dxi'u cha cheedxu ca da gaca gundxu ca da dxaca lazre' gunne' tu tudxu. Dخال-la' guchine xánnedxu ca da nunne' dxi'u. Che nunne' dxi'u chee guchálajdxu waláz chee',

dxal-la' gundxu na dutę xel-la dxeajlí lazre' da nápadxu.

⁷ Che nunņę' dxi'u cheę gundxu zrin cheę lįwézredxu,
dxal-la' gundxu na cháwe'dau'.

Che nunņę' dxi'u cheę gusędedxu bėnneache,
dxal-la' gusęde xánnedxu le'.

⁸ Che nunņę' dxi'u cheę gutįpadxu lazre' bėnneache,
dxal-la' gutįpa xánnedxu lazre' le'.

Che nunņę' dxi'u cheę bi gunėzrujdxu,
dxal-la' gundxu na du lázredxu.

Che nunņę' dxi'u cheę nņę xuedxu,
dxal-la' guxúe xánnedxu ca dxundxu na.

Che nunņę' dxi'u gácaleđxu benne' xache' ca',
dxal-la' gundxu na dutę xel-la dxebé cheędxu.

⁹ Le zri'i lįwézrele du lázrele tule xetule.

Le guzúa chalá'ala da caleļa, ne le gun da xrlátaje.

¹⁰ Dخال-la' zri'i lįwézrele tule xetule ca nazri'ile bi bįchequezle.

Le gapa ba lá'ana lįwézrele, ne le güe lataj tule xetule.

¹¹ Le gun zi' lázrele, ne quebe gácale zrawęde,
na' le gun zrin cheę Xránadxu dutę lázrdaule.

¹² Le sua xel-la dxebé lu da dxebeza lázrele.
Le gaca dxexruj lazre' gate dxedele xel-la zi'.

Le guchálajłeteze Xránadxu.

¹³ Le gunezruj da dxelexazrje benne' ca' zaj naque' bi cheę Dios.

Le si' lu na'le du lázrele benne' ca' zá'aque' dxelenabe' le'e.

¹⁴ Le naba da chawe' cheę benne' ca' zaj nau zi' xuzre' le'e.

Le naba da xrlátaje cheę', ne quebe nábale da caleļa cheę benne' ca'.

¹⁵ Le be nen benne' dxelebé,
ne le xexache lazre' benne' ca' dxelebezre xache'.

¹⁶ Le gaca tuze nen lįwézrele tule xetule.

Quebe gucá'ana szren cuínale,
san le gaca tuze nen benne' dxexruj lazre' ca'.

Quebe guéquele ba nápale dutę xel-la sina.

¹⁷ Quebe xebi'ile da caleļa cheę benne' nunę' cheęle da caleļa.

Le gun ba xuzre gunle da xrlátaje lau xúgute bėnneache.

¹⁸ Che naca cheęle, le gun naga zę lau séquele cueza zri lázrele nen xúgute bėnneache. ¹⁹ Bi bįcha'dau' nazri'itę lazra', quebe xebėj lázrele, san le güe lataj Dios xebėj lazre', lawe' da naxúaj lu dizra' lá'azxa da dxenná na: Chia' neda' naca xebėj lazra'. "Neda' xebi'a cheę bėnneache," dxenná Xránadxu.

²⁰ Cá'anqueze dxenná na: Che dxedún benne' dxecuídene' lue', bnezruj da gawę', na' che dxeбіlene', bnezruj da xí'aje', lawe' da gate dxunle caní, xedué'e bėnnea'. ²¹ Quebe gu'u lataj da caleļa nna be'e na lue', san gunná be'e da caleļa ne cheę da xrlátaje da dxunu'.

13

¹ Xúguteđxu dxal-la' guzúadxu dizra' cheę benne' xu'u lawe', lawe' da quebe nu chilá' benne' xu'u lawe' che quebe nunna Dios le' xel-la dxenná bea cheę'. Benne' xu'u lawe' ca' zaj naque' benne' nuzúa Dios. ² Cheę le na' nu benne' dxedábage' benne' xu'u lawe' dxedábage' ca da nun Dios. Benne' dxeledábage' caní zaj nabague' zria, na' Dios xuzri'e cheę' da xexal-le'. ³ Benne' ca' dxelenná be'e quebe nuzúa Dios le' cheę xuluchebe' benne'

dxelunġ' da xrlátaje, san cheġ xuluchebeġ' benne' dxelunġ' da calela. ¿Dxaca lazru' quebe zrebu' benne' xu'u lawe'? Ben da xrlátaje, na' benne' xu'u lawe' ca' xelapeġ' ba lá'ana lue' ⁴lawe' da zaj naqueġ' wen zrin cheġ Dios cheġ xelunġ' chiu' da xrlátaje. Che dxunu' da calela, dxal-la' zrebu' lawe' da quegá dácheze zaj napeġ' xel-la dxenná bea xelxebi'e cheġ bėnneache lawe' da zaj naqueġ' wen zrin cheġ Dios cheġ xuluzúe' lu da ba xa' benne' ca' dxelunġ' da calela. ⁵Cheġ le na', dxun na ba xen guzúadxu dizra' cheġ benne' xu'u lawe', quegá tuze cheġ quebe xuluzúe' dxi'u lu da ba xa', san lawe' da nezdxu naca na da nadxixruj bea Dios. ⁶Cheġ le na' dxízrujle da dxebugale cheġ xu'u lawe', lawe' da zaj naca benne' xu'u lawe' wen zrin cheġ Dios, ne dxelún xánnie' zrin cheġ' na'.

⁷Le quizruj xúguteġ bėnneache ca da nabágale cheġ'. Da nabágale cheġ benne' wechizruj, le quizruj da nabágale. Da nabágale cheġ xu'u lawe', le quizruj na. Benne' dxal-la' gápale ba lá'ana, le gapeġ' ba lá'ana. Benne' dxal-la' gucá'ana szrenle, le gucá'aneġ' szren.

⁸Quebe dxal-la' cue zria cheġe nen nu benne' san tuze cheġ zri'ile le' ca dxal-la' gunle cheġ le sa' ljwėzrele tule xetule. Che gunle da nigá, na' gunle da nadxixruj bea na. ⁹Naga zaj naxúaj da nadxixruj be'e Dios dxenná na: Quebe súalenu' zru'ula benne' xula. Quebe gutiu' benne'.

Quebe cuanu'. Quebe gun lazru' cheġ benne'. Quebe sa lazru' da naca cheġ benne'. Xúguteġ da nadxixruj bea caní, ne xúguteġ da nadxixruj bea xezícadxa dxun bėnnea' dxuzúe' dizra' da nadxixruj bea na' dxenná na: Bzri'i le sa' ljwezru' ca nazrí'i cuinu'. ¹⁰Bėnnea' nazrí'ineġ' le sa' ljwezreġ' quebe dxunġ' da calela cheġ le sa' ljwezreġ' na'. Ca'an naca, bėnnea' nazrí'ineġ' le sa' ljwezreġ' dxuzúe' dizra' cheġ da nadxixruj bea na.

¹¹Ca naca da caní, le guxúe xanne' ca naca zra zúadxu na'a lawe' da ba bzin zra xebandxu lu bchigala lawe' da ba zua gágudxa zra ladxu lu da nácadxu ca guzúa na gate na' guzú lau dxėajledxu. ¹²Ba dxedé cheġ da chul-la, ne ba za te zra. Cheġ le na' dxal-la' gusandxu da dxelún bėnneache lu da chul-la, na' gácadxu ca tu benne' zejeġ' wedil-la dxacu zra lanġ' xia, cheġ tadxu lu xel-la naxani' cheġ Dios.

¹³Dxal-la' tadxu li lazre' ca dxal-la' tadxu te zra. Quebe dxal-la' xí'ajdxu da dxuzuzre na bėnneache, ne quebe gagu xrátadxu. Quebe gundxu da sban, ne da calela. Quebe tıl-laledxu le sa' ljwėzredxu, ne quebe gácadxu xa lazre'.

¹⁴Xránadxu Jesucristo gácaquezeġ' ca zra lánadxu xia, na' quebe gundxu da dxezá lazre' beġa' dxen cheġdxu.

14

Quebe si tizru' biche ljwezru'

¹Che tu bi bíchedxu quebe ne se cháchabe' lu xel-la dxeajlí lazre', le si' lu na'le lebe', san quegá cheġ gutıl-lalele lebe' dizra' ca naca da quebe dxun na ba xen. ²Ca naca na, zaj zra' benne' dxeleajlí lazre' naca cheġ' xelaweġ' bal-la bi de, san zaj zra' benne' xezícadxa quebe ne xelezé chacheġ' lu xel-la dxeajlí

lazre', na' dxeléquene' waca xelawe' tuze xixre' cuan. ³ Benne' dxawe' xúgute da ca' quebe dxal-la' guzúe' chala'ala bènea' nadxúaj nadxeze da dxawe', na' benne' nadxúaj nadxeze da dxawe' quebe dxal-la' si tizre' bènea' dxawe' bal-la bi de, lawe' da nazi' lu na' Dios bènea'. ⁴ ¿Nuzra nacu' lue' dxezi' tizru' wen zrin chee Xránadxu? Che xegá'ane' xrlátaje, u che quegá, naca na da nabaga Xránadxu. Xegá'ane' xrlátaje lawe' da napa Xránadxu xel-la waca chee gucá'ane' le' xrlátaje.

⁵ Caní naca xetú. Zaj zra' benne' dxulupá'anadxé' tu zra ca xetú zra, na' zaj zra' benne' dxeléquene' tuz ca zaj naca xúgute zra. Tu tudxu dxal-la' se cháchadxu lu xichaj lázrdadxu ca naca da caní. ⁶ Benne' dxupá'ane' tu zra dxune' na chee gape' ba lá'ana Xránadxu, na' bènea' quebe dxupá'ane' zra na' dxune' ca' chee gape' ba lá'ana Xránadxu. Benne' dxawe' bal-la bi de dxune' na chee gape' ba lá'ana Xránadxu lawe' da dxe'e Dios: Xcalenu', na' bènea' nadxúaj nadxeze da dxawe' dxune' na chee gape' ba lá'ana Xránadxu, na' cá'anqueze dxe'e Dios: Xcalenu'.

⁷ Netudxu dxi'u naca bandxu chee gundxu da naca cheézedxu, ne quegá gátedxu lu da naca cheézedxu. ⁸ Che naca bandxu, naca na chee gaca ba Xránadxu. Ca' naca na, che gaca bandxu, u che gátedxu nácadxu bi chee Xránadxu. ⁹ Cristo gutié', ne bebane' chee gaque' Xrana benne' gate ca', ne Xrana benne' ban ca'.

¹⁰ Na'a lue', ¿bizr chee na' quebe dxelé'enu' chawe' ca da dxun le sa' ljwezru', bi bíchedxu? ¿Bizr chee na' dxuzú' le' chala'ala? Xúgutedxu dxal-la' zrindxu lau Cristo chee guchi'e ca da nundxu tu tudxu. ¹¹ Naxúaj lu xiche lá'azxa da dxenná na:

Dxenná Xránadxu: "Dxuzetaj cuina' dxennía':

Xúgute bèneache xuluzú zribe' lawa'.

Xúgute' xelexechebe' lawe' lau naca' Dios."

¹² Ca'an naca, tu tudxu dxi'u dxun na ba xen gulé'dexu ca da nundxu lau Dios.

¹³ Chee le na' québedxa dxal-la' si tízradxu tudxu xetudxu. Le gun ba xuzre quebe bi gunle da gun na ga chegu bi bíchele, u da gun na cheajcházié' lu dul-la. ¹⁴ Dxuxrén lazra' Xránadxu Jesús, ne nezda' quebe bi da dxágudxu nácaqueze sban, san che tu bi bíchedxu dxéquebe' de tu da dxágudxu da naca na sban, chee lebe' naca na da sban. ¹⁵ Che ne chee da dxagu' lue', dxunu' dxeajchaze bi bichu', quebe dxunu' da naca chee xel-la zri' lazre'. Quebe gunu' cuía xi' tu benne', bènea' gute Cristo waláz chee', lawe' da dxaca lazru' lue' gagu' bi xel-la wagu. ¹⁶ Quebe bi gunle da güe lataj nu nne schanní' chee da dxéquele naca na da xrlátaje. ¹⁷ Chee súadxu naga dxenná be'e Dios dxi'u quebe naca na chee da dxágudxu, u chee da dxí'ajdxu, san naca na chee xegá'anadxu xrlátaje lau Dios, ne chee gápadxu xel-la dxebeza zri lazre', ne chee súadxu xel-la dxebé, da ca' nápadxu ne chee Be' Lá'azxa. ¹⁸ Nu benne' dxune' zrin chee Cristo caní dxune' da dxezaca ba lazre' Dios, na' dxelapa bèneache le' ba lá'ana.

¹⁹ Ca' naca na, dxal-la' gundxu da dxulusá na xel-la dxebeza zri lazre', ne da dxuluzá chacha na dxi'u. ²⁰ Quebe guzríá xi'u da nun Dios lu xichaj lázrdau le sa' ljwezru' ne chee da dxagu'. Da li xúgute da dxágudxu zaj naca na xrlátaje, san quebe naca xrlátaje bi gágudxu da gun na cheajchaze benne' xula lu dul-la. ²¹ Xrlátaje naca quebe gágudxu be'la', ne quebe xí'ajdxu xrise uva wal-la, ne quebe bi gundxu da gun na cheajchaze bi bíchedxu lu dul-la, u da guzríá xi na

xel-la dxeajlí lazre' chee'. ²² Che napu' xel-la dxeajlí lazre' bi gaca gunu', dxal-la' gunu' na lué'queze lau Dios. Ba neza naca na chee benne' quebe guzríá xi' cuine' nē chee da dxéquene' naca na da xrlátaje gunē'. ²³ Bénnea' dxawē' da dxéquene' quebe dxal-la' gawe', nabague' zria gate dxawē' na lawe' da dxawē' da quebe dxeajlí lazre' naca chee' gawe'. Xúgute da dxundxu zaj naca dul-la che quebe dxuxrén lázredxu zaj naca na xrlátaje.

15

Ben da dzezaca ba lazre' bi bichu', ne quegá da dzezaca ba lázrezu' lue'

¹ Dxi'u ba zē cháchadxu lu xel-la dxeajlí lazre' dxal-la' gácalēdxu benne' quebe ne sē chachē' lu xel-la dxeajlí lazre', ne quebe gundxu da dzezaca ba lázredxu dxí'uze. ² Tu tudxu dxal-la' gundxu da dzezaca ba lazre' bi bíchedxu lu da gun na chawe' cheēbe', ne lu da gusegula na lebe' lu xel-la dxeajlí lazre' cheēbe'. ³ Cristoqueze quebe benē' da dzezaca ba lazre' leze', san guca chee' ca naxúaj na lu dizra' lá'azxa, dxenná na: Benne' ca' gulenné' schanni' chiu' Lue', Dios, guca na ca gulenné' schanni' chia' neda'. ⁴ Xúgute da naxúaj nédxudaute lu dizra' lá'azxa zaj naxúaj na chee guzējajni' na dxi'u, chee gápadxu xel-la dxebeza lazre' nē chee xel-la zren lazre', ne xel-la dxexúe zren, da ca' nápadxu nē chee da ca' zaj naxúaj na. ⁵ Dxenaba' lau Dios, Bénnea' dxunne' dxi'u xel-la zren lazre', ne dxexúe zrene' dxi'u, chee gácalēne' le'e chee gácale tuze tule xetule nē chee Jesucristo, ⁶ chee gunle xúgutele tu zren güe lá'anale Dios, Xra Xránadxu Jesucristo.

Dxelén benne' quebe zaj naque' judío dizra' chawe'

⁷ Ca'an naca, chee gaca ba Dios, le si' lu na'le ljwézrele tule xetule ca ben Cristo, guzi' lu nē'e dxi'u. ⁸ Ca da dxennéa' neda', dxennéa' bla' Cristo, ne benē' zrin chee benne' judío ca', chee benē' ca da guchebe lazre' Dios lau xra xrtáudxu ca', ne caní blé'eng' naca Dios li lazre'. ⁹ Cá'anqueze blē'e chee xelúe lá'ana Dios benne' ca' quebe zaj naque' judío lawe' da dxexache lazre' bénneache, ca da naxúaj na caní chee Cristo lu dizra' lá'azxa, dxenné': Güe lá'ana' lue', Dios, lau benne' xēzr la xu ca', ne tu gul-lazqueza' da xelapa ba lá'ana Lue'.

¹⁰ Cá'anqueze dxenná na:

Le be, le'e, bénneache dute xēzr la xu
nen benne' zaj naque' bi chee Dios.

¹¹ Cá'anqueze dxenná na:

Le güe lá'ana Xránadxu,
le'e, bénneache chee xúgute xēzr la xu,
ne le guchalaj chee xel-la szren chee',
le'e, xúgute bénneache.

¹² Cá'anqueze bchalaj Isaías ca naca chee Cristo, gunné':

Welá'queze tu zri'ine zre sua Isaí,
Bénnea' nna bé'eng' xúgute cue' xēzr la xu,
na' benne' ca' xelebeza lazre' Le'.

¹³ Dxenaba' Dios, Bénnea' dxunne' dxi'u xel-la dxebeza lazre', chee gúnna'le'e le'e xel-la dxebe', ne xel-la dxebeza zri lazre' lawe' da dxeajlí lázrele Le', chee gápale'ēquezle xel-la dxebeza lazre' nē chee xel-la waca chee Be' Lá'azxa.

¹⁴ Le'e, bi bícha'dau', dxuxrén lazra' nápalē'ele da chawe', ne núnbeale xúgute chee gaca guzējajni'ile ljwézrele tule xetule. ¹⁵ Lu xiche nigá bechugu lazra'

guzúaja' chee da caní chee quebe gal-la lázrele na. Dxuna' na ne chee da bsebaga Dios neda' lu da chawe' chee'. ¹⁶ Caní guna' zrin chee Jesucristo ládujla benne' quebe zaj naque' judío. Zrin dxuna' naca na chee guzenda' bénneache dizra' chawe' chee Dios chee guzrá'a benne' quebe zaj naque' judío lau Dios ca tu guna' da dxezaca ba lazre' Le'. Xelaque' benne' lá'azxa ne chee Be' Lá'azxa.

¹⁷ Lu da naca' chee Jesucristo waca xezaca ba lazra' lu zrin dxuna' chee Dios ¹⁸ lawe' da quebe dxedxugu lazra' guchálaja', san tuze ca naca da nun Cristo ne chia' neda', chee guna' xuluzúa benne' quebe zaj naque' judío xrtizra Dios. Da nigá beña' ne chee da bchálaja', ne da beña', ¹⁹ ne ne chee xel-la waca chee da ble'e Dios, nen xel-la waca chee xabáa, ne ne chee xel-la waca chee Be' Lá'azxa. Caní bchálaja' dizra' chawe' chee Cristo du ca naca xezr la xu. Guzú lawa' dxuna' na xezre Jerusalén, bzrintea' naga nababa Ilírico. ²⁰ Caní naca, beña' ba xuzre bchálaja' dizra' chawe' naga quebe ne xelenne' La Cristo, chee quebe guna' zrin naga ba zaj nun zrin xezícadxa benne', ²¹ na', ca dxenná dizra' lá'azxa:

Xelelé'e benne' ca' quebe ne zrin nu benne' guzenne' le' chee Cristo, na' benne' ca' quebe ne xelén chee Le' xeléajni'ine da naca chee'.

Pablo dxugú'u be'e chéaje' xezre Roma

²² Chee guzenda' le'e da caní, da zan lasa guca lazra' xedajnná'a le'e zrale xezre Roma, san quebe guca chia'. ²³ Na'a, ba bezuzre beña' zrin nigá, ne lawe' da zánete iza ba guca lazra' xida' súalena' le'e, ²⁴ dxebeza lazra' te' xedajnná'a le'e gate cha'a lu xezr la xu España. Gate te sua' xel-la dxebé nen le'e dxebeza lazra' xusi'ile neda' neza, na' cha'a ná'ala. ²⁵ Na'a cha'a Jerusalén, gu'a late' da gácale na bi bíchedxu zaj zre'e na', ²⁶ lawe' da bi bíchedxu zaj zre'e xezre ca' zaj nababa Macedonia, ne xezre ca' zaj nababa Acaya guléquene' naca xrlátaje bulutube' dumí da xelesel-le' chee bi bíchedxu zaj naque' baxache', zaj zrabe' Jerusalén. ²⁷ Guléquene' naca xrlátaje xelune' da nigá, na' caní naca na lawe' da dxelebague' chee benne' ca', lawe' da benne' judío ca', benne' dxeléajle'e chee Cristo, bulunézruje' chee benne' quebe zaj naque' judío chee da zaj nape' chee Dios, na' benne' caní dxal-la' xulunézruje' chee benne' judío ca' chee da zaj nape' chee xezr la xu nigá. ²⁸ Caní naca, gate xexuzre guna' da nigá, ne ba bnézruja' le' dumí nigá, na' cha'a lu xezr la xu España, na' ca teza' xedajnná'a le'e. ²⁹ Dxuxrén lazra' gate xida' naga zrale le'e, gúalé'a da chawe' chee dizra' chawe' chee Cristo.

³⁰ Le'e, bi bícha'dau', dxata' xúeda' le'e ne chee Xránadxu Jesucristo, ne ne chee xel-la zri'i lazre' da dxunna Be' Lá'azxa dxi'u, chee gácale tuze nen neda' guchálajledxu Dios chee gácalene' neda'. ³¹ Le naba Dios chee guselé' neda' lu na' benne' quebe dxeléajle'e chee Cristo naga nababa Judea, ne chee xelezí' du lazre' bi bíchedxu zaj zre'e Jerusalén dumí nigá da nu'a, ³² na' che naca da dxaca lazre' Dios, lá'a lu duté xel-la dxebé xedajnná'a le'e, ne chee xezí' lazra' naga zrale le'e. ³³ Dxenaba' Dios, Bénnea' dxunne' dxi'u xel-la dxebeza zri lazre', súalene' xúgutele le'e. ¡Ca'an gaca na!

16

Pablo dxugape' diuzre bi bíchedxu ca'

¹ Dxegu'a lu na'le nu'ula zandxu Febe, nu'ula na' ba bene' zrin chee Cristo ládujla bi bíchedxu zaj zre'e xezre Cencrea. ² Le si' lu na'le le' cháwedau' lu

La Xránadxu, ca dxal-la' gaca ládujla bi bíchedxu dxeléajle'e chee Cristo, na' le gácalene' bíteze da dxexárzjene', lawe' da ba gúcalę le' benne' zan, ne neda'queza'.

³ Le gugapa diuzre Priscila ne Aquilo, benne' belún zrin chee Jesucristo tu zren nen neda'. ⁴ Benne' caní buluzúe' xel-la nabán chee' lu da štebe chee' gúcalene' neda'. Ca' naca na, dxapa' benne' ca' xcalenle, ne quegaze neda', san cá' anqueze dxelún xúgute' bi bíchedxu quebe zaj naque' judío. ⁵ Le gugapa diuzre bi bíchedxu ca' dxelezágabe' lizre Priscila, ne Aquilo. Le gugapa diuzre Epeneto, benne' ljwezra' nazri'ite lazra'. Le' guquę' benne' nedxu naga nababa Acaya guxéajle'e chee Cristo. ⁶ Le gugapa diuzre María, nu'ula na' ba benle'e zrin ládujla le'e. ⁷ Le gugapa diuzre benne' walázz chia', Andrónico, ne Junias, benne' ca' gulaque' ljwezra' lizre xia. Zaj naque' benne' blau ládujla benne' gubáz ca' chee Cristo, na' guléajle'e chee Cristo nédxudxa ca neda'.

⁸ Le gugapa diuzre Amplias, benne' ljwezra' nazri'ite lazra' lu La Xránadxu. ⁹ Le gugapa diuzre Urbano, benne' ljwezra' lu zrin chee Jesucristo, ne le gugapa diuzre Estaquis, benne' nazri'ite lazra'. ¹⁰ Le gugapa diuzre Apeles, benne' blé'ene' da zan lasa ca dxeajlí lazre' Cristo. Cá' anqueze le gugapa diuzre Aristóbulo, benne' xrtia'. ¹¹ Le gugapa diuzre Herodión, benne' walázz chia', ne Narciso, benne' xrtia', benne' dxeléajle'e chee Xránadxu. ¹² Le gugapa diuzre Trifena ne Trifosa, nu'ula ca' dxelunę zrin chee Xránadxu, ne le gugapa diuzre Pérsida, bi zandxu nazri'ite lazrdxu, nu'ula na' ba benle'e zrin chee Xránadxu. ¹³ Le gugapa diuzre Rufo, benne' blau dxéajle'e chee Xránadxu, ne xrne'e, nu'ula na' naque' ca xrnáqueza'. ¹⁴ Le gugapa diuzre Asíncrito, ne Flegonte, ne Hermas, ne Patrobas, ne Hermes, ne bi bíchedxu ca' zrálene' le'. ¹⁵ Cá' anqueze le gugapa diuzre Filólogo, ne Julia, ne Nereo, ne nu'ula zane', ne Olimpas, ne xúgute' bi bíchedxu dxeajlí lazre' Cristo, benne' zrálene' benne' caní.

¹⁶ Le gugapa diuzre ljwézrele tule xetule, gunídate' ljwézrele. Xúgute' cue' bi bíchedxu dxulugape' le'e diuzre.

¹⁷ Le'e, bi bícha'dau', dxata' xúeda' le'e, nna' xánnele benne' ca' dxelunę' chupa la'a bi bíchedxu ca', ne dxelunę' dxeajlecházie' benne' ca', na' dxulusedene' da dxedábaga na ca da nusédele. Le cuasa naga zaj zra' benne' ca' ¹⁸ lawe' da quebe dxelún benne' ca' zrin chee Xránadxu Jesucristo. Dxelunę' ca da dxezaca ba lazre' be'la' dxen cheequeze', ne dxelezí xę'e benne'achedu ca' quebe ne xeleneze xánnie' ca naca dizra' chawe'. Benne' wen lazre' ca' cadite zaj nupé'e, ne zaj nézene' da dxuluchálaje'. ¹⁹ Xúgute' béneache zaj nézene' ca ba bzúale xtizra' Dios. Chee le' na' dxebeda', ne dxaca lazra' gácale ban lazre' gunle da xrlátaje, na' quegá gunle da calęla. ²⁰ Dios, Béne' dxunne' dxi'u xel-la dxebeza zri lazre' ba zúaqueze' gácalene' le'e, chee guchúchujle Satanás da xriwe'. Dxenaba' lau Xránadxu Jesucristo gunę' gaca chawe' chee.

²¹ Bi bíchedxu Timoteo dxugápabe' le'e diuzre. Nácabe' ljwezra' lu zrin chee Cristo. Cá' anqueze dxulugape' le'e diuzre benne' walázz chia' Lucio, ne Jasón, ne Sosípater.

²² Neda', Tercio, dxuzúaja' xtizra' Pablo caní, dxugapa' le'e diuzre lu La Xránadxu.

²³ Gayo dxugape' le'e diuzre, bénnea' zua' lizre', na' dxunne' lizre' naga dxelezraga xúgute benne' bíchedxu caní. Cá'anqueze dxulugape' le'e diuzre Erasto, benne' xu'u lu ne'e dumí chee xezre, ne bi bíchedxu Cuarto.

²⁴ Dxenaba' Xránadxu Jesucristo gune' gaca chawe' chee xúgutele le'e. ¡Ca'an gaca na!

Pablo dxue lá'ané' Dios

²⁵ Na'a, dxue lá'anantu' Dios, Bénnea' séquene' guzé cháchadxe' le'e lu dizra' chawe' da dxuzenda' bénneache, ne lu da dxusédeda' ca naca chee Jesucristo. Da nigá naca na tuze nen da ble'e Dios chee da nagache da gulú'u chawe' bagácheze nédxudaute, ²⁶ san na'a ba ble'e lawe' na ne chee dizra' lá'azxa da buluzúaj benne' ca' buluchálaje' waláz chee Dios, ca da bdxixruj be'e Dios chadía chacanna. Ba ble'e lau dizra' chawe' nigá na'a lau benne' xúgute xezr la xu chee xeléajle'e chee na, ne xuluzúe' dizra' chee na.

²⁷ Dios, Benne' tu licha', ne Benne' sina, gaca ba Le' chadía chacanna ne chee Jesucristo. ¡Ca'an gaca na!

DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CORINTO

Pablo dxuzúaję' cheę bíchedxu zaj zre'ę xezre Corinto

¹ Neda', Pablo, naca' benne' bláwizra Dios cheę gaca' gubáz cheę Jesucristo. Naca na da guca lazre' Dios gaca'. Tu zren nen bíchedxu Sóstenes ² dxuzúaja' da nigá cheęle le'e, bi bicha', zrágale cheę Dios lu xezre Corinto. Nácale bi cheę Dios lawe' da nácale tuze nen Jesucristo. Dios ba bláwizre' le'e cheę gácale bi cheęqueze' tu zren nen xúgute benne' ca' zaj zre'ę du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u. ³ Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'ę le'e.

Da chawe' da nápadxu ne cheę Cristo

⁴ Dxápequeza' Dios: Xcalenu', ca naca cheęle ne cheę da chawe' da benna Dios le'e ne cheę Jesucristo. ⁵ Lawe' da nácale tuze nen Cristo, Dios ba benne' le'e xel-la gunní'a zantę da naca cheę Be' Lá'azxa cheę', lu da dxuchálajle, ne lu da nézele. ⁶ Ca' naca na, da dxuchálajdxu ca naca cheę Cristo ba guca na li cheęle le'e. ⁷ Ca' naca na, quebe bi dxexázrjele ca da dxunna Dios dxi'u dxácatę dxebézadxu zra xelá' Xránadxu Jesucristo. ⁸ Le' guxrú chache' le'e ca zrin zra bzębe, cheę quebe nu benne' gaca gusebáguę' le'e zría gate xelá' Xránadxu Jesucristo. ⁹ Dios tu dxúnzqueze' ca da nachębe lazre', naque' Bénnea' bláwizre' le'e cheę gácale tuze nen Zrí'ing', Xránadxu Jesucristo.

Dxaca chupa la'a bi cheę Cristo

¹⁰ Bi bicha', dxata' xúeda' le'e lu La Xránadxu Jesucristo, cheę gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lázrdaule, ne da gunle. ¹¹ Da nigá dxapa' le'e, bi bicha', lawe' da buluzén benne' xrtia Cloé neda' dxutil-lale dizra'. ¹² Da nigá zéaje na nácale chupa la'a, na' bál-lale dxennale: Netu' da'ntu' Pablo. Xezícale' dxennale: Netu' da'ntu' Apolos. Xezícale' dxennale: Netu' da'ntu' Pedro. Xezícale' dxennale: Netu' da'ntu' Cristo. ¹³ ¿Dxéquele naca Cristo chupa la'a? ¿Dxéquele gudá'a neda', Pablo, le'ę xaga béguaj waláz cheęle? ¿Bedxúale le'e nisa lu la Pablo? ¹⁴ Xcalén Dios quebe núlale le'e bchua' nisa san tuze Crispo, ne Gayo ¹⁵ lawe' da quebe nu gaca nna: Lu la Pablo gudxúa' nisa. ¹⁶ Cá'anqueze bchua' nisa benne' xrtia Estéfanos, san quebe dxeajsá lazra' che nu xetú bchua' nisa. ¹⁷ Cristo quebe gusel-le' neda' nu guchúa' nisa, san cheę guzenda' bėnneache dizra' chawe' cheę', quegá nen dizra' sina, cheę quebe gaca dácheze da bėn Cristo gate gutie' le'ę xaga béguaj.

Cristo naque' xel-la waca, ne xel-la sina cheę Dios

¹⁸ Dizra' ca gute Cristo le'ę xaga béguaj naca na ca tu da xálaze lau benne' xelebía xi'e, san cheędxu dxi'u, nápadxu xel-la weselá, dizra' nigá napa na xel-la waca cheę Dios. ¹⁹ Naca na ca naxúaj na lu dizra' lá'azxa. Dxenná Dios: Guzría xi'a xel-la sina cheę benne' sina ca', ne guzúa' chalá'ala xel-la naxéajni'i cheę benne' dxeléajni'ing'.

²⁰ ¿Gazra nagá'ana benne' sina na'a? ¿Waca guselá cuine'/? ¿Gazra nagá'ana benne' dxusédenę' bėnneache? ¿Gazra nagá'ana benne' dxuchálaje' ca naca da dxaca lu xezr la xu nigá? Ca naca xel-la sina cheę xezr la xu nigá, Dios

ba nunę' na tu da xálaze lawe' da tuze Le' gaca guselé' bėnneache. ²¹ Dios nézene' xúgute. Quebe be'e lataj bėnneache xelúnbe'e Le' ne chee xel-la sina chee bėnneache. Bezaca ba lazre' Dios ne chee dizra' nigá bselé' benne' ca' dxuluxrén lazre' Le', lácala zaj zra' benne' dxelėquene' naca dizra' nigá tu da xálaze.

²² Benne' judío ca' dxelaca lazre' xeledé'eng' xel-la waca da za xabáa, na' benne' griego ca' dxelexilaje' xel-la sina, ²³ san dxi'u dxuzendxu bėnneache ca naca chee Cristo, ca gutię' le'e xaga bėguaj. Benne' judío dxelexedué'eng' chee dizra' nigá, na' benne' quebe zaj naque' judío dxelėquene' naca na tu da ca zeaje na. ²⁴ Na'a, benne' ca' ba bláwizra Dios, benne' judío ca', ne benne' quebe zaj naque' judío, Cristo nácaqueze' xel-la waca, ne xel-la sina chee Dios. ²⁵ Da dxeleque bėnneache naca tu da xálaze chee Dios nácadxa na sina ca xel-la sina chee bėnneache, na' da dxeleque bėnneache naca na tu da naca bea nate ni'a na' Dios nápadxa na xel-la waca ca xel-la waca chee bėnneache. ²⁶ Le'e, bi bicha', dxal-la' gueque be'ele ba bláwizra Dios le'e lácala bábaze le'e nácale sina lau bėnneache chee xęzr la xu nigá, ne bábaze le'e nácale xel-la dxenná bea, u nácale xrtia benne' zaj naque' blau. ²⁷ Dios ba guquė'e benne' ca' dxeleque bėnneache zaj naque' benne' xálaze, chee xelexedué'e benne' sina ca', ne ba guquė'e benne' ca' dxeleque bėnneache zaj nate ni'a ne'e, chee xelexedué'e benne' wal-la ca'. ²⁸ Dios ba guquė'e benne' ca' quebe zaj naque' blau, ne benne' ca' zaj nuzúa bėnneache chálá'ala, benne' ca' quebe nu zaj naque', chee guzague' naze benne' zaj naque' blau, ²⁹ chee quebe nu seque' gucá'ana szren cuina lau Dios. ³⁰ Diósqeze ba nunę' le'e tuze nen Jesucristo, ne nunę' naca Cristo Benne' dxunna dxi'u xel-la sina, ne Benne' gucá'ana dxi'u xrlátaje, ne Benne' dxuzúe' dxi'u lu na' Dios, ne benne' dxexá'awe' dxi'u. ³¹ Ca' naca na ca da naxúaj na lu dizra' lá'azxa, da dxenná na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

2

Dizra' ca naca chee Cristo, gudė'e xaga bėguaj

¹ Na'a, bi bicha'dau', gate bedajchálajłena' le'e da li chee Dios, quebe bchíneda' dizra' sina, ne dizra' zaca. ² Gate ne zúalena' le'e quebe guca lazra' guchálaja' chee bila da xetú san tuze chee Jesucristo, Bėnnea' gudė'e xaga bėguaj. ³ Gate guzúalena' le'e ne náteťe ni'a na'a, ne guzrízetea' lawe' da bzreba' quebe guca guna' da nusebaga' Cristo neda'. ⁴ Gate bchálajłena' le'e, ne bzenda' le'e dizra' chawe', quebe guca lazra' guna' chėajjle chee' nen dizra' sina chee bėnneache da guchálaja', san bena' guxėajjle chee' ne chee Be' Lá'azxa, ne ne chee xel-la waca chee Dios ⁵ chee gápale xel-la dxeajłi lazre' da naca na ne chee xel-la waca chee Dios, ne quegá ne chee xel-la sina chee bėnneache.

Dios dxulė'e cuinę' ne chee Be' Lá'azxa

⁶ Dxuchálajntu' dizra' sina lau benne' ca' ba zaj ze chache' lu xel-la dxeajłi lazre' chee'. Xel-la sina nigá quebe naca na xel-la sina chee xęzr la xu nigá, ne chee benne' dxelenná be'e lu xęzr la xu nigá, benne' ca' xeledé' chie'. ⁷ Dxuchálajntu' xel-la sina nagache chee Dios, da na' bzua Dios nédxudaute ca bene' xęzr la xu nigá, chee ladxu chadía chacanna. ⁸ Netú benne' ca', benne' dxelenná be'e lu xęzr la xu nigá, quebe gulėajni'ine' da nigá, lawe'

da la guléajni'ineḡ na quebe buludé'e Xránadxu, Benne' xabáa, le'e xaga béguaj.

⁹Naca na ca da naxúaj na lu dizra' lá'azxa, dxenná na:

Dios ba nucueze' chee benne' ca' zaj nazrí'ineḡ Le'

da ca' quebe nu ne le'e, ne quebe nu ne xen,

ne da quebe nu ne cu'u lazre'.

¹⁰Da caní zaj naca na da ble'e Dios dxi'u ne chee Be' Lá'azxa nase-la Le', lawe' da dxelé'e Be' Lá'azxa xúgutē da de, ne dutē da xu'u na lu xichaj lázrdau Diósqueze.

¹¹Ládujla bēnneache, ¿nu seque' neze da xu'u lu xichaj lázrdau xetú benne', san tuze be' da nacaqueze'? Cá'anqueze, tuze Be' Lá'azxa chee Dios nézeneḡ da xu'u lu xichaj lázrdau Dios.

¹²Be' Lá'azxa da xú'udxu quebe naca na chee xezr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u. ¹³Dxuchálajntu' ca naca da caní nen dizra' da bseḡe Be' Lá'azxa chee Dios netu', ne quegá nen dizra' da bsédentu' lu xel-la sina cheentu'. Ca' naca na, dxuzéajni'intu' benne' zaj nazi'e Be' Lá'azxa chee Dios da nuseḡe Be' Lá'azxa nigá dxi'u.

¹⁴Nu benne' quebe nazi'e Be' Lá'azxa chee Dios quebe dxezí' lu neḡe da zaj naca na chee Be' Lá'azxa chee Dios, lawe' da dxéqueneḡ zaj naca na tu da xálaze. Quebe dxezeque' chéajni'ineḡ na lawe' da zaj naca na da dxéajni'idxu tuze ne chee Be' Lá'azxa. ¹⁵Bēnnea' nazi'e Be' Lá'azxa chee Dios dxezéqueneḡ chéajni'ineḡ xúgutē da dxulé'e Be' Lá'azxa le'. Benne' quebe zúale Be' Lá'azxa le', quebe séqueneḡ chéajni'ineḡ da dxuséde Be' Lá'azxa dxi'u. ¹⁶Naxúaj lu dizra' lá'azxa da dxenná na: ¿Nuzra ba guxéajni'i da xu'u xichaj lázrdau Xránadxu? ¿Nuzra benne' séqueneḡ guzéajni'ineḡ Dios? Dxi'u nazidxu ca da xu'u xichaj lázrdau Cristo.

3

Benne' dxeluneḡ tu zren Dios lu zrin cheeḡ

¹Na'a, le'e, bi bícha'dau', quebe guca guchálajlēna' le'e ca dxuchálajlēna' benne' ca' zúale Be' Lá'azxa chee Dios le', san bchálajlēna' le'e ca dxuchálajlēna' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo. ²Bsédeda' le'e da quebe zaj naca na steḡe da naca na ca da dxugágudxu bidu dxe'ene, bidu ne dxázrebe', ne quebe gaca gágube' xel-la wagu da naca na zibaj, lawe' da quebe ne séquele chéajni'ile da zaj naca na steḡe. Cá'anqueze na'a quebe ne séquele chéajni'ile na ³lawe' da ne nácale ca zaj naca benne' cun ca nalaje'. Dxácatē ne xu'ule xel-la zre lazre', ne dxutil-la ljwézrele dizra' ne nácale chupa la'a, ne nácale ca zaj naca benne' cun ca nálaje', ne dxunle cáteze dxelún xúgutē bēnneache. ⁴Dxácatē ne dxennale: Netu' da'ntu' Pablo, na' xezícale dxennale: Netu' da'ntu' Apolos, ne dxunle ca dxelún benne' cun ca nálajeḡe.

⁵Na'a, ¿nuzra na' Pablo? ¿Nuzra na' Apolos? Nácantu' wen zrin chee Dios, na' ne chee netu' guxéajle chee Xránadxu. Tu tuntu' bēntu' zrin chee Xránadxu da blé'eneḡ netu'. ⁶Neda' guza' bínnedu ca' lu xichaj lázrdau, bchálajlēna' le'e xrtizra Dios, na' Apolos gudilē' na, san Dios bseguleḡ na. ⁷Ca' naca na, ne benne' dxazē', ne benne' dxilē' na, quebe bi zaqueḡ, san Dios na' dxuneḡ xúgutē, lawe' da dxuseguleḡ da du ca'. ⁸Benne' dxelazeḡ, ne benne' dxelilē' zaj naqueḡ lébete, san Dios quízrujeḡ tu tu benne' caní ca naca zrin da beluneḡ. ⁹Nácantu' wen zrin tu zren nen Dios, na' le'e nácale ca tu xezr la xu naga dxun Dios zrin.

Cá'anqueze nácale ca tu xu'u da dxun Dios. ¹⁰ Neda' naca' ca tu wen xu'u blau, na' Dios benne' neda' lataj gulecha' lane na, na' benne' xula dxusegule' ze'e na'. Tu tu benne' dxal-la' guxúe xánnië' ca dxusegule' na. ¹¹ Québedxa nu seque' cueche' xetú lane ca da ba dxe', da na' naca na Jesucristoqeze, ¹² san waca nu benne' gusegule' lawe' na da zaca na ca oro, ne plata, ne xiaj da zaj zaca, u waca gusegule' lawe' na da quebe zaca na ca blaga', ne xizre, ne luaj laga'. ¹³ Zrin da nun tu tu benne' gulé'eqeze lawe na lu zra guchi'a Dios, lawe' da lu zra na' la' tu xi', na' lu xi' na' gulé'e lawe na ca naca zrin nun tu tudxu. ¹⁴ Che nu benne' nunge' tu zrin da quebe chezxe na lu xi', na' wazi'e lazruj chee'. ¹⁵ Che chezxe zrin na', ca naca na nite na, san lé'eqeze' walé', ca tu benne' dxexedxúaje' lu xi'.

¹⁶ ¿Quebe nézele le'e nácale xudau' chee' Dios, na' Be' Lá'azxa chee' Dios zue' lu xichaj lázrdaule? ¹⁷ Che nu benne' gucá'ana dítaje' xudau' nigá chee' Dios, Dios guzría xi'e bénnea' lawe' da naca lá'azxa xudau' chee' Dios, na' lé'eqezle nácale xudau' na'.

¹⁸ Quebe si xe' cuínale. Che núlale dxéquele nácale benne' sina lu da naca chee' xezr la xu nigá, dxal-la' xun cuínale ca tu benne' quebe bi dxaque', chee' gunna Dios le'e xel-la' sina li. ¹⁹ Xel-la' sina chee' xezr la xu nigá naca na tu da xálaze lau Dios. Naxúaj lu dizra' lá'azxa da dxenná na: Dios dxun zréajane' benne' sina ca' lu xel-la' sina da zaj nápaqueze'. ²⁰ Cá'anqueze dxenná na: Xránadxu nézene' quebe bi zaca da dxululaba lazre' benne' sina ca'. ²¹ Chee' le' na' quebe nu benne' dxal-la' gun szren cuine' lawe' da de'e tu benne', lawe' da Dios dxunne' le'e xúgute' da ca' dxechínnele. ²² Pablo, ne Apolos, ne Pedro, ne xezr la xu nigá, ne xel-la' nabán, ne xel-la' gute, ne na'a zra, ne da za za', ne xúgute' da ca' zaj naca na chee' gaca da chawe' chee'e, ²³ na' lé'eqezle xu'ule lu na' Cristo, na' Cristo xu'e lu na' Xradxu Dios.

4

Zrin dxelún benne' gubáz chee' Cristo

¹ Ca' naca na, dxal-la' guéquele nácazentu' wen zrin chee' Cristo, ne nabágantu' gusédentu' bénneache da zaj nagache chee' Dios. ² Na'a, benne' nabague' tu zrin, dxun na ba xen gaque' li lazre'. ³ Neda' quebe dxe'a gunne xue bi dxéquele naca' neda', u bi dxeleque bénneache naca'. Quebe gaca nniá' xrlátaje u quegá chee' da nuna' ⁴ lawe' da lácala quebe dxagu na zria neda' lázrdawa', da nigá quebe dxulé'e na quebe nabaga' zria. Xránadxu naque' Benne' dxuchi'e ca da dxuna'. ⁵ Ca' naca na, quebe guchi'ale chee' da ca' che quebe ne zrin zra. Le cueza zra xelá' Xránadxu, na' xebéaje' lu xel-la' naxaní' ca naca da nagache lu da chul-la. Xránadxu gulé'eng' ca naca da dxulaba lázredxu, na' Dios gulé'eng' lawe' tu tudxu ca da dxal-la' sidxu.

⁶ Le'e, bi bicha', dxuchálajlena' le'e da caní chee' gaca chawe' chee'e, dxuzúa' ca tu da gulé'e na le'e Apolos, ne néda'queza'. Dxennía' da nigá chee' gusédele ne chee' netu' chee' quebe gundxale ca da dxue lataj dizra' lá'azxa le'e, ne chee' quebe gucá'ana szren cuínale, ne chee' quebe guzúale chalá'ala le sa' ljwézrele. ⁷ ¿Nuzra nun lue' blaudxa ca xezícadxa benne'? ¿Bizra napu' da quebe nunna Dios lue'? Che Le' benne' chiu' da na', ¿bizr chee' na' dxucá'ana szren cuinu', dxéquentu' lue'queze gudilju' da na'?

⁸ ¿Nácale le'e benne' gunní'a? ¿Nápale xúgute' da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaquezele wenná bea chee' guntu' netu' le'e tu zren lu xel-la' dxenná bea

chee. ⁹ Dxéqueda' Dios nuzúe' netu', benne' gubáz chee', lu lataj bzebe. Nácantu' ca benne' ba zaj nabía xi' chee gátentu'. Nácantu' ca tu da dxuzé na lau bénneache, na' dxelenná' gubáz chee xabáa ca', ne bénneache netu'. ¹⁰ Dxeleque bénneache nácantu' netu' tu da xálaze lawe' da dxuntu' zrin chee Cristo, san le'e dxéquele dxéajni'i xánnele da zaj naca chee Cristo. Dxeleque bénneache nate ni'a na'ntu' netu' san le'e dxéquele nácale le'e benne' wal-la. Dxuluzúa bénneache netu' chalá'ala, san dxelape' le'e ba lá'ana. ¹¹ Ga bzrinte lu zra na'a zra dxeduntu', ne dxebilentu', ne nácantu' gala xídeze, na' bénneache dxulucháchalene' netu', ne quebe zua lízrentu'. ¹² Dxexedú lázrentu' dxuntu' zrin. Dxelenné bénneache schanni' cheentu', san netu' dxexechébentu' dizra' chawe'. Zaj nau zi' xuzre' netu' san dxuchaga launtu' na. ¹³ Dxelenné' schanni' cheentu', san netu' dxuchálajlentu' le' da li duté xel-la zren lazre' cheentu'. Dxeluné' netu' ca tu xizre bebe, ne ca tu da ba guca ditaj chee bénneache ca lu zra na'a zra.

¹⁴ Quegá dxuzúaja' cheele da nigá chee xedué'ele, san chee guzéajni'ida' le'e, nácale ca bi chia' nazri'ite lazra'. ¹⁵ Lácala zaj zúale le'e gaxúa gaxúane benne' dxulusédene' le'e ca naca chee Cristo, quebe nu zua xetú xrale. Néda'queza' naca' xrale lu xel-la dxejlí lazre' chee Cristo lawe' da bzenda' le'e dizra' chawe' chee Jesucristo. ¹⁶ Ca' naca na, dxata' xúeda' le'e gunle ca dxuna' neda'.

¹⁷ Chee le na' dxusel-la' Timoteo xedajná'abe' le'e, nácabe' ca bi li lazre' chia' nazri'ite lazra', lu da naca chee Xránadxu. Lebe' gusá'abe' lázrele ca dxuna' lu da naca chee Cristo, ne ca naca da dxusédeda' bénneache gáteteze na', ne lau xúgute cue' bi chee Cristo. ¹⁸ Bál-lale le'e ba nucá'ana szren cuínale lawe' da dxéquele quebe xida' xedajnnaba' le'e, ¹⁹ san dxebeza lazra' xídazequeza' xedajnná'a le'e che gunna Xránadxu lataj. Nadxa le'eda' da dxelezeque' xelún benne' ca' dxulucá'ana szren cuíne', ne quegá tuze da dxelenné'. ²⁰ Che dxenná be'e Dios dxi'u quebe naca na chee tu da dxuchálajzedxu. Lécaze' ba nunne' dxi'u xel-la waca chee'. ²¹ ¿Bizra dxaca lázrele le'e? ¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexrj lazre'?

5

Pablo dxuchi'e chee tu da sban

¹ Ba benda' zua tu benne' ládujla le'e nuné' ca zru'ule' xrna zie'. Da nigá naca na tu da sbánle'e da quebe ne xelún benne' quebe zaj núnbe'ene' Dios.

² Ca naca da na' le'e ne dxucá'ana szren cuínale. Dخال-la' cuezre xáchele. Bénnea' nuné' da nigá dxal-la' xebéajle le' ládujla le'e. ³ Quebe zua' neda' naga zúale lu be'la' dxen chia', san naca cáteze zúalena' le'e lu be' nácaqueza', na' ba bchi'a chee bénnea' nuné' dul-la nigá ca tu benne' zúalétequeze le'e. ⁴ Le zraga le'e lu La Xránadxu Jesucristo, na' gaca na cáteze neda' s'ualena' le'e lu be' nácaqueza', na' xel-la waca chee Xránadxu Jesús suale' na le'e. ⁵ Nadxa dxal-la' xudele bénnea' lu na' Satanás da xriwe', na' lácala cuía xi' be'la' dxen chee' na' be' nácaqueze' la na lu zra xelá' Xránadxu Jesús.

⁶ Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na? Láteze cua zichaj dxuchazra na ca naca cua na'?

⁷ Le xebéaj chalá'ala nua zichaj gula na' da dxuxrinnaj na le'e, chee gácale ca tu xeta xtila da dxágudxu Laní Pascua, da dxundxu nen cua cube da quebe nachixre na cua zichaj, ca da li nácale le'e. Cristoqueze gutie' waláz

cheedxu. Naque' cheedxu zrila', be dxelutie' laní pascua. ⁸ Ca' naca na, dxal-la' gupá'adxu Laní Pascua cheedxu lu da naca du lazre', ne lu da li, da ca' zaj naca na ca xeta xtila da quebe nachixre na cua zichaj. Quebe gupá'adxu na lu da calëla, ne lu da zrinna, da ca' zaj naca na ca cua zichaj gula na'.

⁹ Lu da bzuaja' cheele nédxudxa gucha' le'e quebe guchixre cheele nen benne' ca' dxelune' da sban. ¹⁰ Quebe gucha' le'e xecuásatequezele chee benne' zaj zre'e xezr la xu nigá, benne' dxelune' da sban, ne benne' wecude' ca', ne benne' gubán ca', ne benne' dxelúe lá'ane' bedáu' xiaj xaga ca', lawe' da chee quebe guchixre cheele nen benne' caní, dxun na ba xen xedxúajle xezr la xu nigá. ¹¹ Da guca lazra' xapa' le'e naca na chee quebe guchixre cheele nen netú benne' dxenné' naque' bíchedxu, san dxune' da sban, u naque' benne' wecude', u dxue lá'ane' bedáu' xiaj xaga, u dxutupe' dizra' bizruj, u dxí'aje', u naque' gubán. Quebe dxal-la' gágulele benne' caní. ¹²⁻¹³ Quegá naca chia' guchi'a chee benne' dxeledá cúzrela. Dios guchi'e chee benne' ca'. Le'e dxal-la' guchí'ale chee benne' zaj naque' bi bíchedxu. Chee le na' le xebéaj benne' dul-la na' ládujla le'e.

6

Zria da dxelagu ljwezre bi ca' chee Cristo

¹ Gate tule le'e zua da dxaca cheele nen xetule le'e, ¿bizr chee na' dxeajle lau benne' dxuchi'e da dxaca, na' quebe dxéajle'e chee Cristo, ne quebe dxeajle lau bi bíchele? ² ¿Quebe nézele le'e, benne' zaj naca bi chee Dios xuluchi'e ca da dxelún bénneache chee xezr la xu nigá? Che le'e guchí'ale chee bénneache lu xezr la xu nigá, ¿quebe naca cheele guchí'ale chee tu da dauze? ³ ¿Quebe nézele le'e guchí'adxu chee gubáz chee xabáa ca'? Cá'anqueze dxal-la' guchí'adxu da naca chee xezr la xu nigá. ⁴ Che le'e zua da dxaca cheele lu xezr la xu nigá, ¿bizr chee na' dxeajle lau benne' ca' quebe nu zaj naque' ládujla bi bíchedxu ca' chee xuluchi'e chee da na'? ⁵ Da nigá dxapa' le'e chee gapa stu'le. ¿Quebe nu chilá' ládujla le'e nu bíchedxu, benne' naxéajni'ine' chee guchi'e tu da dxaca chee bi bíchedxu ca'? ⁶ ¿Dxun na ba xen tu bi bíchedxu cheajtágube' zria da dxaca cheebe' nen benne' ljwézrebe' lau tu benne' dxuchi'e da dxaca, na' quebe naque' bi chee Dios?

⁷ Che zua da dxedíl-lalële biche ljwézrele, naca na tu zria da ba nabágale. ¿Bizr chee na' quebe dxucá'anale na cá'aze? ¿Bizr chee na' quebe dxuele lataj nu benne' cuane' cheele? ⁸ Le'e dxunle da quebe naca na xrlátaje, ne dxebanle, na' dxunle caní chee bi bíchele.

⁹⁻¹⁰ ¿Quebe nézele le'e, quebe xelxú'u benne' wen da calëla naga dxenná bea Dios? Quebe güele lataj nu si xe le'e. Quebe xelxú'u naga dxenná bea Dios benne' ca' dxelune' da sban, ne benne' ca' dxelúe lá'ane' bedáu' xiaj xaga, ne benne' ca' dxelezúalene' zru'ula benne' xula, ne benne' ca' dxeledálene' ljwezre biue', ne benne' gubán ca', ne benne' wecude' ca', ne benne' cá' dxelé'aje', ne benne' ca' dxulutupe' dizra' bizruj, ne benne' ca' dxulucache lane'. ¹¹ Caní gúcale bál-lale le'e, san na'a bache bexádxele lu xichaj lázrdaule, ne nuzúa cuínale lu na' Dios, na' nazí' lu ne'e le'e lu La Xránadx Jesús ne chee Be' Lá'azxa chee Dios cheedxu.

Naca lá'azxa bela' dxen cheedxu

¹² Da li naca da dxelenné': Nápadxu lataj gundxu da dxaca lazre' tu tudxu. Quegá xúgute na naca na da ba neza. Awe', napa tu benne' lataj gune' da dxaca lazre', san quebe dxal-la' gu'e lataj bi da nna be'e na le'. ¹³ Naca da li

da dxeleñé': Xela wagu naca na chee le'edxu, na' le'edxu naca na chee xel-la wagu, san Dios gusexuzre' dxúpaté na. Quebe naca bēla' dxen cheedxu chee gun na da sban. Bēla' dxen cheedxu naca na da gunézrujdxu chee Xránadxu, na' Xránadxu naque' Bénnea' guchínene' bēla' dxen cheedxu lu da xrlátaje. ¹⁴ Ca ben Dios bsebané' Xránadxu ládujla benne' gate ca', cá'anqueze gusebané' dxi'u nen xel-la waca chee'.

¹⁵ ¿Quebe nézele le'e bēla' dxen chee naca na chee Cristo? ¿Wacá'a tu da naca na bēla' dxen chee Cristo, ne guchaga' na nen bēla' dxen chee tu nu'ula wen da sban? ¡Cabata'! ¹⁶ ¿Quebe nézele le'e gate tu benne' biu dxuchague' tu nu'ula wen da sban dxúpaté' zaj naque' ca tuze bēla' dxen? Naxúaj lu dizra' lá'azxa da dxenná na: Dxúpaté' xelexaque' tuze bēla' dxen. ¹⁷ Gate tu benne' dxuchague' Xránadxu, dxelexaque' tuze be'.

¹⁸ Le guzrunnaj chee da sban. Zaj nita dul-la xula da dxun benne' da quebe dxulucá'ana ditaj na bēla' dxen chee', san benne' dxuchague' nu'ula quebe naca zru'ule' dxune' dul-la lu bēla' dxen cheequeze'. ¹⁹ ¿Quebe nézele le'e naca bēla' dxen chee xudau' chee Be' Lá'azxa, Bénnea' nunna Dios le'e, na' Be' Lá'azxa zue' xichaj lárdaule? Quebe nácale xrana bēla' dxen chee, ²⁰ lawe' da guzi' Dios le na nen tu lazruj zrente. Chee le na', dxal-la' gápale ba lá'ana Dios nen bēla' dxen chee, ne nen be' náaquezle, lawe' da dxúpaté na' zaj naca na chee Dios.

7

Ca naca chee xel-la dxuchaga na'

¹ Na'a xechēba' ca zaj naca da bchébele neda'. Da li naca xrlátaje quebe guchaga na' tu benne'. ² Lawe' da dxácale'e da sban naga zúale, tu tu benne' biu dxal-la' súalene' nu'ula cheequeze', na' tu tu nu'ula dxal-la' súalene' benne' biu cheequeze'. ³ Benne' biu dxal-la' gune' nen zru'ule' da nabague' chee zru'ule', na' cá'anqueze nu'ula dxal-la' gune' nen benne' biu chee' da nabague' chee benne' chee'. ⁴ Nu'ula na' quebe naque' xrana bēla' dxen chee', san naca na chee benne' biu chee'. Cá'anqueze benne' biu quebe naque' xrana bēla' dxen chee', san naca na chee zru'ule'. ⁵ Quebe dxal-la' xeledábaga ljwezre', san tuze gate xelezúe' xel-la wezría tu chí'idauze chee xuluzúa cuine' lau Dios chee xuluchálajlene' Le'. Te na' dxal-la' xuluchaga ljwezre' chee quebe seque' Satanás nna be'e na le' che quebe xelezéquene' xelenná be'e cuine'.

⁶ Da nigá dxapa' le'e naca na tu da dxue le'e lataj. Quebe naca na tu da nadxixruj bea na. ⁷ Neda' dxezá lazra' súale xúgutele ca zua' neda', san Dios ba nunne' tu tudxu da gaca gundxu. Tu da nunne' tudxu, na' da xula xetudxu.

⁸ Dxapa' benne' wegu', ne nu'ula wezebe, naca xrlátaje xelexegá'ane' cá'aze ca zua' neda'. ⁹ Che quebe xelezéquene' xelenná be'e cuine', waca xuluchaga ne'e, lawe' da nácadxa xrlátaje xuluchaga ne'e quézcala xeledé' ba xa' lu bēla' dxen chee'.

¹⁰ Benne' zaj nuchaga ne'e dxapa' nu'ula quebe gusané' benne' biu chee'. Quebe naca cheeza' da nadxixruj bea nigá, san naca na da dxun Xránadxu. ¹¹ Che nu nu'ula gusané' benne' biu chee', dxal-la' xegá'ane' cá'aze, u xexaque' tuze nen benne' biu chee' na'. Cá'anqueze benne' biu quebe dxal-la' gusané' zru'ule'.

¹² Dxapa' xezícadxa benne' néda'queza', quegá Xránadxu, che zru'ula tu bi bíchedxu quebe dxéajle'e chee Xránadxu, dxéquene' xrlátaje zúalene' benne'

chee', bi bíchedxu na' quebe dxal-la' gusanē' le'. ¹³ Che benne' biu chee tu nu'ula zandxu quebe dxéajle'e chee Xránadxu, san dxéquene' xrlátaje zúalene' zru'ule', nu'ula zandxu na' quebe dxal-la' gusanē' benne' biu chee' na'. ¹⁴ Benne' biu na' quebe dxéajle'e chee Xránadxu naque' ca tu bi chee Dios lawe' da nuchague' zru'ule' dxéajle'e chee Xránadxu, na' nu'ula na' quebe dxéajle'e chee Xránadxu naque' ca tu bi chee Dios lawe' da nuchague' benne' biu chee' dxéajle'e chee Xránadxu. La quebe naca na caní, zrí'inele le'e xelácabe' ca zri'ine benne' quebe zaj naque' chee Dios, san da li zaj nácabe' ca bi chee Dios. ¹⁵ Che benne' biu na' u zru'ule', benne' quebe dxéajle'e chee Xránadxu, dxaca lázrtequeze' gusanē' ljwezre', waca na. Che caní dxaca chee tu bi bíchedxu u chee tu bi zandxu, nape' lataj lawe' da gunné Dios dxi'u chee cueza zri lázredxu. ¹⁶ Che quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

¹⁷ Ájateze naca, tu tudxu dxal-la' gundxu ca naca da nunna Xránadxu dxi'u, ne xegá'anadxu cáteze nácadxu gate gunné Dios dxi'u. Caní dxapa' xúgute cue' bi chee Cristo. ¹⁸ Che Dios dxenné' tu benne' biu nadxugu lu belá' chee' da dxulé'e na naque' bi chee Dios, benne' nigá dxal-la' xegá'ang' ca', na' che dxenné Dios tu benne' quebe nadxugu lu belá' chee' da na', quebe dxal-la' chugu lu belá' chee' da na'. ¹⁹ Quebe bi naca che nadxugu da na' lu belá' cheedxu, u quebe. Da dxun na ba xen naca gundxu da dxaca lazre' Dios. ²⁰ Tu tudxu dxal-la' xegá'anadxu cáteze nácadxu gate Dios dxenné' dxi'u chee gácadxu bi chee'. ²¹ Che gucu' benne' nada'u gate Dios gunné' lue', quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na. ²² Bénnea' guque' benne' nada'u gate gunné Xránadxu le' naque' ca benne' quebe nada'u chee gunē' zrin chee Xránadxu, na' cá'anqueze bénnea' quebe naque' benne' nada'u gate gunné Xránadxu le', naque' ca benne' nada'u chee Xránadxu. ²³ Dios ba ná'awē' le'e nen tu lazruj zrentē. Quebe güele lataj nu benne' gunē' le'e benne' zaj nada'u. ²⁴ Ca' naca na, bi bicha', tu tudxu dxal-la' xegá'anadxu lau Dios cáteze nácadxu gate gunné' dxi'u.

²⁵ Ca naca chee benne' ca' quebe zaj nuchaga ne'e quebe bi gunná be'e Xránadxu neda', san dxapa' le'e ca da dxéqueda', na' waca guxrén lázrele neda' lawe' da bexache lazre' Xránadxu neda'. ²⁶ Dxéqueda' neda' dxal-la' xegá'ana tu benne' biu cáteze naque' lawe' da zúadxu zra stébele'e. ²⁷ Che nuchagu' nu'ula quebe cuasu' le', na' che quebe nuchagu' nu'ula, quebe guchaga na'u. ²⁸ Che guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stēbe lu zra caní, na' dxaca lazra' quebe súale stēbe caní.

²⁹ Bi bícha'dau', da nigá dxaca lazra' xapa' le'e. Xelátega ne de súadxu lu xezr la xu nigá. Ná'atēla benne' zaj nuchaga ne'e dxal-la' gunē' da naca chee Cristo ca dxelún benne' quebe zaj nuchaga ne'e. ³⁰ Benne' dxelebezre xache' dxal-la' xelunē' da naca chee Cristo ca dxelún benne' quebe zaj naque' baxache'. Benne' zaj zra' laní dxal-la' xelunē' da naca chee Cristo ca dxelún benne' quebe zaj zue' xel-la dxebe, na' benne' dxelá'awē' dxal-la' xelunē' da naca chee Cristo ca dxelún benne' quebe zaj nape' da na' dxelá'awē'. ³¹ Benne' dxelezi'e ba neza lu xezr la xu nigá dxal-la' xelunē' da naca chee Cristo ca dxelún benne' quebe dxelezi'e ba neza na, lawe' da ba dxexuzre lazre' xezr la xu nigá.

³² Dxaca lazra' quebe bi cue'le gunne xue. Gate tu benne' biu nácabe' wegú' dxe'ebe' gunne xue da naca chee Xránadxu chee gunbe' da dxezaca ba lazre' Xránadxu. ³³ Gate ba nuchaga ne'e, dxe'e gunne xue da naca chee xezr la xu nigá chee gunę' da dxezaca ba lazre' zru'ule'. ³⁴ Cá'anqueze dxaca chee nu'ula zua benne' biu chee', ne nu'ula wegú'. Nu'ula wegú' dxe'ebe' gunne xue da naca chee Xránadxu chee chu'ube' lu na' Dios dutę beła' dxen cheębe', ne dutę be' cheębe', san nu'ula zua benne' biu chee' dxe'e gunne xue da naca chee xezr la xu nigá chee gunę' da xezaca ba lazre' benne' chee'.

³⁵ Dxapa' le'e da nigá chee gaca chawe' cheele, ne quebe chee nna be'eda' le'e, san chee gunle da xrlátaje, ne da li, chee chu'ule du lázrele lu na' Xránadxu.

³⁶ Che nu benne' dxéquene' nácadxá xrlátaje guchaga na' zrí'ine' nu'ula lawe' da ba dxedé xel-la cuide' cheębe', ne naca da dxal-la' gunbe', dxal-la' gunę' da dxéquene' naca xrlátaje. Waca guchaga na'abe'. Quebe naca na dul-la.

³⁷ Che nu benne' quebe dxéquene' dxun na ba xen, ne che nape' lataj gunę' da dxaca lazre', ne che ba nune' lu xichaj lázrdawe' xegá'ana zrí'ine' nu'ula wegú', dxunę' da xrlátaje. ³⁸ Ca' naca na, benne' dxu'e lataj guchaga na'abe' zrí'ine' nu'ula, dxunę' da xrlátaje, na' bénnea' quebe dxu'e lataj dxunę' da nácadxá xrlátaje.

³⁹ Nu'ula zua benne' biu chee' nuchague' bénnea' ne chee da nadxixruj bea na dxácatę ne zue' nabane', san che gate benne' chee', de' lataj nu'ula na' guchaga ne'e nen nüteteze benne' biu, san dxun na ba xen dxéajle'e chee Xránadxu. ⁴⁰ Gácadxá chee' da ba neza che xegá'ane' cá'aze. Caní dxéqueda' neda', ne dxéqueda' dxun Be' Lá'azxa chee Dios neda' tuze.

8

Xel-la wagu da zaj nuzúa bénneache lau bedáu' xiaj xaga

¹ Na'a guchálaja' ca naca chee xel-la wagu da zaj nuzúa bénneache lau bedáu' xiaj xaga. Da li xúguteđxu nápadxu xel-la dxéajni'i ca naca da nigá. Xel-la dxéajni'i dxun na dxi'u benne' dxulucá'ana szren cuina, san xel-la zri'i lazre' dxusegula na dxi'u lu xel-la dxeajlí lazre' cheeđxu. ² Che nu benne' dxéquene' nape' dutę xel-la dxéajni'i, quebe ne chéajni'ine' ca dxal-la' chéajni'ine'. ³ Che nu benne' nazrí'ine' Dios, Dios ba nazí' lu ne'e bénnea'.

⁴ Na'a, ca naca chee xel-la wagu da zaj nuzúa bénneache lau bedáu' xiaj xaga, nezdxu quebe bi naca tu bedáu' xiaj xaga lu xezr la xu nigá, ne tuze Bénnea' naque' Dios. ⁵ Lácala zaj zra' xabáa, ne xezr la xu nigá da zante da dxeleque bénneache zaj naca na dios, ne chee benne' caní zante dios zaj zra na, ne zante xrane' zaj zra na. ⁶ cheeđxu dxi'u che nácadxu chee Cristo, tuze Bénnea' naque' Dios, Bénnea' naque' Xradxu. Xradxu Dios bene' xúgute da de, na' dxi'u zúadxu chee guchínene' dxi'u. Cá'anqueze tuze Bénnea' naque' Xránadxu, Jesucristo. Ne chee Le' guzrá' xúgute da de, na' zúadxu dxi'u ne chee Le'.

⁷ Quegá xúgute bi chee Cristo zaj nézene' da nigá. Bal-la benne' caní gulú'u lawe' belúe lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na chee bedáu', na' lawe' da quebe zaj zę chache' lu xichaj lázrdawe', dxeléquene' zaj nabague' zria ne chee da dxelawe'. ⁸ Da na' dxágudxu quebe dxucá'anadxu na dxi'u xrlátaje lau Dios, lawe' da quebe nácadxu xrlátaje che dxágudxu, ne quebe nácadxu calęla che quebe dxágudxu. ⁹ Le guxie xanne' cuinale ca naca lataj da nápale bi gágule chee quebe guzría xile tu benne' quebe zę chache' lu xel-la dxeajlí lazre' chee'. ¹⁰ Ca' naca na, che lue' nézenu' da nigá, na' che cue'u gagu' tu

naga zra' bedáu' xiaj xaga, na' che tu bi bíchedxu, benne' quebe ze chache' lu xel-la dxeajlí lazre' chee', lé'eng' lue' dxe'u dxagu' na', na' bi bíchedxu na' wexáqrquezne' cue'e gawe' da na' zaj nuzúa bénneache lau tu dios quebe bi naca. ¹¹Ca' naca na, lue', lawe' da napu' xel-la dxéajni'i, guzría xi'u tu bi bichu' quebe ze chache' lu xel-la dxeajlí lazre' chee', na' naque' benne' gute Cristo waláz chee'. ¹²Ca' naca na, gate dxuzría xile bi bíchedxu quebe zaj ze chache' lu xel-la dxealeajlí lazre' chee', dxunle dul-la da dxuzúa Cristoqueze chalá'ala. ¹³Chee' le na', che guzría xi'a tu bi bicha' ne chee' da dxawa', nácadxa chawe' cabátadxa gawa' belá' chee' quebe guzría xi'a le'.

9

Da naca chee' tu benne' gubáz chee' Cristo

¹Naca chia' naca' gubáz chee' Cristo, ne napa' lataj bi guna' lawe' da ble'eda' Xránadxu Jesús, na' nácale le'e bi chee' Cristo ne chee' zrin be'na' chee'. ²Che dxeleque xezícadxa benne' quebe naca' gubáz chee' Cristo, san dxun na ba xen guéquele le'e naca' gubáz chee' lawe' da dxunna bea da nácale chee' Xránadxu da li naca' gubáz chee'.

³Da nigá naca na da dxapa' benne' ca' dxelezí tizre' neda': ⁴Naca chia' si' lu na'a da xi'aj gawa' ne chee' zrin da dxuna'. ⁵Cá'anqueze naca chia' guchaga na'a tu nu'ula zandxu chee' chéajlene' neda' ca dxelún xezícadxa benne' gubáz chee' Cristo, ne benne' bíchequeze Xránadxu, ne Pedro. ⁶¿Dxeleque tuze Bernabé, ne neda' dxal-la' guntu' zrin chee' gata' da xi'aj gáguntu' gate dxuzé'entu' bénneache dizra' chawe'? ⁷¿Nuzra benne' gaque' benne' zeje' wedil-la che quebe nu quizruj le'? ¿Nuzra benne' dxaze' lba' úva che quebe gawe' na? ¿Nuzra benne' gusegule' zrila' che quebe xeque'e xicha zra'ba? ⁸Quebe dxal-la' guéquele dxapa' le'e da nigá néda'queza', lawe' da caníqueze dxenná na lu da bdxixruj be'e Moisés. ⁹Naxúaj lu da nadxixruj bea na da dxenná Dios: Quebe cu'ule xixruj dxu'a bezre, be dxíchuba' zrua' xtila. Quebe gunná Dios da nigá lawe' da dxue lazre' chee' bezre cá'aze. ¹⁰Gunné' na ne cheedxu dxi'u. Naxúaj da nadxixruj bea nigá chee' gaca da ba neza cheedxu, lawe' da benne' dxugá'ane' bezre, ne benne' dxine' dxal-la' xebebeza lazre' xelexezi'e ca naca da gunna lina da xelaze'. ¹¹Na'a, che netu' ba gúzantu' lu xichaj lázrdaule da naca na chee' Be' Lá'azxa, ¿quebe dxal-la' si' lu na'ntu' látedauze da naca chee' lu xezr la xu nigá? ¹²Che xezícadxa benne' naca chee' xelezi' lu ne'e da naca chee'le, ¿gá'zradxa netu'?

Quebe ne guchí'entu' da nigá naca na che'entu'. Bchaga launtu' xúgute chee' quebe guzá'gantu' ca naca dizra' chawe' chee' Cristo. ¹³Ba nézele benne' dxelune' zrin chee' xudau' dxelawe' chee' da xu'u lu xudau' na', na' benne' dxelune' zrin chee' lu cugu naga dxeluti'e be xixre'du ca' lau Dios dxelawe' belá' chee' béadu ca'. ¹⁴Cá'anqueze ba nun Xránadxu chee' benne' dxuluchalaje' dizra' chawe', xelezi'e ba neza zrin da dxelune'. ¹⁵Cabata' guchí'ineda' netú da caní zaj naca na chia', ne quebe dxuzúaja' da nigá chee' gúnnale neda' late'. Gaca lázredxa' gatia' quézcala nu gucuasa da ba neza da napa'.

¹⁶Quebe dxal-la' gucá'ana szren cuina' lawe' da dxuzenda' bénneache dizra' chawe' chee' Cristo, lawe' da dxun na ba xen guna' na. Baxache' naca' che quebe guzenda' bénneache dizra' chawe' nigá. ¹⁷Chee' le na', che dxuna' na lawe' da naca na da dxaca lazra' guna', ba de' lazruj chia'. Na'a, che dxuna' na xadíaze, naca na tu da nusebaga Dios neda'. ¹⁸Ca' naca na, lazruj da dxezi'a naca na da ba neza napa' gate dxuzenda' bénneache dizra' chawe' chee' Cristo,

ne quebe bi dxuchíruja' benne' ca'. Ca' naca na, quebe dxuchíneda' da naca na chia' lawe' da dxuna' zrin nigá.

¹⁹ Lácala quebe naca' benne' nada'u chee nu benne', ba nun cuina' ca tu benne' nada'u chee xúgute bénneache, chee séqueda' cu'a benne' zandxa lu na' Cristo. ²⁰ Gate zua' ládujla benne' judío ca', dxun cuina' benne' judío chee cu'a le' lu na' Cristo. Ca' naca na, ládujla benne' zaj xu'e lu na' da nadxixruj bea na dxun cuina' ca tu benne' xu'e lu na' da nadxixruj bea na, chee cu'a le' lu na' Cristo lácala da li quebe xu'a lu na' da nadxixruj bea na na'. ²¹ Xetú na'a, chee séqueda' cu'a lu na' Cristo benne' ca' quebe zaj xu'e lu na' da bdxixruj be'e Moisés, dxun cuina' ca tu benne' quebe xu'e lu na' da nadxixruj bea na na', lácala da li xu'a lu na' da nadxixruj bea na chee Dios lawe' da xu'a lu na' da nadxixruj bea na chee Cristo. ²² Gate zua' ládujla benne' ca' quebe zaj ze chache' lu xel-la dxeajli lazre' chee' dxun cuina' ca zaj naca benne' ca' chee séqueda' cu'a le' lu na' Cristo. Ca' naca na, dxun cuina' ca naca tu tu benne' ca' chee ájatezla séqueda' cu'a bal-la benne' ca' lu na' Cristo. ²³ Dxuna' xúgute da nigá ne chee dizra' chawe' chee Cristo chee gapa' tu da ba neza chee na.

²⁴ Ba nézquezle le'e tu lu da huitaj benne' zan dxesi'aca chégüe' na' tuze' dxezrué'eng' lataj blau. Le sa'aca chegu le'e chee zrué'ele da dxunna Cristo. ²⁵ Xúgute benne' ca' dxulupá'a cuine' chee xelu'e da huitaj, dxuluzúe' chalá'ala xúgute da dxun na calela chee'. Benne' caní dxelune' da caní chee xezezi' lu ne'e tu da guzúe' xíchaje' da naca na laga' da québequeze si bea, san dxi'u dxundxu zrin chee zrué'edxu da zeajli canna. ²⁶ Neda' quebe dxezá chégua' ájatezla, ne quebe dxedil-la' ca tu benne' dxu'e lu be'ze gate dxedil-le'. ²⁷ Neda' dxudéa' xel-la zi' bëla' dxen chia', ne dxenná be'eda' na, chee quebe guntia' neda' da naca chia' lu zrin nigá, ca te na' ba bsédeda' benne' xula ca'.

10

Da dxuzéajni'i na dxi'u ca naca chee bedáu' xiaj xaga ca'

¹ Dxaca lazra' nézele, bi bícha'dau', ca guca chee xra xrtáudxu ca' xjácálené' Moisés. Dios guché'e xúgute benne' ca' ne chee beuj bza na', na' xúgute' guledéé' ládujla nísadau' da nazí le na Xrna. ² Ca' naca na, waca nnadxu xúgute' beledxúe' nisa lu nísadau' na', ne gulaque' tuze nen Moisés gate guledálené' beuj bza na'. ³ Cá'anqueze xúgute' gulawe' tuze xel-la wagu da bnezruj Dios le', ⁴ ne gule'aj xúgute' tuze nisa da bnezruj Dios le', lawe' da gulé'aje' nisa na' bedxúaj na xiaj xre na'. Xiaj xre nigá dxulé'e na ca naca Cristoqueze, Bénnea' guxéajlené' benne' ca' le'e xixre' lawe' lataj na'. ⁵ Benne' zan benne' ca' quebe belune' da bezaca ba lazre' Dios, na' chee le na' gulatei' le'e xixre' lawe' lataj.

⁶ Xúgute' da caní guca na chee guzéajni'i na dxi'u chee quebe sa lázredxu da calela ca', ca belún benne' ca'. ⁷ Chee le na' quebe gucá'ana szrenle bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawe' lau bedáu' xiaj xaga, na' belexase' chee buluxé'e. ⁸ Quebe dxal-la' gundxu da sban ca belún bal-la benne' ca', na' tu zraze gulate chupa gaxúa chi dxua gaxue'. ⁹ Quebe dxal-la' guchínedxu xel-la zren lazre' chee Xránadxu chee gundxu da calela ca belún bal-la benne' ca', na' gulatei', gate gulí'ina bëla' le'. ¹⁰ Quebe nnele chee Dios ca gulenné bal-la benne' ca', na' gubáz chee xabáa chee xel-la gute bte' benne' ca'.

¹¹ Xúgute' da caní gulezaca xra xrtáudxu, na' zaj naxúaj na lu dizra' lá'azxa chee guzéajni'i na dxi'u, zúadxu lu zra bzebe caní. ¹² Ca' naca na, nu benne'

dxéqueñe' zë chache' lu da naca chee Dios dxal-la' guxúe xanne' cuine' chee quebe cheajcházië'. ¹³ Da dxelún zréaje le'e naca na tuze ca da dxelún zréaje xúgute bënneache, na' waca guxrén lázrele Dios lawe' da quebe gu'e lataj bi gun zréaje le'e da quebe séquele guchaga laule, na' gate gaca tu da gun zréaje na le'e, Dios gunne' le'e ájala gunle chee lale lu da na', chee séquele guchaga laule na.

¹⁴ Chee le na', bi bicha' nazri'ite lazra', québedxa gucá'ana szrenle bedáu' xiaj xaga ca'. ¹⁵ Dxuchálajlena' le'e ca dxuchálajlena' benne' dxeléajni'ine', na' lé'eqeze waca guchi'ale chee da dxapa' le'e. ¹⁶ Gate dxágadxu da dxucube na ca guca gate gute Xránadxu, dxápadxu ba lá'ana Dios. Gate dxí'ajdxu xrisa uva lá'azxa, da nigá dxulé'e na dxezidxu ba neza dxen chee Cristo da gulalaj na le'e xaga béguaj. Xeta xtila na' da dxuzúzrujdxu dxulé'e na xezidxu ba neza be'la' dxen chee Cristo da bdee' waláz cheedxu le'e xaga béguaj. ¹⁷ Lácala naxandxu, xúgutedxu dxágudxu tu xeta xtilaqueze da naca na tuze, da na' dxulé'e na nácadxu ca tuze be'la' dxen chee Cristo.

¹⁸ Le nna'xque ca zaj naca benne' Israel ca'. Benne' caní, benne' dxelawé' da dxuluzré'e lu cugu chee Dios dxelezi'e ba neza lu cugu na'. ¹⁹ Quebe dxennía' naca tu bedáu' xiaj xaga tu da zaca, na' be'la' da dxuluzría bënneache lau bedáu' xiaj xaga quebe zácadxa ca bitetëze xetú be'la'. ²⁰ Dxennía' da dxuluzría lau bedáu' xiaj xaga benne' ca' quebe zaj núnbe'e Dios, dxuluzrié' na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'. ²¹ Quebe gaca xí'ajle da na' dxulé'e na nácale Xránadxu tuze, ne xí'ajtele da gulé'e na nácale tuze be' xriwe' ca', ne quebe gaca gágule da naca na chee Xránadxu, ne gágutele da naca na chee be' xriwe' ca'. ²² ¿Dxaca lázrele xewine lazre' Xránadxu lawe' da dxusandxu Le'? ¿Dxéquele le'e nácadxu benne' wáladxa ca Le'?

Da naca cheedxu gundxu, ne ca naca xel-la zri'i lazre'

²³ Da li naca na' dxelenná bënneache, dxelenné': Naca chia' guna' da dxaca lazra'. Quegá xúgute naca na da sidxu ba neza. Naca chee nu benne' guné' ca dxaca lazre' san quegá xúgute gusegula na le' lu xel-la dxeajli lazre' chee'. ²⁴ Dخال-la' gundxu da gaca chawe' chee benne' xula, ne quegá da gaca na chawe' cheézedxu.

²⁵ Le gagu le'e ca naca da dxeda'u lawe' xi'a, ne quebe naba xúzrele chee na chee quebe sua stëbe xichaj lázrdaule, ²⁶ lawe' da zaj naca chee Xránadxu xezr la xu nigá, ne xúgute da ca' zaj zra' lu xezr la xu.

²⁷ Che nu benne', benne' quebe dxéajle'e chee Xránadxu, dxenné' le'e gágule xeta, na' che dxaca lázrele chéajle, le gagu xúgute da guzrié' laule, ne quebe naba xúzrele chee na chee quebe sua stëbe xichaj lázrdaule. ²⁸ Che nna nu benne' zúale le'e, na' xe'e le'e: "Be'la' nigá bache guzría na lau bedáu' xiaj xaga", quebe gágule na, chee quebe guzúale stëbe bënnea' gunné' ca', ne chee quebe sua stëbe xichaj lázrdaule. ²⁹ Dxennía' da nigá chee xichaj lázrdau benne' zúalëne' lue', ne quegá chee xichaj lázrdau' lué'queze.

Waca naba xuzre tu benne': "¿Bizr chee na' dxuchi'u da naca chia' lawe' da sua stëbe xichaj lázrdau benne' xula? ³⁰ Che dxapa' Dios: Xcalenu' chee da dxawa', ¿bizr chee na' xelezi' tizre' neda' chee da dxawa'?" ³¹ Chee le na', che dxágule u dxí'ajle, u bitetëze da dxunle, le gun xúgute chee gaca ba Dios. ³² Quebe bi gunle da guzúa na stëbe benne' xula, quegá benne' judío ca', ne quegá benne' quebe zaj naque' judío, ne quegá nu benne' naque' bi chee Dios. ³³ Neda' dxuna' ba xuzre guna' da xelezaca ba lazre' xúgute bënneache ca naca

xúgute da dxuna'. Quebe dxuna' da gaca chawe' cheeza' san da gaca chawe' chee xezicadxa bénneache chee xelee'.

11

¹ Le gun ca dxuna' neda', ca neda' dxúnqueza' ca ben Cristo.

Da dxelún nu'ula naga zaj nazraga bi chee Cristo

² Bi bicha', dxapa' le'e ba lá'ana lawe' da dxeajsá lázreqezle neda', ne dxunle ca naca da bzéajni'ida' le'e. ³ Na'a dxaca lazra' chéajni'ile naca Cristo xíchaje chee tu tu benne' biu, na' benne' biu naque' xíchaje chee zru'ule', ca naca Dios, naque' xíchaje chee Cristo. ⁴ Che tu benne' biu gugácue' xíchaje' gate dxuchálajlene' Dios naga zaj nadupa bi chee Cristo, u gate dxuchálaje' waláz chee Dios, naca na tu xel-la stu' chee Bénnea' naque' xíchaje'. ⁵ Che tu nu'ula quebe gugácue' xíchaje' gate dxuchálajlene' Dios, u gate dxuchálaje' waláz chee Dios, naca na tu xel-la stu' chee', lawe' da dxun cuine' ca tu benne' biu. Lébezqueze naca na chugue' xíchaje'. ⁶ Che tu nu'ula quebe gugacu xíchaje', nácadxa xrlátaje chugue' tu chí'ize ca naca xicha xíchaje'. Na' che naca na tu xel-la stu' chee nu'ula che chugue' xíchaje', u che guzúe' zrígaze xíchaje' ca dxun tu benne' biu, dxal-la' gugacu xíchaje' naga zaj nazraga bi chee Cristo. ⁷ Benne' biu quebe dxal-la' gugacu xíchaje' lawe' da naque' lu'a le saca Dios, na' da naque' dxulé'e na ca naca xel-la szren chee Dios. Da naca nu'ula dxulé'e na ca naca xel-la szren chee benne' biu. ⁸ Gate ben Dios benne' biu, quebe bi guléaje' le' lu bēla' dxen chee nu'ula, san guléaje' lu bēla' dxen chee benne' biu da na' bexune' nu'ula na'. ⁹ Dios bene' nu'ula na' chee nna be'e benne' biu le', ne quegá bene' benne' biu chee nna be'e nu'ula le'. ¹⁰ Chee le na' nu'ula dxal-la' guzúe' xíchaje' tu da dxulé'e na zua nu dxenná be'e le' chee quebe gun zréajene' gubáz chee xabáa ca' chee Dios. ¹¹ Lu da nácadxu chee Cristo, benne' biu dxechinne' nu'ula, ne cá'anqueze dxechín nu'ula benne' biu. ¹² Da li Dios guléaje' nu'ula na' lu bēla' dxen chee benne' biu, na' cá'anqueze benne' biu dxálaje' chee nu'ula, na' xúgutedxu zadxu lu na' Dios.

¹³ Le nna'xque le'e che naca xrlátaje che tu nu'ula guchálajlene' Dios, ne quebe gugacu xíchaje'. ¹⁴ Da nácaquezdxu dxulé'e na dxi'u naca tu xel-la stu' che benne' biu se tunna xicha xíchaje', ¹⁵ na' naca tu da ba lá'ana chee nu'ula se na tunna, lawe' da nunna Dios le' xicha xíchaje' tunna chee gugacu na xíchaje'. ¹⁶ Na'a che nu benne' dxaca lazre' gutil-le' dizra' ca naca da nigá, dxal-la' nézene' quegá dxi'u ne quegá benne' zaj nazraga chee Cristo quebe núnbeadxu xetú da xula.

Da dxelún benne', gate dxelawe' da naca chee Xránadxu

¹⁷ Ca naca chee da nigá quebe dxapa' le'e ba lá'ana lawe' da dxaca da calela chee gate nazrágale, ne quegá da chawe'. ¹⁸ Da nédxuteca, dxulé'e neda' gate dxezrágale chee güe lá'anale Dios nácale chupa la'a. Dxéqueda' naca da li da dxelenné'. ¹⁹ Dxál-la'queze gácale chupa la'a chee gulé'e lawe' nu benne' ládujla le'e da li naque' bi chee Cristo. ²⁰ Chee le na' gate dxezrágale le'e chee gágule da naca chee Xránadxu, da li québedxa naca na chee Xránadxu. ²¹ Gate dxezrín zra dxágule, tu tle le'e dxebía lau chee dxecá'ale xel-la wagu cha chee, na' bál-lale le'e dxejá'anale dxedunle, na' xezicádaxe dxezúzele. ²² ¿Quebe bi de chee naga xi'aj gágule? Ca'an dxunle, dxuzúale chalá'ala bi ca' chee Dios, ne dxugu'ule xel-la stu' benne' ca' quebe bi de chee'. ¿Bízraqueze xapa' le'e? ¿Dxal-la' gapa' le'e ba lá'ana? ¿Cabata'!

*Da dxágudxu da naca chee Xránadxu
(Mt. 26.26-29; Mr. 14.22-25; Lc. 22.14-20)*

²³ Xránaquezdxu bzéajni'ine' neda' da nigá bsédeda' le'e: Lu zre' ná'queze gate Judas bdeē' Xránadxu Jesús lu na' benne' guledábague' Le', na' Jesús guquqé'e xeta xtila, ²⁴ na' gudé guzre' Dios: Xcalenu', bzúzruje' na, na' gunné': "Le gagu. Xeta xtila nigá dxulé'e na ca gaca chee beł-la' dxen chia' lu da na' saca zi'a waláz chee. Le gun da nigá chee cheajsá lázrele neda'." ²⁵ Cá'anqueze, gudé gulawé', guquqé'e xrisa uva, na' gunné': "Xrisa uva nigá dxulé'e na ca naca da dxuzé chacha na xel-la wezria cube da naca na dxen chia'. Tu tu lasa xi'ajle na, le gun na chee cheajsá lázrele neda'." ²⁶ Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu lasa gate gágule xeta xtila nigá, ne xi'ajle xrisa uva nigá.

Ca dxal-la' gágudxu da naca chee Xránadxu

²⁷ Ca' naca na, nüteteze benne' gawe' xeta xtila nigá, u xi'aje' xrisa uva chee Xránadxu, ne quebe dxape' ba lá'ana na, na' dxune' dul-la da dxuzá bela' dxen chee Xránadxu chalá'ala. ²⁸ Chee le na' tu tudxu dxal-la' guxúe xánnedxu xichaj lázrdaudxu gate za gágudxu xeta xtila nigá, ne za xi'ajdxu xrisa uva nigá, ²⁹ lawe' da che xi'aj gágudxu, ne quebe dxéquedxu dxulé'e na ca naca bela' dxen chee Xránadxu, na' da xi'aj gágudxu gun na bágadxu zria. ³⁰ Chee le na' benne' zan ládujla le'e quebe chawe' zaj zuē', ne zaj nate ni'a ne'e, na' bal-la benne' ládujla le'e ba gulatione'. ³¹ Che guxúe xanne' cuínadxu, quebe gun na ba xen guchi'a Xránadxu cheedxu caní. ³² Gate Xránadxu dxuchi'e cheedxu, dxudé' dxi'u xel-la zi' chee quebe cuía xidxu nen benne' zaj zre'e xezr la xu nigá.

³³ Ca' naca na, bi bicha'. Gate dxezragale chee gágule da naca chee Xránadxu, le cueza ljwézrele tule xetule chee bi gágule. ³⁴ Che núlale dxedunle, le gagu lu xu'u lízrquezle, chee quebe gun na ba xen guzria xi' Dios le'e gate na' nazragale. Xezicadxa da ca' dxelaca chee gucá'ana' chawe' gate xida' xedajnná' le'e.

12

Xel-la waca ca' da dxunna Be' Lá'azxa tu tudxu dxi'u

¹ Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

² Ba nézquezle gate na' quebe ne chéajlele chee Xránadxu, be'e le lataj gulezrube xue' le'e chee xeajé lá'anale bedáu' xiaj xaga ca', da quebe dxelenné' na. ³ Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

⁴ Zaj nazrá' xel-la waca ca' da gaca si' lu nnadxu, q san tuze naca Be' Lá'azxa, Bénnea' dxunne' dxi'u na.

⁵ Zaj nazrá' ca gaca gundxu zrin, san tuze naca Xránadxu, Bénnea' dxundxu zrin chee'.

⁶ Zaj nazrá' ca da gaca gundxu,

san tuze naca Dios, Bénnea' dxunne' dxi'u xel-la waca gundxu na.

⁷ Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutēdxu.

⁸ Ne chee Be' Lá'azxa dxunne' bal-la benne' xel-la waca xuluchálaje' dutē xel-la sina,

na' xebal-le' ne chee Be' ná'queze dxunne' le' xel-la waca xuluchálaje' dutę xel-la naxéajni'.

⁹ Xebal-le' dxelezi'e xel-la dxeajlí lazre' ne chee Be' ná'queze, na' xebal-le' dxelezi'e xel-la waca chee xelexunę' benne' we' ca'.

¹⁰ Xebal-le' dxelezi'e xel-la waca xelunę' xel-la waca ca' chee xabáa, na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézenę' nu be' dxuchalaj na lu dxu'a bėnneache.

Xebal-le' dxelezi'e xel-la waca xuluchálaje' dizra' nazrá', da quebe naca xrtírzqueze',

na' xebal-le' dxelezi'e xel-la waca xuluxuzájle'e dizra' nazrá' na'.

¹¹ Xúgutę da caní dxun tuze Be' ná'queze, Bėnnea' dxunne' cha cheędxu xel-la waca caní cáteze da dxaca lázrequeze'.

Xúgutędxu nuchágadxu tuze bęla' dxen

¹² Zua cheędxu tu bęla' dxen da napa na zánete cue'. Dxi'u, dxéajleđxu chee Cristo, nácadxu ca tuze bęla' dxen chee Cristo. ¹³ Xúgutędxu dxi'u, che nácadxu benne' judío, u benne' quebe nácadxu judío, ne che nácadxu benne' zaj nada'u, u benne' quebe zaj nada'u, gate gudxúadxu nisa da dxulé'e na nácadxu Cristo tuze, cá'anqueze bexácadxu ca tuze bęla' dxen, da na' bęn tuze Be' Lá'azxa, na' Diosqueze bęnne' dxi'u lataj sidxu tuze Be' ná'queze.

¹⁴ Tu bęla' dxen quebe naca na tu cue'ze, san naca na zane' cue'. ¹⁵ Che ní'adxu nna na: Quebe naca' na'u, ne chee le' na' quebe naca' chee bęla' dxen chiu', quegá da ni gun na québedxa naca na chee bęla' dxen na'. ¹⁶ Na' che nágadxu nna na: Quebe naca' lau', ne chee le' na' quebe naca' chee bęla' dxen chiu', quegá da ni gun na québedxa naca na chee bęla' dxen na'. ¹⁷ Che dutę bęla' dxen cheędxu naca na laudxu, ¿ájazra gundxu xendxu? Che dutę bęla' dxen cheędxu naca na nágadxu, ¿ájazra gundxu lé'edxu? ¹⁸ Dios nuzúe' cha chee cue' bęla' dxen na' naga dxaca lazre' Le'. ¹⁹ Che dutę na' naca na tuze cue', ¿gazra zúaqueze bęla' dxen na'? ²⁰ Ca naca na, lálala naca na zane' cue', tuze bęla' dxen naca na.

²¹ Xia laudxu quebe dxal-la' xę na nadxu: Quebe nachinda' lue', ne quebe dxal-la' nna xíchajdxu, xę na ní'adxu: Quebe nachinda' le'e. ²² Da naca na, da zaj naca chee bęla' dxen cheędxu da dxéquedxu quebe zaj nácateca na blau, zaj naca na da dxechínedxadxu, ²³ Da zaj naca na chee bęla' dxen cheędxu da quebe dxápadxu ba lá'ana zaj naca na da dxugacu xánnedxadxu. Da ca' dxéquedxadxu quebe dxal-la' gulé'edxu zaj naca na da dxucáchedxu, ²⁴ da quebe dxun na ba xen gundxu chee da ca' gaca gulé'edxu. Ca' naca na, Dios bęne' bęla' dxen cheędxu chee gápadxadxu ba lá'ana da ca' dxéquedxu quebe nácateca na da gápadxu ba lá'ana, ²⁵ chee quebe gaca chupa la'a bęla' dxen cheędxu. Tu tu cue' chee bęla' dxen cue' na gunne xue chee ljwezre na. ²⁶ Che dxedé xel-la zi' tu da naca na chee bęla' dxen cheędxu, xúgutę da ca' dxeledé na xel-la zi', na' che tu da na' gaca da ba neza chee na, na' xúgutę da ca' dxelebé na tu zren.

²⁷ Ca' naca na, le'e nácale bęla' dxen chee Cristo, na' tu tule nácale ca tu tu cue' chee bęla' dxen chee' na'. ²⁸ Ca' naca na, Dios nunéruzrųe' lataj blau chee bal-la benne' ládujla bi chee Cristo. Lu lataj blau nuzré'e benne' gubáz chee' ca', na' lu lataj gudxupe' nuzré'e benne' dxuluchálaje' waláz chee', na' lu lataj guxunne' nuzré'e benne' dxulusédene' bi chee' ca', na' gudé na' nuzré'e benne' dxelunę' xel-la waca da za xabáa. Gudé na' nuzré'e benne' ca'

dxelaxunġ benne' we' ca', ne benne' ca' dxelácalenġ bi cheġ' ca', ne benne' ca' dxelenná be'e, ne benne' ca' dxuluchálaje' dízra' nazrá' da quebe zaj nézenġ'. ²⁹ ¿Zaj naca xúgute' benne' gubáz cheġ'? ¿Dxuluchalaj xúgute' waláz cheġ'? ¿Dxulusede xúgute' bi cheġ' ca'? ¿Dxelún xúgute' xel-la waca cheġ xabáa? ³⁰ ¿Dxelexún xúgute' benne' we' ca'? ¿Dxuluchalaj xúgute' dízra' nazrá' da quebe naca xrtizre'? ¿Dxuluxuzájla'a xúgute' dízra' nazrá' na'? ¡Cabí! ³¹ Le gun ba xuzre si' lu na'le cheġ Dios xel-la waca ca' da nácadxa chawe'. Na'a gulé'eda' le'e tu da cháwedxa.

13

Xel-la zri'i lazre' li

¹ Che dxuchálaja' dízra' cheġ benne', ne cheġ gubáz cheġ xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na. ² Che dxuchálaja' waláz cheġ Dios, ne che nezda' xúgute' da zaj nagache, ne dxéajni'ida' xúgute' da dxelaca, ne napa' xel-la dxeajlí lazre' cheġ séqueda' gucuasa' xi'a ca', san che quebe napa' xel-la zri'i lazre' li, quebe nu nácaqueza'. ³ Che quísia' xúgute' da de' chia', ne che guzúa' belá' dxen chia' cheġ chezxe na, san che quebe napa' xel-la zri'i lazre' li, quebe bi da ba neza naca na chia'.

⁴ Bénnea' nape' xel-la zri'i lazre' li:

Naque' zren lazre'.

Naque' zri'i lazre', ne quebe naque' xa lazre'.

Quebe dxucá'ana szren cuinġ, ne quebe dxuzé'cu'e.

⁵ Quebe dxunġ' da calela,

ne quebe naque' zre'e lazre'.

Quebe dxezre'e, ne quebe dxu'u lazre'.

⁶ Quebe dxebenġ' gate nu benne' dxeajcházie' lu dul-la,

san dxebenġ' lu da li.

⁷ Dxuchaga lawġ' xúgute' da dxaca nen dutġ xel-la dxeajlí lazre' cheġ',

ne dutġ xel-la dxebeza lazre' cheġ',

ne dutġ xel-la zren lazre' cheġ'.

⁸ Xel-la zri'i lazre' li quebe te cheġ na. Wazrín zra gate québedxa chinedxu nu benne' guchálajlenġ' dxi'u waláz cheġ Dios, ne benne' dxéajni'ine' xúgute'.

⁹ Na'a dxéajni'idxu látedauze, ne látedauze dxuchálajdxu waláz cheġ Dios. ¹⁰ Zrin zra gate na' chéajni'idxu dutġ ca naca, na' te cheġ da na' naca na látedauze.

¹¹ Gate ne naca' bidau' bchálaja' ca bidau', ne gulaba lazra' ca bidau', ne bchi'a ca bidau', san gate guca' benne' waca, bzua' chalá'ala da zaj naca cheġ bidau'.

¹² Cá'anqueze na'a quebe dxelé'edxu cátequeze, ne da dxelé'edxu ze' zrul-la, san lu zra na' lé'edxu cátequeze. Na'a látedauze núnbe'a, san lu zra na' gúnbe'a cátequeze ca dxun Dios, núnbe'tequeze' neda'.

¹³ Ca' naca na, xel-la dxeajlí lazre', ne xel-la dxebeza lazre', ne xel-la zri'i lazre' li xelexúaqueze na chadía chacanna, san da blaudxa cheġ da caní naca na xel-la zri'i lazre' li.

14

Ca naca cheġ nu benne' dxuchálaje' dízra' nazrá' da quebe naca na xrtizre'

¹ Le gun ba xuzre gápale xel-la zri'i lazre' li, ne cá'anqueze le naba Dios gunne' le'e xel-la waca ca' cheġ Be' Lá'azxa, ne da naca blaudxa, cheġ gaca guchálajle waláz cheġ Dios. ² Bénnea' dxuchálaje' dízra' nazrá' da quebe naca na xrtizre' dxuchálajlenġ' Dios, quegá nen bénneache, lawe' da quegá nu dxéajni'i da dxenné'. Dxuchálaje' ne cheġ Be' Lá'azxa da zaj nagache.

³ Bénnea' dxuchálaję' waláz cheę Dios dxuchálajęne' bénneache cheę gusegule' benne' ca' lu da naca cheę Dios, ne cheę ne xúene'-be', ne cheę xue zrene'-be'. ⁴ Bénnea' dxuchálaję' dizra' nazrá' na' dxusegula cuine', san bénnea' dxuchálaję' waláz cheę Dios dxusegule' bi ca' cheę Cristo lu da naca cheę Dios.

⁵ Dxaca lazra' gapa xúgutele xel-la waca guchálajle dizra' nazrá', san dxaca lázredxa' gaca guchálajle waláz cheę Dios, lawe' da nácadxa chawe' guchálajle waláz cheę Dios quézcala guchálajle dizra' nazrá', che quebe zua nu benne' xuzájle'e dizra' nazrá' na' cheę xelegula bi cheę Cristo lu da naca cheę Dios.

⁶ Cheę le na', bi bícha'dau', che xida' xedajnná'a le'e, ne guchálajęna' le'e dizra' nazrá', ¿bizra da ba neza gaca na cheęle che quebe guchálajęna' le'e tu da ba ble'e Dios neda', u tu da buzėjni'ine' neda', u tu da guchálajaja' waláz cheę Dios, u tu da guzėjni'ida' le'e?

⁷ Nná'xquedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chėjni'idxu da dxelenné na, quebe gaca nezdXu ca da dxelul-la na. ⁸ Gate dxaca wedil-la, che quebe dxebezre luzu da dxulucuezre' cátequeze, quebe nu se lu wedil-la. ⁹ Cá'aqueze dxaca cheęle le'e. Che quebe guchálajaja' dizra' da dxėjni'ile, ¿ájazra gaca nézele da dxennía'? Guchálajaja' lu be'. ¹⁰ Da zante dizra' nazrá' zaj de lu xezr la xu nigá, ne da li xúgute na zaj zéaje na. ¹¹ Na'a che quebe dxėjni'ida' dizra' dxuchálajle tu benne' neda', gaca' ca tu benne' zitu' lau bennea', na' le' gaque' ca tu benne' zitu' lawa' neda'. ¹² Cheę le na', lawe' da dxaca lázrele si' lu na'le xel-la waca ca' da dxunna Be' Lá'azxa dxi'u, le gun ba xuzre si' lu na'le da ca' xulusegula na bi ca' cheę Cristo lu da naca cheę Dios.

¹³ Ca' naca na, bénnea' dxuchálaję' dizra' nazrá' dxal-la' naba lau Dios gunne' le' xel-la waca xuzájle'e dizra' nazrá' na'. ¹⁴ Che guchálajęna' Dios tu dizra' nazrá'la, da li dxuchálajęna' Le' lu be' nácaqueza', san quebe bi da ba neza naca na cheę xel-la dxėjni'i chia'. ¹⁵ ¿Bizra da dxal-la' guna' xca'? Dخال-la' guchálajęna' Dios lu be' nácaqueza', ne cá'aqueze nen xel-la dxėjni'i chia'. Dخال-la' gul-la' cheę Dios lu be' nácaqueza', ne cá'aqueze nen xel-la dxėjni'i chia'. ¹⁶ Che dxue la'anu' Dios tuze lu be' nácaquezu', na' benne' ljwezru' dxenne' chiu' quebe gaca gunę' tu zren lue' gate dxu'u Dios: Xcalenu', lawe' da quebe dxėjni'ine' da dxennáu'. ¹⁷ Da dxuchálajęnu' Dios nácalę'e na chawe', san bénnea' dxenne' quebe dxegule' lu da naca cheę Dios. ¹⁸ Dxapa' Dios: Xcalęne' lawe' da dxuchálajdx'a' dizra' nazrá' ca xúgutele le'e, ¹⁹ san naga zaj nazraga bi cheę Cristo dxaca lázredxa' guchálajaja' gázxuze dizra' da xelėjni'ibe' cheę gusédeda'-be', quézcala guchálajaja' chi mila dizra' nazrá' da quebe gaca xelėjni'ibe'.

²⁰ Bi bícha'dau'. Quebe gulaba lázrele ca bidau'. Le gaca ca bidau' cheę quebe gunle da calęla, san le gaca benne' wal-la cheę gulaba lázrele cháwe'dau'. ²¹ Naxúaj lu xiche lá'azxa cheę da dxenná bea Dios, da dxenná na: Guchálajęna' benne' xezr la xu nigá nen dizra' nazrá', ne lu dxu'a benne' zitu' ca', san ne caní quebe xelenne' chia'. Caní dxenná Xránadxu. ²² Ca' naca na, xel-la waca cheę guchálajdxu dizra' nazrá' naca na tu da dxulé'e na lau benne' quebe dxelėjle'e cheę Dios, ne quegá lau benne' dxelėjle'e cheę'. ²³ Na'a, gate nazrágale, che xúgutele dxuchálajle dizra' nazrá', na' che xelxú'u benne' quebe zaj nazédene', u benne' quebe dxelėjle'e cheę Dios, ¿quebe xelenné' zaj nadá xichaj lázrdaule? ²⁴ Na'a che dxuchalaj xúgutele waláz cheę Dios, na' che chu'u tu benne' quebe dxėjle'e cheę Dios, u tu benne' quebe nazédene', na' guéquene' nabague' dul-la, na' léqueze' guchi'a cuine' gate

xenne' da dxennale xúgutele. ²⁵ Ca' gaca na, da zaj nagache xichaj lázrdawe' xululé'e lau na, na' guzúa zribe', ne güe lá'ane' Dios, na' nne' da li zúale Dios le'e.

²⁶ Ca' naca na, bi bícha'dau', gate dxezragale, bál-lale le'e nápaie salmo ca', ne xebál-lale nápaie da gusedele ljwézrele, ne xebál-lale nápaie tu da ble'e Dios le'e, ne xebál-lale nápaie tu dizra' nazrá' da guchálajle, ne xebál-lale nápaie xel-la waca xuzájla'ale dizra' nazrá' na'. Cháwe'dau' naca na, san xúgute da ca' dxal-la' xulusegula na bi ca' chee Cristo lu da naca chee Dios. ²⁷ Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájle'e da dxennale. ²⁸ Na'a che quebe nu chilá' benne' xuzájle'e dizra' nazrá' na', gácadxa chawe' quebe bi da nne' naga nazrágale. Tu tule dxal-la' nnale lé'equezele, ne nen Dios. ²⁹ Cá'aqueze benne' dxuluchálajle waláz chee Dios waca xelenné' chupa chúnnaze', na' xezícadxale dxal-la' guchí'ale da na' dxenné'. ³⁰ Che dxulé'e Dios xetú benne' dxe'e na' tu dizra', na' bénnea' dxuchálajle' dxal-la' gusané' ca da dxuchálajle'. ³¹ Xúgutele le'e waca guchálajle waláz chee Dios tuwéaj tuwéajle chee chéajni'i xúgutele, ne sile da gun chacha na le'e. ³² Benne' ca' dxuluchálajle' waláz chee Dios dxun na ba xen nna bé'ene' be' nácaqueze', ³³ lawe' da naca Dios Bénnea' dxunne' dxi'u xel-la dxebeza zri lazre', ne quebe dxun zréajene' bénneache.

Ca zaj xu'u lau xúgute cue' bi bíchedxu, bi chee Dios, ³⁴ dxal-la' xelezúa zrize nu'ula ca' naga nazrágale, lawe' da quebe naca chee' xuluchálajle'. Dخال-la' xuluzúe' dizra' ca naxúaj na lu da nadxixruj bea Dios. ³⁵ Che dxelaca lazre' bi xeléajni'ingé', dxal-la' xuluchébe' benne' cha chee' lizre tu tué' lawe' da quebe dxulé'e na chawe' tu nu'ula guchálajle' naga nazrágale.

³⁶ Dخال-la' gueque be'ele quebe guzú lau xrtizra Dios sua na ládujla le'e, ne quegá le'eze nazí' lu na'le na. ³⁷ Che nu benne' dxéqueñe' naque' benne' dxuchálajle' waláz chee Dios, u zúale Be' Lá'azxa le', dxal-la' gueque bé'ene' da nigá dxuzúaja' chee le naca na tu da gunná be'e Xránadxu. ³⁸ Che quebe dxaca lazre' gueque bé'ene' da nigá, quebe dxal-la' si' lu na'le bénnea'.

³⁹ Ca' naca na, bi bícha'dau', le gun ba xuzre guchálajle waláz chee Dios, ne quebe guzágale bénnea' dxuchálajle' dizra' nazrá'la. ⁴⁰ Xúgute da caní dxal-la' gunle duté ba lá'ana, ne ca dxal-la' gaca na.

15

Ca bebán Cristo ládujla benne' gate

¹ Na'a, bi bícha'dau', dxuzenda' le'e dizra' chawe' da ba bzenda' le'e, da na' guzú' lu na'le, ne da dá'le le'e. ² Ne chee dizra' chawe' nigá nalale che dxéajle chee da bzenda' le'e, ne che quebe guca dácheze xel-la dxeajlí lazre' chee le.

³ Da naca blaudxa, bzéajni'ida' le'e da guzú' lu na'a, gute Cristo ne chee dula da nabágadxu ca naxúaj na lu dizra' lá'azxa, ⁴ na' bulucaché' Le', na' bebane' zra guxunne' zra ca naxúajqueze na lu dizra' lá'azxa, ⁵ na' ble'e lawé' lau Pedro, na' gudé na' ble'e lawé' lau benne' gubáz chee' ca'. ⁶ Gudé na' ble'e lawé' lau bi bíchedxu zaj nácadxe' ca gazxu' gaxúa benne' zaj nazrague' tu zren, na' benne' zan, benne' ca' ne zaj naca bané', láqueze benne' zan, benne' ca' ba gulatigé'. ⁷ Gudé na' ble'e lawé' lau Jacobo, na' gudé na' ble'e lawé' lau xúgute benne' gubáz chee' ca'.

⁸ Bzébedxa, ca gudé chee xúgute da na', ble'e lawé' lawa' neda', lácala neda' naca' ca tu bidau', bi gúlajbe' ba gudé beu' cheebe'. ⁹ Neda' naca' benne' bzébedxa chee xúgute benne' gubáz chee Cristo, ne quebe naca chia' si' la'

gubáz cheę Cristo lawe' da gudáu zi' xuzra' bi ca' cheę Dios. ¹⁰ Naca' da naca' lawe' da guca Dios zri'i lazre' nen neda', na' quebe guca dácheze xel-la zri'i lazre' cheę' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchínene' neda'. ¹¹ Quebe zácadxa na che naca neda', u che naca benne' ca', da nigá naca na dizra' bzéntenú' bèneache, ne naca na da guxéajlele.

Ca xelexebán benne' gate

¹² Che da dxuzénentu' bèneache dxenná na bebán Cristo ládujla benne' gate, ¿ájazra naca na bál-lale le'e dxennale quebe xelexebán benne' gate? ¹³ Che quebe xelexebán benne' gate, Crístoqueze quebe bebane' ládujla benne' gate, ¹⁴ na' che quebe bebán Cristo ládujla benne' gate, dácheze naca da dxuzénentu' bèneache, ne dácheze naca da dxejájlí lázrele cheę Cristo. ¹⁵ Che caní naca na dxexechéentu' cheę Dios da wen lazre' lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo. ¹⁶ Che quebe xelexebán benne' gate, Crístoqueze quebe bebane', ¹⁷ na' che quebe bebán Cristo, dácheze naca da dxejájlí lázrele cheę', na' ne nabágale dul-la. ¹⁸ Che caní naca na, cá'anqueze benne' zaj nate, benne' ca' guleajlí lazre' Cristo zaj nanítequeze'. ¹⁹ Che da dxebeza lázrentu' da naca cheę Cristo naca na cheęze xęzr la xu nigá, nácadxu baxáchedxa ca xúgute bèneache.

²⁰ Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quézcala xúgute benne' ca' dxal-la' xelexebane'. ²¹ Ca guca, bla' xel-la gute lu xęzr la xu nigá ne cheę tuze benne', cá'anqueze ne cheę tuze benne' bla' xel-la dxexebán cheę benne' gate. ²² Ca naca dxelate xúgute bèneache lawe' da zaj naque' tuze nen Adán, cá'anqueze xúgute benne' zaj naca tuze nen Cristo xelape' xel-la nabán li lazre'. ²³ Xelexebán tu tuę' gate xelexexale', nédxula bebán Cristo ca tu lina nedxu, na' gudé na', gate xelá' Cristo xelexebán benne' zaj naque' bi cheę' ca'. ²⁴ Nadxa cheajsé cheę xęzr la xu nigá gate guzría xi' Cristo xúgute da dxelenná bea, ne xúgute da dxelixruj bea na, ne xúgute da zaj napa xel-la waca, na' gudéę' xel-la dxenná bea cheę' lu na' Xradxu Dios. ²⁵ Dxun na ba xen nna bea Cristo ca zrin zra ba nuzúa Dios zran ni'e xúgute benne' guledábague' Le', ²⁶ na' da bzébedxa da cuía xi' naca na xel-la gute. ²⁷ Ba nuzúa Dios xúgute zran ni'a Cristo, san gate dxenná na nuzúę' xúgute zran ni'e, dxaca bea na quebe zua Dios ládujla da ca', lawe' da Léqueze' naque' Bénnea' bzue' xúgute zran ni'a Cristo. ²⁸ Gate ba zua xúgute lu na' Cristo, nadxa Crístoqueze, Bénnea' naque' Zrí'inequeze Dios guzúa cuine' lu na' Dios, Bénnea' bdeę' xúgute lu na' Le'. Ca' naca na, Dios gaque' blau lawe' xúgute da de.

²⁹ Xetú da dxaca, zaj zua benne' dxeledxúę' nisa waláz cheę benne' zaj nate. ¿Bizr cheę na' dxelune' caní che quebe xelexebán benne' gate? ¿Bizr cheę na' dxeledxúę' nisa waláz cheę benne' gate?

³⁰ Cá'anqueze, ¿bizr cheę na' zúatequezdxu dxi'u lu da stebe? ³¹ Xúgute zra zua' lu da stebe cheę xel-la gute. Dxapa' le'e, bi bicha', da li naca da nigá ne cheę da ba neza da napa' ne cheęle lu da nácadxu nen Xránadxu Jesucristo. ³² Che ca tu bèneacheze gudíl-lalęna' benne' zaj naca ca be snia ca' lu xęzre Efeso ¿bizra da ba neza naca na chia'? Che quebe xelexebán benne' gate dxal-la' gundxu ca dxelenná bèneache, dxelenné': "Xi'aj gágudxu lawe' da wxre gátedxu."

³³ Quebe güele lataj nu si xę le'e. Naca cáteze dxenná na: Che gácadxu tuze benne' ca' dxelune' da calęla,

tu zrénqueze gundxu da caleja.

³⁴ Le guxúe xanne' cuínale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee gápale xel-la stu'.

³⁵ Guchebe nu benne' neda': Ajazra xelexebán benne' gate? ¿Ajazra gaca beja' dxen chee'? ³⁶ Da nigá naca na tu da xálaze, lawe' da gate dxázadxu tu binne, dxun na ba xen cuía xi' binnedu na' chee gaca na tu xágadau'. ³⁷ Da na' dxázadxu quebe naca na da xelá', san tu binnedauze naca na, che naca na zrua' xtla u xetú binnedau'. ³⁸ Te na' gun Dios chee binnedu na' tu xágadau' cáteze dxaca lázrequeze', na' chee tu tu binnedau' dxunge' tu tu xágadau' cáteze zaj naca binnedu ca'. ³⁹ Quegá xúgute beja' dxen tuz ca zaj naca na. Tuze ca naca beja' dxen chee bénneache, ne xetuze ca naca beja' dxen chee be xixre' ca', na' xetuze ca naca beja' dxen chee bxinnedu ca', ne xetuze beja' dxen chee beja' ca'. ⁴⁰ Cá'anqueze zaj naca beja' dxen chee xabáa, ne beja' dxen da zaj naca na chee xezr la xu nigá. Xel-la xrtan chee da zaj naca chee xabáa nazrá' ca xel-la xrtan chee da zaj naca chee xezr la xu. ⁴¹ Xel-la naxaní' chee gubizra nazrá' ca xel-la naxaní' chee beu', ne cá'anqueze nazrá' ca xel-la naxaní' chee belaj ca', na' ládujla belaj ca', xel-la naxaní' chee tu belaj nazrá' ca xel-la naxaní' chee xetú belaj. ⁴² Cá'anqueze dxaca chee benne' ca' xelexebang' ládujla benne' gate. Dxucáchedxu lu ba tu da guzru', na' xebán tu da québedxa gate. ⁴³ Dxucáchedxu tu da xálaze, na' xebán tu da xabáa. Dxucáchedxu tu da nate ni'a na', na' xebán tu da wál-lale'e. ⁴⁴ Dxucáchedxu tu beja' dxen chee beniácheze, na' xebán tu beja' dxen da naca na chee be' nácaquezdxu. Che zua tu beja' dxen da naca na bénneacheze, cá'anqueze zua tu beja' dxen da naca na chee be' nácaquezdxu.

⁴⁵ Cá'anqueze caní naxúaj lu dizra' lá'azxa da dxenná na: Benne' nedxu Adán guque' bénneache ban, na' Adán, benne' bzebe, naque' Be' da dxunna xel-la nabán. ⁴⁶ Bénnea' naque' Be' quebe ble'e nedxu, san bénnea' naque' bénneacheze. Gudé na' bla' Bénnea' naque' Be'. ⁴⁷ Benne' nedxu guque' xu bxrte, ne guque' chee xezr la xu nigá, na' Benne' gudxupe' naque' Xránadxu, Benne' chee xabáa. ⁴⁸ Beja' dxen ca' chee xezr la xu nigá zaj naca na ca guca bénnea' guque' xu bxrte, na' beja' dxen ca' da zaj naca na chee xabáa zaj naca na ca Bénnea' naque' chee xabáa. ⁴⁹ Ca naca, nácadxu ca bénnea' guque' xu bxrte, cá'anqueze gácadxu ca Bénnea' naque' chee xabáa.

⁵⁰ Dxaca lazra' xapa' le'e, bi bícha'dau', beja' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chadía chacanna. ⁵¹ Dxapa' le'e tu da nagache nédxute: Quegá xúgutedxu gátedxu, san xúgutedxu sidxu tu beja' dxen cube. ⁵² Chadite gaca na, ca dxun benne' guchudie' xexrate lawe', gate xendxu chi'i luzu da dxulucuezre' da bzebe. Cuézrequeze luzu da dxulucuezre', na' xelexebán benne' gate naga cabátadxa xelatíe', na' dxi' u sidxu tu beja' dxen cube. ⁵³ Beja' dxen cheedxu da guzru dxal-la' xexaca na tu da québedxa guzru, na' beja' dxen cheedxu da gate dxal-la' xexaca na tu beja' dxen da québedxa gate. ⁵⁴ Gate beja' dxen cheedxu da guzru ba bexaca na da québedxa guzru, ne beja' dxen cheedxu da gate ba bexaca na tu da québedxa gate, nadxa gaca li da naxúaj na lu dizra' lá'azxa, da dxenná na: Ba beladxu lu na' xel-la gute.

⁵⁵ Lue', xel-la gute, ¿ga na' xel-la waca chiu' chee gunu' netu' we'?

Lue', xel-la gute, ¿ga na' da zrué'enu'?

⁵⁶ Da dxunna xel-la gute xel-la waca chee gun na dxi' u we' naca na dul-la, na' da nadxiruj bea da gula na' naca na da dxunna na dul-la xel-la waca chee

gudé na dxi'u lu xel-la gute. ⁵⁷ Na'a, xcalén Dios, Bénnea' dxunne' dxi'u xel-la waca chee zrué'edxu lu dul-la, ne lu xel-la gute ne chee Xránadxu Jesucristo.

⁵⁸ Chee le na', bi bicha' nazri'ite lazra', le se chacha, ne le súateze lu zrin dxúndxale chee Xránadxu lawe' da nézele quebe naca dácheze zrin dxunle tu zren nen Xránadxu.

16

Dumí da gutúpale chee gácalele bíchedxu ca'

¹ Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgutę cue' bi chee Cristo zaj zra' xęzre ca' zaj nababa Galacia.

² Tu tu zra nedxu chee da gazre zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'. ³ Gate na' xelá'a, sel-la' xęzre Jerusalén benne' ca' cuele, na' gunézruja' le' tu xiche chee xelu'e dumí na' chee bi bíchedxu zaj zre'e na'. ⁴ Che gata' lataj cha'a, na' sá'acalequeze' neda'.

Da dxugú'u bea Pablo gunę'

⁵ Lu neza chia' dxun na ba xen tea' naga nababa xęzr la xu Macedonia, na' xelá'a xęzre Corinto ca te na'. ⁶ Wegá'analja' nen le'e tu chi'i, u che ba guca, na' sua' nen le'e dutę beu' zaga ca', na' le'e waca gácalele neda' lu neza chia' naga dxal-la' cha'a. ⁷ Quebe dxaca lazra' xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj. ⁸ Na'a xegá'ana' lu xęzre Efeso nigá ca zrin zra Pentecostés, ⁹ lawe' da napa' lataj guna' tu zrin zren chee Xránadxu da gulé'etę lawe na, lácala naxán benne' ca' dxeledábaguę'.

¹⁰ Che ba bla' Timoteo, le gun ba xuzre suabe' xel-la dxebé nen le'e, ne quebe bi cué'ebe' gunne xue, lawe' da dxunbe' zrin chee Xránadxu cáteze dxun neda'. ¹¹ Chee le na' netule le'e quebe guzúale-be' chalá'ala, san le gácalebe' chee xexu'ube' neza lu xel-la dxebeza zri lazre' chee xedajnná'abe' neda', lawe' da dxebeza-be' tu zren nen bi bíchedxu caní.

¹² Ca naca chee bíchedxu Apolos, guta' xúlele'ęda' le' chee chéajleņę' bi bíchedxu ca' xedajleņę'e le'e, san quebe guca lazre' se'e na'a. Wide' gate gape' lataj.

Dxulugapa ljwezre' diuzre

¹³ Le sua ban lazre'. Le se chacha lu xel-la dxeajlí lazre' cheęle. Le se ca ze benne' biu. Le gaca benne' wal-la. ¹⁴ Dutę xel-la zri'i lazre' le gun xúgutę da dxunle.

¹⁵ Na'a, bi bícha'dau', ba nézquezele gulaca xrtía Estéfanos benne' nedxu naga nababa Acaya gulezí' lu ne'e dizra' chawe' chee Cristo, na' buluzúa cuinę' chee xelácaleņę' bi bíchedxu ca', bi chee Cristo. ¹⁶ Dxaca lazra' guzúa cuínale lu na' benne' caní, ne lu na' xúgutę benne' dxelácale ljwézredxu, ne dxelún zrin chee Cristo. ¹⁷ Zua' xel-la dxebé lawe' da belelá' Estéfanos, ne Fortunato, ne Acaico, lawe' da belunę' chia' da quebe guzúquele gunle le'e lawe' da zrale zitu'. ¹⁸ Belún chúchųę' be' nácaqueza', ne be' nácaquezele le'e. Dxun na ba xen si' lu na'le benne' caní.

¹⁹ Xúgutę cue' bi chee Cristo naga nababa xęzr la xu Asia dxulugapa le'e diuzre. Aquilo ne Priscila, ne bi bíchedxu ca' dxelezraga lu xu'u lizre' dxulugápale'e le'e diuzre lu La Xránadxu. ²⁰ Xúgutę bíchedxu nigá dxulugape' le'e diuzre. Le gugapa diuzre ljwézrele tule xetule, ne le gunida ljwézrele.

²¹ Neda', Pablo, dxuzúaja' da dxugapa' le'e diuzre nen ná'aqueza'.

²² Che nu benne' quebe nazrí'ine' Xránadxu Jesucristo, cuía xi' bēnnea'. ¡Gudá Xránantu'!

²³ Dxenaba' Xránadxu Jesucristo gun cháwe'e le'e. ²⁴ Dxusel-la' chee xúgutele xel-la nazrí'i chia' lu La Jesucristo. ¡Ca'an gaca na!

DIZRA' GUDXUPE' DA BZUAJ SAN PABLO CHEE BI CHEE CRISTO ZAJ ZRE'E CORINTO

Pablo dxuzúajé' chee bi bíchedxu zaj zre'e xezre Corinto

¹ Neda', Pablo, naca' gubáz chee Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá cheele le'e, bi bícha'dau', zragale chee Dios lu xezre Corinto. Cá'anqueze dxuzúaja' da nigá chee xúgute bi chee Dios zaj zre'e xezre ca' zaj nababa xezr la xu Acaya. ² Dxenaba' Xradxu Dios, ne Xránadxu Jesucristo gun chawe'e le'e, ne gunne' le'e xel-la dxebeze zri lazre'.

Da ca' guz'í guzaca' Pablo

³ Dxue lá'anantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene' dxi'u. ⁴ Dios dxexúe zrénqueze' dxi'u ca naca xúgute xel-la zi' da dxededxu, chee cá'anqueze dxi'u gaca xexúe zrendxu benne' ca' dxeledé' xel-la zi', na' xue zrendxu le' cáteze da ba nun Dios cheédxu dxi'u. ⁵ Lawe' da dxededxu xel-la zi' zren ca da gudé Cristo, cá'anqueze ne chee Cristo zua Nu dxexúe zrénqueze dxi'u, Léqueze Dios. ⁶ Chee le' na', che dxedentu' netu' xel-la zi', naca na chee sua Nu xexúe zren le'e, ne chee lale, na' caní gaca guchaga laule lu duté xel-la zren lazre' cheele xel-la zi' ca' da dxededxu dxi'u. ⁷ Dxuxrén lázrelé'entu' le'e, lawe' da nézentu' ca dxedele xel-la zi' tu zren nen netu', cá'anqueze sua Nu xexúe zren le'e tu zren nen netu', Léqueze Dios.

⁸ Bi bicha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa ca da gaca guchaga launtu', na' québedxa guleza lázrentu' lantu'. ⁹ Gúquentu' ba zua gagu xelute benne' ca' netu'. Guca cheentu' da nigá chee bzéajni'i na netu' guxrén lázrentu' Dios, ne quegá guxrén lazre' cuínantu'. ¹⁰ Dios bselé' netu', na' ne dxuselé' netu' lu da stebe zren nigá chee xel-la gute, na' dxebeza lázrentu' Le' guseláqueze' netu' ¹¹ che le'e gácale netu', nábadxu Dios gácale' netu'. Che benne' zan xelenabe' Dios gácale' netu', na' benne' zan xel'é Dios: Xcalenu', chee da chawe' ca' da gun Dios cheentu'.

Bizr chee na' Pablo guzrene' chéajé' Corinto

¹² Naca tu da ba neza da nápantu' da zua na lawe' da dxé xichaj lázrdauntu' netu' ba gudantu' lu da lá'azxa, ne du lázrentu', lu xezr la xu nigá, ne ládujla le'e. Dios lu xel-la zri'i lazre' chee' gúcale' netu' chee bentu' caní, ne quebe bentu' na lu xel-la sina cheézquezentu'. ¹³ Lu da dxuzúajntu' cheele quebe bi de da quebe gaca gulábale, ne chéajni'ile, na' dxaca lazra' chéajni'i xánnele ¹⁴ ca ba guxéajni'ile late', chee lu zra xelá' Xránadxu Jesús, gácantu' netu' tu da ba neza cheele le'e, ca le'e gácale tu da ba neza cheentu'.

¹⁵ Lawe' da dxuxrén lazra' gaca caní, bechugu lazra' xida' nédxula xeda-jnná'a le'e chee gaca tu da ba neza cheele, na' xedajnná'a le'e chupa lasa, ¹⁶ lawe' da bechugu lazra' xedajnná'a le'e gate tea' cha'a xezre ca' zaj nababa Macedonia, na' te na', gate zezá'a lu xezre ca' zaj nababa Macedonia, xedajnná'a le'e xetú. Ca' gaca na, le'e gaca gácale neda' cha'a xezre ca' zaj nababa Judea. ¹⁷ ¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' chee xezr la xu nigá, na' dxenní'a: Awe', cabí, gate

dxechugu lazra' da guna'? ¹⁸ Dios nézquezne' neda', ne Silvano, ne Timoteo, quebe dxentu' le'e: Awe', cabí. ¹⁹ Naca na caní lawe' da Jesucristo, Zri'ine Dios, Bénnea' bzénentu' le'e ca naca chee', cabata' gunné': Awe', cabí. Nen Cristo nácaqueze da li xrtizra Dios, ²⁰ lawe' da ne chee' Le' dxelaca li xúgute' da guchebe lazre' Dios. Chee' le' na', gate dxue lá'anantu' Dios, dxennantu': ¡Ca'an naca na! ne chee' Jesucristo. ²¹ Dios naque' Bénnea' ba nuzé chúchue' netu', ne le'e lu da naca chee' Cristo, ne ba guqu'é' dxi'u, ²² ne ba nuzé' cheedxu tu da dxulé'e na nácadxu bi chee' Le', lawe' da ba nuzé' Be' Lá'azxa lu xichaj lázrdaudxu, da dxunna bea na sidxu da naca chee'.

²³ Che quebe ne xida' Corinto ca bechugu lazra', neze Dios naca na chee' gaca' zren lazre' nen le'e, ne che quebe naca caní, dxenaba' Dios xequ'é' xel-la nabán chia'. ²⁴ Quebe naca na lawe' da dxaca lázrentu' nna bé'entu' le'e da dxal-la' chéajlele, lawe' da ba zé cháchale lu da dxéajlele. Dxaca lázrentu' bédxale lu da naca chee' Cristo.

2

¹ Chee' le' na' bechugu lazra' quebe xida' xedajnná'a le'e lu da baxache'. ² Che neda' guzúa' le'e lu da baxache', ¿núzraqueze guzúa neda' lu xel-la dxebé? Tuze le'e, benne' ca' ba bzua' lu da baxache'. ³ Chee' le' na' bzuaja' chee'le ca da bēna' lawe' da quebe guca lazra' xida' chee' guzúale neda' lu da baxache', le'e na' dxal-la' guzúale neda' lu xel-la dxebé. Bxren lazra' che neda' zua' lu xel-la dxebé, cá'anqueze le'e súale lu xel-la dxebé. ⁴ Gate bzuaja' chee'le da na' guzélé'ēda' gunne xue, ne guzúa' lu da zi' da xa', ne cá'anqueze gudxézele'ēqueza', san quebe bzuaja' da na' chee' guzúa' le'e lu da baxache', san chee' nézele nazrí'ile'ēda' le'e.

Ca dxal-la' xulunite lawe' chee' bénnea' bēne' da calela

⁵ Che nu benne' ba bzue' neda' lu da baxache', quegá chia' neda'ze bēne' na, san cá'anqueze waca nnadxu, bzue' xúgutele lu da baxache'. Dxennia': Waca nnadxu, chee' quebe gácatēca' snia. ⁶ Ca xel-la zi' da bdele bénnea' gate na' bzrágale, ba nácale'ēqueze da na'. ⁷ Ca' naca na, na'a dxal-la' gunitē laule chee' bénnea', ne xue zrenle le', chee' quebe gunitiē' xel-la dxebeza lazre' chee' ne chee' da baxache' zren da dxedé'. ⁸ Chee' le' na' dxata' xueda' le'e gulé'ele le' xecha lasa ca nazrí'ile'ēle le'. ⁹ Bzuaja' nédxula chee'le ca naca da nigá chee' gulé'e lawe' che nácale wezúe dizra' lu xúgute' da dxaca. ¹⁰ Na'a, nu benne' dxunite laule chee', cá'anqueze neda' dxunite lawa' chee'. Ca da bnite lawa' neda', che naca na tu da dxal-la' gunitē lawa', ba bnite lawa' na ne chee'le le'e lau Cristo ¹¹ chee' quebe seque' Satanás nna be'e na dxi'u, na' ba nézquezdxu ca da dxun na.

Pablo dxezé' gunne xue lu xezre Troas

¹² Gate bzrina' xezre Troas chee' guzenda' bēneache dizra' chawe' chee' Cristo, gutá'le'ē lataj chia' guna' zrin chee' Xránadxu. ¹³ Guzúale'a gunne xue lawe' da quebe bezrelda' bi bíchedxu Tito ga na'. Chee' le' na' bzea' dizra' benne' ca' zaj zre'ē na', na' guxá'a xezr la xu Macedonia.

Dxezrué'edxu ne chee' Cristo

¹⁴ Xcalén Dios, Bénnea' dxeché'tequeze' dxi'u lu neza guxú'u Jesucristo lu da bzrué'ene', ne dxulé'e lawe' ne cheedxu dxi'u dizra' chee' ca tu da dxelá zixre da dxezriluj gáteteze na. ¹⁵ Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xelexé', ne ládujla benne' ca' xelebía xi'ē. ¹⁶ Lau benne' ca' xelebía xi'ē da dxelá nigá naca na ca tu da dxute

bénneache, san lau benne' ca' xelexé naca na tu da dxunezruj na bénneache xel-la nabán. ¿Nu benne' naca chee' gaque' caní? ¹⁷ Netu' quebe dxedantu' dxítentu' dizra' chee Dios, ne quebe dxuchantu' na ca dxelún benne' zante. Lawe' da dxen Dios, dxuchálajntu' du lázrentu', ca benne' nase-la Dios, ne ca wen zrin chee Cristo.

3

Dizra' chee xel-la wezría cube

¹ Gate dxennantu' da nigá, ¿dxéquele dxezú launtu' xecha lasa dxennentu' chawe' da naca cheézquezentu'? ¿Dxun na ba xen gulé'entu' le'e tu xiche da dxulé'e na nácantu' xrlátaje, u nábantu' cheeje tu xiche caní, ca dxelún bal-la benne'? ² ¡Cabí! Lawe' da nácaquezele le'e ca tu xiche da dxulé'e na nácantu' xrlátaje, da naxúaj na lu xichaj lázrdauntu', na' xúguté bénneache gaca xelexúnbe'e na, ne xululabe' na. ³ Le'e nácale ca tu xiche da nuzúaj Cristo, ne da dxulé'e launtu' netu'. Nácale ca tu da naxúaj na da quebe naca na tu lu xiche, san ne chee Be' Lá'azxa chee Dios ban, tu da quebe naxúaj na lu blaga xiaj, san lu lázrdaudxu.

⁴ Ne chee Cristo dxuxrén lázrentu' Dios, ⁵ quegá chee bi gaca guntu' da naca cheézquezentu', san, ca naca da gaca guntu' naca na chee Dios. ⁶ Le' ba nunne' netu' guntu' zrin chee' ne chee tu xel-la wezría cube da quebe naca na ne chee tu da naxúaj na, san da naca na ne chee Be' Lá'azxa chee'. Da nadxixruj bea na da naxúaj na dxuzría xi na dxi'u, san Be' Lá'azxa na' dxunna dxi'u xel-la nabán.

⁷ Da bdxixruj be'e Moisés na' bxuaj na le'e xiaj blaga', ne bla' nen tu da bsení'le'e, na' québedxa belezúe benne' Israel ca' xelené'e lau Moisés, lawe' da gúcatite legala le'e dxu'a lawe' na' xel-la naxaní' na' bexul-la na chawe lazre'. Che lu xel-la naxaní' zren bla' da nadxixruj bea na, da dxuzría xi na dxi'u, ⁸ da zrénle'edxa naca xel-la naxaní' chee dizra' chawe' na' da nusá Be' Lá'azxa cheedxu. ⁹ Che da nadxixruj bea na da dxuzría xi na dxi'u guca na tu da xabáa zrente, na' tu da xabáa zrénle'edxa naca dizra' chawe' na' da dxucá'ana na dxi'u xrlátaje lau Dios. ¹⁰ Lácala che da nadxixruj bea na nédxula guca na tu da xabáa, na'a quebe bi naca xabáa chee na lau dizra' chawe' nigá da naca na tu da xabáa zrénle'edxa. ¹¹ Che guca tu da xabáa chee da na' guzi' bea na tu chí'idauze, napa na tu da xabáa zrénle'edxa da na' si bea na chadía chacanna.

¹² Lawe' da dxuxrén lázrentu' naca na caní, du lázrentu' dxuchálajntu' dizra' chawe' na'. ¹³ Quebe dxuntu' ca ben Moisés, bgacu lawe' tu ladxe' chee quebe xelexé'e benne' Israel ca' xexul-la xel-la naxaní' na' da quebe guzi' bea na. ¹⁴ Benne' Israel ca' quebe guléajni'ine'. Ne na'a zra, gate dxululabe' xel-la wezría gula na', ladxe' ná'queze quebe dxue na le' lataj xeléajni'ine', lawe' da quebe ne xedúa na, na' gaca xedúa na tuze ne chee Cristo. ¹⁵ Na'a zra, gate dxululabe' dizra' chee Moisés, zua ca tu ladxe' da dxucache na xichaj lázrdawe'. ¹⁶ Gate tu benne' xexaque' chee Xránadxu, xedúa ladxe' na' lu xichaj lázrdawe', ¹⁷ lawe' da naca Xránadxu Be' na', na' naga zua Be' chee Xránadxu, na' de xel-la weselá lu na' da nadxixruj bea na chee Moisés na'. ¹⁸ Chee le' na' xúgutédxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa chee Xránadxu, na' dxi'úqueze, tu tu lasa gate dxelé'edxu da xabáa chee' dxexácadxadxu ca naca Cristo, lawe' da tu tu lasa na' nápadxadxu da xabáa chee'. Da nigá dxun Be' chee Xránadxu, na dxuché'e dxi'u lu xichaj lázrdaudxu.

4

¹ Ca' naca na, cabata' dxate ni'a nantu' lawe' da lu xel-la dxexache lazre' chee', Dios ba nusebague' netu' zrin nigá chee' Cristo da dxuntu'. ² Ba nuzúantu' chalá'ala da dxelún bénneache bagácheze, ne da dxedué'entu' ca zaj naca na. Quebe bi dxuntu' da wên lazre', ne quebe dxuchantu' dizra' chee' Dios, san dxennentu' tuze da li, na' caní dxuzúá cuínantu' lu na' xichaj lázrdau xúgute' bénneache lau Dios. ³ Che dizra' chawe' da dxuzéntenú' bénneache ne nagache na, naca na caní tuze lau benne' ca' xelebíá xi'e. ⁴ Lawe' da quebe dxeléajlé'e chee' Cristo, na' da xriwe', da na' naca na dios chee' xezr la xu nigá ba nun chul-la na xichaj lázrdawe' chee' quebe xelelé'eng' xel-la naxaní' chee' dizra' chawe' chee' xabáa chee' Cristo, Bénnea' naque' lu'a lesaca Dios. ⁵ Quebe dxuzéntenú' bénneache ca naca cheézquezentu', san ca naca chee' Jesucristo. Dxennantu' naque' Xránadxu, na' ca naca cheentu' dxennantu' nácantu' wên zrin chee' lawe' da nazrí'intu' Jesús. ⁶ Dios ná'queze, Bénnea' gunná be'e guxaní' xi' na' lu da chul-la, naque' Benne' ba be'ne' guxaní' xi' chee' lu xichaj lázrdaudxu, chee' gaca gúnbeadxu da xabáa chee' Dios da dxácatite legala na dxu'a lau Jesucristo.

Dxundxu xúgute' ne chee' xel-la dxeajlí lazre' cheedxu

⁷ Da xabáa nigá nápanu' lu belá' dxen cheentu', da naca na ca tu xesu' xu, chee' gaca bea za xel-la waca zren nigá lu na' Dios, ne quegá cheézquezentu'.

⁸ Chee' le' na':

Láqueze zúantu' lu da stébele'e, quebe dxezentu' gunne xue.

Láqueze dxezentu' gunne xue, tu dxebeza lázrezquezentu' gácale' Dios netu'.

⁹ Láqueze zaj nau zi' xuzre' netu', quebe dxusán Dios netu'.

Láqueze dxeline' netu' xu, quebe dxebíá xintu'.

¹⁰ Gáteteze dxéajntu' naca tuze belá' dxen cheentu' nen xel-la gute chee' Jesús chee' gulé'e lau lu belá' dxen cheentu' xel-la nabán chee' Jesús. ¹¹ Dxácate naca bantu' zúantu' chee' gátentu' xúgute' zra ne chee' Jesús, chee' gulé'e lau xel-la nabán chee' Jesús lu belá' dxen cheentu' da gate. ¹² Ca' naca na, lácala tu zúzquezentu' lu da stebe chee' xel-la gute da nigá, dxun na sua tu xel-la nabán cube chee'.

¹³ Naxúaj lu dizra' lá'azxa da dxenná na: Guxéajlé'a, na' chee' le' na' bchálaja', na' cá'anqueze netu', lu xel-la dxeajlí lazre' caníqueze, dxéajlé'entu', ne dxuchálajntu', ¹⁴ lawe' da nézentu' Dios, Bénnea' bsebané' Xránadxu Jesús ládujla benne' gate, cá'anqueze gusebané' dxi'u tu zren nen Jesús, na' tu zren nen le'e, xeché'e' dxi'u lau Le'. ¹⁵ Xúgute' da nigá guzaca zintu' chee' gaca tu da ba neza chee'le, chee' gaca na, gate xelezi' benne' zante' xel-la xrlátaje chee' Dios, cá'anqueze benne' zante' xel'é' Le': Xcalenu', chee' gaca ba chee' Dios.

¹⁶ Chee' le' na', cabata' dxate ni'a nadxu. Láqueze dxexru belá' dxen cheedxu, Dios dxuxucube' be' nácaquezdxu tu zra tu zra. ¹⁷ Da dxezácadxu lu xezr la xu nigá naca na tu da dauze, da teze chee' na, na' nusá na cheedxu tu xabáa chadíá chacanna da szrente, ne da cháwedxa. ¹⁸ Quebe nná'adxu ca da dxelé'edxu, san nná'adxu da quebe nalá', lawe' da quebe dxelezi' bea da ca' dxelé'edxu, san da ca' quebe dxelé'edxu dxelezi' bea na chadíá chacanna.

5

¹ Belá' dxen cheedxu naca na ca tu xu'u lizre be' nácaquezdxu. Belá' dxen cheedxu naca na ca tu xu'u da quebe si bea na, na' gate gátedxu Dios ba nucueze' cheedxu xabáa tu xu'u da zea jlí canna, da nun Diósqueze, ne quegá

bénneache. ² Da li dxácate naca bandxu lu belá' dxen nigá dxebezre we'dxu lawe' da dxaca lázredxu cheajchú'udxu belá' dxen cube na' da gunna Dios dxi'u xabáa. ³ Quebe xegá'ana cá'aze be' nácaquezdxu xabáa. Cheajchú'u na belá' dxen cube na'. ⁴ Dxácate ne naca bandxu lu xu'u nigá da naca na belá' dxen cheedxu, dxebezre we'dxu, ne dxededxu xel-la zi'. Quebe nácaze na lawe' da dxaca lázredxu gusandxu belá' dxen gula cheedxu nigá. Dxaca lázredxu cheajchú'udxu belá' dxen cube, na' ca'an gaca xenite belá' dxen cheedxu da dxal-la' gate, na' la' belá' dxen cube cheedxu da gaca ban na chadía chacanna. ⁵ Bénnea' ba nune' dxi'u chee gaca cheedxu caní naque' Dios, Bénnea' ba nunne' dxi'u Be' Lá'azxa ca tu da dxunna bea na dxal-la' sidxu tu belá' dxen cube xabáa.

⁶ Ca' naca na, dxuxrén lázretequezdxu Dios. Ba nezdXu dxácate naca bandxu lu belá' dxen nigá zúadxu zítu'la naga zua lízredxu, da naca na, quebe zúaledxu Xránadxu, ⁷ na' dxedadxu ne chee xel-la dxeajlí lazre' cheedxu, quegá ne chee da dxelé'edxu. ⁸ Dxuxrén lázredxu Dios, ne dxaca lázredxadxu gusandxu xel-la nabán cheedxu lu belá' dxen nigá chee chéajdxu cheajsúaledxu Xránadxu. ⁹ Chee le' na' dxundxu ba xuzre gúntequezdxu da xezca ba lazre' Xránadxu, che nagá'anadxu lu belá' dxen cheedxu nigá, u che cheajchú'udxu belá' dxen cube, da zua na xabáa, ¹⁰ lawe' da xúgute' dxun na ba xen xezrindxu lau Cristo chee guchi'e ca da nundxu tu tudxu, chee si' lu nadxu ca da xáladxu, cáteze naca da xrlátaje, u da caléla da ba bendxu gate ne zúadxu lu belá' dxen cheedxu nigá.

Dizra' da dxexún dxi'u tuze nen Dios

¹¹ Chee le' na', lawe' da núnbeantu' ca dxal-la' zrédedxu Xránadxu, dxuntu' ba xuzre guntu' xelélé bénneache. Dios ba nézene' da nácantu', na' dxebeza lazra' cá'anqueze le'e nézele na. ¹² Quegá dxennentu' xrlátaje cheézquezentu', san dxúnnantu' le'e lataj gápale netu' ba lá'ana, chee gaca xechébele chee benne' ca' dxulucá'ana szren cuine' ca naca da zaj naque' cúzreze, ne quegá ca naca da zaj naque' lu xichaj lázrdawe'. ¹³ Che dxeleque bénneache nadá xichaj lázrauntu' naca na chee guntu' zrin chee Dios, na' che quebe nadá xichaj lázrauntu' naca na chee gaca tu da ba neza cheele le'e. ¹⁴ Xel-la zri'i lazre' chee Cristo dxusebaga na netu' lawe' da nézentu' che tu benne' gutie' waláz chee xúgute' bénneache, na' ba gulate xúgute'. ¹⁵ Cristo gutie' waláz chee xúgute' bénneache, chee benne' ca' zaj naca bané' québedxa xelaca bané' cheézqueze', san chee Le', Bénnea' gutie', ne bebane' waláz chee benne' ca'. ¹⁶ Chee le' na', québedxa nna'ntu' ca naca da nácaqueze tu benne' lu xezr la xu nigá, na' láqueze nédxula gunna'ntu' Cristo cáteze gúcaqueze' lu xezr la xu nigá, na'a québedxa nna'ntu' Le' caní. ¹⁷ Ca' naca, che tu benne' naque' tuze nen Cristo, naque' tu benne' cube. Da gula ca' chee benne' nigá ba guledé chee na, na' xúgute' na zaj naca na cube.

¹⁸ Xúgute' da caní dxun Dios, Bénnea' bexune' dxi'u tuze nen Léqueze' ne chee Cristo, na' bsebague' dxi'u guzendxu bénneache ca gaca xelexaque' tuze nen Dios. ¹⁹ Gate gute Cristo, Dios guzúalequeze' Le', ne bexune' bénneache chee xezr la xu nigá tuze nen Le', ne quebe gunné'e ca zaj naca dul-la zaj nabaga bénneache ca, na' bsebague' dxi'u guzendxu bénneache dizra' da dxexún dxi'u tuze nen Dios. ²⁰ Ca' naca na, nácantu' gubáz chee Dios ne chee Cristo, na' naca na cáteze Diósqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios. ²¹ Cristo netú dul-la ca bene',

san ne cheedxu dxi'u, Dios bdee' Le' chee gutie' le'e xaga béguaj ca tu benne' dul-la, chee xexácadxu benne' xrlátaje lau Dios ne chee da ben Cristo.

6

¹ Ca' naca na, ca wen zrin tu zren nen Dios dxata' xuentu' le'e chee quebe guzúale chalá'ala xel-la zri'i lazre' chee Dios, ² lawe' da lu dizra' lá'azxa dxenné':

Tu zra dzezaca ba lazra' benda' chiu',
na' lu zra chee xel-la weselá gúcalena' lue'.

Na'a naca na zra dzezaca ba lazre' xenne' chee, ne guselé' le'e.

³ Quebe bi dxuntu' da gun na quebe xeláajle bénneache chee Cristo, chee quebe nu nne caléla chee zrin dxuntu'. ⁴ Ca naca xúguté da dxuntu', dxaca lázrentu' gulé'entu' bénneache nácantu' wen zrin chee Dios, ne chee xel-la dxebeza zren lazre' cheentu' gate dxuchaga launtu' da dx-ezácantu',

ne da dxexázrjentu', ne da zaj naca stebe cheentu',

⁵ ca buluzálaje' netu', ne gulegu'e netu' lizre xia.

Guledábage' netu' san bènle'entu' zrin.

Zane' lasa quebe gúsentu', ne quebe bi gudáguntu'.

⁶ Cá'anqueze blé'entu' da nácantu'

ne chee tu xel-la nabán li lazre' cheentu',

ne ne chee da li da núnbeantu',

ne ne chee xel-la zren lazre' cheentu',

ne xel-la zri'i lazre' cheentu',

ne ne chee Be' Lá'azxa, Bénnea' zúalene' netu',

ne ne chee xel-la nazrí'i cheentu' da naca na du lazre',

⁷ ne ne chee dizra' li da dxuzé'entu' bénneache,

ne ne chee xel-la waca chee Dios da zúale na netu'.

Bchínentu' da zaj naca ca xia chee wedil-la chee da xrlátaje chee gudíl-lantu', ne chee gudentu' chalá'ala da zaj naca ca xia chee wedil-la chee benne' ca' dxeledábage' netu'.

⁸ Zua gate dxelape' netu' ba lá'ana',

ne zua gate dxuluzé' netu' chalá'ala.

Zua gate dxelenné' cheentu' da xrlátaje,

ne zua gate dxelenné' cheentu' da caléla.

Zua gate dxelenné' nácantu' wen lazre',

ne zua gate dxelenné' dxennentu' da li.

⁹ Zua gate quebe nu dxuzé' naga netu',

ne zua gate dxuluzé' naga xánnie' netu'.

Zua gate zúantu' lu da stebe chee xel-la gute, san ne naca bantu'.

Zua gate dxuludé' netu' xel-la zi', san quebe ne xelutie' netu'.

¹⁰ Láqueze zúantu' lu da baxache', zúatequezentu' lu xel-la dxebe.

Lácala nácantu' benne' xache', ba nuntu' benne' zan benne' gunní'a.

Láqueze quebe bi núantu', xúguté nápantu'.

¹¹ Bi bíchentu', benne' Corinto, ba bchálajntu' du lázrentu'. Ba blé'entu' le'e ca nazrí'i lázrentu' le'e. ¹² Tu zúazqueze xel-la zri'i lazre' cheentu', na' le'e na' quebe nazrí'ile netu' du lázrele. ¹³ Dxata' xueda' le'e ca dxun tu benne' dxata' xuene' bi cheéqueze' chee gulé'ele neda' du lázrele xel-la nazrí'i da zua na lu xichaj lázraule cáteze bēna' neda'.

Nácadxu xudau' chee Dios ban

14 Quebe gunle tuze nen benne' quebe dxelájle'e chee Cristo, da gaca na ca chacué' bezre gu'una, be quebe zaj nadíl-leba'.

¿Ájazra gun da xrlátaje gaca na tuze nen da calela?

¿Ájazra gun xel-la naxaní' gaca na tuze nen da chul-la?

15 ¿Ájazra gun Cristo gaque' tuze nen Satanás?

¿Ájazra gun benne' dxéajle'e chee Cristo gaque' tuze nen benne' quebe dxéajle'e chee'?

16 ¿Ájazra gun xudau' chee Dios gaca na tuze nen bedáu' xiaj xaga?

Lé'eqeze nácale xudau' chee Dios ban cáteze gunná Díosqueze:

Súalena' le', ne tálena' benne' ca'.

Gaca' Dios chee benne' ca', na' le' xelaque' benne' xezre chia'.

17 Chee le na', cá'anqueze gunné':

Le xedxúaj ládujla benne' ca', ne le cuasa na', dxenná Xránadxu.

Quebe gutale da sban.

Nadxa si' lu na'a le'e 18 ne gaca' Xrale le'e,

na' le'e gácale zri'ina' bi biu, ne zri'ina' bi nu'ula.

Caní dxenná Xránadxu, Bénnea' nape' duté xel-la waca.

7

1 Ca' naca na, bi bícha'dau' nazri'ite lazra', da caní zaj naca na da guchebe lazre' Dios cheedxu. Chee le na' dxal-la' guxúe xanne' cuínadxu chee quebe güedxu lataj netú da sban gudxén na dxi'u lu beja' dxen cheedxu, ne lu be' nácaquezdxu, na' lawe' da dxezrébedxu Dios dxal-la' guzúa cuínadxu lu na' Dios duté ca nácadxu.

Ca belexebí'i lazre' benne' Corinto

2 Le si' lu na'le netu'. Quebe bi da calela ne guntu' chee nu benne' ládujla le'e, ne quebe nu ne guchántu', ne quebe nu ne si xentu'. 3 Quebe dxennía' da nigá chee gusebaga' le'e zria, san naca na ca ba gucha' le'e nédxula, le'e zúale lu lázrdawa' che gaca bana', u che gatia' tu zrente nen le'e. 4 Du lazra' dxuchálajlena' le'e, ne zua' lu da ba neza ne chee le'e. Lu xúguté da dxezácantu' zua da dxexúe zrénle'e neda', na' dxebéle'eda'.

5 Da li, gate bzrintu' naga nababa Macedonia, quebe bezí' lázrentu'. Guzúantu' lu da stebe gáteteze, lawe' da gáteteze gudentu' guledábaga bénneache netu', na' lu lázrdau' bezrébentu'. 6 Nadxa Dios, Bénnea' dxexúe zrene' benne' zaj nate ni'a ne'e, bexúe zrene' netu' ne chee Tito lawe' da bezrinbe' naga zúantu', 7 ne quegá tuze lawe' da bla'be', san cá'anqueze lawe' da bexúe zrenle lebe'. Gúzrebe' netu' ca dxezá lázrele lé'ele netu', ne bzenbe' netu' ca lu da baxache' zúale, ne ca gunne xue dxezele neda', na' chee le na' gubéle'edxeda'.

8 Láqueze da bzuaja' chee bzua na le'e lu da baxache', quebe dxebezre lazra' chee da na'. Láqueze gudxezre lazra' nédxula gate guque be'eda' bzua na le'e lu da baxache' tu chí'idau', 9 na'a dxebeda', quegá lawe' da guzúale lu da baxache', san lawe' da ben da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaja' chee quebe bi da calela ben na chee. 10 Da baxache' da dxuchaga laudxu ca da dxezaca ba lazre' Dios dxun na dxexebí'i lázredxu chee ladxu, na' quebe dxal-la' cuezre lázredxu chee na. Che xegá'anadxu lu da baxache' ca dxelún bénneache chee xezr la xu nigá, na' tu chí'ize gátedxu. 11 Le'e bchaga laule da baxache' da

guca na cheeḷe ne chee da bzuaja', ne benle ca da dxezaca ba lazre' Dios, na' le nna'xque na'a:

Bzua na le'e gunne xue ca naca da guca,
ne ben na ble'ele ca da benle.

Bcha'a na le'e, ne bchebe na le'e.

Nadxa guzé lázrele lé'ele neda',
ne guzúale gudele xel-la zi' bénnea' ben da calela na'.

Ca naca xúgute da nigá ble'ele quebe nabágale zria chee dul-la nigá. ¹² Ca' naca na, gate bzuaja' cheeḷe da na', quebe guca na lawe' da gudxe'a gunne xue chee bénnea' bene' da calela na', ne quegá lawe' da gudxe'a gunne xue chee bénnea' guca na chee', san bena' na chee gueque be'ele lau Dios ca dxele gunne xue cheentu'. ¹³ Chee le na' guca da bexúe zren na netu'.

Da naca tu da zrendxa, gubéle'entu' gate blé'entu' zúale Tito xel-la dxebé, lawe' da xúgutele le'e bexúe zrenle-be'. ¹⁴ Láqueze bca'ana szrena' le'e lau Tito, quebe dxedué'eda', lawe' da cáteze naca da li ca naca xúgute da bchálajlèna' le'e, cá'aqueze guca da li da bena' gate bca'ana szrena' le'e lau Tito. ¹⁵ Nazri'idxabe' le'e gate dxajsá lázrebe' ca benle xúgutele le'e, benle cáteze gunábabe' le'e, ne ca guzi' lu na'le lebe' lu duté xel-la dxexruj lazre', ne lu xel-la dxezrebe. ¹⁶ Dxebeda' lawe' da dxuxrén lazre' xánnia' le'e.

8

Da dxunézrujdxu du lázredxu

¹ Na'a, bi bicha', dxaca lazra' guzenda' le'e ca ble'e lau xel-la zri'i lazre' chee Dios ne chee xúgute cue' bi chee Cristo zaj nnita' lu xezr la xu Macedonia.

² Láqueze guledé' tu xel-la zi' zren gulebéle'equezne', na' láqueze zaj nácale'è benne' xache', du lazre' bulunézruje' da zaj de chee', na' belune' ca benne' gunní'a ca'. ³ Dexecheba' du lazre' bulunézruje' xúgute da gulezéquene', ne da zrendxa ca da gulezéquene'. ⁴ Gulata' xuene' netu' güentu' le' lataj xelune' tu zren bénneache dxelácalene' bi bíchedxu ca' dxelexárzrene'. ⁵ Belundxe' ca da guleza lázrentu', lawe' da belunna cuínaqueze', néxula chee Xránadxu, na' gudé na' cheentu' netu', cáteze dxaca lazre' Dios. ⁶ Ca' naca na, guta' xúentu' Tito gusexuzre' gutupe' da gunézrujle le'e, da na' guzú lawe' dxutupe' gate nate. ⁷ Le'e dxúnle'ele ca naca da dxunle, ca dxeajlí lázrele Dios, ne ca dxusédele bi chee Cristo, ne ca naca da naxéajni'ile, ne ca du lázrele dxunle xúgute, ne ca nazri'ile netu'. Ca' naca na, cá'aqueze dxal-la' gúnle'ele ca gunle zrin chawe' nigá.

⁸ Quebe dxapa' le'e da nigá ca tu da dxenná be'eda' le'e. Dxaca lazra' nézele ca du lazre' dxelún xezicadxa bénneache zrin nigá, dxulunézruje' dumí, chee gueque be'ele che naca li lazre' xel-la zri'i lazre' cheeḷe. ⁹ Ba nézquezle ca naca xel-la zri'i lazre' chee Xránadxu Jesucristo. Naque' benne' gunní'a, san ben cuine' benne' xache' lawe' da bzri'ine' le'e, chee gácale le'e benne' gunní'a lu da naca chee Cristo lawe' da gudé Le' lu xel-la xache'.

¹⁰ Chee gaca da ba neza cheeḷe dxapa' le'e da dxéqueda' ca naca da nigá. Gudú iza guzú laule, quegá dxúnzele, san du lázrele dxunle da nigá, dxunézrujle dumí. ¹¹ Na'a, le gúnteze na chee xexuzrte gunle na, gunle na du lázrele cáteze guzú laule dxunle néxute, gunézrujle ca da du de cheeḷe. ¹² Che da li dxaca lazre' tu benne' gunézruje', Dios xezaca ba lazre' na che gunézruje' ca da nape', ne quegá dxenabe' da quebe napa bénnea'.

¹³ Quebe dxennía' da nigá chee xexácale le'e xache' chee gácalēle benne' xula. ¹⁴ Naca na chee gápale lēbete. Na'a nápale chee gunézruje ca da dxexazrje benne' xula ca', na' xetú lasa xelapa benne' ca' da xelunne' chee gate bi xáxrjele le'e. Caní gápale lēbete ¹⁵ cáteze naxúaj na lu dizra' lá'axza, dxenná na: Bénnea' nápale'ē quebe bi begá'ana chee', na' bénnea' nape' láteze quebe bi bexáxrje'.

Tito ne bi ljwezre' ca'

¹⁶ Xcalén Dios, Bénnea' bzue' lu lázrdau Tito sue' gunne xue chee le'e ca zua' neda'. ¹⁷ Guzí' lu ne'e da bsebaga' le', na' lawe' da zúaqueze' gunne xue chee le'e, ba bezé'e chee xide' xedajnné'e le'e lawe' da dxaca lázrequeze le'.

¹⁸ Tu zren nen Tito nasél-lantu' tu bi bíchedxu, tu benne' dxelenné chawe' chee' xúgutē cue' bi chee Cristo, ca naca zrin xrlátaje da nune' chee dizra' chawe' chee Cristo. ¹⁹ Quegá tuze da nigá, san xúgutē cue' bi chee Cristo gulequē'e bi bíchedxu níqueze chee sálēne' netu' chee gácalēne' netu' lu zrin nigá da dxuntu' dxutúbentu' dumí da gácale na benne' xache' ca' chee gaca ba Xránadxu, ne chee gulé'e lau du lázrele dxunle zrin chawe' nigá. ²⁰ Caní dxuntu' chee quebe nu benne' si tizre' netu' ca dxuchínentu' dumí zrente nigá da dxulunezruj bi bíchedxu ca'. ²¹ Dxuntu' ba xuzre guntu' zrin nigá lu dute xel-la li lazre' cheentu', quegá tuze lau Xránadxu, san cá'anqueze lau xúgutē bēneache.

²² Tu zren nen benne' caní nasél-lantu' xetú bi bíchedxu, tu benne' da zánete lasa ba blé'enē' netu' du lazre' dxunē' zrin chee Cristo, na' na'a du lázredxē' dxunē' zrin nigá lawe' da dxuxrēn lazre' le'e. ²³ Che nu benne' guchebe le'e ca naca chee Tito, le xe'e nácabe' bi ljwezra', ne dxunbe' zrin tu zren nen neda' chee gunbe' zrin chee. Che nu guchebe le'e ca naca chee xezícadxa bi bíchedxu ca' zeajzrague' Tito, le xe'e zaj naque' benne' gulesel-la xúgutē cue' bi chee Cristo, ne dxelape' ba lá'ana Cristo. ²⁴ Chee le na', chee xeleneze xúgutē cue' bi chee Cristo, le gulé'e le' nazri'ile le', na' naca cheentu' xucá'ana szrentu' le'e.

9

Da dxulunézruje' chee bi bíchedxu ca'

¹ Ca naca chee dumí da gunézruje chee bi ca' chee Cristo, quebe dxun na ba xen guzúaja' chee, ² lawe' da ba nezda' ca dxaca lázrele gunle na. Dxezaca ba lazra' dxapa' bi bíchedxu zaj zre'e xezre ca' zaj nababa xezr la xu Macedonia, le'e zrle xezre ca' zaj nababa Acaya, gudú iza ba zúatequezle bi gunézruje, na' benne' zante benne' Macedonia du lazre' dxulunézruje' lawe' da dxunézruje le'e du lázrele. ³ Dxusel-la' bi bíchedxu caní chee quebe gaca tu da wēn lazre' ca da chawe' da ba gunnía' ca dxunle le'e da nigá, ne chee súatezle bi gunézruje, ca ba gucha' benne' caní, ⁴ ne che sa'aca bal-la benne' Macedonia tu zren nen neda' chee quebe xelélé'enē' quebe zúatequezle le'e bi gunézruje. Chela gaca na caní xedué'entu' lawe' da bxren lázrentu' le'e caní, na' da zrendxa ca dxal-la' xedué'ele le'e. ⁵ Chee le na' gúqueda' dxun na ba xen naba' bi bíchedxu ca' xelide' xedajlennabe' le'e nédxula, ne chee xelácalēne' le'e gutúpale da guchebe lázrele nédxula gunézruje. Ca' gaca na, dumí da gutúpale watá'queze na chee gulé'e na naca tu da dxaca lázrele gunle, ne quegá tu da gunne xúentu' le'e.

⁶ Le nna'xque da nigá: Bénnea' dxaze' láteze, cá'anqueze láteze xezi'e, na' bénnea' dxázale'e, cá'anqueze xezi'ile'e. ⁷ Tu tu benne' dxal-la' gunézruje'

cátēze da ba nune' lu lázrdawē', quegá ca tu benne' quebe dxezaca ba lazre', u xadiāze, lawe' da nazrí'i Dios benne' dxunézruje' dutē xel-la dxebé.

⁸ Wazeque' Dios gúnnałe'ē le'e ca naca xúgute' da chawe', chee gata' cheełe xúgute' da nachínele, ne gápale bi gunézruje chee gunle xúgute' zrin xrlátaje.

⁹ Naxúaj lu dizra' lá'azxa da dxenná na:

Du lazre' bnézruje' chee benne' xache' ca'.

Ca zaj naca zrin xrlátaje nune' xelegá'anatequeze na.

¹⁰ Dios, Bénnea' dxunézruje' bínneđu ca' da dxázadxu, ne dxunne' da dxi'aj dxágudxu, gunne' le'e xúgute' da nachínele chee gázale, na' gusegule' na chee gúnnałe'ēqueze na lina chee zrin chawe' da gunle. ¹¹ Ca' gaca na, gáta'le'ē cheełe xel-la gunni'a ca' chee séquele gunézruje du lázrele, na' dumí na' sél-lale lu na'ntu' netu' gun na xelé bi bíchedxu ca' Dios: Xcalenu'. ¹² Ca' naca na, gate gunézrujdxu bi bíchedxu ca' dumí nigá da gácale na le', quegá tuze dxunézrujdxu tu da dxelechinnene' san cá'anqueze dxundxu xelé'ē Dios: Xcalenu'. ¹³ Xelúe lá'ane' Dios lawe' da da nigá dxunézruje gulé'e na dxuzúale dizra' chee dizra' chawe' chee Cristo. Cá'anqueze xelúe lá'ane' Dios ne chee da gunézruje du lázrele da gácale na le', ne xúgute' cue' bi chee Cristo. ¹⁴ Chee le' na' benne' ca' xelenabe' cheełe lau Dios, ne xelezí'ile'ene' le'e ne chee xel-la zrí'i lazre' zren da gulé'e lau Dios ne chee le'e. ¹⁵ Xcalén Dios lawe' da nunne' dxi'u tu da zrente' da quebe séquedxu xuzájla'adxu.

10

Xel-la dxenná bea napa Pablo lawe' da naque' gubáz chee Cristo

¹ Neda', Pablo, dxuzenda' le'e da nigá ne chee xel-la dxexruj lazre', ne xel-la zrí'i lazre' chee Cristo. Dxełenne' naca' benne' zren lazre' gate zúale'na' le'e, na' gate zua' zitu' nácale'a benne' snia. ² Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládujla le'e, benne' ca' dxełenne' dxuntu' zrin chee Cristo lu bela' dxenze cheentu', na' zúaqueza' tıl-laqueza' benne' ca'. ³ Láqueze nácantu' beła' dxen quebe dxedıl-lantu' lu beła' dxenze cheentu', ⁴ lawe' da quebe zaj naca chee beła' dxenze da dxuchínentu' lu wedıl-la cheentu', san zaj napa na xel-la waca chee Dios chee séquentu' guzrí'a xintu' da wal-la ca' chee nu na' dxedábaga' netu'. ⁵ Ca'an naca, dxuzrí'a xintu' da dxusebaga bénnea' dxi'u, ne da dxuzúe' lu xel-la dxucá'ana szren cuina chee quebe xelúnbea bėnneache Dios. Xúgute' da zaj xu'u lu xichaj bėnneache dxuzúantu' lu na' Cristo chee xuluzúe' dizra' chee'. ⁶ Zuátēquezentu' gudentu' xel-la zi' xúgute' benne' ca' quebe dxuluzúe' dizra' chee' gate na' ba dxuzúale dizra' chee' du lázrele.

⁷ Le'e dxenna'le benne' ca' cátēze da zaj naque' cúzreze. Che nu benne' dxéque' da li naque' bi chee Cristo, dxal-la' gueque bé'ene' cátēze na' naca le' bi chee Cristo, cá'anqueze nácantu' netu' bi chee Cristo. ⁸ Láqueze dxuchínedxada' ca dxal-la' guna' xel-la dxenná bea cheentu', quebe dxedu'ē'eda' lawe' da nunna Cristo netu' xel-la dxenná bea na' chee séquentu' gusegúlantu' le'e lu da naca chee Dios, ne quegá chee guzrí'a xintu' le'e. ⁹ Quebe dxaca lazra' guéquele le'e dxaca lazra' gucheba' le'e ne chee da dxuzúaja' cheełe. ¹⁰ Dxełenne' xiche ca' da dxusél-la' zaj naca na snia, ne wal-la, san néda'queza' naca' benne' nate ni'a na', ne ca dxuchálaja' quebe zácateca. ¹¹ Bénnea' dxenne' da nigá dxal-la' gueque bé'ene' cátēze naca' lu dizra' dxuzúaja' gate ne zua' zitu', cá'anqueze gaca' lu da guna' gate na' súale'na' le'e.

¹² Quebe dxexázrentu' gutil-le lëbentu', u gulé'e cuínantu' ca zaj naca bal-la benne' ca' dxulucá'ana szren cuine'. Dxelunë' tu da xálaze gate dxeleonné'e ca da zaj nácaqueze', ne dxulutil-le lëbe ljwezre'. ¹³ Quebe gucá'ana szren cuínantu' lu da quebe naca cheentu'. Dios naque' Bénnea' gulé'ene' netu' naga ze lau guntu' zrin, na' Lë' benne' netu' lataj blantu' naga zrle le'e lu xezre Corinto. ¹⁴ Cheë lë na' quebe dxedxúajntu' naga ze lau cheentu', cáteze gaca na che quebe ne zrintu' naga zrle le'e nédxute. Netu' nácantu' benne' nedxu blantu' naga zrle le'e núantu' dizra' chawe' cheë Cristo. ¹⁵ Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxeajlí lazre' cheële, waca gúndxantu' zrin ládujla le'e gusegúlantu' xel-la dxeajlí lazre' cheële, san guntu' na lu'ule da naca cheentu'. ¹⁶ Te na' dxebeza lázrentu' tédxantu' ca naga zrle cheë guzénentu' bënneache zaj zre'e ga na' dizra' chawe' cheë Cristo, ne quebe chú'untu' naga ba zaj nun zrin xezícadxa benne' ca', cheë quebe gucá'ana szren cuínantu' lu da ba zaj nune'.

¹⁷ Che nu benne' dxaca lazre' nu gucá'ana szrene', dxal-la' gucá'ana szrene' Xránadxu. ¹⁸ Bénnea' dxexedxúaj xrlátaje, quebe naque' benne' dxucá'ana szren cuine', san naque' bënnea' dxucá'ana szren Xránadxu le'.

11

Ca naca cheë Pablo, ne benne' gubáz ca' quebe nasel-la Cristo le'

¹ Le guchaga lau neda' cheë nnia' late' da ca zeaje na. Ájateze naca na, le guchaga lau neda', ² lawe' da dxé'le'a gunne xue cheële le'e lu da nusebaga Dios neda', ne lawe' da ba nachebe lazra' cheële gácale zru'ula Cristo, dxaca lazra' gudé'a le'e lau Lë' ca tu nu'ula cuíde'dau' du lazre' súalebe' benne' cheebe'. ³ Ca ben belá' gula na' guzi' xëba' Eva nen xel-la neze cheëba', dxezreba' güele lataj nu si xë le'e, na' cuásale lu xichaj lázrdaule cheë québedxa gácale du lázrele cheë Cristo. ⁴ Le'e dxuchaga laule benne' ca' zá'aque' dxuluchálaje' cheë tu Jesús, benne' nazrá' ca Bénnea' bzénentu' le'e cheë Lë', ne du lázrele dxezí' lu na'le tu be' da nazrá' ca Be' na' da ba guzi' lu na'le, ne dxezí' lu na'le tu dizra' da nazrá' ca naca dizra' chawe' da ba guzi' lu na'le. ⁵ Dxéqueda' quebe zaca' neda' látezdxa ca benne' gubáz zren ca', benne' ca' zéajlele le'e. ⁶ Láqueze quebe gaca guchálaja' xrtándau', dxéajni'ida' da na' dxuchálaja' cheë na, na' blé'entu' caní naca na lu xúgutë da ba bëntu'.

⁷ ¿Bëna' tu da calela gate bzenda' le'e dizra' chawe' cheë Cristo, ne quebe bi bchízruja' le'e, na' ben cuina' dxexruj lazre' cheë xegá'ana szrenle le'e? ⁸ Guca na ca gudawa' dumí cheë xezícadxa cue' bi cheë Cristo gate guzi'a da belunne' neda' cheë bëna' zrin ga zúale le'e. ⁹ Gate na' guzúalëna' le'e, ne bxárzjeda', quebe bi guzi' lu na'a da naca cheële, san bi bíchedxu zá'aque' xezr la xu Macedonia belunne' neda' ca da guchínneda'. Bëna' ba xuzre quebe bi gunábeda' le'e, na' cá'anqueze guna'. ¹⁰ Lawe' da núnbe'a da li cheë Cristo, quebe zua nu benne' naga nababa xezr la xu Acaya gaca guzague' neda' cheë québedxa gucá'ana szren cuina' cheë da nigá dxuna'. ¹¹ ¿Bizr cheë na' dxennía' caní? ¿Naca na lawe' da quebe nazrí'ida' le'e? Nézqueze Dios nazrí'ida' le'e.

¹² Gúnqueza' ca dxuna' cheë quebe gata' lataj cheë benne' ca' dxelaca lazre' xulucá'ana szren cuine' lawe' da dxeléquene' dxelunë' zrin cáteze dxuntu' netu'. ¹³ Benne' caní zaj naque' gubáz quebe nasel-la Cristo. Dxelezí xë'e bënneache, ne dxululé'e cuine' ca gubáz cheë Cristo. ¹⁴ Quebe naca da nigá da xebánedxu lawe' da Satanásqueze dxulé'e cuina na ca tu gubáz cheë xabáa

zue' lu xel-la naxaní' chee Dios, ¹⁵ na' chee le na' dxululé'e cuine' ca benne' dxelún da xrlátaje. Benne' caní xelebíá xi'e ca ba naca chee benne' dxelún da caní.

Da guzaca Pablo lawe' da naque' gubáz chee Cristo

¹⁶ Xecha lasa dxapa' le'e, quebe nu benne' dxal-la' guéqueng' nadá xichaj lázrdawa'. Che ca'an dxéquele le'e, le gunna neda' lataj guchálajlena' le'e ca tu benne' nadá xichaj lázrdawe', chee gaca gucá'ana szren cuina'. ¹⁷ Quebe dxapa' le'e da nigá lu xel-la dxenná bea chee Xránadxu. Guchálaja' ca tu benne' nadá xichaj lázrdawe', nnia' tu da gucá'ana szren cuina'. ¹⁸ Lawe' da zaj zra' benne' zante dxulucá'ana szren cuine' lu da zaj naque' chee xezr la xu nigá, cá'anqueze neda' gucá'ana szren cuina'. ¹⁹ Lawe' da nácale'ele benne' sina dxuchaga laule du lázrele benne' zaj nadá xichaj lázrdawe'. ²⁰ Dxuchaga laule benne' ca' dxelexung' le'e ca benne' zaj nada'u, ne benne' ca' dxuluchíneng' le'e, ne benne' ca' dxelenná bé'eng' le'e, ne benne' ca' dxuluzúe' le'e chala'ala, ne benne' ca' dxelegape' xraga laule. ²¹ Láqueze dxedué'eda' dxennía' da nigá, quebe guca' benne' dxechugu lazre' chee guna' ca dxelún xezícadxa benne'. Na'a gaca' lazre' dxugu guna' caní.

Ba dxelechugu lazre' benne' xezícadxa dxulucá'ana szren cuine'.

Cá'anqueze neda' xechugu lazra' guna' na, láqueze naca tu da ca zeaje da dxennía'.

²² ¿Zaj naque' benne' hebreo?

Cá'anqueze neda' naca' benne' hebreo.

¿Zaj naque' benne' Israel? Cá'anqueze neda'.

¿Zaj naque' zri'ine zre sua Abraham? Cá'anqueze naca' neda'.

²³ ¿Zaj naque' wen zrin chee Cristo?

Nácadxa' neda' wen zrin chee' ca benne' ca', lácala dxuchálaja' ca tu benne' nadá xichaj lázrdawe' gate dxennía' da nigá.

Ba bendxa' zrin ca benne' ca'.

Ba buluzálajdxa bénneache neda' ca nu bzálaj benne' ca'.

Ba gulegu'udxa bénneache neda' lizre xia ca belung' chee benne' ca', na' zane' lásate ba guzúa' lu da štebe chee xel-la gute.

²⁴ Gazxu' lasa ba belúe benne' judío ca' neda' xide chennu dxua weaj.

²⁵ Chunna lasa beline' neda' xaga. Tu lasa belú'e neda' xiaj.

Chunna lasa guxaze da dxedá lawe' nísadau' da xu'a lu nisa.

Tu lasa, tu zra tu xela guxu'a lu nísadau'.

²⁶ Zane' lásate guxu'a neza, ne guzúa' lu da štebe:

Chee xegu ca', ne chee gubán ca'.

Chee benne' waláxr chia' ca', ne chee benne' zitu' ca'.

Guzúa' lu da štebe lu xezre, ne le'e xixre', ne lu nísadau', ne ládujla benne' wen lazre' dxelenné' zaj naque' bi bíchedxu.

²⁷ Benle'a zrin, ne guzúa' lu da zi' da xa'.

Zane' lásate quebe gusia' dxela.

Gudúnle'a, ne gubilele'eda', na' zane' lásate beña' gubasa.

Catite bexaga', ne bexáxrjeda' zra lana' gacua'.

²⁸ Da zrendxa ca da caní, ne xezícadxa da guzraca'.

Xúgutę zra dxéqueda' zi' lawe' da zua' gunne xue chee xúgutę cue' bi chee Cristo.

²⁹ Che nu benne' nate ni'a ne'e lu xel-la dxeajlí lazre' chee',

chá'anqueze neda' dxéqueda' nate ni'a ná'aqueza'.
Che nu benne' dxelune' dxeajchaze', néda'queze dxaca' tul-la.

³⁰ Che dxun na ba xen gucá'ana szren cuina',
gucá'ana szren cuina' chee da ca' dxululé'e na nate ni'a na'a.

³¹ Dios, Xra Xránadxu Jesucristo, Bénnea' naca chee' güe lá'anatequezdxu Lē', nézene' dxenní'a da li. ³² Gate guzúa' xezre Damasco, benne' wnná bea na' dxune' zrin chee wenna' bea Aretas bzre'e benne' dxuluxúe' dxa xu'u chee xezre na', chee xelexe' neda'. ³³ Na' bi bíchedxu ca' bululetje' neda' tu lu xcuite xia ga dxu'u lení' chee xu'u lu ze'e da naxechaj na xezre na'. Ca' guca na, gulá' lu na' benne' ca'.

12

Da ca' Dios blé'eng' Pablo

¹ Da li quebe dxal-la' gucá'ana szren cuina', san guchálaja' chee da ca' ble'e Xránadxu neda', ne da ca' ble'eda' ca naca chee'. ² Neda', ca tu benne' dxéajle chee Cristo, ba zeaj chidá' iza guché Dios neda' xabáa guxunne'. Quebe nezda' che guxá'a na' dutē bēla' dxen chia', u che cabí. Dios nézene'. ³ Nezda' néda'queza', che zua' lu bēla' dxen chia', u che cabí, quebe nezda', tuze Dios nézene'. ⁴ Guché Dios neda' tu xabáa chee', naga benda' dizra' bagache da quebe naca chee bénneache xelenné' ca zaj naca na. ⁵ Waca gucá'ana szrena' tu benne' caní, san quebe gucá'ana szren cuínaqueza', che quebe naca na chee xel-la nate ni'a na' chia'. ⁶ Láqueze che gaca lazra' gucá'ana szren cuina' quebe gaca na tu da xálaze, lawe' da gaca na tu da li. Quebe guna' na chee quebe nu guéquene' nácadxa' ca da gaca lé'eng' naca', u ca da gaca xenne' da dxenní'a'.

⁷ Da caní ble'e Xránadxu neda' gulaca na da xebánele'edxu, na' chee quebe gucá'ana szren cuina', guca chia' ca tu xeche' naxaze lu bēla' dxen chia' da dxuchine Satanás chee guzalaj na neda'. ⁸ Chunna lasa guta' xueda' Xránadxu gucuase' da dxezaca'. ⁹ Xránadxu guzre' neda': "Xela zri'i lazre' chia' naca na dutē da dxechínenu' lawe' da dxulé'edxa lau xel-la waca chia' nen benne' nate ni'a nē'e." Ca' naca, dxebeda' lawe' da nate ni'a na'a chee gulé'e lau lu bēla' dxen chia' xel-la waca chee Cristo. ¹⁰ Chee le na' dxebeda' ca naca xel-la nate ni'a na' chia', ne ca naca dizra' schanni' ca' dxelenná bénneache chia', ne ca naca da ca' dxexá'zrjeda', ne gate zaj nau zi' xuzre' bénneache neda', ne ca naca da ba xa' ca' da dxedéa' nē chee Cristo, lawe' da gate nátedxa ni'a na'a, dxéqueda' nácadxa' benne' wal-la.

Pablo dxe'e gunne xue chee bi chee Cristo zaj zre'e Corinto

¹¹ Guca' ca tu benne' nadá xichaj lázrdawe' gate bca'ana szren cuina' caní, san le'e beñle bēna' na. Le'e na' dxal-la' gucá'anale neda' szren lawe' da quebe zaca' látezdxca ca benne' gubáz zren ca', benne' ca' dxéajlele, láqueze quebe bi zaca' neda'. ¹² Zrin bēna' ládujla le'e lu dutē xel-la zren lazre' chia' ble'e na da li naca' gubáz chee Cristo nē chee da dxelunna bea na, ne xel-la waca ca' chee xabáa, ne da ca' dxexebánedxu. ¹³ ¿Dxéquele le'e nácale látezdxca blau ca xezícadxa cue' bi chee Cristo lawe' da guzú' lu na'a da belunne' chia', na' quebe guzú' lu na'a da zaj naca chee? Le gunite lau neda' che naca tu da calela quebe bēna' le'e lataj bi gúnnale chia'.

¹⁴ Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na chee. Quebe dxexílaja' da nápane, san lé'equeze, lawe' da dxal-la' xulucude xruze xrna' dumí da xulunézruje' zrí'ingē', ne quegá xulucude zrí'ingē' da xulunézrujbe' xra xrnabe'. ¹⁵ Du lazra' guchínedá' dumí chia' chee gaca

chawe' cheę bénne' du xu'ule, láqueze dxéqueda' gate nazri'idxeda' le'e, látezda nazri'ile le'e neda'.

¹⁶ Bal-la benne', láqueze zaj nézeng' quebe bi guzi' lu na'a da zaj naca na cheęle, dxelenné' gudel-la' le'e lu da wen lazre'. ¹⁷ ¿Guzi' xe'a le'e lu na' tu benne' gusel-la' cheęle? ¹⁸ Guta' xueda' Tito xidabe' xedajnná'abe' le'e, ne gusel-la' nen lebe' xetú bi bíchedxu. ¿Guzi' xe' Tito le'e? ¿Quebe bentu' tuze ca bentu' ládujla le'e neda', ne Tito, na' nen tuze Be' Lá'azxa?

¹⁹ Bi bicha' nazri'ite lazra', ¿dxéquele dxucá'ana cuínantu' xrlátaje laule le'e? Dxuchálajentu' le'e lau Dios, ne lu La Xránadxu Jesucristo. Xúgute' da caní dxennantu' cheę gúlale lu da naca cheę Dios. ²⁰ Dxezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dxezreba' dxedíl-lalele ljwézrele, ne nácale xa lazre', ne dxezrá'ale ljwézrele, ne nácale zide lazre', ne nácale wetupa dizra' bizruj, ne dxezí tízrale ljwézrele, ne dxucá'ana szren cuínale, ne dxunle da caleła. ²¹ Dxezreba' gate xida' xedajnná'a le'e, Dios guné' xedué'eda' ne cheęle le'e, da gucuezre na neda' ne cheę zánele le'e, benne' ca' dxelúntequeze' dul-la, ne quebe dxulusangé' dxeluné' da sban, ne da dxulucá'ana sban ljwezre', ne da caleła da tu dxelúnzqueze'.

13

Dizra' bzebe

¹ Da nigá naca na da guxunne' lasa xida' xedajnná'a le'e. Xúgute' dxulé'e lawe na naca na da li ne cheę dizra' cheę chupa u chunna benne' xelexechebe'. ² Benne' ca' beluné' dul-la nédxula, ne xúgutele le'e, dxácaté ne zua' zitu' naga zrale, dxuzenda' le'e da xula ca da gucha' le'e gate bedajnná'a le'e da gudxupe' lasa, che xida' xedajnná'a le'e da xula quebe gudéa' cá'aze ca da ba nunle. ³ Nadxa lé'ele da gulé'e na dxenné' Cristo lu dxu'a neda', na' Le' quebe nate ni'a ne'e lu da guné' cheęle, san naque' benne' wal-la ládujla le'e. ⁴ Da li gudé'e xaga béguaj ca tu benne' nate ni'a ne'e, san naca bané' ne cheę xel-la waca cheę Dios. Cá'anqueze netu' nate ni'a nantu' ca da guca cheę', san lawe' da nácantu' tuze nen Le' gaca bantu' ne cheę xel-la waca cheę Dios cheę guntu' zrin cheęle le'e.

⁵ Le guxúe xanne' cuínale cheę gueque be'ele che da li dxeajlí lázrele Cristo. Le guxúequeze cuínale. ¿Quebe dxeque be'ele zua Jesucristo xichaj lázrdaule, che da li dxeajlí lázrele Le'? ⁶ Dxebeza lazra' gueque be'ele quebe naca' neda' benne' wen lazre' lu da naca' cheę Cristo. ⁷ Dxenábantu' lau Dios cheę quebe bi da caleła gunle, quegá cheę gulé'entu' dxennantu' da li, san cheę gunle le'e da xrlátaje, láqueze dxéquele le'e quebe dxennantu' da li. ⁸ Quebe bi gaca guntu' da dxedábaga na da li, san tuze da dxácale na da li. ⁹ Cheę le' na' dxebentu' gate nate ni'a nantu', che le'e nácale benne' wal-la, na' nábaquezentu' Dios cheę gácale dutę da dxal-la' xelaca bi cheę Dios. ¹⁰ Dxuzúaja' cheęle da nigá nédxula ca xida' xedajnná'a le'e, cheę quebe gun na ba xen gate xida', gácale'a benne' snia ca guchíneda' xel-la dxenná' bea chia', da benna Xránadxu neda' cheę séqueda' gusegula' le'e lu da naca cheę Dios, ne quegá cheę guzrí xi'a le'e.

¹¹ Na'a, bi bicha', le sua xel-la dxebé. Le gaca dutę da dxal-la' xelaca bi cheę Dios. Le xue zren ljwézrele. Le gaca tuze tule xetule, ne le sua xel-la dxebeza zri lazre', na' Dios, Bénnea' dxunne' dxi'u xel-la dxebeza zri lazre',

ne nazrí'ine' dxi'u súalene' le'e. ¹² Le gugapa diuzre ljuwézrele tule xetule, ne le gunida ljuwézrele. ¹³ Xúgute bi bíchedxu, bi chee Cristo dxulugape' le'e diuzre.

¹⁴ Dxaca lazra' gucá'ana Xránadxu Jesucristo le'e chawe', ne zri'i Dios le'e, ne sua tuze Be' Lá'azxa nen le'e. ¡Ca'an gaca na!

DIZRA' BZUAJ SAN PABLO CHEE BI CHEE CRISTO ZAJ ZRE'E XEZR LA XU GALACIA

Dizra' da bzuaj Pablo chee bi chee Cristo zaj zre'e xezr la xu Galacia

¹ Neda', Pablo, naca' gubáz chee Cristo. Quebe gulesel-la bènneache neda', ne quegá buluzúa bènneache neda' gaca' gubáz. Caní bènqueze Jesucristo chia', ne Xradxu Dios, Bénnea' bsebane' Jesús ládujla benne' gate. ² Xúgute benne' bíchedxu zrálene' neda' zaj naque' neda' tuze. Neda' dxuzúaja' dizra' nigá chee xúgute cue' benne' bíchedxu zaj zre'e xezre ca' zaj nnita' xezr la xu Galacia. ³ Dxenaba' lau Xradxu Dios, ne lau Xránadxu Jesucristo gun chawe'e le'e, ne gunné' le'e xel-la dxebeza zri lazre'. ⁴ Jesucristo bzane cuine' chee gutie' ne chee dul-la da nabágadxu, chee bselé' dxi'u lu da naca chee xezr la xu nigá da naca na da caléla. Bène' da guca lazre' Xradxu Dios. ⁵ ¡Gaca báqueze Dios chadía chacanna! ¡Ca'an gaca na!

Quebe de xetú dizra' chawe' chee Dios

⁶ Dxexebánele'eda' chee le'e lawe' da dxebéaj xíchajte Dios, Bénnea' gunné' le'e chee si' lu na'le da dxunna Cristo, na' dxezi' lu na'le tu dizra' nazrala ca naca dizra' chawe' chee Cristo. ⁷ Da li quebe bi de xetú dizra' chawe', san zaj zra' bal-la benne' dxelún zréajene' le'e, ne dxelaca lazre' xuluchuque' dizra' chawe' chee Cristo. ⁸ Che nu benne' dxuzenne' le'e xetú dizra' da nazrala ca naca dizra' chawe' da ba bzénentu' le'e, dxenaba' lau Dios cue'e bènnea' de', lácala naca neda', u naca tu gubáz chee xabáa. ⁹ Báchequeze bzenda' le'e, ne dxuzenda' le'e da xula, che nu benne' guzenne' le'e tu dizra' da nazrala ca naca dizra' chawe' da ba guzi' lu na'le, dxenaba' lau Dios cue'e bènnea' de'.

¹⁰ Gate dxennia' da nigá, ¿Dxaca lazra' xegá'ana' xrlátaje lau bènneache, u che lau Dios? ¿Dxaca lazra' guna' da xelezaca ba lazre' bènneache? Che ca'an dxaca lazra' guna' da dxelezaca ba lazre' bènneache, quebe naca' wen zrin chee Cristo.

Ca bexaca Pablo gubáz chee Cristo

¹¹ Dxuzéajni'ida' le'e, bi bicha', dizra' chawe' da dxuzenda' bènneache, na' quebe naca na tu da gulaj na lu xichaj lázrdau bènneache. ¹² Quebe nu benne' benne' na neda', ne quegá nu benne' bsédene' neda' le' na, san Léqueze Jesucristo bzenne' na neda'.

¹³ Ba bènqueze ca bəna' neda' nédxula gate na' nazí' lu na'a xel-la benne' xudau' chee judío ca', ca gudáu zi' xuzra' bi chee Dios zaj nácabe' bi chee Cristo, ne ben zi' lazra' guzríia xi'a-be'. ¹⁴ Lu xel-la benne' xudau' chee judío ca', neda' ba bzrué'edxeda' ca xúgute bi walázi' chia', bi ljwezra' ca', lawe' da be' lázredxa' gapa' ca da xjácale xra xrtawa' ca'. ¹⁵ Dios guqu'e' neda' nédxula gate za gálaja', na' lu xel-la zri'i lazre' chee' gunné' neda'. Nadxa gate guca lazre' Le', ¹⁶ blé'ene' neda' Zrí'ine', chee guzenda' benne' ca' quebe zaj naque' judío ca naca chee Zrí'ine'. Gate guca da nigá, quebe nu benne' gunábeda', ¹⁷ ne quebe guxá'a Jerusalén cheajnábeda' benne' zaj naque' gubáz chee Cristo nédxudxa ca neda'. Guxá'a naga nababa xezr la xu Arabia, na' gudé na' bezrina' xezre Damasco.

18 Gudé chun iza guxá'a Jerusalén, chee xeajchálajlëna' Pedro, na' begá'analeña' le' xta' gubizra. 19 Quebe nu ble'eda' xetú benne' gubáz chee Cristo, san tuze Jacobo, bi biche Xránadxu. 20 Ne chee La Dios dxapa' le'e, da li naca da nigá dxuzúaja' cheele le'e.

21 Ca gudé na' guxá'a xezre ca' zaj nababa xezr la xu Siria, ne xezre ca' zaj nababa xezr la xu Cilicia. 22 Benne' bíchedxu ca', bi chee Cristo zaj zre'e xezr la xu Judea quebe zaj nunbe'e neda'. 23 Belénzene' nu dxenná: "Bénnea' nédxula gudáu zi' xuzre' dxi'u, na'a dxuchálaje' dizra' chawe' chee xel-la dxejlí lazre' Cristo, da na' guca lazre' guzríá xi'e nédxute." 24 Na'a dxelúe lá'ane' Dios ca da belenne' ca naca chia'.

2

Benne' gubáz ca' dxelezi' lu ne'e Pablo

1 Ca gudé chidá' iza guxá'a xecha lasa Jerusalén nen Bernabé, na' ben bi Tito neda' tu zren. 2 Guxá'a na' lawe' da ble'e Dios neda' dxal-la' cha'a na'. Na' cheézela bchálajlëna' benne' ca' zaj naque' blau ládujla bi chee Cristo, ne bzenda' le' dizra' chawe' da dxuchálaja' ládujla benne' ca' quebe zaj naque' judío. Bëna' caní chee nezda' quebe guca dácheze zrin da ba bëna', ne da dxuna'. 3 Gulezi' lu ne'e zrin nuna', na' quebe nu gunná be'e Tito, bi zálebe' neda', chugu lu bëla' cheebe' da gulé'e na nácabe' bi chee Dios, lácala quebe nácabe' judío. 4 Bal-la benne' quebe zaj naque' du lazre' benne' bíchedxu, benne' gulu'e ládujla dxi'u lu da wen lazre', gulaca lazre' chugu da gulé'e na lu bëla' chee Tito. Benne' caní gulu'e ládujla dxi'u chee xelenézene' ájala xelegúe' lataj da nazidxu lu na' Jesucristo, chee xuluxuzúe' dxi'u ca benne' zaj nada' lu lu da bdxixruj bea Moisés. 5 Ne chíteze quebe bentu' le' lataj xelegú'u xel-le' netu' lawe' da guca lázrentu' xegá'anale le'e da li dizra' chawe' chee Cristo.

6 Benne' ca' zaj naque' blau quebe bi da cube bulusebague' netu'. Da zaj naque' quebe bi naca na chia' lawe' da quebe xuchí'a Dios ca da nalá' láweze chee bënneache. 7 Quebe bi bulusebague' neda', lawe' da belexúnbe'e Diósqueze bsebage' neda' guzenda' benne' ca' quebe zaj naque' judío dizra' chawe', cáteze bsebage' Pedro guzenne' benne' judío ca' dizra' chawe'. 8 Léqueze Dios na', Bénnea' bzue' Pedro gubáz chee' ládujla benne' judío ca', cá'anqueze bzue' neda' gaca' gubáz chee' ládujla benne' quebe zaj naque' judío.

9 Chee le' na', Jacobo, ne Pedro, ne Juan, benne' zaj naque' blaudxa, belexúnbe'e ben Dios neda' culuén nigá, na' gulezi' lu ne'e neda', ne Bernabé, na' beluné' tuze dizra' cheajzentu' netu' benne' ca' quebe zaj naque' judío dizra' chawe', dxácaté na' le' xuluzenne' na benne' judío ca'. 10 Túteze da gulenábene' netu' xexache lázrentu' benne' xache' ca', da na' dxue lazra' dxuna'.

Pablo dxedil-le' Pedro lu xezre Antioquia

11 Gate bla' Pedro xezre Antioquia gudil-la' le' caníqueze lawe' da gunegue lazre'. 12 Nédxute gudágulëne' benne' ca' quebe zaj naque' judío cadxa belélá' bal-la benne' gusel-la Jacobo. Nadxa bebigue'e chalá'ala, ne bsane' québedxa gudágulëne' benne' ca' lawe' da bzrebé' judío ca', benne' ca' zaj nadxugu lu bëla' chee' da dxulé'e na. 13 Nadxa xezícadxa judío ca' zaj naque' bi chee Cristo beluné' tu zren Pedro lu da dxune' láweze. Caní beluné', na' ca' bente Bernabé tu zren benne' ca' lu da na' dxeluné' láweze. 14 Gate ble'eda' neda' quebe dxeluné' cáteze naca chee da li chee dizra' chawe' chee Cristo, na' gucha' Pedro lau xúguté benne' ca': Lue' nacu' judío, na' benu' ca tu benne' quebe

naque' judío, ne quebe be'nu' ca tu benne' judío. ¿Bizr chee' na' dxenná be'enu' benne' quebe zaj naque' judío xeluné' ca dxelún benne' judío?

Benne' judío xelexé' che dxeajlí lazre' Cristo ca dxaca chee' xezícadxá benne'

¹⁵ Cá'anqueze gucha'-ne': Dxi'u nácadxu benne' judío lawe' da nálajdxu ca', ne quebe nácadxu benne' dul-la ca benne' zaj nababa xezícadxá xezr la xu ca'. ¹⁶ Nézedxu netú benne' quebe xegá'ané' xrlátaje lau Dios lawe' da nune' da bdxixruj be'e Moisés, san tuze che dxeajlí lazre' Jesucristo. Chee' le' na' cá'anqueze dxi'u dxeajlí lázredxu Cristo chee' xegá'anadxu xrlátaje lau Dios ne chee' xel-la dxeajlí lazre' cheedxu Cristo, ne quegá lawe' da bendxu ca nadxixruj bea na. Netú benne' quebe xegá'ané' xrlátaje lau Dios lawe' da nune' da nadxixruj bea na.

¹⁷ Na'a, che dxi'u dxuxrén lázredxu nagá'anadxu xrlátaje lau Dios ne chee' Cristo, ne che zua da dxulé'e na ne nácadxu benne' dul-la, ¿nnadxu Cristo dxunne' dxi'u lataj gundxu dul-la lawe' da québedxa dxenná be'e da bdxixruj be'e Moisés dxi'u? ¡Cabata! ¹⁸ Che dxuchínajá' tu, na' che te na' xexuna' na, na' nabaga' zria. ¹⁹ Ba naca' ca tu benne' gate lu da naca chee' da nadxixruj bea na. Da nadxixruj béaqueze ble'e na neda' naca' ca tu benne' gate, chee' gaca bana' ne chee' da nun Dios. ²⁰ Ba naca' ca tu benne' gate lawe' da naca chia' ca naca chee' tu benne' gudá' xaga béguaj tu zren nen Cristo. Chee' le' na', québedxa naca bana' neda'. Cristo naca bane' lu xichaj lázrdawa'. Xel-la nabán da napa' lu belá' dxen chia', napa' na ne chee' xel-la dxeajlí lazre' chia' Zri'ine Dios, Bénnea' bzri'iné' neda', ne bzane cuine', gutie' waláz chia' neda'. ²¹ Quebe dxaca lazra' guzúa' chalá'ala xel-la zri'i lazre' chee' Dios. Che nu benne' gaca xegá'ané' xrlátaje lau Dios lawe' da nune' da nadxixruj bea na, na' dácheze guca da ben Cristo gate gutie'.

3

Dxezidxu Be' Lá'azxa ne chee' xel-la dxeajlí lazre'

¹ Bi bicha', zrale Galacia, nácale le'e benne' xala ca'. ¿Zua nu benne' dxezi xe'e le'e chee' québedxa guzúale dizra' chee' da li? Ba blé'entu' le'e caníqueze Jesucristo, ca gudé'e le'e xaga béguaj. ² Le xexque neda': ¿Guzile Be' Lá'azxa lawe' da benle da bdxixruj be'e Moisés, u lawe' da guxéajlele chee' da bénnele?

³ ¿Ájala chee' na' nácale benne' xala? ¿Dxéquele gunle gácale duté da na' guzú laule gácale ne chee' Be' Lá'azxa? ⁴ ¿Dácheze gudele záneté xel-la zi' ca'? Dxaca lazra' quebe guca na níteze. ⁵ Gate Dios dxunne' le'e Be' Lá'azxa chee', ne dxuné' xel-la waca ca' chee' xabáa ládujla le'e, ¿dxuné' na lawe' da dxunle ca nadxixruj bea na, u lawe' da guxéajlele chee' dizra' chawe' da bénnele?

⁶ Abraham guxeajlí lazre' Dios, na' Dios guzi' lu ne'e da nigá ca tu da bca'ana le' xlátaje. ⁷ Chee' le' na' dxal-la' nézele, benne' ca' da li zaj naque' zri'ine zre sua Abraham zaj naque' benne' dxeajlí lazre' Dios. ⁸ Naxúaj na lu dizra' lá'azxa ca naca da nigá. Lawe' da neze Dios nédxuté gucá'ané' xlátaje benne' quebe zaj naque' judío, benne' xelexé' lazre' Le', na' guzre' Abraham nédxuté dizra' chawe' nigá, gunné': "Gaca chawe' chee' benne' duté xezr la xu ne' chiu' lue'." ⁹ Ca'an naca, dxaca chawe' chee' benne' dxeajlí lazre' Dios tu zren nen Abraham, bénnea' guxeajlí lazre' Dios.

¹⁰ Benne' ca' dxuluxrén lazre' zaj nagá'ané' xrlátaje lau Dios lawe' da zaj nune' ca da nadxixruj be'e Moisés zaj xu'e de' lawe' da naxúaj lu dizra' lá'azxa da dxenná na: Zaj xu'u de' xúguté benne' quebe dxelúnqueze' xúguté

da nadxixruj bea na, da na' naxúaj na lu xiche lá'azxa. ¹¹ Dxunna bea na netú benne' quebe xegá'ang' xrlátaje lau Dios lawe' da nune' da nadxixruj bea na lawe' da naxúaj lu xiche lá'azxa da dxenná na: Bénnea' nagá'ang' xrlátaje lau Dios gata' chee' xel-la nabán li lazre' che dxeajlí lazre' Dios. ¹² Bénnea' dxune' ca bdxixruj be'e Moisés quebe dxune' na ne chee xel-la dxeajlí lazre' chee' lawe' da naxúaj da dxenná na: Benne' dxune' xúgute da caní gaca bane' ne chee le na.

¹³ Cristo bselé' dxi'u lu de' da xu'u nu quebe dxun da nadxixruj bea na lawe' da guxú'queze' de' waláz cheedxu cáteze naxúaj lu dizra' lá'azxa da dxenná na: Xu'u de' bennea' de'e le'e xaga. ¹⁴ Da nigá guca na chee gaca gun Dios xrlátaje benne' ca' quebe zaj naque' benne' judío, da na' guchebe lazre' guné' lau Abraham ne chee Jesucristo, na' chee si' lu nnadxu xúgutedxu Be' Lá'azxa ne chee xel-la dxeajlí lazre' cheedxu ca da guchebe lazre' Dios.

Da naca chee da nadxixruj bea na, ne da naca chee da guchebe lazre' Dios

¹⁵ Bi bicha', dxulé'eda' le'e ca da dxaca chee bénneache. Gate tu benne' dxune' tu xel-la wezria, ne ba bzuajte' láqueze' lawe na, netú benne' quebe gaca guchinnaje' na, ne quebe bi gaca gudé'e chee na. ¹⁶ Dios guchebe lazre' da guné' chee Abraham, ne chee zri'ine zre sue'. Quebe dxenná na: Chee zri'ine zre sue' ca', da naca na chee benne' zan, san dxenná na: Chee zri'ine zre su', da naca na chee tuze benne', bénnea' naque' Cristo. ¹⁷ Da dxennia' naca na da nigá: Dios bene' tu xel-la wezria nen Abraham, ne bca'ana chawe' na. Chee le' na', da bdxixruj be'e Moisés da bla' na ca gudé tapa gaxúa chi dxua iza quebe gaca guchinnaj na xel-la wezria na', u xucá'ana na dácheze da guchebe lazre' Dios. ¹⁸ Che dxezidxu da dxunna Dios che dxundxu ca da bdxixruj be'e Moisés, quebe naca na tu da nachebe lazre' Dios, san da li Dios guchebe lazre' gunézruje' na cá'aze chee Abraham.

¹⁹ Na'a xca', ¿bizra dxun da bdxixruj be'e Moisés? Dios bnézruje' da na' gudé na' chee gulé'e na ca naca xtul-la bénneache cadxa xelá' zri'ine zre sua Abraham na'. Bénnea' guchebe lazre' Dios guné' da xrlátaje chee'. Dios gusel-le' da gunná bé'eng' lu na' gubáz chee xabáa chee', na' Moisés guque' benne' dxudé dizra' cheen. ²⁰ Quebe dxun na ba xen nu benne' gudé dizra' gate naca na chee tuze benne', na' Dios naque' tuze, Bénnea' guchebe lazre' chee Abraham ca da guné'.

Da dxun da bdxixruj be'e Moisés

²¹ ¿Nnadxu dxedábaga da bdxixruj be'e Moisés da na' guchebe lazre' Dios? ¡Cabata! Che da nadxixruj bea na da bnezruj Dios gaca gunna na xel-la nabán chee bénneache, na' gaca xegá'ana xrlátaje lau Dios tu benne' che guné' ca da nadxixruj bea na na'. ²² Dxenná na lu dizra' lá'azxa, xúgute bénneache zaj nabague' dul-la chee gaca xelezi' lu ne'e da guchebe lazre' Dios gunné' benne' ca' xeleajlí lazre' Jesucristo.

²³ Nédxudxa ca bzin zra gaca nu cheajlí lazre' Cristo, ne chee da nadxixruj bea na, xúgutedxu, benne' judío, gúcadxu ca benne' zaj xu'e lizre xia, lawe' da xadíaze bendxu ca dxenná da nadxixruj bea na, na' gulézadxu ca bzin zra guca cheajlí lázredxu Cristo. ²⁴ Da nadxixruj bea na gunná be'e na dxi'u, ca dxun tu benne' dxusegule' bidau' chee benne' xula cadxa bzin zra bla' Cristo, chee xegá'anadxu xrlátaje lau Dios gate guxeajlí lázredxu Cristo. ²⁵ Na'a lawe' da ba bzin zra gaca cheajlí lázredxu Cristo, québedxa xú'udxu lu na' da nadxixruj bea na da naca na cheedxu ca tu benne' dxusegule' bidau'.

²⁶ Xúgutele na' dxeajlí lázrele Jesucristo nácale tuze nen Le'. Chee le na' nácale bi chee Dios. ²⁷ Xúgutele le'e na' gudxúale nisa chee gácale tuze nen Cristo, Le' naque' cheele ca tu ladxe' nácule. ²⁸ Québedxa dxel'é Dios le'e ca benne' judío, u benne' quebe naque' judío, u ca benne' nada'u, u benne' quebe nada'u, u ca benne' biu, u nu'ula. Dxel'é'eng' le'e, naca xúgutele ca tuze bel-la' dxen lawe' da nácale tuze nen Jesucristo. ²⁹ Che nácale bi chee Cristo, da li nácale zre sua Abraham, na' gaca cheele da guchebe lazre' Dios gun'e'.

4

¹ Da dxaca lazra' nnia' naca na da nigá: Dxácatę ne naca bidau' bi na' gaca cheebe' da naca chee xrabe', nácab'e' ca bi nada'u xu'ube' lu na' xránabe', lácala da li gácab'e' xrane xúgute da de lizre xrabe'. ² Xu'ube' lu na' benne' dxulusédene'-be', ne lu na' benne' ca' xu'u lu ne'e da naca cheebe', cadxa zrin zra gul'é xrabe' da li nácab'e' zrí'ine'. ³ Cá'anqueze dxaca cheedxu. Gate ne nácadxu ca bidau', xú'udxu lu na' xúgute da dxelenná bea na lu xęzr la xu nigá. ⁴ Gate bzrin zra ba ble'e lau Dios, na' gusel-le' Zrí'ine', gúlajbe' ne chee tu nu'ula, na' guxú'e lu na' da bdxixruj be'e Moisés. ⁵ Ble'e bselé' benne' zaj xu'e lu na' da nadxixruj bea na, chee gaca si' lu na' Dios dxi'u ca zrí'inequeze'. ⁶ Lawe' da ba nácale bi chee Dios, Le' gusel-le' Be' Lá'azxa chee Zrí'ine' lu xichaj lázrdaule, na' dxenná Be' na': "Abba", da zéaję na: Xrae. ⁷ Ca'an naca, ba nácadxu bi chee Dios, ne québedxa nácadxu ca benne' zaj nada'u lu na' da bdxixruj be'e Moisés. Na' lawe' da nácadxu bi chee', Dios gunne' dxi'u da de cheen'. Caní naca lawe' da nácadxu Cristo tuze.

Pablo dxe'e gunne xue chee bi ca' chee Cristo

⁸ Da líqueze, gate quebe ne gúnbeale Dios, gúcale benne' zaj nada'u chee dios ca', da' quebe zaj nácaqueze dios. ⁹ Na'a gate ba núnbeale Dios, u nnadxu, Dios na' núnbe'e le'e, ¿ájazra gunle xexú'ule xecha lasa lu na' da dxelenná bea na lu xęzr la xu nigá, da ca' quebe zaj zaca? ¹⁰ Le'e ne dxapa ba lá'anale bal-la zra ca', ne bal-la beu' ca', ne tu tu iza ca'. ¹¹ Dxezrébel'e'a bęna' zrin níteze ládujla le'e gate bzenda' le'e dizra' chawe' chee Cristo.

¹² Bi bícha'dau', dxata' xúeda' le'e gácale ca naca' neda', québedxa xu'a lu na' da nadxixruj bea na, lawe' da gúcaqueza' neda' ca nácale le'e. Quegá bi da calęla bęnle chia' neda'. ¹³ Ba nézqueze gate nédxudau' bzenda' le'e dizra' chawe' chee Cristo. Guca na gate na' guxu'a tu xízrawe'. ¹⁴ Xízrawe' na' guca na da gusegute na le'e, san le'e quebe begútele neda', ne quebe bzúale neda' chalá'ala, san guzi' lu na'le neda' ca tu gubáz chee xabáa chee Dios, u ca nácaqueza' Jesucristo. ¹⁵ ¿Bizra guca chee xel-la dxebe' da guzúale? Waca nnia' tu da xecá'ana le'e chawe', la naca da guzéquele gunle, bebéajęle xiaj láuquezele, chee gúnnae na neda'. ¹⁶ Na'a, ¿bexaca' ca tu benne' dxecuídene' le'e lawe' da guchá' le'e da li?

¹⁷ Benne' ca' dxelaca lazre' chugu lu belá' cheele da na' dxul'é na, dxe'e gunne xue cheele le'e, san quegá chee xegá'anale chawe'. Da dxelaca lazre' naca na xulcuase' le'e nen netu' chee cuele gunne xue chee le'. ¹⁸ Naca chawe' cuedxu gunne xue chee benne' xula chee xegá'ang' chawe', ne quegaze gate zúalęna' le'e. ¹⁹ Zrí'ina'dau', naca chia' ca zua' lu xel-la dxudía ne cheele ca dxaca chee tu nu'ula ba zua sanę' bidau', ne wabédxequeza' gunne xue cheele cadxa gul'é lau da li dxenná bea Cristo lu xichaj lázrdaule. ²⁰ Dxezé lazra' súałęna' le'e ná'aqueze chee gaca guchálajłęna' le'e xezícadxa dizra' lawe' da dxezi'ale'a gunne xue.

Da dxusede dxi'u ca guca cheę Sara, ne cheę Agar

²¹ Le'e na', dxaca lázrele chu'ule lu na' da bdxixruj be'e Moisés, le xechébxque da nigá: ¿Quebe ne xénnele ca dxenná da nadxixruj bea na? ²² Dxenná na gulezrá' chupa zri'ine Abraham. Tube' gúcabe' zri'ine zru'ulaqueze', nu'ula quebe nada'u. ²³ Zri'ine nu'ula nada'u gúlajbe' cáteze dxelalaj xúgute' bidau', na' zri'ine nu'ula quebe nada'u gúlajbe' cheę guca li ca da guchebe lazre' Dios. ²⁴ Da nigá naca na ca tu da dxulé'e na. Dxúpatę nu'ula caní dxululé'ene' ca zaj naca chupa xel-la wezrí'a. Tu xel-la wezrí'a nigá naca na da bnezruj Dios Moisés lu xi'a Sinaí, da na' dxulé'e Agar. Benne' ca' zaj xu'e lu na' xel-la wezrí'a nigá dxelálaje' ca benne' zaj nada'u. ²⁵ Cá'anqueze dxulé'e Agar da naca cheę xi'a Sinaí da zua na ga nababa Arabia, Cá'anqueze xi'a nigá dxulé'e na ca naca Jerusalén lu zra na'a zra lawe' da zaj naca benne' cheę xezre nigá ca benne' zaj nada'u tu zren nen zrí'ine' ca'. ²⁶ Benne' zaj nababe' Jerusalén cheę xabáa quebe zaj naque' benne' zaj nada'u, na' dxi'u nácadxu ca zri'ine benne' ca'. ²⁷ Lu dizra' lá'azxa, naxúaj na ca naca cheę benne' zaj nababa Jerusalén cheę xabáa na', da dxenná na:

Gubé lue', nu'ula wizre, lue' quebe nu chilá' zri'inu'.

Gudxezre xa'a lu xel-la dxebé, lue' quebe núnbe'u xel-la dxudía

cheę xel-la dxezán bidau'.

Nu'ula quebe guzán bidau' gate guque' cuide' waxandxa zrí'ine'

quézcala zri'ine nu'ula zúalęne' benne' cheę'.

²⁸ Le'e, bi bicha'dau', nácadxu ca Isaac. Nácadxu zri'ine Abraham, bi ca' guchebe lazre' Dios gunézruje' le'. ²⁹ Na'a ca guca lu zra na', Ismael, zri'ine Abraham na', bi gúlajbe' ca dxelalaj xúgute' bidau', gudáu zi' xúzrebe' Isaac, zri'ine Abraham na', bi gúlajbe' ne cheę Be' cheę Dios, cá'anqueze dxaca na na'a. ³⁰ Na'a ¿bizra dxenná dizra' lá'azxa? Dxenná na: Bebéaj chalá'ala nu'ula nada'u tu zren nen zrí'ine' lawe' da quebe gaca cheę zri'ine nu'ula nada'u sibe' da dxal-la' si' zri'ine nu'ula quebe nada'u. ³¹ Ca' naca na, bi bicha', quebe nácadxu ca Ismael, zri'ine nu'ula nada'u, san nácadxu ca Isaac, zri'ine zru'ula Abraham, nu'ula quebe nada'u.

5

Le sua chuchu lu xel-la weselá

¹ Cristo bselé' dxi'u lu na' da nadxixruj bea na cheę gácadxu ca benne' quebe zaj nada'u. Le sua chuchu lu xel-la weselá da ba guzile, ne québedxa xexú'ule lu na' da na' dxun na le'e benne' zaj nada'u.

² Le xene da dxapa' le'e. Neda', Pablo, dxapa' le'e, che güele lataj chugu lu belá' cheęle da na' dxulé'e na, quebe bi da ba neza gaca cheęle da naca cheę Cristo. ³ Dxaca lazra' xapa' le'e xecha lasa, che nu benne' chugu lu belá' cheę' da na' dxulé'e na, dxun na ba xen gun bénnea' xúgute' da bdxixruj be'e Moisés.

⁴ Le'e na' dxéquele nagá'anale xrlátaje lau Dios lawe' da nunle ca nadxixruj bea na, ba bcá'anale da naca cheę Cristo, ne dxexebéaj cuínale lu xel-la zri'i lazre' cheę Dios. ⁵ Dxi'u, ne cheę Be' Lá'azxa, ne lawe' da dxeajlí lázredxu Cristo, dxuxrén lázredxu nagá'anadxu xrlátaje lau Dios. ⁶ Che nácadxu tuze nen Cristo, quebe bi da ba neza gaca na cheędxu che chugu lu belá' cheędxu da na' dxulé'e na, u che quebe chugu na. Da ba neza naca na cheędxu che dxeajlí lázredxu Cristo, na' xel-la dxeajlí lazre' cheędxu dxuzúa na dxi'u lu xel-la zri'i lazre'.

⁷ Da xrlátaje bēnquezele. ¿Nuzra gulú'u xel-la le'e chee québedxa guzúale dizra' da li? ⁸ Quegá Dios bene' da na'. Nácaqueze Le' Bénnea' bláwizre' le'e. ⁹ Quebe gal-la lázrele da dxenná na: Láteze cua zichaj dxuchazra na ca naca cua. ¹⁰ Dxuxrén lazra' Xránadxu ca naca chee le'e, quebe guzúale chalá'ala da nigá dxuchálaja'. Dios gudé' lu da ba xa' bēnnea' dxun zréajene' le'e, nüteteze naque'.

¹¹ Da naca chia', bi bicha', la xapa' neda' bēnmeache dxal-la' chugu lu belá' chee' da na' dxulé'e na, quegá weláu zi' xuzre benne' judío neda' lawe' da che dxuna' da caní quebe xelaque' tula che cu'a lban chee xaga béguaj chee Cristo. ¹² Na'a ca naca chee benne' ca', benne' dxelún zréajene' le'e, ne dxelenné' dxal-la' chugu lu belá' chee da na' dxulé'e na, dxaca lazra' chugu ca da zaj naca benne' ca' chee québedxa xelún zréajene' le'e.

¹³ Bi bicha'dau', Dios bláwizre' le'e chee gácale benne' quebe zaj nada'u, ne québedxa xu'ule lu na' da bdxixruj be'e Moisés. Quebe guchínele da nácale chee gunle ca da dxezá lázrele. Le gun cuínale ca benne' zaj nada'u, chee gunle zrin chee le sa' ljwézrele tule xetule lu xel-la zri'i lazre' chee. ¹⁴ Xúguté da nadxixruj bea na dxun bēnnea' dxuzúe' dizra' da na' dxenná na: Bzri'i le sa' ljwezru' cáteze nazri'i cuinu'. ¹⁵ Che dxunle ca dxelún be xixre' ca', ne dxun zi' ljwézrele, ne dxasa ljwézrele tule xetule, le guxúe ga guzrí'a xi' cuínale.

Da dxundxu cáteze dxezá lazre' belá' dxen cheedxu, ne da dxundxu cáteze dxezá lazre' Be' Lá'azxa

¹⁶ Da nigá dxapa' le'e: Le gun cáteze dxulé'e Be' Lá'azxa le'e, na' quebe gunle cáteze dxezá lazre' belá' dxen chee. ¹⁷ Da dxezá lazre' belá' dxen cheedxu dxedíl-lalę na da dxezá lazre' Be' Lá'azxa, na' da dxezá lazre' Be' Lá'azxa dxedíl-lalę na da dxezá lazre' belá' dxen cheedxu. Dxúpatę da caní dxeledíl-lalę ljwezre na, na' chee le na' quebe gaca gunle da dxaca lázrele gunle. ¹⁸ Che dxunle ca da dxulé'e Be' Lá'azxa le'e, québedxa xu'ule lu na' da nadxixruj bea na.

¹⁹ Zaj nulé'e láuqueze da dxelún benne' ca' dxelunę' cáteze da dxezá lazre' belá' dxen chee':

Deledálęne' nu'ula xula.

Dulucá'ana dítaję le sa' ljwezre'

Dxelunę' da sban, ne da schanni'.

²⁰ Dxelúe szrene' bedau' xiaj xaga, ne dxelunę' xel-la wazrá'.

Dxelecuídenę' le sa' ljwezre', ne dxelezzré'ę.

Dxelaque' wide', ne dxelezzrá'a xíchaje'.

Dxelenné' chee ljwezre'.

Dxelebėj xichaj ljwezre' tuę' xetuę', ne dxelaque' chupa la'a.

²¹ Dxelaque' xa lazre', ne dxelutie' benne'.

Dxeleúzrene', ne dxeledanne' da calęla da dxelunę' lu laní ca'.

Zánete da dxelundxę' bi chee da caní. Che le na' dxapa' le'e ca bēnqueza' nédxute, benne' dxelunę' da caní quebe xelexú'ę naga dxenná bea Dios.

²² Da dxelún benne' ca' dxelunę' cáteze da dxulé'e Be' Lá'azxa le' zaj naca na caní:

Zaj nazri'ine' le sa' ljwezre', ne zaj nape' xel-la dxebé.

Dxebeza zri lazre', ne zaj naque' zren lazre'.

Zaj naque' zri'i lazre', ne dxelunę' da zri'a chawe'.

Zaj naque' li lazre'.

²³ Zaj naque' dxexruj lazre', ne dxelenná be'e cuine'.

Quebe de da nadxixruj bea na da dxę na dxi'u quebe gundxu da caní. ²⁴ Benne' ca' zaj naque' bi cheę Cristo ba buludé'e le'e xaga béguaj bęla' dxen cheę nen xúgute da dxezá lazre na. ²⁵ Che naca bandxu ne cheę Be' Lá'azxa, dxal-la' gundxu ca da dxulé'e Be' Lá'azxa dxi'u.

²⁶ Quebe dxal-la' gucá'ana szren cuínadxu, ne quebe gácadxu wide' tudxu xetudxu, ne quebe sua da xa lazre' ládujla dxi'u.

6

Le gácale le sa' ljwézrele tule xetule

¹ Bi bícha'dau', che nu benne' ládujla le'e nune' dul-la, le'e na' dxedálele Be' Lá'azxa dxal-la' gácalele bénnea' cheę xezé chúchue'. Dخال-la' gácale dxexruj lazre' gunle da nigá cheę quebe güele lataj da xriwe' cu'u xel-la na le'e. ² Le gácale le sa' ljwézrele tule xetule lu da naca xua cheele, na' caní gunle ca nadxixruj be'e Cristo.

³ Che nu benne' dxéquene' naque' benne' blau, ne quebe nu naque', dxezi xézqueze cuine'. ⁴ Tu tu benne' dxal-la' na' xánnie' da dxúnqueze', na' che nagá'ana xrlátaje da dxune', waca xape' ba lá'ana da dxúnqueze', ne quegá da ben xetú benne'. ⁵ De tu xua da nabágadxu cheę Cristo, da dxal-la' gua tu tu benne'.

⁶ Benne' zua nu dxusede le' ca naca xrtizra Dios dxal-la' gunézruje' late' da naca cheę cheę bénnea'.

⁷ Quebe si xe cuínale: Netú benne' gaca quítajlene' Dios. Da dxaza bénneache, léqueze na xelape'. ⁸ Che dxune' da dxezá lazre' bęla' dxen cheę', da xezi'e naca na xel-la gute, na' che dxune' da dxezá lazre' Be' Lá'azxa, da xezi'e naca na xel-la nabán zeajlí canna. ⁹ Ca' nacan xca', quebe gusandxu gundxu da xrlátaje lawe' da che quebe gate lazrdxu, lu zra na' quizruj Dios dxi'u, na' xezidxu lazruj cheędxu. ¹⁰ Cheę le na', gate nazidxu lataj, dxal-la' gundxu da xrlátaje cheę le sa' ljwézredxu, ne da dxundxa na ba xen, gundxu da xrlátaje cheę le sa' ljwézredxu dxeleajlí lazre' Cristo.

Da bzuaj Pablo nen ná'queze'

¹¹ Le nna'xque cadite da zri'a naca da nigá dxuzúaja' cheele nen ná'queza'. ¹² Benne' ca' dxelaca lazre' chugu lu bęla' cheęle da na' dxulé'e na, dxelune' na cheę xelxegá'anę' chawe' lau bénneache, ne cheę quebe xeláu zi' xuzre' le' lawe' da dxuluchálaje' dizra' cheę da ben Cristo le'e xaga béguaj. ¹³ Benne' caní, benne' zaj nadxugu lu bęla' cheę' da na' dxulé'e na quebe dxelune' xúgute ca da nadxixruj bea na. Dxelaca lazre' chugu lu bęla' cheęle da na' dxulé'e na cheę gaca xulucá'ana szren cuine' ca naca da belune' cheęle. ¹⁴ Quebe dxaca lazra' xucá'ana szren cuina' cheę tu da bęna', san tuze cheę da ben Xránadxu Jesucristo le'e xaga béguaj. Ne cheę Le' naca xęzr la xu nigá ca tu da gate chia' neda', na' neda' naca' ca tu benne' gate. Québedxa dxezá lazra' da naca cheę xęzr la xu. ¹⁵ Che nácadxu tuze nen Cristo, quebe bi da ba neza gaca na cheędxu che nadxugu lu bęla' cheędxu da na' dxulé'e na, u che quebe nadxugu na. Da ba neza naca na cheędxu che nácadxu benne' cube lu xichaj lázrdaudxu. ¹⁶ Dxenaba' lau Dios gunézruje' xel-la dxebeza zri lazre' cheę xúgute benne' ca' zaj naque' benne' cube caní, ne xexache lazre' benne' ca' da li zaj naque' bi cheę'.

¹⁷ Lawe' da zaj zria lu bęl-la' dxen chia' xizra' da dxululé'e na naca' węn zrin cheę Cristo quebe nu benne' dxal-la' gulálene' neda' na'a, ne lu da za za'.

¹⁸ Le'e, bi bícha'dau', dxenaba' lau Xránadxu Jesucristo gunę' chawe' cheę xúgutele. Ca'an gaca na.

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE ÉFESO

Pablo dxugape' diuzre bi chee Cristo zaj zre'e xezre Efeso

¹ Neda', Pablo, naca' gubáz chee Jesucristo lawe' da guca lazre' Dios gaca' caní. Dxuzúaja' da nigá chee le'e, nácale bi chee Dios, ne dxeajlí lázrele Jesucristo, na' zraxe xezre Éfeso. ² Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'.

Ca naca da chawe' da dxezi' lu nnadxu ne chee Cristo

³ Dxue lá'anadxu Dios, Xra Xránadxu Jesucristo lawe' da ba bene' cheedxu ca naca xúgute da chawe' chee Be' Lá'azxa da zá'aca xabáa lawe' da nácadxu bi chee Cristo. ⁴ Dios guqu'é dxi'u chee gácadxu bi chee Cristo gate quebe ne gunte' xezr la xu, chee gácadxu benne' lá'azxa, ne du lazre' lau Le'. ⁵ Lawe' da bzri'ine' dxi'u, bene' cheedxu gate nate si' lu ne'e dxi'u ca bi cheéqueze' ne chee Jesucristo, cáteze da guca lazre' guné'. ⁶ Chee le na', tu dxue lá'anazquezdxu Dios ne chee xel-la xrlátaje chee' da naca na szrente. Lu xel-la xrlátaje chee' na' gúcalene' dxi'u lawe' da nácadxu tuze nen Zrí'ine', bi nazri'ite lazre'. ⁷ Ne chee Zrí'ine' na' naxá'awene' dxi'u nen dxen cheéqueze', na' lu xel-la zri'i lazre' zren chee' bnite lawe' cheedxu dxi'u ca naca dul-la da nabágadxu. ⁸ Dios nazri'ile'ene' dxi'u, ne dxunne' dxi'u xel-la sina, ne xel-la dxéajni'i, ⁹ na' bzéajni'ing' dxi'u ca naca da dxaca lazre' da bgache na, da na' lu xel-la zri'i lazre' chee' ba núnqueze' guné' ne chee Cristo. ¹⁰ Nuchague' xúgute da zaj zua na xabáa, ne xezr la xu, chee xelú'u na lu na' Cristo, da gusexúzre' guné' gate zrin zra chee na.

¹¹ Ne chee Cristo Dios guqu'é dxi'u chee' gate nate, chee si' lu nnadxu da xáladxu da gunna Le', ca da ba núnqueze Dios, Bénnea' dxuné' xúgute da dxeque Le' xrlátaje. ¹² Caní bene' chee gácadxu tu da gucá'ana szren na xel-la szren chee', nácadxu dxi'u benne' nedxu dxebeza lázredxu Cristo. ¹³ Cá'anqueze le'e, gate benle dizra' li, da naca na dizra' chawe' chee da ben Cristo, bselé' le'e. Guxeajlí lázrele Le', na' Dios bzue' Be' Lá'azxa lu xichaj lázrdaule ca tu da dxunna bea na nácale bi chee', ca guchebe lazre' guné'. ¹⁴ Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi chee' ca', chee güe lá'anaquezdxu Le' ca naca xel-la szren chee'.

Dxenaba Pablo gunezruj Dios xel-la sina chee bi ca' chee Cristo

¹⁵ Chee le na' gate benda' ca dxeajlí lázrele Cristo, ne ca nazri'ile xúgute bi ca' chee Dios, ¹⁶ dxápaqueza' Dios; Xcalenu', ca naca chee le'e gate dxuchálajlena' Dios, ne dxeajsá lázrqueza' le'e. ¹⁷ Dxenaba' Dios chee Xránadxu Jesucristo, naque' Xradxu zue' xabáa, gunne' le'e xel-la sina lu be' nácaquezle da gulé' na le'e gúnbea xánnele Le'. ¹⁸ Dxenaba' lau Dios guzéajni'ine' xichaj lázrdaule le'e chee nézele ca naca da dxebeza lázredxu da bláwizre' dxi'u sidxu, ne ca naca xel-la gunní'a chee xel-la szren da gunezruj Dios bi chee ca', ¹⁹ ne ca naca xel-la waca zrente chee' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu duté xel-la dxenná bea zren chee' ²⁰ gate bsebané' Cristo ládujla benne' gate ca', ne guleche' Le' chalá'a xabéla chee' xabáa, ²¹ ne bzue' Le' chee nna bé'ene' xúgute benne' blau

xabáa, ne xúgute benne' dxelenná bea xabáa, ne xúgute benne' zaj napa xel-la waca, ne xúgute benne' zaj naca xrane, ne xúgute da dxelenná bea na lu zra na'a zra, ne lu da za za'. ²² Bzue' xúgute da zaj zua lu na' Cristo, ne bzue' Le' gaque' benne' xíchaje chee bi chee ca' ca naca xúgute da dxelune'. ²³ Benne' caní zaj naque' ca belá' dxen chee Cristo, da dxulé'e na dute ca nácaqueze Le', Bénnea' dxusexuzre' dxucá'ana chawe' ca naca xúgute da zaj zua.

2

Naca bandxu lawe' da nazrí'i Dios dxi'u

¹ Gate nate gúcale ca benne' gate lu xichaj lázrdaule ne chee da calela ca', ne dul-la ca' ² da benle gate ne dxunle ca dxelún bènneache zaj zre'e xezr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzúe' dizra' chee Dios. ³ Cá'anqueze dxi'u, xúgutedxu bendxu caní gate nate, gate bendxu cáteze da guzá lázredxu, ne bendxu ca da gunná belá' dxen cheedxu, ne ca da gunná xichaj lázrdaudxu. Chee le na' guca na cheedxu sidxu da zi' da xa' chee Dios ca guné' chee xezicadxa benne' ca', ⁴ san Dios bexache lázrele'e dxi'u, ne bzrí'ile'ene' dxi'u, ⁵ na' benne' dxi'u xel-la nabán tu zren nen Cristo gate ne nátedxu lu xichaj lázrdaudxu ne chee dul-la da nabágadxu. Naladxu ne chee xel-la xrlátaje chee Dios. ⁶ Cá'anqueze bsebán Dios dxi'u tu zren nen Jesucristo, ne guleche' dxi'u tu zren nen Le' xabáa. ⁷ Beñe' caní chee gulé'ene' lu zra da za za' ca nazrí'ile'ene' dxi'u, ne ca naca da cháwele'e beñe' cheedxu ne chee Jesucristo. ⁸ Lu xel-la xrlátaje chee Dios bselé' le'e lawe' da guxeajlí lázrele Cristo. Quebe naca na ne chee bi da benle le'e, san naca na tu da ben Dios cá'aze ne chee. ⁹ Quebe nalá nu benne' ne chee bi da dxúnqueze', chee quebe nu benne' gucá'ana szren cuine'. ¹⁰ Dios beñe' dxi'u, na' bexune' dxi'u tuze nen Jesucristo chee gundxu da xrlátaje ca' da ba nun Le' gundxu gate nate.

Nácadxu tuze ne chee Cristo

¹¹ Le gusá lázrele ca gúcale le'e gate nate. Quebe nácale benne' judío, benne' ca' dxelechugue' lu bel-la' dxen chee' da na' dxulé'e na zaj nababe' chee Dios, ne zaj nazí le' benne' zaj nadxugu, na' dxelenné' chee nácale benne' quebe zaj nadxugu. ¹² Lu zra ca' quebe guzále Cristo le'e. Quebe benle tuze benne' Israel ca', ne quebe bènbeale ca naca xel-la wezría da ben Dios, ne ca naca da guchebe lazre' Dios. Guzále lu xezr la xu nigá, ne quebe bi guleza lázrele, ne quebe bènbeale Dios. Gate nate guzrale zitu'la naga zua Dios. ¹³ Na'a ne chee Cristo Dios ba bzue' le'e gágute lawe' da gute Cristo waláz chee. ¹⁴ Léqueze Cristo benne' dxi'u xel-la dxebeza zri lazre', ne bexune' dxi'u tuze, netu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da ben na dxi'u chupa la'a, da guca na ca tu ze'e. ¹⁵ Gate gute Jesús waláz cheedxu guchugue' da nadxiruj bea na da naca na da gunná Dios gundxu, ne da ca' dxeleenná bea na, na' bexune' dxúpaté xezre ca' tuze xezre cube da nababa na chee'. Caní gudíxruje' xel-la dxebeza zri lazre' cheedxu. ¹⁶ Caní guca ne chee xel-la gute chee Cristo le'e xaga béguaj, guchugue' naze xel-la dxezrá'a ljwezre chee dxúpaté xezr ca', na' bexune' dxúpaté tuze bel-la' dxen, ne bexune' le' tuze nen Dios.

¹⁷ Blá' Cristo, ne bzenne' le'e dizra' chawe' chee', le'e quebe nácale judío, na' guzrale zitu' naga zua Dios, ne le'e nácale judío, na' guzrale gagu naga zua Dios, ¹⁸ na' ne chee Cristo, xúgutedxu, benne' judío ca', ne benne' quebe zaj naque' judío, dxebigadxu lau Xradxu Dios ne chee Be' Lá'azxa. ¹⁹ Chee

le na' le'e, benne' quebe nácale judío, québedxa nácale ca benne' zitu' tu lu xezr la xu da quebe naca na chee, san nácale benne' walazre' ca xúgute benne' ca' zaj nababa chee Dios. Nabábale Zri'ine Dios. ²⁰ Nácale ca tu xu'u zren da zria na lawe' lane da gulixruij benne' gubáz ca' chee Cristo, ne benne' ca' buluchálajé' waláz chee Dios, na' Jesucristo nácaqueze' xiaj blau chee lane xu'u na'. ²¹ Lawe' lane nigá da naca Cristo, dute xu'u na' dxegula na tu li chee gaca na tu xudau' lá'azxa chee Xránadxu. ²² Cá'anqueze le'e, lawe' da nácale Cristo tuze, xu'ule lu xu'u na' naga zua Dios ne chee Be' Lá'azxa chee'.

3

Pablo dxuzenne' benne' quebe zaj naque' judío dizra' chawe'

¹ Chee le na' neda', Pablo, dxuzú zriba' lau Dios. Xu'a lizre xia lawe' da dxuna' zrin chee Jesucristo chee gaca chawe' chee le'e, quebe nácale judío. ² Ba nézele ca ben Dios lu xel-la xrlátaje chee', bsebague' neda' guchálaja' dizra' chawe' chee Cristo ládujla le'e. ³ Lu da ble'e Dios neda' bzéajni'ing' neda' tu da nagache chee' ca da bzuaja' chee nedxu. ⁴ Gate gulábale na weque bé'eqezele núnbe'a da nagache ca naca chee Cristo. ⁵ Guca na tu da nagache gate nate. Dios quebe bzéajni'ing' na bénneache, san na'a ne chee Be' Lá'azxa chee' ba blé'eng' na benne' gubáz lá'azxa ca', na' benne' ca' dxuluchálajé' waláz chee'. ⁶ Caní naca da nagache na': Ne chee dizra' chawe' chee Cristo benne' quebe zaj naque' judío welezí'queze' da gunezruj Dios le' ca da xelezí' benne' judío ca', ne zaj naque' tuze be'l-la' dxen, ne xelezí'queze' tu zren da nachebe lazre' Dios ne chee Jesucristo.

⁷ Dios bene' neda' wen zrin chee dizra' chawe' na' ne chee tu da bénnaze' neda', bchínene' xel-la waca zren chee'. ⁸ Neda' nácadxa' benne' baxáche ca xúgute benne' zaj naca bi chee Dios. Bene' neda' tu culuén zren chee guzenda' benne' quebe zaj naque' judío dizra' chawe' ca naca xel-la gunní'a zrente chee Cristo. ⁹ Bsebague' neda' guzéajni'ida' xúgute bénneache ca da nun Dios guné' da bgache gate nate, na' naca Dios Bénnea' bene' xúgute da zaj zua, ¹⁰ chee xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrente chee Dios. Xelúnbe'e na ne chee benne' ca' zaj naca bi chee Cristo. ¹¹ Da nigá ben Dios ca da nune' gate nate gusexuzre' ne chee Xránadxu Jesucristo. ¹² Ne chee Cristo waca bígadxu lau Dios du lázredxu, ne dute xel-la dxuxrén lazre' cheedxu lawe' da dxeajli lázredxu Le'. ¹³ Chee le na' dxata' xúeda' le'e quebe gate ni'a na'le lawe' da dxedéa' xel-la zi' ne chee le'e. Xel-la zi' da dxedéa' neda' gaca na chee tu da ba neza.

Xel-la zri'i lazre' chee Cristo

¹⁴ Chee le na' dxuzú zriba' lau Xra Xránadxu Jesucristo, ¹⁵ Bénnea' dxuzúe' la cha chee benne' zaj zre'e xabáa, ne xezr la xu. ¹⁶ Dxenaba' lau Xradxu, ca naca xel-la gunní'a zrente chee' guzé tipe' le'e nen xel-la waca chee' lu xichaj lázrdaule ne chee Be' Lá'azxa chee', ¹⁷ chee sua Cristo lázrdaule ne chee xel-la dxeajli lazre' chee, ne se cháchale lu xel-la zri'i lazre', ca tu xaga da nudé lue na sítuja, ¹⁸ chee seque' chéajni'ile tu zren nen xúgute bi chee' ca nazriluj, ne ca natunna, ne ca nasituj, ne ca nasibe xel-la zri'i lazre' chee Cristo. ¹⁹ Dxenaba' lau Dios gúnbeale xel-la zri'i lazre' na', lácala cabata' séquedxu gúnbeadxu dute ca naca na. Caní dxenaba' Le' chee suale le'e dute da nácaqueze Dios.

²⁰ Na'a, gaca báqueze Dios, Bénnea' nape' xel-la waca gúnle'eqeze' da zrendxa ca da dxenábaxdu, u ca da dxéquedxu, ne chee xel-la waca chee' da

dxun na zrin lu xichaj lázrdaudxu. ²¹ Gaca ba Dios ládujla benne' zaj naque' bi chee Cristo ne chee Jesucristo xúgute iza chadía chacanna. ¡Ca'an gaca na!

4

Nácadxu tuze ne chee Be' Lá'azxa

¹ Chee le na' dxata' xúeda' le'e, neda', xu'a lizre xia lawe' da dxuna' zrin chee Xránadxu, chee gunle da xrlátaje ca dxal-la' xelún bénneache ba gucá'a Dios le', ca gucá'aqueze' le'e. ² Le gaca dxexruj lazre', ne zri'i lazre'. Le cueza lazre', ne le cue' gunne xue chee tule xetule lu xel-la zri'i lazre' chee. ³ Le gun ba xuzre gácaqueze tuze, guchínele xel-la waca chee Be' Lá'azxa lu xel-la dxebeza zri lazre' da na' dxun na le'e tuze.

⁴ Tuze naca belá' dxen chee Cristo da nácadxu. Tuze naca Be' Lá'azxa, Nu na' zúalene' tu tudxu. Tuze da dxuxrén lázredxu, da na' sidxu lu na' Dios.

⁵ Tuze Bénnea' naque' Xránadxu.

Tuze da dxeajlí lázredxu.

Tuze ca dxedxúadxu nisa.

⁶ Tuze Bénnea' naque' Dios, ne Xra xúgutedxu.

Le' naque' Benne' xíchaje xúgutedxu.

Dxulé'e cuine' lu da dxundxu xúgutedxu.

Zúaqueze' lu xichaj lázrdau xúgutedxu.

⁷ Tu tudxu nasidxu tu xel-la waca cha cheedxu ca da nunna Cristo dxi'u.

⁸ Naca na ca naxúaj na lu dizra' lá'azxa, dxenná na: Begüene' xabáa, gate gudé bzétaje' benne' guledábague' Le'. Na' bnézuje' bénneache xel-la waca ca'.

⁹ ¿Bi zéaje na, dxenná na: Begüene'? Zéaje na nédxula bétaje' lu xezr la xu nigá. ¹⁰ Bénnea' bétaje' nácaqueze' Bénnea' begüene' lu da blaudxa lu xabáa chee gaca bea na xu'u lu ne'e xúgute da de, ¹¹ na' benne' cha cheedxu xel-la waca chee:

Gaca bál-ladxu benne' gubáz chee'.

Gaca guzendxu xezícadxu bénneache dizra' chawe' chee'.

Gácadxu xezícadxu benne' dxuxúedxu bi chee' ca'.

Na' gusédedxu-be' xezícadxu.

¹² Ca'an bene' chee bpa'adxé' bi chee' ca' chee xelunbe' zrin xulucá'anabe' xrlátaje bénneache ca' zaj naque' zruza ni'a na' Cristo:

¹³ Chee gácadxu tuze ca dxéajledxu,

ne ca núnbeadxu Zri'ine Dios,

chee gácadxu benne' du lazre',

chee gácadxu cáteze nácaqueze Cristo.

¹⁴ Caní nacan chee québedxa gácadxu ca bidu ca', bi ca' dxelezibe' bíteteze dizra' da zaj naca na ca tu be' da zeaj na nila na'la, ne québedxa güedxu lataj xelún zréaje benne' wen da zrinnaj ca' dxi'u, chee quebe xelezi xe'e dxi'u chee gundxu da caleja. ¹⁵ Lu xel-la zri'i lazre' dxal-la' guchálajdxu da li chee gácadxu cáteze nácaqueze Cristo, Bénnea' naque' xichaj bel-la' dxen da nácadxu dxi'u.

¹⁶ Le' dxune' tuze xúgute ni'a na' zaj zria bel-la' dxen chee' chee gaca na tu bel-la' dxen nazá'ate chee na, ne chee xelún zrin xúgute ni'a na' ca' chee gula bel-la' dxen na', ne gaca na chawe' lu xel-la zri'i lazre'.

Xel-la nabán cube da dxunna Cristo dxi'u

¹⁷ Da nigá dxapa' le'e, ne dxusebaga' le'e waláz cheę Xránadxu cheę québedxa gunle ca dxelún bénneache quebe zaj núnbe'e Dios, benne' ca' dxelune' cáteze dxeléquene' xrlátaje, ¹⁸ benne' ca' zaj nachul-la xichaj lázrdawe'. Benne' caní quebe zaj napę' xel-la nabán li lazre' da dxunna Dios bénneache: Zaj nachul-la naníteng', ne zaj naca zide' lázrdawe'.

¹⁹ Québedxa dxelexedué'ene'. Belezanne cuinę' dxelune' da schanni'. Du lazre' dxelune' xúgutę da sban.

²⁰ Quegá caní nazédele le'e cheę Cristo, ²¹ che da li xca' bénnele da dxuchalaj Le', ne nusédene' le'e ca naca da li da zúalę Jesús. ²² Ca naca da benle nédxula, le guzúa chalá'ala da gúcale lawe' da guzrínnaile lu da sban da guzá lázrele.

²³ Dxal-la' gácale benne' cube lu xichaj lázrdaule.

²⁴ Dxal-la' gunle da naca cheę benne' cube na' da ben Dios le'e cheę gunle da naca na xlátaje, ne da li da naca na lá'azxa.

²⁵ Cheę le' na' québedxa gun lázrele.

Le nne' da li tule xetule lawe' da nácadxu ni'a na' tuze bęl-la' dxen cheę Cristo.

²⁶ Che dxezrá'ale, quebe dxal-la' gunle dul-la, ne quebe zrá'ale scha'.

²⁷ Quebe güele da xriwe' lataj guchixre cheę na le'e.

²⁸ Bénnea' guquę' gubán québedxa dxal-la' cuane'. Dxal-la' gunę' tu zrin chawe' nen ni'a ná'queze' cheę gapę' da gunézruje' benne' dxelexázrjene'.

²⁹ Quebe nnele dizra' caleła. Le guchalaj da naca na xrlátaje cheę xezezé tipa benne' xelenne', ne xezezé na ba neza. ³⁰ Quebe guzúa xáchele Be' Lá'azxa cheę Dios, lawe' da zúalę Be' le'e cheę gaca bea na nácale bi cheę Dios ca zrindxa zra kezí' lu ne'e dxi'u.

³¹ Le guzúa chalá'ala:

Xel-la dxecuide', ne xel-la dxezrá'a, ne xel-la xichaj zra'a, ne xel-la wetil-la dizra', ne xel-la wechacha, ne xúgutę da zrinnaj.

³² Dxal-la' gácale du lazre', ne xache lázrele tule xetule, ne gunite laule cheę tule xetule ca ben Dios, bnite lawe' cheęle le'e lawe' da nácale bi cheę Cristo.

5

Ca dxal-la' xelaca bi ca' cheę Dios

¹ Lawe' da nácale bi cheęqueze Dios, bi nazri'ine', le gun ba xuzre gácale cáteze nácaqueze Le'. ² Le zri'i le sa' ljuwézrele tule xetule cáteze ben Cristo, bzri'ine' dxi'u, ne bzanne cuinę' waláz cheędxu ca tu zrila'dau', béadu dxelute benne' lau Dios cheę xedúa xtul-le'. Gate gute Cristo le'e xaga béguaj, guca ca tu da dxelá zixre lau Dios da dxelegú'u bénneache lau Le'.

³ Lawe' da nácale bi cheę Dios, québedxa dxal-la' guchálajle cheę da dxucá'ana ditaj na bénneache, ne cheę da sban ca', ne cheę xel-la wecude' da de.

⁴ Quebe guchálajle dizra' schanni', ne dizra' bize, ne dizra' caleła, da quebe dxulucá'ana na chawe' bénneache, san dxal-la' xéquezele Dios: "Xcalenu'."

⁵ Ba nézquezle quebe chu'u naga dxenná bea Cristo nen Dios netú benne' dxucá'ana dítaje' bénneache, u tu benne' dxunę' da sban, u tu benne' dxucúdie' da de, da naca na ca dxucá'ana szrene' bedau' xiaj xaga. ⁶ Quebe güele lataj nu si xę le'e nen dizra' xala, lawe' da ne cheę da nigá dxesel-la Dios da dxusaca zi na benne' ca' quebe dxuluzúe' dizra' cheę'. ⁷ Quebe gunle tu zren benne' dxelune' da caní.

⁸ Nédxutę guzúale lu da chul-la, na' na'a zrágale xel-la naxaní' lawe' da nácale bi cheę Xránadxu. Cheę ę na', le gun da naca na cheę xel-la naxaní', ⁹ da na' naca xel-la dxucá'ana chawe' ljwézredxu, ne da xlátaje, ne da li. ¹⁰ Le gun zi' lázrele nézele gunle da dxezaca ba lazre' Xránadxu. ¹¹ Quebe gunle tu zren benne' dxelunę' da caleła, da ca' naca cheę da chul-la, san le til-la da ca' ¹² lawe' da naca na tu da xedué'edxu guchálajzedxu cheę da dxelún benne' ca' bagácheze. ¹³ Gate dxeledxúaj da caní lu da chul-la, ne zaj xu'u na lu xel-la naxaní', gulé'e lawe' ca zaj naca xúgutę da caní, lawe' da dxulé'e lawe' xel-la naxaní' xúgutę. ¹⁴ Ca naca da caní dxenná na:

Bebán, lue' dxásiu'.

Bexasa ládujla benne' gate,

na' gusení' Cristo lu xichaj lazrda'u.

¹⁵ Cheę ę na', le guxúe xanne' ca da dxunle. Quebe gunle ca dxelún benne' zaj nachul-la naníteng', san le gun ca dxelún benne' zaj naxéajni'ing'. ¹⁶ Le guchine chawe' zra caní lawe' da dxácale'ę da zrinnaj lu zra na'a zra. ¹⁷ Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu. ¹⁸ Quebe súzrele, da na' dxuxrinnaj na bénneache, san du lázrele le si' Be' Lá'azxa. ¹⁹ Le guchálaję le sa' ljwézrele tule xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. Du lázrele le gul-la, ne le güe lá'ana Xránadxu. ²⁰ Le xéqueze Xradxu Dios: "Xcalenu", cheę xúgutę lu La Xránadxu Jesucristo.

Ca dxal-la' xelún bi cheę Cristo nen lwézebe'

²¹ Le gaca dxexruj lazre' tule xetule, ne le gapa ba lá'ana Dios.

²² Nu'ula dxal-la' gaque' dxexruj lazre' lau benne' cheę, cáteze dxal-la' gaque' lau Xránadxu, ²³ lawe' da naca benne' biu xíchaje cheę zru'ule', cáteze naca Cristo xíchaje cheę bi cheę ca'. Cristo naque' Benne' weselá cheę bi cheę ca', bi zaj naca be' ca bel-la' dxen cheéqueze'. ²⁴ Cáteze zaj naca dxexruj lazre' bi cheę ca' lau Cristo, cá'anqueze nu'ula dxal-la' gaque' dxexruj lazre' lau benne' cheę' lu xúgutę.

²⁵ Benne' biu dxal-la' zrí'ing' zru'ule' cáteze ben Cristo, bzrí'ing' bi cheę ca', ne bzánene' xel-la nabán cheę ne ę cheębe'. ²⁶ Caní bene' cheę bebéaje'-be' cheéqueze', ne ben chí'e-be' ne cheę dizra' cheę, da guca na ca dxun benne' dxexibe' bi cheę nen nisa, ²⁷ cheę guzúe'-be' lau Le', xelácabe' bi xabáa, ne quebe bi da sban zaj nápabe', ne netú da zrinnaj, ne netú da naca na ca da ca', san xelácabe' lá'azxa, ne du lazre'. ²⁸ Cá'anqueze benne' biu dxal-la' zrí'ing' zru'ule' cáteze nazrí'ing' bel-la' dxen cheéqueze'. Benne' nazrí'ing' zru'ule' nazrí'i cuinę'. ²⁹ Netú benne' quebe dxecuđene' bel-la' dxen cheéqueze', san dxugawe' na, ne dxuxúe' na, ca dxúnqueze Cristo cheę bi cheę ca' ³⁰ lawe' da zaj nácabę' ca bel-la' dxen cheéqueze', na' dxi'u nácadxu ca ni'a na' bel-la' dxen cheę, ne nácadxu ca bela' dxen cheę, ne zrita cheę'. ³¹ Cheę ę na' tu benne' biu dxal-la' gusanę' xra xrne'ę cheę gaque' tuze nen zru'ule', na' dxúpatę' xelaque' ca tuze benne'. ³² Da nigá naca na tu da zren da nagache, na' dxennía' da caní ca naca cheę Cristo nen bi cheę ca'. ³³ Cá'anqueze tu tule le'e dxal-la' zrí'ile zrú'ulale cáteze nazrí'i cuinale, na' nu'ula dxal-la' gape' ba lá'ana benne' cheę'.

6

¹ Le'e, bi cuide', lawe' da nácale bi cheę Xránadxu, dxal-la' guzúale dizra' xruze xrna cheęle, da naca na xlátaje. ² Da nadxixruj bea nedxu da zraga

na tu da guchebe lazre' Dios naca na da dxenná na: Gudapa ba lá'ana xra xrna'u, ³chee gaca chawe' chiu', ne chee su' scha' lu xezr la xu.

⁴ Le'e, xruze xrna', quebe guchá'ale zrí'inele. Le gusegula-be' lu xel-la dxenná bea chee Xránadxu, ne le gusina-be' da naca chee Le'.

⁵ Le'e, benne' nada'u, le guzúa dizra' chee benne' zaj naque' xránale lu xezr la xu nigá, ne le gapa le' ba lá'ana, ne le zrebe le', ne du lázrele le gaca chee', cáteze dxuzúale dizra' chee Cristo. ⁶ Le gun zrin chee xránale ca', quegaze gate dxelenná'te' le'e, ca dxelún benne' ca' dxelaca lazre' xelezaca ba lazre' bèneache chee'. Le gun zrin na' cáteze dxunle zrin chee Cristo, gunle du lázrele da dxaca lazre' Dios. ⁷ Le gun zrin chee xránale du lázrele, cáteze dxunle zrin chee Xránadxu, ne quegaze chee bèneache. ⁸ Ba nézquezle tu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nune'.

⁹ Le'e, xrana benne' ca', cá'anqueze le gun le'e nen benne' wen zrin cheele ca', ne quebe guzálajle le' lawe' da nézele zua Bènea' xabáa naque' Xrana benne' ca', ne Xránale le'e, na' Le' quebe dxebéaje' cha chee bèneache.

Zra lana bi chee Cristo da dxácale lebe' lu wedil-la

¹⁰ Na'a, bi bícha'dau', le gaca chuchu ne chee Xránadxu nen xel-la wala zren chee'. ¹¹ Le gaca ca benne' zjaque' wedil-la zaj nácu'e zra lan'e xia da na' dxunna Dios le'e, chee gaca se chúchule lau xúgute da dxuzé da xriwe' laule chee xi se na le'e. ¹² Quegá dxedíl-lalədxu bèneache zaj naque' be'la' dxen. Dxedíl-lalədxu xel-la dxenná bea chee da xriwe' da dxeledá na lu be', ne dxedíl-lalədxu be' xriwe' ca', da dxelenná bea na, ne be' xriwe' ca' dxə na ljwezre ca' da xelún na, ne be' xriwe' ca' xu'u lu na' na xezr la xu chul-la nigá. ¹³ Chee le na', le gaca ca benne' zjaque' wedil-la zaj nacue' zra lan'e xia da dxunna Dios le'e, chee séquele súale wedil-la lu zra che da xriwe', na' ca te na' xegá'ana chúchule. ¹⁴ Le se chuchu xca', suale le'e da li ca tu bazxu da nacá'a na le'ele, ne suale le'e da xlátaje ca tu xia da da' lachu'le. ¹⁵ Le gaca sina chee guchálajle dizra' chawe' chee xel-la dxebeza zri lazre', da gaca na cheele ca tu cue' zrélele. ¹⁶ Da dxun na ba xen, le gapa xel-la dxeajlí lazre', da gaca na cheele ca tu da xegapa na, da xusula na xúgute da zaj nalá na zaj zua na xi' da dxuzala da xriwe'. ¹⁷ Xel-la weselá gaca na cheele ca tu lapa xia da guache xíchajle, na' xrtizra Dios gaca na cheele ca tu xia da gunna Be' Lá'azxa le'e. ¹⁸ Gate ne dxunle da caní dxal-la' guchálajlele Dios, gata' xúele, ne nábale lau Le' ne chee Be' Lá'azxa. Chee gaca gunle da caní dxal-la' súale ban lazre', ne quebe gate ní'a na'le, na' nábale Dios chee gácaləne' xúgute bi chee' ca'. ¹⁹ Cá'anqueze le naba Le' waláz chia' neda' chee gunne' neda' dizra' da guchálaja', chee xazrda' guzenda' bèneache dizra' chawe' chee'. ²⁰ Dios bəne' neda' gubáz chee dizra' chawe' chee', na' chee le na' xu'a lizre xia na'a. Le naba Le' gácaləne' neda' chee xazrda' guchálaja' dizra' chawe' chee' ca dxal-la' guna'.

Pablo dxugape' diuzre le sa' ljwezre'

²¹ Tíquico, bi bíchedxu nazri'ite lazrdxu, bi li lazre' lu zrin chee Xránadxu, guzenbe' le'e da dxaca chia' nigá, ne da dxuna'. ²² Chee le na' dxusel-la'-be' lau le'e chee guzenbe' le'e ca zúantu', ne chee gutípabe' lázrele.

²³ Dxenaba' lau Xradxu Dios, ne lau Xránadxu Jesucristo gunézrujē' bi bíchedxu ca' zaj zřē'ē na' xel-la dxebeza zri lazre', ne xel-la zri'i lazre', ne xel-la dxeajlí lazre', ²⁴ na' gunē' chawe' xúgutē' benne' ca' du lazre' zaj nazri'ine' Xránadxu Jesucristo. Ca'an gaca na.

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE FILIPOS

Pablo dxugape' diuzre bi bíchedxu ca' zaj zre'e xezre Filipos

¹ Neda' Pablo, ne Timoteo nácantu' wen zrin chee Jesucristo. Dxuzúaja' da nigá cheele le'e, bi bíchentu', ne cheele le'e, dxuxúele bi chee Cristo, ne le'e, zaj xu'u lu na'le bi chee Cristo, ne zrale xezre Filipos. Nabábale chee Dios, ne nácale tuze nen Jesucristo. ² Dxenáabantu' lau Xradxu Dios, ne lau Xránadxu Jesucristo gungé' cheele da xrlátaje, ne gungne' le'e xel-la dxebeza zri lazre'.

Da dxenaba Pablo gun Dios chee bi ca' chee Cristo

³ Tu tu lasa dxajsa' lazra' le'e dxapa' Dios chia': Xcalenu'. ⁴ Gate dxuchálajena' Dios, duté xel-la dxebé dxenábaqueza' bi gun Le' chee xúgutele le'e. ⁵ Caní dxuna' lawe' da dxundxu zrin tu zren chee dizra' chawe' chee Cristo gate guzú lau núnbe'tu' na bzrinte lu zra na'a zra. ⁶ Dxuxrén lazra' Dios, Bénnea' guzú lawe' dxuné' tu zrin chawe' lu xichaj lázrdaule le'e, gúnqueze' na ca zrinte zra xelá' Jesucristo. ⁷ Naca xrlátaje dxéqueda' neda' caní chee xúgutele le'e, lawe' da nazrí'ilé'eda' le'e, ne dxezidxu tu zren da chawe' ca' dxunna Dios dxi'u. Dxácate ne xu'a lizre xia nigá, ne gate na' gudíl-lalena' bénneache ca' dizra', benne' ca' guledábage' dizra' chawe' chee Cristo, ba ble'eda' benne' ca' naca na da li. ⁸ Dios nézquezené' nazrí'ilé'eda' le'e, lu duté xel-la zri'i lazre' da dxunna Jesucristo neda'. ⁹ Dxenaba' lau Dios gungé' zri'idxa ljwézrele, ne gápale'eqeuzle xel-la sina, ne xel-la dxéajni' lu xúgute da dxunle, ¹⁰ chee nézele cuele da cháwedxa, chee gácale du lazre', ne quebe bi gata' da gagu na zria cheele lu zra na' xelá' Cristo. ¹¹ Caní gaca, da ca' dxunle xululé'e na da xrlátaje da dxun Jesucristo lu xichaj lázrdaule, chee gaca ba lá'ana Dios, ne xegá'ana szrénqueze'.

Dxenná Pablo: Che naca bana', Cristo dxuchínene' neda'

¹² Le'e, bi bích'a'dau', dxaca lazra' nézele ca da ca' guzraca' gulácale na neda' chee bchálaja' dizra' chawe' chee Cristo. ¹³ Caní guca, xúgute benne' xra'aga xu'u lawe', ne xezícadxa benne' ca' zaj zre'e xu'u lawe' na' zaj nézené' xu'a lizre xia lawe' da dxuna' zrin chee Cristo. ¹⁴ Lawe' da xu'a neda' lizre xia nigá, chaze xúgute bi bíchedxu ca' dxuluxrén lázredxe' Xránadxu, na' dxuluchálaje' du lazre' dizra' chee Dios, ne quebe dxelezrebe'.

¹⁵ Da li bal-la benne' ca' dxuluchálaje' ca naca chee Cristo lawe' da zaj naque' zre'e lazre', ne zaj naque' wil-la dizra'. Xezícadxa benne' caní dxuluchálaje' na duté xel-la li lazre' chee'. ¹⁶ Benne' nedxu ca' dxuluchálaje' da naca chee Cristo chee xulucá'ana szren cuine', ne quegá du lazre', lawe' da dxelaca lazre' súadxa da guzúa na neda' stebe dxácate xu'a lizre xia nigá. ¹⁷ Xezícadxa benne' ca' dxeluné' na duté xel-la zri'i lazre' chee', lawe' da zaj nézené' nuzúa cuina' guzéajni'ida' benne' ca' dxeledábage' dizra' chawe' chee Cristo. ¹⁸ ¿Bizra xca'? Ájatezla dxeluné', che dxuluchálaje' du lazre', u quebe dxuluchálaje' du lazre', dxuluchálaje' chee Cristo, na' dxebeda', ne wabéqueza' ¹⁹ lawe' da nezda' lu xúgute da caní wedxúaj na chawe' chia' neda', lawe' da dxenábale le'e lau Dios chia' neda', na' gácale Be' Lá'azxa neda', Bénnea' gusel-le' Jesucristo cheedxu. ²⁰ Dxaca lazra', ne dxuxrén lazra'

quebe xedué'eda' neda', séqueda' guchálaja' du lazra' chee xelexé'e bénneache zúaledxa xel-la szren chee Cristo neda' na'a, ca zúalequeze na neda', che gaca bana', u che gatia'. ²¹ Chia' neda', che naca bana', Cristo dxuchínene' neda', ne che gatia' wazrue'eda' da cháwedxa. ²² Che xedxúaj na chawe' chee zrin chee Xránadxu che naca bana', quebe nezda' bila na ca'a. ²³ Naca na stebe chia' neda' bila da caní ca'a. Dxaca lazra' gatia' chee cheajsúalena' Cristo, da gácadxa chawe' chia' neda', ²⁴ san che naca bana' nácadxa chawe' chee le'e. ²⁵ Lawe' da nuxrén lazra' naca caní, nezda' wazúaledxa' le'e chee se cháchadxale lu da naca chee Cristo, ne chee béquezdxale. ²⁶ Chee le na' bédxale lu da naca chee Cristo ne chia' neda' gate súalena' le'e.

²⁷ Dxun na ba xen gunle da dxuzéajni'i dizra' chawe' chee Cristo le'e, na' che xedajnná'a le'e, u che sua' zitu', wenda' ze cháchale, ne nácale tuze, dxunle tu zren zrin chee Cristo chee xelexé'le lazre' bénneache dizra' chawe' chee'. ²⁸ Quebe zrébele benne' ca' dxeledábague' le'e. Ca dxunle gulé'e na le' xelebía xi'e, na' nalale le'e lawe' da bselá Dios le'e. ²⁹ Tu da zrente naca da dxunna Dios le'e gate gunle zrin chee Cristo, quegaze chéajlele chee', na' cá'aqueze che tele xel-la zi' ne chee Le'. ³⁰ Le'e dxunle neda' tu zren dxedíl-laledxu da zaj naca da caləla. Blé'equeze gate nate ca gudíl-laləna' na, na' na'a dxenle ca dxedíl-laləna' na.

2

Xel-la dxexruj lazre', ne xel-la szren chee Cristo

¹ Cristo dxutipe' lázrele, na' xel-la zri'i lazre' chee' dxuzúa na le'e lu da ba neza, na' Be' Lá'axxa chee' zúaləne' le'e, na' nápaie xel-la zri'i lazre', ne xel-la dxexache lazre' chee'. ² Chee le na' le gun ca béle'eda', gaca tuze ca da dxéquele, ne gácale tuze lu xel-la zri'i lazre' chee'le, ne gunle tuze lu xichaj lázrdaule. ³ Quebe bi gunle chee' xulucá'ana szren bénneache le'e, ne chee' gaca gucá'ana szren cuínale, san dutə xel-la dxexruj lazre' chee'le dxal-la' guéquele nácadxa blau le sa' ljuwézrele ca le'e. ⁴ Netule le'e quebe dxal-la' gunle ca da gácalən le'eze. Le gun da gácalən na xezícadxa bénneache.

⁵ Dخال-la' si' lu na'le da gaca na chee'le ca ben Jesucristo. ⁶ Lácala naque' ca nácaqueze Dios, quebe gúquene' dxal-la' gune' ba xuzre xegá'anaqueze' ca Dios. ⁷ Bzue' chala'ala da nápaqueze', ne ben cuine' ca tu benne' nada'u, guque' bénneache. ⁸ Gate ba naque' bénneache, guque' dxexruj lazre', na' bzue' dizra' chee' Dios ca bzrintə gutie', lácala gutie' ca tu benne' wen da caləla le'e xaga béguaj. ⁹ Chee le na' Dios bca'ana szréne'le'e Le', ne bzue' tu Le' da naca szrendxa ca xúgutə la xezícadxa, ¹⁰ chee' gate xelenne' La Jesús, na' xuluzú zribe lau Le' xúgutə benne' zaj zre'e xabáa, ne xezr la xu nigá, ne zran xezr la xu nigá, ¹¹ ne chee' xeləxechebe xúgutə' naca Jesucristo Xránadxu, chee' gaca ba lá'ana Xradxu Dios.

Bi chee' Cristo zaj nácabe' ca xi' da dxuluseni na

¹² Chee le na', le'e, bi bicha' nazri'ite' lazra', ca na' benle le'e, bzúaquezle dizra' chee' Dios gate na' zúaləna' le'e, le guzúadxa dizra' chee' Dios na'a gate zua' zitu'. Dutə xel-la dxexruj lazre', ne dutə xel-la dxezrebe le gun zrin chee' zru'e'le dutə ca naca xel-la weselá chee'le, ¹³ lawe' da dxun Dios zrin lu xichaj lázrdaule chee' sa lázrele gunle da xrlátaje da dxaca lazre' Le', ne chee' séquele gunle na.

¹⁴ Le gun xúgute da dxunle, ne quebe gáchajele, ne quebe gutil-la dizra' ljwézrele ¹⁵ chee gácale li lazre', ne quebe nu nne chee. Gácale bi chee Dios du lazre' ládujla bènneache zaj naque' benne' dxelún da calela, ne gácale ca belaj ca' dxulusení na lu xezr la xu naga nachul-la na, ¹⁶ ne guchálajle benne' ca' dizra' da nua na xel-la nabán. Che gunle caní, neda' wezaca ba lazra' chee gate xelá' Cristo, lawe' da wanezda' quebe ben zi' lazra' dácheze, ne quebe bena' zrin níteze. ¹⁷ Béle'eda' lácala gun na ba xen gatia' chee gaca li lazre' xel-la dxeajlí lazre' chee lau Dios. Bzua cuínale lu na' Dios ca tu guna' da gúnnale chee', na' chee le na' béle'equezda' tu zren nen xúgutele le'e. ¹⁸ Le béquezle le'e, ne le gun tuze neda' lu xel-la dxebe' chia'.

Ca naca chee Timoteo, ne Epafrodito

¹⁹ Che naca da dxaca lazre' Xránadxu Jesús, dxebeza lazra' sél-lazequeza' Timoteo xedajnná'abe' le'e, chee beda' gate xelabe', ne guzenbe' neda' chee le'e. ²⁰ Quebe nu chilá' xetú benne' guéquene' chee ca da dxéqueda' neda'. Tuze Timoteo dxá'ebe' gunne xue chee gaca chawe' chee le'e. ²¹ Xúgute benne' ca' xezicala zaj dxe'e gunne xue da zaj naca chee, ne quebe zaj dxe'e gunne xue da naca chee Jesucristo. ²² Le'e nézquezle ca da xrlátaje dxun Timoteo, ne ca benbe' zrin tu zren nen neda'. Dxuchálajntu' dizra' chawe' chee Cristo, na' dxunbe' ca dxun tu bi dxácale' xrabe'. ²³ Caní naca, dxebeza lazra' sel-la'-be' gate nezda' ca gaca chia'. ²⁴ Dxuxrén lazra' Xránadxu, néda'queza' xida' xedajnná' a le'e.

²⁵ Cá'anqueze dxéqueda' dxun na ba xen sel-la' Epafrodito, bi bíchedxu. Dxunbe' zrin tu zren nen neda', dxedíl-lalentu' da calela. Lé'equezle gusél-lale bi nigá chee gácalebe' neda', ne xu'a lizre xia nigá. ²⁶ Dxezá lázrel'ebe' xedajnná'abe' le'e, ne zúale'ebe' stébe lawe' da nézebe' bénele quebe chawe' guzúabe'. ²⁷ Da li quebe chawe' guzúabe', ne bache gátebe', san Dios bexache lazre' lebe', ne quegá tuze lebe', cá'anqueze neda' chee quebe xewine lázredxa' ca da dxaca chia' na'a. ²⁸ Chee le na' dxezá lázredxa' sel-la' lebe' chee bele le'e gate xelé'ele lebe', ne chee québedxa xewine lazra' neda'. ²⁹ Le xezí' lu na'le lebe' duté xel-la dxebe', ca bi bíchele lu da naca chee Xránadxu, ne le gápaqueze ba lá'ana benne' ca' zaj naque' ca lebe', ³⁰ lawe' da guzúa gátebe' dxunbe' zrin chee Cristo. Bzuabe' lu da stébe xel-la nabán chee' chee gunbe' zrin chia' da quebe guzéquele le'e gunle.

3

Da naca chawe' da naca na du lazre'

¹ Na'a, bi bicha', le be lu da naca chee Xránadxu. Quebe naca na zede chia' neda' guzúaja' chee xecha lasa ca da ba bzúajqueza', lawe' da dxun na ba xen guna' da nigá chee. ² Le guxúe cuínale chee benne' ca' dxelune' da calela, ne zaj naque' ca becu', benne' ca' dxelechugue' lu bel-la' dxen da na' naca bea na benne' zaj naque' chee Dios. ³ Dxi'u nácadxu benne' nápaquezdxu da dxunna bea na nácadxu chee Dios, ne dxue lá'anadxu Dios ne chee Be' Lá'azxa, ne dxebedxu lawe' da nácadxu bi chee Jesucristo. Quebe dxuxrén lázredxu da dxundxu, ⁴ lácala neda' wazéqueda' guxrén lazra' da ca' nuna'. Che nu benne' dxéquene' waca guxrén lazre' ca da ba nune', wazéquexeda' neda'. ⁵ Gate gúqueda' xrunu' zra gulechugue' lu bel-la' dxen chia' da na' dxulé'e na naca' chee Dios lawe' da naca' benne' Israel, ne xrtia Benjamín. Naca' da li benne' hebreo. Guca' benne' fariseo ca buzájla'a da bdxixruj be'e Moisés. ⁶ Gudxéle'a gunne xue da naca chee Dios ca bzrinte gudáu zi' xuzra' benne'

ca' zaj nácabē' bi cheē Jesús. Ca naca da xlátaje da napa tu benne' dxunē' ca dxenná da nadxixruj bea na, quebe nu benne' guzéqueñē' bi nniē' chia'.⁷ Xúgutē da ca' gúqueda' gate nate zaj zácále'e na, na'a dxéqueda' da ca' quebe bi zaj zaca na, lawe' da nazrí'idxeda' Cristo.⁸ Da li dxéqueda' xúgutē da ca' ca tu da nite lawe' da zácadxa Xrana' Jesucristo. Lawe' da nazrí'ida' Le' ba bzua' chalá'ala xúgutē da gudapa', ne dxéqueda' da ca' ca tu da niteze cheē si'a da ba neza da dxunna Cristo,⁹ cheē gaca' tuze nen Le', quegá lawe' da guca' xlátaje ne cheē da nadxixruj bea na na', san lawe' da ble'e Dios neda' xlátaje lawe' da dxeajlí lazra' Cristo, na' Dios dxelé'ene' xlátaje xúgutē benne' dxeleajlí lazre' Cristo.¹⁰ Da dxaca lazra' naca na gúnbeadxá' Cristo, ne súale' xel-la waca neda' da bsebán na Le', ne tea' xel-la zi' ca da gudé'e Le', ne gudé' cuina' lu na' Dios lálala dxal-la' gatia' ca gute Cristo,¹¹ na' dxebeza lazra' xebana' ládujla benne' gate ca'.

Pablo dxun zi' lazre' gusexuzre' gune' zrin cheē Cristo

¹² Quebe dxennía' ba bzrué'eda' xúgutē da caní, u ba naca' dutē xlátaje, san dxun zi' lazra' cheē zrué'eda' da na' bláwizra Jesucristo neda' cheē zrué'eda'.¹³ Le'e, bi bicha', quebe dxennía' ba bzrué'eda' da nigá, san tuze da dxuna', dxuzúa' chalá'ala da ba gudé, ne dxun zi' lazra' cheē zrué'eda' da za za',¹⁴ cheē gusexuzra' guna' zrin da dxuna', cheē zrué'eda' da na' bláwizra Dios dxi'u sidxu lu xabáa cheē lawe' da nácadxu bi cheē Jesucristo.

¹⁵ Caní dxal-la' guéquedxu dxi'u, zē cháchadxu ca naca da dxeajlí lázredxu. Che quebe dxéquele caní cheē bítetēze da caní, Dios guzéajni'ing' le'e ca naca cheē na.¹⁶ Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

¹⁷ Le'e, bi bícha'dau', le gun ca dxuna' neda', ne le nna' ca dxelún benne' ca', dxelunē' ca da blé'entu' le'e.¹⁸ Zane' lasa ba gucha' le'e, ne na'a dxebértea' dxapa' le'e, zrále'e bi bíchedxu dxelunē' ca dxelún benne' dxuluzúe' chalá'ala da ben Cristo le'e xaga béguaj.¹⁹ Ca gaca cheē benne' ca' lu zra bzēbe, xelebía xi'e. Zaj nunē' dios cheē da dxelé'aj dxelawē', ne dxulucá'ana szren cuine' cheē da na' dxal-la' xelapa stu'e. Zaj dxe'e gunne xue da naca cheē xēzr la xu nigaze.²⁰ Dxi'u nácadxu benne' zaj nababē' xabáa, ne dxebéxadxu zra xelá' benne' weselá cheēdxu, Xránadxu Jesucristo, ze'e xabáa.²¹ Le' xegüē' bel-la' dxen cheēdxu da dxeledé cheē na, ne gunē' na ca naca bel-la' dxen xabáa cheē', guchínene' xel-la waca cheē' da nape' cheē nna bé'ene' xúgutē da zaj zua.

4

Dxal-la' béquezdxu lu da naca cheē Xránadxu

¹ Cheē le' na' le'e, bi nazrí'ite lazra', le se chacha lu da naca cheē Xránadxu. Le'e, bi bícha'dau' nazrí'ite lazra', dxezá lázrele'a le'eda' le'e, lawe' da dxebeda' ca nácale le'e, na' lawe' da bēna' neda' nácale bi cheē Cristo dxal-la' si'a tu da gunna Dios neda'.

² Dxata' xueda' Evodia, ne Síntique xelaque' tuze, lawe' da zaj naque' bila ne cheē Xránadxu.³ Na'a lue', bi ljwezra' li lazre', dxata' xueda' lue' gácalēnu' nu'ula zandxu caní, nu'ula belúnlēne' neda' zrin cheē dizra' chawe' cheē Cristo. Belunē' zrin na' tu zren nen Clemente, ne xezicadxa benne' ca' belúnlēne' neda' zrin. La benne' caní zaj naxúaj na lu xiche cheē xel-la nabán zeajlí canna.

⁴ Le béqueze lu da naca cheę Xránadxu. Xecha lasa dxennía': Le be. ⁵ Dxaca lazra' xeleque be'e xúgute bénneache nácale zren lazre'. Ba zua bagu zra xelá' Xránadxu.

⁶ Quebe bi cuele gunne xue, san le guchálajlequeze Dios ca naca cheę da ca'. Le naba na lau Dios, na' le xe'e: Xcalenu'. ⁷ Nadxa gunna Dios le'e xel-la dxebeza zri lazre', da naca na szrendxa ca da seque' gúnbea bénneache, na' guzúa chuchu na xichaj lázrdaule ne cheę Jesucristo.

Le gulaba lazre' ca naca da xrlátaje

⁸ Na'a, bi bicha', le gulaba lazre' ca naca

xúgute da zaj naca li, ne

xúgute da zaj napa na ba lánana, ne

xúgute da zaj naca na li lazre', ne

xúgute da zaj naca na du lazre', ne

xúgute da dxezaca ba lazre' Dios, ne

xúgute da dxulucá'ana na bénneache xrlátaje.

Che zua tu da naca xrlátaje, u da dxal-la' gucá'ana szrendxu, le gulaba lazre' da caní.

⁹ Le gun ca naca da bsédeda' le'e, ne da bzéajni'ida' le'e, ne da bzenda' le'e, ne da ble'eda' le'e, na' súalę Dios le'e, Bénnea' dxunne' dxi'u xel-la dxebeza zri lazre'.

Da gulesel-la benne' Filipos ca' cheę Pablo

¹⁰ Dxebéle'ęda' ne cheę Xránadxu, lawe' da dxajsá lázrele neda'. Quebe dxennía' ba gul-la lázrele neda', san quebe guta' lataj gácalele neda'. ¹¹ Quebe dxennía' da nigá lawe' da bi dxexájrjeda', lawe' da ba bşęde Xránadxu neda' sua' xel-la dxebé ájateęe dxaca chia'. ¹² Ba gudéa' xel-la xache', ne cá'anqueze xel-la gunní'a. Nazédia' dxuchaga lawa' xúgute da dxaca chia', che néljada', u che dxeduna', che nápalę'a, u che quebe bi napa'. ¹³ Xúgute wazéqueda' xuchaga lawa' lawe' da dxuzé tipa Cristo neda'. ¹⁴ Benle da xrlátaje, gúcalele neda' ne cheę da gusél-lale chia'.

¹⁵ Ba nézquezle le'e, benne' Filipos, ca guca gate guzú lawa' dxuchálaja' dizra' chawe' cheę Cristo nigá. Gate bezá'a xęzre ca' zaj nababa xęzr la xu Macedonia, le'eze gusél-lale chia' dumí cheę da guzí' lu na'le. ¹⁶ Gate guzúa' xęzre Tesalónica, chupa chunna lasa gusél-lale dumí chia' cheę quebe bi xájrjeda'. ¹⁷ Quebe dxennía' da nigá lawe' da dxaca lazra' bi gúnnaie chia', san dxaca lazra' gácadxa da ba neza cheele le'e lau Dios. ¹⁸ Ba guzí'a xúgute da gusél-lale, na' delę'e chia'. Ca naca da gusélal-le chia' lu na' Epafrodito, da zrendxa guca na ca da bexájrjeda'. Da na' gusél-lale naca na ca tu guna' da dxelá zixre na lau Dios, u tu da bzúale lau Dios da dxezaca ba lazre'. ¹⁹ Dios chia' gunne' le'e xúgute da dxexájrjele, cheę xel-la gunní'a cheę xabáa cheę ne cheę Jesucristo. ²⁰ Gaca ba Xradxu Dios chadía chacanna. ¡Ca'an gaca na!

Pablo dxuzé dizra' benne' Filipos ca'

²¹ Waláz chia' neda' le gugapa diuzre lu La Jesucristo xúgute benne' zaj nababę' cheę Dios. Bi bíchedxu ca' zaj zúalę neda' dxulugapę' le'e diuzre. ²² Xúgute bi bíchedxu zaj zre'e nigá, benne' zaj nababę' cheę Dios, ne bi bíchedxu zaj zre'e lizre bénnea' dxenná bé'ene' xęzr la xu Roma, dxulugapę' le'e diuzre.

²³ Dxenaba' lau Xránadxu Jesucristo gunę' da chawe' cheę xúgutele le'e. Ca'an gaca na.

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE COLOSAS

Pablo dxugape' diuzre bi bíchedxu zaj zre'e xezre Colosas

¹ Neda', Pablo, naca' gubáz chee Jesucristo lawe' da naca da dxaca lazre Dios, na' zúale bi bíchedxu Timoteo neda'. ² Dxuzúaja' da nigá chee le'e zrale xezre Colosas, ne nabábale chee Dios, ne dxeajlí lázrele Cristo. Dxenaba' Xradxu Dios guné' da chawe' chee le'e, ne gunne' le'e xel-la dxebeza zri lazre'.

Da dxenaba Pablo lau Dios chee bi bíchedxu ca'

³ Dxéquezentu' Dios, Xra Xránadxu Jesucristo: Xcalenu' ca naca chee gate dxuchálajlentu' Le'. ⁴ Ba bémentu' ca dxeajlí lázrele Cristo, ne ca nazrí'ile xúgute' bi ca' chee Dios. ⁵ Caní dxunle lawe' da dxebeza lázrele da nucueza Dios chee xabáa, na' guzú laule dxunle ca naca da nigá gate guzile dizra' chawe' da naca na da li. ⁶ Dizra' chawe' nigá bla na ládujla le'e ca bla na duté xezr la xu nigá, na' dxezriluj na, ne dxun na zrin duté xezr la xu ca dxun na ládujla le'e, gate béntele ca nazrí'i Dios bénneache, ne gunézele naca na da li. ⁷ Da nigá ble'e Epafras le'e. Naque' bi bíchedxu nazrí'i lázredxu, ne ba bénqueze' zrin nen netu', ne naque' chee le'e tu benne' wen zrin li lazre' chee Cristo. ⁸ Epafras nigá bzenne' netu' ca dxaca chee le'e, ne ca nazrí'i ljwézrele ne chee Be' Lá'azxa.

⁹ Chee le' na', zra gunézentu' da nigá, dxuchálajlequezentu' Dios chee le'e, ne dxenábantu' Le' guzéajni'ine' le'e ca naca da dxaca lazre', ne gunne' le'e duté xel-la sina, ne duté xel-la dxéajni'i da dxunna Be' Lá'azxa dxi'u. ¹⁰ Caní dxenábantu' Le' chee gaca gunle ca dxal-la' xelún bi ca' chee Xránadxu, ne gunle ca da dxezaca ba lazre' Le', gunle xúgute' da naca da xrlátaje, ne gúnbeadxaquezle Dios. ¹¹ Dxenábantu' Le' guzúa chache' le'e lu xel-la waca da naca chee xel-la szren chee' chee séquele guchaga laule xúgute' da dxaca chee lu duté xel-la zren lazre' chee, ne duté xel-la dxebé. ¹² Dخال-la' xele Dios: Xcalenu', lawe' da bzua Dios dxi'u chee sidxu da nucueze' cheedxu, chee súadxu lu xel-la naxani' chee', lawe' da nácadxu bi chee Le'. ¹³ Dios bselé' dxi'u lu xel-la dxenná bea chee da chul-la, na' bzué' dxi'u naga dxenná bea Zrí'ine' nazrí'ite lazre'. ¹⁴ Zrí'ine' nácaqueze' Bénnea' bselé' dxi'u gate gutié' waláz cheedxu, chee bnite lau Dios dul-la gubágadxu.

Bexácadxu tuze nen Dios lawe' da gute Cristo

¹⁵ Ca naca Jesús, dxulé'e na dxi'u ca nácaqueze Dios, Bénnea' quebe gaca lé'edxu, ne naque' chee Dios ca tu bi nedxu chee bénneache, bi nácaxabe' blau ca xúgute' da ben Dios. ¹⁶ Ne chee Le' ben Dios xúgute' da zaj zua xabáa, ne da zaj zua xezr la xu nigá, da ca' dxelé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u be' ca' zaj napa na xel-la waca, xúgute' na ben Dios ne chee Le', na' chee Le' zaj naca na. ¹⁷ Cristo ba zúaqueze' nédxute' ca xúgute' da zaj zua, na' ne chee Le' xúgute' da ca' dxelún na ca zaj naca chee na. ¹⁸ Xúgute' benne' zaj naque' bi chee Cristo zaj naque' ca tuze bel-la' dxen, na' Crístoqueze naque' xichaj bel-la' dxen na' da nácadxu. Le' bzué' bel-la' dxen na', ne Le' naque' Benne' bebán nédxute' ládujla benne' gate ca' chee gaque' Benne' blau

lu xúgute da zaj zua. ¹⁹ Caní naca na lawe' da guca lazre' Dios súale Cristo duté da nácaqueze Dios. ²⁰ Cá'anqueze guca lazre' Dios ne chee Cristo xexunge' tuze nen Le' xúgute da zaj zua, ca da zaj zua na lu xezr la xu, ne da zaj zua na xabáa. Bexune' dxi'u tuze nen Le' ne chee xel-la gute chee Cristo le'e xaga béguaj.

²¹ Nédxute le'e gúcale ca benne' zitu' lau Dios, ne bzrá'ale Dios lu xichaj lázrdauale, ne benle xúgute da calela, san na'a Dios ba bexune' le'e tuze nen Le', ²² ne chee da ben Cristo gate gutie' le'e xaga béguaj lu belá' dxen chee'. Da nigá ben Le' chee gaca guzúe' le'e lau Le', gácale benne' lá'azxa, ne du lazre', ne quebe bi nabágale da calela. ²³ Chee gaca caní dxal-la se cháchale, ne sua típale ca dxeajlí lázrele Cristo, ne quebe gusanle ca da dxebeza lázrele, da na' nápale lawe' da dxéajlele dizra' chawe' chee Cristo. Dizra' chawe' nigá nene na duté xezr la xu, na' nuzúa Dios neda', Pablo, benne' wen zrin chee', chee guchálaja' dizra' chawe' nigá.

Zrin dxun Pablo chee bi ca' chee Cristo

²⁴ Na'a dxebeda' lu xel-la zi' da dxedéa' ne chee le'e, lawe' da dxuzá lawa' lu bel-la' dxen chia' ca da dxezaca Cristo ne chee bi chee' ca', benne' ca' zaj naque' ca bel-la' dxen cheéqueze'. ²⁵ Bzua Cristo neda' ca benne' wen zrin chee bi chee' ca', ne chee da bláwizra Dios neda' guna', gácalena' le'e, na' guchálaja' dútequeze da naca dizra' chee Dios, ²⁶ ne chee guzéajni'ida' bénneache ca da nagache, da na' nagache nédxute, san na'a Dios ba blé'eng' bi chee' ca' ca naca na. ²⁷ Guca lazre' Dios gulé'eng' benne' ca' ca naca xel-la gunní'a zren chee da na' nagache nédxute, da gunézruje' benne' ca' quebe zaj naque' judío. Da na' nagache nédxute naca na caní: Cristo zue' xichaj lázrdauale, na' chee le na' dxebeza lázredxu súadxu xabáa chee'.

²⁸ Netu' dxuchálajntu' ca naca chee Cristo. Dxuzéajni'intu' xúgute bénneache, ne dxusédentu' xúgute', chee xeleajni'i xánneng' chee xelaca xúgute bénneache du lazre' lau Dios ne chee Jesucristo. ²⁹ Chee gaca caní dxuna' neda' zrin, dxuchíneda' duté xel-la waca chee Cristo, da dxun na zrin lu xichaj lázrdawa'.

2

¹ Dxaca lazra' nézele le'e dxúnle'a zrin, dxe'a gunne xue len Dios da naca chee le'e, ne da naca chee bi bíchedxu ca' ca' zaj zre'e Laodicea, ne da naca chee xúgute bi bíchedxu ca' quebe ne xelélé'eng' neda' caníqueze. ² Dxaca lazra' xeledípa lazre', ne xelaque' tuze lu xel-la zri'i lazre', ne xelaque' benne' gunní'a lu xichaj lázrdawe', chee xelúnbe'e da nagache chee Xradxu Dios da nácaqueze Cristo. ³ Lu na' Le' zaj de ca naca xel-la gunní'a chee xel-la sina, ne xel-la dxéajni'i. ⁴ Dxapa' le'e da nigá chee quebe xelezi xé le'e benne' ca' zaj neze xrgúe' ca dxuluchálaje'. ⁵ Lácala quebe zúaletea' le'e caníqueze, naca na cáteze zúalena' le'e lu be' nácaqueza', na' dxebéle'eda' dxenda' dxunle da xlátaje, ne ze cháchale ca dxeajlí lázrele Cristo.

⁶ Chee le na', ca benle, guzi' lu na'le Xránadxu Jesucristo, cá'anqueze dxal-la' gunle súalele Le'. ⁷ Dخال-la' gácale ca tu xaga da dxudé lue na sítuja lu da naca chee Cristo. Cá'anqueze dxal-la' gácale ca tu xu'u da dxe' lane lu da naca chee' Le', chee se cháchale ca dxeajlí lázrele Le', ca blé'entu' le'e, na' dxál-la'queze xeje Dios: Xcalenu'.

Xel-la nabán cube da dxunna Cristo dxi'u

⁸ Le guxúe cuínale. Quebe güele lataj xelezi xé benne' ca' le'e, xuluchíneng' xel-la sina chee bénneache, ne dizra' calela, ca naca da dxulusédequeze

bénneache, ne ca zaj naca da ca' dxácaqueze lu xęzr la xu nigá, ne quegá ca naca chee Cristo.

⁹ Dute ca naca Dios nácaqueze Cristo.

¹⁰ Nápale le'e xúgute da naca chee'

lawe' da nácaquezele bel-la' dxen chee Le'.

Le' dxenná be'ene' xúgute be' da dxelenná bea na,

ne xúgute be' da zaj napa na xel-la waca.

¹¹ Cá'anqueze, lawe' da nácale tuze nen Cristo nácale bi chee Dios. Quebe guca chee ca da na' belúnqueze benne' judío ca', gulechugue' late' bel-la' dxen chee bi biu chee' ca', da na' dxulé'e na zaj nácabé' chee Dios. Bedúa dute da naca chee belá' dxen chee da naca sban, da guca na ne chee da ben Cristo lu xichaj lázrdaule. Bene' nácale bi chee Dios. ¹² Gate gudxúale nisa guca chee ca guca chee Cristo gate bgache' lu xędxu ba, na' cá'anqueze guca chee ca guca chee Le' gate bebanę' ládujla benne' gate. Caní guca chee lawe' da guxeajlí lázrele xel-la waca chee Dios, Bénnea' bsebanę' Cristo ládujla benne' gate ca'.

¹³ Gate nate gúcale le'e ca benne' gate lu dul-la da gubágale, ne lu belá' dxen sban chee da quebe ne xedúa na. Na'a Dios ba nunne' le'e xel-la nabán tu zren nen Cristo, ne ba bnite lawe' xúgute dul-la da gubágale. ¹⁴ Dios bzria xi'e ca naca da nabágadxu chee xúgute da nadxixruj bea na da gula da buluzría xi na dxi'u. Bebéaje' na chalá'ala, ne bde'e na le'e xaga béguaj ca tu da gubaga' Cristo. ¹⁵ Gate gute Cristo le'e xaga béguaj begüe' ca naca xel-la dxenná bea, ne xel-la waca chee be' xriwe' ca', na' blé'ene' da ca' lówela gubáz chee xabáa ca' lawe' da gunná bé'ene' na.

Le sa lazre' da ca' zaj de na xabáa

¹⁶ Chee le na', quebe nu dxal-la' si tizra' le'e ca naca da dxe'aj da dxágule, ne ca zaj naca zra laní, ne ca naca laní chee beu' dxe'ene, ne ca zaj naca zra dxupá'anale. ¹⁷ Xúgute da caní zaj naca na ca tu zrúl-laze chee da zaj zéaje da ca'. ¹⁸ Quebe güele lataj nu cua da nucueza Dios chee le'e, ne chee da dxululé' benne' ca', benne' dxeléquene' zaj naque' dxexruj lazre' lawe' da dxulucá'ana szrene' gubáz chee xabáa ca', ne dxuluchálaje' chee da quebe ne xeelé'ene', ne dxulucá'ana szren cuine' ca naca xel-la sina chee bénneacheze da zaj nape'. ¹⁹ Quebe zaj de'e Cristo, Bénnea' naque' xichaj bel-la' dxen da nácadxu dxi'u, na' Le' dxusegule' dute bel-la' dxen na', ne dxugawe' na, ne dxune' na tuze du ca naca na, chee gaca na ca dxaca lazre' Dios.

²⁰ Naca chee ca naca chee tu benne' ba nate lawe' da nácale bel-la' dxen chee Cristo, chee québedxa gunle ca zaj naca da ca' dxácaqueze lu xęzr la xu nigá. Na'a, zbizr chee na' dxedale ca benne' ne zaj nácaqueze' chee xęzr la xu nigá, ne dxunle ca da dxelenná bea bénneache. ²¹ Dxelenné': Quebe guchínenu' da nigá. Quebe gagu' da ca'. Quebe chajtáu' da na'. ²² Xúgute da nadxixruj bea caní dxuluchalaj na chee da ca' dxeledé chee na gate dxuchinedxu na, ne zaj nácaze na da dxelenná bea bénneache, ne da dxulusede bénneache. ²³ Da li dxeleque bénneache zaj naca na sina da nadxixruj bea caní, lawe' da dxulusede na bénneache xelúe lá'ane' Dios, ne xelaque' dxexruj lazre', ne xelenná be'ene' bel-la' dxen chee'. Quebe bi culuén zaj napa na chee xelenná be'e na xel-la dxezá lazre' sban ca' chee bénneache.

3

¹ Le'e nácale ca benne' ba belexebán tu zren nen Cristo. Chee le na' le sa lazre' da zaj zua xabáa, naga dxe' Cristo chalá'a xabela chee Dios. ² Le gulaba

lazre' chee da zaj de xabáa, quegá chee da zaj de lu xezr la xu. ³ Nácale ca benne' ba zaj nate, na' xel-la nabán chee le nuzúa chawe' Dios naga zua Cristo. ⁴ Cristo nácaqueze xel-la nabán cheedxu, na' gate xelá' Le', cá'anqueze le'e gunle tu zren Le' lu xel-la szren chee'.

Xel-la nabán gula ne xel-la nabán cube

⁵ Chee le na', le xebéaj ca tu da nate xúgute da zaj zua lu xichaj lázrdaule da zaj naca na chee xezr la xu nigá, ca naca xel-la dxichaj na xrba chee xel-la nuchaga na', ne da sban, ne xel-la dxezá lazre' da sban ne da caléla ca', ne xel-la dxucude' lawe' da naca da dxucude bénneache ca dios cheequeze'. ⁶ Xúgute da caní dxelún benne' quebe dxuluzúe' dizra' chee Dios, na' chee le na' gudé Dios benne' ca' lu da ba xa'. ⁷ Cá'anqueze le'e benle xúgute da caní gate nate.

⁸ Na'a, québedxa gunle xúgute da caní:

Xel-la dxezra'a, ne xel-la xichaj zra'a, ne xel-la dxecuide ljwezre.

Québedxa nnele dizra' schanni'.

Québedxa gucháchale ljwézrele.

⁹ Quebe si xe ljwézrele tule xetule, lawe' da ba bzúale chalá'ala da gúcale nédxute, ne ca naca da benle. ¹⁰ Nácale ca benne' cube, lawe' da dxuxucube Dios le'e chee gácale ca nácaqueze Dios, Bénnea' bené' le'e, ca zrindxa gúnbea xánnele Le'. ¹¹ Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bel-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xegu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xíchajdxu, ne che zue' lu xichaj lázrdaudxu.

¹² Dios nazri'ine' le'e, ne guqu'é le'e chee gácale bi chee' ca'. Chee le na' le gaca:

Benne' dxexache lazre', ne benne' zri'i lazre',
ne benne' dxexruj lazre', ne benne' chawe' lazre',
ne benne' zren lazre'.

¹³ Le gácale ljwézrele tule xetule,
ne le gunite lau chee le tule xetule,
che núlale dxezra'a ljwézrele.

Ca ben Cristo, bnite lawe' chee le,
cá'anqueze le gun le'e chee ljwézrele.

¹⁴ Da dxundxa na ba xen, le zri'i ljwézrele lawe' da naca xel-la zri'i lazre' da dxun na dxi'u tuze, ne li lazre'. ¹⁵ Xel-la dxebeza zri lazre' da dxunna Dios dxi'u dxal-la' nna bea na lu xichaj lázrdaudxu, lawe' da bláwizra Dios le'e chee súale lu xel-la dxebeza zri lazre' chee', ne gácale ca tuze bel-la' dxen. Cá'anqueze dxal-la' xe le Dios: Xcalenu'.

¹⁶ Dizra' chee Cristo dxal-la' guzúa xánnele lu xichaj lázrdaule chee séquele guzéajni'ile, ne gusízre ljwézrele nen duté xel-la sina chee Dios. Lu duté xel-la dxezaca ba lazre' le gul-la lau Dios salmo ca', ne da dxue lá'anale Dios, ne da ca' dxuzúa Be' Lá'azxa xichaj lázrdaule. ¹⁷ Bíteteze da gunle, u da nnale, le gun xúgute na lu La Xránadxu Jesús, ne xe le Xradxu Dios: Xcalenu', ne chee Le'.

Ca dxal-la' xelún benne' ca' zaj naque' bi chee Cristo

¹⁸ Le'e, nu'ula, le guzúa dizra' chee benne' chee chee le, lawe' da naca na da dxal-la' xelún benne' dxeajli lazre' Xránadxu.

¹⁹ Le'e, benne' biu, le zri'i zrú'ulale, ne quebe xexitaj lázrele le'.

²⁰ Le'e, bi cuide', le guzúa dizra' chee xra xrnale lu xúgute da dxelenné', chee gunle da dxezaca ba lazre' Xránadxu.

²¹ Le'e, xruze xrna', quebe tételale xel-la snia nen zrí'inele, chee quebe xelate ni'a na'be'.

²² Le'e, benne' zaj nada'u, le guzúa dizra' xúgute da xelenná xránale lu xezr la xu nigá, quegaze gate dxelenná'teé', chee xeléquene' le'e xrlátaje, san le gun da ca' du lázrele, ne le zrebe Dios. ²³ Bíteteze da gunle, le gun na du lázrele, ca nu benne' dxune' zrin chee Xránadxu, ne quegá zrin chee beniácheze. ²⁴ Lácala dxunle zrin nigá chee bénneache, nézele gunna Xránadxu lazruj chee da dxal-la' sile lu zra na', lawe' da dxunle zrin chee Cristo, Bénnea' nácaqueze' Xránale. ²⁵ Nu benne' dxune' da calela, wazi'e lazruj chee da calela nune' lawe' da quebe dxuchá Dios ca da dxune' chee tu xetú benne'.

4

¹ Le'e, benne' nácale xrane bénneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'anqueze le'e, zua Xránale xabáa.

² Le'e, bi bícha'dau', le guchálajlequeze Dios, súale ban lazre', ne xele Dios: Xcalenu'. ³ Cá'anqueze, le naba lau Dios waláz cheentu', chee gácale Xránadxu netu' chee séquentu' guchálajntu' xrtizre', ne guzéajni'intu' bénneache ca naca da nagache ca naca chee Cristo. Lawe' da dxuna' da caní ne xu'a lizre xia nigá. ⁴ Le naba lau Dios chee séqueda' guzéajni'i xánnea' bénneache ca dxal-la' guna'.

⁵ Le gaca sina ca dxunle chee benne' ca' quebe dxeleajlí lazre' Cristo, guchíne xánnele zra ca' dxunna Dios le'e. ⁶ Dizra' dxuchálajle dxal-la' gaca na xrlátaje, ne da xelexezaca ba lazre' bénneache, na' dxal-la' nézele ca xechébele chee tu tu benne' ca' gate bi dxelenábene' le'e.

Dxulugapa diuzre bi bíchedxu ca' ljwezre'

⁷ Tíquico, bi bíchedxu nazrí'i lázredxu guzenbe' le'e ca naca da dxaca chia'. Nácabe' tu bi li lazre' dxácalenbe' neda', ne dxunbe' zrin chee Xránadxu tu zren nen neda'. ⁸ Chee le na', dxusel-la'-be' naga zúale, chee guzenbe' le'e ca dxaca cheentu', ne chee gutípabe' lázrele. ⁹ Cá'anqueze zéajle Onésimo lebe', naque' bíchedxu li lazre', benne' nazrí'i lázredxu, ne naque' benne' waláze chee. Benne' caní xuluzenne' le'e ca naca da dxaca nigá.

¹⁰ Aristarco, benne' xú'ulene' neda' lizre xia, dxugape' le'e diuzre, ne cá'anqueze dxun Marcos, bi xrtia Bernabé. Ba bzéajni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'. ¹¹ Cá'anqueze bénnea' le' Jesús dxugape' le'e diuzre, bénnea' léqueze' Justo. Benne' zan benne' judío dxeleajlí lazre' Cristo, san benne' canize ládujla benne' judío ca' dxelune' zrin tu zren nen neda', na' dxuzéentu' bénneache ca xelexéquene' xelu'e naga dxenná bea Dios, na' dxuluzúe' neda' tu lu da ba neza zrente. ¹² Dxugapa Epafras le'e diuzre. Naque' wen zrin chee Cristo, ne benne' waláze cheequezele. Dxenábaqueze' lau Dios chee le'e chee se cháchale, ne guzúa cuínale du lázrele chee gunle da dxaca lazre' Dios. ¹³ Neda' dxexecheba' chee Epafras, dx'e gunne xue chee le'e, ne chee bi bíchedxu zaj zre'e xezre Laodicea, ne xezre Hierápolis. ¹⁴ Dxugapa le'e diuzre Lucas, bénnea' dxexune' benne' we' ca', ne naque' benne' nazrí'i laza'. Cá'anqueze dxugapa Demas le'e diuzre.

¹⁵ Le gugapa diuzre bi bíchedxu zaj zre'e xezre Laodicea. Cá'anqueze le gugapa diuzre Ninfas, ne bi bíchedxu ca' dxelezrague' lizre'. ¹⁶ Ca te gulábale

le'e xiche nigá, le sel-la na chee xululaba bi bíchedxu ca' zaj zre'e Laodicea na. Cá'aqueze le gulaba le'e xiche da ze za na Laodicea. ¹⁷ Le xe Arquivo da nigá: Bxue xanne' gunu' cháwe'dau' ca naca zrin chee Xránadxu da bzu'e' lu na'u.

¹⁸ Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios gun'e' chee'le da chawe'. ¡Ca'an gaca na!

DIZRA' NEDXU BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

Pablo dxugape' diuzre bi bíchedxu ca'

¹ Neda', Pablo, ne Silvano, ne Timoteo dxugápantu' le'e diuzre. Dxuzúaja' da nigá cheele le'e, bi bicha', nazrágale chee Cristo lu xezre Tesalónica, ne nabábale chee Xradxu Dios, ne chee Xránadxu Jesucristo. Dxenaba' lau Xradxu Dios ne lau Xránadxu Jesucristo gunē' cheele da xrlátaje, ne gunne' le'e xel-la dxebeza zri lazre'.

Ca dxelejli lazre' benne' Tesalónica Cristo

² Dxequezentu' Dios xcalenu' ca naca chee xúgutele le'e, ne dxenábantu' gaca da chawe' cheele le'e gate dxuchálajntu' Le'. ³ Lau Xradxu Dios dxeajá lázrentu' ca benle zrin dutē lu xel-la dxeajli lazre' cheele, ne ca benle zrin chee Cristo lu dutē xel-la zri'i lazre' cheele, ne ca zē cháchale ca dxebeza lázrele súalele Xránadxu Jesucristo. ⁴ Le'e, bi bicha', Dios nazri'ine' le'e, na' nézentu' gucá'a Le' le'e. ⁵ Gate bchálajntu' dizra' chawe' chee Cristo naga zúale, quebe bentu' na nen dízra'ze, san nen dutē xel-la waca chee Be' Lá'axza bchálajntu', ne lu dutē xel-la dxuxrén lazre' cheentu'. Nézquezle ca bentu' zrin nigá ládujla le'e lawe' da nazri'ile'entu' le'e.

⁶ Le'e bēnquezle ca bentu' netu', ne ca ben Xránadxu, na' guzile dizra' na' lu dutē xel-la dxebe' cheele da benna Be' Lá'axza le'e, lácala gudéle'ele xel-la zi'. ⁷ Caní guca, nácale tu da dxulé'e na ca dxal-la' xelaca xúgute benne' dxelejli lazre' Cristo naga nababa Macedonia, ne naga nababa Acaya. ⁸ Caní guca, bzenle le'e benne' ca' dizra' chee Xránadxu. Na'a quegá tuze benne' zaj zre'e Macedonia, ne Acaya, san cá'aqueze benne' ca' zaj zre'e xúgute xezre zaj nézene' ca dxeajli lázrele Dios, na' québedxa dxun na ba xen guzénentu' le'. ⁹ Benne' caníqueze dxuluchálaje' ca guca gate bedajnná'antu' le'e ne ca guzí' lu na'le netu', ne ca bsanle bedau' xiaj xaga ca' chee bábale chee Dios, na' guzú laule dxunle zrin chee Dios ban, Benne' li. ¹⁰ Cá'aqueze dxuluchálaje' ca dxebézale zra xelá' Jesús, zē'e xabáa. Le' naque' Zri'ine Dios, na' Dios bsebanē' Le' ládujla benne' gate ca'. Léqueze' guselé' dxi'u lu da ba xa' zrente da za za' da sel-la Dios lu dutē xel-la dxezrá'a chee'.

2

Zrin ben Pablo lu xezre Tesalónica

¹ Le'e, bi bicha', ba nézquezle le'e da bentu' gate na' bedajnná'antu' le'e quebe guca na zrin nite. ² Nézquezle ca belún benne' zaj zre'e xezre Filipos, bulucháchalēne' netu', ne buluzalje' netu' gate na' za xedajnná'antu' le'e, na' Dios bexru chache' netu' chee bchálajntu' dizra' chawe' chee Cristo naga zúale, lácala buluzaga benne' zan netu'. ³ Quebe guque zréajntu' ca bchálajntu', ne quegá bi da calēla guca lázrentu' guntu', ne quegá guca lázrentu' si xentu' le'e. ⁴ Dxuchálajquezentu' ca dxaca lazre' Dios lawe' da bxren lazre' netu', ne bsebage' netu' guchálajntu' dizra' chawe' chee Cristo. Caní dxuchálajntu', quegá chee xelexezaca ba lazre' bēnneache san chee xezaca ba lazre' Dios, Bēnnea' dxenná'teē da zua xichaj lázrdaudxu. ⁵ Nézquezle le'e cabata' ne xentu' le'e dizra' gúladau' da gucá'ana szren na le'e,

ne quegá bi gunnantu' chee bi gúnnale netu'. Dios nézquezene' naca na da li. ⁶ Cabata' ne gaca lázrentu' xelapa bénneache netu' ba lá'ana, le'e u benne' xula, lácala wazéquentu' nna bé'entu' le'e bi gúnnale netu' lawe' da nácantu' gubáz chee Cristo. ⁷ Bentu' le'e xrtandau' ca dxun tu nu'ula dxusegule' zrí'ine'. ⁸ Nazrí'ile'entu' le'e, la guzréntentu' gúnnatentu' le'e, quegaze dizra' chee Dios, san cá'anqueze xel-la nabán cheentu'. Caní nazrí'ile'entu' le'e. ⁹ Le'e, bi bicha', nézqueze ca bentu' zrin du lázrentu' chee gata' da xe'aj gáguntu'. Bentu' zrin te zra ne chizrela chee quebe bi gusaca zi'ntu' le'e dxácatē bchálajlentu' le'e dizra' chee Dios.

¹⁰ Le'e dxexechēbequezele, ne cá'anqueze Dios nézene' ca bentu' gate na' zúalentu' le'e, gúcantu' li lazre', ne xlátaje, na' quebe nu guzeque' nu nne cheentu'. ¹¹ Cá'anqueze nézquezele ca bentu', bsízrentu' tu tule le'e, ne btípantu' lázrele ca dxun tu xra bidau' chee zrí'ine'. ¹² Gunná bé'entu' le'e gunle ca dxal-la' xelún benne' zaj naque' bi chee Dios, Bénnea' dxuláwizre' le'e chee chu'ule naga dxenná be'e lu dutē xel-la szren chee'.

¹³ Chee lē na' dxéquezentu' Dios xcalenu' lawe' da benle ca naca dizra' chee Dios da bchálajntu', ne guzile na ca dizra' chee Dios, ne quegá ca dizra' chee benneácheze. Da li naca na dizra' chee Dios, ne dxun na zrin lu xichaj lázrdaule le'e, na' dxeajlí lázrele Le' chee gácale chee Dios dutē ca nácale. ¹⁴ Le'e, bi bicha', gate gudele xel-la zi' chee da belún benne' walázzr chee, guca chee ca guca chee benne' zaj nababa chee Dios naga nababa Judea, benne' ca' zaj naque' bi chee Cristo, lawe' da cá'anqueze guledé' xel-la zi' chee da belún benne' walázzr chee' ca', benne' judío. ¹⁵ Benne' judío caní belutiē' Xránadxu Jesús, ca belún benne' judío ca' gate nate, belutiē' benne' ca' gulenné' waláz chee Dios, na' benne' caní gulebeaje' netu' lázrentu'. Quebe dxelunē' da dxezaca ba lazre' Dios, ne dxeledábague' xúgutē bénneache, ¹⁶ na' gate dxaca lázrentu' guchálajlentu' benne' quebe zaj naque' judío chee xeelé', quebe dxelunne' netu' lataj. Caní dxelunē', dxuluzandxē' dul-la da zaj nabague'. Na'a, ba be' Dios lataj dxaca da ba xa' zrente chee benne' ca'.

Pablo dxezá lazre' cheajnné' e bíchedxu zaj zre'e xezre Tesalónica

¹⁷ Le'e, bi bicha', gate becuásentu' naga zúale tu chi'i, lácala québedxa blé'entu' le'e, nuzúaquezentu' le'e lu lázrdauntu', ne guzá lázrele'entu' xeda-jnná'antu' le'e. ¹⁸ Guca lázrentu' xídanu', na' neda', Pablo, guca lazra' xida' tu chupa lasa, na' bzaga Satanás neda'. ¹⁹ ¿Bizra da na' dxunna na netu' xel-la dxebeza lazre', ne xel-la dxebe', ne da dxuzúa na netu' lu da ba neza, ne da dxunna bea na zua da si'ntu' lu na' Dios? Lé'equeze gácale da caní lu zra xelá' Xránadxu Jesucristo. ²⁰ Awe'. Da nácale le'e gun na si'ntu' da xabáa lau Dios, ne súantu' lu da ba neza.

3

¹ Nadxa gate québedxa guca guchaga launtu' lawe' da quebe bi bémentu' ca dxaca chee, na' gúquentu' xegá'ana chúpantu' lu xezre Atenas, ² na' sélantu' bi bíchedxu Timoteo xedajnná'abe' le'e, lawe' da naca lēbe' tu bi wen zrin chee Dios, ne ba benbe' zrin tu zren nen netu', bchálajntu' dizra' chawe' chee Cristo, na' wazéquebe' guzē cháchabe' le'e, ne gutipabe' lázrele ca dxeajlí lázrele Cristo, ³ chee quebe gate ni'a na'le lawe' da dxedentu' lu da stēbe caní. Le'e nézquezele dxal-la' tedxu xel-la zi' caní. ⁴ Gate ne zúalentu' le'e bzéajni'intu' le'e wadéquezdxu lu da zi' da xa', na' ca'an guca, ca ba nézquezele. ⁵ Chee lē na', gate

québedxa bzúeda' guchaga lawa' lawe' da quebe bi benda' cheeḷe, na' gusel-la' nu bedajnába le'e ájala dxaca cheeḷe lu xel-la dxeajlí lazre' cheeḷe Cristo, lawe' da bzreba' ga gaze xucuasa da xriwe' le'e lu neza chee Dios, na' gaca níteze zrin bentu' ga na'.

⁶ Na'a ba belá' Timoteo ga ni zúantu', ze zabe' Tesalónica, ne ze núabe' dizra' chawe' ca naca xel-la dxeajlí lazre', ne xel-la zri'i lazre' cheeḷe. Dxebe' netu' dxeajsá lázrquezle le'e netu' nen duté xel-la zri'i lazre', ne dxezá lázreḷe'ele lé'ele netu', ca netu' dxaca lázrentu' le'entu' le'e. ⁷ Chee ḷe na', bi bicha', dxácate dxedentu' lu da stebe caní, ne lu da zi' da xa', zúantu' xel-la dxebé lawe' da nézentu' ze cháchale ca dxeajlí lázrele Cristo. ⁸ Na'a naca cheentu' ca naca chee tu benne' bezúatee' chawe' lawe' da nézentu' ze cháchale lu da naca chee Xránadxu. ⁹ ¿Ájazra guntu' xéḷe'entu' Dios: Xcalenu' ca dxal-la' guntu' waláz cheeḷe le'e, ne ca naca xel-la dxebé nápantu' lau Dios ne cheeḷe le'e? ¹⁰ Te zra, ne chizrela dxata' xúentu' Dios gunne' netu' lataj xedajnná'quezentu' le'e, chee gácadxale li lazre' ca dxeajlí lázrele Cristo.

¹¹ Dxenábantu' lau Xradxu Dios, ne lau Xránadxu Jesucristo gácalene' netu' chee séquentu' xedajnná'antu' le'e. ¹² Dxenábantu' Le' chee zrí'idxa ljwézrele tule xetule, ne chee zrí'idxale xúgute bénneache ca nazrí'intu' netu' le'e. ¹³ Dxenábantu' Le' guzúa chúchue' lázrdaule, chee gácale benne' li lazre', ne benne' lá'azxa lau Xradxu Dios lu zra na' gate xelá' Xránadxu Jesús nen xúgute bi chee Le'.

4

Dxal-la' gundxu da dxezaca ba lazre' Dios

¹ Le'e, bi bicha', dxata' xúentu' le'e, ne dxusebágantu' le'e da nigá lu La Xránadxu Jesús. Le gúndxaqueze da blé'entu' le'e gunle, da na' dxezaca ba lazre' Dios.

² Nézquezle le'e da bzéajni'intu' le'e ne chee Xránadxu Jesús. ³ Da dxaca lazre' Dios naca na guzúa cuínale lu na' Le', ne québedxa gunle da sban, ⁴ na' súaleḷe zrí'ulaqueze tu tule le'e lu xel-la lá'azxa chee Xránadxu, ne gápale le' ba lá'ana, ⁵ ne quebe súale lu xel-la dxezá lazre' chee da sban ca dxelún benne' quebe zaj nunbe'e Dios. ⁶ Ca naca chee da nigá, netule le'e quebe dxal-la' si xeḷe bi bíchele, quebe gunle da sban chee', lawe' da xebéaj lazre' Xránadxu chee xúgute benne' dxelune' da caní, ca ba bzéajni'intu' le'e. ⁷ Dios bláwizre' dxi'u chee gundxu da xrlátaje, ne quegá gundxu da sban. ⁸ Caní naca, che nu benne' dxuzúe' chalá'ala ca naca da nigá, quegá tuze bénneache dxuzúe' chalá'ala, san Diósqueze dxuzúe' chalá'ala, Bénnea' nunne' dxi'u Be' Lá'azxa.

⁹ Ca dxal-la' zri'i ljwézrele quebe dxun na ba xen guzúaja' cheeḷe, lawe' da ba blé'equeze Dios le'e chee zri'i ljwézrele tule xetule. ¹⁰ Caníqueze dxal-la' zri'ile xúgute bi bíchedxu zaj zre'e xezre ca' zaj nababa xezr la xu Macedonia. Dxata' xuntu' le'e, bi bicha', chee zrí'idxa ljwézrele. ¹¹ Le gun ba xuzre súale lu xel-la dxebeza zri lazre', ne gunle da naca cheézquezle, ne gunle zrin nen ni' na'le ca ba guzrentu' le'e, ¹² chee xelapa benne' xula le'e ba lá'ana, ne chee quebe bi xázzjele le'e.

Ca gaca zra xelá' Xránadxu

¹³ Le'e, bi bicha', dxaca lázrentu' nézele ca naca chee bi bíchele zaj nate, chee quebe xewine lázrele ca dxelún xezícadxa benne' ca' quebe bi dxele-beza lazre'. ¹⁴ Dxeájledxu gute Jesús, ne bebane' ládujla benne' gate, ne

ca'anqueze dxéajlédxu Dios gusebané' benne' gate ca' guleajlí lazre' Jesús, chee xelezúalene' Le'.

¹⁵ Chee le na' dxentu' le'e da na' ble'e Xránadxu, gunné': Dxi'u naca bandxu gate xelá' Xránadxu, quebe cheajsúalédxu Le' nédxula ca benne' ca' zaj nate. ¹⁶ Xránaquezdxu ze'e xabáa, na' cuezre xe'e nen duté xel-la dxenná bea chee', na' xendxu chi'i gubáz blau chee xabáa, ne chi'i luzu da dxulucuezre' waláz chee Dios. Nadxa benne' gate ca', benne' guléajlé'e chee Cristo xelexebánqueze' za'a le'. ¹⁷ Te na', dxi'u na' naca bandxu xeché'e dxi'u tu zren nen benne' ca' ládujla beuj chee xezrágadxu Xránadxu lu be'. Ca'an gaca súalédxu Xránadxu chadía chacanna. ¹⁸ Chee le na' le gutipa lázrele tule xetule nen dizra' caní.

5

¹ Na'a, ca naca chee bi zra, u bi iza xelá' Xránadxu, quebe dxun na ba xen guzúaja' chee, bi bicha'. ² Ba nézqueze le'e zrin zra xelá' Xránadxu gate québela nu dxebeza Le', ca za tu benne' gubán chizrela. ³ Gate dxelenná bénneache: Cháwele'e dxaca cheedxu, ne quebe bi dxuchixre chee, nadxa za da guzría xi na benne' ca', ca za xel-la dxudía chee tu nu'ula gate zue' zi'i, ne quebe xeelé' lu da na'. ⁴ Le'e, bi bicha', quebe zúale lu da chul-la, chee quebe gaca chee lu zra na' xelá' Xránadxu ca dxaca chee tu benne' dxu'u gubán lizre'. ⁵ Xúgutele le'e dxunle xrlátaje, da naca chee xel-la naxaní', ne chee te zra. Quebe dxundxu da caléla, da naca chee chizrela, ne chee da chul-la. ⁶ Chee le na' quebe dxal-la' gácadxu ca benne' la wase' ca dxelún benne' xula, san dxal-la' gácadxu ban lazre', ne guzéajni' cuínadxu. ⁷ Benne' dxelase, chizrela dxelásié', ne benne' dxelezuzre, chizrela dxelezúzrequeze'. ⁸ Nácadxu dxi'u chee te zra, na' dxal-la' guzéajni' cuínaquezdxu. Che dxeajlí lázredxu Xránadxu, ne zri'idxu Le', da nigá gaca na cheedxu ca tu zra lana benne' zeje' wedil-la da naca na xia. Cá'anqueze che dxebeza lázredxu ladxu, da nigá gaca na cheedxu ca tu lapa xia ca da dxuzúu tu benne' zeje' wedil-la xíchaje'. ⁹ Dios quebe bene' cheedxu tedxu lu da ba xa' da sel-le' lu xel-la dxezrá'a chee. Bene' cheedxu zrué'edxu xel-la weselá ne chee Xránadxu Jesucristo. ¹⁰ Jesucristo gutié' waláz cheedxu chee gaca bandxu tu zren nen Le', che naca bandxu, u che ba nátedxu gate zrin zra na'. ¹¹ Chee le na' le gutipa lázrele, ne le guzé chacha ljwézrele tule xetule, ca ba dxúnquezele.

Pablo dxuzéajni'ing' bi bíchedxu ca'

¹² Le'e, bi bicha', dxata' xúentu' le'e gápale ba lá'ana benne' dxeluné' zrin ládujla le'e, benne' ca' gucá'a Xránadxu chee xelenná be'eng' le'e, ne xulusédene' le'e. ¹³ Dخال-la' gápale benne' ca' ba lá'ana, ne zri'ile le' lawe' da dxeluné' zrin chee Dios. Le sua lu xel-la dxebeza zri lazre' tule xetule.

¹⁴ Cá'anqueze dxusebágantu' le'e, bi bicha', guszrele benne' ca' quebe dxelaca lazre' xeluné' zrin, ne gutipa lázrele benne' ca' dxelate ni'a ne'e, ne gácale benne' quebe zaj ze' chacha, ne gácale zren lazre' nen xúgute bénneache.

¹⁵ Le guxúe xanne' cuínale chee quebe gunle da caléla chee nu benne' dxuné' chee da caléla, san le gun ba xuzre gúnquezele da xrlátaje, tule xetule, ne chee xúgute bénneache.

¹⁶ Le béquezele.

¹⁷ Le guchálajlequezele Dios.

¹⁸ Le xe Dios: Xcalenu' ca naca xúgute da dxaca chee.

Dxal-la' gunle da nigá lawe' da naca na da dxaca lázrqueze Dios gunle le'e, lawe' da nácale bi chee Jesucristo.

¹⁹ Quebe guzágale da dxun Be' Lá'azxa.

²⁰ Quebe guzúale chalá'ala dizra' da nunezruj Be' Lá'azxa nu bi bíchedxu ca'.

²¹ Le guchi'a xanne' xúgute da ca', na' le si' da naca na xrlátaje.

²² Le cuasa lu xúgute da quebe naca na xrlátaje.

²³ Dios dxunne' dxi'u xel-la dxebeza zri lazre'. Dxenaba' lau Le' gunē' le'e benne' lá'azxaqueze, ne guxúe' be' nácaquezle, ne bēnne'du xu'ule, ne bel-la' dxen chee chee gácale du lazre' lu zra na' xelá' Xránadxu Jesucristo.

²⁴ Bēnnea' bláwizre' le'e naque' li lazre', na' Le' gunē' xúgute da caní.

Pablo dxuzé dizra' bi bíchedxu ca'

²⁵ Le'e, bi bicha', le naba lau Dios gácal-lene' netu'.

²⁶ Le gugapa diuzre xúgute bi bíchedxu ca', ne gunídale le'.

²⁷ Lau Xránadxu dxusebaga' le'e gulábale xiche nigá lówela xúgute bi bíchedxu ca'.

²⁸ Dxenaba' lau Xránadxu Jesucristo gunē' chee da chawe'. ¡Ca'an gaca na!

DIZRA' GUDXUPE' BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

Pablo dxugape' diuzre bi bíchedxu ca'

¹ Neda', Pablo, nen Silvano, ne Timoteo, dxugápantu' le'e diuzre. Dxuzúaja' da nigá chee le'e, bi bícha'dau', nazrágale chee Cristo lu xezre Tesalónica, ne nácale bi chee Xradxu Dios, ne chee Xránadxu Jesucristo. ² Dxenaba' lau Xradxu Dios, ne lau Xránadxu Jesucristo guné' chee da chawe', ne gunné' le'e xel-la dxebeza zri lazre'.

Dios guchi'e da belún benne' dul-la ca' gate xelá' Cristo

³ Le'e, bi bícha'dau', dxal-la' xéquezentu' Dios: Xcalenu' ca naca chee, da dxal-la' guntu' lawe' da ba dxegula xel-la dxeajlí lazre' chee, ne ba zúadxá xel-la nazrí'i lazre' len ljwézrele tule xetule. ⁴ Chee le na' dxuchálajntu' ca naca chee le'e lówela bi ca' chee Cristo. Dxuchálajntu' ca dxuchaga laule da dxelún benne' ca' zaj nau zi' xuzre' le'e, ne ca naca xel-la zi' da dxedele, san nácale zren lazre', ne dxeajlí lázrele Dios. ⁵ Da nigá dxulé'e na xlátaje naca Dios ca dxuchi'e da dxelún bénneache, dxenné' naca chee chu'ule naga dxenná bea Le' lawe' da dxedele xel-la zi' chee la' xel-la dxenná bea chee'.

⁶ Xlátaje naca gudé Dios benne' ca' xel-la zi', benne' ca' dxuludé' le'e xel-la zi' na'a, ⁷ na' guzúé' le'e naga xezi' lázrele chee xel-la zi' da dxedele na'a. Xezi' lázrele tu zren nen netu' gate xelá' Xránadxu Jesús, ze'e xabáa nen gubáz blau ca' chee xabáa chee'. ⁸ Ze'e nu'e xi' chee gudé' lu da ba xa' benne' ca' quebe dxelexúnbe'e Dios, ne quebe dxuluzúé' dizra' ca dxenná dizra' chawe' chee Xránadxu Jesucristo. ⁹ Benne' caní xelecuase' naga zua Xránadxu lu xel-la szren chee', ne xel-la dxenná bea chee', na' xeledé' xel-la zi' chee' da ba xa' chadí' chacanna. ¹⁰ Caní gaca gate xelá' Xránadxu lu zra na' chee xulucá' ana szren benne' chee' ca' Le', na' benne' ca' dxeajlí lazre' Le' xelape' Le' ba lá'ana. Le'e gunle benne' ca' tu zren lawe' da guxéajlele chee da bechébentu'.

¹¹ Chee le na' tu dxuchálajlequezentu' Dios ca naca chee, ne dxenábantu' Le' gaca chee sile da na' bláwizre' le'e sile. Cá'anqueze dxenábantu' lau Dios guchínene' xel-la waca chee' chee gaca gunle ca naca xúgute da xrlátaje da dxezá lázrele, ne xúgute zrin dxunle ne chee xel-la dxeajlí lazre' chee. ¹² Caní gunle, gucá'ana szrenle La Xránadxu Jesucristo, na' Le' gape' le'e ba lá'ana ne chee xel-la xrlátaje chee Dios cheedxu, ne chee Xránadxu Jesucristo.

2

Benne' xriwe'

¹ Le'e, bi bícha', ca naca chee zra xelá' Xránadxu Jesucristo chee xutupe' dxi'u chee Le', dxata' xúentu' le'e ² chee quebe guchale ca dxéquele, ne quebe súale stebe chee bi dizra' xuluchalaj bénneache lácala xelenné' naca na da dxunezruj Be' Lá'azxa le', u chee xetú bila dizra' xénele, u chee bi xiche xelenné' naca na da gusél-lantu' netu', che dxenná na ba belá' Xránadxu. ³ Quebe güele lataj nu si xe le'e, lawe' da xelalá' bénneache xelebéaj xíchaje' Dios, ne la' bénnea' dxedábague' Dios nédxula gate zrin zra xelá' Xránadxu. Bénnea' dxedábague' Dios, na' ba naca chee' cuía xíqueze', ⁴ na' tábague' xúgute

da naca chee Dios, ne xúgute da dxulucá'ana szren bénneache. Gucá'ana szren cuine' ca zrinte cheajché'e lu xudau' chee Dios, ne gun cuine' ca Diósqueze.

⁵ ¿Quebe dxeajsá lázrele gúchequeza' le'e da nigá gate na' zúalena' le'e? ⁶ Le'e ba nézele Nu Benne' nuzague' bénnea' dxedábage' Dios chee quebe le'e gate quebe ne zrin zra le'e. ⁷ Ba dxun zrin xel-la waca da nagache chee da calela, san zua Nu Benne' nuzague' le na na'a, ca zrin zra xecuasa Bénnea' nuzague' le na. ⁸ Nadxa la' bénnea' dxedábage' Dios, na' Xránadxu Jesús gutie' le', guchínene' be' da dxuaj na dxu'e, ne guzría xi'e le', guchínene' xel-la naxaní' chee zra ze'e. ⁹ Benne' xriwe' na' ze'e ne chee xel-la dxenná bea chee Satanás, na' lu duté xel-la waca chee na gune' da ca' xelunna bea na, ne xel-la waca ca' da zaj naca na wen lazre', ¹⁰ ne guchínene' xúgute da calela ca' chee si xe'e benne' ca' xelebía xi'e, benne' ca' quebe gulaca lazre' xelezíte da li chee xelelé'. ¹¹ Chee le na' Dios dxu'e lataj si xe da calela benne' ca' chee xelájlé'e chee da wen lazre', ¹² chee xelebía xi' xúgute benne' ca' quebe gulaca lazre' xelájlé'e chee da li, san dxeledánedxene' da naca da calela.

Dios guqu'é e dxi'u chee ladxu

¹³ Netu' tu dxál-la'queze xentu' Dios: Xcalenu' ca naca chee le'e, bi bícha'dau', nazrí'i Xránadxu le'e, lawe' da gucá'a Dios le'e nédxute chee lale. Be' Lá'azxa ba nune' le'e chee Dios lawe' da dxéajle chee da li. ¹⁴ Chee gaca chee da nigá Dios ba bláwizre' le'e ne chee dizra' chawe' da dxuchálajntu', chee zru'éle xel-la szren chee Xránadxu Jesucristo.

¹⁵ Chee le na', bi bícha'dau', le se chacha, ne quebe gal-la lázrele da ca' bzéajni'intu' le'e caníqueze, ne cá'aqueze lu xiche. ¹⁶ Dxenaba' lau Xránadxu Jesucristo, ne lau Xradxu Dios, Bénnea' lu duté xel-la xrlátaje chee' bzri'ine' dxi'u, ne ba benne' dxi'u xel-la dxexúe zren chee' tu chi'i gaze, ne tu xel-la dxebeza lazre' li. ¹⁷ Dxenaba' Le' gutipe' lázrele, ne guzé chúchue' le'e chee nnale, ne gunle xúgute da xrlátaje.

3

Pablo dxenné xúene' bíchedxu ca' xelenabe' Dios gácalene' le'

¹ Na'a, bi bícha'dau', le naba Dios gácalene' netu', chee zrínzega dizra' chee Xránadxu xúgute xezre ca', ne chee xelezíte na duté lu xel-la ba lá'ana, ca guca ládujla le'e. ² Le nábaquezle chee ladxu lu na' benne' ca' dxelune' da calela, ne lu na' benne' sban ca', lawe' da quegá xúgute benne' dxelejli lazre' Cristo. ³ Xránadxu naque' li lazre', na' Le' guzé chache' le'e, ne xuxúe' le'e chee quebe bi da calela gaca na chee. ⁴ Dxuxrén lázrentu' Xránadxu gácalene' le'e chee gunle ca da dxénentu' le'e, ca ba dxúnqueze. ⁵ Dxenábantu' lau Xránadxu gácalene' le'e chee gápale xel-la zri'i lazre' da gunna Dios le'e, ne gápale xel-la zren lazre' da gunna Cristo le'e.

Dxal-la' gundxu zrin

⁶ Le'e, bi bícha'dau', lu La Xránadxu Jesucristo dxénentu' le'e quebe gunle tuze núteteze bi bíchedxu quebe dxaca lazre' gune' zrin, ne quebe dxune' ca da bsédentu' le'e. ⁷ Ba nézele dxal-la' gunle zrin ca bentu' netu' gate na' zúalentu' le'e. ⁸ Quebe nu chee gudáguntu' cá'aze che nadxu quebe gudízrujntu' na. Bénle'equezentu' zrin te zra, ne chizrela chee quebe bsaca zi'ntu' le'e da gáguntu'. ⁹ Nácaqueze cheentu' nábantu' le'e da gáguntu', san bentu' zrin chee blé'entu' le'e dxal-la' gunle ca bénquezentu' netu'. ¹⁰ Gate na' zúalentu' le'e, bdentu' lu na'le da nadxixruj bea nigá: Benne' quebe dxaca

lazre' gunę' zrin ca'an gunę' quebe gawe'. ¹¹ Ba bėnentu' bál-lale le'e quebe dxunle zrin, na' dxedázele dxuchixre cheęle da dxaca cheę benne' xula. ¹² Benne' canı dxixruj be'entu', ne dxusebágantu' le' lau Xránadxu Jesucristo cheę xelunę' zrin du lazre' cheę gata' da xele'aj xelawe'.

¹³ Le'e, bi bicha', le gun da xrlátaje, ne quebe cheajtá lázrele. ¹⁴ Che nu benne' quebe dxuzúę' dizra' ca da dxennantu' lu xiche nigá, le nna' nu bėnnea', ne quebe gunle le' tuze, cheę gapa stuę'. ¹⁵ Quebe zrá'ale le', san le guzėjani'i le' ca bi bíchele.

Pablo dxuzé' dizra' bi bícheđxu ca'

¹⁶ Xránadxu naque' Bėnnea' dxunne' dxi'u xel-la dxebeza zri lazre'. Dxenaba' lau Le' gúnnaqueze' le'e xel-la dxebeza zri lazre' lu xúgute da dxunle, ne súalene' xúgutele le'e.

¹⁷ Neda', Pablo nen ná'aqueza' dxuzúaja' cheęle da nigá. Da nigá dxunna bea na xúgute xiche da dxuzúajqueza' neda'. Canı dxuzúaja'. ¹⁸ Dxenaba' lau Xránadxu Jesucristo gunę' da chawe' cheę xúgutele le'e. Ca'an gaca na.

DIZRA' NEDXU BZUAJ SAN PABLO CHEE TIMOTEO

Pablo dxugape' diuzre Timoteo

¹ Neda', Pablo, naca' gubáz chee Jesucristo lawe' da caní bdxixruj bea Dios, Xra Xránadxu Jesucristo, weselá cheedxu, Bénnea' dxebeza lázredxu xelá'teé'.

² Dxuzúaja' da nigá chiu' lue', Timoteo, nacu' ca zrí'inequeza' lawe' da dxeajlí lazru' Cristo. Dxenaba' Xradxu Dios, ne Xránadxu Jesucristo gune' chiu' da chawe', ne xexache lazre' lue', ne gunne' lue' xel-la dxebeza zri lazre'.

Pablo dxusízrene' Timoteo ca naca chee benne' ca' dxulusédené' da wen lazre'

³ Ca ba guta' xúeda' lue' gate na' bezá'a naga zu', ne bexá'a naga nababa xezr la xu Macedonia, begá'ana lu xezre Efeso chee nne xúenu' benne' ca' zaj zre'e na' québedxa xulusédené' da wen lazre', ⁴ ne québedxa xululapa ne'e dizra' dxuluzaze benne' ca' ca zaj naca zánete xra xrtawe' ca'. Dizra' caní dxulutila na bénneache. Quebe naca na da xelácale na bénneache chee xelezé chache' ca dxeleajlí lazre' Dios. Caní dxenné xúeda' lue' xecha lasa.

⁵ Dxenné xúeda' lue' gunu' caní chee xelezrí'i ljwezre' dute lázrdawe', chee quebe bi sua da gagu na zria lázrdawe' ca', ne gaca du lazre' ca dxeleajlí lazre' Cristo. ⁶ Bal-la benne' ca' belexecuase' lu da caní, na' ba zaj nazi'e dizra' xálaze. ⁷ Dxelaca lazre' xuluxuzájle'e da nadxixruj bea Dios, ne quebe dxelájni'ine' da dxuluchálajzeqe', ne ca naca da ca' dxuluxrén lazre'.

⁸ Nezdxu da nadxixruj bea na naca na xrlátaje che nu benne' dxuchínene' na ca naca chee na. ⁹ Dxal-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san chee nna be'e na benne' ca' dxelune' da caleja, ne benne' ca' quebe dxuluzúe' xrtizre'e, ne benne' ca' dxelune' da zrinnaj, ne benne' wen dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute xra xrna', ne benne' ca' dxelutié' benne', ¹⁰ ne benne' ca' dxelune' da sban, ne benne' biu ca', benne' dxulugune' ljwezre biue' ca nu'ula, ne benne' dxelebane' benne' ca' chee xelutié' le' lu na' benne' xula, ne benne' ca' dxelún lazre', ne benne' ca' dxelexechebe' da wen lazre', ne benne' ca' dxuluchuqe' da li. ¹¹ Caní naca da dxulé'e dizra' chawe' da bsebaga Dios neda'. Naque' Dios xabáa, Benne' szrente.

Pablo dxé'e Dios: Xcalenu'

¹² Dxapa' Xránadxu Jesucristo: Xcalenu'. Naque' Bénnea' benne' neda' xel-la waca chee guna' da nigá, lawe' da dxelé'ene' neda' xlátaje, na' nuzúe' neda' lu zrin chee'. ¹³ Xúgute' da caní ba bene' chia' lácala gunnía' schanni' chee Cristo gate nate, ne gudáu zi' xuzra' bi chee' ca', ne ben la' chee benne' ca'. Dios bexache lazre' neda' lawe' da quebe ne cheajlí lazra' Cristo, ne quebe guxéajni'ida' da na' bena'. ¹⁴ Chee le' na' Xránadxu, dute lu xel-la zri'i lazre' zren chee' bnite lawe' chia', ne benne' neda' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo.

¹⁵ Da nigá naca na da li, na' xúgute' bénneache dxal-la' xeléajle'e chee na. Caní dxenná na: Jesucristo ble'e lu xezr la xu nigá chee guselé' benne' dul-la ca', na' neda' nácadxa' benne' dul-la ca xúgute' benne' ca'. ¹⁶ Chee le' na' Dios

bexache lazre' neda' chee gulé'e Cristo ca szren naca xel-la zren lazre' chee' nen neda', nácale'a benne' dul-la, chee gaca' neda' tu da gulé'e na lau xúgute benne' ca' xeleajlí lazre' Cristo, na' xelape' xel-la nabán chadia chacanna. ¹⁷ Chee le na' dxal-la' gápadxu ba lá'ana, ne güe lá'anadxu Bénnea' nna béaqueze' chadia chacanna. ¡Cabata' gatie', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadia chacanna! ¡Ca'an gaca na!

¹⁸ Lue', bi chia', Timoteo, dxusebaga' lue' su' wedil-la chee tíl-lalenu' da naca chee da calela, ca da buluchalaj nédxute benne' ca', benne' gulenné' waláz chee Dios ca dxal-la' gunu' lue'. ¹⁹ Bexru tipa xel-la dxeajlí lazre' chiu', chee quebe bi sua da gulale na lu xichaj lazrda'u. Bal-la benne' ca' quebe belune' caní, na' buluzúe' chalá'ala xel-la dxeajlí lazre' chee'. ²⁰ Caní guca chee Himeneo, ne chee Alejandro, benne' ca' bdea' neda' lu na' Satanás chee xulusédie' quebe xelenné' schanni' chee Dios.

2

Ca dxal-la' guchálajle dxu Dios

¹ Da dxundxa na ba xen dxenné xúeda' lue', dxal-la' ná bale lau Dios gácalene' bénneache, ne guchálajle Dios, ne gucá'ana szrenle Le', ne ná bale Dios gunne' le'e da dxexázrjele, ne xele Dios: Xcalenu'. Dخال-la' gunle caní, guchálajle Dios da naca na chee xúgute bénneache. ² Cá'anqueze dxal-la' ná bale Le' gácalene' benne' xichje ca', benne' dxeleenná be'ene' bénneache, ne benne' xu'u lawe' ca' chee chadxu chawe', ne súadxu lu xel-la dxebeza zri lazre', ne guzúa cuínadxu lu na' Dios du lázredxu, ne gápadxu ba lá'ana bénneache. ³ Da nigá naca na xrlátaje, ne da dxezaca ba lazre' Dios, weselá cheedxu, ⁴ lawe' da dxaca lazre' Le' xelélá xúgute bénneache, ne xelúnbe'e da li. ⁵ Zua tuze Dios, ne zua tuze wenaba chee bénneache lau Dios, Bénnea' naque' Jesucristo, ne cá'anqueze ben cuine' bénneache. ⁶ Jesucristo bzua cuine' lu xel-la gute chee bexá'awe' xúgute bénneache, na' blé'ene' da na' ca bzin zra chee na. ⁷ Chee le na' bzué' neda' gubáz chee' chee cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xelune' ca naca da li. Lau Cristo dxexechéba', ne quebe dxun lazra'.

⁸ Chee le na' dxaca lazra' xuluchálajle xúgute bénneache Dios gáteteze na', ne xelechisa ne'e duté xel-la li lazre' chee' lau Dios, ne quebe xelezré'e ljwezre', ne quebe xeledíl-lalene' ljwezre' ca'. ⁹ Nu'ula ca' dxal-la' xelácué' da naca xlátaje, ne ca naca chee da dxelúe lechítaje cuine' dxal-la' gaca na xel-la dxexruj lazre', ne xel-la du lazre', ne quegá ca dxulupá'a xíchaje', ne quegá lechítaje da naca na oro, ne quegá bga ca', ne quegá zra lané' da zácále'e na. ¹⁰ Dخال-la' xelune' da gácale na bénneache, ca dxal-la' xelún nu'ula ca' ba zaj nuzúa cuine' lu na' Dios. ¹¹ Nu'ula ca' duté lu xel-la dxexruj lazre' chee' dxal-la' xuluzé nague' gate nu dxusede xrtizra Dios, ne quebe xelenné' chee na. ¹² Quebe dxunna' lataj nu'ula gusédene' benne' biu ca', ne quebe nna be'ene' le', san dxal-la' sue' zrize. ¹³ Caní naca na lawe' da ben Dios teca Adán, na' gudé na' bene' Eva, nu'ula chee Adán na'. ¹⁴ Adán, quebe guzi xé da xriwe' le', san guzi xé na Eva, nu'ula na', na' gudé guzi xé na le', na' bene' dul-la. ¹⁵ Tu nu'ula gape' xel-la weselá che dxezane' bidu ca', ne cheajlí lazre' Dios, ne nazri'ine' Le', ne nuzúa cuine' lu na' Dios, ne gague' dxexruj lazre'.

3

Ca dxal-la' xelaca benne' ca' dxulusédene' bi ca' chee Cristo

1 Da líqueze naca da nigá: Che nu benne' dxezá lazre' gaque' benne' gusédenē' bi ca' chee Cristo, tu zrin xrlátaje dxaca lazre' gunē'. 2 Tu benne' dxusédenē' bi ca' chee Cristo:

Dxal-la' gaque' benne' quebe bi zua da dxunite na le'.

Dxal-la' súalēne' tuze nu'ula.

Dxal-la' gaque' benne' dxuzéajni'i cuine',

ne benne' dxenná be'e cuine',

ne benne' nape' ba lá'ana.

Dxal-la' si' lu nē'e benne' xelezrine' lizre'.

Dxal-la' gaque' benne' dxaca dxusédenē' bēnneache.

3 Quebe dxal-la' xé'aje' da guzuzre na le',

ne quebe gutil-le' nu benne',

ne quebe sa lazre' dumí.

Dxal-la' gaque' benne' dxexrux lazre', ne zren lazre'.

4 Dxal-la' nézene' nna be'ene' benne' zaj zre'e lizre',

ne gulé'engē' zrí'ingē' ca' xelácabe' wezúa dizra',

ne xelápabe' ba lá'ana xra xrnabe'.

5 Che nu benne' quebe nézene' ájala nna be'ene' benne' zaj zre'e lizre', z ájazra

gunē' gusédenē' bi ca' chee Dios? 6 Benne' dxusédenē' bi ca' chee Cristo quebe

dxal-la' gaque' benne' za dxúnbeate dizra' chee Cristo, chee quebe gucá'ana

szren cuine', chee quebe cuía xi'e ca guzríá xi' da xriwe'. 7 Cá'anqueze dxal-

la' gaque' benne' nape' ba lá'ana lówela benne' quebe zaj naque' chee Cristo,

chee quebe gata' lataj nu guzúa le' chalá'ala, na' chee quebe chu'e lu na' da

xriwe'.

Ca dxal-la' xelaca benne' dxelácalēne' bi ca' chee Cristo

8 Cá'anqueze benne' ca' dxelácalēne' bi ca' chee Cristo:

Dxal-la' xelaque' benne' zaj nape' ba lá'ana, ne benne' li lazre'.

Quebe dxal-la' xelé'aje' da guzuzre na le',

ne quebe xelaque' benne' dxulucudee'.

9 Dxal-la' xelapa xánnie' da zácale'e chee da dxeajlí lázredxu,

ne quebe bi sua da gagu na zría chee' lu xichaj lázrdawe'.

10 Dxal-la' guxúe xánnele ca dxeledé'.

Te na', che quebe bi zua da dxagu na zria chee', waca xelácalēne' bi ca' chee

Cristo. 11 Zru'ula benne' caní:

Dxal-la' xelaque' benne' zaj nape' ba lá'ana,

ne quebe xelaque' wetupa dizra' bizrux.

Dxal-la' xelaque' du lazre', ne li lazre' ca naca xúgute da dxelune'.

12 Tu benne' dxácalēne' bi ca' chee Cristo dxal-la' súalēne' tuze nu'ula, ne dxal-

la' nézene' nna be'ene' zrí'ingē' ca', ne benne' zaj zre'e lizre'. 13 Benne' ca' dx-

elácalēne' bi ca' chee Cristo, che dxelune' cháwedau' zrin chee', welezrué'engē'

xel-la' ba lá'ana, na' xelezéquedxengē' xuluchálaje' du lazre' ca dxeajlí lázredxu

Jesucristo.

Tu da ble'e Dios dxi'u ca naca da zéajledxu

14 Dxebeza lazra' xídazequeza' xedajnná'a lue', na' dxuzúaja' chiu' da nigá

15 chee' chéajni'inu' che dxezreda', ca dxal-la' gunu' ládujla benne' ca' zaj

nababē' chee Dios, benne' ca' ba bláwizra Dios ban, ne zaj nuxru chache' da

li, ne dxuluxúe xánnie' na. 16 Da li tu da zrentē naca da nigá ble'e Dios dxi'u

ca naca da zéajledxu:

Dios ble'e nigá, ne guque' bēnneache.

Be' Lá'azxa blé'ené' naque' xlátaje.
 Belelé'e gubáz chee xabáa ca' Le'.
 Benne' duté xezr la xu belenne' ca naca chee'.
 Guleajlí lazre' benne' zaj zre'e duté xezr la xu nigá Le'.
 Dios bezi'e Le' xabáa.

4

Ca naca chee benne' ca' dxuluzúe' chalá'ala xel-la dxeajlí lazre' chee'

¹ Be' Lá'azxa ba bdxixruj lie' wazrín zra xulusán bal-la benne' xel-la dxeajlí lazre' chee', na' chjácálené' be' ca' xelezí xé na le', ne xelezí'e ca da xululé'e be' xriwe' ca'. ² Xuluzé nague' ca da xuluséde benne' wen lazre' ca', benne' dxelún láweze da xrlátaje, ne québedxa zaj zua xel-la dxeléquebe'e xichaj lázrdawé', ne zaj naque' lázrdau zizraj, na' quebe zaj nape' xel-la stu' gate dxelún lazre'. ³ Benne' caní quebe dxelu'e latja nu guchaga na', ne cá'anqueze nu xe'aj gagu bal-la da dxágudxu, lácála ben Dios da ca' chee' xelagu benne' ca' dxeajlí lazre' Le', ne benne' ca' zaj núnbe'e da li, ne xelé'e Le'; Xcalenu'. ⁴ Xúgute da ben Dios naca na chawe', ne quebe dxal-la' bi guzúadxu chalá'ala, san dxal-la' sidxu na, ne xedxu Dios; Xcalenu', ⁵ lawe' da naca chawe' lau Dios bíteteze da dxágudxu che dxundxu ca dxenná xrtizre', ne che nábadxu Le' gune' gaca na da chawe'.

Benne' wen zrin xrlátaje chee Jesucristo

⁶ Che dxusédenu' bi bíchedxu ca' da caní, nacu' bi wen zrin chawe' chee Jesucristo, na' nazi lu na'u dizra' chee Dios, ne ca naca da dxusédedxu, da na' zéajlenu'. ⁷ Quebe gulapa na'u da dxuluzaze bénneache, ne dizra' xálaze. Bzazraj cuinu' lu da naca chee Dios. ⁸ Che dxuzazraj cuinu' ca naca lu bel-la' dxen chiu' wácalequeze na lue' late', san che dxuzazraj cuinu' lu da naca chee Dios, wácale na lue' lu xúgute da dxunu', na' naca na da sidxu ba neza lu xezr la xu nigá, ne cá'anqueze lu xezr la xu da za za'. ⁹ Da li naca da nigá, na' xúgute bénneache dxal-la' xeléajlé'e chee na. ¹⁰ Chee le na' dxudé xel-la' zí' cuínadxu dxundxu zrin lawe' da dxebeza lázredxu Dios ban, Bénnea' naque' weselá chee xúgute bénneache, na' dxuselé' benne' ca' dxeajlí lazre' Le'.

¹¹ Da caní dxal-la' gusédenu' bénneache, ne nne' xuenu' le' xelune' na. ¹² Quebe gu'u lataj nu guzúa lue' chalá'ala lawe' da nacu' benne' cuide', san dxal-la' gacu' tu da gulé'e na benne' ca' dxeajlí lazre' Cristo ca dxal-la' xelune'. Gulé'e na le':
 Ne chee da dxuchálaju',
 ne ne chee da dxunu',
 ne ca nazri'inu' le sa' ljwezru',
 ne ca naca Be' Lá'azxa zúalene' lue',
 ne ca dxeajlí lazru' Cristo,
 ne ca nacu' du lazre'.

¹³ Dxácaté xida' neda', ben zi' lazru' gulabu' xiche lá'azxa lávela bénneache, ne gutipu' lazre' bi bíchedxu ca', ne guzéajni'inu' le'. ¹⁴ Quebe gusanu' xel-la waca da benna Dios lue' gate buluzé na' benne' gula ca' xichju', ne gulenne' ca da ble'e Be' Lá'azxa le' ca naca zrin chee Xránadxu da dxal-la' gunu'.

¹⁵ Ben da caní du lazru' chee xelelé'e xúgute bénneache nápazezu' da naca chee Dios. ¹⁶ Bxue xanne' cuinu', ne ca da dxusédenu', ne guzé chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelenne' da guchálaju'.

5

Ca dxal-la' xelaca benne' ca' dxeajlí lazre' Cristo

¹ Quebe cun til-lu' tu benne' gula, san bzéajni'i le' ca xráquezu'. Gúcale benne' cuide' ca' ca bi bíchequezu'. ² Gúcale nu'ula gula ca' ca xrnáquezu'. Gúcale nu'ula cuide' ca' ca bi zánquezu', dutę lu xel-la dxapa ba lá'ana chiu'.

³ Gúcale nu'ula ba nate benne' cheę, nu'ula' quebe nu xrtię' zradxa. ⁴ Che tu nu'ula ba gute benne' cheę ne zaj zra' zrí'ine', u zre suę, lebe' dxal-la' xelunbe' ca da zaj nabágabe' cheę xelácalębe' benne' zaj naca xrtíaquezbe', ne xelunbe' ca da zaj nabágabe' cheę xra xrnabe', lawe' da naca na xrlátaje, ne da dxezaca ba lazre' Dios. ⁵ Nu'ula da li québedxa nu chilá' cheę dxebeza lazre' Dios, ne dxuchálajęę' Dios te zra, ne chizrela. ⁶ Nu'ula caní, che dxunę' ca da dxezaca ba lazre' léquezeę, naqueę' ca benne' ba nate. ⁷ Bdxixruj be'e benne' ca' xelunę' caní, cheę quebe gun na ba xen nu til-la le'. ⁸ Che nu benne' quebe dxebé'ę gunne xue cheę benne' ca' zaj naqueę' tuze, ne da dxun na ba xen che quebe dxácalęę' xrtíaqueze', ba bsane' xel-la dxeajlí lazre' cheę, ne nácadxe' benne' węn da zrinnaj ca tu benne' quebe ne chéajle'ę cheę Dios.

⁹ Lu xiche naga zria la nu'ula ca' quebe nu chilá' cheę, benne' dxácalele, dxal-la' guzúajle la nu'ula caní, nu'ula na' ba gudée' ga xun iza, ne guzúa tuze benne' cheę'. ¹⁰ Dخال-la' gaque' nu'ula ba bęnle'ę da xrlátaje ca da caní:

Che ba bsegule' zrí'ine' ca'.

Che ba guzi' lu ne'ę benne' bíchedxu belezrín lizre'.

Che ba gúcalęę' benne' caní dutę lu xel-la dxexruj lazre' cheę'.

Che ba gúcalęę' benne' dxedéę' xel-la zi'.

Che bi xetú da xrlátaje ba bęę'.

¹¹ Quebe guzriale lu xiche na' nu'ula caní che quebe ne xelezríę' ga xun iza lawe' da gagaze xucuasa xel-la dxelezá lazre' cheę' le' lu da naca cheę Cristo, na' xelaca lazre' xuluchaga ne'ę xecha lasa, ¹² na' xelegague' zria lawe' da bulusanę' ca da gulechebe lazre' cheę Cristo. ¹³ Cá'anqueze che dxeledé' tu tu xu'u, xelaque' zrawęde, ne quegaze zrawęde, san cá'anqueze xelaque' wetupa dizra' bizruj, na' xuluchixre cheę' lu xúgutę da xelennę', ne xelenné' da quebe dxal-la' xelenné'. ¹⁴ Cheę le' na' dxaca lazra' xuluxuchaga ne'ę che ne zaj naque' nu'ula cuide', ne xelezrá zrí'ine', ne xuluxúę' lizre', cheę quebe xelezi lataj xelezi tizra benne' ca' dxelezre'ę dxi'u. ¹⁵ Bal-la nu'ula caní ba belexecuase' cheę Cristo, ne zjácaleęę' da xriwę'.

¹⁶ Che nu benne' dxeajlí lazre' Cristo, benne' biu, u nu'ula, che zua xrtię' naque' nu'ula ba gute benne' cheę, dxal-la' gácalęę' le' cheę quebe xelegaga bi ca' cheę Cristo da nigá, na' benne' caní welezeque' xelácalęę' nu'ula caní québedxa nu chilá' cheę'.

¹⁷ Che zaj zra' benne' gula ca' dxulusédene' cháwedau' bi ca' cheę Cristo, dxal-la' gápale'ęle benne' ca' ba lá'ana, na' dxundxa na ba xen gápale ba lá'ana benne' gula ca' dxuluchálajęę' le'e dizra' cheę Dios, ne dxulusédene' le'e. ¹⁸ Lu xiche lá'azxa dxenná na: Quebe cu'ule xixruj dxu'a bezre, bę dxíchujba' zrua' xtila. Cá'anqueze dxenná na: Benne' węn zrin dxal-la' si'ę xrlázruje'.

¹⁹ Quebe guzę nagu' che nu gagu zria cheę tu benne' gula cheę xudau' che quebe xeelá' chupa u chunna benne' xelexechebe'. ²⁰ Benne' ca' dxelúnqueze' dul-la, dxal-la' til-lu' benne' ca' lówela xúgutę bi ca' cheę Cristo, cheę xelezrebe xezícadxa benne' ca'. ²¹ Lau Dios, ne lau Xránadxu Jesucristo, ne lau gubáz blau ca' cheę xabáa cheę, dxusebaga' lue' cheę gunu' da caní.

Dxenné xueda' lue' quebe cueu' ca zaj naca benne', ne quebe gucha'u ca gunu' chee tu tu benne'. ²² Quebe xexúbenu' nu la guzúateu' lu zrin chee Cristo chee quebe bagu' dul-la chee benne' xula. Quebe gulapa na'u ne tu da calela.

²³ Lawe' da quebe chawe' zua le'u, ne tu lize dxaca na, québedxa xé'aju' nísaze, san güe'e late' xrise uva wal-la.

²⁴ Zaj nalá' dul-la chee bal-la benne' gate quebe nu ne guchi'a ca da zaj nunge', san dul-la da zaj nun xezícadxa benne' ca' xululé'e lawe na te na'.

²⁵ Cá'anqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

6

¹ Benne' zaj nada'u dxal-la' xelápalé' ba lá'ana xrané' ca' chee quebe nu nne schanni' chee Dios, ne chee da dxusédedxu. ² Che benne' zaj nada'u, zaj zra' xrané' ca' dxelejil' lazre' Cristo, quebe dxal-la' xuluzúe' le' chalá'ala lawe' da zaj naque' benne' biche', san dxal-la' xelunge' zrin da nácadxa xrlátaje chee xrané' ca' dxelezi'e ba neza zrin na', lawe' da dxelejil' lazre' Cristo, ne zaj naque' benne' biche' zaj nazri'ine'. Bzéajni'i benne' ca' da nigá ne bsizre le'.

Da calela da dxuluséde benne', ne xel-la gunní'a li

³ Che nu benne' dxusédene' da zaj naca calela da quebe zaj naca na tuze ca da bséde Xránadxu Jesucristo, ne ca da dxuséde da dxéajlédxu chee Dios, ⁴ benne' nigá dxucá'ana szren cuine', ne quebe bi nézene'. Dxezá lázrele'e gutil-le' benne' dizra' ca naca chee tu tu dizra' ca'. Benne' dxelún caní: Dxelaque' benne' xre lazre', ne dxeledil-le',

ne dxulucháchale' ljwezre',
ne dxeléquene' dxun le sa' ljwezre' da calela,

⁵ ne tu lize dxulutil-la dizra' ljwezre',
ne zaj naque' benne' zaj nazrinnaj lu xichaj lázrdawe',
ne quebe zaj nunbe'e da li.

Dxeléquene' zrin dxundxu chee Cristo naca na tu da waca xuluchínene' chee xelaque' benne' gunní'a. Quebe gunu' tuze benne' caní. ⁶ Da li da zéajlédxu chee Cristo naca na tu da gunní'a zren, na' caní nácaqueze chee tuze bénnea' dxezaca ba lazre' ca da nape'. ⁷ Quebe bi núadxu gate gúlajdxu lu xezr la xu nigá, ne quebe bi xexúadxu gate xezá'adxu nigá, ⁸ san che de' da gágudxu, ne zra lánadxu, dxal-la' xezaca ba lázredxu nen da ca'. ⁹ Benne' ca' dxelaca lazre' xelaque' gunní'a, cheajlecházie' lu na' da xriwe', na' cheajlechu'e lu xralaj chee le' na, chee xelezá lazre' da xálaze, da dxulucá'ana ditaj na bénneache, ne dxelegú'u na bénneache lu da ba xa' naga xelebía xi'e. ¹⁰ Benne' nazri'ine' dumí dxuné' xúguté' da calela, na' zaj zra' bal-la benne' gulezá lazre' na, na' bulusané' xel-la dxelejil' lazre' chee', na' ba gulezí' lataj xel-la dxudía lu lázrdawe'.

Da dxusizre Pablo Timoteo

¹¹ Lue', wen zrin chee Dios, gucuasa lu da caní. Ben da naca xlátaje, ne bzua cuinu' lu na' Dios, ne guxeajil' lazre' Cristo, ne bzri'i le', ne guca zren lazre', ne dxexruj lazre'. ¹² Gudíl-lale' da xriwe', guchínenu' xel-la dxeajil' lazre' chiu'. Bexru tipa xel-la nabán da chadía chacanna lawe' da bláwizra Dios lue' chee gapu' da nigá, na' ba blé'enu' ca dxeajil' lazru' Cristo lávela zane' benne' dxelexechebe' chee na. ¹³ Na'a, lau Dios, Bénnea' nuzúe' xel-la nabán chee xúguté' da naca ban, ne lau Jesucristo, Bénnea' cá'anqueze blé'ene' da naque', ne bechebe' chee na lau Poncio Pilato, dxenné xueda' lue'. ¹⁴ Guzú' dizra' ca da

dxapa' lue', ne quebe gucha'u na. Dخال-la' gunu' na chee quebe nu seque' bi nne chiu' ca zrin zra xelá' Xránadxu Jesucristo. ¹⁵ Ca zrin zra chee na Dios sel-le' Le'. Naque' Dios tu licha', na' Benne' Lá'azxa dxenná be'e. Naque' Wenná bea, Benne' dxenná be'ene' wenná bea ca', ne naque' Xrana xúgute benne' zaj naque' xrana bénneache. ¹⁶ Tuze Dios quebe gati'e', ne zue' lu xel-la naxaní' naga quebe nu seque' cheaj. Netú bénneache quebe ne lé'ene' Le', ne quebe nu gaca le'e Le'. Chee Le' naca xel-la ba lá'ana, ne xel-la dxenná bea chadía chacanna. ¡Ca'an gaca na!

¹⁷ Gunné xue benne' zaj naque' gunní'a lu xezr la xu nigá chee quebe xulucá'ana szren cuine', ne quebe xuluxrén lazre' xel-la gunní'a chee', lawe' da quebe naca na da chadía chacanna. Dخال-la' xuluxrén lazre' Dios ban, Bénnea' dxúnnale'e dxi'u xúgute da dxechínedxu chee sidxu da ba neza. ¹⁸ Gunné xue benne' caní xelune' da xrlátaje, ne xelaque' benne' gunní'a lu da xrlátaje da xelune', ne bi xulunézruje' benne' xache' ca', ne xulunézrujle'e na. ¹⁹ Caní gaca, xelezrué'ene' xel-la gunní'a da gaca na tu da guzúa chacha na le' lu zra da za za', ne xelape' xel-la nabán da zeajlí canna.

²⁰ Lue', Timoteo, bxue xanne da nuzúa Dios lu na'u. Quebe guzé nagu' dizra' xálaze chee xezr la xu nigá, da na' dxelenná bal-la benne' naca na xel-la sina. Da nigá naca na da wen lazre'. ²¹ Bal-la benne' gulezí'e na, na' bulusane' xel-la dxeleajlí lazre' chee'. Dxenábeda' Dios guné' da chawe' chiu'. ¡Ca'an gaca na!

DIZRA' GUDXUPE' DA BZUAJ SAN PABLO CHEE TIMOTEO

Pablo dxugape' diuzre Timoteo

¹ Neda', Pablo, naca' gubáz chee Jesucristo lawe' da guca lazre' Dios gaca' caní, chee cu'a lban ca naca xel-la nabán da guchebe lazre' Dios gunne' chee benne' ca' zaj naque' bi chee Jesucristo. ² Dxuzúaja' da nigá chiu' lue' Timoteo, bi chia' nazri'i lazra', na' dxenaba' Xradxu Dios, ne Xránadxu Jesucristo guné' da chawe' chiu', ne xexache lazre' lue', ne gunne' chiu' xel-la dxebeza zri lazre'.

Pablo dxusízreng' Timoteo chee gunbe' zrin chee Cristo

³ Te zra ne chizrela gate dxuchálajlëna' Dios, ne dxeajsá lazra' lue', dxápequeza' Dios: Xcalenu', Bénnea' dxuna' zrin chee', ne quebe bi zua da dxagu na zria lu xichaj lázrdawa'. Dxuna' zrin na' ca belúnqueze xra xrtawa' ca'. ⁴ Dxeajsá lázrqueza' ca gudxezru' gate na' bezá'a naga zu', ne dxaca lázrelé'a xelé'eda' lue' chee gápale'a xel-la dxebé. ⁵ Cá'anqueze dxeajsá lazra' xel-la dxeajlí lazre' li da napu'. Xrna'u gula, Loida, ne xrna'u, Eunice gulape' xel-la dxeajlí lazre' caní, na' nuxrén lazra' lue' nápaquezu' na.

⁶ Chee le' na' dxuzéajni'ida' lue' guchínenu' ca da benna Dios lue' gate na' bzea' na'a xichju', ne gunaba' gun Dios da chawe' chiu'. ⁷ Be' Lá'azxa benna Dios dxi'u quebe dxuné' dxi'u bi zra chebe, san dxunne' dxi'u xel-la wal-la, ne xel-la zri'i lazre', ne dxuné' dxi'u benne' dxenná be'e cuina. ⁸ Chee le' na' quebe gapa stu' ca naca chee Xránadxu, ne cá'anqueze ca naca chia' neda', xu'a lizre xia nigá lawe' da dxuna' zrin chee Cristo, san bchaga lau lue' xel-la zi' da dxeledé benne' ca' dxuluchálaje' dizra' chawe' chee Jesús, na' Dios gutípaqueze' lazru'. ⁹ Dios bselé' dxi'u, ne bláwizre' dxi'u chee guzúa cuínadxu lu na' Le', quegá lawe' da bendxu tu da xrlátaje, san lawe' da guca lázrequeze Le' gaca na caní, ne lawe' da bzri'ine' dxi'u, nazrágadxu chee Cristo. Dios bzri'ine' dxi'u gate quebe ne gunte' xezr la xu nigá, ¹⁰ na' blé'engé' xel-la zri'i lazre' nigá na'a, lawe' da gusel-le' Jesucristo, weselá cheedxu, na' bzria xi'e xel-la dxenná bea chee xel-la gute, ne blé'engé' bënneache ca gaca xelezi' lu ne'e xel-la nabán chadía chacanna, ca dxennáqueze dizra' chawe' da dxuchálajdxu.

¹¹ Dios bzué' neda' chee guchálaja' ca naca dizra' chawe' nigá, ne bené' neda' benne' gubáz chee' chee gusédeda' benne' quebe zaj naque' judío. ¹² Chee le' na' dxedéa' xel-la zi' caní. Quebe dxapa stu'a ne chee da nigá, lawe' da núnbe'a Bénnea' nuxrén lazra', ne nezda' napé' xel-la waca cu'u chawe' da nuzúa' lu ne'e ca zrindxa zra na'.

¹³ Bexru tipa ca naca dizra' da bsédeda' lue', ne quebe gusanu' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo.

¹⁴ Ne chee xel-la waca chee Be' Lá'azxa, Bénnea' zué' xichaj lázrdaudxu, bexru tipa da na' nuzúa Dios lu na'u.

¹⁵ Ba nézenu' ca belún xúgute' bi bíchedxu zaj zre'e naga nababa Asia. Gulebéaj xíchaje' neda'. Cá'anqueze Figelo, ne Hermógenes beluné' tu zren benne' ca'. ¹⁶ Dxenaba' Xránadxu xexache lazre' benne' zaj zre'e lizre Onesíforo. Gúcale le' neda' zane' lásaqueze, ne quebe gudapa stué' chia' neda', xu'a lizre xia. ¹⁷ Gate blé'engé' xezre Roma, bexilaje' neda', na' bezrélené' neda'.

18 Dxenaba' Xránadxu xexache lazre' le' lu zra ná' gate xelá' Le'. Ba nézenu' ca gúcalele'ene' dxi'u lu xezre Efeso.

2

Benne' wen zrin du lazre' chee Jesucristo

1 Lue', zri'ina', guzé tipa ne chee da xrlátaje da nápadxu lawe' da nácadxu bi chee Jesucristo. 2 Ca da bennu' bchálaja' lávela benne' zan, benne' belexechebe' naca na da li, bzua na lu na' benne' zaj naque' li lazre', benne' xelexéque' xulusédené' na benne' xula.

3 Lue' dxal-la' gacu' benne' wen zrin du lazre' chee Jesucristo, guchaga lau' xel-la zi' ca tu benne' zeje' wedil-la. 4 Netú benne' zeje' wedil-la, benne' xu'e lu zrin chee xrané', quebe dxuné' zrin xula, lawe' da dxaca lazre' xezaca ba lazre' xrané' chie'. 5 Cá'aqueze, benne' xu'e lu witaj quebe zrue'ene' da xexale' che quebe quitaje' ca naca chee na. 6 Cá'aqueze benne' dxaza dxa'ana, benne' dxúnle'e zrin, dxal-la' xezí' lu ne'e lina chee'. 7 Blaba lazre' ca da dxapa' lue', na' Xránadxu guzéajni'ine' lue' xúgute na.

8 Bsa lazre' ca naca chee Jesucristo, guque' xrtia David, ne bebane' ládujla benne' gate, ca dxenná dizra' chawe' da dxuchálaja' neda'. 9 Ne chee dizra' chawe' nigá dxedé' xel-la zi', ne xu'a lizre xia nigá ca tu benne' wen da zrinnaj, san dizra' chee Dios quebe nu seque' cu'u le na lizre xia. 10 Chee le na' xúgute da ca' dxuchaga lawa' ne chee benne' ca' ba gucá'a Dios le', chee cá'aqueze benne' ca' xelexé' ne chee Jesucristo, ne xelexexú'e lu xabáa chadía chacanna.

11 Da nigá naca na da li:

Che nuzúa cuínadxu gátedxu ca bzua cuina Le',
cá'aqueze waca bandxu nen Le'.

12 Che dxededxu xel-la zi',
na' nna béaquezdxu tu zren nen Le'.

Che quebe xechébedxu nácadxu bi chee Le',
cá'aqueze Le' quebe xechébe' nácadxu bi chee'.

13 Che dxi'u quebe nácadxu li lazre',

Le' nácaqueze' li lazre'.

Dios québequeze guché'e ca naque'.

Tu benne' wen zrin du lazre'

14 Bsa lazre' bi bíchedxu ca', ne bsizre le' lu La Xránadxu québedxa xulutil-la dizra' ljwezre'. Xel-la dxutil-la dizra' ljwezre quebe bi culuén napa na, san dxuxrinnaj na xichaj lázrdau benne' ca' dxelénne' na. 15 Ben ba xuzre gacu' wen zrin du lazre' lau Dios, na' quebe gaca xel-la stu' chiú', lawe' da dxuchínenu' xrlátaje dizra' li. 16 Quebe gulapa na'u dizra' xálaze, ne dizra' sban da dxuluchálaje bènneache, da ca' dxulucuasa na bènneache lu da naca chee Dios. 17 Dizra' sban caní dxuluxrinnaj na xichaj lázrdau bènneache ca dxun tu we' da dxuzru na lu bel-la' dxen cheedxu. Caní guca chee Himeneo, ne Fileto, 18 benne' ca' gulecuase' lu xel-la li, na' dxelenné' ba belexebán benne' gate, na' dxuluxrinnaje' xel-la dxeajlí lazre' chee bal-la benne'. 19 Dios ba gudixruj bi'e xrtizre' da naca na ca tu lane xu'u chee xel-la dxeajlí lazre' cheedxu, da dxenná caní: Xránadxu núnbe'e bi chie' ca' Cá'aqueze dxenná na: Xúgute bi ca' chee Cristo québedxa dxal-la' xeluné' da caléla.

20 Tu lu xu'u zaca, quegá zra' tuze zriga xé'ena da zaj naca na oro ne plata, san cá'aqueze zaj zra' da zaj naca na xiaj ne xu. Dxuluchínene' da ca' zaj

zácadxa lu da zaca, na' xezícadxa da ca' dxuluchínene' ájateze. ²¹ Nácadxu ca zriga xé'ena ca'. Che nu benne' dxaca lazre' gaque' ca tu da zaca, chee gaque' benne' guchine Xránadxu lu zrin xrlátaje chee', dxal-la' xexadxé' ca naca da calela ca'.

²² Bxue xanne' cuinu' ca zaj naca da ca' dxelezá lazre' benne' cuide' ca', ne quebe gusanu' da xrlátaje da dxunu', ne ca dxeajlí lazru' Cristo, ne ca nazri'inu' Le', ne ca dxebeza zri lazru', da ca' dxunu' tu zren nen xúgute benne' ca' du lazre' dxululáwizre' Xránadxu. ²³ Quebe gulapa na'u dizra' xálaze, ne dizra' quebe zeaj xrlátaje, lawe' da nézenu' dxuluzúa na bénneache lu da ba xa'.

²⁴ Benne' wen zrin chee Xránadxu:

Quebe dxal-la' til-lalene' benne'.

Dxal-la' gaque' zri'i lazre' nen xúgute bénneache.

Dxal-la' gaque' benne' dxezeque' gusédene' bénneache.

Dxal-la' gaque' zren lazre',

²⁵ ne duté xel-la dxexruj lazre' gusízrene' benne' dxelune' da calela.

Caní dxal-la' gune' che ba benla Dios xelexexéaje lazre' benne' ca chee xelúnbe'e da li, ²⁶ na' xelelé' lu xralaj chee da xriwe', naga nuzrá na le', na' dxelune' ca da dxenná le na.

3

Ca xelaca bénneache lu zra bzebe

¹ Cá'anqueze dxal-la' nézele lu zra bzebe ni' gaca na stebe chee bénneache.

² Bénneache ca' xelaque':

Benne' xelezrí'ize cuina, ne xelezrí'ine' dumí.

Xulucá'ana szren cuine',

ne xulucá'ana cuine' ca benne' blau ca'.

Xelenné' schanni' chee Dios,

ne quebe xuluzúe' dizra' chee xra xrne'e.

Xelaque' benne' quebe dxelezi le,

ne benne' quebe dxelapa ba lá'ana Dios.

³ Quebe xelaque' zri'i lazre',

ne quebe xelexexache lazre' ljwezre'.

Xelenné' chee ljwezre', ne quebe xelenná be'e cuine'.

Xelaque' benne' snia ca', ne xuluzúe' chalá'ala da naca xrlátaje.

⁴ Quebe xelaque' li lazre' nen ljwezre'.

Xelaque' benne' dxelexube.

Xeléquene' zaj naque' benne' szrente.

Xelexezaca ba lázredxene' da ca' dxeledánene' quézcala da naca chee Dios.

⁵ Lácala xululé'e cuine' ca benne' zaj naque' chee Dios,

quebe súale le' xel-la waca chee Dios.

Quebe gunu' tu zrén benne' ca'. ⁶ Ca zaj naca benne' caní zaj naca benne' ca'

zjaque' tu tu xu'u, ne dxelezi xe'e nu'ula quebe zaj zie' du lazre', ne zaj zua da

dxagu na zria lázrdawe' da naca chee xtul-le'. Xel-la dxelezá lazre' chee nu'ula

caní nazrube xu na le'. ⁷ Lácala tu dxulusédezqueze' chee xel-la li, cabata'

dxeléajni'iquezne' na. ⁸ Ca belún Janes ne Jambres, benne' wazrá' ca', benne'

ca' guledábague' Moisés, cá'anqueze dxelún benne' caní, dxeledábague' xel-la

li. Zaj nazrinnaj xichaj lázrdawe', ne belexeuase' lu xel-la dxeajlí lazre' chee

Dios. ⁹ Quebe bi xelezrué'e benne' caní, lawe' da xelexe bé'equenze xúgute

bénneache zaj naque' benne' xálaze, ca gulaca benne' chupa ca' guledábague' Moisés.

Da bzebe da dxusebaga Pablo Timoteo

¹⁰ Ba benu':

Ca da bzéajni'ida' bénneache, ne blé'eqeznu' ca bénqueza'.

Nézenu' da dxaca lazra' guna, ne ca dxeajlí lazra' Cristo.

Bchaga lawa' da guzxaca', ne nazrí'ida' xúgte bénneache.

Nézenu' ca naca xel-la zren lazre' chia'.

¹¹ Blé'enu' ca guláu zi' xuzre' neda', ne ca gudéa' xel-la zi'.

Nézenu' xúgte da guzraca' lu xezre Antioquia, ne xezre Iconio, ne xezre Listra.

Guláu zi' xuzre benne' ca' neda', na' Xránadxu bselé' neda' lu xúgte da ca'.

¹² Xúgte benne' ca', benne' dxelaca lazre' xelúnqueze' ca da dxenná Jesucristo, weláu zi' xúzrequeze bénneache le'. ¹³ Benne' ca' dxelune' da calela, ne benne' dxelezí xé'e welúndaqueze' da calela. Xelezí xé'e bénneache, na' benne' xula xelezí xé'e benne' caní.

¹⁴ Lue', guzé chacha ca da ba naxéajni'inu', da na' nuxrén lazru'. Nézqueznu' nu bsede lue', ¹⁵ na' ne nácateu' bídau'te ba núnbe'u da dxenná lu xiche lá'azxa, da dxezeque na guzéajni'i na lue', chee lau' lawe' da dxeajlí lazru' Jesucristo.

¹⁶ Xúgte da naxúaj na lu xiche lá'azxa naca na da bzéajni'i Dios benne' ca' zaj naque' bi chee Le', ne naca na da dxuzéajni'i na dxi'u, ne da dxedil-la na benne' dxelune' da calela, ne da dxusizre na dxi'u, ne da dxulé'e na dxi'u ca dxal-la' gundxu da xrlátaje, ¹⁷ chee gaca du lazre' bi chee Dios, na' gácabe' bi nazeđe xanne chee gunbe' xúgte da xrlátaje.

4

¹ Lau Dios, ne lau Xránadxu Jesucristo, Bénnea' guchi'e chee benne' ban ca', ne chee benne' gate ca' gate ze'e xedajnná be'e, dxusebaga' lue' ² guchálaju' dizra' chee Dios, ne gunu' ba xuzre guchálaju' che xuluzé naga bénneache, ca xuluzé nague'. Bzéajni'i benne' ca' duté xel-la zren lazre' chiu', ne ble'e le' ca da zaj nabague'. Gudil-la, ne bsizre benne' ca'. ³ Caní dxal-la' gunu' lawe' da wazrín zra québedxa xuluzé naga bénneache chee xel-la li da dxusédedxu. Ca dxelezá lázrqueze le', xulunné' zane' benne' xulusédené' le' ca da dxelaca lázreze le' xelenne'. ⁴ Québedxa xuluzé nague' da li. Wuluzé nague' dizra' da dxuluzaze bénneache. ⁵ Na' lue', bzéajni'i cuinu' lu xúgte da caní. Bchaga lau xel-la zi' da teu'. Bzua cuinu' chee guchálaju' dizra' chawe' chee Cristo, ne ben zrin da nabagu' chee Cristo.

⁶ Ba bzin zra guzúa' xel-la nabán chia' lu na' Dios, lawe' da ba zua bagu xelutié' neda'. ⁷ Du lazra' gudábaga' benne' ca' guledábague' da naca chee Cristo. Tu bénezqueza' ca naca da li chee', ne ba bexuzre beña' da bsebaga Cristo neda' guna'. ⁸ Lawe' da beña' da xrlátaje, na'a ba dxebeza da dxexala' neda', da na' gunna Xránadxu neda' lu zra na', ne quegá tuza' neda' gunne' na. Cá'anqueze gunézruje' na chee benne' ca' duté xel-la zri'i lazre' chee' dxelebeze' zra xelé'e.

Pablo dxulé'eng' Timoteo ca dxal-la' gunbe'

⁹ Ben ba xuzre xídazeu' xedajnná'u neda'. ¹⁰ Ba guleaj xichaj Demas neda' lawe' da dxedánedxabe' da naca chee xezr la xu nigá, ne ba zexíajbe' Tesalónica. Crescente ba gusel-la'-be' zexíajbe' naga nababa Galacia, na' Tito gusel-la'-be' naga nababa Dalmacia. ¹¹ Tuze Lucas zúalebe' neda'. Bexilaj

Marcos, na' guché'-be' tu zrén len lue', lawe' da wazéquebe' gácalebe' neda' lu zrin chee Cristo. ¹² Tíquico gusel-la'-be' lu xezre Efeso. ¹³ Gate xidu', gúagu' gabán chia' da nucá'ana' xezre Troas lizre Carpo. Cá'anqueze gu'u xiche ca' bcá'ana' ga na', ne da dxunte na ba xen gu'u xiche ca' zaj naca na xide.

¹⁴ Alejandro, benne' gubizre xia bsaca' zí'le'e neda'. Xránadxu gunézruje' lazruj chee' ca da bene'. ¹⁵ Bxue xanne cuinu' chee benne' nigá lawe' da ba gudábagale'e dizra' da dxuchálajdxu.

¹⁶ Da nedxu lasa gate becheba' ca naca chia' lau benne' xu'u lawe' ca', netú benne' quebe gúcalene' neda'. Xúgute' buluzá' xíchaje' neda'. ¹⁷ Gúcale Xránadxu neda', ne btipe' lazra' chee guzéqueda' bchálaja' dizra' chawe' lau xúgute' benne' ca' quebe zaj naque' judío. Ca'an guca bselá Xránadxu neda' lu na' benne' ca', ca dxun benne' dxuselé' béadu ca' lu dxu'a bezre xixre', ¹⁸ na' guseláqueze' neda' lu xúgute' da calela, ne guxúequeze' neda' ca zrin zra xezrina' xabáa naga dxenná bea Le'. ¡Gaca báqueze Le'! ¡Ca'an gaca na!

Benne' chee Cristo dxulugapa diuzre ljwezre'

¹⁹ Dxugapa' diuzre Priscila, ne Aquilo, ne benne' zaj zra' lizre Onesíforo.

²⁰ Erasto begá'anabe' xezre Corinto, na' bcá'ana' Tróximo lu xezre Mileto lawe' da quebe chawe' zúabe'. ²¹ Ben ba xuzre xidu' nigá dxácaté quebe ne chú'udxu beu' zaga. Eubulo, ne Pudente, ne Lino, ne Claudia, ne xúgute' bi bíchedxu zaj zre'e nigá dxulugape' lue' diuzre.

²² Dxenaba' Xránadxu Jesucristo súalene' lue', ne dxenaba' Dios gune' da chawe' chee xúgutele le'e. ¡Ca'an gaca na!

DIZRA' DA BZUAJ SAN PABLO CHEE TITO

Pablo dxugape' Tito diuzre

¹ Neda', Pablo, naca' wən zrin chee Dios, ne gubáz chee Jesucristo chee guzéajni'ida' benne' ca' ba gucá'a Dios chee xelejli lazre' Cristo, ne xelúnbe'e da naca li lazre' chee da naca chee Dios, ² ne chee xebeza lazre' xel-la nabán chadía chacanna, da guchebe lazre' Dios gunne' cheedxu gate za gunte' xezr la xu nigá. Dios quebe dxun lazre', ³ na' na'a, ca ba bzrin zra chee na, ba bzéajni'ine' dxi'u ca naca xrtizre' ne chee da bxrize' Dios neda' cu'a lban chee na. Dios nácaqueze' weselá cheedxu. ⁴ Dxuzúaja' da nigá chiu', Tito. Nacu' ca zrí'inequeza' lawe' da dxeajli lázredxu Cristo. Dxenaba' lau Xradxu Dios, ne lau Xránadxu Jesucristo, Benne' weselá cheedxu, gune' chiu' da cháwedau', ne xexache lazre' lue', ne gunne' lue' xel-la dxébeza zri lazre'.

Zrin da dxun Tito lu xezr la xu Creta

⁵ Bcá'ana' lue' lu xezr la xu Creta da naxechaj nisa chee gucá'ana chawu' da quebe begá'ana chawe' ládujla bíchedu ca', ne chee gunnitu' benne' gula chee xudau' tu tu xézredu ca', cáteze bxriseda' lue' gunu'. ⁶ Tu benne' gula chee xudau':

Dxal-la' gaque' benne' quebe bi zua da gagu na chie'.

Dxal-la' súalene' tuze nu'ula.

Zrí'ine' dxal-la' xelácabe' bi ba dxéajli lázrebe' Cristo.

Quebe bi da zrinnaj dxelún zrí'ine' ca',

ne quebe gaca nu gagu zria chee da dxelunbe'.

⁷ Lawe' da xu'u lu ne'e zrin chee Dios, tu benne' dxuxúe' benne' zaj nababe' chee Cristo:

Dxal-la' gaque' benne' quebe bi zua da gagu na zria chee'.

Quebe dxal-la' gaque' benne' dxucá'ana szren cuine'.

Quebe dxal-la' gaque' benne' xichaj zra'a.

Quebe dxal-la' gaque' benne' dxé'aje' da dxuzuzre na le'.

Quebe dxal-la' gaque' benne' dxedíl-lalene' bėnneache.

Quebe dxal-la' gaque' benne' dxucúde'e.

⁸ Dxal-la' súateze' si' lu ne'e benne' zjaque' lizre'.

Dxal-la' gune' da naca cháwedau'.

Dxal-la' gaque' benne' nna be'e cuine'.

Dxal-la' gaque' benne' xrlátaje.

Dxal-la' gaque' benne' nuzúa cuine' chee Dios.

Dxal-la' gaque' benne' dxuzéajni'i cuine'.

⁹ Dxal-la' gaque' benne' nuzúa cuine' chee dizra' li.

Dizra' li naca na da bsedu nu benne' le' chee séquene' gusízrene' benne' xubla ne chee da li da dxusédene', ne chee séquene' guzextruje' lazre' benne' ca' dxelenné' chee da li na'.

¹⁰ Caní dxal-la' gune' lawe' da zrále'e benne' dxelenné' chee dizra' li, benne' dxelezí xe'e benne' xubla lu da xala da dxlenné'. Zane' benne' Israel dxelune' caní. ¹¹ Dxal-la' guzúa zriu' benne' dxelune' da caní lawe' da dxuluxrinnaje' xichaj lázxdau xúgute' benne' zaj zra' tu tu xu'u naga dxelú'e chee xulusédene' da quebe naca xrlátaje. Dxelune' caní chee xelezí' lu ne'e dumí. Da nigá da dxelune' naca na da calela.

¹² Tu benne' Creta naga zu', benne' gunné' waláz chee xudau' chee benne' ca', gunné': "Benne' Creta zaj nácaqueze' wən lazre', ne zaj naque' ca be snia ca', ne zaj naque' benne' wagu xrata', ne zrawede." ¹³ Da li gunné'. Chee le na' gudíl-laqueze benne' ca' chee xelaque' li lazre' ca dxelejli lazre' Cristo, ¹⁴ ne chee quebe xuluzé nague' dizra' da dxuluzaze benne' Israel ca', ne ca naca da nadxiruj bea ca' da dxelún benne' ca' dxuluzúe' chalá'ala dizra' li.

¹⁵ Xúgute naca na xrlátaje chee benne' ca' zaj naca xrlátaje xichaj lázrdawe', san chee benne' ca' dxelune' da sban, ne québedxa dxeléajle'e chee Cristo, quebe bi de da naca xrlátaje. Zaj nazrinnaj xichaj lázrdawe'. ¹⁶ Benne' caní dxelenné' zaj núnbe'ene' Dios, san da dxelune' dxulé'e na quebe naca da li da dxelenné'. Zaj naque' benne' wən da sban, ne benne' wən da calela, ne quebe xezequene' xelune' tu da xrlátaje.

2

¹ Dxal-la' guchálaju' da ca' dxusede na dxi'u da naca li.

² Benne' gula chee xudau':

Dxal-la' xelaque' benne' dxelenná bé'e cuine'.

Dxal-la' xelaque' benne' du lazre'.

Dxal-la' xelaque' benne' dxuluzéajni'i cuine'.

Dxal-la' xelaque' li lazre' ca dxlejli lazre' Cristo,

ne ca zaj nazrí'ine' Le',

ne ca naca xel-la zren lazre' chee'.

³ Cá'anqueze nu'ula gula ca' chee xudau':

Dxal-la' dxelapa ba lá'ana Dios ca naca xúgute da dxelune'.

Quebe dxal-la' xelaque' benne' dxulutupe' dizra' bizruj.

Quebe dxal-la' xelaque' benne' dxelé'aje' da xuzuzre na le'.

Dxal-la' xulusédene' da naca xrlataje

⁴ chee gaca xulusédene' nu'ula cuide' ca'

chee xezezí'ine' benne' chee' ca', ne zrí'ine' ca',

⁵ ne chee xelenná be'e cuine',

ne xelaque' du lazre',

ne xulupe'e lizre',

ne xuluzé' dizra' chee benne' chee'.

Caní dxal-la' xelune' chee quebe nu nne' schanní' chee xrtizra' Dios.

⁶ Cá'anqueze bsizre bi cuide' ca' chee xelenná be'e cuínabe'. ⁷ Ca naca da xrlátaje dxunu' lue' dxal-la' gulé'e na benne' ca' ca dxal-la' xelune'. Gate dxusédenu' benne' ca' dxal-la' gacu' li lazre', ne du lazre'. ⁸ Dxal-la' guchálaju' da naca li lazre' chee quebe nu seque' si tizra le na. Che gunu' caní, na' che nu benne' nnié' chee, wedué'equezne', lawe' da quebe sua tu da calela da dxunle.

⁹ Bzéajni'i benne' ca' zaj nada'u chee xuluzé' dizra' chee xrané' ca naca xúgute da xelé xrané' le'. Dxal-la' xelune' da xelexezaca ba lazre' xrané', ne quebe xelexenné' lau xrané'. ¹⁰ Quebe dxal-la' xeleané' da naca chee xrané', san dxal-la' xelaque' li lazre', chee xelexé'e benne' ca da dxelún benne' caní, na' xelenné' chawe' chee xrtizra' Dios, Benne' weselá cheedxu.

¹¹ Dios ba blé'ene' ca naca da chawe' chee' chee xelexé' xúgute bēneache. ¹² Da xrlátaje chee Dios dxusede na dxi'u chee québedxa gundxu da calela, ne ca naca xel-la dxezá lazre' da calela, san chee nna be'e cuínadxu, ne gácadxu du lazre', ne gápadxu ba lá'ana Dios lu xezr la xu nigá ¹³ dxácaté ne dxebézadxu zra xelá' Dios szren, ne weselá cheedxu Jesucristo nen xel-la szren chee', da

na' dxebeza lázredxu. ¹⁴ Le' bzua cuine' lu na' benne' ca' belútië' Le' waláz cheędxu dxi'u cheę bselé' dxi'u lu xúgute da zrinnaj, na' bca'ana chawe' dxi'u cheę gácadxu bi cheęqueze', ne cheę gundxu da xrlátaje du lázredxu.

¹⁵ Da caní dخال-la' gusédenu' benne' ca'. Gudil-la benne' ca', ne bsizre-ne' dute xel-la dxenná bea chiu'. Quebe bi da calela gunu' cheę quebe nu si tizra lue'.

3

Da dخال-la' xelún benne' zaj nababe' cheę Cristo

¹ Bsa lazre' benne' bíchedxu ca' cheę xelune' ca dxuluchixruj benne' ca' dxelenná bé'ene', ne benne' xu'u lawe', ne cheę xuluzúe' dizra' cheę benne' ca', ne cheę xelexúe' xelune' xúgute da xrlátaje. ² Quebe dخال-la' xelenné cheę nu benne', san dخال-la' xelaque' zren lazre', ne zri'i lazre', ne dxexruj lazre' lau xúgute bėnneache. ³ Cá'anqueze dxi'u gate nate gúcadxu benne' xala, ne quebe bzúadxu dizra' cheę Dios. Gudadxu calela, na' gunná be'e belá' dxen cheędxu dxi'u, cheę bėndxu ca naca xúgute da guzá lázredxu, ne da bezaca ba lázredxu. Bėndxu da zrinnaj, ne gúcadxu xa lazre'. Belecuide bėnneache dxi'u, na' bzrá'adxu ljuwėzredxu tudxu xetudxu. ⁴ Gate Dios, weselá cheędxu, blé'ene' da naca chawe' cheę', ne xel-la zri'i lazre' cheę', ⁵ na' bselé' dxi'u, quegá lawe' da bėndxu dxi'u tu da xrlátaje, san lawe' da bexache lazre' dxi'u. Bselé' dxi'u ne cheę da gudibe na dxi'u gate na' bexálajdxu, na' bucube Be' Lá'azxa cheę' dxi'u. ⁶ Ne cheę Jesucristo, weselá cheędxu, Dios ba núnnałe'e dxi'u Be' Lá'azxa cheę', ⁷ cheę ne cheę da naca chawe' cheę' gácadxu xrlátaje lau Le', ne zrué'edxu xel-la nabán chadía chacanna da dxebeza lázredxu. ⁸ Da caní zaj naca na da li. Dxaca lazra' gusízrequeznu' benne' ca' ca naca da caní cheę xełebé' gunne xue xelún benne' ca' da chawe', benne' ca' dxeléajle'e cheę Dios. Da caní zaj naca na da xrlátaje, ne da gaca xuluchine xúgute bėnneache. ⁹ Quebe gulapa na'u dizra' xala ca', ne dizra' dxuluzaze bėnneache ca naca cheę zra xrtawe', ne dzra' da dxun na bėnneache chupa la'a, ne da dxulutilla bėnneache da naca cheę da bchixruj be'e Moisés. Da caní quebe culuén zaj napa na. Dácheze naca na.

¹⁰ Che nu benne' dxune' le'e chupa la'a, bsizre-ne' tu chupa lasa, ne che quebe dxenne' ca dxu'u le', bebéaje' ládujla le'e ¹¹ lawe' da nézenu' nazrinnaj xichaj lázxdau benne' caní, na' dul-la dxelúnqueze' ba nuzría xi na le'.

Da dخال-la' gun Tito

¹² Gate sel-la' Artemas u Tíquico naga zu', ben baxuzre xidu' xedajna'u neda' lu xezre Nicopolis lawe' da bache nuna' sua' nigá beu' zaga ca'. ¹³ Gúcale Zenas, benne' wedé dizra', ne Apolos, ca da séquenu'. Bnezruj benne' ca' ca da zaj nachínene' cheę chjaque' lu neza cheę', na' quebe bi xelexázejene'. ¹⁴ Cá'anqueze benne' zaj nabábalene' dxi'u dخال-la' xulusédie' xelune' da chawe', cheę xelácalene' benne' dxelaxázejene', cheę xelaque' benne' guchine Cristo.

Pablo dxuzé' Tito dizra'

¹⁵ Xúgute benne' zrálene' neda' dxulugape' lue' diuzre. Bgape diuzre benne' ca' zaj nazrí'ine' dxi'u lu da naca cheę Cristo. Dxenaba' Dios gun chawe'e xúgutele le'e. ¡Ca'an gaca na!

DIZRA' BZUAJ SAN PABLO CHEE FILEMÓN

Pablo dxugape' diuzre Filemón

¹ Neda', Pablo, xu'a lizre xia lawe' da dxuna' zrin chee Jesucristo, nen bi bíchedxu Timoteo. Dxugápantu' lue' diuzre, Filemón, benne' nazrí'ite lázrentu'. Nacu' bi ljwézrentu' lu zrin chee Cristo. ² Dxugapa' diuzre benne' bíchedxu ca' dxelezrague' lizru', ne nu'ula zandxu Apia, ne Arquipo, bi ljwézredxu nácabe' benne' zeje' wedil-la chee Cristo. ³ Dxenaba' Xradxu Dios ne Xránadxu Jesucristo guné' da chawe' chee, ne gunné' le'e xel-la' dxebeza zri lazre'.

Ca naca chee Filemón

⁴ Dxápequeza' Dios xcalenu' gate dxuchálajlena' Le' ne dxeajsá lázrqueza' lue', ⁵ lawe' da ba benda' ca nazrí'inu' Xránadxu Jesucristo ne ca dxeajlí lazru' Le', ne ca nazrí'inu' xúgute bi ca' chee Dios. ⁶ Dxenaba' lau Dios guzéajni'ine' benne' ca' dxelejli' lazre' Le' ne chee xel-la' dxeajlí lazre' chiu', ca naca xúgute da chawe' ca' da nápadxu ne chee Jesucristo. ⁷ Xel-la' zri'i lazre' chiu', bi bicha', dxúnna'le' na neda' xel-la' dxebe, ne dxutipa na lazra', ca dxutipa na lazre' xúgute bi chee Dios.

Pablo dxenabe' Filemón tu da guné' chee Onésimo, bi na'u Filemón

⁸ Chee le' na', lálala xu'u lu na'a nna be'eda' lue' ca dxal-la' gunu' lawe' da naca' gubáz chee Cristo, ⁹ dxata' xúeda' lue' lu xel-la' zri'i lazre' cheedxu, neda', Pablo, benne' gula, ne xu'a lizre xia lawe' da dxuna' zrin chee Cristo. ¹⁰ Dxata' xúeda' lue' tu da gunu' chee Onésimo, bi nácabe' ca zrí'inequeza' lu da naca chee Cristo, neda', xu'a lizre xia nigá.

¹¹ Gate nate Onésimo, bi na'u lue' gúcabé' tu bi wen da calela, san na'a nácabe' wen zrin li lazre' chiu' lue', ne chia' neda'. ¹² Dxesel-la'-be' naga zu'. Bezí' lu na'u-be', nácabe' bi nazrí'ite lazra'. ¹³ Guzá lazra' neda' xegá'analebe' neda' nigá chee gunbe' zrin chia' neda' waláz chiu' lue' dxácaté ne xu'a lizre xia lawe' da dxuna' zrin chee dizra' chawe'. ¹⁴ Quebe dxaca lazra' bi guna' che quebe naca na da nnau' lue', chee gácalenu' neda' lawe' da naca na ca dxaca lazru' lue', ne quegá lawe' da dxenná be'eda' lue'. ¹⁵ Becuasa Onésimo nen lue' tu chí'idau', san na'a súalétequezebe' lue', ¹⁶ quegá ca tu bi na'u lue', san gácabé' tu bi cháwedxa ca tu bi na'u lue', da zéajé na, gácabé' tu bi bichu' nazrí'ite lazru'. Neda' nazrí'ile'eda'-be', san lue' dxal-la' zrí'idxenu'-be', quegaze ca bènneacheze, san cá'anqueze ca bi bíchedxu, bi chee Cristo.

¹⁷ Chee le' na', che dxéquenu' neda' ca bi ljwezru', bezí' lu na'u-be' ca dxezí' lu na'u neda'. ¹⁸ Che bi da calela ba benbe' chiu', u che bi dxál-labe' chiu', neda' quízruja' na. ¹⁹ Neda', Pablo, dxuzúaja' da nigá nen ná'aqueza': Neda' quízruja' na, lálala neda' la gusá'a lazru' lue' dxál-laquezu' chia' cuínquezu'. ²⁰ Lue', bi bicha', dxata' xúeda' lue' lu La Xránadxu, ben da guzúa na neda' lu da ba neza.

²¹ Dxuzúaja' chiu' lawe' da nuxrén lazra' gunu' ca da dxapa' lue', ne nezda' gundxu' ca da dxenaba' lue'. ²² Cá'anqueze bcueza latja naga sua' neda' lawe' da dxebeza lazra' gun Dios da dxenábale Le', gunné' neda' lataj xida' xedajnná'a le'e.

Bi chee Cristo dxulugápabe' diuzre Filemón

²³ Epafras, bi ljwezra', xú'ulebe' neda' lizre xia lawe' da dxunbe' zrin chee Jesucristo, ²⁴ ne Marcos, ne Aristarco, ne Demas, ne Lucas, bi ca' dxelácalębe' neda' lu zrin chee Cristo dxulugápabe' lue' diuzre.

²⁵ Dxenaba' lau Xránadxu Jesucristo gunę' da chawe' chee le'e. Ca'an gaca na.

DIZRA' DA NAZÚAJ CHEE BENNE' HEBREO CA'

Dios ba bchálajlëné' dxi'u lu dxu'a Zrí'inequeze'

¹ Dios bchálajlëné' xra xrtáudxu ca' gate nate zane' lasa, ne zane' ca bchálajë' lu dxu'a benne' ca' buluchálajë' waláz chee'. ² Na'a, lu zra caní, Dios ba bchálajlëné' dxi'u lu dxu'a Zrí'inequeze'. Dios bene' xezr la xu nigá lu na' Zrí'ine' nigá, ne ba bene' naca chee' xúgute da ca' bene'. ³ Zrí'ine Dios nigá naque' Benne' dxulé'ene' ca naca xel-la' szren chee' Dios, ne naque' ca da nácaqueze Dios, na' nuxre' xúgute da ca' nune', dxuchíne' dizra' chee' da nápalë'e na xel-la' waca. Gate ba gudúe' dul-la da nabágadxu xeajxedxé'e chalá'a xabëla chee' lataj blau chee' Dios xabáa.

Zrí'ine Dios nácadxe' blau ca gubáz chee xabáa ca'

⁴ Zrí'ine Dios nácadxe' blau ca gubáz chee xabáa ca' chee' Dios, ca naca La Cristo da bzua Dios, nácadxa na blau ca la gubáz chee xabáa ca'. ⁵ Dios cabata' guzre' tu gubáz chee xabáa ca guzre' Cristo, gunné':

Lue' nacu' Zrí'ina'.

Neda' nácaqueza' Xrau' na'a zra.

Cá'anqueze cabata' guzre' tu gubáz chee xabáa ca gunné' chee' Cristo:

Neda' gaca' Xre',

na' Le' gaque' Zrí'ina'.

⁶ Gate bzuë' Zrí'ine' lu xezr la xu nigá, gunné':

Xúgute gubáz chee xabáa ca' xelue lá'ane' Le'.

⁷ Ca naca chee gubáz chee xabáa ca', Dios gunné':

Dsesel-lë' gubáz chee' ca' ca tu be' da dxaca,
ne dxuchíne' gubáz wen zrin chee' ca' ca tu xi'.

⁸ Ca naca chee Zrí'ine', gunná Dios:

Lataj blau chiu' lue', Dios, zúatequeze.

Xel-la' dxenná bea chiu' naca na xlátaje.

⁹ Nazri'inu' da xlátaje, ne dxezra'u da calela.

Chee lë na' Dios chiu' ba bénnadxe' Lue'

xel-la' dxebé ca da bnézruje' bi ljwezru' ca'.

¹⁰ Cá'anqueze guzre' Le':

Lue', Xran, nédxudaute' benu' xezr la xu.

Nen xel-la' waca chiu' benu' xabáa.

¹¹ Da caní weledé chee na, san Lue' súatequezu'.

Xúgute da caní welaca gula ca zra lana béneache.

¹² Na' xutubu' na ca tu ladxe',

ne gucha'u na ca dxun tu benne' dxuché'e zra lanë'.

Lue' zúaquezu' chadía chacanna,

na' xel-la' nabán chiu' quebe téqueze chee na.

¹³ Dios cabata' guzre' tu gubáz chee xabáa ca guzre' Zrí'ine', gunné':

Gudxe'e chalá'a xabëla chia',

cadxa guzúa' benne' ca' dxeledábague' Lue' zran ni'u.

¹⁴ Xúgute gubáz chee xabáa ca' zaj naque' be' ca' dxelún zrin chee' Dios, na' dxesel-lë' gubáz chee xabáa ca' chee xelácalëné' benne' ca' dxelezi'e xel-la' weselá.

2

Quebe dxal-la' guzúadxu chala'ala xel-la' weselá

¹ Chee le na' dxal-la' nna' xánnedxu dizra' da ba bendxu chee quebe cuásadxu lu neza chee xel-la' li. ² Dizra' da gusel-la Dios gate nate lu na' gubáz chee xabáa ca' guca na li lazre', na' xúgute benne' ca' buluzúe' na chala'ala, ne quebe buluzúe' dizra' ca da gunná Dios, Dios bde'e le' xel-la' zi' ca da dxal-la' xezezi'e. ³ ¿Ájazra gaca ladxu che guzúadxu chala'ala tu xel-la' weselá zren caní? Xránaquezdxu bchálaje' chee xel-la' weselá nigá nédxute, na' gudé na' buluchálaj benne' ca' belenne' na, na' gulenné' naca na da li laudxu dxi'u. ⁴ Cá'anqueze ba bzua chacha Dios na ne chee da dxelunna bea na, ne ne chee da zren ca' ben Dios, ne ne chee xel-la' waca zan ca', ne ne chee Be' Lá'azxa, Bénnea' benne' dxi'u xel-la' waca ca', ca da guca lázrequeze Le'.

Jesucristo ben cuine' ca nácadxu dxi'u

⁵ Dios quebe bzue' lu na' gubáz chee xabáa ca' xezr la xu da za za', chee da na' dxuchálajdxu na'a. ⁶ Naca na ca naxúaj na lu xiche lá'azxa, ca da gunná tu benne':

¿Ájazra naca bénneache che Lue', Dios, dxeajsá lazru' chee'?

¿Ájazra naca bénneache, che Lue' dxe'u gunne xue chee le'?

⁷ Tu chí'idau'ze bzu' bénneache látezdxa ca gubáz chee xabáa ca'.

Nunu' chee' si'e xel-la' szren, ne xel-la' ba lá'ana, ne bzu' lu ne'e xúgute da benu'.

⁸ Xúgute ba bzu' na zran ni'a le'.

Caní naca, gate Dios bzue' xúgute zran ni'a bénneache, quebe bi de da quebe guzúa na dizra' chee bénneache, na' quebe ne xuluzúa ca naca da ca' dizra' chee'. ⁹ Na'a dxelédxu Jesús, Bénnea' bzua Dios guque' tu chí'idau' látezdxa ca gubáz chee xabáa ca'. Dios gúnene' gate Jesús waláz chee xúgute bénneache lawe' da nazri'ine' bénneache, na' na'a nunéruje' Le' xel-la' szren, ne xel-la' ba lá'ana lawe' da gudé' lu xel-la' gute zi xa'.

¹⁰ Dios bene' xúgute da zaj zua, na' zaj zua na chee gaca ba Le'. Le' dxaca lazre' xezezi' xúgute bi chee' ca naca xel-la' szren chee'. Chee le na' ben na ba xen ben Dios naca Jesucristo duté weselá cheedxu, ne chee da zi' da xa' da gudé' chee séquene' guselé' bénneache chadia chacanna. ¹¹ Benne' caní dxegúa Jesús dul-la da zaj nabague', na' benne' caní, ne Léqueze' zaj naque' bi ca' chee tuze Xradxu. Chee le na' quebe dxedu'e Jesús nne' chee benne' ca', zaj naque' bi biche'. ¹² Naca na ca dxenná lu xiche lá'azxa:

Guchálajqueza' da naca chiu' Lue' lávela bicha' ca',

na' gúl-laqueza' da güe lá'ana' Lue' ládujla benne' ca' zaj nazrague' lau Lue'.

¹³ Cá'anqueze dxenná xiche lá'azxa:

Neda' guxrén lazra' Dios.

Cá'anqueze dxenná na:

Nigá zua' nen bi chia' ca', bi ca' benna Dios neda'.

¹⁴ Lawe' da zaj naca belá' dxen benne' ca' zaj naque' bi chee', Le' ben cuine' belá' dxen chee guzéquene' gutie', ne caní bene' chee séquene' guzría xi'e da xriwe', da na' napa na xel-la' dxenná bea gute na bénneache. ¹⁵ Caní guca bselé' xúgute benne' gulaque' ca benne' zaj nada'u xúgute iza zaj naca bané' lawe' da belezrebe' xel-la' gute. ¹⁶ Da li quebe ble'e nigá chee gácalene' gubáz chee xabáa ca', san naca na ca dxenná xiche lá'azxa: Ble'e chee gácalene' benne' zaj naque' zri'ine zre sua Abraham. ¹⁷ Chee le na' ben na ba xen

guque' dutē ca zaj naca bi biche' ca', chee séquene' gaque' lau Dios tu bxruze blau naque' li lazre', ne dxexache lazre' bēneache, ne chee séquene' gun cuine' tu da dxegúa na dul-la zaj nabaga bēneache. ¹⁸ Lawe' da gudéqueze Le' xel-la' zi' gate guca lazre Satanás gun zréaje Le', dxezéquene' na' a gácalene' benne' ca' dxun zréaje da xriwe' le'.

3

Jesús nácadxē' blau ca Moisés

¹ Le'e, benne' bícha'dau', nácale bi chee Dios, lawe' da nácale benne' ca' ba gunné Dios, le nna' xanne' Jesucristo, Bēneache' gusel-la Dios chee gaque' bxruze blau chee da dxéajledxu. ² Jesús nigá guque' li lazre' lau Dios, Bēneache' bzue' Le' lu zrin na' da ba bene', ca guca Moisés, guque' li lazre' lu zrin na' bene' lau benne' ca' gulaque' bi chee Dios. ³ Jesús dxal-la' sidxe' xel-la' ba lá'ana ca da si' Moisés, ca dxaca chee benne' dxunge' tu xu'u, dxezidxe' xel-la' ba lá'ana ca da dxezi' xu'u ná'queze. ⁴ Tu tu xu'u naca na da ben benne', san Dios nune' xúgutē da zaj zua. ⁵ Ca wen zrin chee Dios guca Moisés li lazre' lu zrin na' bene' lau benne' ca' gulaque' bi chee Dios, na' bchálaje' ca naca da nne Dios ca te na'. ⁶ Cristo naque' li lazre' ca Zrí'inequeze Dios laudxu dxi'u. Nácadxu ca lizre Dios che se cháchadxu lu da dxuxrén lázredxu ca zrindxa zra cheajsé cheedxu, ne dxebéle'edxu lu da dxebeza lázredxu.

Bi ca' chee Dios xelexezi' lazre' naga zua Dios

⁷ Caní naca, naca na ca da dxenná Be' Lá'azxa lu xiche lá'azxa, dxenné': Na'a, che le'e dxenle ca da dxenná Dios,

⁸ quebe gácale lázrdau zide' ca gulaca benne' ca' guledábage' Dios, na' belunē' Dios zede le'e xixre' lawe' lataj.

⁹ Belún xra xrtaule ca' neda' zede chee guna' ca gunnía', lácala belelé'ene' da bēna' lávela chua iza.

¹⁰ Chee le' na' bzra'a xichja' benne' ca', na' gunnía': Tu dxelebéaj xíchajzqueze benne' caní neda', ne dxeledábage' ca naca da bdxíruja'.

¹¹ Chee le' na' bzra'a xichja' benne' ca', ne bzua chúchua' da gucha' benne' ca', gunnía' quebe xelexú'ē naga xelexezi' lazre' naga zúaqueza' neda'.

¹² Le'e, benne' bícha'dau', le guxúe cuínale chee quebe gaca lázrdau zide' netule le'e, quebe cuásale lau Dios ban lawe' da quebe dxéajlele chee Le'. ¹³ Le gutipa lázrele tule xetule tu zra tu zra, dxácatē ne zúadxu lu zra da nunna Dios dxi'u, chee quebe si xē dul-la netule le'e, na' gácale lázrdau zide'. ¹⁴ Che se cháchadxu ca zrin zra cheajsé cheedxu ca naca da dxuxrén lázrequezdxu nédxutē, na'a nácadxu bi chee Cristo.

¹⁵ Naca na ca dxenná na lu xiche lá'azxa:

Na'a, che le'e dxenle ca da dxenná Dios, quebe gácale lázrdau zide' ca gulaca benne' ca' guledábage' Dios.

¹⁶ ¿Nuzra benne' ca' belenne' dizra' chee Dios, na' ca gudé na' guledábage' Dios? Zaj naca xúgutē benne' ca' bebéaj Moisés lu xezr la xu Egipto. ¹⁷ ¿Nuzra benne' ca' bzra'a Dios le' lávela chua iza? Zaj naca benne' ca' belún dul-la, na' gulátie' le'e xixre' lawe' lataj. ¹⁸ ¿Nuzra benne' ca' bzua chuchu Dios xrtizre' gate guzre' le' quebe xelexú'ē naga xelexezi' lazre' naga zua Le'? Zaj naca benne' ca' guledábage' xrtizra Dios. ¹⁹ Na'a dxelē'edxu quebe guca xelexú'ē lawe' da quebe guléajle'ē chee Le'.

4

¹ Caní naca, dxácatę ne zua cheędxu da nachebe lazre' Dios cheę xexú'udxu naga xezi' lázredxu naga zua Dios, dxal-la' guxúe cuínadxu gagáze nule le'e quebe xexú'ule. ² Cá'anqueze dxi'u ba bendxu dizra' chawe' cheę Dios ca da belén benne' ca', san benne' ca' quebe bi da ba neza gulezi'e cheę dizra' da belenne' lawe' da quebe guléajle'e cheę na. ³ Dxi'u ba guxéajleđxu, na' chú'udxu naga xezi' lázredxu, ca da gunná Dios gate gunné':
Cheę le na' bzra'a xichja' benne' ca',

na' bzua chúchua' da gucha' benne' ca', gunná':

Quebe xexú'e naga xelexezi' lazre' naga zua neda'.

Caní gunná Dios lácala ba bsexuzre' zrin cheę' gate na' bente' xęzr la xu, ⁴lawe' da naxúaj na lu xiche lá'azxa ca naca cheę zra gazre', dxenná na:

Lu zra gazre bezi' lazre' Dios lu zrin da bene'.

⁵Xetú dizra' da naxúaj na lu xiche lá'azxa dxenná na:

Quebe xexú'e naga xelexezi' lazre' naga zua neda'.

⁶Benne' ca' belenne' dizra' chawe' nigá cheę Dios nédxute quebe belexú'e lawe' da quebe buluzú'e dizra' ca naca da gunná Dios. Na'a ne zaj zra' benne' dxal-la' xexú'ukeze' naga xelexezi' lazre'. ⁷Cheę le na' Dios ba guléaje' xetú zra, gunné': Na'a zra. Caní naca lawe' da dxuchálajle Dios dxi'u dxuchinene' dizra' da gunná David gudé na', da naxúaj na lu xiche lá'azxa naga dxenná na:

Na'a, che le'e dxenle ca da dxenná Dios,

quebe gácale lázrdau zide'.

⁸Chela belexezi' lazre' benne' ca' be Josué lataj gulu'e xęzr la xu na', quegá guchálajdxu Dios cheę xetú zra. ⁹Caní naca na, de lataj xelú'u bi ca' cheę Dios naga xelexezi' lazre' naga zua Dios, ¹⁰lawe' da xezi' lazre' lu zrin dxun nu benne' chu'e naga xezi' lazre' naga zua Dios, ca ben Dios, bezi' lazre' lu zrin ben Le'. ¹¹Dxal-la' gun zi lázredxu séquedxu chú'udxu naga xezi' lázredxu gagáze nu benne' gunę' ca belún benne' ca' quebe guléajle'e.

¹²Dizra' cheę Dios naca na da bane, ne napa na xel-la' waca. Naládxu na ca tu xia da nalá na dxupa la'ate, ne dxaze na naga dxelezraga béne'du xú'udxu, ne be' nácaquezdxu, ne dxaze na lu xichaj lázrdau béneache, na' dxuchi'a na ca naca da dxugú'u bea béneache ne ca da dxéqueņe' gunę'. ¹³Quebe bi de da ben Dios da seque' gucache cuina na lau Dios. Xúgute zaj nalá' na, ne zaj naxalaj na lau Béneea' dxal-la' xulé'edxu Le' ca da bendxu.

Jesús naque' bxruze blau zrente

¹⁴Jesús, Zri'ine Dios naque' bxruze blau zrente cheędxu, Béneea' ba bexu'e lau Dios. Cheę le na' dxal-la' se típadxu lu da dxéajleđxu cheę Dios. ¹⁵Bxruze blau cheędxu wazéqueņe' xexache lazre' dxi'u che dxi'u dxate ni'a nadxu lu xel-la' dxéajlí lazre' cheędxu, lawe' da gudéqueze Le' lu xel-la' zi' ca' gate guca lazre da xriwe' gun zréaje na Le', ca da dxededxu dxi'u na'a, na' Le' quebe bene' dul-la. ¹⁶Cheę le na' dxal-la' bígadxu du lázredxu lu lataj blau cheę Dios cheędxu, Béneea' nazri'ine' dxi'u, cheę xexache lazre' dxi'u, ne dutę xel-la' xrlátaje cheę' gácaleņe' dxi'u gate nachinedxu nu gácale dxi'u.

5

¹Tu tu bxruze blau dxecá'a Dios ládujla béneache, ne dxuzúe le' cheę gunę' zrin lau Dios waláz cheę béneache ca', ne cu'e guna' lau Dios, ne gutię' béadu ca' ne cheę dul-la zaj nabaga' béneache. ²Cá'anqueze bxruze blau

nigá dxate ni'a ne'e lu da ca' dxune' ca da dxaca cheedxu dxi'u. Chee le na' wape' xel-la' zren lazre' chee benne' ca' quebe dxelajni'ine', ne dxelune' da calela, ³ na' lawe' da dxate ni'a ne'e, dxal-la' gutie' béadu ca' ne chee dul-la da nabáaqueze', cáteze dxune' ne chee dul-la da zaj nabaga xezícadxa bénneache.

⁴ Quebe nu gaca gun cuina bxruze blau, san Diósqueze dxenne' bénnea', ne dxunézruje' le' xel-la' szren na', ca bene' chee Aarón. ⁵ Cá'anqueze naca na chee Cristo, quebe bzua cuine' bxruze blau, san Dios be'e Le' xel-la' szren na' ca da guzre' Le':

Lue' nacu' Zri'ina'.

Neda' nácaqueza' Xrau' na'a.

⁶ Cá'anqueze naxúaj na lu xiche lá'azxa ca guzre' Le':

Lue' nacu' bxruze blau chadía chacanna

ca gúcaqueze Melquisedec.

⁷ Gate zua Cristo lu xezr la xu nigá, bchálajlene' Dios, ne guta' xuene' Dios nen chi'e zizraj, ne gudxézrele'e, lawe' da napa Dios xel-la' waca guselé' Le' lu xel-la' gute, na' Dios benne' chee' lawe' da gudape' Xre' ba lá'ana. ⁸ Ca'an guca, lálcala naca Cristo Zri'ine Dios, bsédie' guque' wezúa dizra' ne chee xel-la' zi' da gudée', ⁹ na' gate guque' duté Weselá cheedxu ne chee da caní, nadxa guzéquene' bselé' bénneache chadía chacanna, benne' ca' dxuluzúe' dizra' chee', ¹⁰ na' Dios bzue' Le' bxruze blau ca gúcaqueze Melquisedec.

Quebe dxal-la' gusandxu xel-la' dxeajli lazre' cheedxu

¹¹ Déle'e da dxal-la' guchálaja' ca naca chee da nigá, san naca na stébe guzėjni'ida' le'e na'a, lawe' da quebe ne gaca chėjni'ile na. ¹² Zane' iza ba guca dxėjlele chee Cristo, na' ba gul-la' gusédele benne' xula ca naca chee Le', san dxun na ba xen nu guzėjni'i le'e da xula da quebe nácateca stébe ca naca dizra' chee Dios. Ne nácale ca bidau' ne dxázrebe' nizre'. Quebe ne gaca gágule xel-la' wagu chee benne' waca. ¹³ Benne' ca' zaj naca ca bidau' ne dxázrebe' nizre' zaj naque' benne' ca' quebe ne xuluchíne'e' dizra' chee xel-la' li. ¹⁴ Xel-la' wagu chee benne' waca naca na chee benne' ca' ba zaj nézene' xelexúnbe'e' da naca da xrlátaje, ne da naca da calela.

6

¹ Chee le na' québedxa dxal-la' gusédedxu ca da bsédedxu nédxute' ca naca chee Cristo, san chéajtezedxu gusédedxu da naca chee' chee gácadxu benne' waca. Québedxa bi dxal-la' guchálajdxu chee da du ca' da bsédedxu nédxute', ca dxal-la' xexéaje lázredxu chee da ca' bendxu da zaj nua na xel-la' gute, ne ca dxal-la' chėjle' dxu chee Dios, ² ne ca dxal-la' xedxúadxu nisa, ne ca dxal-la' xuluzé ne'e xíchajdxu, ne ca xelexebán benne' gate, ne ca gun Dios, guchi'e da nun tu tu bénneache chee gudée' benne' ca' dxelune' da calela lu lataj ba xa' chadía chacanna. ³ Chee le na' chéajtedxu lu da naca chee Cristo, che Dios gunne' dxi'u lataj.

⁴ Benne' ca' ba gulez'í'e ca naca xel-la' naxaní' chee Dios, ne ba gulezú lawe' xelúnbe'e' da dxunna Dios, ne ba gulez'í'e Be' Lá'azxa, ⁵ ne ba gulezú lawe' xelúnbe'e' da xrlátaje ca' chee Dios ca naca da xelex'í'e lu xezr la xu da za za, ⁶ na' te na' che xuluzé' Dios chalá'ala, québedxa gaca xelexexéaje lazre' lawe' da gaca na ca xuludé'e Cristo le'e xaga begúaj da xula, ne dxelún le' chee' lálwela xúgute' bénneache. ⁷ Zaj naque' ca xezr la xu da dxezi' na nisa xiuj. Che xezr la xu na' dxunna lina chawe' chee benne' dxelune' na zrin, naca na da dxun chawe' Dios, ⁸ san che dxachuj na xeche', ne xixre' da quebe bi culuén

napa na, quebe bi zaca xęzr la xu na', san naca na tu da xu'u de', na' naga chęajsetę chezxe na.

Xel-la' dxebeza lazre' da nąpadxu

⁹ Le'e, benne' bįcha'dau', lącala dxuchąlajntu' canį, dxuxręn lązrentu' ca naca cheęle le'e wazile le'e da chawe' cheę xel-la' weselą. ¹⁰ Dios dxunę' da xlątaje, ne quebe gal-la lazre' ca naca zrin da ba benle, ne ca bzri'ile Le' gate gųcaleę benne' bįchedxu ca', ne ca da tu dxųnzquezle. ¹¹ Dxaca lązrentu' chęajęze tu tule gunle da canį dutę lązrdaule ca zrin zra cheajsę cheęle, cheę zruę'ele da dxebeza lązrele. ¹² Quebe dxaca lązrentu' xewędele. Dxaca lązrentu' gunle le'e ca belųn benne' ca' guleajlı lazre' Dios, ne gulaque' zren lazre', na' gulezi'e ca da guchebe lazre' Dios gunęzruje' cheę'.

¹³ Gate guchebe lazre' Dios bi gunęzruje' cheę Abraham, na' bzętajqueze cuinę' lawe' da quębedxa nu zua nącadxa szren ca Le', nu guzętaje', ¹⁴ gunnę': "Da li gųnqueza' da chawe' chiu' lue', ne guząnqueza' zri'ine zre su'." ¹⁵ Abraham guleze' dutę xel-la' zren lazre', na' cheę le' na' guzi'e da guchebe lazre' Dios gunęzruje' cheę'. ¹⁶ Gate nu dxuluzetaj bęnneache, dxuluzętaje' benne' nącadxę' szren ca lęqueze', ne gate bi dxuluzia chųchue', ne dxuluzętaje' Dios, quębedxa bi dę da bi xelennę'. ¹⁷ Cheę le' na' Dios bzua chųchue' da guchebe lazre', ne bzetaj cuinę', lawe' da guca lazre' gulę'eng' benne' ca' xelezį'e da guchebe lazre', Le' gunę' ca naca da guchebe lazre', ne quebe guchę'e ca gunę'. ¹⁸ Canį naca, da chupa canį quebe gaca cha na, na' lu da canį Dios quebe gaca gun lazre', ne ne cheę da ca' Dios ba nunnę' dxi'u tu da gun na dxi'u dipa lazre', dxi'u na' ba nęzedxu dxuxųe Le' dxi'u, ne nuxręn lązredxu si' lu nnadxu da dxebeza lązredxu ca naca da gunnę' dxi'u. ¹⁹ Da nigą dxebeza lązredxu nuxru chacha na bęnne'du xų'udxu ca dxun tu xia da dxuxru chacha na tu da dxedą lawe' nįsadau' gate zria na lawe' nįsadau'. Da na' dxebeza lązredxu zųale na Cristo cuzru ladxe' da zę lu xudau' da zua xabąa, ²⁰ naga guxų'u Jesųs waląz cheędxu cheę gusąlaje' neza naga tedxu, na' Le' naque' tu bxruze blau chadıa chacanna ca guca Melquisedec.

7

Jesųs naque' bxruze blau ca guca Melquisedec

¹ Melquisedec nigą guque' wenną bea cheę xęzre Salem, ne bxruze cheę Dios szrentę. Gate ze za' Abraham lu wedil-la gate bzętaje' benne' wenną bea ca', na' Melquisedec nigą xeajchague' le', ne gunabe' lau Dios gunę' da chawe' cheę Abraham, ² na' Abraham bnęzruje' cheę le' tu cue' cheę da chi cue' ca' ca naca da bzruę'eng' lu wedil-la na'. La Melquisedec zęaje na wenną bea xlątaje, ne lawe' da lawe' da guque' benne' wenną bea cheę xęzre Salem, da zęaje na xel-la' dxebeza zri lazre', le' zęajequeze na wenną bea cheę xel-la' dxebeza zri lazre'. ³ Quebe naxųaj na zua xre', ne xrnę'e, ne xra xrtawe', ne quebe naxųaj na che gųlaje', ne che gutię'. Canį naca na, da guca Melquisedec dxulę'e na ca naca cheę Zri'ine Dios, naque' bxruze blau chadıa chacanna.

⁴ Le na' xque na'a ca szren guca Melquisedec, che bnezruj xra xrtąudxu Abraham cheę le' tu cue' cheę da chi cue' cheę da guquę'e lu na' wenną bea ca' lu wedil-la na'. ⁵ Ca naca da bdxixruj bea Moįsęs, bxruze ca', benne' ca' zaj naque' xrtia Levį dxal-la' xelezį'e tu cue' cheę da chi cue' ca' da xelizruj benne' Israel ca', benne' zaj naque' xrtia ljwezre', lącala zaj naque' zri'ine zre sua Abraham ca zaj nącaqueze benne' ca'. ⁶ Melquisedec, benne' quebe

naque' xrtia Leví guzi'e tu cue' chee da chi cue' ca' da gudizruj Abraham, bënnea' dxal-la' si'e da guchebe lazre' Dios. Cá'anqueze Melquisedec gunabe' lau Dios guné' da chawe' chee Abraham, ⁷ na' dxelenná xúgute bënneache nácadxa blau bënnea' dxenabe' lau Dios guné' chawe' chee benne' xula ca' quézcala bënnea' si'e da chawe' na' dxenabe'. ⁸ Na'a benne' ca' dxelezi'e tu cue' chee da chi cue' ca' zaj naque' benne' dxelate, san ca naca chee Melquisedec, naque' ca tu benne' naca bánqueze' lawe' da quebe naxúaj na lu xiche lá'azxa che gutie'. ⁹ Ca naca chee Leví, ne ca naca chee xúgute bxruze ca' zaj naque' zri'ine zre sua Leví na', benne' ca' dxelezi'e na'a tu cue' chee da chi cue' ca', wácaqueze nnadxu cá'anqueze benne' caní gulíruje' chee Melquisedec tu cue' chee da chi cue' gate na' bezrague' Abraham, ¹⁰ lawe' da wazeque' nnadxu ne zaj zua zri'ine zre sua Abraham lu bel-la' dxen chee', benne' quebe ne xelalaj gate na' bdxuaj Melquisedec xeajchague' Abraham na'.

¹¹ Benne' Israel ca' gulezi' lu ne'e da bdxixruj bea Dios lu na' bxruze ca' zaj naque' xrtia Leví. Chela guzeque' da belún bxruze ca' gun na li lazre' benne' ca' buluzé' dizra' chee da bdxixruj bea Dios na', na' quebe ben na ba xen la' xetú bxruze ca guca Melquisedec, ne quegá ca guca Aarón. ¹² Che xezrá' ca dxal-la' gaca bxruze na', na' dxál-la'queze xezrá' da nadxixruj bea na'. ¹³ Xránadxu, Bënnea' naxúaj na chee' gaque' bxruze ca guca Melquisedec, nababe' xetú cue' xrtia Israel ca', benne' ca' netue' quebe ne gaque' bxruze. ¹⁴ Naca bea na nababa Xránadxu xrtia Judá, na' Moisés quebe gunné' xelaca benne' caní bxruze.

¹⁵ Da nigá naca beadxa na che bxruze cube na' dxal-la' gaque' ca guca Melquisedec, ¹⁶ ne bxruze cube nigá quebe gaque' bxruze ne chee tu da nadxixruj bea da dxenná na nu xrtia dxal-la' gaque'. Gaque' bxruze lawe' da nape' xel-la' waca chee tu xel-la' nabán da quebe te chee na. ¹⁷ Naca chee' ca da dxenná Dios:

Lue' nacu' bxruze chadía chacanna
ca da guca Melquisedec.

¹⁸ Caní guca, bedxúaj chalá'ala da bdxixruj bea Dios gate nate lawe' da quebe guzeque' bi gun na, ne quebe bi culuén gudapa na, ¹⁹ lawe' da quebe guca da gunná bea Moisés gun na bënneache li lazre'. Na'a nápadxu tu xel-la' dxebeza lazre' da cháwedxa, na' ne chee na dxebíxadxu lau Dios.

²⁰ Gate Dios bene' Jesús bxruze, bzetaj cuine'. ²¹ Quebe bzetaj cuine' gate bzue' xezícadxa bxruze ca'. Gate bene' Jesús bxruze bzetaj cuine' ca da naxúaj na lu xiche lá'azxa, dxenná na:

Xránadxu Dios bzetaj cuine', ne quebe guché'e xrtizre'.

Gunné': "Lue' nacu' bxruze chadía chacanna
ca da guca Melquisedec."

²² Chee le na' Jesús dxun chúchu'e tu xel-la' wezria da nácadxa chawe' ca da nedxu. ²³ Xezícadxa bxruze ca', benne' gulezrá' nédxula ben na ba xen gulaque' benne' zan lawe' da gulate tu tue', na' quebe guca xeledié'. ²⁴ Jesús naque' tu bxruze chadía chacanna lawe' da quebe gatie'. ²⁵ Chee le na' dxezéquene' guselé' chadía chacanna benne' ca' xelebigue' lau Dios ne chee Le', lawe' da naca ban Le' chadía chacanna chee gudé'e dizra' chee benne' ca' lau Dios.

²⁶ Jesús naque' bxruze blau, bxruze na' dxechínedxu. Naque' lá'azxa, ne quebe bi da caléla bene', ne quebe nabague' dul-la. Quebe naque' tuze ca zaj naca benne' dul-la, na' Dios nucá'ana szrendxe' Le' ca xúgute da zaj zua xabáa. ²⁷ Quebe naque' ca xezícadxa bxruze ca', benne' ca' ben na ba xen

belutię' béadu ca' tu zra tu zra, béadu ca' buluzúę' nedxu ne cheę xtúl-laqueze', na' ca gudé na' buluzúę' béadu xula ca' ne cheę xtul-la bėnneache. Jesús tu lásaze bzua cuine' ne cheę dul-la zaj nabaga xúgute bėnneache. ²⁸ Da bdxixrui bea Moisés dxuzúa na bxruze blau ca' zaj naque' benne' quebe zaj naque' li lazre'. Gate Dios bzetai cuine' ca gudé bla' da nadxixrui bea na', bzuę' tu bxruze blau naque' Zrí'inequeze', Bėnnea' bėn Dios naque' tu bxruze blau li lazre' chadía chacanna.

8

Jesús naque' bxruze blau cheędxu

¹ Da naca blaudxa cheę da caní dxennantu' naca na da nigá: Zua tu bxruze blau cheędxu caní, Bėnnea' dxe'e chalá'a xabėla cheę lataj blau cheę Dios xabáa, ² ne naque' bxruze blau dxunę' zrin lu lataj lá'azxa li, da bėn Xránadxu, quegá bėnneache. ³ Xúgute bxruze blau nuzúa Dios le' cheę xelegú'e guna' lau Dios, ne xelútię' béadu ca' lau Dios. Cheę le' na' dxun na ba xen bí guzúa Cristo lau Dios. ⁴ La zua Cristo xęzr la xu nigá, quebe gaque' bxruze lawe' da ne zaj zra' bxruze ca' dxelegú'e guna' ca nadxixrui bea da bde Moisés. ⁵ Zrin dxelún bxruze caní naca na ca tu da dxulé'eze na, ne ca tu zrúlaze cheę da na' zua xabáa. NezdXu naca na tu da dxulé'eze lawe' da gunná Dios, guzre' Moisés gate ba zuę' gunę' lataj lá'azxa: "Bxue xanne' gunu' xúgute na cáteze naca da ble'eda' lue' lu xi'a na'." ⁶ Na'a bxruze blau cheędxu nigá dxunę' tu zrin zácadxa lawe' da naque' wedé dizra' cheę tu xel-la' wezría cháwedxa, da nun Dios ne cheę da ca' guchebe lazre' da zaj naca na cháwedxa.

⁷ La guca li lazre' xel-la' wezría da bėnę' nedxu, quebe bėn na ba xen gunę' xel-la' wezría gudxupe' na'. ⁸ Gate Dios gudil-le' benne' ca' zaj naque' bi che, gunné':

Dxenná Xránale: Wazrín zra
gate guna' tu xel-la' wezría cube
nen benne' Israel ca', ne benne' Judá ca'.

⁹ Quebe gaca na ca guca xel-la' wezría
da bėna' nen xra xrtaule ca' gate becá'a ne'e,
ne bebéaja' benne' ca' lu xęzr la xu Egipto.
Caní guna' lawe' da quebe buluzúę' dizra'
xel-la' wezría da nuna',
na' cheę le' na' guleaj xichja' benne' ca'.
Da ni dxenná Xránale.

¹⁰ Xel-la' wezría guna' nen benne' Israel ca'
ca te cheę lu zra caní gaca na caní, dxenná Xránale:
Guzúa' da gudxixrui be'a lu xichaj lázrdau benne' ca',
ne guzúaja' na lu lázrdawę'.
Nadxa gaca' neda' Dios cheę benne' ca',
na' le' xelaque' bi chia' ca'.

¹¹ Quebe gun na ba xen xulusęde ljwezre',
ne quegá nu benne' xę'e bi biche': Bėnbea Xránadxu.
Xúgute' xelúnbe'e neda',
benne' cá'aze, ne benne' blau.

¹² Gunite lawa' cheę benne' ca'
ca naca da calela da zaj nune',
ne québedxa cheajsá lazra' cheę dul-la da zaj nune'.

¹³ Gate dxuchalaj Dios cheę tu xel-la' wezria cube, naca na lawe' da ba gunné' cheę da nedxu naca na da gula, na' da ba dxaca na da gula, ne da gulasla la xenitete na.

9

Lataj lá'azxa da zua lu xęzr la xu, ne da zua xabáa

¹ Gate ne zua xel-la' wezria nedxu, zaj de da nadxixrux bea ca dxal-la' xelun bxruze ca' tu lu xudau' da zua xęzr la xu nigá. ² Xudau' nedxu caní guca na tu xu'u xide zren. Lu lataj nedxu cheę xudau' na' da nazí le na Lataj Lá'azxa zaj zua da dxusa'ni', ne tu ta'a naga zria xeta xtila lá'azxa. ³ Cuzre naga ze ladxe' gudxupe' zua xetú lataj da nazí le na Lataj Lá'azxa Blau. ⁴ Lu lataj nigá zaj zua tu tá'adau' naga xezxe xala, ne tu xi'ina cheę xel-la' wezria da nun Dios, da nacu na oro du ca nácaqueze na. Lu'ule xi'ina na' xu'u tu zruágadau' xu'u na xeta maná. Cá'anqueze lu'ule na xu'u xágadau' da bęxru Aarón da na' bezria na, ne zaj xu'u na xiaj ca' naga zaj naxúaj dizra' cheę xel-la' wezria. ⁵ Lawe' xi'ina nigá zaj zua gubáz cheę xabáa ca' zaj naca na oro, da dxululé'e na zua Dios na', na' zaj nugacu xrile na naga dxuluzrie' dxen ne cheę dul-la zaj nabaga bėnneache. Québedxa séquentu' guchálajntu' ca naca cheę da caní ná'a.

⁶ Gate ba nagá'ana chawe' da caní, na' bxruze ca' dxelú'unqueze' lu lataj nedxu cheę lataj lá'azxa cheę xelune' zrin cheę xel-la' bxruze cheę'. ⁷ Lu lataj gudxupe' dxu'u tuze bxruze blau tu lásaze tu tu iza, na' gate dxu'e na' dxun na ba xen gu'e dxen cheę béadu ca' da guzrie' ne cheę dul-la nabágaqueze', ne ne cheę dul-la zaj nabaga bėnneache ca'. ⁸ Be' Lá'azxa dxuzéajni'ine' dxi'u quebe naxalaj neza cheę chú'udxu Lataj Lá'azxa Blau na' dxácate dxelune' zrin cheę xel-la' bxruze cheę' lu lataj nedxu cheę lataj lá'azxa na'. ⁹ Xúgutę da caní zaj naca na da dxululé'eze, da dxaca lu zra na'a zra, lawe' da guna' ca', ne dxen cheę béadu ca' da dxuluzia bxruze ca' lau Dios quebe gaca xelun na bėnneache dutę li lazre'. ¹⁰ Da caní zaj naca na cheę da dxelé'aj dxelawe', ne cheę da dxulucá'ana chawe' cuine', ne cheę da nadxixrux bea ca naca cheę bęla' dxen cheę bėnneache, da ca' bzua Dios ca zrindxa zra guché'e da ca'.

¹¹ Na'a ba bla' Cristo, ne naca Le' bxruze blau cheę da xrlátaje ca' da ba belelá'. Lataj Lá'azxa naga dxun Le' zrin ca bxruze blau naca na blaudxa, ne da li lásredxa. Quebe naca na tu da zaj nun bėnneache, da zéaje na, quebe naca na cheę xęzr la xu nigá. ¹² Cristo ba guxú'e Lataj Lá'azxa Blau, quegá cheę guzúe' dxen cheę béadu ca', ne cheę među ca', san cheę guzúe' dxen cheęqueze', na' guxú'e ga na' tu lásaze lawe' da ba bęne' xel-la' weselá chadía chacanna cheędxu dxi'u. ¹³ Da li dxen cheę bezre, ne cheę béadu ca', ne de cheę bėzredu ca', bea ca' dxuluzezxe' lu ta'a cheę Dios, da ca' dxuluzre'e xichaj benne' ca' zaj naque' sban, zaj napa na xel-la' waca xelibe na benne' ca' cúzreze, ne cheę xulucá'ana chawe na le' lau Dios. ¹⁴ Che caní naca na, wazéquedxa dxen cheę Cristo, Bėnnea' bzua cuine' lau Dios ne cheę Be' Lá'azxa dutę xel-la' li lazre' cheę', na' dxen cheę' na' dxibe na xichaj lázrdaudxu cheę da bęndxu da nua na xel-la' gute, cheę séquedxu gundxu zrin cheę Dios ban.

¹⁵ Cheę le' na' naca Jesucristo wedé dizra' cheę tu xel-la' wezria cube. Xel-la' gute cheę Cristo dxun na zrin cheę gaca gunite lau Dios cheędxu ca naca dul-la da bęndxu gate ne zúadxu lu xel-la' wezria nedxu, na' na'a benne' ca' ba gunné Dios waca xezezi'e ca naca da ca' guchebe lazre' Dios, da zaj naca na chadía chacanna. ¹⁶ Gate tu benne' dxune' tu xiche da dxelá'a na da de cheę',

dxun na ba xen gulé'edxu ba nate bénnea' chee gundxu ca dxenná xiche na'.
 17 Xiche na' quebe bi seque na dxácatę ne naca ban benne' bene' na, san gate
 ba gute bénnea', na' seque na. 18 Chee lę na', xel-la' wezria nedxu na' guzúa
 chuchu na ne chee dxen da buluzrię' na. 19 Moisés blabe' xúgutę da nadxiruj
 bea da zaj naxúaj na lu dizra' chee Dios lau xúgutę bénneache, na' ca gudé na'
 guquę'e zrila' da nadxé na da xrna, ne tu zruze xaga hisopo, na' gusebise'
 na dxen chee među ca', ne dxen chee béadu ca', ne nisa, na' bzre'e na lawe'
 xiche naga naxúaj xtizra Dios, ne bzre'e na bénneache ca'. 20 Nadxa guzre'
 benne' ca': "Dxen nigá naca na da dxuzúa chuchu na xel-la' wezria da nun
 Dios nen le'e." 21 Cá'anqueze bzra Moisés dxen lu lataj lá'azxa, ne lu xúgutę da
 dxuluchínene' lu zrin da dxelún bxruze ca'. 22 Ca naca da bdxiruj bea Dios,
 dxal-la' xulucá'ana chawe' xúgutę da ca' nen dxen, na' che quebe nu gularaj
 dxen, Dios quebe gunitę lawe' chee bénneache ca naca dul-la da zaj nabague'.

Dxen chee Jesucristo dxegúa na dul-la

23 Cani ben na ba xen xulucá'ana chawe' da ca' zaj naca na da dxululé'eze
 na ca zaj naca da zaj zua xabáa, na' da ca' zaj zua xabáa dxun na ba xen
 xulucá'ana chawe' na nen tu da zácadxa. 24 Cristo quebe guxú'e lu lataj lá'azxa
 da zaj nun bénneache, da na' naca na tu da dxulé'eze ca naca lataj lá'azxa li
 da zua xabáa, san guxú'e xabáqueze, naga zue' na'a lau Dios, dxudé' dizra'
 cheedxu dxi'u. 25 Bxruze blau chee benne' judío ca' dxu'e lu lataj lá'azxa
 blau tu iza tu iza chee guzú'e ga na' dxen da quebe naca cheequeze'. Na'a
 Cristo quebe dxuzúa cuine' zane' lasa. 26 La ben na ba xen guzúa cuine'
 zane' lasa, cá'anqueze zane' lasa gatię' ca gudé bene' xęzr la xu nigá. Na'a,
 gate ba bzrin zra dxaca li ca da guchebe lazre' Dios, Cristo ba ble'e tu lásaze,
 na' bzua cuine' chee cuę' dul-la zaj nabaga bénneache. 27 Ca dxun na ba xen
 xelate xúgutę bénneache tu lásaze, na' te na' Dios guchi'e da zaj nun tu tue',
 28 cá'anqueze Cristo bzua cuine' chee gutię' tu lásaze chee gudú'e' dul-la zaj
 nabaga' benne' zantę. Te nigá xel'e da gudxupe', quegádxa chee cuę' dul-la,
 san chee xedajselé' xúgutę benne' dxelebeze' Le'.

10

1 Da nadxiruj bea da bde Moisés guca na ca tu zrúl-laze chee da chawe' ca'
 da dxal-la' xelélé', ne quegá naca na léqueze na. Chee lę na' da ca' buluzúa
 bxruze ca' lau Dios ca nadxiruj bea na', da ca' buluzúe' tu iza tu iza, quebe
 gulezeque na xelún na benne' ca' li lazre', benne' ca' gulebigue' lau Dios. 2 La
 guzeque' da nadxiruj bea na' gun na benne' ca' li lazre', québedxa nu guzúa
 da ca' lau Dios lawe' da la guladxę benne' ca' lu dul-la zaj nabague', québedxa
 zaj nabague' dul-la. 3 Na'a da ca' buluzúe' lau Dios tu iza tu iza bulusá na lazre'
 chee dul-la da zaj nabague', 4 lawe' da quebe guzeque' dxen chee bezre ca',
 ne dxen chee béadu ca' cua na dul-la zaj nabaga bénneache.

5 Chee lę na', gate bla' Cristo lu xęzr la xu nigá, guzre' Dios:
 Quebe dxaca lazru' guna', ne béadu ca' nu gute lęba' lau'.
 Na'a ba bęnu' bel-la' dxen chia' nigá.

6 Quebe dzezaca ba lazru' béadu ca' dxuluzezxe' lau',
 ne béadu ca' dxelutię' lau' chee cua na dul-la zaj nabague'.

7 Nadxa gunniá': "Nigá za'a neda' chee guna' ca da nnau' Lue', Dios,
 ca naxúaj na chia' neda' lu xiche lá'azxa."

8 Nédxula gunné': "Quebe dxaca lazru', ne quebe dzezaca ba lazru' guna', ne
 béadu ca' nu gute lęba' lau', ne béadu ca' dxuluzezxe' lau', ne béadu ca' dxelutię'

lau' cheē cua na dul-la zaj nabaga bēnneache." Caní gunné' lácala zaj naca na da nadxixruj bea na xuluzúe' na lau Dios. ⁹ Ca gudé na' gunné': "Nigá za'a neda' cheē guna' ca da nnau' Lue', Dios." Da nigá zéaje na gudé' lu waláz cheē da ca' buluzúa bxruze ca' lau Dios, gate bzua cuine' lau Dios ne cheē dul-la zaj nabaga bēnneache. ¹⁰ Dios ba bca'ana chawe' dxi'u lu dul-la nabágadxu lawe' da ben Cristo ca da gunná Dios gate bde cuine' lau Dios tu lásaze gate gutie' le'e xaga begúaj.

¹¹ Xúgutē bxruze judío dxelune' zrin lau Dios tu zra tu zra, ne zane' lasa dxuluzrie' lau Dios da cá'anqueze lácala da ca' cabata' xezezeque na xelegúa na dul-la cheē bēnneache. ¹² Jesucristo bzrie' lau Dios tuze da dxugúa na dul-la, na' gudé na' gudxé'e chalá'a xabela cheē Dios. ¹³ Zue' na'a dxebeze' zra gate guzúa Dios benne' ca' dxeledábage' chee' zran ni'e. ¹⁴ Caní dxune' lawe' da bca'ana chawe' chadía chacanna benne' ca' zaj naque' bi cheē Dios. Caní bene' gate bzua cuine' lau Dios tu lásaze. ¹⁵ Caníqueze dxenná Be' Lá'azxa lawe' da gunné' nédxula:

¹⁶ Caní naca xel-la' wezría guna' nen benne' Israel ca' ca te cheē lu zra caní, dxenná Xránale: Guzúa' da nadxixruj bea na' lu xichaj lázrdau benne' ca', ne guzúaja' na lu lázrdawe'.

¹⁷ Ca gudé na' dxenné': Cabátadxá cheajsá lazra' cheē dul-la da zaj nabague', ne cheē da caléla ca' da zaj nune'.

¹⁸ Ca'an naca, gate Dios ba bnite lawe' cheē bēnneache ca naca dul-la da zaj nabague', québedxa dxun na ba xen bi xuluzúe' lau Dios cheē cua na dul-la ca'.

Dxal-la' bígadxu lau Dios

¹⁹ Cheē le na', benne' bicha'dau', waca chú'udxu lu lataj lá'azxa blau dute lázrdaudxu ne cheē dxen cheē Jesucristo da blalje'. ²⁰ Dxezrindxu lau Dios, dxededxu tu neza cube, da quebe naca na ca da xjácalē bxruze ca' lu lataj lá'azxa. Dxededxu neza da naca Cristoqueze, Bēnea' zúalē Dios xabáa. ²¹ Jesús naque' bxruze blau cheedxu, ne zaj xu'u lu ne'e bēnneache cheē Dios. ²² Cheē le na' dxal-la' bígadxu lau Dios dute lázrdaudxu ne dute xel-la' dxeajlí lazre' li, lawe' da bca'ana chawe' Le' lázrdaudxu cheē québedxa sua da stebe lu xichaj lázrdaudxu ca naca cheē dul-la, ne naca cheedxu cáteze ba gudibe' bel-la' dxen cheedxu nen da naca ca tu nisa chawe'. ²³ Dxal-la' sua cháchadxu ca naca da dxebeza lázredxu cheē da dxéajledxu, ne quebe guchadxu ca dxundxu, lawe' da gun Dios ca da guchebe lazre' guné' cheedxu. ²⁴ Dxal-la' quilaj lázredxu ca gundxu gácalē ljwézredxu tudxu xetudxu cheē zri'i ljwézredxu, ne gundxu da xrlátaje. ²⁵ Quebe dxal-la' gusandxu xezrágadxu lau Dios ca dxelún bal-la benne'. Dxal-la' gutipa lazre' ljwézredxu tudxu xetudxu, na' gúndxadxu caní na'a lawe' da dxelé'edxu ba za bagu zra xelá' Xránadxu.

²⁶ Che núnbeadxu ca naca xel-la' li cheē Dios, ne chéajdxadxu gundxu dul-la, québedxa bi de da cua na dul-la bágadxu. ²⁷ Lu xel-la' dxezebe súadxu da naca cheē zra guchi'a Dios, ne cheē xi' da guzría xi na benne' ca' dxeledábage' cheē Dios. ²⁸ Gate nu benne' bzué' chalá'ala da gunná bea Mnoisés, ne gulezrá' chupa u chunna benne' belexechebe' cheē da ben bēnea', na' belutie' bēnea', ne quebe belexache lazre' le'. ²⁹ Tu da stebe zrendxa dxal-la' xezezi' benne' ca' dxuluzúe' chalá'ala Zri'ine Dios, ne dxulucá'ana dítajé' dxen cheē, da blalje', dxen na' dxuzúa chuchu na xel-la' wezría cheē Dios, ne

dxucá'ana chawe na benne' ca', na' dxelenné' schanni' chee Be' Lá'azxa chee Dios, Bénnea' nazri'ine' le'. ³⁰ Ba núnbeadxu Xránadxu, Bénnea' gunnáqueze': "Neda' xebéaj lazra' bénneache. Neda' gunézruja' lazruj chee benne' ca'." Cá'anqueze gunné': "Xránale guchi'e chee bénneache chee'." ³¹ Da dxal-la' xelezrebe bénneache naca da štebe da gun Dios benne' ca'. ³² Le gusá lázrele le'e iza da ba guledé, gate za guzítele xel-la' naxaní' chee Dios, na' duté xel-la' zren lazre' bchaga laule xel-la' zi' da gudele. ³³ Bál-lale le'e bulucháchaléne', ne belú'e le'e lówela bénneache, na' xebál-lale le'e guzáca'le gate guná'ale benne' ca' guledé' xel-la' zi' caní. ³⁴ Bexache lázrele benne' gulezrá' lizre xia, ne duté xel-la' dxebe bchaga laule da beluné' gate gulequé'e ca da nápale, lawe' da nézele nápale xabáa da zácadxa na, ne da naca na da chadía chacanna. ³⁵ Quebe gusanle ca da dxuxrén lázrele, lawe' da nusá xel-la' dxuxrén lazre' chee tu da zren da sí'le. ³⁶ Le'e dxal-la' gácale zren lazre' chee gunle ca da nna Dios, na' síle ca da guchebe lazre' Dios gunné' chee. ³⁷ Naca na ca dxenná xiche lá'azxa:

Xátedauze de,

na' xelá' Bénnea' dxal-la' xelá', ne quebe chene'.

³⁸ Benne' naque' xlátaje lawa' neda',

gata' chee' xel-la' nabán li lazre' lawe' da dxéajle'e chia',

na' che cueaj xíchaje' neda' quebe xezaca ba lazra' nen bénnea'.

³⁹ Na'a dxi'u quebe nácadxu tuze nen benne' ca' dxelebéaj xíchaje' Dios, ne xelebíá xi'e. Nácadxu tuze nen benne' dxeléajle'e chee Dios, na' xelélé bénne'du zaj xu'e.

11

Xel-la' dxeajlí lazre'

¹ Che nápadxu xel-la' dxeajlí lazre' dxuxrén lazrdxu sídxu da dxebézadxu, ne nézquezdxu naca da li da quebe dxelé'edxu. ² Xra xrtáudxu ca' belexegá'ané' xrlátaje lau Dios lawe' da guléajle'e chee'.

³ Lu xel-la' dxeajlí lazre' cheedxu nezdXu ben Dios xezr la xu nígá, bchínene' dizra' chee', na' ca naca da dxelé'edxu na'a ben Dios le na nen da quebe nalá' gate nate.

⁴ Abel, lu xel-la' dxeajlí lazre' chee', bzue' lau Dios tu guna' da zácadxa na ca da bzua Caín, na' chee le na' Dios gunné' naca xlátaje Abel, ne guzi'e guna' chee'. Ca'an naca, lácala ba gute Abel, ne dxusédene' dxi'u ne chee da bene' lawe' da gudape' xel-la' dxeajlí lazre'.

⁵ Enoc, lu xel-la' dxeajlí lazre' chee', Dios beche'e le'. Quebe gutie', na' québedxa nu ble'e le' lawe' da beché Dios le'. Naxúaj na lu xiche lá'azxa da dxenná na, gate quebe ne xeché Dios le', ben Enoc ca da bezaca ba lazre' Dios.

⁶ Quebe gaca nu gun da xezaca ba lazre' Dios che quebe dxeajlí lazre' Le'. Bénnea' dxebigue' lau Dios, dxun na ba xen chéajle'e zua Dios, ne xunézruje' chee benne' ca' dxelexilaje' Le'.

⁷ Noé, lu xel-la' dxeajlí lazre' chee', gate Dios guzre' le' nédxula ca da dxal-la' gaca, bzue' dizra' chee Dios, ne bene' tu da zren da dxedá lawe' nísadau' chee xelélé xrtie' ca'. Guxeajlí lazre' Noé Dios, san gulebíá xi' bénneache zaj zre'e xezr la xu na', lawe' da quebe guleajlí lazre' Dios. Dios bca'ané' Noé xrlátaje lawe' da guxeajlí lazre' Le'.

⁸ Abraham, lu xel-la' dxeajlí lazre' chee', gate Dios gunné' le', bzue' dizra', ne guzé'e zéaje' tu lu xezr la xu da guchebe lazre' Dios gunézruje' chee'.

Bdxuajé' lázrié', ne quebe nézené' naga zéaje'. ⁹ Lawe' da guxeajlí lazre' Dios, guzúa Abraham lu xezr la xu na' da guchebe lazre' Dios gunézruje' chee', naga naca xezr la xu chee' benne' zitu' ca'. Guzúe' tu lu xu'u ladxe', ne cá'anqueze ben Isaac, ne Jacob, benne' ca', cá'anqueze Dios guchebe lazre' xezezi'e da na' gunezruj Dios le'. ¹⁰ Caní ben Abraham lawe' da guleza lazre' chu'e lu xezre na' na' da quebe te chee' na, da na' guleche Dios, ne da ben Léqueze'.

¹¹ Cá'anqueze Sara, lácala ba nácale'e benne' gula, ne quebe nu bi chee' dxalaj, san xel-la' dxeajlí lazre' chee' guque' xrna bidau'. Guzúa tu bi biu chee' lawe' da guxeajlí lazre' Dios guné' ca da guchebe lazre'. ¹² Caní guca, Abraham, lácala ba gúxrulé'e, guxánle'e zri'ine zre sue' ca naxán xuzre' da zaj dxe' dxu'a tu yegu zren, da quebe nazeque' gulábadxu.

¹³ Xúgute benne' caní gulatie', ne quebe ne xezezi'e da ca' nachebe lazre' Dios, san lawe' da guleajlí lazre' Dios, belelé'eng' na zítu'la, na' belexeza ba lázreléne' na. Caní bululé'eng' gulaque' ca benne' zitu', benne' guledeza lu xezr la xu nigá. ¹⁴ Benne' dxuluchálaje' caní dxululé'eng' dxeledé' dxelexilaje' tu lazrie'. ¹⁵ La buluwía lazre' ca naca xezr la xu naga gusá'aque', na' waca xelexezrine' na'. ¹⁶ Gulaca lazre' tu lazrie' da naca na cháwe'dxa, da na' naca na lazrie' da zua xabáa. Chee' le' na' Dios quebe dxexedué'eng' gate dxelenná benne' ca' naque' Dios chee', na' nucueze' tu xezre naga xezezi'a benne' ca'.

¹⁷ Gate guca lazre' Dios nézené' ca naca xel-la' dxeajlí lazre' chee' Abraham, na' lu xel-la' dxeajlí lazre' chee' guché'e Isaac chee' gutié'-be' lau Dios. Ba zue' gutié' bi tu licha' chee' lácala ba nachebe lazre' Dios, gunné': ¹⁸ "Né chee' Isaac wazrále'e zri'ine zre su'." ¹⁹ Abraham bxren lazre' Dios wazéquene' gusebané' benne' gate, na' waca nnadxu bezí' lu ne'e zri'ine' Isaac ládujla benne' gate.

²⁰ Isaac, lu xel-la' dxeajlí lazre' chee', guchebe lazre' xezezi' zri'ine' Jacob, ne Esaú da xrlátaje ca'. ²¹ Jacob, lu xel-la' dxeajlí lazre' chee', gate zua gatie', guchebe lazre' xezezi' tu tu zri'ine José da xrlátaje ca', ne be' lá'ané' Dios, nuchiche tipe' xágadu nuxre'. ²² José, lu xel-la' dxeajlí lazre' chee', gate ba zua gatie' gunné' welaxedxúaj benne' Israel ca' lu xezr la xu Egipto, ne bdxixruj be'e ca dxal-la' xeluné' chee' zrita xu'e.

²³ Gate gulaj Moisés, xra xrné'e, lu xel-la' dxeajlí lazre' chee' bulucaché' lebe' lawe' chunna beu', lawe' da belelé'eng' naca bidu na' xrtanle'e, ne quebe belezrebe' benne' wenná bea, bénnea' bdxixruj be'e xelate bidu ca'. ²⁴ Moisés, lu xel-la' dxeajlí lazre' chee', gate guque' benne' waca, quebe guca lazre' gaque' zri'ine nu'ula zri'ine benne' wenná bea chee' xezr la xu Egipto, ²⁵ san guca lázredxe' té'e' xel-la' zi' nen bi ca' chee' Dios quézcala sue' tu chí'idau' lu da ba neza chee' da naca dul-la'. ²⁶ Gúquene' nácadxa chawe' gate belún lala bénneache chee' ca da guca chee' Cristo, quézcala gape' ca naca da gunní'a chee' xezr la xu Egipto, lawe' da dxenné'e da gunezruj Dios le'. ²⁷ Moisés, lu xel-la' dxeajlí lazre' chee', bedxúaje' lu xezr la xu Egipto, ne quebe bezrebe' xel-la' dxezrá'a chee' benne' wenná bea, na' guzúa chúchue' ca tu benne' dxelé'eng' Dios, Bénnea' quebe gaca nu le'e.

²⁸ Moisés, lu xel-la' dxeajlí lazre' chee', beñe' Laní Pascua gate na' bdxixruj be'e xuluzrá benne' Israel ca' dxen le'e xaga dxa xu'u chee' quebe gite gubáz chee' xabáa chee' xel-la' gute netú zri'ine benne' Israel ca', bi biu nedxu. ²⁹ Benne' Israel ca', lu xel-la' dxeajlí lazre' chee', beledé' lu Nísadau' Xrna ca' benne' dxeledé' lu xu bizre, san gate gulú'u benne' Egipto ca' naga ba guledé' benne' ca', na' bezraga nisa na', na' gulebé' chí'i benne' Egipto ca', na' gulatie'.

³⁰ Benne' Israel ca', lu xel-la' dxelejíl lazre' chee', guzré'e ze'e da naxechaj na xezre Jericó ca' gudé guledé benne' Israel ca' bezúate xezre na' tu tu lasa du gazre zra. ³¹ Rahab, nu'ula dxezí' lu ne'e benne' zaj xu'e neza, lu xel-la' dxeajíl lazre' chee', quebe gutie' tu zren nen benne' Jericó ca', benne' quebe buluzúa dizra' chee' Dios, lawe' da gudapa le' ba lá'ana benne' Israel ca', benne' xejjenná' lane' xezre na'.

³² ¿Bizradxa nnia'? Québedxa bi lataj napa' guchálaja' ca' ben Gedeón, ne ca' ben Barac, ne ca' ben Sansón, ne ca' ben Jefté, ne ca' ben David, ne ca' ben Samuel, ne ca' belún benne' ca' gulenné' waláz chee' Dios. ³³ Benne' ca' lu xel-la' dxelejíl lazre' chee' gulezí'e xezr la xu ca' chee' benne' xula, ne gulenná be'ené' cháwe'dau' benne' waláZR chee' ca', na' gulezí'e da guchebe lazre' Dios, lawe' da gúcalene' le'.

Belelé' lu dxu'a bezre xixre' ca'.

³⁴ Buluxusule' xi' da dxéneaca.

Belelé' lu xia nalá.

Benne' ca' zaj nate ni'a na' belexaque' dipa lazre'. Gulaque' benne' wala lu wedil-la, ne gulaca lu ne'e da guta' chee' benne' ca' guledábague' le'.

³⁵ Nu'ula ca' belezí' lu ne'e benne' gate chee' ca', benne' belexebáne'.

Xebal-le' gulátie' gate buludé' le' ba xa', lawe' da quebe belú'e lataj nu gusán le', chee' xelezrué'ene' xel-la' dxexebán chee' xelezí'e xetú xel-la' nabán da naca na da li.

³⁶ Xebal-le' belún le' chee',

na' xebal-le' belú'e le',

na' xebal-le' buluchéaje' le' du xia ne gulegu'e le' lizre xia.

³⁷ Belutie' xebal-le' nen xiaj,

na' xebal-le' gulecheze' le' nen xia.

Xebal-le' buludé' le' lu da stebe ca',

na' xebal-le' belutie' nen xia nalá.

Xebal-le' guledé'e nila na'la,

zaj nacue' zra zrila' ne zra béadu ca'.

Baxache' gulaque', na' guledé'e lu da zi' da xa',

na' buluzalje' le'.

³⁸ Bénneache zaj zra' lu xezr la xu nigá quebe zaj naca chee' xelezí'e ba neza chee' benne' caní. Tu guledázqueze' le'e xixre', ne lu xi'a ca', ne lu bluaj ca', ne lu bluaj xu ca'. ³⁹ Xúgute benne' ca' bca'ana chawe' Dios le' lawe' da guleajíl lazre' Le', san quebe ne xelezí'e ca' naca da guchebe lazre' Dios, ⁴⁰ lawe' da nucueza Dios tu da nácadxa chawe' cheedxu dxi'u, chee' xelexaca benne' ca' li lazre' tu zren nen dxi'u.

12

Dxal-la' nna'dxu Jesús

¹ Lawe' da zaj naxéchaj benne' zante dxi'u, benne' ca' ba bululé'ene' ca' guléajle' chee' Dios, dxal-la' guzúadxu chalá'ala xúgute da dxululale na dxi'u, ne dul-la da naxél-la na dxi'u, na' lu duté xel-la' zren lazre' cheedxu gundxu zrin chee' Dios, da naca na ca' dxezá' chéguDXU chee' zrué'eledxu da dxelé'edxu tu chi na'. ² Dxal-la' nna'dxu Jesús, Bénnea' dxunge' nápadxu xel-la' dxeajíl lazre', ne dxunge' li lazre' xel-la' dxeajíl lazre' na'. Jesús gudé'e xel-la' zi' le'e

xaga begúaj, ne quebe bedué'ene' lawe' da guné'e xel-la' dxebe' na' da dxebeza na Le', na' gudxé'e chalá'a xabela chee lataj blau chee Dios.

³ Le nna' xanne' ca da ben Jesús, gudéle'e xel-la' zi' da bulusaca benne' dul-la ca' Le'. Chee le na' quebe chajxré'quele gunle zrin chee', ne quebe gute lázre-le. ⁴ Ba gudíl-lalele dul-la, na' quebe ne gátele lu wedil-la na'. ⁵ Quebe gal-la lázrele le'e ca dxun Dios, dxuzéajni'ine' le'e ca zrí'inequeze', gate dxenné': Zrí'ina', quebe guzú' chalá'ala da dxun Xranu' gate dxusízrene' lue', ne quebe gate lazru' gate dxedil-le' lue'.

⁶ Xránadxu dxusízrene' bi ca' nazrí'ine', na' xúgute' bi dxezi' lu ne'e ca zrí'inequeze' dxudé'-be' xel-la' zi'.

⁷ Le guchaga lau le'e xel-la' zi' da dxedele, lawe' da dxuxúe Dios le'e ca zrí'inequeze'. ¿Zra bi quebe dxusízre xrabe' lebe'? ⁸ Che Dios quebe dxusízrene' le'e ca dxusízrene' xúgute' bi chee' ca', quebe nácale zrí'inequeze Le'. Nácale ca bi lan ca'. ⁹ Gate ne nácadxu bidau', bulusízre xra xrnadxu dxi'u, na' gudápadxu le' ba lá'ana. Dخال-la' guzúadxadxu dizra' Xradxu zué' xabáa, na' gaca bandxu. ¹⁰ Xra xrnadxu bulusízrene' dxi'u tu chí'idauze ca da guléquene' chawe', san Dios dxusízrene' dxi'u chee gaca tu da ba neza cheedxu da naca na li lazre', chee gácadxu lá'azxa ca naca lá'azxa Lé'queze'. ¹¹ Da li quebe dxedánnedxu da dxusízrene' xradxu dxi'u, san dxé'quedxu zi', na' dxedé' na', che dxéajni'idxu ca da dxusízrene' dxi'u, na' gundu' da xrlátaje ca', ne cueza zri lázredxu lau Dios.

Quebe dxal-la' guzúadxu chalá'ala da dxenná Dios

¹² Chee le na' le guzazraj na'le, ne zríbele da ba dxelate ni'a na', ¹³ ne le sa' lu neza da zaj naca na li, chee quebe chegu ní'ale da quebe zaj zua chacha, ne chee xelexaca chacha na.

¹⁴ Le gun ba xuzre suale lu xel-la' dxebeza zri lazre' nen xúgute' bénneache, ne le gaca li lazre' lau Dios. Che quebe gunle caní, quebe gaca lé'elele Xránadxu. ¹⁵ Le guxúe xanne' chee quebe gusanle da chawe' ca' dxunna Dios le'e, ne chee quebe gaca netule le'e ca tu xixre' sla' da dxulala na, ne dxuxrinnaj na da xezícala. ¹⁶ Le guxúe xanne' chee quebe gunle da sban, ne quebe guzúale chalá'ala ca da dxunna Dios, ca ben Esaú, bénnea' bsane' xúgute' da gunezruj xre' le' chee guzi'e tu cueze xel-la' wagu. ¹⁷ Ba nézele ca da guca gudé' na', gate guca lazre' Esaú na' si'e da chawe' da naba xre' lau Dios, na' xre' bzue' le' chalá'ala, ne lácala gudxézrele'e, quebe guca xuché'e ca da ba bene'.

¹⁸ Quebe dxaca chee'le ca da guca chee benne' Israel ca', gulebigue' naga zua tu xi'a, da na' wazeque' nu guchiche, ne naga dxala na xi', naga zua da chul-la, ne dxe' zren, ne dxaca be' bdu'nu'. ¹⁹ Belenne' gudxezre luzu da dxulucueze', ne chí'i Dios bchálajlene' le'. Benne' ca' belenne' chí'i Dios na' gulata' xúene' québedxa guchálajlene' le'. ²⁰ Ca'an guca lawe' da quebe gulezéquene' xuluchaga lawe' ca naca da bdxixruj be'e Dios, gunné': "Che tu béadauze guléajba' lu xi'a na', dxal-la' xelútie'-ba' nen xiaj u nen tu xia nalá xéche'ze." ²¹ Da na' belelé'ene' bchébele'e na le', na' Moisés gunné': "Dxezrízetea' xel-la' dxezrebe."

²² Na'a le'e ba nabícale naga zua xi'a lá'azxa da nazí le na Sión, ne lu xezre chee Dios ban, da naca na Jerusalén da zua xabáa, ne naga zaj zra' gázxue gázxue gubáz chee xabáa, ²³ ne naga zaj nazraga benne' ca' gulaca bi chee Dios nédxute, benne' ca' ba zaj naxúaj le' xabáa, ne lau Dios, Bénnea' guchi'e chee xúgute' bénneache, ne naga zaj zra' be' gulácaqueze benne' ca' ba nun Dios le' li lazre', ²⁴ ne lau Jesús, Benne' wedé dizra' chee xel-la' wezrí'a cube, ne naga bzre'e dxen da dxuchalaj na da cháwedxa ca da bchalaj dxen chee Abel.

²⁵ Chee le na', le guxúe xanne' cuínale chee quebe guzúale chalá'ala Bénnea' dxuchálajlene' dxi'u. Quebe belegache benne' ca' buluzúe' chalá'ala Dios gate na' bchálajlene' le' lu xezr la xu nigá, ne quebe gáchedxu dxi'u che guzúadxu chalá'ala Bénnea' dxuchálajlene' dxi'u, zué' xabáa. ²⁶ Lu zra na' gate gunná Dios, na' guzrú' xezr la xu nigá. Na'a dxenné': "Xetú lásaze guniba' quegaze xezr la xu nigá, san cá'anqueze xabáa." ²⁷ Gate gunné': "Xetú lásaze", zéaje na xecá'a Dios ca naca da dxeledá, da ca' bene', na' xegá'ana da quebe seque' nu gutá. ²⁸ Dxal-la' xedxu Dios: Xcalenu' lawe' da gunne' dxi'u tu lataj naga dxenná bea Le' da quebe seque' nu gutá. Dxal-la' güe lá'anadxu Dios du lázredxu ne duté xel-la' ba lá'ana, ca da dxezaca ba lazre', ²⁹ lawe' da naca Dios cheedxu ca tu xi' da guzrí'a xi na da sban.

13

Da dxezaca ba lazre' Dios

¹ Quebe gusanle ca nazrí'i ljwézrele tule xetule ca bíchequezle. ² Le gusá lázrele dxal-la' si' lu na'le benne' zá'aque' lízrele, lawe' da gate belún caní bal-la benne', gulezí' lu ne'e gubáz chee xabáa ca', ne quebe guleque be'ene'.

³ Le gusá lázrele gácalele benne' zaj xu'e lizre xia, gun cuínale ca benne' xú'uqueze lizre xia nen benne' ca'. Le gusá lázrele gácalele benne' ca' dxeledé'e' xel-la' zi', gun cuínale ca benne' dxeledé'queze' xel-la' zi'.

⁴ Xúgutele dxal-la' gápale ba lá'ana xel-la' wechaga na', ne gunle da xlátaje lu xel-la' wechaga na' chee, lawe' da guchi'a Dios chee benne' ca' dxuluzúe' chalá'ala xel-la' wechaga na' chee', ne chee benne' ca' dxelune' da sban.

⁵ Quebe sa lázrele xel-la' gunní'a. Le xezaca ba lázrele ca da nápa le lawe' da ba gunná Dios: "Cabata' gusana' lue', ne quebe cueaj xichajqueza' lue'." ⁶ Caní naca, du lázredxu waca nnadxu:

Xrana' Dios dxácalene' neda'.

Quebe zreba' bi da gusaca bénneache neda'.

⁷ Le gusá lázrele gácalele benne' ca' dxuluxúe' le'e, ne dxuluchálajlene' le'e dizra' chee Dios. Le na' xque ca da dxelúne', ne le chéajle chee Dios ca dxelún benne' ca'.

⁸ Túzqueze ca naca Jesucristo neaje, ne na'a zra, ne chadí'a chacanna.

⁹ Quebe sile ca da dxuluchalaj benne' dxulusédené' da quebe naca na ca da naxúaj na lu xiche lá'azxa chee Dios. Cháwedxa naca guzú'a chuchu lázrdauxu lu xel-la' zri'i lazre' chee Dios, ne quebe chéajledxu da dxeledixiruj bea benne' ca naca da dxal-la' xi'aj gágudxu, lawe' da benne' ca' zjácálene' da ca' cabata' ne xezezí' ba neza ne chee da ca'.

¹⁰ Bxruze judío ca' gulawé' béadu ca' belutié' lataj lá'azxa. Quebe zaj naca chee' xelawé' guna' da dxugú'udxu dxi'u chee Dios. ¹¹ Bxruze blau judío bzrié' dxen chee béadu ca' lu lataj lá'azxa blau ca tu guna' da dxegú'a na dul-la. Buluzexé' da nagá'ana chee béadu ca' cúzrela xezre. ¹² Cá'anqueze gute Jesús cúzrela xezre na' chee bca'ana chawé' bénneache ne chee dxen cheé'queze'.

¹³ Le dxuaj, gundxu tu zren Cristo, lácala xuluzú'a bénneache dxi'u chalá'ala ca belune' chee Le'. ¹⁴ Lu xezr la xu nigá quebe de' cheedxu tu xezre da súatequeze. Dxebézadxu tu da za za'. ¹⁵ Chee le na' tu dxál-lazqueze güe lá'anadxu Dios nen dxú'aquezdxu ne chee Jesucristo, da naca na ca tu guna' da dxugú'udxu chee Dios. ¹⁶ Dxal-la' gusá lázredxu gundxu da xrlátaje, ne bi gunézruidxu chee benne' ca' quebe bi zaj nape', lawe' da dxezaca ba lazre' Dios le na.

¹⁷ Le guzúa dizra' chee benne' ca' dxuluxúe' le'e, ne le gun ca da dxelenné'. Benne' caní dxuluxúe' bénne' du xu'ule, ne xuluxudé' lau Dios ca da zaj nune'. Che gunle caní, na' benne' caní welune' zrin chee' du lazre', ne quebe xelezúa xaché', lawe' da che quebe gunle caní, quebe bi da ba neza gaca na chee'.
¹⁸ Le naba lau Dios gaca chawe' cheentu'. Quebe bi zua lu lárdauntu' da dxagu na zria netu' lawe' da dxun zi' lázrentu' guntu' da xrlátaje ca naca xúgute' da dxuntu'. ¹⁹ Dxenaba' le'e nábale lau Dios gunne' neda' lataj xídazega' súalena' le'e naga zúale.

²⁰ Dxenaba' lau Dios, Bénnea' dxunne' dxi'u xel-la' dxebeza zri lazre', ne bsebane' Xránadxu Jesucristo ládujla benne' gate. Léqueze' naque' Benne' Blau Dxuxúe' Dxi'u, nácadxu zrila' chee', na' caní naque' lawe' da blalje' dxen chee' da bzua chuchu na xel-la' wezria chadía chacanna da bene'. ²¹ Dxenaba' Dios guné' le'e li lazre' chee' séquele gunle da xrlátaje ca da dxaca lazre' Le', ne guné' cheentu' ca da dxaca lazre' ne chee' Jesucristo. ¡Gaca ba Cristo chadía chacanna! ¡Ca'an gaca na!

²² Le'e, benne' bícha'dau', dxata' xueda' le'e gácale zren lazre' ca naca dizra' caní, da dxulusizre na le'e, na' látega da du nigá dxuzúaja' chee'.
²³ Dxuzenda' le'e ba bedxúaj bi bíchedxu Timoteo lizre xia, ne che xelá' zé'ebe', na' che'a-be' gate xedajnná'a le'e.

²⁴ Le gugapa diuzre xúgute' benne' ca' dxuluchálajlene' le'e dizra' chee' Dios, ne le gugapa diuzre xúgute' benne' bíchedxu ca'. Benne' zaj zre'e xezr la xu Italia nigá dxulugape' le'e diuzre.

²⁵ Dxenaba' lau Dios guné' da chawe' chee' xúgutele le'e. ¡Ca'an gaca na!

DIZRA' CHEE DIOS DA BZUAJ SANTIAGO

Santiago dxuzuaje' chee benne' ca' zaj nadxúaje' lazrie'

¹ Neda', Jacobo, naca' wen zrin chee Dios, ne chee Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Israel, ne nase dínnaje du gabí'i xezr la xu nigá.

Xel-la' sina da za lu na' Dios

² Benne' bícha'dau', dxal-la' béle'ele gate dxedele zane cue' da stebe ca', ³lawe' da nézele gate dxedé xel-la' dxeajlí lazre' chee lu da stebe, da nigá dxundxa na le'e zren lazre'. ⁴ Le gun ba xuzre gaca li lazre' xel-la' zren lazre' chee chee gácale benne' xrlátaje ne li lazre', ne quebe bi xázrjele.

⁵ Che núlale le'e dxexázrjele xel-la' sina, le naba na lau Dios, na' Le' gunne' na le'e, lawe' da dxunézrjele Dios chee xúgute' bénneache, ne quebe dxexezúene' zi'. ⁶ Dخال-la' ná bale nen duté xel-la' dxeajlí lazre' chee, ne quebe gun chupa lázrele. Benne' dxun chupa lazre' naque' ca xeajxruza chee nísadau' da dxua be' nila na'la. ⁷⁻⁸ Benne' dxune' caní, ne quebe zrize dxezúa lázrdawe', ne quebe tuz ca dxun xichaj lázrdawe' quebe dxal-la' guéquene' bi da xunezruj Xránadxu chee'.

⁹ Tu benne' bíchedxu naque' baxache' dxal-la' bene' lawe' da guzúa Dios le' ca tu benne' zaca. ¹⁰ Benne' nape' xel-la' gunní'a dxal-la' bene' gate gun Dios le' dxexruj lazre' lawe' da naca benne' gunní'a ca tu xiaj xixre' da quebe dxezi' béateca na. ¹¹ Gate dxalaj gubizra, ne dxennále' na, na' dxebizre xixre' na', na' dxexruj xiaj chee na, na' dxedé xel-la' xrtan chee na. Cá' anqueze gaca chee benne' gunní'a, xenítie' dxácaté na' dxezi' lu ne'e xel-la' gunní'a.

Ca naca chee da stebe ca' da dxededxu

¹² Ba neza naca na chee benne' dxuchaga lawe' da stebe ca' duté xel-la' zren lazre' chee, lawe' da che ba bedxúaje' chawe' lu da stebe da dxedé', na' si' lu ne'e da nachebe lazre' Dios gunézruje' chee benne' ca' zaj nazri'ine' Le'. ¹³ Gate nu benne' zua da dxegú'u xel-la' na le' chee gune' da calela, quebe dxal-la' guéquene' dxuzúa Dios da na' dxegú'u xel-la' na le', lawe' da quebe bi de da seque' xegú'u xel-la' na Dios chee gune' da calela, ne quebe bi guzúa Dios da xegú'u xel-la' na dxi'u chee gundxu da calela. ¹⁴ Tu benne' zua da dxegú'u xel-la' na le' chee gune' da calela gate xel-la' dxezá lazre' da calela chee' dxecá'a na le', ne dxenná be'e na le'. ¹⁵ Nadxa ca naca xel-la' dxezá lazre' da calela caní dxuluzán na dul-la, na' gate ba guzeque' zua dul-la na', na' dxute na bénnea'.

¹⁶ Benne' bícha'dau' nazri'ite' lazra', quebe güele lataj nu si xe le'e. ¹⁷ Xúgute' da zaj naca xrlátaje ne da zaj naca li lazre' da dxezidxu zá'aca na xabáa lu na' Dios, Bénnea' bene' da ca' dxulusení na zran xabáa. Dios quegá dxuchá cuine', ne quebe dxuché' ca dxune'. ¹⁸ Ca naca da guca lazre' Dios, ba benne' dxi'u xel-la' nabán. Bchíne' dizra' li chee', chee gácadxu ca tu lina nedxu chee', chee da ba ben Le'.

Xel-la' dxucá'ana szren Dios da naca na li lazre'

¹⁹ Chee le' na', benne' bícha'dau' nazri'ite' lazra', tu tule le'e dxal-la' gácale ban lazre' chee xénele, san dxal-la' cueza lázrele ca da nnele ne quebe la' zrá'atele. ²⁰ Tu benne' xichaj zra'a quebe dxune' da dxezaca ba lazre' Dios. ²¹ Chee le'

na', le gusán xúgute da sban ne ca naca da calela da dxanle'e na, na' dute xel-la' dxexruij lazre' chee'le le si' ca naca dizra' chee' Dios da ba naxaza na lu xichaj lázrdaule, lawe' da wazeque' dizra' na' guselá na bénne'du xu'ule.

²² Le gun ca da dxulé'e dizra' na' le'e, ne quegá xénezele na. Benne' dxénzene' na dxezí xeze cuine'. ²³ Bénnea' dxénzene' dizra' na', ne quebe dxune' ca dxenná na, naque' ca tu benne' dxenné'e lawe' tu lu wana'. ²⁴ Dxenné'e ca naque', na' gate ze xeajze' na', na' dxal-la lazre' ca naque'. ²⁵ Benne' dxenná' xánnie' ca da bdxixruij be'e Dios da naca na li lazre', ne da dxuselá na dxi'u, ne dxusédie' ca naca na, ne quegá dxénzene' na, quebe dxal-la lazre' na. Che dxune' ca naca na, benne' nigá gaca tu da ba neza chee' lu xúgute da dxune'.

²⁶ Che nu benne' dxéquene' naque' benne' dxucá'ana szren Dios, ne quebe dxezéquene' nna be'ene' luzre', benne' nigá dxezí xeze cuine', na' ca naca xel-la' dxucá'ana szren Dios chee' dácheze naca na. ²⁷ Xel-la' dxucá'ana szren Dios da naca na du lazre', ne da naca na da dxezaca ba lazre' Xradxu Dios naca na cani: Gácale' dxu bidu ca' zaj naze'be, ne nu'ula ca' ba zaj nate benne' biu chee' gate zaj zue' lu da zi' da xa', ne quebe gundxu ca naca da sban chee' xezr la xu nigá.

2

Quebe guchale ca gunle chee' tu tu benne'

¹ Benne' bícha'dau', le'e dxéajlele chee' Xránadxu, Benne' xabáa Jesucristo, quebe dxal-la' guchale ca gunle chee' tu tu benne'. ² Che chu'u tu benne' naga nazrágale, ne nácu'e' zra lan'e' da zaca, ne xu'u da naca na oro lu xrube ne'e, na' cá'anqueze che chu'u tu benne' xache', ne nácu'e' zra lan'e' tuzruij, ³ na' che dxelé'ele cháweday' bénnea' nácu'e' zra lan'e' da zaca, ne dxele le': "Gudxe'e nigala naga nácadxa na chawe'", na' dxele benne' xache' na': "Xejájsé na'la, u gudxe'e lu xu ná'te'ze." ⁴ Che dxunle cani, dxuchale ca dxunle chee' tu tu benne', ne dxuchi'ale ca zaj naca bénneache, quebe naca xrlátaje xichaj lázrdaule.

⁵ Benne' bícha'dau' nazri'ite' lazra', le xen da nigá: Dios ba guqu'e' benne' ca' zaj naque' benne' xache' lu xezr la xu nigá chee' xelaque' benne' gunní'a lu xel-la' dxeajli lazre', ne chee' xelezi' lu ne'e da nucueza Dios naga dxenná bea Le', da na' guche'be lazre' Le' guné'zruje' chee' benne' ca' zaj nazri'ine' Le'. ⁶ Le'e dxuzúale chalá'ala benne' xache' ca'. ¿Quegá benne' gunní'a ca' benne' dxuluchínene' le'e, ne dxelech'e' le'e lau benne' xulawe' ca'? ⁷ ¿Quegá benne' gunní'a ca' benne' dxelenné' schanni' chee' da xrlátaje ca nazí' lale, dxennale nácale bi chee' Cristo?

⁸ Che da li dxunle ca dxenná da nadxixruij be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazri'i cuinu', xrlátaje dxunle. ⁹ Na'a che dxuchale ca dxunle chee' tu tu benne', dul-la dxunle, ne nabágale zria lawe' da quebe dxunle du ca bdxixruij be'e Dios. ¹⁰ Che tu benne' dxune' ca zaj naca da nadxixruij be'e Dios, san che dxené'guene' ca naca tuze da nadxixruij be'ene', naca na cáteze nabague' zria ca zaj naca xúgute da nadxixruij be'e Dios. ¹¹ Léqueze Dios gunné': "Quebe gunle dul-la da dxichaj na xrba chee' xel-la' wechaga na'", cá'anqueze gunné': "Quebe gútele benne'." Cani naca, che tu benne' quebe dxune' dul-la da dxichaj na xrba chee' xel-la' wechaga na', san che dxutie' benne', ba guné'guene' ca da nadxixruij be'e Dios. ¹² Le'e dxal-la' guchálajle, ne gunle ca

dxal-la' xelún benne' ca' guchi'a Dios ca da dxelung', benne' ca' zaj nalá lu na' da gunná bea Le'. ¹³ Benne' ca' quebe dxelexexache lazre' chee benne' xula, Dios guchi'e ca da dxelún benne' ca', ne quebe xexache lazre' chee benne' ca', san benne' ca' dxelexexache lazre' chee benne' xula quebe bi zria xelegu' gate Dios guchi'e ca da zaj nun benne' caní.

Ca naca chee xel-la' dxeajli lazre', ne chee zrin dxundxu

¹⁴ Le'e, benne' bícha'dau', ¿bizra culuén gapa na che tu benne' dxenné' dxeajli lazre' Cristo, na' quebe bi dxune' da dxácaleñ nu benne' dxexázejne'? ¿Wazeque' xel-la' dxeajli lazre' na' guselá na le'? ¹⁵ Che zra' benne' bíchedxu u nu'ula zandxu, benne' quebe bi zaj de zra lané' u da xelawe', ¹⁶ na' che núale le'e xeje benne' ca': "Bexiajze cháwedau'. Nazré'enu', ne gágugu' szri'", san che quebe bi gunézrujle ca da dxexázejne', ¿bizra culuén gapa da na' gunnále? ¹⁷ Caní naca na chee xel-la' dxeajli lazre'. Che quebe bi zaj de da chawe' da xululé'e na che dxeajli lazre' bènnea' Cristo, xel-la' dxeajli lazre' chee' naca na ca tu da gate.

¹⁸ Wannalja nu benne': Lue' dxennáu' dxéajle'u chee Cristo, na' neda' dxuna' da chawe' ca'. Ble'e neda' dxéajle'u chee Cristo ne quebe dxunu' da chawe' ca', na' neda' gulé'eda' lue' dxeajli lazra' Cristo ne chee da chawe' ca' da dxuna'. ¹⁹ Dxéajle'u lue' zua tuze Dios. Nácaqueze na ca'. Cá'anqueze da xriwe' ca' dxeléajle na, ne dxelezrize na lu xel-la' dxelezrebe. ²⁰ Lue', benne' xala, ¿dxaca lazru' gulé'eda' lue' naca xel-la' dxeajli lazre' ca tu da gate che nu benne' dxeajli lazre' Cristo na' quebe bi zaj de da chawe' da xelunna bea na? ²¹ ¿Ájazra guca chee xra xrtáudxu Abraham guque' benne' xrlátaje lau Dios? Guca na ne chee da beñe' gate guxúe' zri'ine' Isaac lu bdupa xiaj chee guzeze'-be'. ²² ¿Quebe dxele'enu'? Ca da beñ Abraham dxulé'e na guxeajli lazre' Dios, na' xel-la' dxeajli lazre' chee' guca na du lazre' ne chee da beñe'. ²³ Caní guca li ca da dxenná na lu xiche lá'azxa: Abraham guxéajle'e chee Dios, na' Dios blé'ene' le' benne' xrlátaje. Na' bchálaje' ca naca chee Abraham, gunné': "Bi zráaqueza', Abraham."

²⁴ Na'a dxelé'ele Dios dxezi' lu ne'e tu benne' ne chee da chawe' da dxune', ne quegá tuze lawe' da dxeajli lazre' Le'. ²⁵ Cá'anqueze guca chee Rahab, nu'ula wen da sban. Nu'ula nigá gulu'e lizre' benne' ca' gusel-la Josué, na' bsi'e benne' ca' neza xula chee belelé' lu na' benne' ca' dxjaque' wedil-la, na' ne chee da beñe', Dios guz' lu ne'e nu'ula na'. ²⁶ Ca naca chee belá' dxen cheedxu, che ba bedxúaj be' chee na, ba nate na, cá'anqueze naca chee xel-la' dxeajli lazre' cheedxu. Che quebe bi zaj de da chawe' da xululé'e na dxeajli lazrdxu Cristo, naca na ca tu da gate.

3

Ca naca chee lúzredxu

¹ Benne' bícha'dau', quebe dxal-la' gun cuínale benne' dxulusede dizra' chee Dios, lawe' da nézele ca gun Dios, guchi'a xáñnedxe' chee da dxundxu dxi'u, dxuchálajdxu xrtizre'. ² Xúgutedxu dxúnle'edxu da calëla. Che nu benne' quebe bi da calëla dxune' ca naca da dxuchálaje', naque' benne' li lazre', na' wazéqueñe' nna be'ene' ca nácaqueze belá' dxen chee'. ³ Gate dxugú'udxu xia dxu'a bzrina' chee gunba' da dxaca lazrdxu, wazéquedxu nna be'edxu duteba'. ⁴ Le na' xque ca naca chee da ca' dxeledán lawe' nísadau'. Lácala zaj naca na da zri'a, na' be' da dxuzriga na le na dxácale'e na, benne' dxusé'e na

dxuchínene' tu xágadauze, na' dxenná be'ene' na chee cheaj na naga dxaca lazre' le'. ⁵ Cá'anqueze naca chee lúzredxu. Naca na tu da dauze da naca chee bela' dxen cheedxu, na' da zrente da dxenná na. Tu xi'dauze waca guzezze na tu xi'a zren. ⁶ Lúzredxu naca na ca tu xi'. Lúzredxu naca na ca tu xezr la xu sban da zua lu bela' dxen cheedxu, ne dxuxrinnaj na du ca nácdxu. Zúale ca tu xi' lúzredxu da za' lataj ba xa', ne naca na ca tu da dxegú'u na xi' ca naca xúgute da dxundxu. ⁷ Wazeque' nu benne' nna bé'ene' xúgute be xixre' ca', ne be zaj zua xrila, ne be snia ca', ne be zaj zra' lu nísadau', ne ba gunná bé'ene'-ba'. ⁸ Quebe nu benne' dxezéquene' nna bé'ene' dute da dxenná luzre'. Naca na tu da calela da quebe dxue na lataj nu nna be'e le na, ne naca na ca tu be snia, be dxúteba' bèneache ca'. ⁹ Nen lúzredxu níqueze dxue lá'anadxu Xradxu Dios, ne nen le na dxennéquezdxu da calela chee bèneache, benne' ca' nun Dios na' lu'a le saca Léqueze'. ¹⁰ Lu dxú'adxu ná'queze dxeledxúaj da xrlátaje ne da calela. Benne' bícha'dau', da nigá quebe dxal-la' gaca na ca'. ¹¹ ¿Waca galaj nisa chawe' ne nisa sla' lu tuze beaj? ¹² Benne' bícha'dau', ¿waca tu xaga higo cuía na da zixre chee xaga olivo? ¿Waca tu lba uva cuía na da zixre chee xaga higo? Cá'anqueze, tu beaj quebe gaca gunna na nisa xene', ne nisa zri lazre'.

Xel-la' sina da naca li lazre'

¹³ Che zua tu benne' ládujla le'e naque' benne' sina, ne dxéajni'ine', dxal-la' gulé'ene' na ne chee da chawe' da dxune' dute xel-la' dxexruj lazre' chee' da dxunexruj xel-la' sina le'. ¹⁴ Che zua lu lázrdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina chee le lawe' da caní nnele da wen lazre' chee da naca da li. ¹⁵ Xel-la' sina caní quebe naca na chee Dios. Naca na chee xezr la xu nigá, ne chee bèneache, ne za na lu na' da xriwe'. ¹⁶ Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxelune' xúgute da calela. ¹⁷ Benne' zaj nape' xel-la' sina da dxunna Dios zaj naque' du lazre', ne zren lazre', ne dxe'ene lazre', ne dxexruj lazre'. Dxelexache lazre' ljwezre', ne dxelune' da chawe'. Zaj naque' li lazre' ne quebe dxelune' cúzreze da chawe'. ¹⁸ Benne' dxelebeche zrie' da ba xa' dxelune' tu zrin da naca ca tu binne da dxunna na da chawe'.

4

Ca naca chee benne' zaj nazri'ine' da zaj naca chee xezr la xu nigá

¹ ¿Bizr chee na' dxedíl-lale ne dxe' da ba xa' ládujla le'e? Dxaca caní lawe' da dxezá lázrele da zaj naca chee da calela, da dxuluzúa na le'e lu da ba xa'. ² Le'e dxaca lázrele bi gápale, na' lawe' da quebe dxezru'éle na, na' dxútele benne'. Dxezá lázrele tu da sile, na' lawe' da quebe dxezéquele sile na, na' dxedíl-lale ljwézrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios. ³ Che dxenábale na, quebe dxezile na lawe' da dxenábale na calela, lawe' da dxedánele na chee guchínele na ca da dxaca lázrele. ⁴ Le'e, benne' quebe nácale li lazre', ¿quebe nézele che nu benne' dxedánnene' da calela da de lu xezr la xu nigá, benne' nigá dxecuídene' Dios? Núteteze benne' dxaca lazre' si'e' ba neza ca da dxaca lu xezr la xu nigá naque' benne' dxecuídene' Dios. ⁵ Chee le' na' dxenná xiche lá'azxa: Be' da nuzúa Dios lázrdaudxu cadite dxe'e gunne xue cheedxu. ⁶ Dios dxácaleđxene' dxi'u lu xel-la' xrlátaje chee', ca dxenná xiche lá'azxa: Dios dxezré'e benne' ca' dxulucá'ana szren cuína, na' dute xel-la' xrlátaje chee' dxácale' benne' dxexruj lazre' ca'. ⁷ Le guzúa dizra' chee Dios.

Le til-la da xriwe', na' le' na xuzrunnuj na naga zrale.

⁸ Le biga lau Dios, na' Le' bigue' naga zúale le'e.

Le'e, benne' dul-la, le gupá'a cuínale chee' dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

⁹ Le guzua ba xa' lázre'le.

Le cuezre, ne le gaca xache' lazre'.

Québedxa guzrízrele, na' le cuezre.

Québedxa bele, ne le xewine lazre'.

¹⁰ Le gaca dxexruj lazre' lau Xránadxu, na' Le' gucá'ana szrene' le'e.

Quebe dxal-la' guchí'adxu ca da dxun tu benne' bíchedxu

¹¹ Le'e, benne' bícha'dau', quebe nnele chee' ljwézrele tule xetule. Benne' dxenné' chee' tu benne' bíchedxu, u dxuchi'ë ca da dxun bénnea', naque' benne' dxenné' calela chee' da bdxixruj be'e Dios, ne dxebé' ca zaj naca da bdxixruj be'e Dios. Che dxebéu' ca zaj naca da bdxixruj be'e Dios, dxun cuinu' ca benne' dxuchi'ë da dxaca, ne quebe dxuzú' dizra' da bdxixruj be'e. ¹² Zua tuze Dios, Bénnea' bdxixruj be'e da ca', ne dxuchi'ë da dxaca, na' Léqueze' wazéqueñe' guselé' dxi'u, ne guzrí'a xi'ë dxi'u. Lue', ¿núzraqueze nacu', dxuchi'u da dxun benne' xula?

Quebe nezdxu bi gaca wxre

¹³ Na'a, le xene da nigá, le'e dxennale: Na'a u wxre chéajdxu tu xezre ne cheajsúadxu na' tu iza. Gá'udxu, ne gútedxu chee' gucúdedxu dumí. ¹⁴ Quebe nézele ca da gaca wxre. ¿Ájazra naca chee' xel-la' nabán cheedxu? Naca na ca tu beuj da dxebé' tu chí'i, na' chadí dxenite na. ¹⁵ Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da na'. ¹⁶ Le'e dxucá'ana szren cuínale ca da dxuchálajle. Xel-la' dxucá'ana szren cuina caní naca na da calela. ¹⁷ Che nu benne' ba nézene' ca da chawe' da dxal-la' guné', na' quebe dxuné' na, na' bágale'ë dul-la.

5

Santiago dxusízrene' benne' gunní'a ca'

¹ Le xene da nigá, le'e, benne' gunní'a. Le cuezre ne le xewine lazre' ca naca da zi' da xa' da lé'ele. ² Ca naca xel-la' gunní'a chee'le ba zaj nuzru na, na' zra lánale zaca ba zaj nagu béadu ca' le' na. ³ Ca naca oro chee'le ne plata chee'le, ba gulezén xrche'ë na, na' lawe' da quebe bchínele da gunní'a chee'le lu da xrlátaje, da caní dxululé'e na nabágale zria lau Dios, na' Le' gudé' le'e lu da ba xa'. Caní gaca chee'le lawe' da btúbele xel-la' gunní'a chee' gápale na gate ba dxéxrule. ⁴ Quebe gudízrujle ca naca chee' na benne' ca' belexelape' lina chee'le, na' dxelawe' zria chee' da quebe gudízrujle, na' Xránadxu, Bénnea' nape' duté xel-la' dxenná bea, ba benne' ca naca zria da dxelagu benne' ca' chee'le le'e. ⁵ Lu xezr la xu nigá ba guzile ba neza xel-la' gunní'a chee'le ne xúgute da zaca ca', ne guzrenle ca tu bezre dxánnele'ë, na' ba dxezrín zra xelútie'-ba'. ⁶ Le'e ba bzria xile, ne ba bétele benne' quebe bi da calela zaj nuné', na' benne' ca' quebe guledábage' le'e.

Dxal-la' gácadxu benne' zren lazre' ne guchálajledxu Dios

⁷ Chee' le' na', benne' bícha'dau', le gaca zren lazre' ca zrindxa zra xelá' Xránadxu. Benne' dxaza dxa'ana dxal-la' cueze' duté xel-la' zren lazre' chee' ca zrindxa zra xelá' xiuj ba ne xiuj lina, chee' xezí' lu ne'ë lina chawe' chee'.

⁸ Cá'anqueze le gaca zren lazre', ne quebe gute lázrele, lawe' da ba zua gagu

zra xelá' Xránadxu. ⁹ Le'e, benne' bícha'dau', quebe gágule zria chee ljawézrele, chee quebe guchi'a Dios chee da dxunle, lawe' da zua gágute zra xelá' Dios, Bénnea' dxuchi'e da dxaca. ¹⁰ Le'e, benne' bícha'dau', le gusá lázrele ca guca chee benne' ca' gulenné' waláz chee Dios, gulaque' zren lazre' lácala guledé' xel-la' zi'. ¹¹ Dxennadxu guca da ba neza zren chee benne' ca' buluchaga lawé' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios chee' ca gudé na'. Xránadxu naque' zri'i lazre', ne dxexache lazre' dxi'u.

¹² Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xezr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, chee quebe guzríá xi' Dios le'e.

¹³ Che núlale dxedele lu da zi' da xa', dxal-la' guchálajle Dios. Che nu benne' zue' xel-la' dxebe, dxal-la' gul-le' da güe lá'ane' Dios. ¹⁴ Che nu benne' quebe chawe' zue', dxal-la' nne' benne' gula ca' dxuluxúe' bi chee Cristo, chee xelenabe' lau Dios xexune' benne' we' na', ne xelegú'e le' da za lu La Xránadxu. ¹⁵ Gate dxuluchálajle Dios duté xel-la' dxeajlí lazre' chee', na' xexaca benne' we' na', na' Xránadxu xechise' le', ne che bi dul-la nune', na' gunite lau Dios chee bénnea'. ¹⁶ Chee le na', le xrúalepe lau ljawézrele tule xetule dul-la da nunle, ne le guchálajle Dios chee tule xetule, chee xexune' le'e. Da dxenaba benne' xrlátaje du lazre' lau Dios wazrué'ene' na'. ¹⁷ Elías, bénnea' gunné' waláz chee Dios, guque' tu bènneache ca dxi'u, na' gate gunabe' lau Dios chee quebe gaca xiuj, na' quebe guca xiuj lu xezr la xu duté chun iza xugachaj. ¹⁸ Gudé na', gate gunabe' lau Dios da xula, na' belá' xiuj, na' xezr la xu na' benna na lina.

¹⁹ Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule le' lu xel-la' li, ²⁰ dxal-la' nézele, núteteze benne' xucuase' tu benne' dul-la lu neza calela da zeajlene', guselé' bènne'du xu'u benne' dul-la na' lu xel-la' gute, na' xunite lau Dios dul-la zan da nabaga bénnea'.

DÍZRA'DAU' NEDXU DA BZUAJ SAN PEDRO

Dizra' gusel-la Pedro cheę benne' ca' gucá'a Jesús, ne zaj nase dímajé'

¹ Neda', Pedro, naca' benne' gubáz cheę Jesucristo. Dxuzúajja' da nigá cheęle le'e nadxúajle lázrele, ne zrale xęzre ca' zaj nababa Ponto, ne xęzre ca' zaj nababa Galacia, ne xęzre ca' zaj nababa Capadocia, ne xęzre ca' zaj nababa Asia, ne xęzre ca' zaj nababa Bitinia. ² Xradxu Dios ba guquęę le'e ca da gunné' gate nate. Ne cheę Be' Lá'azxa ba gucá'a Dios le'e cheę guzúale dizra' cheę', ne cheę chádxele lu dxen cheę Jesucristo. Dxenaba' lau Dios gúnnale'e le'e da chawe', ne xel-la' dxebeza zri lazre'.

Ca da dxebeza lázredxu

³ Dxue lá'anadxu Dios, Xra Xránadxu Jesucristo. Lawe' da dxexache lázrele'e dxi'u ba bene' cheędxu bexálajdxu lawe' da bebán Jesucristo ládujla benne' gate. Da nigá nuzaga na dxi'u cheę cueza lázredxu, ⁴ ne gun na sile ca da nucueza Dios cheęle xabáa, da na' quebe cuia xi na, ne quebe xexúe na, ne quebe te cheę na. ⁵ Lawe' da dxéajlele cheę Dios, Le' guxre' le'e nen xel-la' waca cheę' ca zrindxa zra na' sile du ca naca xel-la' weselá da nucueze' cheędxu, na' gulé'ene' na lu zra bžebe ní'.

⁶ Cheę le' na' dxebéle'ele lácala dxun na ba xen tele xel-la' zi' tu chí'idau'. ⁷ Xel-la' dxeajlí lazre' cheęle gaca cheę na ca dxaca cheę oro da dxedé na lu xi' cheę xegá'ana chawe' na. Caní naca cheę xel-la' dxeajlí lazre' cheęle, gate ba gudé na lu xel-la' zi', na' xegá'ana na da zácadxu cheę sile xel-la' szren, ne xel-la' ba lá'ana lu zra na' gate xelá' Jesucristo.

⁸ Le'e nazri'ile Jesucristo lácala quebe ne le'ele Le', na' lawe' da nuxrén lázrele Le' lácala quebe ne xelé'ele Le', dxebéle'ele. Ca naca xel-la' dxebe' cheęle naca na da zrentę da quebe séquentu' xuzájla'antu' ⁹ lawe' da nalá bénne'du xu'ule lawe' da dxéajlele cheę Dios. ¹⁰ Lu iza da ba guledé gate nate, benne' ca' gulenné' waláz cheę Dios buluxúe xánnie', ne belexebéajni'e ca naca cheę xel-la' weselá nigá, na' buluchálaję' ca naca xel-la' chawe' cheę Dios da gunné' le'e. ¹¹ Be' Lá'azxa, Bénnea' gusel-la Cristo, bzéajni'ing' benne' ca' buluchálaję' waláz cheę Dios gate nate ca da saca Cristo, ne ca naca xel-la' szren da si'e te na', na' benne' ca' belexexílaję' nuzra benne' nigá, ne bátala gaca da dxenná Be' Lá'azxa, Bénnea' zúale le'. ¹² Dios bzéajni'ing' benne' ca' ca naca cheę da na' dxuluchálaję', gunné' quebe naca na cheę léęqueze', san naca na cheędxu dxi'u. Na'a, da nigá naca dizra' chawe' da ba bénquezle, da buluchalaj benne' ca' ne cheę Be' Lá'azxa, Bénnea' ze'e xabáa. Da caní gulaca lazre' gubáz cheę xabáa xeléajni'ing'.

Dios dxenné' dxi'u cheę gácadxu bi lá'azxa cheę'

¹³ Cheę le' na', le guxúe xanne' ca da gunle. Tu dxál-lazqueze gunle da xrlátaje. Dutę lázrdaule le guxrén lazre' xel-la' chawe' cheę Dios, ne le cueza da gunné' le'e lu zra na' gate xelá' Jesucristo. ¹⁴ Lawe' da nácale bi cheę Dios, le guzúa dizra' cheę', ne québedxa gunle ca da guzá lázrele gate quebe ne gúnbeale Dios. ¹⁵ Na'a, le ta lu xel-la' lá'azxa cheę' lawe' da naca Dios lá'azxa, Bénnea' gunné' le'e. ¹⁶ Cá'anqueze naxúajqueze na lu xiche lá'azxa cheę', dxenné': "Le gaca lá'azxa, lawe' da naca' neda' lá'azxa."

17 Che dxennale le'e naca Dios Xrale, na' Le' dxuchi'e ca da dxelún bënneache, dxal-la' zrébele Le' dxácatę ne zúale lu xęzr la xu nigá. 18 Dios ba bselé' le'e lu da benle gate na' guxíajlele ca da belún xra xrtaule, da calęla, na' ba nézquezle quebe guca na ne cheę tu da dxuzru na ca oro, ne plata. 19 Bselé' le'e ne cheę dxen zácale'e cheę Cristo, Bënnea' bzua cuine' lau Dios ca tu zrila'dau' du lazre', ne quebe nadxenba', be dxelutie' cheę xunite lau Dios dul-la zaj nabague'. 20 Cristo ba nácaqueze cheę' gate nate saque' da nigá, na' ble'e lu zra caní cheę gaca chawe' cheęle. 21 Ne cheę Cristo dxéajlele cheę Dios, Bënnea' bsebanę' Le' ládujla benne' gate, ne bca'ane' Le' szren. Cheę le na' dxéajlele cheę Dios, ne dxuxrén lázrele Le'.

22 Na'a, ba bzúale dizra' cheę xel-la' li ne cheę Be' Lá'azxa, cheę zri'ile dute lázrdaule benne' zaj nababę' dxi'u. Cheę le na' dxal-la' zri'ile ljwézrele tule xetule dute lázrdaule, ne dute xel-la' wala cheęle. 23 Caní naca na lawe' da ba bexálajle, quegá cheę bënneache, benne' dxeláte. Nálajle ne cheę dizra' cheę Dios, da naca ban na, ne da zua na chadía chacanna. 24 Caní naca na lawe' da naxúaj na lu xiche lá'azxa, da dxenná na:

Xúgute bënneache zaj naque' ca xixre',
na' xel-la' szren cheę' naca na ca xiaj cheę xixre'du ca'.
Xixre' na' dxebizre na, na' xiaj cheę na dxexruj na.

25 Dizra' cheę Xránadxu zúatequeze na chadía chacanna.
Dizra' nigá ba benle le'e ne cheę dizra' chawe' da dxuchálajntu'.

2

1 Cheę le na', québedxa gunle da calęla. Québedxa nu si xele, ne quebe gunle láweze da xrlátaje. Québedxa gácale xa lazre', ne quebe bi nnele cheę ljwézrele. 2 Cáteze dxeledane bidu dx'e'ene ca' nizre', ca' le gane xrtizra Dios, da naca na du lazre', cheę gun na se cháchale, ne lale lu na' dul-la. 3 Che da li ba guzú laule nézele naca Xránadxu chawe', na' gaca lázrele sídxale xrtizre'.

Cristo naque' ca xiaj xre ban

4 Le biga lau Xránadxu, Bënnea' naque' ca xiaj xre ban. Bënneache buluzúe' Le' chalá'ala, san lau Dios naque' tu xiaj chawe' da zácale'e na. 5 Cá'anqueze le'e nácale ca xiaj ban ca'. Le güe Dios lataj guchínene' le'e cheę gunę' tu xudau' cheę Be' Lá'azxa cheę', gácale bxruze cheę Dios cheę guzúale lau Dios ca da dxunna Be' Lá'azxa le'e. Da nigá waca gunle ne cheę Jesucristo, da xezaca ba lazre' Dios. 6 Cheę le na' lu xiche lá'azxa dxenná Dios:

Neda' núzúa' lu xęzre lá'azxa tu benne'
naque' ca tu xiaj blau cheę xu'u,
da naca na tu xiaj du lazre',

ne da zácale'e na,
na' nu benne' chéajle'e cheę Le'
quebe gaca xel-la' stu cheę'.

7 Cheęle le'e dxéajlele cheę', xiaj nigá zácale'e na, san cheę benne' ca' quebe dxéajle'e naca na ca da dxenná xiche lá'azxa:
Xiaj na' buluzúa benne' wen xu'u ca' chalá'ala,
le na' naca na xiaj blau.

8 Cá'anqueze naca na ca dxenná xiche lá'azxa:
Naque' tu xiaj da dxechegu bënneache,
na' lawe' le na' dxeajlecházie'.

Caní naca na, dxeajlecházie' lawe' da quebe dxelezi'e dizra' cheę Dios. Dios ba núnqueze' gaca caní cheę benne' ca'.

Benne' zaj naque' bi chee Dios

⁹ Le'e nácale benne' ba gucá'a Dios. Nácale bxuze lu zrin chee Benne' Wenná Bea, Jesús. Nácale tu xezre lá'azxa chee Dios, na' Le' naxá'awene' le'e chee guzenle bénneache ca naca xel-la' szren chee Dios. Le' gunné' le'e chee xedxúajle lu da chul-la, na' súale lu xel-la' naxani' li lazre' chee'. ¹⁰ Gate nate quebe nu bexache lazre' le'e, san na'a Diósqueze' dhexache lazre' le'e.

Zúale chee gunle zrin chee Dios

¹¹ Bi bicha' nazri'ite lazra', dxata' xueda' le'e, nácale ca benne' zaj zre'e zitu' naga zua lazre', chee quebe gunle ca da dxenná be'la' dxen chee, da dxedíl-lale na bénne'du xu'ule. ¹² Ca da dxunle, dxal-la' gaca na xrlátaje lau bénneache quebe zaj núnbe'e Dios. Caní gaca na, lácala na'a dxelenné' chee, dxelenné' nácale benne' ca' dxelune' da zrinnaj, na' welelé'eqezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bénneache.

¹³ Lawe' da nácale bi chee Xránadxu, le guzúa dizra' ca da dxenná benne' xu'u lawe', bénnea' buluzúa benne' xezre ca'. Le guzúa dizra' chee benne' nape' xel-la' dxenná bea zren, ¹⁴ ne chee benne' dxelenná bea, benne' ca' nasel-la' le' chee xuludé'e xel-la' zi' benne' ca' dxelune' da zrinnaj, ne xelu'e ba lá'ana benne' ca' dxelune' da xrlátaje. ¹⁵ Dios dxaca lazre' gunle le'e da xrlátaje chee guzúa zrile benne' ca' quebe zaj naxéajni'ine', gate dxelenné' cale'la chee dizra' chawe' da nazile.

¹⁶ Le gaca ca benne' quebe zaj nada'u, san quebe guchínele da na' nazile, quebe gunle da cale'la. Le gaca ca benne' ca' dxenná be'e Dios. ¹⁷ Le gapa ba lá'ana xúgute' bénneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

Ca da guzaca zi' Cristo dxuzéajni'i na dxi'u

¹⁸ Le'e, bi wen zrin, le guzúa dizra' chee xránale duté xel-la' ba lá'ana, quegaze chee benne' zaj naque' zri'i lazre', ne dxelebé'e gunne xue chee, san cá'aqueze gunle chee benne' snia ca' zaj naque' xránale. ¹⁹ Naca na tu da xrlátaje che guchaga laudxu xel-la' zi' da dxulusaca bénneache dxi'u gate dxundxu da nezdxu naca na da dzezaca ba lazre' Dios. ²⁰ Che dxunle tu da cale'la, na' dxulusaca zi'e le'e, ¿bizra da ba neza gaca na chee? Na'a, che dxedele xel-la' zi' lawe' da dxunle da xrlátaje, ne dxuchaga laule na duté xel-la' zren lazre' chee, da nigá naca na xrlátaje lau Dios. ²¹ Dios gunné' le'e chee tele xel-la' zi' caní, lawe' da gudé Cristo xel-la' zi' waláz chee le'e, da dxuzéajni'i na le'e gunle ca da ben Le'.

²² Le' quebe bene' dul-la, ne quebe nu guzi xe'e.

²³ Gate bulucháchalene' Le', quebe bi dizra' schanni' bechebe'.

Gate buludé'e Le' xel-la' zi', Le' quebe bexéchaje'.

Bzua cuine' lu na' Dios, Bénnea' dxuchi'e ca da naca na. ²⁴ Biá'queze Cristo na' lu be'la' dxen chee' ca naca dul-la cheedxu gate gudé'e le'e xaga begúaj, chee gácadxu ca benne' gate, québedxa gundxu dul-la, na' gaca bandxu chee gundxu da xrlátaje.

Le' guzri'e we' chee xexácale le'e chawe'.

²⁵ Le'e gudale gate nate ca zri'la' zaj naníteba'.

Na'a ba bela'le lau Cristo, Bénnea' dxuxúe' le'e ca dxun tu benne' dxuxúe' zri'la'du ca', ne dxe'e gunne xue chee bénne'du xú'ule.

3

Ca dxal-la' xelún benne' zaj nuchaga na'

¹ Cá'anqueze le'e, nu'ula nuchaga na'le, le guzúa dizra' chee benne' chee, na' che núlale zua benne' biu chee quebe dxéajle'e xrtizra Dios, xexúnbe'e naca na da li gate lé'ene' da xrlátaje da dxun zru'ule', ne quebe gun na ba xen bi guchalaj zru'ule', ² lawe' da lé'ezene' da xrlátaje dxune' lawe' da naque' xrlátaje, ne dxape' le' ba lá'ana. ³ Ca lechítaje chee tu nu'ula quebe dxal-la' gaca na cúzreze ca xel-la' dxupá'a xicha xíchaje', ne lechítaje da naca na oro, ne zra lane' da zácále'e. ⁴ Lechítaje chee' dxal-la' gaca na lu xichaj lázrdawe', da naca na tu da xrtan da quebe te chee na. Da xrtan nigá naca na tu be' dxexrui lazre', ne zren lazre', da na' zácále'e na lau Dios. ⁵ Cá'anqueze guca lechítaje chee nu'ula ca' gulaque' bi chee Dios gate nate. Nu'ula ca' buluxrén lazre' Dios, ne buluzúe' dizra' chee benne' chee'. ⁶ Cá'anqueze guca Sara, bzué' dizra' chee Abraham, na' guzre' le': "Xran." Le'e wácaqueze ca guca Sara na' chee gunle da xrlátaje, ne quebe bi guchebe lázrele.

⁷ Cá'anqueze le'e, benne' biu, zúalele nu'ula, le gaca dxexrui lazre' nen zrú'ulale. Le gapa ba lá'ana zrú'ulale lawe' da quebe zaj naque' benne' wala ca le'e, ne cá'anqueze zaj nape' xel-la' nabán ca da nunna Dios le'e dute xel-la' chawe' chee'. Dخال-la' gunle caní chee quebe bi guzaga na le'e gate guchálajlele Dios.

Benne' dxeledé'e' xel-la' zi' lawe' da dxelune' da chawe'

⁸ Na'a:

Le gaca tuze

Le xexache lazre' ljwézrele, ne le zri'i ljwézrele.

Le gaca benne' zri'i lazre', ne zren lazre'.

⁹ Quebe gunle da calela chee benne' dxune' chee da calela, ne quebe gucháchalele benne' dxuluchácalene' le'e. Le gun da chawe' chee benne' ca' lawe' da gunné' Dios le'e chee sile da chawe'. ¹⁰ Caní naca na lawe' da dxenná xiche lá'azxa:

Benne' dxaca lazre' gaca tu da ba neza chee',

ne sue' xel-la' dxebe'

dxal-la' guxúe' luzre' chee quebe nne' dizra' schanni',

ne guxúe' dxu'e chee quebe nne' na da wen lazre'.

¹¹ Dخال-la' gusané' ca da calela bene',

ne québedxa guné' na, chee guné' da chawe'.

Dخال-la' cueche zri'e' da ba xa',

ne gaque' benne' zren lazre'.

¹² Xránadxu dxuxúe' benne' chawe' ca',

ne dxenne' ca da dxelenaba benne' ca'.

Dxuzúe' chalá'ala benne' wen da zrinnaj ca'.

¹³ ¿Núzraqueze benne' guné' chee da zrinnaj che le'e cuele gunne xue gunle da chawe'? ¹⁴ Lácala tele xel-la' zi' lawe' da dxunle da chawe', gaca na da ba neza chee. Quebe nu zrébele, ne quebe xrúsale. ¹⁵ Le gapa ba lá'ana Cristo ca Xránale lu xichaj lázrdaule. Le súateze ban lazre' xechébele lau benne' ca' dxelenabe' le'e bizr chee na' dxuxrén lázrele Le'. Le gun na lu xel-la' dxexrui lazre', ne le gapa ba lá'ana benne' ca'. ¹⁶ Le gun da chawe' chee quebe bi sua da gagu na zria lu xichaj lázrdaule, na' benne' ca' dxelenné' schanni' chee da chawe' da dxunle lawe' da dxéajlele chee Cristo, xelapa stu'e ca dizra' da

dxelenné'. ¹⁷ Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da calëla.

¹⁸ Caní naca na lawe' da gudé Cristo tu lásaze lu xel-la' gute zi' xa' ne chee dul-la da nabágadxu. Le' guque' benne' xrlátaje, na' gudé' xel-la' zi' waláz cheedxu dxi'u, benne' wen da zrinnaj, chee gaca xeché'e dxi'u lau Dios. Gute Cristo lu bel-la' dxen chee', san bebánqueze' lu be' nácaqueze'. ¹⁹ Cá'anqueze lu be' nácaqueze' guxiájé' lataj chul-la naga xeajchálajlene' be' zaj nácaqueze benne' ca' nuzaga xel-la' gute lu lataj na'. ²⁰ Benne' caní quebe buluzúe' dizra' ca da bchalaj Noé gate nate, gate na' guleza Dios duté xel-la' zren lazre' chee' dxácaté na' ben Noé da zren na' da dxedá lawe' nísadau'. Lu da dxedá lawe' nísadau' gulelá xrúnuze benne' ne chee nisa xiuj da na' bzria xi na ca naca bënneache. ²¹ Nisa xiuj na' dxulé'e na ca naca nisa naga dxelexedxúa benne' nisa, na' lu le na' naladxu na'a. Nisa nigá quegá le na' quibe na dxi'u, san dxulé'e na dxaca lázredxu chádxedxu lau Dios, na' ladxu lawe' da bebán Jesucristo ládujla benne' gate, ²² ne begüene' xabáa, ne zué' chalá'a xabëla chee Dios, na' dizra' chee Le' dxuluzúa gubáz chee xabáa, gubáz ca' zaj nape' xel-la' dxenná bea, ne gubáz blau ca'.

4

Dxal-la' gundxu zrin chee Dios guchínedxu ca da ba nunna Dios dxi'u

¹ Chee le na', ca ben Cristo, gudé' xel-la' zi' lu bel-la' dxen chee', cá'anqueze le'e dxal-la' si lu nale tele xel-la' zi' lawe' da che tu benne' ba gudé' xel-la' zi' lu bel-la' dxen chee', ba bzua bënnea' chalá'ala da naca dul-la, ² chee guné' ca da dxaca lazre' Dios dxácaté naca bané', ne quebe guné' ca da dxenná bel-la' dxen chee'. ³ Naze cáтите da ba bënle gate nate da dxeledanne benne' quebe zaj núnbe'e Dios. Ca lu iza da ba guledé bënle da sban ca', ne da zrinnaj ca' da guzá lázrele, ne guzúzrele, ne bënle laní sban ca'. Güé'elë'ele, ne bca'ana szrenle bedau' xiaj xaga ca' da na' dxecuide Dios. ⁴ Benne' ca' quebe zaj núnbe'e Dios dxelexebánene' lawe' da québedxa dxunle le' tuze ca naca da sban da dxeluné', na' chee le na' dxelenné' schanni' cheële. ⁵ Benne' ca', dxun na ba xen xululé'eng' ca da zaj nuné' lau Bënnea' naca chee' guchi'e chee benne' ban ca', ne chee benne' gate ca'. ⁶ Benne' ca' zaj nate belenne' ca naca dizra' chee Dios chee xelexaca bané' lu be' zaj nácaqueze' ca naca ban Dios, lácala lu xezr la xu nigá Dios bchi'e ca da beluné' ca guchi'e chee xúgute bënneache.

⁷ Ba za cheajsé chee xúgute da dxelé'edxu. Chee le na', le sua ban lazre', ne le guchálajlequeze Dios. ⁸ Da nácadxa blau, le zrí'ilé'e ljwézrele. Che nazrí'idxu benne' bíchedxu ca', na' gunite laudxu da calela da beluné' cheedxu. ⁹ Le guzúa lízrele ljwézrele tule xetule, ne quebe nnele chee ljwézrele. ¹⁰ Tu tule le'e dxal-la' gunle zrin chee ljwézrele ca da nunna Dios cheële, ca benne' dxuluchínene' chawe' ca da chawe' da dxunezruj Dios chee'. ¹¹ Che nu benne' dxuchálajé', dxal-la' guchálajé' da gunezruj Dios le'. Che nu benne' guné' zrin cheële, dxal-la' guné' na guchínene' xel-la' waca chee' da nunezruj Dios le'. Ca naca xúgute da dxunle, dxal-la' gaca ba Dios lawe' da nácale bi chee Jesucristo, na' chee Le' gaca xel-la' szren, ne xel-la' dxenná bea chadía chacanna. ¡Ca'an gaca na!

Wadedxu xel-la' zi' lawe' da nácadxu bi chee Cristo

¹² Benne' bícha'dau' nazri'ite lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca. ¹³ Le be lawe' da

tele xel-la' zi' ca xel-la' zi' da gudé Cristo chee cá'anqueze béle'ele gate lé'ele xel-la' szren chee Cristo gate zezé'e. ¹⁴ Che dxulugazja' benne' le'e dizra' lawe' da nácale bi chee Cristo, ba neza zren naca na chee, lawe' da zúale Be' Lá'azxa chee Dios le'e, Bénnea' ze'e xabáa. Dxelenné bénneache schanni' chee Le', san le'e dxápale Le' ba lá'ana. ¹⁵ Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle chee benne', u bi da zrinnaj benle, u lawe' da guchixre chee da naca chee benne' xula. ¹⁶ Che nu benne' dxedé' xel-la' zi' lawe' da naque' bi chee Cristo, quebe dxal-la' xedu'é'eng', san dxal-la' güe lá'ané' Dios lawe' da nazi le' bi chee Cristo. ¹⁷ Ba bzrin zra su lau Dios guchi'e ca da zaj nun tu tu bi nácabe' chee Le'. Che Dios su lawe' guchi'e ca da nundxu dxi'u, ¿ájala gaca chee benne' ca' quebe dxeluné' ca dxenná dizra' wexw' chee Dios? ¹⁸ Che benne' xrlátaje ca' cánnaze xeledé' ¿ájazraqueze gaca chee benne' wén da zrinnaj ca', ne chee benne' wén dul-la ca'? ¹⁹ Caní naca, benne' dxeledé' xel-la' zi' lawe' da dxeluné' da xrlátaje da dxaca lazre' Dios, dxal-la' xelúnqueze' da xrlátaje, ne xuluzú' benne'du zaj xu'e lu na' Dios, Bénnea' bene' le', lawe' da naca Le' li lazre'.

5

Pedro dxuzéajni'ing' bi ca' chee Cristo

¹ Dxuzéajni'ida' le'e, benne' gula dxuxúele tu tu cue' bi ca' chee Cristo lawe' da naca' neda' benne' gula ca le'e, ne dxexechéba' ca xel-la' zi' da gudé Cristo, ne cá'anqueze lawe' da gúnnaqueze' neda', ne le'e, chee sidxu da xabáa chee' da gulé'eng' te chee zra caní. ² Ca dxelún benne' dxuluxúe' zrila' ca', le guxúe bidu ca' chee Dios, benne'du ca' nabágale. Le gun na duté lázrdaule ca dxaca lazre' Dios, quebe gun na ba xen nu benne' nna bé'eng' le'e, ne quebe gunle ba chee dumí. Le gun zrin du lázrele, ³ ne quebe gun cuínale ca xrane benne'du ca' nabágale. Le gun ba xuzre gácale tu da gulé'e na ca dxal-la' xelún benne'du ca'. ⁴ Caní gaca, gate xelá' Xránadxu, Benne' Blau dxuxúe' zrila' ca', sile tu lazruj da naca na chee xabáa, da quebe te chee na. ⁵ Cá'anqueze le'e, benne' cuide', le gun ca da dxeleenná benne' gula ca'. Xúgutéle dxal-la' guzúale dizra' chee ljwézrele tule xetule lu xel-la' dxexruj lazre' chee lawe' da dxenná xiche lá'azxa:

Dios dxezré'e benne' ca' dxulucá'ana szren cuine'.

Duté xel-la' chawe' chee' dxácalené' benne' dxexruj lazre' ca'.

⁶ Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na. ⁷ Le guzúa lu na' Dios xúguté da dxele gunne xue, lawe' da dxe' Le' gunne xue da naca chee.

⁸ Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu bezre xixre', dxebezre xa'aba', dxíljaba' nu guébeba'. ⁹ Le tíl-lalé da xriwe', ne le se chacha lu xel-la' dxeajlí lazre' chee, lawe' da nézqueze dxeledé'queze xúguté bíchele zaj zré'e lu xezr la xu nigá xel-la' zi' ca da dxedele le'e. ¹⁰ Gate bache gudele xel-la' zi' tu chí'i, Dios guné' le'e li lazre', ne guzúa chawe'e le'e. Dios ná'queze dxunne' dxi'u xúguté da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo. ¹¹ Gaca ba Le', ne chee' Le' gaca xel-la' dxenná bea chadia chacanna. ¡Ca'an gaca na!

Pedro dxugaqe' diuzre bi bíchedxu ca'

¹² Silvano, benne' nigá dxéqueda' naque' tu bi bíchedxu li lazre', ba bzuaje' dizra' caní chee le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'ine' le'e. Le se chacha ca zaj naca da caní.

¹³ Bi chee Cristo zaj zre'e Babilonia nigá, benne' ca' gucá'a Dios ca guqué'e le'e, dxulugape' le'e diuzre. Cá'anqueze Marcos, bi na' nácabe' ca bi cheéqueza' dxugápabe' le'e diuzre. ¹⁴ Le gugapa diuzre ljuwézrele tule xetule, ne le gunida' ljuwézrele lu xel-la' zri'i lazre'.

Dxenaba' lau Dios gunne' le'e xel-la' dxebeza zri lazre', le'e nácale bi ca' chee Jesucristo. ¡Ca'an gaca na!

DIZRA' GUDXUPE' DA BZUAJ SAN PEDRO

Dizra' da gusel-la San Pedro chee' bi ca' chee' Jesús

¹ Neda', Simón Pedro, naca' wən zrin chee' Jesucristo, ne benne' gubáz chee'. Dxuzúaja' da nigá chee'le le'e, ba nápa'e xel-la' dxeajlí lazre' da zácale'e, ne naca tuze ca da nápanu' netu'. Caní naca lawe' da naca li lazre' Dios cheedxu, ne Benne' Weselá cheedxu Jesucristo. ² Dxenaba' lau Dios gúnnale'e le'e da chawe' chee', ne xel-la' dxebeza zri lazre', lawe' da núnbeale Dios, ne Xránadxu Jesús.

Ca dxal-la' gaca bi chee' Cristo

³ Dios lu xel-la' waca chee' ba nunne' dxi'u xúgute da nachinedxu chee' gápadxu xel-la' nabán chee' Le', ne chee' gaca gundxu zrin chee', lawe' da núnbeadxu Bénnea' gunné' dxi'u chee' gápadxu da xabáa chee' Le', ne xel-la' szren chee'. ⁴ Caní naca na, ba nunne' dxi'u ca da nachebe lazre', da zaj naca na szrenle'e, ne da zaj zácale'e na, chee' ne chee' da guchébe lazre' wazru'e'ele le'e gácale ca nácaqueze Dios, ne chee' lale lu da sban da dxaca lu wezr la xu nigá ne chee' da dxezá lazre' bela' dxen chee' benneache. ⁵ Chee' le' na' dxal-la' cue'le gunne xue gun xel-la' dxeajlí lazre' chee'le gunle da xrlátaje, ne chee' gun da xrlátaje da dxunle gácale benne' sina. ⁶ Xel-la' sina chee'le dxal-la' gun na nna be'e cuínale, na' xel-la' dxenná be'e cuina chee'le dxal-la' gun na gácale benne' zren lazre', na' xel-la' zren lazre' chee'le dxal-la' gun na zri'ile Dios. ⁷ Xel-la' zri'i lazre' chee'le nen Dios dxal-la' gun na zri'ile benne' bíchedxu ca', na' xel-la' zri'i lazre' chee'le nen bíchele ca' dxal-la' gun na gácale zri'i lazre'.

⁸ Che le'e dxunle da caní, ne dxelepe ban na, quebe xegá'ana cá'aze xel-la' nabán chee'le, ne quebe naca na níteze núnbeale Xránadxu Jesucristo. ⁹ Benne' quebe dxuné' da caní naque' ca benne' la chul-la, u ca benne' quebe dxenné' ca da za za'. Ba gul-la lazre' guxádxie' ca naca chee' dul-la ca' da bene' gate nate. ¹⁰ Chee' le' na', benne' bícha'dau', le gun ba xuzre nézele Dios gunné' le'e, ne ba guqu'é' le'e, na' che gunle da nigá, cabata' cheajcházele. ¹¹ Caní gun Dios, gúnnale'e le'e lataj chu'ule naga nna bea Xránadxu, ne weselá cheedxu Jesucristo chadía chacanna.

¹² Chee' le' na' tu dxusá'azqueza' lázrele da caní, lácala ba nézele na, ne ba ze cháchale lu xel-la' li da ba nápa'e. ¹³ Dxácatę naca bana' dxéqueda' dxun na ba xen gusá'a lázrele chee' da caní ¹⁴ lawe' da ba nezda' wátezea' ca ba gunná Xránadxu Jesucristo, guzre' neda'. ¹⁵ Na'a guna' ca da séqueda' chee' gate te gatia' neda', cheajjá lázrquezele chee' da caní.

Benne' belelé'eng' xel-la' szren chee' Cristo

¹⁶ Da bşedentu' le'e ca naca chee' xel-la' szren chee' Xránadxu Jesucristo, ne ca xel'é' xecha lasa quebe naca na ca da dxenná xichaj lázrdau benneache. Netu' blé'equezentu' ca naca xel-la' szren chee' Xránadxu. ¹⁷ Blé'entu' Le' gate Xradxu Dios be'e Le' xel-la' ba lá'ana, ne xel-la' szren, na' Dios gúzrequeze' Le' lu da xabáa chee': "Benne' nigá naque' Zri'ina' nazri'ite' lazra', ne dxezaca ba lazra' nen Le'." ¹⁸ Nétu'queze benentu' chi'i na' da za na xabáa gate zúantu' nen Xránadxu lu xi'a lá'azxa na'. ¹⁹ Chee' le' na' dxuxrén lázredxantu' dizra' da buluzúaj benne' ca' gulenné' waláz chee' Dios. Da xrlátaje dxunle le'e lawe' da dxenle ca naca dizra' nigá. Naca na ca tu xi' da dxusení na tu lataj

naga naca chul-la ca zrin zra chaní', na' Cristo, Bénnea' naque' ca belaj zila súalene' le'e chee gusení'ē lu xichaj lázrdaule. ²⁰ Le guxúe xanne' ca naca da nigá. Netú da naxúaj na lu xiche lá'azxa quebe nu benne' seque' xuzájle'ē na lu xel-la' dxéajni'i cheeze'. ²¹ Benne' ca' buluchálaje' waláz chee Dios quebe buluchálaje' ca da gulaca lázrequeze le'. Gulaque' benne' chee Dios, na' gulenné' waláz chee' ca da bnezruj Be' Lá'azxa le'.

2

Ca naca chee benne' ca' dxulusédene' da wen lazre' (Judas 4-13)

¹ Cá'anqueze gulezrá' ládujla benne' Israel benne' wen lazre' ca', benne' belún cuine' ca benne' dxelenné' waláz chee Dios. Cá'anqueze welezrá' ládujla le'e benne' wen lazre', benne' xelún cuine' ca benne' dxulusédene' bénneache dizra' chee Dios. Benne' caní wuluzéajni'ine' bénneache bagácheze ca naca dizra' wen lazre' da guxrinnaj na, na' caní xeledábage' Xránadxu, Bénnea' bselé' dxi'u, na' lawe' da dxulusédene' da caní xelebíá xi' zéqueze'. ² Benne' zan chjácalene' ca da sban dxuluséde benne' ca', na' ne chee benne' caní xelenné' bénneache schanni' chee dizra' li chee xel-la' weselá. ³ Lawe' da dxelezá lazre' xelezí'ē dumí, xelebéaje' le'e dumí ne chee da wen lazre' da dxuluzéajni'ine' le'e. Dios ba nucueze' da guzríá xi na benne' caní, lawe' da ba guchugue' gate nate ca da gaca chee benne' ca'.

⁴ Dios quebe bnite lawe' chee gubáz chee xabáa ca' belún dul-la. Bdeé' gubáz chee xabáa ca' lu lataj ba xa', ne bze'ē le' lu da chul-la, ne bcheaje' le' du xia naga zaj nadxéaje' ca zrin zra chugu Dios ca da gaca chee gubáz chee xabáa ca'. ⁵ Cá'anqueze Dios quebe bnite lawe' chee benne' ca' gulezrá' gate nate. Gusel-le' nisa xiuj da bzria xi na benne' ca' belune' da calela. Bselé' Noé, bénnea' bchálaje' ca naca da xrlátaje da dxal-la' xelún bénneache. Bselé' gázreze benne'. ⁶ Cá'anqueze guchugu Dios chee xezre Sodoma, ne xezre Gomorra chee xelebíá xi na. Bzézxie' dxúpaté xezre ca', na' bexexgá'anaé na de. Caní dxuluséajni'i na benne' ca' xelune' da calela, benne' xelezré'ē te na'. ⁷ Dios bselé' Lot lu xezre Sodoma na' lawe' da guque' tu benne' xrlátaje, ne bexiajele'ene' gate blé'ene' ca naca da sban da dxelún benne' ca' dxelune' da calela. ⁸ Benne' xrlátaje nigá guzúe' ládujla benne' ca', na' tu zra tu zra guzúa ba xa' lázrdawe' ca dxenné'ē, ne dxenne' ca da calela da dxelún benne' ca'. ⁹ Nézqueze Xránadxu guselé' benne' zaj naca bi chee' che bi da dxusaca zi na le', na' guzráqueze' benne' ca' dxelune' da calela, ca tu lizre xia, ca zrin zra chugue' chee' chjaque' lataj ba xa'.

¹⁰ Dios xudé' xel-la' zi' zrendxa benne' ca' dxelune' cáteze da sban da dxelezá lazre', ne dxulusé' chalá'ala xel-la' dxenná bea chee Xránadxu. Benne' caní zaj naque' lazre' dxugu dxelune' da sban, ne dxulucá'ana szren cuine'. Quebe dxelezrebe' dxelenné' schanni' chee gubáz chee xabáa ca'. ¹¹ Gubáz ca' zaj nápadxe' xel-la' dxenná bea, ne xel-la' szren ca benne' caní, quebe dxelenné' da calela chee benne' ca' gate dxelawe' zria chee' lau Xránadxu.

¹² Benne' caní zaj naque' ca bea ca' quebe zaj naxéajni'iba', be' dxelunba' ca da zaj nézezeba', ne zraba' chee xelél-le'-ba', ne xelutie'-ba'. Benne' caní dxelenné' schanni' chee da quebe dxeléajni'ine', na' xelátequeze' ca dxelate bea ca', ¹³ ne xeledé' xel-la' zi' ca xel-la' zi' buludé' benne' xula. Dxeléquene' zaj zré'ē lu da ba neza gate dxelebene' ca da dxaca tu zra tu zra. Zaj naque'

ca tu da sban da dxusi'i na le'e xel-la' stu' gate zaj zře'e nen le'e lu laní cheeĽe, dxácate ne dxelezúe' lu xel-la' dxebe' lu da caleĽa da dxelune'.

¹⁴ Dxelezá lazře' xúgute nu'ula dxelelé'eng', ne quebe dxelálenē' dxelune' dul-la. Dxulusi'e neza xula benne' bíchedxu quebe zaj ze chache'. Dxulucúdequeze', ne zaj naque' benne' zaj xu'e de'. ¹⁵ Zaj nanítie' lawe' da gulecuase' lu neza lí chee' Dios. Dxelune' ca da ben Balaam, zři'ine Beor. Balaam nigá bene' ba chee' dumí, ne gudé' dxune' da caleĽa, ¹⁶ na' bea na', be' dxua xua', gunneba' ca benne', ne gudíl-laba' Balaam ca naca dul-la da dxune', na' guchúguba' da xala da dxun Balaam.

¹⁷ Benne' caní zaj naque' ca tu beaj bizre, ne ca tu beuj da dxua be' bduun'. Ba zaj naca chee' benne' ca' xelexegá'ane' chadía chacanna lu da chul-la.

¹⁸ Dxelennē' dizra' da dxulucá'ana szren na le', ne da zaj naca na dácheze. Dxuluchíneng' da sban ca', ne da dxezá lazre' beĽa' dxen chee' bénneache chee' dxulusi'e chalá'ala benne' ca' za dxelexedxúajteque' ládujla benne' ca' dxelune' da caleĽa. ¹⁹ Dxelechebe lazře' xulunézruje' benne' ca' tu xel-la' weselá, san léqueze benne' ca' zaj naque' wen zrin chee' da sban. Tu tu bénneache naque' benne' nada'u chee' da dxenná be'e na le'.

²⁰ Benne' ba zaj núnbe'e Xránadxu, ne Weselá cheedxu Jesucristo, ne ba gulelé' lu da sban chee' xezr la xu nigá, na' te na' che xelexexu'e xecha lasa lu da sban na', ne xelu'e lataj xenná be'e na le', na' gácadxa da ba xa' chee' benne' ca' ca da guca chee' gate nate.

²¹ Cháwe'dxela gaca na chee' benne' caní la quebe zaj núnbe'e Cristo, quegala gate ba belúnbe'e Le' na' xelexecuase' ca naca xel-la' dxixruj bea lá'azxa da guzre Dios le' xelune'. ²² Ca da guca chee' benne' caní dxulé'e na naca da lí dizra' nigá da dxenná na:

Becu' dxexáguba' ca da ba bexébeba',

na' cuche za hexíbeba' bexú'uba' xecha lasa lu guzra' cheeĽa'.

3

Ca naca chee' zra xelá' Xránadxu

¹ Benne' bícha'dau' nazri'íte lazra', da nigá naca na dizra' gudxupe' da dxuzúaja' cheeĽe. Lu dxúpatē xiche caní guca lazra' guzėjáni'ida' le'e chee' gulaba lázrele chee' da caní. ² Le gusá lazre' ca da gulenná benne' lá'azxa ca', benne' buluchálaje' waláz chee' Dios, ne ca naca da gudixruj be'e Xránadxu, Benne' Weselá cheedxu, da na' bulusede benne' gubáz chee' ca' le'e.

³ Dxunna ba xen gúnbeale, lu zra da za zá'aca welelá' benne' xelún le' chee' da zaj naca na da lá'azxa, ne xelune' cáteze da dxelezá lazře', ⁴ ne xulucheĽe' bénneache: ¿Bizra guca chee' da guchebe lazre' Cristo, gunné': Welá'a? Xra xrtáudxu ca' ba gulate', na' túzqueze ca guca, gaca na gate guzrete' xezr la xu.

⁵ Benne' caní quebe dxeleque be'e ne' gulezúa xabáa, ne xezr la xu gate nate, Dios gunné' bedxúaj na lu nisa, na' guzúa chacha na lu nisa, ⁶ na' xezr la xu da zua gate nate guzřia xi na ne chee' nisa xiuj, ⁷ na' xabáa, ne xezr la xu da zaj zua na na'a, ba naca chee' na xelexe na ca ba núnqueze Dios chee' na. Xi' na' guzeze na da caní lu zra guchi'a Dios, gate xelebía xi' benne' ca' dxelune' da caleĽa.

⁸ Benne' bícha'dau' nazri'íte lazra', quebe gal-la lázrele da nigá: Lau Xránadxu tu zraze naca na ca chí gaxúa iza, na' chí gaxúa iza zaj naca na ca tu zraze. ⁹ Quebe dxezře Xránadxu gunē' da nachebe lazre' ca dxeleque bénneache. Naque' zren lazre' nen dxi'u lawe' da quebe dxaca lazře' nu cuía xi'. Dxaca lazře' xelexexíaje lazre' xúgute bénneache.

¹⁰ Zra xelá' Xránadxu zrin na gate quebe nu dxeque ca', ca za' tu gubán chizrela. Lu zra na' cuía xi' xabáa da dxelé'edxu, na' gunle'e na schaga, ne ca naca da dxelé'edxu zran xabáa xelebía xi na lu xi', na' xezr la xu nigá chezxe na tu zren nen da de lawe na.

¹¹ Che ba nézele xelebía xi' xúgute da caní, ¿ájala dxal-la' gunle? Dخال-la' gácale li lazre' ne guzúa cuínale lu na' Dios ¹² dxácatē ne dxebézale zra na', ne dxal-la' gunle ca da séquele zrintē zra na'. Lu zra na' cuía xi' xabáa lu xi', na' da zaj zria zran xabáa xelexuna na lu xi' na'. ¹³ Dxi'u dxebézadxu tu xabáa cube, ne tu xezr la xu cube da ba guchebe lazre' Dios naga gaca xlátajē xúgute.

¹⁴ Cheē lē na', benne' bícha'dau' nazri'itē lazra', dxácatē dxebézale da caní, le gun ca da séquele cheē quebe bi bágale, ne quebe bi nadxenle cheē dul-la lau Dios, ne suale lu xel-la' dxebeza zri lazre'. ¹⁵ Le gusá lázrele naca Xránadxu zren lazre' nen dxi'u cheē ladxu. Cá'anqueze Pablo, benne' bíchedxu nazri'itē lázredxu, bzuajē' cheēle, bchínenē' ca naca xel-la' sina da bnezruj Dios lē'. ¹⁶ Lu xúgute xiche da ba bzuajē', ba bchálajlēne' le'e ca naca cheē da caní, lácala balla na nácalē'e na stebe chéajni'idxu na, na' benne' ca' quebe dxelájni'ine' na, ne benne' ca' quebe zaj zua chache' dxuluchuque' na, ca dxuluchuque' xezícala xrtizra Dios, na' cheē lē na' Dios guzría xi'e benne' ca'.

¹⁷ Cheē lē na', benne' bícha'dau' nazri'itē lazra', che le'e ba nézele da nigá nédxula, le guxúe cuínale cheē da wen lazre' cheē benne' ca' dxelune' da calela cheē quebe xelechē le'e chalá'ala, ne quebe nite xel-la' li lazre' cheēle lau Dios.

¹⁸ Le gúnbea xanne' Xránadxu, Benne' Weselá cheēdxu, Jesucristo, ne le gula lu xel-la' zri'i lazre' cheē'. ¡Gaca ba Lē' na'a, ne chadía chacanna! ¡Ca'an gaca na!

DIZRA' NÉDXUDAU' DA BZUAJ SAN JUAN

Xtizra Dios da dxunna na xel-la' nabán li lazre'

¹ Dxuzúaja' cheęle da nigá ca naca cheę Bénnea' zúaquezē' gate guzú lau zua xúgutę da dxelé'edxu. Dxuzúaja' ca naca cheę Bénnea' ba bėnentu' cheę', ne ca naca da ba blé'equezentu' beņe', neda' ne kezícadxa benne' ca' bseđe Jesús. Ca naca cheę Benne' nigá guzúantu' dxennantu', ne btantu' Le' nen na'ntu'. Dxuchálajntu' ca naca cheę Bénnea' naque' Dizra' da dxunna na xel-la' nabán li lazre'. ² Bénnea' dxunne' xel-la' nabán zeajlí canna ba blé'e, na' netu' blé'entu' Le'. Dxixruj bėantu' da naca cheę', ne dxuzentu' le'e ca naca cheę'. Léqueze' zúalęņ' Xradxu Dios, na' blé'e naga zúadxu. ³ Da blé'entu', ne da bėnentu' dxuzentu' le'e cheę gácale tuze nen netu'. Da lítegage, nácadxu tuze nen Xradxu Dios, ne nen Jesucristo, Zri'ine Dios. ⁴ Ca naca da caní dxuzúaja' cheęle cheę gaca du lazre' xel-la' dxebe' cheęle.

Dios naque' lení' cheę xichaj lázrdau bėnneache

⁵ Da nigá naca dizra' da bchálajle Jesús netu', ne da dxuzentu' le'e. Gunné': Dios naque' lení', ne quebe bi zúale Le' da naca cheę da chul-la. ⁶ Che dxennadxu nácadxu tuze nen Le', na' che dxundxu da naca na cheę da chul-la, dxun lázredxu ca naca da dxennadxu, na' ca naca da dxundxu quebe dxundxu da li. ⁷ Che dxundxu da li da naca cheę xel-la' naxaní', ca naca Dios, Bénnea' naque' li lazre', ne zuę' lu xel-la' naxaní', nadxa zúadxu tuze tudxu xetudxu, na' dxen cheę Jesús, Zri'ine Dios, dxibe na dxi'u ca naca xúgutę dul-la nabágadxu.

⁸ Che dxennadxu quebe nabágadxu dul-la, dxezí xéqueze cuínadxu, na' da li quebe zúale na dxi'u. ⁹ Che xrúalepedxu ca naca dul-la da nabágadxu, Dios naque' li lazre', ne xlátaje, na' cheę le na' Le' gunite lawę' cheędxu ca naca dul-la da nabágadxu, ne quibe' dxi'u ca naca xúgutę da sban da ba bėndxu. ¹⁰ Che dxennadxu quebe nundxu dul-la, dxucá'anadxu Dios ca wen lazre', ne quebe ne sidxu du lázredxu ca naca dizra' cheę'.

2

¹ Le'e, bi nazri'ite' lazra', dxuzúaja' da nigá cheęle cheę quebe gunle dul-la. Che nu benne' gungē' dul-la, zua wenaba cheędxu lau Dios, Jesucristo, Benne' xlátaje. ² Le' gutie' waláz cheędxu cheę gudúę' da nabágadxu lau Dios ca naca dul-la cheędxu, ne quegaze da nabágadxu dxi'u, san gudúę' da zaj nabaga xúgutę bėnneache.

³ Che dxuzúadxu dizra' ca naca da bdxixruj be'e Dios, nezdxu ba núnbeadxu Le'. ⁴ Che nu dxenná: Neda' núnbe'a Le', ne che quebe dxuzúę' dizra' ca naca da bdxixruj be'e Dios, benne' nigá naque' wen lazre', ne quebe dxenné' da li. ⁵ Che nu benne' dxuzúę' dizra' ca naca da bdxixruj be'e Dios, benne' nigá nazri'ine' Dios du lazre'. Che dxundxu caní nezdxu ba zúadxu tuze nen Le'. ⁶ Bénnea' dxenne' naque' tuze nen Dios dxal-la' gaque' ca guca Jesús.

Tu da cube da bdxixruj be'e Jesús

⁷ Le'e, bi nazri'ite' lazra', dxuzúaja' cheęle ca naca da dxenná na dxal-la' zri'idxu le sa' lįwézredxu. Quebe naca na tu da cube da bdxixruj bea Dios. Naca na da gula na' da ba guzile nédxudautę. Da gula da bdxixruj bea Dios

naca na dizra' da ba bénequezle. ⁸ Naca na ca dxuzúaja' cheęle tu da cube da dxixruj bea Dios, da naca béaqueze na naca da li lawe' da ben Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li cheę xel-la' zri'i lazre' lu xichaj lázrdaxu, da dxegúa na da naca na cheę da chul-la.

⁹ Che nu benne' dxenné' dxuné' da naca na cheę xel-la' naxaní', ne che dxecuídene' le sa' ljwezre', benne' nigá ne dxedé' lu da naca na cheę da chul-la. ¹⁰ Benne' nazri'ine' le sa' ljwezre' dxuné' da naca cheę xel-la' naxaní', ne quebe dxuné' da guzría xi na le sa' ljwezre'. ¹¹ Bénnea' quebe chawe' dxelé'ene' le sa' ljwezre', lu da naca na cheę da chul-la zua bénnea', ne lu da na' dxedé', ne quebe nézene' ga zéaje' lawe' da dxucá'ana da chul-la le' ca tu benne' la chul-la.

¹² Le'e, bi nazri'ite' lazra', dxuzúaja' cheęle lawe' da ba bnite lau Dios cheęle ca naca dul-la cheęle, lawe' da gute Jesucristo waláz cheędxu. ¹³ Le'e, benne' nazri'ite' lazra', dxuzúaja' cheęle lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheęle lawe' da ba bsanle da dxenná da xriwe'.

Le'e, bi nazri'ite' lazra', dxuzúaja' cheęle lawe' da ba núnbeale Xradxu Dios.

¹⁴ Le'e, xruze xrna', dxuzúaja' cheęle lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheęle lawe' da nácale benne' wal-la, ne dizra' cheę Dios nácale, ne bsanle da dxenná da xriwe'.

¹⁵ Quebe sa lázrele da calęla ca' da zaj naca na cheę xęzr la xu nigá, ne quegá da zaj de lu xęzr la xu nigá. Che nu benne' dxezá lazre' da zaj de lu xęzr la xu nigá, quebe nazri'ine' Xradxu Dios. ¹⁶ Da caní zaj naca na cheę xęzr la xu nigá, da dxezá lázredxu da dxezaca ba lazre' beła' dxen cheędxu, ne da dxezaca ba lazre' xiaj laudxu, ne ca naca xel-la' dxucá'ana szren cuina cheę da nápadxu. Xúgute' da caní quebe zaj naca na da dxunna Dios, san zaj naca na cheę xęzr la xu nigá. ¹⁷ Ba za zra xuzre lazre' xęzr la xu nigá, ne ca naca da dxezá lázredxu da naca na cheę xęzr la xu nigá. Bénnea' dxuné' da dxaca lazre' Dios wazúatecaze'.

Ca naca da li, ne da wen lazre'

¹⁸ Le'e, bi nazri'ite' lazra', zra caní zaj naca na zra bzebe. Ba bénele gulé'e lawe' benne' tábage' Cristo. Neda' dxapa' le'e na'a, bache belelá' benne' zante benne' dxeledábage' Cristo. Cheę le na' nezdru ba zúadxu zra bzebe. ¹⁹ Benne' caní belexedxúajqueze' ládujla dxi'u. Da liqueze quebe gulaque' tuze nen dxi'u. La gulaque' tuze nen dxi'u, na' belexegá'anaqueze' dxi'u. Caní guca cheę nezdru quebe zaj naca xúgute' tuze nen dxi'u.

²⁰ Ca naca cheęle le'e, ba zúale Be' Lá'azxa le'e, Bénnea' gusel-la Xradxu Lá'azxa. Cheę le na' ba nézele xúgute' da caní. ²¹ Dxuzúaja' cheęle da nigá lawe' da ba nézele da li, ne quegá dxennia' quebe nézele da li. Ba nézquezle le'e quebe dxun lazre' Bénnea' naque' da li.

²² ¿Nuzra' naca benne' wen lazre'? Naca bénnea' dxenné' Jesús quebe naque' Cristo, Benne' nasele-la Dios. Benne' wen lazre' nigá dxenné' Dios quebe naque' Xra Jesús, ne Jesús quebe naque' Zri'ine Dios. ²³ Xúgute' benne' dxelenné' Jesús quebe naque' Zri'ine Dios, Dios quebe zúalęne' benne' ca'. Bénnea' dxexchebe' Jesús naque' Zri'ine Dios, Dios zúalęqueze' bénnea'.

²⁴ Chee le na', le cu'u lu xichaj lázrdaule dizra' da ba bénele nédxudautę. Che da ba bénele nédxudautę zua na lu xichaj lázrdaule, le'e súatequezle tuze nen Zri'ine Dios, ne nen Xradxu Dios. ²⁵ Da nigá naca na da nachębe lazre' Dios, gunņe' dxi'u xel-la' nabán zeajlı canna.

²⁶ Ba bzuaja' cheęle da nigá ca naca chee benne' ca' dxelezı xę'e le'e. ²⁷ Na'a zúale Be' Lá'azxa le'e, Bénnea' gusel-la Jesucristo cheęle, na' Be' Lá'azxa nigá zuę' xichaj lázrdaule. Chee le na' quebe nachınele nu gusede le'e lawe' da dxusede Be' Lá'azxa le'e ca naca xúgute da canı, na' da dxusedene' le'e naca na da li, ne quebe naca na da wen lazre'. Chee le na', le súatequeze tuze nen Cristo ca naca da ba bşede Be' Lá'azxa le'e.

Ca naca chee benne' zaj naque' zri'ine Dios

²⁸ Na'a, bi nazri'ite lazra', le súatequeze tuze nen Cristo, chee súadxu li lazre' gate xelá' Le', ne quebe xedué'edxu lau Le' gate xelé'. ²⁹ Ba nézele naca xlátaje Dios. Chee le na' dxal-la' nézele xúgute benne' ca' dxelúnqueze' da naca na xlátaje zaj naque' zri'ine Dios.

3

¹ Le nna' xque ca nazri'ile'e Dios dxi'u lawe' da nazı ladxu bi chee Dios, ne canı nácadxu. Chee le na' quebe zaj neze bénneache lu xęzr la xu nigá da nácadxu lawe' da quebe belúnbe'e Jesús. ² Le'e, bi nazri'ite lazra', na'a nácadxu bi chee Dios. Quebe ne gulé'e lawe' da gácadxu. NezdXu gate xelá' Le', gácadxu ca naca Le' lawe' da lé'edxu Le' ca nácaqueze Le'. ³ Nu benne' dxebeza lazre' gaque' ca naca Jesús dxue lazre' gaque' du lazre' ca naca Jesús, naque' du lazre'.

⁴ Nu benne' dxune' dul-la quebe dxuzúę' dizra' ca naca da bdxixruj be'e Dios lawe' da naca dul-la da dxedábaga da bdxixruj be'e Dios. ⁵ Ba nézele bla' Jesucristo chee gudúę' dul-la nabágadxu, ne Le' quebe bi dul-la bene'. ⁶ Xúgute benne' zaj zúatequeze' tuze nen Jesús quebe dxelune' dul-la, na' xúgute benne' dxelune' dul-la quebe ne xelelé'eng' Cristo, ne quebe ne xelúnbe'e Le'. ⁷ Le'e, zri'ina'dau', quebe güele lataj nu si xę le'e. Bénnea' dxune' da xlátaje, xlátaje naque', ca naca Dios, naque' xlátaje. ⁸ Benne' dxune' dul-la naque' chee da xriwe' lawe' da dxun da xriwe' dul-la nédxudautę. Chee le na' bla' Zri'ine Dios, chee bşria xi'e xúgute da nun da xriwe' lu xęzr la xu nigá.

⁹ Xúgute benne' zaj naca bi chee Dios quebe dxelune' dul-la lawe' da zúaletequeze Be' chee Dios benne' ca'. Chee le na' québedxa gaca xelezúę' xelune' dul-la lawe' da zaj naque' bi chee Dios. ¹⁰ Naca bea nu naca bi chee Dios ne nu naca bi chee da xriwe'. Bénnea' quebe dxune' da xrlátaje ne quebe nazri'ine' le sa' ljwezre' quebe naque' bi chee Dios.

Dxal-la' zri'idxu tu xetudxu

¹¹ Da nigá naca na dizra' da ba bénequezle nédxudautę, da dxenná na: Dxal-la' zri'idxu tudxu xetudxu. ¹² Quebe gundxu ca ben Caın, bi na' gúcabe' chee da xriwe', na' bétebe' bi bichebe'. ¿Bizr chee na' bétebe' lebe'? Bétebe' lebe' lawe' da naca da zrinnaj da ben Caın, na' da ben bi bichebe' naca na da xrlátaje.

¹³ Le'e, benne' bícha'dau', quebe xebánele che bénneache lu xęzr la xu nigá dxuluzúę' le'e chalá'ala. ¹⁴ NezdXu ba bdxújadxu lu na' xel-la' gute, ne ba guxú'udxu lu xel-la' nabán lawe' da nazri'idxu bíchedxu ca'. Bénnea' quebe nazri'ine' bíchedxu ca' zúaqueze' lu xel-la' gute. ¹⁵ Bénnea' dxuzúę' chalá'ala bíchedxu ca' naque' ca tu benne' dxute benne', na' ba nézqueze le'e nu benne' dxute benne' quebe nape' xel-la' nabán zeajlı canna. ¹⁶ Ba nezdXu da naca

xel-la' zri'i lazre' lawe' da bzanne Jesucristo xel-la' nabán cheg', na' gutië' waláz cheëdxu. Cá'anqueze dxi'u dxal-la' guzúadxu xel-la' nabán cheëdxu cheë gácalëdxu bíchedxu ca'. ¹⁷ Che tu benne' nape' xel-la' gunní'a da naca na cheë xëzr la xu nigá, ne che dxelé'eng' le sa' ljwezrë' dxexázrjeng', na' che quebe xexache lazre' le', benne' nigá quebe nazri'ine' Dios. ¹⁸ Le'e, zri'ina'dau', dxal-la' zri'idxu tudxu xetudxu, quegá nen dízra'ze, ne quegá nen da nezedxu. Dخال-la' gúntequezdXu na, na' gaca bea na da li nazri'idxu bíchedxu ca'.

Zua zri lárdaudxu lau Dios

¹⁹ Che gundxu caní ba nezdXu nácadXu cheë da li, na' sua zri lárdaudxu lau Dios, ²⁰ gate zua tu da dxagu na zria lu lárdaudxu, lawe' da nezdXu naca Dios zrendxa ca lárdaudxu. Le' nézquezne' ca naca da dxundxu. ²¹ Ca'an naca, bi nazri'itë lazra', che quebe zua tu da dxagu na zria lu lárdaudxu, waca sua zrize lárdaudxu lau Dios, ²² na' Le' gunne' dxi'u xúgutë da nábadxu lawe'. Ca'an gaca lawe' da dxuzúadxu dízra' da bdxixruj be'e Dios, ne dxundxu da dxezaca ba lazre' Le'. ²³ Da bdxixruj be'eng' dxi'u naca na chéajledxu cheë Jesucristo, Zri'ine Dios, ne zri'idxu tudxu xetudxu ca bdxixruj be'e Le'. ²⁴ Bénnea' dxuzúe' dízra' da bdxixruj be'e Le' zúalequeze' Dios, na' Dios zúalequeze' bénnea'. Ba nezdXu Le' zúalequeze' dxi'u lawe' da bache benne' dxi'u Be' cheë'.

4

Naca bea Be' cheë Dios

¹ Le'e, bi nazri'itë lazra', quebe chéajlele cheë xúgutë benne' dxelenné' zúale Be' cheë Dios le'. Le nna' xque ca naca da dxulusédene' cheë nézele che zúale Be' cheë Dios le'. Caní dxal-la' gunle lawe' da ba belelá' benne' zantë, benne' wën lazre', dxelenné' dxuluchálajë' waláz cheë Dios. ² Caní gaca nézele che zúale Be' cheë Dios tu benne'. Xúgutë benne' dxelexechebë' ba bla' Jesucristo, ne guque' bénneache, benne' caní zaj naque' cheë Dios. ³ Xúgutë benne' quebe dxelexechebë' ca guca Jesucristo quebe zaj naque' cheë Dios. Zaj naque' cheë bénnea' dxedábague' Jesucristo. Ba bénele gulé'e lawe' bénnea', na' na'a ba zue' lu xëzr la xu nigá.

⁴ Le'e, bi nazri'itë lazra', nácale cheë Dios, ne bache bzúale chalá'ala benne' ca' dxelezí xë'e lawe' da szrendxa naca Be' zúale na le'e ca be' zua na lu xëzr la xu nigá. ⁵ Benne' ca' zaj naque' cheë xëzr la xu nigá. Cheë le' na' dxuluchálajë' cheë da naca na cheë xëzr la xu nigá, na' benne' zaj zre'e xëzr la xu nigá dxelenné' da dxuluchalaj benne' ca'. ⁶ Dxi'u nácadXu cheë Dios. Benne' zaj núnbe'e Dios dxuluzé' nague' cheëdxu. Benne' quebe zaj naque' cheë Dios quebe dxuluzé' nague' cheëdxu. Cheë le' na' nezdXu nu benne' zúale Be' cheë xel-la' li le', ne nu benne' zúale be' cheë da dxezí xë na le'.

Tu dxúnzqueze Dios da naca cheë xel-la nazri'i lazre'

⁷ Le'e, bi nazri'itë lazra', dxal-la' zri'idxu tudxu xetudxu lawe' da dxunna Dios dxi'u xel-la' nazri'i lazre' na'. Xúgutë benne' zaj naque' zri'i lazre' caní zaj naque' zri'ine Dios ne zaj núnbe'e Dios. ⁸ Bénnea' quebe naque' zri'i lazre' caní quebe núnbe'e Dios lawe' da tu dxúnzqueze Dios da naca cheë xel-la nazri'i lárze'. ⁹ Naca béaqueze Dios nazri'ilë'engë' dxi'u lawe' da gusel-le' Zrí'ingë' tu licha' lu xëzr la xu nigá cheë zrué'edxu xel-la' nabán da naca na cheë Zrí'ingë' na'. ¹⁰ Xel-la' zri'i lazre' li naca na caní: Quegá dxi'u na' bzri'idxu Dios. Le'

bzri'ine' dxi'u, ne gusel-le' Zrí'ine' chee guque' da gudúa na da nabágadxu lau Dios lawe' da nabágadxu dul-la.

¹¹ Le'e, bi nazrí'ite lazra', che Dios bzri'ine' dxi'u caní, dxi'u dxal-la' zri'idxu tudxu xetudxu. ¹² Quebe nu ne le'e Dios, san che zri'idxu tudxu xetudxu, Dios zúaqueze' lu xichaj lázrdaudxu, na' xel-la' zri'i lazre' chee' dxun na li lazre' xel-la' zri'i lazre' cheedxu. ¹³ NezdXu nácadxu tuze nen Dios, na' Dios naque' tuze nen dxi'u lawe' da bzué' Be' chee' lu lázrdaudxu. ¹⁴ Ba blé'entu', ne dxuzentu' le'e ca naca da ben Xradxu Dios, gusel-le' Zrí'ine' chee' bedajselé' bènneache chee' xezr la xu nigá. ¹⁵ Bénnea' dxexechebe' naca Jesús Zrí'ine Dios, Dios zúalequeze' bènnea', na' le' zúalequeze' Dios.

¹⁶ Ba núnbeadxu ca nazrí'i Dios dxi'u, ne ba guxéajlédxu nazri'ine' dxi'u. Tu dxúnzqueze Dios da naca chee xel-la nazri'i lazre', na' bènnea' naque' zri'i lazre' caní zúalequeze' Dios, na' Dios zúalequeze' le'. ¹⁷ Caní dxaca li xel-la' zri'i lazre' cheedxu, chee sua zrize lázrdaudxu lu zra guzrí'a xi' Dios bènneache, benne' ca' dxelune' da calela, lawe' da nácadxu lu xezr la xu nigá ca nácaqueze Jesucristo. ¹⁸ Bénnea' naque' zri'i lazre' caní quebe dxezebe' da gaca na lu zra na'. Xel-la' zri'i lazre' li dxebéaj na chalá'ala xel-la' dxezebe na'. Nu benne' dxezebe' dxebeze' bi da saque', na' bènnea' dxezebe' quebe dxaca li xel-la' zri'i lazre' chee'.

¹⁹ Dxi'u nazri'idxu Dios lawe' da bzri'i Dios dxi'u nédxudaute. ²⁰ Che nu benne' dxenné': Nazri'ida' Dios, ne che benne' nigá dxuzúé' chalá'ala le sa' ljwezre', dxun lazre'. Che quebe nazri'ine' le sa' ljwezre', bi dxelé'etene', çájazra gune', zri'ine' Dios, ne quebe dxelé'ene' Le'? ²¹ Dios ba bdxixruj be'ene' dxi'u caní, gunné': Bénnea' nazri'ine' Dios, zri'iquezne' le sa' ljwezre'.

5

Ca bdxúajdxu chawe' lu xezr la xu nigá

¹ Xúgute benne' dxeléajle'e Jesús naque' Cristo, Benne' nase-la Dios, benne' caní zaj naque' bi chee Dios, na' che zaj nazri'ine' Xradxu Dios, dxal-la' xelezrí'iquezne' xúgute benne' zaj naque' bi chee Dios. ² NezdXu nazri'idxu benne' zaj naque' bi chee Dios chete nazri'idxu Dios, ne dxundxu ca naca da dxi'e dxi'u. ³ Che da li nazri'idxu Dios, dxundxu da dxi'e dxi'u. Da dxi'e dxi'u quebe naca na stebe. ⁴ Xúgute benne' zaj naque' bi chee Dios dxedxúaje' chawe' lau da calela da dxaca na lu xezr la xu nigá. Dxedxúajdxu chawe' lau da calela da dxaca na lu xezr la xu nigá lawe' da dxéajlédxu da naca na chee Jesucristo. ⁵ Benne' dxedxúaje' chawe' lau da calela da dxaca na lu xezr la xu nigá naque' bènnea' dxéajle'e naca Jesús Zrí'ine Dios.

Da dxenná Dios ca naca chee Zrí'ine'

⁶ Guca bea Jesús naque' Cristo gate gudxúe' nisa, ne gate gulalaj dxen chee'. Quegá gudxúaze' nisa san cá'aqueze gulalaj dxen chee'. Be' chee Dios gudxixruj lie' da nigá, na' Le' dxuchálaje' da li. ⁷ Chunne' dxelixruj lie' chee da nigá xabáa, Xradxu Dios, ne Zrí'ine', ne Be' Lá'azxa, na' chunne' caní zaj naque' tuze. ⁸ Cá'aqueze chunna da dxelixruj li na chee da nigá lu xezr la xu nigá, Be' Lá'azxa, ne da guca gate gudxúa Jesús nisa, ne da guca gate gulalaj dxen chee', na' da chunna caní, túzqueze da dxelixruj li na. ⁹ Dxéajlédxu da dxelixruj li bènneache, san da nadxixruj li Dios zácaxa na, na' Le' nadxixruj lie' naca Jesús Zrí'inequeze'. ¹⁰ Bénnea' dxéajle'e naca Jesús Zrí'ine Dios ba guzi'e xichaj lázrdawe' da ba gudxixruj li Dios, san bènnea' quebe dxéajle'e chee Dios dxucá'ane' Dios ca tu benne' wen lazre', lawe' da quebe guxéajle'e

chee da ba gudxixruj li Dios ca naca chee Zrí'ine'. ¹¹ Da nigá naca na da nadxixruj li Dios, dxenné' ba benne' dxi'u xel-la' nabán zeajlí canna, na' xel-la' nabán nigá za na lu na' Zrí'ine', Jesucristo. ¹² Bénnea' zua Zrí'ine Dios na' lu xichaj lázrdawe' zúale xel-la nabán nigá le', san bénnea' quebe zua Zrí'ine' lu xichaj lázrdawe' quebe zúale xel-la' nabán nigá le'.

Ca gaca nezdXu nápadXu xel-la' nabán zeajlí canna

¹³ Da nigá dxuzúaja' chee dxéajle chee Zrí'ine Dios chee nézele zúale xel-la' nabán zeajlí canna le'e.

¹⁴ Dxuxrén lázredxu Dios lawe' da nezdXu che bi nábadXu lau Le' ca naca da dxaca lazre' Le', Léqueze' wenne' cheedXu. ¹⁵ Lawe' da nezdXu Dios dxenne' cheedXu, cá'aqueze ba nezdXu gunna Le' da ba gunábadXu lau Le'.

¹⁶ Che tu benne' dxelé'eng' dxun bíchedXu dul-la da quebe nua na xel-la' gute, dxal-la' nabé' lau Dios ne chee bíchedXu na', na' Dios gunézruje' xel-la' nabán chee', che naca na tu dul-la da quebe nua na xel-la' gute. De dul-la da nua na xel-la' gute, na' quebe dxennía' ná bale lau Dios ne chee bénnea' dxuné' dul-la nigá. ¹⁷ Xúguté da caléla naca na dul-la, na' de dul-la da quebe nua na xel-la' gute.

¹⁸ NezdXu nu benne' naca bi chee Dios québedxa dxúnqueze' dul-la lawe' da dxuwía dxuxúe Zrí'ine Dios le', na' da xriwe' quebe bi dxezeque guné na le'.

¹⁹ NezdXu nácadXu bi chee Dios, na' xúguté benne' zaj naca chee xezr la xu nigá zaj xu'e lu na' da xriwe'.

²⁰ NezdXu ba bla' Zrí'ine Dios, ne ba bzéajni'ing' dxi'u chee gúnbeadxu Dios li. NácadXu tuze nen Bénnea' naque' li lazre', Jesucristo, Zrí'ine Dios. Benne' nigá naque' Dios li, ne Léqueze' naque' xel-la' nabán zeajlí canna da zúale na dxi'u. ²¹ Le'e, zrí'ina'dau', le guxúe xanne' cuínale chee quebe gucá'ana szrenle bedau' xiaj xaga ca'.

DIZRA'DAU' GUDXUPE' DA BZUAJ SAN JUAN

Da naca li, ne xel-la' zri'i lazre'

¹ Neda', benne' gula wen zrin chee Cristo, dxuzúaja' da nigá chiu' lue', nu'ula zana', ba gucá'a Dios lue'. Dxuzúaja' chee zri'inu' ca'. Da li nazrí'ida' le'e, ne quegá tuze neda', san cá'anqueze benne' ca' zaj núnbe'e da li zaj nazrí'iquezne' le'e. ² Nazrí'ida' le'e lawe' da ba núnbeadxu da li, da súatequeze na xichaj lázrdaudxu. ³ Dxenaba' lau Xradxu Dios, ne lau Xránadxu Jesucristo, Zri'ine Dios, xezá' lazre' chee da xrlátaje, ne xache lazre' le'e, ne gunne' le'e xel-la' dxebeza zri lazre', chee gúnbeale da li, ne chee gácale zri'i lazre'.

⁴ Dxebéle'eda' lawe' da ba benda' zri'inu' ca' dxelunbe' ca naca da li, ca naca da bdxixruj be'e Xradxu Dios. ⁵ Na'a, nu'ula zána'dau', dxata' xúeda' lue' zri'idxu tudxu xetudxu. Da nigá dxuzúaja' chiu' quebe naca na tu da cube da nadxixruj bea Dios, san naca na da ba bendxu nédxudaute. ⁶ Xel-la' zri'i lazre' li naca bea na che dxundxu ca da nadxixruj bea Dios, na' da nadxixruj be'e naca na da ba bénele nédxudaute, chee zri'idxu tudxu xetudxu.

Benne' dxelezi xe'e

⁷ Ba belelá' benne' zante, benne' dxelezi xe'e. Benne' caní quebe dxelexechebe' guca Jesús bela' dxen. Benne' caní zaj naque' benne' dxelezi xe'e, ne dxeledábague' Cristo. ⁸ Le guxúe xanne' cuínale chee quebe gunítele da dxal-la silé du naxá'.

⁹ Nu benne' dxedé' nagá xula chee da nigá quebe dxezilene' ca naca da bsede Cristo, ne quebe zúale Dios le'. Bénnea' dxezilene' ca naca da bsede Cristo, da li Dios zúalene' Le', na' cá'anquez zúale Cristo Le'. ¹⁰ Che nu benne' xide' naga zúale le'e, ne quebe dxusédené' le'e ca naca da bsede Cristo, quebe nnele bénnea' lízrele, ne quebe gápale le' ba lá'ana. ¹¹ Nu benne' gape' bénnea' ba lá'ana, dxun benne' nigá tuze ca da calēla da dxun bénnea'.

Dizra' bzebe

¹² Da zante dxal-la' xapa' le'e, san quebe dxaca lazra' guzúaja' na lu xícheze. Dxebeza lazra' xida' xedajná'a le'e, na' guchálajlequeza' le'e, chee gaca béle'edxu.

¹³ Bidu' ca' chee bi bilu', nu'ula ba gucá'a Dios le', dxulugápabe' lue' diuzre. Ca'an gaca na.

DIZRA'DAU' GUXUNNE' DA BZUAJ SAN JUAN

San Juan dxenné' da chawe' chee benne' le' Gayo

¹ Neda', benne' gula wən zrin chee Cristo, dxuzúaja' da nigá chiu' lue', Gayo, bi nazrí'ite lazra'. Da líqueze nazrí'ida' lue'.

² Lue', bi nazrí'ite lazra', dxenaba' lau Dios gaca da chawe' chiu', ne su' chawe', ca dxaca chee bénne'du xu'u. ³ Gubéle'eda' gate belelá' tu chupa benne' bíchedxu, ne gulé'e neda' ca dxéajle'u chee Xránadxu, ne ca dxunu' ca naca da li. ⁴ Québequeze bi de da gundxa na neda' súale'a xel-la' dxebé, ca xel-la' dxebé da zua' gate dxenda' dxelún benne' zaj naque' ca zrí'inequeza' ca naca da li.

⁵ Lue', bi nazrí'ite lazra', nacu' benne' li lazre' ca naca da dxunu' dxácalenu' bi bíchedxu ca', ne da naca blaudxa dxácalenu' bi bíchedxu za'aque' xezre xula. ⁶ Lau benne' zaj nazrague' chee Dios nigá dxuluchalaj bi bíchedxu caní ca nazrí'inu' bi bíchedxu ca'. Da cháwedau' dxunu' gate dxugú'u benne' caní neza, dxácalenu' le' ca naca da dzezaca ba lazre' Dios. ⁷ Benne' caní zjaque' dxeluné' zrin nigá lawe' da zaj nazrí'ine' Cristo, ne quebe bi dxelezi'e da xelunna benne' quebe zaj núnbe'e Dios. ⁸ Chee le' na' dxal-la' gápadxu ba lá'ana benne' caní chee gúnledxu le' zrin chee da li.

Da calela da dxun benne' le' Diótrefes

⁹ Ba bzuaja' chee benne' zaj nazrague' chee Dios naga zu', na' bénnea' le' Diótrefes quebe dxape' netu' ba lá'ana lawe' da dxaca lazre' gaque' blau lávela benne' ca'. ¹⁰ Chee le' na', che xida' naga zu', guzéajni'ida' benne' ca' ca naca da dxun bénnea', dxezí tizre' netu', ne dxennéle'e cheentu'. Quegá da nigáze dxuné', san cá'anqueze quebe dxezí' lu ne'e benne' bíchedxu zá'aque' ga na', ne quebe dxu'e lataj benne' ca' dxelaca lazre' xelezí' lu ne'e benne' caní, ne dxexebéajle' le' ládujla benne' ca' zaj nazrague' chee Dios.

¹¹ Lue', bi nazrí'ite lazra', quebe gunu' lue' ca naca da calela da dxelún benne' caní. Ben ca naca da xrlátaje. Bénnea' dxuné' da xrlátaje naque' chee Dios, san nu benne' dxuné' da calela, quebe ne gúnbeaqueze' Dios.

Da xrlátaje da dxun benne' le' Demetrio

¹² Xúgute' benne' dxelenné' da chawe' ca naca da dxun Demetrio, na' da líqueze naca bea na ca dxuné'. Cá'anqueze netu' dxixruj beantu' ca naca da dxuné', na' lue' nézqueznu' dxuchálajntu' da li.

Dizra' bzebe

¹³ Déle'e da dxal-la' guchálajlena' lue', san quebe dxaca lazra' guzúaja' na lu xícheze, ¹⁴ lawe' da dxebeza lazra' lé'etequezda' lue'. Nadxa guchálajdxu caníqueze.

¹⁵ Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu tu benne' bíchedxu zaj zre'e naga zu'. Ca'an gaca na.

XTIZRA DIOS DA BZUAJ SAN JUDAS

Dizra' da gusel-la San Judas chee bi ca' chee Dios

¹ Neda', Judas, wən zrin chee Jesucristo, naca' benne' biche Jacobo, na' dxesel-la' dizra' nigá chee le'e, nácale benne' ca' ba gunné Xradxu Dios, ne ba guqu'é'e le'e chee gácale bi chee', ne dxuxúe' le'e lawe' da nácale tuze nen Jesucristo. ² Dxenaba' lau Dios xache lázrele'e le'e, ne gúnnale'e chee le-xel-la' dxebeza zri lazre', ne xel-la' zri'i lazre'.

Ca naca chee benne' ca' dxulusédene' da wən lazre' (2 Pedro 2.1-17)

³ Benne' bícha'dau' nazri'ite' lazra', ba guca lázreli'a guchálajleña' le'e ca naca chee xel-la' weselá da ba nazile le'e, ne cá'anqueze neda', san na'a dxun na ba xen guchálajleña' le'e, ne gata' xueda' le'e gapa típale da naca chee xel-la' dxejilí lazre' da ba benna Dios chalásaze chee bi chee' ca'. ⁴ Caní naca lawe' da ba gulú'u benne' wən lazre' ca' ládujla dxi'u, benne' ca' ba gunná Dios gate nate dxal-la' xelebía xi'e. Zaj naque' benne' dxelune' da sban, na' lawe' da dxunité lau Dios chee benne' dul-la, dxeléquene' zaj nápaqueze' lataj xelune' cáteze da dxelaca lazre', ne dxuluzúe' chalá'ala Dios tu licha', Bénnea' dxenná bea, ne Xránadxu Jesucristo.

⁵ Lácala ba nézquezle le'e da nigá, dxaca lazra' gúsá'a lázrele ca ben Xradxu Dios gate bebéaje' benne' Israel ca' ládujla benne' Egipto, na' gudé na' bzria xi'e benne' Israel ca', benne' quebe guléajle'e chee'. ⁶ Cá'anqueze gubáz chee xabáa, gubáz ca' chee Dios, quebe belune' ca da guzre Dios le', san bulucá'ane' lataj chee'. Dios nuzague' le' lu da chul-la, ne nuchéaje' gubáz ca' chalásaze nen du xia, chee guzrí'a xi'e le' lu zra bzebe ni'. ⁷ Cá'anqueze guca chee xezre Sodoma, ne xezre Gomorra ne chee xezre walízredu ca'. Ca belún gubáz chee xabáa ca', cá'anqueze belún bénneache chee xezre caní. Buluzúa cuine' lu da sban, ne belune' cáteze da gulaca lazre', ne buluzúe' chalá'ala ca da bdxixruj bea Dios chee xel-la' zúale nu'ula. Na'a, lawe' da bzria xi' Dios benne' ca', bde'e le' tu lu xi' da québedxa xexula na, na' da na' guca chee benne' caní dxuzéajni'i na dxi'u chee quebe gúnquezdxa ca'.

⁸ Láqueze gulaca caní chee benne' ca', cá'anqueze dxelún benne' caní, zjácalene' xel-la' bchigala, ne dxuluca'ane' sban béla' dxen chee', ne dxuluzúe' chalá'ala xel-la' dxenná bea chee Xránadxu, ne dxelenné' schanni' chee gubáz chee xabáa, gubáz ca' chee Dios. ⁹ Léqueze Miguel, gubáz blau chee xabáa chee Dios gate gudíl-lalene' da xriwe', ne btil-le' dizra' nen le' na chee guca bexu'e bel-la' dxen chee Moisés, quebe hexárzjene' nnabe' da ba xa', san guzre' na: "Xránadxu Dios tíl-laqueze' lue'." ¹⁰ Na'a benne' caní dxelenné' schanni' chee da quebe zaj núnbe'e, na' da ba zaj núnbeaqueze', ca da zaj neze be xixre', be quebe zaj naxéajni'iba', da caní dxuluchínene' chee xuluzrí'a xi' cuine'.

¹¹ Edxugua benne' caní lawe' da dxelune' ca da ben Caím, chee gulez' lu ne'e dumi, buluzúe' chalá'ala da dxenná Dios ca ben Balaam, na' welexenite' ca guca chee Coré, bénnea' bzria xi' Dios lawe' da gudábague' xrtizra Dios. ¹² Benne' caní, gate dxelágulene' le'e lu laní chee dxelune' cheajlechaze bénneache. Dxelé'aj dxelawe' nen le'e, ne quebe dxelape' ba lá'ana Dios. Dxelún cuine' ca benne' dxuluxúe' zrila', san dxuluxúeze cuine'. Zaj naque'

ca beuj ca' quebe zaj xuzru nisa, beuj ca' da dxua be'. Zaj naque' ca xaga ca' quebe dxelebía na da zixre chee na, ne zaj nabizre na du lue na, ne ba zaj zua na chee lepe na. ¹³ Zaj naque' ca xeajxruza chee nísadau' da dxedxú'u na bzrina' sgute, da dxulé'e na ca da sban da dxelune'. Zaj naque' ca belaj ca' dxelecuasa na lu nrneze na, ne zaj nabía xi na chee cheajsúa na chadía chacanna lu da chul-la.

¹⁴ Cá'anqueze Enoc, benne' chee gazre cue' zre sua Adán gunné' waláz chee Dios ca naca chee benne' caní, gunné': "Ble'eda' Xránadxu ze'e nen gaxúane gaxúane bi chee ca' ¹⁵ chee guchi'e ca da zaj nun xúgute bénneache. Gulezría xi' xúgute benne' wen da sban ne chee da caləla da belune' lu xel-la' caləla chee', nen benne' dul-la ca' ne chee xúgute dizra' schanni' da gulenné chee Dios." ¹⁶ Zaj naque' benne' wagu zria, ne benne' wezí tizra', benne' dxelunze' cátəze dxelezaca ba lazre'. Dxuluchálaje' dizra' da dxucá'ana szren na le', ne dxelennáze' da chawe' chee bénneache chee xezezí'e da zaj de chee benne' ca'.

San Judas dxenné xuené' bi ca' chee Xránadxu

¹⁷ Le'e, benne' bícha'dau' nazri'itə lazra', le gusá lázrele ca zánete iza gulenná benne' gubáz chee Xránadxu Jesucristo, ¹⁸ gulé'e le'e: Lu zra bzebe welezrá' benne' xelún le' chee da ca' zaj naca lá'azxa, ne xelune' cátəze zaj naca da sban da dxelezá lazre'. ¹⁹ Benne' caní dxelune' chupa la'a bénneache. Zaj naque' benne' chee xezr la xu nigá, ne quebe zúale Be' Lá'azxa chee Dios le'.

²⁰ Le'e, benne' nazri'itə lazra', le se chacha ca naca lu xel-la' dxeajlí lazre' lá'azxa da nápa. Le guchálajle Dios, zúale xel-la' waca chee Be' Lá'azxa le'e.

²¹ Le cha' lu xel-la' zri'i lazre' chee Dios, ne le cueza zra gate gunna Xránadxu Jesucristo dxi'u xel-la' nabán da zeajlí canna lu xel-la' zri'i lazre' chee'.

²² Le gácale benne' ca' dxelaca chupa lazre' ca naca chee Cristo. ²³ Le gun xeledá benne' xula chee quebe chjaque' lu xi' chee lataj ba xa', ne le xexache lazre' xezícala bénneache. Le guxúe xanne' ca naca da sban da dxelún benne' ca' chee quebe ca'a le na le'e.

San Judas dxue lá'ané' Dios

²⁴⁻²⁵ Dios tu licha', Benne' naque' sina, ne naque' Weselá cheedxu, wazéquene' guxúe' le'e chee quebe cuásale Le', ne chee guzúe' le'e lau Le' lu xel-la' szren chee', ne chee quebe dxenle da naca chee dul-la, ne chee súalequeze xel-la' dxebé le'e.

¡Gaca ba Le', ne gaca chee' xel-la' szren, ne xel-la' waca, ne xel-la' dxenná bea, ne chee Xránadxu Jesucristo, na'a zra, ne chadía chacanna! ¡Ca'an gaca na!

DIZRA' DA BLE'E JESUCRISTO JUAN

Da ble'e Jesucristo Juan

¹ Da nigá naca tu da bnezruj Dios Jesucristo da gulé'ene' wen zrin chee' ca' ca naca da dxal-la' gácatę. Jesucristo gusel-le' gubáz chee' xabáa chee', na' le' bzéajni'ine' neda', Juan, naca' wen zrin chee' Jesús. ² Neda' dxulé'eda' le'e da li ca naca xúgutę da ble'eda', ne dxexecheba' ca naca dizra' chee' Dios, ne ca naca da gunná Jesucristo.

³ Ba neza zrente naca na chee' benne' gulabe', ne cá'anqueze ba neza zrente naca na chee' benne' ca' dxuluzé' nague' chee' bénnea' gulabe' dizra' nigá da benna Dios, ne xelunę' ca naca da naxúaj nigá, lawe' da ba za gáguze zra gaca na.

Juan dxuzuaję' chee' gazre cue' benne' dxelėjle'e chee' Jesús

⁴ Neda', Juan, dxuzúaja' chee' gazre cue' benne' dxelėjle'e chee' Jesús, zaj zre'e naga nababa Asia. Dxenaba' lau Dios gaca chawe' chee, ne gunne' le'e xel-la' dxebeza zri lazre'. Le' guzúaqueze' nédxudaute, ne zúaqueze' na'a, ne tu súazqueze' chadía chacanna. Gazre Be' ca' zaj zra' ca li naga dxe' Dios zaj naca Le' tuze, ⁵ ne cá'anqueze Jesucristo naque' Le' tuze ca naca da chawe' da dxun Dios chee. Jesucristo naque' benne' li lazre' dxexechebe' ca da zaj naca chee' Dios, ne naque' benne' nedxu bebane' chálásaze ládujla benne' gate ca', ne nape' xel-la' dxenná bea lówela xúgutę wenna' bea zaj zre'e xęzr la xu nigá. Cristo nazri'ine' dxi'u, ne ba gudibe' xichaj lázrdaudxu. Begüe' dul-la cheedxu gate blálaję' dxen chee'queze' le'e xaga begúaj. ⁶ Beņę' dxi'u ca benne' wenna' bea ca', ne bxruze ca' chee' gundxu zrin chee' Dios chee', Bénnea' naque' Xre'. ¡Gaca ba Le', ne gape' xel-la' dxenná bea chadía chacanna! ¡Ca'an gaca na!

⁷ Le na' xque. Cristo ze'e lu beuj bza. Xúgutę bénneache xeledé'eng' Le', ne cá'anqueze benne' ca' belunę' Le' we', na' ca naca bénneache zaj zra' lu xęzr la xu xebeze xache'e ca xeledé'eng' Le'. ¡Awe', ca'an gaca na!

⁸ Le' dxenné': "Neda' zúaqueza' nédxudaute, ne zúaqueza' bzébedxa. Dxuna' su lau sua xúgutę ne guna' xexuzre na." Caní dxenná Xránadxu, nape' dute xel-la' dxenná bea, naque' Bénnea' guzúaqueze', ne zúaqueze', ne tu súazqueze'.

Juan dxelé'eng' tu da ble'e Dios le' da naca na da xabáa chee' Cristo

⁹ Neda', Juan, naca' benne' bíchele le'e, ne naca' tuze nen le'e lu xel-la' zi', ne lu xel-la' dxenná bea, ne lu xel-la' dxuchaga lau da dxunna Jesucristo dxi'u. Ca tu benne' xu'e lizre xia guzúa' lu xęzr la xu Patmos da naxechaj nísadau', lawe' da bchálaja' dizra' chee' Dios ne dxuna' ba nalí ca naca chee' Jesucristo.

¹⁰ Guzúale' Be' Lá'azxa neda' lu zra chee' Xránadxu, na' benda' cęzrula' chi'i tu benne' dxenné' zizraj ca chi'i luzu da dxulucuzre'. ¹¹ Gunné':

—Neda' naca' nedxu, ne bzebe ca naca da dxezú lau, ne da dxexuzre na. Bzuaj tu lu xiche da dxelé'enu', na' gusel-la na chee' gazre cue' bénneache dxelėjle'e chia', zaj zre'e naga nababa Asia, benne' ca' zaj zre'e xęzre Efeso, ne xęzre Esmirna, ne xęzre Pérgamo, ne xęzre Tiatira, ne xęzre Sardis, ne xęzre Filadelfia, ne xęzre Laodicea.

¹² Bexéchaja' chee' le'eda' nu chi'i na' gunné' neda', na' ca bexéchaja' na', ble'eda' gazre da zua na xi' da' zaj naca na oro. ¹³ Laduj da zaj zua na xi' ca' ble'eda' tu benne' naque' ca Bénnea' gulje' bénneache, nácue' zra lanę' da

dxezrinte lu ni'e dxe'ela, na' xu'u tu bazxu oro lachu'e. ¹⁴ Xicha xíchaje' zaj naca na chiche ca zrila' chiche, u ca bezxe', na' xiaj lawe' dxelácatite legala na ca xi'. ¹⁵ Ni'e dxelácatite na ca xia da gudetę bea guxu'u na lu xi', na' chi'e naca na zizraj ca naca chi'i zane' xegu zri'a ca'. ¹⁶ Lu ne'e da zua xabela nuxre' da ca' zaj naca ca gazre belaj xabáa, na' dxu'e dxedxuaj da naca na ca tu xia da nalá dxupa la'ate. Dxu'a lawe' dxácatite na ca gubizra gate dxennále'e na.

¹⁷ Ca ble'eda' Le', xeajchazia' zran ni'e ca tu benne' gate. Na' Le' guxrúa ne'e xabela neda', na' gunné':

—Quebe zrebu'. Neda' zúaqueza' nédxudate, ne zúaqueza' bzébedxa. ¹⁸ Naca bánqueza'. Gutia', na' na'a nabánqueza' chadía chacanna. Neda' nuxra' zren xia cheę xel-la' gute, ne cheę lataj ba xa'. ¹⁹ Bzuaj da ba blé'enu' ne da dxaca na'a, ne da gaca te nigá. ²⁰ Caní naca da zéaje ca gazre belaj ca' blé'enu' nuxra' na'a xabela, ne ca naca cheę gazre da zua na xi' da' zaj naca na oro. Gazre da zaj naca ca belaj ca' zéaje na gubáz ca' nasel-la' cheę gazre cue' bėnneache chia' ca', na' gazre da zua na xi' zéaje na gazre cue' bėnneache chia' ca'.

2

Dizra' gusel-la Cristo cheę gazre cue' bėnneache cheę'

Dizra' gusel-le' cheę bi cheę' zaj zre'e xezre Efeso

¹ Guzre Jesús neda':

—Bzuaj cheę gubáz chia' zúalęe' bi chia' zaj zre'e xezre Efeso. Bzuaj da nigá: Caní dxenná Jesús, Bėnnea' nuxre' gazre belaj ne'e xabela, ne dxedé' laduj gazre da zua na xi' da zaj naca na oro. ² Neda' nezda' xúgutę da dxunle. Nezda' dxúnle'e zrin ne nácale zren lazre', ne quebe dxuele lataj benne' wen da zrinnaj ca'. Neda' nezda' ba bxue xánnele benne' ca' dxelenné' zaj naque' gubáz chia' ne quebe zaj naque', na' ba ble'ele zaj naque' benne' wen lazre'. ³ Gúcale zren lazre', ne gudele xel-la' zi', na' bėnle'e zrin chia', ne quebe gute ni'a na'le. ⁴ Na'a zua tu da dxagu na zria cheęle, quėbedxa nazri'ile neda' ca bzri'ile neda' nédxute. ⁵ Cheę le' na', le gusá lazre' ca bzri'ile neda' nédxute, ne le xexíaje lazre', na' le gun ca da bėnle nédxute. Che quebe gunle caní xídaqueza' naga zúale, na' xecá'a xrlátajle lu da naca chia' cheę quėbedxa gácale ca da zua na xi' chia'. Caní guna' che quebe xexíaje lázrele. ⁶ Zua tu da dxexecá'a na le'e, dxecuıdele da dxelún benne' ca' zaj nazí le' nicolaıta ca', benne' ca' dxulucá'ana szrene' bedau' xiaj xaga ca', da na' dxecuıdequeza' neda'. ⁷ Benne' zua naque' dxal-la' xenne' da nigá dxe Be' Lá'azxa bi chia' ca'. Benne' ca' xeledxúaje' xrlátaje lawe' da zrinnaj, neda' gunéruzja' da xelawe' da dxebía xaga da dxunna na xel-la' nabán, ne zua na lu lataj xrlátaje cheę Dios.

Dizra' gusel-le' cheę bi cheę' zaj zre'e xezre Esmirna

⁸ Guzre Jesús neda':

—Bzuaj cheę gubáz chia' zúalęe' bi chia' zaj zre'e xezre Esmirna. Bzuaj da nigá: Caní dxenná Jesús, Bėnnea' zúaqueze' nédxudate, ne zúaqueze' bzébedxa, Bėnnea' gutie', ne bebánqueze'. ⁹ Neda' nezda' xúgutę da dxunu'. Nezda' gudele xel-la' zi', ne nácale benne' xache'. Da li nácale benne' gunní'a. Nezda' ca dxelenné schanni' cheęle benne' ca' dxelenné' zaj naque' judío, san zaj naque' tu cue' benne' dxulucá'ana szrene' da xriwe'. ¹⁰ Quebe zrébele ca naca xel-la' zi' da tele, lawe' da guzrá' da xriwe' bál-lale le'e lizre xia cheę gulé'e lau

da nácale, na' tele xel-la' zi' lawe' chi zra. Le gaca li lazre' lácala xelutíe' le'e, na' neda' gunna' le'e xel-la' nabán ca tu da dxunna bea na bedxuajle chawe'.
 11 Benne' zua nague' dxal-la' xenne' da nigá dxé Be' Lá'azxa bi chia' ca'. Benne' ca' xeledxúaje' chawe' lawe' da zrinnaj, quebe bi gune da zi' da xa' da zeajli canna chee benne' ca'.

Dizra' gusel-le' chee bi chee' zaj zre'e xezre Pérgamo

12 Guzre Jesús neda':

—Bzuaj chee gubáz chia' zúalene' bi chia' zaj zre'e xezre Pérgamo. Bzuaj da nigá: Caní dxenná Jesús, Bénnea' nuxre' xia da nalá dxupa la'a. 13 Neda' nezda' xúgutę da dxunle. Nezda' zúale naga dxenná bea da xriwe'. Quebe nusanle da naca chia'. Quebe bsanle dxexechébele chia', ne lu zra ca' gate belutíe' Antipas, benne' bechebe' du lazre' da naca chia' ládujla le'e, naga zua da xriwe'. 14 Na'a, zua tu da dxagu na zria cheele, dxuele lataj zaj zra' ládujla le'e benne' ca' ne zjácálene' da bsede Balaam, bénnea' gulú'u xel-le' Balac, bennen' bene' belún benne' Israel ca' dul-la, na' gulawe' da buluzríe' lau bedau' xiaj xaga ca', ne belune' da sban. 15 Cá'anqueze zaj zra' ládujla le'e bal-la benne' ne zjácálene' da dxulusede benne' zaj nazí le' nicolaíta, da na' dxecuídequeza' neda'. 16 Chee le' na' le xexíaje lázrele lawe' da che quebe xexíaje lázrele xida' naga zúale, na' tíl-lalęna' benne' ca' nen xia nalá da dxedxuaj na dxu'a. 17 Benne' zua nague' dxal-la' xenne' da nigá dxé Be' Lá'azxa bi chia' ca'. Benne' xedxuaje' chawe' lawe' da zrinnaj, neda' gunézruja' da gawe' da naca na xeta maná da nagache na xabáa, ne gunézruja' le' tu xiaj chiche, na' le'e xiaj na' naxúaj tu la cube chee bénnea', da quebe nu neze, san tuze bénnea' si'e na.

Dizra' gusel-le' chee bi chee' zaj zre'e xezre Tiatira

18 Guzre Jesús neda':

—Bzuaj chee gubáz chia' zúalene' bi chia' zaj zre'e xezre Tiatira. Bzuaj da nigá: Caní dxenná Jesús, Bénnea' zaj zra xiaj lawe' da dxelácatite na ca xi', na' ni'e zaj naca na ca xia gache da nabá'ale'e na. 19 Neda' nezda' xúgutę da dxunle. Nezda' ca nazri'ile neda', ne ca dxéajlele chia', ne ca dxunle zrin chia', ne ca nácale zren lazre', na' dxúndxale na'a da zrendxa ca da benle nédxute. 20 Na'a, zua tu da dxagu na zria cheele, dxuele lataj nu'ula ná' le' Jezabel, nu'ula na' dxenné' dxuchálaje' waláz chee Dios, na' dxezi xę'e benne' wen zrin chia' ca' ca naca da dxusédene' chee xelune' da sban, ne xelawe' da dxuluzríe' lau bedau' xiaj xaga ca'. 21 Neda' ba be'a nu'ula na' lataj xexíaje lazre', na' quebe guca lazre'. Quebe dxusanę' ca naca da sban da dxunę'. 22 Na'a, che benne' ca' quebe xulusanę' ca da dxelune' ca dxun nu'ula na', neda' cu'a le' xel-la' we' da quixruj na le', na' wexedéle'e xel-la' zi' benne' ca' dxelune' dul-la nen nu'ula na', 23 na' gútequeza' benne' ca' zaj de'e nu'ula na'. Caní gaca, xúgutę cue' bi chia' ca' xeleque be'ene' neda' nezda' ca naca dute da zua lu xichaj lázrdau bénneache, na' tu tule le'e gunna' le'e cáteze naca da benle. 24 Xezícadxale le'e zrale xezre Tiatira, quebe zéajlele da na' dxusede nu'ula na', ne quebe ne sile da dxenné' naca na da nagache chee da xriwe', neda' dxapa' le'e, quebe bi xetú da gucha' le'e gunle. 25 Le gapa chi'i xel-la' dxixruj be'e da ba gucha' le'e gunle ca zrindxa zra xelá'a neda'. 26 Benne' ca' xeledxúaje' chawe' lawe' da zrinnaj, ne xelune' ca dxaca lazra' neda' ca zrindxa zra bzebe ni', neda' gunézruja' chee benne' ca' xel-la' dxenná bea lawe' xezre ca', 27 ca ben Xra', benne' neda' xel-la' dxenná bea, na' xelenná

be'ene' benne' xezre ca' nen tu var xia, na' xuluzría xi'e xezre ca' ca dxun tu benne' dxelé'e tu xesu' xu. ²⁸ Cá'anqueze gu'a benne' ca' lataj xezezúaleñe' neda', naca' ca belaj zila. ²⁹ Benne' zua nague' dxal-la' xenne' da nigá dxę Be' Lá'azxa bi chia' ca'.

3

Dizra' gusel-le' chee' bi chee' ca' zaj zře'e xezre Sardis

¹ Guzre Jesús neda':

—Bzuaj chee' gubáz chia' zúaleñe' bi chia' zaj zře'e xezre Sardis. Bzuaj da nigá: Caní dxenná Jesús, Bénnea' zaj zúale gazre Be' chee' Dios Le', ne nuxre' da gazre ca' zaj naca ca belaj ca'. Neda' nezda' xúgute da dxunle. Nezda' ba nácale ca benne' gate ca' lau Dios lácala dxeleque benneache naca banle. ² Le guxúe, ne le sua chacha chee' québedxa gácale ca benne' ca' ba zúate xelátie'. Dxele'eda' da dxunle, quebe naca na li lazre' lau Dios chia'. ³ Le gusá lazre' ca naca da ba nazédele. Le chéajle na, ne le xexíaje lazre'. Che quebe guxúe cuínale wida' naga zúale ca za tu gubán, ne quebe nézele bi zra xida'. ⁴ Zaj zra' ládujla le'e bábaze benne' quebe ne xelune' da sban, na' benne' caní xeledálene' neda', ne xelácie' zra lanę' chiche lawe' da caní dxal-la' gaca chee'. ⁵ Benne' ca' xeledxúaje' chawe' lawe' da zrinnaj xelácie' zra lanę' chiche ne quebe xusula' la benne' ca' lu xiche naga zaj naxúaj la benne' ca' zúale xel-la' nabán le', na' xechęba' chee' benne' ca' lau Xra' ne lau gubáz chee' xabáa chee' ca'. ⁶ Benne' zua nague' dxal-la' xenne' da nigá dxę Be' Lá'azxa bi chia' ca'.

Dizra' gusel-le' chee' bi chee' zaj zře'e xezre Filadelfia

⁷ Guzre Jesús neda':

—Bzuaj chee' gubáz chia' zúaleñe' bi chia' zaj zře'e xezre Filadelfia. Bzuaj da nigá: Caní dxenná Jesús, Bénnea' naque' lá'azxa ne li lazre', Bénnea' nuxre' zren xia da dxunna bea na napę' xel-la' dxenná bea ca da gudapa wenna' bea David, na' gate salje', netú quebe nu gaca xusezxuj, na' gate xusézxuję' netú quebe nu gaca salaj. ⁸ Neda' nezda' xúgute da dxunle. Nuzúa' laule le'e tu dxa xu'u da naxalaj, da quebe nu gaca xusezxuj. Lácala quebe nadípatecale, zéajlele dizra' chia', ne quebe ne gusán lázrele da naca chia'. ⁹ Benne' ca' dxulucá'ana szrene' da xriwe', benne' wen lazre' ca', benne' dxelennę' zaj naque' judío ne quebe zaj naque', neda' guna' xuluzú zribe' zran ní'ale chee' xelenézene' neda' nazrí'ida' le'e. ¹⁰ Ba benle ca da gucha' le'e gunle chee' gácale zren lazre', na' chee' le na' guxúequeza' le'e lawe' xel-la' zi' da xeledé xúgute benneache zaj zře'e lu xęzr la xu, chee' gulé'e lau da zaj naque'. ¹¹ Wídaęqueza'. Le gapa chi'i da nápaie chee' quebe nu ca'a ca da dxal-la' si'le. ¹² Benne' ca' xeledxúaje' chawe' lawe' da zrinnaj, neda' gun chacha' benne' ca', na' xelaque' ca ze'e xiaj ca' zaj zua na lize Xra', ne cabátaquezdxa xeledxúaje' na', na' lu lázrdawe' guzúaja' La Xra', ne la xezre chee' Dios chia' da naca na Jerusalén cube da za' xabáa, ne La' cube. ¹³ Benne' zua nague' dxal-la' xenne' da nigá dxę Be' Lá'azxa bi chia' ca'.

Dizra' gusel-le' chee' bi chee' zaj zře'e xezre Laodicea

¹⁴ Guzre Jesús neda':

—Bzuaj chee' gubáz chia' zúaleñe' bi chia' zaj zře'e xezre Laodicea. Bzuaj da nigá: Caní dxenná Jesús, Bénnea' naque' li lazre', Bénnea' dxexechębe' da li, Bénnea' naque' naga guzú lau xúgute da ben Dios. ¹⁵ Neda' nezda' xúgute

da dxunle. Nezda' quebe nácale zaga ca dxunle da naca chia', ne quebe nácale látēla. Dxaca lazra' la gácale zaga u la. ¹⁶ Nácale ca nisa bate, ne quebe nácale zaga, ne quebe nácale la, na' chu'una' le'e ca tu benne' dxexēbē' nisa bate. ¹⁷ Le'e dxennale nácale gunnī'a, ne dxaca chawe' cheeḡe ne quebe bi dxexázrjele, na' quebe dxéquebe'ele' dxaca ba xa' cheeḡe ne dxezaca zi'le, ne nácale xache', ne nácale la chul-la, ne nácale gala xide. ¹⁸ Chee ḡe na' dxuzéajni'ida' le'e si'le lu na' neda' da naca ca oro da nabá'a na lu xi', chee gápale xel-la' gunnī'a li lazre', ne si'le zra lánale chiche chee gáculē, da gunna' le'e, na' xenite xel-la' stu' chee da gúcale gala xide, ne si'le da cu'ule xiaj laule chee xelé'ele. ¹⁹ Neda' dxusízreda', ne dxudéa' xel-la' zi' xúgute benne' ca' nazrí'ida'. Chee ḡe na' dxal-la' xexíaje lázrele ne gunle zrin chia' du lázrele. ²⁰ Le na' xque. Neda' zea' dxa xu'u dxennia'. Che nu benne' xenne' chi'a, ne salje' xu'u, na' chu'a gágulēna' le', na' le' gágulēne' neda'. ²¹ Benne' ca' xeledxúaje' chawe' lawe' da zrinnaj, neda' gunézruja' le' lataj xelebé'ḡe' neda' naga dxenná be'a, ca neda' bedxúaja' chawe', ne dxé'ḡena' Xra' naga dxenná bea Le'. ²² Benne' zua nague' dxal-la' xenne' da nigá dxē Be' Lá'azxa bi chia' ca'.

4

Dxulucá'ana szrenē' Dios lu xabáa

¹ Ca gudé na' gunná'a, na' ble'eda' tu dxa xu'u da naxalaj na xabáa, na' benda' chi'i Bénnea' benda' chee' nédxute da naca na ca chi'i luzu da dxulucuezre', na' guzre' neda':

—Guluén nigá, na' gulé'eda' lue' da ca' dxal-la' gaca ca te chee da nigá.

² Ca gunné' ca' guzúale Be' Lá'azxa neda', na' ble'eda' tu lataj blau xabáa, ne ble'eda' tu Benne' zaca dxē'ḡe lataj blau na'. ³ Bénnea' dxē'ḡe lu lataj blau na' nalé' ca tu xiaj jaspe da dxácatite na, u ca tu xiaj cornalina, na' dxu'a lataj blau na' naxechaj ca tu bchita' da dxácatite na ca tu xiaj esmeralda. ⁴ Dxu'a lataj blau na' zaj zua tape dxua lataj naga zaj dxē' tape dxua benne' gula ca', zaj nacue' zra lanē' chiche, ne zaj zria xíchaje' da zaj naca na oro. ⁵ Lu lataj blau na' dxeledxúaj xesa, ne dxaca nine, ne dxelenné' guziu', na' lau lataj blau na' zaj zua gazre xi' dxelala na, da zaj naca na gazre Be' chee Dios. ⁶ Le na' lau lataj blau na' de ca tu nísadau' da naca na ca xiaj esa' xaní'le'e.

Laduj na' dxu'a lataj blau na' zaj zra' xetapa da zaj naca ban, zaj zua xiaj lau cuzre', ne laule'. ⁷ Benne' nedxu nalé'ḡe ca tu beze xixre', na' benne' gudxupe' nalé'ḡe ca tu beze, na' benne' guxunne' naca lawe' ca lau bénneache, na' benne' gudape' nalé'ḡe ca tu bsia nachiluj xílaba'. ⁸ Dápatē benne' caní zaj zua xrupa xrilē' tu tuē', na' dxupa la'a le'ḡe xrila benne' caní zaj zria zane' xiaj lawe'. Te zra ne chizrela quebe dxulusane' dxelenné':

Lá'azxa, lá'azxa, lá'azxa naca

Xránadxu Dios nape' dutē xel-la' dxenná bea,

Bénnea' guzúaqueze', ne zúaqueze', ne tu súaqueze'.

⁹ Tu tu lasa gate dápatē benne' ban caní dxeḡé'ḡe ba Dios, ne dxulucá'ana szrenē' Le', ne dxelé'ḡe Le': Xcalenu', Bénnea' zúaqueze' chadía chacanna, ¹⁰ na' dape dxuate benne' gula ca' dxuluzú zribē' lau Le', ne dxulucá'ana szrenē' Bénnea' zúaqueze' chadía chacanna, ne dxuluzú' da ca' zaj zria xíchaje' ca' lau lataj blau na', dxelenné':

¹¹ Xránantu' Dios, Lue' naca chiu' si' lu na'u xel-la' szren, ne xel-la' ba lá'ana, ne xel-la' dxenná bea, lawe' da beḡu' Lue' xúgute da de,

na' ca dxaca lazru' Lue' zaj zua na, ne gulá gulebinna na.

5

Tu xiche nadube, ne Bénnea' naque' Zríla'dau'

¹ Lu na' xabela chee Dios, Bénnea' dxe'e lataj blau na', ble'eda' tu xiche nadube, da naxúaj dxupa la'ate' na, na' nazriche na gazre da dxelunna bea na. ² Ble'eda' tu gubáz chee xabáa nápalé'e xel-la' waca, na' gunné' zizraj:

—¿Nuzra naca chee' chíluje' xiche na', ne cheze' da ca' dxelunna bea na?

³ Queba nu chilá' xabáa, ne lu xezr la xu, ne zranla xezr la xu naca chee' chíluje' xiche na', ne quebe nu gaca nne'e na chee' lé'eng' ca naca na. ⁴ Neda' gudxézreli'a lawe' da quebe nu chilá' benne' naca chee' chíluje' xiche na', ne gulabé' na, ne quebe gaca nne'e na. ⁵ Nadxa tu benne' ládujla benne' gula ca' guzre' neda':

—Québedxa cuezru' lawe' da ba bzrué'e Jesús, Bénnea' nazi'i le' Bezre Xixre' chee xrtia Judá lawe' da nape' xel-la' dxenná bea zrente, ne naque' zri'ine zre sua David, na' Le' naca chee' chíluje' xiche na', ne cheze' da gazre ca' dxelunna bea na.

⁶ Nadxa ládujla naga zua lataj blau na', ládujla tapa benne' ban ca', ne ládujla tape dxua benne' gula ca', ble'eda' Jesús, Bénnea' naque' Zríla'dau' chee Dios. Ze'e na', lácala zrié' we' lawe' da belutié' Le'. Zria gazre lúzuba' ne gazre xiaj lauba', na' xiaj lauba' ca' zaj naca na gazre Be' chee Dios da ca' nasel-la Dios du ca naca xezr la xu. ⁷ Bénnea' naque' Zríla'dau' guxíaje' guqué'e xiche na' lu na' xabela Bénnea' dxe'e lataj blau na'. ⁸ Ca guqué'e xiche na', na' tapa benne' ban ca', ne tape dxua benne' gula ca' buluzú zribe' lau Bénnea' naque' Zríla'dau'. Tu tu benne' gula ca' zaj nuxre' tu da dxelúl-laléne' da can zríadi'i na du, nazí le na árpa, ne zaj nu'e xé'ena bzri da naca na oro zaj xu'u na xala zixre, da zéaje na xel-la' dxuláwizra Dios da dxelún bi ca' chee Dios. ⁹ Dxelul-le' tu da cube caní:

Lue' naca chiu' ca'u xiche na',
ne chezu' da ca' dxelunna bea na,
lawe' da belutié' Lue', na' nen dxen chiu'
bexa'u bénneache chee xelaque' chee Dios,
Zaj naque' benne' xúgute cue' bénneache,
ne dxelenné' xúgute dízra' walazre',
ne zaj naque' benne' xúgute xezre
ne xúgute cue' xezr la xu.

¹⁰ Benu' le' benne' wenná bea ca',
ne bxruze ca' lau Dios cheedxu,
na' xelenná be'e lu xezr la xu.

¹¹ Nadxa gunná'a, na' benda' chi'i zane' gubáz ca' chee xabáa zaj naxéchaje' lataj blau na', ne tapa benne' ban ca', ne tape dxua benne' gula ca'. Zaj zra' benne' zantau' gubáz ca', ¹² na' dxelenné' zizraj:

Bénnea' naque' Zríla'dau' belutié',
naca chee' si'e xel-la' dxenná bea, ne xel-la' gunní'a,
ne xel-la' sina, ne xel-la' waca,
ne xel-la' ba lá'ana, ne xel-la' szren,
ne xel-la' dxue lá'ana.

¹³ Cá'anqueze benda' dxelenná xúgute da ca' ben Dios, da ca' zaj zra' xabáa, ne da ca' zaj zra' xezr la xu, ne da ca' zaj zra' lu nísadau', ne xúgute da ca' zaj nita xúgute lataj ca', dxelenná na:

Xel-la' dxue lá'ana, ne xel-la' ba lá'ana,
 ne xel-la' szren, ne xel-la' dxenná bea
 zaj naca na cheę Bénnea' dxe'ę lataj blau na',
 ne cheę bénnea' naque' Zríla'dau',
 gaxúane gaxúane iza.

¹⁴ Dápatę benne' ban ca' gulenné':

— ¡Ca'an gaca na!

Na' dape dxuate benne' gula ca' buluzú zribe', ne bulucá'ana szreng'
 Bénnea' naca bane' gaxúane gaxúane iza.

6

Dxecheze' xrupa da gazre ca' da dxelunna bea na

¹ Nadxa ble'eda' gate Bénnea' naque' Zríla'dau' gucheze' da nedxu da gazre
 ca' dxelunna bea na. Na' benda' dxenná tu benne' tapa ca' zaj naca bane', na'
 chi'ę ben na ca guziu', dxenné':

— Gudá, le'enu'.

² Gunná'a, na' ble'eda' tu bzrina' chiche, na' benne' zrie'-ba' nuxre' tu da
 dxedxú'una na xágadau' nalá xéche'ze. Bulunézruje' le' tu da naquen oro da
 guzúe' xichaje', na' nen dutę xel-la' dxenná bea bdxuaje' cheę zrué'ene' lu
 wedil-la.

³ Gate Bénnea' naque' Zríla'dau' gucheze' da gudxupe' da dxunna bea na, na'
 benda' benne' gudxupe' cheę benne' tapa ca' zaj naca bane', dxenné':

— Gudá, le'enu'.

⁴ Na' bdxuaj xetú bzrina', nácaba' be xrna, na' bénnea' zrie'-ba' guzi'ę xel-la'
 dxenná bea cheę cue' xel-la' dxebeza zri lazre' lu xęzr la xu, ne cheę gunę'
 xelute bénneache ljwezre' ca', na' bulunézruje' le' tu xia tunna da nalá.

⁵ Gate Bénnea' naque' Zríla'dau' gucheze' da guxunne' da dxunna bea na,
 na' benda' benne' guxunne' cheę benne' tapa ca' zaj naca bane', gunné':

— Gudá, le'enu'.

Gunná'a, ne ble'eda' tu bzrina' gasaj, na' benne' zrie'-ba' nuxre' zrgú'unsá.

⁶ Benda' tu chi'i dxenné' na ládujla tapa benne' ban ca', gunná na:

— Chupa xia zrúa' xtila saca na lazruj cheę tu zra, ne xrupa xia zrúa' cebada
 saca na lazruj cheę tu zra, san quebe cu' za xel-la' wagu, ne quebe cu' xrise
 uva wal-la.

⁷ Gate Bénnea' naque' Zríla'dau' gucheze' da gudape' da dxunna bea na, na'
 benda' benne' gudape' cheę benne' ban ca', gunné':

— Gudá, le'enu'.

⁸ Gunná'a, ne ble'eda' tu bzrina' gache, na' benne' zrie'-ba' le' Xel-la' Gute,
 na' cuzru bénnea' za tu benne' ze'ę waláz cheę lataj chul-la ga nnita benne'
 gate ca'. Bénnea' le' Xel-la' Gute guzi'ę xel-la' dxenná bea cheę gutie' tu cue'
 cheę tapa cue' ca naca bénneache zaj zre'ę xęzr la xu. Gutie' benne' ca' lu
 wedil-lá, ne lu xel-la' dxedún, ne lu xízrawę' ca', ne lu na' be snia zaj zraba'
 lu xęzr la xu.

⁹ Gate Bénnea' naque' Zríla'dau' gucheze' da gázxue da dxunna bea na, na'
 ble'eda' zran cugu béne'du ca' gulú'u benne' ca' belute bénneache le' lawe' da
 buluchálaje' dizra' cheę Dios, ne belexechebe' ca naca cheę'. ¹⁰ Béne'du ca'
 gulú'u benne' ca' gulenné' zizraj:

— Xran lá'azxa, ne li lazre', zxeajátę chenu' cheę guchi'u cheęntu', ne xebéaj
 lazru' benne' ca' belutie' netu', benne' ca' zaj zre'ę lu xęzr la xu?

¹¹ Nadxa bénne'du ca' gulú'u benne' ca' gulezí'e zra lané' chiche, na' guzrē' le' xelebeze' xetú chí'idau', cadxa cha benne' biche' ca' dxelune' zrin chee Cristo, xelute bénneache le' ca belutiē' benne' ca'.

¹² Gate Bénnea' naque' Zríla'dau' gucheze' da xrupe da dxunna bea na, na' guná'a, na' guzrú'le' lu xēzr la xu. Gubizra bexaca na da chul-la ca ladxe' gasaj, na' beu' bexaca na xrna ca dxen, ¹³ na' belaj zaj zria xabáa belexruij na lu xēzr la xu, ca dxelexruij higo dxe'ene ca' gate dxácalē' be' dxunibe na xaga higo na'. ¹⁴ Xabáa benite na ca tu xiche da dxexedube, na' xúgute' xi'a ca', ne xēzr la xu ca' da zaj naxechaj nísadau' gulecuasa na naga zaj zua na. ¹⁵ Benne' wenná bea ca' zaj zre'e lu xēzr la xu bulucache cuine' lu bluaj ca' ne ládujla xiaj ca' zaj nita lu xi'a ca', na' tuze gulaca benne' blau ca' ne benne' gunní'a ca', ne benne' xíchajē' ca' chee benne' dxjaca wedil-la, ne benne' ca' dxelenná bea, ne benne' zaj nada'u, ne benne' zaj nadxúajē' lu na' xranē' ca', ¹⁶ na' benne' caní gulé'e xi'a ca', ne xiaj xre ca':

—Le quia cha netu', ne le gucache netu' lau Dios, Bénnea' dxe'e lataj blau, ne lu xel-la' zi' zren da gunna Bénnea' naque' Zríla'dau'.

¹⁷ Ba bzrin zra chee xel-la' zi' zren. ¿Núzraqueze sue le na?

7

Benne' Israel ca' gucá'a Dios

¹ Ca gudé chee da nigá, ble'eda' tapa gubáz chee xabáa zaj ze' dapa saca chee xēzr la xu, na' zaj nuzague' be' da zá'aca na dapa saca, chee quebe bi be' gaca lu xēzr la xu, ne lawe' nísadau', ne lawe' xaga ca'. ² Cá'anqueze ble'eda' xetú gubáz chee xabáa ze'e naga dxalaj gubizra, na' nuxrē' da gunna bea na nu benne' naque' che Dios ban. Gubáz nigá gunné' zizraj, dxe'e dápatē' gubáz chee xabáa ca' bache zaj nazi'e xel-la' dxenná bea xuluzría xi'e xēzr la xu, ne nísadau', gunné':

³ —Quebe guzría xile xēzr la xu, ne nísadau', ne xaga ca', dxácatē' quebe ne guchichentu' luzrgá benne' ca' tu da gunna bea na zaj naque' chee Dios cheedxu.

⁴ Benda' cáтите zaj naca benne' ca' gulezriche luzrgue' da na' dxunna bea na. Zaj naque' tu gaxúe tape xun cue' da zaj naca na chi gaxúa weaj lávela xúgute' cue' benne' Israel. ⁵ Gulezriche luzrgue' da na':

Chazrinnu cue' benne' xrtia Judá, ne

chazrinnu cue' benne' xrtia Rubén, ne

chazrinnu cue' benne' xrtia Gad, ne

⁶ chazrinnu cue' benne' xrtia Aser, ne

chazrinnu cue' benne' xrtia Neftalí, ne

chazrinnu cue' benne' xrtia Manasés, ne

⁷ chazrinnu cue' benne' xrtia Simeón, ne

chazrinnu cue' benne' xrtia Leví, ne

chazrinnu cue' benne' xrtia Isacar, ne

⁸ chazrinnu cue' benne' xrtia Zabulón, ne

chazrinnu cue' benne' xrtia José, ne

chazrinnu cue' benne' xrtia Benjamín.

Benne' zan zaj nacu zra lané' chiche

⁹ Gudé na' gunná'a ne ble'eda' benne' zan chee xúgute' cue' bénneache: Benne' xúgute' cue' xēzr la xu, ne benne' dxelenné' xúgute' dizra' walazre' cha chee', ne benne' xúgute' xēzre ca'.

Zaj zē' le na' naga zua lataj blau na', ne naga zē' Bénnea' naque' Zríla'dau'. Benne' caní zaj nacue' zra lanē' chiche, ne zaj nuxre' zina'. ¹⁰ Xúgute' dxelenné' zizraj:

Xel-la' weselá za na lu na' Dios cheedxu,
Bénnea' dxe'e lataj blau,
ne lu na' Bénnea' naque' Zríla'dau'.

¹¹ Xúgute' gubáz chee' xabáa ca' zaj zē' zaj naxéchaje' lataj blau na', ne naga zaj zra' benne' gula ca', ne tapa benne' ban ca', na' buluzú zribe' belixrujte lawe' zran ni'e, na' bulucá'ana szrenē' Dios. ¹² Dxelenné':

¡Ca'an gaca na!
¡Xel-la' dxue lá'ana, ne da xabáa,
ne xel-la' sina, ne xel-la' dzezaca ba lazre',
ne xel-la' ba lá'ana, ne xel-la' dxenná bea,
ne xel-la' szren,
zaj naca na chee' Dios cheedxu chadía chacanna!
¡Ca'an gaca na!

¹³ Nadxa tu benne' gula ca' bchebe' neda':

—¿Nuzra benne' caní zaj nacue' zra lanē' chiche, ne gazra zesí'aque'?

¹⁴ Neda' gucha' le':

—Xran, lue' nézqueznu'.

Le' guzre' neda':

—Benne' caní ba guledé' lu xel-la' zi' zren na', na' benne' caní ba zaj nacue' zra lanē' chiche lawe' da Bénnea' naque' Zríla'dau' ba gudibe' xichaj lázrdawe' nen dxen chee'. ¹⁵ Chee' le' na' zaj zre'e dxu'a lataj blau naga dxe' Dios, ne dxelúe lá'ane' Le' te zra ne chizrela lu xudau' chee', na' Bénnea' dxe'e lataj blau na' guxúequeze' benne' ca', ne súaletecaze' le'. ¹⁶ Québedxa xeledune' ne québedxa xelebílenē', ne québedxa guzezxe gubizra benne' ca', ne québedxa xeléquene' da la, ¹⁷ lawe' da zua Bénnea' naque' Zríla'dau' cuita lataj blau na', na' guxúe' benne' ca' ca dxun benne' dxuxúe' zríla' ca', ne che'e benne' ca' naga dxelalaj nisa da dxunna na xel-la' nabán, na' Diósqueze tu súalezqueze' benne' ca' chee' québedxa xelebezre'.

8

Dxecheze' da gazre da ca' dxelunna bea na

¹ Gate Bénnea' naque' Zríla'dau' gucheze' da gazre da ca' dxelunna bea na, da ca' zaj nuchiche na xiche na', na' gudxe' zri xabáa tu chi'i zrenqueze.

² Nadxa ble'eda' gazre gubáz chee' xabáa ca' zaj ze' lau Dios, na' bulunézruje' gubáz chee' xabáa ca' gazre luzu da xulucuezre'. ³ Gudé na' bla' xetú gubáz chee' xabáa nuxre' tu xé'ena bzri da naca na oro ne guzé' dxu'a cugu, na' bulunézruje'e le' xala zixre chee' guzúe' na lau Dios tu zren nen xel-la' dxuláwizra Dios ca' da belún benne' ca' zaj naque' chee' Dios. Bzue' na lu cugu naca na oro, da zua na lau lataj blau na'. ⁴ Zren chee' xala na' guluén na lau Dios tu zren nen xel-la' dxuláwizra Dios ca' belún benne' ca' zaj naque' chee' Dios. ⁵ Nadxa tu gubáz chee' xabáa guqué'e xé'ena bzri na', na' bzre'e na xi' da guqué'e lu cugu na', na' gudxú'unge' xi' na' lu xezr la xu, na' gulenné' guziu', ne guléninne'e, ne gulépele'e xesa, ne guzrú' xezr la xu.

Dxuluchine gubáz ca' da dxulucuezre'

⁶ Nadxa gázrete' gubáz chee' xabáa ca' zaj nuxre' gazre luzu da dxulucuezre' gulezé' chawe' xuluchínene' na.

⁷ Gubáz nedxu na' bchínene' da dxucuezre', na' gulinnaj xiaj bezxe', ne xi' da zaj nachixre na dxen da belexruj na lu xęzr la xu. Xáteze quebe bedú gachaj xęzr la xu guzezxe na late weaj du ca naca lu xęzr la xu. Xáteze quebe gudache gáchajtę xaga ca' zaj zę lu xęzr la xu gulezxe na, ne cá'aqueze guca cheę xixre' xa'a ca'.

⁸ Gubáz cheę xabáa gudxupe' bchínene' da dxucuezre', na' bexruj da naca na ca tu xi'a zren da dxala na xi' lu nísadau', na' xáteze quebe guca gáchajtę nísadau' na' bexaca na dxen. ⁹ Xáteze quebe guca gáchajtę bea zaj zraba' lu nísadau' guláteba', na' xáteze quebe guca gáchajtę da ca' dxeledán lawe' nísadau' gulebía xi na.

¹⁰ Gubáz cheę xabáa guxunne' bchínene' da dxucuezre', na' bexruj tu belaj zrente zran xabáa, da dxala na ca tu xi' xedxe. Naga bexruj na, xáteze quebe gudache gáchajtę xęgu ca', ne beaj ca' gulebía xi na. ¹¹ Belaj na' le' na Ajenjo, da zéaje na da naca na sla', na' xáteze quebe guca gáchajtę nisa da de lu xęzr la xu bexaca na ajenjo, na' benne' zantę gulatie' ne cheę nisa na' lawe' da bexaca na sla'.

¹² Gubáz cheę xabáa gudape' bchínene' da dxucuezre', na' xáteze quebe bedú gachaj xel-la' naxani' cheę gubizra, ne xel-la' naxani' cheę beu', ne xel-la' naxani' cheę belaj ca' belexaca na chul-la, na' quebe bulusení na du lazre' xáteze quebe guca gachaj zra, ne cá'aqueze che zrela.

¹³ Nadxa gunná'a, ne benda' chi'i tu gubáz cheę xabáa dxedé' lu be', dxenné' zizraj:

—Edxugua bėnneache zaj zra' xęzr la xu gate xelebezre luzu da xuluchine xechunna gubáz cheę xabáa ca'.

9

¹ Gubáz cheę xabáa gáxzue bchínene' da dxucuezre', na' ble'eda' tu benne' naque' ca tu belaj bexruj na lu xęzr la xu, na' bulunézruje' le' zren xia cheę lataj chul-la cheę benne' gate ca'. ² Gusálaje' lataj chul-la na', na' lu'ule na' bdxuaj zren ca naca da dxedxuaj na naga dxeluzre' bla'dau', na' zren na' bchul-la na lau gubizra, ne lu be'. ³ Lu zren na' beledxúaj biche zu. Guledaba' du ca naca xęzr la xu, na' biche zu ca' guleziba' lataj xeláduba' bėnneache ca da dxelún bėxrujni. ⁴ Dios guzre' biche zu ca' quebe xuluzría xiba' xixre' xa'a ca', ne netú xaga, san xeláduzeba' bėnneache quebe nazriche luzrgue' da dxunna bea na benne' ca' zaj naque' cheę Dios. ⁵ Quebe zaj naziba' lataj xelúteba' bėnneache, san xuludézeba' bėnneache ba xa' lawe' gazxu' beu', na' xel-la' dxelá cheę naga dxeláduba' naca na ca naca da dxun bėxrujni, be dxelúteba' bėnneache. ⁶ Lu zra ca' xelaca lazre' bėnneache xelexute cuine', ne quebe xelezéquene'. Xelaca lazre' xelatie' ne quebe xelatie'.

⁷ Biche zu ca' zaj nácaba' ca bzrina' ca' ba zaj nabėzaba' chjácaba' lu wedil-la. Xíchajba' zaj zria na ca tu da naca na oro, na' dxu'a lau biche zu ca' naca na ca lau bėnneache. ⁸ Xicha xíchajba' zaj naca na ca xicha xichaj nu'ula ca', na' láxzaba' zaj naca na ca lazxa bezure xixre'. ⁹ Lachu'uba' xu'u na ca zraba' xia, na' xrílaba' dxeleninne na ca dxeleninne da dxelecá'a bzrina' ca' zjaca chéguba' lu wedil-la. ¹⁰ Zaj zua xrbanba' ca xrbán bėxrujni, zaj zua na liba'. Zaj nazi'ba' lataj xeláduba' bėnneache lawe' gazxu' beu'. ¹¹ Zua tu xrane biche zu ca' naca gubáz cheę lataj chul-la, ne le' na Abadón nen dizra' hebreo, ne nen dizra' griego le' na Apolión, da zéaje na da dxuzría xi na.

¹² Caní guca da nedxu da ba xa' da xeledé bēnneache, na' da' zí'aca xechupan ca'.

¹³ Nadxa gubáz chee xabáa xrupe bchínene' da dxucuezre', na' benda' tu chí'i da gunná ládujla tapa luzu cugu lá'azxa na' naca na oro da zua na lau Dios.

¹⁴ Chí'i na' guzre na gubáz chee xabáa xrupe na' nuxre' luzu da dxucuezre':
—Bsan dápatę gubáz ca' zaj nadxéję' dxu'a xęgu zren lę na Eufrates.

¹⁵ Ca' guca na, na' gulelá gubáz ca' chee xelutie' xáteze ca gaca gáchajte bēnneache lawe' da ba zaj nabeza gubáz ca' chee zra na', ne beu' na', ne iza na'.

¹⁶ Benda' cátite zaj naca benne' dxjaca wedil-la ca' zaj zrie' bzrina' zrálene' gubáz ca'. Zaj naque' chupa cue' gaxua da zaj naca gaxúane gaxúane.

¹⁷ Lu da ble'e Dios neda' ble'eda' ca zaj naca bzrina' ca', ne ca zaj naca benne' dxjaca wedil-la ca' zaj zrie'-ba'. Zaj xu'u lachu'e zre' xrna da naca na xia, ne da nalá' ca zran xabáa, ne da gache. Xichaj bzrina' ca' zaj naca na ca xichaj bezre xixre', na' dxú'aba' ca' beledxúaj xi', ne zren, ne tu da gache da dxuzéxzele'ę na. ¹⁸ Xáteze quebe gudache gáchajte bēnneache gultatie' lu da ca' beledxúaj na dxu'a bzrina' ca', xi', ne zren, ne da gache na'. ¹⁹ Xel-la' snia chee bzrina' ca' zua na dxú'aba', ne xrbanba' lawe' da zaj naca xrbanba' ca' bęla' ca' zaj zua xíchajba', na' nen da ca' dxuluzría xiba' bēnneache.

²⁰ Benne' ca' zezica, benne' quebe belúteba', belúnqueze' da zrinnaj ca da dxelúnqueze', ne bulucá'ana szrénqueze' be' xriwe' ca', ne bedau' oro ca', ne bedau' plata ca', ne bedau' xia gache ca', ne bedau' xiaj ca', ne bedau' xaga ca', da ca' quebe dxaca xelelé'e na, ne quebe dxaca xelén na, ne quebe dxaca si'aca na. ²¹ Cá'anqueze belútequeze' benne' ca', ne belúnqueze' xel-la' wazrá', ne belúnqueze' da sban, ne gulebánqueze'.

10

Tu gubáz chee xabáa nuxre' tu xíchedau' nazriluj na

¹ Nadxa ble'eda' xetú gubáz chee xabáa nápalę' xel-la' dxenná bea. Bétaje' xabáa, xu'e tu lu beuj, ne zua tu bchita' xíchaję'. Dxu'a lawe' dxácátite na ca gubizra, na' ni'e zaj naca na ca xi'. ² Nuxre' tu xíchedau' da nazriluj na, na' bzue' ni'e zua xabęla lawe' nísadau', ne ni'e zua xęglala lawe' xęzr la xu bizre. ³ Nadxa gudxezre xę'e ca dxun bezre xixre' dxebezre xa'aba', na' ca gudxezre xę'e gulenné gazre guziu'. ⁴ Ca gudé gulenné gazre guziu' ca', ba zúate guzúaja', na' benda' tu chí'e za xabáa, guzre neda':

—Bcache naze da gulenná gazre guziu' ca'. Quebe guzúaju' na.

⁵ Nadxa gubáz chee xabáa na' ble'eda' zę' lawe' nísadau', ne lawe' xęzr la xu bizre guchisa ne'e da zua xabęla zran xabáa, ⁶ na' bzétaje' La Bēnnea' zue' chadía chacanna, ne beņe' xabáa, ne xęzr la xu, ne nísadau', ne xúgute' da zaj de lawe' da ca' beņe', na' gunné':

—Québedxa che na, ⁷ lawe' da gate su lau gubáz chee xabáa gazre guchínene' luzu da xulucuezre', ba guca li ca naca da nun Dios dxal-la' gaca ca bzennę' benne' wen zrin chee' ca', benne' gulenné' waláz chee'.

⁸ Ca naca chí'e da benda', da za xabáa, bchálajlene' neda' xetú, gunné':

—Guxíaj xeajcá'a xíchedu na' nuxru gubáz chee xabáa na' zę' lawe' nísadau', ne lawe' xęzr la xu bizre.

⁹ Nadxa guxá'a lau gubáz chee xabáa na', na' gunaba' gunnę' neda' xíchedu na', na' guzre' neda':

—Gucá'a na. Gudagu na. Lu dxu'u gaca na zixre ca bzrina'dau', na' lu lę'u xexaca na da sla'.

¹⁰ Nadxa gucá'a xíchedu na' lu na' gubáz chee xabáa na', na' gudawa' na, na' lu dxu'a guca na zixre ca bzrina'dau'. Ca gudé gudawa' na, bexaca na sla' lu le'a. ¹¹ Nadxa gulé'e neda':

—Dxun na ba xen guchálaju' waláz chee Dios lau benne' zaj zre'e zane cue xezr la xu, ne lau benne' zaj zre'e xezre zan ca', ne lau benne' dxelenné' dizra' walazre' cha chee' ca', ne lau benne' wenná bea ca'.

11

Chupa benne' dxelexechébe'

¹ Nadxa belunne' neda' tu xia xtíladau' da naca na ca tu xaga da dx-dxíredxu, na' gulé'e neda':

—Guxasa, bdxixre' sudau' chee Dios ne lu cugu, na' blaba bal-la benne' zaj zre'e na' dxulucá'ana xzrené' Dios. ² Quebe gudxixru' chale'aj chee xudau' na' lawe' da ba gudé na lu na' benne' zitu' ca', na' benne' ca' xululéajé' xezre lá'azxa lawe' chupe xun beu'. ³ Neda' sel-la' chupa benne' zaj nacue' ladxe' tuzruj, na' xelenné' waláz chia' lawe' chazrinnu gaxúa ga xun zra.

⁴ Benne' chupa caní zaj naque' ca chupa xaga olivo ca', ne ca zaj naca chupa da zaj zuan xi', da ca' zaj zua na lau Dios, Xrane xezr la xu. ⁵ Che nu benne' dxaca lazre' guzría xi'e benne' caní, na' le' xululube' xi' da dxuaj lu dxu'e ca', na' guzézxete' na benne' ca' dxeledábague' le'. Caní gate núteteze benne' tábague' benne' chupa caní. ⁶ Benne' chupa caní zaj nape' xel-la' dxenná bea xeluné' ga quebe gaca xiuj dxácaté na' dxelenné' waláz chee Dios. Cá'anqueze zaj nape' xel-la' dxenná bea xeluné' xaca nisa dxen, ne chee xulusaca zi'e bénneache nen xúguté xízrawe' ca', bátatezla dxelaca lazre'. ⁷ Gate bache belexuzre beluné' zrin chee', na' be xixre' snia, be dxedxúajba' lataj chul-la, tíl-laléba' benne' chupa ca', na' quél-laba' le', ne gúteba' le'. ⁸ Bela' dxen gate chee benne' caní xelexegá'ana na la neza chee xezre zrentau' naga gudá' Xránadxu xaga begúaj, ne ca dxutil-la Dios lebe, le na Sodoma, ne Egipto. ⁹ Lawe' chunna zra xugachaj, bénneache chee xúguté cue' benne', ne benne' xezre ca', ne benne' zra du gabí'i xezr la xu, ne benne' dxelenné' dizra' walazre' cha chee' xelélé'ene' be'la' dxen gate chee benne' caní, ne quebe xelu'e lataj nu benne' gucache' le'. ¹⁰ Benne' zaj zre'e lu xezr la xu xebebe' lawe' da zaj nate benne' caní, na' xelexezaca ba lázrel'e, ne xelesel-le' da xulunezruj ljwezre' tue' xetue' lawe' da bulusaca zi' benne' caní gulenné' waláz chee Dios bénneache ca'. ¹¹ Gate guca chunna zra xugachaj, na' Dios bsebané' benne' caní, na' belexase', na' xúguté benne' ca' belelé'ene' le' belezrébele'e. ¹² Nadxa dxúpaté benne' ca' dxelexechébe belenne' chi'i tu benne' dxenné' zizraj xabáa, dxé'e benne' ca':

—Le xegüén nigá.

Na' xelexegüene', na' belelé'e benne' ca' dxeledábague' le' ca guca. ¹³ Ca'an gúcate guzrú'le'e xezr la xu, na' xu'u zaj nita na lu xezre na' gulebía xi na, na' gulate gazre cue' da nacan chi gaxúa bénneache weaj ne chee da guzrú'. Benne' ca', benne' quebe gulate lu xezre na', nen duté xel-la' dxelezrebe belúe lá'ané' Dios zue' xabáa.

¹⁴ Ba gudé da gudxupe' da ba xa' da xeledé bénneache, na' la za'te da guxunne'.

Gubáz gazre dxuchínene' da dxucuezre'

¹⁵ Gubáz gazre bchíneng' da dxucuezre', na' ben chi'i benne' zan xabáa dxelenné' zizraj:

Naga dxelenná bea bénneache lu xezr la xu ba guledé na lu na' Xránadxu Dios, ne lu na' Cristo cheg', na' Le' nna be'ene' lataj ca' chadía chacanna.

¹⁶ Nadxa tape dxua benne' gula ca' zaj dxe'e dxu'a lataj blau naga dxe' Dios buluzú zribe' zaj nuzuate lawe' zran ni'e, dxulucá'ana szrene' Dios, dxelenné':

Xcalenu', Xran.

Dios, napu' dutę xel-la' dxenná bea.

Guzúaquezu', ne zúaquezu', ne tu súaquezu', lawe' da ba guzi'u xel-la' dxenná bea zrente chiu', ne ba guzú lau' dxenná be'u.

¹⁸ Bénneache xúgutę xezre ca' dxelezzé'e san ba bzrin zra gudéu' benne' ca' ba xa', zra na' guchi'u cheę benne' gate ca'.

Xunézruju' da naca cheę benne' ca' gulenné' waláz chiu', ne da naca cheę benne' ca' zaj naque' chiu', ne da naca cheę benne' ca' belune' Lue' ba lá'ana, benne' blau ca', ne benne' quebe nu zaj naca.

Ba bzrin zra guzría xi'u benne' ca' buluzría xi'e xezr la xu.

¹⁹ Nadxa bxalaj xudau' cheę Dios da zua xabáa, na' ble'e lau xi'ina naga xu'u xel-la' wezría xrlátaje cheę', da zua na lu xudau' na'. Gulepe xesa, ne guleninne na, ne gulenné guzi'u', ne guzrú' xezr la xu, na' bxínnajle'e xiaj bezxe'.

12

Tu nu'ula ne be snia schanni' zrente

¹ Nadxa ble'e lau tu da zrente xabáa. Zua tu nu'ula naca zra lanę' ca gubizra, na' zran ni'e zua da naca ca beu', na' xíchaję' zria tu da zaca zaj zria na chazrinnu belaj. ² Nu'ula nigá zuę' zi'i, ne dxebezre xę'e xel-la' dxudi'a sanę' tu bidau', dxedéle'e xel-la' zi' cheę galaj bidu na'. ³ Nadxa ble'e lau xabáa xetú da zrente, zua tu be snia schanni', be xrna, zua gazre xíchajba' ne chi lúzuba', na' zria tu da zaca tu tu xíchajba' ca'. ⁴ Nen xrbanba' gucá'a dxéguba' xáteze quebe guca gáchaję belaj zaj zria zran xabáa, na' bzálaba' na lu xezr la xu. Be snia schanni' na' guzęba' lau nu'ula na' sanę' bidau' cheę gáguba' bidu na' gate ze gálajbe'. ⁵ Nu'ula na' guzanę' tu bi biudau', bi na' nna be'ebe' dutę xezr la xu nen tu var xia. Nadxa bi biu cheę nu'ula na' gucá'a Dios lebe', na' bexu'e-be' lataj blau cheę' naga dxe'e. ⁶ Na' nu'ula na' bzrúmmuje' zéaję' le'e xixre' lawe' lataj naga nucueza Dios tu lataj naga sua nu'ula na', naga xulugawę' le' lawe' chazrinnu gaxúa ga xun zra.

⁷ Gudé na' guxú'u wedil-la xabáa gate gubáz cheę xabáa blau le' Miguel nen gubáz cheę xabáa zaj da' le' guledil-laleng' be snia schanni' zrente. Be snia schanni' na', ne gubáz zaj de'e-ba' belune' wedil-la. ⁸ Quebe bi gulezéqueng' lu wedil-la na', na' québedxa guta' lataj cheę gubáz ca' lu xabáa. ⁹ Ca'an guca gulebéaję' be snia schanni' na' xabáa, be snia na' zúaba' nédxute, na' nazí laba' da xriwę', ne Satanás, da na' dxezi xę na xúgutę bénneache. Da xriwę' na', ne gubáz ca' zaj de'e na guledxú'ung' na lu xezr la xu.

¹⁰ Nadxa benda' tu chi'i benne' gunné' zizraj xabáa:

—Ba bla' xel-la' weselá, ne xel-la' szren, ne xel-la' dxenná bea chee Dios cheedxu, ne xel-la' dxenná bea chee Cristo chee', lawe' da ba guledxú'üne' da na' gudagu zria na chee benne' bíchedxu, da na' dxagu zria na chee benne' ca' te zra, ne chizrela lau Dios cheedxu. ¹¹ Benne' bíchedxu ca' beledxú'aje' chawe' ne chee dxen chee Bénnea' naque' Zríla'dau', ne ne chee da belexechebe' ca naca chee dizra' chee Cristo, ne quebe belezrebe' nu benne' gutie' le'. ¹² Chee le' na' gata' xel-la' dxebe' xabáa.

¡Le be le'e zrale xabáa!

¡Edxugua benne' ca' zaj zře'e xezr la xu, ne lawe' nísadau'

lawe' da ba bla' da xriwe' naga zúale,

dute' xel-la' dxezrá'a chee na,

lawe' da neze na xáte'ga ne de chee na!

¹³ Gate guque be'e da xriwe' ba buluzale' na lu xezr la xu, na' gudxé' nau na nu'ula na' guzane' bi biudu na'. ¹⁴ Nu'ula na' bulunézruje' le' chupa xriłe' zren ca xrila bsia chee gaca xexiaje' xezue' le'e xixre' lawe' lataj, zitu' naga zua be snia schanni' na', na' bulugawe' le' lawe' chun iza xugachaj. ¹⁵ Be snia schanni' na' bexébeba' nisa chee benba' tu xegu chee gua na nu'ula na'. ¹⁶ Gúcale' xezr la xu nu'ula na'. Bzra xezr la xu, na' gudebe na xegu na' bexebe be snia schanni' na'. ¹⁷ Chee le' na' bzrá'le'e da xriwe' nu'ula na', na' guxíaj na xejtíl-lale' na xrtia nu'ula na' zaj zře'e xezr la xu, benne' ca' dxuluzúe' dizra' da bdxixruj be'e Dios, ne dxelexechebe' ca naca chee Jesucristo.

13

Chupa be xixre' snia ca'

¹ Nadxa guzéa' dxu'a nísadau', ne ble'eda' bdxuaj tu be xixre' snia lu nísadau' na', zua gazre xíchajba', ne chi lúzuba'. Zria tu tu lúzuba' na' tu da zaca, na' da' tu laba' xíchajba' ca' da dxecuide Dios. ² Be xixre' snia nigá nácaba' ca tu bežrtau', na' ní'aba' zaj naca na wal-la ca ni'a oso, na' dxú'aba' naca na ca dxu'a bežre xixre'. Be snia schanni' bnézrujba' xel-la' dxenná bea cheeba', ne lataj blau cheeba', ne xel-la' waca cheeba' lu na' be snia na' nácaba' ca bežrtau'. ³ Zua tu we' tu xichaj be xixre' snia na' nácaba' ca bežrtau' da gute na leba', na' we' na' bexaca na, na' ca naca bénneache ca' zaj zře'e lu xezr la xu belexebánele'ene', ne zjácalene' be xixre' snia na'. ⁴ Bulucá'ana szrene' be snia schanni' na' lawe' da bnézrujba' xel-la' dxenná bea chee be xixre' na' nácaba' ca bežrtau', ne cá'anqueze bulucá'ana szrene' be xixre' snia na', dxelenné':

—¿Núzraqueze naca ca be xixre' nigá, ne nu seque' tíl-lale' leba'?

⁵ Nadxa da xriwe' be na leba' lataj gunneba' dizra' zri'a, na' gunneba' da calęla chee Dios, ne gudápaba' xel-la' dxenná bea lawe' chupe xun beu'. ⁶ Gunneba' da calęla chee Dios, ne chee La Dios, ne chee lataj lá'azxa chee', ne chee benne' ca' zaj zře'e xabáa. ⁷ Cá'anqueze guziba' xel-la' dxenná bea tíl-laleba' benne' ca' zaj naque' chee Dios, ne gúteteba' benne' ca', na' guziba' xel-la' dxenná bea lu xúgute' cue' bénneache, ne benne' zaj zře'e xúgute' xezre ca', ne xúgute' cue' xezr la xu ca', ne benne' dxelenné' dizra' walazre' cha chee'. ⁸ Xúgute' benne' zaj zře'e xezr la xu bulucá'ana szrene' be xixre' snia na', benne' ca' quebe zaj naxúaj le' lu xiche naga zaj naxúaj la benne' ca' zaj nape' xel-la' nabán, xiche na' bzuj Bénnea' naque' Zríla'dau' belutię'-ba'.

⁹ Che nu benne' zua nague', dxal-la' xenne' dizra' nigá. ¹⁰ Benne' ca' dxelegú'e' bénneache lizre xia, cá'anqueze xelú'u benne' ca' lizre xia, na' benne' ca' dxelutię' benne' nen xia nalá, cá'anqueze xelatie' lu xia nalá. Chee le' na'

benne' zaj naque' chee Dios dxal-la' xelaque' zren lazre', ne xeléajle'e chee Dios.

¹¹ Gudé na' ble'eda' xetú be xixre' snia bdxúajba' lu xezr la xu. Bea nigá zua chupa lúzuba' zaj naca na ca luzu zrila'. Bea nigá gunneba' ca be snia schanni' na'. ¹² Bea nigá nápaba' duté xel-la' dxenná bea da napa be nedxu na', gate zúaba' lau be nedxu na', na' gunná be'eba' ca naca bénneache zaj zre'e duté xezr la xu xulucá'ana szrene' be nedxu na', bea na' bexaca we' cheeba' da na' naca gute leba'. ¹³ Be gudxupe' na' benba' xel-la' waca zri'a ca', ne benba' bexruij xi' zran xabáa lu xezr la xu lau bénneache ca'. ¹⁴ Ne chee xel-la' waca ca' da benba' lau be nedxu na', guzi xeba' benne' zaj zre'e xezr la xu, na' gunná be'eba' benne' ca' xelune' tu bedau' ca naca be nedxu na', bea na' guzúa we' chee xia nalá, na' naca bánquezeba'. ¹⁵ Be gudxupe' na' guziba' xel-la' dxenná bea gunézrujba' xel-la' nabán bedau' na' naca na ca be nedxu na', chee nne' bedau' na', ne gute na xúgute benne' quebe xulucá'ana szrene' na'. ¹⁶ Cá'anqueze bedau' na' gunná be'e na zriche tu da gunna bea na luzrgá u lu na' zua xabela chee xúgute bénneache, benne' blau, ne benne' quebe nu naca, ne benne' gunni'a, ne benne' xache', ne benne' zaj nada'u, ne benne' zaj zre'e cá'aze. ¹⁷ Netú benne' quebe gaca ga'uwe' ne gutie' che quebe zriche da na' dxunna bea na le', u la be xixre' snia na', u xrbaba ca naca laba'. ¹⁸ Nu benne' gulabe' da nigá dxal-la' gaque' sina. Benne' dxéajni'ing' waca gulabe' ca naca xrbaba chee laba'. Naca na tuze ca naca xrbaba chee bénneache, na' xrbaba nigá naca na xrupa gaxúa ga xun xrupa.

14

Da dxelul-la tu gaxúa tape xun cue' chi gaxúa weaj benne'

¹ Gudé na' gunná'a, na' ble'eda' Bénnea' naque' Zríla'dau' ze' lu xi'a Sión. Tu zren nen Le' zaj zra' tu gaxúa tape xun cue' chi gaxúa weaj benne', zaj zriche luzrgue' La Bénnea' naque' Zríla'dau', ne La Xre'. ² Nadxa benda' tu da dxeninne na da za' xabáa, da dxeninne na ca schaga' da dxelún zánete xegu ca', ne ca schaga' da dxun guziu' gate dxennéle'e na, ne ca dxeninne naga zaj zra' zánete benne' dxelinnié' da ca' cun zriadi'i na du. ³ Belul-le' tu da cube dxu'a lataj blau naga dxe' Dios, ne lau tapa benne' ca' zaj zua nábancze', ne lau tape dxua benne' gula ca'. Netú benne' xezica quebe guca gul-le' ca naca da na' belul-le'. Dxaca dxelul-le na benne' tu gaxúa tape xun cue' chi gaxúa weaj, benne' ca' gulelé' lávela benne' zaj zre'e xezr la xu. ⁴ Benne' caní quebe gulezúalene' nu'ula chee benne' xula, san belexegá'ana chawe', na' zjácálene' Bénnea' naque' Zríla'dau' gáteteze zéaje'. Benne' caní gulelé' lávela bénneache, ne zaj naque' lau Dios ca tu da blaudxa chee da dxezidxu, da dxuzúadxu lau Dios, ne lau Bénnea' naque' Zríla'dau'. ⁵ Cabata' dxelún lazre', na' zaj naque' du lazre' dxu'a lataj blau naga dxe' Dios.

Dizra' da dxuluzén chunna gubáz chee xabáa bénneache

⁶ Nadxa ble'eda' xetú gubáz chee xabáa dxedé' lu be' zran xabáa, nape' dizra' chawe' da chadía chacanna, chee guzenne' na benne' ca' zaj zre'e xezr la xu, benne' xúgute cue' bénneache, ne benne' xúgute cue' xezr la xu, ne xúgute xezre, ne benne' dxelenné' dizra' walazre' cha chee'. ⁷ Gubáz na' gunné' zizraj:

—Le zrebe Dios, ne le güe lá'ana Le' lawe' da ba bzrin zra guchi'a Le' chee bénneache. Le gucá'ana szren Bénnea' bene' xabáa, ne xezr la xu, ne nísadau', ne beaj ca'.

⁸ Xetú gubáz chee xabáa zéaje' cuzru gubáz chee xabáa nedxu na', dxenné':
—¡Ba guzría xi'! ¡Ba guzría xi' xezre Babilonia, xezre zren na', lawe' da bulusuzre' benne' xezre ca', ne benne' dutę xęzr la xu nen da naca ca xrise uva wal-la chee da sban da dxelunę'!

⁹ Xetú gubáz chee xabáa zéaje' cuzru gubáz chupa ca', dxenné' zizraj:
—¡Che nu benne' dxucá'ana szrenę' bę snia na', ne bedau' cheęba', ne gu'e lataj zriche luzrgue' u ne'e laba', ¹⁰ benne' nigá téę' lu da ba xa' da nucueza Dios lu xel-la' dxezrá'a chee', na' saca zi'e lu xi' chee da dxuzézxelę'e na lau gubáz chee xabáa ca' chee Dios, ne lau Bénnea' naque' Zrila'dau'! ¹¹ ¡Zren chee xi', naga saca zi'e, cuen na chadía chacanna, na' xelezaca zi' te zra ne chizrela benne' ca' dxulucá'ana szrenę' bę snia na', ne bedau' cheęba', ne dxelu'e lataj zriche laba' luzrgue'! ¹² ¡Chee lę na', benne' ca' zaj naque' chee Dios, ne dxuluzúę' dizra' ca nadxixruij be'ene', ne zjácalęne' da naca chee Jesús, dxal-la' xelaque' zren lazre'!

¹³ Nadxa benda' chi'i tu benne' da za xabáa. Dxe'e neda':

—Bzuaj da nigá: Na'a, ne lu da za za' ba neza zrentę naca na chee benne' gate ca' xelute bęnneache lę' lawe' da dxelęajlę'e chee Xránadxu. Be' Lá'azxa dxenné': “¡Ca' naca na, lawe' da xelexezi' lazre' ca naca lu zrin da belunę', na' da xrlátaje da belunę' zeajlę na benne' ca'!”

Lina chee xęzr la xu

¹⁴ Nadxa guná'a, na' ble'eda' tu beuj chiche, na' lawe' beuj na' dxe' tu benne' naque' ca Bénnea' gulję bęnneache. Zria tu da naca na oro xíchaje', ne nuxrę' tu xia nalá. ¹⁵ Bdxuaj tu gubáz chee xabáa lu xudau' da zua xabáa, na' gunné' zizraj. Dxe'e bęnnea' dxe'e lawe' beuj:

—¡Bchine xia nalá chiu', ne becá'a lina, lawe' da ba bzrin zra, na' lina chee xęzr la xu ba guca na!

¹⁶ Nadxa bęnnea' dxe'e lawe' beuj na' gudine' xia nalá chee' na', na' bequę'e lina chee xęzr la xu.

¹⁷ Nadxa xetú gubáz chee xabáa bdxuaję' xudau' da zua xabáa, nuxrę' tu xia nalá. ¹⁸ Xetú gubáz chee xabáa bdxuaję' lu cugu, gubáz chee xabáa na' nape' xel-la' dxenná bea lu xi', na' gunné' zizraj. Dxe'e gubáz chee xabáa na' nuxrę' xia nalá:

—¡Bchine xia nalá chiu' na', ne becá'a uva ca' da zaj dęn lu xęzr la xu lawe' da ba güe na!

¹⁹ Na' gubáz chee xabáa na' gudine' xia nalá chee' lawe' xęzr la xu, ne bequę'e uva ca' da zaj dę lu xęzr la xu da zéaje na benne' ca' dxelunę' da zrinnaj, na' bzre'e na naga xelesię' na, da na' zéaje na da ba xa' da nucueza Dios chee benne' ca' dxelunę' da zrinnaj. ²⁰ Uva ca' gulesię' na naga dxdxuaj xezre, na' naga dxelesię' na bdxuaj dxen chee benne' ca' dxelunę' da zrinnaj da gulęn na cátite sibe zua dxu'a bzrina', na' guzá' dxen na' cátite sadxu du gazre zra.

15

Gubáz chee xabáa ca' zaj nuxrę' gazre da ba xa' da xuluzále' xęzr la xu

¹ Ble'eda' xabáa xetú da zrentę da xebánedxu, belelá' gazre gubáz chee xabáa zaj nuxrę' gazre da ba xa' bzebe, da zaj naca na naga cheajsetę xel-la' dxezrá'a chee Dios.

² Cá'anqueze ble'eda' tu da naca na ca nísadau' da naca na ca xiaj esa', ne nachixre na xi', na' benne' ca' quebe gulezi' lu ne'e da naca na chee bę snia na', ne da nacan chee bedau' cheęba', ne xrbaba chee laba', zaj ze' lu nísadau'

na' da naca na ca xiaj esa', zaj nuxre' da ca' con zríadi'i na du da ba bnezruj Dios le'. ³ Dxelul-le' da bil-la Moisés, benne' wen zrin chee Dios, ne da dxul-la Bénnea' naque' Zríla'dau', da dxenná na:

Da zrente, ne da dxebánedxu zaj naca xúgute da ba benú' Lue'.

Xran, nacu' Dios napu' duté xel-la' dxenná bea.

Xrlátaje, ne li lazre' zaj naca xrba chiu' Lue'.

Nacu' Wenná Bea chee duté xezr la xu.

⁴ ¿Núzraqueze quebe zrebe Lue', Xran?

¿Núzraqueze quebe güe lá'ana Lue'?

Tuze Lue' nacu' lá'azxa.

Xelélé' benne' duté xezr la xu, na' xulucá'ana szrene' Lue',

lawe' da ba belelé'eng' da xrlátaje da nunu'.

⁵ Gudé na' gunná'a ne ble'eda' bxfalaj xudau' da zua na xabáa, naga zua lataj naga zaj naxúaj da ca' bdxixruj be'e Dios. ⁶ Lu xudau' na' beledxúaj gazre gubáz chee xabáa ca' zaj nuxre' gazre da ba xa'. Zra lané' zaj nacué' naca na ladxe' zaca, da naca na ba'a, ne dxelácatite na, na' zaj nasíe' lachu'e bazxu da naca na oro. ⁷ Nadxa tu benne' laduj tapa benne' zaj naca bánqueze' bnézuje' tu tu gubáz gazre ca' tu xé'ena bzri da naca na oro, ne zaj nazrate na da ba xa' da nucueza Dios, Bénnea' zue' chadía chacanna. ⁸ Guzrate xudau' na' nen zren chee xi' da dxulé'e na ca' zaj naca xel-la' szren, ne xel-la' dxenná bea chee Dios, na' netú benne' quebe guca chu'e ga na' cadxa gudé chee da gazre da ba xa' ca' da zaj nuxru gazre gubáz chee xabáa ca'.

16

Da gazre da ba xa' ca'

¹ Nadxa benda' chi'i tu benne' gunné' zizraj lu xudau'. Dxe'e gazre gubáz chee xabáa ca':

—Le chjaca, le cheajzala da ba xa' ca' lu xezr la xu, da ca' nucueza Dios.

² Na' guxéaj gubáz chee xabáa nedxu, xeajlatje' xé'ena bzri chee' lawe' xezr la xu, na' xúgute bénneache, benne' zaj nazriche luzrgue' la be snia na', ne dxulucá'ana szrene' bedau' cheeba', gulebía we' lu be'la' dxen chee benne' ca' da gulále'e na.

³ Gubáz gudxupe' xeajlatje' xé'ena bzri chee' lu nísadau', na' nísadau' na' bexaca na dxen ca dxen chee benne' gate, na' gulate xúgute bea zaj naca banba' lu nísadau' na'.

⁴ Gubáz guxunne' xeajlatje' xé'ena bzri chee' lu xegu nisa ca', ne lu beaj ca', na' belexaca na dxen. ⁵ Na' benda' chi'i tu gubáz chee xabáa dxenná be'eng' nisa caní, gunné':

—Xran, Dios Lá'azxa, zúaquezu', ne guzúaquezu'. Xrlátaje nacu' lawe' da guchugu' chee benne' ca' guca caní, ⁶ lawe' da bululalje' dxen chee benne' chiu' ca', ne chee benne' ca' gulenné' waláz chiu', na' na'a dxuxí'aju' benne' caní dxen lawe' da caní zaj naca chee' xelé'aje'.

⁷ Cá'aqueze benda' chi'i tu benne' zue' lu cugu, dxenné':

—Ca' naca na, Xran. Nacu' Dios napu' duté xel-la' dxenná bea. Ba bchi'ue chee bénneache ca' ca naca da li, ne da xrlátaje.

⁸ Gubáz gudape' xeajlatje' xé'ena bzri chee' lau gubizra, na' gubizra guzí na lataj guzeze na bénneache ca' nen xi' chee na. ⁹ Xúgute bénneache gulé'zele'e, ne quebe belexebí'i lazre', ne quebe belúe lá'ang' Dios, san gulenné' da cale'la chee Bénnea' nucueze' da ba xa' na'.

¹⁰ Gubáz gáxzue xeajlatje' xé'ena bzri chee' lawe' lataj naga dxe' be xixre' snia, na' naga dxenná beaba' guchul-la na. Bénneache ca' gulagu xa'a luzre' lu xel-la' dxudía chee', ¹¹ ne quebe bulusané' da zrinnaj da dxelune'. Gulenné' da caléla chee Dios zue' xabáa, lawe' da dxelezaque' caní ne chee we' da zaj zria belá' dxen chee' ca'.

¹² Gubáz xrupe xeajlatje' xé'ena bzri chee' lawe' xegu zren le na Eufrates, na' nisa xegu na' bebizre na, chee xalaj tu neza naga xeledé benne' dxjaca wedil-la chee benne' wenná bea ca' zá'aque' naga dxalaj gubizra.

¹³ Nadxa ble'eda' beledxúaj chunna be' xriwe' dxu'a be snia schanni', ne dxu'a be xixre' snia na', ne dxu'a benne' dxenné' waláz cheeba'. Be' xriwe' ca' zaj naca na ca bluzru ca'. ¹⁴ Be' xriwe' caní belún na xel-la' waca zri'a ca', na' beledxúaj na chee xulutupa na xúguté benne' wenná bea chee xezr la xu, chee chjaque' lu wedil-la chee zra zren chee Dios, Bénnea' nape' duté xel-la' dxenná bea.

¹⁵ Dxenná Xránadxu:

—Le na' xque, neda' xida' gate quebe dxebézale neda', ca za' tu benne' gubán. Ba neza zrenté naca na chee bénnea' zue' ban lazre' ne nupé'e lázrdawé' ca tu benne' dxuxúe' zra lane' chee quebe te' gala xídeze, ne quebe xedué'eng' lau bénneache.

¹⁶ Nadxa beledube' benne' wenná bea ca' lu lataj naga le na Armagedón nen dizra' hebreo.

¹⁷ Gubáz gazre na' xeajlatje' xé'ena bzri chee' lu be', na' lu xudau' da zua xabáa ben tu chi'i benne' dxenné' zizraj, da za na lataj blau naga dxe' Dios, dxenné':

—Bache naca na.

¹⁸ Nadxa gulepe xesa, ne guleninne na, ne gulenné guziu', na' lu xezr la xu guzru'le'e ca netú lasa quebe ne xru', na' gulálate' zaj zra' bénneache lu xezr la xu. ¹⁹ Xezre zrentau' na' guzra' na chunna cue', na' xezre ca' zaj nita lu xezr la xu gulebía xi na, na' xeajsá lazre' Dios benne' ca' chee xezre zrentau' na' le na Babilonia chee xeledé' lu da ba xa' zren da nucueza Dios lu xel-la' dxezrá'a chee'. ²⁰ Xúguté xezr la xu ca' da naxechaj nísadau', ne xúguté xi'a ca' belexenite na. ²¹ Cá'anqueze belexruij zran xabáa xiaj bezxe' zri'a lawe' bénneache ca', da dxelá'a na ca tu gaxúa xia weaj, na' bénneache ca' gulenné' da caléla chee Dios ne chee da ba xa' da gulezaque', lawe' da guca na tu da ba xa' zrenté.

17

Dios dxuzría xi'e nu'ula dxúnle'e da sban

¹ Nadxa bla' tu gubáz chee gazre gubáz chee xabáa ca', gubáz ca' bululátaje' xé'ena bzri ca', na' guzre' neda':

—Gudá, na' gulé'eda' lue' ca naca da ba xa' da saca' nu'ula na' dxúnle'e da sban, nu'ula na' dxe'e lawe' nísadau' ca'. ² Benne' wenná bea ca' zaj zre'e xezr la xu dxelune' da sban nen nu'ula na', na' benne' zaj zre'e xezr la xu zaj naque' ca benne' dxelezuzre' lawe' da dxelune' da sban nen nu'ula na'.

³ Nadxa, lu da ble'e Be' Lá'azxa neda', gubáz chee xabáa na' guché'e neda' le'e xixre' lawe' lataj, na' lataj na' ble'eda' tu nu'ula zrie' cuzru tu be xixre' schanni' xrna, na' zaj naxúaj lu belá' dxen cheeba' laba' schanni' ca', da ca' dxecuide Dios, na' zaj naca gazre xíchajba', ne chi lúzuba'. ⁴ Nu'ula nigá nacue' zra lane' bzawe, ne da xrna, na' lechítaje chee' zaj naca na oro, ne xiaj xrtante, ne bga ca'. Nuxre' tu xé'ena bzri da naca na oro da nazrate na da sgute ca', ne

da sban da dxunę'. ⁵ Naxúaj luzrguę' ca le', da dxenná na: Babilonia, Xęzre Szrentau', Xrna' Xúgute Nu'ula Ca' Dxelune' Da Sban, ne Xúgute Da Sgute Da Dę Xęzr La Xu. ⁶ Nadxa ble'eda' nu'ula na' dxezúzrene' nen dxen cheę benne' ca' zaj naquę' cheę Dios, ne cheę benne' ca' belute bęnneache le' lawe' da behexechebę' cheę Jesús. Gate ble'eda' da na', bebánele'ęda'. ⁷ Nadxa gubáz cheę xabáa na' guzre' neda':

—¿Bizr cheę na' dxebánu'?' Gulé'eda' lue' ca naca da nagache cheę nu'ula nigá, ne cheę bę xixre' schanni' na' núaba' le', bea na' zaj napa gazre xíchajba', ne chi lúzuba'. ⁸ Bę xixre' schanni' na' blé'enu', nácabá' tu bę zúaba' nédxute, na na'a quębedxa zúaba'. Wagüenba' lu lataj chul-la nédxudxa ca za gáteba' tu chí'izqueze. Benne' zaj zra' xęzr la xu, ne quebe zaj naxúaj le' lu xiche cheę xel-la' nabán ca bęntę Dios xęzr la xu, xelexebánele'ęne' gate xeelé'ęne' bea nigá, bę zúaqueze nédxute, na' na'a quębedxa zúaba', na' wela'ba'.

⁹ Nigá dę late' da gulé'eda' benne' xelėjajni'ing' na. Gazre xíchajba' caní zaj zėjaje na gazre xi'a naga dxenná bea nu'ula na'. ¹⁰ Cá'anqueze xíchajba' ca' zaj zėjaje na gazre benne' wenná bea. Gazxu' benne' wenná bea caní ba gulatię'. Tu benne' ca' dxenná be'ę na'a, na' xetuę' quebe ne xidę'. Gate la' benne' zbębe nigá, quębedxa súatequę' scha'. ¹¹ Bę xixre' schanni' na', bę zúaba' nédxute, na' na'a quębedxa zúaba', zėjaje na benne' xrunu' naquę' benne' wenná bea. Naquę' tu benne' ládujla benne' gazre ca', na' te na' gatię' tu chí'izqueze.

¹² Chi lúzu bę xixre' snia na' da blé'enu' zaj naca na chi benne' wenná bea ca', benne' quebe ne xelezú lawę' xelenná be'ę, na' xelezí'ę xel-la' dxenná bea xelaquę' wenná bea tu chí'idau'ze tu zren nen bę xixre' schanni' na'. ¹³ Benne' chi wenná bea caní zaj nune' tuze dizra', na' xulunęzruje' xel-la' szren cheę', ne xel-la' dxenná bea cheę' lu na' bęnnea' naquę' bę xixre' schanni' na'. ¹⁴ Benne' caní xeledí'lalęne' Bęnnea' naquę' Zríla'dau', na' Benne' nigá guzría xi'ę benne' wenná bea ca', lawe' da naca Le' Benne' Wenná Bea cheę benne' wrálnę bea ca', ne Xrane benne' zaj naquę' xrane bęnneache, na' benne' ca' zrálęne' Le', gunné Dios le', ne guquę'ę le', na' zaj naquę' li lazre'.

¹⁵ Cá'anqueze gubáz cheę xabáa na' guzre' neda':

—Nísadau' ca' blé'enu', naga dxe' nu'ula na' dxúnle'ę da sban, zaj naca na xęzre bęnneache ca', ne benne' dxelennę' dizra' walazre' cha cheę', ne benne' zane cue' xęzr la xu. ¹⁶ Chi lúzuba' na' blé'enu' xichaj bę xixre' schanni' na', da zaj naca na chi benne' wenná bea ca', xeleguđene' nu'ula na' dxúnle'ę da sban, na' xelebėj xíchaję' le', ne xulucá'ane' le' gala xideze. Xelawę' bęla' dxen cheę', ne xuluzexęe' le' lu xi'. ¹⁷ Dios bzue' lu lázrdau benne' wenná bea ca' xelunę' ca da dxaca lazre' Le', gate belunę' tuze dizra', ne bulunęzruje' xel-la' dxenná bea cheę' lu na' bęnnea' naquę' bę xixre' schanni' na', cadxa gaca ca da ba gunná Dios. ¹⁸ Nu'ula na' blé'enu' naquę' Babilonia, xęzre zrentau' na' dxenná be'e na benne' wenná bea ca' zaj zre'ę xęzr la xu.

18

Dxebía xi' xęzre Babilonia

¹ Gudę na' ble'eda' betaj xetú gubáz cheę xabáa, nápalę'ę xel-la' dxenná bea, na' bsení' xel-la' szren cheę' lu xęzr la xu. ² Na' gunné' zizraj:

—Ba guzría xi'. Ba guzría xi' Babilonia, xęzre zrentau' na', ne ba bexaca na lataj naga zaj zra' da xriwę' ca', ne lataj naga zaj zra' xúgute cue' be' xriwę' ca', ne lataj naga zaj zra' bę zua xrila, bę schanni' ca', ne bę sgute ca'. ³ Xúgute

bénneache zaj zře'ę tu tu cue' xęzř la xu zaj naquę' ca benne' dxelezuzre', lawe' da dxelunę' da sban da dxaca xęzre na', na' benne' wenná bea ca' zaj zře'ę xęzř la xu belunę' da sban da dxaca xęzre na', na' benne' ca' dxelúti'e gulaquę' benne' gunni'a ne cheę da zantę da gulezá lazre' benne' ca' zaj zře'ę xęzre na'.

⁴ Nadxa benda' chi'i xetú benne' da za xabáa, dxennę':

—Le dxuaj xęzre na', le'e, nácale chia', cheę quebe gácale benne' ca' tuze lu dul-la da dxelunę', ne cheę quebe tele lu da ba xa' da xelezaca benne' ca'.

⁵ Dul-la cheę benne' ca' ba guxán na, na' zaj naca na ca tu da ba bgula, da ba bzrintę na zran xabáa, na' Dios ba xeajsá lazre' ca naca da zrinnaj da dxelún benne' ca'.

⁶ Dios gunézruje' cheę benne' ca' cáteze da bulunézruje' cheę benne' xula, ne xunézruje' le' chupa cuenla ca da zrinnaj da belunę'. Ba nucueze' da xelezauę' da nácale'ędxa zi' ca da bulusaquę' benne' xula.

⁷ Gudę' benne' ca' lu da ba xa', ne gudę' le' xel-la' zi' cáteze na' belunę'. Buluzúa cuinę' lu xel-la' szren, ne gulezú' lu xel-la' dxelexezaca ba lazre' cheę', lawe' da dxelennę' lu lázřdawe': Dxé'entu' nigá dxenná béantu'. Quebe nácantu' wežebe, ne quebe bi sácantu'. ⁸ Cheę le' na', tuze zra xelezřin da ba xa' ca' da xelezauę', xel-la' gute, ne xel-la' zi', ne xel-la' dxedún, na' xelexę' lu xi', lawe' da napa Xřánadxu Dios dutę xel-la' dxenná bea, na' naquę' Bénnea' guchugue' cheę benne' ca' xelezauę' caní.

⁹ Benne' wenná bea ca' zaj zře'ę xęzř la xu, ne belúnleņę' benne' ca' da sban ne da belexezaca ba lazre', xebebezre xache' gate xelexé'ęne' ca naca zren cheę xęzre na', da dxezxe na. ¹⁰ Welezé' zítu'la lawe' da xelezrebe' xelezauę' ca da dxelezaca benne' ca', na' xelennę':

—Baxache' nácale le'e, benne' zaj zře'ę xęzre zrentau', Babilonia, lawe' da chaditę bla' da ba xa' da dxezácale.

¹¹ Cá'anqueze benne' ca' dxelúti'e, benne' zaj zře'ę xęzř la xu, webebezre', ne webebezre xáchequeze' ca naca da dxaca cheę xęzre na', lawe' da québedxa nu chilá' benne' si'ę da dxeluti'e,

¹² da zaj naca oro, ne plata,
ne xiaj xřtantę ca', ne bga ca',
ne ladxe' zaca ca', ne ladxe' bzawe ne da xrna,
ne xúgute' cue' xaga ca' dxelexlé'ę na zixre,
ne zřita xřtantę, ne xaga xřtantę,
ne xia gache, ne xia, ne xiaj esa',

¹³ ne lacu zixre, ne xixre'dau' dxelálę'ę na zixre,
ne xala, ne da ca' dxelexlé'ę na zixre,
ne xřise uva wala, ne za xel-la' wagu,
ne xřte xezaj, ne zrua' xřila,
ne be' xixre', be' dxelúa xua',
ne zřila' ca', ne bzřina' ca',
ne da ca' dxudé xua,
ne benne' ca' dxelúti'e le' lu na' benne' gunni'a ca'.

¹⁴ Benne' caní xelé'ę benne' zaj zře'ę xęzre na':

—Na'a québedxa gápale da zixre ca' da zácale'ę na da bdánnele'ęle, ne ba bnítele tu chí'izqueze xúgute' xel-la' gunni'a cheęle, ne da xřtantę cheęle.

¹⁵ Benne' ca' belúti'e da ca' xelexé' zítu'la lawe' da dxelezrebe' xelezauę' ca da dxelezaca benne' zaj zře'ę xęzre na', na' xebebezre', ne xebebezre xáchequeze', ¹⁶ na' xelennę':

—Baxache' zaj naca benne' ca' zaj zře'ę xęzre zrentau' na'. Gulaquę' ca tu nu'ula nacue' ladxe' zácale'ę da bzawe, ne da xrna, ne nazi'ę lechitaję da naca

na oro, ne xiaj xrtante, ne bga ca'. 17 Chadite benite xel-la' gunni'a na', ne guxezxe na.

Xúgute benne' xrane da ca' dxeledán lawe' nísadau', ne benne' zaj zre'e lu'ule na, ne benne' dxuluse'e da ca' dxeledán lawe' nísadau', ne benne' dxelune' zrin lu nísadau' beleze' zitu'la, 18 na' gate belele'ene' zren chee xezre na' dxezxe na, na' gulenné' zizraj:

—¿Bízaqueze xetú xezre naca na da zren ca xezre zrentau' nigá?

19 Dute xel-la' dxelexewi'ine lazre' xuluzre'e xu xichaje' ca', ne xebezeze', ne xebezeze xáchequeze', xelenné':

—Baxache' zaj naca benne' ca' zaj zre'e xezre zrentau' na'. Nen xel-la' gunni'a chee benne' ca' gulenni'a xúgute benne' ca' zaj nape' da ca' dxeledán lawe' nísadau'. Chadite guzria xi' xezre zrentau' na'.

20 Ca guca chee xezre na', le be, le'e zrale xabáa, ne le'e, gubáz chee Cristo, ne le'e bchálajle waláz chee Dios, ne xúgutele le'e nácale bi chee Dios, lawe' da gate bzria xi' Dios xezre na', bebéaj lazre' da naca chee le'e.

21 Nadxa tu gubáz chee xabáa, gubáz nápal'e xel-la' dxenná bea guchise' tu xiaj zren da naca na ca xiaj xiche, na' bzale' na lu nísadau', gunné':

—Cá'ante cuá xi' Babilonia, xezre zrentau' na', na' québedxa nu lé'equedxa le na, 22 ne québedxa nu xen la neza chee xezre na' da ca' dxulugul-la bèneache, da can zriadi'i na du, ne bchiuj, ne luzu da dxulucuezre', ne québedxa nu chilá' gun zrin lu xezre na', ne québedxa xen schaga da dxun da dxutu na. 23 Québedxa gusení' netú xi' lu xezre na', ne québedxa xen laní chee wechaga na' ga na, lácala benne' ca' belúti'e lu xezre na' gulenná be'e lawe' xúgute benne' zaj zre'e xezr la xu, ne gulezi' xe'e xúgute cue' xezr la xu nen xel-la' wazrá' chee'.

24 Caní guca lawe' da lu xezre na' gulalaj dxen chee benne' ca' gulenné' waláz chee Dios, ne dxen chee benne' ca' zaj naque' bi chee Dios, ne dxen chee benne' ca' belute bèneache le' du ca naca xezr la xu.

19

1 Gudé na' benda' chi'i benne' zan zaj zre'e xabáa, dxelenné' zizraj:

¡Gaca ba Dios! ¡Xel-la' weselá, ne xel-la' szren, ne xel-la' dxenná bea zaj naca na chee Dios cheedxu.

2 Ca dxuchi'a Le', xrlátaje, ne li lazre' naca na!

¡Ba bzria xi'e xezre na' dxulé'e na nu'ula na' núnle'e da sban, nu'ula na' bxrinnaje' bèneache zaj zre'e dute xezr la xu lu da sban da bene'!

¡Dios ba bebéaj lazre' nu'ula na' lawe' da betie' wen zrin ca' chee Dios!

3 Nadxa gulenné' da xula:

—¡Gaca ba Dios lawe' da tu cuénzqueze zren chee xezre na' dxezxe na!

4 Nadxa tape dxua benne' gula ca' ne tapa benne' ban ca' buluzú zribe', na' bulucá'ana szrene' Dios, Bènea' dxe'e lataj blau na', dxelenné':

—¡Ca' naca na! ¡Gaca ba Dios!

5 Nadxa ben tu chi'i benne' lu lataj blau na', dxenné':

¡Le güe lá'ana Dios cheedxu, xúgutele le'e dxunle zrin chee',

ne dxezebele Le', le'e benne' blau, ne benne' quebe nu nácale!

Laní chee wechaga na' chee Bènea' naque' Zrila'dau'

6 Cá'aqueze benda' tu da naca ca chi'i benne' zan, ca dxeleninne zánete xegu, ne ca dxelennéle'e guziu' ca', dxelenné':

¡Gaca ba Dios lawe' da ba guzú lau dxenná bea Xránadxu Dios, Benne' nape' dute xel-la' dxenná bea!

7 ¡Du be! ¡Béle'equezdxu, ne güe lá'anadxu Le'!
 ¡Ba bzrin zra chee laní wechaga na' chee Bénnea' naque' Zríla'dau'!
 Nu'ula na' si'e ba nupá'a cuínabe',

8 nu'ula na' nazi'ibe' lataj nácube' ladxe' zaca, da quebe nadxén na, ne dxácátite na.

Ladxe' zaca na' zéaje na da xrlátaje da zaj nun benne' ca' zaj naque' bi chee Dios.

9 Nadxa guzre gubáz chee xabáa neda':

—Bzuaj caní: Ba neza zren naca na chee benne' ca' gunné Dios xelélé'e laní wechaga na' chee Bénnea' naque' Zríla'dau'.

Nadxa guzre' neda':

—Da caní zaj naca na dizra' li chee Dios.

10 Nadxa bzu zriba' lau gubáz chee xabáa na' chee gucá'ana szrena' le', na' le' guzre' neda':

—Quebe gunu' caní lawe' da nácaqueza' neda' wen zrin chee Dios ca lue', ne ca benne' bichu' ca' zéajle da li na' da ble'e Jesús le'e. Bca'ana szren Dios. Da li na' da ble'e Jesús le'e naca na da dxelenná benne' ca' dxuluchálaje' waláz chee Dios.

Benne' zri'e' bzrina' chiche

11 Nadxa ble'eda' ba naxalaj xabáa, na' ble'e lau tu bzrina' chiche, na' Benne' zri'e'-ba' le' Du Lazre', ne Li Lazre', lawe' da dxenná be'e, ne dxune' wedil-la lu da xrlátaje. 12 Xíaj lawe' dxelácátite na ca xi' ca, na' xíchaje' zaj zría zánete da zaca ca', na' naxúaj tu le' lawe', da nézene' tuze Le'. 13 Nacu'e' tu zre' da nazaj na dxen, na' La Le' naca na Xrtizra Dios. 14 Xúgute' benne' ca' zaj zre'e' xabáa zjácálene' Le', zaj nacue' ladxe' zaca ca', ladxe' chiche zríladau', ne zaj zri'e' bzrina' chiche ca'. 15 Dxu'a Bénnea' zua tu da naca na ca tu xia nalále'e da quíne' benne' xezre ca', na' nna be'ene' benne' ca' nen tu bar xia. Le' guzría xi'e' benne' ca' ca tu benne' dxesie' uva ca', ne dxuléaje' na, da zéaje na da ba xa' da nucueza Dios lu xel-la' dxezrá'a chee', ca da xelezaca bénneache ca'. 16 Naxúaj le'e' zre', ne zríchuje' da nazí Le' caní: Benne' Dxenná Be'ene' Benne' Wenná Bea Ca', ne Xrane Benne' Ca' Zaj Naque' Xrane Bénneache.

17 Nadxa ble'eda' tu gubáz chee xabáa ze' lu gubizra, na' gunné' zizraj xúgute' be' zua xrila, be' dxeledá zran xabáa, dxenné':

—Le da. Le zraga gágule da dxúnale'e Dios le'e, 18 chee gágule be'la dxen chee benne' wenná bea ca', ne chee benne' dxelenná be'e lu wedil-la, ne chee benne' wal-la ca', ne chee bzrina' ca', ne chee benne' zaj zri'e'-ba', ne chee xúgute' bénneache, benne' ca' zaj nadá'ue', ne benne' ca' quebe zaj nadá'ue', benne' blau ca' ne benne' quebe nu zaj naque'.

19 Nadxa ble'eda' be' xixre' schanni', ne ca naca benne' wenná bea zaj zre'e' xezr la xu nen benne' dxjaca wedil-la chee' ca', ba nazrague' chee xeledíl-lalene' Bénnea' zri'e' bzrina' chiche na', ne nen benne' ca' zaj de'e Le'. 20 Gulé-le' be' xixre' schanni' na' tu zren nen bennea' gunné' waláz cheeba', bennea' bénle'e' xel-la' waca zren lauba'. Ne chee xel-la' waca caní da bene', benne' nígá guzri' xé'e benne' ca' belú'e' lataj guzriche luzrgue' laba', ne bulucá'ana szrené' bedau' cheeba'. Nadxa beleché'e' be' xixre' schanni' na', ne bennea' gunné' waláz cheeba', na' belegu'e' le' zaj nabante' lu xi' chee da dxuzéxele'e' na da dxe' ca tu nísadau'. 21 Nadxa Bénnea' zri'e' bzrina' chiche betje' benne' ca' xezícala nen xia nalá na' zua dxu'e, na' xúgute' bea ca' zaj zua xrila gulélajba' be'la dxen chee benne' ca'.

20

Chi gaxúa iza

¹ Gude' na' ble'eda' betaj tu gubáz chee xabáa, nuxre' zren xia chee lataj chul-la, ne nuxre' tu du xia zren. ² Gubáz nigá gudel-le' be snia schanni', nácaba' bela' zua nédxute, ne nácaba' da xriwe', ne Satanás, na' bcheaje'-ba' du xia lawe' chi gaxúa iza. ³ Na' gudxú'üne'-ba' lataj chul-la na' naga bséxujé'-ba', na' bde'e le'e dxa xu'u na' tu da gunna bea na, chee québedxa si xe na bénneache chee xezr la xu ca' cadxa te chi gaxúa iza. Te chee chi gaxúa iza, dxal-la' xelá' na tu chí'idau'.

⁴ Nadxa ble'eda' lataj blau ca', naga zaj dxe' benne' ca' ba zaj nazi'e xel-la' dxenná bea chee xuluchi'e ca da zaj nun bénneache. Cá'anqueze ble'eda' bénne'du ca' gulexú'u bénneache ca' gulechugu bénneache xíchaje' lawe' da belexechebe' chee Jesús, ne buluchálaje' xrtizra Dios. Benne' caní quebe bulucá'ana szrené' be xixre' schanni' na', ne bedau' cheeba', ne quebe belú'e lataj zriche laba' luzrgue', u ne'e. ⁵ Benne' gate ca' xezícala quebe xelexebane' ca tedxa chee chi gaxúa iza ca'. Da nigá guca naca na xel-la' dxexebán nedxu. ⁶ Ba neza zrente naca na chee benne' ca' zaj naque' bi chee Dios, benne' ca' xelexebane' nedxu. Da zi' da xa' da zeajlí canna quebe seque' bi gunne na benne' ca'. Xelaque' bxruze chee Dios, ne chee Cristo, na' xelenná be'e tu zren nen Le' chi gaxúa iza.

⁷ Ca te chee chi gaxúa iza ca', na' la' Satanás naga nadxéaj na, ⁸ na' xedxúaj na chee cheajxri xe na bénneache zaj zre'e xúgute cue' xezr la xu ca'. Si xe na bénneache xezre Gog, ne xezre Magog, na' guchaga na benne' dxjaque' wedil-la chee xúgute cue' xezr la xu lu wedil-la, na' benne' dxjaque' wedil-la zaj naque' benne' zan ca naxán xuzre' da dxe' dxu'a tu xegu zren. ⁹ Ca' guca, beledxúaje' du ca naca lu xezr la xu, na' guléchaje' naga zaj zra' benne' zaj naque' chee Dios, ne xezre na' da nazrí'i Dios. Nadxa Dios gusel-le' xi' da za' xabáa, na' bzezxe xi' na' ca naca benne' ca'. ¹⁰ Nadxa gulel-le' da xriwe', da guzi' xe na bénneache ca', na' guledxú'üne' na lu xi' chee da dxuzézrele'e na da dxe' ca tu nísadau', naga zaj zra' be xixre' schanni', ne bénnea' gunné' waláz cheeba'. Lu xi' na' xeledé'e lu da ba xa' te zra, ne chizrela chadía chacanna.

Dios dxe'e lataj blau chiche, dxuchi'e chee benne' ca' dxelune' da zrinnaj

¹¹ Nadxa ble'eda' tu lataj blau chiche, ne Bénnea' dxe'e lataj na'. Lau Le' belexenite xezr la xu, ne xabáa, na' québedxa nu benne' lé'ene' da ca'. ¹² Nadxa ble'eda' benne' gate ca', benne' blau, ne benne' quebe nu zaj naque', zaj ze' lau Dios, na' belexalaj xiche ca', ne cá'anqueze xetú xiche naga zaj naxúaj la benne' ca' zaj nape' xel-la' nabán. Dios bchi'e chee benne' ca' cáteze da belún tu tue', da ca' zaj naxúaj na lu xiche ca'. ¹³ Belexedxúaj benne' gate ca' zaj nagache' lu nísadau', ne belexedxúaj benne' gate ca' zaj nagache' lataj chul-la chee benne' gate, na' Dios bchi'e chee xúgute' cáteze da belún tu tue'. ¹⁴ Nadxa guledxú'üne' benne' gate ca' gulezú'e' lataj chul-la naga zra' benne' gate lu xi' chee da dxuzézrele'e na da dxe' ca tu nísadau'. Xi' nigá naca na da zi' da xa' da zeajlí canna, ¹⁵ na' lu xi' nigá guledxú'üne' xúgute' benne' ca' quebe zaj naxúaj le' lu xiche chee xel-la' nabán.

21

Tu xabáa cube ne tu xezr la xu cube

¹ Ca gudé na' ble'eda' tu xabáa cube, ne tu xęzr la xu cube, lawe' da belexenite xabáa nedxu, ne xęzr la xu nedxu, na' québedxa de nísadau'.
² Neda', Juan, ble'eda' xęzre lá'azxa, da naca na Jerusalén cube, dxetaj na xabáa, za na naga zua Dios. Xęzre na' nabeza na ca tu nu'ula wechaga na' nupá'a cuínabe' chee gácabe' tuze nen benne' cheębe'.
³ Benda' chi'i tu benne' da za' xabáa, dxenné':

—Gunná'xque, Dios zue' ládujla bėnneache, na' xelaque' xęzre chee', na' Dios súaqueze' nen benne' ca', ne gaque' Dios chee'.
⁴ Dios tu súałezqueze' benne' ca' chee' québedxa xelebezre', na' québedxa gata' xel-la' gute, ne xel-la' gubezre, ne xel-la' dxebezre xache', ne xel-la' dxudía, lawe' da ba gudé chee' xúgute' da gulaca nédxute'.

⁵ Nadxa Dios, Bėnnea' dxe'e' lataj blau na' gunné':

—Gunná'xque, neda' dxuna' cube xúgute' da ca'.

Cá'anqueze gunné':

—Bzuaj dizra' caní lawe' da naca li lazre', na' waca guxrén lázrele le' na.

⁶ Gudé na' guzre' neda':

—Ba bėna' xúgute' da ba gunnía' guna'. Neda' naca' Benne' zúaqueze' nédxudaute, ne Benne' zúaqueze' bzėbedxa. Naca' Bėnnea' dxuna' su lau sua xúgute, ne dxuna' xexuzre na. Nu benne' dxeбіłeņe', neda' gunėzruja' nisa beaj xí'aje' da gunezruj na le' xel-la' nabán, ne quebe bi quízruje'.
⁷ Nu benne' zrue'ene' si'e' xúgute' da caní, neda' gaca' Dios chee', na' le' gaque' zrí'ina'.
⁸ Benne' ca' zaj naque' zra' chebe, ne benne' ca' quebe dxelėajle'e' chia', ne benne' ca' dxelune' da zrinnaj, ne benne' ca' dxelutię' benne', ne benne' dxelune' da sban, ne benne' wazrá' ca', ne benne' dxulucá'ana szrene' bedau' xiaj xaga ca', ne xúgute' benne' dxelún lazre', gudėa' le' lu xi' chee' da dxuzėzrele'e' na da dxe' ca' nísadau', da naca na da zi' da xa' da zeajlı canna.

Jerusalén cube

⁹ Nadxa bla' tu gubáz chee' gazre gubáz chee' xabáa ca' belúxru'e' gazre xé'ena bzri ca' naga zaj xu'u da gazre da ba xa' bzebe ca', na' guzre' neda':

—Gudá. Gulé'eda' lue' nu'ula wechaga na', zru'ula Bėnnea' naque' Zríla'dau'.

¹⁰ Lu da ble'e' Be' Lá'azxa neda', gubáz chee' xabáa na' guchė'e' neda' tu xi'a zren, ne sibe, na' blė'e'ne' neda' ca naca xęzre lá'azxa zren na', Jerusalén cube. Dxetaj na xabáa naga zua Dios.
¹¹ Xęzre nigá dxácatite na nen da xabáa chee' Dios, na' xel-la' dxácatite chee' na naca na ca dxácatite tu xiaj xrtante, ca tu xiaj jasje, da naca na ca xiaj esa' xrtante.
¹² Dxu'a xęzre na' naxechaj na tu ze'e' sibe, na' napa na chazrinnu dxa xu'u, na' tu tu dxa xu'u ca' zaj ze' tu weaj gubáz chee' xabáa, na' le'e' dxa xu'u ca' zaj naxúaj la chazrinnu cue' benne' Israel.
¹³ Zaj zua chunna dxa xu'u weaj dapa sácatę.
¹⁴ Lu lane ze'e' da naxechaj na xęzre na' zaj zra' chazrinnu xiaj, na' zaj naxúaj lu xiaj ca' la chazrinnu benne' gubáz chee' Bėnnea' naque' Zríla'dau'.

¹⁵ Gubáz chee' xabáa na' dxuchálajleņe' neda' nuxre' tu da naca na ca tu xia xtila da naca na oro chee' gudxixre' xęzre na', ne dxa xu'u chee' na ca', ne ze'e' da naxechaj na.
¹⁶ Xęzre na' naca na lėbetę dapa saca. Lėbetę naca na xel-la' tunna, ne xel-la' laga chee' na. Gubáz na' bdxixre' xęzre na' nen da nuxre', na' naca na laga catite sadxu tapa gaxúa zra, na' xel-la' laga, ne xel-la' tunna, ne xel-la' sibe chee' na zaj naca na lėbetę.
¹⁷ Gudé na' bdxixre' xel-la' sibe chee' ze'e' na' naxechaj na. Naca na tu gaxúa tape xun zrita, na' chazrita chee' gubáz chee' xabáa na' naca na lėbetę ca chee' bėnneache.

¹⁸ Ze'e na' da naxechaj na xezre na' naca na xiaj jaspe, na' xezre na' naca na oro du lazre', da naca na ca xiaj esa' du lazre'. ¹⁹ Xiaj lane ze'e na' zaj naca na xiaj xrtante' ca':

Xiaj nedxu naca na xiaj jaspe,
na' xiaj gudxupe' naca na xiaj zafiro,
na' xiaj guxunne' naca na xiaj ágata,
na' xiaj gudape' naca na xiaj esmeralda,

²⁰ na' xiaj gáxzue naca na xiaj ónice,
na' xiaj xrupe naca na xiaj cornalina,
na' xiaj gazre naca na xiaj crisólito,
na' xiaj xrunu' naca na xiaj berilo,
na' xiaj ga naca na xiaj topacio,
na' xiaj chi naca na xiaj crisoprasa,
na' xiaj chinéaj naca na xiaj jacinto,
na' xiaj chazrinnu naca na xiaj amatista.

²¹ Chazrinnu da dxusezxuj na dxa xu'u ca' zaj naca na chazrinnu bga ca'. Tu tu na naca na tuze bga. Neza blau chee xezre na' naca na oro du lazre', ca xiaj esa' du lazre'.

²² Quebe ble'eda' netú xudau' xezre na', lawe' da Xránadxu Dios, Bénnea' nape' dute' xel-la' dxenná bea, nácaqueze' xudau' chee xezre na', ne cá'anqueze naca Bénnea' naque' Zríla'dau'. ²³ Xezre na' quebe nachine na guseni' gubizra na', ne beu', lawe' da dxuseni' queze da xabáa chee Dios ga na', na' Bénnea' naque' Zríla'dau' naque' xel-la' naxaní' chee na. ²⁴ Bénneache chee xúgute' cue' xezr la xu, bénneache gulelé', xeledé' lu xel-la' naxaní' chee xezre na', na' benne' wenna' bea ca' chee xezr la xu xelu'e da gunni'a chee' lu xezre na'. ²⁵ Dxa xu'u chee xezre na' quebe xelexzuj na te zra, na' québedxa gata' chizrela. ²⁶ Xelu'e xel-la' szren, ne xel-la' ba lá'ana chee xúgute' cue' xezr la xu lu xezre na'. ²⁷ Cabata' chu'u da sban ga na', ne netú benne' dxune' da zrinnaj, ne netú benne' dxun lazre'. Xelú'uze benne' ca' zaj naxúaj le' lu xiche chee xel-la' nabán da napa Bénnea' naque' Zríla'dau'.

22

¹ Nadxa gubáz chee xabáa na' blé'ene' neda' tu xegu nisa da dxunna na xel-la' nabán. Naca na xaní' ca xiaj esa', na' dxedxuaj na lataj blau naga zaj dxe' Dios, ne Bénnea' naque' Zríla'dau'. ² Laduj neza blau chee xezre na' zaj naxaza xaga dxupa la'a dxu'a xegu na', na' da zixre chee xaga caní zaj naca na da dxunna na xel-la' nabán, ne dxebía na da zixre chazrinnu lasa tu tu iza. Dxebía na da zixre chee na tu tu beu', na' xrlague xaga na' naca na da dxexún na benne' zaj zre'e du gabi'i xezr la xu. ³ Québedxa bi gata' da xu'u de'. Lataj blau naga zaj dxe' Dios, ne Bénnea' naque' Zríla'dau' sua na lu xezre na', na' benne' wen zrin chee' ca' xulucá'ana szrene' Le'. ⁴ Xeledé'ene' Le' caníqueze, na' La Dios zriche na luzrgá benne' ca'. ⁵ Québedxa gata' chizrela ga na', na' benne' zaj zre'e na' quebe xelechinne' xi', ne xel-la' naxaní' chee gubizra, lawe' da Xránadxu Dios guseni'e benne' ca', na' benne' ca' xelenná be'e chadía chacanna.

Ba zua gagu zra xelá' Cristo

⁶ Nadxa gubáz chee xabáa na' guzre' neda':

—Dizra' caní zaj naca na li lazre', ne waca guxrén lázrele le' na. Xránadxu Dios, Bénnea' dxuzúe' Be' chee' xichaj lázrdau benne' ca' dxelenné' waláz chee' ba gusel-le' gubáz chee xabáa chee' chee gulé'ene' benne' wen zrin chee' da

ba zua gaca, ⁷ dxenné': "La zátequeza'. Ba neza zrentę naca na cheę benne' zéajłęne' dizra' cheę Dios da naxúaj na lu xiche nigá."

⁸ Neda', Juan, benda', ne ble'eda' da caní. Ca gudé'benda' na, na' bzu zriba' zran ni'a gubáz cheę xabáa na', gubáz blé'ene' neda' da caní cheę gucá'ana szrena' le'. ⁹ Na' le' guzre' neda':

—Quebe gunu' ca' lawe' da naca' wen zrin cheę Dios ca nacu' lue', ne ca zaj naca benne' bichu' ca' dxelenné' waláz cheę Dios, ne ca zaj naca xúgute benne' ca' zjácálene' ca da naxúaj na lu xiche nigá. Bca'ana szren Dios.

¹⁰ Cá'anqueze guzre' neda':

—Quebe guchu' ca naca dizra' cheę Dios da naxúaj na lu xiche nigá lawe' da ba zua gaca da naxúaj na. ¹¹ Dxácate na', be' lataj benne' dxelunę' da zrinnaj xelúnqueze' da zrinnaj dxelunę', ne benne' ca' dxelunę' da sban xelúnqueze' da sban na', san benne' xrlátaje ca' xelúnqueze' da xrlátaje, na' benne' zaj naque' bi cheę Dios chjácálequeze' da naca na cheę'.

¹² Dxenné':

—Ca' naca. La zátequeza', ne nu'a ca naca da gunézruja' tu tu benne' ca', cáteze da zaj nun tu tue'. ¹³ Neda' naca' benne' zúaqueza' nédxudaute, ne benne' zúaqueza' bzébedxa, bėnnea' dxuna' su lau sua xúgute, ne dxuna' xexuzre na. ¹⁴ Ba neza zrentę naca na cheę benne' ca' dxulupé'e xichaj lázrdawe' ca tu benne' dxibe' zra lanę', cheę xelape' lataj xelawe' da zixre cheę xaga da dxunna na xel-la' nabán, na' caní xelezéquene' xelu'e lu dxa xu'u cheę xęzre na'. ¹⁵ Benne' ca' dxelunę' da zrinnaj quebe xelu'e ga na', ne québequeze xelu'u benne' wazrá' ca', ne benne' dxelunę' da sban ca', ne benne' węte benne', ne benne' dxulucá'ana szrene' bedau' xiaj xaga ca', ne benne' zaj nazri'ine' da węn lazre', ne benne' dxelún lazre'. ¹⁶ Neda', Jesús, ba gusel-la' gubáz cheę xabáa chia' cheę xuluzenne' tu tu cue' bėnneache chia' ca naca da nigá. Neda' naca' ca xra xrtau David, benne' wenná bea, ne naca' zri'ine zre sua David na'. Neda' naca' ca belaj zila da dxácátitele'e na.

¹⁷ Be' Lá'azxa, ne benne' ca' zaj naca ca zru'ula Bėnnea' naque' Zrila'dau', dxelenné':

—Gudá, Xran.

Nu benne' xenne' da nigá dxal-la' nne':

—Gudá, Xran.

Benne' dxeбіłene', ne dxaca lazre' dxal-la' xide', na' xí'aje' nisa da dxunna na xel-la' nabán, na' quebe bi quízruje'.

¹⁸ Xúgutele le'e dxulábale dizra' cheę Dios da naxúaj na lu xiche nigá, neda' dxuzéajni'ida' le'e da nigá: Che nu benne' bi gudé'e cheę da caní, Dios gudé'e cheę bėnnea' da ba xa' ca' da zaj naxúaj na lu xiche nigá. ¹⁹ Cá'anqueze che nu benne' bi xequę'e cheę da zaj naxúaj na lu xiche nigá, Dios wecá'aqueze' da naca cheę bėnnea' lu xiche cheę xel-la' nabán, ne lu xęzre lá'azxa cheę, cáteze naxúaj na lu xiche nigá.

²⁰ Xránadxu, Bėnnea' dxulé'ene' da nigá, dxenné':

—Ca' naca na. La zátequeza'.

¡Ca' gaca na! ¡Gudá, Xrana' Jesús!

²¹ Dxenaba' Xránadxu Jesucristo gune' da chawe' cheęle le'e, xúgutele. ¡Ca'an gaca na!